

**Iroaquerari Itioncacaantaqueca**

**Aapani Irioshi**

**Tsavetacoquerica**

**Amajirote Jesoquirishito**

El Nuevo Testamento  
de nuestro Señor Jesucristo  
en el idioma  
caquinte



El Nuevo Testamento  
de nuestro Señor Jesucristo  
en el idioma caquinte  
del Perú

Primera edición, 2005  
Segunda edición, 2008

Publicado por  
© La Liga Bíblica 2008

[www.ScriptureEarth.org](http://www.ScriptureEarth.org)

Creative Commons

Atribución - No Comercial l- No Derivadas 3.0



Eres libre de:

copiar, distribuir y comunicar públicamente la obra

Bajo las condiciones siguientes

- Atribución — Debes reconocer la autoría de la obra en los términos especificados por el propio autor o licenciatte.
- No comercial — No puedes utilizar esta obra para fines comerciales.

• No Derivadas — No está permitido que alteres, transformes o generes una obra derivada a partir de esta obra.

Con la comprensión eso:

• Renuncia — Un de los sobre condiciones puede ser renunciado si consigue el permiso del sostenedor de las derechos.

• Otras derechos — Están de ninguna manera los siguientes derechos afectadas por la licencia:

- Las derechos del uso justo;
- Las derechos morales del autor;
- Las derechos que otras personas pueden tener en el trabajo mismo o en cómo se utiliza el trabajo, por ejemplo las derechos de publicidad o las derechos privados.

• Aviso — Para obras reutilizadas o redistribuidos, tiene que avisar claramente estos términos de la licencia.

<http://creativecommons.org/licenses/by-nc-nd/3.0>

## INDICE

|   |            |     |
|---|------------|-----|
| Mateo.....                                | Mt.....    | 5   |
| Maricoshi.....                            | Mr.....    | 92  |
| Irocashi.....                             | Irc.....   | 145 |
| Joanca.....                               | Jn.....    | 240 |
| Yantajiguica Itigarancanejia Jesoshi..... | Ya.....    | 297 |
| Iromaquitica.....                         | Irm.....   | 370 |
| 1 Corintoquitica.....                     | 1 Co.....  | 412 |
| 2 Corintoquitica.....                     | 2 Co.....  | 450 |
| Garashiaquitica.....                      | Ga.....    | 475 |
| Epesoquitica.....                         | Ep.....    | 488 |
| Piripoquitica.....                        | Pp.....    | 502 |
| Corosaquitica.....                        | Cor.....   | 512 |
| 1 Tesaronicaquitica.....                  | 1 Ts.....  | 521 |
| 2 Tesaronicaquitica.....                  | 2 Ts.....  | 529 |
| %Timoteo.....                             | 1 Ti.....  | 534 |
| 2 Timoteo.....                            | 2 Ti.....  | 545 |
| Tito.....                                 | Tit.....   | 553 |
| Piremoni.....                             | Prm.....   | 558 |
| Evereojia.....                            | Ev.....    | 561 |
| Santiago.....                             | Stg.....   | 591 |
| 1 Peerero.....                            | 1 Pe.....  | 601 |
| 2 Peerero.....                            | 2 Pe.....  | 612 |
| 1 Joanca.....                             | 1 Jn.....  | 619 |
| &>oanca.....                              | 2 Jn.....  | 627 |
| 3 Joanca.....                             | 3 Jn.....  | 629 |
| Jorashi.....                              | Jor.....   | 631 |
| Yonigaajiguequerica Joanca.....           | Yonig..... | 635 |
| Vocabulario.....                          |            | 678 |
| Glosario.....                             |            | 680 |



# QUENQUETSATSARENTSI OGANEJENCATATSICA ITIONCAQUECA

## MATEO

**Antsatantaquemparoca**

Ocatica iroguenti antsatantaquemparoca itioncaqueca Mateo itioncacotaquerigueti Jesoquirishito. Mateo iriguenti jorio quintenitanquitsica quepatsiqui icantajitica Garirea. Iriguenti itigarancane Jesoshi. Mateo ipajita aisa Irevi. Tequeratagueti incajemeriji Jesoshi iroguijatanaqueri, iriguenti amanaguequerica igonorojia imentaquitsitepae cameetsaniji incapiocauqueneri majirontatsica Iromaquitica omperajiacarica jorioja. Irirajia tsatatsica iquenquejajiaque itioncaquero Mateo ocatica tsavetacoquerica Jesoquirishito ichoocatigueti quepatsiqui iguintenijiacagueti ichoviquijiani Ishiraeri. Tecatsi tsamajaterone ajagantsini itioncaquerogueti, cotanquitsi chooca quenquejanquitsica arica itioncaquero ajagantsiniqui 70. (Oratica ajagantsi ivoaquegueti Jesoshi iro icantajitica ajagantsini 1.)

Mateo yonigaantaqueri Jesoshi iriotaque majirontatsica. Itioncajiaqueneri irapijorijatiensi intsajiaqueniji iriraquea Jesoshi irio itigarancaqueca Aapani Irioshi, irira icantajitica Meshiashi, iriotaque itsavetacotsitacaca tsavetantajiatatsica coramani itioncaquerogueti paperiqui icantajitica *Iroquetinica Itioncaantaqueca Aapani Irioshi (el Antiguo Testamento)*. Oraquea ocanqueca otsapaqui 1.1 onetsanataquero icanquerica Aapani Irioshi irira Taavini aisa Averaameni choviquijianaquerica Jesoshi (Jen. 15.18; 2 Sam. 7.8-16). Mateo yonigaacajiri aisa Jesoshi irio tsatacaantantatsica.

Chooca 5 itsatacaacajica Mateo itsavetacotaquerigueti Jesoshi:

(1) imajirontagueti Aapani Irioshi (capitoroqui 5-7); (2) icamantajiaquerica Jesoshi itigarancanejia taa opajita intsavetantajiaque intigarancajiaquerigueti (cap. 10); (3) iquejetacaacaca Jesoshi itsatacaanquegueti (cap. 13); (4) itsavetacotaquero quero incojiaquempani quemisantajiaquerica Jesoshi (cap. 18); (5) itsavetacotaquero quero oncoguetanaquempani onteroncanajempagueti quepatsi aisa quero ococani oparianacagueti imajirontacagueti Aapani Irioshi (cap. 13-25).

---

**Choviquijianaquerica Jesoquirishito**  
(Irc. 3.23-38)

**1** <sup>1</sup>Imaicaquea nontioncacoguequiero-  
queate ipajiguetagueti paesatinipae-

quitica choviquijianaquerica Jesoquirishito, ichoviquini Taavini aisa ichoviquini Averaameni.

<sup>2</sup> Iriraquea Averaameni irijanincari Ishaaco.

- Irira Ishaaconi irijanincari Jacovo.  
 Irira Jacovoni irijanincari Joraa  
     aisa iriguentijeguijate.
- <sup>3</sup> Irira Joraani yoacaaquero  
     Tamare, irijanintacari Parese  
     aisa Tsara.
- Irira Pareseni irijanincari  
     Eserome.
- Irira Eseromeni irijanincari  
     Arame.
- <sup>4</sup> Irira Arameni irijanincari  
     Aminaravo.
- Irira Aminaravoni irijanincari  
     Naasone.
- Irira Naasoneni irijanincari  
     Saramoni.
- <sup>5</sup> Irira Saramonini irijanincari Voose.  
     Oratica iriniro opajita Iraava.
- Irira Vooseni irijanincari Overi.  
     Oratica iriniro opajita Iroti.
- Irira Overini irijanincari Isai.
- <sup>6</sup> Irira Isaini irijanincari majirontatsica Taavi.
- Irira majirontatsica Taavini  
     irijanincari Saromoni. Oratica  
     iriniro Saromonini iroguenti  
     imanquigavetanica Oriashi.
- <sup>7</sup> Irira Saromonini irijanincari  
     Irovoame.
- Irira Irovoameni irijanincari  
     Avashi.
- Irira Aviashini irijanincari Asa.
- <sup>8</sup> Irira Asani irijanincari Josapate.  
     Irira Josapateni irijanincari  
     Jorame.
- Irira Jorameni ichoviquivaetana-  
     queri Oshiashi.<sup>a</sup>
- <sup>9</sup> Irira Oshiashini irijanincari  
     Jotame.
- Irira Jotameni irijanincari Acashi.
- Irira Acashini irijanincari Esequia.
- <sup>10</sup> Irira Esequiani irijanincari  
     Manaseshi.
- Irira Manaseshini irijanincari  
     Amoni.
- Irira Amonini irijanincari  
     Joshiashi.
- <sup>11</sup> Irira Joshiashini ichoviquivaeta-  
     naqueri Jeconiashi<sup>b</sup> aisa  
     iriguentijeguijate coramaniqui  
     icoraquecoraqueitashiqueru-  
     gueti coaretajia Vavironiaqui-  
     tica yashintajiacarigueti  
     maasano ishiraerija yaajitana-  
     queri Vavironiaqui oshequi.<sup>c</sup>
- <sup>12</sup> Iroomba iriraquea Jeconiashini  
     irijanincari Saratieri.
- Irira Saratieriini ichoviquivaetana-  
     queri Sorovaveri.<sup>d</sup>
- <sup>13</sup> Irira Sorovaverini irijanincari  
     Aviote.
- Irira Avioteni irijanincari  
     Eriaquime.
- Irira Eriaquimeni irijanincari  
     Asoro.
- <sup>14</sup> Irira Asoroni irijanincari Saroco.
- Irira Saroconi irijanincari  
     Aquiimo.
- Irira Aquimoni irijanincari Eriote.
- <sup>15</sup> Irira Erioteni irijanincari Eriasare.

**a 1.8** Irira joriojia incankegueti “iririni” iragavejaque incantacoqueri ivaesatinite. Acaniqui Mateo tee intsavetacoteriji maasano ivaesatinite Jesoshi, mana itioncacogarantaqueri. Pamenero 2 Coronica 21.4–26.23 itsavetacojitaquerigueti irijanite *Jorameni* pajitatsica Ocoshiashi (22.1), irijanite Ocoshiashi pajitatsica Joashi (22.11; 24.1), irijanite Joashi pajitatsica Amashiashi (24.27). Irira Amashiashini irlotaque iriri *Oshiashi* (26.1).

**b 1.11** *Ichoviquivaetanaqueri Jeconiashi*. Pamenero 2 Coronica 36.1-9 itioncacojitaquerigueti irijanijiate Joshiashi. Irira Joshiashi irijanincari Joacashi aisa Eriaquime. Iriratica Eriaquime ipajijitajiri Joashime. Irira Joashime irijanincari Joaquinis icantajitica aisa Jeconiashi.

**c 1.11** *Yaajitanaqueri Vavironiaqui oshequi*, cotanquitsiquea aparopae choocaguetajatsi.

**d 1.12** Irira *Saratieriini* irijanincari Peraashi iriri *Sorovaveri* (pamenero 1 Coronica 3.17-19).

Irira Eriasaren irijanincari  
Matani.

Irira Matanini irijanincari Jacovo.  
16 Irira Jacovoni irijanincari Jose  
manquigataroca Maria.  
Iroatimpa iroguenti iriniro  
Jesoshi icantajiqueca aisa  
Quirishito.<sup>e</sup>

<sup>17</sup>Maasano tioncacojianquitsica  
ipajiguetagueti ocaniqui icaravaeque 14  
ipariapanajanta ichoocaquegueti  
Averaameni yarejevaecaroquea ichooca-  
quegueti Taavini. Arikea iquempejiaca  
aisa icarajiaque 14 maasano tioncacoji-  
anquitsica ipajiguetagueti ipariapan-  
jantaroquea ichoocaquegueti Taavini  
icaravaeque yaajitanaquerigueti  
Vavironiaqui. Iroompaquea ari  
iquempejiaca aisa icarajiaque 14  
maasano tioncacojianquitsica ipajigue-  
tagueti ipariapanajantaroquea  
yaajitanaquerigueti Vavironiaqui  
icaravaeque ichoocaquegueti Quirishito.

#### Ivoaquegueti Jesoquirishito (Irc. 2.1-7)

<sup>18</sup>Imaicaquea nontsavetacotantaqueri-  
queate Jesoquirishito queroca oco-tacani  
iroqueragueti ivoaquegueti. Coramani-  
quea ochoocaque manquigarentsi  
pajitatsica Maria. Iriquentiquea  
cashiacaro shirampari pajitatsica Jose.  
Iroompaquea tequeratatirajatari quisho  
irogueroji ichoocatashica irijanite,  
iriquentiquea choocatacaaqueri Ishire  
Aapani Irioshi. <sup>19</sup>Iriraquea Jose  
inintaveca irovashiantjerome, irigu-  
entiquea comajamajatanquitsica, cotanqui-

tsiquea ipintsatacocaroea jero teeca  
irinintantempaji inquenquetsatacoque-  
roquea iroguipashiventajaquero,  
manaqueate iquenquejavetanacaquea  
irovashiantashitajemparo intati,  
aatoqueate icanti taa opajita irovashian-  
tantanajemparoca. <sup>20</sup>Cotanquitsiquea  
irooqua iquenquejavetanacaquea  
imaica, yonigaapojacariquea irashivan-  
tite Amajirote iguimaanequi, icanqueri:  
“Jose, ichoviquitanaqueca Taavini, aato  
pitsaroacagaro pimanquigatemparo  
Maria. Aritarite iriraquea irijanite  
choocatanchitsica intsompogui irigu-  
entiquea choocatacaaqueriquea Ishire  
Aapani Irioshi, irootaquequeate  
ichoocatantacaca. <sup>21</sup>Oncoajicatapoja-  
quegueti irivoaquegueti pimpaitsitem-  
pari Jesoshi,<sup>f</sup> iriорији irotaquequea  
meshiajiaquerineca igonorojia aatonijite  
icatsimatimentiritsiquea Aapani Irioshi  
icovaeguishecagueti.”

<sup>22</sup>Arikea oquejetaca imaica  
cameetsanijite onetsanamajaquempani-  
jite icanqueca Amajirote paesatoniqui  
icantashirentaquerigueti tsavetantatsi-  
cana, icanque:

<sup>23</sup> “Ora majinaro ontsaraquitashitana-  
quempa,  
ariquea inchoocataquequea  
irijanite.

Iriatimpa impajijiteri Emanoere”  
(ocanquequea: “Iconoajiacaji Aapani  
Irioshi”).

<sup>24</sup>Iroompaquea ipityaquirejanaji Jose  
iquemisanqueriqueate irashivantite  
Amajirote, iroompa arikea yoanaque  
yaquitiroquea Maria itsipatanacaro

**e 1.16 Quirishito.** Iguenquetsatsarequi guiriegojia icanquegueti *Christos* (Quirishito) manaquea  
ocanque “Ishagujitaqueca” aisa “Icoguiaqueca”, irishagujitaqueritari orejiqui orivo irirajia  
icoguiajiaqueca impeaquempa imajirojitate irooca isaserorotejitate. Irira Quirishito  
iriotaquequea itsavetacotsitacaca tsavetantajatisca coramanitica intigarancaque Aapani  
Irioshi impeaquempaniji Imajirojitate maasano. **f 2.21 Jesoshi.** Iroguenti iguenquetsatsare  
guiriego (*Iesous*), ari oquenapajoque iguenquetsatsarequi evereo, icanquequea *Yeshua*,  
ocanque: “Yamitacontaque Yave”, “Yaantavaji Yave”, aisa “Imeshiantaque Yave”.

itsovironaquitequi. <sup>25</sup>Cotanquitsiquea teequea quisho irogueloji arejevaetaca ivoaquegueti irijanite opariacaca.

Arikea ipajiqueru Jesoshi.

### Savicaventajiguirica impoquirojite

**2** <sup>1</sup>Oraquea ivoaquegueti Jesoshi Verenequi Joreaqui chooca imajirojite Joreajiaquitica pajitatsica Erorishi. Iroompaeua icoraquecoraqueitaqueuea Jerosarequi shiramparipae icantajitica maagopae savicaventajiguirica impoquirojite intsatantajiaquempaca taaca opajitapae. Iriatimpajia iquenaquenaiopjaque isotoguiguequi catsirincaiteri. Oraquea yarejerejeipojacagueti <sup>2</sup>icoacojiapoqiriquea choocajatsica ocaniqui icanqueri:

—¿Querocaquea ichoocaueni oraniqui imajirote joriojia voanquitsica? Namenajiaqueriqueate irimpoquirote isotoashitapojacaquea ontaniqui isotoguiguequi catsirincaiteri notsatantajiacaca voaque, nocoraquecoraqueitanta-jiacaca nogueroventajiaquempariquea noshineventajiaquitempariqueate.

<sup>3</sup>Iroompaeate iquemavaquegueti majirontatsica Erorishi, arikea ishoshoguitevaetanacaquea, ariqueate iquempejanaca maasanojia choocajatsica Jerosarequi. <sup>4</sup>Incajaranquiguitetanaquegueti, iriatimpia icajemacaantajiaqueriquea maasano saserorotejia antajianquitsica aisa tsatacaajiguirica joriojia itioncacotanqueca Moishishini coramani, icoacojaqueriquea queroca oraniqui irivoaque Quirishitotanquitsica.<sup>g</sup> <sup>5</sup>Iriatimpajia icanquequea:

—Iroguenti irivoaque ontaniqui Verenequi Joreaqui, arikea icanque

tsavetantatsica itioncacotaquerogueti coramani icanquerica Aapani Irioshi, icanque:

<sup>6</sup>‘Aviatimpia Verene<sup>h</sup> choocatatsica iguepatsitequi Joraani, aatoquea anajaiguimpi otsipapae quintenintsi iguintenijlagueti oshequi Joreaquitica, irisotoampojempitarite majirontanquitsineca peanquitsineca Imajirote maasanobia ishiraerijia nashintajia- caca.’

<sup>7</sup>Arikeate Erorishi santicoji yoquiero icajemacaantsitari maagopae, teequeate quericaca incamanque. Yarejerejeipojacagueti icoacojiavaqueriquea icantajia-vaqueri:

—¿Querocaquea savincaguiteri pamenantajiacari isotoampojacaca impoquiro?

<sup>8</sup>Iroompaeua iquemavaquegueti icamantaquerigueti itigarancijaqueriquea Verenequi icantajiaavaqueri:

—Iintsijate poajianaque pamenamajaguequierijate, irompa pamenajiaquerigueti pincoraquetajeja pincamantajiajapajenaja cameetsanijite noanaquenijite naatimpia noguerovenquitempariqueate noshinevenquitempari.

<sup>9</sup>Irooquea iquemajiaquerigueti yoayoaitanaquequea Verenequi. Iriraquea impoquiro yamenajiaqueca iroqueragueti ontaniqui iguinteniqui ijivaqueriquea iroompaeua iquishojencatapojiquea otampaticataquegueti tsovironaquiqui ichoocatacotacaca Jesoshi. <sup>10</sup>Oraquea yamenajiajirigueti impoquiro, arikea icohicoitanaca

**g 2.4 Quirishitotanquitsica.** Iguenquetsatsarequi guiriegojia icanquegueti *Christos* (Quirishito) manaquea ocanque “Ishagujitaqueca” aisa “Icoguiaqueca”, irishagujitaqueritaro orejiqui orivo irirajia icoguiajiaqueca impeaqueuempa imajirojite irooca isaserorotejiate. Irira Quirishito irotoquequea itsavetacotsitacaca tsavetantajajatsica coramanitica intigarancaque Aapani Irioshi impeaqueuempaniji Imajirojite maasano. **h 2.6** Iguenquetsatacaaqueo quintenintsi Verene quejetaca iroguenti caquinte.

ishinejiana ca icanca.<sup>11</sup> Iroompaeua yarejerejeipojacarogueti tsovironaqui iquiaquijaitanaquequea intsompogui inejajapojiriquea Jesoshi, otsipatacari Maria, iriniro. Iguerorentajiapojacari- quea ishineventajiapojacari. Iroompaeua itanarejacoguetapojiro yamajia- quenerica yojocajiaqueneri ooro, casancavani, aisa otsipa casancari icantajitica mira.<sup>12</sup> Iroompaeua imaaquiaquegueti icamantajiqueru iguimaanequi aatonijite yoayoaitanajitsiquea Erorishiqui, irootaqueuea iquenapitsatantajianajarica otsipaqui quenavoquirontsi, yoayoaitanaji iguinenti.

**Jose ishiacaanacari Jesoshi ontaniqui Ejepitoqui**

<sup>13</sup> Iroompaeua yoayoaitanajigueti iriatimpajia, iriraquea irashivantite Amajirote yonigaapojacari Jose iguimaanequi, icantiriquea:

—Iintsija imaica pincatianaqueja paanaqueriquea chaajaniquitirajaca aisa iriniro poanaqueshiatsi pishianaqueshi- atsi ontaniqui osamanji Ejepitoniqui. Pinchoocateja ontaniqui aapojajempa- guetiquea noncantantajempica pincora- quetantajempaca, iramenacaantague- queritari majirontatsica Erorishi irimetojacaanquerini.

<sup>14</sup> Ariqueate icatiapanajanta, yaanaqueriquea chaajaniquitirajaca aisa iriniro, yoanincanaquequea pitsecariqui yoayoaitanaque Ejepitoqui.<sup>15</sup> Ichoo- guitiniquea ontaniqui aapojaguetiquea imetojanajigueti Erorishi. Ariquea iquempejiaca imaica cameetsanijite onetsanamajaquempanijite icanqueuea Aapani Irioshi coramaniqui itioncaca- querica tsavetantsica icanque:

“Ichoocavetaca Irijani Ejepitoqui, nocajemajiri.”<sup>i</sup>

**Erorishi imetojacaantajiaqueriquea chaajaniquirijia**

<sup>16</sup> Iroompaeua iriraquea Erorishi yamenaquegueti teequea incoraquejaje maagopae icatsimatsitanacaquea, ariuea itigarancajiaqueri coaretatia irimetojajia- queriquea maasano chaajaniquirijia guinteninijianquitsica Verenequi irioc aisa guinteninijianquitsica irooshiguetanqu- tsica, interoncajiaqueriquea maasano iriaqueraca voaguetanquitsica irarejvae- quempariquea incaravaequeriquea ajagantsitacojiananquitsica mavite. Iroguentiquea ipampiatsitaqueri icantajia- queca maagopae ivoantacaca.<sup>17</sup> Arikea iquempejiaca imaica inetsanajitaquero itioncacotanaqueca coramani tsavetanta- tsica Jeremiashini, icanque:

<sup>18</sup> “Iquemajiquero ontaniqui Iramaqui ocajemavaequequea, ocantacogui- tani iraaguitani, iroguenti ochoviquijiani Iraquereni, iraacoguitiriniquea irijanijiate. Tee oninteki iroguishinejajitajero, teetari inchoocajajeji irijanijiate.”

<sup>19</sup> Ocoramanitapojaquegueti imetoja- najigueti Erorishi, iriraquea irashivantite Amajirote yonigaapojajari Jose iguimaanequi ontaniqui Ejepitoqui,

<sup>20</sup> icanti: “Iintsijate imaica pincatianaje paanaquerija chaajaniquitirajaca aisa iriniro, poanajequea ontaniqui Ishirae- riqui, metojanajitaru nintajavetanqui- tsica irimetojajiaquerimequea.”

<sup>21</sup> Arikea icatianaja, yaanajiri chaaja- niquitirajaca aisa iriniro, yoanaji Ishiraeriqui.<sup>22</sup> Cotanquitsiquea iquema- coqueriquea Arequerao irijanite Erorishini ipejaaquea majirontatsica

<sup>i</sup> 2.15 Icantsitacaroquea Aapani Irioshi coramaniqui tequeratagueti aguempaji, cotanquitsiquea icanquero quejetaca avisanaque. Os. 11.1.

Joreaqui iquempetajari iririni, ariqueate icotanaca itsaroanaquequea teequea irininteqi iroanajequea ontaniqui. Iroompaquea icamantajitiri iguimaa-nequi aatoniji yoanaji ontaniqui, irootaquequea yoantanajaca Garireaqui.<sup>23</sup> Yarejetapoajaroquea ontaniqui ichoocatantapoajaro quinteninintsi icantajitica Nasare. Arikea iquejeta-querogueti imaica onetsanatanaca icantaguetaqueca tsavetantajitsica, icanquequea: “Incantajiteri Nasareequi-tica.”

**Joanca Viñacajatantsica  
itsavetantavaequequea  
oquitamampororoitapojaquegueti**  
(Mr. 1.1-8; Irc. 3.1-9, 15-17; Jn. 1.19-28)

**3** <sup>1</sup>Aapojacagueti savincaguiteri yoanaquequea Joanca Viñacajatantsica itsavetantavaequequea ontaniqui oquitamampororoitapojaquegueti Joreaqui,<sup>2</sup>icanque: “Pincantashitatijaianaquempaja povashiantajianaquerojate pipeacaaguishetaca, irooshipojitarite aapojaquempa quea irimajirontaquempa acaniqui Inquitequitica.”

<sup>3</sup>Iriraquea Joanca irotaque itsavetacotaqueca tsavetantsica Isaiahini coramaní, icanquequea:

“Inquenquetsataquequea oquita-mampororoitapojigueti iririjen-caní, incanquequea:  
‘Pinetsanatashijiavaquempari Amaji-rote inquenantapojempacá, pintanarejagueteneri iguenavoqui-ropae ontampaticapopoquitanta-naquempaca.’”<sup>j</sup>

<sup>4</sup>Iroguenti iquitsaataca Joanca quitsaarentsi ipeacaajitacaca imae cameyo, aisa ichompimashitacotacariquea imeshinatsa. Iriguentiquea ishecataca quejevetarica shapipii qui

aisa earotoja.<sup>5</sup> Iroompaquea yoayoaitashitanaqueri icaramirincavaetanaquequea caquintejia guinteninitantaroca Jerosarequi, iriguentijiaca itsipajia Joreauquitica, iriguentijiaca aisa irooshitacojiacaroca ojaquiniqui pajitatsica Jororane.<sup>6</sup> Irooqueate iquemajapirojaquerigueti, ariqueate icohipoitanaca itsavecojianaqueroquea maasanopae igovaeguisherejia, arikea iviñacajajajiqueriquea Joanca Jororaneequi.

<sup>7</sup>Arikea icoraquejiajetaca ossequini pariseojoia, aisa saroseojoia iviñacajatantaquegueti. Cotanquitsiquea yamenajiavaquerigueti, icantajiavaqueri: “¡Quejejia-quempiquea irijanijiate sanatari! ¿Taate cantajiaquempi picoraquecoraqueitanta-caca ocaniqui noviñacajajiaquempiquea aatonijite icatsimajiguimpiquea Aapani Irioshi oncoramanitapoajegueti incatsimati mentajiaquerigueti maasano igovaeguisherejia?<sup>8</sup> Intsijate pinquempetajemparo inchato oitsoquitananquitsica cameetsa, pinetsanamajajianaquempaja iramenajia-quempinijite maasano arimajaca picantashitatijaianaja povashiantajianajiro pantagushejiajetacaca.<sup>9</sup> Aatoja picantajigui: ‘Aatoqueate icatsimajigana Aapani Irioshi, naroguentitari ichoviquijiani Averaameni.’ Pamenajigueroja oratica mapiporoqui. Irininqequegueti Aapani Irioshi iragavejaquequeate impeacaajajemparoquea ichoviquivaejinaqueca Averaameni.<sup>10</sup> Jac, yaajitiro poshontyo, itsitijitanaquero inchaquijita-quero ovarí maasano inchato teeca oncameetsateji oitsoqui, arikea intajaiquero paamariqui.

<sup>11</sup>“Naatimpa iroguenti nantaque noviñacajatantajiaquempiro oja iramenantajiquemparoca arimajaca picantashitatijaianaca povashiantajiana-jiroquea pipeacaaguishetacaca,

cotanquitsiquea incoraquepoje impoita-  
pojenaneca caaviji yanaaquaquea  
yagavejamajati. Ooshiatsi, aatotarite  
noquempejitaritsiquea iriatimpa nompe-  
aquempame amiquerineca aitanaqueri-  
neca igaviguitire. Iriatimpa inquempeta-  
caantaquemparo iroviñacajatantajia-  
quempi Ishire Aapani Irioshi aisa  
paamari.<sup>k</sup> <sup>12</sup>Incoraquepojaquegueti  
iroashigueta pojempariquea queri  
tsaroventamajacarica. Inquempetana-  
quemparo quea aguerogeti oitsoqui,  
asagorejitemparo, ampishoncavaquero-  
quea oncoraquejencaquegueti choviga-  
jenca, aanaquero quea osagoma, ovegui-  
seanaquempa oitsoqui. Aguijaavaquero-  
quea shimatoqui anquempoguijitempa-  
roquea. Oraquea osagoma antaitempa-  
roquea. Arikea inquempetaquempa-  
quea Amajirote incapiocajapojaqueri-  
quea tsaroventamajacarica intspatsipai-  
tanajempari jenoqui ichoocatigueti  
Aapani Irioshi. Iriraquea teeca intsaro-  
ventajiguempariji intigarancqueriquea  
camorecariqui teeca ontsivacavaete,  
incoquempaniquea irantsipevaeliaquem-  
paquea.”

**Iviñacajajiquerí Jesoshi**  
(Mr. 1.9-11; Irc. 3.21-22)

<sup>13</sup>Iroompaquea iquenapojaque  
Jesoshi Garireaqui yoanaque Jorora-  
nequi ichoocaquegueti Joanca  
cameetsaniji iriviñacajatavaqueri.  
<sup>14</sup>Cotanquitsiquea teequea irinintave-  
tempaji Joanca iriviñacajateri,  
icantavaqueri:

—Cameetsa aviguenti viñacajapojenane  
naatimpa. ¿Arimajampa picoraquetashi-  
quena naatimpa noviñacajatemi?

<sup>15</sup>Icanque Jesoshi:  
—Arita queate onquejetaquempaja  
imaica cameetsaniji anetsanajiaquero-  
nijite maasano ininqueca Aapani Irioshi.

Arikea icanquequea Joanca:  
—Iintsijate.

<sup>16</sup>Arikea iviñacajataqueri. Iroompaa-  
quea yarejepojatigaro Jesoshi  
otsapijaqui, ariqueate otanaca  
otanarejanaca queate inquite, yameniri-  
queate yampiguiricashipojacariquea  
Ishire Aapani Irioshi iquejetapojacari-  
quea emoreni. Yagatapojaqueri.

<sup>17</sup>Iroompaquea iquenquetsajencajita-  
naque jenoqui inquitequi, icanque:  
—Iricatica irio Irijani nopsisamajata-  
caca, noshineventamajatacari.

**Inintavecaquea ampatsini**  
**irantacaquerime Jesoshi teeca irininteji**  
**Aapani Irioshi**  
(Mr. 1.12-13; Irc. 4.1-13)

**4** <sup>1</sup>Iroompa iriraquea Ishire Aapani  
Irioshi yaanaqueriquea Jesoshi  
osamani oquitamampororo itapojaquegueti  
cameetsaniji iramenamajaquerinijite  
imajirote ampatsini arica iragavejaque  
irantacaqueri teeca irininteji Aapani  
Irioshi. <sup>2</sup>Arikea ichoocaque oraniqui 40  
savincagueteri, teequea irishecate tempaji.  
Arimpa itaseamajatanaque. <sup>3</sup>Arikea  
i quempejipojacari irira nintatsica incovae-  
guishetacaante, icantiriquea:

—Iintsija arimajagueti aviguentica  
Irijanite Irioshi iintsijate pincanteroja  
ocatica mapi ompeanaquempata pan  
pishecataquempaca.

<sup>4</sup>Cotanquitsiquea Jesoshi icantiriquea:  
—Choocatarite otioncacocagueti  
ocanque: ‘Teequea aparo ontampishita-

**k 3.11 Paamari** oquenquetsataquero mavitepae. (1) Pamenero otsapa 12 acaniqui  
ocantacoquerogueti camorecarci intaantajitaquempaca caarica netsanatiro ininqueca Aapani  
Irioshi. (2) Pamenero aisa Ya. 2.3 ocantacoquerogueti icoraquepojaquegueti Ishire  
yamenajiquero quejivetaca paamari. (3) Pamenero aisa 1 Co. 3.13 ocantacoquerogueti  
iramenantajitaquempogueti yantaguetaqueca maasano caquinte.

caanteji isheca caquinte, jero aisa maasano icanqueca Aapani Irioshi.'

<sup>5</sup>Iroompaquea ariquea yaanaqueriquea Jerosarequi, oratica guinentinintsi yashincaca Aapani Irioshi, icatiacaopajacariqueate teemporoqui<sup>l</sup> itsaroventantajitarica Aapani Irioshi ochoviinatapojacagueti ocaravaequequea jenoqui ocanca, icanqueriquea:

<sup>6</sup>—Iintsija arimajagueti aviguentica Irijanite Irioshi, iintsijate pisapocanaquejate isaviji, ocanquetari itioncacojiquerogueti ocanque:

‘Intigarancajaquemperi Irioshi irashivantijite, quisho iroaro-aitanaquempi.’

‘Irajiricanaquempea irantsomaja-naquempi  
aatonijite pitsitincapojaro mapi.’

<sup>7</sup>Icantitanaca Jesoshi icanqueriquea:  
—Cotanquitsiquea choocatarite itioncacojiquerogueti aisa ocanquequea:  
‘Aatoquea pamenantaritsi Majirontamajatatsica Pirioshite.’

<sup>8</sup>Iroompaquea yaanaqueriquea otsempiqui jmm agasataanquitsica yonigaaguetaqueri maasanopae quepatsi yashincaca majirontaguetatsica aisa maasanopae yashintajiacaca. <sup>9</sup>Icanqueriquea:

—Arquietija poguerovenquena pintsarovenquena, nojocaguetaquemproquea maasanopae pamenaguetaqueca imaica.

<sup>10</sup>Icantitanajaquea Jesoshi aisa icanqueri:

—Pijatequetiroshine, Satanashi, choocatarite otioncacagueti ocanquequea:  
‘Pintsaroventaquemparija Majirontamajatatsica Pirioshite, aparoqueate iroguenti pimajirontamajaquempa.’

<sup>11</sup>Arikea yoanaji imajirote ampatsini. Irioquea coraquecoraqueitajatsi irashivantijite Aapani Irioshi yamita-cojiapojajiri.

### Iparianacaro Jesoshi itsavetantavaetaque Garireaqui

(Mr. 1.14-15; Irc. 4.14-15)

<sup>12</sup>Iroompaquea iriraquea Jesoshi iquemacoquerigueti Joanca isantanata-cojitaqueri, yoanajiquea Garireaqui.

<sup>13</sup>Cotanquitsiquea teequea inchoocatan-tajemparozi Nasare, iroguentiquea yoantanaja Caperenao iriguinentapojajemparo. Oraquea Caperenao iroguenti ochoocaque otsapijaqui iniromotijaqui. Iroatimpa iroguenti ochoocaque iguinentijiacagueti ichoviquijianaqueca Savoroone aisa Nepetari. <sup>14</sup>Arikea iquejetaca imaica cameetsanijite irinetsanajiqueronijite itioncacotana-queca tsavetantatsica Isaiahini coramani, icanque:

<sup>15</sup> “Oraquea iguepatsite Savoroone aisa iguepatsite Nepetari, chococatanquitsica intatquieroqui Jororane,  
iquenaquenaitantajacaroquea yoayoaitantapinicarogueti inirojani quentijani:

Garirea ichococatantajiacaca oshequini teeca irijorijoigueji.

<sup>16</sup> Irirajia pitsecacojjavetanquitsica inejajiaquero tsirencari tsiren-cavaetanquitsica;  
irirajia guinentinijianquitsica otsiman-cacojjavetacarogueti metojagantsi otsirencaguitetacojiaqueri tsiren-cari.”

<sup>17</sup>Arikea iparianacaro Jesoshi itsavetantavaetaque, icanque:

<sup>14.5 teempo.</sup> Oratica teempo iroguenti inirojegui tsovironaqui choocatatsica Jerosarequi. Irira joriojia iroguenti itaantapinitantarica viratsipae intsaroventantajaquequeparica Aapani Irioshi. Pamenero ovaantorite otsapaqui Mt. 21.23.

—Pincantashitatijaianajempaja povashiantajianajerojate pipeacaaguishetacaca, iroshipojitarite aapojaquem-paquea irimajirontaquempa acaniqui Inquitequitica.

**Jesoshi icajemajiaqueri 4 tarajajiatsica impeacaajiaquempari itsatacaanejia**  
(Mr. 1.16-20; Irc. 5.1-11)

<sup>18</sup>Iroompaquea yoanaquequea Jesoshi oraniqui ishitaravijatanacaro otaraviaqui iniromotija Garirea. Inejajipojiriquea Shimo (icantajitica aisa Peerero) itsipatacarí iriguentijeguite pajitatsica Antirishi, tarajajia-quequea, irootaquequeate isavicaventajigu-quea iriatimpajia. Arikea icantiri:

<sup>19</sup>—Jame poguijaguijaitanaquenajate, imainaquea irioquea pimpitsocashijiana-quempa caquintejia, nagavejacaajia-quequea pinquejetacaajiajempari shima panquitacojiguirigueti.

<sup>20</sup>Iroompaquea iriatimpajia yojocapa-najantiroquea imantsatsitepae yoguijajaitanaqueri.

<sup>21</sup>Yoayoavetanaca tijacoñaji ontaniqui irioquea yamenapojiquea Santiago<sup>m</sup> aisa iriguentijeguite pajitatsica Joanca savisavii-taque quenajarontsiqui inetsanajiaquerou-queate imantsatsitepae. Itsipatsipacari iriri pajitatsica Severeo. Iroompaquea iriraquea Jesoshi icanneriquea Santiago aisa Joanca:

—Jame poguijaguijaitanaquenaja.

<sup>22</sup>Taampina yojocajianaqueroquea quenajarontsi aisa iriri, yoguijaguijaitanaqueriquea Jesoshi.

**Jesoshi itsatacаяiaqueriquea icaramirincavaequequea caquintejia**  
(Irc. 6.17-19)

<sup>23</sup>Iroompaquea yoanaquequea Jesoshi itsitacagueitejanaquero

Garirea itsatacaantavaetanaque shinagogapaequi icapiocantajiacaca joriojia, itsavetantaquero Quenque-tsatsarentsi Oganejencatatsica icantajiaqueri quero icotani imajiron-tagueti Aapani Irioshi. Aisa yogueshi-guequeriqueate oshequini joquijigue-tanquitsica aaguequerigueti cantashi-tatijencaguetanquitsica ashinoncaja-gantsipae, aisa catsijianquitsica, jac peamajajianajaqueate. <sup>24</sup>Iroompaquea irirajia quinteninijianquitsica osamanipaquetica Shiriaqui iquema-cojianaquerigueti yogueshitantague-tanaque jero yamajiaipojaqueneriquea maasano ashinoncajajianquitsica. Iriatimpajia iroguenti icantashitatia-guecaquea icanca iconoaca yatsipe-vatani oshequi. Itsipa iroguenti imetojapinitaquiti icantapinitaquiti tinquininini, itsipapae teeca ironquempaji, cotanquitsquea iriatimpa yogueshiguetajiriquea maasanopae. Aisa yoguisotoacoventa-jajiri ishaquiajiacarigueti ampatsi-nipae. <sup>25</sup>Iroompaquea yoguijajitainaqueriquea icaramirincavaequequea caquintejia quenaquenaitapojanqui-tsica Garireaqui, Tecaporishiqui, Jerosarequi, Joreaqui irooca aisa quenaquenaitapojanquitsica intatquiero Jororane, icaramirincaji-aque.

**Itsavetantaquequea Jesoshi niganquitantanaqui**

**5** <sup>1</sup>Iroompaquea yamenajiaquerigueti Jesoshi maasano capiocaventajiacrica icaramirincavaequequea oraniqui, itoncoanaque isavicaquequea niganquitantaqui, arikea iquempejijiapojacari

**m 4.21 Santiago.** Iguenquetsatsarequi guiriego ipajita *Iakobos*. Iconagarantaca quimajareri yoguipitsocajianaqueroquea ivajiro ipajitaqueri *Santiago*, itsipa ipajitaqueri *Jacobo*. Mavite oponeaca iguenquetsatsarequi evereo, ipajitaqueri *Yaakob*.

itsatacaanejia iquemisantajiaqueriquea.  
<sup>2</sup>Ariquea itsatacajaiaqueri icantajiaqueri:

**Queri shinetavajatsineca**

(Irc. 6.20-23)

- <sup>3</sup> “Caavijiquea irishinevaequempa  
maasano tsatanquitsica ishirequi  
tee iragavejamajatempaji,  
iriguentitari intsipajiaquempa  
Inquitequitica imajirontagueti.
- <sup>4</sup> Caavijiquea irishinevaequempa  
maasano shimapojancajan-  
quitsica,  
iroguishinejajiaqueriquea Aapani  
Irioshi.
- <sup>5</sup> Caavijiquea irishinevaequempa  
maasano teeca iraventacoji-  
guempaji,  
irojocajitaqueneritari maasano  
quepatsi.
- <sup>6</sup> Caavijiquea irishinevaequempa  
maasano nintamajajatiatsica incoma-  
jamajajiaquempa inquejetempari-  
gueti taseatsica aisa miretatsica,  
iragavejacajaiqueritari irinetsana-  
jigero ininqueca quejetaca  
inquemempagueti.
- <sup>7</sup> Caavijiquea irishinevaequempa  
maasano pintsatacotantajiatatsica,  
impintsatacojitaquemparitari.
- <sup>8</sup> Caavijiquea irishinevaequempa  
maasano comajashirentajiatatsica,  
irojiatar amenerineca Aapani Irioshi.
- <sup>9</sup> Caavijiquea irishinevaequempa  
maasano gameetsantajajeri-  
neca igonorojia,  
incantacojiqueritari: ‘Trioja irijanijiate  
Aapani Irioshi.’
- <sup>10</sup> Caavijiquea irishinevaequempa  
maasano irantsipetacaajiquempari-

gueti incatsimatimentajiquerigueti  
incomajamajaquempagueti,  
iriguentitari intsipajiaquempa  
Inquitequitica imajirontagueti.  
<sup>11</sup>“Caavijiquea pishinevaejiaquempa  
pamenajaquegueti incantaguishejiaquempi,  
incatsimacatsimajaqueempigueti, aisa  
intsoeventajiaquempigueti iramenajiaquem-  
pigueti pitsaroventajiaquenaquea naatimpa.  
<sup>12</sup>Pamenajaquegueti inquejejiaquempigueti  
imaica pishinevaetanaquempaja, pitsajiaque  
incavintsajamajataquempiquea Aapani  
Irioshi oncoramanitapoja jegueti ontaniqui  
inquitequi. Arikeate iquempejitaqueri  
tsavetantajatsica choocajatsica coraman-  
paequitica yatsipetacaajiacari catsimajaque-  
rica.

**Tsarovenajatiatsica iquempejiacaro incachoane**  
*(Mr. 9.50; Irc. 14.34-35)*

<sup>13</sup>“Aviatimpajia conoajigarica quepatsiqui-  
tica piqumepjiacaro incachoane. Cotanqui-  
tsiquea ariguettija omasancategueti,  
¿querocampate incojitajeroni incachonetan-  
tajitajemparo? Aatoquea inintajitajiro,  
manaquea impishoncrajeroquea intati,  
iragatigatijitaquero intati.<sup>n</sup> <sup>14</sup>Aisa  
aviatimpajia quempejiaquempi tsivotacoji-  
guirica maasano caquinteja. Pamenajiguero-  
tarite oratica tsovironaquipae impeacajaitem-  
parogueti otsempiqui incapiocajiterogueti  
oshequiaetaquea oncanquempa,  
¿arimpate aatoquea yamenajitiotsi?  
Iramenajquieroquea, onconjavaeque.  
<sup>15</sup>Arikea iquejetaca aisa tsivorentsi itsivojiti-  
rigueti teetarite arikea iroguiyotacojiteriji  
chomoquí, iroguenti yoguisavacocojiteriji  
jenoquijaniqui cameetsanijite intsivotana-  
quenerinijite maasano choocajianquitsica  
tsovironaquiqui. <sup>16</sup>Arikeate pinquempejia-

<sup>n</sup> 5.13 Ari aquejejiaca aatimpajia tsarovenajatiatsica Aapani Irioshi, anconoaqueemparogueti antaguetiroca covaeguisherentsi antsatacaajiaqueriquea aatosaconaniji icovaeguishejiga. Cotanquitsiquea ariguettija avashiantanajero atsarovenarogueti ¿querocampate ancojiaquempani antsatacaajajerogueti? Manaquea anquejetanaquemparo incachoane omasancategueti, aatoquea inintajitajiro.

quempa aviatimpajia pincomajamajaja-quempa pimpeacaajaquemparo cameetsa-guetatsica cameetsanjite iramenajaqueemp-gueti maasano, ariquea irishineventamajajia-naquemparinjite Piri choocatatsica inquitequi.

**Jesoshi icanque onetsanamajaquempa  
itioncacaanqueca coramani Aapani Irioshi**

<sup>17</sup>“Aato pijijiguitsi iroguenti nocoraqueta-shitaque novashiantacaajempiro piquemisan-tirogueti itioncacotanaqueca Moishishini irooca aisa itioncacotanaqueca tsavetantajia-tsica coramani, teatarite iroquea noncora-quetashtiteji, iroguentiquea nocoraquetashitaque onetsanamajaquempañi maasanopae icantajiaqueca. <sup>18</sup>Arimajaca noncamanta-quempi: aatotagueti opeitsita inquite aisa quepatsi, aatoquea opegatsi apaitsouquia-niui Itioncacaantaqueca Aapani Irioshi, onetsanamajatanaquempaquea maasanopae icanqueca. <sup>19</sup>Quericaca teeca irinetsanamajateroji maasanopae icanqueca Aapani Irioshi, aisa intsatacaaajaqueriquea itsipapae inquejianaquempa iriatimpajia, oncorama-nitapojagueti irisavijjisavijitapojajequea inquitequi imajirontacagueti Aapani Irioshi, itsipajia iranaantapojequea. Cotanquitsiquea iriraquea netsanamajaqueroneca, aisa intsatacaaajaqueriquea itsipapae inquempejianaquempa iriatimpa irinetsanamajajiana-quoquea, caaviji iranaavaepojaje ontaniqui inquitequi. <sup>20</sup>Nocantantajiaquempica imaica aatogueti picomajamajajiga, aatogueti panaacojiguiri tsataacaantajiguiroca itioncacotanaqueca Moishishini aisa pariseoja, icomajamampeajiacagueti, aatotarite pagavejitsi pinquijanaque imajirontagueti Inquitequitica.

**Jesoshi itsatacaaantajiaqueroquea aatonijite  
icatsimatantajititsi  
(Irc. 12.57-59)**

<sup>21</sup>“Pitsajiaqueroquea icantajitiri pivaesatinite: ‘Aatoja pimetojanti,

maasano metojantajianquitsineca irantsipetacimentajiquempari yantaqueca.’ <sup>22</sup>Cotanquitsiquea naatimpa noncantajiaquempi quericaca catsimataquerineca igonoro inquejeta-caajitaquempariquea iriatimpa oncoramanitapojagueti irantsipetacimentajiquempari yantaqueca. Aisa quericaca cantaquerineca igonoro: ‘Aviatimpa tee pintsatimateji’, irajaitanaqueriquea majirontatsicaqui incatsimajitaqueriquea. Cotanquitsiquea iriraquea cantaquerineca itsipa: ‘Aviguenti covaeguisheri!’, shoshoh itsigatsi camorecariqui.

<sup>23</sup>“Irootaquequea nocantantajiaquem-pica poapoaitanaquegueti tetemporouki itsaroventantajitarica Aapani Irioshi paanaquegueti pivira pijitorejacaanta-quenerigueti aretarequi, ariquea taampi-nagueti pinquenquejapojaquerogueti pincanke: ‘Choocatari icatsimati-men-quenaca nogonoro’, aatotajate pijitoreja-caantiritsijate. <sup>24</sup>Manaquea pojoquijipa-najanteritaja oneguitapojacagueti aretare, poapanajantetaja pogameetsata-panajanteritaquea pigonoro. Irooompa ariquea poashitanajeriqueate pivira pijitorejacaantaqueneriquea Aapani Irioshi.

<sup>25</sup>“Incatsimaquempigueti pigonoro irinintavequempagueti iraanaquempi-quea jivatatsicaqui irisanatanatacota-caanquempi, pinquenquetsatacanaje-rija quenavoquirontsiqui pogameetsata-najeri taampina aatonijite yaguimpi. Arigueti iraanaquempi jivatatsicaqui joesequi iriotaque cajemaquerineca coarea, iriraquea coarea manaquea iraapanajantempiquea irisanatanatacotsi-tempi. <sup>26</sup>Arimajaquea aatogueti povegar-ramajatajiri catsimataquempica maasanopae paacotaquerica, aatoquea yoguipaquijajimpitsi santanatacoquem-pica.

**Jesoshi itsatacaantaqueroquea aatonijite yoashijitirotsi manquigarentsi**

<sup>27</sup>“Aviatimpajia pitsajiaquerotarite icantajitaquero paesatoniqui: ‘Aatoja poashitirotsi manquigarentsi.’ <sup>28</sup>Cotanquitsiquea naatimpa noncantajiaquempi quericaca nevequemparoneca manquigarentsi, quejecaquea yoashitaquero, iquenquejaquerotarite yamaquero-gueti. <sup>29</sup>Nonquejetacaajaquempiroquea imaica: arigueti oncovaeguishetacaa-quempi poquijamajaca pinquitsoreja-quempa pimpishoncaquero. Cameetsavaequeate pimpishoncaquerogueti covaeguishetacaaqueempica pinetsanati-mentanajempanijite. Aatoguetitarite pipishonquiro jatanatsitarite oncovaeguishetacaajempi, iroomba pimetojana-jegueti impishoncajitaquempiqueate camorecariqui. <sup>30</sup>Aisa iroogueti covaeguishetacaaqueempine pacomajaca ariquenqueate pincarataquero pimpishonqui-tsitemparo. Cameetsavaequeate pimpishoncaquerogueti covaeguishetacaaqueempica pinetsanatimentanajempanijite. Aatoguetitarite pipishonquiro jatanatsitarite oncovaeguishetacaajempi, iroomba pimetojanajegueti impishoncajitaquempiqueate camorecariqui.

**Icanque Jesoshi aatoja quericaca ovashiantirotsi imanquigare (Mt. 19.9; Mr. 10.11-12; Irc. 16.18)**

<sup>31</sup>“Aisa icantajitironi paesatoniqui: ‘Quericaca nintanquitsineca irovashian-tanajero imanquigare, irojocauqueroja paperi oncanque: ‘Imaica novashianta-jiro nomanquigavetacaca.’’ <sup>32</sup>Cotanquitsiquea naatimpa noncantajiaquempi quericaca ovashiantaqueroneca imanquigare apaniro oaquerica, arigueti omanquigatajempagueti itsipa jac icovaeguishetacaacaro, omanquigataja-

tarite itsipa teeca irio omanquigarema-jaca. Ariquea iquejetaca quericaca manquigataquemparoneca yovashianta-jitica jac icovaeguishetaca.

**Jesoshi icanque: Aato picantashita**

<sup>33</sup>“Aisa pitsajiaquerotarite icantajita-queri paesatoniqui: ‘Aatoja pitsojega. Aato picantashita intati: “Incatsimati-mentenarota Aapani Irioshi aatogueti nonetsanatiro nocanqueca.” Arigueti pincantero, pinetsanamajateroja maasano picanqueca.’ <sup>34</sup>Cotanquitsi-quea naatimpa noncantajiaquempi aatoja pitsojeimatatsi aatonijite oavaeta-naque pinintajiguitsi pincantajigue: ‘Incatsimati-mentenarota Aapani Irioshi aatogueti nonetsanatiro nocanqueca.’ Aisa aatoja piquenquetsatacojigurotsija inquite, aato picantajiguitsi: ‘Nontsojea-quempagueti ompeguempata inquite’, iroguentitarite imajirontamento isavificantaca Aapani Irioshi. <sup>35</sup>Ari oquejetaca quepatsi, aatoja piquenqu-etsatacojigurotsi, aato picantajiguitsi: ‘Nontsojea-quempagueti ompeguempata quepatsi’, iroguentitari ivanqueguitita-caca. Aisa aatoja piquenquetsatacojigurotsija Jerosare, aato picantajiguitsi: ‘Nontsojea-quempagueti ompeguempata Jerosare’, iriguentitari ashincaro Majirontamajatatsica. <sup>36</sup>Aisa aatoja picantajigu: ‘Nontsojea-quempagueti nonquitamaromaetanajeta’, teetarite pagavejajigueji aviatimpajia pinquita-maromaejigueroji irooca pinquisaamae-tacaajero apamaerotica pimae. <sup>37</sup>Aatoja piquejetacaajigarotsi, manaquea pincantajigue: ‘Jeeje’, irooca manaquea pincantajigue: ‘Tee’. Oraquea iroguen-tica pinquenquetsatacojiaque quejegue-tacaroca imaica cameetsanijite inquemi-santajiaquempinijite itsipapae, manaquea oquenantapojacari ampatsini icantajitica covaeguisheri.

**Jesoshi icanque aatoja pipigatari  
catsimataquempineca**  
(Irc. 6.29-30)

<sup>38</sup>“Aviatimpajia pitsajiaquerotarite icantajitiro paesatoniqui: ‘Quericaca tyquaissaatantanquitsineca ariqueate inquejetacaajitaquempariquea iriatimpa intyaquisajaitaqueri. Aisa quericaca jararejitsiquerineca iraji, ariqueate inquejetacaajitaquempariquea iriatimpa irijararejitariqueriquea iraji.’ <sup>39</sup>Cotanquitsiquea naatimpa noncantajiaquempi aatoja pipigajigaritsija catsimataquempineca. Quericaca capojaquempineca pivoroqui pimpitsocanaquempaja inquejetacaaque paro otsipavoroqui. <sup>40</sup>Choocagueti nintanquitsineca iraanaquempi jivatatsica qui iraitsiquem- pironiji piitsaare intsompoguitica, pishinetstemparieate aisa piitsaare jenoquitanquitsica. <sup>41</sup>Choocagueti aanaquempineca iromperaqueempigueti incanquempi: ‘Pinquijanaquenaroja ontaniqui’, poavaetanaquequea panaavaetanaqueroquea icanquempica poavaequeteriquea osamani. <sup>42</sup>Quer- cagueti amanaquempineca taaca opajita, pojocaquequieriquea. Aisa quericaca cantaquempica: ‘Pojoquenaja ocatica, noguipiarajatempirotari coajica’, aato pipitsocapitsatari.

**Ampintsataquempariajia catsimatacrajica**  
(Irc. 6.27-28, 32-36)

<sup>43</sup>“Piquemajiaquero icantajiqueca: ‘Pimpintsataquempariajia pigonoro pincavintsa- jaquerijate, pisemaquempari catsimata- quempica.’ <sup>44</sup>Cotanquitsiquea naatimpa noncantajiaquempi pimpintsataquempariajia

catsimajiaquempica.<sup>45</sup> Aisa pamanacoven- tajiaquerija maasano atsipetacaajiaquempica. <sup>45</sup>Pinquejejaquempaquea imaica pinquempetimentajiaquempariniji Piri choocatatsica inquitequi. Quempeca iriatimpa ivoreguirigueti catsirincaiteri cameetsanjite irivoreacojiaquerinijite maasano caquintejiatsica, irioca cameetsa- jiatsica aisa teeca incameetsajigueji. Ariqueate oquejetaca incani iroatimpa itejiniri maasano, comajamajaijatsica aisa covaeguishejiatsica. <sup>46</sup>Noncantajiaquempi aparogueti iriatimpa pincavintsa- jaque cavintsa- jaque, carimpate irishineeventsi- quempiro Aapani Irioshi? Arikea iquempejiga imaica amatavijantajiatsica capiocapinijiguinirica majirontatsica imentaquipae. <sup>47</sup>Ari oquejetaca aparogueti iriatimpa pinquenquetsatacaajivaque pigonorojia, carimpate panajajaqueri itsipapae? Arikea iquempejiga imaica irirajia teeca intsar- ventajiguemparijia Aapani Irioshi. <sup>48</sup>Pincomajamajajana- quempaja pinquempejianaquempariajia Piri choocatatsica inquitequi icomajamajata- gueti.

**Jesoshi itsatacaantaque queroca  
incojiqueroni incavintsa- jantajitegueti**

**6** <sup>1</sup>“Aatotarite mana picavintsa- jantajigui iramenajiaquempiniji caquinteji. Pinquempejiaquempagueti imaica aatotarite ishineventajiguimpitsi Piri choocatatsica inquitequi. <sup>2</sup>Pimpin- tsatacojiaquemparigueti teeca irashin- tempaji pojocajiaquenerigueti icoguite- jacojiacaca, aatoja picamantiritsija pigonorojia aatonijite piquejejigaritsi tsaroventamampeajatsica intati. Iriatimpa jiaquero icantajiqueca intati. Iriatimpa jiaquero icantajiqueca intati.

**o 5.44** Iconoagarantaca itioncajajiroguedi oca guriegotsaqui yogavijitaquero capichaji, ocanti acaniqui: “Irirajia cantavetaquempica: ‘iShoo poanaque camorecariqui!’, manaquea pinquenquetsatacaajiveriquea cameetsa, pincanqueri: ‘Noninque pinchoocajiaque cameetsa.’ Pincavintsa- jaqueri semajiaquempica.”

aque shinagogapaequi acapiocantapinicaca irooca aisa oraniqui quenavoquirontsipaequi cameetsanijite irishineventajaqueemparinijite igonorojia, cotanquitsiquea imaica noncantajiaquempi aatotarite ishineventajigaritsi Aapani Irioshi quempejiguroca imaica, iriguenti shineventajiacari igonorojia amenajiaquerica. <sup>3</sup>Pojocajaquenerigueti quericaca coguitejacojianquitsica aatotarite quericaca picamantitsi. <sup>4</sup>Santicoguitenija pojocaqueperi. Iroompaquea iramenajiaquempigueti Aapani Irioshi picavintsamajatastaque, irioquea shineventajaqueempineca, ariquea pamenacojiaquempaja oncoramanitapojaquetuontaniqui inquitequi.

Jesoshi itsatacaantaquero quero  
incojitaquerini iramanajiterigueti Aapani  
Irioshi  
(Irc. 11.2-4)

<sup>5</sup>“Pamanajiaquerigueti Aapani Irioshi aatoja piqempejigari tsaroventamampeajianquitsica intati yamanamampeajiacari. Iriatimpajia iroguentiquea inintavintsaquia incatintijiaque shinagogapaequi irooca aisa oquenavouquigecaguetai yamanamampeajiacari cameetsanijite iramenajiaquerinijite igonorojia. Irirajia quejejianquitsica imaica aatotarite ishineventaritsi Aapani Irioshi. Aparoqua shineventajaquemparine amenajiaquerica. <sup>6</sup>Cotanquitsiquea pamanerigueti Aapani Irioshi poanaqueja pinquijanaquequea pitsovironaquitequi pashitacotanaquempa aparo, ariquea pamaniqueriqueate. Iriatimpa yamenaqueempiquea aparo pichoocaque pamaniquerigueti,

inquemaquempiquea irishineventaquempi, ari incavintsaquempi.

<sup>7</sup>“Pamanerigueti Aapani Irioshi, aatoja pamanavijitiri intati vero vero vero, aatonijite piquejigartsitieecintsajigueriji Aapani Irioshi. Ijiqueji inquemisantavaqueri arigueti incantacoguitempani vero vero vero. <sup>8</sup>Aatojate piqempejigartsitieecintsajigueriji, itsatsitarotari Aapani Irioshi maasano picoguitejacocaca tequeratatrabajueti pamaneriji. <sup>9</sup>Pamanajiguerigueti mana pinquempejiaquempaja imaica, pincantajiaque:

‘Aapani choocatatsica inquitequi, noninque intsariventamajajiaquempiquea maasano caquinte.

<sup>10</sup> Caacateja pimajirontamajapajuempa.

Noninquequea irinetsanamajajiqueraja ocaniqui quepatsiqui maasanopae pininqueca aviatimpap,

onquejetantaquempaca inetsanamajajiquerogueti ontaniqui inquitequi.

<sup>11</sup> Pojocauenaja imaica noshecatapinijiaquempaca.

<sup>12</sup> Pimpeacotsitajenaroja nogovaeguishere, quejetaca naatimpajia nopeacotsijajari antaguetaqueroca teeca oncameetsateji.

<sup>13</sup> Aato pishinejiganrotsi oncoraque-tashijiaquena aatoca notampishitashithi nocoguishetatsi.

Manaquea noninque pintampishitacaamajajiaquenaja aatonijite yagavejajana ampatsini incovaeguishetacaajaena.’<sup>p</sup>

<sup>14</sup>“Arigueti pimpeacotsijajemparyantaqueca caquinte, ariquea inquempata-

**p 6.13** Iconoagarantaca itioncajitirogueti oca guriegotsaqui yogavijitaquero capichaji, ocanti acaniqui: “Aviguentitari majirontamajatatsica, aviguenti ashintaro tampishirenti aisa oganejencarentsi. Pincoguitempaniquea pinquejetaquempa. Ari oncoquempani.”

quempaquea Piri choocatatsica inquitequi impeacotsitajempiroquea maasanopae pantaguishevetacaca aviatimpajia.

<sup>15</sup>Cotanquitsiquea aatogueti pipeacotsijigartsi yantaguishejiaqueca caquinte, aatotarite ipeacotsijajimpirotsi Piri pantaguishejiaqueca aviatimpajia.

**Jesoshi itsatacaanque quero incojitaquempa  
irisanticotaquierogueti isheca**

<sup>16</sup>“Ariguetijate pisanticotaquiero pisheca cameetsanjite pisavicavenquerinijite Aapani Irioshi, aatoja pishimampojan-camampeajiaja intati, aatonijite piquempe-jigariquea tsaroventamampeacarica. Iriatimpajia iroguenti ishimampojan-camampeajiac intati iramenajiquerinijite isanticoquiro isheca. Cotanquitsiquea irirajia quempejianquitsica imaica aatotarite ishineeventaritsi Aapani Irioshi, aparoquea shineeventajiaquemparine amenajiaquerica. <sup>17</sup>Cotanquitsiquea aviatimpajia pisanticotaquierogueti pisheca cameetsanjite pamaneri Aapani Irioshi, pinquishijiaquempaquea, aisa pinquivavorojiaquempaja, <sup>18</sup>aatonijite itsajiguimpitsi pigonorojia pisanticotaquiero pisheca. Irioquea amenajiaquempine Piri teeca iramenajiteriji. Iriatimpayamenajiaquempi pichoocatigueti apaniro, ariuea irishineeventajiaquempiquea iroguishinejajiaquempi ariuea pamenaco-jiaquempa oncoramanitapoja jegueti ontaniqui inquitequi.

**Irishineeventamajajiquemparoja  
maasanopae inintaguetica Aapani Irioshi**  
(Irc. 12.33-34)

<sup>19</sup>“Aatojate iroguenti pishineeventajiasci pashintajiaquempa ocaniqui

quepatsiqui, onconoagaranguempa-queate irishecaguetaquemparo shecaguetaroca, otsipapae oyogueguetanaque ompomatsatanaquempa, otsipapae inquijaguetanaque aitsitanta-tsica iraitsiguetaquempiro. <sup>20</sup>Iroguenti pishineeventamajajiaquempaja maasanopae inintaguetica Aapani Irioshi cameetsanjite incavintsajamaja-jiaquempinijite iroguishinejajiaquempi-niji oncoramanitapoja jegueti ontaniqui inquitequi. Ontaniquiea ontaniqui aato ichoocati shecaguetaroca pashinta-guecaca, aatoquea oyogueti, aato yaitsijitajimpiro. <sup>21</sup>Aritarite taaca opajita pishineeventamajataca manaquea pisavicaventaguitironi piquenquejaguitironi.

**Iquempetacaacaro tsivorentsi**  
(Irc. 11.34-36)

<sup>22</sup>“Poquija oquempetecaro otsivore pitsino. Arigueti oncameetsate poquija, pamenamajate, onquempeta-quemparo otsivoguitemajatigueti.

<sup>23</sup>Aatogueti ocameetsati poquija, aato pamenantamajataro, onquempeta-quemparo pipitsecacotigueti maasanotsino. Ari oquempetaca, arigueti omnipitsecanaque tsivoshiren-taquempimeca, pimpitsecacomasajatati-guenimaja.<sup>9</sup>

**Nintanquitsineca irajaarantavaequempa**  
(Irc. 16.13)

<sup>24</sup>“Tee inchoocateji agavejanquitsineca irantavaetaqueneri mavite ashinta-quemparica. Manaquea irisemaneguin-taquempari aparo, iriraquea itsipa impintsataquempari, irooca inquemisan-

**q 6.23** Arigueti anintamajataque anetsanatero inintaguetica Aapani Irioshi, anquempetaquempari cameetsatanquitsica iroquija amenamajataquerotari ocanqueca Iguenquetsatsare Aapani Irioshi, anquemaquero. Aatogueti anintamajati anetsanatiro inintaguetica Aapani Irioshi, manaquea anquempetaquempari teeca oncameetsateji iroquija, amenavequemparogueti ocanqueca Iguenquetsatsare Aapani Irioshi, aato aquemirotsi.

tamajataqueri aparo, itsipaquea intsojencaneguintaqueri. Aato pagaveji pantaqueneri Aapani Irioshi inintague-tica, iroogueti pisavicaventaque pajaarantavaequempa quejetaca irooqua ea ashintaquempi ajaarontsi.

**Aapani Irioshi yojocapinijiguiniri  
irijanijiate maasanopae  
icoguitejacojiacaca**

(Irc. 12.22-31)

<sup>25</sup>“Imaicaquea noncanquempi: aatoja pishoshoventajigaro pisheca irooca pimirajiaquempaca choocatacaciajempineca, aisa aatoja pishoshoventajigaro-quea pinquitsaajiaquempaca. Oraquea pishire anijacajaiguimpica ¿teempa anagueroji pisheca? Aisa pitsino ¿teempa anagueroji quitsarentsipae? <sup>26</sup>Pamenajiguiriquea araguetatsica, teequea irivintyacavetempaji, aisa teequea onchoocavetempajiquea incapiocantaquemparoca isheca iroaraoitapinijigue iraapinijiaquequea irishecaciaquempaca, cotanquitsiquea Piri inquitequitica yojocapinijiaqueneri-quea ishecajiacaca. Aviatimpajia ¿teempa panaamajajigeriji iriatim-pajia? <sup>27</sup>Arigueti pishoshoguiteventave-quemparo pigatsantsare ¿arimpa pagavejaque pincatsantsatanaje niganqui meetero?<sup>r</sup>

<sup>28</sup>“Iroosacanica ¿queroca ococani pishoshoguiteventajiacaroquea pinquitsaajiaquempaca? Pamenajigui-rotarite ocatica ovempenaquipae inchiquiojiquea otsoroashiguequea iroatimpa, teequea oncatsiquejia- tempaji aantaquemparomeca oitsaare, aisa teequea onquiricajavetempaji, <sup>29</sup>ariqueate ocameetsamajavioti

anaavaequequea ocanca ocameetsa- vaeque, anaaguequieroqua quitsaa-rentsi cameetsamorenaguetatsica coramanitica iquitsaajiacaca majiron-tatsica Saromonini caavijica anaaque ocameetsamorenamajataquequea.

<sup>30</sup>Quempeca ocatica ovempenaquipae oporencanaque pore icameetsataca-a-guetaqueroqua Aapani Irioshi, cotanquitsiquea osaitequera taampina oshimeguiricanaque shimeguiririri, irajaiqueroqua intajaiquero.

iAviatimpajiaquea caaviji irojocajia- quempiquea pinquitsaajiaquempaca, caavijitari panajajiaqueroqua ovempenaquipae! Cotanquitsiquea aviatimpajia teequea paventamaja-tempariji, manaquea pishoshoventajia-aca taaca opajitapae. <sup>31</sup>Noncantan-tajiaquempica aatoja pishoshoguite- ventajigaro tsija pincantajiaque:

‘¿Querocashiatsi noshecataquempaca? ¿Taate nomirajeca? ¿Queroquea naajeroqua nonquitsaatajempaca?’

<sup>32</sup>Iriguentiquea quempejigiroquea imaica irirajia teeca intsaroventajiguempariji, ishoshoventajiacaroquea taaca opajitapae, irootaquequeate isavicaventajiaquequea iriatimpajia. Cotanquitsiquea aviatimpajia aatojate piquejiguirotsija imaica, choocata-rite Piri inquitequitica. Iriatimpa itsataque maasanopae picoguitejacoji-acaca. <sup>33</sup>Aviatimpajiampani pininta-majajigue pimajirontamajatanaquem- pari Aapani Irioshi pishineventajia- quemparoja pisavicaventajiaquerojate maasanopae inintaguequeca iriatimpa, ariquea iriatimpa irojocajia- quempiquea maasanopae picoguite- jacojiacaca. <sup>34</sup>Aatojate pishoshoven-

<sup>r</sup> 6.27 Oguiptsocaquerogueti tioncanquitsica guiriegoqui, agavejaque aisa oncanque: “Arigueti pishoshoguiteventavequemparo oshequianajeme pisavincaguitertepae ¿arimpa pagavejaque poshequiaquero capichaji?”

tajigarotsijate pincantajiaque:  
 ‘¿Querocate noncotaquempani  
 osaitequera?’ Ococaniquea savinca-  
 guiteriqui chooca taaca opajita  
 manapitsajiaquempineca pinquenque-  
 jacoqueca. Osavincaguitevetanajem-  
 pagueti otsipapae choocatatsineca  
 pinquenquejacojajeca.

**Aatoja piquenquejacoguishetsitiritsi  
 peacaajigaroca covaeguisherentsi**  
*(Irc. 6.37-38, 41-42)*

**7** <sup>1</sup>“Pamenitaquerigueti yantaguishet-  
 taqueca itsipa aato piquenquejitsi:  
 ‘Teequea incameetsateji, icovaeguishe-  
 taca’, aatonijite iquejetacaajitimpi  
 aviatimpa. <sup>2</sup>Iroriji querocaca pinquen-  
 quejacotsiterica itsipa, ariquea inquem-  
 petacaajitaquempi aviatimpajia.  
 Querocagueti pincotsiterini itsipa  
 ariquea inquejetacaajitaquempi aviatim-  
 pajia.

<sup>3</sup>“¿Queroaquea picocani  
 pamenantacarica itijaarojaniqui  
 pigonoro cotanquitsi tee pinquen-  
 quejacoteroji inchapoa poquiaqui  
 pashi aviatimpa? <sup>4</sup>¿Arimpate  
 pagavejaquempa pincanqueri  
 pigonoro: ‘Iintsija nonquitsoajem-  
 piro pitijaaro’, choocatirajagueti  
 inchapoa poquiaqui pashi  
 aviatimpa? <sup>5</sup>Cameetsatamampea-  
 tsica, iroquetitarite pijivatavaque  
 pinquitsoavajerota inchapoa  
 jocaaquempica aviatimpa, ariquea

pamenamajatanaje pinquitsoimenta-  
 jenerinijite tijaataquerica  
 pigonoro.<sup>s</sup>

<sup>6</sup>“Aatoja pojoquiniri shiishi querocaca  
 yashincaca Aapani Irioshi. Oquempe-  
 taca aisa aatoja pipishonquiniri  
 chanchopae piveererate vegaramajatan-  
 quitsica. Pinquempetaquempagueti  
 mana iragatigatiivaequero, ariquea  
 impitsocashiitsitempi aviatimpa  
 inteshireteshirejaquempi.<sup>t</sup>

**Quero incojitaquerini iramanajiterigueti  
 Aapani Irioshi**  
*(Irc. 11.9-13; 6.31)*

<sup>7</sup>“Pamanajigueri Aapani Irioshi taaca  
 opajita picoguitejacojiacaca, ariquea  
 iriatimpa irojocajaqueMPIRO. Pamenague-  
 teroja taaca opajita, ari pamenapojoero.  
 Aisa pintinquiapojerogueti sotomorontsi,  
 ari irashirejacojiquempi. <sup>8</sup>Aritarite  
 iriraquea amanantatsica irojocajiquereneri.  
 Iriraquea amenaguetatsica iramenapoje.  
 Aisa iriraquea tinquiguiroca sotomorontsi  
 irashirejacojiquerier.

<sup>9</sup>“¿Arimpate pinquempejiaquempa  
 aviatimpajia iramanempigueti pirijanite  
 pan arimpate paitsitenempari mapi  
 pojoquitenempari? <sup>10</sup>Iriogueti  
 iramanempi shima, ¿arimpate paitsite-  
 nempari pojoquitenempari camaarini?  
<sup>11</sup>Avirovetaca covaeguishejiatsica  
 pitsajiaque pojocajiguiniri pirijanijiate  
 taaca opajitapae cameetsaripae,  
 iriompare Piri choocatatsica inquitequi

<sup>s</sup> 7.3-5 *itijaarojaniqui pigonoro*. Oquejetacaro arigueti pininque pincanqueri pigonoro  
 irovashiantajero covaeguisherentsipae yantaguistica, avquietita jivaquerone povashiantajero  
 pantaguisheguetica aviatimpa. <sup>t</sup> Queroaquea picocani pamenantacarica  
 ipeacaaguishetaqueca pigonoro cotanquitsi teequea pameneroji pashi aviatimpa caaviji  
 pogaaca? <sup>t</sup> 6 Itsataacaquerigueti iquejetacaacaro, quejetaca incanteri: Aatoja  
 piquenquetsatimoguitirini Iguenquetsatsare Aapani Irioshi manintiroca aatonijite  
 icatsimajiguimpi. *Piveererate*. Chooca quentijaqui quejeveratarica chopiro. Onquiaquerigueti  
 capichaji impanequi, asereaueri, ari intiritapiniquero cameetsaniji oncarenitanaque.  
 Oncoramanitapojaqueguedi ompeanaquempa icantajitica *peerera* (icanquero quimajarer perla),  
 quitasaaancorerencavaeque, impeacaquaemparo nenquetsiqui. Ovegaravaetaca.

caaviji irojocajiaquempiquea cameetsa-guetatsica pamanajiaquerigueti.

<sup>12</sup>“Taaca opajitapae pantajigue pincavint-sajajiguera itsipajia, pinquejetacaguem-paro pininquegueti incavintsajaquempi aviatimpa. Irootarite ocanque itioncacota-naqueua Moishishini aisa itsipajia tsavetan-tajiguiroca icanquerica Aapani Irishi.

**Sotomorontsi chaamorojaniquitica**  
(Irc. 13.24)

<sup>13</sup>“Pinquijantajianaquemparoja sotomorontsi chaamorojaniquitica. Choocatarite otsipa sotomorontsi iniromore-jeguini ocanca aisa quenavoquirontsi iniropoquiaetaque ocanca oavoquiaeta-nanquitsica isaviqui camorecariqui. Iroguen-tiquea iquijaquijaitantacaca icaramirinca-vaeque caquinteja. <sup>14</sup>Cotanquitsiquea oraqua sotomorontsi chaamorojaniquitica aisa quenavoquirontsi orijanipoquijaniquitica mana oquenavoquitanaca anijagantsiqui. Teemajaca incaramirinrateji nejaqueroneca.

**Jesoshi itsavetacojiaqueri caquinte iquejetacaacanari inchato sovenatatsica**  
(Irc. 6.43-44)

<sup>15</sup>“Inchiquiojitala yamatavijajiguimpitsi tsavetacotamampeajiacarica Aapani Irishi, inquitsaatsijiaquequem-pari imae oveja, cotanquitsiquea intsompogui iriguentijia lobo<sup>u</sup> catsimari. <sup>16</sup>Aviatimpajia pamenamajajiaqueroyantajiaqueca pintsatantajiaqueempa-rica quero icocani iriatimpa. ¿Arimate iraantajitemparo ovaitsouqui samerento? Aato yaantajitaro. ¿Arimate iraantaji-temparo igo<sup>v</sup> poronqueto? Aatoquea. <sup>17</sup>Arikeate oquejetaca, maasanopae inchato cameetsaguetatsica oncameetsa-sovenatanaque. Oraquea inchato teeca oncameetsateji, irootaque ochoocatan-

taca osovena teeca oncameetsateji.

<sup>18</sup>Oraqueate inchato cameetsatatsica aato agaveji ochoocatantaro osovena teeca oncameetsateji. Aisa oratica inchato teeca oncameetsateji, aatoquea agaveji ochoocatantaro osovena cameetsatatsica. <sup>19</sup>Maasanopae panqui-rentsi teeca oncameetsateji osovenapae inchaquitsitemparoqua iraanaquero intaitemparoqua. <sup>20</sup>Arikea iquempe-jiaca caquinteja, pamenitsijiaqueri yantajiaqueca pintsatantajiaquemparica.

**Aatotarite yoayoaititsi maasano ichooatigueti Aapani Irishi**  
(Irc. 13.25-27)

<sup>21</sup>“Aatotarite maasano iquijaquijaiti imajirontagueti Inquitequítica cantajiaquena-neca: ‘Nomajirote, Nomajirote.’ Iriguentiquea quijaquijaitananquitsine irirajia maasano netsanamajajiaqueroca inntaguetica Aapani choocatatsica inquitequi. <sup>22</sup>Oraqueate aapojempagueti oratica savincagiteri, incaramirincaetanaquequea cantajiajaveta-naquenaneca: ‘Nomajirote, Nomajirote, notsavetantajiaquempi, aisa naventashijia-cari pivajiro noguisotoaguetajiniri ishaquiajia-avecaca ampatsini, aisa nonigaantajiaqueroy-quea oacaantantatsica intati nocantajiaque aviguenti agujejacaquena.’ <sup>23</sup>Cotanquitsiquea naatimpa noncantajiaqueri: ‘Teequeate nontsajiguempiji, poapoaitanaquequea osamani maasano aviatimpajia antajiguiroca covaeguisherentsi.’

**Jesoshi itsavetacojiaqueri caquinte iquempetacaajiacari peacagaroca tsovironaquui**  
(Irc. 6.47-49)

<sup>24</sup>“Imaicaquea noncantajiaquempi quericagueti quemisantaquenaneca

<sup>u</sup> 7.15 **Irira lobo** iriguenti tomirishiquitica catsimari quejevetarica iririjegui shiishi.  
<sup>v</sup> 7.16 **igo** (*higo*). Iroguenti osovena inchato icantajitica iguera (*higuera*).

netsanamajataqueroneca nocanqueca ari inquempetaquempari quenquejamajata-tsica vinchajiroca itsovironaquite shiratan-tapiqui.<sup>25</sup> Iroompaquea otejavetanaca incani amaravetanaca ojaaquiniqui, ochovigaguitevaetanaquequea jeoc jeoc, cotanquitsiquea teequea agavejeroji osoveanaqueroji, oquishomajataquetari shiratantapi ochoocatantacaca.<sup>26</sup> Iriraquea quemavetavaquenanea cotanquitsiquea teequea irinetsanateroji nocanqueca, manaquea iquempetacari teeca inquenque-jamajateji peacaavetacaroca itsovirona-quite impanequivi.<sup>27</sup> Iroompaquea otejavetanaca incani, amaranaque ojaaquiniqui, ochovigaguitevaetanaquequea jeoc jeoc, ariqueate ocotanaca osoveanaca-quea itsovironaquite, ocantavaeti soven.”

<sup>28</sup>Iroompaquea iteroncanajirogueti Jesoshi itsavetantaquerogeti, yamename-naitanaquequea intati maasano quemisan-tajiaquerica,<sup>29</sup>yamenajaqueritari itsataca-jaiquerigueti choacaquea iragavejane, teequea inquempejiguempariji tsatacaanta-jiguiroca itioncacotanaqueca Moishishini.

**Jesoshi yovejairi avejancari**  
(Mr. 1.40-45; Irc. 5.12-16)

**8** <sup>1</sup>Iroompaquea yoguirincanaja Jesoshi otapiqui, ariquea isaquiritsaeventajianacari icaramirincavaeque caquintejia. <sup>2</sup>Icoraquepojaquequea aparo avejancari iguerovempojacari icanqueri:

—Nomajirote, arigueti pininque, pagavejaque piveajena.

<sup>3</sup>Iriraquea Jesoshi icantajempequita-naca ipamitsitari, icanqueri:

—Jeeje, noninque. iPimpeanajem-paja!

Iroompaqueate icanquitiguijac ipeanaja yavejancavejancaacagueti.

<sup>4</sup>Iroompaquea icantavajiri Jesoshi:

—Aatojate picamantitsija. Iriguenti poimotanaque saserorote ponigaapojem-pa-

rija, paanajenerija viratsipae pinetsanaque-roja icanqueca Moishishini cameetsanijite iramenamajaquempinijite, ariquea incanquempi peanajimpi intsajiaquempinijite maasano peamajatanajimpi.

**Jesoshi yogueshitajiri yashincaca imajirote coaretajia**  
(Irc. 7.1-10)

<sup>5</sup>Iroompaquea yoanaque Jesoshi Caperenaoqui. Arikea yarejetapojacaroquea yameniriquea icoraquepojaque aparo Iromaquitica. Iriatimpa iriguenti imajironcaca 100 igoaretajiate. Iroompaquea icampojiri:

<sup>6</sup>—Nomajirote, inorijaguitani nashin-caca notsovironaquitequi, teetari ironquempaji, yatsipevaetaca.

—Icanqueri Jesoshi:

—Iroosacanica noanaque nogueshi-tajeri.

<sup>8</sup>Icanquequea imajirote coaretajia:

—Nomajirote, aatotarite piquijitsitana-rotsi notsovironaquite, notaquetarite panaamajataquenaquea. Pincantajaniqui-queja impeapanajantempaquea nashincaca. <sup>9</sup>Quejetaca naatimpa ichooca-veca tigarancanaca, ariqueate ichoocaque nashi nogoaretajiate notigarancajiguica. Noncanterigueti: ‘Pijate’, ari iroanaque. Itsipaquea noncanterigueti: ‘Caacate’, incoraquetaque. Aisa ichoocaque nashincaca taaca opaji nomperacarica iquemisanquenaquea.

<sup>10</sup>Irooqua iquemavaquerigueti Jesoshi icanqueca yamenanaque intati, icantajiguiri oguijaguijiquerica:

—Arimaja noncanquempi, teequea namenimagueteji aparo acaniqui Ishiraeriqui inquejetempariji irica itsamajatigueti nagavejamajati, iquemisantamaja-taque. <sup>11</sup>Noncanquempiquea irimajironta-quempagueti Inquitequitica, ariquea incoraquecoraqueipoje caquintejia irisaqui-ritsaevaepojaque inquenaquenaipoje jmm

osamanipaequitica isotoguigueti catsirincaiteri, itsipajia inquenajipoje iquijigueti catsirincaiteri, intsipajapijom-priquea Averaameni, Ishaaconi aisa Jacovoni irishecajiaquempaquea.<sup>12</sup>Cotan-quitsiquea irirajia jororio inintajiavecaca Aapani Irioshi iroaroaitanaqueme aatotarite yoajiguquea, manaquea intigarancajiqueriquea osamani ocanque-gueti manquimanquimanqui. Ontaniqui-quea ontaniqui incoquempanija iriraagu-ittempani irantsicayajijianaquempa.

<sup>13</sup>Iroompaquea ipitsocashitanacari imajirote coaretajia icanqueri:

—Poanajeja, pitsaquetarite nagaveja-majati nogueshitajeri pashincaca, imaica impeanajempa.

Irooqua icanquitigui Jesoshi jac-peanaja.

**Jesoshi yogueshitajiro orijanintaroca  
imanquigare Peerero**  
(Mr. 1.29-31; Irc. 4.38-39)

<sup>14</sup>Iroompaquea yoanaque Jesoshi itsovironaquitequi Peerero, yamenapojiro-quea ivaguirote Peerero, ashinoncrajaca onorijaca ocatsirincavaeque.<sup>15</sup>Yaavacopo-jaquero ariquate ocatanaca opeanaja ogatsirincare, ariqua ocatanaja ojocacoji-ajiniri irishecajiaquempaca.

**Jesoshi yogueshiguetajiri ashinoncajaiatsica**  
(Mr. 1.32-34; Irc. 4.40-41)

<sup>16</sup>Iroompaquea opitsecanaquegueti yamajapijiniri Jesoshi icarajiaavaetaque ishaquiajiacaca ampatsini. Irooqua icantaquitigui Jesoshi ariqua icohipoi-tanaca ampatsinipae yovashiantajiana-jiri ishaquiajiavecaca. Aisa yogueshi-guetajiri maasano ashinoncajaguetan-

quitsica.<sup>17</sup>Ari icanque paesatoniqui tsavetantatsica Isaiashini itsavetacota-naquerigueti icanque:

“Yaitanacajiro agavejavetacajica, aisa yogueshiguetajaji ojoquijijiaca-gueti.”

**Nintajattsica iroguijaguijaitanaqueri Jesoshi**  
(Irc. 9.57-62)

<sup>18</sup>Iroompaquea yameniriquea Jesoshi icaramirincavaeque capiocaventajia-pajarica, icantajiguiri itsatacaanejia:

—Jaame amontemonteitanaquempaja intatquieroqui.

<sup>19</sup>Arikea icoraquepoji tsatacaanti-roca itioncacotanaqueca Moishishini, icanqueri Jesoshi:

—Tsatacaantatatsica, noninque noncoguitempani noguijaguitempini querocagueti poanaque.

<sup>20</sup>Icanque Jesoshi:

—Iriraquea zorro<sup>w</sup> chooca imoro iquijantacaca. Arikea iquempejiaca tsimeripae chooca imencoshi, cotanquitsiquea iriraquea Irijanite Caquinte<sup>x</sup> teequeate onchoocateji itsovironaquite irimaantaquempaca.

<sup>21</sup>Iroompaquea icanque aparo itsatacaane:

—Nomajirote, nonintaveca noguijaguitempini, cotanquitsiquea iroquetita nonquitatanajeritaja aapani.

<sup>22</sup>Icanque Jesoshi:

—Poguijatanaqueñaja. Pishineteri metojari ashincarica inquitatajaterita metojari.

**Jesoshi ipejairoquea choviga aisa  
imagojatacajairo iniromotija**  
(Mr. 4.35-41; Irc. 8.22-25)

<sup>23</sup>Ariquate itetanajaroquea Jesoshi quenajarontsi itsipatsipaitanacari itsataca-

**w 8.20** Ichocati zorro tomirishiqui, iquejevercari shiishi. Iriguenti shecatarica chaapa, quepigari, maasano. **x 8.20** Icanquegueti Jesoshi *Irijanite Caquinte* mana icantacotac ariatimpa, mana oquejetaca icantacoqueri itsipa. Iriotaque Quirishito Meshiantatsica quenapojoquitsica jenoqui inquitequi, icaquintetapojaquetari ivoapojaque.

neja.<sup>24</sup> Incajarán que guita tana que guetí ocho víga que guita topo jíquea in irojencata poja que choviga jeoc jeoc, otamaco jata na que in iromotija oshagui shaguiva etana que roquea quenajaron tsí. Irira quea Jesoshi yojocanacan ítin.<sup>25</sup> Itsaroajiana que itsatacaaneja itinajitsitari icanqueri:

—iNomajirote, paavaquenashiatsi ojocajate mpanishiatsi!

<sup>26</sup> Iriatimpá icantajiguiri:

—¿Quero oco tanací pitsaro antajiana caca? iTequerata píntsamajajiguena nagi nagavejamajati!

Icatiitsitanaca iquenquet satac aitaro choviga icanquero:

—Pimpeja encata na jempaja.

Icantitaro aisa in iromotija:

—Pinchopecajata na jempaja.

Ari oco tanaja osantico jencata na jí que choviga, ari oquempetanaja in iromotija ochopecajata na jí.

<sup>27</sup> Iriatimpajia yamenamen aita na que intati icantajiana que:

—¿Taashia ipaji irica? Jerompate oquemisanta maja queriquea choviga aisa in iromotija.

**Jesoshi yoguisotoacoventajajiri ishaquiajia vetacaca ampatsinipae**  
(Mr. 5.1-20; Irc. 8.26-39)

<sup>28</sup> Ora quea yarejetapojacaguetai Jesoshi intati queriqui, iguepatsitequi Garara quita ca<sup>r</sup> icora quejiapoji mavite caquinte ishaquiajia caca ampatsini. Iriatimpajia iroguenti iquena quenaipoji imperitamo-roqui yojequijita pinijitarica meto ja-tsica. Icatsimama jajia que itsaroaca amajita cari, caarica ipampoquivo quita ntitaro quenavo quirontsi oatsica ichooca jia que guetí.<sup>29</sup> Iroompaquea icajemitsiji-anaca icantajigui:

—Jesoshi Irijanite Irioshi, ¿quero quea pinco jigu enani? iRoo ca jate picora que-tashita que pantsipe ta aja quena imaica tequerata nicate areje tempa ji nantsipe-tantajia quempaca?

<sup>30</sup> Ariqueate ichoocajia que orani qui oshe qui chancho,<sup>z</sup> ishec ajiaca, icarajia-va que quea icanca.<sup>31</sup> Irirajia ampatsini shaquiajia carica icantajia queri Jesoshi:

—Poguisotoajia quenaguetai, iint sija noashijiana querita irinta chancho jia, noshaquiajia pojemparita.

<sup>32</sup> Icanque Jesoshi:

—Intsiquetirote poapoaitana que.

Icampanajanta isotosoto itapanajanti yovashiantajiana queri ishaquiajia ve-caca, irio quea yoashijia vetanaca chancho. Iroompa ishaquiajia vetapoja-cari ariqueate ico hicoitanaca ishiajia-naca ojegui roncapo jacaguetai itan quire-tan quiretana que yojocajajia pojaca, icampo jaca teron maasano jia.

<sup>33</sup> Ariqueate yamenajia va querigueta quempogui jajigu irica itsaroajiana que, ishia shia itanaca yoayoai tana que igu intenijia caguetai icamanta jia pojiri ignoro jia yojocajajia caguetai chancho. Aisa itsavetanta jia poja queriquea quero quea ico hicoitanacan ishaquiajia vetapoja cariguetai ampatsinipae.

<sup>34</sup> Iquemitsita quea iriatimpajia yoayoai-tana que quea ontani qui ichoocaque que guetí Jesoshi, icantajajiri iroanaje irovashian-tsitanajeri iguepatsite.

**Jesoshi yogatiajiriguetai teeca ironquempaji**

(Mr. 2.1-12; Irc. 5.17-26)

**9** <sup>1</sup> Iroompaquea itetanaja quea Jesoshi quenajaron tsí qui imonteja-cota na jia yoanaji igu inten i caguetai.

y 8.28 iguepatsitequi Garara quita ca. Chooca otsipa paperi otioncacota caguetai acanqui Jerejesa quita ca (gergesenos), otsipa paperi ocanti Jerasa quita ca (gerasenos).

z 8.30 Irira chancho iroguenti viratsi queje vatarica santaviri.

<sup>2</sup>Ariquea icoraequejiapojiquea itsipapae caquintejia yamacojiapoaqueri teeca ironquempaji, yaajianaqueneriquea Jesoshi irogueshitajeri. Iriraquea Jesoshi itsajjavaqueri yaventajapojacari irogueshitajerini, icantantacarica teeca ironquempaji:

—Irijani, pishinevaetempaja. Jac shetacotajimpi maasanopae pipeacaaguishevecaca.

<sup>3</sup>Ariquea ichoocajiaque oraniqui tsatacaantajiguiroca itioncacotanaqueca Moishishini. Iquemajavaquerigueti icanqueca imaica, iquenquejajianaque intati: “Manatari iquejemanatanacari Aapani Irioshi.” <sup>4</sup>Cotanquitsquea Jesoshi itsajjavaqueriquea iquenquejajaqueca icantsijigari:

—¿Queroquea picopicoitanacani piquenquejajianaquequea teeca oncameetsateji? <sup>5</sup>¿Querocampate caavijica anaaque mananquitsica? ¿Iroocaja nocantaquerigueti: ‘Jac shetacotajimpi maasanopae picovaeguishevetacaca, aatoquea iquenquejacaajimpiro Aapani Irioshi’, iroocaja noncanqueri: ‘Pincatianaje panijitanaje’? <sup>6</sup>Imaicaquea namenacaajiaquempiroquea yagavejaque ocaniqui quepatsqui irira Irijanite Caquinte irishetacoitajeri ipeacaagushevecaca caquinte.

Iroompaquea ipitsocashitanacari teeca ironquempaji icanqueri:

—Pincatianaje, paanajero pinorijanca, poanaje pitsovironaquitequi.

<sup>7</sup>Ariqueate icotanaja icatiapanajanta yoanajiquea itsovironaquitequi.

<sup>8</sup>Oraquea yamenajiaavaquerigueti maasano omporoguiajianquitsica itsaroajianaque, ariquea ishineventajinacari Aapani Irioshi, yamenajiaquetari mana yagavejacaajiaqueri caquintepae ironigaantajiaquero oacaantantatsica intati.

Jesoshi icanqueri Mateo  
iroguijatanaquerija  
(Mr. 2.13-17; Irc. 5.27-32)

<sup>9</sup>Iroompaquea yoanaque Jesoshi icantanaca oraniqui yamenapojiri aparo capiocapinitinirica majirontatsica imentaquipae. Ipajita Mateo. Iriatimpa iroguenti isavicaque ontaniqui ipashicasarajitirogueli yoguijajavaqueri avisavisaitatsica ivergaratacaajiaavaqueri imentaquitsite maasano aajananquitsica irajaararopae irooca taaca opajitapae. Iroompaquea iriraquea Jesoshi icampojiri:

—Jameja, poguijatanaquena. Iriatimpa icatiapanajanta yoanaque yoguijatanaqueri.

<sup>10</sup>Ariquea Jesoshi yoanaque itsovironaquitequi ishecaciaca itsipatsipaitanacari itsatacaanejia, jerija itsipajia capiocapiniji-guinirica majirontatsica imentaquipae, jeri aisa itsipajia covaeguishejiatsica.

<sup>11</sup>Iriraquea pariseojia yamenajiaavaquerigueti Jesoshi itsipatsipaitacarigueti ishecaciaca-gueti, icanqueriquea itsatacaanejia:

—¿Quero icocani irira tsatacaaajiguim-pica ishecatacojiacari capiocapiniji-guinirica majirontatsica imentaquipae, jeri aisa itsipapae covaeguishejiatsica?

<sup>12</sup>Oraquea iquemavaquegueti Jesoshi icantajiguiri:

—Iriraquea teeca irashinoncajempaji teetarite incoguitejacotemporapii aavintantatsica. Iriquenti coguitejacoji-gari ashinoncajaijatsica. <sup>13</sup>Poapoa-naje pinquenquejajiaqueroja pintsjajia-queronijite icanqueca Aapani Irioshi icanquegueti: ‘Caaviji anaaque nonintamajaque pimpintsatacotantajiguempaja, anaquieroqua pjitorejajiguenerigueti viratsipae pintaashiquenarigueti.’

Teetarite iroquea noncoraquetashiteji teeca incovaeguishejiguempaji noncaje-majiaqueri, irquenti nocoraquetashiji-

aque covaequishejiatsica noncajemajia-queriquea cameetsanijite incantashitati-jaianajempanijite irovashiantanajeroni-jite ipeacaaguishevetecta.

**Icoacojitaqueriquea Jesoshi  
irisanticotantajitemparoca isheca**  
(Mr. 2.18-22; Irc. 5.33-39)

<sup>14</sup>Iroompaquea icoraugecoraqueipo-jaque itsatacaanejia Joanca Viñacaja-tantatsica icantajapojaqueri Jesoshi:

—¿Quero ococani naatimpajia aisa pariseojia nosanticotapinijiguquea teequea noshecajiguempaji, cotanquitsi-quea iriraquea pitsatacaanejia teetarite ariuea inquempejiguempaji imaica?

<sup>15</sup>Iroompaquea iquejetacaaca Jesoshi icanque:

—Pinquenquejeroja inchoocategueti iriaqueraca manquigatanquitsineca incajemajiaqueriquea itsipavijijiaca irishecatacaajaqueempari, ɔarimpare aatompate ishecajiga? Irishecashecaita-naquempaquea, itsipatsipaitacaritarite cajemajiaquerica shinejiacaquea. Cotanquitsiquea oraqueate aapojempa-gueti incatsimatantajitaquemparica irajaitanaqueriquea osamani, ariuea iroguenti irisanticotantajitemparoca isheca, irishimampojancacojianaquem-pari.

<sup>16</sup>“Aatoquea ocameetsati oncotatemparo-gueti quitsaarentsiqui iroquetishitequifica incotatantajivetaquemparo iroqueramore-natica quitsaarentsi. Irajaquitsijivetemparo-quea ariueate oncotaquempani ontsiñotsiñomorenatanaquequea arimpaquea omperejanaqueroquea.<sup>17</sup> Aisa ari onquempetaquemparouquea iroguijaa-tajitaquemparogueti vinoja<sup>a</sup> iroquerajatica

oncachotapoje iroguijaa-tantajivetaquempa-rogueti imeshinanaquiqui iriquetinica oroameshinatananquitsica. Oncachojamaja-vetanaquempagueti oshimoajavetana-quempa, ariuea oncotaquempa aravoave-taquitempa imeshina, intyaquisanaque oshacojaata-naquempaquea vinoja, aisa impomatsataquempaquea imeshina imperejanaque. Jero caaviji ocameetsa-vaeque impijaatantajitaquemparouquea iriaquerameshinari cameetsanijite aatonijite opomatsajata vinoja, aisa aatonijite ipomatsatatsi imeshina.”<sup>b</sup>

**Jesoshi ivochatajiro irorianite Jairo**  
(Mr. 5.21-43; Irc. 8.40-56)

<sup>18</sup>Choocatiraja quenquetsatanatsitiraja Jesoshi, icoraugepojaque aparo jivatatsica, iguerovempojacari icanqueri:

—Iraquererasano metojananquitsi norijanite. Jaame pimpamitaquitenaro ontancorejanajenijite.

<sup>19</sup>Iroompaquea icatiapanajanta Jesoshi yoguijatanacaqueri itsovironaqui-tequi itsipatsipitanacari itsatacaanejia.

<sup>20</sup>Ariuea ochooquaque aisa oraniqui manquigarentsi ashinoncaavaetanquitsica ososojavaetini coramaní, ariuea ocarataco-vaetanaqueni 12 ajagantsiteni. Iroatimpa ojocavaetapoja quempeji ocoraquetashipojiri itaquiui ochagatsaequitsitavaqueri ocaramagotapojaquegueti irogataamagoro.

<sup>21</sup>Oquenquejitsitanacaquea incajaranqui ocanque: “Iroguenti nonchagatsivetaquem-pari irogataamagoro nompeanajempaquea.”<sup>c</sup>

<sup>22</sup>Iroompaquea ipitsocanaca Jesoshi yameniroquea icanquero:

—Orijani, pishinevaetempaja. Irooriji pavenuenatarite naatimpa, irootari piveantanajaca.

**a 9.17** Ocachotanaquegueti ovaja opeanacaquea *vinoja*. **b 9.16-17** Itsatacaantica Jesoshi iroguenti quejetacaroca quitsaarentsi iroqueraro, oquejetacaro aisa vinoja iroquerajatica. Aato agaveji otsipataro itsatacaantica pariseojia aisa tsatacantajiguiroca itioncacotanaqueca Moishishini.

Icanquitiguiro jac peamajatanaja.

<sup>23</sup>Iroompa yarejetapojaca Jesoshi iquijapojo itsovironaquitequi jivatatsica, yamenajapojiri covijiatsica covijiaque. Irirajia iraacojiaqueroca metojatsica iraajiacajacajemajiaque. Icantajiapoqueri:

<sup>24</sup>—Pijajavajeta. Teetarite ometojeji, mana omaaque intati.

Ariqueate icojanaca ishirontimentajianacari. <sup>25</sup>Irooqua yoguisotojaiquerigueta iquijitsitanaca intsompogui yaavacopojaqueroquea. Ariqueate octanaca otancorejanaja ocatianaja. <sup>26</sup>Iroompaquea ari maasano choocajatsica oraniqui osamanipaequitica iquemacojiaqueri itancorejapiroquea irorianite jivatatsica.

**Jesoshi yamenacajairi mavite shamoncajavetanquitsica**

<sup>27</sup>Iroompaquea yoanajigueta Jesoshi yoguijaguijaitanajiri mavite shamoncajari icajemacovaetavaqueri icanqueri:

—iChoviquini Taavini,<sup>c</sup> pimpintsatacogajoitenashiatsi!

<sup>28</sup>Ariqueate yarejetapojaca Jesoshi tsovironaquipui iquijitsitanaca intsompogui. Irirajia shamoncajari guijaguijaitanaquerica iquempejiquempejiopojiri. Icantavaqueri Jesoshi:

—¿Pitsaquinampa nagavejaque nantero oca?

Icantajianaque:

—Jeeje, Nomajirote, pagavejaque.

<sup>29</sup>Arikea ipamitsitari iroquijaqui icantajiguiri:

—Pitsaquinatari nagavejaque, ari nonetsanatanaquempiro.

<sup>30</sup>Ariqueate icojanaja yamenajianaji. Iroompaquea Jesoshi icantimentajaviajiri icantiriquea:

—Shoshoh inchiquiojitajate pitsavetampojirotsija.

<sup>31</sup>Cotanquitsiquea yoayoaitanajigueta jatanatsi itsavetantaguetanaqueriquea querocagueta ontaniqui.

**Icanquerigueta Jesoshi iquenquetsatanaji macanari**

<sup>32</sup>Incajararanquiguitetanaquitigui quea icoraquecoraqueipojaque itsipapae yamajapojaiqueriquea macanari ishaquiacaca ampatsini.

<sup>33</sup>Irooqua yoguisotoaquerigueta Jesoshi ampatsini, ariqueate icotanaja iquenquetsatanaji macanari. Yamenamenaitanaquequea intati maasano icantajianaque:

—Teetarite irinejajigueteroji quejeguetacaroca ocatica ocaniqui Ishiraeriqui.

<sup>34</sup>Cotanquitsiquea irirajia pariseojia icantajiaque:

—Iriguentiquea agavejacaqueriquea imajirote ampatsinijia yagavejantacaca yoguisotoajaiqueri ampatsinipae shaquiajiavecarica caquinte.

**Jesoshi ipintsatacojaciari maasanojia**

<sup>35</sup>Iroompaquea yoanaque Jesoshi yoantanacaroquea oraniqui itsitacagueta-naqueroquea ocapiocaguetaqueti tsovironaquipae. Itsatacantaguetanaquequea shinagogapaequi icapiocantapinitacaca joriojia itsavetantaquero Quenquetsatsarentsi Oganejencatatsica icantajiaqueri quero icotani imajirontagueti Aapani Irioshi. Aisa yogueshijajiri maasano ashinoncabajatsica. <sup>36</sup>Oraquea yamenajiquerigueta maasano caquinteja ipintsatacojianaacari oshequi, yamenajiaqueriquea yatsipevajiacaa taaca opajitapae, ishimampojancajiacaca, mana iquempejiacari oveja

**c 9.27 Ichoviquini Taavini**, irootaque icantajitiri Meshiantanquitsineca coraquetanquitsineca.

teeca inchoocateji quempogujirica.

<sup>37</sup>Iroompaquea icantajiguiri itsatacaaneja:

—Arimajaquea chooca icaramirinca-  
vaeque nintajianquitsica irimeshiajqueri-  
quea, cotanquitsiquea teemajaca iroshequi-  
amajateji tsatacaajiaquerineca cameetsani-  
jite irimeshiimentajiquerinijite. Iroguenti  
iquempejiacaroquea osampatigueti  
tirigoitoqui iniroteji teemajaca iroshequia-  
majateji aviguitaqueroneca. <sup>38</sup>Irootaque-  
queate imaina noncantantajiaquempica  
pamanajiaquerija Aapani Irioshi pincanta-  
jiaqueri intigarancajiaqueri tsatacaajiaque-  
rineca.

Jesoshi yaajiaqueriquea 12

impeacaaajiaquempaca itigarancaneja

(Mr. 3.13-19; Irc. 6.12-16)

**10**

<sup>1</sup>Iroompaquea icajemajiaqueri-  
quea Jesoshi itsatacaaneja  
carajianquitsica 12, yagavejacaajiaque-  
riquea ironigaitssijaquempariquea  
ishaquiajiacaca ampatsinipae, aisa  
irogueshijiaqueriquea aajiaquerica  
cantashitatiaguetanquitsica ashinoncaya-  
gantsipae aisa joquijirentsipae. <sup>2</sup>Iriatim-  
pajia carajianquitsica 12 ipeacajaiacari  
itigarancaneja. Iroguenti ipajijiga:

Shimo (icantajitica aisa Peerero)  
aisa Antirishi (iriguentijeguite  
Peerero);

Santiago<sup>d</sup> irijanite Severeo, aisa  
Joanca iriguentijeguite Santiago;

<sup>3</sup>Jeripe aisa Varitorome;  
Tomashi aisa Mateo (capiocapiniti-  
nirica majirontatsica imenta-  
quipae);

Santiago<sup>e</sup> (irijanite Arejeo) aisa  
Tareo;<sup>f</sup>

<sup>4</sup> Shimo (icantajitica “Serote”)<sup>g</sup> aisa  
Jorashi Ishicariote, aacaanque-  
rineca Jesoshi.

**Jesoshi itigarancajiaqueri 12 itsatacaane  
iroaroaitanaque intsavetantajianaque**  
(Mr. 6.7-13; Irc. 9.1-6)

<sup>5</sup>Ariuea itigarancajiaqueri Jesoshi  
irirajia carajianquitsica 12, itsatacajai-  
vaqueri icanque: “Aatoja poapoaitashiji-  
guiri teeca irijorijoigueji pintsatacaajia-  
queri. Irirajia Samariaquitica aatoja  
piquijajiguitsi ontaniqui iguinentijia-  
gueti. <sup>6</sup>Iroguenti poimojianaque  
maasano ishiraerija, iroguentiquea  
iquempejiacari oveja peajianquitsica.

<sup>7</sup>Imaina poajianaqueja pintsavetantimo-  
jianaquerija pincantajiaquerija: ‘Irooshi-  
pojaque aapojaquempaquea irimajiron-  
taquempa acanqui Inquitequitica.’

<sup>8</sup>Pogueshiguetaquerija avejancagueta-  
tsica iriguentijiac aisa itsipapae  
ashinoncaya jatiatsica. Pintancorejagueta-  
jerija metojaguetanquitsica, aisa  
poguisotojaijenerija ishaquiajiacaca  
ampatsinipae, cotanquitsiquea aatoja  
pivegaratacaaajigaritsija, quejecaquea  
naatimpa teequea novegaratacajaguem-  
piji nagavejacaajiaquempigueti. <sup>9</sup>Aatoja  
paajiguitsija pimentaquisite; <sup>10</sup>aatoja  
paajiguiquea pitsaratote, iroguenti  
paajianaque apamorenaro piitsaare  
piquitsaatacaca, aisa pigaviguitire  
picavijiacaca; aatoja paajiguitsi pigotiro;  
icantajitrotari cameetsavaeque irojoca-

**d 10.2** Irira *Santiago* ipajita aisa Jacovo. **e 10.3** *Santiago*. Chooca mavite *Santiago*, pajitatsica Jacovo. **f 10.3** *Tareo*. Irioca icantajitica aisa Jorashi irijanite *Santiago*. Pamenero Irc. 6.16 aisa Ya. 1.13. **g 10.4** *Serote* oncanque “nintamajatatsica”. Irooqua icantajitiri irirajia jorioja nintamajatanquitsica iroguisotoajigueri Iromaquitica omperaperaacarica onchoocatashitajempanijite iguepatsite ishiraerija. Acanqui Mateo icantiri “kananitas”, irooqua oponeaca iguenquetsatsarequi arameo, oncanque “nintamajatatsica”, tee oncanjeji iponeaca Canaanequi. Irocashi (6.15) icantiri iguenquetsatsarequi guiriego “zelotes”, irootaquequea ationcantacaroca “Serote”.

jiqueneriquea catsiquetatsica irisheca-quempaca.

<sup>11</sup>“Querocagueti oraniqui parejerejei-pojaquempagueti pincoaguetapojaqueri cavintsajantatsica aavaquempineca cameetsa, irioquea pimaimoquiaque irosati arejetapojaquempagueti poantajianajempaca. <sup>12</sup>Poajianaquegueti itsoviornaquitequi pinquijajapojegueti pincantajiaqueriquea: ‘Noninque incavintsaajajaqueempiquea Aapani Irioshi.’ <sup>13</sup>Irishineventajiaquempi-gueti, irioquea shineventajiaquemparine Aapani Irioshi incavintsaajajaquequeriquea. Oraquea aatogueti ishineventajigum-pitsi, aatoquea ishineventajigaritsi Aapani Irioshi aato icavintsaajajiguiri, aparoquea incavintsaajajaqueempiquea aviatimpajia. <sup>14</sup>Oraqueate querocagueti poapoitanaqueni oraniqui, aatogueti ishineventajavajimpi, poapoitanajeja, cotanquitsiquea iroquetitaja pantecama-jatanaquereroja quepatsivane pagatiqui-tsitapojaquerigueti iroonijite iramenan-tajiaquempaca manaquea yantaque teeca oncameetsateji. <sup>15</sup>Arimajaquea oncoramanitapojaquempi-gueti arejetapoja-jempagueti incatsimatantaquemparica Aapani Irioshi, caaviji incatsimamajajia-queriquea irirajia teeca irishineventajia-vajempiji, anaamajataqueroquea incatsimamajajiaquerigueti quintenijia-vetanquitsica coramaniquitica Soromaqui aisa Gomoraqui.<sup>h</sup>

#### Irantsipetacajitaquempari itsatacaanejia Jesoshi

(Mr. 13.9-13; Irc. 21.12-19)

<sup>16</sup>“Imaicaquea nontigarancajiaquem-piquea, onquejevetaquempa intigarancajiterigueti ovejapae inconoitempari lobopae<sup>i</sup> catsimari. Iroguenti pinquem-

pejiaquempari casantonqueni itsatigueti, cotanquitsiquea aatoja paashitantajiatsi, aisa aatoja pipigatsa-tantajiatsija, iroguenti pinquempejia-quemparija emoren. <sup>17</sup>Pagamajajia-quemparija caquinteja; irajaianaquempi icapiocajiacagueti jivajatsica incatsima-tacaantajiaquempiquea, impasatacaan-tajiaquempi agompiquitempi shinago-gapaequi icapiocantapinijiaca pagon-rojia. <sup>18</sup>Aatoquea aparo ocatica. Irajaianaquempiquea aisa iramajiro-requi, jeri aisa majirontajiatsicaqui, incatsimatacaantajiaquempiquea irooriji poguijatacotaquena naatimpa. Ariquea pintsavetantimojianaqueriquea iriatimpajia, iriguentijia aisa maasano teeca irijorijoigueji, pintsavetacojiaque-naja naatimpa. <sup>19</sup>Oraquea irajaiana-quempiqueti majirontajiatsicaqui aatoja pishoshoguitetatsi, aatoja piquenquejajigui: ‘¿Querocaca noncanqueni?’ InquenquejacaajajaqueMPIotari Aapani Irioshi cameetsanijite pintsajiaquenijite querocaca pincanke. <sup>20</sup>Aatoquea inchiquiojitala piquenquetsajigui aviatimpajia, irioquea quenquejacaajia-quempironeca Ishire Aapani Irioshi chocashirentajiaquempica.

<sup>21</sup>“Inconoagaranquempaquea iraacaan-tajiaqueri iriguentijeguijate irashimajaca igonoromajaca irimetojacaantajiaqueri, itsipaquea iraacaantajiaqueriquea irijanijate. Ariqueate inquejiaquem-paquea itsipa iraacaantajiaqueri iriri irimetojacaantajiaqueriquea. <sup>22</sup>Maasa-nopae irisemaneguintimentajiaquempiro-quea novajiro pitsarovenentajiaquenagueti, cotanquitsiquea quericaca atsipetacovae-tanquitsineca aatogueti yovashiantirotsi itsarovenquenagueti arejvaequempa irimetojanaje, irioquea iriguenti

<sup>h</sup> 10.15 Soroma aisa Gomora. Pamenero Jen. 18.20-21; 19.23-29. <sup>i</sup> 10.16 Irira lobo iriguenti tomirishiquitica catsimari quejevercarica iririjegui shiishi.

irajaitanaje inquitequi.<sup>23</sup>Querocagueti irantsipetacaajiaquempigueti oshequi, poapoaitanaquequea pishiashiaitanaquequea. Arimajaca noncantajiaquempi tequeratagueti pintsitacaguetejajigueroji maasanopae iguintenipaequi ishiraerija pintsavetantimojianaqueri, incoraquetajate Irijanite Caquinte.

<sup>24</sup>“Iriraquea itsatacaya jita teetarite iranaguerji tsatacagurica. Arikea iquejetaca yashintajitaca teetarite iranaguerji ashincarica.<sup>25</sup>Aisa iriraquea itsatacaya jita ariquea inquejetaquemparija tsatacagurica. Arikea iquempetaca yashintajitaca, ariquea inquempetaquemparija ashincarica. Quempeca naatimpa Pimajirote ariqueate icantajiquenaquea Veeresevo,<sup>j</sup> ogashia aviatimpajia caaviji irogaajitaquempi.

**Apatiromajaca**  
**intsaroacaamajajitaquempari Aapani**  
**Irioshi**  
*(Irc. 12.2-7)*

<sup>26</sup>“Irootaquequea noncantantajiaquempica aatoja pitsaroacaajigaritsi caquinte, iroorihi maasanopae isenacajivetacaca imaica oncoramanitapojaegueti intsajitaqueroquea. Arikea oquejetaca maasanopae itsitijigueveta caca imaica, oncoramanitapojaegueti ironigaantajitaqueroquea.<sup>27</sup>Taaca opajitapae nocanquempica pitsecariqui, pintsavetanteroquera savincaguiteriqui. Taaca opajita nocantajiaquempica inchiquioji piguempiataqui, iririjencaniquea pintsavetantero sotsiqui omencota pojacagueti pitsovironaquitequi ovancaitoqui.<sup>28</sup>Aatoja pitsaroacaajigaritsi nintajianquitsineca irimetojajiaquempiquea. Iriatimpajia irimetojajiaquempigueti, iroguentiquea metojan quitsineca, cotanquitsiquea

aatotarite yagavejajiguirotsi irimetojajiaqueroquea pishire. Iriguentiquea pintstarsoacaamajajempaja Aapani Irioshi, apatirotarite icocani iriatimpa yagavejiquea incanque querica metojan quitsineca, iroompapea iragavejaque intigarancaqueroquea ishire camorecariqui.<sup>29</sup>¿Arimpate teequea pamenajiguériji tsimeripae ari ivesgarataca mavite tsimeri apamentaquitiro imentaqui? Cotanquitsiquea aatoquea yomposa aparo quepatsiqui aatogueti irio nintatsine Piri.<sup>30</sup>Quejetacaquea pimaejia, ariqueate itsatiroquea apamaeropae.<sup>31</sup>Irootaquequea noncantantajiaquempica aatoja pitsaroajiguitsjate, caavijitarite panajaiaqueriquea tsimeripae.

**Teeeca impashiventacaiguempariji**  
**Jesoirishito**  
*(Irc. 12.8-9)*

<sup>32</sup>“Quericaca cantamajaqueroneca itsaroventamajataquena incamantajiaqueri gueti caquinteja, ariqueate nonquejetaquempaquea naatimpa oncoramanitapojaegueti, noncanque: ‘Naroguenti ashincari’, inquemavaquenaquea Aapani chocatatsica inquitequi.<sup>33</sup>Cotanquitsiquea quericaca cantaquerineca caquinte: ‘Teetarite nontsaro ventempariji Jesoshi’, ariqueate nonquejetaquempaquea naatimpa oncoramanitapojaegueti, noncanquequea: ‘Teequea naroguenti ashintemparine’, inquemavaquenaquea Aapani chocatatsica inquitequi.

**Teequea irooqua incoraquetashiteji**  
**Jesoshi incantajiaqueri maasanojia**  
**inque mavacaajiaquempa**  
*(Irc. 12.51-53; 14.26-27)*

<sup>34</sup>“Aato pijijiguitsi irooqua incoraquetashique noncantajiaqueri maasano

<sup>j</sup> 10.25 Veeresevo. Iroguenti otsipa ivajiro Satanashi, imajirote ampatsinijia. Pamenero Mt. 12.24.

quepatsiquitica inquemavacaajia-quempa iraavacaajiaquempa. Teetarite irooqua noncoraquetashiteji, iroguenti-quea nocoraquetashique ompampiata-nanaquemparoqua intsinampirejava-caajianaquempa, incatsimajitanqueri-quea tsaroventaqueaneneca.<sup>35</sup> Iriraquea irijanite incatsimatanaqueriquea iriri. Oratica orijanite oncatsimatanaquero-quea iniro. Aisa oratica imanquigata-caca irijanite oncatsimatanaqueroquea ovaguirote.<sup>36</sup> Ariqueate onquejetana-quempaquea, inchoocajiaque quemisan-tajiaquenanea incatsimajiaqueriquea ijijiguica.

<sup>37</sup>“Aatotarite nompeguiritsi notsata-cane quericaca caavijica ipintsama-jatari iriri, iriniro, aatomajaca naatimpa ipintsamajatana. Aisa aatotarite nopeguiritsi notsatacane quericaca caavijica ipintsamajatari-quea irijanite, irorijanite, aatomajaca naatimpa ipintsamajatana.<sup>38</sup> Arikea nonquejetaquempa aisa aatotarite nopeguiritsi notsatacane quericaca teeca irininteji iraanontanaquempa ivoatsite irompajacotantajitaquempa-rica irantsipeventavaeten airoguijata-cotantanaquenaca.<sup>39</sup> Quericaca teeca irininteji irantsipeventenaji irooca irimetojavenquena, manaquea impeaquempa; cotanquitsiquea iriraquea teeca irinintimateji irantaguetaquequea taaca opajita inintaguequea iriatimpa iroguenti irinique irantsipevenquena irooca irimetojavenquena, iroquea iroguenti incoguitempani inchoocaguiteni.

#### Querica incavintsajaqueca Aapani Irioshi oncoramanitapojajegueti (Mr. 9.41)

<sup>40</sup>“Taacagueti aaajiavaquempineca shineeventajiaavaquempineca naroguenti ishinevenca, ariquea

iquejetaca quericaca shineventaque-naneca naatimpa, iriguenti ishinevenca aisa tigarancaquenaca.<sup>41</sup> Quericaca aavaquerineca tsavetaco-tirica Aapani Irioshi inquemisanta-querigueti yamenaquegueti iriguenti tigarancaqueriquea Aapani Irioshi, iriatimpa irishineventaquempariequa incavintsajaqueriquea inquempeta-aaquempari icavintsajaquerigueti irira tsavetacotaquerica. Arikea inquempetacaajitaquempari quericaca aavaquerineca comajamajatatsica iramenaquerigueti icomajamajataca, irishineventamajaquempariequa Aapani Irioshi incavintsajaqueriquea inquempetacaajitaquempariequa icavintsajaquerigueti comajamajata-tsica.<sup>42</sup> Arikea iquejetaca quericaca cavintsajaquerineca chaajanquiri teeca iranaantavaeteji iramenaqueri-gueti yoguijatacotanaquena, iroguen-tigueti irojocavetaquenempari catsincajari irimiraqueca, arimaja aato opeapitsatari iramenacotajem-paca.”

Joanca itigarancijaqueriquea  
itsatacaanepae incoacojiaquieri Jesoshi  
(Irc. 7.18-35)

**11** <sup>1</sup>Iroompaquea iteronacaquero-gueti Jesoshi itsatacajiaque-riqueti itsatacaanejia carajianquitsica 12, yoanaque osamanipaequi ocapio-caguetacagueti tsovironaquipae itsavetantavaeque, itsatacaantavae-taque.<sup>2</sup> Iriraquea Joanca choocatiraja isantanatacojitaqueri. Iroompaquea icamantajitaquerigueti itsavetanta-vetaque Quirishito, aisa yogueshi-guetaqueri icaramirincavaetaque ashinoncajajianquitsica, itigarancija-queriquea Joanca mavite itsatacaanejia incoacojiaquieriquea.<sup>3</sup> Icantaji-apojiri:

—¿Aviguentica noguijajiavecaca?  
¿Irooca noncantacoguitempani noguijajaguitarini itsipa incoraquetaque?

<sup>4</sup>Iriraquea Jesoshi icantajiguiri:  
—Imaicaquea poapoaitanaje pincamantajiapojerija Joanca maasanopae pamenaquequitica aisa piquemajiaquitica.

<sup>5</sup>Iriraquea shamoncاجاivetatsica yamenamenaitanaji. Iriraquea teeca iranijijiavetempaji yanijijianaji. Ariquea iquejejia avejancaripae ipejaianaja. Iriraquea teeca inquemajiavetempaji iquemajianaji. Aisa iriraquea metojaqueta-tsica itancorejajianaji. Iriraquea coguitejacojianquitsica<sup>k</sup> imaica itsavetantimojiqueruea itsatacayaqueri Quenquetsatsarentsi Oganejencatatsica. <sup>6</sup>Caavijiquea irishine-vaequempa quericaca incantacoguitempani intsaroventamajataquena, quericaca caarica ovashiantajana.

<sup>7</sup>Ariquea yoayoaitanajigueti itigarancajiaqueca Joanca iquenquetsavaetana-quequea Jesoshi iquenquetsatacoqueri Joanca, icantajiguiri maasano: “¿Taaca-quea poapoaitashitaquiti ontaniqui oquitamampororoitapojaquegueti? ¿Arimate iroquea poapoaitashitaquiti pamenaquiaquiro savorovana ojeonqui-rogueti choviga, ariquea oaquito oaquito?<sup>l</sup> <sup>8</sup>¿Ariquea taaquea poashijia-quiti? ¿Iriocaja poashijiaquiti pamenaquiaquiro taaquinte quitsaataroca shipetamorenaro quitsarentsi? Pitsajaque-quea maasano quitsaataroca shipetamorenaro quitsarentsi manaquea isavisaviiit itsovironaquitequi majiron-tatsica. <sup>9</sup>Iroosacanica ¿taaquea poapoaitashitaquiti? ¿Iriocaja poapoaitashitaquiti pamenaquiaquiro tsavetantaquerica Aapani Irioshi? Jeejeguitatsi, iriotaque,

cotanquitsiquea iriatimpa caaviji yanaaguequeri itsipajia tsavetantajatatsica. <sup>10</sup>Iriotaque itioncacojiqueca coramani iquenquetsatacaquerigueti Aapani Irioshi Irijanite, icanqueri:

‘Ari nontigarancaqueri iriquetica oananquitsineca, intsavetacotempi.

Irio camantajiaquerineca igonorojia queroca pinquenanaqueni irinetsanatashitantajiavaquem-pica.’<sup>m</sup>

<sup>11</sup>Arimajaca noncantajiaquempica: maasanopae caquintejia teetarite inchoocatimateji aparo anaquerineca Joanca Viñacajatantatsica, cotanquitsiquea maasano majirontajiacarica Inquitequitica, irirajia teeca iranaajencavavetempaji, caavijiquea icavintsajamajajiaqueri, oquejevetaca yanaajiaqueri Joanca.

<sup>12</sup>“Coramaniquea iroqueragueti iparianacarogueti Joanca Viñacajatantatsica itsavetantavaequerogueti arejevae-caroqueua imaica, iriraquea catsimatan-tajatiatsica icatsimativentajiaqueriquea maasano tsavetacojiguirica Inquitequitica quero icotani imajirontagueto, teetarite irinintajigueji inquemisantajiteriji aatonijite quericaca peguiritsi Aapani Irioshi Imajirote. <sup>13</sup>Maasano tsavetantajatiatsica itsavetacojiaqueri Aapani Irioshi coramani arejevaecarоquea ichooaquegueti Joanca Viñacajatantatsica. Ariquea iquempetaca Moishishini iriatimpa itioncacotaqueri.

<sup>14</sup>Iriraquea Joanca iriotaquequea tsavetantatsica Iriashini piquemacojia-queca incoraquetaque. Arigueto pininta-jiaque pinquemisantajiavaquero nocanquempica, pinquemajiavaquero-

**k 11.5** Icanquegueti coguitejacojianquitsica iquejetacaacari aisa irirajia tsavianquitsica teequea iragavejeji inchiquiojita irimeshiguempaji. Pamenero Mt. 5.3. **l 11.7** Icanquegueti savorovana iquejetacaacari aisa caquinte teeca intampishitashigueteroji maasano amataagantsi, aca icanti aca icanti. **m 11.10** Mara. 3.1.

quea.<sup>15</sup> Choocagueti piguempita pinquemantavaquempaca, pinquemeja.

<sup>16</sup>“¿Quero icojigani caquinteja choocajianquitsica imaica? ¿Taa ipaji i quempejiaca? Iriguenti i quempejiaca chaajaniquitirajaca irisavisaviague-gueti tsovijaguiteriqui irantanavijitem-pagueti, iroomba ari incatsimatavacaajianaquempa incanquequea:

<sup>17</sup> ‘Nocovitimojiaquequempiquea

teequea pintsamarojigueji.

Ariquea namashaitimojiavet-aquempi amashairentsi yama-shajitica ishimampojancajita-gueti

teequea pirajaiguempaji.’

<sup>18</sup> Arikeate piquempejiaca aviatimpajia. Icoraquevetaca Joanca teequea irishecatempaji ishecapinitaca igonororja, aisa teequea irimirimatempoji cachojaro, manaquea picantacojiaqueriquea: ‘Ishaquiacari ampatsini.’<sup>19</sup> Arikea imaica icoraquevetaca irira Irijanite Caquinte, ishecataca iriatimpa, imiraca, arikeate picantajiaque: ‘Iriguenti shecrajanti, iriguenti shinquitatsica, aisa iriguenti itsipavijijiapojaca covaeguishejiatsica aisa capiocapinijiguinirica majirontatsica imentaquipae.’

Cotanquitsi onconijavaetanaque itsatica tsamajatatsica amenajiaquerogueti quero ococani yantaguetaqueca.”

**Jesoshi icantomajajiaqueriquea  
guinentiatisca Corashiniqui, Vetsairaqui  
aisa Caperenaoqui**  
(Irc. 10.13-15)

<sup>20</sup> Iroompaquea Jesoshi icantomajitsiji-gari ipeacaimojiavecaca oshequini oacaantantatsica intati, yamenajiaqueritarite teequea incantashitatijaquempajis tsaroventajiguemparji Aapani Irioshi, icanqueriquea:<sup>21</sup> “¡Imaicashiatsi

pantsipevaetempanishiatsi aviatimpajia guinentiatisca Corashiniqui! ¡Imaicasashiatsi pantsipevaetempanishiatsi

aviatimpajia guinentiatisca Vetsairaqui! Pamenajiavecaroquea nonigaimojiaquequempica oacaantantsica intati, cotanquitsiquea teequea pinintajigueji pincantashitatijaana-jempa povashiantajanajeroji picovae-guishejiacagueti. Iriraquea guinentijia-vetatsica coramani Tiroqui aisa Shironequi iriome amenajiguerome, incantashitatijaanaquempamequea inquitsaaquiaquemparome jiriquipijiporoquiero, aisa irigachoncaguinajiaquem-paromequea cachopoquiri ironigaanta-quempanijite ishimampojancajica yamenajiaque icovaeguishejiaca, incantashitatijaanajemparequea.

<sup>22</sup> Cotanquitsiquea noncanquempiquea aviatimpajia arejetapojajempagueti incatsimatantajiaquemparica Aapani Irioshi maasano teeca intsaroventajiguemparji, caaviji irogaamajajiaquem-para anaamajajeroquea incatsimajajiaqueri-gueti Tirojiaquitica aisa Shironejiaquitica.<sup>23</sup> Aviatimpajia guinentiatisca Caperenaoqui paventacojiaca. ¿Pamenajiaaca ariji poapoaitanaque jenoqui inquitequi? ¡Aatotarite! Manaquea poapoavaetanaque isaviji Areshiqui.<sup>n</sup> Arimequeate impeacajiaquemparome oacaantantatsica intati coramani ontaniqui Soromaniqui onquempeta-quemparomequea nopeacaimojiaquempica aviatimpajia imaica, aatomequeate iteronajiguirimequeate maasano, choocatatsimequea iguinteni iriguenti-jitemparomequea imaica.<sup>24</sup> Irootaque-quea noncantantajiaquempica oncoramanitapojaquegueti aapojajempagueti incatsimatantajiaquemparica Aapani Irioshi maasano teeca intsaroventaj-

<sup>n</sup> 11.23 Oraquea Areshi iroguenti ichoocajiaquegueti metojatsica.

guempariji, caaviji incatsimamajajia-quempiquea aviatimpajia, anaavaeque-rofea incatsimajiaquerigueti Soromaji-aquitica.”

**Jesoshi icanque irimagorejacaajiaqueri  
aventajaquemparineca**

(Irc. 10.21-22)

<sup>25</sup>Iroompaquea icanque Jesoshi: “Aapani Majirontamajatatsica, aviguenti majirontacojiacarica maasano inquieto-quitica aisa quepatsiquitica. Noshine-venquempiquea nocanca, pitsititapitsajiaqueritaris tsajiatatsica teequea ponigaaji-gueriji querocaca picotani aviatimpa. Iriguentiquea ponigaajiaque teeca intsaigueji. <sup>26</sup>Oquempetantacaca imaica, irootari pininque aviatimpa.”

<sup>27</sup>Iroompaquea icantajiguiri maasano: “Yojocaguetaquenaroquea Aapani maasanopae, aisa yagaveja-caamajauena maasanopae. Teequea quericaca tsamajatatsineca querocaca icotani Irijanite Aapani Irioshi, apatiroti tsatanquitsi Aapani. Aisa teequea quericaca tsamajatatsineca querocaca icotani Aapani, apatiroti tsatanquitsi Irijanite aisa irirajia mintacajiaqueca Irijanite intsatacaajiaqueri.

<sup>28</sup>“Caacate naatimpaqui maasano aviatimpajia magoshirentajatsica atsipejianquitsica cameetsanijite nomagorejacaajiaquempinijite. <sup>29</sup>Pinata-vaquero novoatsite, pintsatavaquero nontsatacaaquempica, naroguentitari atsipetacotsica teetarite naventacotimatempaj. Arikea pamenapojero pimaginejashirentajiaque. <sup>30</sup>Teequea omanempaji novoatsite nojocaquem-

pica, pijoncavaetaque nonatacaaquem-pica.”

**Itsatacaanejia Jesoshi yaajiaqueroquea  
tirigoitsoqui savincaguiteriqui  
imagorejantajitaca**

(Mr. 2.23-28; Irc. 6.1-5)

**12** <sup>1</sup>Arikea arejetapojacagueti savincaguiteri imagorejantajitaca<sup>o</sup> yoanaquequea Jesoshi icantanaca tirgomashiqui, itsipatsipaitanacari itsatacaanejia. Iriatimpajia itaseajia-naque ishireguipanajanti tirigoitsoqui ishecajicaroquea. <sup>2</sup>Arikea yamenajia-querigueti pariseojia icantsijigariquea Jesoshi:

—iPamenajiguerija! Yaajianaquequea pitsatacaanejia tirigoitsoqui imaica savincaguiteri imagorejantajitaca, icantimentantajitirotarite irantantajittemparo.

Cotanquitsiquea iriatimpa icanqueriquea:

<sup>3</sup>—¿Arimpate teequea pampatsajavanta-cojigueroji aviatimpajia itioncacojitaquerigueti Taavini coramaní ocanquegueti itaseanaque iriatimpa aisa itsipajianacaca, teequeate onchoocatimajaniquiteji taampaquea irishecajiaquempaca? <sup>4</sup>Iquipitsitanacaquea itsovironaquitequi Aapani Irioshi<sup>p</sup> ishecatsitaroquea pan icantimentantajitica irishecajitemparogueti, manaquea yojequijitaquero oraniqui shitaponcarontsiqui cameetsanijite iramenaueronijite Aapani Irioshi. Iriguenti shecataroquea saserorotejia, irioqueate cantanquitsica Aapani Irioshi. Cotanquitsiquea iriraquea Taavini ishecatacaroquea, aisa yojocajiaqueneriquea itsipatsipaitacaca. <sup>5</sup>¿Arimpate teequeate pampatsajavanterojo aisa

**o 12.1** *imagorejantajitaca*. Irirajia joriojia imagorejantaro savincaguiteri saavaro.

**p 12.4** Ocanquegueti *itsovironaquite* Aapani Irioshi iroguenti ocantacotaque quitsaarentsivanco itsaroventantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco icantajitica *teemporo* intsarovenantaquemparica. Ipajiqueroquea iroatimpa aisa *itsovironaquite* Aapani Irioshi.

itioncacotanaqueca Moishishini ocanque-gueti iriraquea saserorotejia antajiguinrica teemporoqui itsaroventantajitarica Aapani Irioshi yantantajigaroquea savincagui-teri imagorejantajitaca, cotanquitsiquea teequea irooqua impeacajaiguempaji covaeguishe-rentsi? <sup>6</sup>Imaicaquea noncamantajiaquempi-quea chooca acaniqui caavijica anaquiero-quea teemporo itsaroventantajitarica Aapani Irioshi. <sup>7</sup>Aviatimpajia teetarite pinquemajiguerojiquea itioncacojitaquerou-gueti cantatsica: ‘Caaviji anaaque noninta-quequea pimpmintsatacotantajiaquempa, anaquieroqua pijitorejajiaquenarigueti viratsipae pintajiaquenarigueti.’ Pinquema-jiaquaveromegueti ocatica, aatomequea pijijiguime ipeacaaguishejiaquero covaegui-sherentsi. <sup>8</sup>Irraqua Irijanite Caquinte iriguentiquea cantatsica queroca icantimen-tantajitica irantantajitemparogueti savincaguiqueri imagorejantajitaca, aisa querocaquea teeca incantimentantajiteroji.

**Jesoshi yogueshitajiri  
chompevacovetatsica  
(Mr. 3.1-6; Irc. 6.6-11)**

<sup>9</sup>Incajaranquivaetanaquegueti yoanaque Jesoshi shinagogaqui icapiocantapinijiacaca joriojia iquijana-quequea intspoguiqui. <sup>10</sup>Ariquea ichooque oraniqui aparo chompevacovetatsica. Irirajia catsimajiaquerica Jesoshi yamenajiaquequea querocaca incanke cameetsanjite intsaveacojia-querinijite incatsimatacaantajiaqueri, icoacotantajiacarica icanneriquea:

—¿Cameetsavaequempa irogueshitan-tajitaquempariquea caquinte savincagui-teri imagorejantajitaca?

<sup>11</sup>Icanqueriquea:

—Choocagueu ashintanquitsica irovejate arigueti intanquierejantana-quemparo aparo omoroqui savincagui-teri imagorejantajitaca, ¿arimpate aato yoashitiri irajaateri? <sup>12</sup>Iriompaqueate

caquinte caaviji ipintsatacojitar, caavijitarite yanaaqueri oveja. Irootaquea imaica cameetsavaeque incavintsajantantajiquemparoja savinca-gui-teri imagorejantajitaca.

<sup>13</sup>Jero ipitsocashitanacariquea chompevacovetatsica icanneri:  
—Pincantavacotempaja.

Iroompate icantavacovetanaquitiga ariquea icotanaja iraco jac peamajata-naja quempemajatanaja otsipapaco.

<sup>14</sup>Ariquea yamenajiavaquerigueti pariseojia yogueshitajirigueti, isotoso-toitapanajanti ariquea isariimanatana-cari Jesoshi irimetojacaantajiaqueri-quea.

**Isaiashini itsavetantaqueriquea  
Jesoshi coramani**

<sup>15</sup>Irooqua itsatavaquegueti Jesoshi isariimanajianacari irimetojacaantajia-queri, yoanaquequea, ariquea yoguija-guijaitanaqueri icaramirincavaeque caquinteja. Iriatimpayogueshiguetajiri maasano ashinoncajaijatsica, <sup>16</sup>cotan-quitsiquea icantimentajiaqueriquea aatonijite itsavetacojiguiritsi. <sup>17</sup>Oraquea iquejetacagueuimaica onetsanataca-quea icankeca Isaiashini coramani itioncacoquerogueti icankeca Aapani Irioshi, icanke:

<sup>18</sup>“Jeeri irira notigararanquica noninta-aaqueca.

Nopintsamajacari, aisa noshineven-carci.

Nontigararanquimoqueriquea Noshire inchoocashirentapjeri. Iriatimpaycamantajiaqueriquea maasano caquinteguetatsica querocaca cameetsaripae, aisa querocaca teeca oncamenteji.

<sup>19</sup>Aatotarite icatsimatanti, aisa aatotarite itampishijencatanti, aato iquemajitiri quenavoquirontsi-paequi.

<sup>20</sup> Aato ijararejiro ovi chacopi otapore-javetanacagueti,  
aato itsivaquiro otsa tsivorentsi  
chaavogajaniquitanquitsica,<sup>q</sup>  
arejevaetemparo quea irinetساناما-jatantanaquemparoca maasano,  
irooquea anaantanaranquitsine  
tampaticatanquitsica.

<sup>21</sup> Iriotaque iroguijajiaqueca  
caquinteguetatsica, iraventajia-quemparo ivajiro.”

**Icantashijitacarigueti Jesoshi iriguenti shaquiacari ampatsini**  
(*Mr. 3.20-27; Irc. 11.14-23*)

<sup>22</sup> Iroompaequea yaajitanaqueneriquea Jesoshi aparo caquinte ishaquiacaca ampatsini, ishamponcataque aisa imacanataque, teequea inquenquetsateji. Iriatimpa ariquea yamenacajairi, aisa inijacajairi macanari. <sup>23</sup> Yamenename-naitanaquequea intati maasano, icantajigu: “Iriocajate Ichoviquini Taavini.”

<sup>24</sup> Irooquea iquemajiaquerigueti pariseojia icantajiaqueca, iriatimpajia icanquequea: “Iriguentisa shaquiacari Veeresevo” imajirote ampatsinijia. Iriotaquequea agavejacaquerica yoguisotoantaguetacanarica ishaquiajia-caca ampatsinipae.”

<sup>25</sup> Cotanquitsiquea itsatavaqueroquea Jesoshi iquenquejajiaqueca, icanqueri-quea: “Inchoocategueti caquinte incapiocajiaqueriquea igonorojia impeaquequaquea imajirote, iroompaequea arigueti impariajianaquemparo incatsimatavacaajiaquempa, ariquea intsinampirejavacaajianaquempaquea irishiapitsajianaqueri imajirote, aparo

inchoocataje, aato ichoocataji quericampa iromperatajempaca. Arikea iquempejiaca tsipatsipaitaca-rica ijijiguica, arigueti incatsimatava-caajiaquempaquea, arikea incohincoi-tanaquempa intsinampirejavacaajiana-quempaquea, aatotarite iconoavaca-jaija. <sup>26</sup> Arikea iquejetaca Satanashi,  arimpate intigarancajempa iriatimpa iroguisotoaquepa? Inquempetaquem-pagueti imaica irisatica guisotoajatsine,  arimpate iragavejaque incoguitempani impeaquequaquea imajirote maasano ampatsinijia? <sup>27</sup> Aviatimpajia iriguenti picantajiaquena: ‘Iriguentisa shaquiacari Veeresevo’, nagavejantacarica noguiso-toantsijajarica ishaquiajiavecaca ampatsinipae. Iriomegueti agavejaca-aquename Veeresevo,  ariquea quericam-pate agavejacaajiaqueriquea pigonorojia yoguisotoantsijajarica ishaquiajia-caca ampatsini? Irootaquequea itsatantajita-caroca manatarite picomica aviatim-pajia. <sup>28</sup> Cotanquitsiquea iriguenti agavejacaquenaqueate Ishire Aapani Irioshi noguisotoantsijajarica ishaquia-jiacaca ampatsinipae, irooquea pintsatantajiaqueempaca jac imajiron-tapojaca Irioshimajaca acaniqui aviatimpajiaqui.

<sup>29</sup> “Imaica noninque noncoacojiguem-pija:  Queroquea incojitaquerini incatsimajitaquerigueti caavijica itampishiti iraitsijiguetanaqueriquea aatogueti iroquetita iroishojitaqueri? Oraqueate iroquetigueti iroishotsijita-quemparigueti, ariquea iriguenti iraitsijiqueriquea.”

<sup>30</sup> “Iriraquea teeca irishineventavaque-naji, manaquea icatsimataquena; aisa

**q 12.20** Icanquegueti ovi *chacopi* aisa otsa *tsivorentsi* iriguenti iquejetacaaca caarica tampishitatsi, caarica agavejatsi irompetanaquempa, mana incavintsajajiaqueriquea.

**r 12.24** Veeresevo. Iguenquetsatsarequi guiriego icanqueri *Beezeboul* aisa *Beelzeboul*. Icanqueri quimajareri *Beelzeb  *. Iriotaque pajitatsica aisa Satanashi.

iriraquea teeca intsipatenaji nocapiro-cantaquegueti, iroguenti yoguivorocantaque.<sup>31</sup> Ariquea noncantajiguempi imaica, taaca impeacaajiaquempaca caquinte covaeguisherentsi irooca incantaguishevaeque taaca opajitapae, iriraquea Aapani Irioshi iragavejaque-quea irishetacotajeri aatoquea iquenquejacaajiri, cotanquitsiquea iriraquea cantaguishetacoquerineca Ishire Aapani Irioshi aatoquea ishetacjitiritsi.<sup>32</sup> Arikea oquempeca quericaca cantaguishetacoquerineca Irijanite Caquinte iragavejaquequea Aapani Irioshi irishetacotajeri, cotanquitsiquea iriraquea cantaguishetacoquerineca Ishire Aapani Irioshi, irioquea iriguenti aatoquea ishetacojitiri, aato imaica ocaniqui quepatsiqui aisa aatoquea oncoramanitapojaquegueti.

**Quero incojiquerini caquinte  
iramenantajiquemparicate arimajaca  
iriguenti comajamajatatsica**  
(Irc. 6.43-45)

<sup>33</sup>“Pamenaquerogueti inchato cameetsatsica, pintsaque cameetsataquequea osovenapae. Aisa pamenaquerogueti inchato teeca oncameetsateji, pintsaque tee oncameetsateji osovena. Iroguntitarite itsatantajitaroca inchato, yamenajitiro osovena.<sup>s</sup> <sup>34</sup>Quejejiaquempiquea irijanijate sanatari, équeroquea pincojia-quempani pincantajigueronijite cameetsaripae?, aviguentijatarite covaeguishejatsica. Maasanotari iquenquejacojigueta. irootaquequea iquenquetsatacogueta. <sup>35</sup>Arikea iquempetaca caquinte comajamajatatsica iroguenti iquenquetsatacoguetaque cameetsaripae, irootari iquenquejacojuguetaque. Iriraquea teeca

incomajamajatempaji iroguenti iquenque-tsaguishetaque taaca opajitapae, irootarite iquenquejacojuguetaque iriatimpa.

<sup>36</sup>Noncantajiaquempiquea, oraquea aapojajempagueta incatsimatantajitaquem-parica covaeguishejatsica, inquenquejaaajitaqueri maasanopae iquenquetsaguishejiaqueca intati.<sup>37</sup> Aritarite cameetsarica picantaguetica, irishinevenquempiquea. Cotanquitsiquea teegueti oncameetsateji picantaguetica, incantajitaquempi: ‘Imaica pantsipeventaquemparo.’”

**Iriraquea covaeguishejatsica  
icantajiavecariequea Jesoshi  
iramenanacaajiaquerime oacaantantatsica  
intati**

(Mr. 8.12; Irc. 11.29-32)

<sup>38</sup>Arikea icoraquetashijiapojaqueri Jesoshi pariseojia aisa tsatacaantajigu-roca itioncacotanaqueca Moishishini, ikanqueriquea:

—Tsatacaantantatsica, nonintajiaque ponigaajiguenero oacaantantatsica intati.

<sup>39</sup>Icanqueriquea Jesoshi:

—Aviatimpajia otiavaejaquempiquea covaeguisherentsi, teequea quisho poajigueriji Irioshimajaca, pinintantajavetacaca nonigaajiaquempirome oacaantantatsica intati, cotanquitsiquea aatoquea nonigaajiguimpirotsi. Iroguentiquea nonigaajiaquempi otsipa, onquempetaquemparoqua iquejetacaajitacarigueti tsavetantatsicani Jonashini coramani.<sup>40</sup>Piquemacojiaqueriquea Jonashini iniaquerigueti quejevetarica iririjegui quiterinqueni arikea icarata-covaetanaquequea 3 savincaguiti ontaniqui imotijaqui. Arikea inquejeta-quempaquea oncoramanitapojaquegueti

<sup>s</sup> 12.33 Ari iquejetaca caquinte: iroguenti yamenantajitar ipeacaaguetacaca, ari intsajitaqueri arisa icoca. Iriraquea teeca incameetsateji iroguenti ipeacajaiaca covaeguisherentsi. Iriraquea cameetsari oavaetanaque iroguenti ipeacaaguetaca cameetsaripae.

irira Irijanite Caquinte incaratacovaeta-naque 3 savincaguiteri intsimpogui quepatsiqui.<sup>41</sup> Oncoramanitapojaqueri aapojajempagueti incatsimatantajia-quemparica Aapani Irioshi maasano teeca intsarovenatajuempariji, iriraquea Ninivejaquitica incatintisita-naquempaquea intsavetacotsijiaquempi-roquea pantagushejiaqueca. Maasano-tari Ninivejaquitica iquemisantajiaquer-iquea Jonashini itsavetantimojiaqueri-gueti, ishimampojancajanaca yamenaji-acagueti ipeacaaguishejiacagueti covaeguisherentsi, ariquea icantashitati-jaianaca. Cotanquitsiquea imaica icoraquevetapojaca caavijica anaavae-querica Jonashini, teequea pinquemi-santajavaqueriji.<sup>42</sup> Arikeate onqueje-taquempaquea aisa oncoramanitapojaqueri oraquea imajirojate Savajiaqui-tica oncatiitsitanaquempaquea ontsave-tacotsijiaquempiro pantagushequeca aviatimpajia choocajianquitsica imaica. Coramanitari ocoraqetashivaequer Saromonini oquemisanqueriquea itsatacaaquerogueti, oquenavaetapo-jaque jmm osamani oquemacoqueri-gueti itsamajati. Cotanquitsiquea imaica icoraquevetapojaca caavijica anaavae-querica Saromonini, teequea pinquemi-santajavaqueriji.

**Ampatsini icoraquitashitajiri aisa  
ishaquiatetacaca**  
(Irc. 11.24-26)

<sup>43</sup>“Oraquea irovashiantanajerigueti ampatsini iriraquea ishaquiatetacaca, iroanaque ontaniqui oquitamampororoitapojaqueri irinintavequempa irimagore-javequeme. Cotanquitsiquea iroompa iramenavetapojaquemparo querocampa inchoocateni oraniqui.<sup>44</sup> Inquenquejitsi-tanaquemparoqua incanque: ‘Noanta-najemparota notsovironaquite nosotoan-tavetanacaca.’ Ari incoraquevetajempa

iramenapojajeri ishaquiatetacaca quempeca tsvironaqui ipishijitirogueti inetsanajitirogueti, cajaraginejisano oncanquempa tecatsi choocatantempara-one. <sup>45</sup> Arikea iroanaque iraaquieri itsipajia 7 ampatsini caavijica igajaiaca. Iroompaquea irishaquiajiapojempari irira ishaquiatetacaca iroaqueragueti, ariquea iriatimpa ari incotanajempa arimpa irogaamajatanajempa. Ari onquejetimojiaquempariquea covaegui-shejatsica choocajianquitsica imaica.”

**Iriniro Jesoshi aisa iriguentijeguijiate**  
(Mr. 3.31-35; Irc. 8.19-21)

<sup>46</sup> Choocatiraja iquenquetsatacaaquiaqueri-gueti Jesoshi omporoguijajianquitsica, ocoraquepoji iriniro aisa iriguentijeguijiate icatintiitapoja sotsiqui, inintajavetaca inquenquetsatacaaquiaquerime.<sup>47</sup> Iroompa-quea icamantajiqueriquea Jesoshi icantajitiri:

—Coraquetaque piniro aisa piguenti-jeguijiate, ichoochapoji sotsiqui, inintajiaque inquenquetsatacaaquiaquempi.

<sup>48</sup> Cotanquitsiquea iriatimpa icanqueri camanquerica:

—¿Taa opaji iinani? ¿Taa ipaji iguentijeguijia?

<sup>49</sup> Iroompaquea ipitsocashijianacari itsatacaaanejia, ijicojiaqueriquea icanque:

—Jeeri iricajia nopeajiaqueca iinani aisa iguentijeguijape. <sup>50</sup> Quericaca netsanamajatiroca inintagueca Aapani choocatatsica inquitequi, iriotaque nopeajiaque iguentijeguijape, tsiojipae, iinanipae.

**Jesoshi iquejetacaacari  
pishoncaguitiroca oitsoqui**  
(Mr. 4.1-9; Irc. 8.4-8)

**13** <sup>1</sup>Iroompaquea oraticaquea savincaguiteri isotoanajis Jesoshi tsvironaqui, yoanaque otsapijaqui iniromotija, isavicapoji. <sup>2</sup>Yomporogui-

ventajia pojacariea icaramirincavaeta-naque caquinte jia, ari quea itetanaja quea quenajarontsiqui isavicaque. Maasano omporoguijajianquitsica isavisavi quea ocaratsapija qui. <sup>3</sup>Iroompaquea itsatacajia queri iquempetaca aguetacaro-quea taaca opajitapae, icanqueriquea: “Yoana quee aparo caquinte impishoncaguitero oitsoqui. <sup>4</sup>Ipishoncavoncaquitanaque-roquea tacororo tacororo, itsitacaguetana-quero. Ocono agaranca queate asacaraague-tanaca quenavo quirontsiqui, iroompaquea isavisavi tashipojiroquea tsimeripae ishecajia pojacaro. <sup>5</sup>Otsipa ocono agaranca asacaraanaca mapiporo qui, taampina otsoro avetanaca, teemajaca onchoocama-jatenica quepatsi. <sup>6</sup>Iroompaquea icatsirin-caguitevetanaca catsirin caiter, itsiana que-roquea oshimpieguriricanque ometoja-naque, teetarite oamajateji ovarishitsa isaviqui, ojocaava querotarite mapi. <sup>7</sup>Ocono acquea otsipapae asacaraanaca ochoo caquegueti ovarishitsa samerento. Iroompaquea otsoro itsivetanaca, arimpaquea otsoro itsitanaca quea samerento iroatimpa otsincoana queroquea ometo janaquero. <sup>8</sup>Otsipa ocono acquea asacaraague tanaca ocameetsaguiteta que-gueti quepatsiqui, otsoro ana quea otagananaca ochoocatana quea opitsaraqui-acotanaca queate oitsoqui, ocono acquea ochoo caque 100, otsipa 60, otsipa ochoo caque 30. <sup>9</sup>Choocagueti piguem pita pinquemanta vaquempaca, pinquemeja.”

**Jesoshi itsatacajia queriquea quero  
ococani iquempetaca antague caroca**  
(Mr. 4.10-12; Irc. 8.9-10)

<sup>10</sup>Iroompaquea iquempejiquempeji poja-cari itsatacaanejia icantiriquea: “¿Quero-

quea ococani pitsatacajia querigueti caquinte jia piquejetaca acanari intati?”

<sup>11</sup>Iriatimpa icanqueriquea: “Imaica inique Inquitequitica pintsajia querou quea aviatimpa jia querou quea icotani imajiron-ta-gueti iriatimpa, cotanquitsiquea iriatim-pajia quea aato quea itsajigu rotsi. Teetarite intsajiteroji paesatoniqui, aviguentiquea tsjajia querone imaica. <sup>12</sup>Quericaca choocatanquitsica itsataquea, inquimo-guen quejanetaca amajajueri, oava etana quea intsamajatana quea. Cotanquitsiquea quericaca teeca onchoocateji itsataquea, capichague quejan ejani quitanquitsica choocave carica iraapitsatsijiquer. <sup>t</sup>

<sup>13</sup>Irootaque quea noquejetantajia carica imaica notsatacajia querigueti iriatimpa jia mana quea noquejetaca acar oquea maasanopae. Iriatimpa jia quea yamename-nai vetanac atari, cotanquitsiquea tee irinejeji; iquemajia vetaca quea, cotanquitsi-quea tee inquemajia vaqueroji, tee intsajiva queroji. <sup>14</sup>Iquejeji acagueti imaica, onetsanatanaca quea icantakea Isaiashini coramani, icanque:

‘Pinquemajia vequempaquea,  
cotanquitsiquea aato piquemaji-  
avajirotsi.

Pamenajia vequempaquea, cotanqui-tsiquea aato pitsatimajia vaji-rotsi.

<sup>15</sup>Iquishoshirentana quetarite iricajia. Ora quea iguempita tee inquemama-jatantajemparo, aisa imatsivocajata quea, aatonijite inejantajia jarotsi iroquija, aatoniji iquemantajia jarotsi iguempita, aatoniji itsajigui ishirequi aatoniji ipitsocashijigana nogueshi-shirentantajia jemparica.’

<sup>t</sup> 13.12 Quericaca nintanquitsineca inquema quero quea Iguenquetsatsare Aapani Irioshi, arimpaquea intsamajatana quero. Cotanquitsiquea irira quea teeca irininteji inquemisanteroji, inquemaveta quempagueti capichaji, manaquea omanapitsatana quempari, aato quea itsatimati rotsi.

<sup>16</sup>“Cotanquitsiquea aviatimpajia caaviji icavintsajamajajiaquempi Aapani Irioshi pamenantajiacaroca maasanopae pamena-jiaqueca imaica, aisa piquemajiaquena notsatacayaquempica. <sup>17</sup>Arimajaca noncantajiaquempica, ichoocajiavetaca oshequini tsavetantajaiatsica aisa comajamajajianquitsica inintajiavetaca iramenajiaqueromequea pamenajiaqueca aviatimpajia imaica, cotanquitsiquea teequea iramenajigueroji. Aisa inintajiavetaca inquemajiaqueromequea piquemajiaqueca aviatimpajia, cotanquitsiquea teequea inquemajigueroji.

**Jesoshi itsatacaa jiaqueri itsatacaanejia taaca opajita iquejetacaaca incajaranqui**  
(Mr. 4.13-20; Irc. 8.11-15)

<sup>18</sup>“Imaica iintsijsa pinquemisantajiaava- quenaja noncamantaquempigueti taaca opajita noquempetacaaca incajaranqui. <sup>19</sup>Oraquea oitsoqui asacaraaguitanan-quitsica quenavoquirontsiqui iriguenti noquejetacaajiaquea caquinte quemisantajiavetacaroca Iguenquetsatsare Aapani Irioshi itsavetacojito-gueti, cotanquitsi tee intsajjavaqueroji. Itsatacajaiivecariquea queroquea incojiaquempani impejajiaquerigueti Aapani Irioshi Imajirote, cotanquitsiquea iroompaqueate icoraquetashiqueriquea ampatsini ipeacotacaacariquea maasanopae. <sup>20</sup>Oraquea asacaraaguigue-tananquitsica mapiporoquiqui iriguenti ogomarojiaquequea quemisantajiavetavacaroca Iguenquetsatsare Aapani Irioshi ishineventajiavetavacaroca, <sup>21</sup>cotanquitsiquea teemajaca inquemi-santamajateroji, jero ipeacotantajianajaroca taampina. Iroompaquea ocoraque-tashiqueriquea atsipetagantsi, irooca icatsimatiamentajiqueriquea Iguenquetsatsare Aapani Irioshi, ariqueate icohicoitanaca yovashiantajianajiroquea, iquejejianaja iroqueragueti

tequeratagueti intsaroventimatempariji. <sup>22</sup>Oraquea asacaraaguigueta nanquitsica samerentoqui iriguenti noquempetacaajiaqua quemajiavetacaroca Iguenquetsatsare Aapani Irioshi iquemajiavetavacaroqueate, cotanquitsiquea iroompa irooquetae aisa iquenquejajavajiroquea maasanopae choocaguetatsica quepatsi-quitica. Arikea iriatimpajiaquea teequea inquenquejajajeroji Iguenquetsatsare Aapani Irioshi, iroguentiquea iquenquejajianaji incarajiavaequeroquea yashintaguecaca. Querocampate incojiaquempani intsaroventamajajiaquempari-gueti. <sup>23</sup>Cotanquitsiquea oraquea asacaraaguigueta nanquitsica ocameetsa-guitetaquegueti quepatsi iriguenti ogomarojiaque quemisantajiavaquerooca Iguenquetsatsare Aapani Irioshi, arikea itsariventamajatacariquea iriatimpa. Arikea ichoocajiaque cameetsa, iquempejia caroqua oitsoqui choocata-nanquitsica oitsoqui 100, itsipa iquempejia caroqua oitsoqui choocata-nanquitsica 60, itsipa iquempejia caroqua choocatananquitsica 30.”

**Jesoshi iquempetacaacaro tojari conoacaroca tirigoitsoqui**

<sup>24</sup>Arikea iquejetacaajiacanari Jesoshi otsipa, icanqueri: “Imaica irooqua nonquempetacaquemparo quero icotani imajirontagueti Inquitequitica. Yoanaque caquinte ipishoncavoncaquitanaqueroquea tirigo cameetsaitosquiri iniganquitejirequi. <sup>25</sup>Iroompa imaa jianajigueti maasano, yanancinacuquiquea itsipa catsimataque-rica ipishoncavoncaquitapanajantiro tojari quempevetaroca tirigo itsitacavaetanaque-roquea oraniqui. <sup>26</sup>Iroompa quea otsoroavetanaca tirigo, arimpaqueate otsoroitsitanaca tojari iroatimpa omoncarajanacaroca. Oraquea ochoocatanaquegueti oitsoqui tirigo, yamenajiqueroquea manasacanica oconoacaroca tojari.

<sup>27</sup>Irirajia amijiguirica yamenitsijigaroquea icoraquejiapojaque icantajiapoji  
ashintaroca: 'Nomajirote, arimpate  
namenajiaque iroguenti pipishoncavonca-  
quitaque tirigomajaca. ¿Imaicaquea  
querocaquea oquenapojini tojari?' <sup>28</sup>Icant-  
riquea iriatimpa: 'Ooshiatsi, iriocajate  
quempequeroquea catsimataquenaca.'  
Icantajianaque amijiguirica: 'Ari pininque  
noanoaitanaque nontsopajajajatero?'  
<sup>29</sup>Icanquequea iriatimpa: 'Aatota, pitsipata-  
caantajigarotsihatsi tirigomajaca.  
<sup>30</sup>Arikea ocoaniquea osampatanaque-  
gueti, arikea nontigaranquitsijiguempari-  
quea aviguijiaqueroneca arikea intsopajis-  
titemparoquea tojari iroishovativaequer-  
quea intaitsijiguemparoquea. Iroomba  
irooqua irajaiaquequea tirigomajaca  
intariajiaqueroquea tsovironaquiqui  
itariantitaroca tirigoitsoqui."

**Jesoshi iquempetacaacaroquea oitsoqui  
moshitaasa**

(Mr. 4.30-32; Irc. 13.18-19)

<sup>31</sup>Iroompaquea iquejetacaajiacanari  
otsipa, icanque: "Imaica nontsavetacota-  
queroquea queroquea icotani imajironta-  
gueti Inquitequitica, arikea nonquempeta-  
caaqueimpiro oitsoqui moshitaasa  
ivintyacajitiroguedi iniganquitejirequi.  
<sup>32</sup>Iroatimpa caaviji anaaque ochaamirija-  
quijaniquivaque, cotanquitsiquea otsoro-  
anaquegueti inirojempetanaquequea  
anaaguequeroquea otsipapae panquiren-  
tsipae chaamirijaquitatsica oitsoqui.  
Ontsegotsegoatanaquemparoquea onquem-  
petanajemparoquea inchato, inchoocatan-  
tajianaquemparoquea tsimeripae."

**Jesoshi iquempetacaacaroquea  
anempoacaguiroca pan**

(Irc. 13.20-21)

<sup>33</sup>Iroompaquea iquejetacaajiacanari  
otsipa, icanquequea: "Imaicaquea  
nontsavetacotanaqueroquea queroquea

icoqueroni Inquitequitica imajironta-  
gueti, arikeate nonquempetacaaqueim-  
paro anempoacaguiroca pan. Pameniro-  
tarite manquigarentsi ompeacaguempa-  
roguedi pan, aaquequea apamontiinaro  
tirigovane, arikea onconoanquemparo  
anempoacaguiroca, arikea oncotana-  
quempa anempoacaanaquero  
maasanose."

**Queroquea ococani  
iquempetacaantaguecaroca Jesoshi**

(Mr. 4.33-34)

<sup>34</sup>Arikea iquejejiaqueri Jesoshi  
imaica maasano itsatacaaajaquerica  
caquinteja, mana iquempetacaajiacan-  
nari. Teetarite intsatacaaajigueriji intati,  
taaca opajitapae ininqueca intsatacaa-  
jiqueriquea, iroguenti iquejetacaagueta-  
caroquea. <sup>35</sup>Oraquea iquempetaquero-  
gueti imaica iroguenti onetsanatanaca  
itioncacotanaqueca tsavetantatsicani  
coramani, icanquequea:

"Nonquenquetsatacaaajaqueriguedi,  
irogquenti nonquejetacaagueta-  
quemparoquea taaca opajita.  
Nontsavetantaguequero taaca  
opajita iroquetinica itsitijigue-  
vecaca paesatoniqui iroquera-  
guetiquea ipeacajaicaroguedi  
quepatsi arejevaetapojaroquea  
imaica."

**Jesoshi icamanqueriquea itsatacaeaneja  
taaca opajita itsavetacotaqueca  
iquenquetsatacotaqueroguedi tojari  
conoacaroca tirigo**

<sup>36</sup>Arikea iquenquetsatacaaajaivajiri  
Jesoshi capiocaventajiacarica, yoanaji  
tsovironaquiqui iquijapojaque. Iriraquea  
itsatacaeaneja iquempejiquempejiipojiri  
icanqueriquea:

—Nonintajiaque poguisotoguenaroja  
incajarankuitica piquempetacaajiacana-  
roguedi tojari conoacaroca tirigo.

<sup>37</sup>Icanque Jesoshi:  
—Iriraquea pishoncavoncaquitaque-roca tirigo cameetsaitsoquiri iriguenti Irijanite Caquinte. <sup>38</sup>Oraquea niganquiteji, iroguenti maasanopae quepatsi iguinentantajiacaca caquin-teguetananquitsica. Oraquea camee-tsaitsoquitatsica, iroguenti quejecari caquintejia peajiaquerica Aapani Irioshi Imajirote. Oraquea tojari, iroguenti quejecari caquintejia irashijia ampatsini. <sup>39</sup>Iriraquea catsimatantatsica pishoncavoncaqui-queroca tojari, iriguenti imajirote ampatsinijia. Oraquea nocanquegueti irajaiquerogueti tirigoitsoqui, iroguenti notsavetacotantaque onteroncanajempagueti quepatsi. Irirajia aajiaqueroneca iriguentijia irashivantijitete Aapani Irioshi. <sup>40</sup>Imaicaquea pamenajiaquerogueti itsopajajiquerogueti tojari itajique-rogueti, ariquea onquempetaquempa oncoramanitapoja jegueti onteronca-naquempagueti quepatsi. <sup>41</sup>Iriraquea Irijanite Caquinte intigarancajiaqueri irashivantijitete, incapociacijaqueri-quea covaeguishetacaajiacarica itsipajia, irirajia aisa maasano peacaaguishejiacaroa covaeguishe-rentsi, aatoniji iconoajiajari majiron-tajiacarica, <sup>42</sup>impishoncajiaqueriquea camorecariqui. Oraniquiquea oraniqui incoquempaniquea iriraaguitempani irantsicayajijaquempa. <sup>43</sup>Ariquea irirajia comajamajatanqui-tsica iroaroaitanaque ichoocatigueti Aapani Irioshi imajirontagueti, inquempejianaquempariquea catsirin-caiteri itsirencashimpoquirerejigueti.

Choocagueti piguempita pinqueman-tavaquempaca, pinquemeja.

**Jesoshi iquempetacaacaro  
itsitijitirigueti ooro**

<sup>44</sup>“Imaica nontsavetanqueroquea queroquea icotani imajirontagueti Inquitequitica, ariquate nonquempeta-caaquempariquea ooro itsitijitirigueti iquitajitirigueti quepatsiqui. Ariquea yamenapojiquerigueti itsipa caquinte, iquitasitanajariquea. Ishinevaetanaca yojocantaguetaqueroquea maasanopae yashintaguecaca yaancaroquea imenta-quipae. Iroompaquea yoanaque ivegarataqueroquea quepatsi ichoocatantacaca ooro.

**Jesoshi iquempetacaacaro peerera  
vegaramajatatsica**

<sup>45</sup>“Oraquea imajirontagueti Inquite-quitica iroguenti oquempetacari jocantaguetiroca taaca opajita. Iriatimpa yoanaque yamenaguetaque-quea peerera<sup>u</sup> vegaramajatatsica.

<sup>46</sup>Ariquate yamenapojiquerouquea apaitsotiro caavijica anaaguequero-quea oquitasaancorerencavaeque, ovegaramajavaeca oshequi. Yojocantaguetaqueroquea maasanopae yashintaguecaca yaantaguecaroquea imenta-quipae ivegaratantaguetacaroa oratica peerera.

**Jesoshi iquempetacaacaroquea  
iniromantsa**

<sup>47</sup>“Imaicaquea nontsavetacotanta-queroquea queroquea icotani imajirontagueti Inquitequitica, iroguenti nonquempetacaquempa-

<sup>u</sup> 13.45 *peerera*. Chooca quentijaqui quejevetarica chapiro. Onquijaquerigueti capichaji impanequi, asereakeri, ari intiritapiniquero cameetsaniji oncarenitanaque. Oncoramanitapoja jegueti ompeanaquempa icantajitica *peerera* (icanquero quimajareri *perla*), quitasaancorerencavaeque, impeacaquemparo nenquetsiqui. Ovegaravaetaca.

roquea yanquitacotantajitarigueti shimaguetatsica iniromotijaqui, inoshicacotaqueriquea icantashitatiaguecaquea oshequini. <sup>48</sup>Itseraiquitatigaroquea yaitsitajaroquea yaajitanaqueroquea imparaguequi. Arikea isavisiavitañaque ashinacaroca imantsatsite icoguiaguetaqueriquea cameetsaguetatsica itejiaveriquea cantiripaequi. Iriraquea teeca incameetsateji manaquea ipishoncaguetavaqueri. <sup>49</sup>Arikea onquempetanaquempauea oncoramanitapojajegueti onteroncaguetanaquempagueti quepatsi, incoraquecoraqueipoje irashivantijite Aapani Irioshi incapiocajiaqueriquea comajamajajianquitsica iroashijiaquempariquea maasano covaeguishejitsica, <sup>50</sup>impishoncajiiqueriquea camorecariqui. Ontaniquiquea ontaniqui incoquempaniquea iriraaguitempani irantsicayajijaquempa.”

<sup>51</sup>Icanque Jesoshi:

—¿Ari piquemajiaquero maasano nocantajiaquempica?

Iriatimpajia icanqueriquea:

—Jeeje, Nomajirote.

<sup>52</sup>Icantiriquea:

—Maasano tsatacaantajiguiroca itioncacotanaqueca Moishishini itsatacamajajitaquerigueti queroquea icotani imajirontagueti Inquitequitica, inquempejiaquempariquea ashintaroca tsovironaqui icapiocantaguetaquerogueti yashintaguetacaca. Iragavejaque iraguetaquero cameetsaguetatsica choocatatsica intsompogui, iroquetinicapae aisa iroqueraguetatsica.”

**Itsatacaantavetacagueti Jesoshi  
Nasarequi**

(Mr. 6.1-6; Irc. 4.16-30)

<sup>53</sup>Arikea iteroncanaquerogueti Jesoshi iquempetacaaguetacarogueti, yoanajiquea. <sup>54</sup>Yarejetapojacagueti iguinteniqui itsatacaantapojaji ontaniqui shinagogaqui icapiro-cantapinijiaca jorioja. Yamenamaitanaquequea intati maasano quemisantajiaquera, icantajiaque:

—¿Queroquea oquenapojini maasanopae ocatica itsatica iricatica? ¿Taaquea agavejacaqueri yagavejantacaca yonigaantagueque-roquea oacaantantatsica intati?

<sup>55</sup>Teecajate irioquea irijanite caripintero<sup>w</sup> choocatatsica aguiente-nijiagueti? Oraquea iriniro iroguenti Maria. Iriraquea iriguentijeguijate iriguenti Santiago, Jose, Shimo aisa Jorashi. <sup>56</sup>Arikea oquempejiaca itsijoitepae iroatimpajia iroguenti oguinentijiaca ocaniqui. ¿Queroquea oquenapojini itsatica aisa iragavejane?

<sup>57</sup>Arikea teequea irinintajigueji inquemisantajigueriji, iroguenti icatsimajiaqueri, cotanquitsiquea Jesoshi icanqueriquea:

—Iriraquea tsavetantiroca icanquerica Aapani Irioshi ishine-ventajitavajari querocagueti yoana-queni osamani, cotanquitsiquea ichoocavecagueti iguinteniqui aisa itsovironaquitequi, teequea irishine-ventajitempariji, teequea inquemisantajigueri.

v 13.52 *Iroquetinicapae* ocantacoquero itioncacotanaqueca Moishishini aisa itsipajia tsavetantaqueroca icanquerica Aapani Irioshi coramani. *Iroqueraguetatsica* ocantacoquero imacatrica itsavetanqueca Jesoshi. w 13.55 Iriraquea *caripintero* iriguenti tsamajaguetiroca inchacota, ipeacaantaguecaro shitaponcarontsipa, taaca opajita.

<sup>58</sup>Ariquea teemajaca ironigaantaguetajeroji oraniqui oacaantantsica intati, teetarite inquemisantajigueriji, manaquea iquenquejajaque: “Caaricaja.”

**Erorishi iquenquejajiro  
imetojacaanquerigueti Joanca  
Viñacajatantatsica  
(Mr. 6.14-29; Irc. 9.7-9)**

**14** <sup>1</sup>Iroompaquea iriraquea Erorishi<sup>x</sup> imajirojate Garirequitica iquemacoqueruea Jesoshi.  
<sup>2</sup>Ariquea icantajiaqueri amijiguirica:

—Iriguentiquea Joancani Viñacajatantsica nometojacaantaqueca. Tancorenjanajishitsi, jero iquejetampojajaroca imaica yagavejamajatantacaca yonigaantaguequeroquea oacaantantsica intati.

<sup>3</sup>Oraquea chapinqui iriraquea Erorishi yaacaantaqueri Joanca yoishotacaanqueriquea cavorejatsariqui, isantanatacotaantaqueri, irooriji yamenaquequea icantomajimentavecari Eroriashi yaapitsaquerigueti iriguentijeguite pajitatsica Jeripe. <sup>4</sup>Iriraquea Joanca icantajiaqueruea Erorishi: “Teetarite oncameetsateji paapitsaquerigueti imanquigare piguentijeguite.”

<sup>5</sup>Irootaquequea inintantavetacaca Erorishi imetojacaantaquerimequea, cotanquitsiquea itsaroacaajiacariequa maasano choocajianquitsica oraniqui, yamenajiaqueriquea iriguenti tsavetantatsica. <sup>6</sup>Iroompaquea aapojacagueti isavincaguiterite Erorishi icajemajiaqueriquea itsipavijijiaca irishecacatimojiaquempariequa. Arikeate ishecashecaica, oquijitsipojacaquea orijanite Eroriashi otsamaropojaquequea opitsopitsovaetancaquea ocanca. Ishineventsitanacaro Erorishi, <sup>7</sup>icanqueroquea:

—Imaica noncanquempi arimajaca nojocauquempiroquea taaca opajita pamanaqueenaca, aatitarite namatavijimpitsi. Incatsimatimentenaro Aapani Irioshi aatogueti nonetsanatiro nocanqueua.

<sup>8</sup>Otsatacaitsitaroquea iniro, ariquea ocampojajiri Erorishi:

—Pojocacotsitenaro acanqui iguito Joanca Viñacajatantatsica shimencoqui.

<sup>9</sup>Ariquea icotanaca iriatimpa ishimampojancanaca, cotanquitsiquea iroorijite icanqueroquea, aisa iquemajiaqueriquea maasano icajemajiaqueca, irootarite icantantacaca:

—Iroosacanicate intsiquetirote.

<sup>10</sup>Itigaránquitsitariquea coareta ichoocaqueguedi Joanca isantanatacotacagueti irijitorejaquieri iraacotanaqueneroquea iguito. <sup>11</sup>Ariquea yaacotanaqueneroqueate yojocacopojaquenero, irooqueate jocacotaqueneroquea iniro. <sup>12</sup>Iroompaquea iquemacojiaqueriquea itsatacaanejia Joanca, icoraquetashijajiri yaajianajiro itsino iquitajiajiro. Arikeate yoayoaitanaji icamantajiaquitiri Jesoshi.

**Ishecatacaajiacari Jesoshi 5,000  
shirampari**

*(Mr. 6.30-44; Irc. 9.10-17; Jn. 6.1-14)*

<sup>13</sup>Iroompaquea iriraquea Jesoshi iquemacoquerigueti Joanca imetojacaantaquerigueti, yoanaque osamani teegueti inchoocateji caquinte, iriguenti itsipatsipatanaca itsatacaanejia, iquenajatantajianacaroquea quenajartonsi. Cotanquitsiquea iquemacojiaqueriquea choocajatsica oraniqui guinentinintspaequi, yoguijaguijaitanaqueriquea yanjinijiitanaque. <sup>14</sup>Iroompaquea yarejerejeipojaca yoncotsinampijaatacojiapojaca. Irooqua iterejavetanaca

<sup>x</sup> 14.1 Iriratica *Erorishi* irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

Jesoshi yamenajiapojiriquea icaramirincavaequequea caquintejia, ipintsatacojianacari maasano. Yogueshiguetajiri maasano ashinoncajajianquitsica.

<sup>15</sup>Imaicaquea ijaguitevaetanaji catsirincaiteri, iriraquea itsatacaanejia icantajigui:

—Jac ijaguitevaetanaji catsirincaiteri. Ocaniquiquea ocaniqui teequea quericaca choocatatsineca, iroosacanica pintigarancajajerija maasano irirajia iroaroitanajetaja ontaniqui guinteninitsipaequi cameetsanijite irivegarajiaquenijite isheca irishecajiaquempaca.

<sup>16</sup>Cotanquitsiquea Jesoshi icantajigui:

—¿Taaquea opaji iroashitantemparoca? Pojocajigueneri aviatimpajia irishecajiaquempaca.

<sup>17</sup>Iriatimpajia icantajigui:

—Teequea anejeroji taampate nojocajiaquenerica. Ariguenti ocarataque 5 pan, iriraquea shima mavipaquite icarataque.

<sup>18</sup>Icanque Jesoshi:

—Iintsjate pojocajiguenerojate.

<sup>19</sup>Ariquea icancarqueriquea maasano irisavisaviataquequea cataromashiqui. Iriatimpajia isavisaviataquequea, ariquea yaquieroquea Jesoshi maasano 5 pan aisa mavipaquite shima, ipaguittanaquero inquite yamanaqueriquea Aapani Irioshi, icantaqueri:  
“Arioteesaa.”

Ariquea icotarejaqueroquea pan, yojocajiaqueneriquea itsatacaanejia, iriatimpajia yojocajiaqueneriquea maasano. Arikea iquempetacaacari shima iriatimpa. <sup>20</sup>Arikea ishecajiaaca maasano, iquemajianaca. Iroompai riraquea itsatacaanejia icapiocajajiro chocatajatsica, itejajiro cantiriqui tseraiquipae, ocaratacovaetaji 12.

<sup>21</sup>Maasano shecajianquitsica icaramirincavaeque arica 5,000. Cotanquitsiquea

iriguenti itsajitaquequea shiramparijia quenquevarijia, teetarite intsajiteroji manquigarentsijia aisa chaajanquirijia.

**Yanijijatanaquero Jesoshi ojenoquijaare iniromotija**

(Mr. 6.45-52; Jn. 6.16-21)

<sup>22</sup>Iroompaquea icantajigui Jesoshi itsatacaanejia:

—Pintepinteitanajempajate quenajarontsiqui pijivajivaitanajejate pimontejacojianajempaquea intatiqueroqui. Naatimpa aatotaquea nocoraquetsitaja, nonquenquetsatacaa jiajaverita irirajia iroaroitanajegueti.

<sup>23</sup>Iroompaquea yoayoaitanajigueti maasano, iriatimpa itoncoanaque otsemppiqui iramaneri Iriri, apatiroquea yoanaquequea. Arikea opitsecanaquegueti apaniro ichoocaque. <sup>24</sup>Iriraquea itsatacaanejia javaetanajiquea niganquijaqui ontaniqui. Oraquea iniromotija otamacojatanaquequeate oshequi, oshaguishaguivaetanaqueroqueate quenajarontsi joac joac, ochovigajenapojoqueate choviga jeoc jeoc, oguipigui-piacojiaqueriqueate. <sup>25</sup>Arikea irooshipojajigueti osavincaguitetanaje, icorapepojaji Jesoshi, yanijijatapojojirenoquija iniromotija. <sup>26</sup>Iriraquea itsatacaanejia yamenitsjjigariquea yanijijatapojojirenoquija itsaroajia-naque, icajemajianaquequea:

—¡Jeerishiatsi sashinti!

<sup>27</sup>Icantitanaca Jesoshi:

—Pintampishishirentajianaque.

Naroguenti, aatoquea pitsaroajiguitsi.

<sup>28</sup>Icantiriquea Peerero:

—Nomajirote, aviguentica, pincajeme-nashiatsi nagaticajatashitanajempita ojenoquijaarequi.

<sup>29</sup>Icantiriquea Jesoshi:

—Caacatequetirote.

Yanijirejanaque Peerero yagaticajatsi-vetanacaroquea iroanaqueme ichooca-

quegueti Jesoshi. <sup>30</sup>Cotanquitsiquea yamenavaqueroquea ochovigajencapojoiquea itsaroitsitanaca, ariqueate icotanaca itsitijaatanaque, icajemitsitanaca:

—iNomajirote, paavajenashiats!

<sup>31</sup>Itaampinatsitanacaquea icantajempequitinanaca Jesoshi, yaitsitavajariquea iracoqui, icanqueriquea:

—iTeemajaca pintstateji arimajaca nagavejavaeti! ¿Querocaquea ococani pitsaroancaca?

<sup>32</sup>Irooquea itehiteitanajatiga quenajarontsiqui jac opeanaja choviga.

<sup>33</sup>Maasano choocajianquitsica quenajarontsiqui igueroventajianacari Jesoshi, icanqueriquea:

—Arimajaca aviguenti Irijanite Aapani Irioshi.

*Jesoshi yogueshiguetajiriquea  
ashinoncajajianquitsica Jenesarequitica  
(Mr. 6.53-56)*

<sup>34</sup>Imontejacolianajaquea yarejejiapajaro Jenesarequi. <sup>35</sup>Irirajia choocajiascica oraniqui yamenajivaquerigueti iriguenti Jesoshi, ishiashiaitanacaquea icamantajavacaanaca itsitacaguitejajianaqueroquea iguintenijiaqueti. Yaajianaqueneri maasano ashinoncajajianquitsica irogueshiguetajeri. <sup>36</sup>Iroompaquea iriatimpajia icantapojiri:

—Intsishiatsi, Nomajirote, noninque inchagatsisivetavaquempiro oshipaquijaniqui piitsaare.

Maasanopaetari chagatsijiaquerica ipeaguetaanaja.

*Jesoshi itsatasacajaiqueriquea  
itsatacaneja taaca opajitapae  
covaeguishetantatsica  
(Mr. 7.1-23)*

**15** <sup>1</sup>Iroompaquea icoraquecoraqueipoji pariseojoia aisa tsatacantajiguiroca itioncacotanaqueca

Moishishini, iquenaquenaipoji Jerosarequi, icantajiguiri:

<sup>2</sup>—¿Queroquea icohipoitacani pitsacaanejia teeca irinetساناتا jiguempa-roji maasanopae icantajianaquea avaesatiniteni? Mana ishecajiacaquea intati teequea inquivacomajatemppaji.

<sup>3</sup>Iriraquea Jesoshi icanqueriquea:

—¿Queroquea picojiacani aviatimpajia teeca irooquea pinetsanatantajiguempaji icanqueca Aapani Irioshi, iroguenti pinintajiaque pinetsanajaque-quea icantajianaquea pivaesatiniteni?

<sup>4</sup>Icantavetacaquea Aapani Irioshi: ‘Pinquemisantamajajiaquerijate piri aisa piniro, aatoquea pipigatsajigaritsija.’ Icanque aisa: ‘Iriraquea tsavejencatirica iriri irooca iriniro irimetojitajitemppari.’

<sup>5</sup>Cotanquitsiquea aviatimpajia manaquea picantashitatjaiacaroquea. Pinquenquejejate imaica, choocajia irijanintajatiacsica coguitejacojianquitsica icantajiavecariequa irijanite incavintsa-jajiaquerime irojocajiaquerenerime icoguitejacojiacaca, cotanquitsiquea aviatimpajia manaquea picantajiaque-quea cameetsavaeque incanqueriquea: ‘Aatoquea nagaveji nojocajiguimpirotsi pamanajiaquenaca, irooriji maasanopae nashintaguecaca nashintacaajari Aapani Irioshi’, <sup>6</sup>ariequa aatoquea yojoquiniri. Oraquea piquempejiacagueti imaica iroguentiquea povashiantajianaquero icanqueca Aapani Irioshi, irooqua poguijaguijaitanaquea icantajianaqueca pivaesatiniteni. <sup>7</sup>iCameetsatamampeaj-atsica! Itampaticamajataqueroquea tsavetantatsica Isaiashini itioncacojiana-quempigueti coramani icanque:

<sup>8</sup>‘Iricatica caquinteja ishinetseraven-tamampea quena, cotanquitsiquea manaquea ichoo- shirentavaetaque osamani.

<sup>9</sup> Itsaroventamampeajavetaquena- quea,

cotanquitsiquea itsatacaantajiguica  
iroguenti icantajiguica caquin-  
tejia irinetsanajiquea.'

<sup>10</sup>Iroompaquea icajemajiaqueriquea  
maasano, icapiocajiaqueriquea, icantaji-  
guiri:

—Pinquemisantamajajavaquenaja,  
pintsajiaavaquero noncamanquempica.  
<sup>11</sup>Oraquea quijanquitsica ivagantequi  
caquinte teequea irooqua covaeguishe-  
shirenterineca. Oraquea sotoanquitsi-  
neca ivagantequi, irootaquequea  
covaeguisheterineca.

<sup>12</sup>Ariquea iquempejiquempejii tapojiri-  
quea itsatacaanejia, icanqueriquea:

—¿Pamenajajavaquerimpa pariseojia  
itijerequivorojianaca iquemajiaquempi-  
gueti picanquerigueti imaica?

<sup>13</sup>Icanque Jesoshi:  
—Maasanopae panquirentsí teeca  
irioquea vintyaquerone Aapani Irioshi  
inquitequitica intsopajajiqueroquea  
oncoramanitapojagueti. <sup>14</sup>Imaica  
ariquea iquejejiaca irrajia pariseojia,  
iquempejiacari shamoncajatatsica  
irancatsavacojiaquerigueti irapisham-  
poncjariteni. Oraquea inquempeta-  
quempagueti imaica mavite shamonca-  
jari irancatsatavacaajiaquempagueti  
iroaroaitegueti, mavitequea intanquire-  
tanquireitanaque ocogarajacagueti.

<sup>15</sup>Icantsitanaca Peerero:

—Iintsjate poguisotoguenaroja  
pitsavetacotaqueca incajaranqui.

<sup>16</sup>Icanque Jesoshi:  
—iArisacanica piquempejiacaquea  
aviatimpajia tequerata pinquemajiguena!

<sup>17</sup>¿Arimpate teequea pinquemajiguena  
nocantajiaquempica? Nocanque maasanopae  
ishecajigueta caca manaquea oanaque  
itsicotoqui, ariquea irishitacojitajero.

<sup>18</sup>Cotanquitsiquea maasanopae iquenquetas-  
guishejita queca oquenantapojacaro shiretsi,  
irootaquetari iquenquejaguishejitia.  
Irootaquequea covaeguishetantanquitsica.

<sup>19</sup>Arikea oquenapojoj ishirequi taaca  
opajitapae covaeguisherentsipae, iquenqueja-  
guishejiaquero taaca opajitapae coguisheren-  
tsipae, imetojantajigui, yoashijiguiro  
manquigarentsi manquigajitsica aisa  
tequeratatirajaca irimanquigajitemparojo,  
yaitstantajgui, itsoeventantajiga, iquenque-  
tsatacoguishetantajgui. <sup>20</sup>Maasanopae  
ocatica ipeacaagushejigueta caca irooqua  
iroguenti ocovaeguishetanti, cotanquitsiquea  
pishecajiaquempagueti aatogueti piquivaco-  
veta teequea oncovaeguishetanteji.

**Aventanajari Jesoshi manquigarentsi  
ichoviquijianaqueca Canaanequica  
(Mr. 7.24-30)**

<sup>21</sup>Iroompaquea yoanaque Jesoshi  
irooshitacoquero Tiro aisa Shirone.

<sup>22</sup>Arikea ocoraquepojiquea aparo  
manquigarentsi ichoviquijianaqueca  
choocajavetatsica Canaanequi,  
ocanquequea:

—iNomajirote, Ichoviquitanaqueca  
Taavini, pincavintsajenashiatsi! Chooca  
norjanite ishaquiacaca ampatsini  
atsipevaecaquea oshequi.

<sup>23</sup>Cotanquitsiquea iriraquea Jesoshi  
teequea incanteji, manaquea isanticota-  
naque. Arikea iquempejiquempejii po-  
jiri itsatacaanejia, icanajiaqueri:

—Intsijate pinquemisanteroja  
cameetsanijite oanajenijite, manaqueate  
oguijaguijai pojacaji ocajemavae poji.

<sup>24</sup>Icanque Jesoshi:  
—Iroguenti itigarandiquimenta quena-  
quea Aapani Irioshi noncoraquetashijia-  
queri ishiraerijia, noncavintsajajiaqueri  
quejejiacarica oveja peajianquitsica.

<sup>25</sup>Cotanquitsiquea iroatimpa arimpas-  
quea oquempejitaro jaro ogueroventana-  
cari, ocanque:

—iNomajirote, iiintshishiatsi pincavin-  
tsajacotenashiatsi!

<sup>26</sup>Cotanquitsiquea Jesoshi icanquero-  
quea:

—Teequea oncameetsateji aapitsateri chaajanquirijia isheca, ojoquitenempari ishiishitepae.<sup>27</sup>

<sup>27</sup>Iroatimpa ocanque:

—Arimajaca, Nomajirote, cotanquitsiquea shishi iramenacojiaquerigueti irishecaciaquempagueti virajiacarica iroguijavaqueroquea isaviji shitaponcrontsiqui irishecatsopequiguetavaquemparoqua otsopequi ontanquirejagueta-naquegueti.

<sup>28</sup>Icantitaroquea Jesoshi:

—Iroosacanica, manquigarentsi, pitsamajataque nagavejaque nogueshitaro porijanite, imaica nonetsanata-quempiro pamanaqueunaca.

Iroompa icanquitiguiro opeapanajanta.

**Jesoshi yogueshiguetajiri oshequini ashinoncajajatiatsica**

<sup>29</sup>Iroompaquea yoanaji Jesoshi icantanacaquea otaravijatapojacagueti iniromotija Garirea. Coajicaquea itoncoanaque niganquitantanaqui ariquea isavicaque oraniqui. <sup>30</sup>Ariquea yoayoaitashitanaqueri icaramirincaveta-naque caquintejia yaajianaqueneriquea teeca iranijimajateji, shamponcrajipae, macanaripae, teeca ironcavacotempaji, aisa oshequini ashinoncajajatiatsica ocantashitatiajencaguecaquea ashinoncajarentsi. Yojoquijijiaopojiniri iguitiqui Jesoshi. Iriatimpa yogueshiguetajiriquea maasano. <sup>31</sup>Irraquea capiocajianquitsica yamenamenaitanaquequea intati, yamenajiaquetarite iquenquetsajianajiquea macanaripae teeca inquenquetsajiajivetempaji, yoncavacojianajaquea teeca ironcavacotempaji, yanijimajatanajiquea teeca

iranijimajavetempaji, aisa yamenajianaji shamponcavetanquitsica. Arikeate icohipoitanaca ishineventamajatanacari Aapani Irioshi cavintsajajiaquerica ishiraerijia.

**Jesoshi yoshequiavaequeroquea pan, ishecatacaajiacari 4,000 shirampari (Mr. 8.1-10)**

<sup>32</sup>Iroompaquea icajemajiaqueriquea Jesoshi itsatacaanejia icantajiguiri:

—Nopintsatacojianaquerica irirajia, namenajiaqueriquea isavicaventajiaque-naquea ocaniqui 3 savincagiteri, niganquiquea iteroncacojianaquaquea ishecajia. Imaicaquea imaica teequea onchoocateji taaquea irishecajiaquempaca. Teatarite noninteji nontigarancajiaqueriquea iroaroaitanaje itsovironaquitequi itaseajiaquetari, aajiaavaqueritsi itase quenavoquivirontsiqui.

<sup>33</sup>Iroompaquea icantajiguiri itsatacaanejia:

—iOoo icaramirincavaequequea!

¿Querocampate naajiaqueroni pan nojocajiaquenerica irishecajiaquempaca maasano inquemantajianaquempacate? Ocaniquiquea teequea quericaca quintenitantemparone.

<sup>34</sup>Icanqueri Jesoshi:

—¿Querocaquea ocarashequiaqueni pan choocatanquitsica?

Icantajiguiri:

—Ocarati 7. Chooca aisa ishantyo-riqui shima tee iroshequiamajateji.

<sup>35</sup>Ariquea Jesoshi icantajiaqueriquea maasanojia irisavisaviitaquequea quepatsiqui. <sup>36</sup>Yajiricajiaquero pan caratanquitsica 7 aisa shima, yamaniqueriquea Aapani Irioshi, icantajiqueru: “Arioteesaa.” Ariquea icotarejaqueroquea pan aisa shima yojocajiaqueneri

**y 15.26** Aapani Irioshi itigaranquimentaqueri Jesoshi incoraquetashijiaqueri ishiraerijia. Iriquetimegueti incavintsajajiaqueme teeca irijorijoigueji, onquempevetaquempame yaapitsajitirigueti isheca chaajanquirijia irojoquitenemparigueti shiishipae.

itsatacaaneja, irioqueate jocajia que-  
neriquea maasano.<sup>37</sup> Ishecajia quea  
maasano, iquemajianaca. Oraquea  
choocatapo jajatsica iteguetajiroquea  
itsatacaaneja cantiriqui, ocaratacovae-  
taji 7.<sup>38</sup> Maasanojia shecajia quitsica  
icaramirincavaeque 4,000. Iriguentita-  
rite itsajique shiramparijia, teequea  
intsajiteroji manquigarentsijia aisa  
chaajaniquirijia.<sup>39</sup> Iroompaquea Jesoshi  
itigarancabajiri iroaroaitanajeta.  
Iriatimpa itetanaja quenajarontsiqui,  
itsipatsipaitanajari itsatacaaneja  
yoajiana quequea irooshitacoquero  
Magarara.<sup>z</sup>

**Iriraquea pariseojia aisa saroseojia  
icantajia vecari Jesoshi  
ironiga jia querime oaca antantatsica  
intati**

(Mr. 8.11-13; Irc. 12.54-56)

**16** <sup>1</sup>Ariquea icoraque coraque itashi-  
pojiriquea Jesoshi pariseojia  
aisa saroseojia iramenantajiguempari,  
icantantajia pojacarica ironiga jia queri-  
oaca antantatsica intati onquenanta-  
jemparoja ontaniqui jenoqui inquitequi.  
<sup>2</sup>Cotanquitsiquea iriatimpa icanqueri-  
quea:

—Aviatimpajia pamenajiguirogueti  
ocamachoncaguitetigueti itsaparonca-  
guitetigueti catsirincaiteri manaqueate  
picantajigu: ‘Osaitequera quea oncamee-  
tsaguitetama quequea, camachonca-  
guiteva quetarite.’<sup>3</sup> Oraquea arigueti  
oncamachoncaguitetama quequea  
picantajigu: ‘Imaica quea aatotarite  
ocameetsaguiteti, mampiro guiteva eta-  
quequea, aisa seevaequetarite.’ Pitsajia-  
vetacaro arigueti oncameetsaguitetaque  
aricampate aatocaja ocameetsaguiteti,  
cotanquitsiquea teequea pintsajigueji

queroquea octacani oquempetantacaca  
imaica pinejajia vetacarogueti taaca  
opajitapae oaca antantatsica intati teeca  
iramenajiteji coramani.<sup>4</sup> Aviatimpajia  
otiavaetaquempiquea covaeguisherentsi,  
pinintantajiacaca namenacajia que-  
piro oaca antantatsica intati, cotanquitsi-  
quea aatoquea namenacajia que-  
piro otsipa onquempetaquemparo quea  
iquejetaca jita carigueti Jonashi  
coramani.<sup>a</sup>

Ariquea itsinampirejajianajiri,  
yoanaji.

**Jesoshi itsavetacotsita queri  
itsataca antaquea pariseojia  
i quempetaca acaro anempoacaguiroca pan**  
(Mr. 8.14-21)

<sup>5</sup>Iroompaquea yoayoaitana quequea  
itsatacaaneja Jesoshi imontemonteita-  
naja quea intati quoqui, ipeaco jianaja-  
roquea pan irajaiana queme irishecajia-  
quempameca.<sup>6</sup> Iroompaquea iriraquea  
Jesoshi icanqueriquea:

—Aviatimpajia, inchiquiojita  
pishecajic jarotsi anempoacaguiroca  
pan irashijia pariseojia aisa saroseojia.

<sup>7</sup>Iroo quea iquemajia quegue-  
tui quenquet satava caajianaca, icanque quea:

—Manatarite yamenajia cajiquea  
teetarite ameji pan, jero icantantajia-  
caca imaica.

<sup>8</sup>Iriraquea Jesoshi yamenajia que-  
gueti quenquet satava caajianaca,  
icantsitariquea:

—iTeemajaca pintsamajajigueji arima ja  
nagavejamajati! ¿Queroquea oco cani  
piquenquet satacantajia caroca pan,  
picanque quea manatarite namena que-  
pi quea pameji pan?<sup>9</sup> ¿Arimpate tequerata  
pintsajigueji? ¿Arimpate teequea pinquen-

<sup>z</sup> 15.39 Oratica quinteninintsi *Magarara* (*Magdala*) opajita aisa Magarani (*Magadán*).

<sup>a</sup> 16.4 Pamenero 12.39-40.

quejajigueroji pan ocaravecauea 5, nocotarejaguequero noshecatacaaajiacari 5,000 shiramparijia? Ariquea picapiocajajiro choocatapoajatsica oshequiacovaetaji cantiripaequi. ¿Arimpate pipeacoajajaroquea?<sup>10</sup> Aisa ¿arimpate teequea pinquenquejajigueroji ocaravecauea pan 7, nocotarejaguequeroquea noshecatacaaajiacari 4,000 shiramparijia? Ariquea picapiocajajiroquea choocatapoajatsica oshequiacovaetaji cantiripaequi. ¿Arimpate pipeacoajianajaro?<sup>11</sup> Oraquea nocantajiaquempigueti: ‘Inchiquoitaja pishecatacojigarotsija anempoacaguiroca pan irashijia pariseojia aisa saroseojia’, ¿queroquea ococani teeca pintsajiaqueroji teequea irooqua noncantacoteji pan?

<sup>12</sup>Ariquea itsajiaque itsatacaaneja teequea irooqua incantacoteji anempoacaguiroca pan, iroguentiquea iquempe-tacaacaro itsatacaantajiguica pariseojia aisa saroseojia aatonijite iquemisantajiguiritsi itsatacaantajiguigueti.

#### Peerero icanque Jesoshi iriguenti Quirishitotatsica

(Mr. 8.27-30; Irc. 9.18-21)

<sup>13</sup>Iroompaquea yoanaquequea Jesoshi icantanacaroquea oraniqui iroshiticocarogueti quinteninintsi pajitatsica Sesarea Piripo. Arikea icanqueriquea itsatacaaneja:

—¿Queroquea icanqueni caquenteja? —Taa ipaji iricatica Irijanite Caquite?

<sup>14</sup>Iriatimpajia icantajiguiri:

—Iconoagarantajiaca icantacojiaquempi: ‘Iriguenti Joancani Viñacajatantsica.’ Itsipa cantajiananquitsica: ‘Iriguenti Iriashimi.’ Itsipa quea cantajiananquitsica: ‘Iriguenti Jeremiashini, teegueti irio, iriguentica itsipa tsaventatatsicani paesatinica, itancorenjanajishiatsi.’

<sup>15</sup>Arikea icantajiguiri:

—Aviatimpajia, ¿quiero picantajiguini? —Taa nonaque naatimpa?

<sup>16</sup>Icantsitanaca Shimo Peerero:

—Aviguenti Quirishitotatsica,<sup>b</sup> Irijanite Aapani Irioshi anijatsica.

<sup>17</sup>Icanqueriquea Jesoshi:

—Pishinetaca, Shimo, irijanite Jonashi, teetarite irioquea caquenteja tsatacaajiguem-pirona ocatica picantaqueunaca imaica. Iriguenti tsatacaaquempiro Aapani inquitequitica, icavintsaquempitari.

<sup>18</sup>Arikea noncanquempi naatimpa: aviguenti Peerero, Mapi,<sup>c</sup> arikea ocatica shiratantapiqui novinchajacotantemparo notsovironaquite cantacotaquerica maasano quenisantajiaquenaneca. Aatoquea agavejajiguiri osotomoro Areshi ichoocaque-gueti metojatsica.<sup>d</sup> Onquempevetaquem-paquea nojocaqueMPI yavi iyavirejantajitaroca sotomorontsi inquijantajitempacá imajirontagueti Inquitequitica; taaca opajita picantimentaquerica choocatansquitsica acanqui quepatsiqui, inquejetaquempa Aapani inquitequitica incantimentantaquerico

**b 16.16 Quirishitotatsica.** Iguenquetsatsarequi guiriegojia icankegueti *Christos* (Quirishito) manaquea ocanque “Ishaguijitaqueca” aisa “Icoguiáqueca”, irishaguijitaqueritari orejiqui orivo irirajia icoguijiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsaventatajitsica coramanitica intigarancaque Aapani Irioshi impeaquempañi Imajirojiate maasano. **c 16.18 Peerero** ocanque “mapi”. Jesoshi ipajitajiri “Peerero” irooriji itsatsitacari oncoramanitapoajegueti iroanajegueti Jesoshi jenoqui inquitequi, intampishirentanaque Peerero, aisa intampishitacajajaqueri itsipajia. Quericaca cantamajatanquitsineca: “Irira Jesoshi irio Quirishito, Irijanite Aapani Irioshi”, intsipatacaantajiguempari maasano itsipajia tsaroventajigarica. **d 16.18** Oraquea Areshi iroguenti ichoocajiaquegueti metojatsica. Icanquegueti *Aatoquea agavejajiguiri osotomoro Areshi*, ocanque “Aatoquea agavejajiguiri metojagantsi”, ipochatanajitari Quirishito, arikea inquejejiaquempa aisa maasano aventajiaquemparica.

quea; aisa taaca opajita pishineteneri choocatanquitsica acaniqui quepatsiqui, inquejetaquempaquea Aapani inquitequitica irishineteneri.

<sup>20</sup>Arikea Jesoshi icantajiaqueriquea itsatacaanejia aatonijite itsavetantajiguiti incanqueuea iriguenti Quirishito.

**Jesoshi icamantsicaro irimetojaque**  
(*Mr. 8.31-9.1; Irc. 9.22-27*)

<sup>21</sup>Iroompaquea Jesoshi iparianacarоquea itsatacajaiqueriquea itsatacaa-nejia iroanaque Jerosarequi irantsipeta-cajaiqueriempaquea jivajatsica, irirajia saserorotejia anaantajianquitsica, irirajia aisa tsatacaantajiguiroca itioncotanaqueca Moishishini, iroompaquea ari irimetojajiquer, cotanquitsiquea aapojajempagueti 3 savincaguiteri impochatanaje. <sup>22</sup>Iriraquea Peerero itsipatanacari tijacofnaji icantomajitavetari, icantiriquea:

—iAato, Nomajirote! iAatotari avishimatimpi!

<sup>23</sup>Cotanquitsiquea ipitsocanaca Jesoshi icantsitari Peerero:  
—iPoanaqueshinete, Satanashi!  
Piticaavetaquena, teetarite irooquea pinquenquejamajate inintaguetica Aapani Irioshi, iriguenti piquenquejaguetaqueuea iquenquejaguetaqueca quaintejia.

<sup>24</sup>Arikea Jesoshi icanqueriquea itsatacaanejia:

—Quericaca nintanquitsineca iroguijatacoquena irovashiantanaque-roja inintashiguevetacaca iriatimpa, irinatasshitapiniquempa inchapoa irompajacotantajiquemparica, mananiji iroguijatacoquena. <sup>25</sup>Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenaca irooca irimetojavenquena, incoquempani-

quea inchoocaguiteni. <sup>26</sup>Arigueti inchoocavetaquempa agavejanquitsineca irashinquemparo maasanopae quepatsipaequitica, cotanquitsiquea oncoramanitapoja jegueti irimetoja-quegueti arigueti impeaquempa camorecariqui, carimpate agavejaque irajaararo aavajeri? Aatoquea agavejitsi. Irashintaguevequemparo-queate maasanopae, cotanquitsiquea aatotarite yagaveji irivegaraventava-quempa aatonijite yoguitsi camorecariqui. <sup>27</sup>Oraquea incoraquetajategueti Irijanite Caquinte iroganejencapoja-jempaquea, iroguentiquea iroganejen-care Iriri. Oraquea incoraquetajate-gueti intsipatsipaiquempariquea irashivantijite, iroguishinejajipoja-jeri maasano netsanajiguiroca intintaguetica, irioquea teeca inquemi-santajiguera manaquea incatsimati-mentajapajayeri irantsipetaajia-quempari. <sup>28</sup>Noncanquempipa arimajaguitatsi iconagarantaca catintiitimojiaquenaca imaica, aato imetoji tequeratagueti irameneri irira Irijanite Caquinte irimajirontapoja-quempagueti.

**Jesoshi icantashitatiimojiacariequea**  
**itsatacaanepae**  
(*Mr. 9.2-13; Irc. 9.28-36*)

**17** <sup>1</sup>Iroompaquea anaavaetanaca-guetiquea 6 savincaguiteri iriraquea Jesoshi yoanaquequea ontaniqui otsempiqui yagatsonquivaeta-naquequea osamani. Iriguentequea itsipatsipaitanaca Peerero, Santiago aisa iriguentejeguite Santiago pajitatsica Joanca. Tee inchoocateji itsipajia.

<sup>2</sup>Iroompaquea taampina iriatimpajia yamenitsijigari Jesoshi icantashitatiimo-jianacariequea. Arikea icotanaca itsirencashimpoquirerejanaquequea ivoroqui quempetanacaquea itsirenca-

shimpoquirerejigueti catsirincaiteri, aisa iitsaarequi oquitamaromajatanaquequea ocanca. <sup>3</sup>Yamenitsijigariquea Moishishini aisa Iriashini iquenquetsatacaajiaqueri Jesoshi. <sup>4</sup>Irira Peerero icanqueriquea Jesoshi:

—Nomajirote, cameetsavaeque achoocajiaque ocaniqui. Pininquegueti nompeacaguempaja 3 catisetarentsi, aparo pashinquempa aviatimpa, aparo irashinquempa Moishishi, otsipaquea irashintaquempa Iriashi.

<sup>5</sup>Quenquetsavetanatsi omanacojiapajiri mararo quitamaromajatanaquitsica, ariquea iquenquetsajencajitanaque omararosecanquegueti icanque:

—Iricatica irio Irijani, nopsisatacaca, noshineventamajatacari. Pinquemisantamajajuerija.

<sup>6</sup>Iquemitsijigariquea ariqueate icohipoitanaca itsarotsaroitanaque ipatapataitanaca. <sup>7</sup>Cotanquitsiquea Jesoshi iquempejiquempejiopojiri ichagajiaqueriquea icanque:

—Pincatintijianaje, aatoquea pitsarajigui.

<sup>8</sup>Yamenitsijavetanaja aisa teequea anejeriji incatintuitaje, aparoquea icatiaja Jesoshi. <sup>9</sup>Ariquea icoraquecora-queitaji yoguirincajaja, iriraquea Jesoshi icanqueriquea:

—Aatotaja quericaca picamantitsi oratica pamenajiaqueca imaica. Intanco-rejanajegueti Irijanite Caquinte irimetojavetaquempagueti, ariquea pintsavetacotsijiguemparoquea.

<sup>10</sup>Iriraquea itsatacaanejia icoacota-queri, icantajiguiri:

—¿Quero ocotacani icantantacaca tsatacaantajiguiroca itioncacotanaqueca Moishishini icantajiaquegueti iriquetita-quea coraquetajatsine Iriashini?

<sup>11</sup>Icanqueri Jesoshi:

—Arimaja iriquetitaquea coraquetaja-tsine Iriashini, irinetsanaguequieroqua-

maasano. <sup>12</sup>Imaica noncantajiaquempi-quea jac icoraquequiti Iriashini, cotanquitsiquea teequea intsajiteriji, manaqueate yantagushejitaqueri maasano inintajitaqueca. Arikea inquempetacaajitaquempariquea Irijanite Caquinte irantsipetacajaiquem-pari.

<sup>13</sup>Arikea itsajiaipojaque itsataca-anejia iriosacanica itsavetacotaque Joanca Viñacajatantatsica.

**Jesoshi yogueshitajiri chaajaniquitirajaca, yoguisotoajiniri ampatsini**  
(*Mr. 9.14-29; Irc. 9.37-43*)

<sup>14</sup>Iroompaquea yarejerejeipojacaquea ichoocajiaquegueti caquinteja icapiocajiacagueti. Icoraquetashipojiri Jesoshi aparo shirampari, iguerovempojacari icanqueriquea:

<sup>15</sup>—Nomajirote, pimpintatsacotenari-shiatsi nirijanite imetojapinitaquiti icantapinitaquiti tinquininini, yatsipe-vaetaca. Itsatsiavaetanacaqueate paamariqui, aisa iticajaticajavaetaca ojaaquiniqui. <sup>16</sup>Namajiavetacanariequa pitsatacaanejia irogueshitajerimequea, cotanquitsiquea teequeate iragavejaji-gueriji.

<sup>17</sup>Icanque Jesoshi:

—iArisa picomirincajiga teequea paventemparoji iragavejane Aapani Irioshi, iroguentiquea picovaeguishe-jiga! ¿Queroquea oncarashequiavae-teni nosavicaventajiaquempi? ¿Queroca oncarashequiavaefteni nantsipetacojia-quempi? Iroosacanica iintsijate pamajia-querijke ocaniqui.

<sup>18</sup>Iroompaquea icantomajitari Jesoshi ampatsini, ariquea icotanaca isotoapa-najanti, ari ipeanaja chaajaniquiri ishaquiavectaca.

<sup>19</sup>Coajica iriraquea itsatacaanejia icoraquetashipojiriquea Jesoshi apaniro, icanqueriquea:

—¿Queroquea ococani naatimpajia teeca nagavejajigueji noguisotoitajiguejiji?

<sup>20</sup>Icanque Jesoshi:

—Iroorijite tee paventajiguemparoji nagavejane. Arimaja noncanquempi, arigueti pavenuquitiguemparo capichaji, ariquia pagavejajiaquerquea pincantajiaqueror oratica otsempi: ‘Pogaanaquempajate poanaquequea osamani’, ogaanaquempaquea. Aatotarite taaca opaji manapitsajiguimpitsi arimajacagueti paventamajatanaquemparogueti nagavejane. <sup>21</sup>Cotanquitsiquea ampatsinipae quejecarica irintatica, aato isotogui aatogueti pamanamajatiri Aapani Irioshi, aisa aatogueti pisanticotiro pisheca.

**Jesoshi icamantsitajariquea irimetojaque**  
(*Mr. 9.30-32; Irc. 9.43-45*)

<sup>22</sup>Iroompaquea Jesoshi itsipatsipaitanacari itsatacaanejia yoayoaitanaquequea oraniqui Garireaqui, itsatacayaiaqueriquea icanke:

—Iriraquea Irijanite Caquinte iraacaantajiqueru iraajavaqueri caquintejia. <sup>23</sup>Ariquia irimetojajiaqueri, cotanquitsiquea aapojajempagueti 3 savincaguiteri irovochantajitajeri.

Ariquia iquemajiavaquerigueti ishimampojancajanaca oshequi.

**Imentaquipae ashiquea teemporo itsaroventantajitarica Aapani Irioshi**

<sup>24</sup>Ariquia yarejerejeipojacagueti Jesoshi aisa itsatacaanejia Caperenaoqui, icoraquejiajapoaquequea capioquirica imentaquipae ashiquea teemporo, icoacojiajapoaqueri Peerero, icanqueriquea:

—Iriraquea tsatacaajiguimpica <sup>25</sup>teempa irivegaratapiniteri capioquirica imentaquipae ashiquea teemporo?

<sup>25</sup>Icanque Peerero:

—Jeejeguitatsi ivergaratapinitiri.

Iquijavetanaquitiga intsompogui tsovironaqui qui ichoocaquegueti Jesoshi, iriquetiquea quenquetsatacaa-vaqueri, icanqueriquea:

—Shimo, ¿queroquea piquenquejaque aviatimpa? Iriraquea majirontajatsica choocajatsica acaniqui quepatsiqui ¿queri irivegaratacaquempaca imenta-quitite? <sup>26</sup>Irioca irijanijiate, irioca itsipajia?

<sup>26</sup>Icanque Peerero:

—Iriguentiquea irivegaratacijaia-quempaca itsipajia.

Icanque Jesoshi:

—Iroosacanica teesacanica irioqueate irivegaratacaajiguempaji irijanijiate.

<sup>27</sup>Cotanquitsiquea aatimpajia aatonijite icatsimatasshitaji, poanaque iniromotijaqui pojocatsajataquiteja, iroompaquea iriraquea iriquetica paaque pintisavan-caqueritaquea paitsitavaqueriquea imentauqui cavorejatatsica choocatanquitsica ivagantequi, pamajiaqueneriquea capioquirica imentauquipae ashiquea teemporo, pojocajiajapoqueneri. Irarejequemparo ivergaratacaquenaca naatimpa aisa aviatimpa avegaratimen-tajiaquempajiji.

**Quericaca anaantamajatanquitsineca**  
(*Mr. 9.33-37; Irc. 9.46-48*)

**18** <sup>1</sup>Iroompaquea iquemepijquem-pejipojiri itsatacaanejia Jesoshi icantajiaqueriquea:

—¿Quericaca anaantamajatanquitsineca irimajirontaquempagueti Inquite-quitica?

<sup>2</sup>Iriatimpa icajemitsitaquea aparo chaajaniquiri yogatiitsitariquea niganquiqui ichoocajiaquegueti, <sup>3</sup>icanta-jiaqueriquea:

—Arimajaca noncantajiaquempica: aatogueti picantashitatijajaa pishirequi pinquempejjajempariquea chaajaniquirija, aatotarite pagavejitsi pinquija-

naque imajirontagueti Inquitequitica.  
<sup>4</sup>Taacagueti quempetajemparineca  
 iricatica chaajaniquiri teeca inquenque-  
 jeroji iranaimanatantaque, irioquea  
 iriguenti caaviji iranaaque irimajironta-  
 quempagueti Inquitequitica. <sup>5</sup>Aisa  
 quericaca shineventavaquemparine  
 chaajaniquiri quempecarica iricatica  
 iroorijite nonintacaantaquero naatimpa,  
 quempecaqueate naroguentica  
 ishineventavaca.

**Caaviji incatsimamajajiqueriquea  
 covaeguishetacaantqnuitsineca**

(Mr. 9.42-48; Irc. 17.1-2)

<sup>6</sup>“Taacagueti covaeguishetacaquem-  
 parineca aparo chaajaniquiri quejejia-  
 rica iricajia tsaroventaqueraneca,  
 incatsimamajajitaqueriquea oshequi.  
 Iroquetitamequea intsatotacojiquene-  
 rime itsanoqui iniroshimentapiri  
 itononcantajitaca ariquea irajaitanaque-  
 rimequea impishoncrajiquerime  
 osaanajavaetaquegueti inirojani  
 quentijani. <sup>7</sup>Ilmaicashiatsi irantsipevae-  
 jiguempanishiatsi maasano choocajia-  
 tsica acaniqui quepatsiqui, inchoocajia-  
 quetarite nintajianquitsineca incovae-  
 guishetacaantajiaquempaquea! Arikea  
 onquejetanaquempaquea imaica,  
 cotanquitsiquea caavijkea irantsipe-  
 majajiaquempaquea quempejiaqueri-  
 neca imaica, incatsimamajajiqueriquea.

<sup>8</sup>“Nonquejetacaajiaquempiroquea  
 imaica: arigueti oncovaeguishetaca-  
 quemi paco irooca piguiti, arikea  
 pincarataqueroquea pimpishonquitem-  
 paro. Cameetsavaequeate  
 pimpishoncaquerogueti covaeguisheta-  
 caaquempica pinetsanatimentanajempa-  
 njite. Aatoguetitarite pipishonquiro  
 jatanatsitarite oncovaeguishetaca-  
 jempi, iroompa pimetojanajegueti  
 impishoncjitajuempiqueate camoreca-  
 riqui aatoca otsivaquitsi. <sup>9</sup>Aisa iroogueti

covaeguishetacaquempine poquija  
 pinquitsorejaquempa pimpishonca-  
 quero. Cameetsavaequeate  
 pimpishoncaquerogueti covaeguisheta-  
 caaquempica pinetsanatimentanajempa-  
 njite. Aatoguetitarite pipishonquiro  
 jatanatsitarite oncovaeguishetaca-  
 jempi, iroompa pimetojanajegueti  
 impishoncjitajuempiqueate camoreca-  
 riqui aatoca otsivaquitsi.

**Oveja peavetanquitsica**

(Irc. 15.3-7)

<sup>10</sup>“Aatoja pitsojenquiritsija irirajia  
 chaajaniquiri, choocajitarite irashivan-  
 tijitete Aapani Irioshi quempogujajia-  
 querica. Iriatimpajia icocaniquea  
 ichoocajiaque ontaniqui quempeji  
 Aapani Irioshi choocatatsica jenoqui  
 inquitequi. <sup>11</sup>Irootaquequea icoraque-  
 tantacaca Irijanite Caquinte, irajajajateri  
 peajavetanquitsica.

<sup>12</sup>“¿Queroquea piquenquejajiaque  
 aviatimpajia? Inchoocategueti aparo  
 caquinte iriviraquempaquea 100  
 irovejajiate iroompaquea impeaquempa-  
 quea aparo, ¿arimpate aatompate  
 yojocajianajiri maasano irovejate  
 iroanaquequea iramenaguetajateri  
 peanquitsica? <sup>13</sup>Arikea iraajerigueti  
 caaviji irishinevenquempariquea,  
 anaavaequeroquea ishineventajiacari-  
 gueti maasano 99 teeca impeavetempaji.  
<sup>14</sup>Arikea iquempetacaquea Piri inquite-  
 quitica, teetarite irininteji impeaque-  
 paquea aparo quejejiacarica irirajia  
 chaajaniquiri.

**Queroquea ancojiaquempani  
 avetsinantajajerigueti  
 apitsarovenatarijiateni**

(Irc. 17.3)

<sup>15</sup>“Querocagueti incoquempini  
 papitsarovenatarite poanaquequea  
 pinquenquetsatacapojeri apaniroja,

pincamanqueriquea querocagueti icoquempini. Iriatimpa inquema-quempigueti jac pivetsinrantajiri. <sup>16</sup>Oraquea aatogueti iquemimpitsi, pintsipatanaquempariquea aparo arica mavite papitsaroventarite cameetsanijite inquemajavaquempi-nijite iriatimpa, aisa intsajiaquenijite arimajaca pininquequea pivetsi-nantajeri. <sup>17</sup>Cotanquitsiquea aatogueti iquemimpitsi, poanaque-quea icapiocajiacaguetti tsaroventaji-atsica pincamantajiqueriquea, incantomajajaqueriquea. Aatogueti iquemiritsi iriatimpajia, manaquea pinquempetacaajiaquempari teeca intsaroventempariji Aapani Irioshi irioca capioquinirica majirontatsica imentaquipae.

<sup>18</sup>“Arimaja noncantajiaquempi: taaca opajita picantimentaquerica choocatanquitsica acaniqui quepatsiqui, inquejetaquempa Aapani inquitequitica incantimen-tantaqueroquea; aisa taaca opajita pishineteneri choocatanquitsica acaniqui quepatsiqui, inquejeta-quempaquea Aapani inquitequitica irishineteneri.

<sup>19</sup>“Noncantajiaquempi aisa: ariguetti pincarate mavite acaniqui quepatsiqui, ariguetti onquempetava-caguempa pinquenquejaqueca, iroomba pincoacotaqueri Aapani inquitequitica, ari irimataquempiro. <sup>20</sup>Querocagueti incapiocaventajia-quenagueti, mavitegueti inchoocaji-avetaquempa irooca mavitepae, ariqueate nonchoocatimojiaqueri-quea naatimpa.”

e <sup>18.22</sup> Icanquegueti Jesoshi *oncaravaetequea 70 x 7* ocanque aato ocaratapojitsi, ancoguitempani ampeacotajemparoja intati querocagueti incovetacajini itsipapae.

f <sup>18.24</sup> Iriraquea icantajitica *tarento*, irioquea apamontiinaro imentaquipae cavorejatatsica tenatatsica 91 quiro. Iramiterigueti itsipa irajagantsitacovaetanaque irivegarataqueri aparo tarento.

### Iramajirore majirontatsica teeca imprintsatacotantempají

<sup>21</sup>Iroompaquea iquempejipojari Peerero, icanqueri:  
—Nomajirote, ¿querocaquea oncarashequigueni nompeacotajemparo querocagueti incoquenani napitsaroven-tarite? ¿Ari oncaravaete 7?

<sup>22</sup>Icanqueriquea Jesoshi:  
—Aatoqueate ocaratapojitsi 7, manaquea oncaravaetequea 70 x 7 pimpeacotajemparo.<sup>e</sup>

<sup>23</sup>“Imaicaquea noninque nontsatacaa-jaquempiro quero icotani imajirontagueti Inquitequitica, manaquea nonquempeta-caaquepari majirontatsica cajemacaanta-jiaquerineca itigarancajiguica caarica jocavetajanari, incantajiaqueri irivegarajia-keri. <sup>24</sup>Irooqua iparianacaroquea icajema-caantajiaqueri, yamajitaqueneri aparo jocajenerinemeca oshequini imentaquitsite caravaetatsica 10,000 tarentopae.<sup>f</sup>

<sup>25</sup>Cotanquitsiquea iriatimpa teequea inchoocateji taampaquea irivegaratanta-jemparica, irootaquetari icantacaantanta-carica majirontatsica irojocantajiquerijitsipatacaantsitempariquea imanquigare aisa irijanijiate, maasanopae yashintague-caca, iraantajajemparoqua imentaquipae cameetsanijite irivegaratimentajerijijite.

<sup>26</sup>Cotanquitsiquea iriatimpa igueroventsitanacari, icanqueriquea: ‘Pimpintsatacoga-joitenashiatsi, poguijacouempatajate oncoramanitapojajegueti novegaratajempi-roquea maasano imentaqui nojocajempi-meca.’ <sup>27</sup>Iriraquea majirontatsica ipintsata-cotanacariquea icanqueriquea: ‘Iroosaca-nica aritaquequea ococa, aatoquea pivegaratajanatsi.’ Yoguiapaukitajari.

<sup>28</sup>Cotanquitsiquea yoanajigueti itonquivo-jajariquea igonoro aacovecarica, icaravetaca 100 tenario<sup>9</sup> irojocajenerimeca. Yaitsitanacariquea icatiquitsitari itsanoqui, icanqueriquea: ‘iPivegaratenashinete paacovequenaca’ <sup>29</sup>Iriatimpa igueroventsi-vetanacari icanqueri: ‘Pimpintatsacogajoi-tenashiatsi, oncoramanitapojagueti novegaratajempitarite.’ <sup>30</sup>Cotanquitsiquea iriatimpa teequea imprintsatacotempariji, manaquea yaacaanqueriquea isantanatacota-cacaantsitari inchoocaguiteni arejevaetapo-jempsa irivegaratajeri yaacovecarica.

<sup>31</sup>Ariuea yamenajiaqueriquea igonorojia, ishimampojancajanaca yoayoaitanaque icamantajiaquitiri majrontatsica.

<sup>32</sup>Iquemitsitaquea icajemacaantsitari aacovecarica icanqueriquea: ‘Isaashimpi. Naatimpa manaquea nopeacotajimpiro maasanopae pojocauenameca, irooriji picantanaquena: Pimpintatsacogajitenashiatsi. <sup>33</sup>Arimequeate pinquempetaca-quemparimequea aacovequempica aviatimpa, pimpintatsacojiaquemparime-queate iriatimpa, pinquempetaquename naatimpa noplantsatacotimpigueti.’

<sup>34</sup>Icatsimatsitanacaquea icantacaantaqueri irantsipetacaiaquempari arejevaepo-jempsa irivegaratajeriquea maasanopae yaacovecarica.”

<sup>35</sup>Iteroncanaquerogueti Jesoshi itsavetanquerogueti icanque:

—Ariqueate inquejetacajiaquempiquea Aapani inquitequitica aatogueti pipintsataco-jigariquea pigonorojia pimpeacomajaque-mparogueti querocagueti icojiaquempini.

**Icanque Jesoshi aatoja quericaca ovashiantirotsi imanquigare**  
(Mr. 10.1-12; Irc. 16.18)

**19** <sup>1</sup>Iroompaquea iteroncanajiro-gueti Jesoshi itsavetantaquer-

gueti, isotoantanacaro Garirea, yoanaquequea Joreaqui intatiqueroqui Jororanequi. <sup>2</sup>Yoguijaguijaitanaqueriquea oshequini caquintejia. Ontaniquiquea yogueshitajiriquea maasano ashinoncajajatsica.

<sup>3</sup>Ariuea iconoagarantajiacapariseoja choocajatsica oraniqui icoraquecoraqueipojiquea icoacojiapo-jiri iramenajiaqueri querocaca incanqueni iriatimpa, icantajiapo-queri:

—¿Cameetsavaequempa irovashiantajero shirampari imanquigare onchooca-quegueti taaca opajita teeca irinintama-jateroji?

<sup>4</sup>Iriatimpa icanqueriquea:

—¿Arimpate teequea pampatsajavanteroji itioncacojiquerogueti paesatoniqui ocanque iroaqueragueti ipeacaacarigueti Aapani Irioshi caquinte ipeacaitsitari-quea shirampari aisa manquigarentsi?

<sup>5</sup>Iroompaquea icanquequea: ‘Irootaque-quea imaica shirampari intsinampirejanaqueriqueate iriri aisa iriniro, quisho iroamajataquero imanquigare, apatsino-roquea incantanajempa. Ariuea

iroaqueragueti tequeratagueti irimanquigatemparojo, mavite icarajavetaca, ariuea imanquigacarogueti ariqueate icojianaca tee irimavitetajem-paji, quempetanajaqueate apatsinoroni-ka icantaja.’ <sup>6</sup>Irootaquequea noncantantajiaquempica iriraquea shirampari manquigataquemparoneca manquigarentsi aatoquea yovashiantiroquea, teetarite irimavitetajeji, quempeca apatirotiquea icantaja, yamenaqueriquea Aapani Irioshi imanquigacarogueti teetarite oncameetsateji irovashianta-queroquea, incoquempanija irimanqui-gamajataquemparoqua.

**g 18.28** Iriraquea *tenario* irio imentaquitsite Iromaquitica. Iramiterigueti itsipa apajencaro savincagueriteri irivegarataqueri aparo tenario.

<sup>7</sup>Iriatimpajia icantajiaqueri:  
—Iroosacanica, ¿queroquea ococaniqueate icanquegueti Moishishini arigueti irovashiantanajero shirampari imanquigare, irojoquitenemparojate paperi otioncacagueti yovashianquero,<sup>h</sup> ariquea intigararanquitsitemparo oanaje?

<sup>8</sup>Icanque Jesoshi:  
—Iriraquea Moishishini manatarite yamenajiaquempiquea piquishoshirentanaque jero iquejetacaantajiaquempirocaquea imaica itioncajiaquempiroquea. Cotanquitsiquea iroqueragueti ipeacacarigueti Aapani Irioshi caquinte, teequea inquempeteroji imaica.  
<sup>9</sup>Noncanquempiquea naatimpa, aparogueti oaquempi pimanquigare aatoquea povashiantirotsijate. Povashiantanaquerogueti iroompaquea pimanquigatajempagueti otsipa manquigarentsi, manaquea picovaeguisheca.

<sup>10</sup>Iriraquea itsatacaanejia icanqueriquea:

—Iroosacanica omanavaetacaquea oshequi amanquigatemparogueti manquigarentsi. Aatosacanica amanquigatarotsi.

<sup>11</sup>Iriraquea Jesoshi icanqueriquea:  
—Teatarite iragavejajigueji maasanojia inquemisanteroji nocantajiaquempiquea, imaicaquea iriguentequea quemisantajiaqueroneca yagavejacaajiaqueca Aapani Irioshi. <sup>12</sup>Choocajitarite iconoagarantajiac ateequea iragavejajigueji irijanintajiguempaji, ari icoca ivoaquegueti. Aisa chooca itsipa iroguenti ipeacajicari eonoco<sup>i</sup> aatoniji irijaninta. Aisa choocaquea itsipapae iroguenti itampishitashijiaqueroquea

ipeaca majinari cameetsanjite irisaviventamajajiaqueronijite irashipae Majirontamajatatsica Inquiequitica. Quericaca agavejanquitsineca intsama-jaqueroquea nocantajiaquempica imaica iintsijate intsaterojate.

### Jesoshi yamanacoventajiaqueriquea chaajanquirija

(Mr. 10.13-16; Irc. 18.15-17)

<sup>13</sup>Iroompaquea icoraquecoraqueita- quequea itsipapae yamajiapojiniriquea Jesoshi chaajanquiripae impamijiava- queriniji iramanacoventajiaqueriquea. Iriraquea itsatacaanejia yamenajia- querigueti yamajiapojirigueti icantomajavaqueriquea.

<sup>14</sup>Icantsitariquea Jesoshi:

—Ariotaquetsija incoraquetetate chaajanquirijia naatimpaqui, aatoquea pojocaaavaca, ishineventajiacaritarite Inquiequitica irimajirontacotaquempari quenquejaijatsica quempecarica iriatimpajia.<sup>j</sup>

<sup>15</sup>Iroompaquea ipamijiaqueriquea yamanacoventajiaqueri. Ariquea iriatimpa yoanaque.

### Ajaarantavaetatsica

(Mr. 10.17-31; Irc. 18.18-30)

<sup>16</sup>Oraquea yoanaquegueti Jesoshi icoraquetashipojiriquea aparo caquinte, icantapojaqueri:

—Tsatacantantatsica [cameetsari], ¿queroquea noncoquempani cameetsanjite noncoguitempaninijite nonchoocaguiteni? ¿Taa opajita cameetsatanquitsineca nompeacaguempaca?

<sup>17</sup>Icanqueri Jesoshi:

**h 19.7** Oratica paperi icanquero quimajarer *certificado de divorcio* (irooca aisa *carta de divorcio*). Iroguenti paperi itioncajiquerogueti quejecaroca: “Imaicaquea novashiantajiro nomanquigavetacaca, aato nomanquigatajaro.” (Pamenero Os. 2.2 aisa Ireo. 24.1-4.)  
**i 19.12** Eonoco irio isoitsorejitajiqueca iguemaqui. **j 19.14** Irirajia chaajanquitansquitsineca tee iraventacojiguempaji, mana ishineventajiacarri Jesoshi, iquemisantajiaqueri. Ari anquempejiaquempaquea aatimpa.

—¿Queroquea oocani picantantaque-naca ‘cameetsari’? Aparotari ichoocati cameetsatatsica. Cotanquitsiquea pininqueguetiquea poanaque ichoocati-gueti Aapani Irioshi pincoguitempa-niji pinchoocaguiteni, pinetsanamajateroja maasanopae itioncacotanaqueca Moishishini coramanitica.

<sup>18</sup>Icanque iriatimpa:

—¿Querocate?

Icanque Jesoshi:

—Irootaquea cantanquitsica: ‘Aatoja pimetojanti, aatoja poashitiro manquigarentsi, aatoja paitsitanti, aatoja pitsojeventantatsi.’<sup>19</sup>Pinquenquejacameetsatacoque-rija piri aisa piniro, aisa pimpintssataquem-parija pigonoro pinquejetacaajempa pipintsatagueti aviatimpa.’

<sup>20</sup>Icantsitari iriatimpa:

—Arimajaca noquempetacaquea imaica nonetsanamajaqueroquea maasano. ¿Imaicaquea choocampate otsipa nonetsanateca?

<sup>21</sup>Icanqueriquea Jesoshi:

—Pininqueguetii pinetsanamajaquero-quea inintaguetica Aapani Irioshi, poanaquequea pojocantaguetanaquero pashintaguecaca paantaquemparo quea imentaquipae pojocajiaqueneri coguite-jacolianquitsica, pinquejetaquero queuти onchoocataje oganejencaro shineta-cjaempineca ontaniqui inquitequi. Ariquea pincoraquetajeja poguijatan-aquena.

<sup>22</sup>Iquemitsitaquea icanquerica ishimampojancavaetanaca, ariqueate yoanaji, iriguentitari ajaarantavaeta-tsica.

<sup>23</sup>Iroompaquea ipitsocashitariquea Jesoshi itsatacaaneja icanqueriquea:

—Iroomajaca noncantajiaquempica, omanapitsamajataquempari ajaaranta-vaaetatsica inquijanaque imajirontagueti Inquitequitica. <sup>24</sup>Noncantsijajempi aisa. ¿Arimpate iragavejaque cameyo inquija-

naquequea itepoquiqui quisaatonquiri irisotoanaqueriquea antaqueronta? Aatotarite yagavejitsi. Iriompaqueate ajaarantavaetatsica caaviji anaqueromo manapitsataquempari inquijanaque imajirontagueti Aapani Irioshi.

<sup>25</sup>Iquemitsijigari itsatacaaneja arimpapeate yamenamenaitanaque intati, icantajigui:

—Iroosacanica, ¿quericampate agavejanquitsineca iraavajempa?

<sup>26</sup>Yamenajianaqueriquea Jesoshi, icanqueriquea:

—Iriraquea caquinte teequea iragave-jeroji, cotanquitsiquea Aapani Irioshi yagavejaquero maasanopae.

<sup>27</sup>Icantsitanaca Peerero:

—Nomajirote, naatimpajia novashian-tajianaqueriquea maasanopae nashintavecaca, noguijaguijaitanaquempi. Imaicaquea ¿taaca irojocajiaquenaca Aapani Irioshi?

<sup>28</sup>Icantajiguiri Jesoshi:

—Iroomajaca noncantajiaquempica, oraquea iriaqueratacaajitajerogueti maasanopae, irira Irijanite Caquinte irisavicapojero imajirontamento oganejencatatsica irimajirontamajapo-jempa. Aviatimpajia guijaguijaitanaque-naca imaica pintsipajianaquenaquea pisavisaviquiero quea majirontamenton-tsipaequi oncarataque 12. Iroompapea pincantajiaque querocaca incocitaque-rini ichoviquijianaqueca irijanijiate Ishiraeri, icarajiaque iriatimpajia aisa 12. <sup>29</sup>Aisa iriraquea maasano ovashian-tajianaqueroca itsovironaquitepae, irioca iriguentijeguitepae, itsijoitepae, iriniro, iriri, irijanijiate, irooca iniganquitejire, iroguijaguijaitanaquenai-niji, irojocajiqueneriquea otsipa caavijica anaqueroneca yashintavecaca oshequijamajatanaquequea; taaca opajita yovashiantanaqueca apatiroca irojocajitajeneriquea otsipapae 100.

Aisa incoguitepaniquea inchoocaguienti.<sup>30</sup> Icaramirincavaequequea yamenajivetacaca imaica yanaantavaeque, cotanquitsiquea oncoramanitapojaqueguedi aatoquea yanaantajitsi. Aisa icaramirincavaeque teeca iranaanteji imaica, oncoramanitapojaqueguedi iranaantavaetanaque.

**Jesoshi iquempetacaacari ashintatsica iniganquitejire**

**20** <sup>1</sup>“Imaica nontsavetacotaquerouqua quero icotani Inquitequitica imajirontaguei, iroguenti nonquempeta-  
caaquemparo ashintatsica iniganquitejire. Iriatimpa iroguenti yoguinquea pitsecati-  
rajaguedi iraaquieriquea shiacojiasica  
irishiacjiaqueneri irovaitsoquimashite.  
<sup>2</sup> Ariquea yamenajapijiriquea icantajigui: ‘Poapoitanaquequea pishiacojiaquitenar-  
jate ovaitsoqui, iroompaquea inquijanage-  
gueti catsirincaiteri novegarajiaquempi-  
quea aparo tenario.’ Iriatimpa icanque-  
quea cameetsavaequequea. Jero itigaranc-  
cijaqueriquea iroaroaitanaque irovaitso-  
quimashitequi. <sup>3</sup>Iroompa ijenoquivapoji-  
gueti catsirincaiteri icoraquetajiquea  
yojocantajiguetirogueti taaca opajitapae  
irajaatequea itsipajia shiacotanquitsineca.  
Yamenajapijiri itsipajia, savisaviataque-  
quea intati, teequea irantajigueji. <sup>4</sup>Icantajigui:  
‘Poapoitanaquequea aviatimpajia  
aisa, pishiacojiaquiteja noniganquitej-  
requi, novegarajiaquempiquea cameetsa.’  
Ariquea yoayoaitanaquequea. <sup>5</sup>Iroompa-  
quea itampaticatanaquegueti catsirincaiteri  
yoitsitanajaquea aisa iramenaguetaquite-  
queate itsipajia shiacotanquitsineca.  
Ariquea iquempetacaajaroquea ijaguiteta-  
najiguedi, yaitajata itsipajia. <sup>6</sup>Iroompaquea  
iroshipojiguedi inquijanaje catsirincaiteri,  
yoitsitanajaquea aisa yamenajapijiriquea  
itsipajia, teequea irantajigueji, icantajigui:  
‘¿Queroquea ococani pisavisaviitashica-  
quea intati, teequea pantajigueji?’

<sup>7</sup>Icantajigui: ‘Tee inchoocatenica  
shiacotacaajiguenaneca.’ Iriatimpaquea  
icantajigui: ‘Iroosacanica poapoitana-  
quequea aviatimpajia pishiacojiaquequea  
noniganquitejirequi.’

<sup>8</sup>“Iroompaquea itsaparoncaguitetanaque-  
gueti icanneriquea shiacotacaajiquerica:  
‘Imaica pincajemajiguerija shiacojianquitsica  
pivegarajiaqueriquea pintsitacajiaqueri,  
pimparajianaquempari impoipoitanquitsica  
parejetacaapanajantempari iriquetica  
coraquecoraqueitanquitsica.’ <sup>9</sup>Iroompaquea  
icoraquecoraqueipoji coraquejianquitsica  
iroshipojiguedi inquijanaje catsirincaiteri.  
Iquejetavacaajiacmaasano ivergarajiaqueri-  
gueti, yojocajiaqueneri aparo tenario.

<sup>10</sup>Iroompaquea icoraquecoraqueipojiquea  
iriquetica shiacomajatanquitsica, iriatimpa-  
jia yamenajiguiriquea ijiquejiranaacaajiaqueri-  
ri ivergarajiaqueri. Cotanquitsiquea  
manaquea iquejetacaajiacari ivergarajiaqueri-  
gueti, yojocajiaqueneri aparo tenario.

<sup>11</sup>Irooqua yamenajiaqueriguedi teequea  
iranaacaajigueriji ivergarajajigueriji,  
ariegate icohipcoitanaca icantimanajiana-  
queri ashincaroca iniganquitejire. <sup>12</sup>Icantajigui:  
‘Irirajia impoipoitanquitsica capichajani-  
quiquea ishiacotaque, cotanquitsiquea  
pivegarajiaqueri quempeca pivegarajiaque-  
nagueti naatimpajia atsipejianquitsica  
noshiacoguitini catsirincaiteriqui narejevaeca  
imaica.’ <sup>13</sup>Cotanquitsiquea irira ashincaroca  
icanqueri aparo shiacotanquitsica:

‘Nogonoro, teequea namatavijempiji.  
¿Arimpate teequea pincanteji cameetsa-  
vaeque incajaranqui nocanquempiguedi  
novegarataquempi aparo tenario?’ <sup>14</sup>Poanaje-  
quea paanajeri yojocauquempica. Naroguenti-  
quea cantaquerica ivergarajiqueriquea  
impoipoivetanquitsica ishiacoquegueti  
iquempetacaajiaquempiriquea aviatimpajia  
ivergarajitaquempiguedi. <sup>15</sup>Naroguentitari  
ashincari nomentaquisite. ¿Arimpa aato  
nagaveji nojoquinirtsiquerica  
noninqueca? ¿Aricaja picatsimatacotsitaque-

naro pamenaquegueti iriguenti nocavinta-saque itsipa?"

<sup>16</sup>"Irootaquetarite noncantantajiaquem-pica imaica choocajia iramenajivequem-paca imaica yanaavaequequea, cotanqui-tsiquea oncoramanitapoajegueti aatoquea yanaantajajitsi. Iriraquea teeca iranaanta-jigueji imaica, irioquea anaamajatantan-quitsineca oncoramanitapoajegueti."

**Jesoshi icamantajajiri aisa irimetojaque**  
(*Mr. 10.32-34; Irc. 18.31-34*)

<sup>17</sup>Iroompaquea yoanaquequea Jesoshi Jerosarequi itoncotoncoitanaque, icajemitsitari iriatimpapuqitsineca 12, icantajiguiri:

<sup>18</sup>—Imaicaquea atoncotoncoitanaque oahoaitanaque Jerosarequi. Ontaniquiquea ontaniqui arejerejeipojaquempagueti manaquea iraacaantajiqueru irira Irijanite Caquinte, irajaitanaqueru ichoocajiaquegueti saserorotejia anaantajianquitsica aisa tsatacaantajiguiroca itioncacotanaqueca Moishishimi. Iriatimpajia incanquequea: 'Tintsishiasi irimetojajiterim.' <sup>19</sup>Ariquea irajaitanaqueriquea ichoocajiguigueti teeca irijorijoigueji cameetsanjite irantanagushe-vaequerinijite, aisa impasapasajiaqueri agompiapuquempari, ariquea irompajacojiaqueri coroshiqui, cotanquitsiquea aapojajem-pagueti 3 savincaguiteri impochatanaje.

**Onintavecaca iriniro Santiago aisa  
Joanca**  
(*Mr. 10.35-45*)

<sup>20</sup>Iroompaquea ocoraquepojiquea imanquigare Severeo otsipatsipaitapoja-

cari irijanijiate, oguerovempojacariquea Jesoshi oncamanqueriniji oninqueca.

<sup>21</sup>Icanqueroquea:

—¿Taa opaji pininque?

Iroatimpapuquea:

—Aapojajempagueti pimpeaqueempa-gueti Imajirojiate maasano, noninque poguisavisaviitaquenari irirajia irijani irisenampijajiaquempi, aparo savican-quitsinequea pitincamijempequiqui, iriraquea itsipa irisavicaque pishinam-pijempequiqui.<sup>k</sup>

<sup>22</sup>Cotanquitsiquea Jesoshi icanque:

—Teequea pintajigueroji ocatica pinintavecaca. ¿Arimpate pagavejajia-quequea aviatimpajia pimiraquero nomiraqueca naatimpapuquea?

Iriatimpajia icantajiguiru:

—Jeejeguitatsi nagavejaquempi.

<sup>23</sup>Icantajiguiru Jesoshi:

—Pitampaticamajataquero pimiraquero-quea nomiraquempaca naatimpapuquea, cotanquitsiquea teequea naatimpapuquea cantanquitsineca quericaca senampijajia-quequea savicanquitsineca notincamijempe-quiqui aisa noshinampijempequiqui. Iriguentiquea cantanquitsi Aapani Irioshi paesatoniqui iroqueragueti.

<sup>24</sup>Ariquea iquemajiaquegueti itsipajia 10 itsatacaanejia itijerequijianaqueri Santiago aisa Joanca. <sup>25</sup>Cotanquitsiquea Jesoshi icajemajiaqueriquea icanqueriquea:

—Pitsajiguiritarite iriraquea ipejajiaqueca imajirojiate teeca irijorijoigueji manaquea yatsanavaecari igonorojia, ariquea iquempe-jiaca iramajirorejia yomperaperaicari irashijia. <sup>26</sup>Cotanquitsiquea aviatimpajia

**k** <sup>20.21</sup> Irira savcatsica itincamijempequiqui majirontatsica yanaajiaqueri itsipajia, iquejemajirovecari majirontatsica, aisa iquejetaca savcatsica ishinampijempequiqui, quejemajirovecari. <sup>1</sup> **20.22** Ocaticaquea icanqueca Jesoshi manaquea iquejetacaacaro irantsipequempagueti, oquejetaca incanquegueti: "¿Arimpate pagavejajiaquequea aviatimpajia pantsipevaelquempaquea pinquempejiaquenaquea naatimpapuquea?" **m** <sup>20.23</sup> Iquempetacaacaro Jesoshi, quejetacaquea incanquegueti: "Pitampaticamajataquero pantsipevaelquempaquea pinquempejiaquenaquea naatimpapuquea?"

aatoquea piquejejiga. Ariguenti quericaca nintanquitsine iranaantimojiaquempi, impeitsitempaja amijiaquempineca.  
<sup>27</sup>Quericaca nintanquitsine irijivatante, impeitsitempaja iromperare maasano.  
<sup>28</sup>Quempeca Irijanite Caquinte teequea irooqua incoraquetashiteji iramijitavaqueri, iroguenti icoraquetashitaque incavintsajantapoje, aisa irimetojaventsitempariquea maasanojia, onquejevequempaquea irivegaraventajajeneri irisotoimentajianajeniji santanatacojiavetanquitsica.

**Jesoshi ipityaquirejajiriquea mavite shamoncajari**

(Mr. 10.46-52; Irc. 18.35-43)

<sup>29</sup>Ariquea Jesoshi itsipatanacariequa itsatacaanejia iquenaquenaipoji Jérícoqui iroaraoitanaque Jerosarequi, itirorencaventajianacari caquinteja.  
<sup>30</sup>Arikea oraniqui isavicajiaquequea mavite shamoncajari ocaravoquitapojigueti quenavoquivrontsi. Irooqua iquemacojiavaquerigueti Jesoshi coraquetapoji icajemitsijianacaquea icanqueri:

—iNomajirote, Ichoviquitanaqueca Taavini, pimpintsatacetenashiatsi!

<sup>31</sup>Irira choocajianquitsica icantomajajiaqueriquea icantsijiavetari irisancticotanaquenijite, cotanquitsiquea iriatimpajia arimpate icajemamajatsijianaca:

—iNomajirote, Ichoviquitanaqueca Taavini, pimpintsatacetenashiatsi!

<sup>32</sup>Icatiapojaquea Jesoshi icajemajiaqueri icanqueri:

—¿Taaquea pinintajiaque?

<sup>33</sup>Iriatimpajia icantajiguiri:

—Nomajirote, nonintajiaque nompi-tyaquirejajianaje.

<sup>34</sup>Ipintsatacojيانacariequa Jesoshi ipamijiaqueriquea iroquiaqui. Arikea

icojianaja inejajianaji, yoguijaguijaitanaqueri.

**Yarejetapojacaroquea Jesoshi Jerosarequi**  
 (Mr. 11.1-11; Irc. 19.28-40; Jn. 12.12-19)

**21** <sup>1</sup>Iroompaquea iroshipojiguetu irarejerejeipojemparo Jerosare, yarejerejeipojajaroquea Vetepaje Orivotsempiqui. Iroompaquea iriraquea Jesoshi itigarancajiaqueriquea mavite itsatacaane icantajiavaqueriquea:

<sup>2</sup>—Poanaquequea ontaniqui quempeji guinentinintsiqui, pamenajiapojeroquea oraniqui aparo aashino shiticacoca itsipatacaantajicaro irijanigantirenajeniqui. Pishiticarejacojiaqueri pamajiaquenari. <sup>3</sup>Choocagueti cantaquempi- neca, aviatimpajia pincantajigue: ‘Iriguenti coacotacari Amajirote, taampinatari iroguipiajajempiri.’

<sup>4</sup>Arikea oquejetantacaca imaina onetsanatanaquempaniji icanqueca tsavetantatsica coramani itioncacaajiquerigueti, icanque:

<sup>5</sup>“Pincantajiguerija guinentijiaitsica Shionequi:”

‘Pamenajigueja, coraquetapoji Pimajirote aviatimpapui, iriatimpapui iriguenti caavijica imativi camajataca, manaquea iquenantapojacari aashino, irijanigantirenajeniqui aashino, irijanite quijaviriniquitsatsica ajaararontsi.’”

<sup>6</sup>Iroompaquea yoayoaitanaquequea itsatacaanejia inetsanatsitaroquea icanquerica Jesoshi. <sup>7</sup>Yaajianaqueroquea aashino aisa irijanigantirenajeniqui, ipashicamiti- tsajiaquereneri iitsaarepaequi, isaviquitsitanacariequa Jesoshi. <sup>8</sup>Yoayoaitanaquequea icaramirincavaetanaque caquinteja, iconoagarantajiaci imaroncaashijiavaqueri iitsaare quenavoquivrontsiqui, itsipapae-

**n 21.5 Shione** iroguenti Jerosare.

quea aavashijiavanquitsica ovashi imaroncaavoquitashijiavaqueriquea Jesoshi. <sup>o</sup> Iriraquea iriquetica oahoaitanan quitsica aisa irirajia guijaguijaitaquerica icajemajianaque, icanque:

—iCaaviji yoganejencamajataca irira Ichoviquitanaqueca majirontatsica Taavini!

—iIntshishati irishineventajquempari iriratica coraquetapojatsica itigarancaqueca Majirontamajatatsica!

—iCaaviji yoganejencamajataca Aapani Irioshi choocatatsica jenoqui!

<sup>10</sup> Ariquea iquijanaquegueti Jerosarequi, ishiamirincajiapojaca choocajian quitsica. Iconoagarantajiaca icoacojia-pojiri itsipajiacaca icanqueriquea:

—¿Taa ipajita iricatica?

<sup>11</sup> Iriatimpajia icanquequea:

—Iriguenti Jesoshi tsavetantatsica quenapojatsica Nasarequi Garireaqui.

**Jesoshi yoguivvorocajiaqueri  
jocantantajiacaroca tetempo**

(Mr. 11.15-19; Irc. 19.45-48; Jn. 2.13-22)

<sup>12</sup> Ariquea Jesoshi iquijanaque onigan-quirequi oticaacoroqui tetempo itsaroventantajitarica Aapani Irioshi yamenajiapojojiri jocantantagueteririca viratsipae aisa vegaratantajiguirica. Yoguivvorocajiaopojaqueriquea maasanojia, aisa yapitaquiaguequero-quea ishitaponcaropae yojoquijitancarica imentaquitsite guipiantajiguirica imentaquipae.<sup>p</sup> Iquejetsiguetaroquea aisa isavisaviitantacaca jocantajiguirica emorenipae. <sup>13</sup> Icantajiguiri:

**o 21.8** Imaroncaashijiavaquerigueti iitsaare quenavoquirontsiqui aisa imaroncaavoquitashijiavaquerigueti ovashi, manaquea iquejetacaavacari majirontatsica ishineventajigariqueti.

**p 21.12** *guipiantajiguirica imentaquipae.* Incoraquequegueti joriojia quenajiaopojsatsica otsipapaequi guinteninintsipaequi iramajiaquegueti cantashitatiaguetanquitsica imentaquipae, irojocajiaopoqueneri guipiantajirica imentaquipae irojocajavajeneriniji itsipapae cameetsaniji irojocagarantajajeneriniji Aapani Irioshi tetempoqui, irioca irivegarajiaque viratsi irojocajiaquenerica. **q 21.13** Is. 56.7. **r 21.13** Jer. 7.11. **s 21.16** Irootaquequea itioncaneni Taavini yamashaiventaquegueti Aapani Irioshi. Sar. 8.2.

—¿Arimpate tee ontionquempaj: ‘Oratica notsovironaque incantacojitero iroguenti ashi incoraquetantapinjjitempaca iramanajiaquenaniji’?<sup>q</sup> Cotanquitsiquea aviatimpajia manaquea pipeacajaiacaro imoro itsititantaca aitsitantajatisca.<sup>r</sup>

<sup>14</sup> Iroompaquea ocaniqui oniganqui-requi oticaacoroqui tetempo icoraque-tashijiapojojiri shamponcajaricia aisa teeca iranijimajateji. Iriatimpia ipityaquirejaguetajiri teeca iramenajia-vetempaji, aisa yanijitacaamajatajiri teeca iranijimajajiavetempaji.

<sup>15</sup> Iriraquea saseroroteja anaantajianqui-sica aisa tsatacaantajiguiroca itioncacotanaqueca Moishishimi icatsimamajajia-naque yamenajiavaquerigueti yonigaantaguereroquea oacaantantatsica intati, aisa iquemajiaquerigueti chaajaniqui-ripae icajemitsijianaca oniganquirequi tetempo, icantajiaque:

—iCaaviji yoganejencamajataca irira Ichoviquitanaqueca majirontatsica Taavini!

<sup>16</sup> Ariquea iriatimpajia icantajiguiri:

—¿Arimpate teequea pinquemajigue-riji irirajia chaajanquiripae icajemajia-quegueti?

Iriraquea Jesoshi icantajiguiri:

—Jeejeguitatsi, noquemaque, cotanquitsiquea ¿arimpate teequea pampatsajavantacojigueroji ocanquegueti: ‘Pinintacajiaqueri chaajaniqui-ripae aisa igantagatirajaca yatsoti itsaroventajiaquempi’?<sup>s</sup>

<sup>17</sup> Ariquea yojocajianajiri isotosotoitanajiro Jerosare, yoayoaitanaque

Vetaniaqui, ariquea imaapojaji  
oraniqui.

**Jesoshi icanqueroquea iguera aatonijite  
ochoocatimatajitsi osovena**  
(Mr. 11.12-14, 20-26)

<sup>18</sup>Iroompaquea osavincaguitetama-  
naquegueti icoraquecoraqueitaji  
Jerosarequi. Iriraquea Jesoshi  
arikea itaseapoji. <sup>19</sup>Arikea  
yamenacovetapojacaro iguera  
ocaravoquitapojigueti quenavoqui-  
rontsi, arikea yoapanajanti  
iramenamajapanajanteroqua  
choocaca osovena, cotanquitsiquea  
yarejevepojacaroquea quempeji tee  
onchoocateji, iroguentini ovana.  
Icantsitaroqua:

—Imaicaquea imaica aatotarite  
ochoocatimataji pisovenia.

Arikea octanaca osampirocana-  
quequea ometojanaque. <sup>20</sup>Irooqua  
yamenajiavaquerogueti itsatacaanejia  
yamenamenaitanaquequea intati,  
icanqueriquea:

—¿Queroquea ococani picanquiti-  
giro ometojanaque?

<sup>21</sup>Iriraquea Jesoshi icanqueriquea:  
—Iroomajaca noncanquempica,  
arigueti paventamajataquemparigueti  
Aapani Irioshi pintsamajajiaquegueti  
arimajaca yagavejamajati, aatogueti  
pinquenquejimatirotsijate: ‘Aatoca  
yagaveji Aapani Irioshi’, arikea  
pagavejajiaquequea pinquempejia-  
quena naatimpa nosampirocaquero-  
gueti iguera. Cotanquitsiquea teequea  
aparoquea ocatica. Aisa pagavejaji-  
aque pincantajiguero ocatica otsempi:  
‘Poanaquetsija pojocajatempa iniroja-  
niqui quentijani’, oapanajantequea  
ojocajapojempa. <sup>22</sup>Maasano taaca  
opajita pamanajiaquerica Aapani  
Irioshi, arigueti paventamajajiaquem-  
pari, onetsanaquempaquea.

**Icoacojitaqueriquea Jesoshi taaquea  
tigarancaqueri**

(Mr. 11.27-33; Irc. 20.1-8)

<sup>23</sup>Iroompaquea yarejetapojaca Jesoshi  
teemporoqui iquijapojaquero omiganqui-  
requi oticaacoroqui itsatacantapoaque. Inca-  
jaranquiguitetanaquegueti icoraque-  
coraqueitashipojaqueriquea saserorote-  
jia anaantajianquitsica aisa jivajigu-  
rica joriojia, icanqueriquea:

—¿Taaquea cantaquempi piquempe-  
tancaroca imaica poguivorocantajiacar-  
rica jocantantajaiatsica? ¿Taampate  
tigarancaquempiquea?

<sup>24</sup>Iriraquea Jesoshi icanqueri:

—Intsija naatimpa noncoacotempi.  
Poguisotoaquenarogueti, arikea  
nonquempetsitempa naatimpa  
noncamanquempiquea queri tigaranca-  
quenaca. <sup>25</sup>Iviñacajatantigueti Joancani,  
¿queroquea oquenapojini? ¿Irooca  
oquenantapojaca inquite? ¿Irioca  
oquenantapojaca caquintejia?

Irooqua iquemajiavaquerigueu  
iokenquetsatavacaajianaca  
icantajigui:

—¿Querocate ancoterini? Ancantsive-  
temparigueti oquenantapojaca inquite,  
iriatimpa incantanaque: ‘Iroosacanica  
¿queroquea ococani teeca pinquemisan-  
tantajiguempariji?’ <sup>26</sup>Cotanquitsiquea  
ariguettija ancantsivetempari oquenanta-  
pojaca caquintejia, atsaroacaajiacari-  
quea caquintejia, maasanopaetari  
icanque irira Joancani iriguenti  
tsavetantatsica itigarancaquea Aapani  
Irioshi.

<sup>27</sup>Jero icantantajiacarica:

—Teetari nontsajiguenica.

Arikea iriatimpa icanqueriquea:

—Iroosacanica, arikea nonquejeta-  
quempaquea naatimpa, aatoquea  
nocamantimpitsi quericaca tigaranca-  
quenaca naatimpa.

**Jesoshi iquejetacaacari mavite irijanite caquinte**

<sup>28</sup>Iroompaquea Jesoshi icanqueriquea: —¿Queroquea pincanqueni pinquenquejerogueti noncantajiaquempica imaica? Ichoocati caquinte choocatasica mavite irijanite. Iroompaquea icanqueri parianquitsica: ‘Irjani, poanaque pishiacocoquiteta ovaitsoquimashiqui.’ <sup>29</sup>Iriatimpa icanque: ‘Aatoquea noguitsi’, cotanquitsiquea iroompaquea iquenquejanaquero yoanaque ishiacoquiti. <sup>30</sup>Iroompaquea yoashitanaqueri itsipa irijanite, ariquea iquejetacaacari iriatimpa, itigarancavetacari irishiacote. Iriatimpa manaquea icantaveca: ‘Intsija nonquejetaquempa’, cotanquitsiquea teequea irogueji. <sup>31</sup>Imaicaquea pincantajiguena, ¿querica quemisanta-vaquerica iriri?

Iriatimpajia icanquequea:

—Iriguenti parianquitsica.

Arikea Jesoshi icantajiguiri:

—Iroomajaca noncanquempica, iriraquea capiocajiguinirica majiron-tatsica imentaquitsite aisa manquigarentsijia cantatsatantaguetatsica yanaajiaquempiquea iquemisantajiaque, iriquetiquea quijaquijaitanansquitsine imajirontagueti Aapani Irioshi. <sup>32</sup>Pinquenquejeja, icoraqueta-shijiavequempiquea Joancani Viñacajatantatsica itsatacaaajiaveta-quempiquea queroquea pincojiaquempani pincocomajajiaquempagueti, cotanquitsiquea aviatimpajia teequea pinquemisantajiguériji. Iriraquea capiocapinijiguinirica majiron-tatsica imentaquipae, iriguentiquea quemisantajiaquerica. Arikea oquejetaca cantatsatantaguetatsica. Aviatimpajia pamenajiavecariea cotanquitsiquea teequea pinintajigueji pincantashitatijaianaquempa

povashiantajianaquero pigovaegui-shere pinquemisantajianaqueri.

**Jesoshi iquempetacaajiacariquea quempoguijaveraroa ovaitsoquimashi**  
(Mr. 12.1-12; Irc. 20.9-19)

<sup>33</sup>“Intsija pinquemisantajavaqueroja nonquejetacaajiaquemparogueti otsipa. Ichoocataque aparo caquinte yashinca iguepatsite. Arikea imiataqueroquea ovaitsoqui itantotacotaqueroquea. Aisa ipeacaashicaroquea yagaticantajitaroca ovaitsoqui osotoajatantanaquempaca ovaja, aisa ipeacaacaroquea irisavican-taquempaca jenoqui amenaqueroneca cameetsanjite iramanamajaqueronijite aatonijite yaajitirotsi. Iroompaquea icajemajiaqueri itsipapae irishiacojia-queneriquea. Oraquea onchoocatana-quegueti irojocagarantajiaqueneriquea iriatimpa. Iroompaquea yoavaetanaque-quea jmm osamani. <sup>34</sup>Ocoramanivaeta-pojiquea aapojajagueti osampatantana-jempaca ovaitsoqui itigarancajavecari irashijia iramanajajaterime irojocaga-rantajajenerime. <sup>35</sup>Cotanquitsiquea iriraquea shiacojiaqueroca manaquea icatsimajiaqueri aparo itavatavaavae-queri, iriraquea itsipa imetojajiaqueri. Iriraquea itsipatapojsatsica manaquea itsinatsinavaequeri mapiqui. <sup>36</sup>Iroompa-quea iriraquea ashincaroca ovaitsoquimashi itigarancajavecari itsipajia irashijia, yanaajiaqueriquea iriquetica itigarancajavecaca. Cotanquitsiquea iriraquea shiacojialsica arikea iquempetacaajavacari iriatimpajia.

<sup>37</sup>“Iroompaquea icanquequea: ‘Iriocajate nontigarancaquequea nirijanite, irioca intsaroacaajiava-quempa.’ Arikea itigarancuquitsitari.

<sup>38</sup>Cotanquitsiquea iriatimpajia yamenajiaqueriquea icoraquetapoa-jaquegueti, iquenquetsatavacaajiana-naca icanque: ‘Jeeri irintatica

ashinqueparoneca maasanopae irimetojanajegueti iriri. Jaamequetiroshias ametojajiaqueri cameetsanijite aatimpajia ashintamajatajemparonijite.<sup>39</sup> Iroompaquea yarejevepjaca yaitsijianacari yaajianaqueri acaquerroca otantotacotacaguetti ovaitsquimashi, imetojitsitari.

<sup>40</sup>“Oraquea incoraquetajegueti ashintamajataroca ovaitsquimashi, ¿querocaca incojiapojaquerini irirajia shiacojiatsica?”

<sup>41</sup>Iriatimpajia icanqueriquea:

—Irimetojajiaqueri interoncaciajiaqueri maasanojia, aatotarite ipintsatacogajiritsi. Iroompaquea incajemajiaquequea itsipajia quempogujajenerineca iniganquitejire. Arikea onchoocatana-jegueti ovaitsqui iriatimpajia irojocagarantajajeneri.

<sup>42</sup>Icanqueriquea Jesoshi:

—¿Arimpate teequea pampatsajavan-tacojigueroji Itioncacaantaqueca Aapani Irioshi coramani? Arikea ocanque:

‘Oraquea ogota mapi teeca irishine-ventajavetempaji peacaajiacaroca mapipanco,

opeanacaquea anaantamajatanqui-tsica quishotacaqueroca.

Iriraquea Aapani Irioshi ipeacajaa-roquea.

Amenajiaqueroquea aatimpajia oganejencani.’

<sup>43</sup>Irootaquequea nocantantajiaquem-pica aatotari piconoajajari Aapani Irioshi imajirontagueti, itsipapae caquinte incajemajiae quemisanta-majajiaquerineca, iriatimpajia iriguentiquea peajiaquenerica Imajirojiate. <sup>44</sup>Quericaca omposa-quemparoneca ocatica mapi incampo-

jemparo jarare jarare, cotanquitsi-quea quericaca otsinacaqueca opitsarepitsarejatanaqueri.<sup>t</sup>

<sup>45</sup>Irooquea iquemajiajaverigueti saserorotejia anaantajianquitsica aisa pariseojoia iquejetacaajiacanarica Jesoshi, itsajiaquequea iriguenti itsavetacojiaqueca. <sup>46</sup>Arikea icatsimajianaque intintajiajaveca iraacaantajiaqueri, cotanquitsiquea itsaroacaajiacari igonorojia. Iriatimpajia yamenajiaqueriquea Jesoshi iriguenti tsavetantatsica.

**Jesoshi iquempetacaacaro  
ishineventajitarogueti imanquigajitagueti**  
(Irc. 14.15-24)

**22** <sup>1</sup>Iroompaquea Jesoshi iquempe-tacaacaroquea imajirontagueti Aapani Irioshi, icanque:

<sup>2</sup>“Imaicaquea imaica nontsatacaa-ajia-quempiro quero icotani Inquitequitica imajirontagueti. Iroguenti iquempetaca-riquia majirontatsica itiacaantaquequea taaca opajitapae isheca icajemitsijigari igonorojia irishecatacaa-jaquempari irishineventajiaquempariquea irijanite irimanquigajauempagueti. <sup>3</sup>Iroompa-quea itigarancajiaqueriquea irashijia incantajiaquiteri coraquecoraqueitan-quitsineca, cotanquitsiquea iriatimpajia teequea irinintajigueji incoraquecora-queite. <sup>4</sup>Arikea itigaranquitsita-itsipapae icantajiajaveriquea: ‘Imaica pincantajiajaveri: “Icajemaquia-tempi inetsanamajajeroquea taaca opajitapae shecatsipae.” Nojitorejacaan-tajiaqueriquea nogAAPironcaarinitepae aisa irijanigantirenajaniquipae quejima-jatanquitsica, imaica netsanagueca maasanopae. Pincamanteri incoraqueco-

<sup>t</sup> **21.44** Oraquea *mapi* irioquea quejecaro Jesoshi. Oraquea otsinacaqueca opitsarepitsarejata-queca iriojia quempecaro caarica shineeventavacari Jesoshi. Ari inquempetacaajitaquempari incatsimamajitaqueri.

raqueique taampina irishecatacojiaqui-  
tena.<sup>5</sup> Cotanquitsiquea irirajia icajema-  
vecaca teequea inquemisantajavaque-  
riji, manaquea yoayoaitanaque queroca-  
gueti. Aparo oananquitsi iniganquiteji-  
requi, itsipa oananquitsica irolocanta-  
gueteroqua irajaararo.<sup>6</sup> Iroompaquea  
itsipapae yaajiavaqueri itigarancajia-  
queca majirontatsica itavatavaavaetava-  
queri imetojajavaqueri.<sup>7</sup> Arikea  
icatsimamajatanaque majirontatsica  
itigarancuitsijigariquea igoaretajate  
irimetojajiaquiteri metojantajatisca,  
intaitemparo itsovironaquitepae.<sup>8</sup>  
Iroompaquea icanqueriquea irashijia:  
'Jac netsanavetacaquea maasanopae  
cameetsanijite irimanquigaquempanijite  
irijani, cotanquitsiquea iriatimpajia  
nocajemajavetacaca teequea incamee-  
tsajigueji, manaquea iquemavetaca,  
imaicaquea aatoquea icoraquetitsi.<sup>9</sup>  
Imaicaquea manaquea poajianaque  
quenavoquirontsipaequi pincajemajia-  
quieriquea maasano quericaca  
pintonquivotonquivoiquempaca.'<sup>10</sup>  
Arikea yoayoaitanaquequea icapioca-  
jiaqueriquea cameetsajianquitsica aisa  
teeca incameetsajigueji. Iriatimpajia  
icoraquecoraqueipojiquea iquijaquijaita-  
pojaque yomporoguijavaetapojacaro  
itsovironaquite.<sup>11</sup> Arikea iquijitapoja-  
quea majirontatsica iramenajiaquiteri-  
quea icajemajiaqueca. Ipitsoquitsiveta-  
naca yamenitsitaro aparo teeca  
inquitsaatemparoji quitsaarentsi  
quempetaroca iquitsaajiacaca igonorojia  
yojocajiquenerica cameetsanijite  
intspatsipaiquemparinijite iriaqueraca  
manquigatanquitsineca.<sup>12</sup> Icanqueri-

quea: 'Notsipavijitaca, ¿quieroqua  
picocani piquijapojo intati teequea  
pinquitsaatemparoji quitsaarentsi  
quempetaroca iquitsaajiacaca pigono-  
rojia?' Cotanquitsiquea iriatimpia  
imatovicanaquequea.<sup>13</sup> Iroompaquea  
ipitsocashijigari irashijia icanqueriquea:  
'Poishojigueri iguitiqui aisa iracoqui,  
paajianaqueriquea pimpishoncijaqui-  
teri sotsiqui opitsecaquegueti pintspipa-  
tsipaitacaantaquitempari iraajianqui-  
tsica atsicayajijianquitsica.'

<sup>14</sup>"Icaramirincavaequequea icajemaji-  
vecaca, cotanquitsiquea irirajia icogua-  
guetaquea teequea iroshequiamaja-  
teji."

**Icoacojiqueru Jesoshi cameetsavaequempa  
irojocajiqueneri Sesa imentaquipae**  
(Mr. 12.13-17; Irc. 20.20-26)

<sup>15</sup>Iroompaquea iriraquea pariseojia  
yoayoaitanaji iquemavacaajiac  
incoraquetashijiaqueriquea Jesoshi  
incomitacaajiaquempari cameetsanijite  
onchoocauenijite incanqueca ompam-  
piatantapojempacca incatsimatacantaji-  
aqueri.<sup>16</sup> Iroompaquea iriatimpajia  
itigarancagarantajiaque itsatacaane aisa  
shinevencarica Erorishi<sup>u</sup> iroaroaitana-  
quequea incoacojiaquiteri. Iroompaquea  
yarejerejeipojaca icanqueriquea:

—Tsatacantantsica, notsajiaquequea  
aviatimpia teequea pamatavijanteji.  
Oraquea pitsatacantigueti tampatica  
poaqueru picamanqueriquea maasanopae  
queroquea incojiaquempani irinetsanaji-  
gueroniji inintagueticia Aapani Irioshi. Tee  
inchoocateji quericaca pagamajaquem-  
paca, aisa teequea pintspatoacaguempari

**u 22.16** Irira *pariseojia* irio jorioja, teetari irinintajigueji irimajirontaquempari Sesa,  
iriguentitari Iromaqutica. Ari iquejetaca *Erorishi*, teequea irio jorio. Cotanquitsiquea iriraquea  
Iromaqutica iquijaguetanaque iguinenteniqui jorioja yomperaperavajiacari. Irioquea  
cantanquitsi irimajirontaquempari *Erorishi* joriojaqui, iriotarite inquemisantamajataque Sesa.  
Icanquequea Sesa maasanopae jorioja irojocagarantapinijiaqueneri imentaquipae.  
Tee iroshequiamajateji jorioja *shineventacarica Erorishi*.

caquinte, irioca anaantavetanquitsica, irioca teeca iranaanteji.<sup>17</sup> Pitsatirotarite icanqueca majirontatsica Sesa icanquegueti maasanojia jorio irojocagarantapinijaque-neri imentaquipae. Imaicaquea ¿queroca pincanten? ¿Cameetsampa nojocajaque-neri, arica tee oncameetsateji?

<sup>18</sup>Cotanquitsiquea Jesoshi itsatavaquero-quea manasacanica iquenquejaguishejiaque intati, irootari icantantacarica:

—Cameetsatamampeajitsica, ¿querou-quea ocotacani pincomitacaquename?

<sup>19</sup>Iintsijate pamaquenarija apamenta-qui ro imentaqui icanqueca Sesa ajocapi-  
nitenerica, nameneritate.

Iriatimpajia yojequitajianariquea tenariomontaqui,<sup>v</sup> <sup>20</sup>icantsitariquea:

—¿Taa ipajita iricatica ivaantoriji-queca? ¿Taaquea ashintaro ivajiro tioncanquitsica?

<sup>21</sup>Icanqueri:

—Iriguenti majirontatsica Sesa.

Icantsitariquea:

—Iroosacanica, pojocajiajenerijate Sesa yashincaca iriatimpa pinetsanati-menqueroniji icanqueca, aisa pinquejetacaajiaquempariquea Aapani Irioshi pinetsanamajajiaqueroja maasanopae icantaguequeca.

<sup>22</sup>Iquemajiavaquerogueti icantajiaque-rica, ariquea icohipitanaca yamenanem-naitanaque intati, ariquea yoayoita-naji.

Icoacojitaqueriquea Jesoshi quero  
oncoquempa  
intancoretancoreitanajegueti  
oncoramanitapoajegueti  
(Mr. 12.18-27; Irc. 20.27-40)

<sup>23</sup>Iroompaquea incajaranquiguitetana-quegueti irioqueate oahoitanajatsi saroseojia iramenajiaquieriquea

Jesoshi. Iriatimpajia iriguentiquea cantajianquitsica aatoquea itancoretan-coreitajitsi metojatsica. Icantajiapoja-queri:

<sup>24</sup>—Tsatacantantatsica, iriraquea Moishishini itioncanaque corama-niqui paperiqui icanque inchooqua-  
gueti caquinte teeca irijanintempaj, aapojempagueti irimetojanajegueti irojocapanajantero imanquigare, choocaguetiquea iriguentijeguite  
irioquea manquigatajemparone irijanintacajaemparoqua quejetaja irioca irijanintajari metojanquitsica.

<sup>25</sup>Coramaniquea ichoocataquequea aparo nogonoro irijanintacaquea 7. Iriraquea parianquitsica imanquigave-tacaroquea manquigarentsi, cotanquitsiquea niganquiquea imetojaque teequea irijanintacaguemparoji.

Iroompaquea irioquea manquigaveta-jaro itsipa oguijatirica. <sup>26</sup>Ariquea iquejetajaquea iriatimpa imetojanaji, teequea irijanintacaguemparoji.

Ariquea iquejetacaquea itsipa niganquitanquitsica, arimpate iteroncanacaquea maasano imanqui-gajiavetacarogueti, teequea irijaninta-cajaguemparoji. <sup>27</sup>Ariquea ometoji-tsitanaca iroatimpa. <sup>28</sup>Imaica, iiintsija pincantajiguena, oraquea oncora-manitapoajegueti intancoretancore-i-tanajegueti maasano metojajavetan-quitsica, ¿quericaca manquigamajata-jemparoneca? Maasanotari imanqui-gajiavecaroquea.

<sup>29</sup>Icanqueriquea Jesoshi:

—Aviatimpajia manaquea picomi-jiaca, teetarite pintsajigueroji queroca ocanqueni Itioncacaanta-queca Aapani Irioshi coramani, aisa teequea pintsajigueroji yagavejica

<sup>v</sup> 22.19 Iriraquea *tenario* irio imentaquitsite Iromaqutica. Iramiterigueti itsipa apajencaro savincaguiteri irivegarataqueri aparo tenario.

iriatimpa.<sup>30</sup> Oncoramanitapoja jegueti intancoretancoreitanajegueti maasano metojajavetanquitsica, aatoquea quericaca manquigatajatsineca, aisa manquigarentsi aatotarite yojocanta-jitajirotsi irimanquigajitajemparo, manatarite inquempejianajempariquea irashivantijite Aapani Irioshi choocajiatsica inquitequi.<sup>31</sup> Imaica-quea aviatimpajia manaquea picanque aatosa itancoretancoreititsi metojaguevetatsica. ¿Arimatee teequea pampatsajavantacojigueroji icantsitaquempica Aapani Irioshi paesatoniqui, icanquegueti:<sup>32</sup> 'Naro-guenti Irioshimajate Averaame, Ishaaco aisa Jacovo'? Teequea irio Irioshite metojatsica, iriguentiquea Irioshite anijatsica.

<sup>33</sup> Irooqua iquemajia vaquerigueti maasano itsatacaa jiaquerigueti imaica, mana yamenamenaitanaque intati.

**Queroca caavijica anaaque  
irinetsanamajajiqueca**  
(Mr. 12.28-34; Irc. 10.25-28)

<sup>34</sup> Iroompaquea iriraquea pariseojia iquemaco jiaquerigueti Jesoshi imajere-taca jiaquerigueti saroseojia, yoayoaita-shitanaqueriquea iriatimpajia aisa.<sup>35</sup> Aparo pariseo tsamajavtaroca itioncacotanaqueca Moishishini, icoacopojiri iramenantaquempariniji, icanqueriquea:

<sup>36</sup> —Tsatacantantatsica, oraticapae icantacaanqueca Aapani Irioshi irinetsanajite ¿querocate anaantamajatatsica?

<sup>37</sup> Iriraquea Jesoshi icanque:  
—'Pimpintsamajataquemparija

Majirontamajatatsica Pirioshite, pampa-niromajatanaqueri, pimpintsashirenta-majaquempari, pimpintsaguenquejane-majatanaquempari.<sup>38</sup> Caavijiquea anaaque ocameetsamajataque irinetsanamajajiqueroquea ocatica, anaague-quero maasanopae icantacaanta queca Aapani Irioshi irinetsanajique.

<sup>39</sup> Oraquea mavitetapojatsica oquejeve-caro, ocanque: 'Pimpintsaquemparija pigonoro pinquejetacaajempa pipintsa-tagueti aviatimpa.'<sup>40</sup> Ocaticaquea mavite icantacaantacajica anetsanajigue irootaquetari oquenantapojaca maasano otsipapae itioncacoguetaqueca Moishishini aisa itsipajia tsavetantajia-queroca icanquerica Aapani Irioshi.<sup>w</sup>

**Taaquea choviquitanaqueri  
Quirishitotatsica?**  
(Mr. 12.35-37; Irc. 20.41-44)

<sup>41</sup> Choocatirajagueti pariseojia, iriraquea Jesoshi icanqueri:

<sup>42</sup> —¿Queroquea pincanqueni aviatimpajia? ¿Quericaca choviquiquerica Quirishitotatsica?<sup>x</sup>

Iriatimpajia icanqueriquea:

—Iriguentiquea choviquiquerri Taavini.

<sup>43</sup> Iriraquea Jesoshi icanqueri:

—Iroosacanica, paesatoniqui

iquenquejaca aquerigueti Ishire Aapani Irioshi Taavini, ¿quiero quea ocotacani iriraquea Taavini ipeantacarica Quirishitotatsica Imajirote? Icanquetari:

<sup>44</sup> <sup>44</sup> Iriraquea Majirontatsica Aapani Irioshi icanqueri Nomajirote:

w 22.40 Ampintsamajatempaquerigueti Aapani Irioshi aisa ampintsatempaquerigueti agonorojia, anetsanajiqueroquea otsipapae igantacaantane Aapani Irioshi, ovonchaquijacarotari.

x 22.42 Quirishitotatsica. Iguenquetsatsarequi guiriegojia icanquegueti *Christos* (Quirishito) manaquea ocanque "Ishaguijitaqueca" aisa "Icoguiaqueca", irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajitsica coramanitica intigarancaque Aapani Irioshi impeaquejempaniji Imajirojiate maasano.

Pisaviquetaja pisenampijaquenaja  
notincamijempequiqui  
pintsipataquenaquea arejebaetana-  
quempa  
nagavejajiaquerigueti maasano catsima-  
jiaquempica, onquejevequemparo  
povanquegontatsitempari.’

<sup>45</sup>Iriraquea Taavini icanqueri: ‘Nomaji-  
rote’, ¿querocaca incoquempani  
inchoviquitanaqueri?

<sup>46</sup>Teequeate inchoocatimateji aparo  
agavejanquitsineca iroguisotoajivaqueneri,  
arioca oparianaca teequea quericaca  
coacotajerineca, manaquea imajerejianaque.

**Icanque Jesoshi aatoja yoguijatacogitajiri  
pariseojia aisa tsatacaantajiguiroca  
itioncacotanaqueca Moishishini**  
(Mr. 12.38-40; Irc. 11.37-54; 20.45-47)

**23** <sup>1</sup>Iroompaeua Jesoshi iquenque-  
tsatacaajiaqueriquea capiocajian-  
quitsica aisa itsatacaanejia icanqueriquea:  
<sup>2</sup>“Iriraquea pariseojia aisa tsatacaantajiji-  
guiroca itioncacotanaqueca Moishishini,  
iriojiaquea oguisotojaiguiroca itioncacota-  
naqueca Moishishini. <sup>3</sup>Nocantantajia-  
quempica intsishiatsi pinquemisantamaja-  
jigueri pinetsanamajajigueroquea  
maasanopae itsatacaajiaquempica,  
cotanquitsiquea aatoja piquempejigaritsi  
iriatimpajia. Manaquea itsatacaantajia-  
quequea intati, cotanquitsiquea teequea  
irinetsanamajajigueroji. <sup>4</sup>Oquejetaca  
yoishotacojitinirigueti itsipajia inirochon-  
quiina tenamajatatsica iquijachonquiina-  
tacaajitaqueri, iriatimpa ejempaco,  
teequea irininteji inuijue. <sup>5</sup>Maasano  
yantajiaqueca yantajiaqueroquea  
cameetsaniji iramenimentajiqueriniji.  
Ariquea yamatsaetacojiacaroquea onaqui  
ivancaqui yoguijaancaroca itioncacotana-  
queca Moishishini, ipeacaitaroquea  
catsantsanaqui. Ariquea iquempejiaquer-  
quea aisa imaatacojiacaroquea inaraqui.  
Oraquea yamanajiaquerigueti Aapani

Irioshi iroguenti iquitsaajiaca catsantsaje-  
paquipae. <sup>6</sup>Oraquea icajemajitrigueti  
ishecajicagueta iroguenti inintajiguiquea  
iroguisavisaviqueriquea intsipatsipata-  
caanquempariquea anaantajatiatsica, aisa  
yoayoaitapinijiguigueta tsovironaquiui  
icapiocantapinijigaca inintajiaquequea  
iroguisavisaviitaqueri intsipatsipataacaan-  
quempariquea caavijica yanaajiaque.  
<sup>7</sup>Aisa yoayoaitanaquegueti oraniqui  
yojocantantajitirogueti taaca opajitapae  
inintajiaquequea inquenquetsatac妖aitava-  
queri incantavaqueri: ‘Tsatacaantanta-  
tsica.’

<sup>8</sup>“Cotanquitsiquea aviatimpajia  
aatoquea pinintajiguitsi incantajiquempi:  
‘Tsatacaantantatsica’, choocatarite  
aparoquea Tsatacaantantatsica tsatacaaji-  
aquempica. Maasano aviatimpajia mana  
piquejetavacaajiac, quejejiaquempi  
iguentijeguijia. <sup>9</sup>Ocaniquiquea ocaniqui  
quepatsiqui aatoquea ichoocatimatitsi  
pijitalshimpaca: ‘Aapani’, choocatarite  
aparo Piri, ichooocati inuitequi. <sup>10</sup>Aisa  
aatoquea pinintimatitsi incantajiquempi:  
‘Nomajironcaca’, choocatarite aparo  
Pimajirote, irira Quirishito. <sup>11</sup>Iriraquea  
nintanquitsineca iranaaque manaquea  
iramatacotanquequea. <sup>12</sup>Aritarite irira  
quenquejacotajatsineca: ‘Nanaajiaqueri  
itsipajia’, manaquea iroguiipashiventaja-  
queriquea Aapani Irioshi oncoramanitapo-  
jajegueti, iriraquea teeca iranaanteji  
iroguenti irishinevenquempariquea  
iranaacaavaequeri.

<sup>13</sup>“<sup>i</sup>Imaicashiatsi pantsipevaetempani-  
shiatsi aviatimpajia tsatacaantajiguiroca  
itioncacotanaqueca Moishishini, aisa  
aviatimpajia pariseojia, cameetsatamam-  
pejiatsica! Quejevecaquea, pashitero-  
gueti sotomorontsi inquijantajitaquempa-  
meca nintajianquitsica irimajirontaquem-  
pari Inuitequitica. Aviatimpajiaquea  
teequeate pinquijiji, manaquea piticaan-  
tavaque aatoniji iquijaquijaiti nintajiae-

tanquitsica.<sup>y 14</sup> iImaicashiatsi pantsipevael-tempanishiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsata-mampeajitsica! Manatarite pamatavijaji-aqueroquea metojacoguetatsica piteronca-pitsajiaquerorequa ashincaca. Aisa pamanajiaquerigueti Aapani Irioshi picaratsantsatacavaevetacaro iramenaji-taquempiniji. Nocantantajiaquempica aviatimpajia caaviji panaamajajiaque incatsimamajajiaquempiquea oncorama-nitapojaqueueti.

<sup>15</sup>“iImaicashiatsi pantsipevaetempanishiatsi aviatimpajia tsatacaantajiguiroca itioncacotanaqueca Moishishini, aisa aviatimpajia pariseojia, cameetsata-mampeajitsica! Aviatimpajia pitsitaca-guitejavaetanaqueroquea quepatsi aisa inirojani quentijani pinquemisantacaajiaqueriniji aparo caquinte inquempejianaquempiquea aviatimpajia. Oraquea iquemisantajiaquempigueti caavijiquea igaanacaqueate icovaeguishetanacaquea yanaajiaquempiquea aviatimpajia. Irootaqueuea iroantajianaquempaca camorecariqui quejajaquempi aviatimpajia.

<sup>16</sup>“iImaicashiatsi pantsipevaetempanishiatsi aviatimpajia, pitsatacaantajiave-caquea cotanquitsiquea teequea pintsatimajigueji! Mana piquejejiacari shamoncajari nigavaetaquemparica itsipa queroquea inquenanaque. Iroguenti picantajiaquequea: ‘Taaca opaji ancantajiaque iroocajate anquen-quetsatacojiaque tetempo ancanque: “Nontsojeaquempagueti ompeguempata tetempo”, iroompa aatogueti anetsana-tiroquea acanqueca cameetsataqueuea.

Cotanquitsiquea iriogueti anquenquetsatacotaquequea ooro choocatatsica teemporoqui, ari anetsanamajajeroja, aatoquea acantashitatiimatarotsi.’

<sup>17</sup>iQuishoguinari pinajiaque! Shamponcajataquempi pishirequi. ¿Querocampate anaatsica: iriocajate ooro choocatancaroca tetempo, iroocajate tetempo yashintantavarajica Aapani Irioshi? Irooriji anaavaeque tetempo. <sup>18</sup>Ariquea picanquequea aisa: ‘Taaca opaji ancantajiaque iroocajate anquen-quetsatacojiaquequea aretare itaantajitarica viratsipae yaajiguinirigueti Aapani Irioshi ancantajiaquegueti: “Nontsojeaquempagueti ompeguempata aretare”, iroompa aatogueti anetsana-tiro acanqueca cameetsataquequea.

Cotanquitsiquea iriogueti anquenquetsatacojiaque viratsi ogataanquitsica aretarequi, ari anetsanamajajeroja, aatoquea acantashitatiimatarotsi.’

<sup>19</sup>iShamoncajari pinajiaque! ¿Querocampate anaatsica: iriocajate viratsi, iroocajate aretare yashintantavarajica Aapani Irioshi? Irooriji anaavaeque aretare. <sup>20</sup>Iriraquea quenquetsatacoti-roca aretare, teequea aparo inquen-quetsatacoteroji iroatimpa, iquenquetsata-coqueriquea aisa viratsi ogataancaroca.

<sup>21</sup>Ariquea iquejetacaquea iriraquea quenquetsatacotiroquea tetempo, teequea aparo inquenquetsatacoteroji tetempo, iquenquetsatacotsitariquea iriatimpa aisa Aapani Irioshi choocatan-caroca. <sup>22</sup>Aisa quericaca quenquetsatacotiroca inquite ichoocatigueti Aapani Irioshi irooqua iquenquetsatacotsita-queri ishitaponcaroqua Aapani Irioshi Imajirojate maasano, aisa iriguenti

**y 23.13** Irirajia tsatacaantajiguiroca itioncacotanaqueca Moishishini iriovetaca tsatacaantamajatanerome Iguenquetsatsare Aapani Irioshi irimeshiantaquemparime igonororjia, cotanquitsiquea iriatimpajia tee irinintenica irinetsanatero, manaquea itsatacamampeajiacaro intati.

iquenquetsatacoquequea Aapani Irioshi savicantaroca.

<sup>23</sup>“¡Imaicashiatsi pantsipevaetempanishiatsi aviatimpajia tsatacantajiguiroca itioncacotanaqueca Moishishini, aisa aviatimpajia pariseojia, cameetsata-mampeajatiatsica! Pojocagarantapinijigui-niri Aapani Irioshi pashintaguecaca: pashintajigagueti 10 ovanajaniqui icantajitica menta, irooca oitsiquijaniqui anishi, irooca comino, pinetsana-queroquea pojocapinijiguiniri aparó. Cameetsavetaca, cotanquitsiquea povashiantanajiro caavijica anaaque-quea itsatacayaquempica tioncarentsiqui, jero inintamajataqueca: tampatica poaqueneri maasano caquinteguetatsica, pimpintsatacotan-tempaja, aisa paventamajaguitemparini Aapani Irioshi. Cameetsavaequea pojocagarantajiaqueneriquea Aapani Irioshi pashincaca, cotanquitsiquea aatomesano pipeacojigarome otsipapae icantajiaquempica. <sup>24</sup>Quempevaequempiquea shamoncajari tsatacaavetanacarica itsipa queroquea inquenacaanaque-rime. Quempecaquea pitsicajatacovetacari tsiijaniqui, iriraquea cameyo, pinijacoqueri.

<sup>25</sup>“¡Imaicashiatsi pantsipevaetempanishiatsi aviatimpajia tsatacantajiguiroca itioncacotanaqueca Moishishini, aisa aviatimpajia pariseojia, cameetsata-mampeajatiatsica! Piquejejiacari quiviroca otaqui chotarontsi irooca perato, cotanquitsiquea intsompogui-requi jac cantatevaaquequea, oshateca-quempitari covaeguisherentsi, manaquea paitsitantaguetaque, mana picoaguetaquero pinintaguetica aviatimpa. <sup>26</sup>¡Aviatimpajia pariseojia

quejequempiquea shamoncajari! Iroquetita pinquivaquero intsompogui-requi chotarontsi irooca perato ariuea aato ocantaitetajitsi aisa otaquiqui.”

<sup>27</sup>“¡Imaicashiatsi pantsipevaetempanishiatsi aviatimpajia tsatacantajiguiroca itioncacotanaqueca Moishishini, aisa aviatimpajia pariseojia, cameetsata-mampeajatiatsica! Manatarite piquempeji-acaroquea yoguijaantajitarica metoja-tsica, manaquea ipantantajitacaro quitamarori cameetsanijite iramenaji-queronijite ocameetsavaeque. Cotanquitsiquea intsompogui-requi chomisaani-quea iriguentiquea tseraiquicaroquea itonqui metojatsica icojotonquipiotana-quequea. <sup>28</sup>Ariueate piquempejiaca-quea aviatimpajia iroguenti picameetsa-tamampeajiacaca intati cameetsanijite iramenajiaquempinijite caquinteja, cotanquitsiquea intsompogui pishireji-aqui mana pishatecanajiro amatavija-gantsi aisa covaeguisherentsi.

<sup>29</sup>“¡Imaicashiatsi pantsipevaetempanishiatsi aviatimpajia tsatacantajiguiroca itioncacotanaqueca Moishishini aisa aviatimpajia pariseojia, cameetsata-mampeajatiatsica! Iroguentiquea pipeacaashijiakanariequa inquenquejacotantajitajemparica tsavetantajatiatsica metojajianquitsica coramanipaequitica, aisa pinetsanajiaqueneriquea yoguijaantajitarica comajamajajatiatsica metojajianquitsica cameetsanijite inquenquejacojitajerinijite. <sup>30</sup>Ariuea picanquequea: ‘Aimequea nonchoocateme coramani ichoocatigueti choviquivaejianaquenaca atomequea namijiguirime imetojajia-querigueti tsavetantajatiatsica.’

<sup>31</sup>Oraqueate piquempejiaquerogueti imaica aviguenti quempetacaant-

<sup>z</sup> **23.26** Iquejetacaacari intati Jesoshi itsatacaaquerigueti pariseojia, quejetaca incanteri: “¡Aviatimpajia pariseojia teequea pintsatimajigueji! Iroquetita pinetsanamajajigueroja pishirequi cameetsanijite iramenajiquempiniji netsanamajajiaquempi.”

quitsi, picantajiaqueterite aviguentijia ichoviquivaejianaqueca metojaqueterica, ari piquejejiacari. <sup>32</sup>iIroosacanica pinteroncamajateroja ipariaguishecaca choviquivaejianaquempica!

<sup>33</sup>“iQuempevaequempi camaarini! iQuejejaquempiquea irijanijate sanatari! ¿Quero pincoriaquempani aatonijite pitsijaigatsi camorecariqui? <sup>34</sup>Irootaquequea nontigaranquimotanta-jiaquempirica tsavetantajiguiroca icanquerica Aapani Irioshi, itsipajia caavijica itsajigui, itsipajia tsatacaantajatisca. Cotanquitsiquea ari pimetojagarantajigueri pompajacogarantajigueri, itsipapae pintavatavajaigueri shinagoga-paequi picapiocantapinijiacaca, pincatsimatashijianaquempari pimpatimajanaqueriquea iguintenipaequi. <sup>35</sup>Pinintacaajiaqueri irimetojajiaque comajamajaijatsica irootaquequea incatsimatimentantaquempiroca Aapani Irioshi quejetacaquea aviatimpajia quejetacaantajiaqueriquea imetojantajicarica tsaroventamajajigarica Aapani Irioshi coramanitica, iriquetinicaquea ipariajitacaca comajatatsica Averini icaratacaajivaequeriquea Sacarianiqui irijanite Verequishini. Iriraquea Sacariani manaquea imetojajitaqueriquea ontaniqui oniganquiruequi oticaacoroqui tetempo ichoocavetacagueta acquieroaca aretare itaantajitarica viratsipae. <sup>36</sup>Arimajacaquea noncantajiaquempica, imaicashitsi incatsimatimentajiaquempironishiatsi Aapani Irioshi aviatimpajia choocajianquitsica imaica.

**Jesoshi iraacojiaqueriquea  
Jerosarequitica**  
(Irc. 13.34-35)

<sup>37</sup>“iJerosarequitica, Jerosarequitica, pimetojajiguiriquea tsavetantajaitica, aisa pitsinatsinavaetaqueriquea itigaran-

quimojiajvetaquempica Aapani Irioshi intsavetantimojiaquempiro Iguenquetsatsare! Pamenajiguiroquea chaapa osaavantajiguigueti orijanijate, nonintaguevetacaquea naatimpa nonquempetacaajiaquempimequea maasano aviatimpajia noncapiocajia-quempinequeate pintsaroventajiaquena, cotanquitsiquea aviatimpajia teequea pinintajigueji. <sup>38</sup>Imaicaquea imaica aatoquea ichoocatimojajimpi Aapani Irioshi, aparoquea pinchoocajiaje. <sup>39</sup>Nocantajiaquempiquea imaica aatoquea pamenajiajana arejevaetapoja-jempaquea aapojajempagueti pincanta-jianaquetaquea: ‘ilintsishitsi irishine-ventajquempari iriratica coraquetapoja-tsica itigarancaqueca Majirontamajatasca!’”

**Jesoshi icanque irisovejaiquero tetempo**

(Mr. 13.1-2; Irc. 21.5-6)

**24** <sup>1</sup>Arikea isotoanajirogueti Jesoshi oticaacoroqui tetempo iroavaetanaje, iquempejiquempejiipojiriquea itsatacaanejia yamenacaaguequeri tetempo aisa tsipaguetacaroca.

<sup>2</sup>Cotanquitsiquea iriraquea Jesoshi icantajiguiri:

—¿Arite pamenajiaquero maasanopae ocatica? Iroomajatari noncanquempica, aatoquea ochoocatajitsi aparo mapi ogataajatsineca, maasanopae irisoveaco-majajitaquero.

**Queroquea oncotanaquempani  
irooshipojegueti onteroncaguetanajempa  
quepatsi**

(Mr. 13.3-23; Irc. 21.7-24)

<sup>3</sup>Iroompaquea isavicaquegueti Jesoshi Orivotsempiqui, arikea iquempejiquempejiopojarí itsatacaanejia, icantajapojiri:

—Nonintajiaque pintsatacaguena quero oncarateni onetsanatantaquem-

paca incajaranquitica picanquegueti irasacaraajitaquero. ¿Taa opaji nontsatantajavajemparoca pincoraque-tantapojajempaca aisa onteroncantague-tanaquempaca quepatsi?

<sup>4</sup>Iriraquea Jesoshi icantajiguiri:

—Shoshoh yamatavijajitimpitsi.

<sup>5</sup>Incoraquecoraqueitaquetari oshequini pinajajiaquenaneca cantajianquitsineca: ‘Naroguenti Quirishito’,<sup>a</sup> ariuea iramatavijajiaqueri incaramirincatashi-vagetanaqueri. <sup>6</sup>Aisa pinquemacojiaque-riquea itsipajia irashimirintavacaajiana-quempa quempeji, aisa itsipajia otsipapaequi quinteninintsipaequi, cotanquitsiquea aviatimpajia aatoquea pitsaroajiguitsi. Aritarite onquempeta-naquempaquea imaica, cotanquitsiquea aatotaquea arejetsitatsi onteroncantaguetaquempaca quepatsi. <sup>7</sup>Iriraquea quintenijianquitsica otsipapaequi quepatsi iroaroaitashijianaqueriquea osamanipaequitica, ariuea irashimirintavacaajianaquempa. Ariuea inquempejiaquempa majirontajatiatsica inchoocag-rantajiaque intigarancajiaqueri igoaretajate iroaroaitashijianaqueriquea itsipa majirontatsica irashimirintavacaajiana-quempa. Irantsipevajitaquemparoqua tasesijencapae, aisa omoguecaguetana-quempaquea. <sup>8</sup>Onquempetanquem-pagueti imaica mana oparianaca intati irantsipevetaantajitaquempaca.

<sup>9</sup>“Ariuea irajaiquempiquea iraanaquempi incatsimataacaantajia-quempiquea irimetojacaantajiaquempi. Maasanopae caquinteguetatsica irisemimentajiaquempiroquea novajiro pitsaro-ventajiaquenagueti. <sup>10</sup>Inconoagarantajiaquempaquea tsaroventajiavequenaneca irovashiantajianajero aato itsaroventajiajana, iroguenti iraacaantajianaqueri-

quea itsipavijivetacaca, irisemavacaajia-naquempa.<sup>11</sup> Irisotoaguetanaquequea amatavijantanquitsineca incantamampe-ajaquempaquea: ‘Notsavetantiro Iguenquetsatsare Aapani Irioshi’, cotanquitsiquea iriatimpajia manaquea iramatavijajianaqueri oshequini.

<sup>12</sup>Oncantatiaguishevaetanaquempaquea oratica covaeguisherentsi, aato ipintsatantamajatanaja oshequini caquintejia. <sup>13</sup>Cotanquitsiquea quericaca atsipetacovaetanquitsineca aatogueti yovashiantirotsi itsarovenque-nagueti arejevaequempa irimetojanaje, irioquea iriguenti irajaitanaje inquitequi. <sup>14</sup>Intsitacaguitejavaetana-quero quepatsi intsavetantajitaniquer-quea quero icotani Aapani Irioshi imajirontagueti. Ariuea inquempejia-quempaquea imaica cameetsanjite inquemacojiaquero maasano caquinte-guetatsica, ariuea onteroncapojempa.

<sup>15</sup>“Iriraquea tsavetantsica Iranierini coramani itioncacotaqueriquea covaegui-shetaqueroneca teempor oñcoramanita-pojajegueti. (Quericaca apatsajavanquero-neca ocatica pinquenquejamajateroja pintsatimenqueroniji.) Imaica aviatimpajia

pamenajavaquerigueti inchoocatantapoja-quemparogueti iteemporote Aapani Irioshi,<sup>16</sup> pincampojeja jaran maasano Joreajiaqui-tica pishiaschiaitapanajantejate otsempigue-cagueti. <sup>17</sup>Quericaca choocatanquitsineca sotsiqui omencotapojacagueti itsovirona-quitequi ovancaitoqui, aatoquea yaguijita-panajanti iraaguepanajantero taaca opajitapae choocatanquitsica intsompogui.

<sup>18</sup>Quericaca choocatanquitsineca iniganquitejirequi, aatoquea yoapanajanti itsovironaquitequi iraapanajantero otsipa iiisaare. <sup>19</sup>iOoshiatsi manquigarentsijia tsaraquijianquitsineca, aisa atsojanquitsi-

<sup>a</sup> 24.5 Quirishito ocanque “Ishaguijitaqueca” aisa “Icoguiaqueca”, irio yoguijajavaqueca ishiraerijia incoraquetaque impeaquémpa imajirote ompejiaquemparineca.

neca, caaviji antsipemajajiaquempaquea!  
<sup>20</sup>Aviatimpajia pamanacoventajiaquempaquea aatonijite pishiamirincatantajigarotsi sharacaguiteriqui iroca aisa savincaguite-riqui imagorejantajitaca.<sup>21</sup>Caavijitari irantsipevajitaquempa anaavaequermaasanopae yatsipejitataca iroaqueragueti ipeacaaguecarogueti Aapani Irioshi quepatsi arejevaeca imaica. Aisa aatoquea yamenimajitajirotsi oncoramanitapoja-gueti.<sup>22</sup>Atomegueti icaratacaapojirome Amajirote oratica savincaguiteripae irantsipetantajavetaquempaca interoncamajajiaquempamequea caquintejia. Cotanquitsiquea ipintsatacatacari icoguiajiaqueca,<sup>b</sup> incaratacaantapojaquenemparica.

<sup>23</sup>“Quericaca cantajiaquempineca: ‘Jeeri iricatica Quirishitotatsica’, iroca incanquempi: ‘Ichooqua ontaniqui’, aatoquea piquemisantajiguiritsija.<sup>24</sup>Incoraquelcoraqueitaquequea tsavetantamampejaigatsica amatavijantajianquitsineca incanquequea: ‘Naroguentiquea Quirishitotatsica.’ Itsipaqua cantajianquitsineca: ‘Naroguentiquea tsavetanti-roca icanquenaca Aapani Irioshi.’ Aisa ironigaanqueroquea oacaantantatsica intati cameetsanjite iramatavijajiana-querinjite oshequini. Inquejetacajitsivetempariequa icoguiajiaqueca Aapani Irioshi, cotanquitsiquea aatoquea yagavejiritsi.<sup>25</sup>Jero, nocamantsivae-quempiro maasano ocatica imaica tequeratagueti arejepojempa.<sup>26</sup>Incanquempigueti: ‘Jeeri irintatica oquitamampororoitapojigueti’, aatoquea poapoaitisi pamenamenaiqueri. Aisa incanquempigueti: ‘Chooca oraniqui intsompoguiqui’, aatoquea piquemisan-tajiguiritsi.<sup>27</sup>Onquempetaquempaquea

pamenajiguirogueti caretia querocao cocani ocantigueti timemec, teequea capichajaniqui ontimememequeji, maasanoquea ontimemecaguitevae-quiero. Arikea inquempetapoja-irira Irijanite Caquinte incoraquelpojague-queti, maasanojia iramenamajajavajeri.<sup>28</sup>Quempecaquea metojatsica querocagueti oraniqui yojoquijicagueti yamenajiqueriquea sheetyaoni irarampejashijia-pojeri.<sup>c</sup>

**Querocaca oncoguetanaquempani  
incoraquetajategueti Irijanite Caquinte**  
(Mr. 13.24-37; Irc. 17.26-30, 34-36;  
21.25-33)

<sup>29</sup>“Irooqua oncaraguijanaquegueti atsipevaerentsi impitsecajencatanaque catsirincaiteri, taai aato iquitasetaji. Iriraquea impoquirope irasacaraaguetanaquempaquea. Irimoguecanaquempaquea choocaguetanquitsica jenoqui inquitequi.<sup>30</sup>Arikea iramenajitavaquero ontaniqui inquitequi intsatantajitavaquemparoca irooshimajapoji incoraquelpojaque irira Irijanite Caquinte. Arikea irishimampon- jancajianaquempa maasano caquintegue-tatsica quepatsipaequica irraajiana-quempa. Arikea iramenajavaqueri Irijanite Caquinte incoraquetantapojempa mararo, iragavejavaetapoja-iranaajiaqueriquea maasano, iroganejenavaetapoja-empa.<sup>31</sup>Iroompaquea intivojique-roquea tivorentsi intigarancajiaqueriquea irashivantijite iroaroaitanaquequea intsitacaguitejajiaquitero maasanopae quepatsi incapiocajiaqueriquea icoguiajia-queca Aapani Irioshi.

<sup>32</sup>“Imaica pintsajiaavaqueroja nontsata-aa-jaquempica, nonquempetacaaque-  
m-

**b 24.22** Irirajia icoguiajiaqueca iriojiatari aventaventajiaquemparineca. **c 24.28** Quejetaca yamenajiquerijie sheetyaoni irarampejashijia-pojeri metojatsica, arikea onquempetaquempaquea incoraquelpojague-queti Quirishito, aato isenacapoja, maasanoquea iramenamajajavajeri. Pamenero aisa Irc. 17.37.

piroja iguera. Iroaquerasano etsocorevanatanaque pitsajiaquequea irooshipojaji ajagantsipojaje.<sup>33</sup> Ariquea onquempetanaquempaquea oncoramanitapoja-gueti pamenaguetavajerogeti onquempetanajempagueti maasanopae notsata-cajianaquempica imaica, irooqua pintsatantajavajempa irooshipojishiatsi incoraquepojaje Irijanite Caquinte, quejetaca catiapoja sotomorontsiqui.<sup>34</sup> Arimajaca noncantajiaquempica, maasanopae ocatica nocantajiaquempica imaica onetsanamajatanaquempaquea tequeratagueti interoncajiguempajimaasano choocajianquitsineca omparia-naquempagueti notsaventsitacaca imaica.<sup>d</sup><sup>35</sup> Oraquea inquite aisa quepatsi ompeaquempa, cotanquitsiquea oraquea nocantaguequeca aato opegatsi.

<sup>36</sup>“Teequea inchoocateji tsatatsineca querocaca savincaguiteri onetsanatanta-quempaca, tee intsajiteji quero incarateni catsirincaiteri. Irirajia ashivantijite inquitequitica tee intsajigueji, ariquea iquempetaca Irijanite Aapani Irioshi teequea intstateji. Aparoqua icocani Aapani Irioshi iriatimpa itsaquieroqua.

<sup>37</sup>“Oraquea incoraquetajategueti Irijanite Caquinte onquempetajemparopea ichoocavecagueti Noeni coramani.<sup>e</sup><sup>38</sup> Tequeratagueti onanquempajia anaantaguetaquemparoca maasanopae quepatsi, ishecajia caquintejia, imirajiac, imanquigajiac, yojocantajiaqueroquea irorijanijite omanquigajiaquempaquea, arejevaeca savincaguiteri iquiaquijaitantacaca Noeni iguenajaroqui icantajitica aareca.

<sup>39</sup>Iroompaquea ocomitajajapojiri anancari ocataraoajianaqueri. Arikea onquempetaquempa oncoramanitapoja-jegueti incoraquetapojajegueti irira Irijanite Caquinte, manatarite incomirejajapojeri.<sup>40</sup> Inchoocajiaque mavite caquinte iniganquitejirequi, aparo irajaitanaque, iriraquea itsipa irojocajitanaqueri.<sup>41</sup> Arikea onquempejiaquempaquea mavite manquigarentsi osaviciajiaque ontoncajiaque, aparo irajaitanaquero, oraquea otsipa irojocajitanquero.

<sup>42</sup>“Irootaquequea noncantantajia-quempica pincoquempanija poguijajavajerija Pimajirote, teetarite pintsajigueji querocaca incoraquetantajempaca.

<sup>43</sup>Intsijate pinquenquejajiguerojate, inchoocategueti itsipa ashintanquitsineca itsovironaquite intsatemegueti querocaca incoraquetantaquempaca aitsitantatsica, ¿arimpate irimaaque? ¡Aatotarite imaguits! Manaquea intinajaventagüiteroni irajaararo aatonijite yaitsijitiritsi.<sup>44</sup> Irootaquequea noncantantajiaquempica pincoquempanija pincomajamajajiaquempa poguijajiterini incoraquetajegueti irira Irijanite Caquinte, iroorijite incoraquetantajemparo pijijiaqueca aatoca icoraquetantaro.

**Yashintajitaca cameetsari aisa teeca  
incameetsateji**  
(Irc. 12.41-48)

<sup>45</sup>“¿Querija quempequemparineca imaica yashintacaca irira tsatatsica quemisantamajatirica ashincarica? Pameneja inchoocategueti ashincarica

**d 24.34** Otioncaca acaniqui, iguenquetsatsarequi guiriegoja ocanque *genea*. Chooc mavitepae agavejaque oncantacotaque. *Genea* agavejaque oncantacoqueri (1) irioca maasano choocajianquitsica icantiquerogueti (*esta generación la gente de este tiempo*); (2) irioca oncantacoque maasano joriojia (*esta raza*); (3) irioca oncantacoque maasano choocajianquitsineca omparianaquempagueti itsaventsitacaca (*esta generación, es decir, la generación que ve el comienzo de estas cosas*).   **e 24.37** Jen. 6.5-12; 7.6-24.

caquinte iroompaquea iroanaquegueti osamani, incantanaqueri aparo yashincaca: 'Pinquempoguijajiajeri maasano nashintajiacaca, pojocapinijia-quenerija ishecajia.'<sup>46-47</sup> Oraquea incoraquepojajegueti iramenapojajeri-gueti inetsanamajatajiro icantanaque-rica, arimpaquea irishineventamajatana-quempariquea. Arimajaca noncan-quempi, incampojajeri: 'Imaica noninquequea pamenaguetaqueroquea maasanopae nashincaca.' Ariquea iriatimpa irishinevaetanaquempariquea oshequi.<sup>48</sup> Cotanquitsiquea iroiogueti teeca inquemisanteji, aatoquea yoguijiritsi ashincarica manatarite incanke: 'Aatotajate icoraquetsitaja',<sup>49</sup> ariquea imparianaquemparo incatsimajianaque-riquia quejejiacarica yashintajitacaca, inconojaquempariquea shinquitatsica manaquea irisavacaventagujiteroni irishecaguitempani, aisa irishinquigui-tempani.<sup>50</sup> Cotanquitsiquea taampina incoraquetimopojajeri ashincarica incomirejapojempari,<sup>51</sup> incatsimamajapojajeri oshequi, intsipatacaantajia-quempariquea quemisantamampeajia-tsica intati, ontaniquiquea iriraaguitempani irantsicayajijiaquempa.

**Jesoshi iquempetacaacaro 10**  
**manquigarentsijia iroaqueraca**  
**quenquevaroguetananquitsi**

**25**<sup>1</sup> "Imaica nonquejetacaquem- paroqua quero oncoquempani irimajirontaquempagueti Inquiequitica aapojempagueti notsaventsitacaca. Manaquea onquempejiaquemparo 10 manquigarentsijia iroaqueraca quenque- varoguetananquitsi. Iroatimpajia amajiaque otsivorepae oahoaitanaque ontonquivotonquivoquempari manquigatanquitsineca.<sup>2</sup> Ocarajiaque 5 teeca onquenquejamajajigueji, otsipa 5 quenquejamajajianquitsica.<sup>3</sup> Iroatim-

pajia teeca onquenquejamajajigueji amajiaveca otsivorepae, cotanquitsiquea teetarite aajianaqueji ashitite oganenca-jatantanaquemparica coajica interonca-naquempagueti.<sup>4</sup> Oraquea quenquejamajajianquitsica iroguenti amajiaque itsipataco.<sup>5</sup> Iroompaequa oguijaveguita-rini teetatarite incoraquetsitempaji manquigatanquitsineca, ocantanaca pochoquini ojocajianacani tin.<sup>6</sup> Iroompaequa onianquiitevaetapojaquegueti oquemitsitariquea icajemajencajitaque: 'iCoraquetapoaque manquigatanquitsineca, poapoateshiatsi pintonquivojajia-vaquempariquea!'<sup>7</sup> Arikea ocojianaca ocatabajanaca maasano aitsijiavetanaca otsivorepae.<sup>8</sup> Oraquea teeca onquenque-jitsitempariji ashti ocantsivetaroquea quenquejajianquitsica: 'Pojocagajitenashiatsi capichajaji pashitite irootapoji-shiatsi nontsvacacotenishiatsi.'<sup>9</sup> Cotanquitsiquea iroatimpajia ocanqueroquea: 'Aatoshineti nojoquimpitsi. Arigueti nojocajiavequempigueti manaquea anteroncajatacotsijianaquempaja taampina maasano. Poapoaitanaque-quea pivegarajiapanajante pashi aviatimpa itsipajato.'<sup>10</sup> Cotanquitsiquea irooqua oahoavetanaca ovegarajiapa-najante jac arejetapojaca manquigatan-quitsineca. Oraquea quenquejamajajianquitsica amajianquitsica ashitite oquijaquijitanaque intsompoguiqui otsipatsipaitanacari irishineventajia-quemparigueti, ariquea ocoitanaca yashimajajitajiro ashitacorontsi.<sup>11</sup> Arikea ocoaquecoraqueitsivepojaca otsipavecaca, ocanquequea: 'iNomaji-rote, nomajirote, intsija pintanarejacote-nashiatsi!'<sup>12</sup> Cotanquitsiquea iriatimpa icantajigiro: 'Teetarite nontsamajaji- guempiji cameetsanijite nontanarejacojiaquempinijite.'<sup>13</sup> Irootaquequea imaica noncantantajiaquempica pincoquempaniquea pincomajamajajia-

quempaja, teetarite pintsajigueji querocaca incoraquetantapojajempaca Irijanite Caquinte.

**Jesoshi iquempetacaacari caquinte ashintajiacarica caraquisequitirica imentaqui**  
(Irc. 19.12-27)

<sup>14</sup>“Imaica nonquempetacaaque paro- quea imajirontagueti Inquitequitica, manaquea nonquempetacaaque empari caquinte ashintajiacarica caraquisequitirica imentaqui. Iroshipoji iroanaque- quea otsipaqui quepatsi icajemajiaqueri irashijia irojocajianaqueneri imenta- quipae iroganencajeri. <sup>15</sup>Iriraquea aparo yojoquitanariequa 5 imontiina imentaqui.<sup>f</sup> Iriraquea itsipa yojocaque- neri mavimontiinate. Iriraquea mavite- vaetapojatsica yojocaqueneri apamontii- naro. Itsaqueritari maasano yashintajia- caca queri agavejamajatanquitsineca aisa teeca iragavejamajateji. Ariquea yoavaetanaque jmm osamani.

<sup>16</sup>Iriraquea yojocanaquenerica 5 imontiina yoganencajiriquea itsipa 5 imontiina. <sup>17</sup>Arikea iquempetacari itsipa yojocanaquenerica mavimontii- nate, yoganencajiri itsipa mavimontii- nate. <sup>18</sup>Cotanquitsiquea iriraqueate yojocanaquenerica apamontiinaro, manaquea yoanaque iquisocashitaqueri quepatsiqui yoguijaitari.

<sup>19</sup>“Ocoramanivaetapojaji anaanaague- tanaca oshequini taai icoraquepojaji ashintajiacarica icantajapijiri: ‘Jameja amenajajieri imentaqui querocaca icaramontiinatanaqueni.’ <sup>20</sup>Iriraquea yojocanaquenerica 5 imontiina yojoqui- tsitajanariequa, itsipatacantacari itsipa 5 imontiina imentaquipae yaancarica,

icanqueriquea: ‘Nomajirote, ari pojocavetanaquena 5 imontiina, jeri iricatica itsipa 5 imontiina naantajarica pimentaqui site.’ <sup>21</sup>Iriraquea ashincarica icanqueri: ‘Cameetsavaeque, pinetsana- majaqueroquea nocanquempica, piquemisantamajataquena. Pinetsanata- vaquerotari nocantavequempica capichajaniqui, imaicaquea aviguenti quempogujenarone oavaetanaque. Pincoraquetequetiro ashinevaeji- quempa.’ <sup>22</sup>Iriraquea itsipa yojocana- quenerica mavimontiinate yojocu- janariequa, itsipatacantacari itsipa mavimontiinate imentaquipae yaancarica, icanqueriquea: ‘Nomajirote, ari pojocavetanaquena mavimontiinate, jeri iricatica itsipa mavimontiinate naantajarica pimentaqui site.’ <sup>23</sup>Iriraquea ashincarica icanqueri: ‘Cameetsavaeque, pinetsanamaqueroquea nocanquempica, piquemisantamajataquena. Pinetsanatavaquerotari nocantavequempica capichajaniqui, imaicaquea aviguenti quempogujenarone oavaetanaque. Pincoraquetequetiro ashinevaeji- quempa.’

<sup>24</sup>“Iriraquea mavitevaepojatsica yojocanaquenerica apamontiinaro icanqueri ashincarica: ‘Nomajirote, namenimpiequa aviguenti teequea pimpintasatacotantempaji, aisa aviguenti caavijica patsipetacaantavaetaca pishiacotacaantigueti paanquempaca caraquisequi imentaqui. Aisa manaquea poganencaqueri imentaqui intati teequea pishiacotimenteriji.’ <sup>25</sup>Iroota- quequea notsaroacaanquempica noanta- nacaca noquitatantacarica pimentaqui- sitepae quepatsiqui. Imaica jeri iricatica pimentaqui sitepae.’

**f 25.15** Apamontiinaro imentaquipae cavorejatatsica tenatatsica 91 quiro, icantajitiro coramani *tento* (*talento*). Iramiterigueti itsipa irajagantsitacovaetanaque irivegarataqueri aparo *tento*.

<sup>26</sup>Iriraquea ashincarica imentaquitsite icanqueri: ‘Teequea pincantempaji, aviguenti peratatsica. Iroosacanica pitsaquesa natsipetacaantavaetaca noshiacotacaantigueti naanquempaca caraquisequi imentaqui, aisa manaquea noganencaqueri imentaqui intati teequea noshiacotimenteriji.

<sup>27</sup>¿Querocaquea octacani teequea pojoqueneriji nomentaquijitsite quempoquijantague-tirica paantajemparimequeate itsipajia, iroompaquea nocoraquevetajagueti imaica pojocavajenarimequea?’<sup>28</sup>Ipitos-cashijigariquea chocajianquitsica oraniqui icanqueri: ‘Paapitsaterishias iricatica apamontiinaro imentaqui nojocavecanarica pojocajigueneri oganencaquerica 5 imontiina.

<sup>29</sup>Caavijitari irojocamajajiqueneri quericaca ganencamajataquerica, cotanquitsiquea iriraquea teeca irashintamajatempaji, capichajitica yashintaveca iraacaitisjita-quempariquea.

<sup>30</sup>Imaica iricatica nashincaca teeca inquemisanteraj paajianaqueriquea pimpishoncrajiaqui-teri sotsiqui opitsecaquegueti intsipatsi-pataquempariquea iraajianquitsica atsicayajijianquitsica.’

**Queroquea incojitaquerini caquinteja  
oncoramanitapoja jegueti  
impeaquempagueti Jesoshi Imajirojiate  
maasanojia**

<sup>31</sup>“Oncoramanitapoja jegueti incoraque-tajegueti Irilanite Caquinte iroganejenca-vaeta pojempa intsipatsipa taquempari irashivantijite Aapani Irioshi, irisavicapo-jero imajirontamento oganejencari irimajirontamajapojempa.

<sup>32</sup>Intirorena-ventajianaquempari maasano caquintege-tatsica. Iriatimpa iromporogujashigue-quempari inquempetacaajiaquempari

quempogujirica oveja yomporogujashigueta guetarigueti irovejate aisa igaaverate.

<sup>33</sup>Iromporogujashitaquempari oveajia itincamijempequiqui, aisa caaverajia iromporogujashitaquempari ishinampi-jempequiqui.

<sup>34</sup>Iriraquea Majirontatsica incantajiaqueri choocajianquitsica itincamijempequiqui: ‘Caacate, aviatimpajia icavintsa jamajajia queca Aapani. Pashintajiaquemparo quea maasanopae ipeacaajiaquempica paesatoniqui iroaque-ragueti ipeacaacarogueti quepatsi, aviatimpajia inintacaajiaquempiro incavintsa jajia-quempiquea.

<sup>35</sup>Iroorijite natsipevaetacarogueti notase aviatimpajia pojocajiaquena-quea noshecatacaca. Nomirevaetigueti pojocajiaquenaquea nomiracaca. Noquenagueta quegueti teequea pintsajia vetenaji, picajemajia vaquena quea pitsovironaqui-tequi nomaimo jiaquempi.

<sup>36</sup>Teequea onchoocavetempaji nonquitsaaquempaca, aviatimpajia pojoquitanaro quea noquitsaa-caca. Nojoujijicagueti aviatimpajia pipintsa taccojia quena quea pamena jiaqui-tana. Aisa isantanatacojitanagueti picoraquejiajati.’

<sup>37</sup>Iroompaquea iriraquea comajamajajianquitsica icanqueriquea: ‘Nomajirote, ¿querocate namenajiaquempini pitasequeni nojocajiaquempi pisheca? ¿Querocate namenajiaquempini pimirequeni nojocajiaquempi pimiracaca?’

<sup>38</sup>¿Querocate namenajiaquempini piquenagueta quea nojocajemajiaquempini pimaimo jiaquena? ¿Querocate namenajia-quempini picajaratsinotigueti nojocajia-quempi pi quisaa caca?

<sup>39</sup>¿Querocate namenajiaquempini pojocajicagueti, aisa isantanatacojitaquempi pigueti noanoaita-quiti namenajiajatimpi?’

<sup>40</sup>Cotanquitsiquea icanquea Majirontatsica: ‘Arimajaca noncanquempi, pipintsa taccojia carigueti aparo iricatica niguentijeguite<sup>g</sup> teeca

<sup>g</sup> 25.40 Icanquegueti Jesoshi *niguentijeguite* iriguenti icantacoque tsaroven taca carica Aapani Irioshi.

iranaanteji, quempeca naroguentica pipintsatacotaca.'

<sup>41</sup>"Aisa icanneriquea yomporoguijajiaqueca ishinampijempequiqui: 'Imaica aviatimpajia icatsimajiaqueca Aapani, poapoaitanaque ontaniqui camorecariqui aatoca otsivaquitsi ipeacaashijicarica Satanashi<sup>h</sup> aisa ashivantinirojite quemisantaquerica. <sup>42</sup>Natsipevaecarogueti notase teequea pojocajiguenuaji noshecajiaquempaca. Nomiretigueti teequea pojocajiguenuaji nomiraqueca. <sup>43</sup>Noquenaguetanaquegueti teequea pincajemajiguenuaji pitsoviornaquitequi nomaimojiguempiji. Teequeti onchoocateji noitsaare teequea pojocajiguenuaji nonquitsaaquempaca. Nojoquijicueti, aisa isantanatacojitanagueti, teequea pimpintatsacojiguenuaji pincoraquetashiji-guenaji.' <sup>44</sup>Iriatimpajia incanneriquea: 'Nomajirote, ¿querocate namenajiaquempini pitaseaquegueti, irooca pimirequeni, aisa piquenaguetanaquegueti, irooca picajaratsinoquegueti, irooca pojoquijicueti, aisa isantanatacojiquempigueti, teequea nompintatsacojiguempiji?'

<sup>45</sup>Iriatimpajia incantajiqueriquea: 'Arimajaca noncantajiaquempi, teetari pimpintatsacojiguempariji iricaticajia teeca iranaanteji, quempeca naroguentica teeca pimpintatsacojiguempaji.' <sup>46</sup>Maasano irirajia iroaroaitanaquequea camorecariqui irantsipeventaguitemparoni igovaeguishere. Cotanquitsiquea iriraquea netsanajiguiroca inintica Aapani manaquea iroaroaitanaque inuitequi, incoguitempani iranijaguteni."

**Iquemavacaimentajiacari Jesoshi  
iraacaantajiaqueri**  
(Mr. 14.1-2; Irc. 22.1-2; Jn. 11.45-53)

**26** <sup>1</sup>Iteroncaquerogueti Jesoshi itsatacajaiquerigueti itsatacaanejia, icanqueri:

<sup>2</sup>—Aviatimpajia pitsajiaque maviteta-pojaque savincaguiteri aapojempaca Paashicoa.<sup>i</sup> Irooquea iraacaantantajita-quemparica Irijanite Caquinte irompajacojiqueru.

<sup>3</sup>Ariquea icapiocajiacca itsoviaguiteritequi Caipashi maasano saseroroteja anaantajianquitsica, tsatacaantajiguirroca itioncacotanaqueca Moishishini aisa jivajiguirica joriojia. Iriraquea Caipashi iriguenti saserorote anaantamajatanquitsica. <sup>4</sup>Ariquea oraniqui iquemavacaajiacca iramatavijajiaqueriquea Jesoshi iraacaantajiaqueri irimetajacaantajiaqueri. <sup>5</sup>Cotanquitsiquea icantajiaque:

—Oraquea anaanajempagueti Paashicoa ariquea aacaantajiaqueri. Imaicaquea imaica aatotaja aacaantajiguiritsi aatonijite icatsimatacojianaqueritsi maasano capiocaventajiacarica.

**Ishaguitantajicari Jesoshi  
poncabajatatsica**  
(Mr. 14.3-9; Jn. 12.1-8)

<sup>6</sup>Iroompaquea yoanaque Jesoshi Vetaniaqui itsovironaquitequi Shimo icantajitica Avejancavetatsica. <sup>7</sup>Ichoocaquegueti ontaniqui ocoraquetashipojiri manquigarentsi amacoqueri poncabajatatsica vegaramajatatsica. Iroguenti yoguijaantajicaro chovintyori qui ipeacaajitaca mapi icantajitica aravasttero. Isavicaquegueti Jesoshi ishecajiacca, iroatimpajiaquempejitaroja-cari oshaguitsitantapojacari ishinquireguishiqui. <sup>8</sup>Iriraquea itsatacaanejia irooquea yamenajivaquerogueti ariquea icohipoitanaca icatsimajia-naque, icantavacaajianaca:

—¿Querocaquea? Opomatsajatacashitsi. <sup>9</sup>Arimesanoja irojocantajiquerome

**h** 25.41 Iriraquea *Satanashi* iriotaquequea imajironcaca ampatsinjia, iriojiaquea irashivantinirojitetete. **i** 26.2 Pamenero *Glosario* itsavetantajitirogueti *Paashicoa*.

iraantajiquemparo imentaqui incaraqui-  
sequivaeque irojocajiquenerimequea  
coguitejacojianquitsica.

<sup>10</sup>Cotanquitsiquea Jesoshi iroquea  
iquemajiaquerigueti icantsitariquea:  
—Ariotaqueshiatsi ococani pasereaji-  
girotsi. Cameetsavaeque oshaguitan-  
quenaro. <sup>11</sup>Iriraquea coguitejacojianqui-  
tsica icancaniquea pintsipatsipaitajem-  
pari, cotanquitsiquea naatimpa  
aatotarite picocani pitsipatsipaitajanatsi.  
<sup>12</sup>Oraquea oshaguitsinotsiquenagueti  
manquigarentsi, manaquea onetsanatsi-  
tacaro iroquoijijitajatenagueti nometo-  
jaquegueti. <sup>13</sup>Imaica noncamanquempi-  
quea arimaja querocaguetai intsavetanta-  
jiqueroni Quenquetsatsarentsi  
Oganejencatatsica maasanopae  
quepatsipaequi, ariquea intsavetantaji-  
queroquea ocatica manquigarentsi  
oshaguiquenagueti cameetsanjite  
inunquejacotimentajitajeronijite  
iroatimpa.

**Jorashi ininque iraacaanqueriquea  
Jesoshi**

(Mr. 14.10-11; Irc. 22.3-6)

<sup>14</sup>Iroompa iriraquea itsatacaane  
Jesoshi pajitatsica Jorashi Ishicariote  
yoanaque iramenajiaquiteri saseroro-  
tejia anaantajianquitsica. <sup>15</sup>Icantajia-  
pajiri:

—¿Queroca incaravaequeni imentaqui  
povegarajiaquenaquea naacaantantajia-  
quempirica Jesoshi?

Iriatimpajia yojocajiaqueneriquea 30  
peratamentaquui.<sup>j</sup> <sup>16</sup>Iroompaquea  
yoanajiquea ariquea ipariapojaro  
iquenquejanaquero querocaca incoque-  
rini iraacaanquerigueti.

**Jesoshi ishecatacaaianajari itsatacaanejeja**  
(Mr. 14.12-25; Irc. 22.7-23; Jn. 13.21-30;  
1 Co. 11.23-26)

<sup>17</sup>Iroompaquea aapojacaguetai savinca-  
guiteri pariantajaroca savincaguiteripae  
ishecatantajitaroca pan teeca oncono-  
guemparoji anempoacaanaqueroneca,  
iriraquea itsatacaaneja icoraquetashijia-  
pojiri Jesoshi icanqueri:

—¿Querocaquea pininqueni nonetsa-  
najiaquempironi maasanopae cameetsa-  
njite ashecajiaquempanijite coajica  
ashineventajiaquemparo Paashicoa?

<sup>18</sup>Iriatimpa icanqueri:

—Pijateja, poapoaitanaque shirampa-  
riqui Jerosarequi pincantajiapojerija:  
‘Iriraquea Tsatacaantantatsica icanque:  
Irootapoji arejetapojempa nocoraqueta-  
shitaqueca, irootaquequea nonintanta-  
caca noshecatacaajiaquempariquea  
notsatacaaneja pitsovironaquitequi  
noshineventajiajemparo Paashicoa.’

<sup>19</sup>Ariquea yoayoaitanaque itsatacaaneja  
itampaticamajajiaqueroquea icantajiaava-  
querica Jesoshi, inetsanajiaqueroquea  
maasanopae irishecajiaquempaca irishine-  
ventajiaquemparoniji Paashicoa.

<sup>20</sup>Iroompaquea opitsecaguitetanaji-  
gueti iriraquea Jesoshi itsipatsipaitana-  
cari itsatacaaneja carajianquitsica 12,  
ipimerequijajiajapojaca shitaponcaron-  
tsiqui. <sup>21</sup>Ariquea ishecajiacaguetai  
icanqueriquea Jesoshi:

—Imaica noncamantaquempi, iconoa-  
quempiquea aviatimpajia aparo aacaan-  
tenaneca.

<sup>22</sup>Ariquea icohicoitanaca itsatacaan-  
ejia ishimampojancajanaca, yacaya-  
caitanaque:

**j 26.15** Iriraquea *peratamentaquui* ipeacaantajitari cavorejatatsica icantajitica *perata* (*plata*). Yanaaqueri itsipa imentaqui icantajitica *tenario*. Apamentaquito peratamentaquui icarataque 4 tenario. Iriraquea tenario irio imentaquitsite Iromaqutica. Iramiterigueti itsipa apajencaro savincaguiteri irivegarataqueri aparo tenario.

—Nomajirote, ¿naroguentimpa aacaanquempineca?

<sup>23</sup>Icanque Jesoshi:

—Iriguenti aacaanquenaneca tsipava-coquenaca notsiantancarogueti pan shovaoqui. <sup>24</sup>Aritarite ontampaticamajata-naque ocanqueca tioncanquitsica coramani itsavetacotsijicarigueti Irijanite Caquinte, cotanquitsiquea iirantsipevaetempanishiati irira aacaan-queringeica! Aatomesano ivoguime iriatimpa.

<sup>25</sup>Icantsitanacaquea Jorashi aacaan-queringeica:

—Tsatacaantantatsica, ¿naroguen-timpa aacaanquempineca?

Icanqueri Jesoshi:

—Aviguentitari cantanquitsi.

<sup>26</sup>Iroompaquea ishecajiacaguetai, yaaqueroquea Jesoshi pan, yama-naque-riuea Aapani Irioshi, icantaqueri: “Ariotesaa.” Ariquea icotarejitsitaro-quea yojocajiaqueneri itsatacaanejia, icantiriquea:

—Paajiavaqueja pishecajiaquem-paro. Iroguenti notsino.

<sup>27</sup>Iroompa yaacoqueroquea chovintyo-riqui,<sup>k</sup> yamanajiri aisa Aapani Irioshi, icantaqueri: “Ariotesaa.” Ariquea yojocacojiaqueneriquea itsatacaanejia, icantiri:

—Jero pimirajiaquemparoja, maasano. <sup>28</sup>Iroguentiquea noriraja<sup>l</sup> sotojaatananquitsineca nometojaventaji-aquerigueti caramirincavaetananquitsi-neca impeacotajemparonijite Aapani Irioshi igovaeguisherejia. Ocantacoque-

roquea iroaqueraro paaquito.<sup>m</sup> <sup>29</sup>Imaica noncanquempiquea, aatoquea nomira-jaro vinoja arejevaetapojempa amiram-iraitajemparo iroaquerajaro oncoramani-tapojajegueti impeaqueempagueti Aapani Imajirojiate maasano.

### Jesoshi icamanqueri Peerero ironmanacoqueriquea

(Mr. 14.27-31; Irc. 22.31-34; Jn. 13.36-38)

<sup>30</sup>Iroompaquea iteroncajianaquero-gueti yamashaiventajiaquerigueti Aapani Irioshi, isotosotoitanaji yoayoai-tanaque Orivotsempiqui. <sup>31</sup>Ariquea icanqueri Jesoshi:

—Ocatica pitsecanquitsica maasano aviatimpajia pimpashiventacaajiaquena-quea pojocajapanajantena. Aritarite ocanque Itioncacaantaquea Aapani Irioshi coramani, ocanque: ‘Aapojempa-gueti nometojaqueri quempoguijurica oveja. Iriraquea ovejajia imporocajen-ca-tesano maasano.’<sup>n</sup> <sup>32</sup>Cotanquitsiquea iroompaquea nontancorejanajegueti naroquetiquea jivatanaquempine noanaquequea Garireaqui.

<sup>33</sup>Icanquequea Peerero:

—Impashiventacaajiajetanaquempi-quea maasanopae irojocajocaivetana-quempi, cotanquitsi naatimpa aatotarite nojoquimatiimpitsi.

<sup>34</sup>Cotanquitsiquea Jesoshi icanqueri:

—Noncamanquempiquea, coajica tequeratagueeti irinijeji chaapa, pomana-coquenaeua 3.

<sup>35</sup>Icantsitanaca Peerero:

**k 26.27** Iroguenti yaacotaque vinoja. **l 26.28** Icanquerogueti *noriraja* mana iquejetacaacaro intati, cameetsaniji amirapinjijaquerogueti anquenquejapinjijaqueri imetojaventajiacajigueti.

**m 26.28** Oraquea *paaquito* iroguenti icantamajajitirica itsipa irinetsanamajajitenerica.

Ocaticaquea *iroaqueraro paaquito* icantajiacajiquea Aapani Irioshi irishetacotajeri igovaeguishere maasano aventaventaqueemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini. **n 26.31** Sac. 13.7.

—Ariguetija intsipatacaantajitenajate irimetojajiquena irimetojajiquenaquea, cotanquitsiquea aatotarite nomanacotimpitsi.

Ariquea iquempejiaquero maasano itsatacaanejia icantajiaqueca.

**Jesoshi yamanaqueriquea Aapani Irioshi  
Jetsemaniqui**

(Mr. 14.32-42; Irc. 22.39-46)

<sup>36</sup>Iroompaquea yoayoaitanaquequea Jetsemaniqui. Irooqua yarejerejeipojacagueti iriraquea Jesoshi icanqueri itsatacaanejia:

—Pisavisaviitetaja ocaniqui, naatimpa noanaquetajate ontaniqui namanaquiterita Aapani.

<sup>37</sup>Iriguenti itsipatsipaitanaca Peerero aisa mavite irijanite Severeo. Arikea ishimampojancavaetanacaquea Jesoshi, yatsipeshirentavaeca. <sup>38</sup>Icanqueriquea:

—Noshimampojancavaetaniganima jiroshipojishiatsi ometojavaetenanishiatyi, picancanija ocaniqui pintinajaventajiaquena.

<sup>39</sup>Iriatimpa yoanaque tiijacōnajisano ontaniqui igueroncaseta pojaca yamananaqueriquea Iriri icanque:

—Aapani, nonintavecaque paapitsatenarojate nantsipequempaca,<sup>o</sup> cotanquitsiquea teequea nonintenica onetsanaquempa nonintica naatimpa, iroguentiquea pinintica aviatimpa.

<sup>40</sup>Arikea yoanaji ichoocajiaquegueti itsatacaanejia, yamenajapijiri yojocanacani tin. Icantapojiri Peerero:

—¿Arimpate teequea pagavejajigueji osamanicoñaji pintinajajigueji pintsipajiaquename? <sup>41</sup>Pintinaje, aatoquea pimaajiguitsi. Pamanacoventajiaquempaja aatonijite ocovae-

guishetacaajianaquempitsi covaeguisherentsi. Aviatimpajia pinintajiaiveca pishirequi pinetsanamajajiaquero inintaguetica Aapani Irioshi, cotanquitsiquea teetarite pintampishijueji pitsinoqui.

<sup>42</sup>Arikea yoitsitanaja aisa yamanajiri Iriri, icanqueri: “Aapani, aatogueti agaveji opega aatoniji natsipetaro, iihtsja onetsanaquempa pininqueca.”

<sup>43</sup>Arikea icoraquevetapoja aisa yamenajapijiri yojocajianacani aisa tin, otiaavaetanacaritari pochoquirents.

<sup>44</sup>Yojquitsijianajariquea aisa, yoitsitanaja aisa yamanajiri Iriri, irootaque icanquitirica incajaranquitica. <sup>45</sup>Iroompaquea iteroncanaquerogueti yamananquerigue, icoraquetapoja jichoocajiaquegueti itsatacaanejia, icantajiaipojiri:

—Arisacanica picantacoguitani maaguitatsimpi magorejajianaquempi. Arejetapojaca iraacaantantajitaquempatica Irijanite Caquinte irimetojajiaqueri covaeguishejatsica. <sup>46</sup>Pincatintiitanaque, jamequetiro, jac coraquetapojojishiatsi aacaanquenaneca.

**Yajitaquerigueti Jesoshi**

(Mr. 14.43-50; Irc. 22.47-53; Jn. 18.2-11)

<sup>47</sup>Quenquetsatanatsitiraja Jesoshi, yarejetapojaca Jorashi, irioveca itsatacaane carajiavetanquitsica 12. Yamamirincatapojaqueri caquinteja itigarancajiaqueca saseroroteja anaantajianquitsica aisa jivajiguirica joriojia, yamashijiapijiri itsaampsantsameniritepae aisa inchaquiji.

<sup>48</sup>Iriraquea Jorashi, aacaanquerineca Jesoshi, itsatacitanacari iroaquera-gueti, icanqueri:

<sup>o</sup> **26.39** Icanquegueti Jesoshi *paapitsatenarojate nantsipequempaca* iroguenti ishimampojancacoma jatacaro incatarojitanaqueri igovaeguishere maasanojia caquinteguetananquitsica quericaca aventajiaquemparineca. Pamenero 1 Pe. 2.24.

—Quericaca nonintavorotapojaqueca,<sup>p</sup> iriotaquequea pinintajiaqueca, paajianaqueriqueate.

<sup>49</sup>Iroompaquea yarejetapojetiga iquempejitarojacari Jesoshi, icantapojiri:

—Tsatacaantantatsica, arisa pichoocataji.

Ariquea intintavorotsitari.

<sup>50</sup>Icantaritareua Jesoshi:

—Notsipavijitaca, iintsijate pinetsanaterote picoraquetashiqueca.<sup>q</sup>

Iroompaquea iriraquea tsipatsipaitanacarica Jorashi iquempejiquempejipojiri Jesoshi, yaitsitapojacari yajiriquitsitari.<sup>51</sup>Cotanquitsiquea chooca aparo itsipatamacaca Jesoshi yaitsitanacaroquea itsaampitsamsamenirite, itsopajitaro, iguempitarejitsitari yashintacaca saserorote anaantamajatanquitsica.

<sup>52</sup>Cotanquitsiquea Jesoshi icanqueriquea:

—Poguijaajerojate pitsaampitsantsamenirite. Quericaca avencaroca itsaampitsantsamenirite manaquea irimetojantsijitempariquea tsaaampitsamsameniri.<sup>53</sup>¿Arimpate tee pintateji naromegueti nintanquitsineme noncantanaquerime Aapani intigaranquimojiaquenarimequea irashivantijite incaramirincavaeque incanquempa irompejianaquenamequeate?<sup>54</sup>Cotanquitsiquea arimegueti nonquempetacaquemparomequea imaica, ¿querocaea oncoquempani onetsanatantanaquempaca Itioncacaantaquea Aapani Irioshi coramani otsavetacotsiquenagueti onquempetaquempa imaica?

<sup>55</sup>Iroompaquea Jesoshi ipitsocashijigari capiocajianquitsica, icanqueriquea:

—¿Arimpate naroguenti catsimari aapitsatantatsica pamashitantajiaque-

naca tsaampitsamsameniripae aisa inchaquiji paimentajianaquenani jite? Nocantacoguitanitari savincaguite ri qui notsipaguitimpini aviatimpajia ontaniqui oniganquirequi oticaacoroqui te temporo notsatacaantaguitini, tee quea paajiguena j. <sup>56</sup>Cotanquitsiquea oquejetantana caca imai ca meetsaniji onetsanamajatanquempaniji itioncaco jiaqueca tsavetantatsicani coramani qui itsavetacotsijiaquenagueti.

Iroompaquea maasano itsatacaanejia, itsinampirejajianaqueri Jesoshi.

**Yaajitanaqueriquea Jesoshi  
icapiocajiacaguetti maasano imajirotepae  
joriojia**

(*Mr. 14.53-65; Irc. 22.54-55, 63-71;  
Jn. 18.12-14, 19-24*)

<sup>57</sup>Irirajia aa jia querica Jesoshi yaajianaqueriquea Caipashiniqui. Iriatimpa iriguenti saserorote anaantamajatanquitsica. Arikea ichoocajia que orani qui tsatacaantajiguiroca itioncaco tana queca Moishishimi aisa jivajigurica joriojia, icapiocajiacaca. <sup>58</sup>Irira quea Peerero yoguijata covetana cari cotanquitsiquea impoiva etapojaque. Ora quea yarejetapojacarogueti pampatejijani qui qui itso virona quite qui saserorote anaantamajatanquitsica, iquijapoja que otanto qui, yamenajia pojiri coartajia quempoguijajiguiroca te temporo, savisavi ta que orani qui. Arikea isavica poji iriatimpa iramenacotimentava que riniji Jesoshi querocaca incojita querini.

<sup>59</sup>Irira quea saserorote jia ana antajian quitsica itsipajiacari maasano majironta jiatsica icajemaca antajia queri itsipapae tsojeventajia queemparineca Jesoshi cameetsanijite onchoocauenijite

**p 26.48** *Quericaca nonintavorotapojaqueca.* Yamejia ca joriojia coramani inintavorotava caajia vaca yamenava caajiacagueti. **q 26.50** *Irooca ocanque guiriego qui: Notsipavijitaca, étaaquea picoraquetashique?*

ompampiatantapoempaca irimetojanta-jitaquemparica.<sup>60</sup> Icoraquecaraqueiveta-pojaca yoshequivavetaca tsojeventajia-quemparineca, cotanquitsiquea irooqua icanque irooqua icanque, querocampate incobiaquerini, teenicate onchoocatenica. Iroompaquea icoraque-caraqueipoji mavite,<sup>61</sup> icanquequea:

—Naatimpajia noquemajiaqueri icanque: ‘Naatimpá nagavejaque nosoveaquero iteemporote Aapani Irioshi, ariquea nompeacaitajemparo, ontrespojajegueti savincaguiteri nontsitacantajemparo.’

<sup>62</sup> Arikea icatiitsitanaca saserorote anaantamajatanquitsica, icanqueriquea Jesoshi:

—¿Aatomba paquiri? ¿Taaquea opajita ocatica icantacojiaquempica iricajia?

<sup>63</sup> Cotanquitsiquea Jesoshi teequea incanteji. Icatsitajari aisa:

—Aatitarite pamatagatsi, inquemava-quempitari Aapani Irioshi anijatsica. Iintsijate pincamantenajate arimajagueti aviguentica Quirishitotatsica, Irijanite Aapani Irioshi.

<sup>64</sup> Icatsitanacaqueate Jesoshi:

—Pitampaticataquero. Jero aisa noncamantajiaquempi: oncoramanitapoja-jegueti pamenajiaqueriquea Irijanite Caquinte irisavicaque itincamijempe-qui qui’ Agavejamajatasica. Aisa pamenaji-avajeri inquenapojafe mararoqui.

<sup>65</sup> Arikeate icotanaca icatsimata-naque saserorote anaantamajatanqui-tsica, iperejitsitanacaroquea iitsaare sarararara,<sup>s</sup> icanque:

—Iricatica manaquea iquejemanatanaca-riquea Aapani Irioshi. ¿Arimpate ancogui-menquempari itsipapae cantacoquerineca? Jac pi quemajiaquerishinete iquejemanata-nacarigueti Aapani Irioshi imaica.<sup>66</sup> Iintsija querocaca pincantajigueni aviatimpajia?

Iriatimpajia icanquequea:

—Iquempetacaantaca, irimetojetashi-nete.

<sup>67</sup> Iroompaquea iquishoquishoavaeta-queriquea ivoroqui, icapocapovaeta-queri, aisa yapatompatovaequeri,<sup>68</sup> icantajiaqueriquea:

—ilintsijate, Quirishitotatsica, pintsatavaqueja taaquea capojaquempi!

**Peerero yomanacoqueriquea Jesoshi**

(*Mr. 14.66-72; Irc. 22.55-62;*

*Jn. 18.15-18, 25-27*)

<sup>69</sup> Iriraquea Peerero chocatiraja ichooque ontaniqui pampatejiji-ani-quiqui. Iroompaquea ocoraquepojaque aparo yomperajitaca ocanque:

—Aviatimpa aisa itsipapinitimpi Jesoshi Garireaquitica.

<sup>70</sup> Yomanacotanacaquea, icanquero:

—Tee notsatsitavaquempiroji.

Iquemitsijigariquea maasano choocajian-quitsica oraniqui.<sup>71</sup> Arikea yogaisvetanaja ontaniqui sotomorontsiqui amenitsitajari-quea aisaotsipa manquigarentsi, ocantsijiga-riquea choocajianquitsica oraniqui:

—Iricatica irio itsipavijire Jesoshi Nasarequitica.

<sup>72</sup> Yomanacotsitajaroquea, icanque:

—iTeequea nontsateriji irintatica! Namataacagueti incatsimatimentenarota-shia Aapani Irioshi.

r **26.64** *itincamijempequi qui*. Yamejiaca coramani iriraquea majirontatsica incajemajiaqueri ishineventamajatacaca irogusavisquitempari itincamijempequi qui, inquejemajironquempari iranaajiaqueri maasano itsipajia. s **26.65** Ari icojiaca joriojia, inquemaquerigueti itsipa inquejemanataquemparigueti Aapani Irioshi irooca incantaguishetaquerigueti, imperejitsitemparo iitsaare intsatantajitaquemparo icovaeguishemajataca. Otioncaca irira quejemanatanaquemparineca Aapani Irioshi irooca cantagushequerineca intsinaquitajitempari irimetojajiqueru.

<sup>73</sup>Incajaranquiquitetenajatigu i quempejiquempejiipojiri choocajianquitsica oraniqui, icantapoaqueriquea Peerero:

—Arimajaca piquejegonoroncari noquemitajavaquempiotari piquenquesaquegueti.

<sup>74</sup>Iriraquea Peerero icantsitanaja aisa:

—iNocanqueshinete tee nontsatimate-riji! Namataacagueti incatsimamente-narotashia Aapani Irioshi.

Icanquitigui, inijanaquea chaapa.

<sup>75</sup>Iquenquejitsitanacaroquea Peerero icanquerica Jesoshi incajaranquita: “Tequeratagueci irinijeji chaapa, pomanacoquenaquea 3.” Icatiitsitapanajantaquea isotoapanajanti, iraitsitanaca-quea ishimampojancamajatanaca.

**Yaajtanaqueriquea Jesoshi Piratoqui**

(Mr. 15.1; Irc. 23.1-2; Jn. 18.28-32)

**27** <sup>1</sup>Iroompaquea osavincaguitetanajigueti maasano saserorotejia anaantajianquitsica aisa jivajiguirica jorioja iquemavacaajiaca querocaca incojiaquerini Jesoshi irimetojacaantajiaquerigueti. <sup>2</sup>Iroompaquea yoishojianaqueri, yaajianaqueneriquea Pontsio Pirato yojocajiaipojaqueneri. Iriatimpairiguenti itigarancane Sesa, quejemajirovetacarica.

### **Imetojaquegueti Jorashi**

<sup>3</sup>Ariquea iriraquea Jorashi, aacaanquerica Jesoshi, itsaquegueti arimajaca irimetojacaanqueri, ishimampojancaca iquenquejitsitanacaro: “Aatomesano naacaantirime”, yoanaquequea ichoocajiaquegueti saserorotejia anaantajianquitsica aisa jivajiguirica jorioja, irojocajiajenerimequea iriratica 30 peratamentaqui, <sup>4</sup>icantajiajepojarí:

—Nocovaeguishemajataca, naacaantaqueritar teeca incovaeguishetimatempaji, imaicanishiati irimetojajiterinishiati.

Cotanquitsiquea iriatimpajia icantajia-vaqueri:

—Jmm. Avirosate quempetanquitsica.

<sup>5</sup>Ipishoncamirijaquipanajantiri intati imentaquitsite oraniqui intsompoguiqui teemporoqui, isotoapanajanti. Yoanaque itsatsotsita. <sup>6</sup>Iriraquea saserorotejia anaantajianquitsica icapiocamirijaquitariri, icanquequea:

—Icantimentantajitrotari anconavoncaquitavagerigueti yamajiaqueca itsipapae yojocajitinirica Aapani Irioshi, iringuetaqui ivergaratsitantacarica irimetojaquenijite.

<sup>7</sup>Iroompaquea iquemavacaajiaca irivegaratantajajemparoquea quepatsi pajitatsica Iguepatsite Peacaaguetaroca Chomopae cameetsanjite onchoocaque-nijite inquitatantajitapinitemparica quenaquenaitapojanquitsineca osamanipaequi. <sup>8</sup>Irootaquequea opariantanacaca oratica quepatsi opajitancaca Irajantsiguite arejevaecaquea imaica. <sup>9</sup>Oquejetacagueti imaica, onetsanamajatanaca icanquequea coramani tsavetantatsica Jeremiashini, icanque: “Iriraquea ishiraerijia iquemavacaajiaca irojocajiaqueneri aacaanquerineca 30 peratamentaqui, ariquea yaajiaqueri iriratica imentaquipae <sup>10</sup>ivegaratantajiacaroca quepatsi pajitatsica Iguepatsite Peacaaguetaroca Chomopae, irootaqueetari icanquenaca Nomajirote.”

### **Pirato icoacoqueriquea Jesoshi**

(Mr. 15.2-5; Irc. 23.3-5; Jn. 18.33-38)

<sup>11</sup>Iriraquea Jesoshi icatiimotapojacari quejemajirovetatsica, icoacotavaqueri:

—¿Arimajaca aviguenti Imajirote jorio? Icanque Jesoshi:

—Tampatica poaquero.

<sup>12</sup>Oraquea itsujeventajiacarigueti saserorotejia anaantajianquitsica aisa jivajiguirica jorioja, teequea incanteji Jesoshi.

<sup>13</sup>Icanqueriquea Pirato:  
—¿Arimpate teequea pinquemavaque-roji icantacojiaquempica?  
<sup>14</sup>Cotanquitsiquea Jesoshi tee incanti-mateji, jero yamenantanacaca quejema-jirovetatsica intati.

**Icanque irimetojajiqueru Jesoshi**  
(*Mr. 15.6-20; Irc. 23.13-25; Jn. 18.38-19.16*)

<sup>15</sup>Icantacoguitani aapojajagueti Paashicoa, iriraquea quejemajiroveta-tsica yoguipaquijajiri aparo isantanata-cotimentajiquerica ipeacaaguishetacaca, quericaca inintajiaqueca igonorojia iroguipaquijaje. <sup>16</sup>Arikea ichoocaque oraniqui aparo santanatacotanquitsica pajitatsica Varavashi, itsitacaguitejacovaetanaca oraniqui iquemacojitiri.  
<sup>17</sup>Iroompaquea yamenajiaquerigueti Pirato yomporoguijaventavaetapojacari, icanqueriquea:

—¿Querica pinintajiaqueca noguipaquijajempiri? ¿Irioca Varavashi, irioca Jesoshi icantajitica Quirishito?

<sup>18</sup>Itsquerotari iriatimpa iroguenti icatsimatacojiqueriquea yamenajiqueru-gueti iriguenti yomporoguijaventajica, irootaquequea yamantajiacarica iriatimpaqui.

<sup>19</sup>Choocatiraja isaviquiquea Pirato ontaniqui icantomajantapiniquegueti, otigarunquitsitari imanquigare camanquierineca:

—Aatoja querocaca picotirini iriratica teeca impeacaimatemtempaji. Natsipevaeca noguimaacotacarigueti incajaranqui.

<sup>20</sup>Cotanquitsiquea iriraquea saseroro-tejia anaantajianquitsica aisa jivajiguirica joriojia itsatacayaqueriquea maasano, incanqueri:

—Irioquea poguipaquijaje Varavashi, iriraquea Jesoshi pimetojacaanteritsijate.

<sup>21</sup>Icanquequea quejemajirovetatsica:

—¿Quericate pinintamajajiaqueca noguipaquijajeca? ¿Irioca Varavashi, iriocaja Jesoshi?  
Icajemitsijianacaquea:  
—iVaravashi!  
<sup>22</sup>Icanqueriquea Pirato:  
—Iroosacanica, ¿querocampate noncoque-rini iricatica Jesoshi icantajitica Quirishito?  
Icajemitsijianacaquea aisa maasano:  
—iPompajacoteri!  
<sup>23</sup>Icanqueriquea Pirato:  
—¿Taampate ipeacaaca?  
Icajemamajajianaji:  
—iPompajacoterishine!  
<sup>24</sup>Iroompaquea yamenavaquero-gueti Pirato icantacoguitani icajemaguitini, querocampate incojiavajerini, arikea icajema-caanque oja iquivavacotimojiacari maasano, icanquequea:  
—Irimetojajiquerigueti imaica, teequea naatimpa quejetatsineca. Aviguentijia quejejianquitsi.  
<sup>25</sup>Maasanopae icajemajianaquequea:  
—Aritaque nonquejetempata, naatim-pajia quejejianquitsineca aisa nirijani-jiate, naatimpajiaquea metojacaantajia-qurineca.  
<sup>26</sup>Arikea iquemajiaquerigueti Pirato yoguipaquijajjiniri Varavashi. Arikea icantacaantsitari-quea Jesoshi impasajitaqueri, irajaita-naqueri irompajacojiqueru.  
<sup>27</sup>Iriraquea igoaretajate quejemajiro-vetatsica yaajianaqueri Jesoshi intsom-poguiqui imapipancotequi, icantajitiro “Peretorio”, arikea icajemacaantajia-queriquea maasano irapicoaretajate, yomporoguijaventajiacariquea.  
<sup>28</sup>Iroompaquea isapoquitsijigari iiitsaare, iquitsaatantajiacari otsipa quitsaarentsi quityoncamorenari.  
<sup>29</sup>Yaajiaquequea tseitseiaro, ipeacajaia-canari iramatsaero, yamatsaetsitari. Aisa yajiricacaajiaqueri savoroquiji

itincamijempequiqui,<sup>t</sup> iroompaquea igueroventajianacari ishirosirontimentajianacariquea, icanqueri:

—iIricashia Imajirote jorio!

<sup>30</sup>Iquishoquishoavaequeri, yaapitsatsijiajari savoroquiji itavatavaatsitantari iguitoqui.

<sup>31</sup>Iroompaquea iteroncajajianaquerogueti ishirosirontimentavaecariqueti, isapocarejajiri quityoncamorenari, irooqua ea iquitsaatantajari iitsaare, yaajianaqueri irompajacoji-aqueri.

### Yompajacojiaquerigueti Jesoshi

(Mr. 15.21-32; Irc. 23.26-43; Jn. 19.17-27)

<sup>32</sup>Oraquea yoayoaitanaquegueti irompajacojiaqueri, itonquivojajavacari aparo Shirenequitica pajitatsica Shimo. Iriraquea coaretajia icantajiavaqueri irinatasshitanaqueriquea Jesoshi igoroshite. <sup>33</sup>Ariuea yarejerejeitacaquea Gorogotaniqui, (ocanqueuea, “Ochoocatigueti Shocoitontsi”). <sup>34</sup>Yojocajiavetacanari vinoja iconoajatantajicaro ishincanajato, yatsirecajavequitaro intati, teequea irimiremparoji. <sup>35</sup>Iroompaquea iteroncajajiqueroguetiquea yompajacojiaquerigueti, iriraquea coaretajia ipegavijijiaca intsajiaquenijite quericaca ashinqueunparoneca iquitsaaguevecaca.<sup>u</sup> <sup>36</sup>Ariuea isavisiuque oraniqui yamenajiaqueriquea. <sup>37</sup>Ojenoquipojaquegueti ishinqireguishi-pojacagueti ipatacajitaqueroquea ogota itioncajiquero ocanque: “Iriguenti Jesoshi, Imajirote jorio.”

<sup>38</sup>Aisa itsipatacaantajicariquea mavite aitsitantatsica yompajacojitaqueri,

aparo yogatiacojiqueritincamijempequiqui, iriraquea itsipa iroguentiyogatiacojiquerisishinampijempequiqui.

<sup>39</sup>Iriraquea avisavisaitanquitsica oraniqui injashinatacari icantajianaque chaguito chaguito, <sup>40</sup>icantajiaqueriquea:

—Arimpate picanque: ‘Nosoveaqueroquea iteemporote Aapani Irioshi, ariuea nompeacaitajemparo, nontsitacajero 3 savincaguiteri.’ Imaicaquea iiintsija pompetanaquempajate. Arimajagueti aviguenti Irijanite Aapani Irioshi, pintospajacotanajempaja paguijitarojo.

<sup>41</sup>Ariuea iquempejjaca saserorotejia anaantajianquitsica itsipatsipaicari tsatacaantajiguiroca itioncacotanaqueca Moishishini aisa jivajiguirica jorioja, ishirosirontimentavaetacari icantava-cajiajaca:

<sup>42</sup>—Arimpate yompeguetacari itsipapae, cotanquitsi teequea iragavejempaj irompetacotanaquempsiriatimpa. Iriovetaca Amajirojiate ishiraerijia, iiintsija intsopajacotanajempaja coroshipui iraguijipojaje, antsatantaquemparica ariguea antsaroventajianaquempari.

<sup>43</sup>Yaventaguitarinitarite Aapani Irioshi, iiintsijate irompetemparija imaica arimajagueti ipintsacari, icanquetarite: ‘Naroguenti Irijanite Aapani Irioshi.’

<sup>44</sup>Iquejequejeitanaca aisa itsipatacaantajicarica yompajacojitaquerigueti, icantacantaguishevaetaqueri.

### Imetojanaquegueti Jesoshi

(Mr. 15.33-41; Irc. 23.44-49; Jn. 19.28-30)

<sup>45</sup>Iroompaquea itampaticavepojaca catsirinaiteri, ocantanaque pitsec

<sup>t</sup> 27.29 Yajiricacaajiaquerigueti savoroquiji itincamijempequiqui, manaquea iquejetacaavetari majirontatsica yajiriquirogueti imajirontamento. Icanquero quimajareri *cetre*.

<sup>u</sup> 27.35 iquitsaaguevecaca. Irooca icantacotaque isavoguinaro, igaviguitire, ichompimashite, aisa yogatacacaca, ocarataque 4. Chooca aparopae paperi iguenquetsatsarequi guiriegopae, yogavijiquero ocaniqui, ocanque: *onetsanatimentanaquempanji icanqueca tsavetantatsica icanquegueti: Yaagarantajiaquero noitsaare, ipegavijijiaca intsajiaquenijite quericaca ashinqueunparoneca* (Sar. 22.18).

maasano quepatsi, arejetacovaeca ijaguitetanajigueti.<sup>46</sup> Ariqueate icotanaca iririjencavaetaque Jesoshi, icanque: “Elí, Elí, ¿lama sabactani?” (Oncanqueua: “Aapani Irioshi, Aapani Irioshi, ¿queroquea ococani pojocanta-naquenaca?”)<sup>v</sup>

<sup>47</sup>Iconoajiacaca choocajianquitsica oraniqui irooqua iquemajiaquerigueti icantajianaque:

—Icajemaqueri tsavetantatsica Iriashini.

<sup>48</sup>Ishiitsitanaca aparo, yaanaquequea atsimijicajatiroca oja, iticajatsitaro vinoja cachonerontoquijajaro, yoguitinajacotsivetenari savoroquijiqui irantsimijicajatavaquerome.<sup>49</sup>Cotanquisquea itsipajia icanqueriquea:

—Iintsjate amenajiaqueritaja incoraquetashipojeri Iriashini iroguiso-aancajeri.

<sup>50</sup>Arikea icajemanaji aisa Jesoshi iririjencavaetaque, arikea yoguipa-quijapanajantiro ishire metoc.

<sup>51</sup>Irooqua imetojanaquitigui, ariqueate oco tanaca operejanaque omorena ticaamorenatanquitsica te temporoqui jocagatsica aatonijite iquijajitrotsi intsompoguiremajaqu. Opecotarejanaque tam paticaquea niganquisano ocantanaque sararararara, oquenapoqijuea jenoqui arejevaetaquea isavi. Omoguequitanaca quepatsi moguec moguec moguec, otsecaguetan quequea mapitsentseina.<sup>52</sup>Arikea ocoguetanaca quea omoroguetanaca iquitajiguitirigueti metojaripae, itancore-tancoreitanaque icaramirincavaeque igomajamajarejia Aapani Irioshi metojajia-vetanquitsica.<sup>53</sup>Arikea isotosotoitantanajaro omoropae, iroompaquea ipochatanajigueti Jesoshi, yoayoaitanaque iriatimpajia Jerosarequi, oratica quinteninintsi

yashincaca Aapani Irioshi, yamenajiavajiri icaramirincavaeque choocajianquitsica oraniqui.

<sup>54</sup>Iriraquea imajirojiate coaretajia aisa itsipatsipaitashijiacaca yamenajiavajiri-gueti Jesoshi, yamenajiavaquerogueti omoguecaguetanaquegueti, aisa otsipapae cantashitatiaguetanquitsica, itsarotsaroitsitanacaquea, icantajiaque:

—Arimajaca iriguenti Irijanite Aapani Irioshi.

<sup>55</sup>Arikea ochoocajiaque oraniqui omporoguijaca manquigarentsijia oguijajuijaiquerica Jesoshi iquenapojo-gueti Garireaqui amitacojiaqueriniji. Iroatimpajia manaquea ochoocajiaque tijaicoñajisano ontaniqui amenamenai-queri.<sup>56</sup>Arikea ochoocajiaque aisa oraniqui Maria Magararaquitica, oraquea otsipa Maria iriniro Santiago aisa Jose, oraquea aisa iriniro irijanijiate Severeo.

### Yyoquijitajitajari Jesoshi imperitamoroqui

(Mr. 15.42-47; Irc. 23.50-56; Jn. 19.38-42)

<sup>57</sup>Iroompaquea ijaguitemajatanajigueti, icoraquepoji aparo ajaarantatsica pajitatsica Jose quenampajaroca Arimatea. Ari iquejeca iriatimpa ipeanaca itsatacaane Jesoshi.<sup>58</sup>Iriatimpa yoashitanaqueriquea Pirato, icanqueriquea ininque irajaitana-jero itsino Jesoshi. Iriraquea Pirato icantacaantsitari irojocajitajeneri.

<sup>59</sup>Arikea yaanajiro Jose itsino Jesoshi, yampiguiricacotantanacari iniomorena shipetari teeca oncataiteteji ipeacaajitaca irino.<sup>60</sup>Iroompaquea yaanajiri yyoquijitajiri imperitamoroqui iroqueramorotica iqueecacaanontacaca mapichonquiinaqui irojoquijitajitajemparica iriatimpa

<sup>v</sup> 27.46 Elí. Iroguenti iguenquetsatsare evereo. Iquemaquero o quejevetacaro ivajiro Iriashi iguenquetsatsarequi, icanqueritari Elías. Icanquegueti *lama sabactani?*, iroguenti iguenquetsatsare arameo.

irimetojaquegueti. Ariquea itigaritashitan-tacari inirotsentseina mapi, iticaacotanta-panajantari, yoanaji.<sup>61</sup> Arikea ochoocaj-i-que oraniqui Maria Magararaquitica aisa otsipa Maria osavisaviique oraniqui itampaticatacotaquegueti yojoquijitajiri-gueti.

**Coaretajia quempoguijajavetacaroca  
yojoquijitantajivecarica Jesoshi**

<sup>62</sup>Iroonpaquea osavincaguitetanaque-gueti imagorejantajitaca,<sup>w</sup> iriraquea saserorotejia anaantajianquitsica aisa pariseoja yoayoaitanaquequea iramena-jajateri Pirato.<sup>63</sup>Icantajiajapojiri:

—Nomajirote, noquenquejajajiroquea icanqueca irintatica amatavijantatsica anijatirajagueti, icanquequea: ‘Apajajem-pagueti 3 savincaguiteri nompochatanaje-quea.’<sup>64</sup>Irootaquequea noncantantaquem-pica, iintsija pintigaranquequea coaretajia inquempoguijamajajiaqueri yojoquijitanta-jicarica avisanaquegueti 3 savincaguiteri, aatonijite icoraquetashijiguiritsi itsataca-anejia iraajajateri, iroonpa incantajiguera maasano jac pochatanaji. Ariguettequea inquempejiaquempagueti imaica ocatica tsobjetsi caaviji anaavaequero otsipa yamatavijantaquegueti.

<sup>65</sup>Iriraquea Pirato icanqueri:

—Iroosacanica iintsijate, jeri irirajia coaretajia, poapoaitanaquequea pinquempoguijamajajiaquerija aviatim-pajia querocaca pincojiaqueroni yojoquijitantajicarica.

<sup>66</sup>Iriatimpajia yoayoaitanaque yojoquijitaquerigueti Jesoshi, iseyotsi-taro mapi yashatirijacontajicarica, arikea icantajiaqueri coaretajia inquempoguijamajajeroja aatonijite quericaca coraquetashitimatiirts.

**Ipochatanajigueti Jesoshi**  
(Mr. 16.1-8; Irc. 24.1-12; Jn. 20.1-10)

**28**<sup>1</sup>Arikea anaanacagueti imagore-jantajitaca,<sup>x</sup> osavincaguitetama-naji pariopojaroca semana, oraquea Maria Magararaquitica aisa otsipa Maria oahoaitanaquequea amenajajatero yojoquijitajitacarica.<sup>2</sup>Oraquea tequera-tagueti arejerejeimpaji, omoguecanaque-quea quepatsi moguec moguec, icoraquepoji irashivantite Amajirote iquenapojoquea inquitequi. Itigaritapojiro mapi iticaacotantajivetacarica Jesoshi, isavicapopojiro.<sup>3</sup>Itsirencavaequequea icanca quempevaecaquea caret. Oratica iitsaare quitamaromajatatiquinimaja quempetaca-queate oquitamarotigueti sharaca.<sup>4</sup>Irirajia coaretajia iroquea yamenajiavaquerigueti arikea icohicoitanaca itsaroamajajia-naque yompioncajanaca pion, pion, pion, itejatejaitanaquequea ijatacojiaquiti.

<sup>5</sup>Iroonpaquea arejerejeivetapojaca manquigarentsi, icantajiguiro irashivantite Aapani Irioshi:

—Aatotarite pitsaroajiguitsi.

Notsaquequea iriguenti pamenuaguejate Jesoshi yompajacojivecaca.<sup>6</sup>Cotanqui-tsiquea teequea inchoocatajeji acaniqui, pochatanaji, aritarite icanque iriatimpa tequeratagueti irimetoeji. Intsijate caacatejate pameneroja yojoquijiveca-rigeri. <sup>7</sup>Pishintsijianajeja pincamanta-pojerija itsatacaanejia pincantajigue: ‘Jac pochatanajishiatsi. Imaica iroanaquequea Garireaqui, iriquetiquea oananquitsine. Pamenajiajapajeri ontaniqui.’ Irootaque nocamantaquem-pica.

<sup>8</sup>Irooquea oquemajiaavaquerigueti otsaroajianaquequea, cotanquitsiquea

w 27.62 *imaginejantajitaca*. Irirajia joriojia imaginejantaro savincaguiteri saavar.

x 28.1 *imaginejantajitaca*. Irirajia joriojia imaginejantaro savincaguiteri saavar, irootaque oteroncampojaja semana. Otsipa semana oparianaja tomincoqui.

oshinejiana aisa. Ocampanajantatigui tapoc oshintsjianaji oncamantapoja- queri itsatacaanejia.<sup>9</sup> Iroompaquea itonquivojajivacaro Jesoshi quenavo- quirontsiqui icantajavaquero:

—¿Choocampi?

Oquempejiquempejitanacari ajiricaguititsitari otsaroventanacari.

<sup>10</sup>Icantajauqueroquea Jesoshi:

—Atoquea pitsaroguitsi. Poapoaita- naquequea pincamanqueri iguentije- guipae<sup>y</sup> iroaroaitanaque Garireaqui. Ontaniquiquea ari iramenajapijajenae.

#### Itsavetantavecaca coaretajia

<sup>11</sup>Irooqua oahoaitanaquegueti manquigarentsijia, iconoagarantajiac a coaretajia quempoguijajavetacarica Jesoshi manaquea yoayoaitanaquequea Jerosarequi, icamantajapijiri saserorotejia anaantajanquitsica maasanopae.<sup>12</sup> Iriatimpajia icapiocajiac a itsipatsipataci jivajiguirica joriojia, iquemava- caajiac a, yojocajauqueneri coaretajia caraquisequi imentaqui,<sup>13</sup> icantajavaquero:

—Aviatimpajia iroguenti pincanque: ‘Oraquea opitsecanaquegueti naatimpajia nomajajiana que, iroompaquea icoraquetashijiaqueri itsatacaanejia yaajapanajantiri.’<sup>14</sup> Arigueti inquemegueti quejemajirovetatsica noshineta- caajiaquempari aatonijite querocaca icotimajiguimpitsi.

<sup>15</sup>Iriraquea coaretajia yaajianaqueri- quea imentaqui, yoayoaitanaque inetsanajiaquero icanquerica. Ariquea

iquemacojiaquero maasano joriojia itsavetantavecaca, otsitacaguitejacovae- tanacari, ocantacoguitani arejevaetaca imaica.

#### Jesoshi icanqueri itsatacaanejia

##### intsavetacojiaqueri

(Mr. 16.14-18; Irc. 24.36-49; Jn. 20.19-23)

<sup>16</sup>Arikea yoayoaitanaquequea Garireaqui itsatacaanejia carajianqui- tsica 11, yoayoaitanaque otsempiqui icanquerica Jesoshi.<sup>17</sup> Arikea yamenajapijirigueti, utsaroventajianacari, cotanquitsiquea iconoagarantacaquea iquenquejashirentajianaque: “Iriocaja.”

<sup>18</sup>Cotanquitsiquea Jesoshi iquemepi- quempejipojiri, icanqueriquea:

—Icanquenaquea Aapani Irioshi paesatoniqui: ‘Imaicaquea aviatimpa aviguenti agavejaguetaqueroneca maasanopae inquitepaequitica aisa quepatsipaequitica.’<sup>19</sup> Irootaquequea imaica nocantantajiaquempica poapoaitanaque pintsavetantimojia- naquerija maasano caquinteugueta- tsica, pintsaroventacaajianaquempari- jate cameetsanjite impejajianaquem- panijite notsatacaanejia. Ariqueate pivinacajajiaqueri ivajiroqui Aapani aisa Irijanite aisa Ishire.<sup>20</sup> Pintsata- caajiaqueri inquemisantamajajiaquero maasanopae nocanquempica irinetsa- namajajiaqueronijite. Noncoquem- pinequa nontsipamajataquempi oavaetanaque savincaguiteriqui arejevaequemparoqua onteroncana- jempagueti quepatsi.

y 28.10 Icanquegueti Jesoshi *iguentijeguipae* iriguenti icantacoque itsatacaanejia. Pamenero otsapa 7, jero aisa Mt. 12.48-50.

# QUENQUETSATSARENTSI OGANEJENCATATSICA ITIONCAQUECA

## MARICOSHI

### Antsatantaquemparoca

Ocatica iroguenti antsatantaquemparoca itioncaqueca Maricoshi itioncacotaquerigueti Jesoquirishito. Maricoshi iriguenti jorio, irio ijitan Verenave (Cor. 4.10). Iriniro opajita Maria. Iconoagarantajiaca tsaroventajiacarica Jesoshi icapiocapinijiaca otsovironaquitequi (Ya. 12.12). Maricoshi aisa ipajita Joanca. Itsipajiacari Paavoro aisa Verenave iquenaguetanaquegueti quepatsipaequi (Ya. 12.25; 15.37-39). Iquenquejajitaque itioncaquero ocatica ichoocaquegueti quinteninintsiqui pajitatsica Iroma. Maricoshi tee intsipatempariji Jesoshi. Iquenquejajitaque arica Shimo Peerero itigarancane Jesoshi itsatacaaqueri yantaguetaqueca Jesoshi. Tee intsajiteroji ajagantsini itioncaquerogueti, cotanquitsi chooca quenquejanquitsica itioncaquero tequeratagueti intioncrajiteroji Mateo, Irocashi aisa Joanca, arica ajagantsini 57 irooca otsipa ajagantsini arejevaetacaro 63.

Maricoshi iroguenti itioncaque antsatantamajaquemparica irira Jesoshi iriguenti quejecarica aajanirentsi amitacotantatsica yantaguetaquero inintaguetica Iriri tigarancaquerica. Iriovetaca jorio cotanquitsi itioncajiaqueneri teeca irio jorijoja intsatantajiaquempaca irira Jesoshi irio agavejamajatatsica yanaajiaqueri maasano agavejavetatsica, yantaguetaquetari oacaantantatsica intati, yoguisotoaguequeri ampatsinipae, aisa ipeacotsijajari caquinte igovaeguisherejia. Iparianacarogueti Maricoshi itioncacotaqueri Jesoshi iquenquevaritapojojigueti Jesoshi, yoviñacajataquerigueti Joanca Viñacajatantatsica.

---

**Joanca Viñacajatantatsica**  
**itsavetantavaequequea**  
**oquitamampororoitapojaquegueti**  
(Mt. 3.1-12; Irc. 3.1-9, 15-17; Jn. 1.19-28)

**1** <sup>1</sup>Jero oparianaca Quenquetsatsarentsi Oganejencamajatatsica tsavetacotaquerica Jesoquirishito Irijanite Aapani Irioshi.

<sup>2</sup>Iriraquea tsavetantatsica Isaiashini itioncacotaqueroquea paesatoniqui icanqueca Aapani Irioshi iquenquetsatcaaquerigueti Irijanite, icanqueriquea:  
“Ari nontigarancaqueri iriquetica oananquitsineca, intsavetacotempi.  
Irio camantajiaquerineca igonorojia querocagueti pinquenanaqueni

irinetsanatashitantajiaquem-pica.”<sup>a</sup>

<sup>3</sup> “Inquenquetsataquequea  
oquitamampororoitapojaque-gueti iririjencani, incanque-quea:

‘Pinetsanatashijiavaquempari Amaji-rote inquenantapojempaca,  
pintanarejagueteneri iguenavoqui-ropae ontampaticapoquitanta-naquempaca.’”<sup>b</sup>

<sup>4</sup> Iroompaquea iriraquea Joanca Viñacajatantatsica yoanaquequea ontaniqui oquitamampororoitapojaque-gueti iviñacajatantavaequequea, aisa itsavetantavaequequea icanque:  
“Pincantashitatijianaajempa povashian-tajianajero pipeacaaguisejiavecaca, piviñacajajianaquempaquea aatonijite icatsimativentajiguimpiroquea Aapani Irioshi maasanopae pigovaeguisherejia, manaqueate irishetajempiroquea.”

<sup>5</sup> Icaramirincatashivaetanaqueriquea Joreajaquitica aisa Jerosarejaquitica. Irooquea iquemajapijirigueti ariquea icohicoitanaca itsaveacojianaqueroquea maasanopae igovaeguisherejia, ariquea iviñacajajiaqueriquea Jororanequi.

<sup>6</sup> Iroguenti iquitsaataca Joanca quitsaarentsi ipeacaajitacaca imae cameyo, aisa ichompimashitacocariea imeshinatsa. Iriguentiquea ishecataca quejevetarica shapipiiquit aisa earotoja.

<sup>7</sup> Ariquea itsavetantajianaqueri icanqueriquea:

—Irooshipojiquea incoraquepojaque impoitapojenaneca. Iriatimpa caaviji yanaaquaenaequa yagavejamajati. Aatotarite noquempetimataritsi iriatimpa nompeaquempame amiquerineca nosavincanaqueme noishorejaco-querime igaviguitire, caavijitari

yanaamajaquena. <sup>8</sup> Naatimpa iroguenti nantaque noviñacajatantajiaquempiro oja, cotanquitsiquea iriatimpa inquem-petacaantaquemparo iroviñacajatantaji-aquempi Ishire Aapani Irioshi.

### Iviñacajajiqueriquea Jesoshi (Mt. 3.13-17; Irc. 3.21-22)

<sup>9</sup> Arikea isotoantanacaroquea Jesoshi Nasare choocatatsica Garireaqui, icampo-jaca ichooaquegueti Joanca, arikea iviñacajatavaqueri Jororanequi. <sup>10</sup> Arikea yarejevetapojajaro Jesoshi otsapijapoja-queti, yameniroquea otanarejanacaquea inquite yampiguircashipojacariquea Ishire Aapani Irioshi iquejetapojacari emoren.

<sup>11</sup> Iroompaquea iquenquetsajencajitanaque jenoqui inquitequi, icanque:

—Aviguentiquea Irijani nopintsamaja-tacaca, noshineventamajataquemiquea aviatimpa.

### Inintavecaquea ampatsimi irantacaquerime Jesoshi teeca iriminteji Aapani Irioshi (Mt. 4.1-11; Irc. 4.1-13)

<sup>12</sup> Iroompa iriraquea Ishire Aapani Irioshi yaanaqueriquea Jesoshi osamani oquitamampororoitapojaquegueti. <sup>13</sup> Arikea ichooaqueguetiquea oraniqui 40 savincaguiteri iconicari shecatantaguetatsica. Iriraquea Satanashi icoraquetashiqueriquea yaseresere-taqueriquea yamenantavetacari inintaveca-quea irantacaquerime teeca iriminteji Aapani Irioshi, cotanquitsiquea teatarite iragavejeriji. Iroompaquea irioquea coraque-coraqueitashipojajiri irashivantijite Aapani Irioshi yamijiapojaquiri.

### Itsavetantavaetaquequea Jesoshi Garireaqui (Mt. 4.12-17; Irc. 4.14-15)

<sup>14</sup> Arikea isantanatacojitaquerigueuti Joanca, yoanaque Jesoshi Garireaqui

**a** 1.2 Mara. 3.1.   **b** 1.3 Is. 40.3.

itsavetantavaetaqueroquea Quenquetsatsarentsi Oganejencamajatatsica tsatacaacajica quero icocani Aapani Irioshi imajirontagueti. <sup>15</sup>Icanque:

—Imaicaquea aapojaca irinetsanantan-taquemparoca Aapani Irioshi icantaqueca coramani, irooshipoji irimajirontapojempa. Povashiantajiana-jeroja covaequisherentsi pincantashitati-ajianajempa, aisa pinquemisantajigue-roja Quenquetsatsarentsi Oganejenca-majatatsica.

**Jesoshi icajemajiaqueri 4**  
**tarajatapinijiatsica impeacaajiaquempari**  
**itsatacaanejia**

(Mt. 4.18-22; Irc. 5.1-11)

<sup>16</sup>Ariquea icantanacaquea Jesoshi oraniqui ishitaravijatanacaro otsapijaqui niromotija Garirea jmm. Inejajiapojiri-quea Shimo aisa iriguentijeguite pajitatsica Antirishi tarajajanatsiquea, irootaquequea isavicaventajiaquequea iriatimpajia. <sup>17</sup>Icantajiapojaqueri

Jesoshi:

—Jame poguijaguijaitanaquenajate, imaicaquea irioquea pimpitsocashijiana-quempa caquintejia, nagavejacaajia-quempiquea pinquejetacaaajiaquempari shima panquitacojiguirigueti.

<sup>18</sup>Ariquea iriatimpajia yojocapanajan-tiroquea imantsatsitepae yoguijaguijataqueriquea.

<sup>19</sup>Yoayoavetanacaquea tijacoñaji ontaniqui irioqueate yamenapoji Santiago<sup>c</sup> aisa iriguentijeguite pajitatsica Joanca savisaviitaque quenajarontsiqui inetsanajiaqueroqueate imantsatsitepae. Itsipatsipataci iriri pajitatsica Severeo. <sup>20</sup>Ariquea iriraquea Jesoshi icampojiriquea Santiago aisa Joanca:

—Jaame poguijaguijaitanaquenaja. Iriatimpajia yoguijaguijaitanaqueriquea Jesoshi, yojocanaqueriquea iriri quenajarontsiqui, itsipajiajari amijiaque-rica.

**Caquinte ishaquiacaca ampatsini**

(Irc. 4.31-37)

<sup>21</sup>Arikea yoayoaitanaque Caperenoqui. Oraquea aapojacaguetai savincogui-teri imagorejantajitaca yoanaque Jesoshi shinagogaqui icapiocantajiacaca joriojia iparianacaroquea itsatacaanta-naquequea. <sup>22</sup>Iquemajiaavaqueriguetai-quea maasanopae yamenamenaitana-quequea intati, yamenajiaqueritari itsatacaajiaqueriguetai chooquea iragavejane, teequea inquempejiguem-pariji tsatacaantajigueroca itioncacota-naqueca Moishishini. <sup>23</sup>Arikea ichoocaque oraniqui ishinagogatequi aparo shirampari ishaquiacaca ampatsini, arikea iriatimpa icajemaque icanke:

<sup>24</sup>—iAriotaqueshiatsi, Jesoshi Nasare-quitica! ¿Querocaquea pincojiaquenani? ¿Irooquea picoraquetashique pinteron-cajiaquena? Notsaquempiquea aviguenti Iriomajaca irashi Irioshi.

<sup>25</sup>Icantanaquequea Jesoshi:

—iPisanticote! iPisotoanajeri!

<sup>26</sup>Irooquea iquemaqueriguetai ampatsini arikea icotanaqueri ishaqui-acaca icantavaetanaquequea tinquinini, tinquinini tinquinini. Iroompaquea icajemapanajanti ampatsini ijeeee! isotoanajiri. <sup>27</sup>Maasanojia yamename-naitanaquequea intati icoacotavacaajinaca:

—¿Taashia opaji ocatica? Ocantashi-tatiacatarite itsatacaantapojica, chooca-

<sup>c</sup> 1.19 Santiago. Iguenquetsatsarequi guiriego ipajita *Iakobos*. Iconoagarantaca quimajareri yuguipitsociquerogueti ivajiro ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*.

quea iragavejane. Icantaquerigueti ampatsinipae, ari iquemisantajiaqueri.

<sup>28</sup>Iroompaquea maasanojia guinteniquinteniitanquitsica Garireaqui iquemacojaqueri Jesoshi.

**Jesoshi yogueshitajiroquea  
ivaguiri temajaca Shimo Peerero  
(Mt. 8.14-15; Irc. 4.38-39)**

<sup>29</sup>Arikea isotosotoitanajigueti shinagaqui, yoanaque Jesoshi itsovironaquitequi Shimo aisa Antirishi, itsipatsipaitanacari Santiago aisa Joanca. <sup>30</sup>Oraquea ivaguiri temajaca Shimo ocatsirincavaetaquequea ojoquijica intsompoguiqui. Irooquetae yarejetapojacaguetai Jesoshi icamantajitavaqueruea. <sup>31</sup>Iriatimpa iquempejipojaro yacatsavacopojiroquea yogatititaro. Arikea ocopanajantaquea opeanaja taampina. Arikea ojocacojaijiniruea irishecajiaquempaca.

**Jesoshi yogueshiguetajiri icarajiavaeque  
joquijijianquitsica  
(Mt. 8.16-17; Irc. 4.40-41)**

<sup>32</sup>Arikea itsoguenancanajigueti catsirincaiteri yamajiapojiniruea Jesoshi maasano joquijijianquitsica iriguentica aisa ishaquijiacaca ampatsini. <sup>33</sup>Maasano guintenijianquitsica oraniqui icaramirincaequequea sotomorontsiqui. <sup>34</sup>Iriraquea Jesoshi yogueshiguetajiriquea cantashitatiajencatas higueracara joquijirentsipae, aisa yoguisotojaijiniri ishaquijiacaca ampatsinipae. Iriraquea ampatsinijia itsajiavaqueruea, jero Jesoshi icantantajiacavarica:

—Aatoja pitsavetacotantajia pojanatsjate.

**Itsavetantavaetaquequea Jesoshi  
shinagogapaequi icapiocantajiacaca  
joriojia  
(Irc. 4.42-44)**

<sup>35</sup>Osavincaguitetanajigueti ogantagatiraja opitsepitseiti, icatianacaquea

Jesoshi, yoanaque ontaniqui osamani, yamaniqueriqueate Iriri. <sup>36</sup>Incajaranquitanaquitiguiquea yoanaque Shimo incoaguetajeriquea itsipatsipaitanacari itsipavijitaca. <sup>37</sup>Arikea yamenajiajapojiri icantajiajapojiri:

—Maasanojia icoaguetajimpi.

<sup>38</sup>Cotanquitsiquea iriatimpa icanqueruea:

—Jaame ontaniqui irooshiguetapojiguetai iguinentipaequi nontsatacayaqueri, irootaquequea nocoraqueta-sique.

<sup>39</sup>Yoanaquequea Jesoshi itsitacanaqueroquea maasanopae Garireaqui itsavetantaguetanqueroquea shinagapaequi icapiocantajiacaca joriojia, aisa yoguisotojaijiniri ishaquijiacaca ampatsinipae.

**Jesoshi yovejairi avejancari**

*(Mt. 8.1-4; Irc. 5.12-16)*

<sup>40</sup>Arikea icoraquepojiquea aparo avejancari. Iguerovempojari icanqueruea:

—Nomajirote, arigueta pininque, pagavejaque piveajena navejancavejancaagueti.

<sup>41</sup>Ipintsatacotanacariquea Jesoshi, icantajempequitanaaca ipamitsitari, icanqueri:

—Jeeje, noninque. iPimpeanajempaja!

<sup>42</sup>Irooquetae icanquitiguiri jac peanaja yavejancavejancaavecagueti, caramajatanaji.

<sup>43</sup>Arikea itigarancajiriquea Jesoshi, cotanquitsiquea icantavajiri:

<sup>44</sup>—Aatoja picamantitsi. Iriguentiquea poimotanaque saserorote ponigaapo jempariquea, paanajenerija viratsipae, pinetsanaqueroja icantaqueca Moishishini cameetsanijite iramenamajauempinijite, arikea incanquempi peanajimpi, intsajiaquempi-nijite maasano peamajatajimpi.

<sup>45</sup>Cotanquitsiquea iriatimpa yoanaquequea icamantajiaqueriquea maasano yogueshitajirigueti Jesoshi. Irootari caarica yoantanta Jesoshi ontaniqui iguinentijiacagueta caquintejia. Manaquea iquenagueta-naque osamanipaequi teeca iriguentejjiguempaji, cotanquitsiquea yoayoaita-shivaetanaqueri osamanipaequitica iramenajiaqueri.

**Jesoshi yogatiajirigueti teeca ironquempaji**  
(Mt. 9.1-8; Irc. 5.17-26)

**2** <sup>1</sup>Iroompaquea ocaraguitejavaetana- quegueti yoanajiquea Jesoshi Caperenaoqui. Maasanojia iquemacoja- queriquea arirea ichoocaque oraniqui tsovironaquiqui imaantapinitacaca. <sup>2</sup>Irooqua iquemacojaquerigueti yoayoaitanaque yomporoguijaventana- cariqueate oraniqui intsompoguiqui aisa sotsiqui. Querocampate incojiaquem- pani inquijaquijaquegueti itsipapae, jocajajiavaecaquea icaramirincavaeque- quea igonorojia. Iriatimpa itsavetantaji- aqueneri Quenquetsatsarentsimajaca. <sup>3</sup>Arirea icoraquecoraqueiquequea 4 shiramparijia yamacojapijaoqueri teeca ironquempaji. <sup>4</sup>Yarejejivapetapojaca iriguenti poncaquini icanca, querocam- pate incotacajaianaquemparini inquija- caantajianaquemparicte intsompo- guiqui ichoocaquegueti Jesoshi. Yataitaiitanaquequea jenoqui sotsiqui ocantamencotacagueti, imorotsitaro- quea itampaticataquegueti Jesoshi ivaritsantsajacojiaqueriquea. <sup>5</sup>Iriraquea Jesoshi yamenajiavaquerigueti yaventa- jiapojacari irogueshitajeriniji, icanneri- quea teeca ironquempaji:

—Irijani, jac shetacotajimpi maasano pipeacaagushevecaca.

<sup>6</sup>Arirea ichoocajiaque oraniqui tsatacaantajiguiroca itioncacotanaqueca Moishishini. Iriatimpajia iquenquejajia- naque intati: <sup>7</sup>“¿Queroquea icocani icanquegueti imaica? Manatari iquejemanatanacari Aapani Irioshi. ¿Arimpate choocampate itsipa agavejan- quitsineca irishetsitantaqueroquea covaeguisherentsi? Aparotarite agavejatsi Aapani Irioshi.”

<sup>8</sup>Cotanquitsiquea Jesoshi itsajiavaque- riquea iquenquejajiaqueca, icantsijigari:

—¿Queroquea picojianacami piquenquejajianaquequea piquejjejiaque- roquea imaica? <sup>9</sup>¿Querocampate caavijica anaaque mananquitsica? ¿Iroocajate noncantaquerigueti teeca ironquempaji: ‘Jac shetacotajimpi maasano pipeacaagushevecaca’, iroocajate noncantaquitigueri: ‘Pincatia- naje, paanajeroquea pinorijancaca, panijitanaje?’ <sup>10</sup>Imaica namenacaajia- quempiroquea yagavejaque ocaniqui quepatsiqui irira Irijanite Caquinte<sup>d</sup> irishetacitajeri ipeacaagushevecaca caquinte.

Iroompaquea ipitsocashitanacari teeca ironquempaji icanqueri:

<sup>11</sup>—Iintsija noncanquempiquea pincatianaje, paanajero pinorijancaca, poanaje pitsovironaquitequi.

<sup>12</sup>Ariquate icotanaca icatiapanajanta, yaanajiroquea inorijancaca isotoanaji yoanaji. Yamenajiavajiriquea maasano, yamenamenaitanaquequea intati ishineventajiacariquea Aapani Irioshi, icantajigui:

—Teequea namenimajigueroji onquempequemparoquea ocatica.

**d 2.10** Icanquegueti Jesoshi *Irijanite Caquinte* mana icantacotaca iriatimpa, mana oquejetaca icantacoqueri itsipa. Iriotaque Quirishito Meshiantatsica quenapojatsica jenoqui inquitequi, icaquintetapojaquetari ivoapojaque.

**Jesoshi icanqueri Irevi  
irogуйатанаquerija  
(Mt. 9.9-13; Irc. 5.27-32)**

<sup>13</sup>Ariquea yoanaji aisa Jesoshi otsapijapojaqueti iniromotija. Irooquea yomporoguijamentajianacariea icaramirincavaetanaquequea caquintejia, itsatacajiaqueriquea.

<sup>14</sup>Iroompaquea yoanaji yamenapojiri irijanite Arejeo pajitatsica Irevie savicaquequea ontaniqui ipashicatsarajitirogueti, yoguijajiaavaqueri avisavisaitatsica ivergaratacaajiaavaqueri imentaquitsica maasanopae aajiananquitsica irajaararopae irooca taaca opajitapae, iriguentitarite capiocapinitinirica majirontatsica imentaquipae. Iroompaquea iriraquea Jesoshi icampojiri:

—Jameja, poguijatanaqueña.

Iriatimpa icatiitsitapanajanta yoanque yoguijatanaqueeri.

<sup>15</sup>Ariquea Jesoshi yoanaque itsoviornoquitequi ishecatacaqueate, itsipatsipaitacariea itsatacaanejia, jerijia itsipapae oshequini capiocapinijiguinicrica majirontatsica imentaquipae, jeri aisa itsipapae covaeguishetatsica. Icaramirincavaetari icanca oguijajitanaquerica. <sup>16</sup>Iriraquea pariseojia aisa tsatacaantajiguiroca itioncacotanaqueca Moishishini yamenajiaquerigueti Jesoshi ishecajicaguetti itsipajiacari covaeguishejiatsica aisa capiocapinijiguinicrica majirontatsica imentaquipae, icanqueriquea itsatacaanejia:

—¿Quero icocani irira tsatacaajiguimpica ishecatacojiacari capiocapinijiguinicrica majirontatsica imentaquipae, jeri aisa itsipapae covaeguishejiatsica?

<sup>17</sup>Oraquea iquemaquegueti Jesoshi icantajiguiri:

—Iriraquea teeca irashinoncajempajiteetarite incoguitejacotempariji aavintantsica. Iriguenti coguitejacojigari ashinoncajajatsica. Ariqueate noquejetaca naatimpa teequea irioquea noncoraquetashiteji teeca incovaeguishejiguempaj noncajemajiaqueri, iriguenti nocoraquetashijiaque covaeguishejiatsica.

**Icoacojitaqueriquea Jesoshi  
irisanticotantajitemparoca isheca  
(Mt. 9.14-17; Irc. 5.33-39)**

<sup>18</sup>Ariquea iriraquea itsatacaanejia Joanca aisa irashijia pariseojia yoguipaquijajiaquerorequea isheca teetaquea irishecatsitajempaquea. Iroompaquea iconoagarantaca yoayoaitanaque icantajipojaqueri Jesoshi:

—Iriraquea itsatacaanejia Joanca aisa irashijia pariseojia yoguipaquijapinijiaquerorequea isheca, cotanquitsiquea pashijia pitsatacaguica teequea inquejiguempajiri iriatimpajia. ¿Querocaquea icojiacani?

<sup>19</sup>Iroompaquea iquejetacaanca Jesoshi icanque:

—Pinquenquejeroja inchoocategueti iriaqueraca manquigatanquitsineca incajemajiaqueriquea itsipavijijiaca irishecatacaajiaquerempaquea, ¿arimpate aatompate ishecajitsi? Irishecajiaquermpaquea, itsipatsipaitacaritarite cajemajiaquerica shinejicaquea.

<sup>20</sup>Cotanquitsiquea oraquea aapojajempagueti incatsimatantajitaquemparica irajaitanaqueri osamani, ariquea iroguenti irisanticotantajitemparoca isheca, irishimampojancacojianaquempari.

<sup>21</sup>“Aatoquea ocameetsati oncotatemparogueti quitsaarentsiqui iroquetishitequitica incotatantajivetaquemparo

e 2.14 Iriratica Irevi ipajita aisa Mateo (pamenero Mt. 9.9; Irc. 5.27).

iroaqueramorenatica quitsaarentsi. Irajaquitsijivetemparoqua ariqueate oncotanaquempani ontsiñotsiñomorenata naquequea arimpaquea omperejanaqueroqua. <sup>22</sup>Aisa ari onquempetaquemparoqua iroguijatantajitaquemparogueti vinoja iroaquerajatica on cachotapoje iroguijatantajivetaquemparogueti imeshinanaquiqui iriquetinica oroame shinatananquitsica. Oncachojamajavetanaquempagueti oshimoajavetanaquempa, ariquea oncotanaquempa aravoavetaquitempa imeshina, intyaquisanaque oshacojaatanaquempaquea vinoja, aisa impomatsataquemparoqua imeshina imperejanaque. Jero caaviji ocameetsavaeque impijaatantajitaquemparoqua iriaquerameshinari cameetsanijite aatonijite opomatsajata vinoja, aisa aatonijite ipomatsatatsi imeshina.”<sup>f</sup>

**Itsatacaanejia Jesoshi ishireguipanajanti  
tirigoitsoqui savincaguiteriqui  
imagorejantajitaca  
(Mt. 12.1-8; Irc. 6.1-5)**

<sup>23</sup>Iroompaquea aapojajagueti savincaguiteri imagorejantajitaca yoanaque Jesoshi icantanaca tirigomashiqui itsipatsipaitanacari itsatacaanejia. Iriatimpajia ishireguipanajanti tirigoitsoqui. <sup>24</sup>Icanqueriquea pariseoja:

—Pamenajiguerija. ¡Quero octacani yaajianaquequea tirigoitsoqui imaica savincaguiteri imagorejantajitaca? Icantimentantajitirotarite irantantajitempo.

<sup>25</sup>Yacanaqueriquea:

**f 2.21-22** Itsatacaantica Jesoshi irogramenti quejetacaro quitsaarentsi iroaqueraro, oquejetacaro aisa vinoja iroaquerajatica. Aato agaveji otsipataro itsatacaantica pariseoja aisa tsatacaantajiguiroca itioncacotanaqueca Moishishini. **g 2.26** Acanqui ocanquegueti itsovironaquite Aapani Irioshi irogramenti ocantacoque quitsaarentsivanco itsaroventantajitarica iriatimpia. Icantajitiro Taverenacoro. Coajica irijanite Taavini ipeacaacaro mapipanco icantajitica teempero intsaroventantajiaquemparica. Iroatimpia aisa icantajitiro itsovironaquite Aapani Irioshi.

—¿Arimpate teequea pampatsajavan-tacojigueroji aviatimpajia itioncacojita-quergueti Taavini coramani ocanque-gueti itaseanaque iriatimpia aisa itsipajianacaca, teequea onchoocatimajaniqui-teji taampaquea irishecajiaquempaca?  
<sup>26</sup>Iquijitsitanaca itsovironaquitequi Aapani Irioshi<sup>g</sup> icoocatigueti saserorote anaantamajatanquitsica Aviatare ishecatacaroqua pan icantimentantajitica irishecajitemparogueti, manaquea yojoquijitaquero oraniqui shitaponcarontsiqui cameetsanjite iramenaquero-nijite Aapani Irioshi. Iriuentiquea shecajiaquemparoneca saserorotejia, iriotaquequea cantanquitsica Aapani Irioshi. Cotanquitsiquea iriraquea Taavini ishecatsitaroqua, aisa yojocajiaqueneriquea itsipatsipaitacaca.

<sup>27</sup>Aisa icanque Jesoshi:

—Oraquea savincaguiteri imagorejan-tajitaca manaquea ipeacaimentajicanari caquinte, iriraquea caquinte teequea impeacaimentajitenemparo iroatimpia.

<sup>28</sup>Iriraquea Iriganite Caquinte iriuentiquea cantanquitsica queroca icantimentantajitica irantantajititemparogueti savincaguiteri imagorejantajitaca, aisa querocaquea teeca incantimentantajite-roji.

**Jesoshi yogueshitajiri  
chompevacovetatsica  
(Mt. 12.9-14; Irc. 6.6-11)**

**3** <sup>1</sup>Arikea yoanaji aisa Jesoshi shinagogaqui icapiocantajiacaca joriojia, iquijapojo intsompoguiqui. Arikea ichoocaque oraniqui chompeva-

cotanquitsica. <sup>2</sup>Ariquea irirajia omporoguijajianquitsica yamenamajajiaqueriquea Jesoshi iramenajaquequea arica irogueshitajeri savincaguiteriqui imagorejantajitaca cameetsanjite intsaveacotantajiaquerinijite incatsimatacaantajiaquerinijite. <sup>3</sup>Cotanquitsiquea Jesoshi yamenapojaqueriquea chompevacotanquitsica icanqueri:

—Iintsiya pincatigueja iramenajiaquempinijite maasanopae.

<sup>4</sup>Ariquea icanqueriquea maasanopae:

—Imaica iintsiya pincantajguenajate querocaquea icanque Moishishini coramaniqui. ¿Taaquea irantantajitemparoca savincaguiteriqui imagorejantajitaca? ¿Ariquea icanque impeacaantajitemparo cameetsa, irooca irantantajitemparo covaeguisherentsi? ¿Ariquea icanque aavajeri agonoro aatoniji imetoji, irooca icanque ametojaqueri?

Cotanquitsiquea iriatimpajia teequea querocaca incanteji, iquemisantajianaquequea maasanojia. <sup>5</sup>Iriraquea Jesoshi yamenamenaquerigueti maasano icatsimatsitanacaquea, aisa ishimampojancacojianacariquea, yamenajiaquerigueti mana iquishoshirentanaquequea. Iroompaquea ipitsocashitariquea chompevacotanquitsica icanqueri:

—Pincantavacotempaja.

Irooquaea icantavacovetanaquitiga ariquea ocoitanaca iraco jac peamajatana. <sup>6</sup>Iroompaquea isotosotoitanaji pariseojia yoayoaitanaji iramenajiaquieri shineventajigacarica Erorishi.<sup>h</sup> Irooquaea yamenajiavaquerigueti icapiocajiacaca isariimanatanacari Jesoshi irimetojacaantajiaqueriquea.

### Yomporoguijaventajiacariquea Jesoshi otsapijapojacagueti iniromotija

<sup>7</sup>Iriraquea Jesoshi yoanaque otsapijapojacagueti iniromotijaqui itsipatsipatancari itsatacaanejia. Itirorencaventajianacari aisa icaramirincavaequequea Garireaqutica aisa Joreaquitica.

<sup>8</sup>Iquemacojiaqueriquea yonigaantaguequeroqueate oacaantantatsica intati icoraquecoraqueiquequea iramenajiaquiteri, iquenaquenagarantajiajapiro Jerosarequi aisa Iromeaquí. Itsipapae iquenajiajapirojuea intatiqueroqui Jororanequi. Itsipapae quenaquenaitapojatsica Tiroqui aisa Shironequi.

<sup>9</sup>Iriraquea Jesoshi irooquaea yamenavaquegueti yomporoguijaventajiajapocari icantajiaqueri itsatacaanejia irajaijateriquea quenajarontsi irojajaueneriquea quempeji otsapijapojacagueti intehintejantajianaquempaca aatonijite itsinacajiguiritsi omporoguijaventajiacarica. <sup>10</sup>Yomporoguijaventajiajapocari icaramirincavaeque joquijijianquitsica itaviavacajianacaquea icanca inintajaque inquempejiquempejiiquempariquea impamijiapoaquerinijite, yamenajiaquequea yogueshiguetajiriquea icaramirincavaeque itsipapae. <sup>11</sup>Iroompaquea irirajiaquea ampatsinipae yamenajiaquerigueti Jesoshi yogueroventsitanacariquea icajemajianaque icanque:

—iAviatimpa aviguenti Irijanite Irioshi!

<sup>12</sup>Cotanquitsiquea Jesoshi icantimentajiaqueriquea aatonijite itsavetacojiguiti.

**h 3.6** Irira pariseojia irio joriojia, teetari irinintajigueji irimajironquempari Sesa, iriguentitari Iromaquitica. Ari iquejetaca *Erorishi*, teequea irio jorio. Cotanquitsiquea iriraquea Iromaquitica iquijaguetanaque iguinenteniqui joriojia yomperaperavaejiacari. Irooquaea cantanquitsi irimajironquempari Erorishi joriojiaqui, irotarite inquemisantamajataque Sesa. Icanquequea Sesa maasanojia joriojia irojocagarantapinijiaquereneri imentaquipae. Tee iroshequiamajateji joriojia shinevencarica Erorishi.

**Jesoshi yaajiaqueriquea 12  
impeacaaquiaquempaca itigarancanejia  
(Mt. 10.1-4; Irc. 6.12-16)**

<sup>13</sup>Iroompaquea Jesoshi yoanaquequea otsempiqui icajemajiaqueriquea inintacajiaqueca. Oraquea yoayoaitanaquegueti iriatimpapqui <sup>14</sup>yaaquequea 12 intsipatsipaiquempaca, aisa intigarancajiaqueca intsavetantavaetaquequea irootaquequea ipajitantajiacarica itigarancanejia. <sup>15</sup>Ariquea yagavejaaquiaqueriquea iroguisotojajaeneri ishaquiajiacaca ampatsinipae.

<sup>16</sup>Maasanoquea yaajiaqueca manaquea ipajijiaca: Shimo (ipajitajica Peerero); <sup>17</sup>Santiago<sup>i</sup> irijanite Severeo, aisa Joanca iriguentijeguite Santiago (ipajijajiri mavite Voaneregueshi, oncanquequea “quempejiaca caretii”); <sup>18</sup>Antirishi, Jeripe, Varitorome, Mateo, Tomashi, Santiago<sup>j</sup> (irijanite Arejeo); Tareo,<sup>k</sup> Shimo (icantajitica “Serote”),<sup>l</sup> aisa <sup>19</sup>Jorashi Ishicariote, aacaanquerineca Jesoshi.

**Icantajiqueriquea Jesoshi iriguenti shaquiacari ampatsini  
(Mt. 12.22-32; Irc. 11.14-23; 12.10)**

<sup>20</sup>Arikea yoanajigueti Jesoshi tsovironaquiui, yomporoguijaventajianacari icaramirincavaequequea caquintejia, querocampate incojiaquempani irishecajiaquempa iriatimpa aisa itsatacanejia. <sup>21</sup>Chooca cantajanqui-

tsica: “Jac itsavigavaetanaque.” Iquema-cojiaquerigueti ijitannejia icoraquejiaqueriquea irajajaterime.

<sup>22</sup>Icoraquejiaquequea aisa tsatacaantajiguiroca itioncacotanaqueca Moishishimi, iquenajiaipojaque Jerosarequi iramenajiaqueriquea Jesoshi. Iriatimpajia icanquequea: “Iriguentisa shaquiacari Veeresevo<sup>m</sup> imajirote ampatsinijia. Iriotaquequea agavejacaamerica yoguisotoantagueta-canarica ishaquiajiacaca ampatsinipae.”

<sup>23</sup>Iriraquea Jesoshi icapiocajiaqueriquea maasano itsatacajiaqueriquea iquejetacaacanari, icanqueri: “¿Arim-pate intigarancajempa Satanashi iriatimpa iroguisotoaquequea?

<sup>24</sup>Arikeate inquempetaquempari inchoocategueti caquinte incapaciocajiaqueriquea igonorojia impeaquempaquea imajirote. Iroompaquea irira igapiocene impariajianaquemparogueti incatsimata-vacaajianaquempa, aatoquea ichoocagantsijajitsi. <sup>25</sup>Arikea iquempejiaca tsipatsipaitacarica ijitannejia, iriatimpajigueti apigarancashitavacaajianajatsineca incatsimatavacaajiaquempa quea, arikea incohincotanaquempa intsinampirejavacaajianaquempa aatoquea iconoavacajajatsi. <sup>26</sup>Arikea iquempetaca Satanashi iriatimpa. ¿Arimpaquea querocaquea incoquempani iriatimpagueti apigarancavacaajajatsineca incatsimatavacaajajempagueti igonorojia ampatsinipae? Interoncaya-

<sup>i</sup> 3.17 Irira Santiago ipajita aisa Jacovo. <sup>j</sup> 3.18 Santiago. Chooca mavite Santiago, pajitatsica Jacovo. <sup>k</sup> 3.18 Tareo. Irioca icantajitica aisa Jorashi irijanite Santiago. Pamenero Irc. 6.16 aisa Ya. 1.13. <sup>l</sup> 3.18 Serote ocanque “nintamajatatsica”. Irooqua icantajitiri irirajia joriojia nintamajatanquitsica iroguisotoajigueri Iromaquitica omperoperaacarica onchoocatashitajempanijite iguepatsite ishiraerjia. Acanqui Maricoshi icantiri “kananitas”, irooqua oponeaca iguenquetsatsarequi arameo, ocanque “nintamajatatsica”, tee oncanjeji iponeaca Canaanequi. Irocashi (6.15) icantiri iguenquetsatsarequi guiriego “zelotes”, irootaquequea ationcantacaroa “Serote”. <sup>m</sup> 3.22 Veeresevo. Iguenquetsatsarequi guiriego icanqueri Beezeboul aisa Beelzeboul. Icanqueri quimajareri Beelzebú. Iriotaque pajitatsica aisa Satanashi.

querigueti igonoro apatiroquea inchoocataje. ¿Ariquea quericampate iromperatajempaca? <sup>27</sup>Inquempetempaquea inchoocategueti itsipa caquinte irinquegueti inquijashitanaqueriquea itsovironaquitequi catsimaramajaca iraagarantsiqueriquea, iroquetitaqueate iroishotapojeri cameetsanijite iraagarantsiquerinijite. Oraquea aatotagueti yoishotiritsi aatoquea yagavejitsi iraagarantsiqueriquea. <sup>28</sup>Nontatacaamajauquempiroquea imaica taacaguetai impeacaaguishejiaquempa caquinte covaeguisherentsi irooca inquenquetsaguishevaeque taaca opajita, iriraquea Aapani Irioshi iragavejaquequea irishetacotajeri aatoquea iquenquejacaajiri. <sup>29</sup>Cotanquitsiquea iriraquea cantaguishetacoquerineca Ishire Aapani Irioshi, aatoja ishetacojitiritsi, incoguitempani irantsipevenquemparo.”

<sup>30</sup>Icantantajiacarica imaica, yammena quequea icantajiaqueri: “Iriguentiquea shaquiacari ampatsini.”

**Iriniro Jesoshi aisa iriguentijeguitepae  
(Mt. 12.46-50; Irc. 8.19-21)**

<sup>31</sup>Arikea ocoraquetaque iriniro Jesoshi aisa iriguentijeguitepae, icatintiitapojaca sotsiqui, ariquea icajemacaantajiaqueriquea. <sup>32</sup>Iriraquea savisaviitanquitsica anquitsaearica Jesoshi icanneriquea:

—Coraquetaque piniro aisa piguentijeguitepae, ichoochapoi sotsiqui, inintajiaque iramenajiaquempi.

<sup>33</sup>Iriatimpa icanneriquea:

—¿Querocate iinani, aisa quericate nigungentijeguitepae?

<sup>34</sup>Arikea yamenitajianacariquea maasanojia savisaviitanquitsica anquitsaearica icancue:

—Jeeri irirajia nopeajiaqueca iinani aisa nigungentijeguitepae. <sup>35</sup>Quericaca netsanamatiroca inintagueta Aapani

Irioshi, iriotaque nopeajiaque iguentijeguiipae, tsiojipae, iinanipae.

**Jesoshi iquejetacaacari pishoncaguitiroca  
oitsoqui**

*(Mt. 13.1-9; Irc. 8.4-8)*

**4** <sup>1</sup>Arikea Jesoshi yoanaji aisa otsapijapojacaguetai iniromotijaqui itsatacaantavaetajiquea. Icapiocajapojaquea icaramirincavaeque caquinteja yomporoguijamentajapijacariequa, itirorencajanacaquea icanca, itetantanacaroa Jesoshi quenajarontsi isavicaque. Maasanojia omporoguijajianquitsica ichoocejiaque otsapijapojacaguetai. <sup>2</sup>Arikea itsatacaajiaqueri iquempetacaaguetacaroquea taaca opajitapae, icanneriquea: <sup>3</sup>“Intsijate piquemisantajiavaquenajate. Yoanaque aparo caquinte impishoncaguitero oitsoqui. <sup>4</sup>Ipishoncavoncaquitanaquerouquea tacororo tacororo itsacaguetaquero. Oconoagarancaquea asacaraaguetanaca quenavoquirontsiqui, iroompaquea isavisaviitashipojiroquea tsimeripae ishecadjapojacaro. <sup>5</sup>Otsipa oconoagaranca asacaraanaca mapiporopiqui, taampina otsoroitsivetanaca, teemajaca onchoocamajatenica quepatsi. <sup>6</sup>Iroompaquea icatsirincaguetevetanaca catsirincaiteri itsianaquerouquea oshimpeguiricanaquequea ometojanaque, teitarite oamajateji ovarishitsa isaviqui, ojocaavaquerotarite mapi. <sup>7</sup>Oconoacaquea otsipapae asacaraaguetanaca ochoocaquegueti ovarishitsa samerento. Arikea otsoroavetanaca ariqueate otsoroitsitanacaquea samerento iroatimpa otsincoanajiroquea ometojanaji, teequea onchoocateji oitsoqui. <sup>8</sup>Oconoacaquea otsipapae asacaraanaca ocameetsaguitaquegueti quepatsi, otsoroanaquequea otagananaca ochoocatanaque opitsaraquiacotanacaqueate oitsoqui, oconoaca

ochoocaque 30, otsipa 60, otsipa ochoocaquequea 100.”

<sup>9</sup>Iroompaquea icanqueriquea:  
“Choocagueti piguempita pinquemanta-vaquempaca, pinquemeja.”

**Jesoshi itsatacayaqueriquea quero  
ococani iquempetacaantaguecaroca**  
(Mt. 13.10-17; Irc. 8.9-10)

<sup>10</sup>Arikea yoayoaitanajiquea maasanopae, aparoquea icantaja Jesoshi itsipatsipaitajariquea itsatacaanejia, aisa itsipa oguijajiquiquerica. Iriatimpajia icanqueriquea:

—¿Taaquea opajita piquempetacaagueta caca incajaranqui?

<sup>11</sup>Iriatimpia icanqueriquea:

—Aviguentijia tsajiaquerone imaica queroquea icotani Aapani Irioshi imajirontagueti, teetari ironigaantajive temparoji paesatoniqui. Iriraquea itsipajia manaquea nonquejetacaagueta quenempari maasanopae, <sup>12</sup>cameetsanjite

iramena menaivetaquempaquea, cotanquitsiquea aato oconijati motiri;

Inquemaquema ivetaquempaquea aisa, cotanquitsiquea aato itsajia vaquerotsi, aato quea ipitsocashijigana nosheta- cotsitajerime igovaeguishere.<sup>n</sup>

**Jesoshi itsatacayaqueri itsatacaanejia  
taaca opajita iquejetacaacaca  
incajaranqui**

(Mt. 13.18-23; Irc. 8.11-15)

<sup>13</sup>Icanqueriquea aisa:

—¿Teempate pinquemajiavaquero- quea ocatica noquejetacaacaca incajaranqui? Iroosacanica, ¿quiero- campate pincojiaquempani pinquema- jiaquerogueti ogonoropae nonqueje-

tacaaguetaquemparogueti? <sup>14</sup>Irira- quea oananquitsica impishoncaguite iriguenti quempecaroca tsavetanti- roca Iguenquetsatsare Aapani Irioshi.

<sup>15</sup>Iconoajiacacaquintejia iroguenti iquempejiacaroquea oitsoqui asacaraaguigueta nanquitsica quenavo quirontsiqui. Iquemisantajia- queroquea Iguenquetsatsare Aapani Irioshi, cotanquitsiquea icoraqueta- shiqueriquea Satanashi ipeacotacajai- jaari maasanopae. <sup>16</sup>Iconoajiacaca itsipa iroguenti iquempejiacaroquea oitsoqui asacaraagueta nanquitsica mapiporoquiqui teemajaca onchooca- majateji ogamiguitere quepatsi.

Iquemajia querorequea Iguenquetsatsare Aapani Irioshi ishineventamajajive- tavacaroquea. <sup>17</sup>Cotanquitsiquea teequea inquemisantamajateroji, mana iquejetacaro panquirentsi teeca onquijamajateji ovarishitsa, jero ipeacojianajaroquea taampina.

Iroompaquea otiaavaetanacari atsipetagantsi, irooca icatsimati- men- tajiqueriquea Iguenquetsatsare Aapani Irioshi arikea ico hicoitanaja yovashiantajianajiroquea itsaroven- vecaca. <sup>18</sup>Itsipa iroguenti iquempejia- caroquea oitsoqui asacaraagueta nan- quitsica samerentoqui. Iquemisantaji- ave caro quea Iguenquetsatsare Aapani Irioshi, <sup>19</sup>cotanquitsiquea irooqueate itsipatavajiroquea iquenquejajia- vajiroquea maasanopae choocaguetatsica quepatsipaequitica, aisa ishineventajia- vajari imentaquitsite irooca aisa taaca opajitapae ajaararontsipae. Teequeate inquenquejajajeroji Iguenquetsatsare Aapani Irioshi, iroguentiquea iquenquejajia quequea irajaarantajiaquemparuea. Querocampate incojiaquempani

<sup>n</sup> 4.12 Pamenero Is. 6.9-10.

intsaroventamajajiaquemparigueti.  
<sup>20</sup>Cotanquitsiquea chooca itsipa  
 iconoagarantajiaca iroguenti  
 iquempejiacaro asacaraaguetananqui-  
 tsica ocamiguitetapojigueti quepatsi.  
 Iquemisantajiavaqueroquea Iguenque-  
 tsatsare Aapani Irioshi, yaajiavaque-  
 roquea, iroompaquea arimpaqueate  
 iquemisantamajaguitironi. Iconaga-  
 rantajiacaquea ichoocajiaque  
 cameetsa iquempejiacaroquea  
 tsoroananquitsica choocatananqui-  
 tsica oitsoqui 30. Itsipa iquempejiaca-  
 roquea choocatananquitsica 60. Itsipa  
 caavijica yanaaque ichoocamajaji-  
 aque cameetsa iquempejiacaroquea  
 choocatananquitsica oitsoqui 100.

**Iquempetacaacaroquea Jesoshi  
 maasanopae senacacovetanquitsica**  
*(Irc. 8.16-18)*

<sup>21</sup>Icanqueriquea aisa:  
 —Oraquea itsivojitirigueti  
 tsivorentsi ¿arimpate isasaviacojitim-  
 quea chomoqui? ¿Arimpate yoguisa-  
 vicacojitimquea osevatatacagueti  
 shitamencontsi imaantajitaca?  
 Teequeate. Iroguentiquea yoguisavi-  
 cacojitimquea jenoquijaniqui camee-  
 tsanijite intsivotacojiaquerinijite  
 maasanopae. <sup>22</sup>Ariquea oquempetaca  
 taaca opajitapae senacaguetanqui-  
 tsica imaina oncoramanitapojajegueti  
 ironigaantajiqueroquea. Aisa taaca  
 opajitapae teeca intsajiteroji imaina  
 oncoramanitapojajegueti intsajiquero-  
 quea. <sup>23</sup>Choocagueti piguempita  
 pinquemantavaquempaca, pinque-  
 meja.

<sup>24</sup>Icanqueriquea aisa:  
 —Pinquenquejamajajigueroja  
 piquemajiaqueca. Querocagueti  
 pincotsiterini itsipa ariquea inqueje-  
 tacaajitaquempi aviatimpajia, ariquea  
 iranaacaavaequempiro. <sup>25</sup>Quericaca

tsatavaqueroneca icantajiquerica  
 intsatacaajitaqueriquea otsipapae.  
 Quericaca teeca irininteji intsatava-  
 quero, iraapitsatsijitavaqueriquea  
 itsavecaca.

**Jesoshi iquempetacaacaro imajirontagueti  
 Aapani Irioshi, iquejetacaacaro  
 tirigoitsoqui**

<sup>26</sup>Icanqueriquea aisa:

—Imaica nontsatacaamajataquempi-  
 roquea aisa queroquea icota imajironta-  
 gueti Aapani Irioshi, iroguenti oquejeta-  
 caroquea tirigoitsoqui. Yoanaquequea  
 aparo caquinte ipishoncavoncaquitana-  
 queroquea tacororororo tacorororo  
 itsitacaguetanaqueroquea. <sup>27</sup>Oraquea  
 iteroncanaquerogueti yoanaji itsovi-  
 naquitequi, iroompaquea opitsecanaji  
 imaanaji, osavincaguitetanajigueti  
 ipityaquirejanaji. Ocaragujejavaetana-  
 queguedi savincaguiteri otseequitana-  
 quequea ortsoroanaque, cotanquitsiquea  
 iriatimpa teequea intsatavaqueroji  
 querocaca octanacani ortsoroanaque-  
 gueti. <sup>28</sup>Inchiquojiquea ortsoroanaque-  
 quea quepatsiqui, ochoocatanaquequea  
 oguiji, ariquea agataganajanaca  
 ochoocatanaque oitsoqui. <sup>29</sup>Oraqueate  
 osamparijencatanaqueguedi yoanaque-  
 quea pishoncavoncaquitanaquero  
 ipesacoqueroquea yaanaquero sampami-  
 riaquitananquitsica.

**Jesoshi iquempetacaacaro imajirontagueti  
 Aapani Irioshi, iquejetacaacaroquea  
 oitsoqui moshitaasa**  
*(Mt. 13.31-32; Irc. 13.18-19)*

<sup>30</sup>Icanqueriquea aisa:

—¿Imaicaquea taaca oquejetacaro-  
 quea imajirontagueti Aapani Irioshi?  
 ¿Taaca nonquempetacaajemparo?  
<sup>31</sup>Ariquea nonquempetacaajemparoquea  
 oitsoqui moshitaasa. Oraquea oitsoqui  
 moshitaasa caaviji anaaque chaamirija-

quijaniquivaequequea anaaguequero-  
quea otsipapae oitsoqui ivintyacajitica  
quepatsiqui.<sup>32</sup> Cotanquitsiquea ivinty-  
cajitirogueti otsoroanaque agajempeja-  
naca ocanca anaaguequeroquea  
otsipapae panquirentsipae chaamirija-  
quijaniquitatsica oitsoqui. Otsegotsegoa-  
tanaca oquempetanajaroquea inchato,  
itsimampeantajajaro tsimeripae.

**Jesoshi iquempetacaantaguecaro  
itsatacaanquegueti**

(Mt. 13.34-35)

<sup>33</sup>Arikea iquejejiaqueriquea imaina  
Jesoshi itsatacaajaiquerigueti Iguenque-  
tsatsare Aapani Irioshi iquempetaca-  
guecaroquea taaca opajitapae,  
maasanopae yagavejajiaqueca.  
<sup>34</sup>Teequea intsatacaaajiguéri intati,  
taaca ininqueca intsatacaaajiaqueri  
iquempetacaaguecaroquea. Cotanquitsi-  
quea iriocha choocatajatsi itsatacaanejia  
yoguisotoamajataqueneri maasanopae.

**Oquemisantamajataqueriquea Jesoshi  
choviga, aisa inriomotija**

(Mt. 8.23-27; Irc. 8.22-25)

<sup>35</sup>Iroompaquea itsaparoncaguitetana-  
jigueti icanqueriquea itsatacaanejia:  
—Iintsija jaame intatiqueroqui.  
<sup>36</sup>Iquenquetsatacaaajianajiriquea  
omporoguijajianquitsica, itaquiajatacoji-  
anjiri itsatacaanejia icocaniquea  
itetaca. Itsipajia oguijajuitacotana-  
querica.<sup>37</sup> Incajaranquiguitetanaque-  
gueti ochovigaguitetapojaquequea  
choviga jeoc jeoc jeoc, ariquea  
ocotanaca ovorevoreatanaca otserajata-  
naqueroquea oja quenajarontsiqui  
irooshivetapojaca ontamorencaquem-  
pamequea.<sup>38</sup> Iriraquea Jesoshi  
yojocanacaniquea tin ovataquipojaca-

gueti itiinatacaroquea tiinarentsi.  
Itinaitariquea icanqueri:

—Tsatacantatatsica, ¿arimpate  
teequea pintstateji irooshipojishiatsi  
ojocajajiguempanishiatsi?

<sup>39</sup>Icatiitsitanacaquea icanquero  
choviga:

—Pimpejaencatanajempaja.

Icantsitaroquea aisa inriomotija  
vorevoreatanquitsica icanquero:

—Pinchopecajatanajempaja.

Ari octanaja opeanaja choviga, ari  
oquempetaca inriomotija ochopecajata-  
naja.<sup>40</sup> Arikea icanqueriquea itsatacaaa-  
nejia:

—¿Quero octacani pitsaroantana-  
caca? ¿Arimpate tequeratampate  
pintsamajajiguena nagavejamajati?

<sup>41</sup> Arimpaquea itsaroamajajianaque-  
quea icantavacaajianaca:

—¿Taa ipaji iricatica? Jero oquemi-  
santamajatancarica choviga aisa  
inriomotija.

**Gararaquitica ishaquiacaca ampatsini**

(Mt. 8.28-34; Irc. 8.26-39)

**5** <sup>1</sup>Arikea yarejerejeipojacaquea  
intatiqueroqui itsinampijaatacojia-  
pojacaquea iguepatsitequi Gararaquit-  
ica.<sup>o</sup> <sup>2</sup>Irooquea yanijiarejvetanaca  
Jesoshi yameniri icoraquepoji aparo  
caquinte ishaquiacariequa ampatsini,  
iquenapojoiroquea imperitamoroqui  
yojoquijitantanijitarica metojatsica.

<sup>3</sup>Ariqueate iguinentiguitaniquea  
oraniqui. Teequea quericaca agavejima-  
tajerineca iroishoteri, teetari agavejeriji  
cavorejatsari. <sup>4</sup>Yoishotantajivecarí  
cavorejatsari qui iguitiqui aisa iracoqui  
itsatsitsativaetaqueroquea itsinatsinavae-  
queroquea pioquire, pioquire, pioquire,  
otsatsitsatiavaetanacaquea cacaaporoqui-

o 5.1 *Gararaquitica*. Chooca otsipa paperi otioncacotacagueti acaniqui Jerasaquitica (gerasenos).

janiqui. Teequeate quericaca agavejimaterineca.<sup>5</sup> Icocaniquea yanijivijiti savincaguiteriqui aisa pitsecariqui. Yoavaeguetanaquequea otsempipaequi aisa imperitamoroqui yojoquijitaptanijitarica metojatsica, icajemamajatati-guinimaja jeeee. Yaitstitaroqua mapi tsaampiri itotsitaquea quitente quitente quitente. <sup>6</sup>Irooqueate yamenacotsitavacarigueti Jesoshi ishiashitanacariequa quempeji iguerovempojacari. <sup>7</sup>Iririjencavaeque icanqueri:

—¿Queroaquea pincoquenani, Jesoshi Irrijanite Irioshimajaca Anaantamajatatsica? Iintsijate aatoja patsipetacaanatsijate. iPimpintasatacogajotenashiatsi!

<sup>8</sup>Icantantacaroca ocatica irooriji icanqueri Jesoshi ampatsini:

—iPisotogue, ampatsini, povashianteriqueate iricatica!

<sup>9</sup>Ariquea icanqueri Jesoshi:

—¿Queroaquea pipajitani?

Icanque iriatimpa:

—Nopajita Caramirincatatsica, nocaramirincavaequetari.

<sup>10</sup>Yapipijitaqueri icantiri:

—Iintsija aatojate pitigarancajanatsiate osamani.

<sup>11</sup>Ariquea ichoocajiaque chancho<sup>p</sup> oraniqui otapiqui ishecajia, icaramirincavaeque icana.

<sup>12</sup>Iquenquetsatsitanacaquea ampatsini icanqueri:

—Iintsija ariguentiquea pintigarancajiaquenaquea noshauquiajiaquempariquea chanchojia.

<sup>13</sup>Iriraquea Jesoshi icanqueriquea:

—Intsiquetirote poapoaitanaque.

Yovashiampanajantiri ishaquivecaca irioqueate yoashiyoashiivetenacari chanchojia. Irooqueea ishaquishaquivetapojacari, ariquea icohicoitanaca

isaquiritsaevaetanaque ojeguironcapoja-cagueti yanoyanoitanaca itanquiretan-quireitanaque yojocajajapojaca, iteroncajiaca maasano. Maasanojia icarajiaque 2,000.

<sup>14</sup>Irooquea yamenajiajavaqueriguetequea quempogujirica itsaroajianaque ishiashiatanaca yoayoaitanaji icamantajapijiri ontaniqui iguinentijiacagueti itsitacagueta-pojiroqueate, iquemacotantajiacarica choocajatsica acaniqui aisa choocajatsica quempejipaequi. Isotosotoitanaque iramenajiaque taa opajita. <sup>15</sup>Yoayoaitanaquequea ichoocaquegueti Jesoshi, iroompaquea yarejerejeipojaca yamenajia-pojiriquea ishaquivecaca ampatsini savicaji quitsaataja quenquejanaji quempe-majatanaja iroqueragueti, ariquea icohicoitanaca itsaroajianaque. <sup>16</sup>Iriraquea amenajiaqueroca maasanopae icamantajia-vaqueriquea querocaca icoqueriniquea iroqueragueti yoguisotojainirigueti shaquivecarica caquinte, aisa querocaca icoquerimi itigarancajiaquerigueti ishaquia-javetacarigueti chanchojia yojocajajacagueti. <sup>17</sup>Iroompaqueate iquemajiaquitigui-quea itsavetantajiaquerigueti, iriatimpajia yamanamanaiqueriquea Jesoshi iroanaje-niji irovashantsitanajeriniji iguepatsite.

<sup>18</sup>Irooquea itetanajaquea Jesoshi quenajarontsiqui iroanaje, iriraquea ishaquivecaca ampatsini icanqueri ininque intsipatanaquempari. <sup>19</sup>Cotan-quitsiquea Jesoshi tee irishineteriji, mana icanqueri intati:

—Poanaje pitsovironaquitequi, pigonoroqui, pincamantapojajerija pintsavetampojajeroquea maasano queroquea icoquempini Aapani Irioshi ipintsatacotajimpigueti.

<sup>20</sup>Iriatimpa yoanajiquea iparianacaro itsavetantaqueroquea oraniqui quinteni-nintsipaequi Tecaporishiqui, yoguisoto-

### **p 5.11 Irira *chancho* iriguenti viratsi quejevetarica santaviri.**

jaiapojaqueneri ipintsatacota carigueti Jesoshi. Maasanoquea mana yamenename naitanaque intati.

**Jesoshi iwochatajiro irorijanite Jairo**  
(Mt. 9.18-26; Irc. 8.40-56)

<sup>21</sup>Ariuea imontejacotanaja Jesoshi intatiqueroqui yomporoguijaventapojacari icaramirincavaeque caquintejia, ariuea ichoocapoji oraniqui otsapijapojacagueti iniromotijaqui. <sup>22</sup>Iroompapea icoraquepojaque shirampari pajitatsica Jairo. Iriatimpa iriguenti jivatanquitsica shinagogaqui icapiocantajiacaca joriojia. Ariuea yamenapojigueti Jesoshi igueroventapojacari, <sup>23</sup>icampojiri:

—Irooshipojo ometoje norijanite. Jaameshiatsi pimpamitaquitenaro shiatsi ompeanajempanijite onchoocatajeniji.

<sup>24</sup>Iriaquea Jesoshi yoanaque yoguijatanaqueriquea, ariuea yoguijaguajitanaqueriquea icaramirincavaeque caquintejia itirorencaventajianacariquea oraniqui itsinacajianaqueri. <sup>25</sup>Ariuea ochoocaque aisa oraniqui aparo manquigarentsi ashinoncaavaetanquitsica ososoajavaetini coramani, ariuea ocaratacoavaetanaqueni 12 ajagantsiteni. <sup>26</sup>Atsipevaecaqueate yaavintanavecaroqueate aavintantatsica teequea ompeajempaji arimpaquea ogatsitanaca, niganquiquea oteroncamajatanaqueriquea omentaquitsite, ejempacotia oanaca. <sup>27</sup>Oquemacoqueriquea Jesoshi oanaquequeate ontaniqui ichoocaquegueti iriatimpa oconoajianacari, oquempejitanacariquea ocoraquetashipojiri itaquiqui ochagatsaequitsitavaqueri ivanquemaero. <sup>28</sup>Oquenquejitsitanacea quea incajaranqui ocanque: “Iroguenti nonchagatsivetaquempari ivanquemaero

nompeanajempaquea.” <sup>29</sup>Irooqua ochagataquitiguiroquea ariuea ocotanaja osanticojatapojaji ososoajare, oquematsinotavaca jac peamajatanaja. <sup>30</sup>Iriaquea Jesoshi itsatavaqueroquea ipeantajaro iragavejane ipitsocanaca quea yamenamenaiqueri omporogujaventajiacarica icanqueriquea:

—¿Taaquea chagatsitaquenaro novanquemaero?

<sup>31</sup>Icantajianaque itsatacaanejia:  
—Pamenavecaqueate itsinacajianaquempi, pogaavacaquea picanque:  
‘¿Taaquea chagatacoquena?’

<sup>32</sup>Iriatimpa yamenamenaitanaque taaca chagatacoquerica. <sup>33</sup>Iroatimpa otsaroamajatanaquequea ompioncavatacaca, otsatavajitari peamajata. Ojocavaetapojaca iriatimpaqui ogueroventapojacari ocamanqueriquea maasanopae. <sup>34</sup>Iriatimpa icanqueroquea:

—Orijani, irooriji pavenquenatarite naatimpa, irootari piveantanajaca. Imaicaquea poanaje, pishinevaetajempa aatotarite apijitajimpi aisa.

<sup>35</sup>Iroompaquea quenquetsatatsitiraja Jesoshi icoraquecoraqueipoji itsipapae, iquenajapiroji itsovironaquitequi jivatanquitsica shinagogaqui, icampojiri:

—Jac metojaque porijanite, ariotapajaque pasereajiritsi Tsatacantantsica.

<sup>36</sup>Cotanquitsiquea Jesoshi iquemaque rigueti,<sup>q</sup> ipitsocashitari jivatanquitsica shinagogaqui icanqueri:

—Aato pitsaroguitsi. Mana paventanaquena naatimpa.

<sup>37</sup>Tee iroguishinejeri itsipajia iroguijajitanaqueri, iriguentiquea itsipatsipaitanaca Peerero, Santiago<sup>r</sup> aisa iriguentijeguite Santiago pajitatsica Joanca. <sup>38</sup>Oraquea yarejerejeitapojaja-

**q 5.36** Chooca otsipapae paperi otioncacagueti: “Cotanquitsiquea Jesoshi teequea inquemisantajajeri.” **r 5.37** Santiago ipajita aisa Jacovo.

gueti itsovironaquitequi jivatanquitsica shinagogaqui yamenapojiri ampenejen-cavaejiaca iraajiaca cajemajiaque oraniqui.<sup>39</sup> Iquipanaquequea intsompoguiqui icantajaiapojiri:

—¿Taampa opajita piraantajiacaca picajemantacaca? Teetarite ometoje-nica, mana omaaque intati.

<sup>40</sup>Ariquea icohipocitanaca ishironti-mentajianacari. Ariquea yoguisotosototajiri maasano sotsiqui, iriguentiquea itsipataja jivatatsica aisa imanquigare, iriguentijia aisa itsatacaanepae itsipatsipaitacaca incajaranqui, iquijaquijaitana-quequea ojoquijicaguetai irorijanite.

<sup>41</sup>Yacatsavacoquero icanqueroquea:  
—*Talitha, cumi*<sup>s</sup> —ocanquequea:  
“Chaajaniquitirajaca, noncanquempi, pincatianaje”.

<sup>42</sup>Irooqua icantaquitigui ariquea ocotanaja otancorejanaji ocatanaja anijivijitaji. Iroatimpa arejetacaro 12 ajagantsite. Iriatimpajia yamenamenaitanaquequea intati.<sup>43</sup>Cotanquitsiquea Jesoshi icantajiguiri aatoquea icamantitsi. Icantsitari aisa irojocajiaquenero oshecatajempata.

**Itsatacaantavetacaguetai Jesoshi Nasarequi**  
(Mt. 13.53-58; Irc. 4.16-30)

**6** <sup>1</sup>Ariquea yoanaji Jesoshi iguiente-niqui, itsipatsipaitanajari itsatacaa-neja. <sup>2</sup>Aapoajagueti savincaguiteri imagorejantajitaca<sup>t</sup> yoanaque shinago-gaqui icapiocantajiacaca iparianacarо-quea itsatacaantanaque. Iriraquea quemajivaquerica yamenajianaque-quea intati icantajianaque:

—¿Queroquea oquenapojini maasanopae ocatica iquejetantacaca

iricatica? ¿Taa opajita ocatica itsatica ganejencaro yojocajiquenerica? ¿Quero ococani yagavejancaca yonigaantague-queroquea oacaantantatsica intati?

<sup>3</sup>¿Teecajate irioquea iricatica caripin-tero,<sup>u</sup> irijanincaca Maria? Iriraquea iriguentijeguitepae iriguenti Santiago, Jose, Jorashi aisa Shimo. Arikea oquempejiaca itsijoitepae iroatimpajia aisa oguinentijiaca acaniqui, amenama-jajiguiroquea aatimpajia.

Arikea teequea irinintajigueji inquemisantajiaqueriji, iroguenti icatsimajiaqueri.<sup>4</sup>Cotanquitsiquea Jesoshi icantajiaqueri:

—Iriraquea tsavetantiroca icanquerica Aapani Irioshi ishineventajitavajari querocaguetai yoanaqueni osamani, cotanquitsiquea ichoocavecaguetai iguinentiqui, teequea irishineventaji-tempariji, aisa teequea inquemisantajiaqueriji ijitannejia aisa gunteninitimota-carica itsovironaquitequi.

<sup>5</sup>Arikea teemajaca ironigaantajeroji oacaantantatsica intati oraniqui iguiente-nivetacaguetai. Manaquea ipamijiaqueriquea aparopae ashinoncajajianquitsica, yogueshijajiri.<sup>6</sup>Arikea yamenanaque intati, yamenaque teequea inquemisantajiajeriji, manaquea icantajiaque: “Caaricaja.”

Arikea Jesoshi yoayoaguetaquequea iroshipojiguetai oraniqui iguinentijiaca-gueti itsatacaantavaetaquequea.

**Jesoshi itigarancajiaqueri 12 itsatacaane iroaroaitanaque intsavetantajianaque**  
(Mt. 10.1, 5-15; Irc. 9.1-6)

<sup>7</sup>Arikea icajemaqueriquea itsatacaane carajianquitsica 12, itigaran-

**s 5.41** *Talitha, cumi.* Icanqueroquea iguenquetsatsarequi arameojia, irootarite iguenquetsatsare Jesoshi ichoocatiguetai quepatsiqui. **t 6.2** *imaginejantajitaca.* Irira joriojia imagorejapinjiaque saavarouqui. **u 6.3** Iriraquea *caripintero* iriguenti tsamajaguetiroca inchacota, ipeacaantaguecaro shitaponcarontsipa, taaca opajitapae.

cajiaqueriquea iroaroaitanaque  
intspatavacaanaquempa mavite mavite,  
yagavejacaajiaqueriquea iragavejajia-  
queri ampatsinipae.<sup>8</sup> Icantajiavaqueri-  
quea: "Aato paimatitsi. Aatoja  
paajiguitsi pitsaratote, pisheca aisa  
pimentaquitsite. Iroguentiquea pigotiro.  
<sup>9</sup> Pincaviguitijanaquempaja, cotanqui-  
tsiquea aatoquea paajiguitsija mavite  
piitsaare, iroguentiqueate piquitsajia-  
caca.<sup>10</sup> Querocagueti oraniqui poapoai-  
tanaqueni incajemajivaquempigueti  
pimaanaque itsovironaquitequi,  
poapoaitanaquea pincoquempani-  
quea pimaimojaqueri arejevaetapoja-  
jempa savincaguiteri poapoaitantana-  
jempaca.<sup>11</sup> Oraquea querocagueti  
poapoaitanaqueni oraniqui aatogueti-  
quea ishineventajiguimpitsi, taampina  
poapoaitanaque, cotanquitsiquea  
iroquetitaja pantecamajatanaqueroja  
quepatsivane pagatiquitsitapojaqueri-  
gueti, iroonijite iramenantajiaquempa-  
nijite iroguenti yantaguishejiaquero-  
quea covaeguisherentsi, teatarite  
irajaiavaquempiji irishineventajava-  
quempiji. [Arimajaquea oncoramanita-  
pojajegueti arejetapojajempagueti  
incatsimatantaquemparica Aapani  
Irioshi, caaviji incatsimamajajiaqueri-  
quea irirajia teeca irishineventajava-  
jempiji, anaamajataqueroquea  
incatsimamajajiaquerigueti quintenijia-  
vetanquitsica coramaniquitica  
Soromaqui aisa Gomoraqui.]"

<sup>12</sup> Iratiempajia yoayoaitanaquequea  
itsavetantajianaque, icantajiaqueri  
maasano irovashiantajianaqueroja  
maasanopae covaeguisherentsi ipeacaa-  
guishevaaetacaca incantashitatijaiana-  
jempa.<sup>13</sup> Yoguiotoajiaqueriquea  
oshequi ampatsinipae, aisa ipantantajia-

cari orejiqui oshequi joquijiripae,  
ipeajianaja.

**Erorishi iquenquejajiro  
imetojacaanquerigueti Joanca  
Viñacajatantatsica  
(Mt. 14.1-12; Irc. 9.7-9)**

<sup>14</sup> Maasano iquemacojiaqueriquea  
Jesoshi, jero iquemacotantacarica  
majirontatsica Erorishi<sup>v</sup> iriatimpa.  
Chooca cantajianquitsica: "Tancorejana-  
jishiatsi Joancani Viñacajatantatsica,  
jero yagavejamajatantacaca yonigaanta-  
guequieroqua oacaantantatsica intati."

<sup>15</sup> Itsipaquea cantanquitsica: "Irguenti-  
quea coramaniquitica tsavetantatsicani  
pajitatsica Iriashini." Itsipapae  
cantanquitsica: "Irguentiquea tsavetan-  
tatsica, quejecarica irirajia tsavetantaji-  
atsicani coramanipaequitica."

<sup>16</sup> Oraquea iquemajiaquerigueti  
Erorishi icantajiaquegueti imaica,  
icanque iriatimpa:

—Irguentiquea Joancani nojitereja-  
caanqueca, tancorejanajishiatsi.

<sup>17</sup> Oraquea chapinqui iriraquea  
Erorishi yaacaantaqueri Joancani,  
yoishotacaanqueriquea cavorejatsariqui,  
isantanatacatacanqueri, irooriji  
yamenaquequea icantomajimentavecari  
Eroriashi yaapitsaquerigueti iriguentije-  
guite pajitatsica Jeripe.<sup>18</sup> Iriraquea  
Joanca icanqueriquea Erorishi: "Tee ari  
incojitempaji paapitsaquerigueti  
imanquigare piguentijeguite."

<sup>19</sup> Oraquea Eroriashi ariquea ocatsima-  
tanaqueriquea Joanca onintaveca  
irimetojaisjiquemparimequea,  
cotanquitsiquea querocampate oncoque-  
rini.<sup>20</sup> Itsaroacaacaritarite Erorishi  
itsaquequea iriguentiquea cameetsari,  
iriguenti igomajamajare Aapani Irioshi,

<sup>v</sup> 6.14 Iriratica *Erorishi* irio icantajitica Erorishi Antipashi. Iririni aisa ipajita Erorishi, irio  
majirontanquitsica ivoaquegueti Jesoshi (pamenero Irc. 1.5; Mt. 2.1-19).

jero yamenamajatantacarica aatonijite queroca icojitimiri. Oraquea itsavetanta-vaetigueti Joanca intintanirovecaro, cotanquitsiquea tee intsateji querocam-  
pate incoquempani.<sup>21</sup> Iroompaquea aapojatiga savincaguiteri ometojacaan-tantaquemparica. Iroguentiquea aapoja isavincaguiterite Erorishi. Iriatimpa itiacaantaguetaqueua taaca opajitapae shecatsipae, ariquea icajema-jiaqueriquea imajirojiate joriojia, aisa imajirojiate coaretajia, aisa anaantajia-tsica guintenijiatsica oraniqui Garireaquí.<sup>22</sup> Ariquea ishecajia, oquijapojoquea orijanite Erorishi otsamaropojo opitsopitsovaetanaca-queate. Irooqua yamenaquerogueti Erorishi aisa maasanopae itsipatsipaita-caca ishecajiacagueti, ishineventajiacar-  
roquea. Iroompaquea icanquero:  
—Imaicaja pamanenajate taaca pininqueca, naatimpa nojoquitsitempi-roquea.

<sup>23</sup>Icantositajaro aisa:

—Imaicaja noncanquempi arimajaca nojocaqueumpiroquea taaca pamanaque-naca, aatotarite namatavijimpitsi. Quempetaca pamanenagueti nojocaga-ranquempiro nashintaguecaca, nontincavirejitempiroquea niganqui. Incatsimatentenaro Aapani Irioshi aatogueti nonetsanatiro nocanqueca.

<sup>24</sup>Osotoapanajanti oanaquequea ocantapojaquero iniro:

—Iinani, taaquea opaji namana-queri?

Iroatimpa ocanqueroquea:

—Iroguentiquea pamaniqueru iguito Joanca Viñacajatantatsica.

<sup>25</sup>Iroatimpa oitsitanacaquea oquijitsi-tanaja ichooquegueti majirontatsica Erorishi, ocanqueriquea:

—Iroguenti noninque pojocacotsite-naro imaica iguito Joanca Viñacajatantatsica shimencoqui.

<sup>26</sup>Arikea icotanaca iriatimpa ishimampojancanaca, cotanquitsiquea iroorijite icanqueroquea, aisa iquemajia-queri maasanopae icajemajiaqueca, tee irinintenica incantero: “Aato.”<sup>27</sup> Iroota-rite itigararanquitsitantarica coreta iroanaque ontaniqui isantanatacojita-querigueti Joanca iramacoqueroquea iguito.<sup>28</sup> Yoanaquequea ijitorejaquitiri santanaqui iroompaquea yamacoque-nero yojocacopojquenero, irooquaete oguipitsocacoquenero quea iniro.<sup>29</sup> Oraquea iquemacojiaquerigueti itsatacaanejia Joanca, icoraquetashijia-jiri yaajianajiro itsino iquitajajiro.

### Ishecatacaajiacari Jesoshi 5,000 shirampari

(Mt. 14.13-21; Irc. 9.10-17; Jn. 6.1-14)

<sup>30</sup>Iroompaquea icoraquecoraqueitaji itigarancanejia Jesoshi itsipatsipaipoja-jari icamampojiri maasanopae yantaguetaquitica ontaniqui aisa maasanopae itsatacaantaguetaquitica.

<sup>31</sup>Cotanquitsiquea coraquecoraqueitanatsiquea icaramirincavaeque caquintejia, itsipapae yoayoaitanaji, teequeate iragavejajiguempají Jesoshi irshecajiguempají. Irootaquequea icantantacarica Jesoshi itigarancanejia:

—Jame ontaniqui osamani teegueti inchoocateji caquinte, pimagoremagore-ipoquequea. Aviguentijia nontsipatsi-paitanaquempaca, aatojate yoayoaiti-tsija itsipapae.

<sup>32</sup>Arikea Jesoshi itsipatsipaitanacari itehiteitanacaquea quenajrontsiqui yoayoaitanaquequea.<sup>33</sup> Cotanquitsiquea irooqua yoayoavetanacaquea yamena-jiavaqueriquea itsipa caquintejia itsajivaqueri. Yoayoaitanaquequea iriatimpajia, aisa yanijijianaque iriquetica arejerejeitanquitsi.<sup>34</sup> Iroompa-quea itsinampiijaatacojiapojaca.

Irooqua yanijirejavetanaca Jesoshi

yamenajiapojiriquea icaramirincajiaque caquintejia, ipintsatacójanacariquea maasano, yamenajiaqueriquea aparo yapintajiaca yatsipevæjiacaqueate quempejiaca oveja teeca inchoocateji quempoguijajiquerineca, ariquea iparianacaroquea itsatacaaguetapojiri.

<sup>35</sup>Imaicaquea ijaguitevaetanaji catsirincaiteri, iquempejiquempejiitanacariquea itsatacaanejia icanqueri:

—Jac jaguitevaetanaji catsirincaiteri. Ocaniquiquea ocaniqui teequea quericaca choocatatsineca, <sup>36</sup>iroosacanica pintigarancajajeri maasano irirajia iroaroaitanajetajate ontaniqui guiteninitsipaequi irooshitacoguetanquitsica cameetsanjite irivegarajiaquenijite ishecajia irishecajiaquempanijite. Ocaniquiquea ocaniqui teetarite onchoocateji taaqueate irishecajiaquempaca.

<sup>37</sup>Cotanquitsiquea Jesoshi icanqueriquea:

—Pojocajigueneritsija aviatimpajia irishecajiaquempaca.

Iriatimpajia icanqueriquea:

—¿Arimpate pininque noanoita-naque novegarajiaquiteneri irashijia maasano irishecajiaquempaca? Ovegaravaecatari 200 tenario.<sup>w</sup>

<sup>38</sup>Arikea icanqueriquea Jesoshi:

—¿Quero ocarashequiaque pan pashijia? Iintsija poapoaitanaque pamenajiaquiterojate querocaca ocarashequiavaeque.

Arikea yoayoaitanaquequea yamenajiaquitiro, iroompaquea icoraquecora-queitaji icantajiajopjiri:

—Chooca 5, aisa shima mavipaquite.

<sup>39</sup>Icanqueriquea Jesoshi:

—Iintsija pincantajigueriquea maasano irisavisaviataquequea janama-

roncaroqui cataro, ariquea pomporoguijaguequeriquea.

<sup>40</sup>Iriatimpajia isavisaviiquequea iconoajiaca yomporoguijajica 100, itsipapae icarajiaque 50. <sup>41</sup>Iroompaquea iriraquea Jesoshi yajiricajiaquero pan caratanquitsica 5 aisa mavipaquite shima, ipaguitetanaqueroquea inquite yamanqueriquea Aapani Irioshi, icantaqueri: “Arioteesaa.”

Arikea icotarejaquero pan, yojocajia-queneri itsatacaanejia, irioquea gaavaqueneri yojocajiaavaqueneri maasano. Arikea iquempetacaacari-quea shima iriatimpa. <sup>42</sup>Arikea ishecajia maasano iquemajianaca.

<sup>43</sup>Iroompaquea iriraquea itsatacaanejia icapiocajajiro chocatajatsica pan aisa shima, itetajiro cantiriqui tseraiquipae ocaratacovaetaji 12. <sup>44</sup>Ikaramirincajiaque 5,000 shiramparijia quenquevarrijia shecajianquitsica.

### Yanijijatanaquero Jesoshi ojenoquijaare iniromotijaqui

*(Mt. 14.22-27; Jn. 6.16-21)*

<sup>45</sup>Arikea itigarancajiaqueriquea Jesoshi itsatacaanejia icantajianajiri intejianajempaquea quenajarontsiqui irijivajianaje irimontejacojianajempaquea intatquieroqui Vetsairaqui. Icantanajiri capiocajianquitsica iroaroaitanaje.

<sup>46</sup>Arikea yoayoaitanajiquea maasano, iriatimpa yoanaquequea otsempiqui iramaneri Iriri. <sup>47</sup>Oraquea opitsecanajigueti iriraquea itsatacaanejia niganquijatacovaetanajiquea. Ichooque Jesoshi apaniro quepatsiqui. <sup>48</sup>Iriatimpa yamenacotsijiavacariquea ipanquenanajiacaro ivetincajajavaquero

<sup>w</sup> 6.37 Iriraquea *tenario* irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario. Iramiterigueti 8 taai irivegarataqueri 200 tenario.

imagojianaquequea, ochovigaguiveae-tanaquetari choviga jeoc jeoc, oguipiguiapacovaetanaqueriquea. Iroompaquea omanchisejaguitetanajatiga savincaguiteri icoraquepoji yanijijatapojiro jenoquija iniromotijaqui iravissajianaquerime.<sup>49</sup> Iriraquea itsatacaanejia yamenitsijiavacariquea yanijijatapojiro ojenoquijaare, ijiqueriji sashinti, icajemajianaquequea.<sup>50</sup> Maasanoequa yamenajiaqueri itsaroajianaque, cotanquitsiquea iriatimpa icanqueriquea:

—Pintampishhirentajianaque. Naroguenti, aatoquea pitsaroajiguitsi. <sup>51</sup> Arikea itetanaja iconoapojajari, arikea octanaja choviga jac santiconi. Iriatimpajia yamenamenaitanaquequea intati. <sup>52</sup> Yamenajiavecaroqueate incajaranquiqui yoshequiaquerogueti pan, cotanquitsiquea teequea intsajigueji queroquea icocaniquea iriatimpa yagavejavaequeguetiquea maasanopae, manaquea iquishoshirentanaquequea.

**Jesoshi yogueshiguetajiriiquea ashinoncajajianquitsica Jenesarequitica**  
(Mt. 14.34-36)

<sup>53</sup> Iroompaquea imontejacojianajaquea intatquieroqui yarejejiapojajaro Jenesarequi, yagatacojiapojaji. <sup>54</sup> Yanijirejajianaquequea, maasanojia itsajiaqueriquea iriguenti Jesoshi. <sup>55</sup> Jero yoayoaitantajanacaca ishiashaitanaca-quea itsitacaguitejavaetanaquero yaacojiaquitiri ashinoncajajianquitsica, yaajianaqueneriquea irogueshiguetajeri. <sup>56</sup> Querocagueti oraniqui iquenagueta-naque Jesoshi guinentinintsipaequi chaajaniquiguetanquitsica, iniroguetanquitsica, jero aisa iniganquitejirepaequi, yaacotsijitanacariquea ashinoncaguate-tanquitsica yoguisavicajiquerl oraniqui quenavoquirontsiqui. Icantajiavaqueri:

—Intsishiatsi, Nomajirote, noninque inchagatsijivetavaquempiro oshipaquijaniquiqui piitsaare.

Maasanopaetari chagatsijiaquerica ipeaguetanaja.

**Jesoshi itsatacajajiqueriquea itsatacaanejia taaca opajitapae coguishetantatsica**  
(Mt. 15.1-20)

**7** <sup>1</sup> Iroompaquea icoraquecoraqueiquea pariseojia aisa tsatacaanta-jiguiroca itioncacotanaqueca Moishishini, iquenaquenaipojiquea Jerosarequi, icapiocaventajiaopajacari Jesoshi. <sup>2</sup> Yamenajiajopirijkea itsatacaanejia iconoagarantajiacaquea teequea irinetsanajigueroji yamejiacaca, mana ishecashecaica intati teequea inquivacommajiguempaji, yamenajiavecaroquea ocoguishequeri yajiricajiaqueca.

<sup>3</sup> (Irirajia pariseojia aisa maasanopae itsipajia joriojia yoguijatacojiaqueriquea choviquijianaquerica, aatogueti inquivacomajataquea aatojate ishecajatisi. <sup>4</sup> Aisa yoayoaitigueti yojocantague-tirogueti taaca opajitapae ishecajigueta-caca icoraquecoraqueitaji inquivavaitapoja. Aatogueti inquivavaitatsi, aatoquea ishecashecaitatsi. Aisa taaca opajitapae yoguijatacojiaqueri choviquijianaquerica coramani, inquivajiguiro-quea ichovintyoriuitepae, igatsantsana-quritepae, cavorejanaquiripae, aisa inorijantacaca.) <sup>5</sup> Iroompaquea iriraquea pariseojia aisa tsatacaantajiguiroca itioncacotanaqueca Moishishini icanqueriquea Jesoshi:

—¿Querocagueta icojiacani pitsatacaanejia teequea iroguijatacojigueriji choviquijianaquajica inquivacomajajia-quempa? Mana ishecatocajiacaroquea iraco ocoguishejiaquerigueti yajiricajiaqueca.

<sup>6</sup> Iriatimpa icanqueriquea:

—Itampaticamajataqueroquea tsavetantatsica Isaishini itioncacojiana- quempigueti coramani aviatimpajia cameetsatamampeajitsica, icanque- quea:

‘Iricatica caquinteja ishinetsaraven- tavequena,  
cotanquitsiquea manaquea  
ichoocashirentavaetaque  
osamani.

<sup>7</sup> Itsaroventtamampeajavetaquena- quea,  
cotanquitsiquea itsatacaantaji- guica iroguenti icantajiguica  
caquinteja irinetsanajiquea.’

<sup>8</sup> Aviatimpajia pojocajianapiroquea icanqueca Aapani Irioshi, iroguentiquea quisho poamajajiaque itsatacaantaji- guica choviquijianaquempica.

<sup>9</sup> Icanqueriquea aisa:  
—Caavijkea pitcaarejajiaquero icanqueca Aapani Irioshi cameetsanijite poguijatacojajeronijite pamejigaca aviatimpajia. <sup>10</sup>Pamenamajajiavecarо- quea icanqueca Moishishini: ‘Pinquemi- santamajajiaquerijate piri aisa piniro, aatoquea pipigatsajigaritsija.’ Icanque aisa: ‘Iriraquea tsavejencatirica iriri irooca iriniro irimetojitsijitempari.’ <sup>11</sup>Cotanquitsiquea aviatimpajia manaquea picantashitatijaiaqueroquea, picantapinijiaque cameetsavaeque shirampari incanqueri iriri irooca iriniro: ‘Aatoquea nagavejitsi nojocaqueMPI picoguitejacoqueca, irooriji maasanopae nojocaquempimeca iroguentiquea corova.’ (Oraquea corova ocanque: ‘Nojocashiquenemparica Aapani Irioshi’). <sup>12</sup>Incanquerigueti iroguenti corova, aviatimpajia picanquea aatoja yojoquinirtsija iriri irooca iriniro, aatoja icavintsaJJiguiri.

<sup>13</sup>Piquempejiaquerogueti imaica iroguentiquea povashiantajianaquero icanqueca Aapani Irioshi, irooqua-

poguijatacojianaque itsatacaantajia- queca pivaesatineni. Cotanquitsiquea teetarite aparoquea onchoocateji ocatica, pantajiaquequea otsipapae quejecaroca.

<sup>14</sup>Arikea icajemajiaqueri aisa maasanopae, icapiocajiaqueriquea icanqueri:

—Pinquemisantamajajiaavaquena ja maasano aviatimpajia, pintsaJiaavaquero noncamanquempica. <sup>15</sup>Taaca opajitapae sotsiquitica quijanquitsineca ivagantequi caquinte aatoquea ocovae- guisheshirentiri. Oraquea sotoanquitsi- neca iriatimpaqui, irootaquequea covaeguisheterineca. <sup>16</sup>Choocagueti piguempta pinquemantavaquempaca, pinquemeja.

<sup>17</sup>Arikea yojocapanajantiri maasano iquijanaquequea tsovironaquiqui.

Iriraquea itsatacaanejia icanqueriquea:  
—¿Taaquea piquempetacaaca incajararanqui?

<sup>18</sup>Iriatimpa icanqueriquea:  
—¿Teetarite pinquemajiguena ji aviatimpajia aisa? ¿Arimpate teesaca- nica pinquemajiguena ji nocanquegueti taaca opajitapae sotsiquitica quijanquitsineca ivagantequi caquinte aatotarite ocovae guishetiritsi? <sup>19</sup>Teetarite ariquea ogueji shecatsi shiretsiqui, manaquea otehoteitapojaca tsicotontsiqui mana irishitacojitajero.

Iroguentiquea icantajiaqueri imaica cameetsanijite intsajiaquenijite maasanopae ishecajigueta caca teetarite oncovaeguishetacaanteji. <sup>20</sup>Icanqueri- quea aisa:

—Oraquea sotoapojirica caquinte, irootaquequea covaeguisheta querica.

<sup>21</sup>Oraquea intsompoquiqui shiretsiqui ariqueate oquenapoji taaca opajitapae covaeguisherentsipae: iquenquejagui- shejigui, yoashijiguiro manquigarentsi tequeratatirajaca irimanquigajitemparo,

yaitsitantajigui, imetojantajigui,  
yoashijigiro manquigarentsija  
imanquigajitacaca,<sup>22</sup> inintsiguetiriquea  
yashintaguecaca itsipapae, isavicaventa-  
jigiro covaeguisherentsi, yamatavjan-  
tajigui, teequea irinejashitemparojo  
manquigarents, icatsimatumentiriquea  
igonoropae yamenaqueguetiquea caaviji  
yagavejavaequequea, iquenquetsagu-  
shetantajigui, yaventacojiacaquea,  
teequea intsajigueji incomajamajaji-  
guempaji.<sup>23</sup> Maasanopae ocatica  
ipeacaaguishejiguetacaca manaquea  
oquenapojoquea shiretsiqui, irootaque-  
quea covaeguishetantanquitsica.

**Aventanajari Jesoshi manquigarents  
Shiropenishiaquítica**

(Mt. 15.21-28)

<sup>24</sup> Arikea yoanajiquea Jesoshi  
irooshitacoquero Tiro aisa Shirone  
ariquea iquijapojo tsovironaquiqui,  
teequea irinintavetempají inquemacoji-  
terime, cotanquitsiquea teequea  
iragavejeji iromanacotempají.<sup>25</sup> Arikea  
ochooaque aparo manquigarents  
choocatanquitsica orijanite tequeratati-  
raja onquenquevaroteji, ishaquiacaro-  
quea ampatsini. Iroompaqueate  
oquemacoquerigueti Jesoshi oanaque-  
quea amenavaqueri. Ocoraquepojiquea  
oguerontapojacari.<sup>26</sup> Oraquea  
manquigarents irogueintiquea guiriego,  
ovoguquea Shiropenishiaqui. Ocantapo-  
jaqueri iroguisotoacoventajero orijanite  
ishaquiacaca ampatsini.<sup>27</sup> Cotanquitsi-  
quea Jesoshi icanqueroquea:

—Iriquetataquea shecamajatanquitsine  
chaajaniquipaetirajaca. Teequea oncamee-  
tsateji aapitsateri chaajanquirija isheca,  
ojoquitenempari ishiishitepae.<sup>x</sup>

<sup>28</sup> Iroatimpa ocanqueriquea:  
—Arimajaca, Nomajirote, cotanquitsi-  
quea shiishi iramenajiguergueti  
irishecajiguempagueti chaajanquiripae  
iroguijavaqueroquea isaviji shitaponca-  
rontsiqui irishecatsopequiguetavaquem-  
paroqua otsopequi.

<sup>29</sup> Iriatimpa icanqueroquea:  
—Pitampaticamajataqueroquea.  
Imaica iintsjate poanaje, jac sotoanaji-  
quea ampatsini shaquiavecaroca  
porijanite.

<sup>30</sup> Oanajiquea, arejevepojaja otsoviro-  
naquitequi amenapojaquitoquea orijanite  
norijaca omencorequi omaantacaca,  
teequea irishaquiajemparloquea  
ampatsini, jac sotoanajiquea.

**Jesoshi iquemacajairiquea teeca  
inquemavetempají**

<sup>31</sup> Yoanajiquea Jesoshi isotoantanaja-  
roquea ichooaquegueti irooshitaco-  
quero Tiro, icantanajaquea Shironequi  
aisa Tecaporishiqui, yarejevaetajaquea  
iniromotijaqui Garirea.<sup>32</sup> Iroompaquea  
yaajianaqueneriquea shirampari  
carenisamaitori, aisa teeca inquenque-  
tsamajavetempají, icantajiaqueri  
impamijiaqueriquea.

<sup>33</sup> Iriraquea Jesoshi itsipatanacariquea  
tijai teegueti inchoocajigueji tirorenca-  
shijiacarica, ariquea yoguijaachapaqui-  
tsitaro iguempitaqui, aisa ijavachapa-  
quitsita ichagatsqueri inenequi.

<sup>34</sup> Arikea ipaguitetanaquero inquitequi  
yaajencataquiti icanqueri: “iEfata!”  
(oncanquequea: “iPishepirejanajempa!”)

<sup>35</sup> Irooqua icanquerigueti ariquea  
icotanaja ishepirejacotanaja, aisa  
itsirecarejanenetanaja iquenquetsamaja-  
tanaji.<sup>36</sup> Iroompaquea icantajiavecari

<sup>x</sup> 7.27 Aapani Irioshi itigarankumentaqueri Jesoshi incoraquetashijiaqueri ishiraerijia.  
Iriquetimegueti incavintsajajiaqueme teeca irijorijoqueji, onquempevetaquempame  
yaapitsajitirigueti isheca chaajanquirija irojoquitenemparigueti shiishipae.

Jesoshi maasano: "Aatoja picamantitsi." Cotanquitsiquea arimpate itsavetantajianaqueroquea.<sup>37</sup> Yamenamenaitanaquea intati maasano icantajianaque: "Maasanoquea yantaqueca cameetsavaeque, iquemacajaiqueriquea teeca inquemavetempaji aisa inijacajairiquea macanavetatsica."

**Jesoshi yoshequiavaequeroquea pan,  
ishecatacaajiacari 4,000 shirampari  
(Mt. 15.32-39)**

**8** <sup>1</sup>Iroompaquea yomporoguijaventajiapojacariea Jesoshi icaramirincavaeque caquintejia, icocaniquea isavicaventajiaqueri, niganquiquea iteroncacojianaca ishecajia, taampate irshecajiaquempaca. Ariquea icajemajiqueriquea itsatacaanejia icanqueri:

<sup>2</sup>—Nopintsatacojianacariea irirajia, namenaquequeate isavicaventajiaquenquea ocaniqui 3 savincaguiteri, niganquiquea iteroncacojianaca ishecajia. Imaicaquea imaica teequea onchoocateji taampaqueate irshecajiaquempaca.<sup>3</sup> Arigueti nontigarancajavetajempari iroaroaitanaje itsovironaquitequi aajiavaquerinishiatsi itaseane quenavoquirotsiqui, iconoagarantajiaquea iquenaquenaivaepoji jmm osamani.

<sup>4</sup>Iroompaquea icanqueriquea itsatacaanejia:

—Ocaniquiquea teequea quericaca quintenitantemparone. ¿Ariquea querocampate iraajiqueroquea ocaniqui pan irojocajiaquenerica irshecajiaquempaca maasano inquemantajianaquempacate?

<sup>5</sup>Icanqueriquea iriatimpa:

—¿Querocaquea ocarashequiaqueni pan choocatanquitsica?

Icanqueriquea:

—Ocarati 7.

<sup>6</sup>Iroompaquea Jesoshi icantajiaqueri maasano irisavisaviataquequea quepatsiqui. Yajiricajiaquero pan caratanquitsica 7, icantacovenquiero: "Arioteesa." Ariquea icotarejaqueroquea yojocajiaqueneri itsatacaanejia, irioqueate jocajiaqueneriquea maasano.<sup>7</sup> Ariquea chooca aisa mavipajianiquipaete shima. Iriraquea Jesoshi icantacovenquiero: "Arioteesa", iroompaquea icantajiaqueri itsatacaanejia irojocajiaqueneriquea maasano.<sup>8</sup> Ishecajiaquea maasanojia, iquemajianaca. Oraquea choocatapoajatsica iteguetajiroquea itsatacaanejia cantiriqui, ocaratacovetajji 7.<sup>9</sup> Maasano shiramparijia shecajianquitsica icaramirincaeque 4,000. Iroompaquea Jesoshi itigarancajajiri iroaroitanajeta.

<sup>10</sup>Iriatimpa itetanajaro quenajarontsi, itsipatsipaitanajari itsatacaanejia, yoajianaquequea irooshitacoquero Tarimanota.<sup>y</sup>

**Iriraquea pariseojia icantajiavecari Jesoshi ironigaajiaquerime oacaantantatsica intati  
(Mt. 16.1-4; Irc. 12.54-56)**

<sup>11</sup>Ariquea icoraquecoraqueitashipojiri quea pariseojia iramenantajiguempari, icantantajiajapojacarica ironigaajiaqueri oacaantantatsica intati onquenantapo-jemparoja ontaniqui jenoqui inquitequi.

<sup>12</sup>Iriraquea Jesoshi yaaejencataquitiquea icanque:

—¿Querocaquea icojiacani choocajiasica imaica inintantajiacaca ironigaajiqueru oacaantantatsica intati? Arimaja noncantajiaquempi aatotari nonigaajiguiniritsi.

<sup>13</sup>Ariquea itsinampirejajianajiri, itetanajaroquea quenajarontsiqui, imontemonteitanajaquea intatiqueroqui.

**Jesoshi itsavetacotsitaqueri  
itsatacaantane pariseoja  
iquempetacaacaro anempoacaguiroca pan  
(Mt. 16.5-12)**

<sup>14</sup>Irirajia itsatacaanejia ipeacojianacaroquea pan irajaianaqueme irishecajia-quempameca, aparoca ochoocaque quenajarontsiqui. <sup>15</sup>Iriraquea Jesoshi icanquequea:

—Aviatimpajia inchiquiojita pishecatacogitarotsi anempoacaguiroca pan irashijia pariseoja aisa Erorishi.

<sup>16</sup>Irooquea iquemajjavaquerogueti iquenquetsatavacaajianaca, icanque:

—Manatarite yamenajiacajuea teetarite ameji pan, jero icantantajia-caca imaica.

<sup>17</sup>Iriraquea Jesoshi yamenajjavaquerogueti iquenquetsatavacaajianaca, icanstitariquea:

—¿Querocaquea ococani piquenque-tsatacotantajiacaroca pan, picanque-quea manatarite namenaquempi teequea pameji pan? ¿Arimpate tequerata pinquemajigueji? ¿Tequerata pintsajigueji? ¿Ari quishoshirentajia-quempi? <sup>18</sup>Ochoocavecaquea poquijajia, ¿teequea pamenantajiguemparojo? Aisa piguempita, ochoocajiavecaquea ¿teequea pinquemantajiguemparojo? ¿Teequea pinquenquejajajeji? <sup>19</sup>Nocotarejaguequerogueti 5 pan, noshecatacaa-jiacari 5,000 shiramparijia, ariquea picapiocajajiroquea chocatajatsica, ¿querocaquea ocarashequiavaetajini cantiripae pitseraiquijajiro?

Iriatimpajia icanquequea:

—Ocaratacovaetaj 12.

<sup>20</sup>—Oquejetacaquea aisa ocaratacove-cagueti pan 7, nocotarejaguequeneri 4,000 shirampari, iroompaquea pavijiguetajirogueti chocatajatsica, ¿querocaca ocarashequiavaetajini cantiripae pitseraiquijajiro?

Icanqueriquea:

—Ocaratacotaaji 7.

<sup>21</sup>Arikea Jesoshi icanqueriquea:  
—¿Tequeratampate pinquemajigueji?

**Jesoshi yamenacajairi shamponcajari  
Vetsairaqui**

<sup>22</sup>Arikea yarejerejeitapojaca Vetsairaqui. Yamajitapojiniri shamponcajari, icantajitapojiri impamiteri.

<sup>23</sup>Iriraquea Jesoshi yacatsavacotapanajantiri shamponcajari itsipatanacari ocaraguepojigueti tsovironaquipae. Iquishoajatsitari iroquijaqui, imavitepacotashitanacari ipamitaqueri icanqueriquea:

—¿Ari pamenaji?

<sup>24</sup>Yamenaveca icanque:

—Namenaguevecari caquintejia, iquempejiavecaro inchato, cotanquitsi yanjinijiitanaque.

<sup>25</sup>Iquejetsitajariequa aisa imavitepacotashitanajari ipamijaquitsitajari iroquijaqui, iroompa icampanajanta jac amenamajatanaji, peamajatanaja, conijamajatanaji maasanopae. <sup>26</sup>Arikea Jesoshi itigarancajiri itsovironaquitequi icantavaqueri:

—Atoja poapanajantitsi quinteninin-tsiqui, picamantacotanatsi.

**Peerero icanque Jesoshi iriguenti  
Quirishitotatsica**

*(Mt. 16.13-20; Irc. 9.18-21)*

<sup>27</sup>Arikea yoanaquequea Jesoshi quinteninintsipaequi irooshitacogueta-queroca quinteninintsi pajitatsica Sesarea Piripo, itsipatsipaitanacari itsatacaanejia. Oraquea quenavoquiron-tsiqui icoacojiaqueri:

—¿Taa ipaji ijijiaquena caquintejia?

¿Quero icantajiguini?

<sup>28</sup>Iriatimpajia icanqueri:

—Iconoagarantajaciaca icantacojia-quempi: ‘Iriguenti Joancani Viñacaja-

tantatsica.' Itsipa cantajiananquitsica: 'Iriguenti Iriashini.' Itsipaquea cantajiananquitsica: 'Iriguenti itsipa tsavetantsicani.'

<sup>29</sup>Arikea icanneriquea:  
—Aviatimpajia, ¿quero picantajiguini? ¿Taa nonaque naatimpa?  
Icantsitanaca Peerero:  
—Aviguenti Quirishitotatsica.<sup>z</sup>  
<sup>30</sup>Icanqueriquea:  
—Aatojate picamantacotanatsi.

**Jesoshi icamantsicaro irimetojaque**  
(Mt. 16.21-28; Irc. 9.22-27)

<sup>31</sup>Arikea Jesoshi iparianacaroquea itsatacayaqueriquea itsatacaanejia irantsipevaequempaquea irira Irijanite Caquinte. Irimantintajiqueriquea jivajatiatsica, saserorotejia anaantajianquitsica aisa tsatacaantajiguiroca itioncacotanaqueca Moishishini. Arikea irimetojajiqueru, cotanquitsiquea aapojajempagueti 3 savincaguiteri impochatanaje. <sup>32</sup>Yoguiconjamajataqueneri. Iroquea iquemaquegueti Peerero itsipatanacari tijai icantomajitsivetari. <sup>33</sup>Cotanquitsiquea Jesoshi ipitsocanaca yamenanaqueri itsatacaanejia, arikea icantomajitsitari Peerero, icantsitari:

—iPoanaqueshinete, Satanashi!  
Teatarite pinquenquejacomajateroji inintaguequeca Aapani Irioshi, iroguentiquea piquenquejacoguequequea iquenquejaguetica caquinte.

<sup>34</sup>Arikea icajemajajiri omporoguijajianquitsica oraniqui aisa itsatacaanejia icanneriquea:

—Quericaca nintanquitsineca iroguijatacoquena irovashiantanaque-

roja intashiguevetacaca iriatimpa, irinatashtapiniquempa inchapoa irompajacotanjiquemparica, mananiji iroguijatacoquena. <sup>35</sup>Quericaca teeca irinintejji irantsipeventena irooca irimetojavenquena, manaquea impeaquequempa; cotanquitsiquea iriraquea atsipevenquenaneca aisa irantsipevenquemparogueti Quenquetsatsarentsi Oganejencatatsica tsavetantaquenaca irooca irimetojavenquenaquea, incoquempaniquea inchoocaguiten.

<sup>36</sup>Arigueti inchoocavetaquempa agavejanquitsineca irashinquemparo maasanopae quepatsipaequitica, cotanquitsiquea oncoramanitapoajegueti irimetojanajegueti arigueti impeaquequempa camorecariqui, ¿arimpate agavejaque irajaararo aavajeri? Aatoquea agavejitsi. <sup>37</sup>Irashintamajavequemparoqua maasanopae, cotanquitsiquea aatoquea yagavejitsi irivegaraventavaquempa aatonijite yoguitsi camorecariqui. <sup>38</sup>Quericaca pashiventacaquenaneca naatimpa aisa nocantaguequeca inchoocatimojiaquerigueti caquintejia caarica quisho oamajatiri Irioshimajaca, irirajia covaeguisherijia, ari inquejetaquempaquea irira Irijanite Caquinte impashiventacaapoaquempariquea iriatimpa oncoramanitapoajegueti incoraquetajegueti. Iroganejenca-pojajempaquea, inquempetapoajemparsi Iriiri, intsipatsipaitapoajemparsi ashivan-tijite comajashirentanquitsica.

**9** <sup>1</sup>Aisa icanneriquea:  
—Noncanquempija arimajaguitatsi iconoagarantaca catintiitimojiaquenaca imaica, aato imetoji tequeratagueti iramene quero icotani Aapani Irioshi

**z 8.29 Quirishitotatsica.** Iguenquetsatsarequi guiriegojia icanneriqueu *Christos* (Quirishito) manaquea ocanque "Ishaguijataqueca" aisa "Icoguiaqueca", irishaguijataqueritaro orejiqui orivo irirajia icoguiajiaqueca impeaquequempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajatiatsica coramanitica intigarancaque Aapani Irioshi impeaqueuempaniji Imajirojiate maasano.

imajirontagueti, ironigaimojiaqueriquea iragavejane.

**Jesoshi icantashitatiimojiacariquea  
itsatacaanepae**  
(Mt. 17.1-13; Irc. 9.28-36)

<sup>2</sup>Ariquea anaanajagueti 6 savincogui-  
teri iriraquea Jesoshi yoanaque  
ontaniqui otsempiqui yagatsonquivaeta-  
naquequea osamani. Iriguentequea  
itsipatsipaitanaca Peerero, Santiago aisa  
Joanca. Tee inchoocateji itsipajia.  
Iroompaquea taampina iriatimpajia  
yamenitsijigariquea Jesoshi icantashita-  
tiimojianacariquea. <sup>3</sup>Ariquea octanaca  
iitsaare ocavorejatanaquequea  
ocantashitatianaca tsiren oquitamaro-  
majatanaquequea ocanca quempetaca-  
queate oquitamarotigueti sharaca,  
teequea iramenimajiteroji quitsarentsi  
oguitamaroca yajacajitirogueti acanqui  
quepatsiqui onquempetaquemparo  
iroatimpa. <sup>4</sup>Yamenitsijigari Iriashini  
aisa Moishishini itsipatsipaitacari  
Jesoshi iquenquetsatavacaajiaca. <sup>5</sup>Irira  
Peerero icanqueriquea Jesoshi:

—Tsatacantantatsica, cameetsa-  
vaeque achoocajiaque ocaniqui. Intishis-  
atisi nompeacaguempaja 3 catisetarentsi,  
aparo pashinquempa aviatimpa, aparo  
irashinquempa Moishishi, otsipaquea  
irashinquempa Iriashi.

<sup>6</sup>Teetarite intstateji querocaca  
incanquemeca, mana itsaroajianaque-  
tari. <sup>7</sup>Iroompaquea omararotacojiapoja-  
jiri, ariquea iquenquetsajencajitanque  
omararosecanquegueti icanque:

—Iricatica irio Irijani, nopersamaja-  
tacaca. Pinquemisantamajajigerija.

<sup>8</sup>Ariquea yamenitsijavetaja aisa  
cajaraguiteni, aparo icatiaja Jesoshi.

<sup>9</sup>Ariquea icoraquecoraqueitaji yoguirin-  
cija, iriraquea Jesoshi icanqueriquea:

—Aatotaja quericaca picamantis  
oratica pamenaquiaquea imaica. Intanco-

rejanajegueti Irijanite Caquinte irimeto-  
javetaquempagueti, ariquea pintsaveta-  
cotsijiguemparoqua.

<sup>10</sup>Iriatimpajia teequea quericaca  
incamanteji, manaquea icantavaca-  
jiaca:

—¿Oraquea icanquegueti: ‘intancore-  
janajegueti Irijanite Caquinte irimetoja-  
vetaquempagueti’, taaquea icantaco-  
taque?

<sup>11</sup>Ariquea icoacotsijijaari Jesoshi:

—¿Quero octacani icantantacaca  
tsatacaantajiguiroca itioncacotanaqueca  
Moishishini icantajiaquegueti iriquetita-  
quea coraquetajatsine Iriashini?

<sup>12</sup>Iriatimpia icanquequea:

—Arimajaca ocanque Itioncacaanta-  
queca Aapani Irioshi iriquetitaquea  
coraquetajatsine Iriashini, irinetsana-  
guequieroqua maasano. Cotanquitsi-  
quea oraquea itioncacojiquerigueti  
Irijanite Caquinte, ¿queroquea ocanca  
ocanquegueti irantsipevaequempaquea,  
aisa incatsimajiqueriquea? <sup>13</sup>Imaica  
noncamanquempi jac icoraquetaquiti  
Iriashini, cotanquitsiquea mana  
yantagushejitaqueri maasano inintajita-  
queca. Ariquea ocanque Itioncacaanta-  
queca Aapani Irioshi coramani itsavetsi-  
jitaroni.

**Jesoshi yogueshitajiri chaajaniquitirajaca,  
yoguisotoajiniri ampatsini**  
(Mt. 17.14-21; Irc. 9.37-43)

<sup>14</sup>Ariquea yarejerejeipojaja ichoocajia-  
quegueti itsipajia itsatacaanejia,  
yamenajiajajiri yomporoguijaventa-  
jiri, aisa ichoocajiaque oraniqui  
tsatacaantajiguiroca itioncacotanaqueca  
Moishishini itsipatsipaicariquea  
iquenquetsatavacaajiaca, irooqua  
icanque irooqua icanque. <sup>15</sup>Yamenitsij-  
avajariquea icoraquepojai Jesoshi  
arieqa icojianaca yamenamenaitana-  
quequea intati. Maasanojia itacorojaia-

naca iquenquetsatacaa jiajavajiri.

<sup>16</sup>Iriatimpa icanqueriquea:

—¿Taaquea piquenquetsaventajiaqueca?

<sup>17</sup>Iquenquetsatanaquequea aparo, icanqueri:

—Tsatacaantantatsica, namavequem-piri irijani ishaquiacaca ampatsini, imacanatacaa queri. <sup>18</sup>Querocagueta ichoocaqueni yaacotapojiquerigueti ariuea ipijempejacaacari ishimotyon-javaetanaque, yatsicayajitanaca, iroompaquea aratsiquijini. Nocantajia-vecari pitsatacaanejia iroguisotojaiaque-riime, cotanquitsiquea teequea iragave-jajigueriji.

<sup>19</sup>Icantanaquequea Jesoshi:

—¡Arisa picomirincajiga teequea paventemparoji iragavejane Aapani Irioshi! ¿Queroaquea oncarashequia-veteni nosavicaventajiaquempi? ¿Querooca oncarashequia-veteni nantsipetacojiaquempiquea? Iroosaca-nica iiintsija pamajiaquenarijate ocaniqui.

<sup>20</sup>Yaajianaqueneriquea. Iriraquea ampatsini yamenavaquerigueti Jesoshi, ariuea icotanaca icantacaanaqueri tinquininini, ariuea itejanaquequea isavi quepatsiqui, itigaritigarivaitanaca tigaririri tigariri, ishimotyonjavaetanaque.

<sup>21</sup>Iriraquea Jesoshi icanqueriquea iriri:

—¿Queroaquea ocaratanaqueni yajagantsitacotaca ishaquiacarigueti ampatsini?

Iriatimpa icanque:

—Jac yoshequiacovaaetanaquequea, ishaquiitsitaritarite coramani chaajani-quitrajagueti. <sup>22</sup>Oconoaca manaquea yomposacaacariquea paamaripoquiqui, oconoaca yomposacaacari ojaquini qui irimetojaquerime. Imaicaquea ariguetti

pagavejaque aviatimpa, iiintsija pimpintsa-tacojiguashiatsi pamitacotenerishiatsi.

<sup>23</sup>Icanqueriquea Jesoshi:

—¿Queroquea ococani picanquena-quea: ‘Arigueti pagavejaque’? Quericaca aventamajauemparineca Aapani Irioshi iragavejaqueroquea maasano.

<sup>24</sup>Iririjencavaetanaque iriri chaajani-quiri, icanque:

—Naventavecariqueate. Pagavejac-augenaja naventamajataquemparinijite.

<sup>25</sup>Ariuea Jesoshi yamenajiaquera-gueti ishiashiaitashipojacari icaramirin-cavaeque caquinteja, icantomajitsitari ampatsini, icanqueri:

—Aviguenti cotacaacari, teeca inqueman tempaj iisa teeca inquenque-tsantempaj. Imaicaquea noncan-quempi pisotoanajerijate, povashianta-najerija iricatica, aatoquea picoraqueti-matajitsi pishaquiaejempari.

<sup>26</sup>Iriraquea ampatsini ariuea icotanaca icajemanaquequea jeeee, icantacaanaqueri tinquininini, isotoapa-najantiri yovashiantanajiri joquijitsan-tsataca quempeniequa imetojaque, iconoajiacaquea icantantajiacaca:

—Metojaque.

<sup>27</sup>Cotanquitsiquea Jesoshi yacatsava-coqueriquea yoguitinajaqueri, ariuea icotanaja icatianaja. <sup>28</sup>Ariuea yoanaji Jesoshi tsovironaquiui, itsipatsipa-tajari itsatacaanejia, iriguenti choocaj-ajatsi, icoacotsjiapojajari:

—¿Querote ococani naatimpajia caarica nagavejantajigari noguisotoitajigueriji?

<sup>29</sup>Iriatimpa icanqueriquea:

—Iriraquea ampatsini quempecarica imaica aatogueti iroquetitaquea pamanaji-guiritsi Aapani Irioshi iisa aatogueti pisanticotiyo pisheca,<sup>a</sup> aatoquea pagaveji-majiguitsi poguisotojaiqueri.

<sup>a</sup> 9.29 Oconoaca paperi iroquetinica tee oncanteji ocaniqui: *aisa aatogueti pisanticotiyo pisheca.*

**Jesoshi icamantsitajariquea irimetojaque**  
(Mt. 17.22-23; Irc. 9.43-45)

<sup>30</sup>Ariquea yoanaji Jesoshi icantanaca Garireaqui. Teequea irininteji iramenajitavaqueri, <sup>31</sup>ininquetarite intsatacaajiaqueriquea itsatacaanejia. Ariquea itsatacajaiqueriquea, icanqueriquea:

—Iriraquea Irijanite Caquinte iraacaantajiquer, irajaiavaqueri caquintejia, ariquea irimetojajiquer, cotanquitsiquea aapojajempagueti 3 savincaguiteri intancorejanaje.

<sup>32</sup>Iriatimpajia teequea intsajialavaquerijo icanqueca, cotanquitsiquea omintsa-roanaqueri incoacojiaquerime taa opaji icanque.

**Quericaca anaamajatantanquitsineca**  
(Mt. 18.1-5; Irc. 9.46-48)

<sup>33</sup>Oraquea yarejerejeipojacagueta Caperenaoqui yoayoaitanaquequea tsovironaqui, iroompaeua irira Jesoshi icanqueri itsatacaanejia:

—¿Taa opajita picantavaque picantavaque incajaranquitica quenavoquiron-tsiqui?

<sup>34</sup>Cotanquitsiquea iriatimpajia imativicajianaque, yamenajiaquequea iroguenti icantavaque icantavaque quericaca caavijica yanaantaque.

<sup>35</sup>Iriraquea Jesoshi isavicanaquequea, icajemajiaqueri itsatacaanejia carajian-quitsica 12, icanqueriquea:

—Quericagueta nintanquitsineca iranaantaque aato yaventacotsi, inchiquioji iriatimpajiaqueriquea maasano.

<sup>36</sup>Ariquea yaitsitaquea aparo chaajani-quitanquitsica yogatiimojiaqueriquea itsatacaanejia, ariquea yatsomaitsitari icanqueri:

<sup>37</sup>—Quericaca shineventavaquempa-rine chaajaniquiri quempecarica iricatica iororijite nonintacaantaquero

naatimpa, quempecaqueate naroguen-tica ishineventavaca. Quericaca shineventavaquenane naatimpa, aatoquea aparo naatimpa ishineventavaca, irioquea aisa irishineventava-quempa tigarancaquenaca.

**Quericaca teeca incatsimajiaji iroguenti itsipatacaji**  
(Mt. 10.42; Irc. 9.49-50)

<sup>38</sup>Ariquea icanqueri Joanca:

—Tsatacaantantatsica, chapinqui qui namenajiaqueriquea aparo yoguisota-queriquea ampatsini, iroguentiquea yaventashicari pivajiro. Cotanquitsiquea naatimpajia nocantimentajiaqueriquea, namenajiaqueriqueate teetarite intsipatsipaltjinica.

<sup>39</sup>Icanquequea Jesoshi:

—Imaica aatotarite picantimentajigui-ritsi. Quericagueta pamenajiaqueca avenquemparoneca novajiro ironigaan-taquerogueti oacaantantatsica intati, iriatimpajia aatoquea taampina itsipatava-jirotsi incantimanatavajenaquea.

<sup>40</sup>Quericacatari teeca incatsimataji iroguenti itsipatacaji. <sup>41</sup>Quericaca cavintsajaquempine jocacotaquempine oja pimiraqueca iroorijite nonintacaantaquero naatimpa, inquenquejaquegueti: ‘Irioriji irashi Quirishito’, arimaja aato opeapitsatari irinejacotajempa.

**Caaviji incatsimamatentamajajiquer iovaeguishetacaantanquitsineca**  
(Mt. 18.6-9; Irc. 17.1-2)

<sup>42</sup>—Taacagueti covaeguishetacaquemparineca aparo chaajaniquiri quejejiacarica iricajia tsaroventaquenane, incatsimati-mentamajajitaqueriquea. Irootaquequea nontsatacaantajiaquempiroca aatonjijite iquejejitritisi imaica, iroquetitamequea intsatocojiquenerime itsanoqui iniroshimentapiri itononcantajitaca, irajaitanaqueriquea impishoncajatsijtempari-

quea inirojaniqui quentijani.<sup>43</sup> Nonquejeta-  
caajaquempiroquea imaica: arigueti  
oncovaeguishetacaquempi paco, pincaratsi-  
temparoquea. Cameetsavetaca  
pimpeaquempa tsatiavacori pichoocatigueti  
acaniqui quepatsiqui, aatoniji mavitepacoti-  
rajampigueti ipishoncajitimpi camorecariqui  
aatoca otsivaquitsi.<sup>44</sup> Ontaniquiquea aato  
imetojitsi igueni aisa aato otsivaquitsi  
paamari.<sup>45</sup> Aisa iroogueti covaeguishetaca-  
quempine piguiti, pincaratsitemparoquea.  
Cameetsavetaca pimpeaquempa tsatiaguitiri  
pichoocatigueti acaniqui quepatsiqui,  
aatoniji maviteguitirajampigueti ipishonca-  
jitimpi camorecariqui.<sup>46</sup> Ontaniquiquea aato  
imetojitsi igueni aisa aato otsivaquitsi  
paamari.<sup>47</sup> Aisa iroogueti covaeguishetaca-  
quempine poquija, pintaguirorejaatsitempa.  
Cameetsavetaca quea apaoquivetaquempi  
pinquijapojaqueguiet i majirontagueti Aapani  
Irioshi, aatoniji mavioquivetimpigueti  
impishoncajitaquempi camorecariqui.  
<sup>48</sup> Ontaniquiquea aato imetojitsi igueni aisa  
aato otsivaquitsi paamari.<sup>49</sup> Maasanojiaquea  
osocapojempari paamari, quejetaca  
icachoanejitirigueti viratsi imetojajitirigueti  
Aapani Irioshi.<sup>b</sup> <sup>50</sup> Oraquea incachoanepane  
cameetsavaeque, cotanquitsiquea ariguettija  
omasancategueti, ¿querocampate incojitaje-  
roni incachoanetantajitajemparo? Pinqueje-  
temparoja incachoanepane cameetsatatsica,  
aisa pinconoavacaamajaqueempaja.”

Icanque Jesoshi aatoja quericaca  
vashiantirotsi imanquigare  
(Mt. 19.1-12; Irc. 16.18)

**10** <sup>1</sup>Ariquea isotoanaque Jesoshi,  
yoanaquequea Joreaqui aisa

intatiqueroqui Jororane. Iroompaquea  
yarejetapojacaguetti yomporoguijajia-  
vempojacariquea aisa icaramirinca-  
vaeque caquinteja. Ariquea itsatacaajaia-  
queri iquempetapiniquerogueti.

<sup>2</sup>Ariquea iconoagarantajiacaquea  
pariseojia icoraquecoraqueipojaque  
icoacojiapojaqueri iramenantajaque-  
pariniji, icantajapirojaqueri:

—¿Arite icantimentantajitiro irovashi-  
anterogueti shirampari imanquigare?

<sup>3</sup>Iriatimpa icanqueriquea:

—¿Querocampate icanqueni Moishi-  
shini itioncacotanaquerogueti?

<sup>4</sup>Iriatimpajia icanquequea:

—Iriraquea Moishishini ishinetsitari  
arigueti irovashiantanajero shirampari  
imanquigare, irojoquitenemparojate  
paperi otioncacagueti yovashianquero,<sup>c</sup>  
ariequa intigaranquitsitemparo oanaje.

<sup>5</sup>Icanque Jesoshi:

—Iriraquea Moishishini manatarite  
yamenajiaquempiquea quishoshirenta-  
vaequempi, jero iquejetacaanquempi-  
roca imaica itioncanquempiroca.

<sup>6</sup>Cotanquitsiquea iroqueragueti  
ipeacaaguecariguetiquea Aapani Irioshi  
maasanopae, ‘ipeacaacariquea shiram-  
pari aisa manquigarentsi.<sup>d</sup> <sup>7</sup> Irootaque-  
quea imaica shirampari intsinampireja-  
naqueriqueate iriri aisa iriniro, quisho  
iroamajataquero imanquigare, <sup>8</sup>apatsi-  
noroquea incantanajempa. Ariquea  
iroqueraguetiquea tequeratagueti  
irimanquigatemparoji, mavite icarajia-  
vetaca, ariquea imanquigacarogueti  
ariequate icojianaca tee irimavitetajeji,  
quempetanajaqueate apatsinoronica

**b** 9.49 Chooca mavite ocantacoquea ocatica. Maasano teeca intsaroventempari Aapani Irioshi iroanaque camorecariqui. Irioquea aisa ocantacoque tsaroventarica Quirishito irantsipevaetanaquempa acaniqui quepatsiqui impishoncamajatanajeroniji quempevaetagantsi. **c** 10.4 Oratica paperi icanquero quimajareri *certificado de divorcio* (irooca aisa *carta de divorcio*). Iroguenti paperi itioncajiquerogueti quejecaroca: “Imaicaquea novashiantajiro nomanquigavetacaca, aato nomanquigatjaro.” (Pamenero Os. 2.2 aisa Ireo. 24.1-4.) **d** 10.6 Jen. 1.27.

icantaja.<sup>e</sup> <sup>9</sup>Jeroquea imaica oraquea itsipatacaantacaca Aapani Irioshi, aatojate itsiparejajiro caquinte.

<sup>10</sup>Arikea yoayoaitanaji tsovirona- quiui icoacomajajiaqueriquea itsatacaanejia. <sup>11</sup>Iriatimpa icanqueri- quea:

—Quericaca ovashianqueroneca imanquigare manquigatajemparoneca otsipa, manaquea icovaeguisheca yaimen- tacocaro iroquetica. <sup>12</sup>Arikea oquempe- taca, irogueti manquigarentsi ovashianta- naquerineca manquigataroca manquigata- jemparineca itsipa, manaquea aimentacari.

**Jesoshi yamanacoventajiaqueri  
chaajanquirijia**

(Mt. 19.13-15; Irc. 18.15-17)

<sup>13</sup>Iroompaquea icoraquecoraqueita- quequea itsipapae yamajiajoniriquea Jesoshi chaajanquiripae impamijiava- queriniji. Iriraquea itsatacaanejia yamenajavaquerigueti yamajiaqueneri- gueti, icantomajavaqueriquea.

<sup>14</sup>Cotanquitsiquea yamenaquegueti Jesoshi, osemacaquitari icanqueriquea:

—Ariotaquetsija incoraquetetate chaajanquirijia naatimpaqui, aatoquea pojocavaca, ishineventajiacaritarite Aapani inquitequitica irimajirontacota- quempari quenquejajatsica quempe- rica iriatimpajia.<sup>f</sup> <sup>15</sup>Iroomajaca noncan- tajiaquempica: quericaca nintanquitsi- neca impejaeri Aapani Irioshi Imajirote inquempetajempariequa chaajaniquit- rajaca. Oraquea aatogueti iquempeta- ritsi, aatitarite iconoapojajari maasano peajiaquerica Imajirote.

<sup>16</sup>Iroompaquea inajiaqueriquea chaajanquiripae, ipamijiaqueri yamana- coventajiaqueri incavintsajamajajiaque- rinijite Aapani Irioshi.

**Ajaarantavaetatsica**  
(Mt. 19.16-30; Irc. 18.18-30)

<sup>17</sup>Oraquea yoanajigueti Jesoshi yameniri icoraquepoji irira caquinte ishiashitapojacariquea iguerovempoja- cari icanqueri:

—Tsatacantantatsica cameetsari, ¿quieroqua noncoquempani cameetsa- njite noncoguitempalinijite nonchooca- guiteni?

<sup>18</sup>Icanqueri Jesoshi:

—¿Quieroqua ococani picantantaque- naca ‘cameetsari’? Teequea inchocateji cameetsari, aparo icoca Aapani Irioshi.

<sup>19</sup>Pitsaquoqua maasanopae itioncacot- tanaqueca Moishishimi, ocanquequea: ‘Aatoja pimetojanti, aatoja poashitiro manquigarentsi, aatoja paitsitanti, aatoja pitsjeacotantimatatsi, aatoja pamativajantsi, pinquenquejacamee- tsatacoquerija piri aisa piniro.’

<sup>20</sup>Iriatimpa icanqueri:

—Tsatacantantatsica, aritarite noquempetaca imaica, noparianacaro- quea nonetsanamajatanaqueroquea maasano nochajaniquipojigueti narejevaecaro imaica.

<sup>21</sup>Yamenitsitanacariquea Jesoshi ipintsatacotanacariquea icanqueri:

—Imaica apanivani poanaquequea pojocantaguetanaqueroquea maasanopae pashintaguecaca, paantaji- aquemparoqua imentaquipae pojocaj- aqueneri coguitejacojianquitsica, pinquejetaquerogueti onchocataje oganejencaro shineta cajaempineca ontaniqui inquitequi. Arikea pincora- quetajeja pogujatanaquena.

<sup>22</sup>Iquemitsitaroqua icanquerica ariquea ocotanaca otsimeteitacaana- queri, ariqueate yoanaji, ishimampojan-

e 10.8 Jen. 2.24. f 10.14 Irirajia chaajaniquitanquitsica tee iraventacojiguempaji, mana ishineventajapojacari Jesoshi, iquemisantajiaqueri. Ari anquempejiaquempaquea aatimpa.

cavaetanacaquea, iriguentitari ajaaran-tavaetatsica.<sup>23</sup> Iriraquea Jesoshi yamenajiaqueriquea maasanopae, ariquea icantajiguiri itsatacaanejia:

—iOmanapitsamajataquempariquea ajaarantavaetatsica inquijanaque imajirontagueti Aapani Irioshi!

<sup>24</sup>Irooqua iquemajiaquerogueti icanqueca, yamenamenaitanaquequea intati itsatacaanejia. Yapijitajiroquea Jesoshi icanque:

—Nirijanijiate, omanapitsamajata-quempar inquijanaque imajirontagueti Aapani Irioshi iriraquea aventaroca irajaararo.<sup>25</sup> Arimpate iragavejaque-quea cameyo inquijanaquequea itepoquiqui quisaatonquiri irisotoana-queriquea antaqueronta? Atoquea yagavejitsi. Iriompaquea ajaarantavaetatsica caaviji anaquiero omanapitsataquempar inquijanaque imajirontagueti Aapani Irioshi.

<sup>26</sup>Iquemitsijigari itsatacaanejia arimpaqueate yamenamenaitanaque intati, icantavacaajiaca:

—Iroosacanica, quericampate agavejanquitsineca iraavajempa?

<sup>27</sup>Yamenajianaqueriquea Jesoshi icanqueriquea:

—Iriraquea caquinte teequea iragave-jeroji, iriguentiquea Aapani Irioshi agavejatsi, yagavejaquerotari maasanopae.

<sup>28</sup>Iriompaquea icantanaque Peerero:

—Nomajirote, naatimpajia novashian-tajianaqueroquea maasanopae nashinta-guecaca, noguijaguijaitanaquempi.

<sup>29</sup>Icanque Jesoshi:

—Iroomajaca noncantajiaquempica, quericaca vashiantajianaqueroneca itsovironaqueite, irioca iriguentijeguitepae, itsijoitepae, iriniro, iriri, irijanijiate, irooca iniganquitejire, cameetsanijite irisavicavenqueroquea notigarankuimenquerica intsavetanti-

mojianaqueriquea itsipapae intsatacaaji-aqueriquea Quenquetsatsarentsi Oganejencatatsica,<sup>30</sup> irojocajitajeneriquea otsipa itsovironaqueite ocaniqui quepatsiqui oshequiavaequequea aricaca oncaravaequequea 100, aisa inchoocajiaque itsipapae iriguentijeguitepae, itsijoitepae, iriniropae, irijanijiate, iniganquitejire. Cotanquitsiquea incatsimatimentajiqueru iramenaji-querigueti itsarovenquenaquea. Oncoramitapojajegueti incoguitempaniquea iranijaguiten.<sup>31</sup> Icaramirincavaequequea yamenajivetacaca imaica yanaantavaeque, cotanquitsiquea oncoramanitapojajegueti aatoquea yanaantajitsi. Aisa icaramirincavaeque teeca iranaanteji imaica, oncoramanitapojajegueti iranaantavaetanaque.

**Jesoshi icamantajiajiri aisa irimetojaque**

(Mt. 20.17-19; Irc. 18.31-34)

<sup>32</sup>Ariquea iriatimpajia ishivoquishivo-quiitanacaroquea quenavoquivrontsi itoncotoncoitanaque iroaroaitanaquequea Jerosarequi. Iriquetitaquea oananquitsi Jesoshi, iriraquea itsatacaanejia yoguijaguijaiopojiri, yamenamenaitanaquequea intati. Itsipajia guijajianaquerica itsaroajianaquequea. Ariquea yapijitajiro Jesoshi itsipajianajari tijacoñaji itsatacaanejia carajianquitsica 12, ariquea iparianacaro icamanqueri querocaca incojiquerini ontaniqui Jerosarequi.<sup>33</sup> Icanqueriquea: ‘Imaica-quea antoncotoncoitanaque oahoaitanaque Jerosarequi. Ontaniquiea ontaniqui arejerejeiquempagueti manaquea iraacaantajiqueru irira Irijanite Caquinte, irajaitanaqueri ichoocajiaquegueti saserorotejia anaantajianquitsica aisa tsatacaantajiguiroca itioncacotanaqueca Moishishini. Iriatimpajia incankequea: ‘Intsishiasti irimetojajiterini.’ Ariquea irajaitanaque-

riquea ichoocajiaquegueti teeca irijorijoigueji irimetojacaanqueriquea.  
**34** Iriatimpajia irantanaguishevaequeri, inquishoquishoavaequeri, aisa impasapasiquieri agompiaciaquitempari. Arikea irimetojajiaqueri, cotanquitsiquea aapojajempagueti 3 savincaguiteri intancorejanaje.”

**Inintajiavecaca Santiago aisa Joanca  
(Mt. 20.20-28)**

**35** Arikea iquempejiquempejipojiriquea Santiago aisa Joanca, irijanijiate Severeo, icanqueriquea:

—Tsatacaantantatsica, nonintajiaque pinetsanamajajiaqueroquea noncantajiaquempica imaica.

**36** Iriatimpajia icanqueriquea:

—¿Taate opajita pinintajiaque nantempica?

**37** Icantajiaqueri:

—Aapojajempagueti pimpeaquequempagueti Imajirojiate maasano, nonintajiavecaquea poguisavisaviitaquena nosenampijajiaquempi, aparo savicanquitsineca pitincamijempequiqui, aparo pishinampijempequiqui.<sup>g</sup>

**38** Cotanquitsiquea Jesoshi icanqueriquea:

—Teequea pintsajigueroji ocatica pinintavecaca. ¿Arimpate pagavejajiaquequea aviatimpajia pimire nomiraquempaca naatimpa? ¿Arimpate pagavejajiaque povinacajatacaantantaquemparo novinacajatacaantantaquempacnaatimpa?<sup>h</sup>

**39** Iriatimpajia icanqueriquea:

—Jeejeguitati nagavejaquempa. Icanqueriquea Jesoshi:

—Pitampaticamajataquero pimiraqueroquea nomiraquempaca naatimpa, arimaja povinacajatacaantantaquemparo novinacajatacaantantaquempaca naatimpa.<sup>i</sup> **40** Cotanquitsiquea teequea naatimpa cantatsineca quericaca senampijaquenaneca savicanquitsineca notincamijempequiqui aisa noshinampijempequiqui. Iriguentiquea cantanquitsica Aapani Irioshi paesatoniqui iroaqueragueti.

**41** Arikea iquemajiajavaquegueti itsipajia 10 itsatacaanejia itijerequijiaqueri Santiago aisa Joanca. **42** Cotanquitsiquea Jesoshi icajemajiaqueriquea icanqueriquea:

—Pitsajiguiritarite iriraquea ipejaiaqueca imajirojiate teeca irijorijoigueji manaquea yatsanavaecari igonorojia, arikea iquempejiaica iramajirorejia yomperaperacari irashijia. **43** Cotanquitsiquea aviatimpajia aatoquea piquejijiga. Ariguenti quericaca nintanquitsineca iranaantimojiaquempi, impeitsitimpaja amijiguempineca. **44** Quericaca nintanquitsineca irijivatante, impeitsitimpaja iromperare maasano. **45** Quempeaquea Irijanite Caquinte teequea irooqua incoraquetashiteji iramijitavaqueri, iroguenti incoraquetashique incavintsajantapoje, aisa irimetojaventsitempariquea maasanojia, onquejevequempaquea irivegaraventajajeneri irisotoimentajianajeniji santanatacojiavetanquitsica.

**g 10.37** Irira savicatsica itincamijempequiqui majirontatsica yanaajiaqueri itsipajia, iquejemajirovecari majirontatsica, aisa iquejetaca savicatsica ishinampijempequiqui, iquejemajirovetajari. **h 10.38** Ocaticaquea icanqueca Jesoshi manaquea iquejetacaacaro irantsipequempagueti, oquejetaca incanquegueti: “¿Arimpate pagavejajiaquequea aviatimpajia pantsipevaequempaquea pinquempejiaquenaquea naatimpa nantsipevaetaquempagueti?” **i 10.39** Iquempetacaacaro Jesoshi, quejetacaquea incanquegueti: “Pitampaticamajataquero pantsipevaequempaquea pinquempejiaquenaqueate naatimpa nantsipevaetaquempagueti.”

**Jesoshi yamenacajairi shamoncajari  
Varitimeo**  
(Mt. 20.29-34; Irc. 18.35-43)

<sup>46</sup>Iroompaquea yarejetapojacaroquea Jesoshi Jericoqui, itsipatsipaitapojacari- quea itsatacaane. Oraquea yoanajigueta- quea arimpaqueate yoshequiaeta- quea oguijagujitanaquerica. Ariquea oraniqui ocaravoquitapojigueti quenavoquirontsi isavicaque shamon- cajari pajitatsica Varitimeo, iriguenti- quea irijanite Timeo. Iriatimpaquea iroguenti isavicaventi yamanantague- imentaquipae. <sup>47</sup>Irooquea iquemacoque- rigueti coraquetapojojishatsi Jesoshi Nasarequitica, icajemitsitanacaquea iririjencatanaque, icanque:

—iJesoshii, Ichoviquitanaqueca Taavini, pimpintsatacotenashiatsi!

<sup>48</sup>Icantomajajiaqueriquea oshequini, icantsijavetari irisan- tanaque, cotanquitsiquea iriatimpa arimpaqueate icajemamajatanaque- quea:

—iIchoviquitanaqueca Taavini, pimpintsatacotenashiatsi!

<sup>49</sup>Icatiapojaquea Jesoshi icanque: —Iintsjate pincajemerijate.

Icajemitsitari shamoncajari icanque- riquea:

—Iintsija, imaica pishinevaetanajem- paja, pincatianaje, icajemaquempi- queate.

<sup>50</sup>Icatiitsitanaca ipishoncapanajantiro- quea isavotacaca ishiashitanacariequa Jesoshi. <sup>51</sup>Icantavaqueri Jesoshi:

—Taa opaji pininque nantaquem- piro?

Ican shamoncajari:

—Tsatacaantantatsica, noninque namenaje.

<sup>52</sup>Icanqueriquea Jesoshi:

—Iintsija poanaje, pitsaquetarite nagavejaque namenacaajempi,

paventantaquenaca, irootaquequea pamenantanajaca.

Arikea icotanaca amenaji, yoguijata- najiri quenavoquirontsiqui.

**Yarejetapojacaroquea Jesoshi Jerosarequi**  
(Mt. 21.1-11; Irc. 19.28-40; Jn. 12.12-19)

**11** <sup>1</sup>Iroompaquea iroshipojigueti irarejerejeipojemparo Jerosare, yarejerejeipojajaroquea Vetepaje aisa Vetania Orivotsempiqui. Arikea iriraquea Jesoshi itigarancjiaqueriquea mavite itsatacaane icantajavaqueri- quea:

<sup>2</sup>—Poanaquequea ontaniqui quempeji guinentinintsiqui, arikea pamena- japirojeri aparo aashino irijanigantirenajani- qui shiticacotaca, tequeratatirajaquea irishiashiavijitacotantajitempariji.

Pishiticarejacojianaqueri pamajiaquena- rija. <sup>3</sup>Choocagueta cantajiaquempineca:

‘¿Querocampate pincojiaquerini?’

Aviatimpajia pincantajiguera: ‘Iriguenti coacotacari Amajirote, taampinatari iroguipijaemperi.’

<sup>4</sup>Arikea yoayoaitanaquequea yamenajapirojiriquea shiticacotaca tsivironaqui qui sotomorontsiqui ocaravoquitapojigueti quenavoquirontsi, arikea ishiticarejacojiaqueriquea.

<sup>5</sup>Iriraquea choocajanquitsica oraniqui icanqueriquea:

—iQueroaqueate pincojiguerini?  
¿Taaquea pishiticarejacancarica aashinogantirenajaniqui?

<sup>6</sup>Icantanaqueriquea iriatimpajia icantajavaquerica Jesoshi, arikea ishinejiaqueneri iraajianaqueneri.

<sup>7</sup>Arikea yaajianaqueriquea yamajia- queneriquea Jesoshi, ipashicamititsajia- queneri iitsaarepaequi, iriatimpa isavicanacari ishiacotantanacariequa.

<sup>8</sup>Irirajia tiorencaventajiacarica iconoagarantajiacaquea yovemaroncaa- shijiavaqueri iitsaare quenavoquiron-

tsiqui, itsipapae aavashijiavanquitsica ovashi ivemaroncaashijiavaqueriquea.<sup>j</sup>

<sup>9</sup>Irirajia iriquetica oahoaitananquitsica aisa irirajia guijaguijaitaquerica icajemajianaque, icanque:

—iCaaviji yoganejencamajataca!

—iIntsishiatsi irishineventajiquempari iricatica coraque tapojatsica itigaranca queca Majirontamajatatsica!

<sup>10</sup>—iAri incoquempani irishineventajiquempariquea iricatica peanquitsineca Amajirojiate inquempetajempariquea Taavini ipeavecagueti coraman i m a j i r o j i a t e choviquijianacajica!

—iCaaviji yoganejencamajataca Aapani Irioshi choocatatsica jenoqui!

<sup>11</sup>Arikea yarejetacaroquea Jerosarequi, yoanaquequea tetemporoqui itsaroventantajitarica Aapani Irioshi, yamenaguepojiroqueate itsitacaguetapojiroquea. Iroompaquea incajaranquiguitetanaquitigui isotoanaji yoanaji Vetaniaqui, itsipatsipaitanajari itsatacaanejia carajanquitsica 12, javaetanaji catsirincaiteri tsaparoncaquitetanaja.

**Jesoshi icanqueroquea iguera aatotarite  
occoatatajitsi osovena**  
(Mt. 21.18-19)

<sup>12</sup>Arikea osavincaguitetanajigueti isotoanajirogueti Vetania, itaseapoji quea Jesoshi. <sup>13</sup>Yamenacotsitapojacaroqueate iguera choocatanquitsica ovana, irootaquequea yoantapanajantaca iramenamajapanajanteroquea choocaca osovena, cotanquitsiquea iquempejive tapojacaroquea quempeji teequea

anejeroji, iroguentini ovana. Tequeratarite arejetempaji ochoocatantaca osovena. <sup>14</sup>Icantitaroquea:

—Imaicaquea imaica aatoquea ishecatimajitajarotsi pisovena.

Iquemajiaqueriquea itsatacaanejia.

**Jesoshi yoguivorocajiaqueri  
jocantantajiavecaroca tetemporoqui**  
(Mt. 21.12-17; Irc. 19.45-48; Jn. 2.13-22)

<sup>15</sup>Arikea yarejerejeitaca Jerosarequi, iquijanaque Jesoshi oniganquirequi oticaacoroqui tetemporo itsaroventanta-jitarica Aapani Irioshi, yamenajiajopojiri-quea jocantantaguetirica viratsipae intsompogui oniganquirequi aisa vegaratantajigurica. Yoguivorocajia-jaqueriquea maasanojia, aisa yapitaqui-aguequieroqua ishitaponcaropae yyojoquijitantarica imentaquitsite guipiantajigurica imentaquipae.<sup>k</sup> Iquejetsiguetaroquea aisa isavisaviitan-tacaca jocantajigurica emorenipae.

<sup>16</sup>Icantimentajiaqueriquea maasano aatotarite iquijacaantajianacaro onigan-quirequi tetemporo irajaianaquero irajaaropae iravisacaantajianaquem-paro antaqueronta. <sup>17</sup>Arikea itsataca-jaqueriquea icanqueriquea:

—¿Arimpate tee ontionquempaji:

‘Oratica notsovironaquite incantacoji-tero iroguenti ashi incoraque tapiniji tempaca caquinteguetatsica iramanajia-quenaniji’?<sup>l</sup> Cotanquitsiquea aviatim-pajia manaquea pipeacajaiacaro imoro itsitantaca aitsitantajitsica.<sup>m</sup>

<sup>18</sup>Iroompaquea iquemacojiaquerigueti saserorotejia anaantajianquitsica aisa

**j 11.8** Yovemaroncaashijiavaquerigueti iitsaare quenavo quirontsiqui aisa ivemaroncaavoqui-tashijiavaquerigueti ovashi, manaquea iquejetacaavacari majirontatsica

ishineventajigarigueti. **k 11.15** *guipiantajigurica imentaquipae*. Incoraque quegueti joriojia quenajiajopatsica otsipapae guinteninintsipaequi iramajiaquegueti cantashitatiaguetanquitsica imentaquipae, irojocajiajopajeneri guipiantajirica imentaquipae irojocajiajeneriniji itsipapae cameetsaniji irojocagarantajajeneriniji Aapani Irioshi tetemporoqui, iriocia irivegarajaque viratsi irojocajiaquenerica. **l 11.17** Is. 56.7. **m 11.17** Jer. 7.11.

tsatacaantajiguiroca itioncacotanaqueca Moishishini intintajiavecauea irimetoja- jiaquerime, cotanquitsiquea querocam- pate incojiaquerini, itsaroacaajiacari- quea, yamenajiaqueri yomporoguijaven- tajiacari maasanopae yamenamenaita- naquequea intati ishineventajanacari itsatacaantavaequegueti.

<sup>19</sup>Ariuea opitsecajencatanajigueti, yoanaji Jesoshi, isotoanaquero Jerosare.

**Oshimpieguriricanaquequea iguera  
(Mt. 21.20-22)**

<sup>20</sup>Osavincaguitetanajigueti yoayoaita- naji, yamenacojianajiro iguera jac sampirocani metojamajataque maasano ovaritsa. <sup>21</sup>Iriraquea Peerero iquenqueji- tanajaro chapinquitica, icanque:

—Tsatacaantantatsica, iintsja pameneroja intati ontatica iguera picantaqueroquea chapinquipi aatonijite ochoocatajitsi osovena, imaicaquea metojaque.

<sup>22</sup>Icanque Jesoshi:

—Paventaventaitemparijke Aapani Irioshi. <sup>23</sup>Iroomajacaquea noncantajia- quempica, quericaca cantaqueroneca ocatica otsempi: ‘Poanaquetsija pojocajatempa inirojaniqui quentijani’, aatogueti iquenquejaveta: ‘Arica’, iroguenti iraventamajaquempariquea Aapani Irioshi, ariuea oanaquequea ojocajapojempa. <sup>24</sup>Jero imaica nocantantajiaquempica, taaca opajita pamanajiaquerica Aapani Irioshi pamanajiaquerigueti, paventamaja- quemparija pintsamajajaqueja arimajaca irojocajiaquempi, ari oncotanaquempa. <sup>25</sup>Oraquea pamanaji- guerigueti Aapani Irioshi, choocagueti picatsimajiaqueca, iroquetitaquea pimpeacojajempari taaca opajita icatsimatacaaquempica cameetsanijite irishinevenquempinijite Piri chocata- tsica inquitequi irishetajempironijite

pipeacaagushejiacaca aviatimpajia.

<sup>26</sup>Cotanquitsiquea aatoguetija pipeacoji- ajaritsi ipeacaajiacaca catsimatcaa- quempica, aatoquea ishetajirotsi Aapani Irioshi choocatatsica inquitequi pipeacaagushejiacaca aviatimpajia.

**Icoacojitaqueriquea Jesoshi taaquea  
tigarancaqueri**

(Mt. 21.23-27; Irc. 20.1-8)

<sup>27</sup>Ariuea yarejerejeitapojaro Jerosare, iriraquea Jesoshi iquijanaque- quea intsompogui oniganquirequi teemporo yanijivijitaque. Incajaranqui- guitetanaquegueti icoraquecoraqueita- shipojaqueri saseroroteja anahtajian- quitsica, itsipatsipaicariequa tsatacaan- tajiguiroca itioncacotanaqueca Moishishini, icoraquejiaquequea aisa jivajatiacsica.

<sup>28</sup>Icantajiaopojaqueri:

—¿Taaquea cantauquempi piquempe- tancaroca imaica poguivvorocantajiac- rica jocantantajatiacsica? ¿Taampate tigarancaquempiquea?

<sup>29</sup>Iriraquea Jesoshi icanqueri:

—Iintsja naatimpa noncoacotempi. Poguisotoaquenarogueti, ariuea nonquempetsitempa naatimpa noncamanquempiquea queri tigaranca- quenaca. <sup>30</sup>Iviñacajatantigueti Joancani, ¿queroquea oquenapojini? ¿Irooca oquenantapojaca inquite? ¿Irioca oquenantapojaca caquinteja? Intsja pincamantena.

<sup>31</sup>Irooquea iquemajiavaquegueti iquenquetsatavacaajianaca icantajia- naque:

—¿Querote ancoterini? Ancantsive- temparigueti oquenantapojaca inquite, iriatimpa incantanaque: ‘Iroosacanica ¿queroquea ococani teeca pinquemisan- tantajiguempariji?’ <sup>32</sup>¿Cotanquitsiquea ariguettija ancantsivetempari oquenanta- pojaca caquinteja...?

Manatari itsaroacaajiacariea  
omporoguijajianquitsica, maasanopae-  
tari icanque irira Joancani iriguenti  
tsavetantatsica itigarancaqueca Aapani  
Irioshi.<sup>33</sup> Jero icantantajiacarica  
Jesoshi:

—Teetari nontsajiguenica.

Arikea Jesoshi icantajiaqueri:

—Iroosacanica, arikea nonquejeta-  
quempaquea naatimpa, aatoquea  
nocamantimpitsi quericaca tigaranca-  
quenaca naatimpa.

**Jesoshi iquempetacaajiacariea  
quempoguijaveraroa ovaitsquimashi**  
(Mt. 21.33-46; Irc. 20.9-19)

**12**<sup>1</sup> Arikea Jesoshi iquempetaca-  
cotañanari icanqueriquea:  
—Ichocaque aparo caquinte yashin-  
caquea iguepatsite. Iroompaquea  
imiamaroncaqueroquea ovaitssoqui,  
itantonacoqueroquea. Iqueecashiquero-  
quea yagaticantajitaroca ovaitssoqui  
osotoajatantanaquempaca ovaja,  
ipeacaitstairoquea irisavacantaquem-  
paca jenoqui quempoguijaveroneca  
cameetsanijite iramenamajaqueronijite  
aatonijite yaajiguetirotsi. Iroompaquea  
icajemajiaqueri itsipapae irishiacojia-  
queneriquea. Oraquea onchoocatana-  
quegueti irojocagarantajiaqueneri  
iriatimpa. Arikea yoavaetanaquequea  
jmm osamani.<sup>2</sup> Ocoramanivaetapoji-  
gueti aapojajagueti osamparipiotantana-  
caca ovaitssoqui itigarancavecarí aparo  
yashincaca iramanajajateriquea irojoca-  
garantajajajenerime iriatimpa.<sup>3</sup> Cotan-  
quitsiquea iriraquea shiacojiaqueroca  
manaquea yaajivavaqueri itavatavaajia-  
queri itigarancajajiri ejempaco.

<sup>4</sup>Arikea irira ashincaroca itigarancui-  
tsitaja itsipa. Iriatimpa iroguenti  
iquirajashitequitacaajivavaqueri  
icantagushejiavaqueri.<sup>5</sup> Itigarancave-  
taja itsipa, arikea imetojajivavaqueri.

Iroompaquea itigarancuitsivetaja  
itsipapae oshequini. Iconoagarantaca-  
queate itavatavaajivavaqueri, itsipapae  
imetojajivavaqueri.

<sup>6</sup>“Iriguenti choocatajatsi irijanite  
ipintsamajatacacá. Arikea itigarancui-  
tsitari iriatimpa, icanque: ‘Iriocampa  
nirijanite, iriguentequea irajaitavaque  
cameetsa, inquemisantajivavaqueri.’

<sup>7</sup>Cotanquitsiquea iriatimpa jia irooqua  
yamenavaquerigueti icoraquepojigueti  
iquenquetsatavacajianaca icanquequea:  
‘Jeeri irintatica ashinqueparoneca  
maasanopae irimetojanajegueti iriri.  
Jamequetiroshias i ametojajivavaqueri  
cameetsanijite aatimpajia ashintamaja-  
tajemparoneca.’<sup>8</sup> Iroompa yarejevepo-  
jaca yaajivavaqueriquea imetojajiaqueri,  
ipishoncavaequitiri antaquerontá  
otantotacocaguetai ovaitsquimashi.

<sup>9</sup>“¿Imaica querocaca incojiaqueriní  
ashincaroca iguepatsite? Manaqueate  
iroashijiaquiteriquea irimetojajiaqui-  
teri, itsipapae queate incajemajiaje  
quempoguijajerineca iniganquite-  
jire.

<sup>10</sup>“¿Arimpate teequea pampatsajavan-  
tacojigueroquea Itioncacaantaqueca  
Aapani Irioshi coramaniquí? Arikeate  
ocanquequea imaica:

‘Oraquea ogota mapi teeca irishine-  
ventajavetempaji peacaajiacar-  
roca mapipanco,  
opeanacaquea anaantamajatanqui-  
tsica quishotacaqueroca.

<sup>11</sup> Iriraquea Aapani Irioshi ipeacajaa-  
roquea.

Amenajiaquereroquea aatimpajia  
oganejencani.”

<sup>12</sup>Iriatimpa jia inintajiaiveca  
iraacaantajajiaquerimequea, iquemajia-  
vaqueritari iriguenti iquejetacaajiacar-  
ica, cotanquitsiquea itsaroacaajiacariea  
omporoguijajianquitsica, jero  
yoayoaitantajianacaca.

**Icoacojiqueru Jesoshi cameetsavaequempa irojocajiqueneri Sesa imentaquipae**  
(Mt. 22.15-22; Irc. 20.20-26)

<sup>13</sup>Iriraquea pariseojia itigarancagarantajaquequea itsatacaane aisa shinevencarica Erorishi<sup>n</sup> iroaroaitanaque ichoocaquegueti Jesoshi incomitacaajiaquempari cameetsanijite onchoocaque-nijite incankeca ompampiatantapojem-paca incatsimatacaantajiaqueri.

<sup>14</sup>Iriatimpajia yoayoaitanaquequea icantajapojiri:

—Tsatacaantantatsica, notsajiaque aviatimpa teetarite pamataguempaji. Tee inchoocateji quericaca pagamaja-quempaca, aisa teequea pintsaroacaguempariji caquinte, irioca anaantavetanquitsica, irioca teeca iranaanteji. Pitsatacaantigueti tampatica poaquero picamanquerigueti queroquea incojiaquempani irinetsanajigueroniji inintaguetica Aapani Irioshi. Aviatimpa pitsatirokeate icanqueca majirontatsica Sesa icanquegueti maasanojia jorioja irojocagarantapinijiaqueneri imenta-quipae. Imaica ¿queroca pincanten? ¿Cameetsampa nojocajiaqueneri, aricaca tee oncamestsateji? <sup>15</sup>¿Ariquea nojocajiaqueneriquea, aricaca aato nojoquinitsi?

Cotanquitsiquea Jesoshi itsatavaque-roquea teequea cameetsa incantajigueji, manaquea ishinetamampeajiacaqueate intati, irootari icantantacarica:

—¿Quero ococani pinintantajiacaca pincomitacaajiaquename? Iintsija pojocajiguenerijate apamentaquiero tenario<sup>o</sup> nameneritate.

<sup>16</sup>Iriatimpajia yojocajiaqueneriquea. Iroompaquea icanqueriquea:

—¿Taa ipajita iricatica ivaantoriji-queca? ¿Taaquea ashintaro ivajiro tioncanquitsica?

Icanqueriquea:

—Iriguenti majirontatsica Sesa.

<sup>17</sup>Icantsijigari Jesoshi:

—Iroosacanica, pojocajajenerijate Sesa yashincaca iriatimpa pinetsanati-menqueroniji icanqueca, aisa pinquejetacajiaquempariquea Aapani Irioshi, pinetsanamamajiaqueroja maasanopae icantaguequeca.

Iquemajiaquerogueti icantajiaque-rica, ariquea yamenamenaitanaque intati.

**Icoacojitaqueriquea Jesoshi quero oncoquempa**

**intancoretancoreitanajegueti oncoramanitapojaegueti**  
(Mt. 22.23-33; Irc. 20.27-40)

<sup>18</sup>Iroompaquea irioquea oahoitanan-quitsica saroseojia iramenajiaquiteriquea Jesoshi. Iriatimpajia iriguentiquea cantajitsica aatoquea itancoretancoreitanajitsi metojatsica. Icantajapojiqueru:

<sup>19</sup>—Tsatacaantantatsica, iriraquea Moishishini itioncanaque coramani paperiqui icanque inchoocaquegueti caquinte teeca irijanintempaji, aapojem-paqueti irimetojanajegueti irojocapanajantero imanquigare, choocaguequea iriguenti-ge quee irioquea manquigatajemparone irijanintacajaemparoquea quempetaja irioca irijanintajari metojanquitsica.

<sup>20</sup>Coramani ichoocaque aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparoji. <sup>21</sup>Iroompaquea irioquea manquigavetajaro itsipa

**n 12.13** Pamenero Mr. 3.6 otioncacagueti isavi itsavetacojiquerigueti *shinevencarica Erorishi*.

**o 12.15** Iriraquea *tenario* irio imentaquitsite Iramaquitica. Iramiterigueti itsipa apajencaro savincagueri irivegarataqueri aparo tenario.

oguijatirica. Arikea iquempetaja iriatimpa, imetojanaji teequea irijanintacaguemparojo. Arikea iquempetaja itsipa niganquitica.<sup>22</sup> Arimpaquea iteroncanaca maasano imanquigajiavecarogueti, teequea irijanintacajaiguemparojo. Arikea ometojitsitanaja iroatimpa.<sup>23</sup> Imaica, iintsijsa pincantenaja, oraqueate oncoramanitapojagueti intancoretancoreitanajegueti maasano metojatsica, ¿quericaca manquigamatatajemparoneca? Maasanotari imanquigajiavecaroquea.

<sup>24</sup>Icanqueri Jesoshi:

—Aviatimpajia manaquea picomijiaca, teetarite pintsajigueroji querocaca ocanqueni Itioncacaantaqueca Aapani Irioshi coramani, aisa teequea pintsajigueroji yagavejica iriatimpa.<sup>25</sup> Oncoramanitapojaqueuti intancoretancoreitanajegueti maasanopae metojatsica, aatoquea quericaca manquigatajatsineca, aisa manquigarentsi aatoquea yojocantajitajirotsi irimanquigajitajemparo, manatarite inquempejianajemparquea irashivantijitete Aapani Irioshi choocajatiacsica inquitequi.<sup>26</sup> Imaica aviatimpajia iroguentiquea picanque aatoquea itancoretancoreititsi metojaripae. ¿Arimpate teequea pampatsajavantacojigueroji itioncacotanaqueca Moishishini coramani iquenquetsataquegueti Aapani Irioshi maequitatsicaqui? Icanqueriquea: ‘Naroguenti Iroshimajate Averaame, Ishaaco aisa Jacovo.’<sup>27</sup> Teequea irio Iroshite metojatsica, iriguentiquea Iroshite anijatsica. Aviatimpajia iroguenti picomimajajiaca.

**Queroca caavijica anaaque  
irinetsanamajajiqueca**

(Mt. 22.34-40)

<sup>28</sup>Arikea icoraquepojaque aparo tsatacaantiroca itioncacotanaqueca

Moishishini, iquemapojaqueri iquenquesatsavacaajiacaca. Yamenaquequea itampaticamajataqueroquea Jesoshi itsatacaaquerigueti saroseoja, arikea icanqueriquea iriatimpa:

—Oraticapae icantacaantica Aapani Irioshi irinetsanajite ¿querocate anaantamajatatsica?

<sup>29</sup>Iriraquea Jesoshi icanqueriquea:

—Oraquea caavijica anaaque icantacaantica irinetsanajite iroguenti cantatsica: ‘Pinquemisantamajatenajate, ishiraerijia. Iriraquea Arioshite Majiron-tamajatatsica, iriguenti apaniromajaca.

<sup>30</sup>Pimpintsamajataquemparija Majiron-tamajatatsica Pirioshite, pampaniroma-jatanaquerija, pimpintashirentamaja-quempari, pimpintasguenquejanemaja-tanaquerija, pintampishiventamaja-queneri irooriji pipintsamajatacarac.<sup>31</sup>

<sup>31</sup>Oraquea mavitetapojatsica iroguentiquea cantanquitsica: ‘Pimpintataquemparija pigonoro pinquejetacaajempa pipintsatagueti aviatimpa.’<sup>q</sup> Teetarite onchoocateji otsipa icantacaantaqueca anaquieroqua ocatica mavite.

<sup>32</sup>Iriraquea tsatacaantiroca itioncacotanaqueca Moishishini icanque:

—Tsatacaantantsica, arimajaca pinetsanamajajiqueroquea, iriraquea Iroshimajaca iriguentiquea aparomajaca, teequea inchoocateji itsipa.<sup>33</sup> Ampintsamajaqueparquea ampanirontamajatanaqueri iriatimpa, ampintasguenquejanemajatanaquerija, ampintashirentamajatanaquerija, antampishiventamajaquepari. Aisa ampintsamajaquepari agonoro anquejetacaajempa apintsatagueti aatimpa. Irootaquequea inintamajataque Aapani Irioshi, anaquieroqua antaajiguenerigueti viratsipae maasanomontiina irooca aisa ajocajiguenerigueti Aapani Irioshi taaca opajitapea.

p 12.30 Ireo. 6.4-5. q 12.31 Irev. 19.18.

<sup>34</sup>Iriraquea Jesoshi yamenquerigueti iquenquejamajaquero itampaticamajata- queroquea yoquiero, icanque:

—Irooshipojishiatsi pimajirontamaja- quempari Aapani Irioshi.

Ariquea icantajiaquiti mariric, ariquea oparianaca teequea quericaca coacotaje- rineca.

**¿Taaquea choviquitanaqueri  
Quirishitotatsica?**  
(Mt. 22.41-46; Irc. 20.41-44)

<sup>35</sup>Oraquea itsatacantanajigueti Jesoshi oniganquirequi teemporo icanque:

—Iriraquea tsatacantajigiroca itioncacotanaqueca Moishishini icanquequea: ‘Iriraquea Quirishitotatsica’ iriguenti ichoviquini Taavini.’ ¿Querocaquea ococani icantantajiacaroca? <sup>36</sup>Coramanitari Ishire Aapani Irioshi iquenquejacaquerigueti Taavini icanque:

‘Iriraquea Majirontatsica Aapani Irioshi icanqueriquea Nomajirote:

Pisaviquetaja pisenampijaqueña notincamijempequiqui, pintspataquenaquea arejevaetana- quempa nagavejajiaquerigueti maasano catsimajiaquempica, onquejeve- quemparo povanquegontatsi- tempari.’

<sup>37</sup>Iriraquea Taavini iringuequea cantaquerica: ‘Nomajirote’, ¿queroquea incoquempani inchoviquitanaqueri?

Icaramirincavaetanaquequea omporo- guijaventacarica, iquemajiavaquerigueti ishinejianaca.

**Icanque Jesoshi aatojate  
yoguijaguijaitacotiritsijate  
tsatacantajigiroca itioncacotanaqueca  
Moishishini**

(Mt. 23.1-36; Irc. 11.37-54; 20.45-47)

<sup>38</sup>Arikea itsatacantanajigueti Jesoshi icanque:

—Inchiquiojitala poguijaguijaitacotiritsijate tsatacantajigiroca itioncacotanaqueca Moishishini. Iroguenti ishineventajiaci inquitsaajerontajia- quemparo ontiasearo cameetsanijite irisemeque. Aisa yoayoaitapinique ontaniqui yojocantajiguetirogueti taaca opajitapae ajaararontipae inintajiaque inquenquesatacaajitavaqueriquea.

<sup>39</sup>Icoguitani yoapinijiguigueti shinago- gaqui icapiocantapinijiaca, inintajia- quequea iroguisavacajitavaqueri intsipatsipaipojempariequa anaantajia- tica. Arikea iquejejiacaquea aisa icapiocajiacaguetai irishecajiaquempa- quea, inintajiaque iroguisavacajitava- queriquea intsipatacantajiquempari- quea anaantajatsica. <sup>40</sup>Aisa yamatavi- matavivaetaqueroquea metojacoropae iteroncamajatsitaqueroquea ashintague- caca. Aisa yamanamampeajacariquea Aapani Irioshi teetaquea irisanticotsi- tempaji, isemejiaque intati. Iriatimpajia caaviji iranaajiaquequea incatsimamaja- tijaqueri oncoramanitapojaqueri.

**Metojacoro ojocaueneriquea Aapani  
Irioshi omentaqui site  
(Irc. 21.1-4)**

<sup>41</sup>Arikea yoanaquequea Jesoshi isavacique tampatica ochoocaquequerigueti itetantajitarica imentaquipae yojocaji-

**r 12.35 Quirishitotatsica.** Iguenquetsatsarequi guiriegojia icanquegueti *Christos* (Quirishito) manaquea ocanque “Ishaguijaqueca” aisa “Icoguijaqueca”, irishaguijitaqueritaro orejiqui orivo irirajia icoguijiaqueca impeaquempa imajirojiate irooca isaserorotejiate. Irira Quirishito iringuequea itsavetacotsitacaca tsavetantajitsica coramanitica intigarancaque Aapani Irioshi impeaquempañi Imajirojiate maasano.

quenerica Aapani Irioshi. Yamenajiavaqueriquea maasano yojocajiaquegueti imentaquitsite. Iconoajiacashintajianquitsica yojocamajataquequea oshequini.<sup>42</sup> Iroompaquea ocoraquepojiquea aparo metojacoro, teequea ashintempajji, otepojiri iroatimpa movimentaquitejaniqui omentaquitsite.<sup>43</sup> Yamenaqueeroquea Jesoshi icajemajiqueriquea itsatacaanejia icanqueriquea:  
—Arimajaca ocatica metojacoro teeca ashintempajji yamenaqueeroquea Aapani Irioshi otetaquequea oshequini, anajaiaqueriquea maasano.<sup>44</sup> Iriatimpajja yaagarantavajiri imentaquitsite, yashintavaevetacatari, cotanquitsiquea iroatimpa teeca ashintamajavetempajji manaquea aacaajaniquicari maasano ashincaca ovegaratantajempameca osheca.

**Jesoshi icanque irisovejaiquero teemporo**  
(Mt. 24.1-2; Irc. 21.5-6)

**13** <sup>1</sup>Ariquea isotoanajiroquea Jesoshi intsompongou oniganquirequi teemporo, icanquequea aparo itsatacaane:

—Tsatacantantatsica, pameneroja nirotsentseina mapipae ipeacaantajitaroca. ¡Cameetsavaequeuequea mapipancopae!

<sup>2</sup>Cotanquitsiquea iriraquea Jesoshi icanqueri:

—¿Arite pamenajiaquero maasanopae ocatica? Aatoquea ochoocatajitsi aparo mapi ogataajatsineca, maasanopae irisoveacomajitaquero.

**Queroquea oncotanaquempani**  
**irooshipojegueti onteroncaguetanajempa**  
**quepatsi**

(Mt. 24.3-28; Irc. 21.7-24; 17.22-24)

<sup>3</sup>Ariquea yoayoaitanaquequea Orivotsemppiqui otampaticatacoqueroquea teemporoqui, ariquea isavicaque

Jesoshi oraniqui. Iroompaquea iriraquea Peerero, Santiago, Joanca, Antirishi iquempejiquempejiipojacariquea, icanquijapojiri:

<sup>4</sup>—Pincamantena, ¿querocate oncarateni irisovejaiqueroni? Irooshipojegueti onetsanatantaquempaca, ¿taa opaji nontsatantajiajavaquemparoca?

<sup>5</sup>Iriraquea Jesoshi icanqueriquea: “Shosho yamatavijajitimpitsija.

<sup>6</sup>Incoraquecoraqueitaquetari oshequini pinajajiaquenaneca cantajanquitsineca: ‘Naroguenti’, ariquea iramatavijajiqueru incaramirinacatashivaetanaqueri.

<sup>7</sup>Pinquemacojiavaquerigueti irashimirintavacaajianaquempaquea quempeji, aisa otsipapaequi quepatsi, aatoquea pitsaroajiguitsi. Aritarite onquejetanaquempaquea imaica, cotanquitsiquea aatotaja arejetsitatsi onteroncantanaquempaca maasanopae quepatsi.

<sup>8</sup>Iriraquea guntenijianquitsica otsipapaequi quepatsi iroaroaitashijianaqueriquea osamanipaquitica, ariquea irashimirintavacaajiaquempa. Ariquea inquempejiaquempaquea majirontajatsica inchoocagarantajiaque intigarancajiaqueri igoaretajiate iroaroaitashijianaqueriquea itsipa majirontatsica irashimirintavacaajiaquempa. Aisa omoguecaguetanaquempaquea. Irantsipevajeitaquemparoqua tasetsjencapae. Onquejetanaquempagueti imaica mana oparianaca intati irantsipevetaantajitaquempaca.

<sup>9</sup>“Pagamajaguitempani. Irajaianaquempiquea icapiocajiacagueti jivajiatatsica incatsimatacantajiaquempiquea, impasatacantajiaquempi agompiquitempi shinagogapaequi icapiocantapinijiacaca pigonorojia. Aisa irajaianaquempiquea quejemajirojiavetatsicaqui, aisa majirontajatsicaqui. Ariquea aviatimpajja pintsavetantimojianaqueri pintsavetacotantajiaquenaqueate

naatimpa.<sup>10</sup>Iroquetitaquea intsavetaco-jiqueroquea Quenquetsatsarentsimajaca Oganejencatatsica intsitacacovaetana-quempariquea maasanopae caquinte-guetatsica, ariquea onteroncapojajempa.<sup>11</sup>Oraquea iraacaantajiquempigueti irajaianaquempigueti majirontajiatsi-caqui aatoquea pishoshoguiteta aatoquea piquenquejajigui pincanta-jigue: ‘¿Querocaca noncanque nompeta-naquempagueti coajica?’ Poapoaitana-queguedi iriatimpajiaqui aatoquea inchiquioji piquenquetsatashijiaquempa aviatimpajia, iriguenti quenquejaaajia-quempironeca Ishire Aapani Irioshi cameetsanijite pintsajiaquenijite querocaca pincanke.

<sup>12</sup>“Inconoagaranquempaquea iraacaantajiaqueri iriguentijeguitepae irashimajaca igonoromajaca irimetoja-caantajiaqueri. Arikea inquejejiaquem-paquea irijanintajatsica irimetojacaantajiaqueriquea irijanijiate. Itsipaquea incatsimajianaqueri iriri iriniro irimeto-jacaantajiaqueri.<sup>13</sup>Maasanopae irisema-neguintimentajiaquempiroquea novajiro pitsaroventajiaquenagueti, cotanquitsi-quea quericaca atsipetacovaetanquitsi-neca aatogueti yovashiantirotsi itsarovenquenagueti arejevaequempa irimetojanaje, irioquea iriguenti irajaita-naje inquitequi.<sup>s</sup>

<sup>14</sup>“Oraquea pamenajiaquerigueti iriraquea covaeguishetaqueroneca teemporo incatianquemparogueti ontaniqui icantimentajitirigueti incatigue (quericaca apatsajavanquero-neca ocatica pinquenquejamajateroja pintsatimenqueroniji), ariquea inchooaqueguedi ontaniqui pintampi-najapanajantejate maasanopae Jorequitica pishiashiaitapanajantejate

otsempitsemпиacagueti.<sup>15</sup>Quericaca choocatanquitsineca sotsiqui omencota-pojacagueti itsovironaquitequi ovancai-toqui, aatoquea yaguijtapanajanti, aato iquiji iraguepanajantero taaca opajitapae choocatanquitsica intsompogui.<sup>16</sup>Quericaca choocatanquitsineca iniganquitejirequi, aatoquea ipiapanajantri iraapanajantero iitsaare.<sup>17</sup>iOoshiatsi manquigarentsijia tsaraqu-jianquitsineca, aisa atsomijianquitsi-neca, caaviji antsipemajajiaquempa-quea!<sup>18</sup>Aviatimpajia pamanacoventaji-guempaja aatonijite otampaticatirotsi oncatsincaguitemajategueti.<sup>19</sup>Caaviji-tari irantsipejitaquempa anaavaequero maasanopae yatsipejiguetacaca iroaque-ragueti ipeacaacarogueti Aapani Irioshi quepatsi arejevaequemparoquea imaica. Aisa aatoquea yamenajitajirotsi oncora-manitapojaegueti.<sup>20</sup>Aatomeguedi icaratacaapojorome Amajirote oratica savincaguiteripae irantsipetantajiajaveta-quempaca interoncamajajiaquempame-quea caquintejia. Cotanquitsiquea ipintsatacotacari icoguijiaqueca,<sup>t</sup> icaratacaantapojacanarica.

<sup>21</sup>Quericaca cantajiaquempineca: ‘Jeeri iricatica Quirishitotatsica’, irooca incanqueMPI: ‘Ichooaque ontaniqui’, aatoquea piquemisantajiguiritsja.

<sup>22</sup>Incoraquecoraqueitaquequea tsavetantamampejaigatsica amatavijantajianquitsineca incanquequea: ‘Naroguentiquea Quirishitotatsica.’ Itsipaquea cantajianquitsineca: ‘Naroguentiquea tsavetanti-roca icanquenaca Aapani Irioshi.’ Aisa ironigaanqueroquea oacaantantatsica intati cameetsanijite iramatavijajiana-querinijite oshequini. Inquejetacaajitsi-vetempariquea icoguijiaqueca Aapani Irioshi, cotanquitsiquea aatoquea

<sup>s</sup> 13.12-13 Mt. 10.21-22. <sup>t</sup> 13.20 Irirajia icoguijiaqueca iriojiatari aventaventajiaquemparoneca.

yagavejiritsi.<sup>23</sup> Pagamajaventajiguem-paja, nocamantsiquempiquea imaica maasano ocatica tequeratagueti arejepo-jempa.

**Querocaca oncoguetanaquempani  
incoraquetajategueti Irijanite Caquinte  
(Mt. 24.29-35, 42-44; Irc. 21.25-36)**

<sup>24</sup>“Iroompaquea oncaraguijanaque-gueti atsipevarentsi impitsecajencata-naque catsirincaiteri, taaí aato iquitase-taji. <sup>25</sup>Iriaquea impoquiropae irasaca-raaguetanaquem-paquea choocaguetanquitsica jenoqui inquitequi. <sup>26</sup>Iroompaquea iramenajita-vaqueriquea Irijanite Caquinte incoraquetapojajegueti incoraquetanta-pojajempa mararoqui, iragavejavaetapo-jempa iranaajiaqueriquea maasano, iroganejencavaetapojempa. <sup>27</sup>Ariquea intigarancajiaqueriquea irashivantijite iroaroaitanaquequea intsitacaguajejajia-quitero quepatsi aisa inquite, incapioca-jiaqueriquea icoguijiaqueca Aapani Irioshi.

<sup>28</sup>“Imaica pintsajiaavaqueroja nontsata-caajiaquempica, nonquempetacaquem-piroja iguera. Iroquerasano etscoreva-natanaque pitsajiaquequea irooshipojaji ajagantsipojaje. <sup>29</sup>Arikea onquempeta-jempaquea oncoramanitapojaxegueti pamenaajavajerogueti onquempetana-jempagueti notsatacayaianaquempica imaica, iroquea pintsantajaviajempa irooshipojajishiatsi incoraquetajate Irijanite Caquinte, quejetaca catiapojaca sotomorontsiqui. <sup>30</sup>Arimajaca noncantajiaquempica, maasanopae ocatica nocantajiaquempica imaica onetsana-

majatanaquempaquea tequeratagueti interoncajiguempaji maasano choocajianquitsineca omparianaquempagueti notsavetantsitacaca imaica.”<sup>31</sup> Oraquea inquite aisa quepatsi ompeaqueuropa, cotanquitsiquea oraquea nocantague-queca aato opegatsi.

<sup>32</sup>“Teequea inchoocateji tsatatsineca querocaca savincaguiteri onetsanatanta-quempaca, tee aisa intsjajiteji quero incarateni catsirincaiteri. Irirajia ashivantijite inquitequitica tee intsjajigueji, ariquea iquempetaca Irijanite Aapani Irioshi teequea intsateji. Aparoqua icocani Aapani Irioshi iriatimpa itsaquieroqua. <sup>33</sup>Pagamajava-jemparija. Pincoguitepaniquea poguijajavajeri, aisa pamanaguiterini Aapani Irioshi, teeterite pintsajigueji querocaca aantapojempaca oratica savincaguiteri. <sup>34</sup>Onquempetaquem-pa-roquea iroguegueti caquinte osamani, irojocajianajeri irashijia incantajianajeriequa maasanojia taaca opajita irisavicaventajajeneri. Incanteri yashincaca quempoguijiroca sotomo-rontsi incantacoguitepani iramenagu-teni. <sup>35</sup>Irootaquequea noncantanta-quempica aviatimpajia, pincoquempaniquea poguijamajaguiterini, teetari pintsajigueji querocaca incoraquetanta-jatempaca ashincaroca tsivironaqui. Aisa teequea pintsajigueji aricaca incoraquetaje ompitsecajencaguitetana-jegueti, irooca nianquii, irooca irinijanajegueti chaapa, irooca osavinca-guitetanajegueti. <sup>36</sup>Taampinaquea incomirejapojajempiquea, inchiquioji-taja yamenajiapojaimpitsijate teequea

**u 13.30** Otioncacaca acaniqui, iguenquetsatsarequi guiriegojia ocanque *genea*. Chooca mavitepae agavejaque oncantacotaque. *Genea* agavejaque oncantacoqueri (1) irioca maasano choocajianquitsica icantaquerogueti (*esta generación o la gente de este tiempo*); (2) irioca oncantacoque maasano joriojia (*esta raza*); (3) irioca oncantacoque maasano choocajianquitsineca omparianaquempagueti itsavetantsitacaca (*esta generación, es decir, la generación que ve el comienzo de estas cosas*).

poguijajigueriji.<sup>37</sup> Oraquea nocantajia-quempica aviatimpajia, irooquea nocantajiaqueriquea aisa maasanojia: Paganmajajiaquempaja.”

**Iquemavacaimentajiacari Jesoshi  
iraacaantajiaqueri**

(Mt. 26.1-5; Irc. 22.1-2; Jn. 11.45-57)

**14** <sup>1</sup>Arikea iriraquea saserorotejia anaantajianquitsica itsipajiacari tsatacaantajiguiroca itioncacotanaqueca Moishishini yamenajiavaquerogueti mavitetapoji savincaguiteri arejetanta-pojempaca Paashicoa,<sup>9</sup> aisa savincogui-teripae ishecatantajitaroca pan teeca inconoantajitemparo anempoacaanaque-roneca, iquenquejajianaque queroquea incoquempani iraacaantajiaquerinijite Jesoshi irimetojacaantajiaqueri, cotanquitsiquea teequea irininteji inquemacojitaqueri. <sup>2</sup>Icanquequea:

—Oraquea anaanajempagueti Paashicoa, arikea aacaantajiaqueri. Imaicaquea imaica aatotaja aacaantaji-guiritsijate aatonijite icatsimatacójana-queritsijate maasano omporoguijaventa-jiacarica.

**Ishaguitantajicari Jesoshi  
casancajencajari**

(Mt. 26.6-13; Jn. 12.1-8)

<sup>3</sup>Arikea yoanaque Jesoshi Vetaniaqui itsovironaquitequi Shimo icantajitica Avejancavetatsica. Isavisaviitaquequea ishecajiaqueate, arikea ocoraquepoji manquigarentsi amacopojiri casancajen-cajari vegaramajatatsica, ipeacaantajita-roquea naarero, tee inconoajatantaji-temparoji otsipaja. Iroguenti yoguijaan-tajicaro chovintyoriqui ipeacaajitaca mapi icantajitica aravasetero. Amapoja-

querogueti iriatimpaqui otsanorejacotsi-taroquea oshaguitantsitariquea ishinqui-reguishi qui. <sup>4</sup>Iconoagarantajiacaquea savisaviitanquitsica oraniqui icatsimaji-anaquequea iquenquetsatavacaajianaca icankequea:

—¿Querocaquea? Opomatsajatacashisti-atci casancajencajari. <sup>5</sup>Ovegaravaeca-queate anaanaquero 300 tenario.<sup>6</sup>

Arimesano irojocantajiquerome aanquemparome imentaqui irojocajita-quenerimequea coguitejacojianquitsica.

Arikea icatsimajiaqueroquea.

<sup>6</sup>Cotanquitsiquea Jesoshi irooqua iquemajiavaquerigueti icantsijigariquea:

—Iintsija ariotaquetsijate, aatoquea pasereajiguirotsi, cameetsavaequequea oshaguitanquenaro. <sup>7</sup>Iriraquea coguitejacojiatsica icoguitanitarite pintsipajia-jempariquea, pinitajiaquegueti pincavintsajajiaqueri pincavintsaajajia-queriqueate, cotanquitsiquea naatimpa-tarite aatoquea picoguitani pitsipajia-natsi. <sup>8</sup>Imaica iroatimpa onetsanaquero agavejaqueca, oshaguitsinotantaquenaro casancajencajari ashi irojoquijijitajate-nagueti nometojanaquegueti. <sup>9</sup>Imaica noncamanquempiquea arimaja querocaueti intsavetantajiqueroni Quenquetsa-tsarentsi Oganejencatatsica maasanopae quepatsipaequi, arikea intsavetantaji-querouquea ocatica manquigarentsi oshaguiquenagueti cameetsanijite inquenquejacomimentajitajeronijite iroatimpa.

**Jorashi ininque iraacaanqueriquea  
Jesoshi**

(Mt. 26.14-16; Irc. 22.3-6)

<sup>10</sup>Arikea yoanaque Jorashi Ishicariote iramenajiaquieriquea

**v 14.1** Pamenero *Glosario* itsavetantajitirogueti *Paashicoa*. **w 14.5** Iriraquea *tenario* irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

saserorotejia anaantajianquitsica  
incantajiaquieri ininquequea iraacaantaqueri Jesoshi. Iriveca itsatacaane  
carajianquitsica 12.<sup>11</sup> Iriatimpajia  
ishinejianacaquea icanqueriquea  
irojocajiaqueneri imentaquipae.  
Iriraquea Jorashi yoanaji, iroompaa  
ariequa iquenquejanaquequea queroca  
incoquerini iraacaantaquerigueti.

**Jesoshi ishecatacaajianajari  
itsatacaanejia**

(Mt. 26.17-25; Irc. 22.7-18; Jn. 13.21-30)

<sup>12</sup>Arikea aapojaca savincaguiteri  
pariantajaroca savincaguiteripae  
ishecatantajitaroca pan teeca oncono-  
guemparojo anempoacaqueroneca,  
iroquea aisa ijitorejantajitarica ovejaja-  
niqui irishecajiaquempaca inquenqueja-  
cojiaqueroquea Paashicoa. Iriraquea  
itsatacaanejia Jesoshi icanqueriquea:

—¿Querocaquea pininqueni nonetsa-  
najiaquempironi maasanopae cameetsa-  
njite ashecajiaquempanijite coajica  
ashineventajiaquemparo Paashicoa?

<sup>13</sup>Arikea iriatimpa itigarancajiaqueri-  
quea mavite itsatacaane icantajiava-  
queri:

—Poapoitanaquequea Jerosarequi,  
pintonquivojajavaquempari shirampari  
iramacopojaquerogueti ijatsite, irioquea  
poguijaguijaitanaque. <sup>14</sup>Querocagueuti  
iniquianaqueni oraniqui arikea  
pinquijaquijaitanaquequea aviatimpajia,  
pincantajiapojeriquea ashincaroca  
itsovironaquite: ‘Iriraquea Tsatacaantant-  
tatsica icanke: ¿Querocaqueate  
oraniqui noshecajiaquempani coajica  
nontsipatsipaiquempari notsatacaanejia  
nonquenquejacojiaqueroquea  
Paashicoa?’ <sup>15</sup>Iriatimpa intsipatsipaita-  
naquempiquea oshitamencotacagueti  
jenoqui, irijicojiaquempiroquea  
otantotacagueti caguitejeguinica, jac  
netsanaguequea maasanopae. Arikea

oraniqui pinetsanamajajiaqueroquea  
maasanopae ashecajiaquempagueti  
coajica.

<sup>16</sup>Yoayoaitanaquequea itsatacaanejia,  
yarejerejeica Jerosarequi, ariuea  
yamenajapijoroquea maasano quejemajataca  
icantajiavaquerica Jesoshi  
incajaranqui. Arikea inetsanajiaqueroquea  
maasanopae irishecajiaquempaca  
irishineventajiaquemparoniji Paashicoa.

<sup>17</sup>Iroompaquea opitsecaguitetanaque-  
gueti yoanaque Jesoshi Jerosarequi,  
itsipatsipaitanacariquea itsatacaanejia  
carajianquitsica 12. <sup>18</sup>Arikea ipimere-  
quijajapijaca shitaponcarontsiqui  
ishecajiaaca. Icanque Jesoshi:

—Imaica noncamanquempi, iconoa-  
quempiquea aviatimpajia aparo aacaan-  
tenaneca, ishecatimotaquena.

<sup>19</sup>Arikea icohicoitanaca itsatacaanejia  
ishimampojancajanaca, yacaya-  
caitanaque:

—¿Naroguenticampa aacaanquempi-  
neca?

<sup>20</sup>Iriraquea Jesoshi icanqueriquea:

—Iriguenti aacaanquenaneca notsata-  
caane conoavetaquempica aviatimpajia  
12, iriguentiquea tsipavacoquenaca  
notsiantancarogueti pan shovaoqui.

<sup>21</sup>Aritarite ontampaticamajatanaque  
ocanqueca tioncanquitsica coramani  
itsavetacotsijicarogueti Irijanite  
Caquinte, cotanquitsiquea iirantsipevael-  
tempanishiatsi irira aacaanquerineca!  
Aatomesano ivoguime iriatimpa.

**Jesoshi icotarejaqueroquea pan  
yojocajiaqueneri itsatacaanejia**

(Mt. 26.26-29; Irc. 22.14-20; 1 Co. 11.23-26)

<sup>22</sup>Iroompaquea ishecajiacagueti,  
yaitsitaroquea Jesoshi pan, yamanaque-  
riquea Aapani Irioshi, icantacoven-  
quero: “Ariotesaa.” Arikea icotareja-  
queroquea yojocajiaqueneriquea  
itsatacaanejia icanqueriquea:

—Paajiajavaqueja. Iroguenti notsino.  
<sup>23</sup>Iroompaquea incajaranquiguitetana- quegueti yaacoquero chovintyoriqui,<sup>x</sup> yamanajiriquea aisa Aapani Irioshi, icantacovenquero: “Arioteesaa.” Arikea yojocacojiaqueneriquea itsatacaanejia, imirajavaca maasano.

<sup>24</sup>Icanqueriquea:

—Iroguentiquea noriraja<sup>y</sup> sotojaatanan- quitsineca nometojaventajiaquerigueti caramirincavaetanananquitsineca. Ocantaco- queroquea iroaqueraro paaquito.<sup>z</sup> <sup>25</sup>Imaica noncanquempiquea, aatoquea nomirajaro vinoja arejevaetapojempa nomirajemparo iroaquerajaro impeaqueempagueti Aapani Irioshi Imajirojiate maasano.

**Jesoshi icamanqueri Peerero  
iromanacoqueriquea**

(Mt. 26.30-35; Irc. 22.31-34; Jn. 13.36-38)

<sup>26</sup>Iroompaquea iteroncajanajer- gueti yamashaiventajiaquerigueti Aapani Irioshi, isotosotoitanaji yoayoai- tanaque Orivotsempiqui. <sup>27</sup>Arikea icanneri Jesoshi:

—Ocatica pitsecanquitsica maasano aviatimpajia pimpashiventacaajiaquena- quea pojocajapanajantena. Otioncaca- tari ocanque: ‘Aapojempagueti nometo- jaqueri quempogujirica oveja. Iriraquea ovejajia imporocajencatesano maasano.’<sup>a</sup> <sup>28</sup>Cotanquitsiquea nontanco- rejana jegueti naroquetiquea jivatana- quempine noanaquequea Garireaqui.

<sup>29</sup>Icanquequea Peerero:

—Impashiventacaajiajvetanaquempi- quea maasanopae irojocajocaivetana-

quempi, cotanquitsiquea naatimpa aatotarite nojoquimatimpitsi.

<sup>30</sup>Cotanquitsiquea Jesoshi icanqueri:

—Noncamanquempiquea, coajica tequeratagueti omavitetempaji irinijeji chaapa, pomanacoquenaquea 3.

<sup>31</sup>Cotanquitsiquea arimpaquea icantamajataque Peerero:

—Ariguetija intsipatacaantajitenajate irimetojajitena, irimetojajiquenaquea, cotanquitsiquea aatoquea nomanacotim- pitsi.

Arikea iquejejiaquero maasano icantajiaqueca.

**Jesoshi yamanaqueriquea Aapani Irioshi  
Jetsemaniqui**

(Mt. 26.36-46; Irc. 22.39-46)

<sup>32</sup>Arikea yoayoaitanaquequea Jetsemaniqui. Irooqua yarejerejeipoja- cagueti iriraquea Jesoshi icanqueri itsatacaanejia:

—Pisavisaviitetaja ocaniqui, naatimpa namanaquierija Aapani.

<sup>33</sup>Iriguenti itsipatsipaitanaca Peerero, Santiago, Joanca. Iriatimpa ishimampo- jancavaetanacaquea yatsipeshirenta- vaeca. <sup>34</sup>Incajaranquiguitetanaquegueti icanneriquea:

—Noshimampojancavaetatiganima- irooshipojishiatsi ometojavaetenanishi- atsi, picancanija ocaniqui pintinajaven- tajiaquena.

<sup>35</sup>Iriatimpa yoanaque tijai ontaniqui itigueroasetanaca quepatsiqui, yamana- queriquea Iriri ininquegueti impejaeneri maasanopae irantsipetaquempaca.

<sup>x</sup> **14.23** Iroguenti yaacotaque vinoja. <sup>y</sup> **14.24** Icanquerogueti *noriraja* mana iquejetacaacaro intati, cameetsaniji amirapinjijaquerogueti anquenquejapinjijaqueru imetojaventajiacajigueti.

<sup>z</sup> **14.24** Oraquea *paaquito* iroguenti icantamajajitirica itsipa irinetsanamajajitenerica.

Ocaticaquea *iroaqueraro paaquito* icantajiacajiquea Aapani Irioshi irishetacotajeri igovaeguishere maasano aventaventaqueemparineca Meshiantatsica metojaventajiacajica. Ochoocaguetaquequea paaquitopae iroquetinica icannerica Noeni, otsipa icannerica Averaameni, otsipa icantajiaquerica ishiraerijia ichoocaquegueti Moishishini, otsipa icannerica Taavini. <sup>a</sup> **14.27** Sac. 13.7.

<sup>36</sup>Oraquea yamanaquerigueti icanqueriquera:

—Aapani, pagavejaquequea maasanopae. Imaica nonintaveca paapitsatenarojate nantsipequempaca,<sup>b</sup> cotanquitsiquea teequea nonintenica onetsanaquempa nonintica naatimpa, iroguentiquea pinintica aviatimpa.

<sup>37</sup>Arikea yoanaji incajaranqui qui ichoocajiaquegueti itsatacaanejia, yamenajapijiri maaajaque. Icantapojiri Peerero:

—Shimo, ¿pojocanacaniquea tin? ¿Arimpate teequea pagavejajigueji osamanicoñaji pintinajajigueji?  
<sup>38</sup>Pintinaje, aatoquea pimaajiguitsi. Pamanacoventajiguempaja aatonjite ocovaeguishetacaajianaquempitsi covaeguisherentsi. Aviatimpajia pinintajivecaqueate pishirequi pinetsanamajajiaquero intantagueta Aapani Irioshi, cotanquitsiquea teetarite pintampishijigueji pitsinoqui.

<sup>39</sup>Arikea yoanaji aisa yamanajiri Iriri oquejetajaro icanquerica incajaranquatica. <sup>40</sup>Iroompaquea icoraquevetaja aisa yamenajapijiri yojocajianacani tin aisa, otiaavaetanacaritari pochoquirents. Ipashiventavaetanacaquea, cotanquitsiquea tee intsajigueji querocampate incantajiaquerini. <sup>41</sup>Yoanaji aisa, iroompaquea icoraquevetaja, arikea icantajiajapajiri:

—Arisacanica picantacoguitani maagtatsimpi magorejajianaquempi. Imaica ariotapoji, arejetapojaca iraacaantantajitaquemparica Irijanite Caquinte irimetojajiaqueri covaeguishejatsica. <sup>42</sup>Pincantintiitanaque, jamequetiro, jac coraquetapojishiatsi aacaanquenaneca.

**b 14.36** Icanquegueti Jesoshi *paapitsatenarojate nantsipequempaca* iroguenti ishimampojancamacajatacaro incatarojitanaquei igovaeguisherejia maasanojia caquinteguetananquitsica quericaca aventajiaquemparineca. Pamenero 1 Pe. 2.24.

**c 14.44** Quericaca *nonintavorotapojaqueca*. Yamejiaca joriojia coramani inintavorotavacaajavaca yamenavacaajiacagueti.

### Yaaajitaquerigueti Jesoshi

(Mt. 26.47-56; Irc. 22.47-53; Jn. 18.2-11)

<sup>43</sup>Quenquetsatanatsitiraja Jesoshi, icoraquetapoji Jorashi, irioveca itsatacaane iriojivaveca carajavetanquitsica 12. Itsipatsipaitapojacari icaramirincavaequequea caquintejia, yamashijiapojiri itsaampsantsameniritepae aisa inchaquiji. Iriguentijia tigarancajiaqueri saserorotejia anaantajianquitsica aisa tsatacaantajiguiroca itioncacotanaqueca Moishishini aisa jivajiguirica joriojia.  
<sup>44</sup>Iriraquea Jorashi, aacaanquerineca Jesoshi, itsatacaaitsitanacari, icanqueriquea:

—Quericaca nonintavorotapojaqueca,<sup>c</sup> iriotaquequea pinintajiaqueca, paitajiguempari paajianaqueriqueate inchiquiojitala poguishiguirtsijate.

<sup>45</sup>Iroompaquea yarejetapojatiga iquempejitarojesacarri Jesoshi, icantapojiri:

—¡Tsatacaantantatsica!

Arikea inintavorotsitari.

<sup>46</sup>Arikea iriatimpajia yaitsijapirojaci yajiricajiajapajiri. <sup>47</sup>Cotanquitsiquea chooca aparo itsipatamacaca Jesoshi yaitsitanacaroquea itsaampsantsamenirite, itsopajitaro, iguempitarejitsitari yashintacaca saserorote anaantamajatquitsica. <sup>48</sup>Iquenquetsatanaque Jesoshi icantajiguiri coraquetashijiaquerica:

—¿Arimpate naroguenti catsimari aapitsatantatsica pamashitantajiaqueanca pitsaampsantsamenirite aisa inchaquiji paimentajianaquenanijite?

<sup>49</sup>Nocantacoguitani savincaguiteriqui notsipatsipitaquempiquea aviatimpajia

ontaniqui oniganquirequi teemporo notsatacaantavaeguitini, teequea ari paajiguenaji, cotanquitsiquea oquempe-tantanacaca imaica cameetsaniji onetsanamajatanaquempaniji itioncaco-jiaqueca tsavetantatsicani coramaniqui.

<sup>50</sup>Iroompaquea iporocajencajianaque maasano itsatacaanejia itsinampirejajainaqueri Jesoshi. <sup>51</sup>Cotanquitsiquea chooca itsipa tequeratatirajaca inquen-quevarimajate yoguijavetanacari, manaquea isavotacaroquea aramaronca-jaro. Yaajiavecari, <sup>52</sup>ipotequitsitanaca tancoren, ishiapanajanta cajaratsinoni.

**Yaajitanaqueriquea Jesoshi  
icapiocajiacaguetti imajirotepae joriojia**  
(Mt. 26.57-68; Irc. 22.54-55, 63-71;  
Jn. 18.12-14, 19-24)

<sup>53</sup>Ariquea yaajianaqueriquea Jesoshi ichooquaquegueti saserorote anaantamajatanquitsica. Arikea icoraquecoraque-ipoji yomporoguijajapirojaca saserorotejia anaantajianquitsica aisa tsatacaantajiguiroca itioncacotanaqueca Moishishini, irirajia aisa jivajigurica joriojia. <sup>54</sup>Iriraquea Peerero yoguijata-covetanacari cotanquitsiquea impoivae-tapojaque. Oraquea yarejetapojacarogueti pampatejijaniquipi itsovironaquitequi saserorote anaantamajatanquitsica, iquijapojaque otantoqui, yamenapojiri coaretajia itajiaque. Arikea iconoajapijacari isavicapojitata-pojaque.

<sup>55</sup>Iriraquea saserorotejia anaantajianquitsica itsipajiacari maasano majirontajiasica capiocajianquitsica icajemacaantaja-

queriquea itsipapae intsojeventajiaquem-pari Jesoshi cameetsanijite onchooquaquenijite ompampiatantapojempaca irimetojantajitaquemparica, cotanquitsiquea tee onchoocateji. <sup>56</sup>Itsojeventajiacariquea oshequin, irooqua icanque irooqua icanque, cotanquitsiquea querocampate incobiaquempani iriatimpajia teequea inquemavacaajiguempaji. <sup>57</sup>Iconoagarantajiaaca itsipapae icatintiitanaca itsojeventajacari, icanqueriquea:

<sup>58</sup>—Naatimpajia noquemajiaqueriquea icanquegueti: ‘Nosoveguero ocatica teemporo ipeacaacaca caquinte, nompeacaajempa otsipa aatoca ipeacaaja caquinte, ontrespojajegueti savincagueri nontsitacantajemparo.’

<sup>59</sup>Icantaveca imaica, cotanquitsiquea itsipapae cantashitatiavacaro. <sup>60</sup>Arikea icatiitsitanaca saserorote anaantamajatanquitsica icanqueriquea Jesoshi:

—¿Aatompá paquiri? ¿Taaquea opajita ocatica icantacojiaquempica iricajia?

<sup>61</sup>Cotanquitsiquea Jesoshi teequea incanteji, teequea iranqueriji. Arikea icoacotsitajari aisa, icanqueri:

—¿Arimajampa aviguentica Quirishi-totatsica, Irijanite Itsaroventajitaca?

<sup>62</sup>Icanquequea Jesoshi:

—Naroguentiguitatsi. Oncoramitanapo-jajegueti pamenaquiaqueriquea Irijanite Caquinte irisavicaque itincamijempe-quiqui<sup>d</sup> Agavejamajatatsica. Aisa pamena-jivajaveri inquenapojaque mararoqui.

<sup>63</sup>Arikea icotanaca icatsimatanaque saserorote anaantamajatanquitsica iperejitsitaroqua e iitsaare sarararara,<sup>e</sup> icanque:

**d 14.62 itincamijempequiqui.** Yamejiaca coramani iriraquea majirontatsica incajemajiaqueri ishineventamajatacaca iroguisaviquitempari itincamijempequiqui, inquejemajirontavetaquempari iranaajiaqueri maasano itsipapia. **e 14.63** Ari icojiaca joriojia, inquemaquerigueti itsipa inquejemanataquemparigueti Aapani Irioshi irooca incantaguishetajquerigueti, imperejitsitemparo iitsaare intsantantajitaquempari icovaeguishemajataca. Otioncaca irira quejemanataquemparineca Aapani Irioshi irioca cantaguishequerineca intsinaquitajitempari irimetojajiqueru.

—¿Arimpate ancoguimenquempari itsipapae cantacoquerineca? <sup>64</sup>Jac piquemajiaquerishinete iquejemanatanacarigueti Aapani Irioshi imaica. Lintsijsa querocaca pincantajiguensi aviatiempajia?

Maasanoquea icantajigui iquempeta-  
caanca irimetojajiqueru. <sup>65</sup>Iconoajiac  
iushoquishoavaequeriquea. Iponaajia-  
queriquea icapocapovaequeriquea,  
icantajiavaqueri:

—Lintsijate pintsatavaqueja taaquea capojaquempi.

Iriraquea coaretajia yapatompatonca-  
vaequeri.

#### **Peerero yomanacoqueriquea Jesoshi**

(Mt. 26.69-75; Irc. 22.56-62;  
Jn. 18.15-18, 25-27)

<sup>66</sup>Iriraquea Peerero ichoocaque oraniqui isavi pampatejijaniquipi.  
Iroompaquea ocoraquepoji aparo iromperare saserorote anaantamajatantsica, <sup>67</sup>amenapojiri Peerero itataque, amenamajatanaqueriquea sorererere, ariuea ocanqueri:

—Aviatimpa aisa itsipapinitimpi Jesoshi Nasarequitica.

<sup>68</sup>Cotanquitsiquea yomanacotsitanaca-  
quea, icanquero:

—Tee notsatsitavaquempiroji. Teequea nonquemeji querocaca picanqueni.

Isotoanaque iquijanajiro oaguitetana-  
quegueti osotomorotapojacagueti.  
Ariuea oraniqui icatiaca, iroompa inijanaque chaapa. <sup>69</sup>Amenitsitajariequa aisa omperarentsi ocantajiguiri choocajianquitsica oraniqui, ocanque:

—Iricatica irio itsipavijire Jesoshi.

<sup>70</sup>Cotanquitsiquea yomanacotsitanaja Peerero.

Iroompaquea incajaranquiguitetana-  
quitigui icantajiguiri choocajianquitsica oraniqui:

—Arimajaca pitsipatari, aviguenti Garireaquitica.

<sup>71</sup>Iriraquea Peerero icantsitanaja aisa:  
—iNocanqueshinete tee nontsatimate-  
riji iricatica piquenquetsatacojaquea!  
Namataacagueti incatsimatimentenaro-  
nishiatsi Aapani Irioshi.

<sup>72</sup>Iroompaquea icanquitigui, inijanajiquea chaapa. Iquenquejitsitanacaroquea Peerero icanquerica Jesoshi incajaran-  
quitica icanqueri: “Coajica tequerata-  
gueti omavitetempaji irinijeji chaapa pomanacoquenaquea 3.” Ariuea icotanaca raitsitanacaquea.

**Yaajitanaqueriquea Jesoshi Piratoqui**  
(Mt. 27.1-2, 11-14; Irc. 23.1-5; Jn. 18.28-38)

**15** <sup>1</sup>Osavincaguitetanajigueti icapioca-  
jiaca saserorotejia anaantajianquitsica, aisa jivajiguirica joriojia, aisa tsatacaan-  
tajiguiroca itioncacotanaquea Moishishimi, aisa maasano imajirotepae joriojia.  
Iquemavacaajiacqua querocaca incocjaquerini Jesoshi. Ariuea yoishojianaqueri, yaajiana-  
queneriquea Pirato, yojocajiaopoaqueneri.

<sup>2</sup>Iriatimpa icoacoqueriquea icanqueri:  
—¿Arimajaca aviguenti Imajirote jorio?

Icanque Jesoshi:

—Tampatica poaquero.

<sup>3</sup>Cotanquitsiquea iriraquea saseroro-  
tejia anaantajianquitsica arimpaquea itsojeventajianacari.

<sup>4</sup>Iriraquea Pirato icantsitajari aisa icanqueri:

—¿Aatomba paquiri? Pinquemavaqueroja maasano icantragouetaquempica.

<sup>5</sup>Cotanquitsiquea Jesoshi teequea incantimateji, jero yamenantanacaca Pirato intati.

#### **Icanque irimetojajiqueru Jesoshi**

(Mt. 27.15-31; Irc. 23.13-25;  
Jn. 18.38-19.16)

<sup>6</sup>Icantacoguitani aapojajagueti Paashicoa, iriraquea Pirato yametapinitaca yoguipaquijajiri aparo isantanatacotimen-  
tajiquerica ipeacaagushtacaca, quericaca

inintajiaqueca igonorojia iroguiapajaje.  
<sup>7</sup>Ichooque aparó shirampari ipajita  
 Varavashi, iroguenti isantanatacotimentaji-  
 queri imetojantaquegueti itsipatacaantaji-  
 cari itsipapae itsipatashjiacaca imetojanta-  
 jiaquegueti, iroguenti inintajiaveca  
 iroguisotoajajerime majirontatsica.  
<sup>8</sup>Icaramirincavaequequea oraniqui jorioja,  
 ariquea iconoagarantajiaca yoayoaita-  
 naque Piratoqui icantajiaipojaqueri  
 irantajeneri yametapinicaca. <sup>9</sup>Iriatimpa  
 icantavaqueri:

—¿Irioquea pinintajiaque noguipaqui-  
 jajempiri Imajirote jorio?

<sup>10</sup>Iriatimpa itsaque irirajia saserorote-  
 jia anaantajianquitsica manaquea  
 icatsimativentajiaqueriquea Jesoshi  
 yamenajiaquegueti iriguenti yomporo-  
 guijaventajiacaca, irootaquequea yaantaji-  
 tanacarica iriatimpaqui. <sup>11</sup>Cotanquitsi-  
 quea iriraquea saserorotejia anaantaji-  
 anquitsica itsatacayaqueri omporogui-  
 jajianquitsica icantajiaqueri:

—Intsija pincantejate: ‘Iriompaqueate  
 poguipaquijaje Varavashi.’

<sup>12</sup>Iriraquea Pirato icanneriquea:

—Arisacanica imaica ¿querocaca  
 noncoquerini irica picanqueca Imajirote  
 jorio?

<sup>13</sup>Iriatimpajia icajemitsijanaca:

—iPompajacoteri!

<sup>14</sup>Icanqueri Pirato:

—¿Taampate ipeacaaca?

Icjemamajajianaji:

—iPompajacoterishine!

<sup>15</sup>Iriraquea Pirato intintaquequeate  
 iroguishinejajiaqueriquea omporoguija-  
 jianquitsica, yoguipaquijajainiri  
 Varavashi. Ariquea icantacaantsitari-  
 quea Jesoshi intavaajitaqueri, irajaita-  
 naqueri irompajacojiqueru.

<sup>16</sup>Iriraquea coaretajia yaajianaqueri-  
 quea intsompoguiqui pampatejjiani-  
 qui qui imapipancotequi Pirato, icantaji-  
 tiro “Peretorio”, ariquea icajemacaanta-  
 jiaqueri maasano irapicoaretajiate.

<sup>17</sup>Arikea iquitsaatantajiacari otsipa  
 quitsarentsi camachoncamorenari.  
 Yaajiaque tseitseiaro, ipeacaashijiaca-  
 nari iramatxaero, yamatsaetsitari.

<sup>18</sup>Arikea ishiroshirontimentavaecari  
 icanneriquea:

—iIricashia Imajirote jorio!

<sup>19</sup>Itavatavaavaetaqueriquea iguitoqui  
 savoroquijiqui, iquishoquishoavaequeri,  
 igueroventajiacari iquempetacaajiacari  
 ishineventajitarigueti majirontamajata-  
 tsica, manaquea ishiroshirontimentavae-  
 cariquea intati. <sup>20</sup>Iroompaquea iteronca-  
 jianaquerogueti ishiroshirontimentavae-  
 carigueti, isapocajiri camachoncamoren-  
 nari, irooqua iquitsaatantajari iitsaare,  
 yaajianaqueri irompajacojiaqueri.

### Yompajacojitaqueriguea Jesoshi

(Mt. 27.32-44; Irc. 23.26-44; Jn. 19.17-27)

<sup>21</sup>Chooca aparó Shirenequitica ipajita  
 Shimo, iriri Ariantero aisa Iropo.  
 Yavisanaque iquenavaetapoji ontaniqui  
 niganquitejipaequi. Icantajiaavaqueri  
 coaretajia irinatashitanqueriquea Jesoshi  
 igoroshite. <sup>22</sup>Arikea yaavaetanaqueriquea  
 Jesoshi ontaniqui osamani opajitaquea  
 Gorogota, (ocanquequea: “Ochoocatigueti  
 Shocoitontsi”). <sup>23</sup>Yojocajivecanariequea  
 vinoja iconoantajicaro mira,f cotanquitsi-  
 quea teequea irimiremparoji. <sup>24</sup>Iriraquea  
 coaretajia yompajacojiaqueri. Arikea  
 ipegavijijiacaca intsajiaquenijite quericaca  
 ashinqueemporoneca iquitsaguevecaca.<sup>g</sup>

<sup>25</sup>Oraquea yompajacojiaqueriguea  
 iroaquerasano ijenoquivaeponji catsirincai-

f 15.23 Oraquea *mira* iroguenti casancatatsica, inconoantajiquemparogueti oja  
 irojocajiqueneri aatonijite ocatsitiri. g 15.24 iquitsaguevecaca. Irooca icantacotaque  
 isavoguinaro, igaviguitire, ichompimashite, aisa yogataacaca, ocarataque 4.

teri.<sup>26</sup> Oraquea itioncacojiquerogueti taate imetojimentajiqueri ocanque: "Irquenti Imajirote jorio."<sup>27</sup> Itsipatacantajicari mavite aitsitantatsica yompajacojitaqueriquea, aparo yogatiacojiqueru itincamijem-pequiqui, iriraquea itsipa iroguenti yogatiacojiqueru ishinampijempequiqui.  
<sup>28</sup> Oraquea oquejetacagueti imaica iroguenti irinetsanajiqueroquea itioncacojiquerogueti coramaniqui ocanque: "Itsipatacantajicari covaeguishetatsica."<sup>h</sup>  
<sup>29</sup> Iriraquea avisavisaitanquitsica oraniqui injashinatacari icantajianaque chaguito chaguito, icanqueriquea:

—iArisacanica querocampate imaica! Arimpate picanque: 'Nosovea-quieroqua iteemporote Aapani Irioshi, ariquea nomepacaitajemparo, nontsitacajero 3 savincaguiteri.'

<sup>30</sup> Iintsijate pompetanaquempajate imaica, pintsoparejacotanajempajate coroshipqui paguijatapojae.

<sup>31</sup> Arikea iquempejiaca saserorotejia anaantajianquitsica itsipajiacari tsatacantajiguiroca itioncacotana-queca Moishishini ishiroshirontimen-tavaecari, iquenquetsatavacaajiaca icanqueriquea:

—Yamijaqueri itsipapae yompetacoguetacari, cotanquitsi teequea iragave-jempaji irompetacotanaquempa iriatimpa.<sup>32</sup> Irivotaca Quirishitotanqui-tsica Amajirojiate ishiraerija, iintsija intsapajacotanajempaja coroshipqui iraguijipojaje, amenajiaquerinijite antsatimenqueriniji antsaroventimenta-jiaquempari.

Iquejetsijianaca itsipatacantajicarica yompajacojitaquerigueti, icantacanta-guishevaetaqueri.<sup>i</sup>

### Imetojanaquegueti Jesoshi

(Mt. 27.45-56; Irc. 23.44-49; Jn. 19.28-30)

<sup>33</sup> Iroompaquea itampaticavepojaca catsirinaciteri, ocantanaque pitsec maasano quepatsi, arejetacovaea jaguitetanajigueti.<sup>34</sup> Arikea icotanaca iririjencavaetanaque Jesoshi icanque: "Eloi, Eloi, ¿lama sabactani?"<sup>j</sup> (Ocanque: "Aapani Irioshi, Aapani Irioshi, ¿quieroqua ecocani pojocanta-naquenaca?")

<sup>35</sup> Iconoagarantajiacaquea choocajian-quitsica oraniqui irooqua iquemajia-quegueti icantajianaque:

—Pinquemerija, icajemaqueri tsaventatatsica Iriashini.

<sup>36</sup> Ishiisitanaca aparo, yaanaquequa atsimijicajatiroca oja, iticajatsitaroqua vinoja cachonerontoquijajaro, yogajeno-cacoqueneriquea savoroquijiqui irantsimijicajataacaquerime. Icanque:

—Iintsijate pamenerijate, amenajiava-queritaja incoraquetashipojeri Iriashini irogagujitajeri.

<sup>37</sup> Iroompaquea icajemapanajanti Jesoshi iririjencavaetanaque, arikea imetojanaque.<sup>38</sup> Irooqua imetojanaqui-tigui, arikea octanaca operejanaque omorena ticaamorenatanquitsica teemporoqui jocagatsica aatonijite iquijajitrotsi intsompoguiremajacaqui. Opecotarejanaque tampaticaquea niganquisano ocantanaque sarararara-rara, oquenapojiquea jenoqui arejevae-tacaquea isavi.<sup>39</sup> Iriraquea imajironcaca 100 igoaretajiate Iromaquitica icatiaca oraniqui itampaticatacotaqueri Jesoshi. Oraquea iquemavaquerigueti icajemana-quegueti, aisa yamenavaquerigueti

**h 15.28** Is. 53.12. **i 15.32** Pamenero aisa Irc. 23.39-43. Aparo cantashitatiananquitsi coajica, yaventanacari Jesoshi inquenquejacotajeriniji irimajironquempagueti. **j 15.34** Eloi, Eloi, ¿lama sabactani? oponeaca iguenquetsatsarequi arameo. Mateo itioncaque Elí, Elí iguenquetsatsarequi evereo (Mt. 27.46).

quiero icotanacani imetojanaquegueti, ikanque:

—Arimajaca iriguenti Irijanite Aapani Irioshi.

<sup>40</sup>Aisa ariquea ochoocajiaque manquigarentsijia tiijacoñajisano ontaniqui, amenajiaqueriquea Jesoshi. Oconoacaroquea Maria Magararaquitica, Sarome, aisa Maria iriniro Jose aisa Santiago<sup>k</sup> guijapojirica. <sup>41</sup>Iroguentijiatiari oguijajiquerica yanijivaetigueti Garireaqui, amitacojiaqueriquea. Aisa ariquea ochoocajiaque oraniqui otsipapae ocaramirincavaeque manquigarentsijia tsipatsipaitacarica iroaqueragueti icoraquetaquegueti Jesoshi Jerosarequi.

**Yojoquijitajitajari Jesoshi  
imperitamoroqui**

(Mt. 27.57-61; Irc. 23.50-56; Jn. 19.38-42)

<sup>42</sup>Arikea ijaguitemajatanaji. Oratica savincaguiteri iroguenti inetsanatantajacaca joriojia maasanopae incoguitejacobiaquempaca osavincaguitetanaquegueti aapojajempaca imagorejantajitaca. <sup>43</sup>Iriraquea Jose Arimateaquitica, iriguenti anaantatsica iguemajirore joriojia, itsipajiacari imajirotepae icapiocapinijijacagueti. Yoguijaqueriquea Aapani Irioshi impeaqueempagueti Imajirojate maasanojia. Iriatimpa teequea intsarogueji, yoashitanaqueriquea Pirato icanqueriquea ininque irajaitanajero itsino Jesoshi. <sup>44</sup>Cotanquitsiquea Pirato iquemaquegueti metojaque Jesoshi yamenanaquequea intati. Icajemacaanqueriquea imajirote coaretatia icoacojiaqueriquea arimajaca

metojaque. <sup>45</sup>Iquemavaquerogueti icanquerica coareta, iriraquea Pirato ishinetsitacanari Jose iraanajero itsino.

<sup>46</sup>Irootarite yoantanacaca Jose ivegarataquitiquea iniroomorena shipetari. Iroompa yoanaque itsopajacotajatiri, yampiguiricantajiacari, yaanajiriquea ontaniqui yojoquijitajatiri imperitamoroqui imorotashijitirigueti metojaitsica. Itigaritashitancari iniroshimentapiri mapi, iticaacotantacari. <sup>47</sup>Oraquea Maria Magararaquitica aisa Maria iriniro Jose amenacojiaqueriquea yojoquijitajirigueti.

**Ipochatanajigueti Jesoshi  
(Mt. 28.1-10; Irc. 24.1-11; Jn. 20.1-10)**

**16** <sup>1</sup>Arikea opitsecanajigueti savincaguiteriqui imagorejantajitaca,<sup>l</sup> oraquea Maria Magararaquitica otsipatanacaroquea Sarome aisa Maria iriniro Santiago oahoaitanaque ovegarajiaquitiquea poncadjencajaripae, oahoaitanaqueniji oshaguitantajiaquitemparime Jesoshi. <sup>2</sup>Iroompa osavincaguitetama-naque pariajapajaroca semana,<sup>m</sup> iroaque-ragueti isotoajapajigueti catsirincaiteri oahoaitanaquequea ontaniqui yojoquijitajirigueti. <sup>3</sup>Oraquea oahoaitanaquegueti quenavoquirontsiqui ocanque:

—¿Taaquea tigaritajerone mapi iticaacottantajivecarica imperitamoroqui?

<sup>4</sup>Inirojeguimajaca ocanca, cotanquitsiquea arejerejeivetapojaca amenajapirojiro oo jac yoguishirincajiqueroquea. <sup>5</sup>Oquijajiquipaipojitsompoguiqui imperitamoroqui, amenajapirojiriquea shirampari iriaqueraca quenquevaritananquitsica,<sup>n</sup>

**k 15.40** *Santiago*. Icantajitiri aisa Jacovo. **16.1** *imagorejantajitaca*. Irirajia joriojia imajirotarao savincaguiteri saavarao. Opitsecapojajigueti oteroncapojaca imagorejantajitaca, irootaque oteroncampojaja semana, arikea oparianaja otsipa. **m 16.2** Iroguenti **n 16.5** *shirampari iriaqueraca quenquevaritananquitsica*. Iriotaque irashivantite Aapani Irioshi, amenajiaqueri quempevaeca caquinte.

isavicaque otincamijempequiqui, quitamrovaeque iitsaare. Ariquea ocojanaca otsarotsaroitanaque.<sup>6</sup> Cotanquitsiquea iriatimpa icanquieroqua:

—Aatoquea pitsaroajiguitsi. Imaica aviatimpajia picoajiavecariequa Jesoshi Nasarequitica yompajacojivecaca, cotanquitsiquea imaica jac pochatanaji. Teequea inchoocatajeji ocaniqui. Iintsijate pamenerojae intati yojquijiji-vecarigueti.<sup>7</sup> Imaica poapoitanaque-gueti pincamantajapojerija Peerero aisa maasano itsatacaaneja pincanqueri-quea: ‘Iroanaquequa Jesoshi Garireaquí, iriquetiquea oananquitsine. Pamenajiajapojeri ontaniqui. Aritarite icantajianaquempi tequeratagueti irimetojeji.’

<sup>8</sup>Osotosotoitapanajanti oshiahiaita-naca ompioncajianaquea mana oajianaque intati. Teequea oncamanta-pojeji irooriji otsaroajianaque.

**Jesoshi yonigaajarogueti Maria  
Magararaquitica**  
(Jn. 20.11-18)

<sup>9</sup>Oraquea ipochatanajigueti Jesoshi iroqueragueti osavincaguitetamanaji pariapojajaroca semana, iroqueti yonigaaja Maria Magararaquitica yoguisotoacoventajaqueca 7 ampatsini ishaquiavecarogueti.<sup>10</sup> Iroatimpa oanaque ocamantajavetapojari maasano itsipavetacaca. Amenajiajapiriraacojiaqueri ishimampojancajanaca.

<sup>11</sup>Cotanquitsiquea iquemajiajavevacaragueti ocanquegueti anijanaji Jesoshi, amenajiri, teequea inquemisantajigue-roji.

**Jesoshi yonigaajari mavite itsatacaane**  
(Irc. 24.13-35)

<sup>12</sup>Iroompaquea Jesoshi irioquea yonigaaja mavite itsatacaane yoayoita-naquegueti ishivoquijavetanacaro

quenavo quirontsiqui niganquitejipaequi, cotanquitsiquea manaquea icantashita-tiimojiacari.<sup>13</sup> Iroompa iriatimpajia icantacantaitanaja Jerosarequi icaman-tajavetapojajari itsipajia, cotanquitsiquea teequea inquemisantajigueriji iriatimpajia aisa.

**Jesoshi icantajianajiri itigarancaneja  
intsavetacojianaqueriquea**

(Mt. 28.16-20; Irc. 24.36-49; Jn. 20.19-23)

<sup>14</sup>Iroompaquea ishecajicagueti itsatacaaneja carajianquitsica 11, yonigaimojojajariquea Jesoshi. Arikea icantomajajiaqueri yamenaquegueti manaquea iquishoshirentavaetanaque, teetarite inquemisantajigueriji cantajia-vecarica amenajiavecarica ipochatanajigueti.

<sup>15</sup>Iroompaquea icanqueriquea:

—Poapoitanaquequea pintsitacagu-tejavaetanaqueroquea maasano quepatsi, pintsvetanteroquea Quenque-tsatsarentsi Oganejencatatsica pintsave-tantimojiaqueriquea maasano caquintejia.<sup>16</sup> Taacagueti quenisantajia-vaqueroneca aisa iriviñacajatacantajia-naquempa irishetacojiqueriquea iraanta-jitavaquemparica aatoniji yogui camorecariqui, cotanquitsiquea quericaca aatoca iquemisantirotsi, manaquea incatsimatimentajiquerigovaeguishere.<sup>17</sup> Iriraquea aventaque-naneca manaquea iramenajitaqueri iroguisotoaguetaqueriquea ampatsinipae shaquiajiacarica caquinte, iraventashita-quemparigueti novajiro, aisa inquenque-tsantajiaquemparoquea otsipapae quenquetsatsarentsipae teeca intsajiae-temparoji.<sup>18</sup> Irajiricajiaqueuempari camaarinii, aisa arigueti irojocajiveque-nempari quepigatatsica irimirajia-queemporquea, aatoquea aanaqueri.

Aisa impamijiaqueri joquijiguetatsica, impeaguetanajempaquea.

**Yatsomajanajagueti Jesoshi**  
*(Irc. 24.50-53)*

<sup>19</sup>Iroompaquea iteroncanaquero-gueti Amajirote Jesoshi iquenquetsatacaajianajirigueti itsatacaanejia, yatsomajanaja yoanaji jenoqui inquitequi isenampijapojajari Aapani Irioshi isavicapojaji itincamijempe-

uiqui.<sup>o</sup> <sup>20</sup>Iriatimpajia yoayoita-naque itsavetantajianaque itsitacaguitejavaetanaquero quinteninintsipae. Iriraquea Amajirote yamijiaqueriquea yagavejacaajiaqueri yonigaantajia-quero oacaantantsica intati cameetsanijite intsajiaquenijite iriratica itsavetantimojiaqueca teequea iramatavijajigueriji.

- 
- o **16.19** Irira savicatsica *itincamijempeiqui* majirontatsica yanaajiaqueri itsipajia, iquejemajirovecari majirontatsica.

# **QUENQUETSATSARENTSI OGANEJENCATATSICA ITIONCAQUECA**

## **IROCASHI**

### **Antsatantaquemparoca**

Ocatica iroguenti antsatantaquemparoca iroquetica itioncaqueca Irocashi itioncacotaquerigueti Jeso quirishito aisa itigarancanejia. Mavitetapo jatsica itioncaqueca opajita *Yantajiguica Itigarancanejia Jesoshi*. Irocashi iriguenti ogavintantatsica. Chooca quenquejajianquitsica tee irio jorio. Irira quea Paavoro itsipatanacari iquenaguetana quegueti itsavetanquerogueti Iguenquetsatsare Aapani Irioshi guiteninintsimpaequi (Ya. 16.10). Ariquea intatjavetacagueti irimetojajiteri Paavoro, tee quea irovashianterji. Ipintsata cotanacariquea yamena querigueti itsaro ventacari Jesoshi. Itsamaja querero quea paperi itioncantacaca cameetsa.

Tee intsajiteji quero ichoo caqueni itioncaquerogueti ocatica paperi. Chooca quenquejajianquitsica arica ichocataque Iromaqui, irooca Cesarea qui, irooca Acaya qui. Chooca quenquejanquitsica tequerataguetti intionqueroji Irocashi ocatica, iriqueti tionscacotaqueri Jesoshi Maricoshi, irooca ajagantsiniqui 60, irooca otsipaqui ajagantsini arejeva etacaro 65. Irocashi tee intsipavetempariji Jesoshi, cotanquitsi itsaquero yantagueta queca Jesoshi, yapatsajava taquerotari itioncaqueca itsipapae aisa icoacomajajia queriquea oshequini amena querica Jesoshi intsamajata cotanta quemparica (1.1-4).

Itioncaquegueti Irocashi yoniga ajiacaji quero icocani Jesoshi: irioveta ca Irioshimajaca, cotanquitsi iriotaque aisa caquinte. Irocashi itioncaco jia queri choviquijiana querica Jesoshi irosati ichoo caquegueti Araini (3.23-38). Aisa itioncacotaqueri ivoaquegueti Joanca Viñacajatantatsica, aisa ivoaquegueti Jesoshi, aisa chaajaniquitirajagueti. Icantajiacaji quero ancojaquempani amanajia querigueti Aapani Irioshi (5.16; 6.12; 9.18; 11.5-13; 18.1-8; 22.32; 23.40), itioncaco jia querero manquigarentsijia (quejecaroca iriniro Joanca Viñacajatantatsica aisa iriniro Jesoshi: 2.36-38; 7.1-18, 37-38; 8.1-3; 10.38-42; 13.10-17; 15.8-10; 18.1-8; 21.1-4; 23.27-28), itioncaco jia queri caquinte jia teeca irishine ventamajaji tempariji, quejejia ca chaajaniquirija, coguitejaco jianquitsica, aisa capiocapinitinrica majirontatsica imenta quipae. Itsavetacotaqueri Jesoshi yantagueta queca, ipariana caro quegueti irosati iteron capo jiro quegueti. Itioncajia quereneri jivatatsica pajitatsica Teopiro aisa itsipajia teeca iri jorijo quegueti intsa jia queuniji iroo majaca ocatica quenquetsatsarentsi iquemaco jia querica Jesoshi (1.3-4). Irootaque quea itioncantajiacanarica cameetsaniji intsa jia queriniji Jesoshi iriguenti

aajiajaverineca maasano caquinteja aventajiaquemparineca, irioca jorio, irioca aisa teeca irijorijoigueji, aatoniji yatsipeventajigaro igovaeguisherejia.

### Irocashi itioncaqueneriqueate Teopiro

**1** <sup>1</sup>Icarajiaquea oshequi panque-napanquenaicaroca itioncacojia-quero maasano aquemacojiaqueca acaniqui aguinentiguetaquetu. <sup>2</sup>Itioncajiaqueroquea itsatacaajiaque-naca irirajia amenamajajiaqueroca maasano oparianacagueta arejevataencarо imaica, iriojiaquea tsavetantaquero. <sup>3</sup>Naatimpaquea napatsajavanta-queroquea noteroncamajajiaqueroca queate maasanopae, aisa noocoacomajagueta-queriquea tsavetantaquero. Imaica-quea, Teopiro, namenaqueroquea cameetsataque nontioncaquempiquea nontsatacamajajiaquempiroquea maasanopae, nonetsanamajajiaquerero, <sup>4</sup>pintsaquenijite teetarite iramatavijaji-guempiji tsatacaajiaquempiroca, iroomajacaquea.

### Irashivantite Aapani Irioshi icamanqueriquea Sacaria inchoocataque irijanite

<sup>5</sup>Coramani, imajirontagueti Erorishini Joreaqui, ichoocaquequea saserorote pajitatsica Sacaria. Ariquea yantavaetapiniquegueti teemporoqui<sup>a</sup> itsaroventantajitarica Aapani Irioshi, teetarite aparoquea irantavaetequeate Sacaria iriguentiquea itsipajiacaca Aviashini coramani. Choocaquea imanquigare opajitaquea

Erisaveti.<sup>b</sup> Oquempetacariquea iroguen-tiquea ichoviquitanaqueca Aaroni.<sup>c</sup>

<sup>6</sup>Iriraqueate Aapani Irioshi yamenaque-riquea Sacaria aisa Erisaveti icomajama-jajia, inetsanamajajiaqueroca maasanopae icanquerica Amajirote itioncacojiquerogueti coramani. Teetarite inchoocateji agavejanquitsi-neca incanque: “Tee irinetsanamajate-roji.”

<sup>7</sup>Iriraquea Sacaria aisa imanquigare jac quenquevarimajajianaji, teequea inchoocatejiquea irijanite, teetarite irijanintimatempajiqueate Erisaveti.

<sup>8</sup>Iroompaquea aapojajaqueate savincagui-teri yoayoaitantanacaca Sacaria aisa irirajia itsipajiacaca irantajigueneriquea teemporoqui itsaroventantajitarica Aapani Irioshi. <sup>9</sup>Igamejigaroquea isaserorotejiate jorio impegavijijiaquempsa cameetsanijite intsajiaquenijite taaca opajitaquea irantajia-quequea aparopae irantajiaqueca. Iroompaquea yarejerejeipojacaquea teemporoqui icoguajiaqueroqueate, iroompaquea iriguentiquea otampaticatanaquequea Sacaria inquijaquenijite intsompogui intaaqueneriquea Aapani Irioshi casancavani. <sup>10</sup>Iroompaqueate aapojacaguetaquea capichajaniquinivani intaaqueneriquea, iquijanaquequea intsompogui. Maasano omporoguijajianquitsica ichoocaquequea sotsiqui yamanajajiaqueriqueate Aapani Irioshi. <sup>11</sup>Icatiacaqueate Sacaria intsompogui itaaguequeneriquea, yamenitsitariquea

**a 1.5 teemporo.** Oratica teemporo iroguenti inirojegui mapipanco choocatatsica Jerosarequi. Irira joriojia iroguenti itaantapinitantarica viratsipae intsaroventantajitaquemparica Aapani Irioshi. Pamenero ovaantorite otsapaqui Mt. 21.23. **b 1.5 Erisaveti.** Iguenquetsatsarequi guiriego Erisaveti opajita Elisabet. Yogiupitsocaquerogueti quimajareri iguenquetsatsarequi iriatimpa iconagarantaca icanqueroquea Isabel (ancanque “Isavera”). Iconoacaquea itsipa yoguipitsocaquereroquea Elisabet. **c 1.5 Aaroni.** Iriraquea Aaronini iriguentiquea saserorote paesatinica. Aisa maasano ichoviquijianaqueca iriguentijiaquea saserorotejia.

irashivantite Amajirote catiacaqueate ocaratapojiguetiquea aretare itaantajitaroca casancavaneri ocantanacaguetai itincamijem-pequiqui.<sup>12</sup> Yamenitsitariqueate ariuea icotanacani itsaroitsitanacaquea yamenanaqueate intati.<sup>13</sup> Cotanquitsi icantiri ashivanti:

—Sacaria, aatoquea pitsaroguitsi, iquema-quempiqueate Aapani Irioshi pamanaqueri-gueti. Pimanquigare Erisaveti ovojaempiri pirijanite. Pimpajiteri Joanca.<sup>14</sup> Aviatimpa-quea oshequi pishinevenquempari, aisa irishinejiaquempaquea oshequi caquintejia inquemacojiaquerigueti voaque.<sup>15</sup> Irishine-ventamajaquempariquea Amajirote. Aatoqueate imirimataroqueate vinoja aisa otsipapae cachojaguetatsica. Choocatirajaguetai inchooaque omotijaqui iriniro inchoocamajaqueriqueate Ishire Aapani Irioshi.<sup>16</sup> Iroompaquea intsaroventacaajia-quempariqueate igonororjia ichoviquijiana-queca Ishiraeri cameetsanijite intsaroventajiaquemparinijite Aapani Irioshi ashincarica.<sup>17</sup> Iriraquea pirijanite inquejetaquempariquea iriratica tsavetantsica Iriashini, inchoo- majaqueriqueate Ishire Aapani Irioshi chooquaquerica Iriashini paesatoniqui, iragavejacaqueriquea quejetacaquea yagavejacaquerigueti. Iriatimpa manaqueate irijivaqueriquea Amajirote intsatacajiaqueriquea igonororjia irivetsinanta- tjavaquerita shiramparijia irijanijate. Irirajaquea teeca inquemisanteji intsatacajia- queriquea incomajamajiaquempa cameetsanijite irinetsanatashitimentajava- quemparinijite Amajirote incoraquepojaque- gueti.

<sup>18</sup>Icantiri Sacaria:

—¿Queroquea noncoquempani nontsama- jatantaquemparoca ocatica picanquenaca? Jac quenquevarimajatanajanatarite, aisa nonmanquigare jac quenquevaromajatanaji.

<sup>19</sup>Ariueate icanneriquea ashivanti:

—Naroguentiquea Gaviriero, catiimota- rica Aapani Irioshi. Itigarancaquenaquea

nonquenquetsataacaquempiniji noncaman- quempi ocatica oguishinejantatsica.

<sup>20</sup>Cotanquitsiquea imaica teetarite pinquemisantavaquenaji, aatoqueate pagavejaja piquenquetsatajitsi arejevaeta- quempa irivoajegueti pirijanite. Coajica- quea aapojacaguetai onetsanatantanaquem- pac a nocanquempica ariuea pinquenque- tsatanaje.

<sup>21</sup>Irirajia omporoguijajianquitsica sotsiqui yoguijaveguitarini teequea irisotojaeji Sacaria, iquenquejajiaquequea: “¿Quero ocotacani osamani ichoocatanta- caca intsompogui teemporoqui?”

<sup>22</sup>Iroompaquea isotoavetapojaquetu- teequea iragavejajempa inquenquetsa- taje. Yamenajiaavaquerigueti itsajianaque chooca yamenaqueca intsompogui qui teemporoqui. Iriatimpa- quea teetarite inquenquetsatajequea, manaqueate ijicojicotapojaquea.

<sup>23</sup>Iroompaquea aapojajaguetaquea savinca- guiteri iteroncantanajaroca yantaguetaque- nerigueti Aapani Irioshi, yoanajiquea itsovironaquitequi.<sup>24</sup> Ariuea oaue Erisaveti, imanquigare Sacaria, cotanquitsi- quea ocancaniquea otsovironaquitequi 5 taai, teequeate onigaantajempaquea.<sup>25</sup> Ocanque- quea: “iCaavijiqueate icavintsajamajaque- quea Nomajirote! Ipintsatacotaquenaqueate aatoniji yoguipashiventajana nogonoropae incantajaque: “Aricajate icatsimaqueroquea Aapani Irioshi jeroqueate teeca irijanintan- tempaji.””

### Irashivantite Aapani Irioshi icamanqueroquea Maria irooshipojiquea inchooaque irijanite

<sup>26</sup>Iroompaquea aapojacaguetai 6 otaaite otsaraquitanaquegueti Erisaveti, iriraquea Aapani Irioshi ariuea itigaranquitsitariquea irashivantite pajitatsica Gaviriero iroanaquequea Nasarequi Garireaqui.<sup>27</sup> Aritaquequea ochoocatiquea oraniqui manquigarentsi

pajitatsica Maria. Iroguenti majinaro iroaquera oquenquevarotanaque. Chooca cashiacaroca ipajitaquea Jose irooshivetapo jaca irimanquigatempa-roquea. Iriguentiquea ichoviquini Taavini imajirote joriojia coramaniqui.<sup>28</sup> Iroom-paquea iquijapoji ashivanti otsovirona-quitequi, icantapojaqueroquea:

—iPishinetempa, aviguenti ishineven-tamajatacaca Aapani Irioshi! Itsipata-quempi Amajirote. Icavintsajamajata-quempi, anaquiero icavintsajajiaquerogueti otsipapae manquigarentsi.

<sup>29</sup>Oquemitsitariquea ariuea ocotanaca otsaroanaque oquenqueja-naque: “¿Querocaca icanque?”

<sup>30</sup>Icanqueroquea ashivanti:

—Maria, aatoquea pitsaroguitsi, icavintsajamajataquempi quea Aapani Irioshi.<sup>31</sup> Imaicaquea iroshipojiquea inchoocapo jempi pirjanite. Oncoajica-guitepojeguetiquea irivoaquegueti pimpajitsitempariquea Jesoshi.<sup>32</sup> Caavijiquea iranaantaquequea iroganejenca-majaquempaqueate iranaajiaqueri-queate maasano. Incantajiqueriqueate Irijanite Aapani Irioshi Anaantamajata-tsica. Iriraquea Amajirote Aapani Irioshi impeacaaquempari majirontatsica inquejetajempariquea Taavini choviqui-taquerica.<sup>33</sup> Impeaquempaquea Imajiro-jiate ichoviquijiana queca Jacovoni, incoguitempa quea irimajironta-quempa, aatoquea opejaa imajironta-gueti.

<sup>34</sup>Cotanquitsiquea ocanqueri Maria ashivanti:

—¿Querocaquea oncotaquempani picanquenaca? Tequeratirajatarite quisho iroguenaji shirampari.

<sup>35</sup>Icanqueroquea ashivanti:

—Incoraquetaquequea Ishire Aapani Irioshi aviatimpaqui. Iriraqueate Irioshimajaca Anaantamajatatsica iragavejacaquemitarite. Iriraquea

pirjanite voanquitsineca aatotarite icovaeguishetimatatsi, incantajiqueriqueate Irijanite Irioshimajaca.<sup>36</sup> Quejetacaquea pijitica Erisaveti jac quenquevarovaevetanajaquea, aisa icantajiveta-roquea tee agavejempají orijanintem-pají, choocaquequea imaica irijanite, imaicaquea tsaraquitanaquequea icaratacotanaquequea yarejetapojacaro-quea 6 otaite.<sup>37</sup> Yagavejaquequeate Aapani Irioshi maasanopae, teequeate taaca opajitaquea manapitsatimatempa-rineca.

<sup>38</sup>Iroatimpaquea ocanquequea:

—Iintsija. Ariuea inquempetacaque-naquea Aapani Irioshi maasanopae picantaquenaca. Naroguentiquea yashincaca.

Ariuea yoanaji ashivanti.

#### Maria oanaquequea onejaquitero Erisaveti

<sup>39</sup>Ariueate onetsanatanacaquea Maria otaampinatanaque oanaquequea guinentinintisqui Joreaqui otsempitsem-piapojacaguetai.<sup>40</sup> Arejetapojaca oquijapojiquea itsovironaquitequi Sacaria amenapojiroquea Erisaveti, oquenquetsatacapojaquero.

<sup>41</sup>Oquemitsitaroqueate Erisaveti ocantapojaquea Maria, ariuea icotanaca imoguecanaquequea irijanite omotijaqui, ichoocamajajeroqueate Ishire Aapani Irioshi.<sup>42</sup> Oquenquetsatsitanacaquea ocarajencavetaquequea ocanque:

—Aviguentiquea icavintsajamajataque Aapani Irioshi. Maasano manquigarentsi icavintsajaqueroquea, cotanquitsiquea aviatimpa caavijiqueate anaquiero ipintsamajataquempi. Ariuea iquejeta-caquea pirjanite voanquitsineca caavijiqueate icavintsajamajataqueri.<sup>43</sup> iAriotesaa, ocoraquetaquequea onejaquitana iriniro Nomajirote!

- <sup>44</sup>Jeroquea noquemaquempigueti piquenquetsatapojaquegueti ariquea icotanacaquea nirijanite ishinevaetancauea imoguecanaque nomotijaqui.
- <sup>45</sup>Icavintsajaqueempiqueate Aapani Irioshi piquemisantavaqueritari, pitsaqueuea irinetsanaqueroquea maasanopae itsatacaaqueempica.
- <sup>46</sup>Ariuea ocanquequea Maria:  
“Noquenquetsashirentanaquequea noshirequi nocanquequea:  
‘Caaviji yoganejencamajata Nomajirote.’”
- <sup>47</sup>Noshinevaecaquea noshirequi, noshinevencariquea Aapani Irioshi meshijaanaca.
- <sup>48</sup>Yamenaqueunatari naroguentiquea yashincaca teetarite nashintem-pajiquea ipintsatacotantaque-naca.
- Irosatiquea imaica maasano choocajianquitsineca ocaniqui quepat-si qui incantajiaquequea:  
‘Caavijiquea icavintsajamajata-quero Aapani Irioshi’;
- <sup>49</sup>irorijite iriraquea Agavejamajatsica yantaquena oganejeneguetatsica.  
Saanca onaque ivajiro Iriomajatasica.
- <sup>50</sup>Icocaniquea ipintsatacojiacaji maasano pincatsajiguirica.  
Ariuate iquejetacaajiacariquea avaesatiniteni, manaquea oavaetanaque.
- <sup>51</sup>Yonigaaqueroqueate yagavejica yantaguetaquequea oacaantatatsica intati.  
Yoguvivorocajiaqueriquea aventaci-jiatsica.
- <sup>52</sup>Yoguisotoajiaqueriquea majirontajatisica.

- Iriraqueate teeca irimajirontempaji yanaacaajiajavajiri.
- <sup>53</sup>Iriraqueate taseajjatsica yojocajia-queneriquea cameetsaripae.  
Iriraqueate ashintavaetatsica ejempacotia yoajaqueriquea.
- <sup>54</sup>Yamitacomajajiaqueriquea ishiraerijia, iriguentitarite irashimajaca.  
Iquenquejajiaqueriquea icocaniquea ipintsatacomajajiacari.
- <sup>55</sup>Icanqueritarite choviquijianacajica paesatoniqui:  
‘Nococaniqueate nompintsatacoquem-pariquea Averaame aisa maasano inchoquitanaqueca.’”
- <sup>56</sup>Oraqueate Maria ochoocaquequea otsovironaquitequi Erisaveti aapojajagueti 3 taai, iroompaquea oanajiqueate ochoocatigueti.
- Ivoaqueueti Joanca Viñacajatantatsica**
- <sup>57</sup>Ocoajicaguitetapojajigueti arejeta-pojaquea ovoantajemparica Erisaveti, ovoacotajiqueate iriguenti shirampari.
- <sup>58</sup>Oshinevaetanacaqueate oanca.  
Ariuate iquemacojiaquerogueti maasano irooshiguetanquitsica aisa ojigueticia caaviji icavintsajamajajquero Aapani Irioshi, ishinejianacaquea maasano. <sup>59</sup>Iroompaquea aapojajagueti 8 savincaguiteri icoraquecoraqueitaque-quea intotsaquitacaantajiaquero ichonquimashi<sup>d</sup> chaajaniquitrajaca.  
Inintajiavecaquea impajijiaquerimequea Sacaria iraacotsiquerime iriri. <sup>60</sup>Cotan-quitsiquea iriniro ocanquequea:  
—Aato, ariguentiquea impajiquempa Joanca.
- <sup>61</sup>Iriatimpajia icantajianaquequea:  
—¿Oo querocaquea ococani? Tee inchoocatenicate pijigueticapajitatsica Joanca.

<sup>d</sup> 1.59 Pamenero *Glosario itsavetantajitirogueti Totzaiquimashitagsanti, itotsaquisti que ichonquimashi*.

<sup>62</sup>Ariquea ijicojiqueriquea Sacaria incankequea ininqueca impajiquempa irijanite. <sup>63</sup>Ariqueate iriatimpa ijicotsitaroquea inchapataquiqui intioncanquemparoquate, yojocajiqueneriquea intioncanquemparoca, itionquitaquea: "Ipajita Joanca." Mana yoayoaitanaquea intati maasanojia. <sup>64</sup>Iroompaqueate itionquitsitarogueti, ariquea icotanajaqueate iquenquetsatanajiquea, ishinevencariqueate Aapani Irioshi.

<sup>65</sup>Arikea iquemacojiaquerogueti maasano quempejitacoguecaroca yamenajianaquequeate intati. Arikea iquejejianacaquea maasano choocajatsica otsempipaequi Joreaniqui iquenquetsatacojiaquerorequa.

<sup>66</sup>Maasano quemacojiaqueriqueaqueate iquenquejajianaquequea icantavacaajianacaquea: "¿Querocacaquea incotanajuempani irira chaajaniquiri oncoajicatapojajegueti?" Yamenajiaqueterarite icavintsajamajataqueriquea Amajirote.

**Sacaria ishineventamajatanacariequea  
Aapani Irioshi**

<sup>67</sup>Iriraquea Sacaria iriri chaajaniquiri ichoocamajaqueriqueate Ishire Aapani Irioshi, iquenquejacaquaqueriquea icanquequea:

<sup>68</sup>"Caavijiquea yoganejencavaeca Amajirote Irioshimajaca ashintajiacajica aatimpajia ichoviquijianaqueca Ishiraeri.

ICoraquetashijiacajitarirajaiavajajiquea.

<sup>69</sup>Itigaranquimojiacajiquea Meshiantatsica agavejamajatatsica, irioquea ichoviquitanaqueca Taavini netsanapinitinirica ininqueca coramani.

<sup>70</sup>Irootaquequea icantsitacaca paesatoni qui iquenquejacaajiaquerigueti comajamajaiatsica tsavetacojiaqueroca icantaquerica.

<sup>71</sup>Inchoocavetaquempaquea iroshequiaetaquequea catsimajiacajica aisa semane-guintajiacajica, cotanquitsiquea irompejiacajiquea.

<sup>72</sup>Iquenquejajiaqueritari maasano avaesatinite ipintsatacojicariquea, iquenquejacoguitironi ivaaquitote oganejencatatsica icantajiaquerica irinetساناجا-quereri.

<sup>73</sup>Aapani Irioshi icantaqueriquea avaesatinite Averaameni coramaniqui icantamajajiqueriquea

<sup>74</sup>irompejiacajiquea inchoocajiaqueguedi catsimajiacajineca aatonijite atsaroi mati antsaroventajiaquemparigueti anetsanajiaqueroniji inintacaajiacajica, <sup>75</sup>ancomajamajajiaquempaquea, anetsanashirentimojiaquempari maasano savincaguiteriqui anijatirajajigueti.

<sup>76</sup>Aisa aviatimpa, irijani, incantacojiquempiquea: 'Irioquea tsavetacotantirica Aapani Irioshi Anaantamajatatsica', aviguentitarite jivaquerineca Amajirote, pincamantajiaqueriquea ishiraerija irinetساناتسiji aquempaquea iroguijajiaqueri Amajirote incoraquepojaguegui.

<sup>77</sup>Aisa pintsatacaajiaqueriquea intsajianaquenijite queroquea incojiaquempani irimeshiantajitaquemparica aatonijite iquenquejacaguiriquea Aapani Irioshi maasanopae igovaeguishere.

<sup>78</sup>Ipintsatacomajajiacajitarite Aapani Irioshi intigarancantaquemparica irira quenapojatsica inquitequi

quempevetarica catsirincaiteri  
isotoguigueti,

<sup>79</sup> irisavincaguitetacojiaqueriquea  
pitsecacojianquitsica, irirajia  
guintenijianquitsica otsimanca-  
cojavieretacarigueti metojaxantsi.  
Intsatacacaajiacaji queroquea ancoja-  
quempani aatoniji ashoshogui-  
teta mana anchoocajiaque  
cameetsa.”

<sup>80</sup> Ariquea iquenquevaritanaquequea  
chaajaniquiri, itampishishirentanaque-  
quea. Ariguenti ichoocaguitini osamani  
oquitarumpororoipojigueti irosati  
yonigaampojaca ipariitanacaroquea  
itsatacacaajiaqueri ishraerijia.

**Ivoaquegueti Jesoshi**  
(Mt. 1.18-25)

**2** <sup>1</sup>Ariqueate chaajaniquitirajagueti-  
quea Joanca icanquequea majiron-  
tatsica Sesa Aogoshito intioncacojia-  
quempaquea maasano caquintejia  
guinteninintspaequi intsatantaquempa-  
rica quero icarataqueni maasano,  
<sup>2</sup>teetarite intioncacotempanica corama-  
niqui. Iroqueratarite intioncacota-  
quempaquea imaica ipeacagueti  
Shirenio quejemajirovetacarica Sesa  
irinetsanaguequeneriquea maasano  
ontaniqui Shiriaqui. <sup>3</sup>Iroompaquea  
yoayoaitanaquequea maasano queroca-  
gueti ichoocajiavetagueti choviquijiana-  
querica coramani, intioncacojiaquempa-  
queate.

<sup>4</sup>Iriraquea Jose iquenapojaque  
Nasarequi Garireaquí, itoncotoncogueta-  
naque Joreaquí, yoanaquequea iguiente-  
niqui Taavini, opajita Verene, iriotarite  
choviquitanaquerica coramani, irio

ivaesatiniteni. <sup>5</sup>Yoanaque ontaniqui  
intioncacotempaniji, itsipatanacaroquea  
Maria icashiacaca irimanquigaquem-  
paca, tsaraquitaquequeate. <sup>6</sup>Arikea  
yarejevepojacagueti Verenequi  
aapojacaquea ovoacotantajempaca  
Maria. <sup>7</sup>Ovoqueriquea opariacaca.  
Ampiguiricacotantacariqueate  
paañoqui, ojoquijitancariquea  
ishecatantaca viratsi, teetarite onchoo-  
cavetempaji querocampate irimaapojeni  
tsovironaqui qui imaantapinijitacaca.

**Irashivantijitete Aapani Irioshi**  
**yonigaajiapojacari quempogujajiguirica**  
**ovejapae**

<sup>8</sup>Ontaniquiquea irooshiquegueti  
Verene ochooquegueti cataromashi  
ichoocajiaquequea quempogujajiguirica  
oveja itinajaventajacariquea iroveja-  
jiate. <sup>9</sup>Ariqueate yamenitsitari catiaca  
irashivantite Amajirote. Itsirencacotan-  
tajapojacariquea iroganejencare  
Amajirote, itsaroamajajianaquequea.  
<sup>10</sup>Cotanquitsiquea icantajiguri  
ashivanti:

—Aato pitsaroajiguitsi. Iroguentiquea  
nocoraquetantacaca noncamanquempi-  
quea shinetacajiaquempineca pishine-  
majatantajianaquempaca aviatimpajia  
aisa maasano pigonorojia. <sup>11</sup>Ontaniqui-  
quea ontaniqui Verenequi ichoocaveta-  
gueti Taavini coramaniqui voaquequea  
Meshiajiaquempineca, iriotaque  
Quirishito<sup>e</sup> Amajirote. <sup>12</sup>Imaicaquea  
poapoaitanaquegueti pamenajiaopojaque-  
riquea ampiguiricacotacaquea paañoqui  
yojoquijicaquea ishecatantaca viratsi.  
Irootaquequea pintsatantaquempaca  
teetarite namatavijajiguempiji.

**e 2.11 Quirishito.** Iguenquetsatsarequi quiriegojia icanquegueti *Christos* (Quirishito) manaquea  
ocanque “Ishaguijataquea” aisa “Icoguiaqueca”, irishaguijitaqueritari orejiqui orivo irirajia  
icoguiajiaqueca impeaquempa imajirojiate irooca isaserorotejiate. Irira Quirishito  
iriotaquequea itsavetacotsitacaca tsavetantajatisca coramanitica intigarancaque Aapani  
Irioshi impeaquepaniji Imajirojiate maasano.

<sup>13</sup>Taampina iconijatsitapoja iriatim-paqui itsipapae inquitequitica catintijiacaquea icarapiovaetaque. Ishineventajacariequa Aapani Irioshi icantajigui:

<sup>14</sup> “Ontaniquiqueate jenoqui incantajiqueriqueate: ‘Caavijiquea yogane-jencamajata Aapani Irioshi.’”

Acaniquiquea quepatsiqui inchoocajaquequea cameetsa maasano incavintsajajaqueca Aapani Irioshi.”

<sup>15</sup> Arikeate yoayoaitanajigueti irashivantijite Aapani Irioshi jenoqui inquitequi, iquenquetsatavacaajianaca-quea iriatimpajia icantajigui:

—Jamequetishiatsi oahoaitanaque Verenequi amenajiaquieriqueate itsatasacajianaacajica.

<sup>16</sup> Yoayoaitanaquequea, itaampinata-naque yarejerejeipojaca yamenajiapojiro-quea Maria aisa Jose jeri aisa chaajanquiri joquijitaca, yojoquijitancarоquea ishecatantaca viratsipae. <sup>17</sup>Iroompaqueate yamenajiapojirigueti itsavetantajapiopojaque-roquea maasanopae icamanquerica irashivantite Aapani Irioshi irashi chaajan-quitirajaca. <sup>18</sup>Maasano quemajiavaquerica itsavetantajiaquerogueti yamenajianaque-queate intati. <sup>19</sup>Oraquea Maria ococani-quea oquenquejaguitironiquea maasanopae, teatarite ompeacotemparoji. <sup>20</sup>Arikea yoayoaitanajiquea quempoguiija-guirica oveja, ishineventajianacariequa Aapani Irioshi, yamenajiaquequeate onetsanatanacaquea maasanopae icantajia-querica irashivantijite Aapani Irioshi.

**Yaajitanaqueriquea Jesoshi tetemporoqui**

<sup>21</sup> Arikeate yarejetacotapojaclarogueti savincaguiteri 8 itotsaiquijiqueriquea

ichonquimashi irijanite Maria. Ipajijiqueriquea Jesoshi, aritarite icanquero irashivantite Aapani Irioshi itsatacaaquitirogueti tequeratagueti inchoocatimateji.

<sup>22</sup> Arikea iriraquea Jose aisa Maria inetsanaqueroquea ocanqueca itioncaco-tanaqueca Moishishini,<sup>f</sup> jeroquea arejetapojagueti savincaguiteri incantantajiaquemparica saserorote: “Cameetsatanajimpi imaica aatoniji picovaetajiro teemporo itsaroventantaji-tarica Aapani Irioshi”, yoanaquequea Jose aisa Maria Jerosarequi yaajiana-queriquea Jesoshi tetemporoqui incanquequea: “Jeri irica irijani.”

<sup>23</sup> Arikea iquejetacaa jicaroquea imaica cameetsanjite irinetsanatimenta-jiaqueronijite Itioncacaantaqueca Amajirote coramanitica ocanquequea: “Maasano iriquetica pipariacaca pirijanincaca pojocajeneriquea Amajirote irashintajempariniji.”

<sup>24</sup> Yoayoaitanaquequea yaajianaquequea viratsi yojocajiaqueneriquea saserorote intajaiqueneriquea Aapani Irioshi, irinetsanajiaqueroniji Itioncacaanta-queca Amajirote ocanquegueti irojocaji-aqueneriquea “mavite jeento irioca mavite emoreni iriaqueraca quimopona-tananquitsica.”

<sup>25</sup> Oraniquiquea Jerosarequi chooca-quea aparo tsaroventamajatarica Aapani Irioshi, ipajitaquea Shimeone. Icomaja-majatacaquea. Yoguijaguitiniquea coramaniqui incoraquetaquequea Meshiantanquitsineca shinetaacajajem-parineca ishimampojancajiacagueti maasano ishiraerijia. Iriguentiquea choocqueri Ishire Aapani Irioshi.

**f 2.22** Coramani Aapani Irioshi itioncacaquerigueuti *Moishishi* (Irev. 12.2-8) icanti ovoacotajegueti manquigarentsi irijanite, oguijacotempa 40 savincaguiteri aato oita tetemporoqui. Avisanaquegueti 40 savincaguiteri oanaque tetemporoqui ojocapojaqueneri saserorote ovejajaniquite aisa emoreni (irioca jeento) intashitaquenerica Aapani Irioshi. Aatogueti ichoocati ovejate cameetsataque ojocaueneri mavite emoreni (irioca jeento).

<sup>26</sup>Iriotaquequea cantaquerica  
aatotagueti yameniri incoraquequegueti  
Meshiantanquitsineca intigarancaqueca  
Aapani Irioshi, aatotajate imetojita.

<sup>27</sup>Irira Ishire Aapani Irioshi itigaranquitariquea Shimeone iroanajequea  
teemporoqui, iquijapojajiquea otantotacagueta. Ariquea ichoocaque icoraquejiaquegueti Jose aisa Maria yamajiaquerigueti Jesoshi irinetsanataqueronijite  
itioncacotanaqueca Moishishini coramanitica. <sup>28</sup>Iriraquea Shimeone yamenavaquerigueti Jesoshi yaitsitariquea  
yatsomajitsitari ishineventanacariquea  
Aapani Irioshi icanqueriquea:

<sup>29</sup>"Imaicaquea, Nomajirote, jac  
netsanatapojaca picanquenaca  
coramanitica.

Pininquegueti nometojaque imaica  
naatimpa paajanire, cameetsavaeque.

<sup>30</sup>Imaicatari nonejaqueri noquijaqui  
meshiantanquitsineca pitigarancaqueca,

<sup>31</sup>pinetsanatimojiaquerica maasano  
caquinteguetanquitsica.

<sup>32</sup>Intsirencacoshirentajiaqueriquea  
teece iriojia joriojia intsajiaque  
nijite queroquea incojaquempani irimeshiantajitaquempa-  
rica.

Inquemacojiaquerigueti irishinevae-  
jiaquempaquea, irishineventajita-  
quempariequa ishiraerijia  
pashintajaca."

<sup>33</sup>Ariquea iquemavaquerigueti Jose  
aisa iriniro Jesoshi iquenquetsatacoquerigueti yamenajianaquequeate intati.

<sup>34</sup>Iriraquea Shimeone yamanacoventajiaqueriqueate icanquequea incavintsaja-

majajiaqueriquea Aapani Irioshi,  
ariquea icanqueroquea Maria iriniro  
Jesoshi:

—Pamenequea quero incotanaquempani iricatica, irio irromposantajiaquempaca oshequini Ishiraeriqui, irio aisa incatiantajianajempaca itsipajia oshequini.<sup>35</sup> Ironigaantaqueroquea inintaqueca Aapani Irioshi, cotanquitsiquea inchoocagarantajiaquequea oshequini manintaquerineca,<sup>35</sup> onconijavaetantanaquempaca iquenquejajiaqueca. Maasanopaequea ocatica  
manaqueate oshimampojancacaquempiquea aviatimpa, manaquea onquejeve-  
quemparo irisatajajitempigueti  
osotoatsantsamenivaeque.

<sup>36</sup>Ariquea ochoocaquequea oraniqui  
aparoquea manquigarentsi tsavetanti-  
roca icanqueroca Aapani Irioshi opajita-  
quea Aana, iroguentiquea irorijanite  
Panoerini ichoviquitanaqueca Ashereni  
coramanitica. Iroatimpaquea oquenque-  
varovaetini coramani. Oraqueate  
iroaqueragueti oquenquevarotanaque-  
gueti imanquigajivecaroqua, ariquea  
anaanajaguetiquea 7 ajagantsini  
imetojaquequea manquigavecaraoca.

<sup>37</sup>Imaicaquea ochoocatashtajaquea  
ocaravaetanaque 84 ajagantsini.  
Ocoguitaniquea ochoocapiniquequea  
teemporoqui. Osanticopinquieroqua  
osheca teequea oshecatajempaji  
cameetsanjite osavicavenquerinijite  
Aapani Irioshi amanaqueriquea savinca-  
guiteriqui aisa pitsecariqui.

<sup>38</sup>Irooqueate amenavaquerigueti  
Jesoshi yamajiquerigueti ocoraquepoji-  
queate ocanqueriquea Aapani Irioshi:

—iAriotesaa, cameetsavaeque!

<sup>g 2.34</sup> Icanquegueti *irio irromposantajiaquempaca* icantacotaqueri irirajia caarica  
quemisantrica Jesoshi impomatsajiaquempaquea quejetaca irromposaquempa. Icanquegueti  
*irio aisa incatiantajianajempaca* icantacotaqueri irirajia quemisantaquerineca Jesoshi,  
irogueshishirentajigerui incatiashirentajianaje.

Arikea otsavetacotantaqueriquea ocantajiaqueriquea maasano oguijajiaquerica incoraqueque ompetajemparoneca Jerosare.

<sup>39</sup>Iroompaquea Jose aisa Maria iteroncabajanaquerogueti inetsanajiaquerogueti maasanopae Itioncacaantaquea Aapani Irioshi icampojajaqueate Garireaqui, yoayoaitanaquequea iguinenticaguetai Nasarequi. <sup>40</sup>Iriraquea Jesoshi arimpa ijatiriquea iquenquevaritanaque itampishitanaquequea, aisa itsamajati iquenquejamajatanaque. Caavijiquea icavintsajamajataqueri Aapani Irioshi.

#### Yoaquitigueti Jesoshi teemporoqui

<sup>41</sup>Icantacoguitani iriri aisa iriniro aapojajagueti savincaguiteri Paashicoa yoayoaitapiniquequea Jerosarequi. <sup>42</sup>Iroompaquea yajagantsitacocaguetai Jesoshi 12 irajagantsite, aapojajagueti aisa Paashicoa, arikea itsipatananacari. <sup>43</sup>Iroompaquea anaanajaguetiquea Paashicoa icantajianajaguetai, iriraquea Jesoshi chaajaniquitirajagueti ichoocatajiquea oraniqui Jerosarequi. Cotanquitsiquea Jose aisa iriniro Jesoshi teequea intsajigueji, <sup>44</sup>yamenajiaquequea ariji yoguijaguijaitanajiriquea igonororja. Arikea opitsecavetanajaguetai yamenaguevetajari tee anejeriji, itsitacaguevecaroqua oraniqui icoacotsivetariequa ijiguetai aisa itsipatsipaicaca,

<sup>45</sup>teequea iramenajigueriji, tee anejeriji. Osavincaguitevetanacaguetai yoayoaitajiquea Jerosarequi iramenaguetapanajanteritaquea. <sup>46</sup>Ocarataque 3 savincaguiteri yamenaguetajiri, arikea yamenapoajiri quijsquea otantotacaguetai teemporo, savicaquequea iconoajiacariquea tsatacaantajiguiroca itioncacaantaquea Moishishini coramanitica, iquemisantajavaqueriquea icoacotantaqueroquea. <sup>47</sup>Iriatimpajia icoacotsi-

majavetariquea manamajaguetanquitsica, cotanquitsiquea iriatimpayoguisotoajiavaqueneriquea. Maasano quemajiaquerica yamenamenaitanaquequea intati, yamenajiaqueriqueate caaviji itsamajati.

<sup>48</sup>Oraquea Maria aisa Jose yamenapoajajirigueti yamenajianaquequea intati. Arikea ocanqueriquea iriniro:

—¿Taaquea, irijani, piquejetantajiaquenaca imaica? Namenaguevetajimpiqueate naatimpay aisa piri notsitacaguevecaroqueate, tee anejempiji, ocanavaetaquitanaquea tsarorec.

<sup>49</sup>Iriraquea Jesoshi icanquieroquea: —¿Queroquea ococani pitsitacavae-tantavetanacaroca pamenajiaquenaquea? ¿Arimatee pintsateji iroguentiquea nosavicaventamajaque intintaguetica Aapani?

<sup>50</sup>Cotanquitsiquea iriatimpajia teequea intsajigueji taacaquea icanqueca.

<sup>51</sup>Arikeate itsipatsipaitanajariquea Nasarequi. Iriatimpajuea icocaniquea iquemisantamajatiriquea iriri aisa iriniro. Iriatimpajuea ococaniquea oquenquejacoqueroquea maasanopae icanqueca, teequea ompeacotemparloji.

<sup>52</sup>Iriraquea Jesoshi arimpaquea iquenquevaritanaque, aisa arimpaquea itsamajatanaque. Iriraquea Aapani Irioshi ishinevencariquea, aisa caquinteja maasano ishineventajiacariquea.

Itsavetantanaquequea Joanca  
Viñacajatantatsica  
oquitamampororoipojaquegueti  
(Mt. 3.1-12; Mr. 1.1-8; Jn. 1.19-28)

**3** <sup>1</sup>Coramani imajirontaca Tiverio Sesa Iromaqui. Iroomba ovegaratacaguetai 15 ajagantsini imajirontacaguetai, choocaquea iramajirore pajitatsica Pontsio Pirato itigaranca-

queca irinetsanajiaqueneriniji Joreaquitica. Iriraquea Erorishi<sup>h</sup> iriguentiquea netsanajigurica Garireaquitica. Choocaea iriguentijeguite pajitatsica Jeripe, iriatimpaquea iriguentiquea netsanajigurica Itoreaquitica aisa Teraconitequatica. Iriraquea netsanatantatsica ontaniqui Aviriniaqui ariguenti ipajica Irisaniashi.<sup>2</sup> Aisa choocaquea mavite saserorote anaantamajatanquitsica. Aparoquea ipajitaquea Anashi, iriraquea itsipa ipajita Caipashi. Iriraquea Joanca, irijanite Sacaria, choocaquea ontaniqui, ichoocaquequea osamani oquitamampororoitapojigueti. Ariquea iquenquetsatacaaqueri Aapani Irioshi.<sup>3</sup> Iquemaquerigueti Joanca yoanaquequea icantanacaroquea Jororanequi, itsitacavaejianaqueriqueate choocajatsica oraniqui, itsavetantavaetanaqueroqueate icantajiguriquea: “Pincantashitatijaianajempa povashiantajianajero pipeacaaguishejia-vecaca, piviñacajajianaquempacea aatonijite icatsimatimentajiguimpiroquea Aapani Irioshi maasanopae pigovaeguisherejia, manaqueate irishetajempiroquea.”

<sup>4</sup>Aritarite itionquicaroquea Isaiashini coramaní icanquequea:

“Inquenquetsataquequea oquita-  
mampororoitapojigueti iririjen-  
cani, incanquequea:  
‘Pinetsanatashijiaquempari Amaji-  
rote inquenantapojempaca,  
pintanarejagueteneri iguenavoqui-  
ropae ontampaticapoquitanta-  
naquempaca.

<sup>5</sup> Querocacaquea oquichovitoquiague-  
cagueti intijajiquero cameetsa-  
nijite ovepampajantanajem-  
paca.

Oraquea otsempiguetatsica aisa otsonquiinapae irivepampajajueguero.

Oraticaquea quenavoquirontsicopopoquiguetanquitsica ontam-  
paticavoquitanaque.

Irooqueate quenavoquirontsicopopoquiguetanquitsica  
irivevajajiguetaqueroqueate.

<sup>6</sup> Ariquea iramenajiaque maasano  
caquinte quero icota Aapani  
Irioshi imeshiantigueti.”<sup>i</sup>

<sup>7</sup>Oraqueate yoayoaitanaquegueti tirorerere caquinteja iriviñacajajiguériquea Joanca, iriatimpa icantajiavaqueriquea: “iQuejeliaquempiquea irijanijiate sanatari! Pitsanirovetacaquea. ¿Taate cantajiaquempi picoraquecoraqueitanta-  
caca acaniqui noviñacajajiaquempiquea aatonijite icatsimajiguimpiquea Aapani Irioshi oncoramanitapojagueti incatsimatimentajiaquerigueti maasano igovaeguisherejia?<sup>8</sup> Iintsija pinetsanamajajianaquempaja iramenajiaquempi-  
nijite maasano arimajaca picantashitatijaianaja povashiantajianajiro picovae-  
guishevetcacaca, pintaroventamajatana-  
jemparija Aapani Irioshi. Imaica aatoja picantajigui: ‘Aatoqueate icatsimajigana Aapani Irioshi, naroguentitari ichoviquijiani Averaameni.’ Pamena jigueroja oratica mapiporoqui. Irininquegueti Aapani Irioshi iragavejaquequeate impeacaajiaquemparoquea ichoviqui-  
vaejianaqueca Averaameni.<sup>9</sup> Jac, yaajitiro poshontyo, itsitijitanaquero inchajijitaquero ovarí maasano inchato teeca oncameetsateji oitsoqui, ariquea intajajiquero paamariqui.”

<sup>10</sup>Iriatimpajia icantsijigariquea:  
—¿Querocacaquea noncojiaquempani?

**h** 3.1 Iriratica *Erorishi* irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

**i** 3.4-6 Is. 40.3-5.

<sup>11</sup>Icantiriquea Joanca:

—Choocagueti ashintanquitsica  
mavite iitsaare irojocagaranqueneriquea  
quericaca teeca inchoocatacoteji. Aisa  
quericaca chocatacotanquitsica isheca  
irojocaqueneriquea teeca inchoocataco-  
teji.

<sup>12</sup>Arikea ichoocajiaquequea oraniqui  
capiocapinijiguinirica majirontatsica  
imentaquipae,<sup>j</sup> iroguentiquea icoraque-  
tashijiaque iriatimpajia aisa incampoje-  
rieka Joanca iriviñacajajiaqueri.  
Iquemajiaquerigueti iquenquetsavae-  
quegueti Joanca icantsitanacaquea  
iriatimpajia:

—Tsatacaantantatsica, naatimpajia,  
¿querocaquea noncojiaquempani?

<sup>13</sup>Icantsijigariquea:

—Imaicaquea aviatimpajia aatoja  
poganaajiguiniriquea pigonorojia,  
iroguenti paaajiaque intati icanqueca  
majirontatsica.

<sup>14</sup>Arikea icoacojiaqueriqueate  
coaretapae aisa icantsijigariquea:

—Naatimpajia, ¿querocaquea nonco-  
jiaquempani?

Icantajiguiriquea Joanca:

—Aviatimpajia aatoqueate paapitsaj-  
uiritsi taaca opajitapae yashincaca  
itsipapae aisa aatoquea picantajigiri:  
'Aatogueti pojocanaro noninqueca  
noncatsimauquempiquea.' Aatoja  
pamanantajigu imentaquipae itsipa,

aatoja picantitsi: 'Aatogueti pojocana  
nontsojevenquempiquea incatsima-  
quempiquea majirontatsica.' Iriraquea  
imentaquitsite ivegarakuempica  
majirontatsica ariotapojaquequea,  
aatoquea pinintajiguitsi itsipapae.

<sup>15</sup>Irirajiaquea maasano capiocajian-  
quitsica oraniqui arikea icojianaca  
intamtamajajianaquequea intsamajajia-  
queri Joanca iriocajate Quirishitota-  
tsica.<sup>k</sup> <sup>16</sup>Cotanquitsiquea Joanca  
icantajiguiriquea maasano: "Naatimpá  
iroguenti nantaque noviñacajatantajia-  
quempiro oja iramenantajiquemparoca  
arimajaca picantashitatijaianaca  
povashiantajianajiroquea pipeacaagu-  
shetacaca, cotanquitsiquea incoraque-  
poje impoitapojenanea caavíi  
yanaaquaquea yagavejamajati.

Ooshiatsi, aatotarite noquempejitaritsi-  
quea iriatimpá nompeaquémpame  
amiquerineca noishorejacoquerimeca  
igaviguitire. Iriatimpá inquempetacaan-  
taquemparo iroviñacajatantajiaquempiro  
Ishire Aapani Irioshi aisa paamari.<sup>l</sup>

<sup>17</sup>Incoraquepojaquegueti iroashigueta-  
pojempariquea queri tsaroventamajaca-  
rica. Inquempetanaquemparo quea  
aguerogueti oitsoqui, asagorejitemparo,  
ampishoncavaueroquea oncoraquejen-  
caquegueti chovigajenca, aanaquero-  
quea osagoma, onchoocatashtana-  
quempa oitsoqui. Aguijaavaqueroquea

<sup>j</sup> 3.12 *imentaquí*. Coramani tee inchoocavetempaji quenapapana ipeacaantajitaca paperipana, iroguenti chocataqnitsi imentaqui cavorejatatsica. Irootaque ivergaratantajitaca coramani.

<sup>k</sup> 3.15 *Quirishitotatsica*. Iguenquetsatsarequi guiriegojia icanquegueti *Christos* (Quirishito) manaquea ocanque "Ishagujitaqueca" aisa "Icoguiaqueca", irishagujitaqueritaro orejiqui orivo irirajia icoguiajiaqueca impeaquequempa imajirojiate irooca isaserorotejiate. Irira Quirishito irotoquequea itsavetacotsitacaca tsavetantajitsica coramanitica intigarancaque Aapani Irioshi impeaquequempaniji Imajirojiate maasano. <sup>l</sup> 3.16 *Paamari* oquenquetsatacota-  
quero mavitepae. (1) Pamenero otsapa 17 acaniqui ocantacoquerogueti camorecarí  
intaantajitaquemparo quea caarica netsanatiro ininqueca Aapani Irioshi. (2) Pamenero aisa Ya. 2.3  
ocantacoquerogueti icoraquepojaquegueti Ishire yamenajiquero quejevetaca paamari.  
(3) Pamenero aisa 1 Co. 3.13 ocantacoquerogueti iramenantajitaquemparogueti  
yantaguetaqueca maasano caquite.

shimatoqui anquempoguijitemparoqua. Oraquea osagoma antaitemparoqua. Arikea inquempetaquempaquea Amajirote incapiocajapojaqueriquea tsaroventamajacarica intsipatsipaitanajempari jenoqui ichoocatigueti Aapani Irioshi. Iriraquea teeca intsaroventajiguempariji intigarancaqueriquea camorecariqui teeca ontsivacavaete, incoquempaniquea irantsipevaejaquem-paquea.”

<sup>18</sup>Arikea iquejetacaquea imaica Joanca icamantajiaqueri maasano quero incojiaquempani, oshequi icamantague-taqueri, itsavetacotimojiaqueri Quenquetsatsarentsi Oganejencatatsica.

<sup>19</sup>Aisa icantomajajeriquea majiron-tatsica Erorishi, yamenajeriquea yaapitsaqueriqueate iriguentijeguite imanquigare pajitatsicaquea Erorishi. Teetarite aparoquea onchoocateji ocatica. Icantimentaguequeriquea aisa taaca opajitapae icovaeguisheguetacaca. <sup>20</sup>Arikea yogaavaetanaca Erorishi, yogavitaquero oca: isantanatacotsitari-quea Joanca.

**Iviñacajataacaantacaquea Jesoshi**  
(Mt. 3.13-17; Mr. 1.9-11)

<sup>21</sup>Oraqueate tequerataguetequea irisantanatacojiteriji Joanca, choocatira-jaquea iviñacajatantaguitiniquea, arikea iviñacajataacaantajiacá oshequini caquintejia, arikea iquejeta-caquea aisa Jesoshi iviñacajataacaantaca-

quea iriatimpa. Arikea iriraquea Jesoshi yamanaqueriquea Iriri. Iroompampa-quea yamanaquitiguiriquea otanarejana-caquea inquite <sup>22</sup>yamenajitavaqueriquea Ishire Aapani Irioshi iquempetapojacari-quea emoren yampiguiricashipojacari-quea iriatimpaqui. Arikea iquenquetsa-jencajitanaque jenoqui inquitequi, icanque:

—Aviguentiquea Irijani nopsisamaja-tacaca, noshineventamajataquempiquea aviatimpa.

**Choviquijianaquerica Jesoshi**  
(Mt. 1.1-17)

<sup>23</sup>Arikea yajagantsitacotanaquequea Jesoshi 30 ajagantsini iparianacarogueti itsatacaantaque. Ijjitaquejiquea iriojiquea irijanintamajatari Jose, cotanquitsiquea iriguentiquea choviqui-tanaqueri Eri.<sup>m</sup>

<sup>24</sup>Iriraquea Erini iriguenti irijanite Matate.

Irira Matateni iriguenti irijanite Irevi.

Irira Irevini iriguenti irijanite Merequi.

Irira Merequini iriguenti irijanite Jana. Irira Janani iriguenti irijanite Jose.

<sup>25</sup>Irira Joseni iriguenti irijanite Matatiashi.

Irira Matatiashini iriguenti irijanite Amoshi.

Irira Amoshini iriguenti irijanite Naomo.

**m 3.23** Omanaca ocatica oguipitsocaquerogueti. Oraquea iguenquetsatsarequi guiriegojia icanquegueti *huios*, chooca mavite aguenquetsatsarequi oguipitsocaquerogueti: oconoagarantaca ocanque “irijanite”, oconoagarantaca aisa ocanque “ichoviquitanaqueca”. Omanaca aisa otsipa: tee onconigamajateji queri ocantacotaquea ichoviquitanaqueca Eri. Iriogueti Jose ocantacotaque guiriegotsaqui ocanquegueti *huios...tou Eli*, oguipitsocaquero “irijanite Eri”. Cotanquitsiquea iriogueti ocantacotaque Jesoshi, oguipitsocaqueroga-“ichoviquitanaqueca Eri”. Mateo 1.16 ocanti iriri Jose ipajita Jacovo, irootaquequea namenantacaca acaniqui irio ocantacotaque Jesoshi ichoviquitanaqueca Eri. Chooca otsipa itionquequea jorio coramani ocanti iri Maria ipajita Eri. Irioca tioncacotanquitsica acaniqui, riotari choviquitanaquerica Jesoshi.

- Irira Naomoni iriguenti irijanite  
Eseri.
- Irira Eserini iriguenti irijanite  
Nagai.
- <sup>26</sup> Irira Nagaini iriguenti irijanite  
Maati.
- Irira Maatini iriguenti irijanite  
Matatiashi.
- Irira Matatiashini iriguenti irijanite  
Semei.
- Irira Semeini iriguenti irijanite  
Joseco.
- Irira Joseconi iriguenti irijanite  
Jora.
- <sup>27</sup> Irira Jorani iriguenti irijanite  
Joanani.
- Irira Joananini iriguenti irijanite  
Iresa.
- Irira Iresani iriguenti irijanite  
Sorovaveri.
- Irira Sorovaverini iriguenti irijanite  
Saratieri.
- Irira Saratierini iriguenti irijanite  
Neri.
- <sup>28</sup> Irira Nerini iriguenti irijanite  
Merequi.
- Irira Merequini iriguenti irijanite  
Ari.
- Irira Arini iriguenti irijanite Cosame.
- Irira Cosameni iriguenti irijanite  
Erimarami.
- Irira Erimaramini iriguenti irijanite  
Eri.
- <sup>29</sup> Irira Erini iriguenti irijanite Josoe.
- Irira Josoeni iriguenti irijanite  
Eriesere.
- Irira Eriesereni iriguenti irijanite  
Jorimo.
- Irira Jorimoni iriguenti irijanite  
Matate.
- <sup>30</sup> Irira Matateni iriguenti irijanite  
Irevi.
- Irira Irevini iriguenti irijanite  
Shimeone.
- Irira Shimeoneni iriguenti irijanite  
Joraa.
- Irira Joraani iriguenti irijanite  
Joname.
- Irira Jonameni iriguenti irijanite  
Eriaquime.
- <sup>31</sup> Irira Eriaquimeni iriguenti irijanite  
Merea.
- Irira Mereani iriguenti irijanite  
Mena.
- Irira Menani iriguenti irijanite  
Matata.
- Irira Matatani iriguenti irijanite  
Natani.
- <sup>32</sup> Irira Natanini iriguenti irijanite  
Taavi.
- Irira Taavini iriguenti irijanite Isai.
- Irira Isaaini iriguenti irijanite Overi.
- Irira Overini iriguenti irijanite  
Voose.
- Irira Vooseni iriguenti irijanite  
Saramoni.
- Irira Saramonini iriguenti irijanite  
Naasone.
- <sup>33</sup> Irira Naasoneni iriguenti irijanite  
Aminaravo.
- Irira Aminaravoni iriguenti irijanite  
Arame.<sup>n</sup>
- Irira Arameni iriguenti irijanite  
Eserome.
- Irira Eseromeni iriguenti irijanite  
Parese.
- Irira Pareseni iriguenti irijanite  
Joraa.
- <sup>34</sup> Irira Joraani iriguenti irijanite  
Jacovo.
- Irira Jacovoni iriguenti irijanite  
Ishaaco.
- Irira Ishaaconi iriguenti irijanite  
Averaame.

<sup>n</sup> 3.33 Oconoagarantaca paperi ocanti ocaniqui: “Irira Aminaravoni iriguenti irijanite Aramini. Irira Araminini iriguenti irijanite Arini.”

- Irira Averaameni iriguenti irijanite  
Tare.
- Irira Tareni iriguenti irijanite  
Nacori.
- <sup>35</sup> Irira Nacorini iriguenti irijanite  
Serogui.
- Irira Seroguini iriguenti irijanite  
Iragao.
- Irira Iragaoni iriguenti irijanite  
Peregui.
- Irira Pereguini iriguenti irijanite  
Evere.
- Irira Evereni iriguenti irijanite  
Shera.<sup>o</sup>
- <sup>36</sup> Irira Sherani iriguenti irijanite  
Cainane.
- Irira Cainaneni iriguenti irijanite  
Arepaisare.
- Irira Arepaquisareni iriguenti  
irijanite Sheme.
- Irira Shemeni iriguenti irijanite  
Noe.
- Irira Noeni iriguenti irijanite  
Irameco.
- <sup>37</sup> Irira Irameconi iriguenti irijanite  
Matosare.
- Irira Matosareni iriguenti irijanite  
Enoco.
- Irira Enoconi iriguenti irijanite  
Jarete.
- Irira Jareteni iriguenti irijanite  
Maarareere.
- Irira Maarareereni iriguenti irijanite  
Cainane.
- <sup>38</sup> Irira Cainaneni iriguenti irijanite  
Enoshi.
- Irira Enoshini iriguenti irijanite  
Sete.
- Irira Seteni iriguenti irijanite Arai.
- Irira Araini iriguenti irijanite  
Aapani Irioshi.<sup>p</sup>

Inintavecaquea ampatsini  
irantacaquerime Jesoshi teeca irininteji  
Aapani Irioshi  
(Mt. 4.1-11; Mr. 1.12-13)

**4** <sup>1</sup>Oraquea iroaqueragueti iviñacaja-tacaantacagueti Jesoshi Jororane-niqui ichoocamajapoaqueriqueate Ishire Aapani Irioshi, yaanaqueriquea ontaniqui oquitamampororoitapojaque-gueti. <sup>2</sup>Ariquea icoraquetashiqueriquea imajirote ampatsini yasereseretaqueriquea yamenantavetacari inintavecaquea irantacaquerime teeca irininteji Aapani Irioshi. Ariquea ichoocaque Jesoshi oraniqui oavaetanaquequea 40 savinca-guiteri, teequea irishecatempaji. Ogatsimajatanaqueri itase. <sup>3</sup>Iroompa-quea icantaqueriquea ampatsini:

—Iintsja arimajagueti aviguentica Irijanite Irioshi iintsijate pincanteroja ocatica mapi ompeanaquempata pan pishecataquempaca.

<sup>4</sup>Cotanquitsiquea Jesoshi icanqueriquea:

—Choocatarite otioncacocagueti ocanquequea: ‘Teequea aparo ontampishitacaanteji isheca caquinte, jero aisa maasano icanqueca Aapani Irioshi.’

<sup>5</sup>Iroompaquea yaanaqueriquea jmm agasataanquitsica yonigaaguetaqueri maasanopae quepatsi yashincaca majirontaguetatsica aisa maasanopae yashintajiacaca. <sup>6</sup>Icanqueriquea:

—Iintsja nompeacaitsitempiquea imajirojate maasano, nojocaqueMPI-quea maasano yashintajiacaca. Aritarita maasanopae ocatica pamenaguequeca iroguentitari nashi. Naatimpaquea nagavejaque nojocaueneri quericaca nonintacaaqueca. <sup>7</sup>Ariguetija piguero-

**o 3.35** *Shera*. Icantajitiri aisa “Sara” (*Sala*). **p 3.38** Icanque *Irira Araini iriguenti irijanite Aapani Irioshi*, teenica inchoocatenica caquinte irijanintacarica Arai, mana ipeacaacariequea Aapani Irioshi.

venquena pintsarovenquena, pashintaguetaquemparoqua maasano.

<sup>8</sup>Icantitanajaquea Jesoshi aisa  
icanqueri:

—Choocatarite otioncacagueti  
ocanquequea: ‘Pintsaromentaqueemparia  
Majirontamajatatsica Pirioshite,  
aparoqueate iriguenti pimajirontamaja-  
quempa.’

<sup>9</sup>Iroompaquea ariquea yaanaqueri-  
quea Jerosarequi icatiacaapojacari-  
queate teemporoqui itsaroventantajita-  
rica Aapani Irioshi ochoviinatapojacac-  
gueti ocaravaequequea jenoqui ocanca,  
icanqueriquea:

—Iintsija arimajagueti aviguentica  
Irjanite Irioshi, iintsijate pisapocanaque  
isaviji, <sup>10</sup>ocanquetarite itioncacojiquero-  
gueti ocanque:

‘Intigarancajiaquempiriquea Irioshi  
irashivantijite,  
quisho iroaroitanaquempi.’

<sup>11</sup>‘Irajiricanaquemriquea irantsomaja-  
naquempi

aatonijite pitsitincapojaro mapi.’

<sup>12</sup>Icantitanacaquea Jesoshi icanqueri-  
quea:

—Cotanquitsiquea choocatarite  
itioncacojiquerogueti aisa ocanquequea:  
‘Aatoquea pamenantaritsi Majirontama-  
jatatsica Pirioshite.’

<sup>13</sup>Arikea iriraquea imajirote ampatsini  
iteroncaquerogueti maasano yamanantave-  
taracigueti, itsinampirejavetajatari.

**Yoanajiquea Jesoshi Garireaqui  
itsatacaantaguetanaque**  
(Mt. 4.12-17; Mr. 1.14-15)

<sup>14</sup>Iroompaquea yoanajiqueate Jesoshi  
Garireaqui. Arikea ichoocamaqua-

quea Ishire Aapani Irioshi yagavejaca-  
queriquea, arikea iquemacojiaqueri-  
quea maasano choocajatsica oraniqui.

<sup>15</sup>Itsatacaantaguetanaquequea shinago-  
gapaequi<sup>q</sup> icapiocantapinijiaca-  
joriojia, ishineventajianacariquea  
maasano.

**Itsatacaantavetacagueti Jesoshi Nasarequi**  
(Mt. 13.53-58; Mr. 6.1-6)

<sup>16</sup>Arikea yoanaquequea Jesoshi  
Nasarequi iquenquevaritaquegueti  
coramani. Iroompaquea aapojajagueti  
savincaguteri imagorejantajitaca  
yoanaquequea shinagogaqui icapiocan-  
tapinijiaca joriojia, iquijapojaque-  
quea, arikeate icotaniquea iriatimpa  
yoampinicaroqueate savincaguteri  
imagorejantajitaca.<sup>r</sup> Arikea icatiaca-  
quea irampsajavantaquero Iguenque-  
tsatsare Aapani Irioshi. <sup>17</sup>Yojocajiquene-  
riquea paperi itioncanaqueca tsavetan-  
tatsica Isaiashini coramaniqui. Yaitsita-  
roquea iponarejitaro yapatsajavantaque-  
roquea yamenaguequeroquea otioncaca-  
gueti ocanquegueti:

<sup>18</sup>“Ichoocaqueaqueate Ishire Amajirote,  
irorijite intintacaquenaquea  
nontsavetantavaetanaqueneri-  
queate maasano coguitejacoji-  
anquitsica,  
nontsatacaantaqueempatica  
Quenquetsatsarentsi Oganejen-  
catatsica.

Itigarancaquenaquea nontsavetanta-  
vaejianaqueneriqueate maasano  
yaajivecaca nontsatacaanta-  
quemparicaquea queroquea  
incojiaquempani cameetsanijite  
iroguipaquijajitajerinijite.

**q 4.15** Oratica icantajitica *shinagoga* iroguenti icapiocantajiac a joriojia yapatsajavantantaroca Iguenquetsatsare Aapani Irioshi aisa yamanantapinicarica. Querocaguete iguinentiguetaquegueti joriojia incarajiaquegueti 10 shirampari quenquevaritatsica iragavejaque impeacaaquemparo shinagoga. Incoguiitempariquea aparo jivaquerineca.

**r 4.16** *imagorejantajitaca*. Irira joriojia imagorejapinijiaque saavarroqui.

Itigarancaquenaquea namenaca-  
jaijerinijite shamoncajague-  
tatsica,  
nompejiaquempariquea icatsima-  
catsimajitica.

- <sup>19</sup> Nontsatacaa jiaqueriquea noncan-  
quequea: ‘Imaicaquea aapojaca-  
quea incavintsajamajatanta-  
quempica Aapani Irioshi.’”

<sup>20</sup>Iroompaquea iteroncanaquitinguiro-  
quea yapatsajavantaquerogueti  
yampiguiricajiroquea yojocajiniri  
jocaquenerica incajaranqui, isavicana-  
quequea. Maasanoquea choocajianqui-  
tsica shinagogaqui yamenamenaitana-  
queriquea sorerere. <sup>21</sup>Ariquea iquenque-  
tsatanaquequea icanquequea:

—Imaicaquea onetsanatimojiaquempi  
ocatica Tioncarentsi piquemajiaqueca.

<sup>22</sup>Maasanoquea iquenquetsatacota-  
querigueti Jesoshi, ishinevencarieate,  
yamenajianaquequea intati, yamenajia-  
queroquea cameetsavaequequea  
icantaguetaqueca, cotanquitsiquea  
icantavacaajianacaquea:

—Nojiquerisacanica irio irijanite Jose.

<sup>23</sup>Icantajiruriquea:

—Arimaja pincantajiaquena: ‘Aavin-  
tantatsica, paavintajempaquate  
avisati.’ Aisa pincantajiaquena: ‘Maasa-  
nopae noquemacojiaquero pantagueta-  
queca Caperenaoniqui iiintsijate  
pantagueteroquea aisa imaica acaniqui  
piguinteniqui.’

<sup>24</sup>Icantsitanajaquea aisa icanquequea:

—Arimajaquea noncantamajajiaquem-  
piquea iriraquea tsavetantiroca icanque-  
rica Aapani Irioshi aatoquea ishineven-  
tajitari igunteniqui. <sup>25</sup>Piquemacojiaque-  
roqueate paesatoniqui choocatirajagueti  
Iriashini teequeate ontejimatajeji incani  
anaavaetanacaquea 3 ajagantsini aisa 6  
taai. Itaseajianaquequea maasano  
Ishiraeriqui. Ochoocavetacaquea  
oshequiavaeveca metojacoropae Ishirae-

riqui, <sup>26</sup>cotanquitsiquea itigarancaqueri-  
gueti Aapani Irioshi Iriashini teetarite  
irooqua intigarancaqueneriji, arigue-  
tiquea itigarancaqueri Sarepetaqui  
irooshitacoqueroquea Shirone, iroimota-  
naqueroquea otsipaquea metojacoro  
teeca iro igonoromajaca. <sup>27</sup>Aisa  
coramani choocatirajaguetiquea  
tsavetantatsica Eriseoni ichoocajiavec-  
quea yoshequiavaeveca avejancarijia  
Ishiraeriqui, cotanquitsiquea teequeate  
impeaguetempaji aparo, iriguentequea  
pejaatsi aparo Shiriaquitica pajitatsica  
Naamanini.

<sup>28</sup>Irooqueate iquemaquemaitavaquiti-  
guiquea capiocajianquitsica icatsimama-  
majianaquequea maasano. <sup>29</sup>Icatintijia-  
nacaquea yoguisotoitsitariquea  
yaajianaqueri tijacoñajiquea oraniqui  
ocaratapojigueti ocapiocagueti tsoviro-  
naquipae. Yaajavetanacarieate  
ocogarajapojacagueti intanquirejitsitem-  
parimequea, iroguentiquea ocapiocaca-  
gueti itsovironaquitepae otsempiqui.

<sup>30</sup>Cotanquitsiquea iriatimpaquea  
iquenaguijianaqueriquea niganquiqui  
yomporoguijajiacagueti, yoapanajanti.

**Jesoshi yoguisotoajiri ampatsini**  
(Mr. 1.21-28)

<sup>31</sup>Iroompaquea yoanajiquea Jesoshi  
Caperenaoniqui, iroguenti guinentinintsi  
choocatqnquitsica Garireaquique. Arejeta-  
pojaguetiquea savincaguiteri imagore-  
jantajitaca yoanaquequea shinagogaqui  
icapiocantapinijiaca joriojia  
itsatacaantaquequea. <sup>32</sup>Iquemajiaquero-  
gueti itsatacaantaqueca mana yamen-  
maitanaquequea intati, agavejavae-  
quetari icanquequea. <sup>33</sup>Arikea  
ichoocaque oraniqui shinagogaqui  
aparoquea ishaquiaca ampatsini,  
icajemavaequequeate iririjencani:

<sup>34</sup>—¡Ariotaqueshiatsi, Jesoshi Nasare-  
quitica! ¿Queroquea pincojiaquenani

naatimpajia? ¿Irooquea picoraqueta-shique pinteroncaciaquena? Notsatava-quempiquea aviguenti Iriomajaca irashi Irioshi.

<sup>35</sup>Icantanaquequea Jesoshi:

—iPisanticote! Pisotoanajeri.

Irooquea iquemaquitiguirquea ampatsini ariquea icotanaca yoguiteja-naqueri ishaquiacaca, iquenapanajanti-quea isotoapanajanti yovashiantanajiri-quea, teequea queroca incotajeri.  
<sup>36</sup>Maasanojia mana yoayoaitanaque intati, iquenquetsatavacaajianaca:

—¿Quero ococani iquejequerogueti?  
iCantaquitiguir iquemisanqueriquea ampatsinipae, isotoapanajanti! iCaavijitari imajirontamajaca! iCaavijiquea yagavejamajati!

<sup>37</sup>Iroompaquea maasanopae choocajitsica oraniqui iquemacojiaqueriqueate Jesoshi.

**Jesoshi yogueshitajirogueti  
ivaguirote Shimo**  
(Mt. 8.14-15; Mr. 1.29-31)

<sup>38</sup>Ariqueate isotoanajiqueate Jesoshi shinagogaqui icapiocajiacaguetai, yoanaquequea itsovironaquequi Shimo. Oraqueate ivaguirote Shimo ashinoncayaeca quea ocatsirincavaeque. Icamantajitavaqueriquea Jesoshi irogueshitajero.  
<sup>39</sup>Yoanaquequea iroatimpaqui icanaanaca-quea iquenquetsatacaaquerorequea joquijirentsi yoguisotoajiroquea. Iroatimpaquea ariquea ocotanaja osavogatanaji. Ariquea ocatianaja ojocacojajiniri irisheca-jiakuempaca.

**Jesoshi yogueshiguetajirigueti  
yoshequiavaequequea ashinoncabajatsica**  
(Mt. 8.16-17; Mr. 1.32-34)

<sup>40</sup>Oraquea itsaparoncaguitetanajiguetai icoraquecoraqueitaquequea maasano

ashinoncacyjoquetai tsica ocantashitatiajen-caguecaquea ashinoncagantsipae, yaajianaqueneriquea Jesoshi irogueshi-guetajeri. Ipamijiavaqueriquea, ipeague-tanajaquea maasano. <sup>41</sup>Iconoagaranca-quea mana ishaquiajaciampatsini. Yoguisotojaijiniriguetai yoguisotosototajiri icajemavaetaquequea icanqueri:

—Aviguenti Irijanite Irioshi.

Cotanquitsiquea Jesoshi icantimentajiaqueriquea inquenquetsajaje, irioriji itsajiaque iriguenti Quirishito Meshian-tatsica.

**Itsavetantaquequeate Jesoshi Joreaqui**  
(Mr. 1.35-39)

<sup>42</sup>Osavincaguitetanajiguetai yoanaque-quea Jesoshi oraniqui teegueti inchoo-cateji caquinte, cotanquitsiquea icoajiaqueriquea caquintejia ariquea yarejetacovaejiacari ichoocaquegueti. Inintajiavetacaquea iraajivaquerime aatonijite yoanaji. <sup>43</sup>Cotanquitsiquea iriatimpa icantajigurikea:

—Noanaquetarite noncamantajiaqueri-quea aisa choocajianquitsica otsipapaequi guinentinintsi, nontsavetantaquero Quenquetsatsarentsi Oganejencatatsica nontsatac妖iaqueri quero icotani imajiron-tagueti Aapani Irioshi, irootaquequea itigararanquimenquenaquea Aapani.

<sup>44</sup>Iroompaquea yoanaquequea Joreaqui itsavetantaqueroquea shinagogapaequi icapiocapinijiaguetai joriojia.

**Yaajiaquequea icarapiovaetaquequea shima**  
(Mt. 4.18-22; Mr. 1.16-20)

**5** <sup>1</sup>Ariqueate yoanaquequea Jesoshi otsapijaqui iniromotija pajitatsica Jenesare.<sup>s</sup> Itiorencavantajianacariequa caquintejia, itsinacajianaqueri Jesoshi. Inintajiaquequeate inquemisantajiaqueri-quea itsavetantaqueroquea Iguenquetsa-

**s 5.1** Jenesare opajita aisa Garirea.

tsare Aapani Irioshi.<sup>2</sup> Arikea yameniro-  
quea Jesoshi mavite quenajarontsi  
ogataaguetaca. Igataajiaqueroqueate  
ashincaroca, yaguijijianaquequea yajacajia-  
jiroqueate imantsatsite.<sup>3</sup> Iroompaquea  
itetanajaquea Jesoshi iguenajaroqui Shimo  
icanqueriquea iraimatanajerota niganqui-  
jacoñaji. Isavicaquequea itsatacaajiaqueri-  
quea irirajia omporoguijajianquitsica  
otsapijaqui.<sup>4</sup> Arikea iteroncanaquerogueti  
iquenquetsataquegueti icanqueriquea  
Shimo:

—Jaameja ontaniqui osaanajataque-  
gueti panquitacotantajiguempari shima  
pimantsatsite.

<sup>5</sup>Icanquequea Shimo:

—Tsatacantantatsica, nanquitacove-  
guitarini incajaranqui pitsecariqui  
nocantacoveguitaniquea aapojaja  
osavincaguitetanaji, teequeate naimaji-  
gueji. Cotanquitsiquea imaicaquea  
aviguenti cantanquitsi, intsishiatsi.

<sup>6</sup>Irooquea yojocajajiaqueroquea  
inoshicajatsjijavetaroquea taaja itseraiqui-  
vaecaroqueate shimapae icanca, niganqui-  
queate otsatitsatiavetanaca imantsatsite.  
<sup>7</sup>Arikea yacocovaetanaquequea vacoc  
vacoc icajemaguitetsjigariquea mavina-  
quitandquitsica quenajarontsi iramitacojia-  
querinjite. Yoayoitanaquequea yamitaco-  
jiaqueriquea yaajiaquequea itseraiquiae-  
queri mavinaque queñajarontsiqui,  
tsitiatacovaeca.<sup>8</sup> Iriraquea Shimo Peerero  
yameniquerigueti caaviji yagavejamajati  
Jesoshi, igueroventsitariquea icanqueri:

—Nomajirote, cameetsa poanaje, aato  
pitsipatanatsi, naroguentiquea covaegui-  
shetatsica.

<sup>9</sup>Itsaroanaquequeate iriatimpa  
irisatijiaquea itsipatsipaicaca yamenajia-  
quequeate yaajiaquequea icarapiovaeta-

quequea shimapae.<sup>10</sup> Iriguentiquea  
itsipatsipaitacaquea irijanitepae Severeo  
ipajitaquea Santiago,<sup>t</sup> iriraquea itsipa  
ipajitaquea Joanca. Itsaroajianaquequea  
iriatimpajia aisa, cotanquitsiquea  
Jesoshi icanqueriquea Shimo:

—Aatoquea pitsaroguitsi. Imaicaquea  
irioquea pimpitsocashijianaquempa  
caquintejia, pinquejetacaajajempari  
shima panquitacojiguirigueti.

<sup>11</sup>Iroompaquea itsinampijaatacójiana-  
jaquea igataapanajantiro igueñajaropae,  
itariapanajantiroquea maasanopae,  
yoayoitanaji yoguijaguijaitanaqueri-  
quea Jesoshi.

**Jesoshi ipeajiriquea avejancari**

(Mt. 8.1-4; Mr. 1.40-45)

<sup>12</sup>Arikea ichoocaquegueti Jesoshi  
ocapiocacaguetti tsovironaquipae,  
icoraquepojiquea avejancari. Yamen-  
pojaquerigueti Jesoshi iguerovempoja-  
cari yarejevaetaquita ivancaqui isavi,  
icanqueriquea:

—Nomajirote, arigueti pininque,  
pagavejaque piveajena navejancavejan-  
caacaguetti.

<sup>13</sup>Iriraquea Jesoshi icantajempequita-  
naca ipamitsitari, icanqueri:

—Jeeje, noninque. iPimpeanajem-  
paja!

Irooqueate icanquitiguri jac peanaja  
yavejancavejancaacaguetti.<sup>14</sup> Arikea  
icantavajiriquea Jesoshi:

—Aatoquea picamanttsi. Iriguentiquea  
poimotanaque saserorote ponigaapojempa-  
riquea, paanajenerija viratsipae, pinetsana-  
queroja icantaqueca Moishishini cameetsa-  
nijite iramenamajauempinjite, arikea  
incanquempi peanajimpi, intsajiaquempi-  
nijite maasano peamajatajimpi.

<sup>t</sup> 5.10 *Santiago*. Iguenquetsatsarequi guiriego ipajita *Iakobos*. Iconoagarantaca quimajarerí  
yoguipitsocajerogueti ivajiro ipajitiri *Santiago*, itsipa ipajitiri *Jacobo*. Mavite oponeaca  
iguenquetsatsarequi evereo, ipajitiri *Yaakob*.

<sup>15</sup>Cotanquitsiquea arimpaqueate i quemacomajajianaqueriquea Jesoshi, itirorencashijianacariquea osheequini inquemisantajiaqueri intsavetantaque-gueti, aisa impeaguetajeriquea irashinoncrajanejia. <sup>16</sup>Cotanquitsiquea Jesoshi yoapiniti osamani teegueti inchoocatimateji caquinte iramanana-queriquea Iriri.

**Jesoshi yogatiajjirigueti teeca ironquempaji**  
(Mt. 9.1-8; Mr. 2.1-12)

<sup>17</sup>Iroompaquea itsatacaantaquegueti- quea Jesoshi, ariqua ichoocajiaquequea oraniqui isavisiisque pariseojia irisatijia- quea tsatacaantajiguiroca itioncacotana- queca Moishishini quenajiajapoatsicaquea Jerosarequi aisa guinentinintsipaequi Garireaquí aisa Joreaquí. Iriraquea Jesoshi yogueshijiaqueriquea ashinoncrajatiacsica, iriguentiquea agavejacaqueriquea Aapani Irioshi. <sup>18</sup>Ariqueate icoraquecoraqueipoji itsipapae caquinte yamacojiapojaqueriquea teeca ironquempaji irajajianaquereneriqueate intsompogui ichoocaquegueti Jesoshi.

<sup>19</sup>Cotanquitsiquea querocampa inquena- caajiaqueri inquijacaantajianaquempari- cate, omporoguijajacaquea tirorererere caquintejia. Yataitaitanaquequea jenoqui sotsiqui ocantamencotacagueti itsopajague- quero ogotapae ivichajajiguequea quepatsi, ishimatarejitaro, yoguisorroncaco- jiaqueriquea teeca ironquempaji itampati- catabotaquegueti ichoocataquegueti Jesoshi. <sup>20</sup>Iriraquea Jesoshi itsajavaqueri yaventajiajopojacari irogueshitajerini, i canqueriquea teeca ironquempaji:

—Shirampari, jac shetacotajimpi maasano pipeacaagushevècaca.

<sup>21</sup>Iriraquea tsatacaantajiguiroca itioncacotanaqueca Moishishini, irirajia

pariseojia iquenquejajianaque intati: “<sup>22</sup>Taate ipaji irira quejemanatacarica Aapani Irioshi? <sup>23</sup>Ooqueate choocam- pacá itsipa agavejanquitsineca irisheta- queroqueate covaeguisherentsi? Aparoqueate yagavejaque Aapani Irioshi.”

<sup>22</sup>Cotanquitsiquea Jesoshi itsajava- queriquea iquenquejajiaqueca icantsiji- gariquea:

—¿Queroquea picopicoitanacani piquenquejajianaquequea piquejejiaque- roquea imaica? <sup>23</sup>¿Querocampate caavijica anaaque mananquitsica? <sup>24</sup>¿Iroocajate noncantaquerigueti teeca ironquempaji: ‘Jac shetacotajimpi maasano pipeacaagushevècaca’, iroocajate noncantaquitigueri: ‘Pincatia- naje panijitanaje?’ <sup>24</sup>Imaicaquea namenacaajiaquempiroquea yagaveja- quequea acaniqui quepatsiqui irira Irijanite Caquinte<sup>u</sup> irishetacotajeri ipeacaagushevècaca caquinte.

Irooquea icantanaquitigui ipitsocashi- tari teeca ironquempaji icanqueriquea:

—Iintsija noncanquempiquea pincati- anaje, paanajero pinorijancaca, poanaje pitsovironaquitequi.

<sup>25</sup>Irooquea icantaquitiguiriquea icampa- najantaquea icatiapanajanta, yaanajiro- queate inorijancaca yoanaji itsovironaqui- tequi, ishineventamajatanacariquea Aapani Irioshi, icanquequea: “Ariotesaa, Aapani, poganejencamajata.” Maasanojia yamen- jiavajiriquea. <sup>26</sup>Yamenamenaitanaque- queate intati ishineventamajajanacariquea Aapani Irioshi iriatimpajia aisa, itsaroama- jianaquequea icantajigui:

—Imaica ocatica savincaguiteri amenantajiacaroca oganejencatatsica teeca iramenajiteroji.

<sup>u</sup> **5.24** Icanquegueti Jesoshi *Irijanite Caquinte* mana icantacotaca iriatimpia, mana oquejetaca icantacoqueri itsipa. Iriotaque Quirishito Meshiantatsica quenapojatsica jenoqui inquitequi, ieaquintetapojaquetari ivoapojaque.

**Ishecatacaquea Jesoshi  
itsovironaquitequi Irevi  
(Mt. 9.9-13; Mr. 2.13-17)**

<sup>27</sup>Arikeate isotoanajiquea Jesoshi icantanaja ontaniqui yamenapojaqueriquea aparo capiocapinitinirica majiron-tatsica imentaquipae. Ipajitaquea Irevi.<sup>v</sup> Isavicaquea ipashicatsarajitirogueti yoguijajavaqueri avisavisaitatsica ivesgaratacaajajavaqueriqueate imenta-quitsite maasano aajiananquitsica irajaararopae aisa taaca opajitapae. Arikeua icanqueriquea:

—Jameja, poguijatanaqueuna.

<sup>28</sup>Arikea yovashiantaguetanaquero-quea Irevi maasanopae, icatiitsitanaca, yoguijatanaqueueri.

<sup>29</sup>Iroompaquea itiacaanquequeate Irevi taaca opajitapae, icajemiqueriqueate Jesoshi irishecaquempa itsovironaquitequi. Icagemacaantaguequeri itsipapae oshequinii capiocapinijiguini-rica majiron-tatsica imentaquipae, itsipapae caquinte, irishinevenquempari Jesoshi. Itsipatsipaicaca ishecaciaca.

<sup>30</sup>Cotanquitsiquea iriraquea pariseojoia itsipatsipaicari tsatacaantajiguiroca itioncacotanaqueca Moishishimi, icantajiaqueri itsatacaane Jesoshi:

—¿Querocaquea picojiacaniquea pishecajicaguetsi pitsipatsipaitantaca-rica capiocapinijiguinirica majiron-tatsica imentaquipae aisa itsipajia covaeguishetatsica?

<sup>31</sup>Icantanaquequea Jesoshi:

—Iriraquea teeca irashinoncajempajiteetarite incoguitejacotempariji aavintantatsica. Iriguenti coguitejacoji-gari ashinoncajajatsica. <sup>32</sup>Arikeate noquejetacaquea naatimpa teequea irioquea noncoraquetashiteji teeca incovaeguishejiguempaji noncajemajia-

queri incantashitatijaianajempaja, iriguenti nocoraquetashijiaque covaeguishejatiacsica noncajemajiaqueriquea cameetsanjite incantashitatijaianajempanijite irovashiantanajeronijite ipeacaagushevecaca.

**Icoacojitaqueriquea Jesoshi  
irisanticotantajitemparoca isheca  
(Mt. 9.14-17; Mr. 2.18-22)**

<sup>33</sup>Iroompaquea icantajitaqueri Jesoshi:

—Iriraquea itsatacaanejia Joanca aisa irashijia pariseojoia yoguipaquijapinijia-quieroqua isheca teetaquea irishecati-sajtempaquea cameetsanjite incantaco-guitempaniquea iramanajiaqueriquea Aapani Irioshi. Cotanquitsiquea pashijia pitsatacaguica ¿querocaquea icojiacani teequea inquejejiguempariji iriatimpajia, manaqueate icantacoguitaniquea ishecguitani, imiraguitani?

<sup>34</sup>Iroompaquea iquempetacaanca Jesoshi icanque:

—Pinquenquejea inchoocateguetiquea iriaqueraca manquigatanquitsineca incajemajiaqueriquea itsipavijijiaca irishecajiaquempa, ¿arimpaqueate aatompate ishecajiga? Irishecajiaquempaquea, itsipajiacaritarite cajemajiaquerica, shinejiacaquea. <sup>35</sup>Cotanquitsiquea oraqueate aapojempagueti incatsimatan-tajitaquemparica irajaitanaqueri osamani, arikea iriguenti iroguiapajia-jantajiaquemparoca isheca, irishimam-pojancacojianaquempari.

<sup>36</sup>Arikeate Jesoshi iquejetacaajiacanriquea aisa icanque:

—Aato agaveji atotashitaro iroaque-raro quitsaarentsi capichaji ampatacan-quemparo iroquetishitequinica quitsaa-rentsi. Anquejetacaquempagueti imaica antovetaquemparogueti iroqueraro,

<sup>v</sup> 5.27 Iriratica *Irevi* ipajita aisa Mateo (pamenero Mt. 9.9; Mr. 2.14).

ompomatsaquempaquea. Oratica aavetacaca capichaji ompatamacataqui-vetaquempa, aato ocameetsamajati, aatotari oquejetaro.<sup>37</sup> Aisa aritarite onquejetaquempaquea iroguijaatantajitaquemparogueti vinoja iroaquerajatica oncachotapoje iroguijaatantajivetiquemparogueti imeshinanaquiqui iriquetinica. Oroameshinatanaquetari, oncachojamajavetanaquempagueti oshimoajavetanaquempaquea, ariuea oncotanaquempa aravoavetaquitempa imeshina, ariuea intyauquisanaque oshacojaatanaquempaquea vinoja, aisa impomatsataquempaquea imeshina.<sup>38</sup> Jeroquea caavijiquea ocameetsataque: orauea vinoja iroaquerajatica iroguentiquea iroguijaatantajiquemparo iriaquerameshinari cameetsanijite aatonijite opomatsajata vinoja, aisa aatonijite ipomatsata imeshina.<sup>w</sup><sup>39</sup> Aisa quericacaquea miraroca vinoja iroquetijaca teequea irinintajeroji iroaquerajaca, manaqueate icankequea:  
‘Oratica quea iroquetica irooquea cameetsajamajatanquitsica.’<sup>x</sup>

Ishireguijiaque tirigoitsoqui itsatacaane  
Jesoshi savincaguiteriqui  
imaginejantajitaca  
(Mt. 12.1-8; Mr. 2.23-28)

**6**<sup>1</sup> Iroompaquea aapojajagueti savincaguiteri imaginejantajitaca yoanaquequea Jesoshi icantanaca tirigomashiqui, itsipatsipitananaci itsatacaanejia. Irooqua icantajianacagueterquea oraniqui ishireguipanajanti

tirigoitsoqui isagorejajiaqueroquea ishecajiacaro.<sup>2</sup> Iroompaqueate yamena-jiaquegueti pariseoja icantsijigariquea:

—¿Quero octacani paajianaquequea tirigoitsoqui? Imaicatarite iroguentiquea savincaguiteri imaginejantajitaca icantimentantajitirotarite irantantajitemparo.

<sup>3</sup>Icantanaquequea Jesoshi:

—¿Arimpate teequea pampatsajavantacotimajigueroji aviatimpajia itioncacojitaquerigueti Taavini coramani ocanquegueti itaseanaque iriatimpa aisa itsipajianacaca, teequeate onchoocatimajaniquiteji taampaquea irishecajiaquempaca?<sup>4</sup> Iquijitsitanacaequee itsovironaquitequi Aapani Irioshi<sup>y</sup> ishecatacaroqua pan icantimentantajitica irishecajitemparogueti, manaquea yojoquijitaquero oraniqui shitaponcarontsiqui cameetsanijite iramaenaqueronijite Aapani Irioshi. Iriguentiquea shecataroqua saserorotejia, iriotaquequea cantaqueroqueate Aapani Irioshi. Cotanquitsiquea iriraquea Taavini ishecatacaroqua, aisa yojocajiaqueneriquea itsipatsipaitacaca.

<sup>5</sup>Icanquequea aisa:

—Iriraquea Irijanite Caquinte iriguentiquea cantatsica queroca icantimentantajitica irantantajitemparogueti savincaguiteri imaginejantajitaca, aisa querocaquea teeca incantimentantajiteroji.

Jesoshi yogueshitajiri  
chompevacovetasica savincaguiteri  
imaginejantajitaca  
(Mt. 12.9-14; Mr. 3.1-6)

<sup>6</sup>Iroompaquea aapojajaqueate otsipaquea savincaguiteri imaginejanta-

w 5.38 Itsatacaantica Jesoshi iroguenti quejetacaroca quitsaarentsi iroaqueraro, oquejetacaro aisa vinoja iroaquerajatica. Aato agaveji otsipatato itsatacaantica pariseoja aisa tsatacaantajiguiroca itioncacotanaqueca Moishishini. x 5.39 Ari iquejejiaca caquintejia, iconoagarantaca tee irinintejji inquemisantajero iroaqueraca itsatacaantaqueca Jesoshi.

y 6.4 Ocanquegueti itsovironaquite Aapani Irioshi iroguenti ocantacoque quitsaarentsivanco itsaroventantajitarica iriatimpa. Icantajitiro Taverenacoro. Coajica irijanite Taavini ipeacaacaro mapipanco icantajitica teemporo intsaroventantaquemparica. Ipajiqueroquea iroatimpa aisa itsovironaquite Aapani Irioshi.

jitaca yoanaquequea Jesoshi shinago-gaqui icapiocantajiacaca jorioja itsatacaantaquequea. Ariquea ichoocaque oraniqui chompevacotanta-caroca itincamijempequiqui, teequea iragavejempajiquea impacorejempaji.

<sup>7</sup>Iriraquea tsatacaantajiguiroca itioncactanaqueca Moishishini aisa pariseojia yamenamajataqueriqueate Jesoshi iramenajiaqueriquea arica impeajeri-queate savincaguiteriqui imagorejantajitaca intsavetantimenquerinijite incantajigue ipeacaaca teeca oncameetsateji ipeajiriquea chompevacori savincaguiteriqui imagorejantajitaca.

<sup>8</sup>Cotanquitsiquea Jesoshi itsataquequea iquenquejajaqueca. Icatsitariquea chompevacovetanquitsica:

—Iintsijate pincatigue iramenajia-quempinijite maasano.

Icatiitsitanacaquea. <sup>9</sup>Ariquea icantajiguiri Jesoshi:

—Iintsija noncoacojiguempi. ¿Querocaquea icanque Moishishini coramani? ¿Taaca irantantajitempaca savincaguiteriqui imagorejantajitaca? ¿Ariquea icanque impeacaantajitemparo cameetsa, irooca irantantajitaquemparo quea covaeguisherentsi? ¿Ari icanque aavajeri agonoro aatoniji imetoji, irooca icanque ametojaqueri?

<sup>10</sup>Ariqueate yamenaueriquea maasano capiocaventajiacarica icanque-riquea chompevacovetanquitsica:

—Pincantavacotempaja.

Iroquea icantavacovetanaquitiga ariquea icotanaja iraco jac peamajatana-naja. <sup>11</sup>Cotanquitsiquea iriatimpajia icatsimamajajianaquequea icanca,

iquenquetsatavacaajianacaquea querocaca incojiaquerini Jesoshi.

**Icoguiajiaqueri Jesoshi 12  
impeacaajiaquempaca itigarancane  
(Mt. 10.1-4; Mr. 3.13-19)**

<sup>12</sup>Otsipa savincaguiteri yoanaquequea Jesoshi otsempiqui iramaneriquea Aapani Irioshi. Yama-naqueriquea icantacoguitani osavincaguitanaj.

<sup>13</sup>Osavincaguitetanajigueti icajemajia-queriquea itsatacaanejia iriatimpaqui. Arikea icoraquejiaquegueti icoguiaque 12, ipeacaajiacari itigarancane.

<sup>14</sup>Maasano yaajiaqueca ariqueate ipajijiacaquea: Shimo (ipajitajica Peerero), Antirishi (iriguentijeguite Shimo), Santiago, Joanca, Jeripe, Varitorome, <sup>15</sup>Mateo, Tomashi, Santiago (irijanite Arejeo), Shimo (icantajitica "Serote"), <sup>z</sup> <sup>16</sup>Jorashi (irijanite Santiago)<sup>a</sup> aisa Jorashi Ishicariote (aacaanquerineca Jesoshi oncoramanitanajegueti).

**Itsatacaajiaqueriquea Jesoshi  
oshequi caquinte  
(Mt. 4.23-25)**

<sup>17</sup>Arikea yoguirincajaquea Jesoshi itsipatsipaitajariquea itsatacaanejia isavisaviopoji opiguitejacaguetai. Yomporoguiaventajianacariquea itsipapae itsatacaanejia yoshequiavae-quequea aisa itsipapae quenaquenaitapojatsica osamani Joreaqui aisa Jerosarequi aisa quenajiaopojatsica otsapijaguetapojacaguetaquea Tiroqui aisa Shirone. Iroguentiquea icoraquetashijiaquequea inquemisantajiaqueriquea

<sup>z</sup> **6.15 Serote** ocanque "nintamajatatsica". Iroquea icantajitiri irirajia jorioja nintamajatanquitsica iroguisotoajiguera Iromaqutica omperoperaacarica onchoocatashitajem-pamijite iguepatsite ishiraerijia. <sup>a</sup> **6.16 Iriratica Jorashi** (irijanite Santiago) ipajita aisa Tareo. Pamenero Mt. 10.3; Mr. 3.18. Iguenquetsatsarequi guiriego ocanque "irashi" Santiago irootaquequea iconoagarantantacaca caquinte yoguipitsocaquerogueti icantiri "iriguentijeguite" Santiago.

Jesoshi intsavetantaquegueti aisa cameetsaniji irogueshitimentajeriniji yojoquijiguetaquegueti.<sup>18</sup> Iriraquea ishaquiguetaacaca ampatsinipae yoguisotoaguejatiniriquea.<sup>19</sup> Maasanopae intintajiaquequea inchagajiaqueriquea, yamenajiaqueriquea yagavejamatjati, yogueshiguetajiriqueate maasano.

**Quericaca shinetavajatsineca aisa  
quericaca atsipetavajatsineca**  
(Mt. 5.1-12)

<sup>20</sup>Iroompaqeua yamenajiguiriquea Jesoshi itsatacaane icantajiguiriquea:  
“Caavijiquea pishinevaejiaquempa aviatimpajia coguitejacojian- quitsica,<sup>b</sup> pimajirontajiacaritarite Aapani Irioshi.

<sup>21</sup> Caavijiquea pishinevaejiaquempa aviatimpajia taseajianquitsica imaica,<sup>c</sup> pinquemajiaquempatari.  
Caavijiquea pishinevaejiaquempa aviatimpajia iraajianquitsica imaica, irogushinejajiaquempitari Aapani Irioshi pishirontajiaquempaquea.

<sup>22</sup> Caavijiquea pishinejianaquempaquea aviatimpajia irisemajitem- pigueti iramenajiaquempigueti pitsaro- ventajiacari irira Irijanite Caquinte.  
Aricaquea aatoquea intintajigui pinconoajiaquempari manaqueate incantagushejianaquempi

aisa incantacojiaquempi: ‘Irigeniti covaeguishemajatanquitsica.’

<sup>23</sup>“Iriraquea choviquijianaquerica ariquea iquejejiaqueriquea tsavetantaji- guinirica Aapani Irioshi coramanipae- quitica icatsimajiaqueriquea. Arikea aviatimpajia pamenajiaquegueti inquejejiaquempigueti imaica pishineji- anaquempaquea, pishinemajajana- quempa, pitsajiaquequea caaviji irogushinejamajaquempiquea Aapani Irioshi oncoramanitapoja jegueti ontaniqui inquitequi, ipeacaajiaquempi- rotari irojocajiaquempica.

<sup>24</sup> iCotanquitsiquea imaicashiatsi pantsipevajiguempa aviatim- pajia ajaarantajiatsica!<sup>d</sup>  
Aatotarite querica guishinejajim- pitsi oncoramanitapoja jegueti, iroorijite pishinetsicaquea imaica, pishineventaveceroquea pashintaguecaca.

<sup>25</sup> iImaicashiatsi pantsipevajiguempa aviatimpajia quemajianquitsica imaica, pintaseajigue!  
Imaica pijique: ‘Teetarite taaca noncoguitejacojiguempaji.’  
Oncoramanitapoja jegueti pinquenquejajiajaveltanquempa- roquea pinintajianaquequea incavintsaajiaquempiqueate Aapani Irioshi, cotanquitsiquea aatoquea ichoocatimati amijia- jempineca.

iImaicashiatsi pantsipevajiguempa aviatimpajia shirontajiatsica imaica, pishinevencaroqueate maasanopae quepatsipa equitica!

**b 6.20** Icanquegueti *coguitejacojianquitsica* iquejetacaacari aisa irirajia tsatanquitsica ishirequi tee iragavejamajatempaji. Pamenero Mt. 5.3.    **c 6.21** Icanquegueti *taseajianquitsica* iquejetacaacari aisa nintamajajianquitsica incomajamajajiaquempa, iragavejacajaiqueritari irinetsanajigueroininquequea quejetaca inquemajiaquempanica. Pamenero Mt. 5.6.

**d 6.24** Icanquegueti *ajaarantajiatsica* icantacotaqueriquea aisa irirajia quenquejajatiatsica: “Teetarite noncoguitejacotempariji impintsatacotena Aapani Irioshi, caavijiquea naatimpa nagavejaque.”

Oncoramanitapoja jegueti  
pishimampojanca jiaquempa-  
quea pirajajaquempa.

<sup>26</sup> iImaicashiatsi pantsipevaeljiguempa  
aviatimpajia irishineventajia-  
quempigueti maasano!  
Ariqueate iquejejiacariquea  
paesatininijianacarica ishineven-  
tajiacari tsavetantajatiatsica  
amataajjatsica.

**Ampintsajiaquempari catsimajiacajica**  
(Mt. 5.38-48; 7.12)

<sup>27</sup> "Imaicaquea aviatimpajia quemisan-  
tajiaquenaca noncantajiaquempiquea  
aisa. Pimpintsa jiaquempariquea  
catsimajiaquempica aisa pincavintsajaji-  
queriquea semaquempica. <sup>28</sup> Irirajia  
cantavetaquempica: 'iShoo poanaque  
camorecariquil', manaquea pinquenque-  
tsatacaqueriquea cameetsa, pincan-  
queri: 'Noninque pinchoocajiaque  
cameetsa.' Pamanaco ventajiaqueriquea  
quenquetsaguishetacovequempica.

<sup>29</sup> Inchoo caquegueti capojaquempineca  
pivoroqui pimpitsoquempaqueate  
acaquerocatica otsipavoro inquejetacai-  
temparoquea iroatimpa. Inchoo caque-  
gueti aa pitsataquempironeca piitsaare,  
irinintsaquempirogueti otsipa  
intsompoguitica piitsaare, pojquite-  
nempari. <sup>30</sup> Inchoo caquegueti  
amanaquempironeca taaca opajitapae,  
pojocaqueneriqueate. Inchoo caquegueti  
aa pitsa quempironeca pashincaca,  
aatoquea picantajiri: 'Pojocajenoja.'

<sup>31</sup> Pincavintsajajiguerija itsipajia,  
pinquejetacaguemparo pininquegueti  
incavintsajajempi aviatimpa.

<sup>32</sup> "Managueti irioca pimpintsa-  
guempa pintsajiguimpica aviatimpajia,  
carimpa irooqua irishinevenquempi  
Aapani Irioshi? Ariqueate icojiga aisa  
coguishejiatsica, itsajiguotari  
impintsaquempari pintsatarica

iriatimpa. <sup>33</sup> Managueti irioca pincavin-  
tsajajigue cavintsajajiaquempica  
aviatimpajia, carimpa irooqua irishine-  
venquempi Aapani Irioshi? Arikea  
icojiga aisa coguishejiatsica, itsajiguotari  
incavintsajajueri cavintsajirica  
iriatimpa. <sup>34</sup> Aisa arigueti pojocaueneri  
pigonoro yamanaquempica iramana-  
quempigueti irogui pijaempica coajica,  
cameetsavaeque. Cotanquitsiquea  
managueti irioca pojoquene quejetaca-  
jjajempineca carimpa irooqua irishine-  
venquempi Aapani Irioshi? Arikeate  
icojiga aisa coguishejiatsica, yojocajigu-  
niri igonoro cameetsaniji inquejetaca-  
jempari iriatimpa. <sup>35</sup> Cotanquitsiquea  
aviatimpajia noncantajiaquempiquea  
pimpintsa jiaquempariquea catsimajia-  
quempica, pincavintsajanta quequea,  
aisa pojocauenerigueti cantaquempica  
irogupi japiro, aatoquea pogui jaco-  
jiaja inquejetacaajempi. Pinquejeja-  
quempagueti imaica, incavintsajamajaji-  
anaquempiquea Aapani Irioshi Anaanta-  
majatatsica aisa pinquejejaquempari-  
quea iriatimpa, icavintsajajiaqueritari  
teeca inquenquejacojigueriji aisa  
covaeguishetatsica. <sup>36</sup> Pimpintsa cotan-  
tajiguemparo, pinquejejaquempari-  
quea Piri Irioshimajaca ipintsata cotanta-  
majatagueti.

**Aatoja piquenquejacoguishtsitiritsi  
peacaajigaroca covaeguisherentsi**  
(Mt. 7.1-5)

<sup>37</sup> "Pamenita querigueti yantaguishet-  
queca itsipa aato piquenquejitsi:  
'Teequea incameetsateji, icovaeguishe-  
taca', arikea aato iquejetacaajitimpri  
aviatimpa. Aatoquea pininttsi  
incatsimatimenteri Aapani Irioshi  
covaeguishetanquitsica, arikea aato  
iquejetacaajitimpri aviatimpa. Pimpeaco-  
tsitajempari itsipajia, arikea inquejeta-  
caajitaquempi aviatimpa. <sup>38</sup> Pincavints-

jantamajajigue, ariquea inquejetacaajitaquempiquea aviatimpa. Incavintsajamajajiquempiquea, onquejetaquempa incavintsajamajajiquempigueti intseraiquimajataquempiro pishimatotequi irivinacamajatavaquero irantecacotavaquero irosati osocaguitanaquempa. Quericaca caavijica iranaaque incavintsa jantamajataque, caavijiqueate incavintsa jajiqueriquea iriatimpa, cotanquitsiquea iriraquea arica igoca icavintsa janquequea, ariqueate inquejetacaajitaquempari iriatimpa ariquea igotaquempa incavintsa jajiqueriquea.”

<sup>39</sup>Ariqueate iquenquetsatanajiquea Jesoshi iquenquetsatacotaqueriquea tsatacantantatsica, icanquequea: “¿Arimpa queate iragavejaque shampontajari iraanaqueri itsipa shampontajari ironiga antaque? ¿Aatompaeua itanqui retanquiereitanaque mavite ocogarajapojacueti? <sup>40</sup>Iriraquea itsatacaajitica, teequea iranagueriji tsatacaguirica, cotanquitsiquea arigueti intsitacaa-guetaqueri intsatacaaa querigueti iroo quea inquejetanta naquemparica iriatimpa.

<sup>41</sup>“¿Querocaquea picocani pamenantacarica itijaarojaniqui pigonoro cotanquitsi tee pinquenquejacoteroji inchapoa poquia qui pashi aviatimpa? <sup>42</sup>Aatogueti pameniro inchapoa poquia qui pashi aviatimpa, carimpate pagavejaquempa pincanqueri pigonoro: ‘Intsija, iguentijegui, nonquitso-ajempiro pitjaaro?’ Cameetsatamampeatsica, iroquetitarite pijivatavaque pinquitsoavajerota inchapoa poquia qui pashi aviatimpa, ariquea pamenamajata-naje pinquitsoimentajenerinijite tijaataque-rica pigonoro.<sup>e</sup>

**Jesoshi iquenquetsatacotaqueriquea  
caquinte iquejetacaacari inchato  
sovenatatsica**

(Mt. 7.17-20; 12.34-35)

<sup>43</sup>“Maasano inchatopae choocatatsica osovena ishecajita aatoquea agavejitsi onchoocaque osovena teeca irishecajitemparoji. Ari oquejetaca inchatopae choocatatsica osovena teeca irishecajitemparoji, aatoquea agavejitsi onchoocaque osovena ishecajigueta-*c*aca.

<sup>44</sup>Maasanopae inchato iroguenti itsatantajitaroca osovena. Iguaresovenia teequea onchoocatantemparoji samerento. Aisa ovaitsoqui teequea onchoocatantemparoji poronqueto.

<sup>45</sup>Ariquea iquempetaca caquinte comajamajatatsica iroguenti iquenquetsatacoguetaque cameetsaripae, irootari iquenquejacoguetaque. Iriraquea teeca incomajamajatempaji iroguenti iquenquetsaguishetaque taaca opajitapae, irootarite iquenquejacoguetaque iriatimpa. Maasanopaetari iquenquejacojiguetaica irootaquequea iquenquetsatacoguetaica.

**Jesoshi itsavetacotaqueriquea caquinte  
iquejetacaajiacari peacagaroca  
tsovironaqui**

(Mt. 7.24-27)

<sup>46</sup>“¿Querocaquea picocani picantajia queate intati: ‘Nomajirote, Nomajirote’, cotanquitsiquea teatarite pinetsanajia vaqueroji nocantajia-*v*e-*q*uempi-*c*ica? <sup>47</sup>Imaicaquea noncantajia-*q*uempi-*c*ica queri iquejetaca iriraquea quericaca coraquetashiquenaca iquemi-santaquenaquea ariquea inetsanamaja-

<sup>e</sup> **6.42 tijaataquerica pigonoro.** Oquejetacaro arigueti pininque pincanqueri pigonoro irovashiantajero covaeguisherentsipae yantagueta-*c*ica, aviquetita jivaquerone povashiantajero pantagushegueta-*c*ica aviatimpa. ¿Querocaquea picocani pamenantacarica ipeacaaguishetacaca pigonoro cotanquitsi teequea pameneroji pashi aviatimpa caaviji pogaa-*c*aca?

quiero nocantaquerica.<sup>48</sup> Manaqueate iquejetacariequa caquinte vinchajiroca itsovironaquite. Iqueequitaroqua yoavaequerorequa jmm isavi imontsitajacotantacaro shiratantapi. Ariquea ivinchajavaquero. Iroompaquea amaravepojacaquea oja anaacotanaquerorequa itsovironaquite otampishijavaetanaquequea ocanca, cotanquitsiquea teequea agueroji, ocatiavaecaqueate isaviqui imontsitajacotantacarotari mapi oquishomajatantacaca.

<sup>49</sup> Iriraquea quemavetavacaroca nocanqueca cotanquitsiquea teequea irinetساناتروري manaqueate iquejetanacari itsipa ipeacaacaqueate itsovironaquite teequea iroguijaamajateroji isavi, querocampaquea onquishotanquem-paca. Iroompaquea amaranaquegueti oja anaacotanaquero itsovironaquite, otampishijatanaque osoveanaquero, jac aapanajantiro, oteroncamajatanaquero oanaquero.”

**Jesoshi yogueshitajiriquea yashincaca  
imajirojate coaretajia  
(Mt. 8.5-13)**

**7** <sup>1</sup>Iteroncanaqueroguetiquea Jesoshi itsatacaajiaquerigueti yoanajiquea Caperenoaqui. <sup>2</sup>Arikea ichoocati oranqui coreta Iromaqutica. Iriatimpairiguenticuea imajironcaca 100 igoaretajate. Yojoquijivaecaquea yashincaca caavijica ipintsamajatacaca, iroovepojaca irimetojeme. <sup>3</sup>Irootaquea iquemacotantaquerigueti Jesoshi itigarancaqueriquea iramajiroreja jorioja incamanquiteri incoraqueque-niji irogueshitajeri yashincaca. <sup>4</sup>Iroompaquea yoayoaitanaquequea icantajia-poaqueriquea Jesoshi:

—Nonintamajajiaque poanaque pogueshitajateneri yashincaca imajirojate coaretajia, caavijitari icameetsati ashintantanquitsica. <sup>5</sup>Ipintsamajajiacaji-

tari aatimpajia joriojia, yantacaantaquenaro shinagoga nocapiocantapinijia-caca.

<sup>6</sup>Arikea yoanaquequea Jesoshi yoguijaguijaitanaqueriquea. Yaajaveta-nacaro quempeji tsovironaqui qui itonquivojajavacari itsipavijijacaca imajirojate coaretajia. Iriatimpairoguentiquea itigarancanjaqueri intonquivojajavaquempari incantajia-vueri:

—Itigarancanjaquena notsipavijitaca icanquempi: ‘Nomajirote, aatoquea patsipeventanaqueate pincoraquetashi-vaequena notsovironaquitequi. Aatotarite piquijitsitanarotsi notsoviro-naquite, notaquetarite panaamajata-quenaquea. <sup>7</sup>Irootaquea nopashiven-tantacaca naatimpa inchiquioji noanaque nonquenquetsatacaaajaqui-tempi. Pincantajaniquiqueja impeapanajanempaquea nashincaca. <sup>8</sup>Quejetaca naatimpa ichoocaveca tigarancanaca, ariqueate ichoocaque nashi nogoreta-jiate notigarancajiguica. Quericaca noninqueca nontigarancaqueca inquemisantaquenaquea iroanaquea. Itsipaquea nocajemirigueti icoraque-taque. Aisa ichoocaque nashincaca taaca opaji nomperacarica iquemisan-quenaquea.’

<sup>9</sup>Irooqua iquemavaquerigueti Jesoshi icanqueca yamenanaque intati. Ipitsocashijianacariequa maasano oguijaguijai-querica icantajiguiriquea:

—Noncanquempiquea, choocavetaca oshequiní quemesantajiaquenaca acanqui Ishiraeriqui, cotanquitsiquea teequea namenimagueteji aparo inquejetempariji irica itsamajatigueti nagavejamajati.

<sup>10</sup>Arikea irirajia itigarancanjaqueca imajirojate coaretajia icoraquecoraqueive-tajaquea tsovironaqui qui yamenavepojajaireua jac peamajatanaja yashincaca.

**Jesoshi itancorejajiniroquea  
irijanite metojacoro**

<sup>11</sup>Iroompa yoanaque Jesoshi guinteniniantsiqui icantajitica Naine, yoguijoguijaitanaqueriquea itsatacaaneja aisaoshequi caquinteja. <sup>12</sup>Arikea yaavetapojacaroquea quempeji osotomoro otantotacojiacagueti tsovironaqipae, yamacojipojiri metojatsica inquitajiajeri. Iriguentiquea irijanite metojacoro, aparoqueate icocaniquea iriatimpa irijanincaca. Icantaventajianaqueroquea tirorererere caquinte oguijoguijaitanaqueroca irijanincarica. <sup>13</sup>Ipintsatacotonacaroquea Amajirote yamaquero-gueti iraaca, icanqueroquea:

—Aato piraga.

<sup>14</sup>Yoashitanaqueroquea yamancarica ipamitsitaro. Arikea ictintiitapojaquea natacojiaquerica. Arikea icanqueriquea Jesoshi metojanquitsica iriaqueraca quenquevaritananquitsi:

—Shirampari, noncanquempiquea pintinajanaje.

<sup>15</sup>Arikea isavicanaji metojavetanquitsica iquenquetsatanajiquea. Yojocajiniroquea iriniro.

<sup>16</sup>Yamaqueroqueuea maasano yogueshitajirigueti yoayoaitanaque intati, aisai shineventajianacariequa Aapani Irioshi. Icantajaquequea:

—Icoraquetimojijacaji tsavetantatsica anaamajatantatsica. Iquenquejacojiacajiquea Aapani Irioshi, icavintsjajacaji aatimpajia yashin-caca.

<sup>17</sup>Iroompaquea maasanopae choocajitsica Joreaqui aisai irooshitacoguetanquitsica iquemacojiaqueriquea Jesoshi itancorejajiri metojavetanquitsica.

**Joanca itigarancijaqueriquea itsatacaane  
incoacojiaquieri Jesoshi**  
(Mt. 11.2-19)

<sup>18</sup>Arikea irirajia itsatacaaneja Joanca icamantajijaqueriquea yantague-taqueca Jesoshi. Arikea ica jemaqueriquea mavite, <sup>19</sup>itigarancaqueri incoacojiaquieri Jesoshi: “¿Aviguentica noguijajavecaca? ¿Irooca noncantacoguitempani noguijajaguiterini itsipa incoraquetaque?”

<sup>20</sup>Arikeate yoayoaitanaquequea yarejerejeipojaca ichoo caquegueti Jesoshi icantajia pojaqueriquea:

—Itigarancijaquenaquea Joanca Viñacajatantatsica noncoacojiaquempi- quea: “¿Aviguentica noguijajavecaca? ¿Irooca noncantacoguitempani noguijajaguiterini itsipa incoraquetaque?”

<sup>21</sup>Oraqueate yarejetapojaquegueti yamenacojia queriquea yogueshi-guetajiri oshequinis ashinoncajaguetsica iconoagarantajiaca aajiaqueri joquijirentsi anaaguetatsica. Iriraquea ishaquiaguetacaca ampatsinipae yoguisotoaguetajiniriquea. Aisa yamenacaajajiri shamoncajavetatsica. <sup>22</sup>Arikea icantajiguiriquea Jesoshi:

—Imaicaquea poapoaitanaje pincamantajia pojajerija Joanca maasanopae pamenaguetaqueca aisapiquemaguetaqueca. Iriraquea shamoncajajia vetatsica yamenamenai-tanaji. Iriraquea teeca iraniji jiavetem-paji yaniji jianaji. Arikea iquejejiaca avejancaripae ipejaianaja. Iriraquea teeca inquemajia vetem-paji iquemajia-naji. Aisa iriraquea metojaguetatsica itancorejajianaji. Iriraquea coguite jacojianquitsicasimaica itsavetantimojique- riquea itsatacajaiqueri Quenquetsatsa-

f 7.22 Icanquegueti coguite jacojianquitsica iquejetacaacari aisai irirajia tsajianquitsica teequea iragavejeji inchiquiojita irimeshiguempaji. Pamenero Mt. 5.3.

rentsi Oganejencatatsica.<sup>23</sup> Caavijiquea irishinevaetaquempa quericaca incanta coguitempani intsarotentamajataquena aatoca yovashiantajana.

<sup>24</sup>Ariquea yoayoaitanajigueti itigaran cajaqueca Joanca iquenquetsavaetaquea Jesoshi iquenquetsatacoqueri Joanca, icantajiguiri maasano: “¿Taaca quea poapoaitashitaquiti ontaniqui oquitamampororoitapojigueti? ¿Arimpa irooqua poapoaitashitaquiti pamenajiaquitiro savorovana ojeonquiroguedi choviga, ariquea oaquitio oaquitio?<sup>25</sup> ¿Ariquea taaquea poashijiaquiti? ¿Iriocaja poashijiaquiti pamenajiaquitiri caquinte quitsaatatsica shipetamorenaro quitsaarentsi? Pitsajiaquequea maasano quitsaatatsica shipetamorenaro quitsaarentsi manaquea isavisaviiti itsovirona quitequi majirontatsica, icantacoguitani quea isavicaventiro taaca opajitapae ishinevencaca iriatimpajia.<sup>26</sup> Iroosanica ¿taaquea poashitaquitectua? ¿Iriocaja poashijiaquiti pamenajiaquitiri tsavetantaquerica Aapani Irioshi? Jeejeguitatsi, iriotaque, cotanquitsiquea iriatimpa caaviji yanaaguequeri itsipajia tsavetantajiatsica.<sup>27</sup> Iriotaque itioncaco jiqueca coramani iquenquetsatacaque rigueti Aapani Irioshi Irijanite, icanqueri:

‘Ari nontigarancaqueri iriquetica oananquitsineca intsavetacotempi.

Irio camantajiaquerineca igonorojia queroca pinquenanaqueni irinetsanatashitantajiaavaquem pica.’<sup>28</sup>

<sup>28</sup>Imaica noncantajiaquempi: maasanopae caquinteja teetarite inchoocatimateji aparo anaquerineca Joanca, cotanquitsiquea maasano

majirontajiacarica Aapani Irioshi, irirajia teeca iranaajencavaevetempaji, caavijiquea icavintsajamajajiaqueri, oquejevetaca yanaajiaqueri Joanca.

<sup>29</sup>“Maasano caquinteja quemajiaava querica Joanca itsatacaantigueti icantajiaqueri iriviñacajajiaqueri, yamenajiaqueritarite icantamajati Aapani Irioshi icantaquegueti iriguentija covaeguishejatiatsica. Ariquea iquejejiaquea irirajia capiocapinijigui nirica majirontatsica imentaquipae iviñacajatacaantajiaquea iriatimpajia aisa.<sup>30</sup> Irirampani pariseojia itsipatacariquea tsatacaantajiguiroca itioncacotanaquea Moishishini teequea irishineteriji iriviñacajajigueri Joanca. Inintavetaca quea Aapani Irioshi incavintsajajiaqueri, cotanquitsi iriatimpajia teequea irinintajigueji inquemisantajiaqueri.

<sup>31</sup>“¿Quero icojigani caquinteja choocajanquitsica imaica? ¿Taa ipaji iquempejiaca?<sup>32</sup> Iriguentiquea iquempejiaca chaajaniquitirajaca irisavisaviita quegueti tsoviaguiteriqui irantanavijitimpagueti iroompia ari incatsimatava caajianaquempsa incantajiaquequea:

‘Nocovitimojiavequempiquea teequea pintamarojuanque. Ariquea namashaitimojiaveta quempi amashairents i yama shajitica ishimampojancajita gueti teequea pirajaiguempajia.’

<sup>33</sup>Ariqueate piquempejiaca aviatimpajia. Icoraquevetaca Joanca Viñacajatantatsica teequea irishecatempaji ishecapinitaca igonorojia, aisa teequea irimirimatttempojo cachojaro, manaquea picantacojiaqueriquea: ‘Ishaquiacari ampatsini.’<sup>34</sup> Ariquea imaica icoraquevetaca irira Irijanite Caquinte, ishecataca iriatimpa,

g 7.24 Icanquegueti savorovana iquejetacaacari aisa caquinte teeca intampishitashigueterojo maasano amataagantsi, aca icanti aca icanti. h 7.27 Mara. 3.1.

imiraca, ariqueate picantajiaque: 'Iriguenti shecاجanti, iriguenti shinquitasica, aisa iriguenti itsipavijijiapojaca covaeguishejiatsica aisa capiocapiniji-guinirica majirontatsica imentaquipae.'<sup>35</sup> Cotanquitsi onconijavaetanaque itsatica tsamajatatsica amenajaquegueti quero ococani yantaguetaqueca."

**Ishecatacaquea Jesoshi itsovironaquitequi pariseo pajitatsica Shimo**

<sup>36</sup> Ichoocaque pariseo icajemaqueri-quea Jesoshi irishecatacaquempari itsovironaquitequi. Arikea yoanaque-quea Jesoshi iquijapoji ipimerequijapo-jaca shitaponcarontsiqui irishecacia-quempa.<sup>37</sup> Ochoocaque manquigarentsi quempevaetatsica, arikea oguinentica quempeji. Arikea oquemacoquerigueti Jesoshi yoanaque irishecatempa itsovironaquitequi pariseo, oanaque aanaquequeate casancajencajari yoguijaantajicaro chovintyori qui ipeacaa jitaca mapi icantajitica aravase-tero.<sup>38</sup> Iroompaqeua arejetapojaca ichoocaquegueti Jesoshi ocatiapojaca igontatapojacagueti, iraanaca oparija-a-tanaquequea ojaquia oshaguitariquea iguitiqui. Arikea osheguititanta jari-quea omae, onintaguititanqueriquea, aisa oshagui guititancari casancajenca-jari.<sup>39</sup> Arikea yamena querogueti pariseo cajemaquerica Jesoshi itsovi-naquitequi iquenquejanaque: "Arimajagueti iriogueti tsavetantsica intsatsita-vaquempa taaqueate pamipojiri, intsaque queroca ococani, intsatavaque-quea iroguenti quempevaetatsica."<sup>40</sup>

Iroompaqeua icantanaquequea Jesoshi icanqueri pariseo:

—Shimo, chooca noncanquempica.

Icanqueriquea:

—Iintsijate, Tsatacaantantatsica, pincantenaja.

<sup>41</sup> Icanqueriquea Jesoshi:

—Chooca mavite shirampari, yaacoqueri imentaquitsite jocavaquene-rica, icanqueriquea: 'Oncoajicatapojaje-gueti pogupi jatenaja.' Aparoqua yaacoqueri 500 tenario.<sup>i</sup> Iriraquea itsipa ariguenti yaacoqueri 50.<sup>42</sup> Cotanquitsi-quea iriatimpajia ocoajicavepojaja aavetapojaja irogui piantajenempari-meca teequea inchoocatajeji imentaqui-tsitejia querocampa quea irajaijera i rivegaratantajemparica. Arikea icantajiriquea: 'Ompeashitanajem-paea intati.' Imaicaquea iiintsija pincanquena ¿queri pintsamajaquempa-rineca?

<sup>43</sup> Icanqueriquea Shimo:

—Iriocajate ipeacomajacaca.

Icanqueriquea Jesoshi:

—Pitampaticamajataquero.

<sup>44</sup> Arikeate ipitsocavetanaca yamen-naquero manquigarentsi, icanqueriquea Shimo:

—¿Ari pamenaquero ocatica manquigarentsi? Noquijavepojaca pitsovirona- quitequi teetari pojocavaquena pijatsite najacaguititaquempame. Iroatimpa ajacaguititanquenaro ojaquia, osheguititajanaro quea omae.<sup>45</sup> Aisa teequea pinintavorotenaji,<sup>j</sup> cotanquitsiquea iroatimpa onintaguitiquenaequea incajar anqui arejevaeca imaica.<sup>46</sup> Teeta-rite pimpantantenaroji orejiqui noguitoqui, cotanquitsiquea iroatimpa- quea oshagui guititaquenaequea casanca- jencajari.<sup>47</sup> Irootaquequea imaica

<sup>i</sup> 7.41 Iriraquea *tenario* irio imentaquitsite Iromaqutica. Iramiterigueti itsipa apajencaro savincaguiteri irivegarataqueri aparo tenario. Ari iquejevecari itsipa imentaqui icantajitica iraquima, iriguenti imentaquitsite guiriegojia. <sup>j</sup> 7.45 teequea pinintavorotenaji. Yamejia ca jorjojia coramani inintavorotavacaajavaca yamenavacaajacagueti.

noncanquempi ocovaeguisheveclarqueate taaca opajitapae, cotanquitsiquea imaica shetajaqueate maasanopae, irooriji opintsamajataquena. Cotanquitsiquea iriraquea irishetsijitaqueca capichaji ipeacaaguishetacaca, capichajaniqui impintsatantavequempa.

<sup>48</sup>Iroompaquea icantsitaroqua manquigarentsi:

—Imaicaquea shetanajaquea picovae-guishevetcaca.

<sup>49</sup>Ariquea irirajia icajemajiquea itsipatsipaicaca ishecaciacagueti icantavacaajianacaquea:

—¿Taashia ipajita iricatica shetsitan-taqueroca covaeguisherentsi?

<sup>50</sup>Cotanquitsiquea Jesoshi icantsitaro-quea aisa:

—Imaicaquea meshajimpi irooriji pavempojana. Poanje pishinevae-quempa.

#### **Manquigarentsijia amijiaquerica Jesoshi**

**8** <sup>1</sup>Iroompaquea iquenaquenagueta-naquequea Jesoshi quinteninintsi-paequi ichoocajiguqueti oshequini caquinteja aisaa quinteninintsi-paequi teegueti iroshequiamajateji, itsavetanta-quero Quenquetsatsarentsi Oganejentat-sica icantajiaqueri quero icotani imajirontagueti Aapani Irioshi. Itsipatsipaitanacari itsatacaanejia carajianquitsica 12. <sup>2</sup>Aisa oguijaguijaitanaqueri-quea manquigarentsijia yoguisotoaco-ventajajica ishaquiajiavecarogueti ampatsini, aisa yogueshijajica ashinon-cajajiavecagueta. Ariquea ochooquaque Maria icantajitica Magararaquitica yoguisotoacovenqueca ishaquiavetaca-rogueti 7 ampatsini. <sup>3</sup>Otsipatsipaicaro Sosana aisa Joana, imanquigare Cosa iramajirore Erorishi. Oahoaitanaque-quea aisa otsipapae manquigarentsijia. Iroatimpajia amiqueriqueate Jesoshi ojocajiaqueneriquea omentaquisite

cameetsanjite irivegaratantaquempaca taaca icoguitejacocaca.

**Jesoshi iquejetacaacari pishoncaguitiroca  
oitsoqui**

(Mt. 13.1-9; Mr. 4.1-9)

<sup>4</sup>Ariqueate icoraquecoraqueitaque caquinteja icaramirincavaeque, iquenaquenaitapojaque quinteninintsi-paequi yomporoguijajentajapojacari Jesoshi. Iroompaquea iriatimpa iquejeta-caacanari, icantajiguiri: <sup>5</sup>“Yoanaque aparo caquinte impishoncaguitero oitsoqui. Ipishoncavoncaquitanaqueroquea tacororo tacororo, itsitacaguetaquero. Oconoaga-rancaqueate asacaraaguiguetanaca quenavoquivortsiqui, ariquea yagatigatii-quero, iroompaquea isavisaviitashipojiro-quea tsimeripae ishecacijapojacaro. <sup>6</sup>Otsipa oconoagaranca asacaraanaca mapiporo-quiqui, taampina otsoroavetanaca cotanquitsiquea oshimpeguircanaque ometojanaji, pirijaguitevaetaqueterite quepatsi. <sup>7</sup>Oconoacaquea otsipapae asacaraanaca ochooquaqueueti ovarishitsa samerento. Otsoroavetanacaquea oquenanaquequea otsoroitsitanacaquea samerento iroatimpa otsincoanaqueroquea ometojanaji. <sup>8</sup>Otsipapae oconoacaquea asacaraanaca ocameetsaguitequegueti quepatsi, otsoroanaquequea otaganaanaca ochoocatanaque opitsaraquiacotanaca-queate oitsoqui, oconoacaquea ochooqua-que 100.”

Irooqua iquejetaquerogueti Jesoshi imaica iquenquetsatanajiquea iririjenca icanquequea: “Choocaguetti piguempita pinquemantavaquempaca, pinquemeja.”

**Jesoshi itsatacajajiaqueriquea quero  
ococani iquempetacaantaguecaroca**

(Mt. 13.10-17; Mr. 4.10-12)

<sup>9</sup>Iroompaquea icoacojiaquera-itsatacaanejia taa opajita oquejetaca itsavetanqueca incajaranqui.

<sup>10</sup>Iriatimpaquea icantajiguiri: “Imaica-  
quea ininque Aapani Irioshi pintsa-  
quero aviatimpajia queroquea icotani  
imajirontagueti iriatimpa. Teetarite  
intsajiteroji paesatoniqui, aviguentiquea  
tsajiaquerone imaica. Oraqueate  
nortsatacayaquerigueti itsipapae  
manaquea noquejetacaacaroquea  
maasanopae, manaquea

iramenamenaivetanaquempaquea,  
cotanquitsiquea aato inejaji-  
guitsi;  
inquemajiavequempaqueate,  
cotanquitsiquea aato itsajia-  
querotsi.<sup>k</sup>

**Jesoshi itsatsatacayaqueri itsatacaanejia  
taaca opajita iquejetacaaca incajaranqui**  
(Mt. 13.18-23; Mr. 4.13-20)

<sup>11</sup>“Imaicaquea nortsatacayaquempi-  
quea taaca opajitapae noquejetacaaca.  
Oraticaquea oitsoqui iroguentiquea  
noquejetacaacaro itsavetantajitirogueti  
Iguenquetsatsare Aapani Irioshi.

<sup>12</sup>Oraticaquea asacaraaguitananquitsica  
quenavoquirontsiqui iriguentiquea  
noquejetacaaca caquinte quemajaveta-  
vacaroca Iguenquetsatsare Aapani  
Irioshi, cotanquitsiquea iroompaquea  
icoraquetashiqueriquea ampatsini  
ipeacotacaacari maasanopae aatonijite  
iquemisantajirotsi imeshiajirititsi.

<sup>13</sup>Oraticaquea asacaraaguitananquitsica  
mapiporoquiqui iriguentiquea noqueje-  
tacaaca caquinte quemajavetavacaroca  
Iguenquetsatsare Aapani Irioshi  
ishineventajavetavacaroca shine,  
cotanquitsiquea teequea intsamajateroji,  
tee inquenquejamajateroji, mana  
iquejetacaro panqurientsi teeca onquija-  
majateji ovaritsa. Iquemisantajaveta-  
quita cotanquitsiquea ocoraquetashique-  
rigueti atsipetagantsi ariquea icotanaca

yovashiantanajiroquea itsaroventane.

<sup>14</sup>Oraticaquea asacaraaguitananquitsica  
ochooquegueti samerento, iriguenti-  
quea quejecaroca caquinte quemajave-  
tacaroca Iguenquetsatsare Aapani  
Irioshi. Cotanquitsiquea ariqueate  
iquenquejajavajiroqueate taaca  
opajitapae ishoshoventajijaaro,  
ishinevencariea imentaquitsite aisa  
taaca inintajigui iriatimpa. Irooqua  
anaanaquero Quenquetsatsarentsi  
iquemavetacaca, iquejetacaroquea  
panqurientsi caarica oitsoquitatsi.

<sup>15</sup>Cotanquitsiquea oraticaquea asacaraa-  
guitananquitsica ocameetsaguitetaque-  
gueti quepatsi, iriguentiquea quejecar-  
oca caquinte tampaticatiroca netsana-  
majatiroca cameetsaguetatsica. Iriatim-  
pajia iquemisantamajatavaqueroquea  
Iguenquetsatsare Aapani Irioshi, ipampi-  
amajaqueroquea, iroompaquea arimpa-  
queate ipampiatsimajatanacaroquea.

**Iquejetacaacaroquea Jesoshi maasanopae  
senacacovetanquitsica**  
(Mr. 4.21-25)

<sup>16</sup>“Oraquea itsivojirigueti tsivorentsi  
teequea ari iriguivotacojiteriji  
chomoqui. Aisa teetarite ariquea  
iroguisavicacojiteriji isaviquea  
omencoqui imaantajitaca. Iroguentiquea  
yoguisavicacojitiriquea jenoquijaniqui  
cameetsanjite intsivoguitetanaqueneri-  
nijite maasano quijaquijaitanquitsica  
oraniqui. <sup>17</sup>Arikea oquejetacaquea  
taaca opajitapae senacaguetatsica  
imaica, oncoramanitapoajegueti  
ironigaantajiquero. Aisa taaca  
opajitapae teeca intsajiteroji imaica,  
oncoramanitapoajegueti intsajitaquero-  
queate, aatotarite osenaquimatajatsi-  
queate. <sup>18</sup>Irootaquequea imaica  
pinquenquejamajateja quero

pincoquempani pinquemisantamajatan-taquempaca. Quericaca tsatavaquero-neca icantajiquerica intsatacaajitaqueri-quea otsipapae. Quericaca teeca irininteji intsatavaquero, iraapitsatsijita-vaqueriquea ijivetaca itsaque.”

**Iriniro Jesoshi aisa iriguentijeguitepae  
(Mt. 12.46-50; Mr. 3.31-35)**

<sup>19</sup>Arikeate ocoraquetaquequea iriniro Jesoshi aisa iriguentijeguitepae tsovironaqui qui ichoocaquegueti iriatimpa, cotanquitsiquea teequeate iragavejajigueji inquijaquijaiteji intsom-pogui, yojocajaiacatarite yoshequiavae-quequea caquinte. <sup>20</sup>Arikea icamantaji-queriquea Jesoshi icantajitiri:

—Coraquetaque piniro aisa piguenti-jeguitepae. Chooca sotsiqui, intintaji-aque iramenajaqueMPI.

<sup>21</sup>Cotanquitsiquea icanquequea:  
—Maasano quemisantajiaquaqueroca Iguenquetsatsare Aapani Irioshi aisa netsanajiaquaqueroca, iriotaque nopejai-aque iinanijia aisa iguentijeguijia.

**Jesoshi ipejairoquea choviga aisa  
imagojatacайiro iniromotija  
(Mt. 8.23-27; Mr. 4.35-41)**

<sup>22</sup>Iroompaeua yoanaquequea Jesoshi iniromotija qui itetanacaroquea quenaja-rontsi itsipatsipaitanacariquea itsatacaane icanqueriquea:

—Jameja intatquieroqui.

Arikeate yoayoaitanaque. <sup>23</sup>Iquena-jatacojianaquegueti imaaquequea Jesoshi quenajarontsiqui. Iroompaeua ochovigaguitevaepojiquea inirojencata-pojaque choviga jeoc jeoc jeoc, arikeate octanaca ovorevoretanaca otserajatanacaeua oja quenajarontsiqui iroovepojaca ontsitijaatanaqueme.

<sup>24</sup>Ishiashijianacariquea Jesoshi itinaitari icantsijigari:

—iTsatacaantantatsica! iTsatacaan-tantatsica! iOjocajajiguempani!

Itinajitsitanacaquea Jesoshi iquenque-tsatacaaquero choviga icanquero:

—Pimpejaencatanajempaja.

ICantsitaroquea aisa iniomotija vorevoreatananquitsica icanqueroquea:

—Pinchopecajatanajempaja.

Ari octanaja osanticojencatanaji choviga, ari oquempetanaja iniomotija ochopecajatanaja. <sup>25</sup>Iroompaeua icantsijigariquea itsatacaane:

—¿Quero octaca caarica pitsatantaji-gana nagavejamajati?

Cotanquitsiquea iriatimpajia itsaro-amajajianaquequea yamenamenaita-naque intati icantavacaajianacaeua:

—¿Taashia ipaji irica? Icantauquit-guiro choviga aisa iniomotija oquemi-sanqueriquea.

**Gararaquitica ishaquiacaca ampatsini  
(Mt. 8.28-34; Mr. 5.1-20)**

<sup>26</sup>Iroompaeua yarejerejeitapojacaro iguepatsitequi Gararaquitica<sup>l</sup> otampati-catacomajataquero quepatsi Garirea.

<sup>27</sup>Irooquea yaguijivetenacaeua Jesoshi yameniriquea icoraquepoji shirampari chocatatsica ocaniqui. Ishaquaijacari-quea ampatsini, yajagantsitacovaetana-quequea teequea inquitsaatajempaji, aisa teequea inchoocateji tsovirona-quiqui ariguentiquea ichoocati imperita-moroqui yojoquijitantanipinjitarica metojaripae.

<sup>28-29</sup>Querocaguetequea savincaguiteri ishoncacoguitevaetanaqueri. Yaajitapi-nivecar iyoishotantajivetacari cavoreja-tsariqui iracoqui aisa iguitiqui, yamena-majajiavecari, cotanquitsiquea teetarite

**1.8.26 Gararaquitica.** Chooca otsipa paperi otioncacotacagueti ocaniqui Jerasaquitica (gerasenos).

iragavejajiteriji. Icaratsarejaguetaqueroquea ocanca, ishiashiatacaaguitarini ampatsini ontaniqui teeca inchoocateji caquinte. Arikea yamenavaquerigueti Jesoshi iguerotashitapojacari icajemanaqueuea:

—¿Querocaquea pincoquenani, Jesoshi Irijanite Irioshimajaca Anaantamajatatsica? Iintsijate aatoqueate patsipetacaavaetana. iPimpintsatacogajotenashiatsi!

Icantantacaroca ocatica irooriji icanqueri Jesoshi ampatsini irisotoanaje irovashiantanajeri.<sup>30</sup> Iroompaquea icanqueriquea Jesoshi:

—¿Querocaquea pipajitani?

Icanque iriatimpa:

—Nopajita Caramirincatatsica.

Icantantacarica: “Nopajita Caramirincatatsica”, irooriji yoshequiavaeque ampatsini shaquiajicarica.<sup>31</sup> Iriatimapajia icantajiaqueriquea Jesoshi aatonijite itigarancajiguiritsi oaganta-vanatananquitsica jmm isaviji.<sup>32</sup> Cotanquitsiquea ontaniqui otapiqui choocaquea chancho<sup>m</sup> icarapiovaeque, ishecajica. Iroompaquea irirajia ampatsini icantajianaqueriquea Jesoshi iroashijianaquerita chancho inchoocajapoaqueriniji. Iriatimpaquea icantsijigariquea:

—Intsiquetirote poapoaitanaque.

<sup>33</sup>Icampanajanta isotosotoitapanajanti ampatsini yovashiantajianaqueri ishaquiavetacaca, irioquea yoashijiavtanaca chancho. Iroompa ishaquiajiev-tapojacari arikea icohipitanaca ishiajianaca ocogarajacaguetti itanquire-ajianaque yojocajajiapojaca, icampojaca teron maasanojia.

<sup>34</sup>Irooqua yamenajavaquerigueti quempoguijajiguirica chancho itsaroajanaquequea ishiashianaca yoayoaita-

naque itsavetantajipojaqueroquea ontaniqui ichoocajiguigueti itsitacavae-pojoiroquea, iquemacotantajiacarica choocajatiatsica acaniqui aisa choocajatiatsica quempejipaequi.<sup>35</sup> Yoayoaitanaqueuea iramenajiaquieriquea. Arikea yarejerejeipojacaro ichoocaquegueti Jesoshi yamenajiajipoririquea ishaquiajia-vecaca ampatsinipae savicaji iquempej-tacocari iquemisantajiri. Quitsaataja quenquejanaji. Itsarotsaroitanaqueuea.<sup>36</sup> Iriraquea amenajiaquerica yoguisoto-jainrigueti itsatacaajiaavaqueri querocaca icoquerini yonigaitsijiacari-gueti ishaquiavecarigueti.<sup>37</sup> Arikea maasano choocajatiatsica Gararaqui itsaroacaamajajianacari Jesoshi yamanamanaitantacarica irovashiantajianajeriji. Arikea itetanajaro quenajaronsti iquenajatacotanaji.<sup>38</sup> Arikea iriratica isotoanaqueua ampatsinipae icantavetacari ininque intspataquem-pari, cotanquitsiquea Jesoshi itigarancaqueri, icanqueri:

<sup>39</sup>—Poanaje pitsovironaquitequi, pintsavetampojeroquea maasano queroquea icoquempini Aapani Irioshi.

Iriatimpa yoanajiquea yoguisotojaipa-jaqueneri maasano choocajatiatsica oraniqui ipintsatacarigueti Jesoshi.

### Jesoshi ivochatajiro irorijanite Jairo

(Mt. 9.18-26; Mr. 5.21-43)

<sup>40</sup>Ocoajicatapoajigueti icoraquetajiquea Jesoshi, yagatanaji intatquieroqui. Maasanopae yaajiavaqueri ishineventajjavacari, irorijite icocani yoguijagu-jaitavaqueri.<sup>41</sup> Iroompaquea icoraque-poji shirampari ipajitaquea Jairo. Iriatimpa iriguenti jivatanquitsica shinagogaqui icapiocantajiacaca joriojia. Arikea yamenapojirigueti Jesoshi itaampinatashipojiriuea iguerovempo-

<sup>m</sup> 8.32 Irira *chancho* iriguenti viratsi quejevetarica santaviri.

jacari icanqueriquea iroanaquequea itsovironaquitequi.<sup>42</sup> Irooshipoji ometojaque irorijanite irapatiroritsite. Ocaratacotaque 12 ajagantsite.

Ariquea yoanaquegueti Jesoshi yoguijaguiaitanaqueriquea icarajia-vaeque caquintejia icantavaetanaque tirorererere oraniqui iroovepojaca irivinacajianaquerimequea.<sup>43</sup> Arikea ochoocaque aisa manquigarentsi ashinoncaavaetanquitsica ososoajavae-tini coramani, ariqueate ocaratacovaeta-naqueni 12 ajagantsiteni. Yaavintanaji-vetacaroquea teequea inchoocatenica agavejanquitsineca iroveajero, niganqui-quea oteroncamajatanaqueri omentaqui-tsute, ejempacotia oanaca.<sup>44</sup> Imaicaquea ocoraquetaque oquenashipojaqueri Jesoshi itaquiqui ochagatsaequitsitava-queri ocaramagotapojaquegueti irogataamagoro. Irooqua ochagatacota-quitiguiri jac osanticojatanaji ososoajare.<sup>45</sup> Icantanaquequea Jesoshi:

—¿Taaquea chagatacoquena?

Icantajianaquequea maasano:

—Tee, jmm.

Cotanquitsiquea icantsitanacaquea Peerero aisa itsipatsipaitacaca icantajiguiri:  
—Tsatacaantantatsica, pamenaveca-queate itsinacajianaquempi itatsintatsii-tanaquempi.

<sup>46</sup> Cotanquitsiquea Jesoshi arimpa-queate icantanaquequea:

—Choocaguitatsi chagatacoquenaca, notsatavaquetari ocantapanajantana shirec nagavejane osotoanaquegueti.

<sup>47</sup> Iroatimpa amenavaquerogueti tee agaveji omanacotempaji, ocoraquepoja-quequea iriatimpaqui ompioncanacaqueate pion, pion, pion, oguerovempojaciriquea. Maasano iquemajiaqueroquea ocamanque-riqueti taaquea opaji ochagatimenqueri, aisa ocamanqueriquea ocanque:

—Iroompaqueate nochagatacoquem-pigueti jac osanticojatanaji noriraja.

<sup>48</sup> Iriatimpa icanqueroquea:  
—Orijani, irootiji pavenquenatarite naatimpa, irootari piveantanajaca. Imaicaquea poanaje pishinevaequempa.

<sup>49</sup> Iroompaquea quenquetsatatsitiraja Jesoshi icoraquepoji itsipa, iquenapoji itsovironaquitequi Jairo, jivatanquitsica shinagogaqui, icanqueriquea:

—Jac metojaque porijanite, ariotapo-jaque pasereguritsi Tsatacaantantatsica.

<sup>50</sup> Cotanquitsiquea Jesoshi iquemaque-riquea, icanqueri Jairo:

—Aato pitsaroguitsi. Mana paventana-quena naatimpa, arikea ompeanajempa.

<sup>51</sup> Arikea yarejetapojacagueti itsovironaquitequi icanque aatoquea iquijitsi itsipa, iriguenti itsipatsipaita-naca Peerero, Joanca, Santiago, iri joquijitanquitsica aisa iniro, iquijaqui-jaitanaquequea intsompogui.

<sup>52</sup> Manaquea icatintijiaca sotsiqui itsipajia iraacojiaqueroquea metojatsica cajemajiaque icanca, cotanquitsiquea Jesoshi icantajiapapanajantiriquea:

—Aato piraajiga, teetari ometojeji, manatarite omaaque intati.

<sup>53</sup> Cotanquitsiquea ishirontimentajia-nacari, itsajiaqueteri metojamajataque.

<sup>54</sup> Iriraquea Jesoshi yaavacopojacuero, iririjencatanaque icanqueroquea:

—Chaaianquitirajaca, pincatianaje.

<sup>55</sup> Arikea opipojaja oshire, ocatianaja. Iroompaquea icanque Jesoshi irojocajia-quenero oshecatajempata.<sup>56</sup> Manaquea yamenamenaitanaque intati iri aisa iniro, cotanquitsiquea Jesoshi icantajiguiri aatoquea icamantitsi.

Jesoshi itigarancajiaqueri 12 itsatacaane iroaroitanaque intsavetantajianaque

(Mt. 10.5-15; Mr. 6.7-13)

**9** <sup>1</sup> Arikea icajemajiaqueriquea Jesoshi itsatacaane carajanquitsica 12, icapiocajiaqueriquea yagavejacaajia-queri iroguisotoaguetaqueri maasano

ampatsinipae aisa irogueshiguetajeri joquijiguetatsica.<sup>2</sup> Itigarancjajakeri quea intsavetantimojianaqueri maasano intsatacaajianaqueri quero icocani imajirontagueti Aapani Irioshi. Icantajakeriquea aisa irogueshiguetajeriquea joquijiguetatsica.

<sup>3</sup>Icantajavaqueriquea:

—Aatoquea paimatitsi. Aatoquea paguirotsi pigotiro, pitsarate, pisheca, aisa pimentaquito. Aatoquea paguirotsi mavite piitsaare, iroguentiquea oratica piquitsaacaca.<sup>4</sup> Querocagueta oraniqui poapoitanaqueni incajemavaquempigueti pimaaque itsvironaquitequi, poapoitanaquequea pimaaque. Picocaniquea pimaimotaqueriquea arejetapojaempa poapoitantanajempaca.<sup>5</sup> Oraqueate aatogueti quericaca aavaquempineca, poapoitanaquequea, cotanquitsiquea iroquetita quea pantecamajatanaquejeroa quepatsivane pagatiqitsitapojaquerigueti, iroonijite iramenantajajauempaca manaquea yantaque teeca oncameetsateji teetarite iraavaquempi irishineventajiavaquempi.

<sup>6</sup>Iroompaquea yoayoaitanaquequea itsitacavaetanaquero querocagueta oraniqui ichoocajiguigueti caquintejia, intsavetantimojianaqueriquea Quenque-tsatsarentsi Oganejencatatsica. Aisa yogueshiguetanjiri joquijiguetatsica.

**Erorishi iquenquejajiro  
imetojacaanquerigueti Joanca  
Viñacajatantatsica**

(Mt. 14.1-12; Mr. 6.14-29)

<sup>7</sup>Ariquea iriraquea majirontatsica Erorishi<sup>n</sup> iquemacoquerogueti maasanopae yantaguetaqueca Jesoshi, yamenanaquequea intati querocampa

incanque, choocatari cantajianquitsica: “Tancorejanajishia Joancani Viñacajatantatsica.”<sup>8</sup> Itsipaqueate cantajianquitsi: “Iriocajate coraquetajatsiquea tsavetantatsicani Iriashini coramanitcani.” Itsipapaequeate cantajianquitsica: “Jac pochatanaji itsipa tsavetantatsica coramanitcani.”

<sup>9</sup>Cotanquitsiquea icanquequea Erorishi:

—Irirampani Joancani nojitorejacaanqueriquea naatimpa. ¿Taampaqueate imaica irira noquemacoqueca icamanta-cojitirini?

Arikea inintaveca iramenaquerime.

**Ishecatacaaiciaci Jesoshi 5,000  
shirampari**

(Mt. 14.13-21; Mr. 6.30-44; Jn. 6.1-14)

<sup>10</sup>Ocoajicatapojigueti icoraquecoraqueitaji itigarancaqueca Jesoshi icaman>taguetapojiri maasanopae yantaguetaquitica. Iquemajiavaqueriquea Jesoshi, itsipatsipaitanacariquea osamani irooshitigueti guinternintintsi icantajitica Vetsaira.<sup>11</sup> Cotanquitsiquea ari iquemacoquierigueti yoayoaitanaque isaquiritsaevaetanaque caquinte yoguijaguijakeriquea. Iriraquea Jesoshi irishineventajavacari itsavetantimojijaqueri icamantajajaqueri quero icocani imajirontagueti Aapani Irioshi, aisa yogueshiguetajiriquea ashinoncajajatsica.

<sup>12</sup>Iroompaquea ijaguitevaetanjigueti catsirinacaiteri iquemepijquempejiitanacariequa itsatacaane icantajiguiri:

—Poguipaquijajajeri maasano irirajia iroaroaitanajeta ontaniqui guinternintipsaequi irooshitacoguetanquitsica cameetsanijite irimagorejajiaquequea aisa irivegarajiaque isheca irishecajat-

<sup>n</sup> 9.7 Iriratica Erorishi irio icantajitica Erorishi Antipashi. Iririni aisa ipajita Erorishi, irio majirontanquitsica ivoaquegueti Jesoshi (pamenero Irc. 1.5; Mt. 2.1-19).

quempanijite. Ocaniquiquea ocaniqui  
tee anejeronica querocampa irishecajia-  
quempaca.

<sup>13</sup>Cotanquitsiquea Jesoshi icantajigu-  
riuea:

—Pojocajigueneri aviatimpajia  
irishecajiaquempaca.

Yacajianaque icantajiguiruea:

—Tee anejeroji querocampa nojocaji-  
aquenerica. Iroguentinivani 5 pan,  
iriraquea shima mavipaquite icarati.  
¿Queroaquea noncojiaquempa? ¿Ari  
nagavejajiaque noanoaitanaque novega-  
rajiaquiteneruea irashijia maasano  
irishecajiaquempaca?

<sup>14</sup>Icantantajiacaca imaica yamenajia-  
quequea iriguentipioniquea tirorererere  
caquintejia, icarajiaavaetaquequea  
aricaquea 5,000 shiramparijia.  
Cotanquitsiquea Jesoshi icantajiguir  
itsatacaaneja:

—Poguisavicajigueri, poashiguequem-  
pari arica incarajiaquequea 50 irisavisa-  
viitaquequea.

<sup>15</sup>Ariquea iquempejiaqueruea,  
yoguisavicaguequeri maasano. <sup>16</sup>Iroom-  
paquea iriraquea Jesoshi yaitaroquea 5  
pan aisa mavipaquite shima, yajirica-  
queruea, ipaguitetanaquero inuite  
yamanaqueruea Aapani Irioshi,  
icantaqueri: “Arioteesaa.”

Iroompaqeua icotarejaguequero-  
quea pan, yojocajiaqueneriquea  
itsatacaane, iriatimpajia yojocajiava-  
queneriquea maasano. <sup>17</sup>Ishecajia-  
quea maasano, iquemajianaca.

Ariquea iriraquea itsatacaane yaague-  
tajiroquea chocatajsica, itetajiro-  
quea cantiriqui tseraiquipae ocarata-  
covaequeuea 12.

**o 9.20 Quirishitotatsica.** Iguenquetsatsarequi guiriegojia icanquegueti *Christos* (Quirishito)  
manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui  
orivo irirajia icoguiajiaqueca impeaquequempa imajirojiate irooca isaserorotejiate. Irira  
Quirishito iriotaquequea itsavetacotsitacaca tsavetantajiajitsica coramanitica intigarancaque  
Aapani Irioshi impeaquejempaniji Imajirojiate maasano.

**Peerero icanque Jesoshi iriguenti  
Quirishitotatsica**

(Mt. 16.13-16, 20; Mr. 8.27-30)

<sup>18</sup>Querocaguetai savincaguiteri  
ichoocaque Jesoshi yamanaqueruea  
Iriri, iriguentiquea itsipajiacaca itsataca-  
neja. Arikea icoacojiaqueri icanque:

—¿Taa ipaji ijijiaquena caquintejia?  
¿Quero icanquiquini?

<sup>19</sup>Iriatimpajia icantajiguiruea:  
—Iconoagarantajiacaca icantacojia-  
quempi: ‘Iriguenti Joancani Viñacaja-  
tantatsica.’ Itsipa cantajiananquitsi:  
‘Iriguenti Iriashini.’ Itsipa quea cantajia-  
nanquitsi: ‘Iriguenti itsipa tsavetantatsi-  
cana paesatinica, tancorejanajishiatsi.’

<sup>20</sup>Arikea icantajiguiruea:  
—Aviatimpajia, ¿quero picantaji-  
guini? ¿Taa nonaque naatimpa?

ICantsitanacaquea Peerero:  
—Aviguenti Quirishitotatsica<sup>o</sup>  
itigarancaqueca Aapani Irioshi.

<sup>21</sup>Icantajiguiruea:  
—Aatojate picamantitsi.

**Jesoshi icamantsicaro irimetojaque**  
(Mt. 16.21-28; Mr. 8.31-9.1)

<sup>22</sup>Icantanaquequea aisa:  
—Irantsipevaequempaquea irira  
Irijanite Caquinte. Irimantajiaqueri-  
quea jivajitsica, saserorotejia anaanta-  
jianquitsica aisa tsatacaantajiguiroca  
itioncacotanaqueca Moishishini.  
Arikea irimetojajiqueruea, cotanqui-  
tsiquea aapojajempagueti 3 savincagu-  
teri impochatanaje.

<sup>23</sup>Arikea icantajiguiruea maasano:  
—Quericaca nintanquitsineca  
irogijatacoquena irovashiantanaque-

roja inintashiguevetacaca iriatimpa, maasanopae osavincaguitetegueti irinatashitapiniquempa inchapoa irompajacotantajiquemparica, mananiji iroguijatacoquena.<sup>24</sup> Quericaca teeca irininteji irantsipeventena irooca irimetojavenquena, manaquea impeaquempa; cotanquitsiquea iriraquea atsipevenquenaneca irooca irimetojavenquena, incoquempaniquea inchoocaguiteni.<sup>25</sup> Arigueti inchoocavetaquempa agavejanquitsineca irashinquemparo maasanopae quepatsipaequatica, cotanquitsiquea oncoramanitapoja-jegueti irimetojanaquegueti arigueti impeaquempa camorecariqui, ¿arimpate agavejaque irajaararo aavajeri? Aatoquea agavejitsi.<sup>26</sup> Quericaca pashiventacaquenaneca naatimpa aisa nocantaguequeca, ariqueate inquejeta-quempaquea irira Irijanite Caquinte impashiventacaapojaquempariquea iriatimpa oncoramanitapoja-jegueti incoraquetajegueti. Iroganejencapoja-jempaquea, inquempetapoja-jempari Iriri aisa irashivantijitete comajashirentanquitsica yoganejencajiacaguetti.

<sup>27</sup> Noncanquempija arimajaguitatsi iconoagarantaca catintiitimojiaquenaca imaica, aato imetoji tequeratagueti iramene quero icotani Aapani Irioshi imajirontagueti.

**Jesoshi icantashitatiimojiacariequa  
itsatsacaanepae**  
(Mt. 17.1-8; Mr. 9.2-8)

<sup>28</sup> Iroompaquea anaavaetanajaguetti arica 8 savincaguite riyoanaquequea otsempiqui iramanajeriequa Iriri, itsipatsipaitanacari Peerero, Joanca, Santiago. <sup>29</sup> Arikea yamanauerigueti Iriri taampinaquea icantashitatianaca

ivoroqui, arikea octanaca iitsaare ocavorejatanaque ocantanaquequea tsiren oquitamaromajatanaque.<sup>30</sup> Arikea iconijajianaque mavite shirampari, itsipajiacariequa Jesoshi iquenquetsatavacajia. Iriotaque Moishishini aisa Iriashini.<sup>31</sup> Icavorejamajatanaquequea icantajianaquequea tsiren. Iroguentiquea iquenquetsatacojiaque irimetojaque Jesoshi Jerosarequi onetsanatantaquempaca itioncacojiquerigueti.<sup>32</sup> Iriraquea Peerero aisa itsipatsipaitacaca manaquea ipochoquipochoquitanaque, cotanquitsiquea opeamajatanacaguetti yamenitsijigariequa Jesoshi cavorejavaequequea cantavaeque tsiren itsipatsipaitacari Moishishini aisa Iriashini.<sup>33</sup> Iroompaquea itsinampirejajitanajatiguri Jesoshi icantsitanacaquea Peerero:

—Tsatacantantatsica, cameetsavaeque achoocajiaque ocaniqui. Intsishatisi nompeacaguempaja 3 catisetarentsi, aparo pashinquempa aviatimpa, aparo irashintaquempa Moishishi, otsipaquea irashintaquempa Iriashi.

Cotanquitsiquea irira Peerero tee intsatavajeroji icantavecaca.<sup>34</sup> Quenquetsavetanatsi omanacojiapajiri mararo, itsarotsaritanaque yamenaquequea omanacojianajiri.<sup>35</sup> Arikea iquenquetsajencajitanaque omaraosecanqueguetiicanquequea:

—Iricatica irio Irijani, nopsisama-jatacaca.<sup>p</sup> Pinquemisantamajajigurija.

<sup>36</sup> Arikea opeanacaguetti iquenquetsataquegueti yamenitsijavetajari Jesoshi aparo icatiaja. Arikea yoayoaitanajiquea imajerejiapoji teequea incamantapoja-jeji iroqua-gegueti yamenavecaca.

**p 9.35 nopsisama-jatacaca.** Chooca otsipapae paperi iroquetinica cantanquitsica ocaniqui “iriguenti nocoguaqueca.”

**Jesoshi yogueshitajiri chaajaniquitirajaca,  
yoguisotoajiniri ampatsimi  
(Mt. 17.14-21; Mr. 9.14-29)**

<sup>37</sup>Osavincaguitetanajigueti icoraquetaji Jesoshi aisa itsatacaane iquenaquenaipojai otsempiqui. Arikeate yoayoaitanaque- quea oshequinii caquinte itonquivotonqui- voitavajari. <sup>38</sup>Arikea iquenquetsatanaque- quea aparo irijencavaetanaque icanca, icanqueriquea Jesoshi:

—Tsatacantantatsica, iintsija pamene- rija nirijanite, apatiroti icanqueua iriatimpa. <sup>39</sup>Ishaquiacaritari ampatsini icajemamajatacaqueri aisa icantacaqueri tinquininimi, ishimotyonajatanaqueuea icanca. Icocaniquea yatsipetacaaguitarini, tee irinintenica iroguiapujajeri. <sup>40</sup>Nocanta- tajiavecariequa pitsatacaane iroguisotojai- querime, cotanquitsiquea teequea iragavejajigueriji.

<sup>41</sup>Icantanaquequea Jesoshi:  
—iArisa picomirincajiga teequea paventemparoji iragavejane Aapani Irioshi, ariguentequea picovaeguishejiga! ¿Quero- caquea oncarashequiavaeteni nosavicaven- tajiaquempi? ¿Queroca oncarashequiavae- teni nantsipetacojiaquempi?

Ipitsocashitanacari iriri icanqueriquea:  
—Pamaquenarijate acaniqui pirijanite.  
<sup>42</sup>Cotanquitsiquea iroquea yaavetana- canarigueti, iriraquea ampatsini yoguiteja- naqueri isavi quepatsiqui icantacaanaqueri tinquininimi. Cotanquitsiquea icantomajis- tiriti Jesoshi, yoguisotoitarí, arikea icotanaja chaajaniquiri jac peamajatanaja. Yojoquitajanriquea iriri.

<sup>43</sup>Maasanopae yooyoaitanaque intati, yamenaquequeate yagavejamajati Aapani Irioshi.

**Jesoshi icamantsitajariquea irimetotojaque  
(Mt. 17.22-23; Mr. 9.30-32)**

Icojiacaniquea quenquejajianatsitiraja iquenquejacojianaquerogueti ipeacea-

guecaca Jesoshi, iquenquetsatanaque- quea iriatimpa icantajiguiri itsatacaane:

<sup>44</sup>—Imaicaquea pinquemisantamajata- vaqueroja noncanquempica. Iriraquea Irijanite Caquinte iraacaantajiqueriquea iraajivaquaqueri caquinteja.

<sup>45</sup>Cotanquitsiquea iriatimpajia teequea intsatavaquero taaca icantaqueua, omanapitsajiacariquea. Cotanquitsiquea omintsaroanaqueri incoacojiaquerime taa opaji icanque.

**Quericaca anaamajatantanquitsineca  
(Mt. 18.1-5; Mr. 9.33-37)**

<sup>46</sup>Iroompaquea ipariajianacaro itsatacaane iquenquetsatavacaajiac a quenquejacojiaqua quericaca anaamaja- tantanquitsine, iroquea icanque, iroquea icanque. <sup>47</sup>Cotanquitsiquea Jesoshi itsaquieroqua maasanopae iquenquejajiaqueca. Arikea yaaque- quea aparo chaajaniquiri isenampija- cari. <sup>48</sup>Icantajiguerije:

—Quericaca aavaquerine shineventava- quemparine chaajaniquiri quempecarica iricatica iroorijite nonintacaantaquero naatimpa, quempecaqueate naroguentica ishineventavaca. Quericaca shineventava- quenane naatimpa, iroquea aisa irishine- ventavaquempsa tigarancaquenaca. Taacagueti cavintsajantamajatantanqui- tsine incavintsajamajatanaqueriquea teeca iranaanteji, iroquea iriguenti caaviji yanaantavaeque.

**Quericaca teeca incatsimajiaji  
iroguenti itsipatacaji  
(Mt. 9.38-40)**

<sup>49</sup>Arikea icanqueriquea Joanca:

—Tsatacantantatsica, chapinqui namenajiaqueriquea aparo yoguisoto- queriquea ampatsini, iroguentequea yaventashicari pivajiro. Cotanquitsiquea naatimpajia nocantimentsitariquea, namenaque tee intsipatacaji.

<sup>50</sup>Icanquequea Jesoshi:

—Imaicaquea aatoquea picantimentiri, maasanotari teeca incatsimajiacaji iroguenti itsipatacaji.

**Jesoshi icantomajaqueri Santiago aisa Joanca**

<sup>51</sup>Irooshipojigueti iroantanajempaca Jesoshi jenoqui inquitequi itampishitashitanaqueri iroanaque Jerosarequi. <sup>52</sup>Itigarancajiaqueri iriquetita oananquitsineca incamantanquequea coraquetaopoi Jesoshi. Iriatimpajia yoayoaitanaquequea irinetsanaguequeneri, iquiaquiajivetaopojaca apatiroca quinteninintsi ichoocatantajiacaca Samariaquitica. <sup>53</sup>Cotanquitsiquea iriatimpajia yamenamenaiqueguedi ariguenti iroaroaitanaque Jerosarequi, teequea irinintajigueji iraajiavaqueri. <sup>4</sup> <sup>54</sup>Iriraquea itsatacaane pajitatsica Santiago aisa Joanca yamenaquegueti teequea iraajiavaqueriji, icantajiguiriquea Jesoshi:

—Nomajirote, ñari pininque noncantajiaque asacaraaqueempa paamari jenoqui inquitequi ampevoquijajiaqueri onteroncamaquaqueri?

<sup>55</sup>Ipitsocashijigari Jesoshi icantomajaqueri, [icanti:

—Tee pintsateji quero icocani Ishire ashintajiaquempica; <sup>56</sup>teenicate iroonica incoraquetantempa Irijanite Caquinte interoncaguetajacuante, iroguentiquea icoraquetantacaca iraajavajeri.]

Iroompaquea yoayoaitanaquequea otsipaqui quinteninintsi.

**Nintajiatsica iroguijaguijaitanaqueri Jesoshi**  
(Mt. 8.19-22)

<sup>57</sup>Arikea ishivoquishivoquitanacaro quenavoquivontsi, icoraquepojaque shirampari icampojiri Jesoshi:

—Nomajirote, noninque noncoguitempani noguijaguitempini querocagueti poanaque.

<sup>58</sup>Icanquequea Jesoshi:

—Iriraquea zorro<sup>s</sup> chooca imoro iquijantacaca. Arikea iquempejiaca tsimeripae chooca imencoshi, cotanquitsiquea iriraquea Irijanite Caquinte teequeate onchoocateji itsovironaquite irimaantaquempaca.

<sup>59</sup>Arikea icanneriquea itsipa:

—Jameja poguijaguitenani.

Cotanquitsiquea iriatimpajia icanqueua:

—Nomajirote, iroquetita nonquitatanjeritaja aapani.

<sup>60</sup>Icanquequea Jesoshi:

—Iriraquea metojashirentari irio quitatajerine metojari. Aviatimpapoanaque pintsaventantaqueroquea quero icotani imajirontagueti Aapani Irioshi.

<sup>61</sup>Icantanaquequea itsipa:

—Nomajirote, iiintsija naatimpaignoguijaguitempini, cotanquitsiquea iroquetita pishinetena noapanajanteta notsovironaquitequi noncamantantague-tapanajanteta.

<sup>62</sup>Cotanquitsiquea Jesoshi icanneriqueua:

—Quericaca parianaquemparoneca inquitencavatsatacantempari

**q 9.53** Irirajia Samariaquitica oshequi icatsimaneguintajiaqueri joriojia, teequea irinintejinquenaqueunaitsitaqueri joriojia iguinentiqui iroaroaitanaquegueti Jerosarequi intsaorentajiaquemparigueti Aapani Irioshi, irootaquequea teeca irinintantempajia iraavajeri Jesoshi. **r 9.55-56** Oconoagarantaca paperi iroquettinica manaquea ocanti acaniqui: “Ipitsocashijigari Jesoshi icantomajajiaqueri.” **s 9.58** Ichococati zorro tomirishiqui, iquejevecari shiishi. Iriguenti shecatarica chaapa, quepigari, maasano.

igaapironcaarite quepatsiqui, arigueti iramenamenatanaque itaquitapojaquetai, aato otampaticati iquitencaquea. Ari iquejetaca quericaca parianaquemparoneca iroguijatacota, arigueti iramenamenatajaterogueti iquejeveguitaniguetai coramani, aatoquea yagaveji inetsanamajatiro intintacaavecarica Aapani Irioshi, teatarite irimajirontama-jatemparinica.

**Jesoshi itigarancajiaqueriquea 72  
intsavetantanaque**

**10** <sup>1</sup>Coajicaquea iriraquea Amajirote icoguiaguetaqueri itsipapae itsatacaaneja carajanquitsica <sup>72,</sup> <sup>t</sup> itigarancajiaqueriquea irijivajivaitanaqueri intsipatavacaanaquempa mavite, intsitacaguitejavaetanaquero quinteninintsipae querocaguetai iroanaqueni iriatimpa.

<sup>2</sup>Iroompaquea icantajiaavaqueri: “Choocaquea oshequini coguitejajianquitsica irimeshiajiaqueri, cotanquitsiquea teemajacaquea iroshequigueji tsatacaajiaquerineca cameetsanijite irimeshiimentajiquerinijite. Manatarite iquejejiacaroquea osampatigueti tirigoitsoqui ocaraguitetacovaeque catejiegini teemajacaquea iroshequia-majateji aviitaqueroneca. Irootaquequea imaina nocamantantajiaquempica pamanajiaqueriquea Aapani Irioshi intigarancajiaque tsatacaajiaquerineca.

<sup>3</sup>Poajianaquequea aviatimpajia. Iroguentiquea nontigarancajiaquempiquea inchoocajiaqueguedi catsimatantajiatsica irantsipetacaavaequempiquea quempecaquea irioca notigarancaquea irijanigantirenajaniqui oveja iroanaquequeate yomporoguijaguetai

lobopae<sup>u</sup> shecatarica oveja. <sup>4</sup>Aatoquea paajiguetsi pitsaratote, aisa pitetantarica pimentaquisite, aisa aatoquea paajiguetsi itsipapae pigaviguitire. Aatoquea pisavicaguetanaquequea quenavoquirontsiqui pinquenquetsata-vacaajianaquempa pintsipatsipaiquem-pariquea quericaca pintonquivojajapo-jaquempaca.

<sup>5</sup>“Querocaguetiquea oraniqui incajemajiaavaquempi pimaajianaque itsovironaquitequi pinquijaquijaitana-queguedi intsompogui iroquetitaquea pincantajiaqueri: ‘Noninquequea incavintsajamajajiaquempi Aapani Irioshi maasano choocajianquitsica pitsovironaquitequi.’ <sup>6</sup>Irishinevaetana-quempaguedi iriatimpa irinunqueguedi incavintsajamajaqueriquea Aapani Irioshi, ariquea inquejetaqueempaquea Aapani Irioshi incavintsajamajataqueriquea. Cotanquitsiquea aatogueti intinti, aatoquea icavintsajiritsi Aapani Irioshi, aviguentiquea incavintsajajiaque.

<sup>7</sup>Irishineventajiaavaquempigueti pincoquempanija pimaimojaqueri aapojempaguedi poapoaitantanajempaca, aatoquea pigajaiatsi. Pishecajia-quemparoqua taaca opajitapae irojocajiaquempica, aisa pimirajiaqueroquea imirajiacaca iriatimpajia. Icantajitiro-quea cameetsavaeque irivegarajiqueriquea catsiquetatsica. Jeroquea cameetsavaeque irojocajiaquempiquea maasanopae picoguitejacojiacaca, poimojianaqueritarite pitsavetantimojia-queritarite.

<sup>8</sup>“Querocaguetiquea oraniqui poapoai-tanaque, incajemajiaavaquempigueti pishecajianaquempaquea pishecatava-quemparoqua taaca opaji yojocacojia-

**t 10.1** Oraquea itioncajajiroguetai coramani oconoajiaca itioncajiquero 70, otsipapae otioncaca 72. **u 10.3** Irira lobo iriguenti tomirishiquitica catsimari quejevecarica iririjegui shiishi.

quempica.<sup>9</sup>Pogueshiguetajeriquea ashinoncaaguetatsica, aisa pincantajiaqueriquea maasano: 'Irooshitapoji irimajirontaquempa Aapani Irioshi.'<sup>10</sup>Cotanquitsiquea querocagueti poapoaitanaque aatogueti icajemimpi, pinquenaquenaitanaquequea quenavoirontsiqui icanqueguedi tirorererere caquintejia pincantajianaqueja:<sup>11</sup>'Noshegontamajajianaqueroquea quepatsivane nagatiquitsitapojaquem-pica iroonijite pintsajiaquenijite manaquea pipeacajaiaca covaeguishe-rentsi teetarite pishineventajavaque-naji. Cotanquitsiquea noninque pintsajiaque irooshipojaquequea irimajironta-quempaquea Aapani Irioshi.'<sup>12</sup>Pitsajigui coramaniqui icatsimajiaqueriquea Aapani Irioshi Soromaquitica yapevo-quijajiaqueriquea iteroncaciaqueriquea. Imaica noncantajiaquempiquea aavaepojajempagueti incatsimatantajia-quemparica Aapani Irioshi maasano teeca intsaroventajiguempariji, caaviji irigaajiaqueri teeca irinintajigueji inquemisantajiaquempiji, anaamajata-quero irantsipejiaquempaca Soromaquitica.

**Jesoshi icantomajajiaqueriquea  
guinentijati-sica Corashiniqui, Vetsairaqui  
aisa Caperenaoqui**

(Mt. 11.20-24)

<sup>13</sup>"iImaicashias patsipevaetempani-shiatsi aviatimpajia guinentijati-sica Corashiniqui! iImaicashias patsipevaetempanishiatsi aviatimpajia guinentijati-sica Vetsairaqui! Pamenajiavecaroquea nonigaimojiavequempica oacaantanta-tsica intati, cotanquitsiquea teequea pinintajigueji pincantashitatijaiana-jempa povashiantajianajeroji picovae-

guishejiacagueti. Iriraquea guinentijia-vetatsica coramani Tiroqui aisa Shironequi iriome amenajiguerome, incantashitatijaianaquempamequea inquitsajiaquemparome jiriquiquijipo-roquiero, aisa irigachoncaguinajiaquem-paromequea cachopoquiri ironigaanta-quempanijite ishimampojancajiaca yamenajiaque icovaeguishejiaca, incantashitatijaianajempamequea.<sup>14</sup>Cotanquitsiquea aviatimpajia arejeta-pojajempagueti incatsimatantajiaquem-parica Aapani Irioshi maasano teeca intsaroventajiguempariji, caaviji irogaamajajiaquempi anaamajaquer-oquea incatsimajiaquerigueti Tiroquitica aisa Shironequitica.<sup>15</sup>Aviatimpajia guinentijati-sica Caperenaoqui paventa-cojica. ¿Ari pijitaque poapoaitanaque jenoqui inquitequi? iAatotarite! Manaquea poapoavaetanaque isaviji Areshiqui."

<sup>16</sup>"Notsatacaanejia, quericaca quemisan-tamajatavaquempineca aviatimpa, naroguenti iquemisantamajatavaque. Quericaca manintaquempineca aviatimpa, naroguenti imanintaque. Quericaca manintaquenaneca naatimpa, iriguenti imanintaque tigarancaquenaca."

**Iconaquecoraqueitaji itigarancajiaqueca  
Jesoshi**

<sup>17</sup>Ocoajicaguitevaetanaquequea icoraquecoraqueitaji irirajia 72<sup>w</sup> itigarancajiaqueca, ishinejiapojajaquea icantajiguiri:

—Nomajirote, iquemisantajianaque ampatsinipae, noguisotoantajiacari pagavejica naventajiacarogueti pivajiro.

<sup>18</sup>Icantajiguiri Jesoshi:

—Jeejeguitatsi arimajaca namenaque-riuea Satanashi yagavejajitaqueri

v 10.15 Oraquea Areshi iroguenti ichoocajiaqueguedi metojatsica. w 10.17 Pamenero tioncanquitsica isavivanauqui otsapaqui 10.1.

yasacaraantanacaro inquite iquejetanacaro careti.<sup>19</sup> Naatimpa nagavejacaajiaquempi pagaticajiaqueriquea camaarini aisa oseroticona. Aisa pagavejajiaqueriquea ampatsini catsimatantanquitsica agavejavetanquitsica, aatoquea querocaca icojiguimpiniquea.<sup>20</sup> Cotanquitsiquea noncantajiaquempi, aatoquea irooqua pishineventajati pamenajiaqueueti pagavejajiaqueriquea ampatsinipae. Iroguentiquea pishinejiaquempaqua pamenajiaque tioncacojiaquempiqueate jenoqui inquitequi.

**Jesoshi ishinevencariquea Aapani Irioshi  
(Mt. 11.25-27; 13.16-17)**

<sup>21</sup>Iroompaquea ariquea icotanaca Jesoshi ishinemajatanaca icanca, yoguishinejaqueriquea Ishire Aapani Irioshi, icanquequea: “Aapani Majiron-tamajatatsica, aviguenti majirontacojia-carica maasano inquitequitica aisa quepatsiquitica. Noshinevenquempiquea nocanca, pitsititapitsajiaqueritari tsajitsica teequea ponigajigueriji querocaca picotani aviatimpa. Irguentiquea ponigajiaque teeca intsaigueji. Ari oquempetantacaca imaica, Aapani, irootari pininque aviatimpa.

<sup>22</sup>“Yojocaguetaquenaroquea Aapani maasanopae, aisa yagavejacaamajauenca maasanopae. Teequea quericaca tsamajatatsineca querocaca icotani Irijanite Aapani Irioshi, apatiroti tsatanquitsi Aapani. Aisa teequea quericaca tsamajatatsineca querocaca icotani Aapani, apatiroti tsatanquitsi Irijanite aisa irirajia inintacajiaqueca Irijanite intsatacaaajaqueri.”

<sup>23</sup>Irioquea ipitsocashitanaca itsatacaanejia icanqueri: “Icavintsajamajajiaquempiquea Aapani Irioshi pamenanta-jiacaroca maasanopae pamenajiaqueca

imaica.<sup>24</sup> Nocantajiaquempi ichoocajia-veca oshequiniquea majirontajatiatsica aisa tsavetantajiguroca icanquerica Aapani Irioshi inintajiaveca iramenajiaquerome pamenajiaqueca aviatimpaia imaica, cotanquitsiquea teetarite iramenimajigueroji. Aisa inintajiaveca inquemajiaqueroko piquemajiaqueca, cotanquitsiquea teequea inquemeroji.”

**Samariaquitica cavintsajacotantatsica  
(Mt. 22.34-40; Mr. 12.28-34)**

<sup>25</sup>Iroompaquea icatiitsitanaca aparo tsatacaantiroca itioncacotanaqueca Moishishini, icoacoqueriquea Jesoshi inintavetaca iramenantempari. Arikea icanqueri:

—Tsatacaantantatsica, ¿querocaquea noncoquempani imaica iranijacaantajenacate Aapani Irioshi cameetsanijite nonchoocaguiteni?

<sup>26</sup>Icanqueriquea Jesoshi;

—¿Querocaquea ocanqueni itioncacotanaqueca Moishishini? Papatsajavanti-rogueti, ¿querocaquea ocanqueni?

<sup>27</sup>Icanquequea iriatimpa:

—Manatarite ocanque: ‘Pimpintama-jataquemparija Majirontamajatatsica Pirioshite, pampaniromajatanaqueri, pimpintashirentamajaqueMPI, pintampishiventamajaqueMPI irooriji pipintsamajatacarí, pimpintsaquenque-janemajatanaquemparija.’ Aisa ‘Pimpintsaquemparija pigonoro pinquejeta-caajempa pipintsataglieti aviatimpa.’<sup>x</sup>

<sup>28</sup>Icanqueriquea Jesoshi:

—Pitampaticamajataqueroquea. Pincoquempagueti pinetsanamajaqueMPI ocanqueca, ariquea iranijaca-jiempi Aapani Irioshi pinchoocaguiteni.

<sup>29</sup>Cotanquitsiquea iriatimpa inintaque irompetanaquempa, icoacotsitariquea otsipa icanqueriquea:

x 10.27 Ireo. 6.4-5; Irev. 19.18.

—¿Querimpate nogonoro?  
<sup>30</sup>Icantitariquea Jesoshi:  
 —Aparo jorio yoavetanacaquea  
 Jericoqui iquenavepojaca Jerosarequi.  
 Cotanquitsiquea ariquea yarejevecaro  
 niganquipoqui yaavaqueriqueate  
 aitsitantajatiacsica yaitsimajataqueriquea  
 maasanopae aisa iquitsaacaca  
 yoajiaqueriquea ejempaco, itavatavaa-  
 queri semic semic, yamenajigu-  
 quea ijiqueji metojanaque yoguipaquijapa-  
 najanantiri. <sup>31</sup>Iroompaquea yoanaque-  
 quea oraniqui aparo saserorote iquena-  
 pojiroquea iriatimpa aisa Jerosarequi,  
 yamenavetanacari itomicapitsapanajan-  
 tiri tijacoñaji oraniqui, yoanajiquea.  
<sup>32</sup>Aisa icoraquepoji oraniqui aparo  
 irevita amijiguirica saseroroteja,  
 ariquea iquempetacaquea iriatimpa  
 yamenavetanacari itomicapitsapanajan-  
 tiri. <sup>33</sup>Cotanquitsiquea icoraquepoji  
 aparo Samariaquitica y yamenitsipojac-  
 riquea ipintsatacotanacari. <sup>34</sup>Ishashita-  
 nacari yaanaquequea ashiti aisa vinoja  
 yaavintasetisqueriquea imaaguequeri.  
 Iroompaquea igataitsitariquea  
 irashinotequi quijavecari ariatimpa,  
 itsipatanacari tsovironaquequi imaanta-  
 jitaca oahoaitatsica oraniqui. Iquempo-  
 guijaqueriquea yojocaguequeneri  
 icoguitejacoguecaca. <sup>35</sup>Iroompaquea  
 osavincaguitetanaquegueti aisa, yaitsita-  
 naca mavite tenario<sup>z</sup> yojocaqueriquea  
 ashincaroca itsovironaque icanqueri-  
 quea: ‘Jeri iricatica imentaqui novegar-  
 tanquempica pamenamajatajerija  
 iricatica. Aatogueti yarejetaqueate  
 imentaqui oncoajicatanajegueti novega-  
 ratapojajempi noncoraquetajegueti.’  
 Ariquea yoanajiquea Samariaqui.

<sup>36</sup>Imaicaquea imaica iintsija pincanque-  
 naquea, ¿querica peamajaquerica  
 igonoro yaajaqueca aitsitantajatiacsica?

<sup>37</sup>Icanque iriatimpa:  
 —Iriguenti iricatica pintsatacoc-  
 rica.

Icanqueriquea Jesoshi:  
 —Iroosacanica imaica ariquea  
 pinquempequempa aviatimpa.

**Yoanaquequea Jesoshi otsovironaqueitequi  
 Marita aisa Maria**

<sup>38</sup>Arimpaquea yoavaetanaquequea  
 Jesoshi, iroompaquea yarejevaeca  
 ichooocajiguigueti itsipapae. Arikea  
 ochoocatiquea oraniqui manquig-  
 rents opajitaquea Marita, ocajema-  
 queriquea otsovironaqueitequi.

<sup>39</sup>Chooca oguetyote opajitaquea  
 Maria. Iroatimpa osavivcentavaque-  
 riquea Jesoshi oquemisantamajatava-  
 queri itsavetantaquegueti.

<sup>40</sup>Cotanquitsiquea oraquea Marita  
 oshoshoguitevencaroquea antague-  
 queca. Iroompaquea oashitsitanacari-  
 quea Jesoshi ocanqueriquea:

—Nomajirote, pamenashicaroquea  
 intati iguetyo teequea amitacotenaji,  
 aparo nantaveguitaroni maasanopae,  
 teequea querocaca pincanteroji.  
 Lintsjate pincanteroja amitacotenata.

<sup>41</sup>Icantitaroqua Jesoshi:  
 —Marita, iroguentiquea piquenque-  
 jacogueque taaca opajitapae  
 pishoshovencaroquea. <sup>42</sup>Cotanquitsi-  
 quea chooca aparo caavijica anaaque-  
 quea irinintamajajiteca. Irootaque-  
 quea ocoguiavaquea imaica Maria.  
 Aatoquea ichoocati quericaca  
 jocavaqueroneca.

**y 10.33** Icatsimatavacaaca joriojia aisa *Samariaquitica* iroorijite itsaroventajiacarigueti Aapani Irioshi irirajia Samariaquitica tee iroguijamajateroji yamejigaca joriojia iriatimpa.

**z 10.35** Iriraquea *tenario* irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario.

**Jesoshi itsatacayaqueri itsatacanejia  
quero incojiaqueru iramanerigueti Aapani**

Irioshi

(Mt. 6.9-15; 7.7-11)

**11** <sup>1</sup>Arikea otsipa savincaguiteri yoanaque Jesoshi iramaneriquea iriri. Iroompaquea iteroncanaquitiguiroquea, icantanaque aparo itsatacane:

—Nomajirote, iintsiya pintsatacaya-  
guenaja quero noncoqueroni namaneri-  
gueti Aapani Irioshi, pinquejetacaguem-  
paroja itsatacaaquerigueti Joanca  
itsatacanejia.

<sup>2</sup>Icantajiguiri Jesoshi:

—Pamanajiaquerigueti Aapani  
Irioshi, jero pinquejetacaguem-  
paro:  
'Aapani choocatatsica inquitequi,  
noninque intsarorentamajajaque-  
mipuea maasano caquinte.  
Caacateja pimajirontamajapoempa.  
Noninquequea irinetsanamajajique-  
roja ocaniqui quepatsiqui  
maasanopae pininqueca  
aviatimpa,  
onquejetantaquempaca inetsanama-  
jajiquerogueti ontaniqui inqui-  
tequi.

<sup>3</sup> Pojocaquenaja imaica noshecatapi-  
nijiaquempaca.

<sup>4</sup> Pimpeacotsitajenaroja nogovaegui-  
shere,  
aritarite noquempetaca naatimpa  
nopeacotsitajari ipeacaavecaca  
atsipetacaavetaquenaca.

Aato pishinejiganarotsi oncoraque-  
tashiquena aatoca notampishi-  
tashiti.

Manaquea noninque pintampishita-  
caamajajiaquenaja aatonijite  
yagavejajana ampatsini  
incovaeguishetacajaena.'

<sup>5</sup>Iroompaquea icantajiguiri aisa:

—Pinquenquejeroja, arigueti poanin-  
canaquegueti itsovironaquitequi  
pitsipavijitaca nianquuite pincajemaco-  
tapojaqueri: 'Anianishi, pojochenashi-  
atsi 3 pan, <sup>6</sup>iriaquerasanoquea arejeta-  
pojatsi nogonoro, teetari onchoocate-  
nica nojocavaquenerica.' <sup>7</sup>Arikea  
irancanaqueuea iriatimpa ontaniqui  
intsompoguiqui incanquempiquea:  
'Jaashinete paseregansatsi, ashitacojana-  
janatarite, maaajanajanaqueate  
maasano. Aatoquea nagaveji nojoquim-  
pitsi.' <sup>8</sup>Aatoquea yojocavetimpitsi,  
cotanquitsiquea pincantacoguitempani-  
gueti pamanaguiterini incatiitanaquem-  
paquea irojocaqueitimpis maasanopae  
picoguitejacocaca. Cotanquitsiquea  
aatoquea iro yojocavetimpis  
ipeaquempigueti itsipavijitacaca,  
iroquentiquea irojoquimenquempi  
picantacoguitani pamanaguitirini.

<sup>9</sup>Irootaquetari noncantantajiaquempica:  
pamanaguiterini Aapani Irioshi taaca  
picoguitejacojiacaca, arikea iriatimpa  
irojocajiaquempiro. Pamenagueteroja  
taaca opajita, ari pamenapojoero. Aisa  
pintinquiapojerogueti sotomorontsi, ari  
irashirejacoquempi. <sup>10</sup>Aritarite iriraquea  
amanantatsica irojocajiqueneri.  
Iriraquea amenaguetatsica iramenapoje.  
Aisa iriraquea tinquiguiroca sotomo-  
rontsi irashirejacoqueri.

<sup>11</sup> 'Arimpate piquempejiga aviatim-  
pajia iramanempigueti pirijanite pan,  
paitsitenempari mapi pojokenem-  
pari? Arimpate iramanempigueti  
pirijanite shima, paitsitenempari  
camaarinji pojokenempari? <sup>12</sup>Iriogueti  
iramanaquempi iitsouqui, paitsitenempari  
pojokenempari oseroticona?

<sup>13</sup> Quempevequea aviatimpa-  
pajia, picoguishejiavecquea, cotanquitsi  
pojocajiguiniriquea pirijanijiate taaca  
opajitapae cameetsaguetatsica yamana-  
jiaquempica, iriomate Aapani Irioshi

choocatatsica inquitequi caaviji intigaranquimojiaqueri Ishire inchooajiajapoaqueri maasano amanajiaquerineca."

**Icantajiqueriquea Jesoshi iriguenti shaquiacariquea ampatsini  
(Mt. 12.22-32, 43-45; Mr. 3.20-30)**

<sup>14</sup>Iroompapea Jesoshi yoguisotoaqueriquea ampatsini macanari, irooqua isotoanajigueti ampatsini iquenquetsatana naji shirampari macanavetanquitsica. Yamenamenaitanaqueua intati maasanojia. <sup>15</sup>Cotanquitsiquea iconoagaranca manaquea icantajia naque: "Iriguentiquea shaquiacari Veeresevo<sup>a</sup> imajirote ampatsinipia. Iriotaquequea agavejacaquerica yoguisotoantaguetacanarica ishaquiajia caca ampatsinipae."

<sup>16</sup>Ariquea iconoagarancaqueate itsipapae inintajiaque iramenanquempari icantantajiacarica: "Iintsja pamenaacajigueneroja otsipa oacaantantatsica intati onquenantapojaquem paro inquite."

<sup>17</sup>Cotanquitsiquea iriatimpa itsatava quero iquenquejajiaqueca icantajiguir: "Inchoocategueti caquinte incapiocajia queriquea igonorojia impeaqueampaquea imajirote, iroompapea arigueti impariajiaquemparo incatsimatavacaajianaquempa, ariquea intsinampirejavacajianaquempa, aatotari itsipatava caaja, aato imajirontajajari. Ariquea iquempejiaca tsipatsipaitarica ijijiguica, arigueti incatsimatavacaajianaquempa quea, ariquea incojianaquempaquea intsinampirejavacajianaquempaquea, aatotarite iconoavacajajaa. <sup>18</sup>Ariquea iquejetaca Satanashi iriatimpa, carimpate queroquea incoquempani

incatsimatavacaajempagueti igonorojia ampatsinijia? Aato iconoavacaaja, aato imajirontajitajari. Manaquea noncantajiaquempi imaica notsaque picantajiaque: 'Iriguenti shaquiacari Veeresevo agavejacaquerica yoguisotoantajijarica ishaquiajuevecaca ampatsinipae.'

<sup>19</sup>Iriomegueti agavejacaquename

Veeresevo, *č*ariequa taaquea agavejacaajiaqueri oguijatacoquempica aviatimpa yoguisotoantajijarica ishaquiajiavetacaca ampatsinipae?

Irootaquequea itsatantajitacaroca manatarate picomica aviatimpajia.

<sup>20</sup>Cotanquitsiquea iriguenti agavejacaquena Aapani Irioshi noguisotoantajijaarica ampatsinipae, irooqua pintsatantajiaquempaca jac imajirontajopaca Irioshimajaca acanqui aviatimpajiaqui.

<sup>21</sup>"Iriraquea ampatsini manaquea iquempecariequa caquinte tampishittatsica choocatatsica ishiquiripite, igotsirote, maasanopae iticaancaca, iquempoguijamajatsitaroqua itsovironaque, aatoquea quericaca agavejericanea iraitsijiteri. <sup>22</sup>Cotanquitsiquea incoraquetegueti itsipa caavijica yanaaqueri, irioquea iriguenti iragavejaque iraitsikeri maasanopae yaventaguevecaca irashinquemparoqua maasanopae yashintaguevecaca, irojoquitenempariquea quericaca inintacaqueca iriatimpa.

<sup>23</sup>"Iriraquea teeca irishineventavaquenaj, manaquea icatsimaquena; aisa iriraquea teeca intsipatenaji nocapiocantaquegueti, iriguenti yoguivorocantaque.

**Ampatsini icoraquetashitajiri aisa ishaquiajiavetacaca  
(Mt. 12.43-45)**

<sup>24</sup>"Oraquea irovashiantanajerigueti ampatsini iriraquea ishaquiajiavetacaca,

**a 11.15 Veeresevo.** Iguenquetsarequi guiriego icanqueri *Beezeboul* aisa *Beelzeboul*. Icanqueri quimajareri *Beelzebú*. Iriotaque pajitatsica aisa Satanashi.

iroanaque ontaniqui oquitamampororoi-tapojigueti irinintavequempa irimagore-javaequeme. Cotanquitsiquea iroompa iramenavetapojaquemparo querocampa inchoocateni oraniqui. Inquenquejitsita-naquemparoqua incanque: ‘Noantana-jemparota notsovironaquite ni nosotoan-tavetanacaca.’<sup>25</sup> Ari incoraqueveta-jempa iramenapojajeri ishaquiavetacaca quempeca tsovironaqui ipishijitiroguedi inetsanajitiroguedi, cajaraguitejisano oncanquempa.<sup>26</sup> Ariquea iroanaque iraaquierteri itsipajia 7 ampatsini caavijica igajaiaca. Iroompaquea irishaquiajiapojajempari irira ishaquia-vecaca iroaqueragueti, ariquea iriatimpa ari incotanajempa arimpia irogaamajatanajempa.”

**Quericaquea caavijica  
icavintsajamajajique**

<sup>27</sup>Iroompaquea choocatirajagueti iquenquetsavaetaque Jesoshi ocajemitsita-naquea aparo manquigarentsi tsipajiacrica omporoguijajianquitsica, ocanque:

—iCavintsajamajajiqueroquea piniro irijaninquempica atsomitimpica!

<sup>28</sup>Cotanquitsiquea iriatimpa icanque-quea:

—Iriompaqueate icavintsajamajajique quemajiaavaqueroca Iguenquetsatsare Aapani Irioshi netsanamajajiaqueroca.

**Iriraquea covaeguishejiatsica  
icantajiavecariea Jesoshi  
iramenacaajiaquerime oacaantantatsica  
intati**

(Mt. 12.38-42; Mr. 8.12)

<sup>29</sup>Iroompaquea arimpaquea yomporo-guiaventavaetapojacari Jesoshi, yanqui-

tacojiapojiri icanca, iroompaquea itsatacaaajiaqueriquea, icanque: “Aviatimpajia otiavaetaquempiquea covaeguishejentsi, pinintantajiacaca namenacaajiaquempirome oacaantanta-tsica intati, cotanquitsiquea aatoquea nonigaguimpirotsi. Iroguentiquea nonigaajiaquempi otsipa onquempe-quemparoqua iquejejiquerigueti tsavetantatsica Jonashini coramani.<sup>30</sup> Piquemacojiguiritarite Jonashini coramaniqui. Aapani Irioshi manatarite yamenacaajiaqueriquea Ninivequitica intsajiaquenijite arimajaca iriguenti tigarancaqueri. Arikea inquempeta-quempaquea irira Irianite Caquinte, manaquea inquejetacaquempari Aapani Irioshi Jonashini cameetsanijite pintsajiaquenijite aviatimpajia iringa que itigarancaque aisa.<sup>b</sup> <sup>31</sup>Oncoramaniguite-vaepojajegueti aapojajempagueti incatsimatantajiaquemparica Aapani Irioshi maasano teeca intsaroven-tajiguempariji, oraqueate imajirojiate Savaquitica oncatiitsitanquempaquea ontsavetacotsitaquempiro pantagushe-queca aviatimpajia choocajianquitsica imaica. Coramanitari ocoraquetashivae-queri Saromonini oquemisanqueriquea itsatacaaqueroguedi, oquenavaeta-pojiquea jmm osamani oquemacoquerigueti itsamajati. Cotanquitsiquea imaica icoraquevetapojaca caavijica anaavae-querica Saromonini, teequea pinquemi-santajigueriji.<sup>32</sup> Arikea inquempetajia-quempa aisa Ninivequitica incatintiitsi-tanaquempaquea oncoramanitapoja-geuti incatsimatantajiaquemparica Aapani Irioshi maasanojia teeca intsaroven-tajiguempari, intsavetacotantsita-

**b 11.30** Iriraquea *Jonashini* icaratacovaetanaque 3 savincaguiteri imotijaqui quejevetarica iririjegui quiterinqueni niavetacarica. Imaica icanti Jesoshi inquempetaquempaquea iriatimpa irimetojaquegueti iroguijaajivetaquitempariquea omoroqui icaratacovaevopojempa 3 savincaguiteri.

quempiroquea pantaguishejiaqueca. Maasanotari Ninivequitica iquemisanta- jiaqueriquea Jonashini itsavetantimojia- querigueti, ishimampojancajiana- yamenajiacagueta ipeacaagushejia- gueta covaeguisherentsi, ariuea icantashitatijaianaca. Cotanquitsiquea imaica icoraquevetapojaca caavijica anaavaequerica Jonashini, teequea pinquemisantajigueriji.

**Iquempetacaacaro tsivorentsí**  
(Mt. 5.15; 6.22-23)

<sup>33</sup>“Oraquea itsivojirigueti tsivorentsí, teequea ariuea intsitijiteriji, aisa teequea irisasaviacojiteriji chomoqui, ariguenti yoguisavicacojитiri jenoquijani- qui, cameetsanjite intsvoguitetana- quenerinjite maasano quijaquijaitan- quitsica oraniqui.<sup>c</sup> <sup>34</sup>Poquija oquempe- vecaro otsivore pitsino. Arigueti oncameetsate poquija, pamenamajate, onquempetaquemparo otsivoguitemajati- gueta. Aatogueti ocameetsati poquija, aato pamenantamajataro, onquempeta- quemparo pipitsecacotigueti maasano- tsino.<sup>d</sup> <sup>35</sup>Pamenamajateroja quero ocotaca piquenquejaguetaqueca. Inchiquiojitsi pijitirotsi cameetsa piquenquejavetacaca, pijitirotsi oquem- petacaro tsivoguitetanquitsica, pameni- tsivetemparo quea coajica manaquea ocanque pitsec.<sup>e</sup> <sup>36</sup>Arigueti ocameetsa-

taque maasano piquenquejagueca, onquempetaquemparogueti tsivoguite- tanquitsica teeca ompitsequimateji, ari pamenamajataqueroquea maasano, onquempetimotaquempi itsivotaco- quempigueti tsivorentsí, pintsatavaque- roquea intintacaquempica Aapani Irioshi.”

**Jesoshi icantomajajiaqueri pariseojia aisa irirajia tsatacaantajiguiroca itioncacotanaqueca Moishishini**

(Mt. 23.1-36; Mr. 12.38-40; Irc. 20.45-47)

<sup>37</sup>Iroompaquea iteroncanaquitiguro- quea iquenquetsavaequegueta Jesoshi, icantanaque aparo pariseo icajemitsita- nacariequa irishecatimoquempari. Iroompaquea yoanaque iquijanaque ipimerequijapojaca shitaponcarontsiqui irishecajiaquempa. <sup>38</sup>Cotanquitsiquea yamenitsitanacaquea intati cajemate- rica yamenaqueriquea ishescatacaquea intati teequea inquivavacotempaji inquempejiaquempariji iriatimpajia iquivavacomajataca iroshipojigueti irishecajiaquempa.<sup>e</sup> <sup>39</sup>Cotanquitsiquea Amajirote icanqueriquea:

—Aviatimpajia pariseojia mana piqempejiacari quiviroca otaqui chotarontsi aisa perato, oraquea intiomspoguiqui ooquea cantaitvaeque- quea. Ari piquejejiaca, mana pinetsana- tamampeajiacá intati, cotanquitsi

**c 11.33** Ari iquejetacaquea Jesoshi, teequea intsititeroja maasano yantaguetaqueca aisa itsatacaantaqueca, oconijatimojiaqueriquea maasano coraquetashiquerica. Arimegueti irininqueme joriojia, iramenamajauerome, intsaqueme inttaguetica Aapani Irioshi, aatome icantirime Jesoshi: “lintsija pamenacajiguenaroja otsipa oacaantantatsica intati.”

**d 11.34** Arigueti anintamajataque anetsanatero inttaguetica Aapani Irioshi, anquempetaquempari cameetsatanquitsica iroquija, amenamajataquerotari ocanqueca Iguenquetsatsare Aapani Irioshi, anquemaquero. Aatogueti anintamajati anetsanatiro inttaguetica Aapani Irioshi, manaquea anquempetaquempari teeca oncameetsateji iroquija, amenavequemparogueti ocanqueca Iguenquetsatsare Aapani Irioshi, aato aquemirotsi.

**e 11.38** Iriraquea pariseojia manaquea yogavitashitajaro itioncacotaqueca Moishishini icantajiguiri igonorojia: “Aatogueti iroquetitaja piquivacomajata manaquea incatsimajiaquempi Aapani Irioshi.”

caaviji paitsitantagueti, otsitacashirentavaetaquempi pigovaeguishere.

<sup>40</sup> i Teequea pinquenquejajigueji!

¿Arimpate teequea pintsajigueji  
iriraquea peacaacaroca itsino caquinte  
irioquea peacaacaroca ishire aisa?

<sup>41</sup> Cotanquitsiquea pinetsanashirentajainaquempaja, pimpintsatacotantajia-quempaja, arigueti pinquempequero,  
saancavaequequea oncanquempa  
maasano.

<sup>42</sup> "i Imaicashiatsi pantsipevaetempanishiatsi aviatimpajia pariseojia! Taaca opajitapae pashincaca irooca ovanajaniqui menta, irooca quejevecaroca sanconca, irooca otsipapae taaca opajitapae pivintyacajiguica pitsipatacaantajigaroca pisheca pojocagarantaqueneriqueaf Aapani Irioshi, cotanquitsiquea pipeacojiacaroquea icantajiavequempica: tampatica poaqueneri maasano caquinteguetatsica aisa  
pimpintsamajajiaquempariquea Aapani Irioshi. Cameetsavaeque pojocagarantaquiaeneriquea Aapani Irioshi  
pashincaca, cotanquitsiquea aatomesano pipeacojigaroncogonoropae icanqueca.

<sup>43</sup> "i Imaicashiatsi pantsipevaetempanishiatsi aviatimpajia pariseojia! Picantacoguitaniquea poapoaitapiniquegueti tsovirona-  
qui qui picapiocantapinijiacaca aviatimpajia pinintajiaque pisavisaviitaque  
pitsipatsipaitacari caavijica yanaajenca-  
vaeque. Aisa poapoaitigueti ontaniqui  
yojocantajiguetirogueti ajaarontsipae  
taaca opajitapae, pinintajiaque inquenque-  
tsatacaaajiavaquempi.

<sup>44</sup> "i Imaicashiatsi pantsipevaetempanishiatsi aviatimpajia cameetsatamampea-

jiasica! Iroguenti piquempejiacaro yoguijaantajitarica metojatsica coramanitica iroompaquea mana omaperinca-naja. Yoapinijquieroqua yagatigativae-  
queroqua, iroorijite maperincanajatari teeca iramenantajitajemparojo."<sup>g</sup>

<sup>45</sup> Iroompaquea icantsitanaca aparo tsatacaantiroca itioncacotanaqueca Moishishini icanque:

—Tsatacaantantsica, noquemajia-  
quempi piquenquetsataquegueti imaica,  
picantimanajianaquenaquea naatim-  
pajia aisa.

<sup>46</sup> Cotanquitsiquea Jesoshi icanqueri-  
quea:

—i Imaicashiatsi pantsipevaetempanishiatsi aviatimpajia aisa, tsatacaantajiguiroca itioncacotanaqueca Moishishini!  
Poguijatacantamajatacariquea  
caquinteja manamajatanquitsica  
pitsatacajaiqueriquea taaca opajitapae  
irinetsanamajataqueca irishineventa-  
quemparinijite Aapani Irioshi, cotanquitsiquea aviatimpajia teequeate pinetsa-  
natimajigueroji.

<sup>47</sup> "i Imaicashiatsi pantsipevaetempanishiatsi aviatimpajia! Iroguentiquea pipeacaashijiacanariequa inquenquejota-  
cotantajiquemparica tsavetantatsica metojajianquitsica coramanitica  
imetojajiaqueca choviquijianaquempica.  
Cotanquitsiquea manatarite pinetsanata-  
mampeajiacaroquea intati, teequea  
ariequa ontampaticateji pishineventamajatempariji. <sup>48</sup> Oraquea pipeacajaiacanrigueti, ponigaantajiacaca mana  
pamenajiaquero cameetsavaeque  
imetojajiaquerigueti. Iriatimpajia  
imetojajiaqueritarite coramaniqui,

f 11.42 pojocagarantaqueneri. Yojocagueneri 1/10 (*un décimo*), ocanque onchooquaquegueti 10 irojocagueneriquea aparo, onchooquaquegueti 100 irojocagueneri 10. g 11.44 Ariquea iquempejiaca iriatimpajia imaica, yamenajiaquerigueti irirajia tsipatsipaitacarica ijiqueji ari itampaticamajataquero itsaroventamajatacarri Aapani Irioshi, cotanquitsiquea teequeate, teetarite intsajigueji manaqueate iquenquejaguishejiaquequea taaca opajitapae covaeguisherentsi.

imaica aviatimpajia pipeacaashijiacanariaquea inquenquejacotantajitajemparica cameetsanijite aatonijite omanatsi yoguijaajiquerigueti.

<sup>49</sup>“Paesatoniqui itsatsitacaroquea Aapani Irioshi, irootaquequea icantantacaca: ‘Nontigarancavequenempariquea tsavetantiroca nocanquea aisa itsipapae notigarancanejia, cotanquitsiquea inconoagaranquempa quea irimetojaqueri, itsipapae irooca irantsipetaca-jaquempariquea.’<sup>50</sup> Oncoramanivaeta-pojajegueti incatsimajiaquempiquea Aapani Irioshi aviatimpajia choocajianquitsica imaica, inquenquejacaajia-quempiroquea imetojajiquerigueti tsavetantatsica iroaqueragueti ipeacajai-carogueti quepatsi arejevaetajemparo imaica.<sup>51</sup> Iriraquea iriquetica imetojajique iriguenti Averi. Iriraquea impoimajatananquitsica iriguenti Sacariani<sup>h</sup> imetojajiqueruea teempo-roqui itsaroventantajitarica Aapani Irioshi ichocavecquea aramerorora aretarequi itaantajitarica viratsipae. Irootaquequea nocantantajiaquempica imaica arimajaca incatsimamajajia-quempiquea aviatimpajia choocajianquitsica imaica inquenquejacaajiaquempiroquea maasano imetojajiguequea, quejetacaquea aviguentijia metojajia-queri.

<sup>52</sup>“Imaicashati pantsipevaetempanishatsi aviatimpajia tsatacantajigueroa itioncacotanaquea Moishishini! Piquejevecariquea aitsitantavetajaroca yavi iyavitanjitaroca sotomorontsi, teequea inquijeji iriatimpa, aisa teetari irishineteriji nintavetanquitsica inquija-quistanaqueme. Pitsajiavecaroquea

Iguenquetsatsare Aapani Irioshi, cotanquitsiquea teetarite pinintajigueji pintsamajajiguero aviatimpajia, aisa piticaacojaqueritari itsipapae nintajia-vetanquitsica intsajigue.”

<sup>53</sup>Iroompaquea isotoanajigueti icatsimamajajianaqueriquea pariseojia aisa tsatacantajigueroa itioncacotanaquea Moishishini, ariquea icoacoja-queriquea taaca opajitapae<sup>54</sup> iramenan-quempaca querocaca incanque cameetsanijite intsojeventajiaquempari-nijite incatsimatacantajiaquemparica.

Jesoshi icantajiaqueri itsatacaanejia aatoquea itsaroventamampeajigari intati

**12**<sup>1</sup>Iroompaquea icaramirincavae-tanaquequea jmm caquintejia icantajianaquequea tirorererere icanca itsinacajianacaquea. Iriraquea Jesoshi icantajiguiriquea itsatacaanejia: “Inchiquojitaja piquempejigaritsija pariseojia, manaquea icameetsatamam-peaca intati, aisa itsaroventamampeajiac. Iquempetacaro anempoacaana-queroca pan ose, anempoanaquempa maasanose. Shooshoh paajencatsitiritsi.<sup>2</sup> Maasanopae yomanajivecaca imaica yamatavijantigueti oncoramanitapoja-geueti intsajitaqueroquea. Arikea oquejetaca maasanopae isenacajigueve-tacaca imaica, oncoramanitapoja-geueti ironigaantajiqueroquea.<sup>3</sup> Irootaquequea imaica nocantantajiaquempica, maasanopae picantaguetaquea pitsecariqui pomanavecaca imaica, oncoramanitapoja-geueti incantajiteroqua savincaguiteri qui, intsajianaquereroquea maasano. Aisa maasano pinchiquiojien-cavetaquempa iguempitaqui pigonoro

**h 11.51** Iriratica *Sacariani* tee irio iriri Joanca Viñacajatantatsica. Irioquea iriquetinica tsipatacarica Sorovaveri icquierigueti majirontatsica Vavironiaqui cameetsa iroajianaje Joreaqi impeacaajemparo teemporo Jerosarequi 538 ajagantsini tequeratagueti irivogueji Jesoshi. Pamenero 1 Coronica 24.20-22. Iguenquetsatsarequi evereo iroguenti paperi caratapojaqueroca *Iroquetinica Itioncacaantaqueca Aapani Irioshi (el Antiguo Testamento)*.

intsompogui pitsovironaquitequi,  
oncoramanitapoja jegueti intsavetantaji-  
tero sotsiqui omencotapojacaguetai  
pitsovironaquitequi ovancaitoqui.

**Apaniromajaca**  
**intsaroacaamajajitaquempa Aapani**  
**Irioshi**  
*(Mt. 10.26-31)*

<sup>4</sup>“Imaicaquea nocantajiaquempiquea aviatimpajia notsipajiacaca, aatoquea pitsaroacaajigaritsi nintajianquitsica irimetojajiaquempi. Iriatimpajia arigueti irimetojajiaquempi iroguenti metojan-quitsine pitsino, cotanquitsiquea aato yagavejirotsi irimetojajiaqueroquea pishire. <sup>5</sup>Cotanquitsiquea naatimpa nontsatacaajiaquempiquea querica pintsaroacaajiaquempaca: irioquea pintsaroacaamajaquempaquea Aapani Irioshi, aparo icanca iriatimpa yagaveja-majaque incanquegueti quericaca metojanquitsineca arikea iragavejaquea intigarancaqueroquea ishire camorecariqui. Arimajaca irioquea pintsaroacaamajaquempa. <sup>6</sup>¿Arimap-quea teequea pamenajiguiri tsimeripae ariguenti ivesgaraca 5 tsimeri mavimen-taquitequea imentaqui? Cotanquitsiquea Aapani Irioshi tee inchoocateji impeaco-tempaca. <sup>7</sup>Quempacaquea pimaejia, ariqueate itsaquieroquea apamaeropae. Irootaquequea nocantantajiaquempica aatoquea pitsaroajigui, caaviji panajaia-queruea tsimeripae.

**Teeea impashiventacajaiguempariji**  
**Jesoquirishito**  
*(Mt. 10.32-33; 10.19-20)*

<sup>8</sup>“Imaicaquea noncantajiaquempi-quea: quericaca cantamajaqueroneca itsaroventamajataquena incamantajia-querigueti caquintejia, ariqueate inquempetaquempa irira Irijanite Caquinte oncoramanitapoja jegueti,

incanquequea: ‘Naroguenti ashincari’, inquemajiaqueriquea maasano irashivantijitete Aapani Irioshi. <sup>9</sup>Cotanquitsiquea quericaca cantaquerineca caquinte: ‘Teetarite nontsaroventempa-riji Jesoshi’, ariqueate inquempeta-queampaquea Irijanite Caquinte oncoramanitapoja jegueti, incanquequea: ‘Teequea naroguenti ashintemparine’, inquemajiaquenaquea maasano irashivantijitete Aapani Irioshi. <sup>10</sup>Queri-caca cantaguishevetaquemparineca irira Irijanite Caquinte iragavejaque Aapani Irioshi irishetacotajeriquea, cotanquitsiquea iriraquea cantaguishetacoquerineca Ishire Aapani Irioshi, irioquea iriguenti aatoquea ishetacojitiritsi.

<sup>11</sup>“Oraqueate arigueti irajaitanaquem-pigueti shinagogaqui icapiocantapinijia-caca irooca ichoocatigueti jivatatsica joese iriooca majirontajatsica, aatoquea pishoshoguiteta piquenquejajiguiroquea querocaca pincankeca pinquenquetsa-tacoventaquempagueti. Aatoquea picanti: ‘¿Querocaca noncanqueni?’, <sup>12</sup>aapojaquempatari inquenquejacaajia-quepi Ishire Aapani Irioshi cameetsa-nijite pintsajiaquequea querocaca pincankeca.”

**Teequea oncameetsateji**  
**irinintajiterogueti irajaarantajiquempa**

<sup>13</sup>Iroompaquea icantanaque aparo caquinte tsipatsipaitacarica omporogui-jajianquitsica icanqueriquea Jesoshi:

—Tsatacantantsica, iintsija pincanteri iguentijegui irojocagarantaquenaro-quea yojoquimojianajanaca aapanini imetojanajigueti. Imashitsatapsataque-naroquea nashintagarantaquemparome.

<sup>14</sup>Cotanquitsiquea Jesoshi icanqueri-quea:

—¿Narompate jivatatsica joese cameetsanijite nonquenquetsatacaa-quempiri irojocagarantajempi?

<sup>15</sup>Ariquea icantajiguirī maasano:

—Shooshoh pinintajiguitsja pajaaran-tajiaquempaquea. Pajaarantajiavequem-paquea, ɿarimpate irooqua amijacaajia-quempineca?

<sup>16</sup>Ariquea iquempetacaanacariea ajaarantavaetatsica, icanque: “Ichocati caquinte ajaarantavaetatsica. Yashinta-majataca iguepatsite ivintyacacaanta-queroquea tirigoitoqui, iroompaquea ochoocatanaquequea ooquea jmmtaco-vaequequea teetarite oncapichaguiteteji.

<sup>17</sup>Ocoramanivaetanaquequea anaavae-guetanaqueroquea oratica icapiocanta-roca querompaquea incapiocajeroni, icanque: ‘Querocaquea noncotajeroni? Anaanaaguetaqueroquea nocapiocan-taroca. Imaica ɿquerocaca noncapiocaje-roni?’

<sup>18</sup>“Ariquea iquenquejanaqueroquea icanque: ‘Imaicaquea notsaquequea querocaca noncapiocajeroni. Nosovea-caanquerota nocapiocantavetaroca nantacaantaguetajequea otsipapae iniropaquea cameetsanijite arejetajem-panijite maasanopae noncapiocantague-tajemparonijite notirigoitsoquite aisa maasanopae najaaropae. <sup>19</sup>Iroompa-quea noshinevaequempaquea noncanque: Imaicaquea choocatacovae-tanaquenaquea oshequiavaeque, aatotaquea oteronquitajatsi oncarataco-vaetanaquequea ajagantsini, aatoquea taaca nocoguitejacotimataja. Imaica-quea imaica nomagorejaguiteniquea, noshecaguitempani, nomiraguiteniquea, noshinevaeguitempani noncanquempa.’

<sup>20</sup>“Cotanquitsiquea Aapani Irioshi icanqueriquea: ‘Teequea pintsatimateji aviatimpia. Imaica pimetojaque ompitse-canaquegueti, povashiantaguetanaque-roquea maasanopae pashintaguecaca.

‘Taaca ashintajemparone?’ <sup>21</sup>Ariquea iqumpeca imaina maasano iriratica nintatsica manaquea irajaarantavae-quempa intati, cotanquitsiquea iriraquea Aapani Irioshi yamenaqueri-quea quempapequea teeca irashintem-paji capichaji.”

#### Iquempoguijaqueri Aapani Irioshi irijanijiante (Mt. 6.25-34)

<sup>22</sup>Iroompaquea Jesoshi icantajiguirī itsatacaaneja: “Imaicaquea noncanquempi: aatoja pishoshoventajigarо pishecajia choocatacajempineca, aisa aatoja pishoshoventajigarоquea pinquitsaa-jiaquempaca. <sup>23</sup>Oraquea pishire anijacajai-guimpica yagavejaquequea Aapani Irioshi ichocatacaaquempiroquea, iroompaquea pisheca caaviji irojocajiaquempiquea.

Ariquea oquempapequea pinquitsaa-ja-quempaca, yagavejaquequea Aapani Irioshi ichocatacaaqueroquea pitsino, iroompaquea pinquitsaa-jaquempaca caaviji irojocajiaquempiquea. <sup>24</sup>Pamenaji-guiriquea cogonti, teequea irivintyacave-tempaji, aisa teequea onchoocavetempajiquea incapiocantemparoca isheca iroaroai-tapinijigue iraapinijiaquequea irishecajia-quempaca, cotanquitsiquea Aapani Irioshi yojocapinijiaqueneriquea ishecajiacaca.

<sup>i</sup>Aviatimpajia caaviji irojocajiaquempiquea pishecajia pishecajiaquempaca, caaviji panajaiqueriquea araguetatsica!

<sup>25</sup>Arigueti pishoshoguiteventavequemparo pigatsantsare ɿarimpate pagavejaque pincatsantsatanaje niganqui meetero?<sup>i</sup>

<sup>26</sup>Iroosacanica teequea pagavejajigueji teemajaca omanamajatempajji, ɿqueroquea ococani pishoshoventantajiacaroca caavijica omanapitsajiaquempiquea?

<sup>27</sup>“Pamenajiguiroguetiquea ocatica ovempenaquipae inchiquiojiquea

<sup>i</sup> **12.25** Agavejaque aisa oncanque: “Arigueti pishoshoguiteventavequemparo oshequianajeme pisavincaguiteiterapea ɿarimpate pagavejaque poshequiaquero capichaji?”

otsoroashiguetacaqueate iroatimpa, teequea oncatsiquejiavetempajiquea aantaquemparomeca oitsaare, aisa teequea onquiricajavetempaj, jac ocameetsamajaquea anaavaequequea ocanca ocameetsavaeque, anaaguequieroqua quitsaarentsi cameetsamorenaguetsatica coramanitica iquitsaaiciaca majirontatsica Saromonini caavijica anaaque ocameetsamorenataquequea.<sup>28</sup> Quempeca ocatica ovempenaquipae oporencanaque pore icameetsatacaaguequieroqua Aapani Irioshi, cotanquitsiquea osaitequeraquea taampina oshimpeguiricanaque shimpogui-ririri, irajaiquerouquea intajaiquero. iAviatimpajaquea caaviji irojocajiaquempiquea pinquitsaaiciaquempaca, caavijitari panajaiquerouqueate ovempenaquipae! Cotanquitsiquea aviatimpajia teequea paventamajatempariji, manaquea pishoshoventajiaca taaca opajitapae.

<sup>29</sup> Irootaquequea imaica nocantantajia-quempica: aatoquea pishoshoventajigaro-quea pishecajiaquempaca irooca pimirajia-queca.<sup>30</sup> Iriguentiquea quempejiguiroquea imaica irirajia teeca intsaroventajiguempariji, ishoshoventajiacaroquea taaca opajitapae, irootaquequea isavicaventajia-quequea iriatimpajia. Cotanquitsiquea aviatimpajia aatojate piquejiguirotsija imaica, choocatarite Piri inquitequitica. Iriatimpa itsaquequea maasanopae picoguitejacojicaca.<sup>31</sup> Aviatimpajimpani pinintamajajigue pimajirontamajatana-quempari Aapani Irioshi, ariquea iriatimpa irojocajiaquempiquea maasanopae picoguitejacojicaca.

**Pashintamajatapojaquempa  
inquitequitantanquitsica**  
(Mt. 6.19-21)

<sup>32</sup>“Aatotarite pitsaroajigui, novejajiate. Teequea pincaramirincajavetempaj, cotanquitsiquea Piri choocatatsica jenoqui inintacaajiaquempi pimajironta-

jiapojempari aisa impeacaavajempi majirontajatiatsica imajirontagueti iriatimpa.<sup>33</sup> Pojocantajiaqueroquea pashintaguecaca, paanquemparoqua imentaquipae, pojocajiaqueneriquea coguitejacojianquitsica. Pinquejeta-quempagueti ariquea irojocajiaquempi-quea Aapani Irioshi cameetsamajague-tanquitsica ontaniqui inquitequi, onquejевetaquempaquea pinteterigueti imentaquipae tsaratoqui aatoca oshitequirejitsi, aatotari oteroncatsi irojocajiaquempica ontaniqui inquitequi, aatoquea ichocatati aitsitan-tatsica, aisa aato ichocatati shecagueta-roca quitsaarentsi.<sup>34</sup> Aritarite taaca opajita pishineventamajataca manaquea pisaviventaguitironi piquenquejaguiti-roni.

**Agamajamajajiaquemparija Amajirote**

<sup>35-36</sup>“Aviatimpajia pinquempejiaquem-  
parija yashintajitaca yoguijajuijaitiri-  
gueti ashincarica yuguigueta irameneri  
manquigatanquitsineca. Inetsanatashiji-  
avacariequea incoraquetantajempaca,  
iquitsaaiciaca, itsivojiaqueriquea  
tsivorentsi yoguijajuijaiqueriquea  
incajemapojye intanarejacojaviaqueri-  
quea taampina.<sup>37</sup> Irishinejiaquempa-  
quea irirajia yashintajitacaca tinajajian-  
quitsica guijajiajavajirica ashincarica  
incoraquepojajegueti. Noncantamaja-  
quempiquea inquitsaatashipojajempari-  
queate iroguisavacijaipojaqueri  
shitaponcarontsiqui irojocajiaipojaque-  
neriquea isheca.<sup>38</sup> Incoraquevequempa-  
quea nianquiitequi irooca osavincagui-  
tetamanaquegueti cotanquitsiquea  
iramenajiajapajerigueti irashijia tinajaji-  
anatsi, irishinejiaquempaquea yashinta-  
jiacaca.<sup>39</sup> Intsija pinquenquejajiguero-  
jate, inchoocategueti itsipa choocatans-  
quitsineca itsoironaquite, intsateme-  
gueti querocaca incoraquetantaquem-

paca aitsitantatsica, ¿arimpate ari irimaaque? ¡Aatoquea! Manaquea intinajavenqueroquea irajaararo aatonijite iquijashitsijitiri iraitsijitaqueriquea.<sup>40</sup> Irootaquequea nocantantajia-quempica: pincoguitempanija pincomajamajajiaquempaja poguijajavajeri irira Irijanite Caquinte incoraquepojaje. Aatoguetiquea piquenquejamajajigu-rotsti inchiquojitaja icomirejajapijim-pitsija.”

**Yashintajitaca cameetsari aisa teeca  
incameetsateji**  
(Mt. 24.45-51)

<sup>41</sup> Icatsitanaca Peerero:

—Nomajirote, piquejetacaacarogueti imaina ¿ari aparo pitsatacaajiaquena naatimpajia? ¿Arica maasano caquintejia pitsatacaajiaqueri?

<sup>42</sup> Icanque Amajirote: “Imaicaquea iintsija pinquenquejajigueriquea yashintajicaca tsatatsica quemisantamajatirica ashincarica. Pameneja inchoocategueti ashincarica irashijia, iroompapea iroanaquequea osamani, incanque-riquea aparo yashincaca irinetsanague-tajeneriquea maasanopae irashijia, icancani irojocajiaqueneriquea ishecajia.

<sup>43</sup> Irishinevaequempaquea yashincaca incoraquepojegueti ashintarica arigueti iramenapojajeriquea inetsanamajaguetajiro icantanaquerica, arimpapea irishineventamajatanaquemparequa. <sup>44</sup> Arimajaquea incanqueri: ‘Imaica noninquequea pamenaguetaquenaro maasanopae nashincaca.’ <sup>45</sup> Cotanquitsiquea aatogueti yoguijiri ashincarica manaquea incanque: ‘Aatota icoraque-tsita’, ariquea imparianaquemparoqua

incatsimajiaqueriquea irashijia shiram-parijia irooca manquigarentsijia intavatavaitaqueriquea. Manaquea irisavicaventaguiteroni irishecaguitempani, irimiraguiteni, irishinquiguitempani.<sup>46</sup> Cotanquitsiquea taampina incoraquetapojaje ashincarica savinca-guiteriqui teeca intsateji, incomirejapo-jajempari incatsimacatsimavaequeriquea oshequi, intspatsipaitacaanquempari maasanojia teeca inquemisantajiguériji.

<sup>47</sup> “Iriraquea yashintajitaca tsatatsica inintacaavecarica ashincarica, cotanquitsiquea teequea inquemisanteriji, aisa teeca irinetsanatemppaji incoraquepojagegueti, intavatavaavaequeriquea oshequi.

<sup>48</sup> Cotanquitsiquea iriraquea yashintajitaca teeca intsateji inintavecaca ashincarica, impeacaaguevequemparo-quea teeca irininteji ashincarica, aatomajaca itavatavaajitiri, teetarite intsatenica. Quericacaquea itsatacaama-jaquiqueca, inintajitiroquea inquempeta-quempaquea iriatimpa inquempetaca-majaquemparoqua querocagueti icojitaquerini itsatacjajiquerigueti. Quericaca yojocamajajitica oshequi, inintajitiroquea irojocamajajitajeneriquea.

**Teequea irooqua incoraquetashiteji  
Jesoshi incantajiaqueri maasanojia  
inquemavacaajiaquempa**  
(Mt. 10.34-36)

<sup>49</sup> “Naatimpa nocoraquetaquequea cameetsanjite nontsitacopojaqueroniji paamari acaniqui quepatsiqui irooca iquejetacaaca incatsimatavacaquempagueti caquintejia. Irirajia teeca intsaroventajiaquemparineca. Oncoramatanpojegueti Aapani Irioshi incatsimamatentajiaqueri maasano teeca inquemisanteriji.

j 12.49 Icanquegueti Jesoshi *nontsitacopojaqueroniji paamari acaniqui quepatsiqui* irooca iquejetacaaca incatsimatavacaquempagueti caquintejia. Irirajia teeca intsaroventajiaquemparineca. Oncoramatanpojegueti Aapani Irioshi incatsimamatentajiaqueri maasano teeca inquemisanteriji.

quea. iNoshimampojancavaetanaca nocanca, irooshipoitari aapojaquempa!<sup>51</sup> ¿Pijiqueji irooqua nocoraquetashique noncanqueriquea maasano quepatsiquitica inquemavacaajiaquempa iraavacaajiaquempaquea? Teatarite irooqua noncoraquetashiteji, iroguentiquea nocoraquetashique ompampiatantanaquemparoca intsinampirejavacaajianaquempa, incatsimajitanaqueriquea tsaroventaquenaneca.<sup>52</sup> Jeroquea imaica inchoocajiaque caquintejia tsvironaquipi, incarajiaque apavacoro, cotanquitsi mavitetanquitsica incatsimajiaqueri itsipajia, ari intsinampirejavacaajianaquempa.<sup>53</sup> Iriraquea shirampari incatsimamaqueriquea irijanite, iriraquea irijanite incatsimamaqueriquea iriri. Oraquea imanquigare oncatsimamaqueroquea orijanite aisa ovataguero, oraquea orijanite oncatsimamaqueroquea iniro, ariquea onquempetaquempaquea ovataguero iroatimpa oncatsimamaqueroquea ovaguirote.”

**Teequea intsafigueroji  
yonigaimojiavecarica Aapani Irioshi  
(Mt. 16.1-4; Mr. 8.11-13)**

<sup>54</sup> Iroompaquea icantajiguiri maasano: “Oraqueate pamenajiguirogueti opoasecantiguetti mararo oraquea iquijiguetti catsirincaiteri picantajiaquequea: ‘Imaicaschia ontejapojenishiasci incani’, ariquea otejapojoqueate.<sup>k</sup> <sup>55</sup> Aisa ochovigaguitetiguetti oquenajencatapojoiguetti quirincaqui picantajiaque: ‘Imaicaschia oncatsirincaguitetanaquenishia’, ariquea ocatsirincaguitetanaque!<sup>l</sup> <sup>56</sup> iMana picameetsatamampeajiac

intati! Aviatimpajia pitsajiavecapamenaguitevetarogueti arica ontejaque arica aato, irooca aisa pitsajiavecarocquea querocaca oncameetsaguitetantanajempaca, cotanquitsiquea ¿quero ococani teeca pintsatantajiguempajiqueroca ococani yonigaimojiavequempiroquea Aapani Irioshi maasanopae pamenajiaqueca imaica?

**Pishinetacaajiajempariequea  
catsimajiaquempica  
(Mt. 5.25-26)**

<sup>57</sup> “¿Queroquea picojiacani aviatimpajia caarica pinintantajiga pintsajiguequea taaca opaji cameetsaguetanquitsica?<sup>58</sup> Incatsimataquempigueti pigonoro irinintavequempagueti iraanaquempiquea jivatatsicaqui irisantanatacotaacaanquempi, pinquenquetsatacaguetanaquerija quenavoquivrontsiqui pishinetacaajemparinijite aatonji yaguimpitsi. Ontaniqui iraanaquempigueti jivatatsicaqui iriotarite cajemaquerineca coreta. Iriraquea coreta manaquea iraapanajantempiquea irisantanatacotsitempi.<sup>59</sup> Noncanquempiquea, aatogueti povegararamajatajiri catsimataquempica maasanopae paacotaquerica aatotarite yoguipaquijajimpitsi santanatacotaquempica.”

**Icantajiaqueri Jesoshi aatogueti  
icantashitatiaga interoncajiaquempaquea**

**13** <sup>1</sup> Iroompaquea icoraquecoraqueipojiquea itsipapae icamantajapojiriquea Jesoshi icantajiguiri:  
—Iriraquea Pirato imetojacaantajiaqueriquea Garireaquitica ontaniqui

**k 12.54** Icantantacaroca iroorijite ontaniqui iguinteniqui ishiraerijia ochocoqueterate inirojani quentijani iquijiguetti catsirincaiteri, ontaniqui oquenantapojacaro mararo otejantapojacaca. **l 12.55** Ontaniqui Ishiraeriqui oraquea choviga quenajencapojiroca quirincaqueguetti catsirincajencavaeque irooriji oquitarampororoivaeque quirinca.

ijitorejajitinirigueti Aapani Irioshi viratsipae, ochovivincajatanaqueuea iriraja oconoajatanacaroquea iriraja ivirapae ijitorejajaqueua.

<sup>2</sup>Icantijigariquea Jesoshi:

—¿Ari pijiqueji caaviji yogaamajajia-  
caquea icovaeguismajaca iriatimpajia  
Garirequitica yanaajiaqueriquea  
igonorojia, jero iquempetacaajicariequa  
imaica? Teequea. <sup>3</sup>Naatimpa noncantajia-  
quempiquea aviatimpajia aisa:  
aatogueti pishimampojancaventajigarо  
pigovaeguisherre aisa aatogueti picanta-  
shitatijajaa, manaquea pinteroncrajia-  
quempa oncoramanitapojaquegueti,  
pinquempejiaquempariquea  
iriatimpajia. <sup>4</sup>Iroompaquea aisa  
piquemacojiaqueriquea Jerosarequitica  
osoveimojiacari imapiancote inirocho-  
viina coramani ontaniqui Shiroequi.  
Otsinacajiaqueriquea, imetojajiavaeque  
18. ¿Ari pijiqueji caaviji yanaajiaque  
icoguishejiaca iriatimpajia yanaajiaque-  
riquea igonoropae choocajitsica  
Jerosarequi? Teequeate. <sup>5</sup>Noncantajia-  
quempi aviatimpajia aisa: aatogueti  
picantashitatijajaa, pinteroncamaja-  
quempacea pinquempejiaquempari-  
quea iriatimpajia.

**Jesoshi iquempetacaajiacariquea teeca  
irinetsanamajaterojo icanqueua Aapani  
Irioshi**

<sup>6</sup>Iroompaquea iquempetacaajiacanari-  
quea Jesoshi icanque: “Ichocati aparo  
caquinte ivintyacaqueroquea aparo  
iguera iniganquitejirequi, ariquea  
yoapiniquequea iramenapiniquero  
choocatapojojica osovena, cotanquitsi-  
quea yoavetanacaquea teequea  
anejeroji. <sup>7</sup>Icantitariquea shiacotiroca:  
‘Iintsija pinquenquejeroja. Nocoraqueta-  
shitironiquea coramani, imaica ariquea  
omavitevaepoij aagantsini tequerata-  
queate onchoocateji osovena. Pincha-

quiteroshine, mana onchoocatashigui-  
tempani intati.’ <sup>8</sup>Cotanquitsiquea

iriatimpa icanqueriquea: ‘Iintsija  
ariotaqueta. Imaicaquea imaica  
nonqueecavanetashitajeroquea  
noaviotacotajeroita itigaqui viratsi.

<sup>9</sup>Iroompaquea ajagantsitapojaquegueti  
onchoocatajeguerti osovena, cameetsa-  
vaeque; aatogueti ochoocatitsi, ariquea  
pinchaquitsitemparoquea.”

**Jesoshi yovejairoquea mititsajancatsica  
savincaguiteriqui imagorejantajitaca**

<sup>10</sup>Iroompaquea aapojacagueti savinca-  
guiteri imagorejantajitaca itsatacaanta-  
vaetaqueuea Jesoshi shinagogaqui  
icapiocantapinijiacaca joriojia.

<sup>11</sup>Ariquea ochoocaque oraniqui aparo  
manquigarentsi ocantacoguitani  
omititsajancaguitini, aapojaca 18  
ajagantsini teequea ompejaempaji,  
irorijite ishaquiacaroqueate ampatsini  
imititsajancacaqueroquea, querocam-  
pate oncotajempani ontampaticatanta-  
najempacate. <sup>12</sup>Oraquea yamenaquero-  
gueti Jesoshi icajemaqueroquea  
icanquieroquea:

—Manquigarentsi, imaicaquea jac  
peajimpiquea.

<sup>13</sup>Ariquea ipamitsitavacaroquea,  
ariequa octanaja otampaticatanaji  
oquenquetsatanaque oshinevencariequa  
Aapani Irioshi.

<sup>14</sup>Cotanquitsiquea iriraquea jivatan-  
quitsica shinagogaqui, yamenaqueri-  
gueti Jesoshi yoveantajaroquea savinca-  
guiteriqui imagorejantajitaca, icatsima-  
tsitanaca, icantajiguiri omporoguijajian-  
quitsica:

—Ocaratiquea 6 savincaguiteri  
irrantajitempacate, irooqueate pincora-  
quetantapinijiacaquempaca cameetsanijite  
irovejajajempinijite. Aatoquea irooquea  
picoraquetantajiga savincaguiteri  
imagorejantajitaca.

<sup>15</sup>Icantitanacaquea Amajirote, icantiri:  
—Cameetsatamampeajitsica,

piquempetaquea aviatimpajia, aapojajagueti savincaguiteri imagorejantajitaca pishiticarejacojiguiri pigaapironcaarite aisa paashinote, paajianaqueriquea pojocajiaqueneri oja, imirajiacaquea.

<sup>16</sup>Iroompaqueate ocatica manquigarentsi ichoviquitanaquea Averaame yagavejaqueroquea Satanashi arejevaeca 18 ajagantsini, quejetacaquea yoishotacotaquero, ɿarimpate tee oncameetsateji iroshorejacotantajitemparo savincaguiteri imagorejantajitaca?

<sup>17</sup>Iquejetacaacarogueti Jesoshi imaica, ipashiventajianaca maasano catsimajavectarica. Cotanquitsiquea itsipajia caquinte ishinejianaca oshequi yamenajiaquerigueti Jesoshi ipeacaaguecaca oacaantantatsica intati.

**Jesoshi iquempetacaacaroquea oitsoqui moshitaasa**

(Mt. 13.31-34; Mr. 4.30-32)

<sup>18</sup>Iroompaquea icanque Jesoshi: “¿Imaicaquea taaca opaji quempetaca imajirontagueti Aapani Irioshi? ¿Querocaca nonquempetacaquemparoqua?”  
<sup>19</sup>Iroguenti nonquempetacaquemparoqua oitsoqui moshitaasa ivintyacajitirogueti niganquitejiqui, chaajaniqui onavetaca, cotanquitsiquea otsoroanaqueua agashimpajanacaquea otsegotsegoatanacaquea oquempetanajaroqueate inchato, ichoocatantajiacarоquea tsimeripae.”

**Jesoshi iquempetacaacaroquea anempoacaguiroca pan**

(Mt. 13.33)

<sup>20</sup>Iroompaquea icanque aisa: “¿Querocaca nonquempetacaquemparoqua

imajirontagueti Aapani Irioshi?

<sup>21</sup>Ariquea nonquempetacaquemparoqua anempoacaguiroca pan. Pamenirotarite manquigarentsi ompeacaguemparogueti pan, aaquequea apamontiinaro tirigovane, ariquea onconoanquemparo anempoacaguiroca, ariquea oncotanaquempa anempoacaanaquero maasanose.”<sup>m</sup>

**Sotomorontsi chaamorjaniquitatsica**  
(Mt. 7.13-14, 21-23)

<sup>22</sup>Iroompaquea arimpaquea yoanaquea Jesoshi Jerosarequi, iquenavaetanaqueuea ichoocajiguigueti caquintejia, itsatacaajianaqueriquea.

<sup>23</sup>Chooca aparo icoacotaqueriquea, icanqueri:

—Nomajirote, ɿteequea iroshequigueji meshijianquitsineca?

Iroompaquea iquempetacaacaroquea Jesoshi querocaca ancojiaquempani oahoaitantanaquempaca ichoocatigueti Aapani Irioshi, icantajiaqueriquea:

<sup>24</sup>—Pimpanquenaguitemparoniquea pinquijaquijaitantanaquemparoniji sotomorontsi chaamorjaniquitatsica. Noncantamajaquempiquea inchoocajavemuquepaquea oshequini nintajavetanquitsineca inquijaquijaitantanaquemparo, cotanquitsiquea aatoquea yagavejajiga iquijaquijaitiquea. <sup>25</sup>Oncoramanitapojajegueti incatianaquequeate ashincaroca itsovironaqueite irashiteroquea sotomorontsi. Aviatimpajia teeca pinquijaquijateji pincatintijiaque sotsiqui pintinquiitavetemparoqua ashitacorontsi pincajemajavetanaquempaquea: ‘Nomajirotee, pintanarejacojiguenatsjia.’ Cotanquitsiquea iriatimpa incantsijiguempi: ‘¿Querompate piquenajapojimi aviatimpajia? Teequea nontsajiguempi.’ <sup>26</sup>Pincantsijavetanaquempaquea:

**m 13.21** *anempoacaanaquero maasanose*. Arikea iquejejiaca majirontajiacarica Aapani Irioshi, yoshequianaqueuea querocagueti quepatsiqui.

'Noconoajiguimpi ashecajiacagueti aisa amirajiacagueti, aisa aviatimpa pitsatacana-tavaeque quenavo quirontsiqui nogunteniqui nocaramirincavaequegueti.'<sup>27</sup> Cotanquitsi-quea iriatimpa arimpaquea incantajiana-quempiquea: 'Teequea nontsajiguempiji. Tee nontsateji quero píquenapojini. Poapoaitana-quea osamani maasano aviatimpajia antagushejiguiroca covaeguisherentsi.'

<sup>28</sup> Ariquea piraajianaquempaquea pantsicajiaqueroqueate pají pamena jiaquerigueti Averaameni, Ishaconi, Jacovoni aisa itsipapae tsavetantajiatsica iconoajia pojacari-queate Aapani Irioshi ontaniqui imajironta-gueti, aviatimpajia manaquea impishoncrajia-quempiquea osamani.<sup>29</sup> Incora quecoraquejiaque inquena quenaivaepojaque quea jmm osamani oshequini otsipapa equi quepatsi irishinemajajiaquempaquea inconoajiaquem-pariquea Aapani Irioshi irisaviciajiaque irishecajiaquempa. Inquena quenaivaepoja-queuea isotoguigueti catsirincaiteri, itsipapae inquena quenaivaepojaque quea iquijigueti catsirincaiteri, itsipapae quirinca, itsipapae inquena quenaivaepojaque quea catonco.<sup>30</sup> Irirajia teeca irana antima jigueji imaica acaniqui quepatsi qui, inconoagaran-quempaquea irana ampojaque. Irirajia ana antajianquitsica imaica inconoagaran-quempaquea aatoquea yana anti maja jai, maasano quea irana aja queriquea.

#### Jesoshi iraaco jiaqueriquea Jerosarequitica (Mt. 23.37-39)

<sup>31</sup> Iroompaktea incajaranquiguitetana-quitigu icorae quecoraqueipojiquea pariseo jia icantajia poja queri Jesoshi:  
—Poanaquesha otsipaqui quepatsi, ininquetari Erorishi<sup>n</sup> irimeto jacaantempi.

<sup>32</sup> Cotanquitsiquea iriatimpa icantajia-gui ri:

—Poapoaitanajiquea pincamantajia poja- jerija irinta amatavijantatsica, pincanqueri: 'lntsija pameneja, imaica quea imaica choocatirajana nonigaaquempariquea ampatsinipae aisa nogueshiguetajeri ashinoncajaguetatsica. Arikea nonquem-petaquempariquea osaitequera, aisa otsipa savincaguiteri, teetarite oshequiva aeteji savincaguiteri nonteroncaguetanajero quea nocora queta shita queca.'<sup>33</sup> Cotanquitsiquea imaica arimpaqueate antanatsina queate, nonquejetaca jemparo queate aisa osaitequera, otsipavepojaquempariquea osaitequera nonquejetacaitajemparo quea aisa. Irootari Jerosarequi imeto janta jicari oshequ i tsavetantajia queroca icanquerica Aapani Irioshi. ¿Arimate irimeto javaete otsipaqui?

<sup>34</sup> 'iJerosarequitica, Jerosarequitica, pimeto jajiguiriquea tsavetantajiatsica, aisa pitsinatsinavaeta queriquea itigar anquimo-jia queempica Aapani Irioshi intsavetanti-mo jia quempiro Iguenquetsatsare! Pamena-jiguiro quea chaapa osaavantajiguirigueti irijanjiate, nonintaguevetaca quea naati mpa nonquempetaca jia quempime-quea maasano aviatimpajia non capio caja-jempime queate pintaro ventaja quena, cotanquitsiquea aviatimpajia tee quea pin intajigui jeji.<sup>35</sup> Imaica quea imaica aatoquea ichoocatimojiajimpi Aapani Irioshi, aparo quea pinchoocajaje. Non can-tajia quempiquea imaica aatoquea pamena-jia jana arejeva etapojaquempariquea aapojajempagueti pincantajiana queta quea: 'ilntsishati si irishine ventajiquempari iri ratica cora que tapo jatsica itigaranca-queca Majirontamajatatsica!' "

#### Jesoshi ipeajiri quea eere heere atatsica

**14** <sup>1</sup>Iroompaktea aapojacagueti savincaguiteri imagorejantaji-

<sup>n</sup> 13.31 Iriratica Erorishi irio icantajitica Erorishi Antipashi; pamenero tioncanquitsica isavivana qui otsapaqui 3.1.

taca yoanaquequea Jesoshi ishecatacacea itsovironaquequi pariseo anaantatsica. Itsipajia pariseojia yamenamajaqueriquea querocaca incoquempani. <sup>2</sup>Ariquea ichoocaque oraniqui iriatimpakui aparo eereheeratatsica. <sup>3</sup>Iroompaquea icantanaque Jesoshi icoacojiaqueriquea tsatacaantajiguiroca itioncacotanaquea Moishishini aisa pariseojia, icantajigui:

—¿Cameetsataque ampeantajempari joquijitatsica savincaguiteriqui imagorejantajitaca, arica teeca oncameetsateji?

<sup>4</sup>Cotanquitsiquea iriatimpajia imajerejianaquequea. Iroompaquea Jesoshi yajiricapojaqueri eereheeratatsica yoveajiriquea, icanqueri iroanaje.

<sup>5</sup>Iroompaquea icantsijigariquea aisa pariseojia:

—¿Arimpaquea aviatimpajia, intanquirejegueti omoroqui pirianite irioca pigaapironcarite savincaguiteriqui imagorejantajitaca, arimpa aato paajajatiri? ¿Arimpate ari pogujajaquequea anaanajempata imagorejantajitaca ariquea paajajateriqueate?

<sup>6</sup>Manaquea imajerejianaquequea, teequea intserarejimajigueji capichaji.

### Iroguipashiventajiqueriquea aventacovaetatsica

<sup>7</sup>Iroompaquea iriraquea Jesoshi yamenajiaqueriquea maasano icajemajiquequa irishecajiaquempa iroguenti inintamajajaquequea irisavisaviatopajaque quempeji irisenampijapojaquempari cajemajiaquerica, irishineventamajajitaquempariniji iranaampojaqueniji. Arikea itsatacayaqueriquea icantajigui:

<sup>8</sup>—Incajemaquempigueti iriaqueraca manquigatanquitsica pishecatimoquemparigueti irishinevenquemparogueti imanquigatantacaca, aatoquea

pisavicampojacaro irisavicanpojaquempaca anaantatsica. Aricagueti incoraquepojaque itsipapae anaquempica, <sup>9</sup>iroompa iriraquea cajemajiaquempica incoraquepojaqueguedeti incanquempiquea: ‘Iintsija tijaitatsija iricatica.’ Arikea ovashiventajanaquempiquea, iroompa pintsenterejapanajante pisavicampojajemparoquea isavicanpinitaca teeca iranaanteji.

<sup>10</sup>Arigueti incajemaquempi, iroguentiquea pisavicampojempa itiinatapinitagueti teeca iranaanteji, cameetsanijite inquijapojetegueti cajemaquempica iramenapojempiquea incantapojempinjite: ‘Notsipavijitaca, caacateja acanqui pisavicampojemparoquea itiinatanta-jiaca anaantatsica.’ Iroompaquea inquemajiaqueguedeti tsipatsipaitaquempica shitaponcarontsiqui intsajianaquequea aviguenti ishineventamajataca cajemaquempica. <sup>11</sup>Iriraquea aventacotatsineca iroguipashiventajiqueriquea. Iriraquea teeca iraventacotempajirianaacaajitaqueriquea.

<sup>12</sup>Arikea iquenquetsataji Jesoshi, icanqueriquea cajemaquerica:

—Pintiacaantegueti pisheca pincajeman tegueti aatoquea iriguenti pincajemanpinique pitsipavijitaca, irioca piguentijeguijate, irioca pijiguetic, irioca ajaarantatsica choocajianquitsica quempeji pitsovironaquequi. Arigueti pincajemaquiaqueri iriatimpajia, inquejetacaajempi incajemajajempiquea aviatimpa pishecatimotajatempariequea iriatimpia. <sup>13</sup>Iriompate pincajemaquiaquea teeca irashintempaj, iriojiaca chompegujiri, iriguentijiaca teeca iranijimajateji, iriguentijiaca aisa shamoncrajari.

<sup>14</sup>Arikea pishinemajatanaquempaquea oavaetanaque, aatotarite yagavejajiguea inquejetacaajajempiquea iriatimpajia, cotanquitsiquea oncoramanitapojaqueguedeti inquejetacaajajempipi-

quea Aapani Irioshi intancoretancoreitanajegueti irirajia iramenajiaqueca quempeca teeca incovaeguishetimatem-paji.

**Jesoshi iquejetacaajari  
cajemantavetatsica  
irishecatacaajiaquemparime  
(Mt. 22.1-10)**

<sup>15</sup>Chooca aparo savicanquitsica shitaponcarontsiqui irooqua iquema-querigueti Jesoshi icantaquegueti icantsitanaca:

—Irishinevaetanaquempaquea irirajia shecajianquitsineca ontaniqui imajiron-tagueti Aapani Irioshi.

<sup>16</sup>Ariquea icantanaque Jesoshi, iquejetacaajiacanari, icanque:

—Ichooque shirampari ininque incajemantaque, iroompaquea icamantaacaantajaqueri maasano incajemae-riquia irishecatimojiaquitempari incaramirincavaequequea jmm.

<sup>17</sup>Coajica itiacaanquequeate taaca opajitapae isheca, iroompaquea oposatanaquegueti itigarancanquitsitari-quea yashincaca irishashiguequieri-quea incanqueri: ‘Caacateshiatsi, netsanaguetaquea maasano.’ <sup>18</sup>Cotan-quitsiquea maasanoquea icantacantaita-naque: ‘Aato nagaveji noguitsi.’ Aparo icanque: ‘Iroaquerasano narejetapoja novegaraquitiroquea quepatsi, noanaquequea namenajatero. Pincavintsajacotena, aato picantana.’ <sup>19</sup>Itsipa-queate cantananquitsi: ‘Iroaquerasano narejetapoja novegaraquitiroquea 10 caapironcaari, noanaquequea namenaja-teri nontsatimenqueniji arimajaca yagavejajiaque inquitencavatsataque. Pincavintsajacotena, aato picantana.’

<sup>20</sup>Iriraquea itsipa icanque: ‘Iroaqueras-notarite nomanquigacaro manquigarentsi, aato nagaveji noguitsi.’

<sup>21</sup>“Arikea icoraquetaji yashintajitaca icamantapoajiriquea ashincarica. Icatsimatsitanaca iriatimpa icanque: ‘Iroosacanica poanaquequeate ontaniqui ocapiocaguecagueti tsovironaqui, pintsitacavaetanaqueroquea maasanopae quenavoquirontspaequi, pintsipatsipaiquempariquea teeca irashintajiguempa, iriguentijiaca chompeguijiri, iriguentijiaca teeca iranijimajateji, irioca aisa shamonca-jari, incoraquecoraqueique irishecataco-jiaquenaquea.’

<sup>22</sup>“Osamaniguitevaepojigueti icoraquetaji yashincaca icantapojiri-quea: ‘Jac naajiaquitrriquea, cotanqui-tsiquea tequerataquea intsitacajiguem-paroji shitaponcarontsiqui.’ <sup>23</sup>Icantanaque ashincarica: ‘Iroosacanica pijateja poanaje irooqua pishivoquitantagueta-naquemparoqua quenavoquirontspaequi tequerataca poantemparoji pamenantaguetapanajantemparija maasano choocajianquitsica oraniqui, pintsipatsipaitanaquemparija incanta-vetanaquetaquea tirorere notsoviro-naquitequi. <sup>24</sup>Noncamanquempiquea, irirajia iriquetica nocajemacaantagueve-tacaca aatoja ishecatimataro ocatica nonetsanavetacanarica.’”

**Quericaca aatoca yatsipeventari Jesoshi  
aato ipeguiritsi itsatacaane  
(Mt. 10.37-38)**

<sup>25</sup>Iroompaquea ishivoquitancarоquea Jesoshi quenavoquirontsi itacororoaven-tajianacari caquinteja. Iroompaquea ipitsocashijianacariquea icantajiguiri:

• **14.16** Jesoshi icamantacoqueri Aapani Irioshi iriquetimajaquea icavintsajamajaveca joriojia itigarancumovcariquea Irianite, cotanquitsiquea teequea irishineventajiaquempariji iriatimpajia, irioqua ipitsocashijianaca teeca iriorioteji, icavintsajamajatsitariquea.

<sup>26</sup>“Taacagueti nintanquitsineca impeamajataquempa notsatacaamajare, incantacoguitempaniquea imprintsamajataquena anaimentanaqueroniji ipintsajigarigueti irijanintajigarica, irooca imanquigare, irijanijiate, irorijanijiate, iriooca iriguentijeguitepae, irooca itsijoitepae. Arikea onquempetaquempa aisa anaaqueroniji ipintsatagueti iriatimpa. Oraqueate aatogueti iquempetacagaro imaica, aatotarite yagavejitsi impeaquempaquea notsatacaane. <sup>27</sup>Arikea iquejetacaquea aisa quericaca teeca irininteji irinatanontanaquempa ivoatsite irompajacotantajitajemparica irantsipeventavaetenairoguijatacotantanaquenaca, aatoquea yagavejitsi impeamajataquempa notsatacaane.

<sup>28</sup>“Taacagueti nintanquitsineca impeacaquaemparoqua mapipanco inirochoviina, iroquetitaquea inquenquejamajaquero quero incaraquisequiqueni imentaquitsite intsitacanquemparoniji. <sup>29</sup>Oraquea aatogueti iroquetitaquea iquenquejirotsi managueti impeacaashiquemparoqua intati, niganquiquea interoncacopojempaquea, aato itsitaquirotsi, arica irishirontimtentajiquempari iramenitsijiquerigueti manaquea capichajaniqui yogatiaguetaqueroquea. <sup>30</sup>Incantajigue: ‘Iriatimpa ipeacaaguevecaroquea, teequea iragavejeroji interonqueroji.’

<sup>31</sup>“Arigueti inchoocaeque majirontatsica ashintanquitsica 10,000 coareta iroaroitanaquequea irashimirintavacaguempaquea itsipa majirontatsicaqui ashintanquitsica 20,000 igoarete, carimpate aatoquea iroquetitaquea iquenqueji arica iragavejajiqueriquea, arica aatoca yagavejajitiri? Inquenquejanaquequea. <sup>32</sup>Arikea iramenanaquegueti aatoquea yagavejiritsi, intigaranquitsitempariquea cantajajerineca,

intonquivojajiavaquempariquea caavijica yanaajiaqueri, iramenajiaqueriquea arica iragavejajiaqueri irivetsi-nantajavajeri. <sup>33</sup>Arimpaqueate oquejetacaquea imaica quericagueti teeca irininteji irovashiantaguetanaque-roquea maasanopae yashincaca, aatoquea ipeamajataquea notsatacaane.

**Queroquea incojiqueroni incachoanepane  
incachoanetantajitajemparoqua**  
(Mt. 5.13; Mr. 9.50)

<sup>34</sup>“Oraquea incachoanepane cameetsavaeque, cotanquitsiquea ariguetija omasancategueti, ¿querocampate incojitareroni incachoanetantajitajemparo? <sup>35</sup>Teequea oncameetsateji onconoquemparoqueti quepatsi, aisa teequea oncameetsateji pinconoanquemparoqueti camishitequi poaviontataquemparoqua panquirentsi. Manaquea impishoncajitaqueroquea intati. Choocagueti piguempita pinquemantavaquempaca, pinquemeja.”

**Oveja peavetanquitsica**  
(Mt. 18.12-14)

**15** <sup>1</sup>Iroompaquea icoraquecoraque-tashijiaqueriquea Jesoshi maasano capiocapinijiguinirica majiron-tatsica imentaquipae aisa itsipajia covaeguishejatsica, iroguentiquea icoraquecoraque tashijiaque inquemisan-tajiaqueriquea. <sup>2</sup>Iroompaquea yamenajiaquerigueti pariseojia aisa tsatacan-tajiguiroca itioncacotanaqueca Moishishini, ariquea iquenquetsataco-guishejiaqueri Jesoshi, icantajigui: —Iintsja pameneri. ¿Quericaquea icocani irintatica iconoconoipojacari-quea covaeguishejatsica ishecatacojia-pojacari?

<sup>3</sup>Iroompaquea icantanaquea Jesoshi iquempetacaaca icanque: <sup>4</sup>“Pameneja aviatimpajia, pashinquempagueti 100

oveja paajianaqueriquea oraniqui cataromashiqui irishecajiaquempaquea, ariquea impeaquepagueti aparo, ɿarimpate aatoquea pitsinampirejajianaqueri igonorojia, poanaquequeate pamenuquetajateriquea, pincantacoguitempani paantajatemparicajate?

<sup>5</sup>Arigueti paajaterigueti pantsomajajeri paanajeri pishinevaetanajempaquea oshequi. <sup>6</sup>Iroompaquea parejetapojem-pagueti pitsovironaquitequi pincajemaji-apojajeriquea pitsipavijijiaca iroica irooshitacoguetaquempica pincantajiaqueriquea: ‘Jaameja ashinejiaquempaquea, naajatiritarite novejate peavetanquitsica.’ <sup>7</sup>Imaicaquea noncantajia-quempi ariquea inquejetempaquea inchoocategueti aparo covaeguishetanquitsica irovashianterogueti ipeacaaguisherecaca covaeguisherentsi ariquea incantashitatanajempaquea, irishine-ventamajajitanaquempariqueate oshequi ontaniqui jenoqui inquitequi, anaavaetanaqueroquea ishineventajacarigueti 99 comajamajajianquitsica teeca incoguitejacojajempaji incantashitati-jaguempaji.

### Imentaqui peavetanquitsica

<sup>8</sup>“Nonquempetacaajiaquempiro otsipa. Iroguentica ashinqueempaquea aparo manquigarentsi 10 omentaquisite<sup>p</sup> vegaravaetatsica, ariquea impeaque- pagueti aparoshimentaqui ɿarimpate aatompate otsivotiquea tsivorentsí ompishitacotsitajempariequeate oncoamajatajeriquea aajerinijite? <sup>9</sup>Arigueti aajerigueti, oncajemaquiaquerqueate otsipavijijiaca irosati irooshitacoguetanquitsica oncantajigueroquea:

‘Jaameja ashinejiguempa, naajiriqueate nomentaquisite peavetanquitsica.’

<sup>10</sup>Imaicaquea noncantajiaquempiquea ariquea iquejejiacaquea irashivantijitete Aapani Irioshi ishinejiaca oshequi yamenajiguiguetai icantashitatiwijaiaca aparo covaeguishetatsica.”

### Peavetanquitsica

<sup>11</sup>Iroompaquea icanquequea Jesoshi aisa: “Ichooocatiquea aparo shirampari, chooca irijanite mavite. <sup>12</sup>Iroompaquea iriraquea ichoviqui icanqueriquea iriri: ‘Aapani, iintsijate pojoquenarajate imaica maasanopae nashinquempaca naatimpa oncoramanitapojaquegueti pimetojanajegueti.’ Iriraquea iriri yojocajiaqueneriquea mavite maasanopae otampaticaguequerica.

<sup>13</sup>“Iroompaquea oquempejipojajigueti savincaguiteri iriraquea ichoviqui yaaguetanaqueriquea maasanopae imentaquisite, yoavaetanaquequea osamani ontaniqui otsipaqui quepatsiqui, ariquea oraniqui ipeacaaguishetapojacaroquea taaca opajitapae, ipomatsaqueriquea imentaquisite, iteroncamajajiqueriquea oraniqui, cajaraguitenisano yoqueri. <sup>14</sup>Ocoajica guitevaetanaquegueti iteroncamajajiquerigueti maasano imentaquisite, oteronquitsitanacaquea isheca otsitacajitejanacaroquea oraniqui, querocampaquea irajaeroquea irishecatajempaca, yatsipevaaecaroshia itase. <sup>15</sup>Coajica yoanaquequea yamanapojiri guinentaroca ocaniqui iramipojeriquea iraque-nijite imentaquisite. Iriatimpa itigarancqueriquea inquempoguijauqueneri ichanchotepae.” <sup>16</sup>Ariqueate itaseague-

<sup>p</sup> 15.8 omentaquisite. Iriratica imentaqui ipajita *dracma* (ancanque aatimpa “iraquima”). Iramijiquerigueti itsipa apajencaro savincaguiteri irivegaraqueneri apashimentaquito iraquima. Irira iraquima iriguenti imentaquisite guiriego. Iquejevecariquea itsipa imentaqui icantajitica tenario irashi Iromaqutica. <sup>q</sup> 15.15 Irira *chancho* iriguenti viratsi quejevetarica santaviri.

tapoji icanca iroovetanacaquea irishecatanaquempamequea osagoma yojocajitirica chancho inquemanaquempanjiteenica onchoocatimiteji irojoquimajiterijeri irishecaquempaca.

<sup>17</sup>“Iroompaquea iquenquejitsitanacaroquea icanque: ‘Iriraquea amitirica aapani ishecajiaca icanca, iquemajinaca teequea interoncamajigueroji. Naatimpa acaniqui imaicashia aanaquena notase. <sup>18</sup>Iintsija noanajequeate aapaniqui noncampojajeriquea: Aapanii, yamenaquea Aapani Irioshi inquitequitica nopeacaaguisevaecaquea covaeguisherentsi, aisa aviatimpa noguipashivenquempiquea, noteroncamajatanaqueriquea maasanopae pojocaguevequenaca, nopolomatsaqueriquea. <sup>19</sup>Imaicaquea ooquea aatocaqueate picantajana irijani, manaqueate pinquempetacaajena amitimpica.’

<sup>20</sup>“Iroompaquea yoanajiquea yarejevaepoja itsovironaquitequi iriri. Irooqueate yamenacotsitavajarigueti icoraquepojajigueti ipintsatacotanacariquea oshequi, ishiashitanacariquea itonquivojavacari, yaavajiriquea yavitsanoitavajiri inintavorotavajiri.” <sup>21</sup>Iroompaquea icantanaquequea iriatimpa: ‘Aapanii, yamenaquea Aapani Irioshi inquitequitica nopeacaaguisevaecaqueate covaeguisherentsi, aisa aviatimpa noguipashivenquempiquea, noteroncamajatanaqueriquea maasanopae pojocaguevequenaca, nopolomatsaqueriquea. Imaicaquea ooqueate aatocaquea picantajana irijani.’ <sup>22</sup>Cotanquitsiquea iriri icantajiguiri irashijia: ‘Poapaitanaquequea paaquite quitsaarentsi caavijica anaaque ocameetsamajataquequea, pinquitsaajia-

queri, aisa pasatecaqueneri maachapauqurientsi ichapaquiqui, aisa pincavigui-tijiaqueriquea. <sup>23</sup>Paajiaquiteja caapironcaari irijanigantirenajaniqui quejitan-quitsica, pijitorejitempariquea. iJaame ashecajiaquempaquea ashinejiaquempaquea! <sup>24</sup>Coraquetajitarite irijani, iroquerasanoquea namenajiri arimegueti irimetujaquemegueti. Ipeamajavetacatarite, imaicaquea imaica amenajajiriquea.’ Iroompaquea ishecajiaquea ishinemajajicaquea.

<sup>25</sup>“Iriraquea iriquetica ariguenti ichoocaque niganquitejiqui. Iroompaquea icoraquevetapojaca iquemajiajipajiri soncajatsica yoshequiavaeque, aisa itsamarojaque. <sup>26</sup>Iroompaquea icajemaquequea aparo yashincaca icoacojaqueriquea icanqueri: ‘¿Taaquea opaji oraniqui?’ <sup>27</sup>Iriatimpa icanqueriquea: ‘Iroguenti icoraquetajiquea piguentijeguite. Imaicaquea ijitorejacaanqueriquea piri irijanigantirenajaniqui caapironcaari quejitanquitsica, cameetsatari yarejetaja.’

<sup>28</sup>“Arikea icotanaca icatsimatanaquequea iriatimpa, teequea irininteji inuijete tsvironaqui. Iroquea iquemacoquerigueti iriri, isotoanaquequea yoanaque inquenquetsatacaqueriquea inuijapogenijite. <sup>29</sup>Cotanquitsiquea iriatimpa ari icanqueriquea: ‘Pameneja, pitsataquequea aviatimpa naatimpa nocantacoguitaniqueate namiguitimpiniquea, teequeate nomperatimotempiji, teequea ari pojoquimatenaji aparo caavera irijanjaniqui noncajemiaquerimequea notsipavijijiaca noshecatacaajiaquempame. <sup>30</sup>Cotanquitsiquea imaicaquea icoraquetajigueti pirijanite teronquitanaquempirica pimentaqui site ipomatsatacaantacaro-

r 15.20 *inintavorotavajiri*. Yamejiaca joriojia coramani inintavorotavacaajiajivaca yamenavacaajiacaguetai.

quea manquigarentsijia cantatsatanta-guetatsica, paitsitanacaquea pijitoreja-caantsitariquea irijanigantirenajaniqui caapironcaari quejitanquitsica.'

<sup>31</sup>'Icantitanacariequa iriri: 'Irjani, aviatimpa ariquetae pichoocaque naatimpaqui. Maasanopae nashintaguecaca iroguenti pashi aviatimpa aisa.  
<sup>32</sup>Cotanquitsiquea imaica cameetsavaeque ashecajiaquempaquea ashinejiaquempaquea, coraquetajitarite piguentijeguite, iroaqueraqueate nojiqueji ariquetae metojaque, ipeamajavecaquea, imaicaquea imaica coraquetajiamenajajiri.'

#### Amatavijirica jivatatsica

**16** <sup>1</sup>Iroompaquea Jesoshi icantajiguiri aisa itsatacaanejia: 'Ichoo-cale aparo ajaarantatsica, chooca itigaranguica amenaguetinirica maasanopae yashintaguecaca. Iroompaquea icamantajiqueriquea ipomatsague-taqueroqueate yashintaguecaca, opeagueta. <sup>2</sup>Iroompaquea icajemaque-riquea icanqueriquea: '¿Arimajaca pipomatsatsiguequenaro? Iintsijate pojoquenarojate pivaperipanate pitioncacoguequerogueti maasanopae, namenerota queroquea picoqueroni, aatotarite pamitacotajanaqueate.'  
<sup>3</sup>Ariquea iquenquejanaque itigaran-quica: '¿Querocaquea noncoquempani imaica? Aatotarite namitacotajiriqueate, ¿quericaquea namitacogajoitajeca? Teetarite nontampishiteji, ¿queroquea noncoquempani noshiacoquegueti? Nopashivencaquea namanapiniquerogueti itsipapae irojocashitapiniquena intati.' <sup>4</sup>Iroompaquea incajaranquini-quea icanque: 'Imaicaquea notsaque-quea querocaca noncoquempani

cameetsanjite inchoocaquenijite aavajenanea jocaquenaneca nosheca coajica intigarancaquenagueti jivatanaca.' <sup>5</sup>Arikea yoanaque icajemajiaqueriquea aacoquerica jivatirica, aparopaetaquea icajemaque. Iriraquea iriquetica icajemaquea icanqueriquea: '¿Querocaca icarashequiguini paacoqueri jivatanaca?' <sup>6</sup>Yacanaqueriquea iriatimpa, icanque: 'Iroguenti naacoquequea ashiti icaratacovaeque 100 chomoqui.' Iroompaquea icanqueriquea: 'Jero ocatica pivaperipanate pitioncacotancarica coramanitica paacoquerigueti. Imaica iintsija caacate-quetirote taampina pitioncajeroquea acanqui pincantashitatiajemparoquea ariguentiquea incarataje pojocaje 50.'  
<sup>7</sup>Iroompaquea icajemitsitaquea itsipa iquempetaqueriquea iriatimpa icanqueriquea: '¿Querocaquea ocarashequiavae-veni paacoquerigueti jivatanaca?' Iriatimpa icanque: 'Iroguenti naacoque tirigoitsoqui ocaratacovaeque 1,000 inirojeguiqui cantiriqui.' <sup>8</sup>Arikea icanqueriquea: 'Jero ocatica pivaperipanate pitioncacotancaroca coramanitica paacoquerigueti. Imaica iintsijate caacatejate pitioncajeroquea ocatica pincantashitatiajemparoquea oncarata-najequea pojocajeca 800.'

<sup>8</sup>'Iroompaquea iriraquea jivatirica itsaquegueti iquejetaquerogueti imaica, yamenanaquequeate intati, icanque: 'Caaviji itsaveca iriraquea amatavijitanquitsica.' Irirajia quepatsiquitica choocajianquitsica imaica itsamajavecaquea querocaca incobiaquerini igonororjia cameetsanjite iragavejacojiaqueronijite taaca inintajiaqueca, yanaajiaqueriquea tsirencacoshirentajianquitsica, teemajaca intsamajajigue-

<sup>s</sup> 16.7 ocaratacovaeque 1,000 inirojeguiqui cantiriqui. Iguenquetsatsarequi guiriego icanque 100 korous, iroguenti ocarataquea arica 35,000 ritorio.

roji. <sup>9</sup>Cotanquitsiquea imaica naatimpa noncantajiaquempi: inchoocajaquegueti pashintaguecaca acaniqui ichoocajiguetai covaeguishejiatsica pincavintsaja- jiaqueriquea coguitejacojianquitsica cameetsanijite inquempetacaajiaquem- pinijite, ariguentiquea pimetojajiana- quegueti povashiantaguetanaqueroquea maasanopae pashijia irajaiavajempini- jite iriatimpajia ontaniqui jenoqui tsovironaquiqui aatoca oteronquimataja.

<sup>10</sup>Quericaca quempoguojamajaquero- neca irojocajitenerigueti capichaji, inquejetacaavajemparoqua aisa irojocajiquenerigueti oshequi, inquempoguojamajatavaqueroquea irinetsana- majaquero inintacaajitaquerica.

Iriraquea aatoca iquempoguojamajatiro irojocajivequenemparigueti capichaji irooca iraitsigetavaqueri capichaji, inquejetaqueampaquea aisa irinintajive- tempagueti inquempoguijaqueneri oshequi, aato iquempoguojamajatirotsi irooca iraitsigetavaqueri. <sup>11</sup>Cotanquitsiquea aatogueti piquempoguojamajati- rotsi ajaararontsi choocaguetatsica acaniqui quepatsiqui, ḥarimpa irojocajitaquempiroquea iroomajaca caavijica anaquero? <sup>12</sup>Ariquea oquempetaca- quea aatogueti piquempoguojamajatsitiri yashintaguetacaca itsipa, irooca paitsigetavaqueri, ḥtaashia jocajempi- rone pashinquempameca aviatimpia?

<sup>13</sup>“Tee inchoocateji agavejanquitsineca irantavaetaqueneri mavite ashintaque- mpara. Manaquea irisemaneguintaque- paro, iriraquea itsipa impintsataquempari, irooca inquemisantamajataqueri aparo, itsipaquea intsojencaneguintaqueri. Aato pagaveji pantaqueneri Aapani Irioshi inintaguettica, iroogueti pisavicaventaque pajaarantavaequempa quejetaca irooqua ashintaqueMPI ajaararontsi.”

<sup>14</sup>Iroompaquea irirajia pariseojia choocajianquitsica oraniqui irooqua

iquemajiaquerigueti Jesoshi, ariqueate ichicoitanaca ishiroshirontimentavae- cari, iriguentijiatari nintamajajigurica imentaquipae. <sup>15</sup>Icantacijigariquea Jesoshi: “Aviatimpajia aviguentijia peamampeajatsica netsanamampeajia- tsica irishineventajiaquempiniji caquinteja, cotanquitsiquea Aapani Irioshi yamenashirentajiaquempi. Iriatimpia teequea irishineventemporajo ishireventajiacaca caquinteja, manaquea yatsitsiimanatacaro.

### **Itioncacotanaqueca Moishishini aisa imajirontagueti Aapani Irioshi**

<sup>16</sup>“Ochoocaqueni coramaniqui itioncaco- tanaqueca Moishishini aisa tsavetantajia- tsica, arejevaetacaquea ichoocaquegueti Joancani, ariquea imaica itsavetantajitana- queroquea Quenquetsatsarentsi Oganejen- catatsica quero icotani imajirontagueti Aapani Irioshi. Icaramirincavaequequea nintamajajianquitsica iroanaque ichooca- quegueti, itampishiventamajauero.

<sup>17</sup>Omanavaeca onteronquitsitempagueti quepatsi aisa inquite. Anaamajaquequea ompeguempagueti apaitsapiro itioncaco- tanaqueca Moishishini, maasanotari onetsanamajauempaquea.

### **Icanque Jesoshi aatoja quericaca ovashiantimatirotsi imanquigare (Mt. 19.1-12; Mr. 10.1-12)**

<sup>18</sup>“Quericaca ovashianqueroneca imanquigare otsipaquea irimanquigata- jempaquea, manaquea icovaeguisheca. Ariquea iquempetaca manquigatavajem- paroneca manquigarentsi yovashiantaji- tica, manaqueate icoguisheca.

### **Ajaarantatsica aisa Irasaro**

<sup>19</sup>“Ichoocaque aparo ajaarantatsica iquitsaamajataroqua quitsarentsi aramampoaro ogameetsareni ocanca. Icantacoguitaniquea savincaguiqueri

ishecamajataquea taaca opajitapae, teequea taaca opaji incoguitejacotempa. <sup>20</sup>Ichooaque aisa aparo teeca irashintempa. ipajita Irasaro.<sup>t</sup> Iroguentini ishimoiriquire teetarite capichaji. Yamajiqueriquea yojoquijiqueru quepatsiqui sotomorontsiqui sotsiqui itsvironaquitequi ajaarantatsica. <sup>21</sup>Yatsipevaecaroquea itase, inintavecaquea iroguijavarqueromequeate otsopequijaniqui ontanquirejaguetapoje shitaponcarontsiqui ishecatacagueti ajaarantatsica, irishecaquemparo. Icoraquecoraqueitashiqueri shiishi yaneronerovaequeriquea ishimoiriquitaqueguedi.

<sup>22</sup>“Iroompaquea imetojanaque Irasaro, iriraquea irashivantijite Aapani Irioshi yaajianajiriquea ichoocaqueguedi Averaameni. Ocoramanivaetapojaquiguedi imetojanajiquea ajaarantatsica, iquitajitajiriquea. <sup>23</sup>Yatsipevaetacaquea oshequi ontaniqui Areshiqui. Iroompaquea yamenacotajiriquea Averaameni osamani itsipatajariquea Irasaro. <sup>24</sup>Icajamacotsitariquea icanqueriquea: ‘Aapanii Averaameni, pimprintsatacogajoitenashiatsi, pintigarancorriquea Irasaro irencachapaquitapanajantemparo quea ojaaquiniqui, incoraqueque intsincapojenaquea nonenequi, natsipevaquea acaniqui paamariqui.’

<sup>25</sup>“Cotanquitsiquea Averaame icanqueriquea: ‘Irjani, pinquenquejaje-roja coramaniqui tequerataguetti pimetoje, aviatimpa pishinevaeca oraniqui, teequea taaca opaji pincogui-tejacotempa. Iriraquea Irasaro yatsipevaeca icanca. Imaicaquea imaica irioqueate shinevaetajatsinequea ocانiqui, aviatimpaquea pantsipeguitempaniquea. <sup>26</sup>Aisa oquichatencanaja-vaequeate ontaniqui aviatimpaqui,

taampaqueate agavejanquitsineca iroanaquequeate oraniqui. Ariquea iquempejiga choocajianquitsica oraniqui aatoquea yagavejajiga incoraquetaquequeate acaniqui, ¿querocaquea inquenaquenaiqueni?’

<sup>27</sup>“Yaquitsitanacaquea aisa ajaarantsica icanqueriquea: ‘Iroosacanica imaica noninque pintigarancaqueriquea Irasaro itsvironaquitequi aapani.

<sup>28</sup>Choocajitarite ontaniqui 5 iguentijeguijia. Intsatacayaipojaqueriquea aatonijite icoraquecoraqueitiquea iriatimpajia aisa acaniqui irantsipevaequempaquea.’ <sup>29</sup>Icanqueriquea Averaameni: ‘Choocatarite itioncacotanaqueca Moishishini aisa tsavetantajatsica, irooqua irampsajavantajiaque inquemisantajiaque.’ <sup>30</sup>Yaquitsitanajaqueate iriatimpa icanqueriquea: ‘Aato, aapani Averaame, cotanquitsiquea ariguetti irogue metojatsica intsatatacayaqueri, ariquea incantashitatijiana-quempaquea.’ <sup>31</sup>Cotanquitsiquea Averaameni icanque: ‘Atogueti inintitsi irinet sanatashitemparo itioncacotanaqueca Moishishini aisa tsavetantajatsica, ari inquejetacaavaquempari ariguetti impochatimoteri metojatsica, aatotarite iquemisantiri.’”

**Caaviji incatsimamajajiqueriquea covaeguishetacaantanquitsineca**  
(Mt. 18.6-7, 21-22; Mr. 9.42)

**17** <sup>1</sup>Iroompaquea icantajiguiri Jesoshi itsatacaneja: “Ococaniquea onchoocaguiteni covaeguishetacaajiaquemparineca caquinteja, cotanquitsiquea iimaicashiatsi irantsipevaequempaquea quericaca covaeguishetacaaqueuemparineca itsipa, caaviji incatsimamajajiqueru! <sup>2</sup>Quericaca covaeguishetacaaqueuemparineca aparo

<sup>t</sup> 16.20 Irica Irasaro, tee irio ivochantajica Jesoshi, iriguenti itsipa coramanitica.

chaajaniquiri quejejiacarica iricajia, incatsimamajajiqueriquea oshequi. Iroquetitamequea intsatotacojiquenerimequea itsanoqui shimentapiri itononcantajitaca iroompaquea irajaitanaqueriquea impishoncajajiquerinirojaní quentijaniqui.<sup>3</sup> Inchiquiojitate aviatimpajia.

“Arigueti impeacaaguishetaquempaigonoro taaca opajitapae, pincantomajajitsitempari. Inquemisantaquempigueti irovashiantaquerogueti ipeacaaguishetacaca pimpeacotajemparoja maasanopae, aatoquea piquenquejacaajiritsi.<sup>4</sup> Irooca aparo savincaguiteri querocagueti incoquempini irampijipijivetaquempiquea oshequi ooqueate, ooqueate, ooqueate, cotanquitsiquea inquenquejanajerogueti incantajempigueti: ‘Arikea nococani naatimpa, imaica aatoquea noquempetimatajirotsi aisa’, iroosacanica aviatimpa pimpeacotajemparoja maasanopae, aatoquea piquenquejacaajiritsi.”

#### **Irvantamajajitemparigueti Aapani Irioshi iragavejajiquero maasanopae**

<sup>5</sup> Irirajia itigarancanejia icantajiguiri Amajirote:

—Notsjajavecaquea yagavejamajati Aapani Irioshi cotanquitsiquea imaica nonintajiaquequea pitsatacaamajajiaquena naventamajatantajianaquemparica.

<sup>6</sup> Yacanaquequea iriatimpa icantajiguiri:

—Arigueti pavenuquitiguemparo capichaji iragavejane Aapani Irioshi, arikea pagavejajiaquequea pincantaquitigueroquea ocatica inchato: ‘Tintsijate pintnopajanaquempaja, poanaquequea pincatiajatapojaque inirojaniqui quentijani’, pagavejajiaquequeate oanaquequea.

#### **Quero incoquempani yashintajitaca**

<sup>7</sup> “Pameneja aviatimpajia, inchoocategueti aparo pashincaca iriaquerasano-

quea arejetapojajatsi ishiacoguitini piniganquitejirequi, irooca iquempoguijaquempiriquea pigaapironcaarite, ñarimpate paavajeriequa pincantavajeri: ‘Caacatequetija, pisavicapojae acaniqui pishecatapojajempaquea’? Aatoshinete.<sup>8</sup> Manaqueate pincantajavajeriequa: ‘Pintiapojajenaja nosheca, pinetsanaquempaja pojocacotsitenaroquea, noshecatavaquempa, nomiravaque. Coajica nonteroncanaquerogueti, arikea pishecatsitajempaquea aviatimpa, pimiravajequea.’<sup>9</sup> Iroompaquea pinteroncanajerogueti ñarimpate pincanqueri: ‘iOoshia! Noshinevaecaquea namenaquempigueti pinetsanaquerouquea nocanquempica’? Aatotarite picantiritsi.<sup>10</sup> Aviatimpajia pinquempejiaquempaquea, pinetsanamajajiaquerogueti maasano icantajiaquempica Aapani Irioshi, manaquea pincantajaque: ‘Naroguentijia yashintajitaca, teequea onchoocatimateji naventacojiaquempameca, manaquea nonetsanajiaquero intati inintacaajiaquenaca ashinquenaca.’”

#### **Jesoshi ipeaguetajiriquea 10 avejancaripae**

<sup>11</sup> Iroompaquea yoanaquequea Jesoshi Jerosarequi, yoantanacaroquea ocaraguetajapojigueti Samaria aisa Garirea. <sup>12</sup> Arikea yarejetapojacaroquea ichoocajiguigueti itsipapae, itonquivojajavacari avejancaguetatsica icarataque 10, cotanquitsiquea teequeate inquempejiquempejiiempariji manaqueate ichoocajiaque tijai. <sup>13</sup> Icajema jianaquequea:

—iJeshohii, Tsatacaantantsica, pimpintatsacogajoitenashiatsi!

<sup>14</sup> Iquemajajiaqueriguetiquea Jesoshi icantajiguiri:

—Poapoaitanaquequea ponigaaji guempariquea saserorotejia.

Yoayoaitanaquequea, ariquea tequera-tatiraja incajaranquiquiteteji ariquea icohicoitanaca ipeaguetanajaquea.

<sup>15</sup>Iroompaquea ichoocaque aparo yamenaquegueti ipeanajaqueate, icoraquetajiquea ishinevempojacariquea Aapani Irioshi inirojencaqueate icanca, icanke:

—Caaviji yagavejamajatiquea Aapani Irioshi.

<sup>16</sup>Iguerovempojacariquea Jesoshi itaquivopojacaquea quepatsiqui yonigantantacaca arimajaca ishineven-tamajatacari. Icanqueri:

—Arioteesaa —yamenajitarite yovejairi.

Iriatimpa iriguenti Samariaquitica.

<sup>17</sup>Icanque Jesoshi:

—¿Arimpate teequea maasano impejaiguempaji carajanquitsica 10? Jeroquea aparo coraquetajatsi. ¿Queri-campate itsipajia 9 imaica? <sup>18</sup>Iricatica-quea iricatica iriguenti teeca irioquea jorio coraquetajatsica ishineventavaeta-pojacari Aapani Irioshi. ¿Arimpate aparo ichoocaque iriatimpa?

<sup>19</sup>Iroompaquea ipitsocashitanacari-quea iriatimpa icanqueriquea:

—Pincatianaje poanje. Pavempojana naatimpa, pitsaquetari nagavejaque nompejaempi, jeroqueate pipeantana-jaca.

#### Jac imajirontaca Aapani Irioshi

(Mt. 24.23-28, 36-41)

<sup>20</sup>Iriraquea pariseojia icoacoquiaqueri-quea Jesoshi icantiriquea:

—¿Querocaqueate impariantana-quemparoca Aapani Irioshi incapiocan-tajajajica impeaqueampaqueate Amajiro-majate acaniqui quepatsiqui?

Icanque iriatimpa:

—Aatoquea quericaca amenimatiroca imaica, teetarite iramenajiteroji. <sup>21</sup>Aisa aatoquea quericaca agavejatsineca

incanke: ‘Jeroquea ocatica’, irooca incanke: ‘Jero ontatica.’ Jac imajiron-tacatarite Aapani Irioshi imaica aviatim-pajiaqui.

<sup>22</sup>Arikea icantiriquea itsatacaanejia:

—Aapojempaquea pinintantajaveta-quempaca pinejerome apajencaro savincaguiteri ironigaimojiaquempi-meca Irijanite Caquinte, cotanquitsiquea aato pinejiro. <sup>23</sup>Inchoocatanaquequea cantanquitsineca: ‘Jeri ocaniqui’, irooca incanke: ‘Jeri ontaniqui’, cotanquitsi-quea aatoquea poapoititsi. Incantajia-vetaquempiquea: ‘Jameshiatsi’, aatoquea poguijatiritsi. <sup>24</sup>Pamenajigu-roquea caretí querocaquea ococani otimemequigueti, teequea capichaja-niqui ontimemecaguiteteji, maasano-quea otimemecaguitevaetanaquero-queate. Arikea inquempetaquempa-quea Irijanite Caquinte incoraquetaje-gueti, maasanoquea iramenamenaitava- jeriquea. <sup>25</sup>Cotanquitsiquea iroquetita-quea irantsipevaequemparoqua taaca opajita, incatsimajitaqueriquea incanta-jiquequeate: ‘Teetarite irioquea agamajajavetacaca.’

<sup>26</sup>“Arikeate incoraquetajegueti irira Irijanite Caquinte onquempetajemparo-quea ichoocavetaniguetti Noeni.

<sup>27</sup>Arikea iriatimpajia manaquea ishecajiaca, imirajiaca, imanquigajiaca, aisa yojocantajajeroquea irorijanijiate imanquigajitacaroquea, teequea intsatimajigueji irooshipoji interoncrajia-quempaquea. Arikea niganqui aapojacaquea savincaguiteri iquijanta-nacaca Noeni intsompoguiqui quenaja-rontsiqui, iroompaquea otejanaque-queate incani, amaranaquequea, anaacoguetanaqueriqueate maasanopae, iteroncrajia yojocajajiaca.

<sup>28</sup>“Arikea oquejetaca aisa ichoocavetaniguetti Iroteni. Arikea iquempejiaca-quea iriatimpajia ishecajiaca imirajiaca,

ivegarajiaquequea yojocantaguetaque-  
quea, ivintyacajiaque, aisa ipeacaajiaca-  
quea tsovironaqipae.<sup>29</sup> Cotanquitsi-  
quea aapojacaguetiquea savincaguite  
isotoantanacaroca Irotensi Soromaqui,  
yasacaraashiqueriquea Aapani Irioshi  
paamari oconoacaroquea asopiri  
oquenapojoquea jenoqui inquitequi,  
otsiajiaqueriquea maasano Soromaqui-  
tica, oteroncamajajiaqueriquea, teetarite  
inchoocatimajiaje aparo.

<sup>30</sup>“Ariqueate onquempetajempaquea ironigaantapojajempagueti Irijanite Caquinte.<sup>31</sup> Oratica savincaguite  
quericaca choocatanquitsineca sotsiqui  
omencotapojacagueti itsovironaquitequi  
ovancaitoqui, choocagueti yashintague-  
caca intsompogui, aatoquea yaguijitatapa-  
najanti iraaguepanajantero.<sup>32</sup> Pinquen-  
quejajajerojate imanquigare Irotensi  
aatonijite piquempejigarotsi iroatimpa.<sup>33</sup> Quericaca teeca irininteji irantsipe-  
venquenaquea irooca irimetojavenquenaquea,  
manaquea impeaquempa;  
cotanquitsiquea iriraquea atsipevenquenaquea  
irooca irimetojavenquenaquea,  
irioquea iriguenti incoquempaniquea  
inchoocaguiteni.

<sup>34</sup>“Imaicaquea noncantajiaquempi:  
oraquea noncoraquepojajegueti intsipata-  
vacaquempa mavite irinorijajiaquempa,  
aparo irajaitanaque, iriraquea itsipa  
irojocajitanaqueri.<sup>35</sup> Arikea onquempejia-  
quempaquea mavite manquigarentsi  
ontsipatavacaquempa ontsinacaguiaque,  
aparo irajaitanaque, oraquea itsipa  
irojocajitanaquero.<sup>36</sup> Arikea inquempejia-  
quempaquea aisa mavite shirampari  
ontsipatavacaquempa niganquitejiqui,  
aparo irajaitanaque, iriraquea itsipa  
irojocajitanaqueri.”

<sup>37</sup>I quemajiavaquerigueti icanqueca  
icoacojaqueri icantiriquea:  
—Nomajirote, ¿querocaquea onchoo-  
caqueni?  
Icantiriquea iriatimpa:  
—Querocagueti irojoquijiquempani  
metojatsica, aritaque oraniqui intiroren-  
cashijiapojempari sheetyaoni.<sup>u</sup>

#### Metojacoro aisa joese

**18** <sup>1</sup>Iriraquea Jesoshi ininque  
intsatacaajiaqueriquea iramana-  
jiaqueri Aapani Irioshi incantacogui-  
tempaniquea aato ipega. Iquejetacaajia-  
canariquea. <sup>2</sup>Icanque: “Ichoocaque  
aparo jivatatsica joese teeca intsaroaca-  
guempari Aapani Irioshi, aisa teeca  
impintsatacotempari caquinte.<sup>3</sup> Arikea ochoocaque aisa oraniqui  
aparo metojacoro. Iroatimpa ocantaco-  
guitaniquea oashipinqueri jivatatsica  
ocanqueriquea: ‘Pompetacotenashiatsi,  
chooca catsimatashitaquenaca.’<sup>4</sup> Iroaqueragueti teetarite irinintavetem-  
paji inquemisantero, cotanquitsiquea  
coajica iquenquejapojiroquea icanque:  
‘Teetarite nontsaroacaavetempari  
Aapani Irioshi aisa teequea nompintsa-  
tacotempari caquinte,<sup>5</sup> cotanquitsi-  
quea occocaniqueate ocoraquetashique-  
naquea asereavaequena. Imaicaquea  
imaica nonquemisanquieroquate  
nompetanaquemparo aatonijite  
asereajanatsi, nocatsimatirotsi.’”

<sup>6</sup>Irompaquea icanque Amajirote:  
“Pinquemero icanqueca jivatatsica teeca  
incameetsateji. <sup>7</sup>Irompaquea Aapani  
Irioshi caaviji irompejiaquempariquea  
icoguijiaqueca amanajiguirica cantaco-  
guitatsica. ¿Arimpate aatoquea yamita-  
cojiguiriquea? ¿Arimpate incantapini-

**u** 17.37 Quejetaca yamenajiqueru sheetyaoni intirorencashijiapojempari metojatsica, arikea  
onquempetaquempa incoraquepojajegueti Quirishito, aato isenacapoja, maasanoquea  
iramenajiavajeri. Pamenero Mt. 24.28.

queri: ‘Aatota?’<sup>8</sup> Noncanquempiquea irrompetisempariquea taampina. Cotanquitsiquea oraquea incoraquepojagueueti irira Irijanite Caquinte, ¿ari iramenajiapojayeri acaniqui quepatsiqui tsaroventamajajarica?’

**Pariseo aisa capiocapinitinirica majirontatsica imentaquipae**

<sup>9</sup>Iroompaquea Jesoshi iquempetacaajacariquea irirajia aventacotatsica amenajavetanquitsica yanaajiaqueri igonorojia itsaroventajacarigueuti Aapani Irioshi, icanque:<sup>10</sup> ‘Mavite shirampari yoayoaitanaqueuea teemporoqui itsaroventantajitarica Aapani Irioshi iramanajiaqueruea. Aparo iriguenti pariseo, iriraquea itsipa iriguenti capiocapinitinirica majirontatsica imentaquipae.<sup>11</sup> Iriraquea pariseo icatiapojacaqueate yamanamampeacariequa Aapani Irioshi icanque: ‘Irioshimajaca, noshineventamajataquempiquea oshequi, pagavejacaaquea queate, teetarite nonquejetempariji itsipapae, ipeacaaguishetacaqueate taaca opajitapae covaeguisherentsi, iconoacaqueate yaitsitantaguequequeate, itsipa icantatsatacotantaque manquigarentsiqui. Teequeate nonquempejiguempariji irintatica capiocapinitinirica majirontatsica imentaquipae.<sup>12</sup> Nocantacoguitani aapojajagueti 3 savincaguiti nosanticotaquiti teequea noshecatempaji nonquenquejamajaquempiniji. Aisa nojocagaranquempiquea taaca opajitapae nashincaca iroaquerapaetica. Naaqueueti 10, nojocajempi aparo.’

<sup>13</sup>‘Cotanquitsiquea iriraquea capiocapinitinirica majirontatsica imentaquipae icatiapojaca oraniqui iroshipojigueti sotomorontsi. Ipashivencia, teequea

iramenimateji jenoqui inquitequi, ariguentequea itinquitinquineguantanaca yonigaantantacaca ishimampojanca-vaea, icanque: ‘iIrioshimajaca, pimpin-tsatacotenashiatsi, narouguentiquea covaeguishetatsca!’

<sup>14</sup>‘Imaicaquea noncamantajaqueMPI iriraquea capiocapinitinirica majirontatsica imentaquipae irioquea iriguenti ishinevenca Aapani Irioshi, ariquea yoanajigueti itsovironaqueitequi meshiacuea. Cotanquitsiquea iriraquea pariseo teetari irisheteneriji, maasanotari aventacotatsica iroguiplashivenqueriqueate Aapani Irioshi oncoramanivaetapoja-gueti. Maasanoquea teeca iraventacotem-paji caaviji iranaacaajeriqueate Aapani Irioshi oncoramanitapoja-jagueti.’

**Jesoshi yamanacoventajiaqueruea chaajanquiripae**

(Mt. 19.13-15; Mr. 10.13-16)

<sup>15</sup>Iroompaquea icoraquecoraqueita-queuea itsipapae yamajiapojiniriquea Jesoshi chaajanquiripae impamijiava-queriniji. Iriraquea itsatacanejia yamenajavaquerigueti yamajiapojiri-gueti icantomajavaqueruea.

<sup>16</sup>Cotanquitsiquea Jesoshi icajemajiaqueri chaajanquiripae, icanque:

—Ariotaquetsija incoraquetetate chaajanquiripae naatimpaqui, aatoquea pojocaavaca, ishineventajacaritarite Aapani inquitequitica irimajirontacota-quempari quenquejajaiatsica quempeca-rica iriatimpajia.<sup>v</sup> <sup>17</sup>Iroomajaca noncan-tajiaquempica: quericaca nintanquitsi-neca impejaeri Aapani Irioshi Imajirote inquempetajempariquea chaajanquiri-rajaca. Oraquea aatogueti iquempeta-ritsi, aatotarite iconoapojajari maasano peajiaquerica Imajirote.

**v 18.16** Irirajia chaajanquitanquitsica tee iraventacojiguempaji, mana ishineventajapojacari Jesoshi, iquemisantajiaqueri. Ari anquempejiaquempaquea aatimpa.

**Ajaarantavaetatsica**  
(Mt. 19.16-30; Mr. 10.17-31)

<sup>18</sup>Iroompaquea icoraquepoji aparo majirontatsica icanqueriquea Jesoshi:  
—Tsatacantantatsica cameetsari,  
¿queroquea noncoquempani cameetsa-  
nijite noncoguitempaninijite nonchooca-  
guiteni?

<sup>19</sup>Icanqueri Jesoshi:  
—¿Queroquea cococani picantantaque-  
naca ‘cameetsari’? Teequea inchoocateji  
cameetsari, aparo icoca Aapani Irioshi.  
<sup>20</sup>Pitsaquieroqueate maasanopae itionca-  
cotanaqueca Moishishini, ocanque:  
‘Aatoja poashitirotsi manquigarentsi,  
aatoja pimetojantsi, aatoja paitsitan-  
tsi, aatoja pitsojeacotantimatatsi,  
pinquenquejacameetsatacotaquerija piri  
aisa piniro.’

<sup>21</sup>Iriatimpa icanqueri:  
—Arimajaca noquempetacaquea  
imaica noparianacaro nonetsanamajata-  
naqueroquea maasano nochaajaniquipo-  
jigueti narejevaecaro imaica.

<sup>22</sup>Iquemaqueguetiquea Jesoshi  
icanqueriquea:  
—Imaica apanivani poanaquequea  
pojocantaguetanaqueroquea  
maasanopae pashintaguecaca, paanta-  
quemparoquea imentaquipae pojocajia-  
naqueneri coguitejacojianquitsica,  
pinquejetaquerogueti onchoocataje  
oganejencaro shinetaacaempineca  
ontaniqui inquitequi. Arikea pincora-  
quetajeja poguijatan aquena.

<sup>23</sup>Cotanquitsiquea iquemitsitaquea  
icanquerica arikea icotanaca ishimam-  
pojancavaetanacaquea, iriguentitari  
ajaarantavaetatsica. <sup>24</sup>Iriaquea Jesoshi  
yamenavaquerigueti ishimampojanca-  
cagueti icanque:

—iOmanapitsamajataquempariquea  
ajaarantavaetatsica inquijanaque  
imajirontagueti Aapani Irioshi! <sup>25</sup>¿Arim-

pate iragavejaque cameyo inquijanaque-  
quea itepoquiqui quisaatonquiri  
irisotoanaqueriquea antaqueronta?  
Aatotarite yagavejitsi. Iriompaquea  
ajaarantavaetatsica caaviji anaakuero  
omanapitsataquempari inquijanaque  
imajirontagueti Aapani Irioshi.

<sup>26</sup>Arikea irirajia quemajiaquerica  
icantajigu:

—Iroosacanica, ¿quericampate  
agavejanquitsineca iraacotacaantava-  
quempa?

<sup>27</sup>Iriraquea Jesoshi icantiriquea:

—Oraquea teeca iragavejeji caquinte,  
iriraquea Aapani Irioshi yagavejaqueri-  
quea.

<sup>28</sup>Iroompaquea icantanaque Peerero:

—Nomajirote, naatimpajia novashian-  
taguetanaqueroquea maasanopae  
nashintaguecaca noguijaguajitana-  
quempi.

<sup>29</sup>Icanque Jesoshi:

—Iroomajaca noncantajiaquempica,  
quericaca jocanaqueroneca itsovirona-  
quite, irooca imanquigare, irioca  
iriguentijeguitepae, itsijoitepae, iriri,  
iriniro, irioca irijanijiate, irorijanijiate,  
cameetsanijite irimajirontamajaque-  
mari Aapani Irioshi, <sup>30</sup>ariquea irojocaji-  
queneriquea otsipapae acaniqui  
quepatsiqui, caaviji anaavaetanaquero  
yashintavecaca, ariquea oncoramanita-  
pojajegueti incoguitempaniquea  
iranijaguuteni.

**Jesoshi icamantajajiri aisa irimetojaque**

(Mt. 20.17-19; Mr. 10.32-34)

<sup>31</sup>Iroompaquea icajemajiaqueriquea  
iriatimpaqui itsatacaanejia carajianqui-  
tsica 12, icantiriquea: “Imaicaquea  
oajianaque Jerosarequi, onetsanagueta-  
naquempaquea maasanopae itioncacota-  
queca tsavetantajiatsica coramaniqui  
itioncacojiaquerigueti Irijanite Caquinte.

<sup>32</sup>Iraacaantajiqueru irajaitanaqueriquea

ichoocajiaquegueti teeca irijorijoigueji, irantanaguishevaequeriquea, incantaguishejiaqueri, inquishoquishoavaequeri.<sup>33</sup> Iroompaquea impasapasajiaqueri agompiquitempari ariquea irimetojajiaqueri, cotanquitsiquea aapojajempagueti 3 savincaguiteri intancorejanaje.”

<sup>34</sup>Cotanquitsiquea iriatimpajia teequea intsatimajigueji taaca opaji icantacotaque, teetarite inquemajigueri. Queroquea incojiaquempani intsatantajiaquempaca, omanapitsajia-caritari.

#### Jesoshi yamenacajairi

shamponcujatatsica choocatatsica

Jericoqui

(Mt. 20.29-34; Mr. 10.46-52)

<sup>35</sup>Irooshipojaji irarejetajemparoquea Jesoshi Jericoqui, chooca shamponcujari isavicaque ocaravoquitaquegueti yamanantaguetaque imentaquipae.

<sup>36</sup>Iquemajiavaquerigueti yavisavisita-naquegueti oshequin i caquintejia icacotsitariquea, icanque:

—¿Taaqueate opajita?

<sup>37</sup>Icamantsijitariquea icantajiqueru iriguenti coraqueta pojatsi Jesoshi Nasarequitica. <sup>38</sup>Icajemitsimajatanaca:

—iJesoshii, Ichoviquitanaqueca Taavini, pimpintasacotenashiatsi!

<sup>39</sup>Irirajia jivajivaitapojirica Jesoshi icantavetariquea irisanticotanaquenijite, cotanquitsiquea iriatimpa arimpaqueate icajemitsimajatanacaquea:

—iJesoshii, Ichoviquitanaqueca Taavini, pimpintasacotenashiatsi!

<sup>40</sup>Iriraquea Jesoshi ariquea icatiapojaca icanque iramajiqueriquea.

Iroompaquea yamajiqueriquea quempeji, icanqueriquea:

<sup>41</sup>—¿Taaquea pininque?

Icantanaquequea iriatimpa:

—Nomajirote, noninque namenanaje.

<sup>42</sup>Icanqueriquea Jesoshi:

—iIntsija pamenanaje! Pitsaque-queate nagavejaque namenacaajempi, paventantaquenaca, irootaquequea pamenantananajaca.

<sup>43</sup>Irooquate icantajitiguiri ariquea icotanaja yamenanaji, ariquea yoanajiquea yoguijatanaqueri, ishineventavae-tanacariquea Aapani Irioshi oshequi, icanque:

—Caaviji yoganejencamajata Aapani Irioshi.

Arikea iquempejianaca maasano amenamenaitavaquerica ishineventajia-nacariquea Aapani Irioshi.

#### Jesoshi aisa Saqueo

**19** <sup>1</sup>Iroompaquea yarejetapojaca Jesoshi Jericoqui icantanacaro-quea ocapiocagueti tsovironaquipae.

<sup>2</sup>Arikea ichocataque oraniqui aparo ajaarantatsica ipajitaquea Saqueo. Iriguenti jivajiguirica capiocapinijiguini-rica majirontatsica imentaquipae.

<sup>3</sup>Iriatimpa iquemacoquerigueti Jesoshi ininquequea iramenaqueri, cotanquitsi-quea querocampate incoquempani iramenaquerigueti, yomporoguijaven-taetanacariqueate itsipapae igonorojia yojocajiaqueriquea, iriguentitarite chaamorintejaniqui. <sup>4</sup>Ishiitsitanacaquea tiijacoenaji oraniqui querocagueti iroanaqueniquea Jesoshi, yataitsitanaca-quea inchatoqui cameetsanijite iramena-vaquerinijite. <sup>5</sup>Iroompaquea yarejetapo-jacarogueti Jesoshi ichoocaquegueti ipivancajanacaquea jenoqui, icanqueriquea:

—Saqueo, paguijitarojequea. Aviguentiquea nomaimoqe. <sup>6</sup>Isoaanquitsipojacaquea ishinetanaca itsipatanacariquea Jesoshi itsovirona-quitequi. <sup>7</sup>Yamenajiavaquerigueti maasano yoanaquegueti icantimanajia-naqueriquea icantavacaajianacaquea:

—Queroaqueate icocani Jesoshi icantanacaquea irimaacotapojaqueriquea itsovironaquitequi covaeguishetasica.

<sup>8</sup>Oraqueate ichoocajiaquegueti itsovironaquitequi icatiitsitanacaquea Saqueo icanqueriquea Amajirote:

—Iintsija pamene, Nomajirote. Maasanopae nashintaguecaca naatimpa nojocagarantajiaqueneriquea teeca irashintajiguempaji, nojocavajeneriquea niganqui. Quericaca ivegaracagueta imentaqui namatavijaquerica itsipa, imaicaquea imaica nojocajeneriquea, cotanquitsiquea nanaacaantajempariequa nojocajiajeneriquea. Ivecaracagueta aparo imentaqui namatavijaquerica, nojocajeneriquea oshequi 4. Ivecaracagueta 10, nojocajeneriquea 40.

<sup>9</sup>Iriraquea Jesoshi icanqueriquea:

—Imaicaquea imeshiajitiriquea choocatantajigaroca ocaniqui tsovironaquiqui, irooriji iquempetanajari Averaameni choviquitanaquerica, ariquea iquempetajariquea iriatimpa itsaroven tarigueta Aapani Irioshi. <sup>10</sup>Irootaquea icoraquetantacaca Irijanite Caquinte, iramenaguetajateri peajivatanquitsica iraajiajateri.

**Jesoshi iquempetacaacari caquinte ashintajiacarica caraquisequitirica imentaqui**  
(Mt. 25.14-30)

<sup>11</sup>Iriraquea omporoguijavencarica Jesoshi iquemisantajiaqueriquea iquenquesatsacaquerigueti Saqueo, itsajiaqueterite irooshipoji irarejepojaquepa Jerosarequi, iquenquejajaquea ijiqueji irooqua yoashitanaque

impeaquequeate imajirojiate, ijijiaqueji irooshipoji irimajirontapojempa Aapani Irioshi ocaniqui quepatsiqui. Cotanquitsiquea iriatimpa irooriji itsaque, ariquea iquejetacaaca, <sup>12</sup>icanque: “Ichooaque aparo anaantsica, ariquea iroavaetanaquequea osamani ontaniqui otsipaqui quepatsiqui ichoocatigueta majirontamatatatsica cameetsanijite impeacaavajemparinijite irimajirontacaavajempari, aapojajempagueti incoraquetaje ichoocatigueta ari irimajirontapojempa. <sup>13</sup>Irootapojigueti iroanaque, icajemajiaqueriquea 10 iromperarepae yashintajiacaca, yojocajianaqueneriquea maasano apashimentaquito icantajitica mina,<sup>w</sup> icantajiaqueriquea: ‘Jeri iricatica imentaqui nojocajianaquempica pogonencajerija, inchiquiojitarite pamenajiaquequea aviatimpajia querocaca pincojiaquerini paantajajempariequa itsipa, ariquea noncoraquepojajegueti namenajiajapojempiquea querocaca incarashequianaqueniquea paajajeca.’ <sup>14</sup>Cotanquitsiquea iriraquea igonorojia teequeate irinintajigueriji, isemajiacari, itigarancajiaqueriquea itsipajia incamantajiaquiteri peacajiaquemparineca majirontatsineca, incanqueriquea: ‘Teetarite nonintajigueji impeaquequeate irira nomajirojiate.’

<sup>15</sup>“Cotanquitsiquea arimpaqueate ipeacaajicariquea majirontatsica, iroompaquea icoraquetaji ichoocatigueta. Arikea yarejetapoja icajemajiajapajiri irashijia yojoquimojianaqueneca imentaquitsite iramenapojaqueriquea querocaca incarashequianaqueni

<sup>w</sup> **19.13** Apashimentaquito *mina* ivecaraque coramani. Iramijiquerigueti itsipa maasano savincaguiteri qui arejevaettemparoquea 3 taai, ariquea irivegaragueneriquea apashimentaquito *mina*. Apashimentaquito *mina* iquejetacariquea 100 iraquima. Iramijiquerigueti itsipa apajencaro savincaguiteri, irivegaragueneri apashimentaquito iraquima.

yaajiaqueca itsipapae.<sup>16</sup> Arikea icoraquepojiquea aparo icanqueriquea: ‘Nomajirote, iriraquea pimentaquisite pojocanaquenaca apamentaquitiro mina icaraveca, imaica naaji itsipapae, icaravaeque 10 naajica.’<sup>17</sup> Icanqueriquea iriatimpa: ‘Cameetsavaequequea, nomperare, pinetsanaqueroquea ocatica capichaji nocantanaquempica. Imaicaquea nompeacaaquempija imajirojate choocajitsica 10 quinteninintsipaequi.’<sup>18</sup> Arikea icoraquepojiquea itsipa icantapojaqueri: ‘Nomajirote, iriraquea pimentaquisite pojocanaquenaca apamentaquitiro mina icaraveca, imaicaquea naaji itsipapae, icaravaeque 5 naajica.’<sup>19</sup> Arikea iquejetaqueriquea iriatimpa icanqueri: ‘Imaicaquea aviatimpa nompeacaaquempija imajirojate choocajitsica 5 quinteninintsi-paequi.’

<sup>20</sup>‘Cotanquitsiquea itsipa icoraquevetapojaca icantapojaqueri: ‘Nomajirote, jeri iricatica pimentaquisite. Nampiguiricacotsitajimpriquea paañoqui noquempoguijajiri. <sup>21</sup>Notsaroacaaquempitarite namenimpiquea aviguenti catsimatantsica, paashiguecariquea imentaquipae intati teequea taaca opajita pantejí, aisa paitsitantagueque teeca pashinquempaji.’<sup>22</sup> Icantanaquea quea iriatimpa: ‘Aviroveca amitacovetana, cotanquitsi tee pincameetsateji. Inchiquiojiquea piquempetacaanca aviatimpa piquenquetsataquegueti imaica.’<sup>23</sup> Queroquea ococani teequea paanaqueriquea nomentaquisite pojocanaquenerime vegaratantatsica iraantajemparinijite itsipapae, iroopaquea pojocavajenarimequeate nocoravezetajagueti imaica. Irooquea pamenanagueti naroguenti catsimatantsica, naashiguecariqueate imentaquipae intati teequea taaca opajita nanteji, aisa naitsitantagueque teeca

nashintempají.’<sup>24</sup> Iroompaquea icantajiguiri choocajianquitsica oraniqui: ‘Paapitsateriquetiro iricatica nomenquitsite pojocajigueneriquea oganencajirica 10.’<sup>25</sup> Cotanquitsiquea iriatimpajia icantiriquea: ‘Nomajirote choocatarite irashi 10.’<sup>26</sup> Yacanaquequeate iriatimpa icanque: ‘Noncanquempiquea quericaca aamajatanquitsica, caaviji irojocamajajitaqueneri, cotanquitsiquea iriraquea teeca irashintempajiquea, capichajani-quiquea yashincaca iraacaitsijiquempriqueate.’<sup>27</sup> Imaicaquea imaica irirajia catsimajiaquenaca teeca irinintajigueji nompeaquequea imajirojate, pamajiaqueriquea ocaniqui pimetojajiaqueri.’”

**Yarejetapojacaroquea Jesoshi Jerosarequi**  
(Mt. 21.1-11; Mr. 11.1-11; Jn. 12.12-19)

<sup>28</sup>Coajica iteroncanaquerogueti Jesoshi iquenquetsavaetaquegueti iparianajaro iroanaquequea Jerosarequi, iriquetitaquea oananquitsi. Yagatsonquivaetanaji.

<sup>29</sup>Iroompaquea irooshipojigueti irarejerejitejempaquea Vetepajequi aisa Vetaniaqui irooshooshitacotacaroquea Orivotsempi, itigarancaquequea mavite itsatacaane, icantajiavaqueriquea:

<sup>30</sup>—Poanaquequea ontaniqui quempeji quinteninintsiqui, arikea pamenajiajoperi oraniqui aparo aashino irijanigantirenajaniqui ishiticacojiqueca, tequerataqueate irishiashiavijitacotanta-jitempariji. Pishiticarejacojiaqueri pamajiaquenari.<sup>31</sup> Choocagueti cantajiaquempineca: ‘¿Taaquea pishiticarejaco-tantacarica?’ aviatimpajia pincantajiguéri: ‘Iruguenti coacotacari Amajirote.’

<sup>32</sup>Yoayoaitanaquequea arikea yamenajiajoperi shiticacoca.<sup>33</sup> Irooquea ishiticarejacojianaquerigueti icantajiguériquea ashintajigarica:

—¿Taaquea pishiticarejacobantacarica aashinogantirenajaniqui?

<sup>34</sup>Iriatimpajia icantiriquea:

—Iriguenti nintaqueri Amajirote.

<sup>35</sup>Iroompaquea yaajianaqueriquea yamajiaqueneriquea Jesoshi. Isavomiti-tsajiaqueriquea iitsaarepaequi cameetsanijite irisavicaquenijite. Arikea yatsomajajiaqueriquea yoguisavacajiaqueriquea. <sup>36</sup>Arikea ishiacotanaca yoanaquequea. Irirajia omporoguijaven-tajiavacarica imaroncaashijiaqueri-quea iitsaarepaequi quenavoquiron-tsiqui ishivoquitantanacaca. <sup>37</sup>Oraquea irooshipojigueti oguirincacaguetti Orivotsempiqui maasanopae quemisan-tajiaquerica isaquiriaventajianacariquea, ishinejianaca icanca, iririjencani yoanaquero ishineventajianacari Aapani Irioshi iroorijite iquenquejanaqueroquea yonigaantaguequeca Jesoshi oacaantantatsica intati. <sup>38</sup>Icantajigu:

—iIntsishiatsi irishineventajiquempari Amajirote coraquetapojatsica itigarancaqueca Majirontamajatatsica!

—iOganejencaguitevaeca inquitequi! iCaaviji yoganejencamajataca Aapani Irioshi choocatatsica jenoqui!

<sup>39</sup>Iroompaquea iconoagarancaqueate pariseojia choacajanquitsica oraniqui icantiriquea Jesoshi:

—Tsatacaantantatsica, pincantomaje-ritsijate guijatacojiaquempica.

<sup>40</sup>Cotanquitsiquea Jesoshi icantiri-quea:

—Noncanquempiquea, arigueti irimajerejigue irirajia, irooqueate cajemajiananquitsineca mapi oshineven-tajianaquenaquea.

<sup>41</sup>Iroompaquea yaapojaquerogueti quempeji yamenacopojiroquea Jerosare, iraacotsijigari choocatantajigaroca,

<sup>42</sup>icanque: “iImaicaquea imaica choocatirajanaguetti ocaniqui nonintaveca pintsajigueme quero pincojiaquempani

aatonijite icatsimajiguimpitsi Aapani Irioshi! Cotanquitsiquea imaicatari omanapitsajiaquempi. <sup>43</sup>Aapojajempa-gueti oncoramanitapojaquetu pantsipe-vaejiaquempaquea, incoraquecoraquei-tashijiaquempiquea catsimajiaquempi-neca iranquitacojiapojaquempi intanto-tacojiapojaquempi irashimirintsitempi-quea. <sup>44</sup>Irampeguitejajiaqueroqueate maasanopae mapi ipeacaantajicaroca piguintenitantajiacaca, irimetojajia-quempiquea. Ontariavaetanaquempaquea isavi, aatoquea ogataavijatasi apapiro. Onquejetaquempaquea irooriji aavepojaca icoraquetantaquitacaca Aapani Irioshi incavintsajajiaquitempi-mequea, cotanquitsiquea aviatimpajia teequea pintsajiaqueroji.”

**Jesoshi yoguivvorocajiaqueri  
jocantantajiavecaroca tetemporoqui  
(Mt. 21.12-17; Mr. 11.15-19; Jn. 2.13-22)**

<sup>45</sup>Iroompaquea yoanaquequea Jesoshi tetemporoqui itsaroventantajitarica Aapani Irioshi iquijavepojacaro onigan-quirequi oticaacoroqui, yamenajiaopojiri jocantantajiaquequea, yoguivvorocajia-pojiriquea, <sup>46</sup>icantiriquea:

—cArimpate tee ontionquempaji: ‘Oratica notsovironaquite incantacoji-tero iroguenti ashi incoraquetantapiniji-tempaca iramanajiaquenaniji?’<sup>x</sup> Cotanquitsiquea aviatimpajia manaquea pipeacajaiacaro imoro itsititantaca atsitsantajjatsica.<sup>y</sup>

<sup>47</sup>Arikea icantacoguitani savincogui-teriqui itsatacaantaguitiniquea Jesoshi tetemporoqui. Cotanquitsiquea irirajia saserorotejia anaantajianquitsica, irirajia tsatacaantajiguiroca itioncacota-naqueca Moishishini, aisa jivajiguirica caquintejia inintajiaveca irimetojacaan-querime. <sup>48</sup>Cotanquitsiquea teequea

x 19.46 Is. 56.7. y 19.46 Jer. 7.11.

iragavejajigueji querocampate incojia-querini, maasanojia ishineventajiacari-quea iquemisantajivaqueri.

**Icoacojitaqueriquea Jesoshi taate tigararancaqueri**

(Mt. 21.23-27; Mr. 11.27-33)

**20** <sup>1</sup>Ariqueate itsatacaantavaeque-quea Jesoshi oniganquirequi teemporo, itsavetacotaquero Quenque-tsatsarentsi Oganejencatatsica. Iroompa-quea icoraquecoraqueipojiquea saserorotejia anaantajianquitsica, itsipatsipaicariquea tsatacaantajiguiroca itioncacotanaqueca Moishishini, icoraquejiaquequea aisa jivajatsica,  
<sup>2</sup>icantajiaopojaqueri:

—Iintsija pincamantenajate.  
 ¿Taaqueate cantauquempi pinquejetaca-quieroqua imaica poguivorocajiaqueri-quea jocantantajiguirica viratsipae?  
 ¿Taaquea tigararancaquempi?

<sup>3</sup>Iriraquea Jesoshi icantiriquea:  
 —Ochoocaque noncoacojiaquempica naatimpa. Iintsija pincamantajiguenaja:  
<sup>4</sup>¿Iviñacajatantigueti Joancani, ¿quero-quea oquenapojini? ¿Irooca oquenanta-pojaca inquite? ¿Irioca oquenantapojaca caquintejia?

<sup>5</sup>Irooqua iquemajiaquegueti iquenquetsatavacaajianaca icantajia-naque: “¿Querote ancoterini? Ancantsi-vetemparigueti oquenantapojaca inquite, iriatimpa incantanaque: ‘Iroos-  
 canica ¿queroqua ococoni teeca pinquemisantajiguempariji?’”

<sup>6</sup>Arigueticaja ancantajiaquequempari-quea iriguenti tigarancaqueri caquintejia, intsinatsinavaetacaji maasano omporoguijajianquitsica, maasanotari icantajiaque irira Joancani iriguenti tsavetantatsica itigarancaqueca Aapani Irioshi.”

<sup>7</sup>Jero icantantajiacaca:  
 —Jmm, taaca tigararancaqueri.

<sup>8</sup>Arikea iriatimpa icantiriquea:  
 —Iroosacanica, ariqueate nonquejeta-quempaquea naatimpa, aatoquea nocamantimpitsi quericaca tigaranca-  
 quenaca naatimpa.

**Jesoshi iquempetacaajiacariquea quempoguijaveraroca ovaitsquimashi**

(Mt. 21.33-34; Mr. 12.1-11)

<sup>9</sup>Ariqueate iparianacaroquea Jesoshi iquenquetsatacaajianaqueriquea maasano, cotanquitsiquea manaquea iquejetacaajicanari, icantiriquea:

—Ichoocaque aparo caquinte imiashi-aqueroqua ovaitsiqui itsitacancaro-quea apamantanejiro iniganquitejire, iroguenti igomaroncaaque. Coajica icajemajiaqueriquea itsipapae irishiaco-jiaqueneriquea. Oraquea onchoocatana-quegueti, irojocagarantajiaqueneriquea iriatimpa. Iroompaquea yoavaetanaque-quea osamani, ichoocaguitini ontaniqui.

<sup>10</sup>Ocoramanivaetapojigueti aapojaja-gueti osamparipiotantanacaca ovaitsiqui, itigarancavecariquea aparo itigaranchica iramanajajateriquea irojocagarantajajenerime iriatimpa, cotanquitsiquea iriatimpajia itavatavaa-jiavaqueriquea itigarancajajiri intati, teequea irojocajavajeneriji capichajaniqui. <sup>11</sup>Iroompaquea iriraquea ashinca-roca itigarancajiquea itsipa yashincaca. Arikea iquejejiavaqueriquea iriatimpa, itavatavaajiavaqueriquea, icaveaqueri, itigarancajiri intati ejempaconi.

<sup>12</sup>Arikea itigarancuitsitajariquea aisa itsipa, cotanquitsiquea iquitenteatanta-vacariquea ipishoncaquitiri.

<sup>13</sup>“Iroompaquea icantsitaquea ashincaroca iguepatsite icanque:  
 ‘¿Querocaquea noncojiaquerini imaica? Iintsija riompate iriguenti nontigarancaquequea irijani nopintsamajatacaca, iriocaqueate intsaraoacaajiaquempaquea.’” <sup>14</sup>Cotanquitsiquea iriatimpajia

irooquea yamenajiaquerigueti icoraquepojaquegueti iquenquetsatava-caajianaca icantajianaquequea: ‘Jeeri irintatica ashinqueparoneca maasanopae irmetojanajegueti iriri. Jamequetiroshiasci ametojajiaqueriquea cameetsanijite aatimpajia ashintamajatempajonjite.’<sup>15</sup> Ariquea yaitsijianacari yaajianaqueri acaqueroca otantotacotacagueti ovaitsquimashi, imetojitsitari.

“Imaicaquea querocaquea incojiaquerini ashincaroca iguepatsite?

<sup>16</sup> Manaqueate iroashijiaquiteriquea irimetojajiaquiteri, itsipapae incajemajiaquequea quempoguijajenerineca iniganquitejire.”

Iquemajiaquerigueti icanqueca icantsijigariquea:

—iOo, aatoquea!

<sup>17</sup> Cotanquitsiquea Jesoshi yamenajiaqueriquea icanque:

—Iroosacanica, taaquea ocantacoque Itioncacaantaqueca Aapani Irioshi ocanquegueti ocatica?:

‘Oraquea ogota mapi teeca irishine-ventajavetempaji peacaajiacaroca mapipanco, opeanacaquea anaantamajatanqui-tsica quishotacaaqueroca.’

<sup>18</sup> Quericaca omposaqueparoneca ocatica mapi incampojemparo jarare jarare, cotanquitsiquea quericaca otsinacaqueca opitsarepitsarejataqueri.<sup>z</sup>

<sup>19</sup> Arikea irirajia saserorotejia anaantajianquitsica aisa tsatacaantajiguiroca itioncacotanaqueca Moishishini irooqua quemajiaquerigueti icanquegueti Jesoshi

icatsimatsijianacaquea, inintajiaveca irajaianaquerime, iquemajiaqueriqueate iriguentijia iquejetacaajiacaquea, cotanquitsiquea itsaroacaajiacari omporoguijajain-quitsica.

**Icoacojiqueru Jesoshi cameetsavaequempa  
irojocajiqueneri Sesa imentaquipae  
(Mt. 22.15-22; Mr. 12.13-17)**

<sup>20</sup> Arikea itigarancajiaqueriquea itsipapae iroaroaitanaque impeamampeajiaquempaquea arimajacaca inintamajajiaque intsajiaquequea, incoacojiaqueriquea Jesoshi iramenajiaqueri querocaca incanke, iroompaquea incanquerogueti taaca opajita, irooqua iroguinajiaquempaquea irajaianaquereneri iramajirore Sesa incatsimataantaqueriquea. <sup>21</sup> Irootaquea icoacotantacarica icanqueri:

—Tsatacaantantatsica, notsajiaquempi-quea aviatiampa teetarite pamataguempajiquea, pitsatacaantaquegueti teequea quericaca pagamajempaquea, teequea pincanteji: ‘Inchiquiojitala iquemajiguitsi itsipapae.’ Pitsatacaantigueti tampaticaquea poaquiero picamanquerigueti quoeroquea incojiaquempani irinetsanajigueroniji intaguetica Aapani Irioshi. <sup>22</sup> Pitsatiro-queate icanqueca majirontatsica Sesa icanquegueti maasanojia jorio irojocagarantapimijaqueneri imentaquipae. Imaicaquea ¿queroca pincanten? ¿Cameetsampa nojocajiaqueneri, aricaca tee oncemeetsateji?

<sup>23</sup> Cotanquitsiquea Jesoshi itsatava-quoeroquea teequea cameetsa incantajigueji, manaquea ishinetamampeajiacaqueate intati, irootari icantantajiacarica:

<sup>24</sup> —Intsijate pamaquenarija apamenta-quiero tenario,<sup>a</sup> nameneritate. ¿Taa ipajita

**z 20.18** Oraquea *mapi* irooqua quejecaro Jesoshi. Oraquea otsinacaqueca opitsarepitsarejataqueca iriojia quempacaro caarica shineventavacari Jesoshi. Ari inquempetacaajitaquempari incatsimamajitaqueri. **a 20.24** Iriraquea *tenario* irio imentaquitsite Iromaquitica. Iramiterigueti itsipa apajencaro savincaguiteri irivegarataqueri aparo tenario. Ari iquejevecari itsipa imentaqui icantajitica iraquima, iriguenti imentaquitsite guiriegojia.

iricatica ivaantorijiqueca? ¿Taaquea ashintaro ivajiro tioncanquitsica?

Icantiriquea:

—Iriguenti majirontatsica Sesa.

<sup>25</sup>Iroompaquea icanque iriatimpa:

—Iroosacanica, pojocajiajenerijate Sesa yashincaca iriatimpa pinetsanatimqueroniji icanqueca, aisa pinquejetacaajiaquempariquea Aapani Irioshi, pinetsanamajajiaqueroja maasanopae icantaguequeca.

<sup>26</sup>Teequea iragavejajigueji incomitsatacaguempariji. Icocani iquemajiaqueri maasano tampatica inetsanaquero. Arikeate yamenamenaitanaquequea intati coacojiavecarica, yamenajiaqueruea itsamajati, ariquea isanticosanti-coitanaque.

**Icoacojitaqueriquea Jesoshi quero oncoquempa  
intancoretancoreitanajegueti  
oncoramanitapojaquegueti**  
(Mt. 22.23-33; Mr. 12.18-27)

<sup>27</sup>Iroompaquea irioquea oahoaitananquitsica saroseojia iramenajiaquiteriquea Jesoshi. Iriatimpajia iriguentequea cantajiatsica aatoquea itancorejajianaji metojaqjatsica.

<sup>28</sup>Icantantajiaipojacarica:

—Tsatacantantsica, iriraquea Moishishini itioncanaque coramani paperiqui icanque inchoocaquegueti caquinte teeca irijanintempaj, aapojem-pagueti irimetojanaquegueti irojocapanajantero imanquigare, choocagueti iriguentejeguite irioquea manquigata-jemparone irijanintacajaemparo quejetaja irioca irijanintajari metojan-quitsica. <sup>29</sup>Coramani ichoocaque aparo nogonoro irijanintacaquea 7. Iriraquea parianquitsica imanquigavetacaroquea manquigarentsi, cotanquitsiquea niganquiquea imetojaque teequea irijanintacaguemparoji. <sup>30</sup>Iroompaquea

irioquea manquigavetajaro itsipa oguijatirica. Arikea iquejetajaquea iriatimpa imetojanaji, teequea irijanintacaguemparoji. <sup>31</sup>Arikea iquejetacaquea itsipa niganquitatsica, arimpate iteroncanacaquea maasano imanquigajavetacarogueti, teequea irijanintacajiguemparoji. <sup>32</sup>Arikea ometojitsitanaca iroatimpa. <sup>33</sup>Imaica, iiintsija pincantajiguenaja, oraquea oncoramanitapojaquegueti intancoretancoreitanajegueti maasano metojaqjavetanquitsica, ¿quericaca manquigamajatajemporena? Maasanotari imanquigajavecaraquea.

<sup>34</sup>Icanqueriquea Jesoshi:

—Imaicaquea imaica acanqui imanquigajiacsha shiramparijia, ariquea oquempe-taca manquigarentsi yojocantajitiro irimanquigajtemparo. <sup>35</sup>Cotanquitsiquea irirajia ishetacojiqueca intancoretancoreitanajegueti oncoramanitapojaquegueti, iroaroaitanaquegueti ichoocatigueti Aapani Irioshi, aatoquea quericaca manquigatajsineca, aisa manquigarentsi aatoquea yojocantajitajirotsi irimanquigajtemparo. <sup>36</sup>Aatotarite imetojimajajitsi, jac tancoretancoreitanajitarite. Manaquea inquempejajempari irashivantijite Aapani Irioshi, aisa inquempejajempari Aapani Irioshi teetarite iramenimateroji imetojane, jac ipeajiaqueri irijanijiate.

<sup>37</sup>Quejetacaquea itioncanaquea Moishishini coramani itioncacotaqueroquea iquenquetsataquegueti Aapani Irioshi maequitatsicaqui, icanque: ‘Naroguenti Irioshimajate Averaame, Ishaaco aisa Jacovo.’ Irootaquequea itsatantajitacariquea Moishishini itsaquequea intancoretancoreitanaje metojaqjavetanquitsica.

<sup>38</sup>Teequea irio Irioshite metojatsica, iriguentequea Irioshite anijatsica. Aviatim-pajia pamenajiavecari metojaque, cotanquitsiquea iriatimpa yamaenakeri maasano icocani yaniji.

<sup>39</sup>Iroompaquea iconoagarantajiaca tsatacaantajiguiroca itioncacotanaqueca Moishishini icanqueri:

—Tsatacaantantatsica, pitampatica-majataqueroquea.

<sup>40</sup>Ariquea icarajianajiquea maasanojia teequea incoacojajeriji otsipapae, yamenaueriqueate teequea iragavejajueriji.

**¿Taaquea choviquitanaqueri**

**Quirishitotatsica?**

(Mt. 22.41-46; Mr. 12.35-37)

<sup>41</sup>Iroompaquea icanque Jesoshi:

—¿Queroaquea ococani icantantajitacaca: ‘Iriraquea Quirishitotatsica<sup>b</sup> iriguenti ichoviquini Taavini’? <sup>42</sup>Iriotaquequea cantanquitsica Taavini iriatimpa coramani itioncaquerogueti paperiqui pajitatsica Saremo, icanque:

‘Iriraquea Majirontatsica Aapani Irioshi icanqueri Nomajirote: Pisaviquetaja pisenampijaqueuna nota notincamijempequi qui,

<sup>43</sup>pintsipataquenaquea arejevaetana-quempa

nagavejajiaquerigueti maasano catsimajiaquempica, onquejevequemparo povanquegontatsitempari.’

<sup>44</sup>Iriraquea Taavini iriotaquequea cantaquerica: ‘Nomajirote’, ¿querocaca incoquempani inchoviquitanaqueri?

**Icanque Jesoshi aatojate  
yoguijaguijaitacotiritsijate  
tsatacaantajiguiroca itioncacotanaqueca  
Moishishini**

(Mt. 23.1-36; Mr. 12.38-40; Irc. 11.37-54)

<sup>45</sup>Maasano iquemisantajiaqueriquea Jesoshi icantajiaquerigueti itsatacaane, icanque:

**b 20.41 Quirishitotatsica.** Iguenquetsatsarequi guiriegojia icanquegueti *Christos* (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajitsica coramanitica intigarancaque Aapani Irioshi impeaquempaniji Imajirojiate maasano.

<sup>46</sup>—Inchiquiojitala poguijaguijaitacotiritsijate tsatacaantajiguiroca itioncacotanaqueca Moishishini. Iroguenti ishineventajiacaca inquitsaajerontajia-quemparo ontiasearo cameetsanijite irisemeque. Aisa yoayoaitapinique ontaniqui yojocantajiguetirogueti taaca opajitapae ajaararontsipae inintajiaque inquenquetsatacaajitavaqueriquea. Icoguitani yoapinijiguigueta shinago-gaqui icapiocantapinijiacaca, inintajiaquequea iroguisavicajitavaqueri intsipatsipaipojempariequea anaantajitsica. Ariquea iquejejiacaquea aisa icapiocajiacagueta irishecajiaquempariquea, inintajiaque iroguisavicajitavaqueriquea intsipatacaantajiquempariquea anaantajitsica. <sup>47</sup>Aisa yamatavimatavivaetaqueroquea metojacorpae iteroncamajatsitaqueroquea ashintague-caca. Aisa yamanamampeajacariequea Aapani Irioshi teetaquea irisanticotsitempaji, isemejiaque intati. Iriatimpajia caaviji iranaajiaque incatsimamajajiqueru oncoramanitapojaquegueti.

**Metojacoro ojocaqueuneriquea Aapani  
Irioshi omentaqui site aacaajaniquicari**  
(Mr. 12.41-44)

**21** <sup>1</sup>Ariqueate ichoocaque Jesoshi oraniqui teemporoqui ochoocaquegueti itetantajitarica imentaquipae yojocajiquenerica Aapani Irioshi. Iriatimpa yamenajiajaveriquea ashintavaejati-sica yojocajiaquequeate imentaqui site. <sup>2</sup>Iroompaquea yameniroquea aparo metojacoro, teetarite ashintempaji, otetsitariquea iroatimpa movimentaquitejaniqui omentaqui site. <sup>3</sup>Ariquea icanque:

—Arimajaca ocatica metojacoro teeca ashintempají yamenaqueroquea Aapani Irioshi otepojiri oshequi, anaitajiaqueri maasano.<sup>4</sup> Iriatimpajia yaagarantavajiri imentaquitsite, yashintavaevetacatari, cotanquitsiquea iroatimpa teecca ashintamajavetempají manaquea aacaajaniquicari maasano ashincaca ovegaratanta-jempameca osheca.

**Jesoshi icanque irisovejaiquero teemporo**  
(Mt. 24.1-2; Mr. 13.1-2)

<sup>5</sup>Iconoagarancaquea iquenquetsaven-tajiaqueroquea teemporo itsaroventan-tajitarica Aapani Irioshi, yamenajiaque-roquea cameetsavaequequea ocanca. Ipeacaantajitaroquea mapi ogameetsa-reñi. Aisa yojoquijitantajiguecaroquea otsipapae taaca opajitapae cameetsague-tatsica yojocajiguequenerica Aapani Irioshi. Iroompaquea icanque Jesoshi:

<sup>6</sup>—Ocaticaquea pamenajianaquea imaica, ariquea arejetapojajempagueti savincaguiteri aatoquea ochoocatajitsi aparo mapi ogataajatsineca, maasanopae irisoveacomajajitaquero.

**Queroquea oncotanaquempani**  
**iroshipojegeti onteroncaguetanajempa**  
**quepatsi**  
(Mt. 24.3-28; Mr. 13.3-23)

<sup>7</sup>Iroompaquea icantajiguiri:  
—Tsatacaantantsica, ¿querocate oncarateni irisovejaiqueron? ¿Taa opaji nontsatantajaviaquemparoca?

<sup>8</sup>Icanque Jesoshi: “Shoshoh yamatavijitimpitsija. Incoraquecoraqueitan-aquetari oshequini pinajajiaquenaneca cantajianquitsineca: ‘Naroguenti.’ Itsipa incanque: ‘Iroshipojo aguempa.’ Cotanquitsiquea aviatimpajia aatoquea piquemisantajiguiritsijate. <sup>9</sup>Iroompa-quea pinquemacojiaqueriquea etsipapae irashimirintavacaajaquempa. Itsipapae iroguisotoitsijiguempari imajirojate.

Cotanquitsiquea aatoquea pitsaroaji-guitsi. Ariqueate onquempeguetana-quempaquea imaica, cotanquitsiquea aatota aitsita onteroncaguetanajem-paca quepatsi.”

<sup>10</sup>Iroompaquea icantiriquea aisa: “Irirajia guntenijianquitsica otsipapae qui quepatsi iroaroaitashijia-naqueriquea choocajitsica osamanipa-equitica, ariquea irashimirintavacaajia-quempa. Arikea inquempejiaquem-paquea majirontajitsica inchoocagaranta-jiaque intigarancjiaqueri igoaretajiate iroaroaitashijianaqueriquea etsipapae majirontatsica irashimirintavacaajia-quempaquea irimetojavacaajiaquempa.

<sup>11</sup>Omoguecaguetanaquempaquea oshequi ooshiatsi. Irantsipevajitaquem-paroquea tasesijencapae. Osotoajen-ca-vetanaquequea ashinoncajarentsi, oncantashitatinjencavetaquem-paquea oshequi querocagueti osotoajen-ca-guetanaqueni. Iramenajitaquero caarica yamenajiti poneanquitsica inquitequi oncantashitatiaguitetanaquem-pa oncanquempa, omintsaroajianaqueri-quea.

<sup>12</sup>Cotanquitsiquea aatotaquea oquejeta imaica, aviquetijiacá incatsimajiaque irantsipetacaavajeja-quempiquea. Iraajianaquempiquea shinagogapaequi icapiocantapinijiacaca, incatsimatsijiguempi irisantanacota-caantajiaquempiquea. Aisa iramenajia-quempigueti pitsaroventajiaquena irajaianaquempiquea ichoocaqueguedi majirontajitsica aisa jivajijatsica cameetsaniji incatsimatimentajiaquem-piroquea. <sup>13</sup>Inquempejiaquempigueti imaica irajaianaquempigueti querocagueti oraniqui, ariquea pintsavetacojia-naquenaqueate naatimpa. <sup>14</sup>Cotanquitsiquea aatoquea piquenquejajiguiroquea pincantajigie: ‘¿Querocaca noncan-queca nompetanaquempagueti coajica

irajaianaquenagueti incatsimajiaquenagueti?<sup>15</sup> Naroguenti quenquejacaajiaquempiroñeca cameetsanjite pintsajiaquenijite querocaca pincanqueca aatonijite yagavejitajiguimpirotsi, manaquea incatsimatashijiaquempiquea intati.<sup>16</sup> Cotanquitsiquea aviatimpajia pinconoagaranquempaquea iraacaantajiaquempi, inquejetsijianaquempiquea irijanintajiguimpica, piguentijeguijate, pijiguettica aisa pitsipavijijiaca, pinconoagarantajiaquempa irimetojacaantajiaquempi.<sup>17</sup> Maasanopae irisementajiaquempiroquea novajiro pitsaroventajiaquenagueti.<sup>18</sup> Arigueti irimetojaquequempi, aatoquea opegatsi apamaero pimajeaniqui piguitoqui.<sup>c</sup> <sup>19</sup>Pantsipevaetaquempaguetti maasanopae ocatica, aatoquea povashiantajiguirotsi pitsaroventajiaquenagueti, pinquejetaquerogueti imaica pincoguitempa panijaguitenienoqui inquitequi.

<sup>20</sup>“Iroompaquea pamenajiavaqueroqueti Jerosare iranquijatacojiapajemparoqua coaretajia, irooqua pintsatantajiaquempa irooshipoji onteroncaguetanaquempa maasanopae tsovironaquipae, irisoveajiaqueroquea.<sup>21</sup> Irirajia choocajianquitsineca Joreaqui irishiashaitanaquetaja otsempipaequi. Irirajia choocajianquitsineca Jerosarequi irishiashaitapanajantetaja osamani. Arikea inquempejiaquempaquea choocajianquitsineca niganquitejiqui inchiquoitaja yoayoaitapanajantitsija Jerosarequi.<sup>22</sup> Inquejetaquempajia irooriji aapojaca incatsimatantajiaquemparica Aapani Irioshi, onetsanamajatanaquempaquea itioncacaanqueca paesatoniqui.<sup>23</sup> Ooshiatsi manquigaren-

tsijia tsaraquijianquitsineca, aisa atsomijianquitsineca caaviji antsipemajajiaquempaquea, irantsipevajiaquemparite maasanojia choocajatiatsica ocaniqui, incatsimamajajiqueriquea.<sup>24</sup> Inconoagarantajiaquempaquea irimetojantajiquempari tsaampsantsameniro. Itsipapae irashijitanaquempari quepatsipaequi osamaniguetsatsica. Iriatimpajia teeca irijorijoigueji quenaquenaitapojatsineca osamani iragavejantajiajapojaque Jerosarequi irarejetacovaetapojemparo aapojempanueti incantantaquempaca Aapani Irioshi: ‘Imaicaquea ariotapojaque.’

**Querocaca oncoguetanaquempani  
incoraquetajategueti Irijanite Caquinte**  
(Mt. 24.29-35, 42-44; Mr. 13.24-37)

<sup>25</sup>“Arikeate incantashitatijainaquempaquea inquitepaequitica: irira catsirinaciteri, taai, impoquiropae. Iramenajitavaqueroquea teeca iramena-jiteji coramani intsantantajiaquemparoca irooshipoji. Maasanopae choocajatiatsica acaniqui quepatsiqui arikeate incohincotanaquempaquea intsaroamajajianaque inquemajajianaquerogueti ampenejencavaetanaquempaquea inirojani quentijani, ontamacoseajavaetanaquempaquea ochonquiinaja sooooo tsacon tsacon. Irishoshoguitejianaquempa caquinteguetatsica incantajianaquequea: ‘iImaicashitsi querocom-pate oahoitanaqueeni!’<sup>26</sup> Caaviji intsaroamajajianaquequea, ojatacota-aaquiteri itsarore inquenquejacojianaquerogueti querocaca oncopojaquempani acaniqui quepatsiqui. Irimogueca-naquequea choocaguetanquitsica

<sup>c</sup> **21.18** Icanque *aatoquea opegatsi apamaero pimajeaniqui piguitoqui*, iroorijite maasano tsaroventajigarica iroaroaitanaquequea ichoocatigueti Aapani Irioshi, incoquempani inchoocaguiteni. Itsavetanquerogueti Paavoro icanque onchooqaque otsipa atsino cameetsamajatatsineca aatoca oteroncatsi. Pamenero 1 Co. 15.53.

jenoqui inquitequi.<sup>27</sup> Iroompaquea iramenajitavaqueriquea irira Irijanite Caquinte incoraquetapojagueti inquenantapoja(jem)paro mararo, iragavejavaetapo(jem)pa iranaajiaqueriquea maasano, iroganejencavaetapo(jem)pa. <sup>28</sup>Oraqueate pamenajiajavero-gueti onquempetapo(jem)pagueti imaica, pishinejianaquempaja, iroshipojitarite iraajiajavajempi Aapani Irioshi patsipevaecagueti."

<sup>29</sup>Ariqueate iquempetacaacaroquea iguera, icanque: "Pamenajiguirogueti iguera irooca otsipapae inchato,<sup>30</sup> ochoocatanajigueti ovana irooqua pitsatantajavajaro iroshipo(j)ajagantsitapo(j)aje. <sup>31</sup>Arikea onquempetanaquempaquea oncoramanitapo(j)agueti pamenajiajavero-gueti onquempetanajempagueti notsatacaya(a)quempica imaica, irooqua pintsatantajavajempi iroshipo(j)ji irimajirontaquempa Aapani Irioshi.

<sup>32</sup>"Arimajaca noncantajiaquempica, maasanopae ocatica nocantajiaquempica imaica onetsanamajatanaquempaquea tequeratagueti interoncajiguempajimaasano choocajianquitsineca omparianaquempagueti notsavetantsitacaca imaica.<sup>d</sup> <sup>33</sup>Oraquea inquite aisa quepatsi ompeaquempa, cotanquitsiquea oraquea nocantaguequeca aato opegatsi.

<sup>34</sup>"Aviatimpajia inchiquiojita jaspisavicaventirotsijate taaca opajitapae covaeguisherentsipae, pishinquitatsija, pishoshoventajigarotsija taaca opajitapae. Pinquempejiaquempagueti imaica aatoquea pagavejajiguitsi pinquenquejajiaqueri irira Irijanite

Caquinte incoraquetaje, iroompaquea manaquea incomirejajapojajempiquea.<sup>35</sup> Manaquea onquempetaquemparo ivaracajitigueti, teequea intsatsitapo(jem)paro(j). Arikeate onquempetaquempaquea oncoramanitapo(j)agueti incoraquetapojagueti irira Irijanite Caquinte, aatoquea itsatsijiga choocajiasica acaniqui quepatsiqui.<sup>36</sup> Cotanquitsiquea aviatimpajia pincoquempanija poguijavajerija, aisa pincoquempanija pamanaguiteinerini Aapani Irioshi cameetsanijite pintampishitashiqueroniji maasanopae ocatica notsatacaya(a)quempica imaica, aisa cameetsanijite pincatintiitmotajerini Irijanite Caquinte incoraquetapojagueti."

<sup>37</sup>Arikea iquejetaqueroquea imaica icantacoguitani savincaguiteiri qui itsatacaantaguitini teemporoqui itsaroventantajitarica Aapani Irioshi. Oraquea pitsecariqui manaqueate yoapiniquequea otsempiqui ipajijitica Orivotsempli. <sup>38</sup>Icantacoguitaniquea pitsecaguitetrajagueti icoraquecoraqueipo(j)que maasano teemporoqui inquemisantajiaquerinijite intsavetanta-vaetaquegueti.

### Iquemavacaimentajiacari Jesoshi iraacaantajiaqueri

(Mt. 26.1-5, 14-16; Mr. 14.1-2, 10-11;  
Jn. 11.45-53)

**22** <sup>1</sup>Iroshipo(j) arejetempa savinca-guiteiri icantajitica Paashicoa ishecatantajitaroca pan teeca onconoguemparo(j) anempoacaguiroca.  
<sup>2</sup>Iriraquea saserorotejia anaantajianquisica itsipajiacari tsatacaantajiguiroca

**d 21.32** Otioncacaca acaniqui, iguenquetsatsarequi guiriegojia ocanque *genea*. Chooca mavitepae agavejaque oncantacotaque. *Genea* agavejaque oncantacoqueri (1) irioca maasano choocajianquitsica icantaquerogueti (*esta generación o la gente de este tiempo*); (2) irioca oncantacoque maasano joriojia (*esta raza*); (3) irioca oncantacoque maasano choocajianquitsineca omparianaquempagueti itsavetantsitacaca (*esta generación, es decir, la generación que ve el comienzo de estas cosas*).

itioncacotanaqueca Moishishini arimpa-  
queate iquenquejajianaque queroquea  
incoquempani iraacaanquerinijite  
Jesoshi irimetojacaantajiaquerinijite,  
cotanquitsiquea querocampaquea  
incojiaquerini, itsaroacaajiacariquea  
maasano omporoguijaventajiacarica.

<sup>3</sup>Ariquea iriraquea Satanashi  
icoraquetashipojiri ishaquiapojacari  
Jorashi pajitatsica Ishicariote. Irioveca  
itsatacaane Jesoshi carajianquitsica 12.  
<sup>4</sup>Arikea yoanaque inquenquetsatacaa-  
jiguera saserorotejia anaantajianquitsica  
aisa imajirojiate coaretajia quempogui-  
jajiguiroca teemporo itsaroventantajita-  
rica Aapani Irioshi. Arikea itsipajap-  
jacari iquenquetsatavacaaca quero  
incoquempani Jorashi iraacaanquerinijite  
Jesoshi. <sup>5</sup>Iquemajiaavaquerigueti  
ishinejianaca, icanqueriquea irojocaja-  
queneri imentaquipae. <sup>6</sup>Iriatimpa  
ishinevaetanaca, arikea yamenagueta-  
naque aatogueti ichoocajigui omporo-  
gуйавенарика, arikea iraacaantsitem-  
pari.

**Jesoshi ishecatacaajianajari  
itsatacaaneja**

(Mt. 26.17-29; Mr. 14.12-25; Jn. 13.21-30;  
1 Co. 11.23-26)

<sup>7</sup>Iroompaquea aapojacaquea savinca-  
guiteri ishecatantajitaroca pan teeca  
onconoguemparoji anempoacaanaquero-  
neca, aisa ijitorejantajitarica ovejaja-  
niqui ishecajitataca iquenquejacojigui-  
rogueti Paashicoa. <sup>8</sup>Iriraquea Jesoshi  
itigarancaqueriquea Peerero aisa Joanca  
icantavaqueri:

—Poapoaitanaquequea pinetsanajia-  
vaqueroquea maasanopae cameetsani-  
jite ashecajiaquempanijite coajica  
anquenquejacojiajerogueti Paashicoa.

<sup>9</sup>Icantiriquea iriatimpajia:

—¿Quero nonetsanajiaqueroni?

<sup>10</sup>Icanque Jesoshi:

—Poapoaitanaquequea Jerosarequi,  
ariquea parejejiapoempagueti  
pintonquivojavaquempari aparo shiram-  
pari iramacopojaquerogueti ijatsite,  
irioquea poguijaguijaitanaque. Poapoai-  
tanaque tsovironaqui qui querocagueti  
inuijapojeni. <sup>11</sup>Pincantajapijerojira  
ashincaroca itsovironaquite: ‘Iriraquea  
Tsatacaantantatsica icanque: ¿Quero-  
caca oraniqui noshecajiaquempani  
coajica nontsipatsipaiquempari notsata-  
caanejia nonquenquejacojiaqueroquea  
Paashicoa?’ <sup>12</sup>Iriatimpa intsipatsipaita-  
naquempiquea oshitamencoacagueti  
jenoqui, irijicoguequempiroquea  
otantotacagueti caguitejeguinica, jac  
netsanaguequea maasanopae. Arikea  
oraniqui pinetsanaguetaqueroquea  
maasanopae ashecajiaquempagueti  
coajica.

<sup>13</sup>Iroompaquea yoayoaitanajiquea,  
ariquea yamenajiapojiroquea maasano  
quejemajataca icantajiaavaquerica  
Jesoshi incajararanqui, arikea  
oquejetaca. Arikea oraniqui ipeacajia-  
caro maasanopae irishecajiaquempaca  
irishineventajiaquemparoniji Paashicoa.

<sup>14</sup>Arikea opitsecaguitetanaquegueti  
icoraquepojaque Jesoshi itsipatsipaita-  
nacariquea itigarancanejia, ipimerequi-  
jajiajapaca shitaponcarontsiqui irisheca-  
jiaquempa.

<sup>15</sup>Iroompaquea icantque Jesoshi:

—Imaicaquea arejetapojaca ocatica  
Paashicoa nonintamajatantacaca nontsipas-  
tsipaitaqueemi noshecatacaajiaquempi-  
quea ashineventajiaquemparo tequerata-  
gueti arejetempaji nantsipevaetaquempa-  
gueti nometojaque. <sup>16</sup>Noncamantaquempi-  
tarite aatoquea noshecatajitarotsi,  
ariguenti noshecatajemparo onetsanamaja-  
tanaquempagueti ocatica maasanopae  
ocantacoquea Paashicoa oncoramanitapo-  
jajegueti irimajirontaquempagueti Aapani  
Irioshi.

<sup>17</sup>Iroompaquea incajaranquiguitetana- quegueti yaacoquero chovintyoriqui,<sup>e</sup> yamanaqueriquea Aapani Irioshi, icantaqueri: "Ariotesaa." Ariquea yojocacojiaqueneriquea itigarancanejia icantiriquea:

—Paajivaquero pimiramiraitava- quero. <sup>18</sup>Noncanquempitari aatoquea nomirajaro vinoja arejevaetapojempa nomirajemparo impeaquempagueti Aapani Irioshi Imajirojiate maasano.

<sup>19</sup>Iroompaquea yaitsitaroquea pan, yamanajiri aisa Aapani Irioshi, icantaqueri: "Ariotesaa." Ariquea icotarejitsitaroquea yojocajiaqueneri, icantiriquea:

—Iroguenti notsino metojaventajia- quempineca. Pinquempelinjiaquempa- quea imaica, pishecajiaquempa- rajoa pinquenquejacojiaquenajate naatimpa.

<sup>20</sup>Iroompaquea arikea iquejetacaacaro- quea otsipatacoro vinoja iteroncrajia- naquerogueti ishecajiacaguetti, yaacotsi- taroquea icantiriquea:

—Ocatica vinoja iroguenti noriraja/<sup>f</sup> sotojaatashiquempineca. Ocantacoque- roquea iroqueraro paaquito.<sup>g</sup>

<sup>21</sup>Iriraquea aacaanquenaneca chooca imaica ocaniqui itsipavacoquenaquea shitaponcarontsiqui ashecatantajiacaca.

<sup>22</sup>Irimetojaquetari irira Irijanite Caquinte, onetsanaquempaquea inintacaquerica Aapani, cotanquitsi- quea iooshiatsi irantsipevaequempaquea irira aacaanquerineca!

<sup>23</sup>Icoacotavacaajanaca maasano:

—¿Quericaqueate aacaanquerineca?

Iquenquetsatacojiaquero quericaca anaantamajatanquitsica

<sup>24</sup>Iroompaquea iparipariitanacaroquea itsatacanejia Jesoshi iquenquetsatava- caajiacaquea iquenquetsatacojianaquero arica chooca itsatacaane anaajiaquerica itsipajia.

<sup>25</sup>Cotanquitsiquea Jesoshi icantiri- quea:

—Iriraquea imajirojiate caquintegue- tatsica teeca intsaroventempariji Aapani Irioshi iroguentiquea yatsanatantajiacaca. Aisa iriraquea majirontajaiatsica manaquea inintajiaque incantajiqueriquea caaviji icavintsajanti. <sup>26</sup>Cotanquitsiquea aviatimpajia aatoquea piquejeji- guirotsi imaica. Iriraquea anaantamajatatsica inquejetanajemparija teeca iranaanteji. Arikea inquejetaquempa- quea majirontatsica, inquempetanajemparija amitantsica. <sup>27</sup>¿Queri anaama- jatatsica? <sup>28</sup>Irioca savicatsica irishecata- vaquempaquea intati shitaponcaron- tsiqui, irioca amitantsica jocacotanti- roca isheca? Iriotaquequea savicatsica shitaponcarontsiqui. Cotanquitsiquea naatimpa imaica nocoraquetaque acaniqui noquempetapajariquea amitan- tatsica. <sup>29</sup>Aviguentijia tsipajiaquenaca natsipevaecaguetti. <sup>30</sup>Irootaquequea imaica nompeacaantajiaquempica majirontajaiatsica, arikea iquejetana- quenaquea naatimpa Aapani ipeacaa- quenaquea imajirojiate maasanojia.

<sup>30</sup>Oncoramanitapojaxegueti pintsipajia- quenaquea nomajirontagueti, pishecaji-

<sup>e</sup> **22.17** Iroguenti yaacotaque vinoja. <sup>f</sup> **22.20** Icanquerogueti *noriraja* mana iquejetacaacaro intati, cameetsaniji amirapinjiaquerogueti anquenquejapinjiaquerou imetojaventajiacajigueti.

<sup>g</sup> **22.20** Oraquea *paaquito* iroguenti icantamajajitirica itsipa irinetsanamajajitenerica.

Ocaticaquea *iroqueraro paaquito* icantajiacajiquea Aapani Irioshi irishetacotajeri igovaeguishere maasano aventaventaqueemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaqueguetti Moishishini, otsipa icanquerica Taavini.

aquempa pimirajiaque noshitaponcaroqui, pisavisavita ntajiaquemparo isavanticata majirontatsica cameetsanijite pincantajiaquerinijite queroquea incojitaquerini ishiraerijia ichoviquijia naqueca irijanijate Jacovoni caravaetanquitsica 12.

**Jesoshi icamanqueri Peerero  
iromanacoqueriquea**

(Mt. 26.31-35; Mr. 14.27-31; Jn. 13.36-38)

<sup>31</sup>Iroompaquea icanque Amajirote aisa:

—Shimo, Shimo, irira Satanashi yamañaqueri Aapani irishinequeriniji inquempetacaajiaquempiniji aviatimpajia yatecacojitirogueti tirigoitsoqui, iramenatajiaquempiquea arimajacaca pitsaroventamajataquena. <sup>32</sup>Cotanquitsiquea naatimpa namanacovenquempiquea aviatimpa aatonijite pipeacomajatanajarotsi pitsarovenquenagueti. Arikea pimpeaco vequitenaquea, cotanquitsiquea pincorquetashitajenagueti, noninque pintampishitacaajiaqueriquea papitsaroventarrijate.

<sup>33</sup>Icanque Shimo:

—Nomajirote, noanaquequea naatimpa quisho noacotantanajuempi, irisantanatacojiquempigueti inquejetacaajitsitenaquea naatimpa, aatoquea notsinampirejimpitsi. Irooca irimetojajiquempiquea inquejetacaajuenaquea naatimpa aisa.

<sup>34</sup>Icanqueriquea Jesoshi:

—Peerero, noncanquempiquea, coajica tequeratagueti irinijeji chaapa, pomanacoquenaquea 3.

**Iroshipojaque irantsipevaequempaquea  
Jesoshi**

<sup>35</sup>Arikea icantiriquea Jesoshi itsatacaanejia:

—Oraqueate notigaranciaquempi-gueti pitsavetantajiaquitigueti, nocanta-jiavaquempiquea: ‘Aatoquea paajiguitsi pitsaratote, aisa pitetantarica pimenta-quitsite, aisa aatoquea paajiguitsi itsipapae pigaviguitire.’ Piquejetaca-gueti, ɿchoocampate picoguitejaco-queca?

Iriatimpajia icantiriquea:

—Tee onchoocateji.

<sup>36</sup>Arikea icantiriquea:

—Cotanquitsiquea imaica choocagueti pitsaratote paanaqueroja, aisa pitetantarica pimentaquitsite. Aatogueti ochoocati pitsaampitsantsamenirite pojocantanaqueroja piitsaare jenoquiti ca paantanaquemparoja pitsaampitsantsamenirite. <sup>37</sup>Noncantajiaquempiquea irinetsanamajajiqueroquea ocanqueca Itioncacaantaqueca Aapani Irioshi cantacotsitaquenaca: ‘Intsipatacaantaji-quempariquea covaeguishejigaroca covaeguisherentsi.’ Maasanopae itioncotsijitaquena onetsanamajatanaquempaquea.

<sup>38</sup>Icantiriquea iriatimpajia:

—Jero, Nomajirote, mavite tsaampitsantsameniri.

Icanque iriatimpa:

—Ariotapojaque.

**Jesoshi yamañaqueriquea Aapani Irioshi  
Jetsemaniqui**

(Mt. 26.36-46; Mr. 14.32-42)

<sup>39</sup>Iroompaquea yoanajiquea Jesoshi Orivotsempiqui,<sup>h</sup> aritarite yoapinique oraniqui. Iriraquea itsatacaanejia yoguijaguijaitanaqueriquea. <sup>40</sup>Arikea yarejerejeipojaca icantiriquea:

—Pamanacoventajiguempa aatonijite picovaeguishejigatsi.

<sup>h</sup> 22.39 Irira Mateo icanque yoanaque Jetsemaniqui (pamenero Mt. 26.36). Iriraquea Joanca icanquero orivoshiqui (Jn. 18.1). Oratica orivoshi opajita Jetsemani, ochoocaquea niganquitapi Orivotsempiqui.

<sup>41</sup>Iroompaquea yoanaquequea tijacoñajiquea ontaniqui yoguerotanaca yamananaqueriquea Iriri icanqueriquea:  
<sup>42</sup>“Aapani, pininquegueti paapitsatenarojate nantsipequempaca,<sup>i</sup> cotanquitsiquea aatoquea iroguenti netsanatatsi nonintica naatimpa, iroguentiquea netsanatananquitsine pininqueca aviatimpa.”

<sup>43</sup>Iroompaquea icoraquetashiqueriquea irashivantite Aapani Irioshi, iquenapojaque inquitequi itampishitacaapojaqueri. <sup>44</sup>Yamenacotavacagueta yatsipemajatanaca, arimpaqueate yamanacoventananacaquea, imasavivaetanaque quempeni irajantsi, ochochorojanaque inirojapae isavi quepatsiqui.

<sup>45</sup>Ariquea iteroncanajatigiro yamanacovencagueta icatianajaqueate yoanaji itajencashijiapojiri itsatacaanejia, yamenajiapojiriquea maajiaque, omagotacaanaqueritari ishimampojan-care. <sup>46</sup>Icantiriquea:

—¿Taate pimaantajiacaca? Pintinajajanaque pamanacoventajiguempaquea aatonijite aapojimpitsi covaeguishetacaanaquempineca.

#### Yaajitaquerigueti Jesoshi

(Mt. 26.47-56; Mr. 14.43-50; Jn. 18.2-11)

<sup>47</sup>Iroompaquea quenquetsatatsitiraja Jesoshi icoraquecoraqueipojaque caquinteja isaquiriventajapojacari. Iriraquea itsatacaane pajitatsica Jorashi ijivatapojiri. Yojocavaetapojaca quempesi irintavorotashipojempari<sup>j</sup> Jesoshi.

<sup>48</sup>Arikea Jesoshi icantavaqueri:  
 —Jorashi, ¿irootaquempa picoraque-tantacaca paacaanqueri Irijanite

Caquinte, pinintavorotantamampeacarica?

<sup>49</sup>Irirajia itsatacaanejia yamenajiavaquerigueti maasanojia coraquetashijiaquerica icantiriquea:

—Nomajirote, ¿carite nompejiana-quempiquea noncarajavaqueri?

<sup>50</sup>Aparo itsatacaane icaratavaqueri yashintacaca saserorote anaantamajatanquitsica, iguempitarejitsitari iguempita itincamijempequiquitica.

<sup>51</sup>Cotanquitsiquea Jesoshi icanque:  
 —Ariotaquetsija icocani.

Ipamitsitajariquea iguempitaqui, jac peamajatanaja. <sup>52</sup>Ariquea Jesoshi iquenquetsatatacaciajiaqueri saserorotejia anaantajianquitsica, imajirojiate igoaretapae quempoguijajiguroca teemporo, aisa jivajiatsica, maasanojia coraquetashijiaquerica aajiaquerineca, icantiriquea:

—¿Arimpate naroguenti catsimari aapitsatantsica pamashitantajiaquenaca pitsaampsantsamenirite aisa inchaquiji?

<sup>53</sup>Oraquea noconoajiguitimpigueti nocanta-coguitaniquea oraniqui teemporoqui teequea querocaquea pincotimajguenaji, cotanquitsiquea imaica manatarite aapojaca pagavejantajiaquenaca, iroguentitari iragavejantantaquempaca imajirote pitsecacojiatsica,<sup>k</sup> jero piquejetantajiacaroca imaica.

#### Peerero yomanacoqueriquea Jesoshi

(Mt. 26.57-58, 69-75; Mr. 14.53-54, 66-72;  
 Jn. 18.12-18, 25-27)

<sup>54</sup>Arikea yajiricajiaqueri Jesoshi, yaanaqueriquea itsovironaquitequi saserorote anaantamajatanquitsica. Iriraquea Peerero yoguijatacovetanacari

*i 22.42* Icanquegueti Jesoshi *paapitsatenarojate nantsipequempaca* iroguenti ishimampojanaco-majatacaro incatarojitanaqueri igovaeguishere maasanojia caquinteguetananquitsica quericaca aventajiaquemparineca. Pamenero 1 Pe. 2.24. *j 22.47* *irinintavorotashipojempari*. Yamejiaca joriojia coramani inintavorotavacaajavaca yamenavacaajacagueta.

*k 22.53* Icanquegueti *pitsecacojiatsica* iriguenti iquejetacaaca coguishejiatsica. Iriraquea Satanashi iriotaquequeua imajirojiate.

cotanquitsiquea impoivaetapojaque.

<sup>55</sup>Ariquea oraniqui itsitacajiaque paamari niganqui pampatejijaniqui qui itsovironaqueitequi, savisaviitaque itajiaque yanquitacojiacaroquea. Iriraquea Peerero iconoajapijacari isavicapoji.

<sup>56</sup>Iroompaquea amenaqueriquea aparo yashintajitaca itaquegueti, amenitsitanacariquea sorerere ocanque:

—Iricatica aisa itsipatcacari Jesoshi.

<sup>57</sup>Cotanquitsiquea yomanacotsitanaca Peerero, icanque:

—Manquigarentsi, teenicate nontsaterri.

<sup>58</sup>Iroompaquea incajaranquiguitetanaquitigu itsipaqua amenaqueri icanqueri:

—Avirotari aisa itsatacaane Jesoshi.

Icantsitajaquea aisa Peerero:

—iTeshinete!

<sup>59</sup>Iroompaquea incajaranquiguitevae-tanaquegueti arimpaquea icantanaque itsipa:

—Arimajaca itsipatcacari, iriguentita-rite Garireaquitica.

<sup>60</sup>Iriraquea Peerero icanque:

—Tee nontsatsitempiro picantacota-queca.

Iroompaquea icantanaquitigu Peerero inijanaquequea chaapa. <sup>61</sup>Ipitsoquitsitanaca Amajirote yamenaquitiri Peerero, ariquea icotanaca iriatimpa iquenquejitanacaroquea icantaquerica Jesoshi incajaranquitica icanqueriquea: “Coajica tequeratagueti irinijeji chaapa pomana-coquenaquea 3.” <sup>62</sup>Icatiitsitapanajanta-

quea isotoapanajanti, iraitsitanacaquea ishimampojancamajatanaca.

**Ishiroshirontimentajitacari Jesoshi**  
(Mt. 26.67-68; Mr. 14.65)

<sup>63</sup>Iroompaquea maasano coaretajia quempoguijajiaquerica Jesoshi ishirososhirontimentavaecari, icapocapo-vaetaqueri, oshequi. <sup>64</sup>Iponaajiaqueri-quea icapoitaric antajiajavaqueri:

—Iintsijate pintsatavaqueja taaquea capojaquempi.

<sup>65</sup>Iquenquetsaguishevventajiaqueri.

**Yaajitanaqueriquea Jesoshi**  
icapiocajiacaguetti maasano imajirotepae joriojia

(Mt. 26.59-66; Mr. 14.55-64; Jn. 18.19-24)

<sup>66</sup>Iroompaquea osavincaguitetanaque- gueti icapiocajiac jivajiguirica joriojia, saserorotejia anaantajianquitsica aisa tsatacantajiguiroca itioncacotanaqueca Moishishini, maasano. Iroompaquea icajemacaanqueriquea Jesoshi icoacoja- queriquea. <sup>67</sup>Icantiriquea:

—Iintsija pincamanquena, ¿arimajaca aviguentica Quirishitotatsica?

Icantiriquea iriatimpa:

—Ariguetti noncantavequempi: ‘Jeejeguitatsi’, aatotarite piquemisanta-jianatsi. <sup>68</sup>Arikea noncoacojavietempi- gueti, aatoquea picantajigui aviatim-pajia. <sup>69</sup>Cotanquitsiquea imaica iriraquea Irilanite Caquinte irisavicaque- quea itincamijempequiqui<sup>m</sup> Aapani Irioshi Agavejamajatatsica, incoguitem-pani.

**1 22.67 Quirishitotatsica.** Iguenquetsatsarequi guiriegojia icanquegueti *Christos* (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajitsica coramanitica intigararanquea Aapani Irioshi impeaquempaniji Imajirojiate maasano. **m 22.69 itincamijempequiqui.** Yamejiajaca coramani iriraquea majirontatsica incajemajiaqueri ishineventamajatacaca iroguisaviquitempari itincamijempequiqui, inquejemajirovequempari iranaajiaqueri maasano itsipajia.

<sup>70</sup>Icantajiaqueriquea maasano:  
—Arisacanica ɿaviguentimpa Irijanite  
Aapani Irioshi?

Icanque Jesoshi:  
—Naroguitatsi, aviguenti cantaque-roca.

<sup>71</sup>Ariquea icantajianaque iriatimpajia:  
—Iroosacanica, imaica ɿarimpate  
ancajemaacaanque itsipapae incamanca-jiquea querocaca icocani iricatica? Jac  
imaicaquea aquemajiaqueriqueate  
icantaqueueti iriatimpia.<sup>n</sup>

**Yaa JITANAQUERIQUEA Jesoshi Piratoqui**  
(Mt. 27.1-2, 11-14; Mr. 15.1-5; Jn. 18.28-38)

**23** <sup>1</sup>Jero maasanojia icatintijia-naca yoayoaitanaque yaajiana-queriquea Jesoshi Piratoqui. <sup>2</sup>Iroompa-quea yarejerejeipojaca itsojeventajiacopacari, icanquequea:

—Iricaticaquea noquemaqueri  
icantacantavaequeri nogonorojia  
itsatacayaqueriquea incatsimajiaqueri  
majirontatsica, aisa icanquequea:  
'Aatoquea pojocagarantajiguinirts  
majirontatsica Sesa pimentaquisite.'  
Aisa manaquea icanque: 'Naroguenti-quea Quirishito Majirontatsica.'

<sup>3</sup>Iriraquea Pirato icanqueriquea:  
—ɿArimajaca aviguenti Imajirote jorio?  
Icanquequea Jesoshi:  
—Tampatica poaquer.

<sup>4</sup>Icantsitariquea Pirato maasano  
saserorotejia anaantajianquitsica aisa  
maasano caquinteja:

—Iricaticaquea naatimpa namenaqueriquea teequea taaca opaji impeacaima-tempaji cameetsanijite incatsimatantajitaquemparica.

<sup>5</sup>Cotanquitsiquea iriatimpajia arimpa-quea itampishijianaquequea icantaji-aque:

—Arimajaca icantacantajiaqueri  
maasano Joreaquitica itsatacayaqueriquea taaca opajitapae, icatsimatantajianacarica majirontajatiatsica. Ipariapanajantaroquea Garireaqui, imaica  
ariegate icoraquepojiquea acaniqui.

**YAAJITANAQUERIQUEA Jesoshi Erorishiqui**

<sup>6</sup>Iroompaquea iquemaquegueti Pirato  
icantsijigariquea:

—ɿIrioca Garireaquitica?

<sup>7</sup>Irooqua icanquitigiri: "Jeejegui-tatsi, irlotaquequea", itigaranquitsitari  
Erorishiqui,<sup>o</sup> irlotaquetari netsanajigu-rica Garireaquitica cotanquitsiquea  
ichoocapoji Jerosarequi imaica.

<sup>8</sup>Iriraquea Erorishi yamenavaquerigueti  
Jesoshi ishinevaevetanaca icanca  
intintavequea iramenaquerimequea  
coramani, iquemacotsicariquea  
iquenquetsatacojitaquerigueti, jero  
intintantacaca iramenaquerimequea  
cameetsanjite iramenacaajiaquerinijite  
oacaantantatsica intati. <sup>9</sup>Icoacogueveca-riquea oshequini, cotanquitsiquea  
Jesoshi teequea incanteji. <sup>10</sup>Ariquea  
ichoocajiaquequea saserorotejia  
anaantajianquitsica aisa tsatacaantajiguiroca itioncacotanaqueca Moishishini.  
Iriatimpajia arimpaqueate itampishijianaque  
itsojeventajianacariquea.

<sup>11</sup>Iriraquea Erorishi aisa igoaretajiate  
ishiroshirontimentavaecari Jesoshi,  
iquejetacaamampeacari majirontatsica,  
iquitsaatantajiacariquea quitsarentsi  
cameetsamorenamatjatanquitsica

**n 22.71** Iquemajiaquerogueti icanquequea Jesoshi iquenquejajianaquequea iroguenti  
iquejemanatanacari Aapani Irioshi. Iriraquea joriojia intsinaquitajitempariquea quericaca  
quejemanaqueemparineca Aapani Irioshi irimetojajiaqueri. Inquejetsijitempari aisa quericaca  
cantaguishequerineca. **o 23.7** Iriratica Erorishi irio icantajitica Erorishi Antipashi. Iririni aisa  
ipajita Erorishi, irio majirontanquitsica ivoaquegueti Jesoshi (pamenero Irc. 1.5;  
Mt. 2.1-19).

quempetaroca iquitsaataca majirontatsica. Itigaranquitsitajari Piratoqui.

<sup>12</sup>Ariquea ivetsinantavacaajiaca Pirato itsipatitajari Erorishi, coramani iroguentiquea icatsimatacavacaajiaveca.

**Icanque irimetojajiqueru Jesoshi**  
(Mt. 27.15-26; Mr. 15.6-15; Jn. 18.39-19.16)

<sup>13</sup>Iroompaquea iriraquea Pirato icapiocajiaqueri saserorotejia anaantajianquitsica, jivajiguirica joriojia, aisa maasano caquintejia.

<sup>14</sup>Icantiriquea:

—Aviatimpajia pamajiavetaqueenari iricatica picantajiaqueca icantacantavaejianaqueri caquintejia icanqueriquea incatsimajianaqueriquea majirontatsica, cotanquitsiquea naatimpa imaica namenavecariquea teequea inquempetetroji picamantavetapojanaca, inchiquiojiqueate piquemajiaqueri aviatimpajia icantaqueca nocoacovecarigueti incajaranqui. <sup>15</sup>Ariquea iquejetacaquea Erorishi iriatimpa yamenavecaquea teequea impeacaguempajiji covaeguisherensi, jero yoguipiantavarajica. Imaicaquea pamenajiaquequea teequea taaca opajita impeacaguempajiji cameetsanijite irimetojaquenijite. <sup>16</sup>Nantsipetacaavauquemparita ariquea noguipaquijitajempariequea.

<sup>17</sup>Icanqueriquea imaica irooriji icantacoguitani aapojempagueti Paashicoa iriraquea Pirato iroguipaquijajeri aparo isantanatacotimentajiqueca igovaeguishere. <sup>18</sup>Cotanquitsiquea iquemajiaqueri icanqueca Pirato, maasanojia icajemajianaque icanquequea:

—¡Irimetojetashine! ¡Irrioquea poguipaquijaje Varavashi!

<sup>19</sup>Iriraquea Varavashi iroguentiquea isantanatacotimentajiqueriquea itsipatsipaitacariquea itsipapae guisotoantanquinsinemeca majirontanquitsica Jerosarequi, aisa imetojantaquequea.

<sup>20</sup>Iriraquea Pirato inintaveca iroguipaquijajerimequea Jesoshi, icantsijajariquea aisa. <sup>21</sup>Cotanquitsiquea iriatimpajia arimpaquea icajemajianaquequea:

—¡Pompajacoteri! ¡Pompajacoteri!

<sup>22</sup>Icantsitajariquea aisa Pirato:

—¿Taampate ipeacaaca? Nocoacotsivetariquea namenaqueroquea naatimpa teequea taaca opajita impeacaimatem-pajiji cameetsanijite irimetojanquempaca. Nantsipetacaavaquemparita ariquea noguipaquijitajempariequea.

<sup>23</sup>Cotanquitsiquea iriatimpajia arimpaquea itampishijianaquequea icajemajianaquequea:

—¡Pompajacoteri! ¡Pompajacoteri!

Caavijiquea icajemamajajianaquequea, ari yagavejantajianaque.

<sup>24</sup>Arikea irira Pirato iquemisantajiaqueri. <sup>25</sup>Arikea yoguipaquijajiriquea iriraquea isantanatacojivecaca itsipajiacarigueti itsipapae guisotoantanquitsinemeca majirontanquitsica aisa imetojanquegueti, iriotaquetari inintajiaque iroguipaquijitajeri. Irirampani Jesoshi, yojocajiaqueneriquea igoaretajiate irinetsanajiaqueronijite inintacaajiaquerica caquintejia.

**Yompajacojiaquerigueti Jesoshi**

(Mt. 27.32-44; Mr. 15.21-32; Jn. 19.17-27)

<sup>26</sup>Arikea yoayoaitanaquequea yaajianaqueriquea Jesoshi irompajacojiaqueri. Itonquivojajiacari Shirenequitica pajitatsica Shimo, iquenavaetapojo ontaniqui niganquitejipaequi. Iriatimpajia yaajiavaqueriquea inatacaitsitariquea igoroshite Jesoshi, yoguijatacaaqueriquea.

<sup>27</sup>Isaquiriaventajianacariquea oshequini caquintejia aisa manquigarentsija ocaramirincavaeque ocanca, iraanajianacariquea oshimampojancacoventajianacari.

<sup>28</sup>Cotanquitsiquea Jesoshi yamenajiaqueriquea icanqueroquea:

—Manquigarentsijia Jerosarequitica, aatoquea piraacojiansati naatimpa, piraacojiaquempa aviatimpajia, aisa piraacotsitempari pirijanijate.<sup>29</sup> Aapojajempaquea savincaguiteri incantajitanaquempaca: ‘Iroguenti icavintsajamajataque Aapani Irioshi teeca onchoocatimajigueji irijanite, teetarite amenajigeriji irijanite, teequea antsomijigueriji.’<sup>30</sup> Iroompaquea maasano incantajianaqueroquea otsempipae: ‘IPintirejanaque pintsinacajiguena!’ Incantajianaqueroquea aisa aatsonquiripa: ‘Poaviotacojiguenajate, pomanacojiaquenaja.’<sup>31</sup> Iquempetacarogueti oratica inchato janatirajaca, ¿quero incojitaquero oroavoaro?<sup>p</sup>

<sup>32</sup>Aisa yaajitanaqueriquea mavite peacaaguishejianquitsica covaeguisherentsi irompajacojiqueriquea, itsipatacaantajiacari Jesoshi.<sup>33</sup> Iroompaquea yarejerejeipojacaroquea aatsonquiri icantajitica Shooitontsi, ariuea oraniqui yompajacojiaqueriquea Jesoshi itsipatacaantajiacari irira peacaajianquitsica covaeguisherentsi, aparo yogatia-cojiquequea itincamijempequiqui, iriraquea itsipa iroguenti yogatiacojiqueriquea ishinampijempequiqui.<sup>34</sup> Irooquea yompajacojitaquerigueti Jesoshi ariueate icotanaca yamanacoventajianaqueriquea ompajacojiaquerica, icanque:

—Aapani, pimpeacotsitajempari iquejejiaquenagueti imaica, teetarite intsaigueji.

Ariuea iriraquea coaretajia ipiegavijijiaca intsajiaquenijite taaca aaqueroneca iquitsaguevecaca<sup>q</sup> Jesoshi.<sup>35</sup> Ariuea ichoocajiaque oraniqui

**p 23.31** Jesoshi iquejetacaro *inchato janatirajaca*. Teetarite impeacaimatemppaji covaeguisherentsi, cotanquitsiquea yatsipetacaajitacari imetojajitaqueri. Irirajia ishiraerijia manintajiaquerica iriojiatari quempecaroca *oroavoaro* inchato intajiqueca, incatsimamajitaqueriquea. **q 23.34** *iquitsaguevecaca*. Irooca icantacotaque isavoguinaro, igaviguitire, ichompimashite, aisa yogataacaca, ocarataque 4.

oshequini caquinteja, yamenajiaqueriquea Jesoshi. Iriraquea jivajitsica ishirosorintimentavaecari, icanqueriquea:

—Yantashitacari yompetacoguetacari itsipajia, imaicaquea iriogueti Quirishitotatsica Icoguaqueca Aapani Irioshi, iiintsija irompetacotanaquempa.

<sup>36</sup>Ariuea iquempejiaca coaretajia ishirosorintimentavaecari, iquempeji-quempejiitanacari yojocajiaqueneriquea vinoja cachonerontoquijajaro.<sup>37</sup> Aisa icantiriquea:

—Aviguentica Imajirote jorio, iiintsija pompetacotanaquempajate.

<sup>38</sup>Ojenoquipojaquegueti ishinquireguhipojaquegueti ipatac妖itaqueroquea ogota itioncantajicaro iguenquetsatsare-paequi guiriego, Iromaquitica, evereo, ocanque: “Iriguenti Imajirote jorio.”

<sup>39</sup>Iquenquetsatanaque aparo peacaanquitsica covaeguisherentsi itsipatacaantajicarica, icaveitariquea Jesoshi icanqueriquea:

—Irootarite aviguentica Quirishitotatsica iiintsija pompetacotanaquempajate aviatimpa, pinquejetacaitsitenaquea naatimppajia aisa.

<sup>40</sup>Cotanquitsiquea icantomajitari itsipa icanqueriquea:

—¿Arimpate teequea pintsaroaca-guemparji Aapani Irioshi? iPamenave-caqueate yompajacojiquempi itsipatacaantajiquempi, pigaanacaquea piquejetanaca imaica!<sup>41</sup> Aatimpajia atsipejiacaquea apeacajaiaca covaeguisherentsi iquejetacaantantajitacajica imaica, cotanquitsiquea iriatimpa teequea taaca opajita impeacaguempaji, manaqueate yatsipetacaajitacari intati.

<sup>42</sup>Ariquea ipitsocashitariqueate Jesoshi icanqueriquea:

—Jesoshi, pinquenquejacotajenaja naatimpa pincoraquetajegueti pimajirontapojaquempagueti.

<sup>43</sup>Icanqueriquea Jesoshi:

—Noncantamajataquempuea ocatica savincaguiteri pintsipatapoja-quenaquea paraisoqui.<sup>r</sup>

#### Imetojanaquegueti Jesoshi

(Mt. 27.45-56; Mr. 15.33-41; Jn. 19.28-30)

<sup>44</sup>Oraqueate iquenquetsataqueguetiquea imaica jac tampaticapoji catsirincaiteri, opitsecanaqueate maasanopae otsitacaguitejavaetanacarоquea oraniqui arejetacovaeca ijaguitetanajigueti. <sup>45</sup>Teequea irivoreitsitajempaji catsirincaiteri. Iroompaquea oraquea omorena ticaamorenatanquitsica teemporoqui jocagatsica aatonijite iquijajitiro intsompoguiremajacaqui, ariquea opecotarejanaque tampatica-quea niganquisano ocantanaque sarararararara. <sup>46</sup>Iriraquea Jesoshi icajemapanajantiquea inirojencamajaca icanca, icanque:

—Aapanii, paavajeroja noshire.

Irooqua icanquegueti imaica, ariquea imetojanaque.

<sup>47</sup>Iriraquea imajironcaca 100 igoaretajate Iromaqutica yamenavaquerogueti maasanopae, ishineventavaetanacariquea Aapani Irioshi icanque:

—Arimajaca irica irio comajamajatsica, teequea taaca opoji impeacaimatempaji.

<sup>48</sup>Maasanojia choocajianquitsica oraniqui yamenamenaitavaquerogueti maasanopae, yoayoitanajiquea

itinquitinquineguintajianacaquea tin tin tin, ishimampojancavaejianacatari.

<sup>49</sup>Cotanquitsiquea irirajia tsatirica Jesoshi aisa manquigarentsijia oguijaguijaiquerica iquenajiajigueti Garireaqui icatintijiaca tiijacoonajiquea oraniqui yamenamenaiqueriquea.

#### Yojoujitantajitariquea Jesoshi imperitamoroqui

(Mt. 27.57-61; Mr. 15.42-47; Jn. 19.38-42)

<sup>50</sup>Ichoocaque aparo shirampari pajitatsica Jose yamajironcaca joriojia, itsipajiacari imajirotepae icapiocapinijiaca-gueti. Iriguenti pintsatantatsica comajama-jatatsica. <sup>51</sup>Tee inquejetempariji itsipapae majirontajiatsica cantanquitsica irimetoje Jesoshi. Iroguenti yoguijajiqueriquea Aapani Irioshi impeaqueempaquea irimajirontajia-quempaca maasanojia. Ariguentiquea iquenapoji guinteninintsiqui Arimatea choocatanquitsica Joreaqui. <sup>52</sup>Iriatimpaya oshitanajiqueriquea Pirato, icanqueriquea ininque irajitanajero itsino Jesoshi.

<sup>53</sup>Ariquea yoanaque itsopajarejacotajiri-quea yampiguiricacotantajariquea iniomorena shipetari. Arikea yaanajiri-quea yojoujitantajari imperitamoroqui, iroquerasanoquea iqueecajitaquero mapichonquiinaqui, tequeratatiraja irojoujitantajitempariji metojatsica.

<sup>54</sup>Oraquea imetojantacaca Jesoshi iroguentiquea savincaguiteri inetsanatsitantaroca joriojia maasanopae tequeratagueti arejetempaji imagorejantajitaca, iroshipoqui arejetapojemparo, iroorijite iquijanaji catsirincaiteri.<sup>s</sup>

<sup>55</sup>Oraquea manquigarentsijia quenaquenaitapojatsica Garireaqui oguijaguijaiquerica Jesoshi icorache-

<sup>r</sup> 23.43 *paraiso*. Irimetojaquegueti tsaroventarica Aapani Irioshi, ari iroanaque ontaniqui paraisoqui, ari inchoocaque irosati aapojempagueti savincaguiteri intancorejantananajempaca. Pamenero aisa 2 Co. 12.2-4; Yonig. 2.7; Irc. 16.22. <sup>s</sup> 23.54 Iriraquea joriojia yamenavajirigueti iquijanajigueti catsirincaiteri ipeavajiroquea aapojaca imagorejantajitaca. Arikea iquejetacaacaro otsipapae savincaguiteri.

quegueti, oahoaitanaquequea amenajia-  
quitiro yojoquijivecarigueti, amenama-  
jajiaqueriquea querocaca icojitaquerini  
ipitsantsajajiquerigueti.<sup>56</sup> Iroompaquea  
ocoraquecoraqueitajiquea tsovirona-  
quiui onetsanapojaquitoa poncaja-  
guetatsica iroguentiquea ontiritsinotan-  
taquemparica Jesoshi. Ariquea  
omagorejajiaque savincaguiteriqui  
imagorejantajitaca<sup>t</sup> onetsanajiaquer-  
quea icanqueca Moishishini itioncacota-  
naqueca.

**Ipochatanajigueti Jesoshi**

(Mt. 28.1-10; Mr. 16.1-8; Jn. 20.1-10)

**24** <sup>1</sup>Iroompaquea iroaqueragueti  
osavincaguitetamanaque paria-  
najaroca semana<sup>u</sup> oahoaitanaque  
manquigarentsijia ontaniqui yojoquijiji-  
taquerigueti Jesoshi aajianaquequea  
poncrajatsica onetsanajiaqueca. <sup>2</sup>Arikea  
arejerejevetapojaca amenajiaopojaquiero-  
quea mapi ticaacotantajivecarica jac  
tigaritaca tanarejanaque. <sup>3</sup>Oquiaquijai-  
vetanaca cajaraguiteni tee anejeriji  
impitsantsajajempaji Amajirote Jesoshi.  
<sup>4</sup>Oquenquejapoji, teequea ontsateji  
quero ococani. Iroompaquea amenitsita-  
riquia mavite shirampari<sup>v</sup> cantacovae-  
quequeate iitsaarequi tsirencavaetaque-  
quea tsiren. <sup>5</sup>Arikeate ocohocoitanaca  
otsaroamajatanaquequea oguerotsita-  
naca arejvaequitar ovancaqui  
quepatsiqui. Iriatimpajia icanquero-  
quea:

—¿Quero ococani pamenantaguejata-  
tarica anijatsica acaniqui yojoquijipiniji-  
trigueti metojaripae? <sup>6</sup>Teequea anejeriji  
acaniqui, pochatanaji. Iintsjate  
pinquenquejajajerojate icantajiaquem-  
pigueti ichoocavetacaguetai ontaniqui

Garireaqui, icantacotacauea icanque:  
<sup>7</sup> Iriraquea Irijanite Caquinte iraacaan-  
tajiqueriquea irajaiaqueriquea covaegui-  
shejiatsica irompajacojaqueri, iroompau-  
quea aapojajempagueti 3 savincaguiteri  
impochatanaje.'

<sup>8</sup>Arikea iroatimpajia oquenquejajia-  
najiroquea icanqueca Jesoshi. <sup>9</sup>Coajica  
ocoraquecoraqueitaji tsovironaquiui  
ocamantajiaopojiri itigarancanejia  
carajajatsica 11, aisa itsipajia. <sup>10</sup>Oratica  
camantajiaopojiquerica itigarancanejia  
iroguntijia Maria Magararaquitia,  
Joana aisa Maria iriniro Santiago aisa  
otsipapea otsipatsipaitanacaca. <sup>11</sup>Cotan-  
quitsiquea iriatimpajia teequea inquemi-  
santajigueroji. Yamenajiaquequea  
manacaja oquenquetsatamampeajiac-  
quea intati. <sup>12</sup>Cotanquitsiquea Peerero  
icatiitsitanaca ishiamajatanaca yojoquijiji-  
taquerigueti Jesoshi, yamenamorove-  
pojacaro intsompoguiqui cajaraguiten-  
iqueate, iroguentiquea yamenaguepoji  
omagopae yampiguiricacotantajiveca-  
rica. Arikea yoanaji tsovironaquiui,  
yamenanaquequea intati.

**Yoajianaque mavite itsatacaane Jesoshi**

**Emaoshiqui**

(Mr. 16.12-13)

<sup>13</sup>Iroompaquea coajica incajaranqui-  
guitetanaquegueti yoajianaque mavite  
itsatacaane Emaoshiqui. Inquenantapo-  
jaquemparogueti Jerosare, arica  
ocarataque 11 quiromeetero. <sup>14</sup>Iroompau-  
quea ari yoayoaitanaquequea quenavo-  
quirontsiqui iquenquetsatavacaajanaca  
iquenquetsatacojianaqueri Jesoshi  
querocaca icojiquerini imetojajiquer-  
gueti. <sup>15</sup>Irooqua iquenquetsajianaque-  
gueti, icoraquepojaque Jesoshi iriatimpia

<sup>t</sup> 23.56 *imaginejantajitaca*. Irira joriojia imaginejapinijiaque saavarroqui. <sup>u</sup> 24.1 Iroguenti  
opariantanaja *semana* savincaguiteri tominco. <sup>v</sup> 24.4 Ocanquegueti *mavite shirampari*,  
iriotaquequea irashivantijitete Aapani Irioshi, amenajiaqueri quempetaca caquinte.

itsipatsipaitanacari yoayoaitanaque-gueti.<sup>16</sup>Yamenajiavecarieate, cotanquitsiquea querocaquea icohicoita-querini Aapani Irioshi aatonijite itsajiguitsi iriguentica Jesoshi.

<sup>17</sup>Ariquea icantiriquea Jesoshi:

—¿Taaqueate piquenquetsatacopia-naque imaica?

Iriatimpajia icatintiitanaca ishimam-pojancajiaacaquea.

<sup>18</sup>Aparo ipajita Quereopashi, icanque-quea:

—¿Arimpate aparoquea picocani aviatimpa teequea pinquemacoteroji iquenquetsatacopiaquea maasano ontaniqui Jerosarequi? ¿Querocaquea picocani aviatimpa aparo pichoocataji teequea pinquemacoteroji chapinqui-tica?

<sup>19</sup>Iriatimpa icantsitariquea:

—¿Taaqueate opajita chapinquitica?

Icantiriquea:

—Orate imetojaquegueti Jesoshi

Nasarequitica. Iriatimpa iriguentiquea tsavetantatsica agavejamajatatsica nigaantaguequeroca oacaantantatsica intati, aisa itsamajati icanca itsatacaantaquegueti. Iriraquea Aapani Irioshi ishineventamajatacari oshequi, ariquea iquempejiaca maasanojia caquinteja.

<sup>20</sup>Iroompaeua iriraquea saserorotejia anaantajianquitsica aisa amajirojiate yaajianaqueriquea yojocapojiniri incantacaantajiaqueriquea irimetojaque, ariquea yompajacotsitari.<sup>21</sup>Iroqua-ruetünamenajiavecaquea ari irioji ompejiacajineca aattimpajia ishiraerijia aatonijite yashintajajitsi itsipapae cameetsanijite anchoocajajenijite intati. Imaicaquea yanaacovaetanaca 3 savincaguiteri imetojaque.<sup>22-23</sup>Cotan-quitsiquea oconoagarantajiaca manquigarentsijia notsipatsipaitacaca oahoita-naque incajaranquimi pitsecaguitetirajagueti amenajiajaterime yojoquijiveca-

rigueti, cotanquitsiquea teequea anejeriji. Iroompaeua ocoaquecora-queitaji omintsaraojiaquenaquea ocamantajia pojanagueti amenajiaqueri-gueti irashivantijitete Aapani Irioshi icamanquerogueti jac pochatanaji.

<sup>24</sup>Iroompaeua iconoagarantajiaca quea notsipajiacaca yoayoaitaquiti quea iriatimpajia yamenajiaquitiro, icantajiaque onetsanamajapo jiroqueate teequea anejeriji Jesoshi.

<sup>25</sup>Iroompaeua icantiriquea Jesoshi:

—¡Tequeratamajaca pintsatimajigueji! Teetari paitsitavaquemparoji maasano icantajia vecaca tsavetantajiguiroca icanquerica Aapani Irioshi coramanitica.

<sup>26</sup>¿Arimpaquea teequea incanteji iroquetita quea irantsipeva queempa quea Quirishitotatsica maasano ocatica, coajica intsajita queri iriguenti Oganejencamajatatsica ariquea impeamajatana queempa quea imajirote maasanojia?

<sup>27</sup>Iroompaeua iparianacaroquea itsatacajia queriquea maasanopae Itioncaca antaquea Aapani Irioshi tsavetacotsitacarica iriatimpa, ipariapa-najantaroquea itioncacotana quea Moishishini ariquea iquejeguetana que-roquea aisa itioncaco jiana quea tsavetantajitsica iriatimpajia, yoguiso-tojai aqueneriquea.

<sup>28</sup>Iroompaeua yarejerejeipojacaro Emaoshiniqui, yamenajiguiriquea Jesoshi arimpaquea iroana queme,<sup>29</sup>cotanquitsiquea yaajiajiru icantiriquea:

—Intsija aatoja poguitsi. Noninque pima imojiana quenaja naatimpajia, irootapojitarite ompitsecanaje.

Ariquea iquiaquijaitana quea intsompo-guiqui itsipatsipaitanacari.

<sup>30</sup>Ariquea isavisavi quea shitaponca-rontsiqui irishecacia queempa quea. Iriatimpa yaitsitaro quea pan yamana-

queriquea Iriri ishinevencaroquea, ariquea icotarejaqueroquea yojocajia-  
queneriquea.<sup>31</sup> Arikea oquejetetaca iroaqueragueti ipityaquirejanaque,  
itsajianajiriquea iriguenti Jesoshi,  
cotanquitsiquea iriatimpa jac ipejaenca-  
tapitsatanajari.<sup>32</sup> Icantavacaajianaca-  
quea:

—Arisacanica pinquenquejajero incajaranqui ontaniqui quenavoquiron-  
tsiqui iquenquetsatacavacajigueti yoguisotoacajirogueti Itioncacaanta-  
quea Aapani Irioshi queroquea ocojianacajini ochagashirentajianacaji-  
quea ashirejiaqui oshinetacaavaetana-  
caji.

<sup>33</sup>Iroompaquea icaticatiitsitanaca yoayoaitanaji icantacantaitanaja Jerosarequi. Yamenajiapoajiri itigarancaneja Jesoshi carajianquitsica 11, omporoguijajaciaca itsipatsipaitacari itsipapae. <sup>34</sup>Iriatimpajia icantavaqueri:

—Arimajaca pochatanaji Amajirote, yonigaavetajari Shimo.

<sup>35</sup>Arikea icamantajiaqueriquea iriatimpajia aisa querocaquea icojiaquerini itsipatsipaitanacarigueti quenavoirontsiqui teequea intsajigeriji, iroompaquea yamenajajirigueti tsoviornaquiqui icotarejaqueroqueti pan, ariquea itsatantajiacarica iriguenti Jesoshi.

**Jesoshi yonigaajajari itsatacaanejia**  
(Mt. 28.16-20; Mr. 16.14-18; Jn. 20.19-23)

<sup>36</sup>Choocatirajaquea quenquetsatava-  
caajianatsi, taampinaquea icatiimojiapo-  
jajari Jesoshi, icantajiapoajiri:

—Pishinejajajempa.

<sup>37</sup>Iriatimpajia itsaroajianaque oshequi  
itsaroacaajianacariquea yamenajiaqueri-  
quea iriocaja sashinti.

<sup>38</sup>Cotanquitsiquea Jesoshi icantiriquea:

—¿Taaca pitsaroacaimentajiaquea?

—Quero ococani piquenquejajiaquea

imaica?<sup>39</sup> Iintsija pameneja intati nacoqui aisa noguitiqui yompajacojique-  
nagueti. Naroguentiquea. Pinchagaji-  
guenaja pamenamajataquenanijite.  
Iriraquea sashinti teetarite onchoocateji  
itsino aisa itonqui, tee inquejetenaji  
naatimpa imaica pamenajiaquenagueti.

<sup>40</sup>Irooquaea icantajiaquerigueti imaica yamenacaajiaqueriquea iracoqui aisa iguitiqui yompajacojitaquerigueti.  
<sup>41</sup>Cotanquitsiquea yamenajiaqueriquea tee iragavejajajempaji inquenquejajero, caavijitarite ishinemajajianaca yamenamenaitanaquequea intati, icantantacarica Jesoshi:

—¿Chooca pisheca?

<sup>42</sup>Arikea yojoquitsitanariquea shima jocavoquiri. <sup>43</sup>Yaitsitariquea ishecata-  
cari, yamenacojiaqueriquea maasanopae.

<sup>44</sup>Arikea icantiriquea:

—Imaicaquea imaica maasanopae  
pamenajiaqueca irootaquequea notsata-  
cajaiquempica coramani choocatirajagu-  
etu notsipatsipaitaquempigueti,  
nocanquegueti onetsanamajatanaquem-  
paquea maasanopae itioncacoquena-  
gueti Moishishini aisa itioncacojiana-  
quenagueti tsavetantajiatsica aisa  
paperiqui Saremo itioncacotanaquena-  
gueti Taavini.

<sup>45</sup>Iroompaquea iriatimpa yagavejaca-  
jiaqueriquea intsamajajianaqueronijite  
taaca opajitapae ocantacoquea Ition-  
caantaqueca Aapani Irioshi, icanqueri-  
quea:

<sup>46</sup>—Arikea oquejetacaquea imaica  
itioncacojiquerogueti ocanque irantsipe-  
vaequempa Quirishitotatsica irimeto-  
jaque, cotanquitsiquea aapojempagueti  
3 savincaguiteri impochatanaje.

<sup>47</sup>Arikea intigarancaqueri tsavetantaji-  
atsica, intsavetantimojiaqueriquea  
maasano caquinteguetatsica incantajia-  
queriquea irovashiantajianajero

ipeacaaguishevecaca covaeguisherentsi  
incantashitatijaianajempaquea  
cameetsanijite irishetacojiajerinijite  
Aapani Irioshi aatonijite icatsimati  
mentiritsi icovaeguishejiacaguetai. Ariquea  
omparianaquemparoquea Jerosarequi,  
onquejetaqueempaquea imaica arejevae-  
tanaqueempaquea ontsitacaguitejavae-  
quemparoja maasanopae quepatsi.

<sup>48</sup>Aviatimpajia pamenanmajajaquero-  
quea maasanopae, imaica aviatimpa  
tsavetantajiaqueroneca. <sup>49</sup>Naatimpa  
nontigaranquimojiaquempiriquea  
icantsitacaca Aapani intigarancanqui-  
mojiaquempi, cotanquitsiquea pinchoo-  
cajiguetaja acaniqui Jerosarequi aatota  
poapoaiti osamani. Poguijajiguetaja  
intigarinquimojiaquempi Aapani

agavejacaajiapojempineca poneanquitsi-  
neca jenoqui.

**Yatsomajanajaguetai Jesoshi**  
*(Mr. 16.19-20)*

<sup>50</sup>Iroompaquea Jesoshi itsipatsipaita-  
nacari itsatacaanejia irooshipojiguetai  
Vetaniaqui. Ariquea icantajempequita-  
naja iraco yamanacoventajianaqueri-  
quea. <sup>51</sup>Irooqua iquejetanaquerogueti  
imaica yamanacoventajianaquerigueti  
yamenajiguiriquea yatsomajanaja  
yoanaque, yaajitanajiri jenoqui  
inquitequi. <sup>52</sup>Itsaroventajavajari,  
coajica yoayoaitanaji Jerosarequi  
ishinejianaica icanca. <sup>53</sup>Icantacoguitani  
yoayoaitapinijigi teemporouqui  
ishineventajiacari Aapani Irioshi.

# **QUENQUETSATSARENTSI OGANEJENCATATSICA ITIONCAQUECA**

## **JOANCA**

### **Antsatantaquemparoca**

Ocatica iroguenti antsatantaquemparoca itioncaqueca Joanca irijanite Severeo itioncacotaquerigueti Jesoquirishito. Joanca iriguenti jorio quintenitanquitsica quepatsqui icantajitica Garirea. Iriguenti itigarancane Jesoshi. Itsipatacari iriguentijeguite icantajitica Santiago iriguentijia quitsatacotirica shima tequeratagueti incajemajiguera Jesoshi iroguijatanaqueri. Irocashi itsavetacotaqueri Joanca paperiqui icantajitica *Yantajiguica Itigarancaneja Jesoshi* (Ya. 3.1-4.22). Itsipatacari Jesoshi itsatacaantigueti, cotanquitsi itsavetantacagueta quejetacaquea irio tioncaquero itsipa. Pampatsajavantacotaquerigueti itsatacaane Jesoshi ipintsamajatacaca, iriotaque Joanca irijanite Severeo, cotanquitsiquea tee incanteji “naroguenti”. Chooca itsipa Joanca irijanite Sacaria, iriotaquequea icantajitica Joanca Viñacajatantatsica.

Iquenquejajitaque itioncaquero ocatica paperi ichoocaquegueti quinteninintsqui icantajitica Epeso. Tecatsi tsamajaterone ajagantsini itioncaquerogueti, cotanquitsi chooca quenquejanquitsica arica itioncaquero ajagantsiniqui 85 irooca otsipa ajagantsini arejevaetacaro 98. Irirajia Maricoshi, Irocashi aisa Mateo itioncajiaquero ivaperitepae tsavetacoquerica Jesoshi tequeratagueti intionqueroji Joanca ocatica. Itioncaquero 3 paperipae cacaajaniquitanquitsica tequeratagueti intionquero ocatica tsavetacotaquerica Jesoquirishito. Oratica cacaajaniquitanquitsica opajijiga *1 Joanca, 2 Joanca, 3 Joanca*. Impojitapojatsica itioncaquero aisa paperi icantajitica *Yonigaajiguequerica Joanca*.

Itioncaquegueti Joanca jeroquea inintamajataque antsajaque: iriraquea Jesoshi irovetaca caquinte cotanquitsi iriguenti Irioshi. Joanca itsavetacoguetaquero yamejigaca joriojia, irootaque atsatantacaca itioncaqueneri teeca iriojia joriojia cameetsaniji intsatantajiaquempaca iriraquea Jesoquirishito irio Meshiashi itigarancaqueca Aapani Irioshi, iriotaque irijanite Aapani Irioshi (Jn. 20.31). Irootaquequea caarica ipariantaro intsvetacotaquero ivoantacaca Jesoshi, iroguenti iparianacaro icamantajiacaji iriguenti Jesoshi peacaacaroca maasano. Irio tsavetacomajaqueroca iquejetacaacagueta Jesoshi itsatacaantaquegueti: Jesoshi iriguenti Irovejajaniquite Aapani Irioshi (1.29, 36); Jesoshi iriguenti pan anijacaantantatsica (6.35, 47-51); iriguenti Tsirencari (1.4-12; 13.19; 8.12; 9.5); iriguenti cameetsari quempoguijamajajiguirica oveja (10.11-15); iriguenti quejecaroca quenavo quirontsi (14.6); iriguenti quejecaroca ovorentsamajaca ova

(15.1-8). Irira Joanca irio tsavetacomajataqueroca oratica savincaguiteri iroshipojigueti irimetoje Jesoshi, itsavetacomajaquero yantaguetaqueca aisa itsatacaantaqueca pitsecariqui oratica savincaguiteriqui (capitoropae 13-17) aisa coajica ipochatanajigueti (cap. 20-21).

---

**Iparianacaroqueate Joanca  
itsavetanqueriqueate irira icantajitica  
Quenquetsatsarentsi**

**1** <sup>1</sup>Iraqueragueti igantaga ichoocataque Quenquetsatsarentsi.<sup>a</sup> Irira Quenquetsatsarentsi itsipatacariqueate Aapani Irioshi. Irira Quenquetsatsarentsi, iriotaque Irioshi. <sup>2</sup>Irío itsipatacaca Aapani Irioshi iroqueragueti. <sup>3</sup>Iriotaquequeate peacaaguetacaro maasano choocaguetatsica. Tee onchoocatashitempajiqueate teeca impeacaguemparo iriatimpa, aisa aatomegueti ichoocatime iriatimpa aato ochoocague-time. <sup>4</sup>Iriatimpa iriguentequeate anijacaantantatsica, aisa iriratica anijacaantantatsica iriguentequea tsirencacojiaquerica caquintejia.<sup>b</sup> <sup>5</sup>Iriraquea Tsirencari itsirencaque pitsecariqui, cotanquitsi pitsecari tee agavejavajeriji.

<sup>6</sup>Ariqueate ichoocatini caquinte itigarancaqueca Aapani Irioshi, ipajita Joanca. <sup>7</sup>Iroguentiqueate icoraquetashataque intsavetanqueriqueate irira Tsirencari, cameetsanijite iraventajiaquemparinijite maasano. <sup>8</sup>Iriraqueate Joanca teequeate irio Tsirencari, iroguenti icoraquetashitaque intsavetanqueri Tsirencari. <sup>9</sup>Icoraquetapojaquea quepatsiqui irira Tsirencarimajaca tsirencacojiaquerica maasano caquintejia.

<sup>10</sup>Ichocataque quepatsiqui, iriotaquea peacaavetacaro quepatsi, cotanquitsiquea irirajia quepatsiquitica teequea intsajavajeriji. <sup>11</sup>Icoraquetantavetacarоquea quepatsi yashincaca iriatimpa, cotanquitsi irirajia yashintajiacaca teequeate irishineventajavajempariji. <sup>12</sup>Cotanquitsi maasano shineventajiacarica, aventacaroca ivajiro, irio icantacojiaqueca cameetsa impeaquempa irijanijiate Aapani Irioshi. <sup>13</sup>Oraqueate ipeacaajiacarigueti irijanijiate Aapani Irioshi teequea onquempetemparoji yoacaantigueti caquinte, aisa teequea onquempetemparoji inintigueti caquinte iroacaantaque, iriguenteritari nintanquitsi Aapani Irioshi irijanintantaquemparica.

<sup>14</sup>Iriraqueate icantajitica Quenquetsatsarentsi icaquintetapojaque iguinentitimojiapocajaji. Namenajiaqueriqueate yoganejencamajata, iriguenteritare Irijanite Aapani Irioshi apaniroquea icoca iriatimpa, caavijiquea icavintsa-jantavaetaque, aisa teequeate iramatavijanteji. <sup>15</sup>Iriraqueate Joanca itsavetacataquerigueti iririjencani icanti: “Iriguentitarite irira noquenquetsatacotaqueca iroqueragueti nocamantajiaquempiqueate nocanti: ‘Iriraqueate imoitapojenanea yanaaquaquea, iriquetitari choocatatsi.’”

<sup>16</sup>Iriatimpaqueate caaviji icavintsa-jtamajati, icancani icavintsa-japinijiacaji

**a 1.1** Irira icantajitica Quenquetsatsarentsi iriotaque Jesoquirishito. Pamenero otsapa 17, jero aisa 1 Jn. 1.1-3. **b 1.4** tsirencacojiaquerica caquintejia. Iroguentiqueate icoraquetashitaque mananijite intsatacaajiaquerinijite teeca intsajavetempaji quempecaquea manaca itsirencacojiaqueriqueate pitsecacojiaquitsica.

aatimpajia maasano.<sup>17</sup> Aritarite oraquea Cantacaantanentsi, irio Moishishini yojocacaitaquene, yogaqueneri itsipajia; orampani cavintsajantamajata-gantsi aisa iroomajatatsica, iriguente-quea Jesoquirishito amaquiero.<sup>18</sup> Tecatsi nejimaterine Aapani Irioshi, cotanquitsi irira Irijanite apatirotica itsipamajata-caca itsatacaajiacajiqueate quero icotani Iriri.

**Joanca Viñacajatantatsica  
itsavetanqueriqueate Jesoshi  
(Mt. 3.11-12; Mr. 1.7-8; Irc. 3.15-17)**

<sup>19</sup> Iriraqueate joriojia Jerosarequitica itigarancajajiqueriqueate saserorotejia jerijia aisa irevitapae incoacojiaqueri Joanca taaquea inaque.

<sup>20</sup> Arikeate teequeate iromanacotempajiriatimpa, tampatica yoquiero icanquerica, icamantamajajavaqueri icantajiguiru:

—Tee naroguenti Quirishito.<sup>c</sup>

<sup>21</sup> Arikeate yapijitajiriquea aisa icantajiguiriquea:

—Iroosacanicate, ¿taampate aviguenti? ¿Aviguenticajate Iriashini?

Icantiri:

—Tee naro Iriashini.

—¿Aviguenti irira tsavetantatsica nagamajajivacaca?

—Tee.

<sup>22</sup> Arikeate yapijitsitajariquea aisa icantajiguiriquea:

—¿Taampate aviguenti? Iintsijate poguisotoguenaro noncamantantajiap-jemparica tigarancaquenaca. ¿Queroca-gueti pincanqueni? Intsija pincamanta-cotempa.

<sup>23</sup> Arikeate icantajiaqueriqueate Joanca:

**c 1.20** Quirishito ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraquetaque impeaquempa imajirote ompejiaqueparineca.

**d 1.23** Icanquegueti Pintanarejaguetereri iguenavoquiro Amajirote ontampaticapoquitantana-quempaca, ocantacotaque irinetsanajiguempa, incomajatashijiavauquempariqueate Amajirote. Is. 40.3.

—Naroguentiqueate quenquetsatasica oquitamampororoipojaquegueti niririjencani, nocantapinitaqueua: ‘Pintanarejaguetereri iguenavoquiro Amajirote ontampaticapoquitantana-quempaca’,<sup>d</sup> irootaquetari itioncaqueua tsavetantatsica Isaiashini coramani.

<sup>24</sup> Iriraqueate coacojiaquerica Joanca iriguentequea tigarancajajiqueripariseojia. <sup>25</sup> Arikeate icantajiaqueua:

—Iroosacanicate teesacanicate aviguenti Quirishito, tee aviguenti Iriashi, aisa teequeate aviguenti tsavetantatsica coraquetanquitsineca. ¿Queroqueate octacani piviñacajatatarica agonororioja?

<sup>26</sup> Icanti Joanca:

—Naatimpa noviñacajatantacaro oja, cotanquitsi chooqueate conoaquem-pica teeca pintsajigueriji. <sup>27</sup> Iriguente-tirite impoitapojenaneca, cotanquitsi iriqueti choocatatsi. Caaviji yanaaque-naquea, aatotarite noquempejitaritsi-quea iriatimpa nompeaqueempame amiquerineca noishorejacoquerime igaviguitire.

<sup>28</sup> Irirajiaqueate coacojiaquerica ariquea yoashijianaqueriqueate Vetaniaqui, choocatatsica intatiquero Jororanequi, aritari iviñacajatantaque Joanca oraniqui.

**Jesoshi iriguentequeate Irovejajaniquite  
Aapani Irioshi**

<sup>29</sup> Arikeate osavincaguitetanajigueti irira Joanca yamenavaqueriqueate Jesoshi icoraquepojaquegueti icanti: “Jeri irinta Irovejajaniquite Aapani Irioshi shejiaquenerineca iguempevaere

caquinteja. <sup>30</sup>Iriotaque queate not save-tanta queca chapinqui, nocantiqueate: ‘Incora quetaque shirampari impoitapo-jenane ca yana aquena quea, iriquetitari choocatatsi.’ <sup>31</sup>Naatimpa quea aisa tee quea nontsavetempariji, cotanquitsi nocora quetaque noviñacajatantaguetan-tacaro oja cameetsanijite intsajia queri-nijite maasano ishiraerijia.”

<sup>32</sup>Ariqueate icanti aisa Joanca: “Namenava queri Ishire Aapani Irioshi iponeapo jaca jeno qui inquite qui iquejetapojacari emoreni, yampiguirica-shipo jacari quea Jesoshi, ichoocapojiri. <sup>33</sup>Iroaqueragueti tee nontsavetempariji, cotanquitsi irira quea tigaranca queunaca noviñacajatantacaro oja icanquena quea: ‘Quericaca pamenava queri irampiguiri-cashita pojempari Noshire inchoocapo- jeri, iriotaque viñacajatantacari Noshire.’ <sup>34</sup>Namenamajatava queri- queate, iroota quequeate nocantantacaca iri guen queate Irijanite Aapani Irioshi.”

### Iriquetica ipeajia queca Jesoshi itsatacaane

<sup>35</sup>Ariqueate osavincaguitetanajigueti irira queate Joanca ichoocataji orani qui itsipajiacari mavite itsatacaane.

<sup>36</sup>Iroompae queate yamenava queri Jesoshi yavisana que, icanti:

—Jeri irinta Irovejajani quite Aapani Irioshi.

<sup>37</sup>Iroompae queate i quemajaivaquitigu-i queate itsatacaane mavite ariqueate yoguijajia itana queri Jesoshi. <sup>38</sup>Ipitso-canaca queate Jesoshi yamenava queri yoguijajiaipoja queri queate icantaji-guire quea:

—¿Taate pininque?  
Iriatimpajia icantajiguiriquea:  
—Tsatacantantsica, ¿quiero pichoo-caqueni?

<sup>39</sup>Icanti Jesoshi:  
—Jameja pamena quitero.  
Ariqueate yoajiana que yamena queri, ariqueate isaviquimotapanajantiri oratica savincaguiti, iroorijite tsaparoncaguitetanaja catsirin caiteri.

<sup>40</sup>Apaniro queate quemava queri Joanca oguijatan a queri Jesoshi, iri guenti Antirishi iri guentijeguite Shimo Peerero. <sup>41</sup>Ariqueate iriatimpia iroqueti yo aquiti icoaguequitiri iri guen-tijeguite, inejapoja queri queate icampo-jiri:

—Nonejajia queri Meshiashi —o can-taque: “Quirishito.”<sup>e</sup>

<sup>42</sup>Ariqueate itsipatanacari ichoocaque-gueti Jesoshi. Iroompae yamenava queri-gueti icantiri:

—Aviguenti Shimo, irijanite Jonashi. Imaica quea imaica pincantajempa Sepashi —o canque: “Peerero”.<sup>f</sup>

<sup>43</sup>Osavincaguitetanajiguete queate iroanaje Jesoshi Garire aqui. Ariquea inejajia queri Jeripe icantiriquea:

—Poguijatan a quena.

<sup>44</sup>Irira queate Jeripe ari iguente nita Vetsairaqui iguente nita queuti Antirishi aisa Peerero. <sup>45</sup>Ariqueate irira Jeripe yo ana queate icoaguequitiri Natanaere, iroompae queate inejapoja tui-giri icantiri:

—Nonejajia queri quea irira itioncacota-na queca Moishishini coramani jerija aisa itsipa tsavetantajiatsica. Iriguenti queate Jesoshi Nasarequita, irijanite Jose.

e 1.41 *Messiashi* oponeaca iguenquetsatsarequi evereo aisa arameo. *Quirishito* oponeaca iguenquetsatsarequi guiriego. Mavite ocanque “Ishaguijata queca” aisa “Icoguia queca”, irio yoguijajia queca ishiraerijia incora quetaque impea queempa imajirote ompejia queemparineca. f 1.42 *Sepashi* aisa *Peerero*. Oraqueate ivajiro Peerero manaqueate ocanque “mapi”. Iroguenti iguenquetsatsarequi guiriego. Iguenquetsatsarequi arameo *ja Sepashi* ocanque “mapi”.

- <sup>46</sup>Icantiriqueate Natanaere:  
—¿Choocampaca cameetsatsatsica  
poneanquitsica Nasarequi?  
Icantiriqueate Jeripe:  
—Caacatejate pamene.  
<sup>47</sup>Iriraquea Jesoshi iroompaquea  
inejavaquitatiguri icoraquepoaquegueti  
Natanaere iquenquetsacotavaqueri icanti:  
—Jeri ishiraerimajaca. Iriatimpa tee  
iramatavijanteji.  
<sup>48</sup>Icantiri Natanaere:  
—¿Queroquea picocani pitsatantava-  
quenaca?  
Icantiriqueate Jesoshi:  
—Nonejitsiquempiquea incajaranqui  
pitsimampeacarogueti iguera tequerata-  
gueti incajemempiji Jeripe.  
<sup>49</sup>Arikeate icantanaquequeate Natanaere:  
—Tsatacaantantatsica, aviguente-  
queate Irijanite Aapani Irioshi, aviguente-  
queate Imajirote ishiraerijia.  
<sup>50</sup>Icantiri Jesoshi:  
—Piquemaquitatigana nocanquempi-  
gueti nonejaquempi pitsimampeacaro-  
gueti iguera ¿irootaquempa pitsatanta-  
pojacaroca picanquenaca imaica?  
Coajicaqueate pamenaguetavaquero-  
queate otsipapae anaqueroneca oca.  
<sup>51</sup>Arikeate icantiri aisa Jesoshi:  
—Imaicaquea noncamantamajajiaquempi,  
coajicaqueate pamenajavaqueroquea inquite  
ontanarejanaquempagueti. Iriraqueate  
irashivantijite Aapani Irioshi iroaroaita-  
naque jenoqui, arikea iragujijujitashitapo-  
jeri Irijanite Caquinte.<sup>g</sup>
- Iparianacarogueti imapocaquero Jesoshi**  
yonigaanqueroquea yagavejica
- 2** <sup>1</sup>Aapojacagueti 3 savincaguiteri  
ishineventajiacaro imanquigaca-  
gueti shirampari Canaaqui Garireaqui.

Arikeate ochoocataquequea oraniqui  
iriniro Jesoshi. <sup>2</sup>Icajemaantajiquer-  
iqueate Jesoshi jerijiaquea aisa itsataca-  
nejia. <sup>3</sup>Arikeate oteroncanacaqueate  
vinoja. Oraqueate iriniro Jesoshi  
oashitanaqueriquea ocamantaqueri  
ocantiri:  
—Teroncanaca vinoja.  
<sup>4</sup>Cotanquitsiqueate Jesoshi icantiro:  
—¿Querocate ocotacani, manquiga-  
rentsi, picantantaquenaca naatimpa?  
Tequeratatirajanica aguempaji  
nonigaantaquempa.  
<sup>5</sup>Cotanquitsiqueate iroatimpa ocanta-  
jiguiriqueate quitajatantiroca vinoja:  
—Pinetsanatavaqueroqueate taaca  
opaji incanquempica.  
<sup>6</sup>Arikeate choocaqueate oraniqui 6  
inirotsentseinapae chomo ipeacaantajita-  
roca mapi, iroguenti yamejiga iquivantapi-  
nijiacaca joriojia. Apamiropaequeate  
otserajaguetacaro oja arica 50 ritorio, arica  
<sup>7</sup>7Arikeate Jesoshi icantajiguiriqueate  
quitajatantiroca vinoja:  
—Pishatecaguetajero oja chomoqui.  
Arikeate ishatecaguetajiro opanco-  
jaguetanajaroquea intati. <sup>8</sup>Arikeate  
icantajiguiriqueate:  
—Imaicaquea imaica pinquitajate  
capichaaji paacotanaqueneriquea  
vetsicacaantaqueroca ashecajiacagueti  
iramenanquemparoquea.  
Arikea yaacojianaqueneri. <sup>9</sup>Yame-  
nantavacaroqueate oja peananquitsica  
vinoja, teequeate intsateroji quero  
oponeacani. Iriguentijiaquea tsajiaque-  
roqueate quitajatantiroca, iriotari  
tserajajiaqueroca oja iroqueragueti.  
Iroompaqueate imiraquitigaroqueate  
icajemaqueriqueate iriaqueraca manqui-  
gatananquitsica, <sup>10</sup>icantiri:

<sup>g</sup> 1.51 Icanquegueti Jesoshi *Irijanite Caquinte* mana icantacotaca iriatimpa, mana oquejetaca  
icantacoqueri itsipa. Iriotaque Quirishito Meshiantatsica quenapojanquitsica jenoqui  
inquiteequi, icaquintetapojaqueetari ivoapojaque.

—Iroorijite amejigaro iroquetica ajivajiguero cameetsajamajatanquitsica vinoja, coajicaqueate iquemajianacagueta irooqueate iquitajaitaque teesaconaca oncameetsajamajateji. ¿Queroqueate picotacani aviatimpa teequeate ari pinquejetero imaica? Manaquea iroquetiquea pimirajiaca teesaconaca oncameetsajamajateji, irooqua pitsoteajiaca cameetsajamajatanquitsica.

<sup>11</sup>Ocatica oacaantantatsica intati onigaantaqueroca iragavejane, iroguenti jivatanquitsica imapocaqueca Jesoshi, ipeacaacaroquea ontaniqui Canaaqui choocatatsica Garireaqui, yonigaantantacaroca iroganejencare, ariqueate iquemisantajiaqueri itsatacaanejia, yaventajianacari.

<sup>12</sup>Arikea yoanajiquea Caperenaoqui, itsipatanacaro iriniro, iriguentijeguitapea, jerijia aisa itsatacaanejia. Ariqueate ichoocajiaque oraniqui aparopae savincagüiteri.

*Jesoshi yoguisotojajiqueriquea  
jocantaguetirica viratsi teemporoqui  
(Mt. 21.12-13; Mr. 11.15-18; Irc. 19.45-46)*

<sup>13</sup>Arikeate oquempejipojigueti Paashicoa ishineventajiacaca joriojia, yoanaquequea Jesoshi Jerosarequi.  
<sup>14</sup>Arikeate yoavetanacagueta teemporoqui itsaroventantajitarica Aapani Irioshi iriguentiqueate inejapoji jocantaguetirica caapironcaari aisa oveja jeriqueate aisa jocantaguetirica emoreni, ichoocajiaque oniganquirequi. Arikeate ichoocajiaquequea aisa oguiplantaguetirica imentaquipae.

<sup>15</sup>Iriraqueate Jesoshi yaanaque peatsa, yampitaguiquero ishincantajiacariqueate maasano, yoguivorocajiaqueriqueate yoguisotojajiqueru itsipatacanaguecariquea irovejatepae aisa igaapironcaarite. Ipishoncavoncaquitsi-

queriqueate imentaquitsitepae oguiopian-tajiguirica imentaquipae, yapitaquiacoguequero ishitaponcaropae.<sup>16</sup>Arikeate icantajiaqueriqueate jocantajiguirica emorenii:

—Paajianajeri pemorenite ontaniqui sotsiqui. Ocaqueate itsovironaquite Aapani aatoqueate piquejetacagaro yojocantantajiguetirogueti ajaararontsi.

<sup>17</sup>Iriraqueate itsatacaane ariqueate iquenquejajianaqueroqueate ocanqueca itioncacojiquerogueti ocanti: “Nontsane-amajaquemparoqueate pitsovironaquite incovaeguishejitaquerogueti, osemacaamajatanaquena.”<sup>18</sup>Irirajia joriojia icantsijigariqueate:

—¿Taaquea cantaquempi piquejetancaroca imaica? Irioca cantaquempi Aapani Irioshi iintsijate ponigaguena-roja oacaanaquenaneca intati irooqua nontsatantajiaquempaca iriguenti tigarancaquempi.

<sup>19</sup>Icantajiqueriqueate Jesoshi:

—Iintsija pisoveguero ocatica teemporo, ariqueate aapojempagueti 3 savincagüiteri nontsitacajeroquea aisa.

<sup>20</sup>Icantajiguiriqueate joriojia:

—Jmm aricampa, oraquea ocatica teemporo ariquea yatsipejaciaro yantajiguironi 46 ajagantsini. ¿Queroquea oncoquempani pintsaquitsitantajempa-roca aviatimpa 3 savincagüiteri?

<sup>21</sup>Cotanquitsiqueate oraquea icankegueti “teemporo” mana icantacotaca iriatimpa iquejetacaaca intati, iroguentiquea icantacotaque itsino.<sup>22</sup>Irootaquequeate irirajia itsatacaanejia yamenajiaquerogueti coajica ipochatanajigueti imetovjavetacagueta iquenquejajianajiroqueate ocatica icanqueca iroaqueragueti, ariqueate itsajiaque arimaja ocanta-majataque Itioncacaantaquea Aapani Irioshi coramani aisa maasano icantajiaquerica Jesoshi.

**Jesoshi itsajiguiri maasano**

<sup>23</sup>Arikeate aapojacaguetai Paashicoa choocatirajaqueate Jesoshi Jerosarequi, arikeate oraniqui yantaguetaquero cameetsaguetatsica oacaantantanaque intati, yonigajiaqueri yagavejica. Inejajiajavaqueriquea irootaquequeate iquemisantantajianacarica oshequini, yaventajianacari.

<sup>24</sup>Cotanquitsiqueate Jesoshi itsatavaqueriquea tee arimaja inquemisantamajateriji maasano, itsajiguiritari maasano caquintejiatsica. <sup>25</sup>Teequeate incogumentempaji incamantajitaqueri quero icojiacani, inchiquiojitsitari itsaque iriatimpa, itsamajatirotari maasano iquenquejajiaqueca caquinte.

**Jesoshi aisa Nicoremo**

**3** <sup>1</sup>Choocaqueate pariseo icantajitica Nicoremo, iriguenti majirontatsica tsipajiacarica itsipajia imajirojiate joriorja. <sup>2</sup>Iriatimpaqueate yoanincancaqueua tsiteniriqui irinejeri Jesoshi, ariquea icampoaqueri:

—Tsatacaantantatsica, notsajiaquempi piponeaca Aapaniqui Irioshiqui pintsatacajiaquenanjite, teenica inchoocateji agavejatsineca irantaque oacaantantatsica intati inquejetaquemqueate aviatimpa aatogueti iriguenti tsipatari Aapani Irioshi.

<sup>3</sup>Iriraqueate Jesoshi icantiri:

—Imaica noncamantamajataquempi, quericaca aatogueti ivojai aisa, aato yagaveji inejiro imajirontagueti Aapani Irioshi.

<sup>4</sup>Icantiri Nicoremo:

—¿Querocampate incotanajempanti quenquevari irovoantajempacate aisa?

¿Arimpate iragavejaque impianajero intsompogui omotijaqui iriniro irivoantajempacate?

<sup>5</sup>Icantiriqueate Jesoshi:

—Imaicaquea noncamantamajaquequipueira, irira caarica voantaro oja,<sup>h</sup> caarica aisa ivoashirentica Ishire Aapani Irioshi, aatoquea yagaveji iquiji imajirontagueti Aapani Irioshi.

<sup>6</sup>Iriraquea ovoaqueca tsinotsi, tsinotsi inaque; iriraquea ivoaqueca Ishire Aapani Irioshi, shiretsi inaque.

<sup>7</sup>Aatoquea poanaque intati nocamantaquempigueti: ‘Picoguimentaca pivojajiae.’ <sup>8</sup>Iriraquea choviga itampijataque querocaguetai mintaque. Arikea piquemavaqueri itampijatigueti ipojimajencatanaque, cotanquitsi teequea pintsateriji quero iquenajencatapoji aisa quero irojaencatanaqueni. Arikea iquejetaca maasano ivoaqueca Ishire Aapani Irioshi.

<sup>9</sup>Icantsitanajariqueate aisa Nicoremo:

—¿Queroquea ococani oca?

<sup>10</sup>Icantsitanajariqueate aisa Jesoshi:

—Arivetacaquea aviguenti tsatacaaajiguirica ishiraerija ¿arimpate tee pintsateroji oca? <sup>11</sup>Arimajaquea noncamantamajaqueMPI, manaquea nocamantajavetaquempiro notsajiguica naatimpajia jeroquea aisa nonejaguetica, cotanquitsiquea aviatimpajia teequea pinquemisantajiavaqueroji notsatacaaajiaquequempica. <sup>12</sup>Imaica nocamantajavetaquemqueate inejajigueta acaniqui quepatsiqui, cotanquitsi teequeate pinquemisantajiavaquenaji. ¿Arimpate pinquemisantajiavaquena nonquenquetsatacaaajiaquequempirogueti choocaguetsica inquiequi?

**h 3.5** Oraquea icantajitigueti acaniqui *voantaroca oja*, chooca iquejetacaajitacaca: (1) Chooca cantatsica iriguenti icantacojitaque viñacajatatsica yovashiantirogueti igoavaeguishere. (2) Chooca cantatsica iroguenti icantacojitaque inianquiare chaajanquiri. (3) Chooca cantatsica iriguenti icantacojitaque Ishire Aapani Irioshi, anejaqueritari Ishire Aapani Irioshi iquejetacaajitacari oja. Pamenero Jn. 7.38, 39; 4.14.

<sup>13</sup>Teequea inchoocateji oananquitsica jenoqui inquitequi, apaniro irira poneanquitsica inquitequi coraquetanquitsica isaviji. Irio nocantacotaque, Irijanite Caquinte.<sup>i</sup> <sup>14</sup>Coramani iriraqueate Moishishini yogatiacotaqueriqueate quejevertarica camaarini ontaniqui oquitamampororoipojaquegueti.<sup>j</sup> Ariqueate inquejetacaajitaqueri irira Irijanite Caquinte irogatiacojitaqueriquea coajica, <sup>15</sup>aatoniji ipejaiga maasano aventajiaquemparineca, incoguitempani inchoaguiteni.

<sup>16</sup>“Aapani Irioshi caaviji ipintsamajatari maasano caquintejiatsica, irootaquequea ipantajiacarica Irijanite irapatiroritsite irimetojaventajiaqueri, aatonijite ipejaija maasano aventajiaquemparineca, incoguitempaniqueate iranijajiae. <sup>17</sup>Teenica irooqua intigaranquimenteri Irijanite acaniqui quepatsiqui incantacaantajiaqueriqueate caquintepae iroajianaque camorecariqui, iroguentiquea itigaranquimenqueri iraajajateri. <sup>18</sup>Quericaca aventaquemparineca aato icatsimamentajitiri igovaeguishere, iriraqueate teeca iraventempariji irioquea icantacotsica Aapani incatsimamentajiqueru igovaeguishere, teenica iraventemparoji ivajiro Irijanite Aapani Irioshi irapatiroritsite. <sup>19</sup>Jeroquea icantamentajiacarica: icoraquevetaca Tsirencari quepatsiqui, cotanquitsiquea irirajia caquinteja irquenti inintamajajinaque pitsecari, teequea irishineventajiaquemparijji Tsirencari, covaequishtacatari yantajiaqueca. <sup>20</sup>Maasanotari antagushejiguiroca quempevaerentsi

isemamajajiacaro tsirencari, teequea incoraquetashitero aatoniji inejitajitiri yantagushejiaqueca. <sup>21</sup>Cotanquitsi iriraquea comajamajatanquitsica icoraquetashitaquero tsirencari, cameetsanijite irinejitsijiqueriqueate yantaqueca intsajitaquerinijite iriguenti agavejacaqueri Aapani Irioshi.”

### Joanca Viñacajatantatsica itsavetantajiriquea Jesoshi

<sup>22</sup>Ariqueate yoanaque Jesoshi Joreaqui itsipatsipaitanacariea itsatacaanejia. Ariqueate ichoocajiaque oraniqui oshequi savincaguiteri iviñacajatantajiaquequea. <sup>23</sup>Arikeate iquejetaca irira Joanca iviñacajatantajiaquequea Enonequi quempeji Sarime, chocatarite oshequi oja oraniqui. Icoraquetashipinijiaqueriqueate oshequi caquinte iviñacajajiaqueriquea. <sup>24</sup>Tequeratratirajatari irashitacojiteriji Joanca santanaqui. <sup>25</sup>Arikeate irira itsatacaanejia Joanca itsipajiacari itsipa irapijorioten iquenquetsatavacaaca iquenquetsataquero ora taaca opajita caavijica osaancanti. <sup>26</sup>Arikeate yoashijianaqueriquea Joanca icantajiguri:

—Tsatacaantantatsica, iriraqueate pitsipatacaca chapinqui ontaniqui intatquieroqui Jororanequi pitsavetantajueca imaica choocaquea iviñacajatantajueque. Yoashijianaqueriquea maasano.

<sup>27</sup>Icantajiguiriqueate Joanca:

—Teequeate inchoocatimateji agavejanquitsineca inchiquioji aatogueti yagavejachaguiri irira chocatanquitsica inquitequi.

<sup>28</sup>Aviguentiquea quemajiaquena nocaman-

i 3.13 Chooca otsipapae paperi ocanti: *Irijanite Caquinte choocatatsica inquitequi*.

j 3.14 Coramani ontaniqui oquitamampororoipojaquegueti yatsicajiaqueriqueate joriojiani oshequi camaarinipae. Arikeate icanqueri Aapani Irioshi Moishishini: “Iintsija pinquejetacaguempa camaarini, pogatiacoteri inchapojaniqui iramenajiaqueriniji pigonorojia, aatoniji imetojajigui maasano amenajiaquerineca.” Arikeate yaaque Moishishini voronquise, ipeacaacari camaarini, yogatiacoqueri, ipeantajianajaca oshequi igonorojia.

taquempigueti teequeate naroguenti Quirishito, iroguentiquea itigarandquimenquena Aapani Irioshi nojivataqueri.  
<sup>29</sup>Pamenerija iriraqueate iriaqueraca manquigatanquitsica iriotaque ashintamajacaro imanquigare. Iriraquea itsipatacaca manaquea itsipatacari intati iquemisanqueriqueate iquenquetsaqueguedi, ishinevencariquea intati. Arikea noquejetaca naatimpa noshinevencariea namenaquerigueti yoashijianaqueri.  
<sup>30</sup>Imaica arimaja oncotanaquempsa iriatimpa arimpaeua iranaantamajatanaque, naatimpa aatosaconaqua nanaantaji.

<sup>31</sup>Iriraqueate poneanquitsica jenoqui yanaamajataqueri maasano. Iriraqueate quepatsiquitica iquejejiacariqueate igonororjia, manaqueate iquenquetsatacoguetaquero inejaguetica quepatsiqui. Iriraqueate poneanquitsica inquitequi yanaamajataqueri maasano,  
<sup>32</sup>iroquenti itsavetantagueque inejaguetica, iquemaguetica, cotanquitsiquea tee inquemisantajitavaqueroji itsavetantaqueca.  
<sup>33</sup>Cotanquitsiquea quericaca quenisantamajatavaqueroneca incanquequea arimajaquea icantamajataque Aapani Irioshi.  
<sup>34</sup>Aritarite iriraquea itigarancaqueca Aapani Irioshi iquenquetsataque icanqueca Aapani Irioshi, teenica intsanguempariji Aapani Irioshi Ishire.  
<sup>35</sup>Aapani Irioshi ipintsamajatacari Irijanite, yojocaueneriquea maasano choocaguetsica.  
<sup>36</sup>Iriraquea aventacarica Irijanite Aapani Irioshi, yashintacaro anijagantsi coguitatsineca. Irirampani teeca irininteji inquemisanteri Irijanite Aapani Irioshi, aato yameniro anijagantsi, manaquea ocancani ochoocaueri igatsimare Aapani Irioshi.”

#### Iquenquetsatacaqueri Jesoshi Samariaquitica

**4** <sup>1</sup>Arikea pariseojia iquemacojiaqueriqueate Jesoshi arimpayoshequiaqueri itsatacaaneja,

caavijiquea yanaantaque iviñacajatanta-guetanaque, yanaanaqueriquea Joanca.  
<sup>2</sup>Cotanquitsi teequea arimaja irio viñacajatantatsine Jesoshi, irguentiquea viñacajatantanquitsiquea itsatacaaneja.  
<sup>3</sup>Arikeate iriraquea Jesoshi irooompaquea iquemacocagueti iquenquetsatacojiquer, isotoantanajaro Jorea, yoanajiquea Garireaquí.

<sup>4</sup>Oraquea yoanajigueti manaquea iquenanaji Samariaqui.  
<sup>5</sup>Oraniquiqueate Samariaqui yarejetapojacaro guintenintsi icantajitica Shicare oquempejiquero quepatsi yashintavecaca Jacovoni coramani yojocanajinirica irijanite icantajitica Jose.  
<sup>6</sup>Arikeate ochoocataque oraniqui oja iqueecacotinica Jacovoni. Imagotapoijiqueate Jesoshi yanijitaqueguedi quenavoirontsiqui, ariqueate isavicapoji oraniqui. Tampatapirojaque catsirincaiteri.  
<sup>7-8</sup>Iriraqueate itsatacaaneja yoajianaquequeate ochoocatigueti tsovironaquipae irivegarajigue irishecajiaquempaca. Iriraqueate Jesoshi inejatiguro ocoraquepojaque manquigarentsi guinentitaroca oraniqui Samariaqui aajate oja, icantiroquea:

—Pojoquenajate nomire.

<sup>9</sup>Ocantiriquea manquigarentsi Samariaquitica:

—Aviguentitari jorio, naatimpaquea naroguenti Samariaquitica. ¿Quero ocozacani pamanantauenaca naatimpa oja pimire?

(Iriraqueate jorioja imantajiguiritari Samariaquitica.)  
<sup>10</sup>Icantitaroqueate Jesoshi:

—Pintsaqueromeguedi irojocaque-mica Aapani Irioshi, aisa pintsaquerime amanaquempiroca imire, pamanaque-rime iriatimpa, irojocaqueempime oja anijacaantantatsica.

<sup>11</sup>Ocantiri manquigarentsi:

—Teenica onchoocateji paajantanquemparoca, aisa ocatica oja ochoocavaetaque jmm isaviji. ¿Querocaquea

paaqueroni oja anijacaantantatsica pojocaquenaca? <sup>12</sup>¿Arimpate panaaqueri avaesatiniteni Jacovoni queecacotanaqueroca ocatica oja? Iroguentitari imirapinitaca iriatimpa, jerijia irijanijiate, jerijia aisa ivirapae.

<sup>13</sup>Icantiroquea Jesoshi:

—Maasano miracaroca ocatica oja irimiretanajequeate aisa. <sup>14</sup>Cotanquitsiquea iriraquea miraqueroneca oja nojocaquenerica naatimpa aatoquea imiretaji. Ocaticaquea oja nojocaquenerica ompeanajempa motojaaro omotoo-jashirentanaque ishirequi, onchoocata-caaqueri incoguitempaniniji iranijagu-teni.

<sup>15</sup>Ocantiriquea manquigarentsi:

—Intsishia pojoquenaroja oratica oja nomirerota aatonijite nomiretaji, aatoniji nocoraquetaji acaniqui noncaja-pinitaje.

<sup>16</sup>Ariqueate icantiroqueate Jesoshi:

—Intsija pincajemaquierija manqui-gatimpica, pincoraquetajequea aisa.

<sup>17</sup>Ocantiriqueate:

—Teequeate inchoocateji manquigata-naca.

Icantsitajaroquea Jesoshi:

—Pitampaticataquero picanquegueti tee inchoocateji manquigatimpica.

<sup>18</sup>Ichoocavetaca manquigavetimpica oshequi, ivegaravetaca 5. Iriraqueate pitsipatajaca imaica, teequea irio pimanquigare. Picantamajataque.

<sup>19</sup>Ocentsitariquea manquigarentsi:

—Nomajirote, nonejaquempi avigu-en-tajate tsaventatatsica. <sup>20</sup>Irirajia novaesatinite manaquea itsaroventapini-jacari Aapani Irioshi acaniqui otsempiqui. Aviatimpajia joriojia

picantajiaque iroguenti Jerosare antsaroventantaquemparica.

<sup>21</sup>Icantiroquea Jesoshi:

—Intsijate, manquigarentsi, pinque-misantavaquenaja noncamantaquem-pueta. Aapojempa savincagüiteri aatoquea pitsaroventajajari Aapani Irioshi acaniqui otsempiqui, aato aisa Jerosarequi. <sup>22</sup>Aviatimpajia Samariaqui-tica teequa pintsafigueriji pitsaroventa-vetacaca, manaquea pitsaroventamam-peajiacarquea intati. Naatimpajia joriojia notsajiguiri notsaroventacaca, aritarite irira Meshiantatsica, jorio inaque. <sup>23</sup>Cotanquitsiquea imaicaquea aapojaca savincagüiteri irira tsaroventa-majajiacarica Aapani Irioshi intsaroventajajauemparigueti onquenavaetanaque intsompogui ishirequi, intsaroventama-jajauemparitari. Irootaquetari ininque Aapani inquejejiaquempa imaica intsaroventauemparigueti.

<sup>24</sup>Iriraqueate Aapani Irioshi shiretsi inaque. Quericacaquea tsaroventarica intsaroventajajauempari ishirequi, aisa arimajaquea intsaroventamajajauem-pariquea.

<sup>25</sup>Ocantiriquea manquigarentsi:

—Notsaqueate incoraqueque Meshiashi icantajitica Quirishito.<sup>k</sup> Oraquea incoraquequegueti incamanta-majajiaquenaquea maasano.

<sup>26</sup>Arikea icantiroquea Jesoshi:

—Iriguentitari quenquetsatacaaqué-pica imaica, naroguentitari.

<sup>27</sup>Arikeate icoraquejiajopajajiquea itsatacaanejia. Yamenajiajopajiquerigueti iquenquetsatacaaquerogueti manquiga-rentsi mana yamenajianaque intati, cotanquitsiquea tecatsi cantapojerine:

<sup>k</sup> 4.25 *Messiashi* oponeaca iguenquetsatsarequi evereo aisa arameo. *Quirishito* oponeaca iguenquetsatsarequi guiriego. Mavite ocanque “Ishaguijitaqueca” aisa “Icoguiaqueca”, irio yoguijajivaqueca ishiraerijia incoraquetaque impeaquempsa imajirote ompejiaquempar-nea.

“¿Taa opaji pininque?” Tecatsi cantatsine: “¿Quero ocotacani piquenquetsatacantacaroca?”

<sup>28</sup>Iroomba iroatimpa ojoquijipanajantiroqueate intati icajantajitaroca oja, oanaquequeate ontaniqui oguinteniqui ocantajipojaqueriqueate ogonorojia:

<sup>29</sup>—Caacateshiatsi pamenajiaquiterija irinta caquinte, icanquenaqueate maasano nantaguisequeca. ¿Taaca ipaji? ¿Irioca Quirishito?

<sup>30</sup>Ariqueate yoayoaitanaque yoguijajaitanaqueroqueate yamenapojiri Jesoshi.

<sup>31</sup>Irirajiaquea itsatacaanejia iroompaqueate yamenajiavaquerogueti oanaquegueti oncantajiaquiteri, icantajiguiri-queate Jesoshi:

—Tsatacaantantatsica, pishecatempa.

<sup>32</sup>Icantiqueate iriatimpa:

—Naatimpa choocatari nosheca teeca pintsajigueji aviatimpajia.

<sup>33</sup>Iriatimpajia icantavacaajianaca-quea:

—¿Choocampa amaquenerica isheca?

<sup>34</sup>Cotanquitsiquea Jesoshi icantajiguiri-quea:

—Iroguenti nosheca nantaqueneriqueate ininqueca tigarancaquenaca, ariquea nonteroncaqueneri nonetsanamajaqueroquea maasano icanquenaca.

<sup>35</sup>Picantajiaveca: ‘Cuatrotiraja taaí osampatantanaquempaca oitsoqui iravigujitaqueroqueate.’ Cotanquitsiqueate naatimpa noncantajiaquempi-

queate iintsijsa pamene, pamenajigueroquea niganquitejirentsipae, jac sampatanaque oitsoqui, pajiniquea irajaitero.

<sup>36</sup>Iriraqueate aguiroca oitsoqui irivegarajiqueriquea irishinevaequempanijite tsaqiroca intsipaquempariquea aguiroca. Iriguentitari quejecaroca oitsoqui irirajia iquemisantacaajita-

queca incoguitempaniniji inchoocaguiteni. <sup>37</sup>Arimajaqueate icantamajajique-roqueate: ‘Apaniroquea tsacaqueroca, itsipaquea aajeroneca.’ <sup>38</sup>Naatimpa-queate notigarancajiaquempi paajaque-roqueate teeca aviro tsacajiguerone. Itsipaqueate tsacajiaqueroca, imaicaquea aviguentiquea aajiaquero yatsipeventajiacaca.

<sup>39</sup>Arikea oshequi Samariaquitica guinentantaroca oratica guinentinintsi iquemisantajianaqueriquea Jesoshi iquemajiavaquerogueti manquigarentsi otsavetantaquerigueti, ocanti: “Icantajia-quea maasano nantaguetaqueca.”

<sup>40</sup>Iroomba icoraquejiaquegueti Samaria-quitica, inejajipojaqueriquea icajemajiaqueri irimaimojaqueri. Ariqueate yoanaque imaanaque mavite savinca-guiteri. <sup>41</sup>Arikea iquemisantajiaqueriquea ontaniqui itsipajia oshequi, iquemamajajiaqueritarite iquenquetsaquegueti iriatimpa. <sup>42</sup>Ariqueate icantajiaqueroqueate manquigarentsi:

—Noquemisantajiaque pitsavetanta-querigueti aviatimpa, cotanquitsi imaica caaviji noquemisantamajajiaque, inchiquiojitaro noquemajiaqueri naatim-pajia, arikea notsatanaque arimajasaca-nicate iriguenti meshiajiaquerineca quepatsiquitica, iriguenti Quirishitota-tsica.

**Jesoshi yogueshitajiri irijanite iramajirore majirontatsica**

<sup>43</sup>Iroomba avisanaquitigui mavite savincaguiteri yogaanajaquea Jesoshi yoanaji Garireaqui. <sup>44</sup>Icantajeterite iriatimpa Jesoshi, iriraqueate tsavetantatsica tee irishineventajitempariji iguinteniqui. <sup>45</sup>Iroomba yarejetapojatiga Garireaqui yaajiavaqueri cameetsa choocajatsica oraniqui, yoajiaquititarite

iriatimpajia aisa Jerosarequi yogavisa-  
jaiaquitirogueti Paashicoa, ariqueate  
yamenajiaqueri yantaguequeca oacaan-  
tantatsica intati.

<sup>46</sup>Ariqueate ipianajaquea Jesoshi  
Canaaqui Garireaqui oraniqui ipeacaa-  
carogueti oja vinoja. Choocaqueate  
iramajirore majirontatsica iguinentitaca-  
queate Caperenaoqui, yojoquijicaquea  
irijanite. <sup>47</sup>Ariqueate iriatimpa iquema-  
cotavaquerigueti Jesoshi arejetapoja  
Garireaqui iponeacaquea Joreaqui,  
yoanaquequea icantapojaqueri  
iroanaqueniji itsvironaquitequi  
irogueshitajeneriquea irijanite,  
pajiniquea irimetoje. <sup>48</sup>Iriraquea Jesoshi  
icantiri:

—Aviatimpajia aatoguetiqueate  
pamenajigana nantaguetaquerogueti  
oacaantantatsica intati, aatoquea  
pitsaroventajigana.

<sup>49</sup>Icantiri iramajirore majirontatsica:  
—Nomajirote, caacateshiatsi pajini  
irimetoje irijani.

<sup>50</sup>Icantiriqueate Jesoshi:  
—Pimpianajequea imaica, anijatsi  
pirjanite.

Iriatimpa iquemisanqueriqueate  
icanquerica, yoanaji. <sup>51</sup>Iroompaqueate  
yoanajigueti pajiniguetti irarejetajempa  
itsvironaquitequi itonquivojajivacari-  
quea amitacojiguirica icantajavajiri-  
quea:

—Anijatsi pirjanite.

<sup>52</sup>Icoacotavaqueri iriatimpa  
queroquea icarataqueni catsirincaiteri  
ipeantanajaca.

Icantajiguiriqueate:

—Chapinqui iroqueragueti icononca-  
naja catsirincaiteri ari icotanaja  
isavogatanaji ipeanaja.

<sup>53</sup>Arikea iquenquejanaquero aritarite  
iroqueragueti icononcanaja catsirinca-  
teri icantaquegueti Jesoshi: “anijatsi  
pirjanite.” Irootaquea iquemisan-

tantanacarica itsatantacaca iriomajaca,  
ariquea iquejejiaca aisa maasano  
conoajiacarica. <sup>54</sup>Ocaticaquea iroguenti  
mavitetapojatsica oacaantantatsica  
intati yonigaantaqueca Jesoshi  
iponeacagueti Joreaqui yoanajigueti  
Garireaqui.

Jesoshi yogueshitajiri caarica anijivetatsi

**5** <sup>1</sup>Arikea irirajiaqueate joriojia  
icapiocajiacaqueate irogavisaaaja-  
jero otsipa savincaguiteri ishineventaji-  
acaca, ariqueate yoanaque Jesoshi  
itoncoanaque Jerosarequi. <sup>2</sup>Oraniqui-  
queate Jerosarequi oquempejiquegueti  
osotomoro icantajitica Isotomoro Oveja  
ariegate ochoocataque osamponaja,  
icantajitiro evereotsaqui Veteshita.  
Chooca oraniqui icatisetajigueta  
tsvironaqui ovegarataca 5. <sup>3</sup>Irootaque-  
tari inorijantajiga oshequini caquinte  
joquijiguetanquitsica, shamponaja-  
ripae, itsipajia teeca incatigueji,  
itsipajia magoviroshittatsica. [Yoguijajia-  
queroqueate omparencajatavajempata  
oja. <sup>4</sup>Icoraquepiniquetari irashivantite  
Aapani Irioshi iparencajatapojiro,  
ariegate quericaca iriquetica quijaantan-  
quitsica iquenapanajanti ipeanaja.] <sup>5</sup>Choocaqueate apaniro oraniqui  
yojoquijitani iriquetinica, teequea  
impejaempaji yajagantsitacovaetanaca-  
queate aavaetanacaqueate 38 ajagantsi.  
<sup>6</sup>Iriraqueate Jesoshi inejapojaqueri-  
queate norijaca, itsapojaqueri yajagan-  
tsitacovaetanaque coramani teequea  
impejaempa, icantantacarica:

—¿Pininque pimpeanajempa?

<sup>7</sup>Yacanaqueri joquijitanquitsica:

—Nomajirote, teequea inchoocateji  
jocajatavaquenaneca oparencajataca-  
gueti oja. Nopitsopitsovecaqueate  
naatimpa inchiquioji teequea nagave-  
jempaji, manaqueate yanajaitanaquena.

<sup>8</sup>Icantiriqueate Jesoshi:

—Iintsija pincatianaje pinatanajero pinorijantacaca, panijitanaje.

<sup>9</sup>Iroompaeua icanquitigui ariquea ipeanaja, inatanajiro inorijantacaca, yanijitanaji. Cotanquitsiqueate iroguentiquea savincaguitei imagorejantajitaca, <sup>10</sup>icantantajiacaca queate imajirojiate joriojia:

—Imaicaqueate iroguenti savincaguitei imagorejantajitaca, tee oncameetsateji pinatanajero gueti pinorijantacaca, icantimentantajitirotarite.

<sup>11</sup>Iriatimpa icantiriqueate:

—Iriraquea ogueshitajanaca iriguente cantaquena: ‘Pinatanajero pinorijantacaca, panijitanaje.’

<sup>12</sup>Arikeate icantajiaqueriqueate:

—¿Queriquea cantaquempica: ‘Pinatanajero pinorijantacaca, panijitanaje?’

<sup>13</sup>Cotanquitsiquea iriatimpa teequea intsateriji queri ogueshitajirica, icapiocajiacatari, iriraquea Jesoshi jac yoanaji. <sup>14</sup>Arikea Jesoshi inejapojajiri teemporoqui itsaroventantajitarica Aapani Irioshi icantiri:

—Imaicaqueate peanajimpi, aatoquea papijitajiro aisa piquempevaetaja, aapojajimpitsi otsipa anaquieroca.

<sup>15</sup>Iriatimpa yoanaquequeate icamanta-jaqueriquea imajirojiate joriojia, icantajiapojaqueriqueate:

—Iriguenti ogueshitajana Jesoshi.

<sup>16</sup>Irootaquequea icatsimatantajiacarica joriojia Jesoshi, inintajiavecaqueate irimetojajiaquerime, yamenajiaqueritate iroguenti yogueshitantajari savincaguitei imagorejantajitaca. <sup>17</sup>Cotanquitsiqueate Jesoshi icantajiguiriquea:

—Ari icoca Aapani irosati yantaguini, ari noquejetacari naatimpa aisa, irosati nantaguitini.

<sup>18</sup>Irootaquequea arimpaquea icatsimajatantajianacarica imajirojiate joriojia, inintamajajiana que irimetojajiaqueri, teenica aparo iogueshitantan-

temparo savincaguitei imagorejantajitaca, manaqueate aisa iquejemanatana-cri Aapani Irioshi icanquegueti iriguente Iririmajaca.

**Oraqueate yantagueta Jesoshi teequea inchiquioji irantashitemparo iriatimpa**

<sup>19</sup>Arikeate icantajiguiriqueate Jesoshi: “Imaicaquea noncamantamajajquempiquea, iriraquea Irijanite Aapani Irioshi, oraqueate yantaqueca teequea inchiquioji irantashitemparo iriatimpa, iroguentiquea yantake yamenacoque-rica yantagueta Iriri. Querocaca isavicaventica Iriri, irootaquequea isavicaventaque iriatimpa. <sup>20</sup>Iriraquea Iriri ipintsamajatacaritari Irijanite, yonigaaguetaqueneri maasano yantagueta. Arikea ironigaqueneri otsipapae anaquieroneca pinejajiaqueca imaica, aviatimpajia pamenajiana quea intati. <sup>21</sup>Aritarite quejetaca irira Aapani itancorejajiguiriqueate metojaji-avetanquitsica, yanijacaajajiri, arikeate iquejetaca Irijanite, iranijacaajeriquea quericaca ininqueca.

<sup>22</sup>Aisa irira Aapani tee irionica cantatsine queri irogashinoncajajiqueca, iriguentequea Irijanite icanque incanta-coqueri. <sup>23</sup>Arikea iquejetaproimaica cameetsaniji maasano irishineventama-jiaquerempariniji Irijanite inquejetaca-jaqueremparinijite ishineventajiacari-gueti Iriri. Quericaca teeca irishineven-tajiguempariji Irijanite teequea irishine-ventajiguempariji Iriri tigarancaquerica.

<sup>24</sup>“Imaicaquea noncamantamajajajquempiquea, maasano inquemaquerogueti nocanqueca aisa inquemisanquerogueti tigarancaquenaca incoguitempaniquea inchoocaguiten, aatoquea icatsimatimentajitiri igovaeguisphere, manaquea yojocanajiro metojagantsi, yarejetapoja anijagantsiqui.

<sup>25</sup>Aisaquea noncamantamajajajquempi-

queate, aapojempa savincagüiteri, jac aapojacatari imaica inquemantajia-quemparoca metojaitsica icanqueca Irijanite Aapani Irioshi, ariqueate maasano quemisantajiaquerica iranijajianaje.<sup>26</sup> Iriraqueate Aapani yanijashitacatari intati, iriotari anijacaantantatsica. Arikea inintacaaqueri Irijanite iquejetancarica yanijashitaca iriatimpa, aisa iriguenti anijacaantantatsica.<sup>27</sup> Aisa icanqueriqueate iriotaque cantacotaquerine caquinte quero incojitaquerini, iriguentitari Irijanite Caquinte.<sup>28</sup> Aatoquea pamenajianaque intati, aapojempatarite savincagüiteri inquemantajiaquemparica maasano iquitajivetacaca,<sup>29</sup> arikea incampanajante irisotoajianajequea. Iriraquea comajamajajianquitsica intancorejajianajequeate, iroajianaquequea jenoqui inquitequi, incoguitempani inchoocajiae. Iriraquea teeca incomajamajaji-guempaji intancorejajiavetanajempaquea manaqueate incatsimatimentajiqueriqueate igovaeguishere.

#### Tsavetacotantajiguirica Jesoshi

<sup>30</sup>“Teequeate nantashitempajiqueate inchiquiojitsita. Querocaca icanquenaca Aapani, irooqueate nocanque naatimpa, aisa notampaticamajataquero maasano nocanqueca, teenicate iroguenti noncoraquetashite nantaquero querocaca noninqueca naatimpa, iroguentiqueate nocoraquetashique nantaqueroquea maasano inintaguetica Aapani tigarancaquenaca.<sup>31</sup> Oraquea apanirome nontsavetanquempamequea naatimpa arimequea pincantajiaqueme: ‘Aatoquea noquemisantiri, irisati tsavetacotajatsi.’<sup>32</sup> Cotanquitsiqueate choocaqueate itsipa tsavetantaquenaca. Naatimpa notsataque arimaja icantamajataque itsavetacotaquenagueti, teequea iramataguempaji.<sup>33</sup> Pitigarancaqueri-

gueti coacoquerineca Joanca, iriatimpa tampatica yoavaquero itsavetanquero iroomajatatsica.<sup>34</sup> Cotanquitsi itsaveta-cojitaquenagueti, teequea iro noshine-ventavacaca oratica poneanquitsica caquintequi, manatari noquenquejaca-aquempiotari itsavetacotaquenagueti Joanca cameetsaniji pimeshiajiaquem-paniji.<sup>35</sup> Iriraquea Joanca iquejevecari tsivorentsi morecanquitsica itsivotaque-queate. Aviatimpajia iro pinintajiaque-quea pishineventapanajantaro itsivota-cojiaquempigueti.<sup>36</sup> Cotanquitsiquea chooca tsavetantaquenaca anaqueroca itsavetanquenagueti Joanca. Oraquea nantaguetaquerogueti icanquenaca Aapani, caavijiquea anaantaque pintsatimentajiaqueronijite arimajaquea iriguenti tigarancaquena Aapani.<sup>37</sup> Arikea iquejetaca Aapani tigaranca-quenaca itsavetantaquenaquea iriatimpa, cotanquitsiquea aviatimpajia teequea pinquemajigueroji icanqueca, aisa teequea pinejajigeriji quero icotani.<sup>38</sup> Arikea oquejetaca iguenque-tsatsare teequea onchoocamajateji pishirequi, teetarite pinquemisantajiava-queriji itigarancaqueca.<sup>39</sup> Aviatimpajia papatsajavantapinijiavecaroqua Itionacaantaqueca Aapani Irioshi pijijiaqueroji irooqueate anijacaajajem-pine pincoguitempaniniji panijaguiteni. Iroguentiquea tsavetantaquenaca naatimpa,<sup>40</sup> cotanquitsiquea tee pininta-jigueji pincoraquejigue naatimpaqui panijantajajempaca.

<sup>41</sup>“Tee naashitemparoji irishineventa-jiaquena caquinte,<sup>42</sup> cotanquitsi notsajiaquempi aviatimpajia, tee pimpintajiguempariji Aapani Irioshi.<sup>43</sup> Naatimpa iriguenti tigarancaveta-quena Aapani, aviatimpajia teequea paajiaquena. Cotanquitsiquea incoraquequegueti itsipa teeca intigarancajiteriji inchiquiogueti

iriatimpa incoraquetashiquempa, irioquea paajiaavaque. <sup>44</sup>Manatari piquenquejajiaque pishineventavacaaji-aquempa intati, teequeate iroguenti pinquenquejajigue irishineventajia-quempi Irioshimajaca apatiroti icota. Piquejejiacagueti imaica ¿quero pincoji-aquempani pinquemisantajigue? <sup>45</sup>Aato piquenquejajigui pijijiaqueji noncamantaqueriquea Aapani teegueti pinquemi-santajigueji. Choocaquea itsipa camanquerineca, iriguenti Moishishini paventamajajavetacaca. <sup>46</sup>Oraqueate pinquemisantamajajiaquerime Moishishini, pinquemisantajiaquename naatimpa aisa, naroguentitari itioncactaque. <sup>47</sup>Teenica pinquemisantajigueroji itioncavecaca, ¿arimpate pinquemisan-tajiaquero nocanquempica naatimpa?"

**Ishecatacaajiacarigueti Jesoshi  
yoshequiamajataque caquinteja**  
(Mt. 14.13-21; Mr. 6.30-44; Irc. 9.10-17)

**6** <sup>1</sup>Ariqueate Jesoshi imontejacojianaca intatiquero inromotijaqui icantajitica Garirea, icantajitiro aisa Tiverashi. <sup>2</sup>Choocaqueate oshequini caquinte gujaguijaitapiniquerica, yamenajiaqueritarite yonigaantagueque-rogueti oacaantantatsica intati yogueshijiadirigueti joquijiguetatsica. <sup>3</sup>Iriraquea Jesoshi yoanaque otsempiqui itsipatsipitanacari itsatacaanejia, isavicajapioji ontaniqui. <sup>4</sup>Irooshipojaque aantapoempaca savincaguiteri Paashicoa ishineventajigaca joriojia. <sup>5</sup>Arikeate Jesoshi yamenajiaquerigueti icoraquecoraqueipoji oshequini caquinte, icantiriquea Jeripe:

—¿Queroquea avegarajiaqueni pan ashecatacaajiaquemparica maasano iricajia?

<sup>6</sup>Manaqueate icanquegueti Jesoshi imaica iramenaque queroqueate incante Jeripe, cotanquitsiqueate iriatimpa

itsaquequea queroquea iraaquero.

<sup>7</sup>Iriraqueate Jeripe icantiri:

—Jmm arigueti avegarajiavetaque-m-pagueti oshequi pan vegaratánquitsica 200 tenario, aato otsitacari irishecajia-quempa apaniropae capichaji.

<sup>8</sup>Arikeate icantanaquequeate itsipa itsatacaane Jesoshi icantajitica Antirishi, iriguentejiguite Shimo Peerero, icantiri:

—Jeri irica chaajaniquitirajaca yamaque ovegarataca 5 pan ipeacaanta-jitaca oitsoqui sevara, jeri aisa mavipa-quite ishimate, cotanquitsi yoshequia-majatatiguinimaja caquinte, carimpate intsitacajiaquempari?

<sup>10</sup>Iriraquea Jesoshi icantiquea:

—Iintsijate pincantajigueriqueate maasano irisavisaviitaque.

Oraniquiquea chooca oshequi cataroshi. Arikea isavicajiaque maasano. Iriraqueate shiramparjia jmm icarajiavaetaque 5,000.

<sup>11</sup>Arikeate Jesoshi yaqueroquea pan yajiriquero, yamanqueriquea Aapani Irioshi, icantajueri: "Arioteesaa." Yojocajia-avaqueneriquea maasano savisavitantanquitsica. Arikeate iquejetacaacari shima yojocajiaqueneri querocaca ininqueni.

<sup>12</sup>Iroompa iquemapojacagueti icantajiguiriquea Jesoshi itsatacaanejia:

—Paaguetajeroquea choocaguetajtatsica aatoniji opomatsata capichaji.

<sup>13</sup>Yaaguetajiroquea iteguetajiro cantiriqui. Ochoocavetaquea 5 pan, jeroquea imaica iquemajianacarogueti maasano ochoocataji otseraiquitanajaro-quea ocarataji 12 cantiri. <sup>14</sup>Arikeate yamenajiaquerogueti maasano yonigaanquerogueti Jesoshi oacaantantatsica intati yoshequiaquerogueti pan icantajianaquequea:

—Arimajasacanica iriotaque tsavetantatsica aquemacoqueca coramani incoraquetaque quepatsiqui.

<sup>15</sup>Cotanquitsiqueate Jesoshi itsataque intajiavetacauea irajaiquerime

impeacaajiaquemparime imajirote, itsinampirejajianajiri, apaniro yoanaji otsempiqui.

**Yanijijatanaquerogueti Jesoshi  
jenoquija oja**  
(Mt. 14.22-27; Mr. 6.45-52)

<sup>16</sup>Ariqueate pajinigueti ompitseca-naque irirajia itsatacaanejia Jesoshi yagategateitanajiqueate omotijaqui.  
<sup>17</sup>Itejiapojaroquea quenajarontsi imontejacojianaqua intatiqero iroaroaitanajequeate Caperenaoqui. Pitsecanajiquea, iriraqueate Jesoshi tequerata incoraquetajeji. <sup>18</sup>Ariqueate icampojiquea choviga jeoc jeoc jeoc itamacosejaatanaqueroquea.  
<sup>19</sup>Ariqueate yoacojianaque niganquija arica 5 irooca 6 quiromeetero, inejajavajiri Jesoshi icoraquepojajiquea yanijijatapojiroquea jenoquija oja, icantajiaquitiquea neguic, itsaroajiana-quequea intati. <sup>20</sup>Cotanquitsiqueate iriatimpa icantajiguiriquea:

—Naroguenti, aato pitsaroajigui.

<sup>21</sup>Ariqueate iriatimpajia ishinejiana ja intepojajempa, ariuea oquenapanajanti agapojaji otsapijaqui Caperenaoqui.

**Yamenaguetajiri Jesoshi**

<sup>22</sup>Ariuea osavincaguitetanajigueti maasanoquea capiocaventajiacarica Jesoshi chapinqui iquenquejajianajiro-quea yamenajiavajirigueti itsatacaanejia yoanajigueti teequea intsipajianajem-pari iriatimpa. Aisa teequea onchoocateji otsipa quenajarontsi, apatirotitari choocatanquitsi itehiteitanajaca.

<sup>23</sup>Iroompaa coraquepojaque otsipapae quenajarontsipae Tiveriashiquitica agaguetapojiqueate oquempejiquegueti ishecajiacarogueti pan, icantacoventa-querogueti Amajirote: “Arioteesaa.”

<sup>24</sup>Ariqueate yamenajiaquegueti iriatimpajia tee inchoocateji Jesoshi irisati

itsatacaanejia, itehiteitanaja yoayoaitanajiquea Caperenaoqui incoaguetajeri.

**Jesoshi iriguenti isheca caquinte  
anijacaajajerineca**

<sup>25</sup>Ariqueate yarejerejeipojacagueti inejajiajapojajiriquea Jesoshi icantajiajapojiriquea:

—Tsatacaantantatsica, ¿quiero icaratini parejetaca acaniqui?

<sup>26</sup>Cotanquitsiqueate Jesoshi icantiri:

—Imaicaquea noncamantamajaja-quempi teequeate iroguenti pincoimentajiguena pamenajiaquenagueti nonigaanquerogueti oacaantantatsica intati, iroguentiquea picoimentajia-quena pishecajicaro pan piquemajina-naca. <sup>27</sup>Aatoquea iroguenti pitampishiventamajajigui pisheca teroncanajatsineca, iroguentiquea pintampishiventamajajigue pisheca aatoca oteronca, oncoguitepani anijacajaempiquea. Irooqua irojocajiaquempica Irijanite Caquinte, iriotarite ijicotaqueca Aapani Irioshi, quejetaca iseyotaqueri.

<sup>28</sup>Iriatimpajiaqueate icantajiguiriquea:

—¿Queroquea noncojiaquempani nontampishiventantajiaquemparoca inintacajiaquenaca Aapani Irioshi?

<sup>29</sup>Icantajiguiriqueate Jesoshi:

—Jeroquea inintacajiaquempica Aapani Irioshi pintampishiventamajajiguero: paventamajajiguempari iriraquea itigarancaqueca, pinquemisantamajajia-naqueri.

<sup>30</sup>Icantajiguiriqueate:

—¿Taa opajita ponigaajiaquenaca cameetsaniji namenajiaquerogueti nonquemisantajiaquempiniji? ¿Taa opaji pantaguetaque ponigaantague-taque? <sup>31</sup>Coramani ichoocajiavetacagueti avaesatinite ontaniquiqueate oquitamampororoipojaquegueti ishecajicaroquea manaa. Oraquea itioncaco-querogueti ocanti: ‘Yojocajiaqueneri-

queate pan poneanquitsica jenoqui inquitequi.'

<sup>32</sup>Irraquea Jesoshi icantajiguiri- queate:

—Imaicaquea noncamantamajaja- quempiquea, teequeate irio Moishishini jocajiaquempiroca pan poneanquitsica jenoqui inquitequi, iriguentuea Aapani jocajiaquempiroca iroomajaca panmajaca poneanquitsica jenoqui inquitequi. <sup>33</sup>Oraqueate pan yojocaquempica Aapani Irioshi, irooqueate poneanquitsica jenoqui inquitequi anijacaajiaquerica quepatsi- quitica.

<sup>34</sup>Arikeate icantajiaqueri:

—Nomajirote, pincoguitempaniquea pojocapinjijaquenaro oratica pan.

<sup>35</sup>Icantiri Jesoshi:

—Naroguentitari pan anijacaantanta- tica. Irira coraquetashitaquenanea aatoquea itaseimataji. Arikeate inquejetaquempa aventaquenanea, aatoquea imiretimataji. <sup>36</sup>Cotanquitsi nocamantajavetaquempitari pamenajia- vequenaquea teequeate pintsajiguenaji, tee parentajiguenaji pinquemisantajiguenaji. <sup>37</sup>Maasano yojocaquenaca Aapani, incoraquetashitaquena; irira coraquetashitaquenanea aato noguiopia- vaqueri. <sup>38</sup>Teenica iroguenti noncora- quetashite acaniqui quepatsiqui nantaque noninqueca naatimpa, mana nopusneacaguetti jenoqui inquitequi iroguentiquea nocoraquetashitaque nantakerouequa ininqueca tigaranca- quenaca. <sup>39</sup>Iroguenti ininque Aapani tigarancaquenaca aato noguipeguiri apaniro yojocaquenaca, manaquea novochantajajeri intati aapojaquem- guetti savincaguiteri vegaratapojaatsineca. <sup>40</sup>Ininquetari Aapani tigaranca- quenaca incoguitepaniquea inchooaque maasano amenajiaqueri- neca Irijanite, aventajiaquemparineca.

Arikeua naatimpa novochantajajeri aapojaquempaguetti savincaguiteri vegaratapojaatsineca.

<sup>41</sup>Arikeua icantimanajianaqueri joriojia iquemajiaquerigueti icanque- gueti: "Naroguenti pan poneanquitsica jenoqui inquitequi." <sup>42</sup>Icantajiguiri- queate:

—¿Teecajate irio Jesoshi irijanite Jose? Atsajiguiritari iriri aisa iriniro. ¿Quero occocani icantantacaca 'Noponeaca jenoqui inquitequi'?

<sup>43</sup>Icantsjigariquea Jesoshi:

—Aato picantimanatantajigui picanta- vacaajiacaguetti. <sup>44</sup>Aato icoraquetashi- tana caquinte aatoguetti icajemashiren- tire Aapani tigarancaquenaca. Arikeua naatimpa novochantajjeri savincaguiteri vegaratapojaatsineca. <sup>45</sup>Ocanque- tarite itioncajiaqueca tsavetantajatisca ocanti: 'Aapani Irioshi intsatacajiaque- riquea maasano caquinte.' Maasanoquea quemajiavaquerica Aapani, intsajiava- querogueti icanqueca, incoraquetashi- quena naatimpa. <sup>46</sup>Tee noncanteji imaica chooca nejaquerica Aapani.

Apaniro irira poneanquitsica Aapaniqui Irioshiphi, irio nejaquerica Aapani.

<sup>47</sup>Nocamantamajajiaquempiquea quericaca avempojenaneca incoguite- paniquea inchoocataje, aatoquea imetojaji. <sup>48</sup>Naroguenti pan anijacaan- tantatsica. <sup>49</sup>Coramani ichoocajaveta- guetti pivaesatinite ontaniqui oquitamampororoipojigueti ishecajiave- caroqueate manaa, cotanquitsiquea imetojajajiquea intati. <sup>50</sup>Cotanquitsi- queate ocatica pan noquenquetsatacota- queca naatimpa ariguenti oquenapoji jenoqui inquitequi, cameetsanijite quericaca shecaquemparoneca aatoquea imetojajitsi. <sup>51</sup>Naroguenti pan anijatsica poneanquitsica jenoqui inquitequi. Quericaca shecaquemparoneca ocatica pan incoguitepani iranijanaque.

Ocatica pan nojocaquenerica, iroguenti notsino nojocajiaquenerica maasano caquintejiatsica cameetsanijite incoguitempaninijite iranijaguiten.

<sup>52</sup>Arikeate iquenquetsatavacaajiana-caquea joriojia, icantajiae:

—¿Queroquea incoquempani iricatica irojocajiacajirogueti itsino ashecajia-quemparoquea?

<sup>53</sup>Icantajiguiriqueate Jesoshi:

—Imaicaqueate noncamantamajaji-aquempi aatogueti pishecatsitanaro notsino, aisa aatogueti pimiritajiganaro noriraja, aatoquea ochoocatimpi anijagantsi. <sup>54</sup>Quericacaquea shecaquemparoneca notsino aisa irimiraquerogueti noriraja onchoocapojeri anijagantsi coguitatsica, arikea nontinaajeri naatimpa savincaguiteriqui vegaratapojaatsineca. <sup>55</sup>Oraqueate notsino iroguentiquea iroomajaca ishecajítaca. Arikea oquejetaca iroatimpa noriraja, iroguentiquea iroomajaca imirajitaca.

<sup>56</sup>Quericaca shecaquemparoneca notsino, aisa irimiraquerogueti noriraja incoguitempani inchoocaguitenani, naatimpaquea noncoguitempani nonchoocaguiteinerini. <sup>57</sup>Itigarancaquenaquea Aapani anijatsica, ari nanijaque naatimpa irooriji yanijacaquena Aapani. Arikea inquejetaquempa quericaca shecaquenaneca naatimpa, nanijacaera.

<sup>58</sup>Ocatica pan, iroguenti quenapoja-tsica jenoqui inquitequi. Teequea onquejetemparoji manaa ishecajiae-caca pivaesatinite imetojajianajiqueate. Quericaca shecaquemparoneca ocatica pan incoguitempaniqueate iranijaguiten.

<sup>59</sup>Maasanoquea ocatica icanqueca Jesoshi manaquea itsatacayaqueriquea shinagogaqui icapiocantapinijiacaca joriojia ontaniqui Caperenaoqui.

### Quenquetsatsarentsi anijacaantantatsica

<sup>60</sup>Iroompaqueate iquemajiaquero-gueti icanqueca Jesoshi imaica, arikea iria oshequini oguijaguijaitanaquerica icantajianeque:

—Manavaeca ocatica icanqueca.

¿Taampa quemisantavaquerone?

<sup>61</sup>Arikeate iriraquea Jesoshi itsatasshitavacaro icantavacaajianaca-gueti icantimanataquerogueti icantave-carica, icantsijaariequa:

—¿Ari ocatsimatacayaianaquempi nocantajiaquempica? <sup>62</sup>Iroosacanica, ¿querocaca pincojiaquempa pamenajia-querigueti Irijanite Caquinte iroanaje-gueti jenoqui inquitequi ichoocatigueti coramani? <sup>63</sup>Oraquea shiretsi, iroguenti anijacaantanquitsica, teequea agavejeji atsino. Arikea oquejetaca nocantajia-quempica imaica, oquejetacaro shiretsi, iroguenti anijacaantatsica. <sup>64</sup>Cotanqui-tsiquea choocaquea piconagarantajiaca teequeate pinquemisantajiguenujaji.

Iriraquea Jesoshi itsatsitacatari iroqueragueti queri aato iquemisantajiguiri, aisa queri aacaanquerineca.

<sup>65</sup>Arikea icantiri:

—Irootaquetari nocantantajiaquem-pica aato inchiquioji icoraquetashitana caquinte aatogueti yagavejacaguiri Aapani.

<sup>66</sup>Arikea iconoagarantajianacaquea oguijaguijaivetanacarica Jesoshi yovashiantajianajiriquea teequea iroguijaguijaitajeriji. <sup>67</sup>Arikea Jesoshi icoacojiaqueriquea itsatacanaejia vegarajianquitsica 12, icantajiguiriquea:

—¿Pinintajiaque poajianaje aviatim-pajia aisa?

<sup>68</sup>Cotanquitsiquea irira Shimo Peerero icantiri:

—Nomajirote, ¿queriquea noashijia-naqueca? Aviguentitari ashintaro

quenquetsatsarentsi anijacaantantatsica noncoguitempinaniji nanjaguiteni.

<sup>69</sup>Naatimpajia noquemisantajiaquempi-quea, aisa notsajiaque aviguentiquea Quirishitotatsica,<sup>m</sup> Irijanite Aapani Irioshi anijatsica.

<sup>70</sup>Icantajiguriqueate Jesoshi:

—¿Teempa narotaque coguijiaquem-pica aviatimpajia carajianquitsica 12? Cotanquitsi chooca aparo piconoacaca, ampatsini inaque.

<sup>71</sup>Oraquea icanquegueti Jesoshi imaica iriguenti icantacoque Jorashi, irijanite Shimo Ishicariote, iriguentita-rite aacaanquerineca coajica. Irioquea itsatacaane inaveca, cotanquitsi coajica yaacaanqueri.

#### Iriguentijeguitepae Jesoshi teequea inquemisantajigueriji

**7** <sup>1</sup>Ariqueate iriraquea Jesoshi tee irininteji iroanaque Jore aqui, itsaquetari inintajiaque joriojia irimeto-jajiaqueri. Mana ichocataji Garire aqui itsatacaantaque oraniqui. <sup>2</sup>Quempejita-pojaquetari ishineventajiacaca joriojia ipeacaantajigaroca tsovironaquijani-quipae iquenquejajiro iquenaquenaitanajigueri ivaesatinite oquitamamporo-roipojaquegueti. <sup>3</sup>Iriraqueate iriguenti-jeguitepae Jesoshi icantajiguiri:

—Intsijate poanaque Jore aqui pinquejetaquempaqueate imaica ponigaanqueroquea oacaantantatsica intati ariniji iramenajiaquempi pitsatacaanejia chocajianquitsica ontaniqui. <sup>4</sup>Icoguitanitari quericaca nintanquitsica iramenajiaqueri, aato yomaniro yantaqueca. Imaicaquea aviatimpia, irorijite pagavejaque

ponigaanqueroqueate taaca opajitapae, iintsijate poanaque ponigaanquempa iramenajiaquempiniji maasano.

<sup>5</sup>Arikeate icojiacani iriguentijegui-tepae aisa teequea intsamajajigueriji, irootaquequea icantantajiacarica imaina.

<sup>6</sup>Cotanquitsiqueate Jesoshi icantajiguiriquea:

—Tequeratatirajatari aguempaji noantanaquempaca, cotanquitsiquea aviatimpajia cameetsaquea poajianaque querocagueti pintintajiaqueni. <sup>7</sup>Tee onchoocateji irisemaneguintimentajiguempica quepatsiquitica. Naatimpapea irootari isemaneguintantajiaque-naca nocanquegueti yantaguetaqueca iroguenti covaeguisherentsi. <sup>8</sup>Poajiana-quequea aviatimpajia pintoncoajianaque incapiocaventajiaquemparogueti ishineventajitaca. Naatimpapea aatota nogui, tequeratanicate aguempaji noantanaquempaca.

<sup>9</sup>Icantajiaquerigueri imaica, ari ichocataji Garire aqui. <sup>10</sup>Cotanquitsiqueate ariqueate yoayoaitanaquegueti iriguentijeguitepae impoitanajiquea yoanaque iriatimpa. Teequea ari intspatsipaitempariji igonorojia, teenicate irininteji irinejajiteri.

<sup>11</sup>Iriraqueate imajirojiate joriojia icoaqueri Jerosarequi, icantajiaqueri capiocajianquitsica:

—¿Quericampa?

<sup>12</sup>Iquenquetsatacojiaqueriquea intati, choocaquea cantavanquitsica: “Iriguen-tiquea cameetsatatsica.” Itsipaqueate icantavaque: “Teequea incameetsateji, mana yamatavijaqueri caquinte intati.”

<sup>13</sup>Cotanquitsiquea inchiquioji iquenque-tsatasvacaajiacaquea teequea inconja-

**m 6.69 Quirishitotatsica.** Iguenquetsatsarequi guiriegojia icanquegueti *Christos* (Quirishito) manaquea ocanque “Ishaguijitaqueca” aisa “Icoguijaqueca”, irishaguijitaqueritaro orejiqui orivo irirajia icoguijiaqueca impeaquémpa imajirojiate irooca isaserorotejiate. Irira Quirishito irotoquequea itsavetacotsitacaca tsavetantajiacarica coramanitica intigarancaque Aapani Irioshi impeaquémpanjii Imajirojiate maasano.

jencateji, itsaroacaajiacaritarite joriojia majirontajiatsica.

**Icatsimamentajaqueri Jesoshi  
yogueshitantajarigueti joquijitatsica  
savincaguiteri imagorejantajitaca**

<sup>14</sup>Oraqueate oniganquipoquegueti ishineventajiacaca ariqueate itonco-naque Jesoshi, yoanaquequea teempo-roqui itsaroventantajitarica Aapani Irioshi, itsatacaantaquequea oraniqui oniganquirequi. <sup>15</sup>Arikeate yamenajia-querigueti joriojia yamenajianaquequea intati icantantajianacaca:

—¿Queroquea icotacani itsatantaca-roca taaca opajitapae? Teenicate intatsatacaamajiteriji.

<sup>16</sup>Cotanquitsiquea Jesoshi icantajigu-riquea:

—Oraqueate notsatacaantaqueca imaica teequeate inchiquiojitsiquea nontsatashitemparoji naatimpa. Iriguen-titari tsatacaaquenaro tigarancaquenaca.

<sup>17</sup>Quericacaquea nintanquitsineca irinetsanataqueroquea ininqueca Aapani Irioshi intsaquequea iriguenti tsatacaa-quena, teequeate inchiquiojitsita naashitemparoji naatimpa. <sup>18</sup>Iriraqueate inchiquiojica aashitaroca intati iriatimpa manaquea ininquequea irishineventajitaquempari, cotanquitsi-quea iriraquea nintanquitsica iriguenti-queate irishineventajitaquempa tigaran-caquerica manaqueate itampaticata-queru intati querocaca icanqueca, teequea iramataguempaji.

<sup>19</sup>“Coramaní Moishishini itioncajia-quempiro icanquerica Aapani Irioshi cameetsaniji pintsaquiaquero, cotanquitsi-queate imaica aviatimpajia tee pinets-najigueroji. ¿Quero ococani pinitanta-jiacaca pimetojajiaquenaquea?”

<sup>20</sup>Arikeate iquenquetsajianaquequea maasano icantajiguiriquea:

—Ichooquaquempi ampatsini. ¿Queri-cate nintanquitsica irimetojaquempi?

<sup>21</sup>Icantiri Jesoshi:

—Nonigaanqueroquea savincaguiteriqui imagorejantajitaca aparo teeca irinejajiteji, ariqueate oacaajianaqueMPI intati.

<sup>22</sup>Iriraqueate Moishishini icanquequeate intotsaiquijiqueruea ichonquimashi iriaqueraca voanquitsica aapojempagueti 8 savincaguiteri (cotanquitsiquea tee irio pariguemparone Moishishini, ogantagatari icotani pivaesatinijate). Irootaquequea pitotantarica. Pitotsaiquitantajigui aisa savincaguiteriqui imagorejantajitaca.

<sup>23</sup>Imaica pitotsaiquitantajiguiqueti savinca-guiteriqui imagorejantajitaca cameetsan-i-jite pinetsanajiaqueronijite icanqueca Moishishini, ¿queroquea ococa picatsimi-mentantajiaquenaro pamenaquiaquen-a-gueti nogueshimajatajirigueti joquijitan-quitsica savincaguiteriqui imagorejantajiti-taca? <sup>24</sup>Aatoqueate taampina picantsiija yantajitaquero teeca oncameetsateji. Iroquetiquea pinquenquejamajajiaquequea iroquenticua yantajitaque teeca oncameetsa-teji irooca cameetsari, iroompa tampatica pincanke.

**Icamantacotacagueti Jesoshi  
quero iponeacani**

<sup>25</sup>Arikea iconagarantajiacaquea guitenijatiatsica Jerosarequi icantajiana-quequea intati:

—¿Iriotaquempa intintajiqueca irimetoja-quieri? <sup>26</sup>¿Queroqueate ocozacani imaica teequeate incantajiteriji icapiocaventajica-riqueti iquenquetsataquegueti? Arica icantajianaque majirontajiatsica iringaque Quirishito.<sup>n</sup> <sup>27</sup>Cotanquitsiquea atsajiaque queroquea iponeacani iricatica. Irirampani

**n 7.26** *Quirishito* ocanque “Ishaguijitaqueca” aisa “Icoguiaqueca”, irio yoguijajiaquequea ishiraerijia incoraquetaque impeaquempa imajirote ompejiaquemparineca.

Quirishito incoraquetapojegueti, aatoquea itsajitiri quero iponeacani.

<sup>28</sup>Iriraqueate Jesoshi choocatirajaquea itsatacaantaque teemporoqui oniganqui-requi oticaacoro iririjencatanaquequea icanti:

—Pitsajiaquenaquea, aisa pitsajiaque quero noponeaca. Teequea noncoraque-tashitempaji inchiquioji, cotanquitsi-quea iriomajacaquea irira tigarancaque-naca. Teequea pintsajiguereji aviatim-pajia. <sup>29</sup>Cotanquitsiquea naatimpa notsaqueriquea, aritarite noponeaca iriatimpaqui, aisa iriguentitarite tigaran-caquena.

<sup>30</sup>Ariqueate inintajiavecquea irajaiquerime, cotanquitsiquea tecatsi ajiriquerine, tequeratatirajatari aguempajia iraantajitaquemparica.

<sup>31</sup>Cotanquitsiquea iquemisantajianaque-riquia oshequini caquinte, icantantajia-nacaca:

—Incoraquequegueti Quirishito ñarimpa iranaaqueri iringatica ironigaan-quero teeca irinejajiteji? Iriotaque Quirishito.

#### Icanquegueti Jesoshi aatoquea inejajitajiri

<sup>32</sup>Ariqueate irirajia pariseojia iquema-jiaquerigueti iquenquetsatacojiquerigueti Jesoshi ishineventajicari, ariqueate itsipatsipaicariaquea saserorotejia anaantajianquitsica itigarancraj-queriqueate coaretapae quempoguijaji-guiroca teemporo irajaiqueriqueate. <sup>33</sup>Cotanquitsiqueate Jesoshi icanti:

—Capichajinivani nonconoajajempi, ariquea noanaje ichoocatigueti tigaranca-quenaca. <sup>34</sup>Ariquea pincoaguevetajena, aatoqueate pinejajijaana, aatotarite pagavejajigui poajianaque aviatimpajia querocagueti noanajeni naatimpa.

<sup>35</sup>Ariqueate icojianaca joriojia iquenquetsatavacaajianacaqueate icanti:

—¿Querocaquea iroanaqueni aatoca anejantajiajari? Aricaquea iroanaque inconoajiaquempariquea ontaniqui agonorojia varajajianquitsica conoajia-carica guriegojia intsatacaajiaqueriquea iriatimpajia aisa. <sup>36</sup>¿Taaqueate opajita icantacoquea icantantacaca: ‘Ariqueate pincoaguevetajena aatoquea pinejaji-jaana, aatotarite pagavejajigui poajianaque aviatimpajia querocagueti noanajeni naatimpa’?

#### Oja anijacaantantatsica

<sup>37</sup>Arikea aapojaja savincaguiteri icaratantajianajaroca ishineventajiacaca. Ocatica savincaguiteri caaviji ishineven-tamajajigaro. Iriraquea Jesoshi icatiana-caquea iquenquetsatanaquequea irirjen-caniquea icanti:

—Quericacaquea miretanquitsica incoraquestashiquenaja nojocaueneri irimirapoje. <sup>38</sup>Quericaca quemisanta-quenaneca, ocantaquequea Tioncarents-tsimajaca, omotojaguuteni ishirequi oja anijacaantantatsica, onquempetana-quemparo iniroja oja.

<sup>39</sup>Oraquea icanquegueti Jesoshi imaica iriguentiquea iquenquetsatacotaque Ishire Aapani Irioshi choocashirentajiaquerineca maasano tsaroventajiaquemparineca, tequeratatirajatari incoraqueteji Ishire Aapani Irioshi inchoocashirentantaque-queate, tequeratanicate irogajenocashita-najemparo Jesoshi iroganejencare.

<sup>40</sup>Ariqueate iquemajiavaquerigueti maasano iconagarantajiacaqueate icantajiaquequeate:

—Arimajasacanicate iriguentiquea tsavetantatsica agujajiaqueca.

<sup>41</sup>Itsipapaequeate cantajianquitsica:  
—Iriguentiqueate Quirishito.

Cotanquitsiquea itsipapae cantajian-quitsicaquea:

—¿Arimpaquea imponeaquempa Quirishito Garireaqui? <sup>42</sup>¿Teempa

oncanteji Tioncarentsimajaca: iriraquea Quirishito irio inchoviquitanaqueca Taavini, imponeaquempa Verenequi, iguinentini Taavini?

<sup>43</sup>Irosatiquea tee inquemavacaimen-tempariji Jesoshi. <sup>44</sup>Iconoagarantajiaca-quea intantajivecaquea irajaiquerime, cotanquitsiqueate tecatsi ajiriquerine.

<sup>45</sup>Ariquate irirajiaquea coaretapae oajavetananquitsica irajaiquiterime-quea ipiapaitashitajaquea intati ichoocajiaquegueti pariseojia jerijia saserorotejia anaantajianquitsica. Iriatimpajiaquea icantajiaqueriquea:

—¿Quero ococani caarica pamantari?

<sup>46</sup>Iriatimpajiaquea icantajiguiriquea: —Iroorijite cameetsavaequetari iquenquetsataquegueti. Teequeate inchoocateji itsipa quempequempar- neca iriatimpa.

<sup>47</sup>Iriraquea pariseojia icantajiguiri- quea:

—Aricaja yamatavijajiaquempiquea aviatimpajia aisa? <sup>48</sup>Irira majirontajia-tsica teequea inquemisantajiguériji. Ariquea noquejejiaaca naatimpajia pariseojia. <sup>49</sup>Irirajia teeca intsafigueroji itioncanaquenica Moishishini iriguenti- quea quemisantajiaquerica, cotanquitsi- queate incatsimajiaqueri Aapani Irioshi.

<sup>50</sup>Ariquate ichoocaque oraniqui Nicoremo oanincashitanaquerica Jesoshi chapinqui, iriguentitari pariseo. Iquenquetsatanaquequea icanti:

<sup>51</sup>—Icantimentantajitrotari ancantsi- quempagueti: ‘Chooca yantaguishe- queca’, aatogueti iroqueti aquemiri inquenquetsaquegueti cameetsaniji antsatimenqueroniji taa opajita yantaque. Aritari ocanti otioncacotaca- gueti.

<sup>52</sup>Icantisijaariquea iriatimpajia: —¿Avirocajate aisa Garireaquitica? Iintsijate pisavicaventamajatero Itionca- caantaqueca Aapani Irioshi, pamenaque-

roquea tee oncanteji imponeaquempa tsavetantatsica Garireaqui.

### **Manquigarentsi teeca apaniro ogueriji manquigataroca**

<sup>53</sup>Ariquate yoayoaitanajiqueate itsovironaquitepaequi.

**8** <sup>1</sup>Cotanquitsiquea irira Jesoshi yoanaque Orivotsempiqui. <sup>2</sup>Osavin- caguitetamanaquegueti yoanajiquea teemporoqui itsaroventantajitarica Aapani Irioshi. Ariquate icapiocaventa- jianajari oshequi caquinte, ari isavica- naque itsatacabajiaqueriquea. <sup>3</sup>Ariquate irirajiaqueate tsatacaantajiguiroca itioncacotanaqueca Moishishini jerijia aisa pariseojia yamajiaqueroquea manquigarentsi yonigaacojicaroquea shirampari, yogatiajiapojaqueneriqueate niganqui icapiocajiacagueti, <sup>4</sup>icantaji- guriqueate Jesoshi:

—Tsatacaantantsica, ocaqueate ocatica manquigarentsi choocaveca- queate manquigataroca cotanquitsiquea inejacoitapojiro itsipa shirampari. <sup>5</sup>Oratari itioncanaqueca Moishishini ocantini maasano manquigarentsi quejejianquitsica imaica intsinsinajiqueroquea irimetojajiquero. Imaicaquea imaica aviatimpa, ¿quieroqueate pincanteni?

<sup>6</sup>Iriatimpajiaquea manaqueate icantajiaquequea imaica iramenajia- queri querocaca incantenri iramenantajia- quempariniji incatsimatimentantajia- quemparica. Cotanquitsiquea Jesoshi imaroncanaca itioncantanacaroquea ichapaqui quepatsiqui. <sup>7</sup>Jatanatsi icoacojianaqueriquea, ariquea icatianaca icantajiguiri:

—Quericacaquea teeca inquempevae- tempaji iintsiija iriquetiquea pariaquem- parone intsinaquero.

<sup>8</sup>Ariquate imaronquitana aisa itioncanaji quepatsiqui. <sup>9</sup>Iroompaqueate

iquemajiavaquerigueti icanquerigueti, ariquea yoaguetanaji. Iriquetiquea oajianajatsi quenquevarimajatanquitsica. Apanirota oaguetanajatsi ari iteroncajiana ja maasano. Apanivaniquea ichoocataji Jesoshi itsipatajaroquea manquigarentsi irisati quea aisa capioventajiacarica incajaranqui.<sup>10</sup> Arikeate icatiavetanaja Jesoshi, [yamenavetari cajaraguiteni, apaniroquea ocatiaca manquigarentsi,] icantiro:

—Manquigarentsi, ¿quiero icantajiana-jani amajia queempica? ¿Teequea inchoocateji catsimatiempreneca pipeacaacaca?

<sup>11</sup>Iroatimpia ocantiri:

—Tee, nomajirote. Tee inchoocateji. Arikeate icantiro:

—Arikea nonquejetaquempa naatimpia, aatoqueate nocatsimatiem-timpilo imaica. Imaica quea poanaje, aatoquea piquempevaetaja aisa.

**Jesoshi iriguentiquea Tsirencari tsirencacojia querica quepatsiquitica**

<sup>12</sup>Arikeate Jesoshi iquenquetsatanajiquea icantajiguiriquea:

—Naroguenti Tsirencari tsirencacojia querica quepatsiquitica. Quericac-queate guijatacotaquenaneca aatoquea ipitsecacotajitsi, naroguentitari tsirencacojia querine cameetsaniji incoguite-pani inchoocataje.

<sup>13</sup>Irirajia pariseojia icantajiguiriquea:

—Avisati tsavetacotajatsi. Tee ontam-paticateji pitsavetacotacagueti.

<sup>14</sup>Cotanquitsiquea icantajiguiri Jesoshi:

—Naroguentiquea tsavetacovetajatsi, cotanquitsiquea arimaja quea nocanque, teequeate namataguempaji. Notsaque-quea quero noproneaca aisa quero noanajeni, cotanquitsiqueate aviatim-pajia teequeate pintsajigueji quero noproneaca, aisa quero noanajeni

coajica.<sup>15</sup> Aviatimpajia piquejeiacari caquinte cantacotashitantsica intati, teequeate pintampaticamajaterojo. Naatimpaquea teequea noncantashiji-guempariji quericaca.<sup>16</sup> Cotanquitsiquea noncantacotanta queguedeti, tampatica noaquerero, irooriji tee noncantacotanteji naatimpia apaniro, nocarataque naatimpia jeri aisa Aapani tigaranca-naca.<sup>17</sup> Oraticatarite itioncajita queca pamenevecaca ocantiqueate omoncarajavaca aquempagueti icanqueca mavite cantacota queroneca inejajia queca, ari pintaque tamatica yoquiero.<sup>18</sup> Jero imaica, noquenquetsatacota quena quea iriatimpia.

<sup>19</sup>Iriatimpajia icantajiguiriquea:

—¿Queroqueate ichoocataqueni piri imaica?

Icantajiguiriqueate Jesoshi:

—Teenicate pinta sija queuenaji naatimpia, ari iquejetaca teequeate pinta sija queueri Aapani. Arimegueti pinta sija queu name naatimpia, pinta sija querime quea iriatimpia.

<sup>20</sup>Maasano icanquerica Jesoshi mana quea itsatacaya queri teempo-roqui, isavicapoji ochooca queguedti yoguija antajitarica imenta quipae yojocajiguinirica Aapani Irioshi. Cotanquitsiquea teequeate inchoocateji aaquerineca iraana queri iri meto jaji-queri, tequeratanica arejetempanica ira antajita quemparica.

**“Aato pagavejajui poajiana que querocague quea noanajeni naatimpia”**

<sup>21</sup>Iroompia irira Jesoshi icantajajiri-quea aisa:

—Naatimpaquea noanaje, arikea pamene queveta jena, cotanquitsiquea ogantaga quea onchoocaguiteni piguem-pevaere irosati pimeto jacota querero.

Ontaniqui querocagueti noanajeni, aatoquea pagavejajigui poajianaque.

<sup>22</sup>Irirajaquea imajirojiate joriojia icantajianaquequea:

—¿Ari irimetojaquempa irisati, irootari icantantacaca aatoquea agavejajigui oajianaque querocagueti iroanaqueni?

<sup>23</sup>Cotanquitsiquea Jesoshi icantajiguiriqa:

—Aviatimpajia aviguentijiaquea isavijiquitica, naatimpaquea ariguenti nopenoneaca jenoqui inquitequi. Aviatimpajiaquea aritari piguintenimajajiga acaniqui quepatsiqui, naatimpaquea teequea noguintenimajatempají acaniqui quepatsiqui. <sup>24</sup>Irootaquequea nocantantajiaquempica pimetojajinaque tequerataguetai oshetempají piguempevaere. Aritarite aatogueti pitsamajatana narotaque, aisa aatogueti paventana, ogantagaquea onchoocaguiteni piguempevaere irosati pimetojacataquero.

<sup>25</sup>Iriatimpajia icantajiguiriqueate:

—Jmm, ¿taampa avia?

Icantiri Jesoshi:

—Nocamantajiavetaqueempitari iroqueraguetai. <sup>26</sup>Aisa chooca oshequini noncantacojiaquempica, cotanquitsiquea manaquea noncanque icanquenaca tigarancaquenaca. Iriatimpaquea inetsanamajaqueroquea icanqueca, teequea iramataguempaji.

<sup>27</sup>Cotanquitsiquea iriatimpajia teequeate intsajigueriji iriguentiquea iquenquetsatacanaque Iriri. <sup>28</sup>Irootaquequea icantantacarica Jesoshi:

—Oraquea pogatiacojiaqueriguetai irira Irijanite Caquinte, ari pintsaque narotaque. Aisa pintsaquiaquea teequea nanteji inchiquioji. Iroguentiquea nocanque querocaca itsatacaqueenaca Aapani. <sup>29</sup>Icoguitanitaris itsipataquena tigarancaquenaca, teequea

irojoquenaji apaniro, nocoguitanitarite nosavicavenqueroqueate ininqueca iriatimpa.

<sup>30</sup>Iquejequerogueti imaica iquenquesataqueguetai, iquemisantajianaqueriquea oshequini.

**Irijanijiate Aapani Irioshi aisa agavejajiaqueca quempevaerentsi**

<sup>31</sup>Ariqueate Jesoshi icantajiguiriquea irirajia joriojia quenisantajiaquerica:

—Aviatimpajiaquea pincoguitempaniguetai pinquemisantajianaquena nocantajiaquempica imaica, pimpeamajajiaquempaquea notsatacaanejia. <sup>32</sup>Pinquejejiaquempagueti imaica ariquea pintsamajajiaavaquero iroomajatatsica, iroqueate oguiapquijacojiajempineca manaquea pinchoocatashijajempa intati.

<sup>33</sup>Chooca quenquetsajianquitsica icantsijaariquea:

—Naroguentijiatari ichoviquijianaqueca Averaameni. Teequea inchoocatimateji ashintajiganaca. ¿Queroquea ocotaca picantantacaca: ‘Pinchoocatashijajempaquea intati’?

<sup>34</sup>Icantajiguiriqueate Jesoshi:

—Noncamantamajajiguempija, maasano quempevaejatsica teequea inchoocatashijiguempaji intati, agavejajiaqueritari quempevaerentsi, quejetaca ashintacari omperoperataacari. <sup>35</sup>Pamerijate aajanirents ivegarajitica teequeate inquejetempariji irijanite aajanitarica, teetari irio irijanite. Irinintaqueguetai irojocaueneri itsipa, irojocaueneriqueate; cotanquitsiqueate irijanitemajaca aatoquea yojocantiri, incoguitempani inchoocaque. <sup>36</sup>Irogui-paquijacaajajempirogueti Irijanite Aapani Irioshi agavejajiaquempigueti quempevaerentsi, arimajaquea pinchoocatashijajempa intati. <sup>37</sup>Notsaquequeate aviguentijiavetaca ichoviquijia-

naqueca Averaameni, cotanquitsiquea tee pinintajigueji pinquemisantajigue-roji nocamantajavetaquempica imaica, irootaquequea pinintantajiacaca pimeto-jajiguena.<sup>38</sup>Naatimpaquea manaquea nocantajiaquempiquea nonejaqueca notsipatacarigueti Aapani. Ariquea piquejejiaaca aviatimpajia manaqueate pantajiaqueroquea querocaca icantajia-quempica piri.

<sup>39</sup>Iriatimpajiaquea icantajiguiri:

—Irio aapani Averaameni.<sup>40</sup>

Cotanquitsi Jesoshi icantiri:

—Iriomeguetiqueate choviquijiana-quempime Averaameni pinquejejia-quemparimequea iriatimpa.<sup>40</sup>Cotanquitsiquea teequea pinquejiguerapariji imaica. Nocamantajavetaquempiqueate iroomajatatsica icanquenaca Aapani Irioshi, cotanquitsiquea aviatimpajia manaquea pinintajiaque pimetojajia-quena. Teequeate inquejeteroji Averaameni imaica.<sup>41</sup>Aviatimpajia mana pisavicaventajiaquero isavicaventica piri.

Iriatimpajia icantajiguiriquea:

—¿Arimpa itsipa irijanintajigana?

Iriguentitari irijanintajigana Aapani Irioshi apatiroti.

<sup>42</sup>Icantajiguiri Jesoshi:

—Iriguentimequea irijanintajiaquempime Aapani Irioshi pimpintajiaquemequea, aritarite noponeaca iriatimpaqi, teenica inchiquioji noncoraquetashitempaj naatimpa, iriguentiquea tigarancaquena.<sup>43</sup>¿Queroquea ocotacani teeca pintsatantajiaquemparo nocantajiaquempica? Teequeate pinintajigueji pinquemisantajigeroji nocanqueca.<sup>44</sup>Iriguentitari irijanintajiaquempi ampatsini, iriguentiquea ashintajiaquempi. Aviatimpajia iriguenti pinintajiaque pantajiaquequea

inintaqueca iriatimpa. Iriatimpaquea iriguenti metojantsica, irosati icocani coramani iroqueragueti irosati imaica. Teequea incanteroji arimajatatsica, teequea irishineventemparojo. Itsojeacagueti, irootaque irashi, ari icocani iriatimpa, iriguenti tsojenti, iriguentiqueate oquenantapojaca tsojetsi.

<sup>45</sup>Naatimpaquea nocantamajataque iroomajatatsica, irootaquequea teeca pinquemisantantajiguena. <sup>46</sup>¿Arimpa chooca nantaqueca teeca oncameetsateji pincantacotsitaquenaroja? Tee anejeroji. ¿Quero ocotacani imaica teeca pinquemisantantajiguena? Iroguentiquea nocanqueca arimajaca.

<sup>47</sup>Iriraqueate yashintacaca Aapani Irioshi iquemisanqueroquea icanqueca. Cotanquitsi aviatimpajia teequea irio ashintajiguerapariva Aapani Irioshi, irootaque tee pinquemisantantajiguemparoji.

<sup>48</sup>Ariquestate icantsijaariequa joriojia:

—Nocantamajataqueshine aviguenti Samariaquitica, aisa ichoocaqueMPI ampatsini.

<sup>49</sup>Iriraquea Jesoshi icantiriquea:

—Tee inchoocatimateneji ampatsini.

Naatimpaquea iroguentiquea noninque iramenantajiquemparica Aapani yoganejencavaetaca noquenquetsatacotan-carica cameetsa, cotanquitsiquea aviatimpajia teequeate pinintajigueji pinquemisantajiguena, mana picantacantataquena intati.<sup>50</sup>Naatimpaquea teequea inchiquioji nonintej inquemisantajitena intsaroventajitena, cotanquitsiquea choocaquea nintacaanqueroaca intsaroventajiguena. Iriontacanquitsine quero incotanaquempani maasano teeca intsaroventajiguena.

<sup>51</sup>Imaicaquea noncamantamajajiaquempi-quea quericaca netsanataqueroneca nocantica aatoquea imetojimataji.

#### o 8.39 Icanqueguedi aapani, icantacotaqueri ivaesatinite.

<sup>52</sup>Icantajiguiriqueate joriojia:

—Notsamajajiaquero imaica arimaja ichoocaqueMPI ampatsini. Metojajana-jitari Averaameni jerijiaquea maasano tsavetantajiatsica, cotanquitsi aviatimpa picanque: ‘Quericaca netsanataquero-neca nocantica aatoquea imetojimataji.’

<sup>53</sup>¿Arimate panaaaqueri Averaameni choviquijianacajica? Iriatimpa metojajiti, ariqueate iquejejianaja tsavetantaji-atsicani. ¿Taampa aviatimpa picantanta-caca? ¿Taaquea pijiqueji?

<sup>54</sup>Icantajiguiriqueate Jesoshi:

—Inchiuijime narosatime quenque-tsatacotajatsine cantajatsineme: ‘Caaviji noganejencamajata’, narosatime nintajatsine intsaroventajitena, aatome ocameetsati. Cotanquitsiquea iriguenti-quea nintanquitsi Aapani picantajiae-caca aviatimpajia iriguenti pitsaroventa-jiga. Irio shineventaquena. <sup>55</sup>Cotanqui-tsiquea teequea pintsajigueriji. Naatimpa arimaja notsaqueri. Orame-quea noncanquemegueti tee nontsateriji, manamequea nontsojeaqueempame nonquempejiaquempimequeate aviatim-pajia. Cotanquitsiquea naatimpa arimaja notsaqueri, aisa noquemisantiri taaca icannedua. <sup>56</sup>Coramani iriraquea Averaameni choviquijiaquempica ishinevaeca iquenquejaquegueti iramenaquero noncoraqueque, ariqueate yammenaquero ishinevaetanacaquea.

<sup>57</sup>Arikea icantajiguiri joriojia:

—Tequerata pajagantsitacoteji 50 ajagantsi, ¿pinejirimpa Averaameni?

<sup>58</sup>Icanqueri Jesoshi:

—Noncamantamajajiaquempi, tequeratagueti inchoocateji Averaameni, choocana naatimpa.

<sup>59</sup>Arikeate yaashijianaqueriea mapi intsinaejiaquerime, cotanquitsi-queate Jesoshi ipeapitsajianajari, isotoantanajaro oticaacoros teemporo, yoanaji.

Jesoshi inejacajairigueti shamponcrajari

**9** <sup>1</sup>Arikeate iquenanaquegueti oraniqui Jesoshi inejapoqiriquea shirampari shamponcrajari, yashitaque yoquiero iroqueragueta ivoapoji tee irinejeji. <sup>2</sup>Iriraquea itsatacaanejia icantajiguiri:

—Tsatacantantsica, ¿quero octacani ivoaquegueti ishamponcrajatacaca irica shirampari? Iriocaja quejejanquitsi iriri irooca iriniro iquempevaejaca iquejetanta-nacaca irjanite, iriocaja quejetanquitsi iquempevaetaca irisati.

<sup>3</sup>Icantajiguiriqueate Jesoshi:

—Teequea iroguentiquea quempetaca-guemparine iguempevaere, aisa teequea iro quempetacaguemparine iguempe-vaerejia iriri irooca iriniro. Manaquea oquejetancaca imaica iramenimentaji-queroniji iragavejane Aapani Irioshi.

<sup>4</sup>Ogantagatirajagueti osavincaguiteti-gueti nantaguiteroni inintacaquenaca tigarancaquenaca. Pajinitari ompitseca-naje, tecatsi agavejanquitsine irantavae-tantajemparo. <sup>5</sup>Choocatirajanagueti acanqui quepatsiqui, narotaque itsirencarite quepatsiquitica.

<sup>6</sup>Arikea icanquitigi imaica, iquisho-aque quepatsiqui, yaaque capichaji yamirocaquero, ariquea itirijatantacari-quea shamponcrajari, icantiri:

<sup>7</sup>—Iintsija piya pinquivajatajatempa omotijaqui icantajitica Shiroe —oncanque ovajiro “Itigarancajitica”.

Iriatimpa yoanaque iquivajapoca, ariquea icoraquevetajagueti jac nejanaji.

<sup>8</sup>Iriraquea iconoajigaca iguinentijiga-gueti jerija aisa amenajiguirica isaviquigueta yamanantapiniquegueti imentaquipae icantajianaquequea:

—¿Teempa irio irira savicapinitatsica amanantapinitatsica imentaquipae?

<sup>9</sup>Iconoagarantajiacaqueate icantajia-quequea:

—Jeejeguitatsi iriguenti.  
Itsipaquea cantajiananquitsi:  
—Tee, mana iquempevecari.  
Iriatimpa icantanaque:  
—Naroguenti.  
<sup>10</sup>Arikea icantajiguri:  
—¿Queroquea picotanajani pinejanta-najaca?  
<sup>11</sup>Iriatimpa icantajiguri:  
—Iriraqueate icantajitica Jesoshi yamirocashitajana quepatsi, itirijatanta-janaro, arikea icanquena: ‘Pija pinquivajatajatempa omotijaqui Shiroe.’ Arikea noanaque noquivajatapojetiga nonejanaji.  
<sup>12</sup>Iriatimpajia icantajiguri:  
—¿Quericampa imaica?  
Icantiquea iriatimpa:  
—Jmm, tee nontsateji.

**Irirajia pariseojia icoacojiaquerigueti shamoncajavetatsica**

<sup>13</sup>Arikeate yaajitanaqueri shamoncajavetatsica ichoocajiaqueguedi pariseojia. <sup>14</sup>Oraqueate yamirocashita-queriguedi Jesoshi quepatsi inejacajairi-guedi iroguentiquea savincaguiteri imagorejantajitaca. <sup>15</sup>Irootaquequea icoacotantajiacarica pariseojia quero icotajani inejantanajaca. Iriatimpaquea icantajiguiriquea:  
—Itirijatantajanaro cajashepatsari, arikea noquivajataja, ari nonejanaji imaica.

<sup>16</sup>Arikea iconoagarantajiaca pariseojia icantajiaquequea:  
—Iriraquea quejequeroca imaica teequea iriguenti tigaranquerine Aapani Irioshi, yantantaracotari savincaguiteri imagorejantajitaca.

Cotanquitsiquea itsipaquea cantanan-quitsica:

—Iriomegueti quempevaetatsica, izarimpa iragavejaqueme ironigaanquero oacaajiacajica intati quejecaroca ocatica?  
Arikeatee inquemavacaajajem-papi. <sup>17</sup>Irootaquequeate icoacotantajia-najarica aisa shamoncajavetatsica, icantajiguiriquea:  
—¿Aviatimpa queroquea pincanten?  
Avirotari inejacajai.  
Icanti:  
—Iriguentequeate tsavetantiroca icanquerica Aapani Irioshi.  
<sup>18</sup>Cotanquitsiquea irirajia joriojia teequea irinintajigueji incantajigueji inejacajairi shamoncajari icajemacaan-tantajiacarica iriri irosati iriniro icantajiguiriquea:  
—¿Irio irica pirijanite picanqueca ivoaqueguedi ishamponcajataque? ¿Queroquea icocani imaica inejantanajaca?  
<sup>20</sup>Yacanaqueri iriatimpa:  
—Notsaque iriotaque nirijanite, aritari icoca iroqueraguedi ivoaque ishamponca-jataque. <sup>21</sup>Cotanquitsiquea teequea nontsateji quero icocani inejantanajaca imaica, aisa tee nontsateji queri nejacaaji-rica. Iintsijate pincoacoteri iriatimpa, quenquevaritari, inchiquojitsitaquea incamantajiaqueMPI iriatimpa.  
<sup>22</sup>Iriatimpajia mana icantantajiacaca intati imaica itsaroacaajiacaritari imajirojiate joriojia, icantajiaquetarite querica cantanquitsine Jesoshi iriguenti Quirishito<sup>P</sup> incatsimatimentajiqueriquea aatoquea iquijiji shinagogaqui icapiocantapinijiacaca. <sup>23</sup>Irootaquequea icantantacaca: “Intsijate pincoacoji-queri iriatimpa, quenquevaritari.”  
<sup>24</sup>Arikea irirajiaquea coacojiaquerica icajemajajiriqueate shamoncajaveta-tsica icantajiguri:

**p 9.22 Quirishito** ocanque “Ishaguijitaqueca” aisa “Icoguiaqueca”, irio yoguijajiaqueca ishiraerijia incoraquetaque impeaquempsa imajirote ompejiaquemparineca.

—Iríguentiquea pincanque yoganejen-camajata Aapani Irioshi. Iríraqueate picanqueca incajaranqui notsajiaqueri-quea iríguentiquea quempevaetatsica.

<sup>25</sup>Cotanquitsiquea iriatimpa icantaji-guiriquea:

—Jmm, tee nontsateji iriocampa quempevaetatsica, iroguentiquea notsaque iroaqueragueti noshamponca-javetaca, imaicaquea nejanajana.

<sup>26</sup>Icantijigariquea aisa:

—¿Queroquea icoquempini inejacaan-tajimpica?

<sup>27</sup>Icantijigariquea iriatimpa:

—Nocamantamajajavetaquempiquea incajaranqui teequea pinquemajigue-naji. ¿Imaicaquea queroquea ococani pinintantajiacaca nampijitajero aisa noncamantajempiquea? ¿Ari pinintaj-i-que aviatimpajia aisa pimpejai-a-quempa itsatacaaneja?

<sup>28</sup>Ariqueate icatsimatsajiaqueriqueate icantajiguiriquea:

—Aviatimpaquea aviguenti itsatacaane, naatimpajiaquea naroguen-tijitarite oguijatacotajironica itsatacaantinica Moishishini. <sup>29</sup>Notsajia-queterite iríraqueate Aapani Irioshi iquenquetsatacaaqueri Moishishini, cotanquitsiqueate iríraqueate irica piquenquetsatacotaquea imaica teequea nontsateriji queroca iponeacani.

<sup>30</sup>Ariqueate iriatimpa icantajiguiriquea:

—Arisacanicate. ¿Queroquea picojia-caní aviatimpajia? Iriatimpaquea inejacaajaanaquea, cotanquitsiquea teequea pintsajigujeji quero iponeaca.

<sup>31</sup>Atsaqueritari iríraquea Aapani Irioshi aato iquemiri quempevaetatsica iramanerigueti. Iríguentiquea inquemaque tsaroventamajacarica antiroca ininqueca iriatimpa. <sup>32</sup>Irosati coramani tecatsi quemacoterine itsipa

caquinte inquejetero imaica iragave-jaque irinejacaajeri voacotiroca ishamponcajare. <sup>33</sup>Iríca noquenquetsata-cotaqueca imaica aatomegueti irio tigaranquirime Aapani Irioshi aatome yagavejime inquejetacaquemparome imaica.

<sup>34</sup>Iriatimpajia icantajiguiriquea:

—¿Oo querocaquea pincantempani pijiquejiquea pintsatacaajiguena naatimpajia? Irosati piquejetaca aviatimpa piquempevaemajatanaca.

Arikeate icatsimamajajianaquequeate yoguisotoaqueri.

**Iríraquea teeca intsateriji Aapani Irioshi quejeavaeca shamponcajari**

<sup>35</sup>Iríraqueate Jesoshi iquemacoqueri-gueti icatsimajitaqueri yoguisotoajita-queri, yoanaque icoaguequeri. Arikeate inejapoajajiri icantiri:

—¿Ari piquemisantaqueri aviatimpa Irijanite Caquinte? ¿Paventashirenta-carí?

<sup>36</sup>Icantiri iriatimpa:

—Nomajirote, ¿quericaquea? Intsija pincamantena naventashirentantaquem-parica.

<sup>37</sup>Icantiri Jesoshi:

—Pinejaqueritari, iriotaque quenque-tsatacaaquempica imaica.

<sup>38</sup>Icantiri:

—Nomajirote, naventashirenta-quempi.

Arikeate itigueroashitanacari itsarovencari. <sup>39</sup>Icanți Jesoshi:

—Iroguenti nocoraquetashique acaniqui quepatsiqui cameetsaniji incantacojiqueriniji caquintejia quero icocani, cameetsanijite irinejajajeniji shamponcajavetatsica, irirampani nejajavetanquitsica irishamponcajata-naje.

<sup>40</sup>Arikeate irírajia pariseoja choocajianquitsica oraniqui iquemajiaqueri-

gueti icanquegueti imaica iconoagaran-tajacaquea icantajiaqueriquea:

—¿Arimpaquea naatimpajia noqueje-jacari shamoncajari?

<sup>41</sup>Icantajiguiriquea Jesoshi:

—Pinquejejaquemparimegueti shamoncajari, aatomequea ochoocata-jime piguempevaerejia, cotanquitsi-queate imaica picantajavetacatarite: ‘Nonejaque’, irootaquequea ochoocatan-tajaca piguempevaerejia.

### Quempogujamajatirica oveja

**10** <sup>1</sup>“Imaica noncamantamajajia-quempiquea quericaca ataitashi-tanaquerineca ontaniqui itantacojiquerigueti oveja aatogueti iquijantaro sotomorontsi iriguentiquea aitsitanta-tsica aisa aapitsatantsica. <sup>2</sup>Cotanquitsisquea iriraquea quijanquemparoneca sotomorontsi iriguentiquea quempogui-jirica irovejate. <sup>3</sup>Iriguentiquea irashire-javaquene timashitiroca sotomorontsi. Iriraquea irovejajiate iquemajiajiriji iquenquetsatigueti. Icajemajiaqueri irovejajiate apaniropae ivajiroqui, yaajianaqueri sotsiqui. <sup>4</sup>Iroompa iteroncaquerigueti yoguisotosotoitaque-riqueti maasano, yoanaque ijivatana-queri. Iriraquea oveja yoguijaguiajitan-queriqueate, itsajiguiritari iquenquetsa-tigueti. <sup>5</sup>Cotanquitsiquea aatoquea yoguijaguiri itsipa teeca intsafigueriji, manaquea irishiashiaitapitsatanaqueri intati, aatotari itsajiguiri inquenquetsa-vaquampagueti.”

<sup>6</sup>Ari iquejetacaajiacari Jesoshi imaica, cotanquitsiquea iriatimpajia tee intsafigueji taa opajita iquejetacaacaca. <sup>7</sup>Irootaque icantantacaca aisa Jesoshi:

“Imaica noncamantamajajiaquempi, naroguenti irashitacoro oveja. <sup>8</sup>Maasa-noquea coraquejianquitsica tequerata-

gueti noncoraqueteji naatimpa iquejeta-cari aitsitantsica aisa aapitsatanta-tsica, cotanquitsi tee inquemisantajigue-riji oveja. <sup>9</sup>Naroguenti ashitarontsi. Quericaca quijantanaquenaneca naatimpa inchoocapojae cameetsa, inquijapoaque, irisotoanaque iramena-pojero cataromashi. <sup>10</sup>Iriraqueate aitsitantsica iroguentiquea icoraqueta-shitaque iraitsitante, irimetojante, impoguerejante, cotanquitsiquea naatimpa iroguentiquea nocoraqueta-shique iranijajianajeniji, iranijamajatati-guenimaja.

<sup>11</sup>“Naroguenti cameetsari quempogui-jamajajigurica oveja. Iriraquea cameetsari quempogujamajajigurica oveja irimetojaventaqueriquea. <sup>12</sup>Cotanquitsiqueate irira ivegarajitica intati inquempogujantakenemparica oveja, iramenavaquerigueti lobo<sup>a</sup> incoraque-quegueti, manaquea irishianaque intati irovashiantanaqueriquea oveja, teenica irio ashintemparine. Irira lobo iraashi-pojempari ovejapae, iroguvivorocajenca-queri. <sup>13</sup>Irooqua ishiantanacaca shirampari, manatari ivegarajitiri intati, teetari imprintsatempariji oveja.

<sup>14</sup>“Naroguenti cameetsari quempogui-jamajajigurica oveja. Notsamajajiguiri-quea novejajiate, ari iquejejigana iriatimpajia itsamajajigana, <sup>15</sup>quejec-quea itsamajatanagueti Aapani, ari noquejetaca naatimpa notsamajatiri. Ariquea aisa nometojaventajiaqueri novejatepae. <sup>16</sup>Chooca itsipapae novejatepae teeca intsipajiguempariji choocajianquitsica acaniqui tantontsiqui. Namajiaqueriquea iriatimpajia aisa. Inquemisantajiaquena-quea nonquenquetsatacaquerigueti, apapioroqua incantanajempa, aparo quempoguijaquerine.

q 10.12 Irira lobo iriguenti tomirishiquitica catsimari quejevecarica iririjegui shiishi.

<sup>17</sup>“Jeroquea ipintsatanquenaca Aapani, inchiquiojitatari nojocanaquero nanijane, cameetsanijite naavajero nanjanaje. <sup>18</sup>Tecatsi aapitsatenarone, inchiquiojita naatimpa nojocanaquero. Nagavejaque nojocanaquero, nagavejaque naavajero. Irootaque intacaaquenaca Aapani nantero.”

<sup>19</sup>Ariquea iquemajiavaquerigueti joriojia icanquegueti imaica, ariquea icojianaca tee inquemavacaajianajempa. <sup>20</sup>Icantajianaquequea oshequini:

—¿Quero ococani piquemisantajavacarica? Manatarite ichoocaqueri ampatsini, aisa mana ishoncacotaca intati.

<sup>21</sup>Cotanquitsiquea icantajianaquequea itsipa:

—Iriraquea ichoocaqueca ampatsini aato yagaveji iquejetacagaro iquenquetasataquegueti imaica. ¿Arimpa iragavejaque ampatsini iramenacaajeri shamponcrajari?

#### Imantajiaquerigueti joriojia Jesoshi

<sup>22</sup>Oraqueate ocatsincaguitempojajigueti iriraquea joriojia icapiocaventajiacarocha quea ishineventajiacaca Jerosarequi iquenquejajajiro inetsanajajirogueti coramani ivaesatinite teemporo itsaroventantajitarica Aapani Irioshi.

<sup>23</sup>Iriraquea Jesoshi yanijitaquequea oraniqui sotsiqui teemporoqui oveshintaacagueti iniroopoapae ocajaratsencoataquegueti icantajitica Irashi Saromoni. <sup>24</sup>Iriraquea joriojia icapiocaventajiacariquea icantajiguiriquea:

—Noguijajivequempiquea coramani, tequerataquea pincamantajiguenuji. Aviguentimpate Quirishitotatsica iiintsijate pincamantamajajiguena imaica.

#### 25Iriraquea Jesoshi icantajiguiriquea:

—Nomajiavequempitari nocamantajavetaquempiquea, teequea pinquemi-

santajiguenuji. Oraquea nantaguequeca ivajiroqui Aapani nintacaaquenaroa, irooqua tsatacaaquempica quero nocotacani. <sup>26</sup>Cotanquitsiquea aviatimpajia tee pinquemisantajiguenuji, teenicaquea avironica novejate. <sup>27</sup>Irirajaquea nashijia novejatepae iquemisantajiganaquea noquenquetsataquegueti, naatimpaquea notsajiguiri, iriatimpaquea yoguijajiguitana. <sup>28</sup>Nanijacaajajeriquea mananiji incoguitempani inchoocajaje, aato ipega camorecariqui. Aatoquea ichoocati aapitsaquerinareca. <sup>29</sup>Aapani jocaquenarica yanaajiaqueri maasano. Aatoquea ichoocati aapitsaquerineca. <sup>30</sup>Naatimpaquea aisa Aapani apaniro nocanca.

<sup>31</sup>Ariquea irirajia joriojia yaitsijianaja aisa mapi intsinacajiaquerime. <sup>32</sup>Cotanquitsiqueate Jesoshi icantajiguiriquea:

—Naatimpaquea yagavejacaquenaquea Aapani nonigaaguequempiroquea taaca opajitapae cameetsaguetatsica. Imaica, ¿querocampate pintsinajimen-tajiaquenaca?

#### 33Icantajiguiriquea joriojia:

—Aato iroguenti notsinaquimentajiguimpi taaca opajita pantaguetaqueca cameetsaguetatsica, iroguenti piquejematacari Aapani Irioshi. Aviguentitari caquinte, cotanquitsiquea pipinajashi-cari iriatimpa.

#### 34Icantajijaariquea Jesoshi:

—¿Teempa oncanteji Itioncacaanta-quempica Aapani Irioshi: ‘Nocanque naatimpa, aviguentijia irioshijsatsica’?

<sup>35</sup>Itsajitirotari maasano Itioncacaantaquenaca Aapani Irioshi aatoquea acanti tee iroomajaca, aisa iriguentiquea cantanquitsi Aapani irirajiaquea itigarancajiaqueneca Iguenquetsatsare iriguenti irioshijsatsica. <sup>36</sup>Iriguentitari nintacaaquena itigarancantaquenaca acaniqui quepatsiqui, ¿querocampate ocoocani picantantaquenaca ‘Pipinajashi-

tacari Aapani Irioshi', nocanquegueti: 'Naroguenti Irijanite Aapani Irioshi'?  
<sup>37</sup>Aatomegueti nantirome yantaguetaica Aapani, cameetsamequea aato piquemisantajigana.  
<sup>38</sup>Cotanquitsiquea imaica nantaquerotarite. Aatogueti piquemisan-tajiavetana nocantajiaquempigueti imaica, pinquemisantajiguenaja pamenaquiaquerogueti nantaguetaquerogueti cameetsaguetatsica pintsamajajia-queniji ichoocaquena Aapani, aisa noquejetaca naatimpa nochoocaqueri Aapani.

<sup>39</sup>Inintajiavetajaquea aisa iraaquerime irajaianaquerime irimetojacaantajiaquerime, cotanquitsiquea iriatimpa ariquea isotoapitsajianajiri.

<sup>40</sup>Ariqueate Jesoshi yoanajiqueate intatiquieroqui Jororanequi iviñacajatan-taquerogueti Joanca iroqueragueti, ariquea ichoocapoji oraniqui.  
<sup>41</sup>Yoajia-naquequea oshequini caquintepae iramenajiaqueri, icantajiguquea:

—Iriraquea Joanca teequea ironigaan-tavetemparojo oacaantantatsica intati, cotanquitsiquea itsavetacotaquerigueti iricatica, arimaja maasano icanqueca.

<sup>42</sup>Ariquea itsaroventajianacariquea oraniqui oshequini.

### Imetojaquegueti Irasaro

**11** <sup>1</sup>Choocaquea joquijitanquitsica icantajitica Irasaro. Iguinentita-quea Vetaniaqui, oguintenitagueti Maria aisa oguetyote icantajitica Marita.  
<sup>2</sup>Ocatica Maria, iroguentiquea shaguitantacarica Amajirote casancajari iguitiqui, ariquate osheguititantacari omae. Irira Irasaro joquijitanquitsica, iriguenti ojariri.

<sup>3</sup>Ariquea irotimpajia otigarancaqueri camantaquerineca Jesoshi incanquiteri:

—Nomajirote, joquijitaca pipintsama-jatacaca.

<sup>4</sup>Iriraquea Jesoshi iquemaquegueti icanti:

—Oraquea joquijirentsi aaquerica teequea iro oncoraquetantempa ometojaqueriniji, manaquea irameni-mentajitaqueroniji caaviji yagavejamajati Aapani Irioshi, aisa intsajitaqueroniji caaviji yagavejamajati Irijanite Aapani Irioshi.

<sup>5</sup>Iriraquea Jesoshi ipintsamajavetaro Marita aisa oguetyote jeri aisa Irasaro,  
<sup>6</sup>cotanquitsiqueate iquemacovetacari-gueti yojoquijica teequea irogueji, manaqueate imaanaji mavite savinca-guiteri ontaniqui ichoocaquegueti.  
<sup>7</sup>Iroompaquea icantajiguiri itsatacaa-nejia:

—Jameja oajianaje Joreaqui.

<sup>8</sup>Iriraquea itsatacaanejia icantajiguiri-quea:

—Tsatacaantantatsica, iroquerasam-pate inintajiavecaquea joriojia intsinacajiaquempime ontaniqui.

¿Arimpate poanajetampate aisa?

<sup>9</sup>Icanque Jesoshi:

—Isotoguiguetai catsirinaciteri ¿teempa oncarate 12 hora osavincagu-i-tetanaque tequeratagueti inquijaje? Quericaca anijitatsineca savincaguiteri qui aato itivata, inejantacarotari otsirencaguite quepatsiquitica.  
<sup>10</sup>Cotan-quitsiqueate quericaca anijitatsineca pitsecariqui intivataquempaquea, teenicate onchoocateji tsirencaguita-cotaquerinerineca.

<sup>11</sup>Irosati icanque:

—Iriraquea atsipavijitaca Irasaro maaquequea, cotanquitsiquea noanaque nontinajeriequea.

<sup>12</sup>Iriatimpajia icantajiguiriquea:

—Nomajirote, imaaquegueti iroveana-jempaqueate.

<sup>13</sup>Oraqueate icanquegueti Jesoshi:

“Maaquequea”, iroguentiquea iquenque-tsatacotaque imetojane, cotanquitsiquea iriatimpajia teequea inquemajigueriji, manaqueate ijijiaqueji arimaja imaaque.

<sup>14</sup>Ariquea icamantamajajaqueriquea Jesoshi, icantajiguiri:

—Metojanaque Irasaro. <sup>15</sup>Cameetsa teequea nonchoocatsitempaji naatimpa ontaniqui pintsaroventimentajaqueña-nijite aviatiempajia pamenajaque rogueti nantaqueca. Cotanquitsiqueate imaica jameja oajianaque iriatimpaqui.

<sup>16</sup>Iquenquetsatanaque queate Tomashi icantajitica Tsipari icantiriquea itsipapae itsatacaanejia Jesoshi:

—Iroosacanicate jamequetirote oajianaque aatimpajia aisa, anquempeji-anaquempari Jesoshi ametojajaque.

**Jesoshi iriguenti tancorejantatsica,  
iriguenti anijagantsi**

<sup>17</sup>Arikeate yarejerejeipojacaguetai iquemacopojaqueriqueate Jesoshi Irasaro icaratacotañaque 4 savincogui-teri yoguijaantajitaracica omoroqui imperita. <sup>18</sup>Oraqueate Vetania oquempejiquero Jerosare, arica ocarataque 3 quiromeetero. <sup>19</sup>Arikeate ichoocaque oraniqui Vetaniaqui oshequi joriojia coraquejianquitsica irogushine-jajiajeroquea Marita aisa Maria oshimampojancacocari ojariri. <sup>20</sup>Oraqueate Marita oquemacotavaqueri-gueti Jesoshi coraquetapojaque, oanaquequea ontonquivojavaqueempa-riñi, oraqua Maria teequea ogueji iroatimpa, mana ochoocaque tsovirona-quiqui. <sup>21</sup>Arikea ocantavaqueriquea Marita Jesoshi:

—Nomajirote, arimegueti pinchooca-queme acaniqui aatomequea imetojime jai. <sup>22</sup>Cotanquitsiquea imaica notsaque taaca opaji pincanqueri Aapani Irioshi, inquemisantavaquempiquea.

<sup>23</sup>Icantiroquea Jesoshi:

—Impochatanaje pijariri.

<sup>24</sup>Ocantiri Marita:

—Jeejeguitatsi, notsaque impochata-na jeguitatsi oncoramanitapojaquegueti

impochajanajegueti maasano metojaja-vetatsica aapojaquempagueti savinca-guiteri vegaratapojaatsineca.

<sup>25</sup>Icantiro Jesoshi:

—Naroguentiquea tancorejantatsica, naroguentitari anijagantsi. Quericaca quemisantaquenanea irimetojavequem-pagueti impochatanajequea. <sup>26</sup>Maasano anijajatsica quemisantajiganaca, aato imetojamatjitsi. ¿Piquemisanquerompa ocatica?

<sup>27</sup>Ocantiri:

—Jeejeguitatsi, Nomajirote, noquemi-sanquempiqueate, notsaquetarite aviguen-tiquea Quirishito, Irijanite Aapani Irioshi, aviguentitarite icamantacojítica incoraque-taque acaniqui quepatsiqui.

**Iraanacaguetai Jesoshi omorotacaguetai  
imperita yoguijaantajicarica Irasaro**

<sup>28</sup>Arikea ocanquitigui imaica Marita, opianaja ocajemapojiro Maria oguetyote, inchiquioji oquenquetsata-caaquieroquea ocantiro:

—Arejetapojaca Tsatacantantatsica, icajemacaanquempi.

<sup>29</sup>Arikea oquemavaquerogueti ocatiapanajantaquea oanaque ichoocaque-gueti. <sup>30</sup>Tequeratirajatarite irarejetempaji Jesoshi ochoocaguetaigueti tsovironaquipae, manaqueate ichoocapojaque ontaniqui iroqueragueti otonquivojavacariguetai Marita. <sup>31</sup>Irirajiaqueate joriojia tsipajacaroca Maria tsovironaquiqui, oguishineja-queroca, iroompaquea yamenavaquero-gueti ocatiapanajanta osotoanaque yoguijajaitanaqueroquea, ijiquequeate ari oanaque ichoocataquegueti ojariri iraacopojajeri. <sup>32</sup>Arikea arejetapojaquegueti Maria ichoocaquegueti Jesoshi, onejapojaquerigueti otigueroashitapojacari iguitiqui, ocantiri:

—Nomajirote, arimequea pinchooca-queme acaniqui aatomequea imetojime jai.

<sup>33</sup>Arikea yamenavaquerogueti Jesoshi iraanaca Maria jerijaquea aisa joriojia tsipajiacaroca, arikea iria ishimampojancavaetanacaquea.

<sup>34</sup>Arikea icanti:

—¿Quero pojoquijiquerini?

Iriatimpajia icantajiguiriquea:

—Nomajirote, jameja pamenaquieri.

<sup>35</sup>Iraaca Jesoshi. <sup>36</sup>Icantajianaquequea joriojia:

—Pameneri, caaviji ipintsamajatari.

<sup>37</sup>Cotanquitsiqueate iconoagarantajia- nacaquea mana icantajianaque intati:

—Yagavejaquetari inejacajairi shamponcavjetatsica, éteempa iragave- jeji irogueshitavajerime iricatica aatoniji imetoji?

#### Jesoshi yovochantajirigueti Irasaro

<sup>38</sup>Arimpa ishimampojancavaetanaca Jesoshi. Arikeate yarejetapojacaroquea omorotacaguetti imperita yoguijantaji- carica, iroguenti iticaacotantajicari nirotsentseina mapi. <sup>39</sup>Icanti Jesoshi:

—Pintanarejeroja mapi.

Oquenquetsatanaquequeate Marita itsijoite metojanquitsica, ocanquea:

—Nomajirote, aricaja pojitanaque, yoguijaitjisijicaritarri chapinqui, icarata- covaetanaquetari 4 savincaguiteri.

<sup>40</sup>Icantiro Jesoshi:

—¿Arimpa tee noncantempi incajaranqui pinquemisanquenaguetti pamenaqueroquea iragavejane Aapani Irioshi?

<sup>41</sup>Arikea itanarejajiaquero mapi. Iriraquea Jesoshi yamenanaque jenoqui inquitequi icanti:

—Ariotesa, Aapani, noshinevaetaca- queate piquemavaquenatarite. <sup>42</sup>Notsa- quetari irosati picoguitaniquea piquemaquena, cotanquitsiqueate nocanqueguetti imaica, iroguenti inquemisantimentajiaquempinjite maasano iricajia catintijianquitsica,

intsajiaquenijite arimaja aviguenti tigarancaquena.

<sup>43</sup>Irooompaquea icanqueguetti imaica iririjencatanaquequea icajemanaque- quea icanti:

—Irasaro, pisotoapojaje.

<sup>44</sup>Ari isotoapojaji metojavetanquitsica aguiaguaatacarí omagopae iracopaequi, iguitipaequi, maasano. Oraquea ivoroqui ipashicacaro paaño. Icanti Jesoshi:

—Poishorejacoterijate iroanajeta.

#### Isariajicariquea Jesoshi irimetojacaantajitaqueri

(Mt. 26.1-5; Mr. 14.1-2; Irc. 22.1-2)

<sup>45</sup>Irootaquequea iquemisantantajiacarica oshequi joriojia oananquitsica tsipajiacaroca Maria yamenajiaquerogueti yantaqueca Jesoshi, itsajiapojaque iriomajaca. <sup>46</sup>Cotanquitsiquea iconoaga- rantajiacaquea manaquea yoajianaque icamantajiaopojaqueriquea pariseojia taa opajita yantaque Jesoshi. <sup>47</sup>Arikea icapiocajiacaquea pariseojia itsipajiacariquea saserorotejia anaantajianquitsica jerijia itsipajia majirontajitsica, icantajiguiguea:

—¿Queroquea ancojiaquerineri intatatica? Yantaguetaquetari oshequi oacaantantatsica intati. <sup>48</sup>Aatoguetitari acantajigu manaquea inquemisantajianaqueri maasano, arikea incoraquejiaque Iromaquitica irisoveaquerorequea teemporo itsaroventantajitarica Aapani Irioshi, irashintsijiapojacajiroquea aguepatsijate iroguivorocajiacijkea intati.

<sup>49</sup>Arikea ichoocaque saserorote anaantamajatanquitsica icantajitica Caipashi. Iriatimpapea iquenquetsata- naquequea icanti:

—Teequea pintasajigueji aviati- pajia. <sup>50</sup>Tee pinquenquejajigueji ocameetsamajataque apatiroti

caquinte irimetojaventaqueri caquin-tejia, aatoniji ateroncajiga maasano aguinenteniqui.

<sup>51</sup>Ora icanquegueti imaica teequeate inchiquiojitsita inquen-quejashitemparoji iriatimpa. Iriotaquetari saserorote anaantama-jatanquitsica oratica ajagantsi, irootaquequeate iquejetacaantanta-carica Aapani Irioshi icantacotaque-riqueti Jesoshi irimetojaventajia-queri maasano joriojia. <sup>52</sup>Cotanqui-tsiquea aatoquea apaniro irimetoja-ventajiaqueri joriojia, irimetojaven-taqueriqueate aisa maasano irijani-jiate Aapani Irioshi guintenigueta-tsica osamanipaequitica, incapioca-jiiquerinijite apapiro incantana-jempa. <sup>53</sup>Irosatiquea isarijantajiana-carica irimetojajiaqueri Jesoshi. <sup>54</sup>Ariqueate iriatimpa teequea ironigajajempariji ichoocamajajia-quegueti joriojia, manaquea yoanaque guinteninintsiqui icantaji-tica Eperaine oquempejitetiqueti oquitamampororoipojigueti. Arikea ichoocapojaji oraniqui itsipajiacari-quea itsatacaanejia.

<sup>55</sup>Pajiniquea aapojempa ishineven-tajiacaca joriojia icantajitica Paashicoa. Oshequiniquea quena-guetapojatsica querocagueti iguiente-niguetani yoayoaitanaquequea Jerosarequi irinetsanamajajia-quempa tequeratagueti arejetempa Paashicoa, irootarite yamejigaca iriatimpajia. <sup>56</sup>Icoaguequeriquea Jesoshi oraniqui. Arikea ichoocaji-aquegueti teemporoqui oniganqui-requi icantavacaajiacaquea:

—¿Quero pincanteni? ¿Arimpa incoraqueque imaica Paashicoaqui?

<sup>57</sup>Irirajia pariseojia jerijia saseror-tejia anaantajianquitsica icantajiaqueri-tarite maasano:

—Pitsaquegueti quero ichoocaqueni Jesoshi, pincoraqueque pincamantaji-guena cameetsaniji naacaanqueri.

**Maria oshaguiguitancari Jesoshi casancajari**

(Mt. 26.6-13; Mr. 14.3-9)

**12** <sup>1</sup>Ocaratapojaquegueti 6 savinca-guiteri arejetantapojaquempaca Paashicoa, iriraquea Jesoshi yoanaque-quea Vetaniaqui iguinentitagueti Irasaro metojavetanquitsica yovochantajica.

<sup>2</sup>Arikea oraniqui itijaiqueroquea irishecaquempaca Jesoshi, irishineven-tajiavaquempariquea. Oraquea Marita iroguenti amajiaqueneri. Iriraquea Irasaro ari ichoocaque oraniqui shitaponcarontsiqui iconoajiacari maasano tsipajiacarica Jesoshi.

<sup>3</sup>Arikea ocoraquepojaquequea Maria amacotaquequea apanaquitiro vegaramajatanquitsica casancajencajata-tsica ipeantajitaroca naarer, tee inconoajatantajitemparoji otsipaja. Oshaguitancariquea iguitiqui Jesoshi, iroompas oshetantavacariquea omae.

Arikea octanaca oponcrajencatana-quequea otsitacajencatancaro tsoviro-naqui. <sup>4</sup>Arikeate ichoocaque oraniqui Jorashi Ishicariote irijanite Shimo, iriguentequea itsatacaane Jesoshi amampivenquerineca coajica. <sup>5</sup>Icanti:

—¿Queroquea octacani teequea irojocantajiteroji? Iraantajiquemparome oshequi imentaquipae irooriji ovegara-vaevetaca 300 tenario, irojocajitaquene-rime coguitejacojianquitsica.

<sup>6</sup>Cotanquitsiquea teequea arimaja inquenquejamajateriji coguitejacojan-quitsica, manaqueate icanquegueti imaica yamenaque iriguente ajiricacota-piniquenerica imentaquitsitepae itsipajiacaca, arikea yaagarantsitaqueriquea.

<sup>7</sup>Cotanquitsiqueate Jesoshi icantsitari-quea:

—Ari octaca, naroguentitarite otsotejatashitaca oshaguitanquenaca imaica, iroguijaajiquenatari omoroqui coajica nometojanaquegueti.

<sup>8</sup>Iriraqueate coguitejacojiatsica icancanitarite intsipajiaquempi, naatim-paquea aatotari nocoguitani notsipaji-guimpi.

**Isariajitanacari Irasaro  
irimetojacaantajitaqueri**

<sup>9</sup>Ariquea iquemacojaquerigueti oshequini joriojia chooja Jesoshi Vetaniaqui, yoayoaitanaquequeate iramenjajaquiteri, cotanquitsiquea tee apaniro iroashijianaqueriquea iriatimpa, yoayoaitashitanajeraquea aisa Irasaro yovochantajica Jesoshi imetojavetaca-gueti. <sup>10</sup>Arikeate iquemavacaajianaca-quea saserorotejia anaantajianquitsica irimetojacaantajitaqueri aisa Irasaro, <sup>11</sup>yamenajajaquetarite irio iquemacoji-aque oshequi joriojia yovashiantantajia-najarica iriatimpajia teequea inquemi-santajiajeriji, iriguentequea iquemisanta-jianaque Jesoshi, yaventajianacari.

**Ishineventajiavacarigueti Jerosarequitica  
Jesoshi**

(Mt. 21.1-11; Mr. 11.1-11; Irc. 19.28-40)

<sup>12</sup>Choocaquea oraniqui Jerosarequi oshequini coraquejianquitsica irishine-ventajiguempa Paashicoa. Arikeate osavincaguitetamanaquegueti iquema-cojiaqueriqueate Jesoshi coraque-taque. <sup>13</sup>Yaavashijianaquequea ovashi yoayoaitanaque itonquivojajiacariquea icajemajianaquequea icantajigu: —iCaaviji yoganejencamajataca!  
—iIntsishatsi irishineventajiquem-pari iriratica coraquetapojaitsica itigarancaquea Majirontamajatatsica!  
iIriotaque Imajirote ishiraerija!

<sup>14</sup>Iroompaquea irira Jesoshi inejapoja-queri iriaqueraca quimogantirenatanan-

quitsica aashino yaqueriquea isavica-naqueri, ariquea onetsanatanacaquea itioncacojiquerigueti ocanti:

<sup>15</sup>“Aatoja pitsaroajigui aviatimpajia Shionequitica, coraquetapojaquetari pimajirote, ishiacotantapojari iriaqueraca quimogantirenatananquitsica aashino.”

<sup>16</sup>Cotanquitsiqueate irirajia itsataca-anjeja tequerata intsajigueji irootaque-quea netsanataqueroca itioncacojiquerigueti, cotanquitsiquea ariquea yogajenocashitanajaroqueti Jesoshi iroganejencare ariquea iquenquejajiana-queroquea maasano yamenaguetaqueca ari itsajipojaque: arimajasacanicate iriguente oquenquetsatacotaque itionca-cojiquerigueti, irootaquequea iquejetantajicarica imaica.

<sup>17</sup>Irirajiaquea amenajiaquerica Jesoshi yovochantajirigueti Irasaro icajemaque-rigerigueti yoguijaajivecarigueti icamantaji-aqueriquea maasano. <sup>18</sup>Irootaquequea yoayoaitantantanaca itonquivojajiacariquea Jesoshi, iquemacojaqueritari yantaquero oacaantantatsica intati.

<sup>19</sup>Irirajiaquea pariseoja icantavacaajia-naqueate:

—Jeroquea nocantavequempi.

¿Queroquea ancojiaquempani imaica?  
Pamenajiguerija maasanojia yoguijajia-naqueri.

**Inintajiaquequea guiriegojia  
iramenjajaqueri Jesoshi**

<sup>20</sup>Yoagarantajianaquequeate aisa guiriegojia Jerosarequi irogavisaaji-guero Paashicoa intsaroventajiguempa Aapani Irioshi. <sup>21</sup>Iriatimpajia yoayoaitanaque ichoocaquegueti Jeripe ponean-quitsica Vetsairaqui choocatantaroca Garireaqui, icantajiguriquea:

—Nonintajiaque nonejajiaqueri Jesoshi.

<sup>22</sup>Iriraquea Jeripe yoanaque icamanta-pojiriquea Antirishi, ariuea itsipatana-cari yoayoaitanaque icamantajiaqueri-quea Jesoshi.

<sup>23</sup>Iquenquetsatanaquequea Jesoshi, icantajiavaqueri:

—Apojacaquea ironigaantantajita-quemparoca iroganejencare Irijanite Caquinte. <sup>24</sup>Imaica noncamantamajajia-quempiquea, arigueti osacoroncaguite tirigoitsoqui quepatsiqui, aatogueti osampirocaguiti oitsoqui, aatoquea oshequigui, manaquea apaitsouquo oncanquempa. Cotanquitsiquea osampirocaguitegueti ontsoroanaque oitsoqui-majatanaque. <sup>25</sup>Ariuea iquempetaca imaica quericaca tsaroacaatsica iriatimpa teequea irinintimateji irantsipeventaquempari itsipa, icavintsajavecaquea cotanquitsiquea irimetojaque coajica. Cotanquitsiquea iriraquea teeca incavintsajempaji iriatimpa acaniqui quepatsiqui iroguenti iquenquejacotaqueri itsipa yatsipeven-cariquea, iriguentiquea incoguitempani-quea iranijaguiten. <sup>26</sup>Quericaca nintanquitsica irantaguequero noninta-guetica naatimpa, iroguijatacotenata. Querocagueti nonchooquaquegueti naatimpa, ari inchooquaque aisa iriatimpa notigaranguica. Iriraqueate antaguetiroca nonintaguetica naatimpa, irishinevenquempariquea Aapani incanqueriquea: ‘Cameetsavaetaque-quea.’

<sup>27</sup>“Imaicaquea noshoshoguitevaetana-caquea, cotanquitsiquea ¿queroquea noncanteni? ¿Arimpa noncante: ‘Aapani, pincavintsajenashia aatoniji natsipeta nometojaque’? Aatoquea nocantiritsi, irootaquetarite nocoraque-tashique, irootaque narejetantapojacaro-oca ocatica savincaguiteri. <sup>28</sup>Aapani, ponigaantero poganejencare irishine-ventajiaquemparoniji pivajiro.”

Ariuea iquenquetsajitanaquequea ontaniqui jenoqui inquitequi icanti: “Nonigaantaquerotari noganejencare, coajicaquea nonigaantajero aisa.”

<sup>29</sup>Ariuea iquemajiaquerigueti maasano catintiitanquitsica iconoaga-rantajiacaquea icantajianaque mana oseroronzaguitetanaque intati, cotanqui-tsiquea itsipa cantajiananquitsica:

—Iriocaja quenquetsatanquitsi irashivantite Aapani Irioshi.

<sup>30</sup>Iriraqueate Jesoshi icantajiguiri-quea:

—Tee iro inquenquetsatantempaji nonquemero naatimpa, iquenquetsatan-tacaca cameetsaniji pinquemajiaquero-niji aviatimpajia. <sup>31</sup>Imaicaquea aapojaca incantantajitaquempaca quero incojita-querini covaeguishejiatsica quepatsiqui-tica, aisa iroguisotoajiteri irira majiron-tavetanquitsica acaniqui quepatsiqui.

<sup>32</sup>Oraqueate irogatiacojitaquenagueti

acaniqui quepatsiqui noncajemashiren-

tajiaqueriquea maasano.

<sup>33</sup>Oraqueate icanquegueti imaica manaqueate itsavetantanaqueroquea quero incojitaqueri irimetojajiquerigueti.

<sup>34</sup>Irirajiaquea capiocaventajiacarica icantajiguriquea:

—Noquemajiaque itsatacabajitanagueti Itioncacaantaqueca Aapani Irioshi ocanti irira Quirishito incoguitempani inchoocaguiten. Imaica ¿queroquea ocotacani picantantacaca irogatiacojita-queri irira Irijanite Caquinte? ¿Queri-quea imaica Irijanite Caquinte?

<sup>35</sup>Iriraquea Jesoshi icantajiguriquea:

—Imaicaquea igantagatiraja ichooca-timojiaquempi Tsirencari, cotanquitsiquea capichajanquinivani. Panijijiaque-quea imaica igantagatirajagueti itsirenuquimojiaquempi, tequeratagueti pimpitsecacojigueji. Iriraquea anijitatsica pitsecariqui teequea intsatej

quiero iquenanaqueni.<sup>36</sup> Nocantanta-quempicaquea, pinquemisantajiguera Tsirencari choocatirajagueta, pinquejetimentajianaquempariniji iriatimpa.

Ariquea iquejequerogueti imaica Jesoshi iquenquetsataquegueti yoanaquequea, ipeapitsajianajari.

**Quero ocotacani teeca  
inquemisantantajiguempaji oshequi jorio**

<sup>37</sup> Iriraquea Jesoshi yantavecauea maasanopae oacaantantatsica intati yamenacajaiavectoriquea maasano, cotanquitsiquea iriatimpajia teequea intsaajiavaqueriji, teequea inquemisantajavaqueriji.<sup>38</sup> Iroguentiquea oquejetantanacaca imaica cameetsaniji onetsanataquempanijite itioncaqueca tsavetantsica Isaishini, oantiquea:

“Nomajirote, notsavetantajiavecarorangea picanqueca cotanquitsiquea ictaa quemisantavaquero?”

Ponigaajavetacari pagavejica cotanquitsiquea ictaa tsatavaquero?”

<sup>39</sup> Oquejetantanacaca imaica teequea iragavejajigueji inquemisantajigueji, iroorijite icanke Isaishini aisa itioncaquerogueti icanti:

<sup>40</sup> “Iriraquea Aapani Irioshi ishamponcajatacaajiaqueri, iquishoshirentacaanaqueri, aatoniji inejantajajarotsi iroquija, aatoniji itsajigui ishirequi, aatoniji ipitsocashijigana nogueshi-shirentantajemparica.”

<sup>41</sup> Iriraquea Isaishini icnqueroquea ocatica imaica yamenaqueritarite Jesoshi caaviji yoganejencamajata irootaquequea itsavetacotantacarica.

<sup>42</sup> Oquempevecaquea imaica cotanquitsiquea ichoocajiaque oshequinaciuntejia aisa imajirojate cantajajiquitsica Jesoshi iriguenti Quirishito Meshiantatsica, cotanquitsiquea

inchiquiojiquea icantajiaque imaica itsaroacaajiacaritarite pariseojia icantimentajiguirtsiqueate inquijajianaquegueti shinagogaqui icapiocantapiniji acaca.<sup>43</sup> Inintajavetacatari irishineventajiaqueparime Aapani Irioshi, cotanquitsi iroguenti inintamajajiaque irio shineventajiaqueparine caquintepae.

**Icanqueca Jesoshi  
oncatsimataacaantaqueri irira teeca  
inquemisantavaqueroji**

<sup>44</sup> Arikea iquenquetsatanaquequea Jesoshi iririjencaquea icanti: “Maasano quemisantanaca teequea apaniro inquemisantena naatimpa, iriguenti quemisantaque tigarancaquenaca.

<sup>45</sup> Arikea iquejetacaquea nejaquenaca, inejaqueriqueate aisa tigarancaquenaca.

<sup>46</sup> Naroguenti Tsirencari, iroguenti nocoraquetashitaque quepatsiqui aatoniji ipitsecacotaji quericaca aventaquerenanea. <sup>47</sup> Cotanquitsiqueate quericaca quemavetavaquenane aatogueti inetsanatiro nocanqueca aatoquea naroguenti cantatsi incatsimattimentajiteri igovaeguishere, teequea iro noncoraquetashite noncantacoteri caquintejiasica incatsimamatentajiteri igovaeguishere, iroguentiquea nocorquetashique naajiajavajeri aatoniji ipega.

<sup>48</sup> Quericaca manintaquerenanea, teeca irininteji inquemisantero nocanqueca, choocaquea cantacaanquerineca: iroguentiquea nocanqueca noquenquesavetacagueti. Irootaquetari cantacaanquerine aapojaquempagueti savincaguiti vegaratapojaatsineca. <sup>49</sup> Teenicaquea inchiquojitsi naashitemparojo naatimpa maasano querocaca nocanqueca. Iriguentequea cantaquea Aapani tigarancaquenaca.<sup>50</sup> Notsaquequea ora icantacaantaqueca Aapani, iroguenti anijacaantantatsica iranijanta-

guitempanica, irootaquequea noquejetantacaroca imaica: ora icanquenaca Aapani irootaque nocanque.”

### Jesoshi iquivaguitijaqueri itsatacaanejia

**13** <sup>1</sup>Tequeratagueti aguempaji  
Paashicoa, itsaquequea Jesoshi aapojaca irojocantanajemparoca ocatica quepatsi iroanajequea Aapaniqui.

Igantagaquea coramani ipintsajiacari yashintajiacaca acaniqui quepatsiqui, icoguitaniquea ipintsamajajianacari, irosati yonigaantamajataquero quero ocarataqueni ipintsamajatacari caquinte.

<sup>2</sup>Opitsecanajigueti ishecajaca.

Incajaranqui iquenquejacaquaqueri ampatsini Jorashi Ishicariote, irijanite Shimo, iramampijaqueneri Jesoshi iraacaanqueri. <sup>3</sup>Itsaquequea Jesoshi yagavejacaquaqueri Aapani Irioshi maasano, itsaque iponeaca Aapaniqui Irioshiqui aisa iroanaje iriatimpaqui, <sup>4</sup>irootaquequea icatiantanacaca ishecajaciagueta, iquitsaarejanacaro iitsaare jenoquitanquitsica, yaaquero ishetantajitaca ishipitacaro. <sup>5</sup>Arikea ishajataqueroquea oja vantejaqui, iquivaguitijaqueriquea itsatacaanejia, ishexitantajiajari ishipitacaca. <sup>6</sup>Yarejetapojacari-gueti Shimo Peerero, icantavaquaqueri:

—Nomajirote, ¿aviguentimpa quivaguititenane naatimpa?

7Icantiriquea Jesoshi:

—Tequeratanicate pintsateroji quero ocozacani noquejetancaroca imaica, cotanquitsiquea coajicaquea pintsapojoero.

8Icantsitariquea Peerero:

—iAatoja piquivaguititimata naatimpa!

Icantiquea Jesoshi:

—Aatogueti noquivaguititimp, aato nagaveji notsipatajimpi.

9Arikea icantiriquea Shimo Peerero:

—Nomajirote, arisacanicate aatoqueate aparo piquivaguititana,

pinquivacotaquenaquea, aisa pimaqueroquea noguito.

<sup>10</sup>Cotanquitsi Jesoshi icantiri:

—Iriraquea cajatatsica mana inquiva-guititajempa intati, ariquea onetsanata-naja maasano itsinoqui. Imaica aviatim-pajia netsanajavetaquempiquea, cotanquitsiquea teequea maasano pinetsanajiguempaji.

<sup>11</sup>Itsatsitacatari queri amampijaquene-rineca aacaanquerineca, irootaquetari icantantacaca: “Teequea maasano pinetsanajiguempaji.” <sup>12</sup>Arikeate iteroncaquerogueti iquivaguitijaqueri-gueti iquitsaatanajaquea yovanqueta-caca, yoanaji isavicapojaji shitaponca-rontsiqui, icantajiguiriquea:

—¿Pitsajivaquaquerompate taa opaji noquejetacaacaca noquejejiaquempiro-gueti imaica? <sup>13</sup>Aviatimpajiaquea iroguenti picantajigana: ‘Tsatacantan-tatsica’, aisa picantajigana: ‘Nomajirote.’ Tampaticaquea poaquiero, aritari nocota. <sup>14</sup>Arivetaca imaica naroguenti-vetacaquea tsatacaaajiguimpica, aisa naroguentivetaca Pimajirote, cotanquitsiquea noquivaguitijaquempiquea. Ari pinquejetacaajajemparo aviatimpajia pinquivaguititavacaajiaquempaqueate.

<sup>15</sup>Naatimpaquea manaqueate noquejeta-queroqueti imaica cameetsaniji namena-cajaiaquempironijite pimpampiatimen-queronijite aviatimpajia, pinquejejia-queaquea naatimpa imaica. <sup>16</sup>Nonca-mantamajajiaquempiquea irirajia aajanrentsi teequea iranagueriji aajanitarica. Ari iquejetaca itigarancaji-tica teequea iranagueriji tigarancaque-rica. <sup>17</sup>Imaica pintsajiaquerogueti ocatica nocantajiaquempica, pinquejeji-avaquerogueti aviatimpajia, arikeate pishinemajajianaquempaquea.

<sup>18</sup>“Cotanquitsiqueate nocanquegueti imaica teequea nonquenquetsatacoji-guempiji aviatimpajia maasano,

notsamajajiguiritari nocoguijiaqueca. Cotanquitsiqueate oquejetantanacaca imaica onetsanaquempaniji Itioncacaantaqueca Aapani Irioshi ocantigueti: 'Iriraquea shecatacoquenaca icatsimata-naquena.'<sup>19</sup> Nocamantsijiaquempiquea imaica tequerataguete onetsanatemppaji, cameetsaniji coajica onetsanaquempaguetei pintsajiaquenanijite narotaque. <sup>20</sup> Noncamantamajajiaquempiquea quericacaquea shineventavaquemparanea notigarancaquea naroguentiquea ishineventavaca, aisa quericaca shineventavaquenaneca naatimpa iriguenti ishineventavaca tigarancaque-naca."

**Jesoshi icamantaquerigueti  
iraacaanqueri Jorashi**

(Mt. 26.20-25; Mr. 14.17-21; Irc. 22.21-23)

<sup>21</sup> Iroomba icanquitigui Jesoshi imaica, ariqueate icotanaca ishimampojancavaetanaca, ariquea icamantamajajianaqueri icantajiguiri:

—Imaica noncamantamajajiaquempi-quea, chooca aparo atsipajiacaca ocaniqui iraacaanquena.

<sup>22</sup> Arikea icojianaca itsatacaaneja yamenavacaajianaca, tee intsateji queri iquenquetsatacotaqueca. <sup>23</sup> Iriraqueate itsatacaane ipintsamajataca Jesoshi choocaquea ipimerequijaca iquempejimajacari ishecaciagueti. <sup>24</sup> Iriraquea Shimo Peerero icanquiti guitoc incoacotimenqueriniji Jesoshi quericaca iquenquetsatacotaqueca. <sup>25</sup> Arikeate iriatimpa itsipamatapojacariequa Jesoshi icantiri:

—Nomajirote, ¿queri?

<sup>26</sup> Icantiri Jesoshi:

—Imaica nojocajaquerogueti ocatica pan ashecajiacaca, quericaca nojocaque-neca iriotaque.

Arikea iquejetaquero yojocajaquero pan yojocaueneriquea Jorashi

Ishicariote irijanite Shimo. <sup>27</sup> Iroompa-quea ishecataquitigaro ariquea icotanaca iquijanaqueriquea Satanashi. Iriraquea Jesoshi icantiri:

—Oraquea piquenquejaqueca iintsijsi pantero taampina.

<sup>28</sup> Cotanquitsiquea itsipajia shecabajiquitsica teequea intsajigueji quero ococani icantaquerigueti imaica.

<sup>29</sup> Iconoagarantajiacaquea iquenquejajaaque arica Jesoshi icanqueri Jorashi iroanaque irovegarataquite irishecajia-quempaca Paashicoaqui, iroocampa irojocajigueneri imentaquipae coguitejacojianquitsica. Iriguentitari ajiricacojiguinirica imentaquitsitepae iriatimpajia.

<sup>30</sup> Arikea yagaquegueti ishecatacaro pan yojocauenerica Jesoshi, ari isotoapanajanti. Pitsecanaque.

**Jesoshi itsatacajajianaqueriquea  
impintsatavacaamajajiaquempa**

<sup>31</sup> Iroomba yoanaquitigui Jorashi icantiquea Jesoshi:

—Aapojacaquea irogajenocashitantanajaroca iroganejencare Irijanite Caquinte; irooqua irinejantajitaquemparoca iroganejencare Aapani Irioshi.

<sup>32</sup> Ironigaanquerogueti iroganejencare Aapani Irioshi, ariqueate inquejetaquempa iriatimpa ironigaanqueroquea iroganejencare Irijanite Caquinte, taampinaquea ironigaanquero.

<sup>33</sup> Irijanija, imaica aato osamani notsipamajajajimpi. Arikea pamenguevetajenaquea, cotanquitsi noncamantajiaquempi aviatimpajia nocamantajiaquerica apijoriojiate: Aatoquea pagavejajigui poajigue querocagueti noanajeni naatimpa.

<sup>34</sup> Imaica noncamantajiaquempiqueate iroqueratanquitsica pinetsanajiaqueca: pimpintsatavacaajiaquempaja. Pinquejiguenaquea naatimpa nopintsamajajiaquempigueti, ariqueate pinquejeji-

guempa aviatimpajia aisa pimpintsata-vacaamajajiaquempaja. <sup>35</sup>Pinquejejia-quempagueti imaica pimpintsatavaca-a-majajiaquempagueti irooqua intsatan-tajitaquempica aviguentijia notsatacaa-nejia.

**Icantaqueueti Jesoshi  
iromanacotaqueriquea Peerero**  
(Mt. 26.31-35; Mr. 14.27-31; Irc. 22.31-34)

<sup>36</sup>Arikea irira Shimo Peerero icantiri Jesoshi:

—Nomajirote, ¿quieroqua poanajeni?  
Iriatimpaquea icantiri:

—Querocagueti noanaqueni naatimpa, aatoquea pagaveji poguijatana aviatimpa, cotanquitsiquea poguijatana-jena coajica.

<sup>37</sup>Iriatimpa icantiri:

—Nomajirote, ¿quieroqua octacani aatoca nagavejanta noguijatimpi noanaquequeate imaica? Naatimpaquea nometojavenquempi.

<sup>38</sup>Iriraqueate Jesoshi icantiri:

—¿Arimajampa pimetojavenquena? Imaicaquea noncamantamajajuempi, coajica tequeratagueti irinijeji chaapa pomanacoquenaquea 3.

**Jesoshi iquempetacaro quenavoquivrontsi**

**14** <sup>1</sup>“Aato pitsaroashirentajigui. Iriguenti pavenuempa Aapani Irioshi, aisa pavenuena naatimpa. <sup>2</sup>Ontaniqui itsovironaquitequi Aapani chooca oshequinii piguinentantapoja-jempaca. Oraqueate aatomegueti ochoocatime, noncantajiaquempime-queate. Imaicaqueate noanaje novetsica-guetapojempiro pinchoocatantajiaopoja-jempaca aviatimpajia. <sup>3</sup>Arikea noanajegueti novetsicaguetaquitempi-rota pinchoocatantajiaopojempac, nompiashijiaquempiqueate naajiaja-tempi poimentajianaquenijite pinchoocatantajiaopojempac ontaniqui naatim-

paqui. <sup>4</sup>Pitsajiaqueroquea quero noanaqueni, aisa pitsajiaquero quenavo-quirontsi.”

<sup>5</sup>Icantiri Tomashi:

—Nomajirote, tee nontsajiguenica quero poanaqueni, ¿querocampate noncojiaquempani nontsatantajiaquem-paroca quenavoquivrontsi?

<sup>6</sup>Iriraqueate Jesoshi icantiri:

—Naroguentitari quenavoquivrontsi, aisa naroguenti arimajatatsica, aisa naroguenti anijagantsi. Teenicate iragavejajitempaji iroashijitanaqueri Aapani aatogueti iquenantanaquena naatimpa. <sup>7</sup>Pintsajiaquenamegueti naatimpa, pintsajiaquerimequea Aapani aisa. Aritaque imaica pitsajiaqueri, pinejajiaqueri.

<sup>8</sup>Iquenquetsatsitanacaqueate Jeripe icantiri:

—Nomajirote, iintsija ponigaajigue-nari Piri, arikea ovegarapojempa.

<sup>9</sup>Icantiriquea Jesoshi:

—Jeripe, notsipatsijavetaquempiquea coramanitacopojimpiquea. ¿Tequera-tatirajampa pintsatenaji? Maasanoquea nejaquenaca naatimpa inejaqueriquea aisa Aapani. Imaica ¿quieroqua octacani picantantaquenaca: ‘Ponigaa-jiguenari Piri’? <sup>10</sup>¿Teempa pintsateji naatimpa nochoocaqueri Aapani, iriatimpa Aapani ichoocatana? Maasanoquea nocantajiaquempica teequea inchiquioji naashitemparoji naatimpa, ichoocaguitanatari Aapani irootaqueate maasano nantaqueca irioquea antaquero. <sup>11</sup>Pinquemisantajia-quenaja noncamantajiaquempigueti naatimpa nochoocaqueri Aapani, iriatimpa Aapani ichoocatana. Aatogueti piquemisantajiguiro nocanqueca, irooqua pinquemisantantaquenaca pamenajiaquerogueti nantagueataqueca.

<sup>12</sup>“Imaica noncamantamajajiaquempi-queate quericaca quemisantaquenanca

inquejetaquenaquea naatimpa irantaguequequea nantaguetaqueca, aisa irantaguetaquequea otsipapae anaaqueroca nantaguetaqueca naatimpa, noanajetarite Aapaniqui.

<sup>13</sup>Taaca opajita pamanantaqueca novajiroqui,<sup>r</sup> irootaque nantavaque nonigaanqueronijite yoganejencamajata Aapani intsaroventantajitanaquemparica.

<sup>14</sup>Pamaquenagueti novajiroqui, nonetsanatavaquempiro.

**Jesoshi icantajiaqueri intigarancaqueri  
Ishire Aapani Irioshi  
inchoocashirentajiaqueri**

<sup>15</sup>“Arigueti pipintsajiaquena, pinetsanajigueroquea nocantajiaquempica.

<sup>16</sup>Arikea naatimpa namaneri Aapani intigarancaqueriquea itsipa Amitacotantatsica incoguitempaniniji intsipajiaquempi.

<sup>17</sup>Irootaque Ishire Aapani Irioshi cantaqueroca iroomajatatsica.

Itsipajia quepatsiquitica aatoquea yagaveja ishineventajavajari, teenicate irinejajigueriji, teequea intsajigueriji. Cotanquitsiquea aviatimpajia pitsajigui, ichoocatimojiaquempitari arikea inchoocashirentajiaquempi.

<sup>18</sup>“Aatoquea novashiantajiguimpi pinquejejiaquemparime metojacori, noncoraquetashijajempitari.

<sup>19</sup>Capichajaniquinivani aato inejaijaana quepatsiquitica, cotanquitsiqueate aviatimpajia pinejajajena. Iroorijite nanijaguitini naatimpa, arikea panijaguiteni aviatimpajia aisa.

<sup>20</sup>Aapojempagueti oratica savincaguiteri ari pintsajiaque arimaja nochoocataqueri Aapani, aviatimpajia pichoocajiaquena, naatimpaquea nochoocajiaquempiquea.

<sup>21</sup>Iriraquea tsatavaqueroca nocantica

netsanatiroca, iriotaque pintsataquenaca. Iriraquea Aapani impintsataquempariquea pintsataquenaca. Ariquea nonquejetaquempa naatimpa nompinsataquempariquea, aisa nonigaaqueriquea quero nocotani.”

<sup>22</sup>Iquenquetsatanaquequeate itsipa Jorashi (teequea irio Ishicariote), icantiri Jesoshi:

—Nomajirote, ¿quieroquea octaca apaniro naatimpajia ponigajiaquena quero picotani, itsipajia caquinteja aatoquea ponigagari?

<sup>23</sup>Icantiri Jesoshi:

—Quericacaqueate pintsatanaca irinetsanataqueroquea nocantica.

Iriraquea Aapani impintsataquempariquea. Naatimpa nontsipataquempariquea Aapani noncoraquetashijiaqueri, noguinentapojempa iriatimpaqui.

<sup>24</sup>Iriraquea teeca impintsatenaji teequeate irinetsanateroji nocantica.

Teequea inchiquioji naashitemparo nocantajiaquempica imaica. Iriguentiquea cantaquena Aapani tigarancaqueanca.

<sup>25</sup>“Nocanquempiroquea octatica imaica choocatirajanagueti notsipajiaquempigueti.

<sup>26</sup>Cotanquitsiquea intigarancaquerigueti Aapani Ishire, Amijiajempineca quejetajenaneca, intsatacaciaquempiquea iriatimpa maasanopae, aisa inquenquejacaajajempiroquea maasano nocantajiaquempica.

<sup>27</sup>“Imaica noshinetacaajianaquempiquea aatonijite pitsaroajigui, pinquejejianaquenaquea naatimpa noshinevaetanacagueti. Naatimpaquea teequea nonquejetempariji ishinetacaantagueti caquinteguetatsica. Aatoquea pishimam-

<sup>r</sup> **14.13 novajiroqui.** Amanantaquemparigueti ivajiroqui Jesoshi oncanque amanaqueri iroorijite aquenquejamajajquero ininqueca iriatimpa, aato amanacoventiro anintashitacaca aatimpa intati.

pojancajiga, aisa aatoquea pitsarogui.

<sup>28</sup>Imaica piquemajiaqueroquea nocanquempigueti noanaje, coajicaquea noncoraquetashijajempi. Arimajame- quea pimpintsaquenam pishinejiana- quempamequea piquemajiaquerogueti nocanqueueti noanaje Aapani, yanaaquenatari. <sup>29</sup>Nocamantajiaquem- piquea imaica tequeratagueti arejetem- paji noantanajempaca cameetsaniji coajica arejetapojempagueti pintsajia- queniji arimajaquea nocamantamajaja- quempi irosatiquea pinquemisantajiana- quena. <sup>30</sup>Imaicaquea aato osamanitaji noquenquetsatac妖impi, coraquetapoja- quetarite irira majirontavetanquitsica acaniqui quepatsiqui. Aatoquea yagave- jana, <sup>31</sup>cotanquitsiquea onquejetaquem- paquea imaica cameetsanijite intsatimentajiaqueronijite maasano naatimpaquea nopintsamajatacriqueate Aapani, aisa nonetsanataqueroquea maasano icanquenaca.

“Imaicaqueate pincatajianaque, Jamequetiro.

**Itsavetancaquea Jesoshi iquejetacaro ovorentsamajaca ova**

**15** <sup>1</sup>Naatimpa noquejetacaro ovorentsamajaca ova. Iriraquea Aapani iquejetacari shiacotioca. <sup>2</sup>Iprivatejatsaguetavaqueroquea maasano notsegotsa teeca onchoocatantemparojo oitsoquipae. Oraquea otsipapae pitsara- quijacotanquitsica manaquea irinetsana- guetavaquero intati intotacoguetava- quero cameetsanijite ompitsaraquijacot- timentamajatanaqueempañijite. <sup>3</sup>Imaica- quea aviatimpajia netsanataquempequea shejiacatari piguempavaere, iroguenti- quea netsanajiaquempi quenquetsatsa- rents iocantajiaquempica. <sup>4</sup>Pincogui- tempaniquea pintsipamajajauenaja, ariuea nonquejetaquempa naatimpa noncoguitepani nontsipamajaja-

quempi. Pameneroja oratica otsegotsa ova aatogueti ogavitaro ovorentsa aatoquea ochoocati oitsoqui, aatotari ochoocatashita inchiquioji. Ariuea piquejejiaca aviatimpajia, aatogueti quisho poajigana, aatoquea pagaveja- jigu iinchiquioji pinetsanajigueron intatagueta Aapani Irioshi.

<sup>5</sup>“Naatimpaquea quejequena ovorentsa, aviatimpajiaquea quejequempi otsegotsapae. Quericagueti tsipamajataquenaneca nontsipamajata- quemparigueti irantaguequeroquea inintagueta Aapani, inquejetanaquem- paroqua otsegotsa pitsaraquijacota- tsica. Arigueti pintsiparejanaquem- pa aatoquea pagaveji. <sup>6</sup>Iriraquea caarica tsipamajatana manaquea inquejetana- quemparo otsegotsapae ova icaratsajita- queca impishoncajiguetavaqueroquea intati, ariueate ompirijatanaque coajicaquea iravijiquero irojocajiquero paamariqui omorecanaquequea samimi- mimi. <sup>7</sup>Imaica aviatimpajia pincogui- tempaniguei pintsipamajajauenaja, aisa aatogueti pipeacojigarao notsatacaya- quempica, pamanajiaqueriquea Aapani taaca opajita pinintaguequeca, ariuea irinetsanatavaquempiro. <sup>8</sup>Jeroquea irinejantajitaquemparoca iroganejencare Aapani: pimptsaraquijacotaquem- gueti pimpeantamajajauempaca notsata- caane.

<sup>9</sup>“Naatimpaquea nopintsamajajia- quempiquea aviatimpajia, noquejetacari Aapani ipintsamajatanaguetai. Imaica picancanija quisho poajiguena noncoguitepaninijite nompintsamajajia- quempi. <sup>10</sup>Naatimpaquea nonetsa- natiroquea icanquenaca Aapani, ariueate iriatimpa icoguitaniquea ipintsamajataquenaquea. Ariuea pinquejejiaquempa aviatimpajia pinetsanajiaquerogueti nocantajiaquem- pica, naatimpaquea noncoguitepani-

quea nompintsamajajianaquempi.  
<sup>11</sup> Manaquea nocantajiaquempiquea imaica cameetsaniji noguishinejajia- quempiniji pishinemajajianaquempamaji.

<sup>12</sup>“Jero ocatica noncantaqueempica poguijajianaqueca: pimpintsatavacaajia- quempaja, pinquejejiaquena naatimpa noppintsaquiaquempigueti. <sup>13</sup>Quericaca metojaventirica itsipavijimajajiaca iriotaque pintsamajatacarica. Tee iragavejeji itsipa iranaaquiero ocatica. <sup>14</sup>Arigueti pinetsanamajajianaquero nocantajiaquempica aviguentiquea notsipavijimajajiaca. <sup>15</sup>Imaica teequea noncantajajempiquea naajanireja, iriraquea aajanirentsi teequea intsateroji maasano yantaguetica aajanitarica. Iroguentiquea nocantajiaquempi notsipavijijiaca, notsatacayaquempiro- tarite maasano icanquenaca Aapani. <sup>16</sup>Teequea aviroquea coguijaiquenane, naroguentiquea coguijaiquempi. Mana nonintacaajiaquempi intati poajianaque pantaguetaquero cameetsaguetatsica pinquejetantajianaquemparoca pitsara- quijacotatsica sovenaguetatsica, aatoquea opega. Noninque pinquejejia- quero imaica cameetsanijite irinetsana- tavaquempiroñi Aapani pamanaque- rica novajiroqui.<sup>s</sup> <sup>17</sup>Jero noncantaquempica poguijajianaqueca: pimpintsatava- caajiaquempaja.

**Teeea inquemisantajigueriji Aapani  
 Irioshi incatsimajajiaqueriquea  
 quemisantajiguirica Jesoshi**

<sup>18</sup>“Pamenajiaquerigueti iriseman- guintajiaquempigueti quepatsiquitica pinquenquejajiajeroquea naroquetitari isemaneguintajiaci. <sup>19</sup>Pinquejejiaquem- parime quepatsiquitica teeca inquemi-

santajiguenaji impintsajiaquempime- quea, inquejetacaajiaquempimequea ipintsatavacaajigagueti iriatimpajia. Cotanquitsiquea nocoguijiaquempi piconoajiavetacarigueti irooqua isemaneguintantajiaquempica, teetarite pinquempejjajempari iriatimpajia. <sup>20</sup>Pinquenquejajiguerija nocantajia- quempica incajaranqui nocanti: ‘Irirajia aajanirentsi teequea iranagueriji aajanitarica.’ Yatsipetacaajiaquenaeua naatimpa, ariuea inquejetacaajiaquem- piquea aviatimpajia aisa irantsipetaca- jiaquempiquea. Itsipajia iquemisantajia- queroreua notsatacayaquerica, ariuea inquejejiaquempi aviatimpajia aisa inquemisantajiaquempiquea pintsatacayaquerigueti. <sup>21</sup>Ariuea inquejejiaquempiquea imaica incatsima- timentajiaquempiro piquemisantajia- quenagueti, teetari intsajigueriji tigaran- caquenaca. <sup>22</sup>Aatomegueti nocoraque- time nontsatacayaqueriquea, aatome- quea icatsimatumentajitirime ocatica yantaguishejiaqueca, cotanquitsiquea imaica nocoraquetaquetari notsatacaya- avetacaritari irootaquea aatoquea yagavejajiguincantajiaquequea: ‘Tee nontsajiguencate, noquejetantajiacar- roca imaica.’ <sup>23</sup>Maasanotari semane- guintajiganaca naatimpa isemaneguintajia- cariquea aisa Aapani. <sup>24</sup>Ariuea oquempetaca aisa aatomegueti namena- cajaiguirime taaca opajitapae teeca irantajigueti aatome iquejetacaan- tame, cotanquitsiqueate imaica yamen- jiavecarotari nantaguetaqueca cotanquitsiquea arimpaquea isemaneguintajiana- quena naatimpa aisa Aapani. <sup>25</sup>Oqueje- tantacaca imaica cameetsaniji onetsana- tanaquempaniji ocanica itioncacaanta-

<sup>s</sup> 15.16 *novajiroqui*. Amanantaquemparigueti ivajiroqui Jesoshi oncanque amanaqueri iroorijite aquenquejamajajeroquea ininqueca iriatimpa, aato amanacoventiro anintashitacaca aatimpa intati.

jiaquenerica Aapani Irioshi, ocanti: 'Mana isemashijiaquena intati.'

<sup>26</sup>"Ariuea noncamanqueri Aapani intigarancaquemperi irira Amitacotantsica, irioquea Ishire tsatacajiaquempi-neca iroomajatatsica. Ariuea incoraquequegueti intsavetantaquenaeua. <sup>27</sup>Ari pinquejiaquempa aviatimpajia pintsavetantajiaquenaeua, pitsipajiaquenatari iroqueragueti noparianacarogueti notsatacaantigueti irosati imaica.

**16** <sup>1</sup>"Imaica nocantajiaquempiquea maasano ocatica aatonijite povashiantajianajiro piquemisantajia-quenagueti. <sup>2</sup>Incantimentajiaquempirotari poavetanaquempagueti shinago-gaqui icapiocantapinijiacaca, aisa aapojaquempagueti savincaguiteri irimetojajiaquempigueti irijke iro yantajiaque ininqueca Aapani Irioshi. <sup>3</sup>Inquempejiaqueroquea imaica teenica intsajiguerinica Aapani, aisa naatimpa tee intsajiguenaji. <sup>4</sup>Manaquea nocamantajiaquempiroquea ocatica imaica cameetsaniji aapojaquempagueti coajica pinquenquejajiajeronijite nocamantsijia-quempitari coramani. Coramiquea tee noncamantajiguempi, choocanatari notsipajiaquempi.

#### ICAMANTAJIAQUERI TAA OPAJITA INTSATACAJIAQUERI ISHIRE AAPANI IRIOSHI

<sup>5</sup>"Imaicaquea imaica noanajequea ichoocaquegueti tigarancaquenaca, cotanquitsiquea aviatimpajia teequea pincoacojiguenaji queroca noanajeni. <sup>6</sup>Manaquea intati noshimampojanca-aaquiaquempiquea nocamantajia-quempigueti. <sup>7</sup>Cotanquitsiquea imaica noncamantamajajiaquempi ocameetsamajataquetari noanaje-gueti. Aatoguetitari nogui aatoquea icoraqueti irira Amitacotantsica oguishinejajiajempineca, cotanquitsi-

noanajegueti nontigarancajiaipoja-quemperiquea. <sup>8</sup>Oraquea incoraquepo-jaquegueti inquenquetsashirentacaaji-aqueriquea caquintejia quepatsiqui-tica iramenajiaquempa manaquea iquempevajiacaca, aisa intsatacajia-queriquea quero icotani comajamaja-tatsica, jeroquea aisa intsajiaque incatsimajiaqueriquea Aapani Irioshi coajica maasano teeca inquemisanta-jigueriji. <sup>9</sup>Inquenquetsashirentacaaji-aqueriquea cameetsaniji intsajiaque-niji mana iquempevajiacaca, teenica-quea inquemisantajiguenaji. <sup>10</sup>Intsa-tacaajiaqueriquea quero icotani comajamajatatsica, noncantanajempa-tari naatimpa Aapaniqui, aviatimpajia-quea aatoquea pinejajijaana. <sup>11</sup>Intsa-tacaajiaqueriquea intsatimentajiaque-niji incatsimajiaqueriquea Aapani Irioshi coajica maasano teeca inquemisantajigueriji, imataquerotari icantacotsitacari irira majirontavetan-quitsica acaniqui quepatsiqui.

<sup>12</sup>"Choocaquea otsipapae oshequi noncamantajiaquempiroquea, cotanquitsiquea aatoquea pagaveja-jiguironica imaica. <sup>13</sup>Oraquea incoraquequegueti Ishire Aapani Irioshi tsatacajiaquempiroquea iroomajaca, intsatacajiaquempiro-quea maasano. Aatoquea inchiquioji iquenquejashitaro iriatimpa, iroguentiquea incamantajiaquempi iquemaqueca. Aisa intsatacajia-queMPIroquea quero oncoguetana-quempani coajica. <sup>14</sup>Iraagarantaque nocanqueca intsatacajiaquempiro-quea, irootaquequea ironigaantanta-quemparoca noganejencare. <sup>15</sup>Maasanoquea yashincaca Aapani irooquea nashi aisa, irooquea nocantantacaca irira Ishire iraaga-rantaque nocanqueca intsatacajia-queMPIro.

**Jesoshi icamantajiaqueri  
irishimampojancajiaquequempa  
cotanquitsi irishinejianajempa**

<sup>16</sup>“Iroshipojaquequea imaica aatoquea pinejajijaana, osamaniguitepojaquegueti ariquea pinejajajena aisa, noncantanajempatari Aapaniqui.”

<sup>17</sup>Arikea iconoagaranca itsatacaanejia iquenquetsatavacajianaca icantajiaquequea:

—¿Taa opaji oca icancajica icanquegueti iroshipojaque aato anejajiri, osamaniguitepojaquegueti ariquea anejajeri, manatari iroanaje Iririqui?

<sup>18</sup>¿Taa opaji icanquegueti ‘iroshipojaque’? Tee antsatavaqueroji iquenquetsatacotaqueca.

<sup>19</sup>Iriraquea Jesoshi itsajiavaqueriquea intajiaivecaquea incoacoquerime, irootaquequea icantantajiacarica:

—¿Iroompa picoacotimentajiaquero nocanquempigueti ‘iroshipojaquequea imaica aatoquea pinejajijaana, osamaniguitepojaquegueti ariquea pinejajajena aisa’? <sup>20</sup>Imaica noncamantamajajiaquempiquea aviatimpajia pishimampojancajianaquempaquea pirajianaquempa intati, irirajiaquea teeca inquemisantajiguenaji irishinevaejianaquempaquea. Cotanquitsquea aviatimpajia pishimampojancajiavetaquempa, coajicaquea pishinejianajempaquea.

<sup>21</sup>Pinquenquejeroja oratica manquigarentsi oncatisitegueti oshimampojancaquempaquea oquemavaquerotari ocatsitanaquerogueti, cotanquitsquea ovoacotanajigueti teequea onquenquejeroji ocatsivecagueti manaquea oshinevaetanaca intati, voajitarri irijanite. <sup>22</sup>Arikea piquejejiaca aviatim-

pajia imaica pishimampojancajiaequepaquea cotanquitsquea naatimpa nonejajajempiquea arikea pishinevajianajempa, aatoquea ichoocati agavejanquitsineca irishimampojancacajiaempi. <sup>23</sup>Oraquea onquejetaquempaqueti imaica aatoquea picoacojajana naatimpa. Noncamantamajataquempiquea taacaquea pamanajiaquerica Aapani novajiroqui<sup>t</sup> irojocajiaquempiroquea. <sup>24</sup>Cotanquitsquea imaica tequerata pamananteji novajiroqui. Iintsija pamanajigueri, irojocajiaquempiquea cameetsaniji pishinemajajianaquempaniji.

### **Yanaantanaque Jesoshi**

<sup>25</sup>“Oraquea notsatac妖aquaquempigueti manaquea noquejetacaajaquempirotaaca opajitapae, cotanquitsquea coajica aato noquejetacaaguetajimpiro, manaquea nontsavetacomajataqueri Aapani noguisotoamajajiaquempiroquea pintsamajatimentajiaqueniji. <sup>26</sup>Onquejetaquempagueti imaica ariquea pamanante novajiroqui. Teequea ari noncanteji naroguenti amanacoventajiaquempine, <sup>27</sup>ipintsamajajiaquempitari Aapani iriatimpa, yamenajiaquempitari pipintsamajajiaquenaquea naatimpa, aisa piquemisantajiaavaqueroquea nocanquegueti mana noponeaca iriatimpaqui. <sup>28</sup>Arimajatari noponeaca Aapaniqui nocoraquequequea acaniqui quepatsiqui, cotanquitsquea imaica ariquea noanaje noncantanajempa Aapaniqui.”

<sup>29</sup>Irirajiaquea itsatacaanejia icantajiaqueriquea:

—Imaicaquea picamantamajajiaquequea, teequea pinquejetacaagueta-

<sup>t</sup> **16.23 novajiroqui.** Amanantaquemparigueti ivajiroqui Jesoshi oncanque amanaqueri iroorijite aquenquejamajajquero ininqueca iriatimpa, aato amanacoventiro anintashitacaca aatimpa intati.

jemparoquea intati.<sup>30</sup>Imaicaquea notsajiaquequea caaviji pitsamajatiro maasano, inchiquojitari pitsatsitacarоquea iquenquejaguetica caquinte tequeratagueti incoacojiguempiji. Notsatantajiacaca manaquea piponeaca Aapaniqui Irioshiqui.

<sup>31</sup>Iriraquea Jesoshi icantajianaqueri-  
quea:

—¿Iroosacanicate pitsajiaquenampate imaica?<sup>32</sup>Aapojempa savincaguiteri, jac aapojacatari imaica, pimporocantajiana-  
quempaca poapoaitanaque querocagueti pojocajianaquenaquea apaniro,  
cotanquitsiquea aatoquea apaniro  
nochoocati, itsipataquenatari Aapani.

<sup>33</sup>Nocamantajiaquempiroquea maasano ocatica pishinemajajianajempaniji  
paventamajajiaquenagueti. Ocaniqui quepatsiqui irantsipetacajaiquempiquea,  
cotanquitsiquea pishinemajajiana-  
quempa, nanajaiaqueritari maasano quepatsiquitica.

### Yamanacoventacagueti Jesoshi

**17** <sup>1</sup>Ariquea iteroncanaquerogueti Jesoshi iquenquetsatacaaajiaque-  
rigueti, yamenanaquequea jenoqui inquitequi icantiquea: “Aapani,  
aapojaca. Ponigaantaguetajero imaica iroganejencare Pirjanite, ironigaantantaquemparoca Pirjanite aisa poganejen-  
care aviatimpa. <sup>2</sup>Aviatimpaquea pipeacaacari imajirojiate maasano caquintejiatsica cameetsaniji iragaveja-  
queniji iranijacaajajieri maasano pojocajiaquenerica incoguitempaniniji inchoocaguitei. <sup>3</sup>Iriguentijia anijagui-  
tatsine, irirajia tsajiaquempineca aviatimpa, apaniro picota Pirioshima-  
jati, ariquea inquejejiaquempa intsajia-  
queriquea Jesoquirishito pitigaranca-  
queca. <sup>4</sup>Naatimpa nonigaanquero poganejencare acaniqui quepatsiqui,  
nonetsanaquerotarite maasano

picanquenaca nantaque. <sup>5</sup>Imaicaquea, Aapani, ponigaantaguetajero noganejen-  
care aviatimpaqui, pinquejetacaamaja-  
tajena notsipatimpigueti iroaqueragueti tequeratagueti onchoocateji quepatsi.

### Jesoshi yamanacoventajiaqueri itsatacaaneja

<sup>6</sup>“Irirajia picoguiajiaqueca pojocajia-  
quenaca notsatacjajiaqueriquea quero  
picota. Aviguentiquea ashintavetari,  
ariequa pojocajiaquenari, iriatimpajia-  
quea inetsanajiaqueroquea picanqueca.<sup>7</sup>Imaica itsajiaquequea maasano  
pojocajiaquenaca aisa pagavejacaquenaca ariguenti oquenapoji aviatimpaqui.

<sup>8</sup>Nocamantajiaqueritari maasano  
picanquenaca, ariqueate itsatavaquero.  
Itsamajajiaquequea arimaja noponeaca  
aviatimpaqui, aisa iquemisantajiaquena-  
quea nocamantajiaquerigueti aviguenti-  
quea tigarancaquena. <sup>9</sup>Iriguentijiatari  
namanacoventajiaque. Tee irio namana-  
coventajigue imaica maasano quepatsi-  
quitica, iriguentiquea namanacoventaji-  
aque pojocajiaquenaca, pashintajiacari-  
tari. <sup>10</sup>Maasanotarite nashintajiacaca  
pashintajiacariequa aviatimpa aisa.  
Ariquea oquejetaca aisa maasano  
pashintajiacaca nashintajiacariequa  
naatimpa aisa. Iriatimpajiaquea  
yonigaantajiaquero noganejencare.

<sup>11</sup>“Naatimpaquea aatoquea nochoocat-  
aji acaniqui quepatsiqui, cotanquitsi-  
quea iriatimpajia icancaniquea  
inchoocajiaje acaniqui. Noncoraquetaje-  
quea naatimpa aviatimpaqui. Aapani  
Oganejencamajatatsica, pinquempogui-  
jamajatantaquempariquea pivajiroqui  
irirajia pojocajiaquenaca, intsipamajata-  
vacaajiaquempaniji inquejejiajaciniji  
aatimpa atsipamajatavacagagueti.

<sup>12</sup>Oraquea notsipajiacarigueti  
quepatsiqui noquempogujantajiacari-  
quea pivajiroqui; noquempogujajia-

queri pojocajiaquenaca, teequea impeimatempaji, apaniroquea peanquitsi irira pomatsatanquitsineca onetsanatimentanaquempaniji Tioncarrentsimajaca.

<sup>13</sup>“Imaicaquea noncoraquetaje aviatimpaqui, cotanquitsiquea imaica choocatirajanagueti acaniqui noncanquempiquea maasano ocatica irishinevaetimentajianaquempaniji iriatimpajia inquejejianaquenaquea naatimpa noshinevaetagueti. <sup>14</sup>Notsatacajaiqueriquea piguenquetsatsare, cotanquitsiquea irirajia quepatsiquitica teecca inquemisantajiguempiji manaquea isemaneguintajiacari yamenajiaquerigueti tee inquempejiguemparipiji iriatimpajia, mana iquejejianaquena naatimpa teequea nonquempejiguemparinica quepatsiquitica. <sup>15</sup>Tee iro namanimentempi noncanquempi paajianajeri taampina aatoniji ichoocataji acaniqui quepatsiqui, iroguentiquea pinquempoguijamajateri aatonijite agavejajiguiri covaeguisherentsi. <sup>16</sup>Iriatimpajia tee inquempejajemparipiji quepatsiquitica, mana iquejejianaquena naatimpa teequea nonquempejiguemparinica quepatsiquitica. <sup>17</sup>Pinashitacaantajajempari iroomajatatsica irsavacaventamajajiaqueroniji pininqueca. Piguenquetsatsare iroguentiquea iroomajatatsica. <sup>18</sup>Oquejetacatari naatimpa pitigarancaquenagueti ocaniqui nontsatac妖iaqueriniji teeca intsarorentajiguempiji, ariuea nonquejetaquempsa naatimpa nontigarancajiaqueriquea iriatimpajia intsatac妖iaqueri.

<sup>19</sup>Naatimpaquea nocoguitaniquea nosavacaventiro pinintaguetica aviatimpa. Iroguentiquea noquejetancaroca imaica cameetsaniji inquempemajajiaquenaniji iriatimpajia aisa.

#### **Jesoshi yamanacoventajiaqueri maasano quemisantajiaquerineca**

<sup>20</sup>“Cotanquitsiquea teequea apaniro yamanacoventajigueriji irirajia notsipa-

jiacaca imaica. Namanacoventajiaqueriquea aisa quemisantajiaquenaneca coajica inquemajiaquerigueti iriatimpajia intsavetantajiaquerogueti picanqueca. <sup>21</sup>Namanacoventajiaqueriquea cameetsaniji apanironiji incantajianajempa, quejetaca, Aapani, pichoocaquena naatimpa aisa naatimpa nochoocaquempsa aviatimpa, ariuea inquejejiaquempa iriatimpajia apaniro incantajiaquempa inquemisantajiacajigueti, cameetsanijite intsajiaqueniji itsipajia caquinteja aviguenti tigarancaquenaca. <sup>22</sup>Oraquea noganejencare pojocaque-naca, ariuea nojocajiaqueneri cameetsaniji apaniro incantajianajempa, quejetaca quea aatimpa apaniro acanca. <sup>23</sup>Nochoocaqueri iriatimpajia aisa aviatimpa pichoocaquena naatimpa, cameetsaniji apaniromajaca incantajia-naquempsa. Inquejejiaquempagueti imaica irirajia teecca inquemisantajigue-naji intsajianaquequea aviguenti tigarancaquena, aisa intsajianaquequea pipintsamajajiacari quemisantajiaquerenaca piquejetacajiacari pipintsamajata-nagueti naatimpa.

<sup>24</sup>“Aapani, nonintaquequea irirajia pojocajiaquenaca iroajianaque inchoocajia poje ontaniqui naatimpaqui iramenimentajiaqueroniji noganejencare pojocauenaca iroorijite pipintsamajata-quena iroaqueragueti tequeratagueti onchoocateji quepatsi. <sup>25</sup>Aapani Comajamajatatsica, irirajia quepatsiquitica teequea intsajiguempiji, naatimpaquea notsamajatimpi. Ariuea iquejejiaqua irirajia notsipajiacaca imaica, itsajiaquequea aviguenti tigarancaquena. <sup>26</sup>Notsatacajaiqueriquea quero picotani aviatimpa, irosatiquea noncoguitempani nonquejejianaquempsa intsativentamajataqueniji arimaja pipintsamajajiacari piquejetacajiacari pipintsamajatanagueti

naatimpa, aisa naatimpa noncoguitem-paniquea nontsipamajajaqueempari-quea.”

### Yaa jita querigueti Jesoshi

(Mt. 26.47-56; Mr. 14.43-50; Irc. 22.47-53)

**18** <sup>1</sup>Ariqueate iteroncanaquero-gueti Jesoshi yamanaquerigueti Iriri, itsipatsipaitanacariea itsatacaanejia imontemonteitanacaro ajavinteni icantajitica Sereroone, yoayoaitanaque-quea panquirentsimashiqui choocata-tsica oraniqui. <sup>2</sup>Irira quea Jorashi aacaanquerineca itsatiroquea iriatimpa aisa, aritarite yoapinique Jesoshi itsipatsipaipinicari itsatacaanejia. <sup>3</sup>Arikea icoraquepojaquequea Jorashi itsipajiacari oshequini coaretapae Iromaquitica jerijia aisa coaretapae quempoguijajiguiroca teemporo itigarancajiaqueca pariseoja aisa saserorotejia anaantajianquitsica. Yamajiapojaquequea yashimirintantaj-gaca jeriquea aisa itsivotantajiacaca. <sup>4</sup>Cotanquitsiqueate Jesoshi itsaquetari queroquea incojita querini, yoanaque-quea itonquivojajiacariquea icantajia-vaqueriquea:

—¿Taa ipaji pamenagueque?

<sup>5</sup>Iriatimpajia icantajiguiquea:

—Jesoshi Nasarequitica.

Icantiquea iriatimpa:

—Narquentitari.

Ari icatiaca aisa Jorashi aacaanque-rica, iconoajiacari. <sup>6</sup>Arikea icantajia-querigueti Jesoshi: “Narquentitari”, arikea icojiana naca ipatiganajianaca-quea intati itejatejaitanaquequea isavi. <sup>7</sup>Arikea yapijitajiri aisa icantajiguir-quea:

—¿Taate ipaji pamenagueque?

Icantajiguiriquea:

—Jesoshi Nasarequitica.

<sup>8</sup>Arikea icantajajiriquea Jesoshi:

—Nocamantaquempitari narquenti.

Imaica narquentica pamenagueque, povashiantajajeriquea iricajia iroaroai-tanajeta.

<sup>9</sup>Ora quea oquejetantacaca imaica cameetsaniji onetsanatimentanaquem-paniji icanqueca Jesoshi icanquegueti: “Irira quea pojocaqueenaca teequea impejaiguempaji aparo.” <sup>10</sup>Arikea irira quea Shimo Peerero inoshicaquero-quea itsaampitsantsamenirite itoguem-pitataqueri irajaanire saserorote anaantamajatanquitsica, iguem pitare-jantacaro itincamijempequiquitica. Ipajita quea aajanirentsi Maaroco.

<sup>11</sup>Jesoshi icantsitariquea Peerero:

—Pisaquajero pitsaampitsantsameni-rite. ¿Aatompa natsiperejarotsi icanque-naca Aapani?

### Yaa jitana querigueti Jesoshi ichoocaquegueti saserorote anaantamajatanquitsica

(Mt. 26.57-58; Mr. 14.53-54; Irc. 22.54)

<sup>12</sup>Arikeate irira queate imajirote coaretajia Iromaquitica itsipajiacariea maasano igoaretepae jerijia aisa igoaretepae joriojia quempoguijajigu-roca teemporo, yajiricajiaqueriquea Jesoshi, yoishojaqueri. <sup>13</sup>Iroqueti yaajiana queri itsovironaquitequi Anashi,<sup>u</sup> iriotarite igoonquiinie Caipashi saserorote anaantamajatanqui-tsica oratica ajagantsi. <sup>14</sup>Irira quea Caipashi iriotaque cantajiaquerica irapijorioten iocameetsamajataque apatiroti caquinte irimetojaventajqueri caquintejia.

**u** 18.13 Irira Anashi irioveta caquerote anaantamajatanquitsica, cotanquitsiquea yoguisotoaqueri Iromaquitica, irio piajari Caipashi. Cotanquitsiquea irirajia joriojia yamenajiaqueri Anashi iriomaja saserorote anaantamajatanquitsica.

**Peerero yomanacoquerigueti Jesoshi**  
(Mt. 26.69-70; Mr. 14.66-68; Irc. 22.55-57)

<sup>15</sup>Ariquea yoguijavetanacariquea Shimo Peerero, itsipatanacariquea itsipa itsatacaane Jesoshi. Irica itsatacaane irio itsatica saserorote anaantamajatanquitsica, irootaquequeate itsipatantacarica Jesoshi yoguijitaquerigueti intsompogui. <sup>16</sup>Iriraquea Peerero tee inquijeji, mana icatiapaja intati oraniqui sotsiqui sotomorontsiqui, cotanquitsiquea irira itsipa itsatacaane Jesoshi itsatica saserorote anaantamajatanquitsica yoanaquequea iquenquetsatacaaquerer aajanrentsi quempoguijiroca sotomorontsi, cameetsaniji inquijapoje Peerero. Ariquea iquijapojaque. <sup>17</sup>Ocantavaqueriquea Peerero:

—¿Aviroquea aisa itsatacaane Jesoshi?

Iriatimpaquea icantiro:

—Tee.

<sup>18</sup>Arikea icatintiitaca aajanrentsijia jeri aisa coaretapae paamariqui itsitacajaqueca, ocatsincaguitetaquetari, ari itajaque. Ari iquejetaca Peerero itsipajiacari icatiaca itaque.

**Saserorote anaantamajatanquitsica icoacotaquerigueti Jesoshi**

(Mt. 26.59-66; Mr. 14.55-64; Irc. 22.66-71)

<sup>19</sup>Arikea irira Anashi saserorote anaantamajatanquitsica icoacoqueriquea Jesoshi querija itsatacaanejia, aisa taaca itsatacaantaguetaque. <sup>20</sup>Iriraquea Jesoshi icantiri:

—Naatimpa notsatacaantigueti noquenquetsatacaaajaqueriquea maasano quericaca nintanquitsica inquemisantavaquero, notsatacaantagueteri shinagogapaequi aisa teempo-roqui, icapiocantapinijiacaca maasano joriojia. Tee nomanacotimateroji nocantaqueca capichaji. <sup>21</sup>¿Queroquea

ocotacani picoacotantaquenaca naatimpa taaquea notsatacaantaque? Pincoacojiguerija quemajiaquenaca taa opajita nocantajiaqueri, itsajiaquerotari iriatimpajia nocantaqueca.

<sup>22</sup>Arikea icanquitigui Jesoshi imaina, aparo coareta catianquitsica oraniqui yapatonquitariquea icanti:

—¿Cameetsampa pinquejetaqueri imaina saserorote anaantamajatanquitsica?

<sup>23</sup>Yacanaqueri Jesoshi, icanque:

—Piquemaquenagueti nocanquegueti teeca oncamenteji iiintsija pincamtajigueri maasano querocaca nocantini. Iroguentigueti cameetsa nocanqueca ¿queroquea ocotacani papatoncanquenaca?

<sup>24</sup>Arikea irira Anashi itigarancacaantaqueriquea Caipashiqui, igantagaquea yoishotaca. Irira Caipashi irioquea saserorote anaantamajatanquitsica.

**Peerero yomanacotajirigueti aisa Jesoshi**  
(Mt. 26.71-75; Mr. 14.69-72; Irc. 22.58-62)

<sup>25</sup>Iriraquea Peerero choocatirajaquea icatiaca oraniqui paamariqui itataque. Arikea icantajitiri:

—¿Aviroquea itsatacaane irinta?

Iriatimpaquea yomanaproquea icanti:

—Teequea naroguenti.

<sup>26</sup>Arikea ichoocaque oraniqui ijitica iguempitarejaqueca Peerero. Irguentiquea irajaire saserorote anaantamajatanquitsica, icoacotsitariquea iriatimpa aisa icantiri:

—¿Aviroca namenaqueca pitsipatac rigueti ontaniqui panquirentsimashiqui?

<sup>27</sup>Arikea yapijitajiro Peerero yomanajiro, icanquitiguiquea imaina inijanaque chaapa.

**Yaajitanaquerigueti Jesoshi Piratoqui**

(Mt. 27.1-2, 11-31; Mr. 15.1-20;

Irc. 23.1-5, 13-25)

<sup>28</sup>Arikea pajinigueti osavincaguitetanaje yoguisotoajianajiri Jesoshi itsoviro-

naquitequi Caipashi, yaajianaqueriquea itsovironaquequi majirontatsica Pirato itigarancane majirontamajatatsica Iromaqui. Irirajia joriojia teequea inquijajigueji intsompogui aatonijite icovaeguishejitim iragavejajiaquenijite irishecaciaquempa coajica ompitsecana- quegueti, iroguentitarite Paashicoa.

<sup>29</sup>Irootaquequea Pirato isotoantanacaca sotsiqui iquenquetsatacaaajiapojaqueri- quea icantajiguiriquea:

—¿Taa opaji picatsimatumentajia- queri? ¿Taate yantaque?

<sup>30</sup>Iriatimpajia icantajiguiri:

—Aatomegueti yantime teeca oncameetsateji aatomequea namimpi- rime.

<sup>31</sup>Ariquea icantajiguiriquea Pirato:

—Iroosacanicate paajianaqueriquea, inchiquiojita pincantimentajiaqueriquea aviatimpajia pinquejetacaajiaquempari- quea ocantigueti paperi pogujatacoji- guica aviatimpajia.

Cotanquitsiquea icantajianaquequea joriojia:

—Naatimpajia joriojia aatoquea nagavejajigui nometojimentiri, icantimentajiganarotarite Sesa.<sup>v</sup>

<sup>32</sup>Oquejetantacaca imaica onetsanata- naquempaniji icanqueca Jesoshi icanquegueti quero incojitaquerini irimetojajiquerigueti. <sup>33</sup>Ariquea iquijanaji Pirato icajemaqueriquea Jesoshi icoacotaqueri:

—¿Arimajaca aviguenti Imajirote jorio?

<sup>34</sup>Icantiriquea Jesoshi:

—¿Inchiquojitsita paashitacaro aviatimpa picanquenagueti ‘Imajirote jorio?’ ¿Choocampate itsipa camanquempica?

<sup>35</sup>Icantiri Pirato:

—¿Narompate jorio? Irirajia pigono- rojia iriguentijatari amajiaquempica acaniqui, itsipajiacari saserorotejia anaantajianquitsica. ¿Taate opajita pantaque?

<sup>36</sup>Icanti Jesoshi:

—Nomajirontagueti naatimpa, teequea omponeguempaji ocaniqui quepatsiqui. Omponeaqueumpamequea ocaniqui quepatsiqui impigamentajia- quenamequea guijatanaca aatome yaajiganame joriojia. Cotanquitsiquea imaica nomajirontagueti tee ompone- guempaji ocaniqui.

<sup>37</sup>Arikea icantiri Pirato:

—Arisacanica, ¿avirompa majironta- tsica?

Iriraqueate Jesoshi icantiri:

—Tampatica poaquero picanquero- gueti naroguentiqueate majirontatsica. Irootaketari novoashitaque nocoraque- tashitaque ocaniqui quepatsiqui nontsavetanqueroniji iroomajaca. Maasanoquea nintanquitsica intsajia- quero iroomajaca iquemisantajiaquena- quea nocantigueti.

<sup>38</sup>Icantiri Pirato:

—¿Taate opajita iroomajaca?

Arikeate icanquegueti imaica isotoanajiquea iquenquetsatacaaajiapoja- jiriquea joriojia icantajiguiri:

—Naatimpa namenaqueri tecatsi iranteca. <sup>39</sup>Cotanquitsiquea aviatimpajia oraquea aapojacagueti Paashicoa pamejiaca noguisotojaemperi apaniro yashitacojitica santanaqui antiroca teeca oncameetsateji. ¿Irioquea pininta- jiaque noguipaquijajemperi Imajirote jorio?

**v 18.31** Iriraquea Sesa majirontatsica Iromaqui yagavejajiaquerigueti quepatsipaequitica icantajiaqueri majirontaguevetatsica irinetsanatacojivaqueri igonorojia, cotanquitsi aato imetojimentiri caarica quemisantiro icantacaantaqueca. Iriguenti agavejanquitsi incante queri metojanquitsine irira Iromaquitica quejetaca Pirato itigarancaqueca Sesa irinetsanatacojiaqueri joriojia.

<sup>40</sup>Iriatimpajiaquea icajemitsijanaca-  
quea icantanaque:

—iAato irica! iIrioquea poguipaqui-  
jaje Varavashi!

Iriraquea Varavashi iriguenti pigatsa-  
tantaneri.

**19** <sup>1</sup>Arikea Pirato icantacaanta-  
queri Jesoshi, ipasapasatacaan-  
taqueriquea. <sup>2</sup>Irirajia coaretapae  
itenempoashiqueru samerento yamatsae-  
tantajiacariquea, aisa iquitsaatantajiacar-  
iquea quitsaarentsi camachoncamagori.  
<sup>3</sup>Mana icantamampeajiaquitari intati:

—iAviroquea Imajirote jorio!

Yapatompatojiaqueriquea. <sup>4</sup>Arikea  
isotoanaji aisa Pirato icantajapijajiri  
jorioja:

—Pamenajigue, namajeri pintsatimen-  
tajiaquenijite naatimpaquea namena-  
queri teequea onchoocateji iranteca.

<sup>5</sup>Irooquea isotoanajigueti Jesoshi  
yamatsaecaroquea samerento, aisa  
iquitsaataca quitsaarentsi camachonca-  
magori. Arikeate icanti Pirato:

—Jeri iricatica shirampari.

<sup>6</sup>Arikeate yamenajjavaquerigueti  
saserorotejia anaantajianquitsica jerijia  
aisa coaretapae quempoguijajiguiroca  
teemporo icajemamajajianaquequea:

—iPompajacoteri! iPompajacoteri!

Icantajiguiriquea Pirato:

—Iintsija paajianaqueriquea pompaja-  
cojigueri aviatimpajia. Naatimpaquea  
namenaqueri teenica irantenica.

7Yacanajiri jorioja:

—Choocaquea cantacaantanensi  
noguijatacotaqueca naatimpajia,  
ocantiquea irimetojajiqueriquea,  
ipinajacaritari Irijanite Aapani Irioshi.

<sup>8</sup>Iroompaquea iquemaquitigui Pirato  
icantajiaquegueti imaica arimpaquea  
itsaroamajatanaquequea. <sup>9</sup>Iquijanaji-  
quea aisa intsompogui icoacopojaqueri-  
quea Jesoshi icantiri:

—¿Quero piponeaca aviatimpa?

Cotanquitsiquea Jesoshi teequea  
iranqueriji. <sup>10</sup>Iriraquea Pirato icantiri:

—¿Quero picotacani caarica  
pacantana? ¿Arimpaquea tee pintsateji  
nagavejaque novashiantajempi, aisa  
nagavejaque nompajacotacaanta-  
quempi?

<sup>11</sup>Icanți Jesoshi:

—Atomeguedi ishinetimprome irira  
choocatanquitsica jenoqui, aatomequea  
pagavejaname. Irootaqueuea irira  
cantacaanquenaca yamajitaquenaguetu  
acaniqui aviatimpaqui yanaaque  
iquempevaemajataca.

<sup>12</sup>Arikea iquemaquegueti Pirato  
icanquerigueti imaica arikea imintama-  
javetanacaquea irovashiantajerime,  
cotanquitsiquea irirajia jorioja arimpa-  
quea icajemacomajajianaqueriquea  
icantajianaqueriquea:

—Povashiantajerigueti irintatica  
teequea pinquenquejacomajatero irashi  
majirontatsica Sesa, maasanotari  
inchiquioji cantashitsica: ‘Naroguenti  
majirontatsica’, manaquea icatsimaqueri  
Sesa.

<sup>13</sup>Arikea iquemavaquitiguiquea  
Pirato isotoacaanaqueriquea Jesoshi,  
isavicapoji shitaponcarontsiqui  
ontaniqui icantomajantapiniquegueti  
icantajitirogueti “Ishitamencotantajita-  
carogueti Mapicotapae”, ora  
evereotsaqui opajita Gavata. <sup>14</sup>Pajini-  
quea intampaticate catsirincaiteri  
irootapojitari aapojempa Paashicoa.  
Iriraquea Pirato icantajiguiriquea  
jorioja:

—Jeri irica pimajirote.

<sup>15</sup>Cotanquitsiquea icajemajianaque-  
quea iriatimpajia:

—iIrimetojeta! iIrimetojeta! iPompa-  
jacoteri!

Iriraquea Pirato icantajiguiru:

—¿Arimpa nompajacoqueri pimaji-  
rote?

Cotanquitsiquea irirajia saserorotejia anaantajianquitsica icantajiguiriquea:

—Tee inchoocatenica itsipa nomajirote. Apaniroquea icoca majirontatsica Sesa.

<sup>16</sup>Arikea icantajiaqueriquea Pirato irompajacojiaqueriquea. Iriatimpajia yaajianaqueriquea.

### Yompajacojiquerigueti Jesoshi

(Mt. 27.32-44; Mr. 15.21-32; Irc. 23.26-43)

<sup>17</sup>Arikea inatanaquero Jesoshi igoroshite, isotoanaque iroanaque ontaniqui icantajitirogueti Shocoitontsi. Oraquea evereotsaqui opajita Gorogota. <sup>18</sup>Arikea oraniqui yompajacojiaqueriquea, itsipatacaantajiacariquea mavite, apaniro yogatiacoyerterti itincamijempequiqui Jesoshi, iriraquea itsipa irajampatequi. <sup>19</sup>Iriraquea Pirato itioncaquequea ovataquiqui ocanti: “Jesoshi Nasarequitica, Imajirote jorio”, arikea yoguipatacacaantaqueroquea igoroshitequi. <sup>20</sup>Iroguentiquea itioncancaro iguenquetsatsarepaequi evereo, guiriego, Iromaquitica. Yapatssajiaqueriquea oshequinji joriojia, aritarite yompajacojiquerigueti Jesoshi oquempejicaro ochoocaguetigueti tsovironaquipae. <sup>21</sup>Irootaquequea irirajia saserorotejia anaantajianquitsica icantajiavetacarica Pirato:

—Aatoquea pitionquiro ‘Imajirote jorio’, iroguentiquea pitioncaque oncanque: ‘Cantatsica naroguenti Imajirote jorio.’

<sup>22</sup>Cotanquitsiquea Pirato icantiriquea:

—Oraquea notioncaquea ari ococa, notioncaquerotari.

<sup>23</sup>Arikea irirajia coaretapae ompajacojiaquerica Jesoshi iteroncaquerogueti yompajacojiaquerigueti yashintajijaaro

iquitsaaguevecaca,<sup>w</sup> yaajajiroquea apaniropae, icarajiaque 4. Apanivani- quea iilsaare intsompoguitica. Iroatimpaquea tee avotempajji yontijajiqueroquea maasano ojamorenataque.

<sup>24</sup>Arikea icantajianaquequea:

—Aatoquea aperejajiguiro, manaquea ampegavijijiaquempa antsatantajia-quempaca quericaca aaqueroneca.

Oraquea oquejetantacaca imaica mananiji onetsanatantanacaca intati Itioncacaantaqueca Aapani Irioshi ocantigueti: “Yashintajijaaro noquitsaaguevecaca yaajajiroquea apaniropae, aisa ipiegavijijiaca intsatantajiaquempaca quericaca aaqueroneca noitsaare.” Aritari iquejejiaca imaica coaretapae.

<sup>25</sup>Oraniquiquea yompajacojitaquerigueti Jesoshi choocaquea catiaca iriniro aisa oguetyote, jero aisa Maria imanquigare Quereopashi, jeroquea aisa Maria Magararaquitica. <sup>26</sup>Iriraquea Jesoshi yamenaquequerogueti iriniro ocatiaca otsipatacariquea itsatacaane ipintsama-jatacaca, icantiroquea:

—Manquigarentsi, jeri pirijanite.

<sup>27</sup>Arikea icantiri aisa itsatacaane:

—Jero piniro.

Arikea yoanajigueti itsipatanajarоquea itsovironaquitequi, arikea ochoocapojaji.

<sup>28</sup>Arikea irira Jesoshi itsaquetari arikea onetsanataca maasano. Imaicaquea, cameetsaniji onetsanaquempaniji Itioncacaantaqueca Aapani Irioshi, icantiquea:

—Mirepojana.

<sup>29</sup>Choocaquea oraniqui yojoquijitacojitaqueca apanaquiero vinoja cachone- rontoquijajaro, shatecaja. Arikeate iticajajitaqueroquea achomiicajatiroca oja yogatiacotancarоquea oguiji

<sup>w</sup> 19.23 *iquitsaaguevecaca*. Irooca icantacotaque isavoguinaro, igaviguitire, ichompimashite, aisa yogataacaca, ocarataque 4.

isopoquiji ivagantequi Jesoshi.  
<sup>30</sup>Arikea yatsimijicajatavaqueroquea icantiquea:  
 —Imaica netsanamajatanacaquea maasano.  
 Arikea yoguivotanaca, yoguipaquija-panajantiro ishire metoc.

#### **Isatajajitaquerigueti Jesoshi**

<sup>31</sup>Oraqueate imetojantacaca Jesoshi iroguenti savincaguiteri inetsanatantajacaca joriojia maasano inintajaquea aapojaquempagueti imagorejantajitaca, irootaquea inintantajiacaca intsopajacotacaantaguetajeri metojaguetanan-quitsica yompajacojiquea tequerata-gueti aguempaji. Oraticaquea savinca-guiteri imagorejantajitaca icantajitica Paashicoa anaaguequeroquea maasano imagorejantajitaca. Irootaquea icantantajiacarica Pirato intigarancajiqueru igoaretate irijararejajaiquiteri itasaquijiqui irimetojanaqueniji taampina intsopajacotimentajaqueuiniji.  
<sup>32</sup>Arikea yoayoaitanaque ijararejajapoaqueri itsipatamacaca Jesoshi yompajacojitaquerigueti, imajiaqueriquea itsipa.  
<sup>33</sup>Arikea inquejetacaajiaquemparime Jesoshi iriatimpa yamenajiaevojacari-quea metojanaque, teequea irijararejeri. <sup>34</sup>Cotanquitsiquea apaniro coareta isatajaquitiguiriquea imerequiqui, osotoajatanaque iriraja aisa oja. <sup>35</sup>Irira amenaqueroca, iriguenti camantacota-queroca, iroomajacaquea itsavetanta-queca. Itsamajaquequea itampaticata-quiero icantaquegueli cameetsaniji pinquemisantajianaquenijite aviati-majapajia aisa. <sup>36</sup>Manatarite oquejetantacaca imaica cameetsaniji onetsanatimentana-quempaniji Itioncacaantaqueca Aapani Irioshi ocantigueti: “Aatoquea ijara-rejimajitiri apatonquiro itonqui.” <sup>37</sup>Chooca-

quea otsipa itioncajitaqueca ocanti: “Iramenajiaqueriquea isatajajaqueca.”

#### **Yoguijajitaquerigueti Jesoshi omoroqui** *(Mt. 27.57-61; Mr. 15.42-47; Irc. 23.50-56)*

<sup>38</sup>Arikea imaica yoanaque Jose Arimateaquitica icamantaquitiriquea Pirato inintaque iraanajeroquea itsino Jesoshi. Irira Jose iriguenti itsatacaane Jesoshi cotanquitsiquea teequea irininteji intsajiaqueriquea joriojia, itsaroacaajiacaritarite icatsimajitiritsi. Iriraquea Pirato icantanaquequea:  
 —Intsija.

Ari yoanaque yaanajiriquea.

<sup>39</sup>Arikea icoraquetaquequea aisa irira Nicoremo oashininquirica Jesoshi tsiteniriqui, yamaquequea casancari icantajitica mira oconoacaroquea otsipa icantajitica aaroe. Maasanoquea otenataquequea 30 quiro. <sup>40</sup>Arikea yaajianajiro itsino Jesoshi, yampiguiricacojiaqueriquea omagopaequi, itsipatacaantacaro casancari, ariquea iquejeta-caajiacariquea querocaca icojigani iquitantajiguigueta joriojia. <sup>41</sup>Ontani-quea oquempejiquero yompajacojia-querigueti Jesoshi choocaquea panqui-rentsimashi. Ari ochoocaque imperitaqui imorotashijitirica metoja-tsica, iroaqueramorotirajaquea tequeratiraja iroquijitantajitempariji metojatsica. <sup>42</sup>Arikea oraniqui yojouqui-jitajiriquea Jesoshi, irootari quempejitanquitsi, aisa pajiniquea aapojempa savincaguiteri imagorejantapiniji acaca joriojia.

#### **Ipochatanajigueti Jesoshi** *(Mt. 28.1-10; Mr. 16.1-8; Irc. 24.1-12)*

**20** <sup>1</sup>Arikea osavincaguitetama-naque parianajaroca semana<sup>x</sup> ogantagatirajaquea opitsequi oanaque-

<sup>x</sup> 20.1 Iroguenti opariantanaja otsipa semana savincaguiteri tominco.

quea Maria Magararaquitica yojoquijijitaquerigueti Jesoshi, amenavepojaroquea mapi iticaacotantajivetacarica jac quitsorejanaquequea.<sup>2</sup> Oshiashtanacari Shimo Peerero aisa itsipa itsatacaane, irira ipintsamajatacaca Jesoshi, ocaman-tajiapojaqueriquea:

—Yajitapanajantiriquea Amajirote. Tee inchoocatajeji yojoquijijivetacarigueti. Teequea nontsateji querocaca yojoquijijitajirini.

<sup>3</sup>Ariquea irira Peerero itsipatanacari itsipa itsatacaane Jesoshi, yoajianaque yojoquijijivetacarigueti Jesoshi.<sup>4</sup> Ishiashiai-vetanacaquea mavite, cotanquitsiquea ishiamajatanaca itsipa, yojocanaqueri Peerero, iriquetiquea arejetapojatsi.

<sup>5</sup>Itavincapojiquea yamenapojaquero joquijimagogtaca omagopae yampiguiracotantajivecarica, cotanquitsiquea teequea inquijeji.<sup>6</sup> Ariquea yarejetapojacagueta Shimo Peerero iquijanaquequea iriguenti intsompogui. Arikea iquejetaca iriatimpa yamenaguequero omagopae joquijigueta-caquea oraniqui.<sup>7</sup> Yamenaqueo aisa omago ipashicavortantajivecarica Jesoshi, teequea ontsipatemparoji otsipapae omagopae, manaquea apitivica oyoquijica tijai.<sup>8</sup> Arikea iquijanaque itsipa itsatacaane Jesoshi iriquetica arejevetan-quitsica incajaranqui, yamenaqueo quea maasano, ari iquenquejanaque arimaja pochatanaji.<sup>9</sup> Tequeratanicate intsaJJave-temparoji ocanqueca Tioncarentsimajaca ocanquegueti impochatanaje.<sup>10</sup> Arikea ipiapaitanaja itsatacaane.

**Jesoshi yonigaajaroquea Maria  
Magararaquitica  
(Mr. 16.9-11)**

<sup>11</sup>Cotanquitsiquea Maria ocatiaca sotsiqui oraniqui yojoquijijivetacarigueti

Jesoshi, iraacaquea. Ariquea otavinca-naque ameni intsompogui.<sup>12</sup> Onejaque-riuea mavite irashivantijite Aapani Irioshi iquitsaataro quitamarori, savicaque ipitsantsajajivetacarigueti Jesoshi, apaniroquea savicanquitsi iguitovecagueta, iriraquea itsipa ichooquea igontavecaguetai.<sup>13</sup> Icantaji-guiroquea:

—Manquigarentsi, ¿taaquea piraacoque? Ocantanaqueriquea:

—Yajitanaqueri Nomajirote. Teequea nontsatajeriji querocaca yojoquijijitajirini.

<sup>14</sup>Iroompaquea ocanquitigui opitsoca-vetanacaquea onejiriquea catiaca Jesoshi, cotanquitsiquea tee ontsatava- jeriji, ojiquequea tee irio Jesoshi.  
<sup>15</sup>Icantiro Jesoshi:

—Manquigarentsi, ¿taaquea piraacoque? ¿Taaquea pamenagueque? Iroatimpaquea ojiqueriquea irio shiacoti-roca panquirentsimashi, ocantsitariquea:

—AvirocAjate aanaqueri, iintsjate pincamantena queroquea pojoquijitajiri-ni, naajaterita.

<sup>16</sup>Icantiroquea Jesoshi:

—iMaria!

Opitsocanacaquea oquenquetsatacan-tanacariquea evereotsaqui ocantiri:

—iIravoni! —oncanquequea: “Tsata- caantantatsica”.

<sup>17</sup>Cotanquitsiquea Jesoshi icantiro:

—Aato pajiricana, tequeratanicate noanajeji jenoqui Aapaniqui. Cotanquitsiquea imaica poanaque pincamantajia-pojaqueriquea iguentijeguipae:<sup>9</sup> ‘Noanaje jenoqui Aapaniqui, iriguenti-quea aisa Piri aviatimpajia. Iriguenti Nirioshite aisa Pirioshite aviatimpajia.’

<sup>18</sup>Arikea oanaque Maria Magarara-quitica ocamatjajapojaqueriquea itsatacaanejia:

y 20.17 Icanquegueti Jesoshi *iguentijeguipae* iriguenti icantacoque itsatacaanejia. Pamenero Mt. 28.10; Irm. 8.29; Ev. 2.11-12.

—Nonejajiriquea Amojirote.  
Ariquea ocantajiaqueriquea aisa  
maasano icantaguetaqueroca.

**Yonigaajajarigueti Jesoshi itsatacaanejia**  
(Mt. 28.16-20; Mr. 16.14-18; Irc. 24.36-49)

<sup>19</sup>Ariquea opitsecanaquegueti oratica savincagüiteri parianajaroca semana,<sup>z</sup> icapiocajiacaquea itsatacaanejia Jesoshi, yashitacojiacaquea itsaroacaajiacaritari joriojia, ariquea imapocashijiapojacari- quea Jesoshi icatiimojiapojacari niganqui ichoocajiaquegueti icantajia- pojaqueriquea:

—Pishinejiguempaquea.

<sup>20</sup>Icantajiaquerigueti yonigaajiaqueriquea iraco aisa imerequiqui. Ariqueate iriatimpajia ishinemajajanacaquea yamenajiaqueritar Amojirote.

<sup>21</sup>Icantsiijaariea Jesoshi:

—Pishinejiguempaquea. Quejetaca- quea naatimpa itigarancaquenagueti Aapani, ariquea nonquejetacaajia- quempi naatimpa imaica nontigarancaji- aquempiquea.

<sup>22</sup>Ariquea itasoncaciaqueriquea soo icantajiaqueriquea:

—Paajavaqueriquea Ishire Aapani Irioshi. <sup>23</sup>Quericaca pincantajiaque: ‘Peanajaquea piguempevaerejia’, peanajaquea. Cotanquitsiquea quericaca pincantajiaque: ‘Choocatirajaquea piguempevaere’, choocatirajaquea.

**Tomashi yamenajirigueti Jesoshi**

<sup>24</sup>Cotanquitsiquea iriraquea itsatacaane Jesoshi icantajitica Tomashi Tsipari teequea inchoocateji iriatimpa yonigaajiaquerigueti Jesoshi itsatacaanejia. <sup>25</sup>Manaquea icamantajiaqueri intati icantajiguiriquea:

—Namenajajiriquea Amojirote.

Cotanquitsiquea iriatimpa icantiquea:

—Aatogueti nameniro iracoqui yompajacojitaquerigueti cavoroton- quiqi, aisa aatogueti noguijaguiro nochapaqui omorotaquerigueti, aisa aatogueti noguijaavacota imerequiqui aatoquea nocanti: ‘Arimaja ipochata- naji.’

<sup>26</sup>Cotanquitsiquea aapojacagueti 8 savincagüiteri iriraquea itsatacaanejia Jesoshi icapiocajijaquea aisa, imaicaquea ari ichoocaque Tomashi. Yashitacojiavetacaquea cotanquitsiquea Jesoshi imapocajiajapojajiri quea icatiimojiapojacari niganqui ichoocajiaquegueti icantajiajapoaqueriquea:

—Pishinejiguempaquea.

<sup>27</sup>Icampojiriquea Tomashi:

—Imaicaquea jeroquea naco poguija- guero pichapaqui, aisa poguijaavacot- tempa nomerequiqui. Aatoquea pitsojencana, manaquea pinquemisan- quena intati.

<sup>28</sup>Iquenquetsatanaquequea Tomashi icantiriquea:

—iNomajirote, Nirioshite!

<sup>29</sup>Icantiriquea Jesoshi:

—Pinejajana, irootaque piquemisan- tantajanaca. Irishinejianaquempaquea irirajia teeca irinejajiavetenaji cotanquitsiquea inquemisantajianaquena.

<sup>30</sup>Iriraqueate Jesoshi yonigaantague- queroquea otsipapae oshequi oacaantantatsica intati yamenacajiaqueriquea itsatacaanejia, cotanquitsiqueate teequea ontionquemppaji acaniqui paperiqui. <sup>31</sup>Ocatica tioncaguetanqui- tsica manaquea otioncaca cameetsaniji pintsaquiaqueniji Jesoshi iriguenti Quirishito, Irijanite Aapani Irioshi; aisa cameetsaniji paventajiaquempariniji ivajiroqui, ariquea iranijacaajajempi.

<sup>z</sup> **20.19** *oratica savincagüiteri parianajaroca semana.* Pamenero tioncanquitsica isavivanaqui otsapaqui 20.1. Aisa pamenero Mt. 28.1; Mr. 16.2, 9.

**Yonigaajiajarigueti Jesoshi 7  
itsatacaanejia otsapijaqui omotija**

**21** <sup>1</sup>Ariqueate Jesoshi yonigaajiaja-  
riquea aisa itsatacaanejia  
ontaniqui otsapijaqui omotija  
Tiverashi. Ari oquejetanaca imaica.  
<sup>2</sup>Icapiocajiacaquea itsatacaanejia.  
Choocaquea Shimo Peerero, Tomashi  
icantajitica Tsipari, Natanaere ponean-  
quitsica Canaaqui Garireaqui, jerijia  
irijanite Severeo, jerijaquea aisa itsipa  
mavite. <sup>3</sup>Ariquea icanti Shimo Peerero:  
—Nonquitsataquitetaquea.

Icantajiguiriquea iriatimpajia:

—Noncoraquejiaquequeate naatim-  
pjia aisa.

Yoajianaque itejiapo jaca quenajaron-  
tsiqui. Iquitsa quitsajia vetaca quea  
iroosati quea isavincaguitetacojianaji,  
teequea irajaigueji apapaquiro.

<sup>4</sup>Ariquea osavincaguitetama quegueti  
ari icatiapoja Jesoshi otsapijaqui,  
cotanquitsiquea itsatacaanejia teequea  
intsa jigueji iriguenti Jesoshi. <sup>5</sup>Ariquea  
iriatimpia icantiquea:

—Iriganijia, ¿paajia quete?

Icantajiana queriquea:

—Tee anejeriji.

<sup>6</sup>Ariquea icantajiguiriquea:

—Iintsijate pinquitsajigue otsipaso-  
taqui quenajarontsiqui pitincamijempe-  
quiqui, ariquea paajia quea.

Iriatimpajia quea iquitsajia quea,  
iroompa queate inoshicaajia vetajaro  
teequea iragavejajeroji irantsomajaji-  
ajero, itseraiquitacarotarite shimapae.  
<sup>7</sup>Iquenquetsatana quea quea itsatacaane  
ipintsamajatacaca Jesoshi icantiriquea  
Peerero:

—Iriguenti Amajirote!

Ariqueate iquemava quitiguiquea  
Shimo Peerero iquitsa atanajaro iitsaare,  
isapocacatari incajaranqui, ariqueate  
yojocajatsitanaca quea pon. <sup>8</sup>Irira quea

itsipajiacaca manaquea iquenantajiana-  
caro quenajarontsi, inoshicajatacojiana-  
quero queate quitsari, teenica osamani-  
majateji otsapijaqui, arica ocarataque  
100 meetero. <sup>9</sup>Iroompaquea yaguijigui-  
jitanaque inejapo jiroquea quichagante-  
sevaetaque paamari jocavoquitaca  
shima aisa pan. <sup>10</sup>Icantava queriquea  
Jesoshi:

—Iintsija pamagarantajia quea  
shimapae paajia quea imaica.

<sup>11</sup>Irira quea Shimo Peerero itetanaja-  
quea quenajarontsiqui inoshicajataco-  
va queriquea shima tseraiquicatari  
isantar inquetepae, yaacota na queriquea  
imparague qui. Maasano quea  
icaravae que 153 shima. Icarapiova e-  
taca, cotanquitsi teequea imperejeroji  
quitsari. <sup>12</sup>Ariquea Jesoshi icantajiguiri-  
quea:

—Caacate pishecajiamanempa.

Inintajia vetaca itsatacaanejia incanta-  
jia querime: “¿Taampa aviguenti?”,  
cotanquitsi tecatsi canterine, itsajia que-  
ritari iriguenti Amajirote. <sup>13</sup>Ariquea  
icora quea que Jesoshi, yaaquero pan,  
yojocajia queneri, ariquea iquejetaca  
cari aisa shima. <sup>14</sup>Oca quea ocatica  
ocaratiquea 3 yonigaajiajari Jesoshi  
itsatacaanejia ipochatanajiguerti.

### **Jesoshi iquenquetsatana quea queriquea Shimo Peerero**

<sup>15</sup>Ariquea yagashecajajianacaguetti  
irira quea Jesoshi icantir Shimo  
Peerero:

—Shimo, iriganite Jonashi, ¿pipintsa-  
majata quena, panajai quea irica  
pitsipajiacaca?

Icantir quea Peerero:

—Jeejeguitatsi, Nomajirote, pitsaque  
aviatimpia nopsintsa quea empi.

Icantir quea:

—Iroosacanicate pojocajia queneri  
novejajaniquite isheca.

<sup>16</sup>Icantitajariquea aisa:

—Shimo, irijanite Jonashi, ¿pipintsamajataquena?

Icantiriquea Peerero:

—Jeejeguitatsi, Nomajirote, pitsaque aviatimpa nopintsataquempi.

Icantiriquea:

—Iroosacanicate pinquempoguijajiguenari novejate.

<sup>17</sup>Ariqueate yapijitsitajariquea aisa icantsitajari:

—Shimo, irijanite Jonashi, ¿pipintsamajataquena?

Arikea ishimampojancanaca  
Peerero yamenanaquerogueti  
otsipatapojacaquea icoacoquerigueti  
icantiri: “¿Pipintsamajataquena?” Icantiriquea:

—Nomajirote, pitsaquerotari  
maasano. Pitsaquequea nopintsataquempi.

Icantiriquea Jesoshi:

—Iroosacanicate pojocajigueneri  
novejate isheca. <sup>18</sup>Imaicaquea  
noncamantamajajiaquempi, iroaque-  
ragueti piquenquevaritapojigueti  
inchiquiojitsita aviatimpa poishotac-  
taca piquitsaatagueti, aisa piquen-  
guetanaque querocagueti pininqueni,  
cotanquitsiquea coajica pinquenque-  
varivaetanajegueti aato piquejetaja  
imaica. Manaquea pincantajempequi-  
tanajempa iroishojitajempiquea  
intati, irajaitanaquempiquea queroca-  
gueti teegueti pinintavetempaj  
pogueji.

<sup>19</sup>Oraquea icanquegueti Jesoshi  
imaica iroguentiquea icantacoque  
quero incojitaquerini Peerero coajica  
irimetojajiquerigueti cameetsaniji  
iramenmentajitaqueriniji Aapani  
Irioshi caaviji yagavejamajati.

Arikea icantiri:

—Poguijatacoguitenani.

Itsatacaane Jesoshi ipintsamajataca

<sup>20</sup>Arikea ipitsocavetanacaquea

Peerero yamenavaqueriquea yoguijata-  
pojiriquea itsatacaane Jesoshi  
ipintsamajatacaca. Iriatimpa irioquea  
pimerequianquitsi imerequiqui Jesoshi  
itsipatagarigueti itsatacaaneja ishecajia-  
cagueti pajinigueti irimetoje, irioquea  
cantanquitsi: “Nomajirote, ¿queri  
aacaanquempineca?” <sup>21</sup>Arikea  
yamenavaquerigueti Peerero, icantiri  
Jesoshi:

—Nomajirote, iricatica ¿quiero  
incoquempani?

<sup>22</sup>Icantanaqueriquea Jesoshi:

—Arigueti noninque naatimpa  
incoguitempani inchooaque irosatiquea  
noncoraquepojajegueti, ¿queroreque  
ococani piquenquejacotsitantacarica  
aviatimpa? Aviatimpaquea poguijataco-  
guitenani.

<sup>23</sup>Irootaquequea icantantajavetana-  
caca quemisantajiaquerica Jesoshi aato  
imetoji itsatacaane ipintsamajatacaca,  
ariea ishimerancaguevetacaro,  
cotanquitsiquea Jesoshi teequea ari  
incanteji aato imetoji. Iroguentiquea  
icanque: “Arigueti noninque naatimpa  
incoguitempani inchooaque irosatiquea  
noncoraquepojajegueti, ¿queroreque  
ococani piquenquejacotsitantacarica  
aviatimpa?”

<sup>24</sup>Irioquea tsavetantaqueroca ocatica  
yamenamajaqueca, iriotaque tioncaque-  
roca ipintsamajatacaca. Itsajitaquero-  
quea itampaticamajataquero, tee  
incantashitempaji.

<sup>25</sup>Choocaquea oshequi yantagueta-  
queca Jesoshi teequea ontioncacotem-  
paji. Arimegueti interoncrajitaquerome  
intioncacojiguetaqueromegueti  
maasano, aricampa anaanaquerome  
quepatsi.

## YANTAJIGUICA

### ITIGARANCANEJIA JESOSHI

**Antsatantaquemparoca**

Ocatica iroguenti antsatantaquemparoca itioncaqueca Irocashi itioncacotaquero-gueti yantajiguica itigarancanejia Jesoshi yagavejacaajiaquerigueti Ishire Aapani Irioshi. Irocashi teequea irio jorio. Iriguenti aavintantatsica (Cor. 4.11-14).

Itsipatacari Paavoro iquenaguetanaquegueti quepatsipaequi (Ya. 16.9-10). Irocashi itioncaquero otsipa paperi tsavetacotaquerica Jesoshi, tequerataguetti intionqueroji ocatica. Irootaque ochoocatantacaca mavite tsavetacotaqueroca yoantanajaca Jesoshi jenoqui inquitequi (Irc. 24.50-53 aisa Ya. 1.1-11). Iquenquejajitaque itioncaquero Irocashi ocatica paperi iroaqueraguetti iteroncaquerogueti otsipa itioncaqueca tsavetantaquerica Jesoshi, arica ajagantsiniqui 62 irooca otsipa ajagantsini arejevaetacaro 65. Teequea intsajiteji quero ichoocataqueni itioncaquerogueti.

Itioncaqueneri shirampari pajitatsica Teopiro aisa itsipajia teeca irio joriojia cameetsaniji intsajiaque itsavetantaqueca itigarancanejia Jesoshi, itsavetacotimojia-vetacari joriojia, cotanquitsi oshequinii tee inquemisantajigueroji, iriguentijia quemisantajavaquero teeca irijorijoigueji, aisa cameetsaniji intsajiaqueniji quero icojiacani majirontajatiatsica icatsimajiaquerigueti itigarancanejia Jesoshi. Itioncacotaqueri Jesoshi icamantajiaquerigueti itigarancanejia intsavetantero Quenquetsatsarentsi Oganejencatatsica intsavetantimojiaqueri caquinteguetatsica. Icanti: “Ariquea pintsavetantajiaquenaqueate ontaniqui Jerosarequi, pinquejetacaajiaquemparo Joreaqui aisa Samariaqui, pintsitacaguitejajianaquero. Coajica pintsitacaguitejajianaqueroqueate maasano quepatsi pintsavetantajiana-quena.” (Ya. 1.8) Itioncacotaquero quero icojiiqueroni ipariajianacarogueti irinetsanjajaquero icantajiaquerica Amajirote Jesoshi. (1) Itsavetantimojiaqueri choocajianquitsica Jerosarequi (1.1–6.7); (2) itsavetantimojiaqueri choocajianquitsica quepatsipaequi pajitatsica Jorea aisa Samaria (6.8–9.31); (3) aisa itsavetantimojiaqueri choocajianquitsica otsipapaequi quepatsipae (9.32–28.31): irirajia choocajianquitsica guinterninintsiqui pajitatsica Antioquia (9.32–12.24), irirajia choocajianquitsica quepatsiqui pajitatsica Ashia (12.25–16.5), irirajia choocajianquitsica otsapijaqui quentijaniqui pajitatsica Ejeo (16.6–19.29), aisa choocajianquitsica guinterninintsiqui pajitatsica Iroma (19.21–28.31).

**Irocashi itioncaqueneri Teapiro**

**1** <sup>1</sup>Otsipaqui paperiqui iroquetica notioncaquempica, Teapiro, notsavetantaguetaquero maasano yantaguetaquitica Jesoshi, aisa itsatacaantaguetaquitica iroqueragueti iparianacarogueti <sup>2</sup>irosatiquesteate aavaetanaja savincaguiteri yaajitanajirigueti jenoqui inquitequi. Tequeratagueti iroanaje jenoqui, iquenques-tatacaajiaqueri itsatacaanejia icoguiajiaquea icamantajiaqueri imintacaaguetaquerica irantajiaque, iriguentuea Ishire Aapani Irioshi agavejacaquerica Jesoshi. <sup>3</sup>Yatsipetacatarite imetojavetaquitagueti, cotanquitsi ariquea coajica ipochatanaji yonigaajianajari itigarancanejia, yantaguetaquequeate oshequi cameetsanijite iramenamajajiaquerinijite intsamajajiaquenijite arimaja ipochatanaji. Yonigaajianajari 40 savincaguiteri itsavetantaguetanaqueri Aapani Irioshi quero icotani imajirontagueti.

<sup>4</sup>Arikea itsipajiacarigueti itigarancanejia icantajianajiriqueate:

—Coramani nocamantajiaquempi icanke Aapani intigarancajiaquempi Ishire. Imaicaquea aatota pijajigu otsipaqui, pinchoocajiavaqueta acaniqui Jerosarequi poguijajiavaqueta irinetsanataquero icanqueca Aapani. <sup>5</sup>Irooriji irirampanti Joanca iviñacajatantaque oja, cotanquitsi imaicaqueate quempejita-pjaque inchoocashirentajiapojaquempi Ishire Aapani Irioshi quejetaca irovíñacajatantajitaquempi Ishire, aato oshequiaji savincaguiteri onetsanatantanaquempaca.

Jesoshi yoanajigueti jenoqui inquitequi

<sup>6</sup>Arikea icapiocaventajarigueti aisa icoacojiaqueri iriatimpajia icantajiguiri:

—Nomajirote, <sup>7</sup>ariqueate imaica aviguenti pincapiocajiajena naatimpajia

ishiraerijia pimpejaempa Nomajirote, pimpigamentajiaquena cameetsanijite nonchoocajiajeniji intati?

<sup>7</sup>Yacanaqueriqueate:

—Teenicate irinintacaguempiroji Aapani pintsajiguero quero oncarateni oncogueta-naquempani coajica. Iriguenti cantanquitsine Aapani. <sup>8</sup>Cotanquitsiqueate incoraquepojaqueguetii Ishire inchoocashi-rentajiapojaquempigueti, ariqueate iragavejacaajianaquempiqueate. Arikea pintsavetantajiaquenaqueate ontaniqui Jerosarequi, pinquejetacaajiaquemparo Joreaqui aisa Samariaqui, pintsitacaguite-jajianaquero. Coajica pintsitacaguitejajianaqueroqueate maasano quepatsi pintsavetantajianaquena.

<sup>9</sup>Arikeate iquejetanaquerogueti imaica iriatimpajiaquea yamenajavajiri yogajenocajaja yoanajiji jenoqui inquitequi. Arikeate ipeantapojaro mararo, tee inconijatajeji.

<sup>10</sup>Ogantagatirajaquea yamenajigui sorerer jenoqui inquitequi inejaitatiguiri icatiimojia-pojacari mavite shirampari, quitamarocanta-jiavaeque iitsaare. Icantajiapojaqueri:

<sup>11</sup>—Aviatimpajia Garireaquita, <sup>12</sup>taaqueate oajiaquempi ogantagatiraja pamenaajigui jenoqui inquitequi? Imaica pinejajavajirigueti Jesoshi yoanajiji jenoqui inquitequi, ariqueate inquejetapojajempa oncoramanitapojaquetu impijaateguedeti.

**Icoguijiaquerigueti Matiashi  
impijaempari Jorashi**

<sup>12</sup>Iriatimpajia ariqueate yoguirincajiana-jaro Orivotsempi, ipiapaitanaja Jerosarequi. Ora Jerosare tee osamanitacoteroji Orivotsempi, ocarataque ishinetantacarica iranijitanaque savincaguiteriqui imagorejan-tajitaca. <sup>a</sup> <sup>13</sup>Iroompaqueate yarejereipojacueti tsovironaquipui yagatsonquijianaque otsipamencoqui jenoquitica. Aritarite

**a 1.12** ocarataque ishinetantacarica iranijitanaque savincaguiteriqui imagorejan-tajitaca. Aricampa onaque aparo quiromeetero.

oraniqui imajaigui Peerero, Joanca, Santiago,<sup>b</sup> Antirishi, Jeripe, Tomashi, Varitorome, Mateo, Santiago (irijanite Arejeo), Shimo (icantajitiri aisa Serote), Jorashi (irijanite Santiago). <sup>14</sup>Maasano iriatimpajia ogantaga icapiocapimijiaca itsipajiacari iriguentijeguitepae Jesoshi aisa Maria iriniro jero aisa otsipapae manquigrentsijia, isaviventajiaquerio iquenquetsatacajiaqueri Aapani Irioshi yamanajiaqueri.

<sup>15</sup>Ariqueate otsipa savincagüiteri icapiocajiacoshequini tsaroventajigarica Aapani Irioshi aricampa iveaujajac 120. Ariqueate icatianaca Peerero icanti:

<sup>16</sup>“Napiguemisantarijiate, inintaque Aapani Irioshi onetsanatanaca Tioncarentsimajaca icanquegueti Ishire coramani ivagantequi Taavini itsaventantsitarigueti Jorashi amampijajiaquerica aajiaquerica Jesoshi. <sup>17</sup>Iroqueragueti itsipajavetacaji iquejejaviatetacaji aatimpajia agujajiguiregueti Jesoshi. <sup>18</sup>Iro cotanquitsi yaajitanqueri imentaquitsitepae yojocajitaquenerica Jorashi incovaeguishequeniji, iveaujantajitacaro quepatsi. Arikea ontanqui iparianaqueate ityaquisanaque imotijaqui tyaquic. Osocataetanaca iseito. <sup>19</sup>Iroompakteate iquemacojiaquerogueti Jerosarequitica ariqueate ipajiaquerora quepatsi Asererama. Oraquea iguenquetsarequi ocanti Irajantsiguate. <sup>20</sup>Itioncataquerotarite paperiqui icantajitica Saremo ocanti:

‘Irovashantsijitaquerija itsovironaquite aatoja ichoocatajina nantajemparoneca.’

Aisa ocanti:

‘Cameetsa inchoocataje piajemparneca impejaempa itigarancane Amajirote.’

**b 1.13 Santiago.** Iguenquetsatsarequi guiriego ipajita *Iakobos*. Iconoagarantaca quimajareri yuguipitsocaquerogueti ivajiro ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*. Aisa pamenero tioncanquitsica isavivanaqui otsapaqui Irc. 6.16.

<sup>21-22</sup>“Imaicaquea imaica choocajia acanqui atsipajiacaca coramani iroqueragueti iviñacajataqueri Joanca Jesoshi quigonquero yoanajigueti jenoqui inquitequi. Imaica jame aajiaje itsipa piajemparineca Jorashi cameetsanijite irionijite antsipajiaquempa antsavetantajiaquerigueti Jesoshi ipochatanajigueti irorijite irootaque inunqueca Aapani Irioshi.”

<sup>23</sup>Ariqueate icajemajiaqueri mavite. Apaniro ipajita Jose aisa icantajiri Varesava Joshito. Iriraqueate itsipa ipajita Matiashi. <sup>24</sup>Yamanajiaqueri Aapani Irioshi icantiri:

—Nomajirote, pamenashirentajiguirimaasano caquintejia. Jeri irica mavite, ponigaajiaquenari queri picoguaqueca <sup>25</sup>impejaempa itigarancane Jesoshi intsipajajena, iriratarite Jorashi yovashiantaguetanaquero maasano, yoanaquequea ontanqui otampaticataquerigueti inchoocatantanaquempaca.

<sup>26</sup>Ariqueate ipegavijijiaca cameetsanijit intsatimentajiaqueriniji quericaca inintacaqueca Aapani Irioshi. Ariqueate iriguenti sotoacotanquitsi Matiashi. Iroqueate peajatsi itigarancane Jesoshi. Iconoajajarigueti inajiaji 12.

**Iroqueragueti icoraquetaque Ishire  
Aapani Irioshi inchoocashirentajiaqueri  
tsaroventajigarica**

**2** <sup>1</sup>Ariqueate aapojacagueti savinca-güiteri ipajitica Pentecoshite ariqueate ichoocajiaque maasano tsaroventajigarica Jesoshi icapiocajiacatsovironaquiqui. <sup>2</sup>Arikea catsiqueti iquemajiatigiro opojimajencapojaque

quejencataca inirojenca tampija oponeajencataca jenoqui inquitequi. Iquemajiaquero maasano savicajianquitsica tsoironaquiqui.<sup>3</sup> Ariqueate ocomijaguetapojaque quejeguetaca morecaripae oashiguetanaqueri maasano apaniropae.<sup>4</sup> Arikeate ichoocashirentajapojaqueri Ishire Aapani Irioshi yagavejacaajianaqueriquea maasano. Arikeate imapocajianaca iquenquetsatantajianacaro otsipapae quenquetsatsarentsi teeca intsajavetempaji, iriguentitarite quenquejacaajiqueru Irioshi Aapani Irioshi.

<sup>5</sup>Arikeate ichoocajiaque oraniqui Jerosarequi oshequini joriojia tsamajajiguiroca itioncanaqueca Moishishini ariguenti iponeajiacota otsipapaequi quepatsi.<sup>6</sup> Iroompaqueate iquemajiaquerogueti opojimajencatanaquegueti ishiashiaitanacaqueate icapiocaventajianacari maasano tsavetantajiguirica Jesoshi, tee intsajipojaquero quero ococani iquemajiaquerigueti iquenquetsatsitantajiacari iguenquetsatsarejia.<sup>7</sup> Mana yoajianaque intati yamenajianaque sorerere, icantavacaajianacaqueate:

—¿Teempaqueate tee iriojia Garirequitica maasano irirajia?<sup>8</sup> ¿Quero ocotaca aquemajiaqueri iquenquetsatantajiacaro quenquetsatsarentsipae? Aquemajiaqueritarite imaica iquenquetsatantajiacaro aguenquetsatsarejia<sup>9</sup> aatimpajia ponejaianquitsica osamanipaequitica Paritiaqui, Meriaqui, Eramequi, Mesopotamiaqui, Joreaqui, Caparoshiaqui, Pontoqui, Ashiaqui,<sup>10</sup> Pirijiaqui, Pampiriaqui, Ejepitoqui, aisa ovegaraguetajacagueta Shirene. Jeri aisa ponejaianquitsica Iromaqui: irirajia joriojamajaca aisa oguijatacojiguirica joriojia.<sup>11</sup> Aisa choocajia ponejaianqui-

tsica Queretaqui aisa Araviaqui. Maasano aatimpajia aquemajiaquaqueri iquenquetsatantajianacaro aguenquetsatsarejia itsavetantajiaquerogueti yantica Aapani Irioshi yagavejamajatigueti.

<sup>12</sup> Mana yoajianaque intati tee intsajigueroji icantavacaantajianacaca:  
—¿Taate opajita ocatica?

<sup>13</sup>Cotanquitsiqueate iconoagarantajiaca mana ishirontimentanajiacari intati icantajianaque:

—Mana imiramajatacaro cachojar.  
<sup>14</sup>Icatianacaqueate Peerero itsipajianacari itigarancanejia Jesoshi carajianquitsica 11 iquenquetsatanaquequeate iririjenca icanti: “Napijorijiate aisa maasano choocajianquitsica acaniqui Jerosarequi, iiintsija pinquemisantamajajiaquena noncamantajiguempiqueate nontsavetanqueroqueate ocatica pamenajiaqueca.<sup>15</sup> Imaica pijijiaqueji ishinkuijia iricajia, cotanquitsi teequeate ari irishinkuijiguempaji, iroqueratarite yogajenocapojaca catsirinaiteri.<sup>16</sup> Manaqueate onetsantanaca itsavetanqueca coramani tsavetantirinica Aapani Irioshi Joereni icantaquegueti:

<sup>17</sup> ‘Icantaque Aapani Irioshi: Oncoramantapojajegueti pajiniguetti aapojempa savincaguiteri vegaratapojaatsineca, nontigarancajiaqueneriqueate Noshire inchoocashirentajiaqueri maasano caquintepae. Iriraquea irijanitepae, intsavetantajiaquero nocanquerica. Iriraquea iriaqueraca quenquevariji-ananquitsi nonigaajiaqueri cantashitatiaguetanquitsica, cotanquitsi mana onquejetimo-jiaquempari iguimaanequi. Irirajia quenquevarijianatsica mana nonigaajiaqueri iguimaanequi.

- <sup>18</sup> Ariqueate noncojiaquerini maasano quemisantajiaquenaneca, shiramparijia aisa manquigarentsijia, nontigarancajiaqueneri Noshire inchoocashirentajiaqueri intsavetantajiaqueroquea nocanqurica.
- <sup>19</sup> Ontaniquiqueate jenoqui inquitequi nonigaantaguequero teeca irinejajite, aisa nonigaanquero nagavejane acaniqui quepatsiqui iramenajitaquero irajantsi, aisa omorecanaque paamari jero aisa ompoasecantanaquequeate ogatsiaca.
- <sup>20</sup> Impitsecanaquequea catsirincaiteri, aisa irira taai inquityoncamentataque inquejetanaquemparo irajantsi.
- Ariquea oncotanaquempa tequerataguetai aapojempa savincaguiti anaantanquitsineca oganejencaquitetanquitsineca ironigaantantaquemparoca Majirontamatatatsica iragavejane.
- <sup>21</sup> Cotanquitsiqueate maasano aventajiaquemparoneca ivajiro Majirontamatatatsica, iraajiavjeri.'
- <sup>22</sup>"Shiramparijia ishiraerija, pinquemisantamajajiguena noncamantajia-quempica. Iriguenti nontsavetantaque Jesoshi, irira Nasarequitica. Yagavejacaqueri Aapani Irioshi yantaguetaquerogueti cameetsaguetatsica teeca irinejajiguete, cameetsanjite pintsajiaquenijite irio Aapani Irioshi tigarancaqueri. <sup>23</sup>Ogantaga itsataque Aapani Irioshi quero incojitaquerini Jesoshi.

Coramani iquenquejaquero intigarancaqueri irimetojaque acaniqui quepatsiqui. Avirojiaquea paacaantajiaqueri pimetojacaantajiaqueri picantajiaquequeate irompajacojiaqueri quempevaejiatsica.

<sup>24</sup>Cotanquitsi ivochantajiri Aapani Irioshi aatonijite icoguitani yatsipetaro metojagantsi, teenicate agavejaguiterini.

<sup>25</sup>Iriraqueate majirontatsica Taavini itioncaquegueti coramani itsavetanqueri Jesoshi icanti:

'Nonejapinitaqueri Nomajirote itsipataquena.

Ogantaga inaque notincamijempe- quiqi, caarica taaca notsaroacaanta.

<sup>26</sup>Irootaquequeate noshinevaetancaca noshirequi, noquenquetsataquegueti shine nocanca.

Notsino aisa onchoocatanaque, aviguentitari noguijacoque,

<sup>27</sup>aatonicate povashiantiro noshire Areshiqui,<sup>c</sup> aato pishinetiro aisa avejanquempa itsino Pigomajamajare.

<sup>28</sup>Pitsatacaaqua quero noncoquempani nanijaguiteniniji aviatimipaqui. Pincoguitempani pintspataquena poguishinejamajataquena.'<sup>d</sup>

<sup>29</sup>"Imaica, nogonorojia, atsamajajiaque irira Taavini avaesatiniteni imetojaquequeate, ariuea iquitajitajiri, aritarite onaque iquitatantajaca acaniqui aguinentiqui. <sup>30</sup>Iriatimpa iriguenti tsavetantironica icanqueca Aapani Irioshi coramani. Itsamajatironi icantaquerica Aapani Irioshi, icantiri: 'Coajica inchoocataque pinchoviquiqueca irimajirontajajempaca ishiraerija inquejetajempi aviatimpa.

<sup>c</sup> 2.27 *Areshiqui*. Oraquea Areshi iroguenti ichoocaquegueti ishirejia metojajatsica tequerataguetai impishoncrajiteriji camorecariqui. Irira guiriego icanquero *hades*, iguenquetsatsarequi evereo icanquero *sheol*.

<sup>d</sup> 2.25-28 Sar. 16.8-11.

Aatoqueate namatavijimpitsi, naroguenti-tari Irioshi.<sup>31</sup> Tequeratagueti impochata-naje Quirishito itsataquero Taavini coramani, irootaqueate itsavetacotanta-carica irimetojaquegueti aato yovashianta-jitiri ishire Areshiqui, ariqueate oquejetaca itsino iroatimpa aatoqueate opatsajitsi.

<sup>32</sup>Iriotaquetarite irira Jesoshi yovochanta-jica Aapani Irioshi, namenamajajaquerita-rite maasano naatimpajia.<sup>33</sup> Ariqueate yoguisavacajiri itincamijempequiqui, yanaantamajataquequeate. Ariqueate yojocaqueneri Ishire icantajerica coramani irojocaquejeneri cameetsanijite intigarankimentaquerimijite acaniqui quepatsiqui inchoocashirentajiaqueri maasano tsaroventajigarica. Imaiqueate imaica coraquequeate, irootaque-queate maasano ocatica pamenajianaqueca aisa piquemajianaqueca, iriotaquequeate quejetacaquecaro imaica.<sup>34</sup> Iriraqueate Taavini teenicate irioqueate ogatsine jenoqui inquiequivi, cotanquitsquea icanti:

Iriraquea Majirontatsica Aapani Irioshi icanqueri Nomajirote:  
‘Pisaviquetaja pisenampijaqueña  
notincamijempequiqui,  
<sup>35</sup> pintspipataquenaquea arejevaetana-quempa  
nagavejajiaquerigueti maasano  
catsimajiaquempica, onquejeve-  
quemparo povanquegontsati-  
tempari.’

<sup>36</sup>“Imaica nonintaque antsamajaja-  
quero maasano aatimpajia ishiraerija:  
irira Jesoshi pompajacotaantajiavetaca-  
ca ivochantajiri Aapani Irioshi,  
ipeacaavajari Amajirote, irisati-queate  
Quirishito Meshiantatsica.”

<sup>37</sup>Iroompaqueate iquemajia-vaqueri-  
gueti ishimampojancajanacaqueate,  
icantajiguiri Peerero aisa itsipapae  
itigarancaneja Jesoshi:

—Imaica, nogonorojia, ¿querocampa  
noncoquiaquempani?

<sup>38</sup>Icantajiguiri Peerero:  
—Povashiantajianajero pipeacaagu-i-  
shetacaca pincantashitatianajempa.  
Poviñacajatacaantimentajiguempari  
Jeso quirishito ivajiroqui cameetsaniji  
irishetajempironijite Aapani Irioshi  
piguempavaere, irimaitsantsitajempironi-  
jite. Arikeate intigarancajiaquempi  
Ishire inchoocashirentajiaquempi.

<sup>39</sup>Arikeate inquejetacaajiaquempi  
maasano aviatimpajia, jerijia maasano  
pinchoviquijianaqueca, aisa maasano  
osamanipaequitica. Arimaja inchooca-  
shirentajiaqueri maasano inintacaajia-  
queca Amajirote Aapani Irioshi.

<sup>40</sup>Irira Peerero arimpaqueate  
iquenquetsatanaque icantajiaqueri-  
queate otsipapae icanti:

—Paventajiguemparija aa-  
jiavajempi-  
neca, aatonijite icatsimati-  
mentimpiro Aapani Irioshi pigovaegui-  
shere itsipata-  
caantimpirtsiquea covaegui-  
hemajajatsica.

<sup>41</sup>Iroompaqueate iquemajia-vaqueri-  
gueti Peerero iquenquetsaquegueti  
ishineventajianacaro icanquerica  
arieate iviñacajatacaantajiacaca.  
Arimpaqueate yoshequiamajatanaque-  
queate tsaroventajigarica Jesoshi.  
Aricampa ivergarajiacaca 3,000 iriaque-  
raca quemisantajianquitsi ocatica  
savincaguiteriqui.<sup>42</sup> Ogantaga isavica-  
ventajiaqueri iquemisantajiaqueri  
itsatacaajiaquerica itigarancaneja  
Jesoshi, tee irovashiantajigueroji. Mana  
itsipatavacaajiacaca iquemavacaajiacaca  
aisa yamanajiaqueri Aapani Irioshi. Jero  
aisa icotarejapinijiaqueri pan ishecacia-  
caro iquenquejantajajarica Quirishito  
imetojaventajiacajigueti.

<sup>43</sup>Irirajia itigarancaneja Jesoshi  
yantapinijiaqueri caquintepae caarica  
inejajiti, aisa yantajiaqueri oacaantans-  
tatsica intati itsatantarica arimaja  
itsipataceri Aapani Irioshi. Mana

yoajianaque queate intati maasano.

<sup>44</sup>Iriraquea quemisantajiguirica Jesoshi itsipatavacaajiaca iquemavacaajiaca, ipavacaajiaca yashintajiacaca.

<sup>45</sup>Yojocantaguequiero taaca opajitapae yashintajiacaca yaantajiacaro imenta-quipae ipacaantagarantajaqueri maasano coguitejacojanquitsica.

<sup>46</sup>Maasano savincaguiteri icapiocapini-jacca teemporoqui oniganquirequi. Ontaniquiquea tsovironaquipaequi itsipatavacaajiaca queate ishecajiaca. Icotarejapinijiaqueri pan ishecajiacaro iquenquejantajiacarica Quirishito imetojaventajiacajigueti. Ishecajiaca-gueti ishinejiaca tee iraventacojiguem-paji. <sup>47</sup>Iriguentitar ishineventajiacca Aapani Irioshi. Maasano caquinteja guinentijatsica oraniqui yamenajiaque-riqueti iquejejiaca imaica, ishineventajianacariequeate. Maasano savincaguiteri iriraqueate Amajirote arimpaqueate ijatiri yoshequiamajatanaqueri quemisantajiaquerica.

### **Yogueshijitajirigueti irira magoviroshiri**

**3** <sup>1</sup>Otsipa savincaguiteri ariqueate irira Peerero ais a Joanca yoajia-naque itoncoajianaque teemporoqui itsaroventantajitarica Aapani Irioshi. Ogantagatari ijaguitetanajigueti catsirin-caiteri yoapinijiaque maasano joriojia yamanapinijiaqueri Aapani Irioshi.

<sup>2</sup>Arikea oraniqui sotsiqui teemporoqui isavicaque irira magoviroshiri, igantaga-queate ivoacoquero imagoviroshica. Aritarite yamapinijiaqueri sotomorontsiqui icantajitica Cameetsari yoguisavi-canajiri cameetsanijite iramanajiava-queri imentaquitsite quijapinijatsica.

<sup>3</sup>Iriatimpa inejajiavaquerigueti Peerero itsipataceri Joanca inquijajiaipoje teemporoqui, yamanajiavecari imenta-quitsite. <sup>4</sup>Iriatimpajia yamenajianaqueri, arikea icanque Peerero:

—Iintsija pamenajiguena.

<sup>5</sup>Iriatimpa yamenajiaqueri yoguijaco-vetaca ijiqueji ariji irojocaqueneri imentaquitsite, <sup>6</sup>cotanquitsi Peerero icanti:

—Naatimpa ejempacona taampate nojocauquemi, tee inchoocatenica nomentaquitsite, cotanquitsi yagaveja-caaquena Jesoquirishito Nasarequitica nogueshitajempi intati, irootaquequeate imaica iintsija pincatianaje panjitanaje.

<sup>7</sup>Arikeate yacatsataqueri itincami-jempequiqui yogatiaqueri. Arikea icantapanajanti itampishitanaji iguitiqui aisa ishonquiriguitoqui. <sup>8</sup>Isapocanaque, icatiamajatanajaqueate yanijitanaji. Arikea yoguijajianaqueri Peerero aisa Joanca iquiaquijaitanaque oticaaco-roqui oniganquirequi teemporo, arikeate yanjinijivaetanaque itincotin-covaetanaquequea icantanaquequeate:

—Caaviji yoganejencamajata Aapani Irioshi.

<sup>9</sup>Maasano yamenajiaavaquerigueti yanijitanaquegueti ishineventanacari-gueti Aapani Irioshi, <sup>10</sup>ariqueate itsaroa-jianaque, mana yoajianaque intati, maasanotarite itsajiguiri isaviquigueti teemporoqui yamanantapiniquegueti imentaquipae ontaniqui osotomoroqui icantajitica Cameetsari.

### **Itsavetantaque Peerero teemporoqui**

<sup>11</sup>Irira magoviroshiri yogueshijitajica ogantagaqueate quisho yoajiaqueri yajiricajiaqueri Peerero aisa Joanca. Maasanoqueate ishiashawitashitanacari-queate iriatimpajia ontaniqui oveshin-tsaacagueti iniroopoapae ocajaratsencoataquegueti icantajitica Irashi Saromoni.

<sup>12</sup>Yamenajiaavaqueri Peerero icanti: “Shiramparijia ishiraerijia, ¿quero ocotaca poantajianacaca intati? Iroguen-tica pijijiaqueji nocameetsamajati nogueshitantajarica irica. Aricampa

pijijiaqueji nagavejashitaca intati nanijitacaantajarica.<sup>13</sup> Iriraquea Irioshite Averaameni, Ishaaconi, Jacovoni, Irioshite avaesatinite, iriguentiquea antaquero oca, yonigaantaquero quea iroganejencare Jesoshi Irijanite. Iriraqueate Jesoshi riotaquequeate paacaantajiavetacaca aviatimpajia, picantajiaqueri majirontatsica Pirato irimetojacaantajerqui. Iriraqueate Pirato inintavecaqueate iroguiapujajerime, cotanquitsiqueate aviatimpajia tee pinintajigueji.<sup>14</sup> Pimanintajiaqueriquea irira Oganejencamajatatsica Comajamajatatsica, iriguenti pinintajiaque iroguiapujajitajempiri metojantatsica.<sup>15</sup> Aritarite piquejejiaca imaica pimetojacaantajavetacari irira Anijacaantantsica, cotanquitsi ivochantajiri Aapani Irioshi, namenamajajiritaripochatanajigueti.<sup>16</sup> Iriotaque naventajianacaca ivajiroqui, irootaquequea itampishitananajaca irica pamenajiaqueca pitsajiaqueca. Iroguenti ogueshimajatantajarica iragavejane Jesoshi naventajiacarigueti ivajiroqui, pinejajiaqueroquea aviatimpajia maasano.

<sup>17</sup>“Imaica nognororio, naatimpa notsataque pimetojajiaquerigueti Jesoshi teenicate pintsaajigueriji iriguenti itigarancaqueca Aapani Irioshi. Ariqueate iquejejiaca pimajirojiate tee intsajigueriji.<sup>18</sup> Cotanquitsi oquejetacagueti imaica mana inetsanataquero Aapani Irioshi icantsitacrica coramani tsavetantirinica itsavetantaquero irantsipevaequempa Quirishito.<sup>19</sup> Irootaquequeate nocantantajiaquempica povashiantajianajero picovaeguishejiagueta pincantashitatijaianajempa, pinquemisantamajajigueri Aapani Irioshi cameetsanijite irishetajempiro piguempevaere. Ariqueate aapojaquempa intampishitacaantajiaquempica iroguishinejantajiaquempica.<sup>20</sup> Ariqueate aisa intigarancijajempiri Jesoshi, irira Quirishitotatsica.

Iriotarite coramani inintacaitsitaquempica irimeshiajiaquempi.<sup>21</sup> Cotanquitsi irira Quirishito ogantaga inchooquaue ontaniqui jenoqui inquitequi arejevaetanajemparoquaue irinetsanaguetajerogueti Aapani Irioshi maasano. Irootaquetarite icantajiaqueca igomajamajarejia tsavetantajiguirinica coramani icantashirentajiaquerigueti Aapani Irioshi.<sup>22</sup> Icanquetarite Moishishini: ‘Majirontamajatatsica Pirioshite irogatiaquempiri choocatimojajerineca pigonorojia, impeacaquempari tsavetantsica camantajiaquempica icanqueca, inquejetaquena naatimpa. Taaca opajita incantajiaquempi pinquemisanqueri.

<sup>23</sup> Maasanotarite aatogueti iquemisanta-jigui interoncrajitaqueri, aato itsipatjari igonororio.<sup>24</sup> Maasanoqueate tsavetantirica Aapani Irioshi itsavetantaguetaquero maasano pamenaguetaqueca imaica. Iroqueti mapocaquero tsavetantirinica Aapani Irioshi irira Samoirini. Ariqueate imajianaca impoiguetananquitsica.

<sup>25</sup> Oraqueate iquenquetsatacaaquerigueti Aapani Irioshi Averaameni icanquerigueti: ‘Coajicani inchoocataque pinchoviquitaqueca, iriguentequea noncavintsajacontantajiaquempatica maasanopae caquintegueta-nanquitsica quepatsiqui’, aviatimpajia iquenquejajiaque incavintsajajiaquempi, aviatimpajia aviguentijitarite ichovivijija tsavetantajiguirinica.<sup>26</sup> Iroompaqueate ivochantajirigueti Aapani Irioshi irijanite aviqueti itigarancijajquene incavintsajajiaquempi cameetsanijite povashiantajianajeronijite piguempevaerejia.”

#### ICATSIMAJITAQUERI PEERERO AISA JOANCA

**4** <sup>1</sup> Choocatiraja iquenquetsajajue Peerero aisa Joanca icoraquejiapoaque saserorotejia itsipajiacari imajirojitate coaretajia quempogujajiguiroca teemporo. Itsipajiacari aisa saroseoja. (Iriatimpajia iriguenti cantajiatsica aato itancorejajigui metojajitsica).

<sup>2</sup>Icatsimajia pojaqueri itsajia queritarite itsatacaajia queri maasano intancorejajianaje oncoramanitapo jagueueti meto jajiavetanquitsica in queje jianajempari Jesoshi ipochatanajigueti. <sup>3</sup>Ariqueate yaajia pojaqueri yaajiana queri, cotanquitsi teequea incantajigueroji mana yogui jaa queri santana qui iroorijite tsitenijen caguitetana que. Arikeate osavincaguitetanajigueti arikeate incoaco jia queri. <sup>4</sup>Cotanquitsi icono agarantajia ca oshequi quemajia vaquerica Peerero i quemisanta jia que. Irirajia shirampari quemisanta jianqui tsica aricampa ives garajia ca 5,000.

<sup>5</sup>Iroompaeate osavincaguitetanajigueti icapiocajia ca aisa acaniqui Jerosarequi imajirojate joriojia, itsipajiacari jivajia tsica jeri aisa tsatacaanti roca itioncaco tana queca Moishishini.

<sup>6</sup>Arikeate ichoocaque saserorote anaantamajatanquitsica icantajitica Anashi, itsipajiacari Caipashi, Joanca aisa Ariantero. Aisa ari ichoocajia que maasano ijitan ejia. <sup>7</sup>Arikea itigaranca jia queri irajia quiteri Peerero aisa Joanca incoaco jia queri. Arikea yamajita queri isateca jia queri niganqui icantajia queri:

—¿Taaqueate agave jaca aja que mepi? ¿Taaqueate cantajia que mepi pogani jitan jarica magovi roshiri?

<sup>8</sup>Irira Peerero yagave jaca ana queri Ishire Aapani Irioshi i quenquetsatacaajiana queriquea capiocajia quitsica icantiri:

—Nomajirojia ca aisa jivajia tsica, <sup>9</sup>iroosacanica picoaco jia quena quero nococa novacintsa janta carica magovi roshiri, quero noco querini noganijitajiri gueti. <sup>10</sup>Imaica noncamantajia que mepi catinca noajia que mepi cameetsanijite pint sajia que aviatimpajia aisa intsajia quenijite maasano ishira erija iriguenti agave jaca aquena Jeso quirishito Nasare-

quitica nogue shita tajarica ivajiro qui. Irira Jesoshi iri tarite pom pa jaco jia ve tacaca, cotanquitsi yovo chantajiri Aapani Irioshi. <sup>11</sup>Irira Jesoshi i quejetacaro mapi pimanintajia vetacaca aviatimpajia pantajiguero qui eti mapipanco pivicha ja cotan caro gueti mapi, cotanquitsi opeaja ana antama jatani quishotaca a queroca.

<sup>12</sup>Teequea inchoo cateji itsipa aajia vajineca aatoniji apega camorecar i qui, te tarite onchoo cati mateji otsipa vajirontsi ipajijita querica caquinte acaniqui isaviji que patsi qui aventajia quempameca ira antajia va jai meca,apaniro icanca Jesoshi.

<sup>13</sup>Maasano imajirojate quemajia va queri gueti i quenquetsatacaajia queri gueti Peerero aisa Joanca yamenajia queri gueti tee intsaro aji que jeji, mana yoajia que intati, itsajia queritarite tee irana antajiguedji aisa tee intsamajajiguedji paperi. Arikeate itsajia queri iriguenti jia itsipajia ca Jesoshi. <sup>14</sup>Arita rite itsipajiacari irira magovi roshiva tetsica cati ca iri atimpajia i querocampate incantajiguero i ri atimpajia! <sup>15</sup>Arikeate yoguisotoaca anta queri sotsi qui cameetsanijite in quenquetsata vacaa quempa iri atimpajia. Arikea icantajiguiri:

<sup>16</sup>—¿Imaica quero anco jia queri n? Maasanotarite Jerosarequita i quemaco jia queri yantajia que caarica inejajiti. Aato agave jia acantajiguiri: ‘Tee irogue shitan teji.’ <sup>17</sup>I quemajiguero tiros queate. I lintsia imaica ancanti mentajiguero aatonijite itsavanta jajiri Jesoshi.

<sup>18</sup>Arikeate icajemaca antajia queri icantajia queri:

—Imaica aato pitsavantimata jia jiri tsitsi Jesoshi, aato paventaro ivajiro, aato pitsataca anti niri.

<sup>19</sup>Cotanquitsiquea Peerero aisa Joanca yacajia queriqueate:

—Pamenerojate quero ininqueca Aapani Irioshi: ¿cameetsavaequempate nonquemisantajiaquempigueti aviatimpajia? ¿Iroompate irio Aapani Irioshi nonquemisantaque? <sup>20</sup>Naatimpajia aato nagaveji novashiantajiguiro notsavetantajiaquero oca nonejajiaqueca aisa noquemajiaqueca.

<sup>21</sup>Icantsijijaariqueate aisa:

—Aato pitsavetantajajiritsi Jesoshi. Arikeate yovashiantajajiri yamenajiaqueritarite querocampate incojaquerini incatsimajiaquerigueti, maasanotarite caquintejia ishineventajiacari Aapani Irioshi itsajiaquerigueti yogueshitajiri magoviroshivetatsica, <sup>22</sup>irootrijite yajagantsitacovetanaca 40 ajagantsi magoviroshivetatsica.

<sup>23</sup>Iroompaqueate yovashiantajajiri-gueti yoajianaji ichoocajiaquegueti irapiguemisantarijiate ni icamatjiaipo-jaqueri maasano icantajiaquerica saserorotejia anaantajianquitsica aisa jivajatiatsica. <sup>24</sup>Iroompaqueate iquemajia-vaquegueti, maasano yamanajiaqueri Aapani Irioshi icantajigui:

—Aapani Irioshi Majirontamajata-tsica, avirotarite peacaaguetacaroca inquite, quepatsi, quentija aisa maasano choocatantajigaroca. <sup>25</sup>Pitigarancaqueri Pishire quenuejacaquerica paajanire Taavini novaesatiniteni, picanquequea ivagantequi:

¿Quero ocotacani icatsimatantajia-caca caquinteguetatsica?

¿Quero icojiacani isariajiavecaro taaca opajitapae teeca oncameetsateji?

<sup>26</sup>Irirajia majirontajiatatsica quepatsi-quatica aisa iramajirorejia caquinteguetatsica

icapiocaventajiacari icatsimajiaqueri Majirontamajatatsica aisa Quirishito icoguiaqueca.

<sup>27</sup>Tampatica oanaquero picanqueca icapiocantajiacarica Erorishi aisa

Pontsio Pirato itsipajiacari teeca irijorijoigueji aisa ishiraerijia iquemava-cajiaaca irimetojajiaqueri Pirianite Jesoshi Oganejencatatsica pinintaca-aqueca impeaquempa Meshiantatsica.

<sup>28</sup>Coramani pitsatsitaca picantsitaca-queate: ‘Aritaquequeate oncoquempani.’ Arikeate imaica inetsanataquero

irintapae. <sup>29</sup>Imaica, Nomajirote, pinquenquejaquero maasano icantajia-quenaca icatsimajiaquenagueti. Pagave-jacaajiguena naatimpajia pomperanejia aatonjite notsaroguitsi nontsavetacojia-querogueti picanqueca. <sup>30</sup>Pagavejacaaji-guena naventajiacarogueti ivajiro Pirianite Jesoshi teeca inquempevaeti-matempaji, cameetsanijite nogueshijia-jeri ashinoncabajaiatsica, aisa nantajia-quenijite cantashitatiaguetanquitsica caarica inejajiti intsatimentajiquerinijite caaviji yagavejamajati iriatimpa.

<sup>31</sup>Iroompaqueate yagajianaquitigui yamanquerigueti Aapani Irioshi, arikeate octanaca omoguecanaque tsovironaqui, yagavejacaamajajiana-queri aisa Ishire Aapani Irioshi. Iriatimpajia arikeate itsavetantajianajiro aisa Iguenquetsatsare Aapani Irioshi teequeate intsaroajajeji.

### ICAVINTSAJAVACA AJIACAGUETI QUEMISANTAJIATSCA

<sup>32</sup>Maasano quemisantajiatatsica itsipatavacaajiacarica iquemavacaajiacarica. Taaca yashintajiacarica tee irimashitsatapi-tsatasvacaajiguemparo, tee incanteji:

“Apaniro nashinquemparo naatimpa”, mana ipavacaajiacarica intati. <sup>33</sup>Irirajia itigarancanejia Jesoshi arimpaqueate itsavetantamajajianaqueri ipochatanaji-gueti, yagavejacaajiaqueritarite Aapani Irioshi, aisa yuguishinejamajajianaqueri.

<sup>34</sup>Tee inchoocajiajeji coguitejacojianqui-tsica, maasanotarite choocajianquitsica iguepatsijiate aisa itsovironaquiariate

yojocantaguequero yaantajiacaro imentaquipae. Ariqueate yaajianaqueneri<sup>35</sup> itigarancanejia Jesoshi cameetsanijite irojocajiaqueneri maasano coguitejacojianquitsica.

<sup>36</sup>Arikea iquejetaca irira Jose poneatsica Tsperequi, iriguenti ichoviqui Irevi. Iriraqueate itigarancanejia Jesoshi ariqueate ipajijajiri aisa Verenave oantiqueate Oguishinejantatsica. <sup>37</sup>Iriatimpa yojocantaquero iguepatsite yaancaro imentaquipae. Ariqueate yaajianaqueneri itigarancanejia Jesoshi.

#### **Yamataajiacagueti Ananiashi aisa Sapira**

**5** <sup>1</sup>Cotanquitsi chooca itsipa icantajatica Ananiashi itsipatacaro imanquigare Sapira yojocantavetacaro iguepatsite <sup>2</sup>yaantajavetacaro imentaquipae, cotanquitsi iquemavacaajiac arikea yaagarantavetava ja iriatimpa iriraquea choocapojajatsica yaavetana-canariqueate itigarancanejia Jesoshi quejevetacaqueate jocaguetaquenerica maasano. <sup>3</sup>Cotanquitsi Peerero icantavaqueri:

—Ananiashi, ¿quero ocotaca piquemasantantacarica Satanashi pinintantavetacaca pamatavijaquerime Ishire Aapani Irioshi paagarantantavajaca imentaquipae ivergarajitaquemapirogueti piguepatsiteni? <sup>4</sup>¿Arimpate tee aviguenti ashintamajatemparone iroqueragueti? Arikeate oquejetaca imaica pojocantaquerogueti, ¿arimpate tee aviguenti ashintemparine pimenta-quitsitepa? Aatotarite piquejetiro imaica, teenica apaniro pamataviji-gueme caquinte, aisa iriguentiqueate pinintavetaca pamataviterime Aapani Irioshi.

<sup>5</sup>Iroompaquea iquemavaquegueti Ananiashi, arikea iquenaque itejanaque imetojanaque. Maasano

quemacojiavaquerica itsaroajianaque.

<sup>6</sup>Arikea iquiaquiaipoji iriaqueraca quenquevarijananquitsi yaajianaqueri yampiguiricacojianaqueri yaajianaqueri inquitajigueri.

<sup>7</sup>Iroompaqueate osamanipojaquegue-tiquea ocoraquevepojaca imanquigare oquijapojaque, teequeate ontsateji imetojaquegueti manquigavetaronica.

<sup>8</sup>Irira Peerero icantavaquero:

—Iintsja pincantena, ¿arimaja yojocauenari manquigatimpica maasano imentaquipae paantajiacaca piguepatsite?

Iroatimpa ocanti:

—Jeejeguitatsi, arimajaguitatsi yojocauquemperi maasano.

<sup>9</sup>Icantiroquea Peerero:

—¿Quero octacani piquemavacaantacaca pamatavijajiguerime Ishire Aapani Irioshi? ¿Ari pijiqueji aato icatsimatimentimpido? Coraquetapojaque quitajajatirica manquigavetimpina, imaica aviroqueate inquitajajate.

<sup>10</sup>Iroompaqueate icanquitiguro arikea oquenaque otejimotanaqueri ometojanaque. Arikea iquiaquiaipojaque quitajajatirica manquigavetaronica inejajapiroji iroatimpa metojaque. Irooqua yaajianaquero iquitajajatiro ichooquegueti manquigavetaronica.

<sup>11</sup>Maasano quemisantajiatsica choocajianquitsica acaniqui aisa maasano quemacojiaqueroca itsaroajianaque.

#### **Itigarancanejia Jesoshi yogueshijajiri oshequi joquijijiavetanquitsica**

<sup>12</sup>Irira Aapani Irioshi yagavejacaajiaqueri itigarancanejia Jesoshi yantimojiaqueri caquinte caarica inejajiti intsamatentajiquerinjite caaviji yagavejamajati iriatimpa. Maasano quemisantajiguirica Jesoshi icapiocajiac teempo-roqui oveshintaacagueti iniroopoapae ocajaratsencoataquegueti icantajitica

Irashi Saromoni. <sup>13</sup>Irira itsipajia itsaroajjianaque inconoajiaquempari-gueti cotanquitsi ishineventajiacari. <sup>14</sup>Arimpaqueate yoshequiamajatatigui-nimaja quemisantajiguirica Amajirote, shiramparijia aisa manquigarentsijia. <sup>15</sup>Yamenajiaavaquerigueti yantajagueta-queca, yaantajianacarica ashinoncajajia-tsica quenavoquirontsiqui yoguinorija-queri inorijantajiguetacaca, yoguijaca-jaiavaqueri Peerero cameetsanijite iroocampa ontsimanquimentajiaquerini-jite ivaantorite iriveajianajempanijite. <sup>16</sup>Ariqueate iquejejiaca poneaguetanqui-tsica oquempejiqueguetii Jerosare yamajiaqueneri yashinoncajajatsica aisa yatsipetacaajiacaca ampatsini, maasano iveajianaja.

**Saserorotejia anaantajianquitsica  
icatsimajianaqueri itigarancanejia Jesoshi**

<sup>17</sup>Cotanquitsi irira saserorote anaanta-majatanquitsica, jerijia saroseojia tsipamajajigarica arimpaqueate icatsimajianaqueri itsajiaqueritari ishineventajaci. <sup>18</sup>Yaacaantajiaqueri itigarancanejia Jesoshi, yashitacota-caantajiaqueri santanaqui. <sup>19</sup>Cotanquitsi ariqueate onianquitepojaqueguetii icoraquetashijiaqueri irashivantite Amajirote yashirejapojaqueneri ashitarontsi, yoguisotojaiqueri, icantavajiri:

<sup>20</sup>—Pija, pincatiapojafe oniganqui-requi oticaacoroqui teemporoo, pincamantajigueri maasano quero incojiaquempani incoguitempaniniji iranijaje.

<sup>21</sup>Iriatimpajia iquemajiavause, ariqueate osavincaguitetamananaqueguetii yoajiamanaque teemporoqui itsitijiana-quero itsatacaajiapojaquiri.

Cotanquitsi irira saserorote anaanta-majatanquitsica aisa itsipajiacaca tequerata intsajigueriji. Icajemajiaqueri-

queate imajirojiate ishiraerijia jerijia jivajiajatsica. Iriatimpajia itigarancajiae-tacari oananquitsineca iraaquiaquerime ontaniqui yashitacojiavecarigueti, iramajiaqueneri iriatimpaqi. <sup>22</sup>Cotan-quitsi yoajiavetanacaqueate coaretapae, tee anejeriji. Ipijajaa icamantajiaqueri, <sup>23</sup>icantajiaipojaqueri:

—Noajiavetanaca namenajiavepoja-caro ashimajataca santana. Iriraquea amenajiaquerica timashijiaque sotomo-rontsiqui aatomiji isotoajigui, cotanquitsi nashirejajiavetacaro cajaraguitevaetaque intsompogui.

<sup>24</sup>Iroompaqueate iquemajiavaquitigui imajirote coaretajia quempoguijajigu-roca teemporo, jerijia saserorotejia anaantajianquitsica, mana yoajianaque intati icantavacaajianaca:

—¿Querocate icojiacani?

<sup>25</sup>Arikea icoraquepojaque aparo icampojiri:

—Irira pashitacotacaantajiavetacaca chapinqui arimpate chooca itsatacaanta-jiaque oniganquirequi oticaacoroqui teemporo.

<sup>26</sup>Ariqueate iquemavaqueguetii imajirote coaretajia itsipajianacari igoaretatepae yoajianaque cameetsa-queate yaajiajatiri, itsaroajiaqueritarite itsinacajitiritsi. <sup>27</sup>Yamajiaipojaqueri yogatiajiapojaqueri icapiocajiacagueti. Ariqueate iquenquetsataque saserorote anaantamajatanquitsica icanti:

<sup>28</sup>—Nocamantamajajiavetakuempi povashiantajianajero, aatoja pitsavetantaji-ajirotsi yantaguetaqueca Jesoshi. Cotanquitsiquea pitsacaguitejaquero Jerosare pitsavetantajiaquero pitsatacantane, mana pinintajiaque incantacojiaquena: ‘Iriguenti metojacaantajiaquerica Jesoshi, mana iquempevaejiaca.’

<sup>29</sup>Iquenquetsajianaque Peerero jerijia aisa itsipajiacaca itigarancanejia Jesoshi icantajiguiri:

—Iriquetimpa nonquemisantamajaji-aque Aapani Irioshi. Incanquegueti caquinte otsipasato, aatoqueate noquemisantajiguiritsi.<sup>30</sup> Arimajatarite pimetojacaantajiavecari Jesoshi pompa-jacotacaantajiavetacari coroshiqui, cotanquitsi yovochantajiri Irioshimajaca itsaroventajiganica avaesatiniteni coramani.<sup>31</sup> Yoguisavacajiri itincamijem-pequiqui, imajirontacaacari aisa ipeacaacari Meshiantatsica, cameetsan-jite incantashitatiyanaquempa ishiraerijia irovashiantajianaquero yantajiguica teeca oncameetsateji, cameetsaniji irishetajenerinijite Aapani Irioshi iguempevaerejia, irimaasantaje-ronjite.<sup>32</sup> Namenamajajiaqueritarite notsavetantajiacarica. Arikeate iquejetaca Ishire Aapani Irioshi itsaveta-coqueri, iriotarite iriguenti itigaranca-queca Aapani Irioshi inchoocashirentajiaqueri maasano quemisantamajajigui-rica.

<sup>33</sup>Iroompaqueate iquemajiajavaqueri-gueti opejaianaqueri itsimajenca, inintajavetaca irimetojajiaquerime.

<sup>34</sup>Cotanquitsi arikeate ichoocataque acaniqui pariseo icantajitica Gamarieri, yamenajiaqueriqueate igonorojia caaviji icameetsati. Iriatimpa iriguenti tsatacantantiroca itioncacotanaqueca Moishishini. Icatiimojianacariequeate majirontajiasica, icantiri itsipa:

—Paajianaquerita sotsiqui capichaja-niqui.

<sup>35</sup>Arikeate icantiri capiocajianqui-tsica:

—Shiramparijia ishiraerijia, inchiquioja pimetojajiguiritsija. Iroqueti pinquenquejamajajiaque.<sup>36</sup> Pinquenque-jajiajero coramanitica ichoocavetacagueti Teorashini inintavetacagueti iranaantaquequeate yoguijajavetacari oshequini caquinte, aricampa icarajiaque 400. Cotanquitsi teequeate

iragavejeji, mana imetojajitaqueri. Irira oguijajavetanacarica arikea yoayoaitanaji, teequeate intsipatavacaajajempaji.<sup>37</sup> Arikeate oquejetaca aisa coramani itioncacotacaantajiaquerigueti majiron-tatsica irajaanire intsataque querocaca ivegaracani maasano, chooqueate itsipa, irira Garireaquitica icantajitica Jorashini. Iriatimpa inintavetaca iranaantaqueme inquejetaquemparime Teorashini. Arikeate iquejetaca iriatimpa yoguijajavetanacari oshequini caquinte, cotanquitsi iroompa imetojajiaquerigueti arikeate iporocajianaque oguijajavetacarica.<sup>38</sup> Irootaquequeate noncantantajiaquempica imaica ariotaque icoca irirajia, povashiantajia-jeri aato picantajiguiritsi. Maasano itsatacaantaqueca inchiquiojica yaashiji-acaro intati iriatimpajia, inchiquiotsi ompeashitanajempa.<sup>39</sup> Cotanquitsi iriguentigueti tigarancaqueri Aapani Irioshi intsatacaantantajiaque querocate pincojiaquerini. Aatoshiatsi picatsima-manatiritsija Aapani Irioshi.

<sup>40</sup>Iroompa iquemajiajavaquerigueti icantajiguiri:

—Iroosacanicate cameetsavaeque.

Arikeate icajemacaantajajajiri itigarancanejia Jesoshi, ipasatacaantajiaqueri. Arikeate yoguipaquijajajiri icantajiaqueri:

—Aato pitsavetantimataji ivajiroqui Jesoshi.

<sup>41</sup>Arikeate isotosotoitanaji icapioca-ventajiacarigueti majirontajiasica, yoajianaji ishinejiana ja itsajiaqueterite ishinevencari Aapani Irioshi, iriguentita-rite yatsipeventajiac Jesoshi.

<sup>42</sup>Maasano savincaguiteri itsatacaanta-pinijiaque ontaniqui oniganquirequi oticaacoroqui tetempo aisa tsovirona-quipaequi, teequea irovashiantajigue-roji, itsavetantajiaqueri Jesoshi, icanti iriguenti Quirishito.

**Icoguiaque 7 amitacotantanquitsineca**

**6** <sup>1</sup>Ariqueate yoshequiamajataquegueti quemisantajiatsica, ariqueate itsitijianaquero irirajia quenquetsatanta caroca guiriego inijashijianacariequeate irirajia quenquetsatantacaroca evereo, icantajiaquequeate:

—Maasano savincaguiteri icavintsajaqueroqueti metojacoguetanquitsica, tee irantajigueji cameetsa, teenicate irojocamajajiguenero oshecajia agonorojia.

<sup>2</sup>Irirajia itigarancanejia Jesoshi carajianquitsica 12 icapiocajiaqueriqueate maasano quemisantajiatsica icantajiguri:

—Teenicate oncameetsateji novashiantajianaquero notsavetantajiguirogueti Iguenquetsatsare Aapani Irioshi irooqueate nantajiaavaque nojocapinijiaquenero oshecapae. <sup>3</sup>Irootaquequeate, napiguemisantarijite, noncantantajiaquempica imaina pincoguiajigue <sup>7</sup>tsamajaijatsica irira comajamajajianquitsica ichoocashirentamajajiaqueca Ishire Aapani Irioshi cameetsanijite irionijite savicaventajiaquerone irojocantajiaque. <sup>4</sup>Naatimpajia manaqueate ogantaga nosavicaventajiaquero namanajigueri Aapani Irioshi aisa nontsavetantajiaquero Iguenquetsatsare nontsatacantaquiaquero.

<sup>5</sup>Iroompaqueate maasanoqueate ishineventajiacaro icantajiaquerica. Icoguiajiaqueriquea Ishitivano, itsajiaqueritarite quemisantamajataque aisa ichoocashirentamajataqueri Ishire Aapani Irioshi. Arikeate icoguiajiaqueri aisa Jeripe, Porocoro, Nicanori, Timo, Parimenashi, jeri aisa Nicoraashi. Irira Nicoraashi ariguenti iponeaca Antioquiaqui. Tee irio jorio cotanquitsi yoguijatacoqueri jorjojia itsarovaentacarigueti Aapani Irioshi. Imaica iquemi-

sanqueri Jesoshi aisa. <sup>6</sup>Arikeate icantajiguiru itigarancane Jesoshi: —Jeri iricatica.

Arikeate iriatimpajia ipamijaqueri yamanajiaqueri Aapani Irioshi impeacaimenquemparinijite amitacotantanquitsineca. <sup>7</sup>Arimpaqueate otsitacacovetaanacaroni Iguenquetsatsare Aapani Irioshi Jerosarequi, iquemantajiavacaroca oshequini. Arimpaqueate ijatiri yoshequiamajataque quemisantajiatsica. Imajianacaeate oshequini saserorotejia iriatimpajia iquemisantajianaque.

**Icatsimajitaqueri Ishitivano**

<sup>8</sup>Irira Ishitivano iriguenti caaviji icavintsamajataqueri Aapani Irioshi, yagavejacaamajataqueri, yonigaaguetaqueri irapijorijateni teeca irinejajigueteji, intsatimentajiaquerinijite iriguenti agavejacaqueri Aapani Irioshi. <sup>9</sup>Cotanquitsi choocaqueate ontaniqui shinagoga icapiocapinijiacaguetti jorio ipimantajiveta coramani cotanquitsiqueate yovashiantajiri aavetacarica. Arikeate iconoagrantajiacarri iriatimpajia itsipajiacari ponejai-anquitsica Shirenequi, Arejantiriaqui, Shirishiaqui, jero aisa Ashiaqui, yoashijianaqueri Ishitivano incatsimajigueri. Iriatimpajia icapiocaventajiacari icatsimajakeri. Irooqua icanti, irooqua icanti, <sup>10</sup>cotanquitsi teequeate iragavejajigueriji iroguemisantajigueri, caavijitarite itsaque, iriguenteritari tsatacaaqueri Ishire Aapani Irioshi. <sup>11</sup>Irootaquequeate yojocantacarica imentaquipae itsipa caquinte cameetsanijite iramatajiaquempa. Iriatimpajia icantajiaque:

—Noquemajiaqueri inijashinatari Moishishini, arikeate iquejetaqueri Aapani Irioshi iriatimpa.

<sup>12</sup>Iroompaqueate quemajiaavaquegueti maasano opeajianaqueri itsimajenca, ari iquejejianaca irirajia jivajiatsica aisa

tsatacaantajiguiroca itioncacotanaqueca Moishishini. Yaajianaqueri yamajianaqueri ichoocajaquegueti imajirojiate.  
<sup>13</sup>Ariqueate icajemajiaque itsipa amataajianquitsica icantajiaqueri:

—Iricatica iroguenti ichoocavenque inijashinatacaro ocatica teemporo yashintacaca Aapani Irioshi aisa inijashinatacaro itioncacotanaqueca Moishishini.<sup>14</sup>Noquemajiaqueritarite icanquegueti: ‘Iriraqueate Jesoshi Nasarequita irisoveaquero teemporo, aisa irogaaguetaquero maasano itsataacaantinica Moishishini.’

<sup>15</sup>Irira capiocaventajiacarica yamena- jiaqueriqueate inejajiaqueriqueate ivoroqui Ishitivano quejetaca ivoro irashivantite Aapani Irioshi.

**7** <sup>1</sup>Ariquea irira saserorote anaanta- majatanquitsica icantiri Ishitivano: —¿Arimaja piquejetaquero imaica?

<sup>2</sup>Iriatimpa icantiri: “Imaica nogono- rojia aisa jivajatiatsica, iiintsija pinquemi- santajiavaquena noncamantajiaquempi- gueti. Coramani itsaroventajiacari avaesatinijiateni Aapani Irioshi Oganejencamajatatsica, ariqueate noquejetaca naatimpa aisa notsaroven- tacari. Choocatirajagueti Averaameni Mesopotamiaqui tequeratagueti iroanaqueji ontaniqui Jaranequi, yonigaacari Aapani Irioshi,<sup>3</sup>icantiri: ‘Pija povashiantanaquero piguinenti, povashiantajianaqueri pijitanejia, poanaquequeate otsipapui quepatsi nonigaaquempica.’<sup>4</sup>Ariquea icatianaca Averaameni yovashiantanaquero iguepatsite Carerequitica, yogaanaja Jaranequi, iguinentipoja ontaniqui. Oraquea imetojanaquegueti iriri, ariqueate itigarancaqueri Aapani Irioshi icoraquequequeate acaniqui piguinenti- jiacagueti imaica.<sup>5</sup>Cotanquitsi tee irojocamajateneriji quepatsi, teenicate irashintemparojo capichaji, cotanquitsi

icashiacaacari icantaqueriqueate: ‘Pimetojanaquegueti irioqueate ashinta- jemparone pinchoviquijianaqueca.’ Oraqueate icashiacaacarigueti tequera- tanica iroacaantenica, <sup>6</sup>cotanquitsi icanqueri: ‘Irirajia pinchoviquijiana- queca mana iriguinentitantajiaquem- paro iguepatsite itsipajia. Iromperape- raajitaquempari intati, aato ivegaratiri. Irantsipetacajajiaquempari aavaetana- quempa 400 ajagantsini.<sup>7</sup>Cotanquitsi naatimpa noncatsimatimentajiguéri maasano omperajiacarica intati. Arikeate irovashiantajajerigueti incoraquejiaje acaniqui intsaroventajia- quena.<sup>8</sup>Icanqueri aisa: ‘Noninque imaica intotsaiquijiquero pichonqui- mashi aisa ariqueate iroguijatacojajero- queate maasano pinchoviquijianaqueca cameetsanijite inquenquejajiaqueroni- jite nocanquempica aisa cameetsanijite ironigaquenajite arimajaqueate inintamajataque inquemisantaquena. Arikeate naatimpa nashintajiaquem- pari noncavintsaajajiaqueri pinchoviqui- jianaqueca.’ Irootaquequeate yoacaan- querigueti Ishaaco iroompaqueate aapojacagueti 8 savincaguiteri itotsaiquitaqueri ichonquimashi. Arikeate iriatimpa Ishaaco yoacaan- querigueti Jacovo imaqueri iriatimpa. Arikeate iquejetaca Jacovo itotsaiqui- taqueri ichonquimashijia irijanijiate. Iriraqueate irijanijiate ivegarataca 12 iriojatarite choviquijiacajica maasano aatimpajia.

<sup>9</sup>“Apaniro irijanite Jacovo ipajita Jose. Iriraqueate iriguentijeguijate icantajogui: ‘Yanajaijaitsi coajica’, irootaquequeate icatsimatimenquerica yojocantantacanarica iromperataquem- pari Ejepitoquitica. Cotanquitsiqueate itsipatacari Aapani Irioshi,<sup>10</sup>yompeta- nacari yatsipetacagueti, irootaquequeate ishineventantacarica imajirote Ejepito-

quitica icantajitica Paraone. Yamener queri iriguenti tsamajatatsica irootaque queate ipeacaantajarica iriatimpa iquejemajirontantajarica imajirontanta jajarica maasano Ejepitoquita aisa iconoajiac Paraone.<sup>11</sup> Ariqueate yatsipetanaca itase maasano Ejepitoquita aisa Canaanequitica, maasano avaesatinijiateni, querocampate irajaijero isheca.<sup>12</sup> Ariqueate Jacovo itigarancanjaqueri irijanitepae Ejepitoqui iramanantajiaquitequeate isheca, iquemacojiaqueritarite iriguenti choocatacojianquitsi tirigo itseraiquijaquero tsovironaquipaequi itsotejiacaro iriatimpa irishecajajempaca coajica onteroncaguetanaquempagueta maasano.<sup>13</sup> Coajica yoajianajiquea aisa iramanajiaquiteri isheca, ariquea icantajiaqueri Jose: 'Naroguentitarite piguentijeguite', itsatantacarica Paraone queri oacaantirica Jose.<sup>14</sup> Arikea Jose icajemacaantaqueri Jacovo iriri, jerijia aisa maasano ijitannejia. Maasano icarajiaque 75.<sup>15</sup> Yoantanacaca Jacovo iguinentapojaca Ejepitoqui. Arikea ontaniqui imetojanaji. Ari iquejejianaca maasano irijanijiate, irirajia choviquijianacajica, imetojajiaque ontaniqui.<sup>16</sup> Arikea yaajitanajiri ontaniqui Shiquemequi, yojoquijitapojajiri omoroqui yojoquijitantajitarica metotatsica, irootarite ivesgaraqueca coramani Averaameni yamanajiaquerigueti irijanijiate Amore Shiquemequi, yojocaqueneri imentaquitsite.<sup>e</sup>

<sup>17</sup>"Ariqueate pajinigueta aapojempa irinetsanantaquemparoca Aapani Irioshi icanquerica Averaameni coramani icantajerigueti irovashianta-

jajeri omperaperaajiavecarica inchoviquijiaqueca, ariqueate yoshequiajiana quequeate avaesatinijiateni ontaniqui Ejepitoqui.<sup>18</sup> Ocoramanitapoja jigueta yoshequiajiana quegueta, ariqueate imajirontaja Ejepitoqui itsipa teeca inquemacoteriji Jose.<sup>19</sup> Irootaque queate amatavijajia vecarica avaesatinijiateni, yatsipetacaajiacari, ipishoncaa jiaqueri irijanijiate iriaqueraca voaguetanquitsi cameetsanijite irimetojajiaque aatonijite yoshequiguitsi.<sup>20</sup> Irootaque queea ivoantacaca Moishishi. Irira Aapani Irioshi ishinevencari. Ocarataque 3 taai iquempogujajitaqueri itsovironaquito tequi iriri.<sup>21</sup> Cotanquitsiquea aapojacagueta yojoquijitantajitarica sotsiqui irimetojeme, aaqueriqueate irorianite Paraone, oguimoncaqueri aajanicari oquejetacaacari irijanimajate.<sup>22</sup> Itsatacajitaqueriqueate Moishishi maasano itsaguetaica Ejepitoquita. Cameetsaqueate iquenquetsataque, itsamajague taqueroqueate taaca opajitapae yantaguetaqueca.

<sup>23</sup>"Ariqueate ovegaratacagueti irajagnitsite Moishishini 40, iquenquejanaque iroanaque irinejeri igonororjia, ichoviquijiani Ishiraerini.<sup>24</sup> Inejapoja quequeate apaniro yatsipetacaacaca Ejepitoquita, ariqueate ipigamempojiri Moishishini, imetojajeriqueate Ejepitoquita.<sup>25</sup> Ijiqueji ariji intsajiajavaquerijiri igonororjia iriguenti tigarancaqueri Aapani Irioshi iramijiaqueriqueate irajaianajeri, cotanquitsi iriatimpajia tee intsajiajavaquerijiri.<sup>26</sup> Osavincaguitetanajigueta queate inejiri mavite igonor taviavacaaca. Intintaveca irogameetsajajerime icantiri: 'Shirampari, pigonorontavacaaca;

e 7.16 Jen. 50.7-13 ocanti yojoquijitajiri Jacovoni omoroqui morotashitatsica Macaperaquitica yashintavecaca Eperoneni (Jen. 49.29-32). Irootaque ivesgarataqueca Averaameni. Josoe 24.32 ocanti iriraquea Joseni iriotaque yojoquijitajica *Shiquemequi* quepatsiqui ivesgarataqueca Jacovoni (Jen. 33.18-19).

¿querocate pincantempaji pitaviavacaanta-  
ca? <sup>27</sup>Iriraqueate taviaquerica itsipa  
itatsinquiriqueate icantiri: ‘¿Taampate  
cantaquempi pimpeaquempa nomajirojiate  
cameetsanijite pincantomajajauenca?  
¿Taampate peacaaquempi nojoesete?  
<sup>28</sup>¿Aricampa pinintaque pimetojaqueña  
naatimpa pinquejetacaguena Ejepitoqui-  
tica pimetojaqueca chapinqui?’ <sup>29</sup>Iroompam-  
queate iquemavaquegueti Moishishi  
ishianaca yoanaque otsipaqui quepatxi  
icantajitica Mariane. Ariqueate ichoocapoji  
ontaniqui iconoajiacari itsipapae.  
Yaapojaque imanquigare, yoacaanque-  
que mate mavite shirampari.

<sup>30</sup>“Ariqueate anaapojacagueti 40  
ajagantsi, ichoocaquegueti Moishishi  
oquitamampororoipojaquegueti quempeji-  
tacoquero otsempi Shinai yonigaacari  
irashivantite Aapani Irioshi. Ichocatanta-  
caro inchatojaniqui maequitatsica,  
omorecanaque more, more, more, more.  
<sup>31</sup>Yamenauerogueti Moishishi, mana  
yoanaque intati. Iquempejivetapojaca  
iramenamajaquero, iquemaitatiguiri  
iquenquetsatanaque Amajirote, icanti:  
<sup>32</sup>Naroguenti Irioshite pivaesatinijiate.  
Naroguenti Irioshite Averaame, Ishaaco  
aisa Jacovo.’ Ariqueate icanquiti Moishishi  
soroc itsaroamajatatinimaja yompionca-  
nacaqueate pion, pion, pion, tee iramenajeroji  
capichaji. <sup>33</sup>Ariqueate icantiri Aapani  
Irioshi: ‘Pasaterejanaquempari pigavigui-  
tire, picatiantacarotarite noganejencagu-  
tere. <sup>34</sup>Naatimpa namenajiaqueri nashinta-  
jiacaca choocajianquisica Ejepitoqui  
yatsipejiacagueti, aisa noquemajiaqueri  
icajemajiaquegueti, irootaquequeate  
naguijitashitantapajarica naajajeri  
namitacojiaqueri cameetsanijite irovashi-  
antajiajeri atsipetacaajiacarica. Imaicaquea  
nontigarancaquempi pimpianaje  
Ejepitoqui.’

<sup>35</sup>“Iriotaquetarite irira Moishishi  
imanintajiaqueca icantajiavecarigueti:

‘¿Taampate cantaquempi pimpeguem-  
paja nomajirojiate cameetsanijite  
pincantomajajauenca? ¿Taampate  
peacaaquempi nojoesete?’ Imaica  
noncantajiaquempi iritatarite itigaranca-  
queca Aapani Irioshi impeaquempa  
imajirojiate aajianajerineca. Iriguentita-  
rite tigarancaqueri irashivantite Aapani  
Irioshi yonigaacarigueti inchatojaniqui  
maequitatsica. <sup>36</sup>Oraqueate  
ontaniqui Ejepitoqui yantaguetaque  
Moishishini oshequi teeca irinejajiteji  
intsatimentajiaqueniji iriguenti Aapani  
Irioshi amitacojiaquerica, ariqueate  
yaajianajiri avaesatinijiate. Arikeate  
iquejetaca aisa ontaniqui Quentijani  
Quityoncjaroqui aisa ontaniqui  
oquitamampororoipojaquegueti  
yantaguetaque oshequi teeca irinejajiteji.  
Ovegarataca 40 ajagantsi  
yantapiniguetaquero. <sup>37</sup>Iriraqueate  
Moishishini iritatarite cantajiaqueri  
ichoviquijia Ishiraerini: ‘Intigaranca-  
jempi Aapani Irioshi pigonoro tsavetan-  
taquerineca, inquejetaquena naatimpa.’  
<sup>38</sup>Iriotaquetarite Moishishini tsipajiacarica  
avaesatinijiate ontaniqui icapiocajia-  
quegueti oquitamampororoipojaque-  
gueti. Aisa itsipatacari irashivantite  
Aapani Irioshi quenquetsatacaquerica  
otsempiqui Shinai. Iriotaquequeate  
quemavaqueroca quenquetsatsarentsi  
oganijantatsica, yogaajiacajiro  
aatimpajia atsatantajiacaroca imaica.  
<sup>39</sup>Cotanquitsi irira avaesatinijiate  
imanintajiaqueri teenica irinintajigueji  
inquemisantajiguera manaqueate intati  
ipintsapintsajianaja Ejepitoqui.  
<sup>40</sup>Icantantajiacarica Aaronini: ‘Panteshi-  
atsi irioshijate itsipapae cameetsanijite  
irionijite jivajianajineca. Irivotetaca  
Moishishi aajavetajajica ontaniqui  
Ejepitoqui, cotanquitsi tee antsateji taa  
opajita oaqueri, ari ipeaca.’ <sup>41</sup>Arikeate  
yantajiaque iriatimpajia irioshivijitashi-

caca iquejetacaacari caapironcaari  
iriaqueraca quimogantirenajaniquitan-  
quitsica. Ariqueate imetojajiaqueneri  
viratsipae itajaiaqueneri ishinevaejiaca,  
ishineventashijiavetacari yantajiaqueca.  
<sup>42</sup>Ariqueate yovashiantajianaqueri  
Aapani Irioshi intsaroventajiguemparita  
catsirincaiteri, taai, impoquiropae.

Itioncacotaquerotarite coramani  
tsavetantatsica itioncacaaquerigueti  
Aapani Irioshi icanti:

‘Aviatimpajia ishiraerija,  
pimetojajiaquegueti viratsipae  
pitajiaquerigueti pichocajia-  
quegueti ontaniqui oquitamam-  
pororoipojaquegueti 40  
ajagantsi

carimpate naroguentimpa pojocajia-  
quene pitajiaquene?

<sup>43</sup> iTeequeate!

Iriguentitarite pishineventajiaca  
pirioshivijitashitaca icantajitica  
Moroco,  
irootaquequeate querocagueti  
poajianaque paajianaquero  
tsovironaqui inchoocatancaca.

Aisa pishineventajiacari impoquiro  
irashi pirioshivijitashitaca  
icantajitica Irepana.

Iriojia pantajiaqueca pintsaroventa-  
jiaquempaca.

Irootaquequeate naacaantantajia-  
quempica irajaitanaquempi  
osamani anaacagueti  
Vavironia.’

<sup>44</sup>“Ariqueate ontaniqui oquitamampo-  
roroipojaquegueti irira avaesatinijijateni  
itsaroventantacariequeate Aapani Irioshi  
quitsaarentsivanco oraquea ochoocatan-  
taca itioncaqueca Aapani Irioshi  
ontaniqui Shinaiqui. Arikeate iquejeta-  
caajiacaro icannerica Aapani Irioshi  
Moishishini yonigaaquerigueti quero  
incoquiaqueroni. <sup>45</sup>Arikeate imetojanaji-  
gueti Moishishini, irioqueate piajari

Josoe itsipajianajari avaesatinijiate  
icoraquetashitajiro ocatica quepatsi  
icashiacaajiacarica Aapani Irioshi  
coramani, yaajianajiroqueate iitsaare-  
vanco. Arikeate yarejerejeivetapojac-  
gueti inejajiapojaqueri teeca iriojia  
joriojia guintenijiavetatsica acaniqui,  
cotanquitsi arikeate yoguishajiaqueri  
Aapani Irioshi cameetsanijite irojocajia-  
quenerinijite irionijite ashintajajempa-  
rone. Ogantaga ochoocaque iitsaare-  
vanco Aapani Irioshi arejevaetapojacaro  
ichoocaquegueti Taavini. <sup>46</sup>Arikea irira  
Aapani Irioshi ishinevencari Taavini,  
icavintsaquaqueri. Arikeate iriatimpa  
inintavetaca irantaquenerime tsovi-  
naqui inchoocatantataquempaca Aapani  
Irioshi itsaroventacaca Jacovoni.

<sup>47</sup>Cotanquitsiqueate teequeate irininta-  
cagueriji iranteneri, iriguentiqueate  
antajiniri irijanite icantajitica Saromoni.

<sup>48</sup>Cotanquitsi irira Aapani Irioshi  
Anaantamajatatsica tee inchoocatan-  
temparo tsovironaqui ishitiquica  
caquinte, icanquetari tsavetantirinica  
Aapani Irioshi:

<sup>49</sup> Icanti Aapani Irioshi:

‘Maasano jenoquipaetica  
manaqueate oquejevecaro  
noshitaponcaro  
aisa quepatsi manaqueate oquejeve-  
caro novanquegontare.  
¿Arimpate pagavejajiaque pishitica-  
jiaquena tsovironaqui nonchoo-  
catantempaca?’

¿Queroquea ochoocaque nomagore-  
jantaquempaca naatimpa?’

<sup>50</sup> ¿Arimpate tee naroguenti peaca-  
guitaroca maasano choocague-  
tatsica?’

<sup>51</sup>“Aviatimpajia aviguentijia tee  
pinquemeji, mana pogapianaca intati.  
Mana piquejejacari teeca intsatimaji-  
gueri Aapani Irioshi, manaquea  
pipigatsajiacari Ishire Aapani Irioshi

piquejejiacari pivaesatinijiate.<sup>52</sup> Iriguentijitarite atsipetacaajiacarica maasano tsavetanririnica Aapani Irioshi aisa imetojajiaqueri maasano camantajiavetacarica: ‘Incoraquetaque coajica irira Comajamajatatsica.’ Ariqueate icoraquevetacaguetai aviatimpajiaqui paacaantajiaqueri intati, pimetojacaantajiaqueri aisa.<sup>53</sup> Pitsajavetacaro icanqueca Aapani Irioshi yogaajiacajica irashivantijitete, cotanquitsi tee pinquemisantajigueroji.”

<sup>54</sup> Iroompaeate iquemajiaavaquitigiri icanquegueti opeamajajianaqueriqueate itsimajenca yatsicayajimajatashijianacariqueate.<sup>55</sup> Iriraqueate Ishire Aapani Irioshi ichocashirentamajatanaqueri Ishitivano, yamenanaquequeate jenoqui inquitequi inejaquero ishimpquirereane Aapani Irioshi cantavaetaque shimpquirererere. Iriraqueate Jesoshi catiaca itincamijempeiqui. Icantanaquequea Ishitivano:

<sup>56</sup>—Jac, imaica naatimpa nonejaquero inquite otanarejanaca. Jeri irinta Irijanite Caquinte, catiaca itincamijempeiqui Aapani Irioshi.

<sup>57</sup> Ariquea icojiana ishepijianaquero iguempitapae aatoniji iquemajigiri, icajemajianaque ishiashijianacari itaviajianaqueri.<sup>58</sup> Yaajianaqueri ovegaraguetaquegueti tsovironaqipae ipishoncashijiaqueri itsinatsinajiaqueri. Iriraqueate tsinacajiaquerica mana isapocajianacaro iitsaare jenoquitanquitsica yojocajianaqueriqueate itsipa itsipajiacaca icantajitica Saoro, iquempogujajinriqueate.<sup>59</sup> Iroompaeate itsinacajianaquerigueuti Ishitivano, iratimpa yamanajiqueru Amajirote, icantiri:

—Nomajirote Jesoshi, paavajero noshire.

<sup>60</sup> Ariquea iguerotanaca icajemapanajanti iririjencani icanti:

—Nomajirote, aato piquenquejacaguiritsi ocatica iquempevaecaguetai.

Iroompaeate iquejetanaquerogueti imaica imetojanaque.

**8** <sup>1-2</sup>Irira Saoro yamenavaquerigueuti imetojanaquegueti yamenavaquero cameetsa.

### Saoro yatsipetacaajiacari quemisantajitsica

Aritarite ichoocajiaque acaniqui quemisantamajajigurica Aapani Irioshi, yaajianajiriqueate Ishitivano iquitajiajtiri. Iraacomajajianaqueriqueate. Ariqueate irira teeca inquemisantajiguejiri Jesoshi itsitijianaqueroqueate icatsimajianaqueri maasano quemisantajitsica choocajiascica Jerosarequi, ishiantajianacaca maasano iriatimpajia yoajianaque iporocajianaquequeate Joreaquai aisa Samariaqui. Iriguentinivani choocajiajatsi itigarancanejia Jesoshi.<sup>3</sup> Iriraqueate Saoro intintavecaqueate interoncajigueme irira quemisantajitsica, yoashijianaqueri itsovironaquitepaequi, iquijashijianaqueri inoshicajianaqueriqueate shiramparijia, manquigarentsijia, maasano. Yaajianaqueri yoguijajiaqueriqueate santanaqui.

### Itsavetantajiquerigueuti Jeso quirishito Samariaqui

<sup>4</sup> Irirajiaqueate porocajiananquitsica yoajianaque itsitacaguitejajiaquero itsavetantaqueroquea Quenquetsatsarentsi Oganejencatatsica.<sup>5</sup> Apaniro icantajitica Jeripe yoanaque Samariaqui itsavetanqueri Quirishito.<sup>6</sup> Oshequini quemajiaavaquerica Jeripe iquemisantamajajiaavaqueri, yamenajiaqueritarite yantaguetaquequeate teeca irinejajiteji.<sup>7</sup> Yogui sotoaguequeriqueate ampatsinipae choocatantajiacarica caquinte. Icajemajianaquequeate isotoajianaque.

Ariqueate aisa yogueshijajiri magoviroshiri, jerija aisa teeca ironquempaji.

<sup>8</sup>Irootaquequeate ishinevaetantajiacaca oshequini guitenijianquitsica Samariaqui.

<sup>9</sup>Arikeate chooca acaniqui aparo shirampari icantajitica Shimo. Yaventapinclaro iragavejane ampatsini yamitan-tajiavecarica, yamatavijantajiacarica Samariaquitica. Yaventacoca icanti: “Naroguenti anaantatsica.” <sup>10</sup>Maasano-queate iquemisantamajajavetacari, majirontajatiatsica, aisa teeca iranaantajigueji, icantajavetacaquea: “Irio agavejavaetsatsica yagavejacaaqueca Aapani Irioshi.”

<sup>11</sup>Iquemisantajiaqueri maasano, yonigaajiaqueritari taaca opajitapae teeca irinejajiteji yagavejacaquerigueti ampatsini, yamatavijantajiacarica. Iriatimpajia mana yoajianaque intati. <sup>12</sup>Cotanquitsiquea yarejetapojacagueta Jeriepe itsavetantaquerogueti Quenque-tsatsarentsi Oganejencatatsica tsavetantaquerica Aapani Irioshi quero icotani imajirontagueti aisa tsavetantaquerica Jesoquirishito, arikea iquemisantajiaqueri iviñacajatacaantajiacaquea, irirajia shiramparijia aisa manquigaren-tsijia. <sup>13</sup>Imatanacaqueate Shimo iriatimp. Iroompaqueate iquemisanta-quegueti iviñacajatacaantaca, arikeate yoguijatanacaqueri Jeriepe. Mana yoanaque intati inejaqueritarite yantaque teeca iragavejeji caquinte.

<sup>14</sup>Irira itigarancanejia Jesoshi choocajianquitsica Jerosarequi iquemacojiaquerigueti Samariaquitica ishineventamajajanacaro iriatimpajia Iguenquetsatsare Aapani Irioshi, arikeate itigarancajiaqueriqueate Peerero aisa Joanca iramenajiaquieri. <sup>15</sup>Iroompaqueate yarejerejeipojacagueta yamanajiaqueriqueate Aapani Irioshi, yamanacoventajiaqueri cameetsanjite inchoocashirenta-

jiapojaqueri Ishire Aapani Irioshi, <sup>16</sup>tequeratanicate inchoocashirentajiguériji, manatarite yoviñacajatimentajiacari ivajiroqui Amajirote Jesoshi.

<sup>17</sup>Arikeate Peerero aisa Joanca ipamiji-aqueriqueate, arikeate ichoocashirentajianaqueri Ishire Aapani Irioshi.

<sup>18</sup>Iroompaquea yamenavaquerigueti Shimo yantaqueca itigarancanejia Jesoshi ipamijiaquerigueti caquinte cameetsanjite inchoocashirentajapojeri Ishire Aapani Irioshi, inintavetacaquea irivegarajiaquenerime imentaquitsite, <sup>19</sup>icantiri:

—Iintsishatsi pagavejacaguena naatimpa aisa nonquejetaquempi aviatim-pajia cameetsanjite quericaca nompamitaque inchoocashirentajapojaqueri Ishire Aapani Irioshi. Iintsija pagavejacaguena, nogevaraquempitarite imentaquipae.

<sup>20</sup>Icantiri Peerero:

—Intaaquempashinete pimentaquitsi-tepae. Pitaatsishatsi aisa aviatimpa camorecariqui iroorijite pijiqueji povegaratantaquemparo imentaquipae ora yojocashitantaca Aapani Irioshi.

<sup>21</sup>Atoqueate pagaveji piconoajigana pinquejiaquena naatimpa, tequeratanicate pincantashitatiamajatempaj. Yamenaquempi Aapani Irioshi teequea ontampaticateji pishire. <sup>22</sup>Povashiantanaquero ocatica piquenquejaguisheta-queca imaina, pincantashitatiamajatana-jempa. Pamaneri Aapani Irioshi, arica impeacotajempiro piquenquejagushe-queca. <sup>23</sup>Notsataquempitari oshequi picatsimatacotsitanacuquenaro, ajiricashir-rentavaquempi covaeguisherentsi.

<sup>24</sup>Icanqueriquea Shimo:

—Pamanacoventajiguenshiatsi pincantajiguéri Aapani Irioshi aatoniji nogui camorecariqui notagatsiqueate quejetaca picantajiaquenaca imaina.

<sup>25</sup>Arikeate itigarancanejia Jesoshi icamantacojiaquerogueti maasano

yamenajiaqueca aisa itsavetantajiaque-  
rogueti Iguenquetsatsare Aapani Irioshi,  
ariqueate iquenaguetanaque iguinteni-  
guetacagueti itsipapae Samariaquitica,  
itsavetantaqueroquea Quenquetsatsa-  
rentsi Oganejencatatsica. Ariqueate  
ipiapiaitanaja Jerosarequi.

#### Iquemisanquegueti Etiopiaquitica

<sup>26</sup>Arikea irashivantite Amajirote  
iquenquetsatacaaqueri Jeripe icantiri:  
—Pija oquitamampororoipojaquegueti  
pinquenantaquemparo quenavoqui-  
rontsi quenavoquipojatsica Jerosarequi  
oavoquitananquitsica Gasaqui.

<sup>27</sup>Arikeate icatianaca Jeripe  
yoanaque quenavoquivirontsiqui, ariquea  
itonquivojavajari shirampari eonocota-  
tsicas<sup>f</sup> poneatsica Etiopiaquia. Iriatimpa  
iriguenti amitacotiroca ora imajirojate  
Etiopiaquitica ora icantajitica Cantase.  
Iriguentitari netsanatiniroca omentaqui-  
tsitepae, cavorejaguetsatsica. Iponeaja-  
queate Jerosarequi yoauquitqueate  
itsaroventaqutari Aapani Irioshi.  
<sup>28</sup>Imaicaqueate iroanaje igunteniqui,  
itetajaro itigaritacomento yapatsajavan-  
taquero paperi itioncacotanaqueca  
coramaní tsavetantirinica Aapani Irioshi  
icantajitica Isaiashini. <sup>29</sup>Irira Ishire  
Aapani Irioshi icantiri Jeripe:

—Poanaque pintonquivojamajatava-  
quempari quempeji.

<sup>30</sup>Ishiashitanacariequeate Jeripe  
iquemapojaqueri yapatsajavantaquero  
itioncanaqueca tsavetantatsica  
Isaiashini, icampojaqueri:

—¿Pitsatavaquerompa papatsajavan-  
taqueca?

<sup>31</sup>Iriatimpaqueate icantiri:

—¿Querocampate noncoquempani  
nontsatantavaquemparoca? Teenicate  
inchoocateji tsatacaaqueranaroneca.

Iintsija caacateja pantaitapojaque  
aviatimpa pisavcapojaque acanqui  
naatimpaqui pintsatacaapojena.

Arikeate yataitanaque Jeripe isavica-  
pojaque. <sup>32</sup>Oraqueate yapatsajavanta-  
queca mana ocanti:

Yaajitanaqueri iquejetacaajitanacari  
yaajitirigueti oveja ipesaitiri-  
gueti.

Teequeate incajemanaqueji, iquejeta-  
nacari yogarajamaejitirigueti  
ovejajaniqui yaajitirogueti imae,  
mana iquemisantacotanaca.

<sup>33</sup>Arikeate ivosantejajiaqueri,  
inijashinajiacariequeate, queri-  
campate cantacotanaquerineca.  
Arikea imetojajiaqueri, tee inchoo-  
cateji quepatsiqui.

¿Imaica quericampa agavejanqui-  
tsine inquenquetsatacotaqueri  
inchoviquijianaqueca?

<sup>34</sup>Iriraqueate eonoco icantiri Jeripe:  
—Pincamantenaja, ¿queri iquenque-  
tsatacotaqueca tsavetantirinica?  
¿Iriocampa quenquetsatacotajatsi,  
aricampa iquenquetsatacotaqueri itsipa?

<sup>35</sup>Arikeate itsititanaquero Jeripe  
acanqui ocanqueca paperi yapatsajavanta-  
queca, itsatacaamajataqueri itsavetanta-  
quero Quenquetsatsarentsi Oganejencata-  
tsica tsavetacoquerica Jesoshi. <sup>36</sup>Arikeate  
yoajianaque inejajapojaquero osamponaja.  
Icanqueuea irira eonoco:

—Jerosa oca osamponaja. ¿Cameetsa-  
taquempa noviñacajatacaanquempa?

<sup>37</sup>Icantiri Jeripe:

—Avirompate. Piquemisantamajata-  
querigueti Quirishito, cameetsa  
piviñacajatacaanquempa.

Iriatimpa icantiri:

—Arimajatarite noquemisantamajata-  
queri, notsataqueterarite irira Jesoquiri-  
shito iriguenti Irijanite Aapani Irioshi.

f 8.27 Eonoco irio isoitsorejitatiqueca iguemaqui.

<sup>38</sup>Ariqueate icantiri tigaritacoquerica irogatigero itigaritacotantaca, yaguijitanaque mavite, irira Jeripe aisa eonoco, yoajianaque osamponajaqui iviñacajataqueri. <sup>39</sup>Iroompaqueate yagajianajatigui otsapijaqui yaanaqueri Ishire Aapani Irioshi Jeripe, ariqua ipeanaca. Iriraqueate eonoco, teequeate irinejjeriji Jeripe, cotanquitsiqueate yoanajiqueate ishinevaetanaca.

<sup>40</sup>Ariqueate irira Jeripe iconigavaeti Asotoqui itsavetantanaquero Quenquetatsarentsi Oganejencatatsica, yoavetaquea itsitacaguitejanaquero quinteninintispae, yarejevaecaro Sesareaqui.

#### Iquemisanquegueti Saoro

(Ya. 22.6-16; 26.12-18)

**9** <sup>1</sup>Iriraqueate Saoro arimpaqueate icatsimajianaqueri quemisantajigurica Amajirote inintavetaca irimetojajiaquerime maasano. Yoantanacaca saserorotequi anaantamajatanquitsica, <sup>2</sup>yamanapanajantiri irojocavaqueneri paperipae cameetsanijite inquijashitimentajianaquerinijite shinagogapaequi icapiocantajaiaca joriojia Tamashicoqui incoaguequieri maasano guijatacojiguroca icantajitica Quenavoirontsi, irajaianaqueri iroguijajiaqueri santanaqui Jerosarequi, shiramparijia aisa manquigarentsijia. Arikea itioncaqueneri paperi, yojocavaqueneri.

<sup>3</sup>Iroompaquea iquenavetanacaguete quenavoirontsiqui quempejivepojacqueate Tamashico ocantanaquitiguiqueate morec oponeajencataca jenoqui inquitequi otsirencapojaqueriqueate anquiritacotapojaqueri. <sup>4</sup>Arikeate itejanaque quepatsiqui iquematiguiqueate icantapojaqueri:

—Saoro, Saoro, ctaate picatsimatantauenaca?

<sup>5</sup>Iriatimpa icoacotanaqueri icantiri:  
—¿Queroquea pipajitani, Nomajirote?

#### Icantiri:

—Naatimpa naroguenti Jesoshi pipatimanataqueca. <sup>6</sup>Imaica pincatianaque poanaque Tamashicoqui. Arikeate oraniqui incantajiquempi querocaca pincoquempani.

<sup>7</sup>Iriraqueate itsipatsipaicaca Saoro itsaroajianaque iroorijite iquemajiavetica iquenquetsajiquegueti cotanquitsi teequeate irinejeriji, cajaraguiteni.

<sup>8</sup>Icatiavetanaja Saoro, ipityaquirejavetanaca, tee iragavejajempaji irinejaje. Manaqueate yacatsajianaqueri intati, yaajianaqueri Tamashicoqui. <sup>9</sup>Arikeate ichoocataque oraniqui 3 savincaguiteri tee irinejajeji, aisa tee irishecatajempaji, tee irimirajeki.

<sup>10</sup>Ontaniquiquea Tamashicoqui arikea ichoocataque quemisantatsica icantajitica Ananiashi. Inegaacari Amajirote mana oquejetanacaro iguimaanequi icantiri:

—Ananiashi.

#### Icantiri iriatimpa:

—Choocana, Nomajirote.

#### <sup>11</sup>Icantiri Amajirote:

—Pija ontaniqui itsovironaquitequi Jorashi, ari ochoocaque quenavoiriron-tsiqui icantajitica Catincapoquiri, pincoacotantapojaqueri Saoro poneanquitsica Tarisoqui. Imaica yamananquena. <sup>12</sup>Nonigaqueritarite oquejetacaro iguimaanequi inejaqueri shirampari pajitatsica Ananiashi iquijapojaque ipamitapojaqueriqueate cameetsanijite iramenimentanajenijite.

<sup>13</sup>Iroompaqueate iquemavaquitigui Ananiashi icantiri:

—Cotanquitsi, Nomajirote, noquemacotiri iriguenti catsimari yatsipetacaantajiacarica pigomajamajarejia choocajianquitsica Jerosarequi. <sup>14</sup>Imaicaqueate imaica coraquetake acaniqui itigarancajiaqueri saserorotejia anaantajianquitsica cameetsanijite irajaianaquerinijite

maasano aventajiguimpica pivajiroqui. Irootaquetarite icoraquetashitaque.

<sup>15</sup>Cotanquitsi icantiri Amajirote:

—Pijja, iriotaquetarite nocoguaqueca, nonintaquetarite naatimpa intsavetanquenaqueate incamantajiaqueri teeca iriojia joriojia aisa imajirojiate. Aisa incamantajiaqueri ishiraerija. <sup>16</sup>Nontsatacaguequeri naatimpa maasano quero incoquempani irantsipeventaquena.

<sup>17</sup>Ari yoanaque Ananiashi, iquijapoaque tsovironaquiqui. Arikeate inejapojaqueri ipamitapojaqueriqueate, icantiri:

—Napiguemisantariteni Saoro, irira Amajirote Jesoshi onigaaquempica quenavoquivrontsiqui itigarancaquena cameetsanijite pinejanaje, aisa inchoocashirentaquempinijite Ishire Aapani Irioshi iragavejacaanaquempi.

<sup>18</sup>Iroompaqueate icanquitiguiari arikeate ocatanaca opariapentauquiguepojaque iroquiaqui quempeguetaca inventaqui shima arikeate yamenanaji. Iroompaquea yoanaque iviñacajataca. <sup>19</sup>Arikeate ishecatanaca itampishitanaji. Arikea ichoocatanaji Saoro aparopae savincaguiteri, imaimojianajiri quemisantajıatsica Tamashicoqui.

**Itsavetankegueti Saoro Tamashicoqui**

<sup>20</sup>Arikeate Saoro itsavetantaguetanajieri Quirishito shinagogapaequi icapiocantajiacorriojia icantanaqueate: “Jesoshi iriguienti Irijanite Aapani Irioshi.” <sup>21</sup>Maasano quemajiaquerica mana yoajianaque intati icantajigu:

—¿Teampaqueate tee irio irira catsimajiaquerica quemisantajiguirica

Jesoshi choocajıatsica Jerosarequi?

¿Teampaqueate tee irio coraquetashijavetacarica quemisantajıatsica choocajıatsica acaniqui iroishoquiaquerime irajaianaquerime saserorotejiaqui anaantajianquitsica?

<sup>22</sup>Cotanquitsi irira Saoro arimpaqueate itsavetantamajatanaqueri Jesoshi, icanti iriguienti Quirishitotsica.<sup>8</sup> Arikeate irirajia irapijoroiyatene choocajıatsica Tamashicoqui tee iragavejajempaji impigajajempariji.

<sup>23</sup>Arikeate oshequianaquegueti savincaguiteri isariajiavecariequa joriojia irimetojajiaquerime,<sup>24</sup>cotanquitsi icamantajiqueris Saoro. Ogantaga tsiteniriqui aisa savincaguiteriqui itimashijiavecari sotomorontsiqui itantajitaquerogueti ocapiocagueti tsovironaquipae inintajiavetaca irisotoanajegueti irimetojajavajerime. <sup>25</sup>Cotanquitsiqueate opitsecanaquegueti yaajianaqueri irapiguemisantarijate otantotacagueti guinternintsi, itetanaca cantiriqui, arikea inchiquojisano yogagujitacojiaqueri yoganoncorenacojiaqueri antaqueronta.

<sup>26</sup>Iroompaqueate yarejetapojacagueti Jerosarequi inintavetacaqueate inconoajapojemparime quemisantajıatsica, cotanquitsiqueate maasano itsaroacaajiavetavacari ijitashivetavarcaritarite tee arimaja inquemisanteriji Quirishito.

<sup>27</sup>Cotanquitsiqueate yaanaqueri Verenave itsipatanacari Saoro ichoocajiaquegueti itigarancanejia Jesoshi, icamantajiaqueri quero ocotacani yonigaacarigueti Amajirote quenavoquivrontsiqui iquenquetsatacapojaqueri. Coajica ontaniqui Tamashicoqui teequea

**g 9.22 Quirishitotatsica.** Iguenquetsatsarequi guiriegojia icanquegueti *Christos* (Quirishito) manaquea ocanque “Ishaguijitaqueca” aisa “Icoguiaqueca”, irishaguijitaqueritari orejiqui orivo irirajia icoguiajiaqueca impeaquempa imajirojiate irooca isaserorotejiate. Irira Quirishito iriotaquequea itsavetacotsitacaca tsavetantajıatsica coramanitica intigarancaque Aapani Irioshi impeaqueuempaniji Imajirojiate maasano.

intsarogueji iquenquetsatanaquequea ivajiroqui Jesoshi, itsavetacotaqueri.

<sup>28</sup>Iroompaqueate iquemajiaquaitigui yaajianaqueriqueate itsipajianacari. Arikeate iquijaguetanaque tsovironaquipaequi Jerosarequi, <sup>29</sup>iquenquetsata-naquequea ivajiroqui Amajirote, itsavetacotaqueri, teequea intsarogueji. Aisa iquenquetsatacaa jiaqueri joriojia irirajia quenquetsatantacaroca guriegio. Iriatimpajia inintajavetaca inquemisanta cajaiaquerime cotanquitsi tee iragave-jajiguera. Arikea itsimajajianaqueri imintantajavetacaca irimetojajiaque-riime. <sup>30</sup>Cotanquitsi iroompaqueate iquemavaquitiguiqueate irapiguemisan-trijiateni yoacajianaqueri Sesareaqui. Arikeate itigarancajiaqueri Tarisoqui.

<sup>31</sup>Arikea ichoocajiaque cameetsa maasano quemisantajatiatsica guntenijia-tsica Joreaqui, Garireaqui aisa Samari-aqui, teequeate irasereajitajeri. Yoshequiamajatanaquequeate oraniqui quemisantajatiatsica, arimpaqueate iquemisantamajajianaqueri Amajirote itsamajajianaqueri maasano inintica iriatimpia, iriguentitari tampishitacaajia-queri Ishire Aapani Irioshi.

#### Peerero yogueshitajiri Eneashi

<sup>32</sup>Arikeate yoanaque Peerero inejantaguetaque gunteninintsipaequi, inejajiaqueri irapiguemisantarijiate, irosati yarejetantaca Iritaqui, inejajia-queri aisa itsipapae irapiguemisantari-jiate guntenijatiatsica ontaniqui.

<sup>33</sup>Arikeate oraniqui inejapojaqueri teeca ironquempaji icantajitica Eneashi inorijaniqueate 8 ajagantsi. <sup>34</sup>Icantiri Peerero:

—Eneashi, imaica iriveajempi Jeso quirishito. Pincatianaje, pampiguiri canajero pinorijantacaca.

Iroompaqueate icanquitigui icatiana-caqueate. <sup>35</sup>Maasano guntenijatiatsica

Iritaqui aisa Saronequi iroompaqueate inejavaquerigueti yogueshitajiri iquemi-santajianaqueri Amajirote.

#### Yovochantajirogueti Irorocashi

<sup>36</sup>Ontaniquiqueate Jopequi arikeate ochoocaque otsipa quemisantatsica icantajitica Tavita. Oraqueate iguenque-tsatsarequi guiriego mana icantajitiro Irorocashi. Iroatimpa caaviji ocaavintsa-janti ocaavintsa jajiguiri coguitejacojian-quitsica. <sup>37</sup>Arikeate ashinoncajanaca ometojanaque. Iquivatsino jitavaquero aritari icojiga joriojia. Arikeate yaajita-naquero shitamencorentsiqui jenoqui.

<sup>38</sup>Arikeate irira quemisantajatiatsica guntenijatiatsica ontaniqui Jopequi itsajiaqueritarite arikea ichoocaque Peerero quempeji Iritaqui, itigarancan-tajiacaca mavite iroajianaque incantaji-aquieri incoraquetaque taampina.

<sup>39</sup>Iroompaqueate iquemavaquitigui Peerero icatianaca yoguijaguijaitana-queri. Oraqueate yarejerejeipojacagueta tsovironaqui qui itsipajianacari ojoquiji-cagueta otsino Irorocashini. Arikeate ochoocajiaque oraniqui metojajianqui-tsica omanquigarejia iraacojiaquero. Iroompaqueate onejajiaquaitigui Peerero ocapiocaventajiavacari onigaaji-aqueri quitsaarentsipa ontijaguequeca Irorocashini choocatirajagueta otsipave-tacarogueti.

<sup>40</sup>Irira Peerero yoguisotojaiquero maasano iguerotanaca queate yaman-aqueri Aapani Irioshi. Arikeate ipitsoca-shitanacaro metojatsica icantiro:

—Tavita, pintinajanaje.

Arikeate opityaquirejanaque onejati-guiiri Peerero otinajanaca osavicanaque.

<sup>41</sup>Yacatsataquero yogatiaquero icajema-jiajiroqueate metojacojiatsica aisa itsipajia quemisantajatiatsica, icantaji-guiiri:

—Jero oca, pochatanaji.

<sup>42</sup>Irira quintenijiatsica acaniqui Jopequi maasanoqueate iquemacojia-  
quero. Arikeate yoshequiamajatana-  
queate quemisantajiguirica Amajirote. <sup>43</sup>Arikeate ichoocaque Peerero oshequi savincaguiteri Jopequi itsovironaquitequi Shimo savicavent-  
rica iticajaguetiri imeshinapae.

#### Iquemisantaqueueti Coronorio

**10** <sup>1</sup>Choocaqueate Sesareaqui coareta icantajitica Coronorio. Iriatimpa iriguenti imajirote coaretajia. Arikea ivergarajiac 100 igoaretajiate. Iriatimpajia itsipajiacaca itsipajia oshequi coaretajia poneanquitsica Itariaqui. <sup>2</sup>Iriatimpa iriguenti pincatsati-  
rica Aapani Irioshi itsipajigari ijitaneria  
itsaroventajigari. Icavintsajajiguiri joriojia coguitejimojiacarica. Yamanapi-  
nitiri Aapani Irioshi irosati savincagu-  
teri. <sup>3</sup>Oraqueate icononcanajagueti catsirincaiteri mana oquejetimovcar  
iguimaanequi icoraquetapojaque irashivantite Aapani Irioshi iconijamaja-  
tapojaque, icampojaqueri:

—Coronorio.

<sup>4</sup>Yamenavaqueriqueate sorerere, itsaroanaquequeate icantiri:

—¿Taa opajita, Nomajirote?

Icantiri:

—Iquemaquempi Aapani Irioshi pamanapinitaquerigueti, aisa yamena-  
quempi caaviji picavintsa-  
janti. Irootaquequeate icavintsa-  
jantaque-  
mica. <sup>5-6</sup>Imaicaquea imaica pintiga-  
ranque iroanaque Jopequi cajemaquite-  
rineca Shimo Peerero, incamantempi  
quero pincoquempa. Iriguenti imaimo-  
que itsipa Shimo quintenitatsica  
quentijaqui savicaventrica iticajatiri  
imeshinapae.

<sup>7</sup>Iroompaqueate yoanajatigui irashivantite Aapani Irioshi irira Coronorio icajemaquequeate mavite

irajaanire aisa aparo coareta amitacoti-  
rica. Irira coareta caaviji ipincatsatiri Aapani Irioshi. <sup>8</sup>Oraqueate icoraquejia-  
queueti icamantajiaqueriqueate maasano icanquerica irashivantite Aapani Irioshi, arikeate itigarancajia-  
queri Jopequi. Arikeate yoajianaque.

<sup>9</sup>Iroompaqueate osavincaguitetanaji-  
gueti itampaticatanaqueueti catsirin-  
caiteri pajinigueti irarejejiguelma,  
iriraqueate Peerero yataitanaque  
jenoqui sotsiqui omencotapojacagueta  
tsovironaqui ovancaitoqui iramaneri Aapani Irioshi. <sup>10</sup>Itaseaque imintavetaca  
irishecaquempame, iroquera  
itijaitanaque tequeratatiraja irisheca-  
tempaji. Arikeate mana oquejetimov-  
car iiguimaanequi. <sup>11</sup>Arikeate otanare-  
jaguitetanaca inquite ocoraquetacopo-  
jaque quepatsiqui quejetaca iniromago  
quitsaarentsi mana ishiticajiguequero  
ovegaramagoguetacagueta. <sup>12</sup>Itelhiteitaca  
taaca ipajitapae tomirishipaequitica  
canaquetatsica, jeri soaancaguetatsica,  
araguetatsica, maasano teeca irisheca-  
tempariji jorio. <sup>13</sup>Arikeate iquemiri  
iquenquetsajencijitanaque icanti:

—Peerero, pincatianaque paaguetava-  
queri pimetojaguetavaqueri pishecata-  
vaquempari.

<sup>14</sup>Icantiri Peerero:

—Nomajirote, aatotarite noshecata-  
ritsi, teenicate noshecateempariji  
icantimentantajitica; tee noshecatempa-  
riji covaetantaguetatsica.

<sup>15</sup>Iquenquetsajencatsijitanaja aisa  
icantiri:

—Iriraqueate icantacoqueca Aapani Irioshi: ‘Cameetsa inaque’, aatoquea  
pipinquiritsi, aato picanti: ‘Covaeguishe-  
taca.’

<sup>16</sup>Otsipatapoja aisa iquejejiquer  
imaica iquenquetsajencatsijitanaja,  
arieate opiacotanaja opeanaja jenoqui  
inquitequi. <sup>17</sup>Arikeate icanti Peerero:

—¿Taate opajita ocatica?  
 Iroompaqueate iquenquejaquerogueti yarejerejeitapojaca itigarancajaquea Coronorio. Icamantajitiri incajaranqui quero onaqueni itsovironaquite Shimo savicaventirica iticajatiri imeshinapae.  
<sup>18</sup>Yarejerejeitapojacagueti icoacojiapoqueri ashincaroca tsovironaqui icantajiapojaqueri:

—¿Ari imaimoquempi Shimo

Peerero?

<sup>19</sup>Iriraqueate Peerero ogantagatiraja iquenquejiro yamenaqueca, icantiri Ishire Aapani Irioshi:

—Coraquejiaque 3 shirampari icojaia-quempi. <sup>20</sup>Pincatianaque poanaque isavi. Aato pitsarogui poguijaguijaitan-queri, naroguentitarite cantajiaqueri icoraquetantajiacaca.

<sup>21</sup>Yaguijitanaque Peerero ichoocaque-gueti shiramparijia [itigarancaquea Coronorio], icantajiapojaqueri:

—Naroguenti picojiaque. ¿Taaqueate picoraquetashijiaque?

<sup>22</sup>Iriatimpajia icantajiguiri:

—Iriguenti tigarancajiaquena nomajirojate icantajitica Coronorio. Iriatimpajia iriguenti caaviji icameetsati aisa ipincatsatiri Aapani Irioshi. Maasano joriojia ishineventajiacari. Chapinqui iquenquesatacaapojaqueri ashivant comajashirentanquitsica icantiri: ‘Pincajemacaanteri Peerero pitsovirona-quitequi. Taaca incamantaguequempi pinquemisantavaquerija.’ Irootaque-queate nocoraquetashitaque noncantajiaquitempi.

<sup>23</sup>Irira Peerero yoguijajavaqueri yonigaajiavaqueri irimaantajiaquem-paca. Ariqueate osavincaguitetanagi-gueti ipijaianajaqueate yoguijaguijita-naqueri, aisa itsipajianacari irapiguem-santarijiateni choocajatiatsica oraniqui Jopequi. <sup>24</sup>Osavincaguitetanajigueti-queate aisa yarejejiapojaca Sesareaqui.

Arikeate ichoocaque Coronorio, icapiocajiaqueri ijitaneria jerijia aisa itsipavijitaca, yoguijajavaqueri Peerero.

<sup>25</sup>Iroompaqueate iquijapojoqueta Peerero, itonquivojavacari Coronorio, yogueroaventavetavacari iguitiqui, iquejetacaacari irioca Irioshi. <sup>26</sup>Cotan-quitsi Peerero yogatiavajiri icantiri:

—Pincatianaje, caquintetajanatari. Aritarite noquejetajimpi aviatimpa.

<sup>27</sup>Ariuea iquenquetsavacaaca iquijajipojaque tsovironaquipui, inejapojaqueri oshequi capiocajianqui-tsica, <sup>28</sup>icantajiapojaqueri:

—Aviatimpajia pitsajiganatarite naatimpajia joriojia nocantashitati-jaiaca, caaviji icantimentajitiro nonconoaquiaquemparigueti teeca iriojia joriojia aisa nonquijitajiaquerigueti itsovironaquitequi. Icantajiaque nogonoro: ‘Tee irininteroji Aapani Irioshi.’ Cotanquitsi itsatacaaquena Aapani Irioshi cameetsanjite aatonijite nopolinquiritsi aisa aatoniji nocantajitsi: ‘Tee incameetsateji, covaeguishetaca.’

<sup>29</sup>Irootaquequeate imaica picajemacaantajiaquenagueti taampinaqueate nocora-quetaque, tecatsiquea nameventempaca. Imaicaqueate pincantajiguena, ¿taaqueate picajemimentajiaquena?

<sup>30</sup>Icantiquea Coronorio:

—Oraqueate chapinqui iquejetanagi-gueti imaica catsirincaiteri icononcanajagueti nochoocaquegueti acaniqui notsovironaquitequi namanaquerigueti Aapani Irioshi, ariqueate yonigaquaquena shirampari quitamarocantaetaque-queate itsaare. <sup>31</sup>Icampojana:

‘Coronorio, iquemaquempi Aapani Irioshi pamanapinitaquerigueti, aisa yamenaquempi caaviji picavintsajanti.

<sup>32</sup>Imaicaqueate imaica pintigaranque iroanaque Jopequi cajemaquierineca Shimo Peerero. Iriguenti imaimotaque itsipa Shimo guinentatsica otsapijaqui

quentija savicaventirica ticajaguetirica imeshinapae.<sup>33</sup> Notigarancantajiacaca camantajiaquitimpica. iAriotesaa picoraquetaque! Imaicaquea imaica acapiocajiacaca ariqueate achoocatimojiaqueri Aapani Irioshi. Nonintaque pintsatacaajiaquena maasano taaca opajitapae icanquempica Aapani Irioshi.

<sup>34</sup>Iquenquetsatanaquequea Peerero icanti:

—Imaica notsamajataque yamenajia- caji Aapani Irioshi aquejetavacaajiaca, teequeate ancantashitatijaiguempaji. <sup>35</sup>Ishineventamajajiacaritarite maasano caquinteguetatsica quepatsipaequita quericaca pincatsamajaquerica aisa icomajamajajanaca. <sup>36</sup>Itigarancaquero- queate Iguenquetsatsare itsatacaajia- quena naatimpajia ishiraerijia quero icotani Jesoquirishito imeshiantigueti cameetsanijite Aapani Irioshi irishine- ventajiacjinijite. Irira Jesoquirishito iriguentitarite Amajironmajate maasano caquinte. <sup>37-38</sup>Aviatimpa piquemacojia- queritarite Joanca itsavetanquerigueti aisa iviñacajatantaquegueti. Arikeate piquemacojiaqueri Jesoshi Nasarequi- tica itigarancaqueneri Aapani Irioshi Ishire jero aisa yagavejacaamajataqueri. Arikeate iquenaquenaguetanaque manaqueate icavintsa jantaguetaque yogueshijiaqueriqueate maasano yatsipetacaajiacaca ampatsini. Ipariana- caroqua Garireaqui, arikeate itsitaca- guitejaquero maasano iguepatsijate joriojia. Iriguenti tsipacari Aapani Irioshi iquejetancaca. <sup>39</sup>Naatimpajia namenamajajiaqueri maasano yantague- taqueca Jesoshi ontaniqui Jerosarequi aisa otsipapaequi iguintenipaequi joriojia. Arikeate imetojajiaqueri yompajacojiaqueri coroshiqui. <sup>40</sup>Cotan- quitsi aapojacagueti 3 savincaguiteri ivochantajiri Aapani Irioshi itigaranca- jiri yonigaajianajana. <sup>41</sup>Cotanquitsi

teequeate maasano ironigaajianajem- riji, naroguentijia yonigaajianajana, naroguentijitarite inintacaqueca Aapani Irioshi coramani nonquemisan- tajiaqueri aisa noncamantajiaqueri maasano. Ipochatanajigueti ariquea itsipajiaana noshecatacavajari aisa nomiracaavajari. <sup>42</sup>Arikeate itigaranca- jiaquena nontsavetantajiaqueri Iguenquetsatsare Aapani Irioshi noncamantajiaqueri maasano caquinte, aisa noncamantajiaqueri irlotaque inintacaque Aapani Irioshi incanke coajica quero incjiaquempa maasano, metojajianquitsica aisa tequerataca irimetojajigueji. <sup>43</sup>Maasanotarite tsavetantirinica itsavetantajiaqueri icantajigui quericaca quemisantaqueri- neca Quirishito impeacotajeneri iguempevaerejia iraventauquemparigueti ivajiroqui.

<sup>44</sup>Ogantagatirajagueti iquenquetsati Peerero icorapepojaque Ishire Aapani Irioshi ichoocashirentajiaipojaqueri maasano quemisantajavaquerica iquenquetsaquegueti. <sup>45</sup>Irira joriojia quemisantajitsica itsipajiacaca Peerero iponeacagueti Jopequi mana yoajianaque intati, yamenavaqueritarite itigarancajia- queri Aapani Irioshi Ishire ichoocashirentajiaipojaqueri teeca iriojia joriojia.

<sup>46</sup>Iquemajiajavaqueri iquenquetsatantajiana- caroqua otsipapae quenquetsatsarentsi teeca intsajavetempaji aisa ishineventama- jajianacari Aapani Irioshi, icantajigui:

—Yoganejencamajata Irioshimajaca.

<sup>47</sup>Iquenquetsatanaquequea Peerero icanti:

—Imaicaquea imaica ɿarimpate incantimentajiqueru iriviñacajajiaquem- pagueti? Aritarite iquejejiacaji- aatimpajia joriojia ichoocashirentajia- jigueti Ishire Aapani Irioshi.

<sup>48</sup>Arikea yoviñacajatacantimentajia- cari ivajiroqui Jesoquirishito.

Ariquenqueate iriatimpajia icantajiaqueri  
Peerero intintajiaque inchoocataje  
aparopae savincaguiteri.

**Iquemacojitaquerigueti Jerosarequi**  
**iquemisantajiaque teeca iriojia joriojia**

**11** <sup>1</sup>Ariquenqueate irira itigarancanejia  
Jesoshi jerijia irapiguemisanta-  
rite guitenijiatsica Joreaqui iquemaco-  
jiaqueri teeca iriojia joriojia itsavetanti-  
mojianaquerigueti Iguenquetsatsare  
Aapani Irioshi ariquenqueate iquemisantaji-  
aque. <sup>2</sup>Iroompaqueate yoanajigueti  
Peerero Jerosarequi, icat simajenciajavia-  
queri irapijorijiate quemisantajiatsica,  
icantajiguiri:

<sup>3</sup>—¿Quero octaca poashitantajiana-  
carica teeca iriojia joriojia irira quea  
teeca intotsauiquijquero ichonquimashi  
pishecatacojiaquitari?

<sup>4</sup>Ariquenqueate yoguisotoanaqueneri  
Peerero icamantaqueri maasano,  
icantiri:

<sup>5</sup>—Lintsija nontsavantanero. Naatimpa  
nochoocaqueguedi Jopequi namanaqueri  
Aapani Irioshi. Ariquenqueate oquejetimove-  
quena manaca noguimaaca namenava-  
queri quejetaca iniromago quitsaarentsi  
oponeapoja jenoqui inquitequi,  
yoishoijquero ocaramagopaequi.  
Ariquenqueate agujitapojaque naatimpaqui.  
<sup>6</sup>Namenamajatavaqueri namenague-  
queri taaca ipajita tetantacaro. Namena-  
guequeri itehiteitaca canaaguetatsica  
viratsipae aisa tomirishipaequitica.  
Itejiacaro aisa soaancaguetatsica aisa  
araguetatsica. <sup>7</sup>Ariquenqueate iquenquetsaj-  
tanaque, icantajiaque: ‘Peerero, pincatia-  
naque paaguetavaqueri pimetojagueta-  
vaqueri pishecatavaquempari.’ <sup>8</sup>Cotan-  
quitsi naatimpa nocantavetacari:  
‘Nomajirote, aato noshecataritsi,  
teenicate noshecatepariji icantimen-  
tantajitica; tee noshecatepariji  
covaetantaguetatsica.’ <sup>9</sup>Iquenquetsatsiji-

tanaja aisa quenquetsatanquitsica  
inquitequi icanti: ‘Irira queate icantaco-  
queca Aapani Irioshi: “Cameetsa  
inaque”, aatoquea pipinquiritsi, aato  
picanti: “Covaeguishetaca.”’ <sup>10</sup>Otsipata-  
poja iquejetaquena imaica iquenquetsa-  
taca aquena, ariquenqueate opianaja opeana-  
jaqueate jenoqui inquitequi.

<sup>11</sup>Teequeate osamaniteji arejerejeipo-  
jaca tsovironaquiqui nomaantaca 3  
shirampari poneanquitsica Sesareaqui  
itigarancajitaqueca camantenaneca.

<sup>12</sup>Ariquenqueate itigarancaquena Ishire  
Aapani Irioshi icanti: ‘Pija poguijajana-  
queri, aato pitsaroguitsi.’ Ariquenqueate  
noanaque yoguijaguiaquenaqueate  
irira 6 napiguemisantariteni, ariquenqueate  
narejerejeipojacagueta noquijajuijaiopo-  
jaque itsovironaquitequi irira cajema-  
caantaquenaca. <sup>13</sup>Iriatimpa icamanta-  
jia-vaquenaqueate yonigaacarigueti  
irashivantite Aapani Irioshi icatiimota-  
pojacari itsovironaquitequi icantiri:

‘Pintigaranqueja oajiananquitsineca  
Jopequi cajemaquiterineca Shimo  
Peerero. <sup>14</sup>Irioqueate camantajiaquitem-  
pine quero pincojiaquempani aviatimpa  
jerijia maasano pigonorojia cameetsani-  
jite irimeshiajiajempinjite Aapani  
Irioshi.’ <sup>15</sup>Iroompaqueate noquenquetsa-  
taca anaquitätiguiri icoraquepojaque  
Ishire Aapani Irioshi ichoocashirentajia-  
pojiri iquejetaca jiacajigueti aatimpajia  
ichoocashirentajiacajigueti iroquera-  
gueta. <sup>16</sup>Noquenquejapoja jiroqueate  
icanqueca Amajirote: ‘Irirampani  
Joanca iviñacajatantaque oja,  
cotanquitsi inchoocashirentajia poja-  
quempi Ishire Aapani Irioshi quejetaca  
iroviñacajatantajitaquemperi Ishire.’

<sup>17</sup>Icavintsa jiaqueritarite Aapani Irioshi  
iquejetaca jiacaji aatimpajia aquem-  
santajiguirigueti Amajirote Jesoquiri-  
shito. ¿Arimpate noncanqueri Aapani  
Irioshi aatoniji icavintsa jiaqueri?

<sup>18</sup>Iroompaqueate iquemajiaavaquitigui irapiguemisantarijiate ni quemisantajia-naque, ariqueate ishineventajianacari Aapani Irioshi icantajiguir:

—Caavijisano icavintsa janti Aapani Irioshi, irootaque queate icavintsa jantajiacarica aisa teeca iriojia joriojia cameetsanijite incantashitati jiana-quempa, aatonijite imetojajitsi, ogantaga incoguitempani.

#### Quemisantajiatsica Antioquiaqui

<sup>19</sup>Oraqueate imetojajita querigueti Ishitivano ariqueate omapocanaca yatsipetaca jita cari quemisantajiatsica, ariqueate iporocajiana que ivarajajiana yoajiana que Penishiaqui, Tsperequi aisa Antioquiaqui. Iriguenti-queate iquenquetsatimojiana joriojia icamantajia queri quero icota Aapani Irioshi imeshiantigueti. <sup>20</sup>Iconoagaran-tajiaca queate porocajiana quitsica iponeajia ca coramani Tsperequi aisa Shirenequi. Iroompaqueate yarejejia-pocagueti iriatimpajia Antioquiaqui iquenquetsataca jia queriqueate aisa quiriegojia, itsavetanquero Quenquetsa-tsarentsi Oganejencatatsica tsaveta cota-querica Amajirote Jesoshi. <sup>21</sup>Iriguentita-rite agavejaca queri Amajirote quemisantajiacarica oshequini, yovashian-tajanajiro ishineventajia vetaca, irioqueate quemisantajianaj Amajirote.

<sup>22</sup>Ariqueate quemacojia queri quemisantajiatsica guntenijiatsica Jerosarequi itigarancajia queri Verenave ontaniqui Antioquiaqui. <sup>23</sup>Iroompau-queate yarejetapo jocagueti inejajia po-queri icavintsa jia queri Aapani Irioshi, ishinevaetanaca icantajiguir:

—Imaica pincoguitempani pinque-misantamajajia queri Amajirote, pinetsanajia quereroja maasano inintague queca. Aatoqueate povashi-antajiguirotsi.

<sup>24</sup>Irira Verenave caaviji icameetsati ichoocashirentamajata queri Ishire Aapani Irioshi, aisa caaviji quemisantamajatiri, irootaque queate quemisantajiacarica oshequini caquinte.

<sup>25</sup>Ariqueate yoanaque Verenave Tarisoqui icoa queri Saoro, inejapo jiriri cantiri:

—Jame Antioquiaqui.

Ariqueate yoayo aitana que.

<sup>26</sup>Ariqueate ichoocajia pojaque aparo ajagantsi, icapiocapinijiaca itsataca jia queri oshequini quemisantajiatsica. Aritarite oraniqui Antioquiaqui imapocajita queri icantajiqueru quemisantajiatsica “quirishitiano”, ocanti guijata cotrica Quirishito.

<sup>27</sup>Oraqueate choocatirajagueti Verenave aisa Saoro Antioquiaqui icora queja que tsavetanta jatsica iponeponeica Jerosarequi. <sup>28</sup>Chooca aparo icantajitica Agavo. Iriatimpa icatiimojiana cariqueate, ariqueate iquenquejaca queri Ishire Aapani Irioshi icanti irantsipejita quemparo tasetsi ontsitacaguete jana quemparo maasano quepatsi. Ariqueate imajirontagueti Caraorio, onetsanatanaca icanqueca Agavo. <sup>29</sup>Iroompia quenquejajia quequea quemisantajiatsica incapiocajia queri imenta-quipae cameetsaniji impaca antajia queri irapiguemisantari teni guin-teni jatsica Jore aqui. Apaniropae yojocagarantajia que yashintajia-caca. Irira queate ashintamajajian quitsica irioqueate jocamajajian quitsi. Irira queate teeca irashinta-majajiguempaj capichajipae yojocajia que. <sup>30</sup>Ariqueate yojocajia queri Verenave aisa Saoro irajaiana queneri quem pogui jajiguirica irapigue misantari teni Jerosarequitica.

**Erorishi icatsimamajajanaqueri  
quemisantajiatsica**

**12** <sup>1</sup>Ariqueate irira majirontatsica Erorishi<sup>h</sup> imapocanaquero icatsimamajagarantajiaqueri quemisantajia-tsica. <sup>2</sup>Imetojacaanqueri Santiago iriguentijeguite Joanca, iroguenti ijitorejantajitacari cotsiro. <sup>3</sup>Ariquea iriatimpa itsanirotaque ishineventamajajiacari joriojia, yaacaanqueriqueate Peerero aisa. Iro yaacaantantacarica savincaguiteripae ishecatantajitaroca pan teeca onconoguemparoji anempoanta. <sup>4</sup>Yoguijacaantaqueri santanaqui, itigarancajiaque 16 coaretajia amenajiaquerineca. Ijivetaca avisanaquegueti Paashicoa iramacantaqueri icapiocajiacagueti maasano incatsimatimentajiaquerinijite. <sup>5</sup>Ariqueate yoguisantajiaqueri santanaqui, cotanquitsi iriraqueate quemisantajiatsica igantaga yamanajiaqueri Aapani Irioshi yamanacoventajiaqueri Peerero. <sup>6</sup>Apanivani tsiteniri intsitentacotanaje, ariqueate osavincaquitetanaquegueti iramacantaquerimequeate Erorishi. Imaanaque Peerero, niganqui yoajavetacari mavite coreta, ishiticacotantajiavecari mavite cavorejatsari ijempequiqui. Iriraqueate itsipapae coreta iticaajavetaca sotomorontsiqui. <sup>7</sup>Ari imapocapojaca irashivantite Amajirote, otsirencanaca intsompogui santanaqui. Iriraqueate ashivantichagatapojaqueri Peerero imerequiqui, itinajaqueri, icantiri:

—Pintinajanaque taampina.

Ariqueate mana oshorejaguetanaca cavorejatsaripae ishiticantajivetacarica.

<sup>8</sup>Arikea icanqueri ashivant:

—Pinchompimashitacotanajempa, pincaviguitanajempa.

Iroompaqueate yagacagueti, icantsitarequeate aisa ashivant:

—Pampinaicanajemparo pimorenatsite quitsaarentsi, caacate poguijatananquena.

<sup>9</sup>Icatianaca yoguijatanajqueri, cotanquitsi tee intsateji arimajaca yaanajiri irashivantite Aapani Irioshi, mana oquejetimotacari yoguimagueti.

<sup>10</sup>Iroompaqueate isotoanajigueti iriqueti yavisajianaque coaretapae amenajiavecarica isantanatacojiguetica, ariqueate iquejianaqueri choocajianquitsica ontaniqui. Arikea yarejetapojacaro otsipa sotomorontsi yashitantajitacaca cavorejamentari agasotoncacagueti quenavoquirotsiqui ochoocaguetaquegueti tsovironaqipae. Ariqueate mana inchiquiojitsitaqueate ashirejashitanaca. Isotosotoitanaque yoajianaque yagatejiaquerogueti otsipapoqui, ariqueate ipeapitsatjari ashivant. <sup>11</sup>Iriraqueate Peerero isavigarejacotanajigueti icanti:

—Iroosacanicate arimajasacanicate itigarancaquenari Aapani Irioshi irashivantite, yoguisotojaana aatonijite imetojacaantana Erorishi, aisa aatonijite yatsipetacaajanatsi napijorijatiene.

<sup>12</sup>Arikea yamenamajavetanajagueti teequeate inchoocatajeji santanaqui, yoanaji otsovironaquitequi Maria iriniro Joanca pajitatsica aisa Maricoshi. Arikeate ichoocajiaque oraniqui irapiguemisantarijiateni icapiocajiacaya manajijaqueri Aapani Irioshi.

<sup>13</sup>Itinquiapojaqueroqueate ashitacomentonksi, arikea ocoraqueque aajanirentsicantajitica Iore amenaquitiri taaca ipajita. <sup>14</sup>Arikeate oquemapojaqueri iriguenti quenquetsatanquitsi Peerero oshinetanacaqueate, cotanquitsi teequeate ashirejacoteriji, mana

**h 12.1** Iriratica *Erorishi* irio icantajitica Erorishi Aguiripa I, irio ishaine iriquetica Erorishini majirontanquitsica ivoaquegueti Jesoshi (Mt. 2.1).

opianaca intati oshianacaqueate  
ocamantajiaqueri chooca Peerero  
sotsiqui.<sup>15</sup> Iriatimpajia icantajiguiro:

—Mana pishoncacotaca intati.

Cotanquitsi ocanti iroatimpa:

—Arimaja.

Iriatimpajiaqueate icantajiguiro:

—Iroosacanicate, iriocajate irashivante Aapani Irioshi quem poguijirica.

<sup>16</sup> Cotanquitsi iriatimpa arimpaqueate itinquiianaquero ashitacomentonsti.

Iroompaqueate yashirejacojiavecarigueti yamenajiguiri iriguenti Peerero, mana yoajianaque intati.<sup>17</sup> Iriatimpa icantiri vacoc cameetsanjite irimajerejianaque-nijite. Ariqueate icamantajiaqueri quero icotajirini yoguisotojairigueti Aapani Irioshi santanaqui. Aisa icantajiguiri:

—Pincamantajiguéri Santiago,<sup>i</sup> jerijia maasano atsipajiaca apiguemisantarijia-teni.

Ariqueate yoanaque Peerero otsipaqui tsovironaqui.

<sup>18</sup> Iroompaqueate osavincaguitetanajiguerti itinajajiavetanajaguerti coaretajia yamenavetari cajaraguuteni Peerero.

Itsaroajianaque icantavacaajianaqueate:

—¿Querocate yoanaqueni?

<sup>19</sup> Iriraqueate Erorishi itigarancajiaqueri itsipa coaretajia incojaijaquieri, cotanquitsi yamenajiavepojari cajaraguuteni. Ariqueate icoacojiaqueri quem poguijajavetacarica, ariqueate imetojacaantajiaqueri. Ariqueate yojocanajiro Erorishi Jorea, yoanaque Sesareaqui, ariquea iguintenitaja ontaniqui.

#### Imetojaquegueti Erorishi

<sup>20</sup> Irira Erorishi icatsimajiaqueri quintenijiatsica Tiroqui aisa Shironequi,

teequea capichaji incatsimajigueriji, cotanquitsi iriatimpajia iquemavacaajiac airojianaque irogameetsajajateri, iriotarite majirontatsica oponeacagueti isheca. Iriqueti yoguishnejajapojaque iramajirore icantajitica Verashito cameetsanjite irionijite amitacojiaque-rine cantajiaquerineca inintaque irogameetsajajeri.<sup>21</sup> Arikea irira Erorishi icajemacaantajiaqueri querocaca savincaguitteri incoraquejiaque irogameetsantavacaajajempa-queate. Arikea aapojaca incoraquetantaquiaquempaca iquitsaatananacaqueate Erorishi iitsaare iquitsaatapinicaca icapiocajaguerti. Ariqueate icoraquejiaque isavicaque iriatimpa isavicampini-quegueti iquenquetsatapiniquegueti, ariqueate iquenquetsatacaaajiaqueri.

<sup>22</sup> Ariqueate iquemajiaqueri capiocajian-quiatsica icajemajianaquequeate ishineventajianacari icantajiguiri:

—Irinta quenquetsatanquiatsica teenicate irio caquinte, iriguenti irioshitatsica.

<sup>23</sup> Iroompaqueate iquemavaquitigui Erorishi yaventacomajatatiganima jaa tee incantamajateji cameetsa, tee incanteji: “Naroguenti caquinte, choocatarite apaniro Irioshimajaca agavejamajata-tsica.” Iroompaqueate iquejetanaquero-gueti imaica icoraquetapojaque irashivante Amajirote yashinoncaja-caanacari. Arikeate iquenaque yashinoncajanaca iquenitanaque-queate quenitsi, arikea imetojanaque.

<sup>24</sup> Oraqueate Iguenquetsatsare Aapani Irioshi arimpaqueate ovarajacovaetana-canis otsitacaguetejacovaetanaca maasano, itsavetantajitanaquero.

<sup>i</sup> **12.17 Santiago.** Iricatica Santiago, tee irio iriguentejeguite Joanca imetojacaantaqueca Erorishi (otsapa 2), iricatica iriguenti iriguentejeguite Jesoshi (Mt. 13.55; Jn. 7.3-5; Ya. 1.14). Irioquea amenaqueca imaica jivaquerica quemisantajitsica Jerosarequi (Ya. 15.13; 21.18; Ga. 1.19; 2.9). Irio tioncaqueroca paperi icantajitica *Santiago*.

<sup>25</sup>Iriraqueate Verenave jeri Saoro iteroncaquerogueti icoraquetashita- queca Jerosarequi ipijaianaja Antioqui- aqui itsipajianacari Joanca Maricoshi.

**Yoajianaquegueti Verenave aisa Saoro intsavetantajigueri Amajirote Jesoshi**

**13** <sup>1</sup>Irira quemasantajatsica quintenijiatsica Antioquiaqui iconagarantajiaca iriguenti tsavetanta- jigueroa icanquerica Aapani Irioshi, itsipa iriguenti tsatacaantiroca Iguenquetsatsare Aapani Irioshi. Jeri irica: Verenave, Shimeone (icantajitica Quisaari), Iroshio Shirenequitica, Saoro, jeri Manaene (itsipataca majirontatsica Erorishi<sup>j</sup> iquenquevarijiguigueti). <sup>2</sup>Arikeate icapiocajiacar iriatimpajia yovashianquitiro isheca, iriguenti isaviventajiaque itsaroventajigari Amajirote. Arikeate icantajiguiri Ishire Aapani Irioshi:

—Poashitenari Verenave jeri aisa Saoro isaviventenaroniji nocajemimentajiaquerica.

<sup>3</sup>Iroompaqueate yovashianquitirogueti isheca, yamanajiaquerigueri Amajirote, ipamijiaqueriqueate Verenave jeri Saoro icantajavaqueri:

—Pija imaica.

<sup>4</sup>Arikeate itigarancajiaqueri Ishire Aapani Irioshi yoajianaque ontaniqui Sereoshiaqui quentijiaqui. Itehiteitanaca yaacojianaqueri tampija yoajianaque inirovogorequi icantajitica Tspere.

<sup>5</sup>Iroompaqueate yarejerejeipojacagueti yagatacojiapojaque quinteninintsiqui icantajitica Saramina, yoajianaque shinagogapaequi icapiocantapinijiaca- joriopae itsavetantajianaqueri

Iguenquetsatsare Aapani Irioshi. Itsipatanacariequeate aisa Joanca<sup>k</sup> yamitacojiaqueri. <sup>6</sup>Arikeate itsavetanta- tajianaqueri itsitacaguetejajianacaro quinteninintsiiae ontaniqui Tsiperequi, iroomba yarejejiaca Paposhiqui. Arikeate inejajiaopojaqueri amataatsica aventaroca iragavejane ampatsini, icantamampeaca: “Jero icanquenaca Aapani Irioshi.” Iriatimpa iriguenti jorio icantajitica Varejesoshi, ipajijitajiri aisa Erimashi. <sup>7</sup>Iriguenti itsipataca majiron- tatsica Sergio Pavoro, caavii itsamajati. Irira Sergio Pavoro ininquietarite inquemisanquero Iguenquetsatsare Aapani Irioshi icajemacaantantajiacarica Verenave, Saoro cameetsanjite intsatacaajaqueri. <sup>8</sup>Cotanquitsi Erimashi, irira aventaroca iragavejane ampatsini (rootaquetari oncanque ivajiro oguipitsoquerogueti), iticaticata- covetavacariqueate yaacanatantajaveta- vacarica aatonijite iquemasantajiguiritsi majirontatsica. <sup>9</sup>Iriraqueate Saoro (pajitatsica aisa Paavoro) ichooccashirentamajatanaqueri Ishire Aapani Irioshi, ariquea yamenanaqueri intati sorere, <sup>10</sup>icantiriqueate:

—Aviguenti amatavijantattsica guijatacoti- rica ampatsini pantaguishetantacaroca covaeguisherentsi, manaquea pimaninta- quero maasano iroomajatatsica. Ogantaga pogaaqueri itsatacaantaqueca Amajirote. ¿Aatompá povashiantiro pantanaqueca?

<sup>11</sup>Imaicaqueate incatsimatimenquemperi Aapani Irioshi, pishamponcatajanaque- queate. Osamanitanaque aatoqueate pamenaajitsi, ompitsequimotaquitempiqueate.

Arikeate taampinaqueate opitsecacota- naqueri, teequeate iramenajeji.

**j 13.1** Iriratica *Erorishi* irio icantajitica Erorishi Antipashi; pamenero tioncanquitsica isavivanaqui otsapaqui Irc. 3.1. **k 13.5** *Joanca*. Irioquea icantajitica Joanca Maricoshi, mavitetatsica ivajiro. (Pamenero 12.12, 25; 13.13; 15.37-38.) Iriguenti ijitane Verenave (Cor. 4.10).

Ipamipamiguitetanaquequeate intati, ininquequeate quericampa acatsatanajerineca.<sup>12</sup> Arikeate yamenavaquerigueti Sergio Pavoro iquemisanqueri Quirishito, manaquea yoanaque intati iquemaquegueti itsatacantajiaqueca itsavetanquerigueti Amajirote.

**Yoajianaquegueti Paavoro aisa Verenave Antioquiaqui choocatantacaroca Pishiria**

<sup>13</sup> Iriraquea Paavoro aisa itsipajiacaca itejianaca Paposhiqui, iquenajatacojianaque yoajianaque Perejequi choocatasica Pampiriaqui. Irirampani Joanca ipiapitsatanajari yoanaji Jerosarequi.

<sup>14</sup> Iriatimpajia yarejetapojacagueti Perejequi, yavisanaque aisa yoajianaque ontaniqui otsipaqui Antioquiaqui, ora Pishiriaquitica. Arikeate aapojacagueti saavaro imagorejantajitaca iquijaquijitanaque shinagogaqui icapiocantajiacajoriojia, isavicajipojaquequeate.

<sup>15</sup> Arikeate iteroncjitaquerogueti yapatsajavantajitaquerogueti itioncactanaqueca Moishishimi aisa itioncacojianaqueca tsavetantajigurica Aapani Irioshi, iriraqueate jivajanquitsica shinagogaqui icapiocantapinijiacaca icamantacaantajiaqueri Paavoro jeri Verenave icampojaqueri:

—Napijoriojateni, choocagueta pinitajiaqueca pincamantajiaquena cameetsanijite pintampishitacaimentajiquenanijite, iintsija pincamantajiguena.

<sup>16</sup> Icatianacaqueate Paavoro icanqueri vacoc cameetsanijite irimajerejianaque, icantajiguiri: “Pinquemisantajiaque-naja shiramparrijia ishiraerijia, aisa maasano itsipajia pincatsajiguirica Aapani Irioshi.<sup>17</sup> Coramani Irioshte ishiraerijia icoguijiaqueriquea avaesatiniteni, yoshequiamajatanaqueri iguinentijiavetacagueti Ejepitoqui. Iroompayonigaajiaqueri itampishica, yaajiana-

jiri.<sup>18</sup> Yatsiperejacojiacarieate Aapani Irioshi ovegarataca 40 ajagantsi ichoochajiaquegueti oquitamampororoi-pojaquegueti.<sup>19</sup> Arikeate yamitacojiaqueri yagavejacaajiaqueri iteroncjajiaqueri oshequini guintenijiatsica Canaanequi, yaapitsajiaqueri iguepatsite, irioqueate yojocajiajini avaesatinijiateni. Iriraqueate caquinteguetsica teroncavianquitsica ovegarajica iguenquetsatsarepae 7.<sup>20</sup> Arikea ocaratapojaque 450 ajagantsini maasano ocatica.

“Iroompa icanque Aapani Irioshi inchoocataque joese comajamajajiaquerineca. Arikea imetojavetaca, cotanquitsi choocaqueate piaguetajarica irosati aapojacagueti ichoochajiaquegueti Samoirini irira tsavetantirinica Aapani Irioshi. Irrioqueate carapojaqueroca.

<sup>21</sup> Iroompa iriatimpajia icantajiaqueri Aapani Irioshi inintajiaque inchoocataque imajirojiate. Arikea Aapani Irioshi iquemisantajiaqueri ipeacaantacarica imajirote Saoroni irijaniteni Quishini ichoviquini Vejamineni. Arikea imajirontaca 40 ajagantsi.

<sup>22</sup> Iroompa Aapani Irioshi yovashiantajiri Saoroni, irioqueate ipeacaaja imajirojiate Taavini irijaniteni Isaini.

Arikeate icamantacoqueri icanti: ‘Namenaqueriquea Taavi irijanite Isai, noshineventamajatacari, irantagueque-roquea iriguenti maasano noninqueca.’

<sup>23</sup> Imaica inetsanataquero Aapani Irioshi icanqueca coramani, itigarancaqueriquea acaniqui Ishiraeriqui irira Aantavanquitsica ichoviquiqueca Taavini, irioquea Jesoshi.<sup>24</sup> Tequeraguetai incoraquete Jesoshi intsavetante, iriqueti parianacaro Joanca itsavetantaque icantajianaqueri maasano ishiraerijia incantashitatijaianaquempa irovashiantajianaqueroyantajigirogueti teeca oncameetsateji iriviñacajata-

caantajianaquempa.<sup>25</sup> Arikeate pajañigueti interonquero Joanca yantaqueca icantanaque: ‘¿Taa pijiquenaji? Tee naroguenti, irioquea impoitanpojenaneca. Iriatimpa caaviji yanaaquina, aatotarite noquempejitaritsiquea iriatimpa nompeaqueempame amiquerineca noishorejacoquerime igaviguitire.’

<sup>26</sup>“Imaica nonintaque noncamantajia- quempiqueate aviatimpajia nogonorojia ichoviquijianaqueca Averaameni, aisa aviatimpajia teeca pijorijoigueji pincatsajiguirica Aapani Irioshi, aroguenti itigarancacajiro ocatica Quenquetsatsarentsi iraantavajajica.

<sup>27</sup>Maasano quintenijiatsica Jerosarequi, aisa imajirojate teenicate intsajiguencate iroguenti icoraquetashitaque Jesoshi irimeshiajajaji, teenicate inquemeroji itioncacotaqueca tsavetantirinica Aapani Irioshi yapatsajavantapinijavetacarogueti savincaguiteri imagorejantajitaca. Cotanquitsiqueate imetojacaantajiaquerigueti onetsanatanaaca itioncacojiquerogueti.<sup>28</sup> Teequeate onchoocavetempaji onquenantapoempaca irimetojimentantajitaquemparica, cotanquitsiqueate arimpaqueate icantajianaqueri Pirato: ‘Pimetojacaanterishinete.’<sup>29</sup> Iroompia inetsanajiaquerogueti maasano itioncacojitaquerica, imetojaqueguedi arikeate yoguijita-cojiqueri coroshiqui, yoguijaajitaquitiri omoroqui.<sup>30</sup> Imetojamajavetaca, cotanquitsi Aapani Irioshi ivochantajiri.

<sup>31</sup> Arikeate ovegaratanaca oshequi savincaguiteri yonigaaguetajari oguijajianaquerica iponeacagueti Garireaquiyoañaqueguedi Jerosarequi. Iriojiatarite imaica tsavetantajajirica icamantajiaqueri caquinte.

<sup>32</sup>“Imaica nocamantajiaquempiro aviatimpajia oguishinejantatsica: oratica icantajiaquerica Aapani Irioshi avaesati-

nijiate,<sup>33</sup> inetsanacajiroquea aatimpajia ichoviquijianaqueca, yovochantajiritate Jesoshi. Iriotaque itioncacojique Saremoqui 2 icanqueguedi Aapani Irioshi:

‘Aviatimpa aviguenti Irijani, ocatica savincaguiteri aviro nashimajaca nirjanite.’

<sup>34</sup>Icanqueterite Aapani Irioshi coramani irovochantajeri Jesoshi aatonijite avejancatsi itsino. Aritarite ocanque itioncacojiqueca ocanti:

‘Aviatimpajia nonetsanaquempiro maasano nocanquerica Taavini.’

<sup>35</sup>Aisa itioncacojiquero otsipaqui [Saremo] ocanti:

‘Aato pishinetiro avejanquempa itsino Pigomajamajare.’

<sup>36</sup>Iriraqueate Taavini yamitacojiaqueri igonorojia coramani, yagaqueneri maasano inintacaquerica Aapani Irioshi, cotanquitsi coajica imetojanaqueguedi iquitajitatiguiri itsipajijaari avaesatinijiate, arikea yavejancanacaqueate.<sup>37</sup> Cotanquitsiqueate iriraticaquea ivochantajica Aapani Irioshi teequeate iravejanquimtempaji.<sup>38</sup> Irootaquequea, nogonorojia, nonintantacaca pintsamajajiaque iriraquea Jesoshi, iriguenti agavejatsi irishejajajiro aguempevarejia, irootaque notsavetantimojia-quempi.<sup>39</sup> Ora itioncacotaqueca Moishishini teenicate agavejeji ogameetsajajjeri iriraqueate oguijata-cojiaqueroca, teequeate omeshiajigueriji. Cotanquitsi irira aventajigarica Jesoshi irimeshiajajeri irogameetsantajajjeri.<sup>40</sup> Shoshoh, inchiquoitaja piquejigartsi irirajia icantacojiqueca Aapani Irioshi itioncacaqueriguedi tsavetantajiguirica icanti:

<sup>41</sup> ‘Pamenajigue aviatimpajia shirontimentantatsica,

mana poajianaque intati, pimpeajia-  
quempaquea maasano,  
irooriji choocatirajampigueti  
nantaquequea oacaantantatsica  
intati,  
cotanquitsiquea oratica nantaqueca  
aato piquemisantajiguiro  
inchoocajiaquequempagueti camanta-  
jiaquequempineca.”

<sup>42</sup>Iroompaqueate isotosotoitanajigueti shinagogaqui, irirajia quemisantajiaque-  
rica icantajiaquera:

—Pimpiaeja pinquenquetsatacaya-  
jena aapojajempagueti otsipa saavar-  
imaginejantajitaca, pinquenquetsatac-  
tajero ocatica.

<sup>43</sup>Iroompaqueate icatiajianaja  
Paavoro jeri Verenave yoguijajaita-  
naqueri oshequini joriojia, jerijia teeca  
iriojia joriojia guijatacojiguiroca itionca-  
cotanaqueca Moishishini. Ariquea  
icantajiaqueri ogantagaja inquemisanta-  
majajiaqueri Jesoshi.

<sup>44</sup>Arikeate aapojajagueta saavar-  
imaginejantajitaca icapiocajianaja-  
queate oshequini caquinte, icoraqueta-  
shijiaqueri Paavoro jeri Verenave  
iquemisantajiaqueri itsavetantajiaquer-  
gueti Iguenquetsatsare Amajirote. Tee  
iroshequigueji irira teeca incoraqueje-  
gueji. <sup>45</sup>Cotanquitsi irira joriojia  
iroompaqueate yamenajiavaquerigueti  
icapiocaventajianacari ocanquitiri shirec  
icatsimajianaquequeate. Arikeate  
inijashijianacari Paavoro icantajiguir  
maasano:

—Aatoqueate piquemisantajiguirts,  
mana yamatavijajiaquempi intati.

<sup>46</sup>Irira Paavoro jeri Verenave tee  
intsaraojigueji arimpaqueate iquenque-  
tsajianaque icantajiguir:

—Avquietitarite nocoraquetashijiave-  
taca iroqueragueta nontsatacaya-  
quempirome Iguenquetsatsare Aapani  
Irioshi, avgumentitarite joriojia,

cotanquitsi teequeate pishineventajiaava-  
quemparojo, teecampa pinintajigueji  
pincoguitempani panijajiaje. Imaica-  
queate iriguenti noashijianaje nontsata-  
caajiaqueri teeca iriojia joriojia.

<sup>47</sup>Irootarite icantajiaquenaca Nomaji-  
rote, icanti:

‘Nopeacaquempi tsivotacojiguirica  
caquinteguetatsica,  
cameetsanijite pintsatacayaqueri  
quero nocotaca nomeshianti-  
gueti,  
pintsitacaguetejanaquemparo  
maasano quepatsi ovellarague-  
tupojacagueti.’

<sup>48</sup>Iroompaqueate iquemajiaquiti-  
guiri teeca iriojia joriojia ishinejianaca  
icantajianaque:

—Oganejencamajata Iguenquetsatsare  
Amajirote.

Arikeate iquemisantajiaque maasano  
intintacajiaqueca Aapani Irioshi  
coramani incoguitempani inconoajia-  
quempari jenoqui inquitequi. <sup>49</sup>Arimpa-  
queate ovarajacotanacari Quenquetsa-  
tsarentsi tsavetantaquerica Amajirote  
iquemajiaquero maasano guintenijia-  
tsica oraniqui. <sup>50</sup>Cotanquitsiqueate  
irirajia joriojia iquenquetsatacayaque-  
riqueate imajirojiate Antioquiaquitica  
jerojia manquigarentsijia anaantagueta-  
tsica ora caavijica oquemisantamajajia-  
vetari Aapani Irioshi, inijashijiacari  
Paavoro aisa Verenave. Arikea  
iroompaqueate iquemajiaquigtigui  
iriatimpajia icatsimajiaqueri Paavoro  
aisa Verenave itigarancajajiri aatoniji  
ichoocataji iguinteniqui. <sup>51</sup>Iriatimpajia  
ipanerejamajajianajiroqueate quepatsi-  
vane yagaticacojiaquerica cameetsan-  
ijite iroonijite iramenantajiaquempari-  
gueti intsajiaqueri aato ipiajatsi, teenica  
irinintajigueji inquemisante. Aritaque-  
queate yoajianaque Iconioqui. <sup>52</sup>Cotan-  
quitsi iriraqueate quemisantajiasica

Antioquiaquitica ishinejianacaqueate, ichoocashirentamajajanaqueri Ishire Aapani Irioshi.

**Paavoro jeri Verenave ichoocajiaque  
Iconioqui**

**14** <sup>1</sup>Ariqueate yarejejiapojacá Iconioqui iquijajiaipojaque- queate shinagogaqui icapiocantajiacá joriojia iquenquetsajiaque. Iquemisanta- garantajiaque oshequini joriojia jerijia aisa teeca iriojia joriojia. <sup>2</sup>Cotanquitsi irira joriojia teeca irinintajigueji inquemisantajigueji iquenquetsatacaaji- aqueri teeca iriojia joriojia yagavejajia- naqueri, irootaquequeate itsititantajia- nacaca icatsimajianaqueri quemisantajia- tsica. <sup>3</sup>Cotanquitsiqueate Paavoro, Verenave teequeate intsaroajigueji arimpaqueate itsavetantajianaqueri Amajirote. Osamani ichoocajianaqueni itsatacantajianaque. Iriguentitarite agavejacaquaqueri Aapani Irioshi yantatiajaca teeca irinejajiteji cameetsan- jite iramenimentajiaquerinijite iriguenti tigarancaquaqueri Aapani Irioshi. <sup>4</sup>Cotan- quitsi iriraqueate guinentijisica Iconioqui teequeate inquemavacaajiana- jempají. Iconoagarantajiacaqueate iriguentijia ishineventajiacá joriojia. Choocaquea aisa shineventajiacarica itigarancanejia Jesoshi. <sup>5</sup>Ariqueate irira joriojia jerijia teeca irijorijoigueji iquemavacaajiacá itsipajiacari imajiro- jiate icantajiguiri:

—Jameshiatsi ancatsimajiguéri antsincacajiguéri.

<sup>6</sup>Iroompaqueate iquemacojiaqueri- gueti ishiashiaitanaca yoajianaque Irishitiraqui aisa Terevequi choocague-

tatsica Iricaoniaqui, jero aisa ovegar- guetapojacagueta Iricaonia, <sup>7</sup>itsavetanta- jianaqueri Quenquetsarentsi Oganejencatatsica. <sup>8</sup>Ontaniquiqueate Irishitiraqui inejajiaipojaqueri savicaque irira magoviroshiri ogantaga ivoacoquero iroqueragueta imagoviro- shica. <sup>9</sup>Iriatimpa iquemisantamajatava- queri Paavoro iquenquetsataquegueta. Iroompaqueate yamenamajatanaqueri Paavoro yamenamajatanaqueri itsatantacarica arimaja itsataque iragavejaque Aapani Irioshi irogueshita- jeri. <sup>10</sup>Icajemacotsitariqueate:

—iPincatiamajatanajeja!  
Icatianacaqueate catic yanijitanaji.

<sup>11</sup>Irirajiaqueate capiocajianquitsica yamenajiavaquerigueti yogatiajiri Paavoro icantajianaque inirojencani iguenquetsatsarejiaqui Iricaoniaquitica icantajigui:

—Yaguijijiapojaque irioshijia, caquin- tejiapojaque.

<sup>12</sup>Irira Verenave icantajiaque iriguenti Seoshi,<sup>1</sup> iriraquea Paavoro icantajiaque iriguenti Eremeshi, iriguentitarite quenquetsamajatantajica.

<sup>13</sup>Oraqueate teemporo itsaroventantajia- tarica Seoshi ochoocaque ovegaragueta- pojacagueta otantotacagueta Irishitira. Iriraqueate saserorote quempoguijiroca teemporo yamacantajiaquequeate caapironcaripae icononatacaaguecarí ochotentegapae itsipajiaipojacari oshequini caquinte. Inintajiatetaca irijitorejajiaquenerime caapironca- ripae, irojocaqueenerime Verenave jeri Paavoro. <sup>14</sup>Cotanquitsiquea iquemajia- vaquegueta Verenave jeri Paavoro itigarancanejia Jesoshi, iperejacojianaca

**114.12 Seoshi** (Zeus) aisa **Eremeshi** (Hermes) iriguenti ivajiropea irioshivijirentsipae itsaroventajiacaca guiriegojia. Irira Iromaquitica ipajitaqueri Seoshi **Júpiter**, ipajitaqueri Eremeshi **Mercurio**. Icantajiaque irira Seoshi iriguenti irioshi anaantamajatatsica, irira Eremeshi icantajiaque iriguenti itigarancane irioshipae, itsavetacotaqueri icantajiaquerica.

iitsaare iramenimentajiaquerinijite teequeate irinintajigueji intsaroventajia-quempari, teequeate irinintajigueji irijijiaqueri iriguenti irioshi. Ishiashijianacariqueate icapiocajiacagueti icajemajianaque icantajigui:

<sup>15</sup>—Aato piquejejiguiro imaica. Aato pitsaroventajigana. Naatimpajia ariqueate noquejejiaquempi aviatimpajia, caquintetarite nonajiaque. Iroguenti nocoraquetashijiaque noncamantajiguempi povashiantajiana-jeronijite pishineventashijiacaca intati, irionijite pinquemisantajiae Irioshima-jaca peacaaguetacaroca inquite, quepatsi, quentija aisa maasano choocatantaguecaroca. <sup>16</sup>Coramani Aapani Irioshi yovashiantajiavecari maasano caquinteguetatsica manaqueate ichoocatashijiaquea intati yantajavetaca taaca opajitapae inintajiaqueca.

<sup>17</sup>Cotanquitsiqueate teequeate impeaco-majajiguempariji irosati imaica teequea impeacojiaji aatimpajia, ogantagaqueate icavintsajajaji cameetsanjite antsajia-quinijite chooca iriatimpa. Itejajiro incani aisa yoguimoncaguetajiro panquiresipae ochoocatantajaca ashecajiaci ashinetantajiacaca. Iriguentiqueate pintsaroventajiguempa.

<sup>18</sup>Iquejejiavecariqueate imaica teequeate inquemajigueji, querocam-pate incojiaquerini, arimpaqueate inintajavetanacaqueate irijitorejajia-quenerime caapironcaari, irocojiaque-nerime. <sup>19</sup>Arikeate yarejerejeipojaca joriojia Antioquiaquitica jerijia Iconioquitica iquenquetsatacaaipi-jaqueri maasano icantajiaqueri incatsimajiaqueri, irootaquequeate yaantajianca-rica Paavoro ipishoncashijiaqueri mapi taan, taan, itsinatsinajiaqueri. Arikeate ijijiaqueri metojamajatanaque inoshicajianaqueri yaajianaqueri ipishoncajiaquitiri ovegaraguetapojaca-

gueti tsovironaquipae. <sup>20</sup>Cotanquitsi ariqueate icapiocaventajiaipojacari irapiguemisantariteni itinajanaja icatianaca yoanaji Irishitiraqui. Osavin-caguitetanajigueti itsipatanajari Verenave yoajianaque Terevequi <sup>21</sup>itsavetantajianaquero Quenquetsatsa-rentsni Oganejencatatsica. Iquemisantajia-que oshequini. Arikeate iteroncabajia-jirogueti ipiapiaitanaja Irishitiraqui, Iconioqui aisa Antioquiaqui. <sup>22</sup>Itampi-shitacajaijanajiri maasano quemisantajia-tsica icantajianajiri:

—Pincoguitempani pinquemisantama-jajianaque, aato povashiantajiguirotsi piquemisantajiaqueca. Aritarite antsipe-jiaquempsa oshequi anquijantanaquem-paca imajirontagueti Aapani Irioshi.

<sup>23</sup>Arikeate yaagarantajiaqueri cameetsanjite inquempogujajajeri quemisantajiaatsica capiocapinijiatsica. Yamanajiaqueri Aapani Irioshi, yoguipa-quijajiaquitiro isheca teequeate irisheca-jiguempaj, arikeate icantajianajiri:

—Inquempogujajajempi Aapani Irioshi piquemisantajiaqueca.

<sup>24</sup>Arikeate yoajianaque Paavoro jeri Verenave iquenajianaquequeate Pishiriaqui yarejerejeivaetaca Pampiri-aqui. <sup>25</sup>Itsavetantajianaquero Iguenque-tsatsare Aapani Irioshi Perejequi, arikea yoajianaque Atariaqui.

<sup>26</sup>Arikea itejianaja yoacojianaji Antioquiaqui. Arikeate oraniqui itigarancajitaqueri iroqueragueti, icantajitiri Aapani Irioshi: “Jeri irica pincavintsajajiaqueri irinetsanajiaquem-pirogueti taaca opajitapae pinintacaajia-querica.” Arikeate inetsanajiaquero.

<sup>27</sup>Imaica yarejetapojajagueti icajemajia-queriqueate maasano quemisantajiaatsica icamantajiaipojaqueriqueate maasano yagavejacaajeria Aapani Irioshi aisa icamantajiaqueri icavintsajajiaqueri-gueti Aapani Irioshi teeca iriojia joriojia

cameetsanijite inquemisantimentajia-  
quenijite iriatimpajia.<sup>28</sup> Ariqueate  
osamani ichoocajiaque ontaniqui  
itsipajiacari irapiguemisantarijijateni.

**Icapiocajiacaca Jerosarequi  
iokenquetsatacojiaquerou  
itioncacotanaqueca Moishishini**

**15** <sup>1</sup>Choocatirajagueti Paavoro aisa  
Verenave Antioquiaqui  
icoraquejiaque joriojia poneponeitan-  
quitsica Joreaqui itsatacaajiaqueri  
quemisantajijatsica icantajiguiri:

—Pinetsanajiaquerou itioncacotana-  
queca Moishishini, pintotsaiquitacaanta-  
jiguero pichonquimashi. Aatogueti  
pitotsaiquijiguero aato imeshiguimpitsi  
Aapani Irioshi.

<sup>2</sup>3Cotanquitsi iriraqueate Paavoro  
aisa Verenave icantimentajavaqueri.  
Arimpaqueate ipigatsatavacaajianaca  
teenicate inquemavacaajiguempaji.  
Irootaqueate itigarancantajiacarica  
Paavoro aisa Verenave, jerijia itsipa  
quemisantajijatsica icantajiaqueri:

—Poajianaque Jerosarequi pincoacoji-  
aquiteri querocaca incantajigue  
itigarancanejia Jesoshi jerijia quempo-  
gуйajigurica quemisantajijatsica.

Itigarancajiaqueri, ariqueate  
yoajianaque iquenaquenaitanaque  
Penishiaqui aisa Samariaqui icamanta-  
guetapojaqueri:

—Imaica iquemisantajiaque oshequi  
teeca iriojia joriojia.

Iroompaqueate iquemacojiavaqueri-  
gueti maasano quemisantajijatsica  
ishinejianacaqueate.

<sup>4</sup>Ariqueate yarejerejeipojacagueti  
Jerosarequi yamenajiaavaquerigueti  
quemisantajijatsica ishinejianacaqueate.  
Aritarite ichoocajiaque itigarancanejia  
Jesoshi jerijia quempogujajigurica  
quemisantajijatsica. Icamantajiapo-  
queri maasano yantaguetaqueca Aapani

Irioshi yamitacojiaquerigueti itsavetan-  
tajiaquerigueti.

<sup>5</sup>Cotanquitsi ariqueate iconoajiacari  
pariseoja quemisantajiaquerica  
Quirishito icatintiitanacaqueate icantaji-  
guiri:

—Intotsaiquitacaantajiaqueroqueate  
ichonquimashija quemisantajijatsica  
teeca iriojia joriojia, aisa irinetsanajia-  
querou maasano itioncacotanaqueca  
Moishishini.

<sup>6</sup>Ariqueate icapiocajiacaca itigaranca-  
nejia Jesoshi jerijia quempogujajigu-  
rica quemisantajijatsica inquenquetsata-  
vacaajiaquempa inquemavacaajia-  
quempa.<sup>7</sup>Osamaniqueate isavicaventaji-  
aquerou iquenquetsatavacaajiacaca.

Ariqueate icatianaca Peerero icanti:

—Napiguemisantarijijateni, aviatim-  
pajia pitsajiaquetarite icoguiaquena  
Aapani Irioshi coramani, pinejacoja-  
quenatarite. Arikeate itigarancaquena  
nontsavetanquero Quenquetsatsarentsi  
Oganejencatatsica, nonquenquetsataca-  
jiaqueriqueate teeca iriojia joriojia  
cameetsanijite inquemajiaavaquerogueti  
inquemisantajiaqueri Jesoquirishito.

<sup>8</sup>Arikeate irira Aapani Irioshi  
amenashirentajigurica maasano  
caquinte itigarancajiaqueneri Ishire  
teeca iriojia joriojia iquejetacaajiacaji  
aatimpajia cameetsanijite antsamajajia-  
quenijite ishineventajiacari iriatimpajia  
aisa.<sup>9</sup>Ipintsaiciari iquejetacaajiacaji  
aatimpajia, iquemisantajiaqueritarite  
arieate imeshiajiaqueri ipeacotsisia-  
jari iguempavaejia.<sup>10</sup>Imaica  
¿arimpate pamenantempari Aapani  
Irioshi? ¿Arimpate pijiqueji teeji  
intsateji? Picantavetacaritarite teeca  
iriojia joriojia aatogueti inetsanajiguero  
itioncacotanaqueca Moishishini aato  
imeshiajiguiri Aapani Irioshi. Aroguenti  
jorio amejavetaro, cotanquitsi tee  
agavejajigujeji anetsanamajajiaquerou,

aisa maasano avaesatinijiate tee iragavejajigueroji. ¿Quero incojia- quempa itsipapae caquinte irinetsana- tantajiaquemparoca? <sup>11</sup>Cotanquitsi imaica atsajiaque mana icavintsa- jajia- caji intati Amajirote Jesoshi yaantajia- vajica aatoniji apegia. Ari iquejejiaqueri iriatimpajia aisa teeca irijorijoigueji, mana icavintsa- jajiaqueri intati.

<sup>12</sup>Iroompaqueate yagatanaquitigui Peerero, imajerejianaque maasano iquemisantajia- queca Verenave jeri Paavoro itsavetantajiaqueroqueate maasano yantajiaquea yagavejaca- jia- querigueti Aapani Irioshi iquenquetsata- caajiaquitirigueti teeca iriojia joriojia, yantajiaque oacaantantatsica intati itsatimentajiguenijite iriatimpajia irio tigarancaqueri Aapani Irioshi.

<sup>13</sup>Arikeate iteroncajianaquerogueti itsavetantajiaqueca, irio quenquetsata- nanquitsi Santiago, icanti:

—Pinquemisantajia- queca aviatim- pajia napiguemisantarijateni. <sup>14</sup>Imaica icamantajiacaji Shimo<sup>m</sup> quero ocotacani iroqueraque- geti imapocaquerogueti Aapani Irioshi icavintsa- jajiaqueri itsipapae caquinte teeca irijorijoigueji, manatarite inintaca- queca inquemisantajiaqueri iriatimpajia aisa. <sup>15</sup>Tampatica oanaquero itioncajiaqueca tsavetantajiguero- icanquerica Aapani Irioshi ocanti:

<sup>16</sup>‘Oncoramanitapoja- jegueti noncora- quetaje,  
nogatiajero iitsaarevanconi Taavini<sup>n</sup>  
soveanquitsica,  
novetsicajero pomatsavetatsica,  
nonetsanatajero.  
<sup>17</sup> Arikeate nonquejetaquero imaica  
cameetsanijite itsipapae caquin-

teguetatsica incoaguetaqueri Majirontamajatatsica,  
irirajia teeca irijorijoigueji nocanta- cojiaqueca nashintajiacari.’

<sup>18</sup> Aritarite iquejetaquero imaica iquenquetsataquegueti Amajirote, itsavetanquerogueti coramani.

<sup>19</sup>“Irootaque noncantantajiaquempica aato asereajuiritsi teeca iriojia joriojia quemisantajia- queca, aato acantajiguiri irinetsanajia- queca Moishishini. <sup>20</sup>Iroguentiqueate antioncajiaqueneri ancantajiaqueri: aatoja ishecatimajijaaritsi yojocajiveta- narica ipeashijiaca caquinte irioshiviji- tashitaca intati; aatoqueate ijatashijiaji- rotsi manquigarentsi teeca iro irashi, aisa manquigarentsi, aato ojatashijiaji- ritsi teeca irio ashi; aatoja ishecatimajijaaritsi icaticajiguetica aisa aatoja ishecatocojijaaritsi irirajapae isheca- jigueta- ca. <sup>21</sup>Aritarite ocanque itioncaco- tanaqueca Moishishini icantimenqueri- queate oca aritarite yapatsajavantapini- jiguero coramani shinagogaqui savinca- guiteriqui imagorejantajitaca arejvae- tanaca imaica.”

<sup>22</sup>Iroompaqueate iquemajia- queca itigarancaneja Jesoshi, aisa maasano quemisantajia- queca jerijia quempogujia- jigurica, icantajiguiri:

—Iintsi- ja antigarancajiaque mavite iroguijajianaqueri Paavoro aisa Verenave iroajianaque Antioquiaqui.

Iriguenti itigarancajiaque Jorashi icantajitiriquea aisa Varesava, jeri Tsirashi. Iriatimpajia iriguentijia quemisantajia- queca anaantajia- queca.

<sup>23</sup>Itioncajiaqueneriqueate paperiqui

**m 15.14** *Shimo*. Iriotaque Shimo Peerero. (Pamenero otsapa 7.) Iroquetinica paperi itioncaqueca guiriegotsaqui ocanti “Simeón”, iroguenti ivajiro iguenquetsatsarequi evereo.  
**n 15.16** Icanquegueti nogatiajero iitsaarevanconi Taavini, icantacotaqueri inchoviquitanaqueca majirontanquitsineca quejetajemparineca Taavini imajirontagueti.

yojocajiaqueneri irajaianaqueneri, icantajiaqueri:

Imaica napiguemisantarijijateni, nontioncajiaquempi paperi aviatimpajia teeca pijorijoigueji gunteniji-atsica oraniqui Antioquiaqui, Shiriaqui aisa Shirishiaqui. Naatimpajia ocaniqui novegarajiacá itigarancaneja Jesoshi, itsipapae quempoguijajiguirica quemisantaj-atsica aisa maasano quemisantajiguirica Jesoshi.<sup>24</sup> Imaica nontioncajiaquempi aviatimpajia noquemaco-jiaquempitarite yoajianaquegueti guntenijiatsica acaniqui yasereajia-quempi icantashitatijaianacaro notsatacajiaquempica. Icantajia-quempi poguijajajeroja itioncacota-naqueca Moishishini pintotsaiquita-caantajiaquero pichonquimashi, picantantajiacaca: “¿Querocampa noncojiaquempani cameetsanjite nontsajiaque queri nonquemisanta-jiaqueca?” Cotanquitsi teequeate naatimpa nontigarancajigueriji, inchiquiotsitarite yoashijianaca iriatimpajia.<sup>25</sup> Arikea noquemava-aaajiaca nontigarancajiaqueri nocoguijajiaqueca iroajianaque irinejajiaquitempi, iriguenti irogui-jaguijaitanaque Verenave aisa Paavoro nopintsajiacaca.<sup>26</sup> Iriatimpajia tee intsaroacaguemparoji irimetojaquegueti itsavetanqueri-gueti Amajirote Jesoquirishito.<sup>27</sup> Iroguenti notigaranquimentajia-queri Jorashi aisa Tsirashi incaman-tamajajiaquempiqueate maasano oca notioncajiaquempica.<sup>28</sup> Iroguenti noncantajiaquempi inintaguequeca Ishire Aapani

Irioshi, ariqueate nocantajiaque naatimpajia aisa: “Cameetsavaeque, iiintsja ancamantajiaqueri.” Imaica jeroqueate pinetsanajigueca:<sup>29</sup> aatoja pishecajijaaritsi yojocaj-guevecanarica ipeashijiaca caquinte irioshivijitashitaca intati; aatoja pishecajijaaritsi irirajapae ishecajigueta; aatoja pishecajijaaritsi icaticajigueta; aatoja pijatashijia-jirotsi manquigarentsi teeca iro pashi; pinquejetaquempa aisa aviatimpajia manquigarentsija, aatoja pijatashijiajiritsi shirampari teeca irio pashi. Pinetsanajiaquerou-gueti oca pincomajamajajiaquempa. Imaica ariotapojaque.

<sup>30</sup> Iriraqueate itigarancajiaqueca yoajianaquequeate Antioquiaqui icapiocajapojaca maasano yojocajapoaqueneri paperi. <sup>31</sup> Iroompaqueate yapatsajavantajiaquerogueti ishinevajiacaca. <sup>32</sup> Iriraqueate Jorashi aisa Tsirashi iriguentijitarite tsavetantajatsica, iquenquetsajiaque itampishitacajiaqueri yoguishinejaji-queri irapiguemisantarijijateni, icamantamajajiaqueri. <sup>33</sup> Osamaniqueate iconoajiaquitari. Arikeate iquenquetsatacaaajiavajiri irira irapiguemisantarijijateni icantavajiri-queate:

—Cameetsataque poajianaje iguntenijiaki tigarancajiaquempica iroaqueragueta. Pamenanontaguetana-jempaja.

<sup>34</sup> Cotanquitsi irira Tsirashi arikeate yamepojaca, apaniro yoanaji Jorashi.<sup>o</sup>

<sup>35</sup> Irira Paavoro aisa Verenave ari ichoochajiaque Antioquiaqui itsipajiacari itsipapae itsatacaantajiaquequeate

o 15.34 Choocaguetaque paperipae iroquetinica iguenquetsatsarequi guiriego teeca intioncajiteroji ocaniqui tioncanquitsica otsapaqui 34.

itsavetantajiaquero iguenquetsatsare Amajirote.

**Yapijitajiro Paavoro yoaguetanaque  
intsavetantajeri Amajirote**

<sup>36</sup>Oshequianaquegueti savincaguiteri ariqueate Paavoro icantiri Verenave:

—Iintsija ampiapiaitanaje anejajiaateri maasano apiguemisantarijiateni acamantajiaquitica coramani atsavetanquerogueti iguenquetsatsare Amajirote. Amenajateri queroca icojiacani.

<sup>37</sup>Inintavetaca Verenave intsipatanajempari Joanca, icantajitica aisa Maricoshi.

<sup>38</sup>Cotanquitsiquea tee irininteji Paavoro intsipatanajempari, yamenajiqueritari coramani Pampiriaqui ipiapitsatanaajaritari tee interonqueroji iquenaguetanaquegueti itsavetantaquegueti Quirishito.

<sup>39</sup>Iquenquetsatavacaajiajivetajaqueate aisa teequeate inquemavacaajianajempoji ariqueate itsinampirejavacaanaca. Irira Verenave itsipatanacari Maricoshi itehiteitanaca yoajianaque Tsiperequi.

<sup>40</sup>Irira Paavoro iriguenti itsipatanaca Tsirashi. Maasano irapiguemisantarijiateni yamanacoventajiaqueri cameetsanijite incavintsajajiaqueri Aapani Irioshi, quishoniji iroajianaqueri. <sup>41</sup>Icatiajianaca yoajianaque Shiriaqui aisa Shirishaqui itampishitacajajiaqueri maasano quemisantajiatsica.

**16** <sup>1</sup>Ariqueate yoajianaque Terevequi aisa Irishitiraqui. Inejajiapojaqueri quemisantatsica icantajitica Timoteo, oraqueate oguirica iroguenti jorio quemisantatsica. Iriraqueate oacaantirica iriguenti guiriego. <sup>2</sup>Irirajiaquea quemisantajitsica quintenijiatsica Irishitiraqui aisa

Iconioqui yamenajiaqueri iriguenti caaviji icomajamajata. <sup>3</sup>Inintantacacaqueate Paavoro intsipatanaqueempari, cotanquitsi iroquetiqueate itotsaquitoaquaqueri ichonquimashi aatonijite icatsimajiaavaqueritsi joriojia quintenijiatsica iroaroaitanaquegueti. Maasanorite itsajiaqueri iriguenti oacaantiri guiriego. <sup>4</sup>Arikeate querocagueti iquenaquenaitanaquegueti guinteninintsipaequi icamantajianaqueri irapigue-misantarijiateni icantajiaquerica itigarancanejia Jesoshi jerijia quemop-guijajiguirica quemisantajitsica quintenijiatsica Jerosarequi. Arikea icantajiaqueri inintajiaque irinetsanamajajianaquero. <sup>5</sup>Iriraqueate quemisantajitsica arimpaqueate iquemisantamajajianaqueri Amajirote. Maasano savincaguiteripaequi arimpaqueate yoshequiamajatanaque. <sup>6</sup>Arikeate inintajiajvetaca intsavetantajiaquierome Iguenquetsatsare Aapani Irioshi Ashiaqui, iro cotanquitsi tee irinintacageriji Ishire Aapani Irioshi, yoantajianacaca Pirijiaqui aisa Garashiaqui.

<sup>7</sup>Yarejerejeivaetanaca ovegaragueta-pojacagueti Mishia. Inintajiajvetaca iroajianaqueme Vitiniaqui, ari oquejetaca iroatimpa tee irininteji Ishire Jesoshi iroajianaque. <sup>8</sup>Arikea iquenaguijianaqueri yanajaianaquero Mishia, yoajianaque yarejejiapojaca Toroashiqui. <sup>9</sup>Arikeate onianquittapojaquegueti irira Paavoro arikeate mana oquejetimotacari iguimaane, yameniri icatiimotacariequeate Maseroniaquitica, icampojaqueri:

—Caacate pinquenapojaque acaniqui Maseroniaqui, pamijiapojena.

<sup>10</sup>Yamenaquerigueti, taampinaquea nonetsanajianaquerop cameetsaniji

**p 16.10** Jero acaniqui amenaqueri itioncaquegueti *nonetsanajianaquerop* ocantacotaqueri Irocashi tioncaqueroca, itsipatacari imaida Paavoro.

nosotoajianaque noajianaque Maseroni-aqui, notsajiaquequeate imaica iriguenti nintanquitsi Aapani Irioshi nonquenque-tsatacajiaqueri Maseroniaquitica nontsavetantapojaquero Quenquetsatsa-rentsi Oganejencatatsica.

### Yoanaquegueti Paavoro Piripoqui

<sup>11</sup>Arikeate notejianaca Toroashiqui namajatacojianaque, apatiroti noajiana-quero Samoterashiaqui. Arikea osavincaguitetanajigueti aisa arikea narejejiapojaca Neaporishiqui.  
<sup>12</sup>Arikeate nanjinijitanaque quenavoirontsiqui noajianaque Piripoqui. Irootaque quinteninintsi anaquieroca otsipapae quempejitanquitsica choocajianquitsica Maseroniaqui. Iriguenti quintenipojaro poneanquitsica Iromaqui. Arikea nochoocajianaque aparopae savincaguiteri. <sup>13</sup>Arikeate aapojacagueti saavaro imagorejantajitaca nosotosotoitanaque ovegaragueta-pojacagueti tsovironaquipae noajianaque ojaaqui yamanapinijitigueti Aapani Irioshi. Arikeate nosavicapajaque notsavetantajiapojiro Iguenquetsatsare Aapani Irioshi nocamantajiaquero manquigarentsijia capiocajianquitsica. <sup>14</sup>Arikeate ochoocaque ocaniqui icantajitica Riria poneanquitsica Tiatiraqui. Iroatimpa iriguenti jocantagueti roca ametsomagori camachoncamagori. Iroguenti tsaroventarica Aapani Irioshi. Oquem-santamajatavaqueri Paavoro iquenque-tsataquegueti, iriguentitarite quenque-tsashirentacaaquero Amajirote, irootaquequeate oquemisantantavacarica. <sup>15</sup>Arikeate ovifacajatantacaca otsipajiacari maasano maimojiguropa. Arikeate ocantajiaquena:

—Pitsaquenagueti arimaja noquemisan-tamajataqueri Amajirote pincoraguejiaque notsovironaquitequi pimaimojiaquitenata.

Arikeate otsipajianaquena noajianaque.

<sup>16</sup>Arikeate noanoaitanaque yamana-pinijitirigueti Aapani Irioshi, notonquivojajavacaro aajanirentsi iroqueraca quenquevarotananquitsi ichocashiren-quero ampatsini otsavijiguevetantaca-roca querocaca oncoguetanaquempani coajica, iroguentiqueate yaampinijia-caca imentaquipae aajanijigaroca. Ininegueti igonoro ontsatsiquenem-pari taaca opaji ininque, ari irovegarata-quero.

<sup>17</sup>Iroatimpa ogujajianaqueriqueate Paavoro aisa naatimpajia, ocajemanagequeate ocanti:

—Irirajia iriguentijia itigarancanejia Irioshi Anaantamajatatsica, itsavetanta-quequea icamantajiaquempi quero pincojiaquempani irimeshiimentajita-jempinijite.

<sup>18</sup>Arikeate oquejetaquero imaica oshequi savincaguiteri noapinijiaque-gueti. Arikeate asereajueri Paavoro ipitsocashitsitanacaroqueate icantsitari-queate choocatancaroca:

—Noncantantaquempiro ivajiroqui Jesoquirishito pisotoanajero.

Arikeate iquenanaque isotoanaque.

<sup>19</sup>Cotanquitsi irira aajanijigaroca itsajiaqueterite aato yaantajijaaro imentaquipae, yaitsijianacariqueate Paavoro aisa Tsirashi yaajianaqueri niganqui ochoocataquegueti tsovirona-quipae, aritarite ichocajiaque oraniqui imajirojate. <sup>20</sup>Yonigaajiapojiri icantajiguiri:

—Jeri irica joriojia iriguenti icoraqueta-shijiaque yasereajiaquenaqueate itsimajaji-aquena maasano guinentijatisica ocaniqui aguenteniqui. <sup>21</sup>Itsatacajajapoaquenaquea yamejigaca iriatimpajia. Tee oncameetsa-teji anquemisantajiguero itsatacapojacajica, icantimentajitajirotsi. Aatimpajitarite agonoroncari Iromaqutica.

<sup>22</sup>Opejaianaqueriqueate itsimajenca maasano. Iriraqueate majirontajiatsica icantacaantajiaqueri isapocajiaqueri itavatavaajiaqueri. <sup>23</sup>Arikeate yagajiaquerigueti itavatavaajiaquerigueti yaajianaqueri yoguijajiaqueriqueate santanaqui, icantajiaqueriqueate ashitacotantatsica:

—Pinquempoguijacomajajiaquerija, ishianacatsi.

<sup>24</sup>Arikeate iquemaquerogueti icantajiaquerica arimpaqueate yoguijamajajianaqueri intsompogui, yavinaacojiaqueri iguitiqui inchacotaqui. <sup>25</sup>Arikeate onianquiitetapojaquegueti, irira Paavoro, Tsirashi yamanajiaqueri Aapani Irioshi aisa itsarontaventajiacari. Iquemisantajiaqueriqueate itsipajia santanatacojianquitsica. <sup>26</sup>Cotanquitsiqueate omoguecanaquequeate ocantanaquequea santana mogué, mogué, mogué, arikeate otanarejaguetanaca sotomorontsipae, oshiticarejaguetanaca oparipariitanaquequeate cavorejatsaripae ishiticacotantajivetacarica maasano yoguijitaqueca santanaqui. <sup>27</sup>Itinajanacaqueate ashitacotantatsica santanaqui yameniroqueate tanarejaguetenanaca sotomorontsipae itsaroanaquequeate ijiqueji shiajianaca yoguijajiaqueca santanaqui, yaavetanacaqueate igotsirote irimocorojempamequeate.<sup>9</sup> <sup>28</sup>Cotanquitsiqueate icajemanaquequeate Paavoro icanti:

—iAato pimocoroja! Maasano choocajiana ocaniqui.

<sup>29</sup>Iroompaqueate iquemavaquitigui icanti:

—Pintsivoteri tsivorentsi namenamajajiaquerita.

Arikeate yamaqueneri, ishianacaqueate iriatimpa iquijanaque intsom-

pogui itsaroanaquequeate yompionanca- caqueate, yogueroaventanacariequa Paavoro aisa Tsirashi. <sup>30</sup>Arikeate itsipajianacari yoguisotojajiri icantajiguiri:

—Iintsija pincamantena, ¿quiero noncoquempani iraantavajenaca aatoniji nogui camorecariqui?

<sup>31</sup>Icantajiguiriquea:

—Paventanajempari Amajirote Jesoquirishito, irioquea aavajempineca aatoniji pogui camorecariqui, arikeate inequetacaajiaquempari maasano piconoacaca.

<sup>32</sup>Arikeate itsatacaaajiaqueri iriatimpa jerijia maasano iconoajiacaca, itsavetantaquero Iguenquetsatsare Amajirote. <sup>33</sup>Iroompaqueate iteroncrajianajirogueti itsatacaaajiaquerigueti, iriraqueate ashitacotantatsica santanaqui yaajianaqueri iquivaguetajniri iquirajashitequitacaajiaquerigueti itavaajiaquerigueti. Arikeate iviñacajatacaantaca iriatimpa jerijia maasano iconoajiacaca. <sup>34</sup>Arikeate yaajianaqueri itsovironaquitequi yojocajiaqueri isheca. Ishinevaejiaca iriatimpajia jerijia aisa iconoajiacaca iroorijite iquemisantajiaqueri Aapani Irioshi.

<sup>35</sup>Arikeate osavincaguitetanajigueti iriraqueate majirontajiatsica itigarancajiaqueri coaretapae incantajiaquiteri:

—Poguipaquijajeri irintatica shiram-parijia.

<sup>36</sup>Iriraqueate ashitacotantatsica icantiri Paavoro:

—Icanti majirontajiatsica noguipaquijajempi. Imaicaqueate pisotosotoitanaje cameetsaqueate poajianaje.

<sup>37</sup>Cotanquitsiqueate Paavoro icantsijigariqueate coaretapae:

**q 16.27** Yamejigaca iriatimpajia coramani aatogueti iquempoguijamajatiri yashitacoqueca irishianaquegueti, arikea irantsipetacaajiaquempari quempoguijavetacarica, irimetojajiteri. Irootaquequeate itsaroantanacaca ashitacotantatsica.

—Aato noajiguitsi. Arimpate chapinqui manaqueate itavaajiaquena intati. Naatimpajitarite nogonoroncari Iromaquitica cotanquitsiqueate teequeate iroquetita incoacojiavaque-naji taaca nantaque. Arikeate yamenajiaque maasano yoguijajiaquena santanaqui. Imaicaquea imaica ñarimpate iromanaquero ioguisotoajia-jenagueti? Iintsijate incoraquejiaque iriatimpajia, iriotaquequeate oguisoto-jaijaatenane.

<sup>38</sup>Ipiapiaitanajaqueate coaretapae icamantajia pojaqueri majirontajatsica. Arikeate iquemacojia querigueti iriguentijia igonoroncari Iromaquitica, arikeate itsaroajianaque. <sup>39</sup>Yoashijianaqueriqueate yogameetsajijaatiriquea yoguisotojaijaatiri icantajiguiri:

—Nonintaque poajianaque, povashi-antajero noguinteni.

<sup>40</sup>Iroompaqueate isotosotoitanajigueti yoajianaque otsovironaquitequi Riria iquenquetsatacaajianajiriqueate irapiguemisantarijiate ni yuguishinejajiaqueri. Arikeate yoajianaji otsipaqui guinteninintsi.

### Yoanaqueguedi Paavoro Tesaronicaqui

**17** <sup>1</sup>Arikeate iquenaquenaita-naque Ampiporishiqui aisa Aporoniaqui irosati yarejetantapojacaro Tesaronicaqui. Arikeate oraniqui chooca shinagoga icapiocantapinijia-caca joriojia. <sup>2</sup>Iriraquea Paavoro iquijapinitaquequeate 3 savincaguiteri imagorejantajitaca iquenquetsatavacaa-jiaca, itsatacaajiaqueri Tioncarentsima-jaca, ogantagatarite yamecaro itsatacaantapinique imagorejantajitaca icapiocajiacagueti joriojia. <sup>3</sup>Yoguisotoa-queneri ijicoguetaqueneri Tioncarentsiqui ocanquegueti irantsipevaeta-quempa irira Quirishito, irimetojaque, cotanquitsi impochatanaje. Icant:

“Iricatica Jesoshi notsavetantaquem-pica, iriotaque Quirishitotatsica.”

<sup>4</sup>Iconoagarantajiaaca joriojia iquemi-santajiaque ariqueate iconoajiacari Paavoro aisa Tsirashi. Aisa iquemisanta-garantajiaque guiriego tsaroventajiga-rica Aapani Irioshi. Arikeate oquejejiaca oshequini manquigarentsijia anaantajati sica oquemisantajiaque-queate. <sup>5</sup>Yamenajia vaquerigueti joriojia teeca inquemisantajigue opeacojiana-queri itsimajenca, icapiocantajiacarica peraguetsica teeca incameetsajigueji. Iriatimpajia icajemajia queuate maasano, itsipatsipaitanacariequea, yoajianaque itsovirona quitequi Jasoni icojaiavecari-queate Paavoro aisa Tsirashi irinoshica-jiiquerime queate irojocajia quenerime-queate capiocajianquitsica. <sup>6</sup>Cotanqui-tsiqueate tee irinejajia pojaqueri.

Iriguentiqueate inoshicajiaque Jasoni jerijia itsipa irapiguemisantarijiate ni, yaajianaqueneri majirontajatsica icajemajiana queuate icantajiguiri:

—Irirajia asereajiguirica maasano caquinte quepatsipaequi, imaica arikeate icoraquejiaque ocaniqui, <sup>7</sup>yaajia vaqueriqueate Jasoni. Iriatim-pajia yojocaavaquero icantica majiron-tatsica Sesa teequeate inquemisantaji-queriji, icantajia quetarite chooca itsipa majirontatsica icantajitica Jesoshi.

<sup>8</sup>Iroompaqueate iquemajia vaqueri-gueti maasano capiocajianquitsica jerijia majirontajatsica opejaianaqueri-queate itsimajenca. <sup>9</sup>Icantajiguiri Jasoni jerijia irapiguemisantarijiate ni:

—Iriraqueate Paavoro aisa Tsirashi teequeate nonintajiguereji ocaniqui, antigarancajajjeri iroajianaje. Cotanquitsi imaica pojocajiguena pimenta quitsitepae, coajica queate iroajianajegueti noguiopiajajempiri-queate.

Ariquenqueate yojocajiaqueneri, iroompa yoguipaquijajajiri.<sup>10</sup> Ariquenqueate opitsecanaquegueti iriraqueate quemisantajiatsica itsipajianacari Paavoro aisa Tsirashi yoajivajiri iroajianaquequeate Vereaqui. Iroompaqueate yarejejiapojacagueta iquiaquijatapojaque shinagogaqui icapiocantapini-jiacaca joriojia.<sup>11</sup> Iriraquea joriojia quintenijiatsica Vereaqui teequeate inquejejiguempariji quintenijiatsica Tesaronicaqui. Iriatimpajia inintamajajaque inquemisantajavaqueri itsatacaajiaquerica. Irosati savincaguiteriqui yapatsajavantamajajivaquero Iguenquetsatsare Aapani Irioshi iramenajauquero cameetsaca itsatacaajiaquerica.<sup>12</sup> Irootaquequeate iquemisantantajiacarica Jesoshi oshequinjorior aisa guiriego. Iquemisantajavaqueri shiramparrijia jerojia manquigarentsijia anaantajiatsica.<sup>13</sup> Cotanquitsi iquemaco-jiavaquerigueti joriojia quintenijiatsica Tesaronicaqui chooca Paavoro itsavetanqueroqueate Iguenquetsatsare Aapani Irioshi Vereaqui, icoraquejiaque icantajiajipaqueri Vereaquitica:

—Aato piquemisantiri Paavoro, mana pincatimajiguera intati.

<sup>14</sup> Iroompaqueate iquemajajivaquitigui irapiguemisantarijateni Paavoro, itigarancantajiacarica iroanaque otsapijaqui quentija. Iriguentinivani choocatajatsi Tsirashi aisa Timoteo.

<sup>15</sup> Iriraqueate tsipajianacarica yoajivae-quitiri Atenashiqui, ariquenqueate ipiapia-taja. Iriraquea Paavoro icantajiajavirij:

—Pincantajiajipaqueri Tsirashi aisa Timoteo taampinaja incoraquejiae.

### **Paavoro iquenquetsataque Atenashiqui**

<sup>16</sup> Ariquenqueate Paavoro yoguijajivaque-riqueti Atenashiqui, yamenaguequeri ipejaiguica irioshivijitashitaca quintenijiatsica ocaniqui, yoshequiamajatatigui-

nimaja, ariquenqueate ishimampojancavaeta-nacaqueate.<sup>17</sup> Iquenquetsatantanacaca-queate shinagogaqui icapiocantapini-jaca joriojia. Iquemisantajavaqueri iriatimpajia jerijia itsipa caquinte tsaroventajigarica Aapani Irioshi. Ariquenqueate iquenquetsatavacaajiaca. Aisa ogantaga savincaguiteriqui yoapinique-queate oniganquiquegueti guinentintsi yojocantajigueterogueti taaca opajitapae iquenquetsatacaajiaqueriqueate choocajianquitsica oraniqui, iquenquetsatava-caajiaca.<sup>18</sup> Ariquenqueate ichocajiaque guijatacojiguiroca itioncacotanaqueca Epicoro jerijia aisa guijatacojiguiroca itioncacojianaqueca tsatacaantajiatsica icantajitica eshitoicojia. Iriatimpajia itsipajiacari Paavoro iquenquetsajiaque-quea, cotanquitsi ariquenqueate iconoga-rantajiacaca icantajiaque:

—¿Querocate icocani irira quenque-tsavaeri?

Itsipaqueate icantajiaque:

—Iriocampate quenquetsatacotirica itsipapae irioshipae.

Icantantajiacaca imaica itsavetanque-rotarite Paavoro Quenquetsatsarentsi Oganejencatatsica tsavetacotirica Jesoshi aisa ipochatanajigueti.

<sup>19</sup> Ariquenqueate yaajianaqueri aatsonqui-riqui icantajitica Areopago icapiocapini-jiacagueta majirontajatiatsica icoacojia-queriqueate icantajiguiri:

—¿Taate opajita ocatica iroquerari pitsatacaantaqueca?<sup>20</sup> Teequeate nontsajigueroji pitsatacaajiaquenaca, nonintantajiacaca poguisotoamajataque-naro.

<sup>21</sup> Icantantajiacaricaqueate imaica iriguentijatarite Atenashiquitica jerijia ponejaianquitsica otsipapaequi guinentintsi oraniqui iroguentitarite isavica-ventajiaque iquemisantajiaqueriqueate iquenquetsatacojiguerojuirogueti otsipapae teeca intsajigueroji, coajicaqueate

irioqueate quenquetsajajatsi.<sup>22</sup> Icatana-caqueate Paavoro niganqui Areopagoqui icantiri:

“Aviatimpajia quintenijiatsica Atenashiqui, namenajaquempi caaviji pishineventamajajavecari pirioshivijitashitacaca.<sup>23</sup> Ontaniquiqueate noquenaguetanaquegueti namenitsiguetana-quempiro pitsaroventapinijiacaca, nonejapojaquero aretare pitsaroventantaca chooca itioncajitaquero ocanti: ‘Iriguenti antajaqueuneca irioshi teeca inquemacojiteriji.’ Iriraqueate teeca pinquemacojigueriji, manaca pitsaroventashijiacaca intati, iriotaquequeate notsaventanca naatimpa.<sup>24</sup> Iriatimpia iriguenti Iroshimajaca. Iriotaquequeate peacaacaroca quepatsi, jeri maasano choocatantaguecaroca. Iriatimpia iriguentitari ashintaguetaroca inquite aisa quepatsi, teequeate inchoocatantempoji tsovironaqui ishitiquica caquinte.<sup>25</sup> Teetarite incoguimentempaji irantaqueneri caquinte. Iriotari peacaajacaji, aisa irioqueate anijacaajacaji yojocajiacajiroqueate maasano.

<sup>26</sup> Iroaqueraguetti ipeacaacari caquinte apaniroqueate ichoocaque. Ariqueate yoshequiaqueri, ariqueate ijatacojiaque maasano caquinteguetatsica teequeate incantashitajiaquempaji. Ivoroquaqueriqueate cameetsanijite itsitacaguitejajanaquemparo maasano quepatsi. Iriotaquequeate cantanquitsi quero avoajiaqueni aisa queroca aguinentijiaquempani.<sup>27</sup> Arikeate iquejejiacaji imaica cameetsanijite anintajiaquenijite antsajiaqueri, antsatantajapirojemparica, teenica irisamanitacoteji itsitacaguitejacarotarite maasano.<sup>28</sup> Iriotaquequeate anijacaajacajica tampishitacaajacajica. Aatomeguetti ichoocatime iriatimpia aatomete achoocajiguime. Aritarite icantajiaque pigonorojia caavijica itsamajajigu: ‘Aroguentijia irijanijiate

Aapani Irioshi.’<sup>29</sup> Aroguentigueti irijanijiate Aapani Irioshi, aato ajijiguirimaica iquejetacari ipeacaajitaca cavorejaguetatsica irooca mapi, ora iquenquejashitaca intati caquinte.

<sup>30</sup> Coramani teenicate intsajiguenicate caquinte, teequeate incantajigueriji Aapani Irioshi, cotanquitsiqueate imaica icantajiacijkeate maasano ancantashitajiajanajempa avashiantajianajero aguempevaerejia.<sup>31</sup> Choocatarite savincaguiteri itsatsicaca Aapani Irioshi, iriraquea shirampari inintacaaquea incanquequea quericaca intsipatadjempaca Aapani Irioshi aisa quericaca oananquitsine camorecariqui, cameetsaqueate iroaquero, iriguentitarite cantaqueri coramani Aapani Irioshi. Iriraqueate Aapani Irioshi yovochantajiri cameetsanijite antsatimentajiaquerinijite iriguenti inintacaaquea.”

<sup>32</sup> Iroompaqueate iquemajiaquaitigui iquenquetsatacotaqueroguetti intancore-jajianaje coajica metojaguevetatsica, iconoagarantajianaca ishirontajianaca inijashijianacariequeate. Choocaqueate itsipapae cantajianquitsica:

—Coajica nonquemajiajempai aisa.

<sup>33</sup> Arikeate icatianaja Paavoro.

<sup>34</sup> Cotanquitsi iconoagarantajiacaqueate iquemisantajiaqueri Jesoshi, ariqueate yoguijajuijaitanaqueri Paavoro. Iquemisantaque apaniro majirontatsica Areopagoqui icantajitica Tionishio. Aisa oquemisanque manquigarentsi icantajitica Tamarishi. Arikeate iquejejiaca itsipapae iquemisantajiaqueri Jesoshi.

### Paavoro iquenquetsataque Corintoqui

**18** <sup>1</sup> Arikeate iponeanacani Paavoro Atenashiqui yoanaquequeate Corintoqui. <sup>2</sup> Arikeate inejapojaqueri jorio icantajitica Aquira quintenivetatsica Pontoqui. Iriaquerasano coraquetanquitsi iponeaca Itariaqui

itsipatacaro imanquigare icantajitica Pirishira. Icoraquetantacaca manatarite yoguishiqaqueri majirontatsica Caraorio, teenicate irinintajeji inchoocajiaje joriojia Iromaqui. Ariqueate yoanaque Paavoro itsovironaquitequi irinejaji-gueri.<sup>3</sup> Arikea iquejetavacaajiacaqueate, irio avoguetiroca quitsarentsivanco, irootaquequeate iconoampojacarica itsipatavacaajiacaqueate ontaniqui yantajiaquequeate.<sup>4</sup> Ogantaga savincaguitequivi imagorejantajitaca yoapinitaque shinagogaqui icapiocantajica joriojia iquenquetsatacaaajiaqueri iriatimpajia jerijia aisa guiriegoja cameetsanijite inquemisantacaimentajiquerinijite.

<sup>5</sup> Arikeate yarejerejeipojacaguetsi Tsirashi aisa Timoteo iponeponeitaca Maseroniaqui, iriraqueate Paavoro arimpaqueate isavicaventanaquero Iguenquetsatsare Aapani Irioshi itsavetantamajatanaquero icamantama-jajaqueri joriojia icanti:

—Irira Jesoshi iriguenti irira Quirishito Meshiantatsica poguijajive-caca.

<sup>6</sup> Iriatimpajia ipigatsajianacariequeate inijashijianacari, ipotecantanacaroca Paavoro iitsaare cameetsanijite intsajia-querinijite mana yovashiantajianaqueri aatoqueate isavicaventajajiritsi intsatacaaajajeri. Icantajiguri:

—Nocamantajiajivetaquempiqueate, teequeate pinquemisantajiguenuaji. Imaicaqueate inchiquiotsiqueate pinquejetacaantajiaquempa aviatim-pajia pimetojajianaquegueti, aato naatimpa noquejetacaantimpitsi. Iroosacanicate imaica iriotaquequeate noashijianaque teeca iriojia joriojia nontsatacaaajiaqueri.

<sup>7</sup> Iroompaqueate icantajiaquerigueti isotoanaji yoanaque itsovironaquitequi Tishio Joshito tsaroventarica Aapani

Irioshi. Oraqueate itsovironaquite mana otsipatacaro shinagoga icapiocantajica joriojia.<sup>8</sup> Irira Quirishipo jivatanquitsica shinagogaqui iquemisantajiaqueri Amajirote. Arikeate iquejejiaica ijitannejia jerijia aisa oshequini Corinto-quitica, iquemajivaquerogueti Iguenquetsatsare Aapani Irioshi iquemi-santajiaqueri Amajirote, arikeate yovinacajatacaantajica.<sup>9</sup> Arikeate yoguimaaca Paavoro tsiteniriqui, arikeate yoguimaacari Amajirote icampojaqueri:

—Aatoja pitsaroguitsi. Arimpaqueate pinquenquetsatanaque, aato povashiantiroti.<sup>10</sup> Ogantagaqueate quisho noaquempi aato yantajitimpi, choocata-rite acaniqui oshequini quemisantajia-quinaca.

<sup>11</sup> Arikeate ichoocaque Paavoro Corintoqui apatiroti ajagantsi aisa otsipa niganqui ajagantsi, itsatacaanta-quero Iguenquetsatsare Aapani Irioshi.

<sup>12</sup> Oraqueate ichoocaquegueti acaniqui icoraquetaquequeate Gario ipeacaqueate imajirojiate Acayaquitica. Arikeate irira joriojia icapiocaventajia-cari Paavoro yaajianaqueneri iriatim-paqui,<sup>13</sup> icantajiguri:

—Iracaqueate iroguenti yantaque icantimentajitica, iroguentitarite isavicaventajiaque iquenquetsatamam-peanacaro Iguenquetsatsare Aapani Irioshi cameetsanijite inquemisantimen-tajiaquerinijite maasano, cotanquitsi icantashitatiacaro.

<sup>14</sup> Iroompaqueate inquenquetsatana-queme Paavoro iquenquetsatanaque-queate Gario icantajiguri joriojia:

—Imaicaquea joriojia, arimequeate iraitsantaqueeme, iroguenticame irimetojantaquequeate, arimequeate nonquemisantajiaquempime.<sup>15</sup> Cotan-quitsi teequeate arikea inquejeteroji imaica, iroguenti picatsimatimentajia-

queri itsatacaa jiaquempigueti icantashitatiitajiaquempirogueti pitsatacaantaji-guica. Pinetsanajiguerojate aviatimpajia. Aatoqueate noquemisantajiguimpitsi.

<sup>16</sup>Arikeate yoguisotoajiaqueri.

<sup>17</sup>Arikea maasano [guriegojia] icatsimajianaqueri Soseteneshi jivatan-quitsica shinagogaqui icapiocantapiniji-acaca joriojia yaajianaqueri itavaajia-queri tac, tac. Yamenajia vecariegate Gario, cotanquitsiqueate tee incantajiguergiji.

<sup>18</sup>Arikeate irira Paavoro ichoocaque oshequi savincaguiteri oraniqui Corintoqui. Arikeate yoanaji iquenquetsatacaa jianajiri irapiguemisantarijia-teni. Arikea itejianaca yamajatacojianaque iroajianaque Shiriaqui itsipatana-caro Pirishira aisa irira Aquira, cotanquitsi yoajapanajanti Senquere-aqui yojocaguinatapanajantaqueate cameetsanijite irinetsanataquero icantaquerica Aapani Irioshi, icantiri: “Coajica nonteroncaquerogueti nocamantaquempica nojocaguinata-quempa.” Arikeate itejianaca yamajatacojianaque. <sup>19</sup>Arikea yarejerejeitaca Epesoqui, arikea oraniqui agujita-naque Pirishira aisa Aquira. Irira Paavoro yoapanajanti shinagogaqui icapiocantapiniji acaca joriojia iquenquetsatacaa jianajantiriqueate capiocajianquitsica. <sup>20</sup>Iriatimpajia icantajiavetavajari:

—Aatotacaja pijatitsi, pimaimojiana-quena.

Cotanquitsi iriatimpia tee irininteji, icantajiguriqueate:

<sup>21</sup>—[Nonintaque noanaque Jerosa-requi nogavisaquitero Pentecoshite.] Ininquegueti Aapani Irioshi nompiaje.

Itetanaca yoajianaque isotoantanajaro Epeso. <sup>22</sup>Yagatacopojaque Sesareaqui yoanaque Jerosarequi inejajiaquitiri-queate quemisantajialsica. Arikeate

yoanaque Antioquiaqui. <sup>23</sup>Osamani ichocatanaque acaniqui, ariqueate yoanaque iquenaguetanaque Garashi-aqui aisa Pirijiaqui intampishitacaimentajianaquerinijite maasano quemisanta-jiatsica inquemisantamajajiaquerinijite Amajirote.

#### Itsatacaa antaque Aporoshi Epesoqui

<sup>24</sup>Arikeate yarejetapo jaca apaniro jorio Epesoqui iponeaca Arejantiriaqui. Iriatimpia ariguenti ipajita Aporoshi, iriguenti quenquetsatatsica cameetsa aisa itsamajatiro Itioncacaantaquea Aapani Irioshi. <sup>25</sup>Iquemacomajataqueri Amajirote Jesoshi. Itsavetantamajataqueri, aisa itsatacaa antaquegueti yoguisotoamajataquero queate, cotanquitsi iroguenti itsavetaca itsatacaa ntica Joanca Viñacajatantsica. <sup>26</sup>Arikeate imapocanaquero iquenquetsatanaque shinagogaqui icapiocantajiac a joriojia, teequeate impashiventempaji. Iroompaqueate iquemajia vaquitigui Aquira aisa Pirishira yaajianaqueri oraniqui intsatacaimentamajajiaqueriniji, yoguisotoamajajiaqueneri quero ococani iguenavoquiro Aapani Irioshi.

<sup>27</sup>Arikeate Aporoshi iquenquejanaji iroanajequeate Acayaqui. Irira queate irapiguemisantarijijateni icantajiaqueri cameetsataque iroanaque inquenque-tsate ontaniqui.

Itioncaciaqueneri quemisantajialsica Acayaquitica iraajiavaquerija. Arikeate coramani icavintsajajiaqueri Aapani Irioshi Acayaquitica irootaquequeate iquemisantantajajarica. Imaica yarejetapo jaca gueti Aporoshi oshequiqueate itampishitacajaiapojaqueri.

<sup>28</sup>Iriatimpia inetsanajianaqueneriquea maasano joriojia capiocajianquitsica itsatacaa ntajia vecaca, cameetsa yoanaqueri maasano, iroguentitari

ipampiatanaque Itioncacaantaqueca Aapani Irioshi itsavetantaquerigueti Jesoshi icanquegueti iriguenti irira Quirishito Meshiantatsica. Irootaqueate querocampate incojiaquerini iriatimpajia.

### Iopianajagueti Paavoro Epesoqui

**19** <sup>1</sup>Oraqueate choocatirajagueti Aporoshi Corintoqui, irira Paavoro itoncotoncoguetanaqueate otsempipae ipianaja Epesoqui. Inejajapoaqueri quemisantajatsica. Teequeate iroshequiamajateji. <sup>2</sup>Icoacojiaqueri icantajiguiri:

—Iroaqueragueti piquemisantaquegueti ɬari icoraquetaque Ishire Aapani Irioshi ichoocashirentaqueMPI?

Icantajiguiri:

—Teequea nonquemacojiguieri chooca Ishire Aapani Irioshi.

<sup>3</sup>Icantajiguiri Paavoro:

—Iroosacanicate ɬtaampate opajita pivināc妖atashijiaca?

Iriatimpajia icantajiguiri:

—Iroguenti noviñacajatashijiaca cameetsanijite nonetsanatimentajiaqueronijite itsatacantica Joancani Viñacajatantsica.

<sup>4</sup>Icantiri Paavoro:

—Oraqueate iviñacajatantaquegueti Joancani mana iviñacajatantaque cameetsanijite iroonijite intsattantajitaquemparoca jac yovashiantanaquero iguempevarejia, cotanquitsi icantajiaqueri: ‘Pinquemisantajiaqueri impoitanpojenaneca’, irioquea Quirishito Jesoshi.

<sup>5</sup>Iroompaqueate iquemajiavaquitigui yoviñacajatacantajianaca ivajiroqui Amajirote Jesoshi. <sup>6</sup>Arikeate Paavoro ipamijiaqueriqueate, arikeate icoraquetapojaque Ishire Aapani Irioshi ichoocashirentajiapojaqueri, imapocantajianacaca iquenquetsatantajianacaro

otsipapae quenquetsatsarentsipae teeca intsajavetempaji, itsavetantajiaquerouqueate icamantajiaquerica Aapani Irioshi. <sup>7</sup>Iriraqueate viñacajajianquitsica yovegarataca 12.

<sup>8</sup>Arikeate yoapinitaque Paavoro 3 taai shinagogaqui icapiocapinijiacaguetti joriojia iquenquetsataque, teequea impashiventempaji. Itsavetanqueri Aapani Irioshi quero icota imajirontagueti, icamantamajajiaqueri. <sup>9</sup>Cotanquitsi iconoagarantajiaca imanintajiaqueri icamantajiaquerica, teenicate irinintajiguenticate inquemisantajigueriji irira Quirishito, arikea icapiocajiacagueti maasano manaquea inijashinajiacarcero Quenavoquirontsi Iroomajaca.

Itsinampirejantanajaca Paavoro itsipajianacari quemisantajatsica yoajianaque itsatacantigueti Tirano. Arikeate iquenquetsatavacapinijiacaroraniQUI ogantaga savincaguiteQUI.

<sup>10</sup>Arikeate iquejetanaquero imaica aavaepojacani mavite ajagantsi itsavetantanaqueri Amajirote Jesoshi, irootaqueate iquemacotantajiacarica maasano quintenijatiacs Ashiaqui, joriojia aisa guiriegojia. <sup>11</sup>Aapani Irioshi yagavejacaamajataqueri Paavoro yantaguetantacaca teeca irinejajigueteji.

<sup>12</sup>Irootaqueate yantimatavaquerogueti Paavoro paañopae irooca quitsarentsipae, arikeate icoraquejiapoji itsipa yaanaquero, yaajianaqueneri ashinoncajajianquitsica, arikeate ipejaijanaja. Arikeate iquejejianaja ichoocashirentajiaqueca ampatsinipae isotoajianaque choocashirentajiavetacarica. <sup>13</sup>Cotanquitsiqueate chooca iconoagarantajiaca joriojia iquenaguetaque quinteninintsipaequi mana yantavaeventiroqueate yonigaanontajia-pinitacari caquintejia ichoocashirentajiaqueca ampatsini. Arikeate inintajiavetaca inquejejiaquemparime Paavoro

yonigaaguetarigueti ampatsinipae iroguenti yaventashijiacari ivajiro Amajirote Jesoshi, icantantajiacarica choocashirentajiaquerica apaniro caquinte:

—Imaica naventashitantzajiaquempiro ivajiro irira Jesoshi itsavetantica Paavoro noncantajiaquempiqueate pisotoajianaje pijajiae.

<sup>14</sup>Arikea iquejejiaca irijanijiate jorio icantajitica Eseva. Irira Eseva irio saserorote anaantanquitsica, irijanijiate ivegarataca 7. <sup>15</sup>Cotanquitsiqueate iquejejiacagueti imaica icantajiavecari-gueti ampatsini, mana ipigatanacari icantiri:

—Naatimpa notsataqueri Jesoshi iriguenti agavejamajatatsica, aisa irira Paavoro noquemacotiri, cotanquitsi ɿtaampate pinajiaque aviatimpajia?

<sup>16</sup>Arikeate irira caquinte ichocashi-renqueca ampatsini ishiashitanacari-queate itaviajianaqueri icapocapotana-queri yagavejajiaqueriqueate iperejacoo-jiaqueri iitsaare, irootaquequeate ishiantajianacaca cajaratsinojia chochoro iriraja.

<sup>17</sup>Iroompaqueate iquemacojiaqueri-gueti maasano joriojia jerijia maasano quiriegojia quintenijatiatsica Epesoqui itsaroajianaque, irootaquequeate ishineventantajianacarica Amajirote Jesoshi, icantajigui:

—Iriraqueate Amajirote Jesoshi iriguenti caaviji yagavejamajati.

<sup>18</sup>Arikeate icoraquejiaipojaque oshequi quemisantajiatatsica icamantaco-jiaqueri yantagushejiguica, icantajigui:

—Jero oca nantaqueca teeca oncameetsateji. Nonintaque irogamee-tsantajena Aapani Irioshi.

<sup>19</sup>Oshequini matsiguetsatsica aisa itsipajia aventapinijigaroca iragavejane

ampatsini yamatavijantajiacarica itsipapae, yamajiaqueroquea tioncaren-tsipae yashintajiacaca, irootaque otsatacaavecariac yantantaguevecaroca. Icapiocajiaqueri ariqueate itaimojia-queri maasano caquinteja. Ocapiocaca-gueti maasano paperi ovegaravaetaca, ari ovegaratacaci 50,000 imentaquitsi-tepae. <sup>20</sup>Arimpaqueate yoshequiamaja-tatiguinimaja quemisantajiguirica Amajirote aisa arimpaqueate iquemisan-tamajajianaqueri quenquetsatsarentsi tsavetaquerica Amajirote, yamenajia-querotarite arimaja ocantamajataque.

<sup>21</sup>Arikeate Paavoro ipintsatanaja iroanaje Jerosarequi inquenanajequeate Maseroniaqui aisa Acayaqui, icanqueta-rite:

—Noanaquegueti Jerosarequi, arikeate nopintsataca noavaetanaque Iromaqui.

<sup>22</sup>Arikea itigarancaqueri mavite amitacojiguirica, irira Timoteo aisa Erashito, iroanaque Maseroniaqui, cotanquitsi iriatimpa choocatiraja Ashiaqui.

#### ICATSIMAJIANAQUEGUETI EPESOQUITICA

<sup>23</sup>Arikeate irira Epesoquitica icantimentajiaqueri Quenavoquironsti Iroomajaca, teequeate capichaji incatsimajigueji. <sup>24</sup>Iriguentiqueate quejetacaantaqueri Irimitio vichajiroca cavorejatatsica. Iriatimpa iriguenti vichajiroca teemporojaniqui iquejeta-caacaro teemporo itsaroventajigarogueti irioshivijitashitaca Aretemisa.<sup>7</sup> Iriraqueate antimojiguirica yaantamaja-taroqueate imentaquipae. <sup>25</sup>Icapiocanta-jiacarica aisa quejejigarica iriatimpa vichajiroca cavorejatatsica icantajiguiri:

—Aviatimpajia pitsajigui irooqueate aantajiacaca imentaquipae antajiguica.

r 19.24 Aretemisa. Irirajia Iromaquitica icantajiguiroquea Diana.

<sup>26</sup>Cotanquitsi imaica pamenajigueja irira Paavoro iquenquetsataquegueti icanquequeate iriraqueate irioshivijirentsi yantajiguica caquinte teequeate irioquea irioshimajaca. Piquemajiaqueri aviatimpajia. Imaicaqueate imaica yoshequianaque guinentijatisca acaniqui Epesoqui quemisantajiaquerica. Cotanquitsi teequeate apaniro inquejetero ocatica, ariqueate itsitacaguitemacaro aisa maasano Ashiaqui.

<sup>27</sup>Quejetanquitsica imaica teequeate oncameetsateji, manaqueate aato aantajijaarotsi imentaquipae, aisa oteemporote arioshite Aretemisa anaantanquitsica manaqueate irovashi-antajitanaquero intati, aatoqueate ishineventajitarotsi. Maasanotarite shineventajiacaroca guinentijatisca Ashiaqui jerijia aisa otsipapaequi aatoqueate ishineventajijaarotsi.

<sup>28</sup>Iroompaqueate iquemajiaavaquitigui opejaianaqueri itsimajenca icajemajianaquequea icantajigui:

—iCameetsavaetaque Aretemisa, atsaroventajiacaca Epesoquitica!

<sup>29</sup>Icjajemajianaque ishiajianacaqueate maasano guinentijatisca oraniqui, yaajipojaqueri Gayo aisa Arishitarico, yaajianaqueri yoajianaque icapiocapini-jiacagueti. Iriguentijia Maseroniaquitica itsipajiacaca Paavoro itsavetantirigueti Amajirote. <sup>30</sup>Irira Paavoro inintavetacaqueate iroanaqueme iriatimpa, cotanquitsiqueate irapiguemisantarijia-teni icantajiaavaqueri:

—Aatota pijati.

<sup>31</sup>Ariqueate iquejejiaca majirontajias-tica Ashiaquitica iconoagarantajiacaqueate ipintsatacari Paavoro, icantacaantajiaqueri aatonijite ijati icapiocajiacagueti. <sup>32</sup>Ontaniquiqueate icapiocajiacagueti icajemajianaque, itsipaqueate cantashitatiavacaroca, cotanquitsi yoshequiamajatatinimaja

teeeca intsajigueji taaca icapiroquimentajica. <sup>33</sup>Iconoagarantajiacaca jorioja inejaitatiguri Arijantero ariqueate ichooque iringatimpa oraniqui, ariqueya yaajianaqueri yoajiaqueri niganqui inquenquetsatacamentajiaqueriniji. Arikeua iringatimpa itinajavacovetanaca cameetsanjite inquemisantimentajia-queriniji maasano inquenquetsatacaa-querime. <sup>34</sup>Cotanquitsi iroompaqueate itsajiaquerigueti iriguenti jorio, arimpa-queate icajemamajajianaque aricampa mavite hora, icantajigui:

—iCameetsavaetaque Aretemisa, atsaroventajiacaca Epesoquitica!

<sup>35</sup>Iriraqueate sequeretario tioncatsica ariqueate yagavejajianaquerigueti yoguimajerentajiaquerigueti icantajigui:

—Aviatimpajia Epesoquitica, pinque-misantajiguena, maasanotarite otsitacaguitemacovaetanacaro itsajitiro aatimpajia aroguentijia quempogujajiguiroca tetempo itsaroventantajitaroca Aretemisa jero aisa mapi quejecaroca iroatimpa parianquitsica jenoqui inquitequi coramani. <sup>36</sup>Aato ichocati cantashitatiakuemparoneca, irootaque-queate nocantantajiaquempica pinque-misantajiguena. Aatoqueate taaca opajita pantajiguitsi. Aatoshiatsi, iroquetita pinquenquejamajajigue.

<sup>37</sup>Iricatica pamajiaqueca tee iraitsiguereroji choocaguetanquitsica teempo-roqui itsaroventantajitaroca Aretemisa, aisa tee irinijashitemparoji arioshite.

<sup>38</sup>Pincantajigueriqueate Irimitio jerijia antavaetimojiguirica, choocaca inintajiaqueca incatsimajiaqueri, iintsjia iroajianaque icantomajantajiguigueti joese irioqueate quemiquerine, irootarite ichoocatashijaque incantajia-queriqueate quericaca quejetanquitsica aisa quericaca teeeca inquejetempaji.

<sup>39</sup>Cotanquitsi choocagueti otsipa

tsimajajiaquempica poguijajigueriqueate majirontajitsica incapiocajiaquempigueti ariqueate pincantajigueri.<sup>40</sup> Imaicaquea imaica aatoshiatsi icamantacojitajitsi amajirojiatequi, ijiqueji irooca acapiocashijiaca anaimanajiaqueri, ariqueate incoacojiacajigueti: ‘¿Taate picapiocashijiaca?’ querocampate ancantajianaque.

<sup>41</sup> Iroompaqueate icantaqueguedi, itigarancajajiri maasano capiocajianquitsica iroajianaje.

### Yoanaqueguedi Paavoro Maseroniaqui

**20** <sup>1</sup>Ariqueate isanticojianajigueti Epesoquitica, irira Paavoro icajemajiaqueri irapiguemisantarijiateni icapiocajiaqueri itsatacaajiaqueriqueate yavinajavajiri. Ariqueate iquenquetsatacaajianajiri icantajiguiri:

—Noanaquequeate Maseroniaqui.

Ariqueate yoanaque. <sup>2</sup>Iquenaguetanaquequeate iquenquetsatacaajianaqueriqueate irapiguemisantarijiateni itampishitacajaianaqueriqueate inquemisantamajajiaquerija Quirishito. Ariqueate yarejerejeivaetani Guereshi-aqui. <sup>3</sup>Ariqueate ichoocatanaque ontaniqui 3 taaí. Ariqueate pajinimequeate intetanaquempame iroanaqueme Shiriaqui iquemacojiaqueri jorioja isariajiacari irimetojajiaqueri, ipiantanajaca Maseroniaqui. <sup>4</sup>Iroguenti itsipajinaca Sopatere (irijanite Piro poneanquitsica Vereequi), Arishitarico jeri Segonto (poneajanquitsica Tesaronicaqui), Gayo (poneanquitsica Terevequi), Timoteo, Tiiquico jeri Toropimo (poneajanquitsica Ashiaqui). <sup>5</sup>Iriatimpajia ijivajanaque yoguijagu-javaetana Toroashiqui. <sup>6</sup>Ariqueate anaapojacaguedi savincaguiteri

ishecatantajitaroca pan teeca inconoantajitemparojo anempoantaca notenoteitanaca noponeponeitanaca Piripoqui. Arikeate aapojacaguedi 5 savincaguiteri notonquivotonquivoitavajari Toroashiqui. Arikeate nochoocajianaque 7 savincaguiteri. <sup>7</sup>Arikeate aapojacaguedi savincaguiteri pariajapajaroca semana<sup>s</sup> nocapiocajiacas notsipajiacari napiguemisantarijiateni noncotarejaquero pan noshecajiaquemparo nonquenquejajiaqueri irira Quirishito imetojaventajiaquitajiguedi. Arikea iquenquetsataque Paavoro iroosatiqea inianquiitetacovaetanaque, itsaquetarite osavincaguitetanajeguedi iroanaje.

<sup>8</sup>Ariguenti nochoocajiaqueni oshitamen-coshitamencoatacaguedi jenoqui notsivojiacaqueate. <sup>9</sup>Arikeate ichoocaque oraniqui iriaqueraca quenquevaritananquitsica icantajitica Eotico, isavicaque omorotacaguedi. Osamanitarite iquenquetsataque Paavoro, iriraquea Eotico ipochoquita-naque imaanaque, cotanquitsi iroompaqueate imaamajavetanacaguedi isorocanaquequeate yomposapojaca isavi tan. Yoajavetanacaqueate yaajavetapojacariqueate, jac metojanaquequeate.

<sup>10</sup>Cotanquitsiqueate irira Paavoro yaguijitositanacari yovanqueta-pojacari ineguuiqui yavinatanaqueri, icantajiaqueri maasano:

—Aato pitsaroajiguitsi, jeri pochatanaji.

<sup>11</sup>Arikeate ipianaja Paavoro jenoqui, icotarejaquero pan yojocajiaquenaro maasano, ariqueate noshecajiaaca. Yapijitajiroqueate iquenquetsatanajai aisa irosatiqea isavincaguitetacotantanajaca. Arikeate yoanaji. <sup>12</sup>Irira Eotico itsipajianajari itsovironaquitequi

**s 20.7** Iroguenti opariantanaja semana savincaguiteri tominco. Irootaque ipochatantajaca Jesoshi.

peamajatanajaqueate ishinejiaca  
maasano.

<sup>13</sup>Naatimpajia nojivajivaitanaque-  
queate namajatacojianaquequeate  
quenajarontsiqui noajianaque Asoqui  
naajipanajanteriqueate Paavoro,  
iriatimpa iroguenti ishivoquitanaca  
quenavoquirontsiqui. <sup>14</sup>Ariqueate  
notonquivojajiajari Asoqui notejianajiri-  
queate noajianaque Mitirenequi.  
<sup>15</sup>Osavincaguitetamaquegueti  
nogaajianaca nanajainaquero Quio.  
Ariqueate otsipatapojacagueti savinca-  
guiteri nagatacojiapanajanti  
Samoshiqui. [Nagatacojiapanajanti  
Torojirioqui,] otsipa savincaguiteri  
nagatacojiaque Miretoqui. <sup>16</sup>Apatiroti  
noajianaquero teequeate nagatacojigueji  
Epesoqui, teenicate irininteji Paavoro  
inchoocate oshequi savincaguiteri  
Ashiaqui, manatarite taampina  
inanaque inchiquiompate irarejetempa  
Jerosarequi aricaca iragavejaquem-  
gueti irogavisaquitero ontaniqui  
savincaguiteri icantajitica Pentecoshite.

<sup>17</sup>Ontaniquiqueate nochoocajiaque-  
gueti Miretoqui ariqueate itigarancaque  
Paavoro camantajiaquiterineca quempo-  
gуйijiguirica quemisantajitsica  
guntenijiatsica Epesoqui, icampoja-  
queri:

—Icajemacaanquempi Paavoro.

<sup>18</sup>Icoraquejiapojaquegueti icantajiava-  
queri: “Aviatimpajia pitsajiaque quero  
nocotaquita nochoocatimojiaquitimp-  
gueti. Iroqueragueti nocoraquetaque  
acaniqui Ashiaqui nocomajataca irosati  
imaica. <sup>19</sup>Ogantaga nantavaetaqueneri  
Amajirote, tee naventacotempaji, mana  
oparijatanaque oshequi nojaquia, aisa  
natsipevaetaca isarijavetaquenagueti  
joriojia, inintajavetacatari irimetojajia-  
quename. <sup>20</sup>Teequeate novashiantej  
aparo noquenquetsatacaaquiaquempigueti  
noguisotoamajataquempiro maasano.

Notsatacaaquiaquempi pichoocajiaque-  
gueti icapiocajitagueti jero aisa  
pitsovironaquitepaequi. <sup>21</sup>Aisa notsata-  
caaquiaqueri joriojia jerijia aisa  
guiriegojia nocantajiaqueri incantashita-  
tijaianajempa irovashiantajianajero  
iguempevaerejia inquemisantajajeri  
Aapani Irioshi jeri aisa Amajirote  
Jesoquirishito. <sup>22</sup>Imaica noanaque  
Jerosarequi, iriguentitari tigaranca-  
quena Ishire Aapani Irioshi. Teequea  
nontsateji taaca oaquenane. <sup>23</sup>Iroguenti  
notsataque querocagueti noanaque  
icanquenaqueate Ishire Aapani Irioshi  
mana irashitacojitaquena santanaqui  
aisa irantsipetacajaiquena. <sup>24</sup>Cotanquitsi  
naatimpa tee nontsarogueji capichaji,  
teenicate nontsaroacaguemparo  
nometojaquegueti. Iroguenti nonintaque  
nonteroncamajaquero maasano  
icantaguetaquenaca Amajirote Jesoshi,  
nontsavetantaquero Quenquetsatsa-  
rentsi Oganejencatatsica camantacajica  
quero icota Aapani Irioshi icavintsajan-  
tigueti.

<sup>25</sup>“Coramani noquenquetsatacaa-  
jiaquempi noquenaguetaquegueti  
notsavetanqueri Aapani Irioshi quero  
icota imajirontaguegueti. Imaica notsamaja-  
taque aato pinejajijaanatsi maasano  
aviatimpajia. <sup>26</sup>Irootaquequea imaica  
nocamantantajiaquempica choocagueti  
teeca inquemisantajigueji teequeate  
naroguenti quejetacaanterine  
impeaquempagueti. <sup>27</sup>Notsavetantague-  
querotari maasano icanquenaca Aapani  
Irioshi, teequeate nomanacoteji aparo.  
<sup>28</sup>Irootaquequeate nocantantajiaquem-  
pica inchiquiotsqueate pamenajajempa  
aviatimpajia. Pinquempogujajajerija  
maasano quemisantajitsica, iriguentita-  
rite cantajiaquempi Ishire Aapani Irioshi  
pinquempogujajajerija quemisantaj-  
guirica Amajirote metojaventajiacajica,  
ivegaratantajiacajiro iriraja. <sup>29</sup>Naatimpa

notsamajataque iroompaqueate  
namerencaquaitatiguempa incoraque-  
tashijiaquempi amataajatsica irogivo-  
rocaciaquempi inquejejiapojaquempa-  
ri lobo<sup>t</sup> yoguivoroquirigueti oveja.<sup>30</sup>Aisa  
iconoajiaquempi amataajatsica  
intstacaaajiaquempiqueate teeca  
iroomajaca iramatavijajiaqueriqueate  
intati yapiguemisantavetacaca iriguenti-  
jiatari iroguijatacojianaque.<sup>31</sup>Cotan-  
quitsi naatimpa noncantajiaquempi  
inchiquiojia yamatavijajiguimpitsi. Aato  
pipeacojigarotsi ogantagatarite notsata-  
caajiguimpi savincaguiteri aisa  
tsiteniriqui niraaniraavaetacaqueate  
irosatiqueate najagantsitacotanaque 3  
ajagantsi.

<sup>32</sup>“Imaica, napiguemisantarijateni,  
nocanqueri Aapani Irioshi inquempogui-  
jajajempi. Pinquemisantamajatero  
Icanqueca camantajiacajica icavintsaja-  
jiacajigueti iriatimpa, irooqueate  
tampishitacaajajempineca. Coajica  
incapiocajiacaji ontaniqui ichoocaque-  
gueti iriatimpa, anconoajiaquempari  
maasano icoguijiaqueca imeshiajia-  
queca.<sup>33</sup>Naatimpa teequeate nonintsi-  
gueri itsipa igavorejaquirite, imentaqui-  
tsite, iitsaarepae.<sup>34</sup>Pitsajiaquetarite  
aviatimpajia, inchiquiotsi nantanontaca  
naatimpa nacoqui naaguetigueti  
nonintaguequeca aisa nojocajiguinirica  
notsipajiacaca.<sup>35</sup>Oraqueate noquejeta-  
querogueti imaica cameetsanijite  
pogujatacotimentajiaquenanjite  
pincavintsajimentajiaquerinijite coacoji-  
anquitsica. Pinquenquejajajero  
icanqueca Amajirote Jesoshi icanti:  
‘Caaviji anaantaque ocameetsamaja-  
taque pincavintsajantajiaquegueti,  
anaaqero aviguentijiaci incavintsajai-  
taque.’”

<sup>36</sup>Iroompaqueate icantajiaquerigueti  
igueroncanaca yamanaqueri Aapani  
Irioshi itsipajiacari maasano.<sup>37</sup>Irajaia-  
nacaqueate maasano, yavinajavajiri  
Paavoro, intintavorotavajiriqueate.

<sup>38</sup>Ishimampojancavaejianacaqueate  
iquemajiaqueritarite icantajianajiri aato  
inejajajiritsi. Ariqueate itsipatsipaitana-  
cari yojocajijaatiri inirojeguiqui  
quenajarontsi yamenajavajiri itetanaja.

### Yoanaquegueti Paavoro Jerosarequi

**21** <sup>1</sup>Ariqueate nopintsamajajive-  
cari napiguemisantarijateni,  
aritaque noajianaji notejianaja namaja-  
tacojianaque, catinca noajianaquero  
Coshiqui. Arikea osavincaguitetanaji-  
gueti nogajianaca, arikeate noquena-  
jatacovaetanaque Irorashiqui. Osavinc-  
guitetanajigueti nogajianaca aisa,  
noquenajatacovaetanaque aisa  
Pataraquí. <sup>2</sup>Arikeate nonejajipoja-  
quero inirojegui quenajarontsi  
oananquitsineca Penishiaqui, arikeate  
notejianacaro. <sup>3</sup>Arikeate namajatacoji-  
anaque noajianaque, namenacojiana-  
quero Tsipere iroguenti ochoocatantaca  
najampatequi. Nanaanaquero  
noajianaque Shiriaqui, arikea  
nagatacojiapanajanti Tiroqui irogaguij-  
tanaqueroqueate ajaararontsi.  
<sup>4</sup>Arikeate oraniqui nonejajipojaqueri  
quemisantajatsica, yaajjivaquena  
arieate nomaimojianaqueri 7 savinca-  
guiteri. Ontaniqui nochoocajiaquegueti  
Ishire Aapani Irioshi iquenquetsashiren-  
tacaajiaqueri iriatimpajia icantantaja-  
vetavacarica Paavoro:

—Aatocaja pijati Jerosarequi.

<sup>5</sup>Aapojacagueti nopintsatancaca  
arieate noajianaji nosotosotoitan-  
queroqueate ovegarapojacagueti

<sup>t</sup> 20.29 Irira lobo iquejevecari shiishi iririjeguini catsimari. Ichocati tomirishiqui otsipaniqui  
guinternintsiqui.

tsovironaquipae. Maasano iriatimpajia jerojia aisa imanquigarejia jerijia irijanijiate itsipajianaquena otsapijaqui impanequivi. Notigueroajianacaqueate namanajaqueri Aapani Irioshi.

<sup>6</sup>Ariqueate noquenquetsatacaajianajiri, icantajavajana iriatimpajia: "Iintsija", ariquea notejianaja noajianaji. Iriatimpajia ipiapiaitanaja itsovironaquitequi.

<sup>7</sup>Ariquea noponeanaca Tiroqui, namajatacotanaque noajianaquero Toremairaqui, ariqueate nagatacojiapajaque oraniqui. Noajianaquequeate nonejajiapojaqueri napiguemisantarijia-teni, aparo nomaimojianaqueri.

<sup>8</sup>Osavincaguitetanaquegueti noajianaque Sesareaqui narejerejeipo- jaca itsovironaquitequi Jeripe tsavetantiroca Quenquetsatsarentsi Oganejenca- tatsica. Iriatimpa iriguenti itsipajiac 7 cavintsaajiguirica quemisantajitsica inintacajaitaqueca iroqueragueti savicavenqueroneca irojocajiaquenero osheca coacojianquitsica guitenijitsica Jerosarequi. <sup>9</sup>Chooqueate 4 irorijanitejia majinarojia. Iroatimpajia iroguen- tija tsavetantajiguiroca icantajiguiroca Aapani Irioshi. <sup>10</sup>Nochoocajianaque- queate oshequini savincaguiteri, icoraquetaquequeate tsavetantiroca icanquerica Aapani Irioshi icantajitica Agavo. Iponeaca Jore aqui, <sup>11</sup>iriguenti icoraquetashitaque irinejajiaquitena. Yaitsitanaqueriqueate ichompimashite Paavoro yoishoguititaca aisa iracoqui, icanti:

—Icanti Ishire Aapani Irioshi: 'Ariqueate inquejajiaqueri joriojia Jerosarequita- ca iroishojaqueri ashintarica irica ichompi- mashite, ariqueate irojocajiaqueneri teeca iriojia joriojia irajaianaqueri.'

<sup>12</sup>Iroompaqueate noquemajjavaqui- tigui naatimpajia jerijia aisa guitenijitsica Sesareaqui nocantajavetavajari- queate Paavoro:

—Aatocajate pijatitsi Jerosarequi.

<sup>13</sup>Cotanquitsiqueate icanti Paavoro:

—¿Taaquea oaquempi piraantajia- caca? Naroguenti pishimampojancaca- naca. Teenicate nompincatsateroji iroishojaquenagueti. Iriogueti nintanquitsine Amajirote Jesoshi nometojaventajerqui Jerosarequi, aatoqueate nagamajarotsi nometojaque- gueti.

<sup>14</sup>Nocantajiavecari, cotanquitsi teequeate inquemisantajiguenaji, aatoquea nocantajiri, ariotapojaque. Nocantajiaqueri:

—Iriompate Aapani Irioshi querocaca- queate ininqueca.

#### Yarejetacagueti Paavoro Jerosarequi

<sup>15</sup>Ariqueate nonetsanajianaca noajianaque Jerosarequi. <sup>16</sup>Yoguijaga- rantajianaquena napiguemisantarijijateni guitenijitsica Sesareaqui, yamajaque- nari Manaso poneanquitsica coramani Tsiperequi irioquea quemisantatsica coramani, ariqueate nomaimojaqueri.

<sup>17</sup>Ariqueate narejerejeipojacagueti Jerosarequi yaajiajavanaughqueate napiguemisantarijijateni ishinejianaja.

<sup>18</sup>Osavincaguitetanajigueti itsipajiana- quena Paavoro noajiaquitiqueate nonejajiaquitiri Santiago. Ariqueate ichoocajiaque maasano quempoguijaji- gurica quemisantajitsica icapiocajia- queate. <sup>19</sup>Irira Paavoro iquenquetsata- caajiaqueri itsavetacotaquero maasano quero icotani yagavejacaaguetaqueri- gueti Aapani Irioshi iquenquetsatacaaji- aquerigueti teeca iriojia joriojia.

<sup>20</sup>Iroompaqueate iquemajjavaquitigui ishineventajianacariqueate Aapani Irioshi. Icantajiguiriquea:

—Cameetsataque, napiguemisantarite, cotanquitsi choocajia yoshequiamajatati- gunimaja apijorijojateni quemisantajigui- rica Quirishito iroguenti inintaque irinetsa-

najiguero itioncacotanaqueca Moishishini.  
<sup>21</sup> Iriatimpajia iquemacojiaquempi  
 pitsatacaajiaqueri joriojia quinteninijsatcsa  
 osamani conoajiacarica teeca iriojia  
 joriojia ijijiaqueji pitsatacaajiaqueri  
 cameetsanijite aatomijite inetsanajiajiro  
 itioncacotanaqueca Moishishini. Aisa  
 ijijiaqueji picantajiaqueri aatonijite  
 itotsaiquitsijajiri ichonquimashi irijanijate  
 aisa aatonijite yoguijatacojiajirotsi icantaj-  
 guinica avaesatinijiate. <sup>22</sup> ¿Querocampa  
 ancojiaquempa? Imaica inquemacojiaava-  
 quempigueti incapiocaventajiajopempi.  
<sup>23</sup> Noquenquejajiaque caaviji ocameetsa-  
 taque pinquemisantajiaquenagueti  
 noncantajiaquempica. Chooca acaniqui 4  
 shiramparijia jocaguinatacaantajianquitsi-  
 neca irinetsanajiaquerogueti icantajiaque-  
 rica Aapani Irioshi icantajiguiru: 'Coajica  
 nonetsanajiaquerogueti nocamantajia-  
 quempica nojocaguinatacaantajiaquempa.'  
<sup>24</sup> Paajianaqueri teemporoqui pintsipajiana-  
 quempari pincanteri Aapani Irioshi  
 irogameetsatantajajempica. Pivegarajigue-  
 neri maasano cameetsanijite irojocaguina-  
 jiaquempa. Irootaquequeate intsatantajia-  
 quempaca apijorijiateni mana itsojeventa-  
 jitaquempi intati, ogantagatirajatarite  
 pinetsanatiro itioncacotanaqueca  
 Moishishini. <sup>25</sup> Cotanquitsi irira teeca  
 iriojia joriojia quemisantajialsica notionca-  
 jiaqueri mana nocantajiguiru intati  
 aatoqueate ishecajijaaritsi imetojajitaque-  
 nerica ipejaiguica irioshivijitashitaca,  
 aatoqueate ishecatacojijaarotsi iriraja,  
 aatoqueate ishecajijaaritsi icaticajiguetica,  
 aisa aatoja ijatashijajirotsi manquigarentsi  
 teeca iro irashi.

<sup>26</sup> Ariquea iquemisantajiaqueri  
 Paavoro. Osavincaguitetanajigueti

itsipajianacari jocaguinajianquitsineca  
 irogameetsajiaquempa. Arikea  
 yoanaque teemporoqui itsaroventantaji-  
 tarica Aapani Irioshi icamantajiaqueri  
 saserorotejia querocaca onteroncantana-  
 jempaca irogameetsatantajajempaca  
 cameetsanijite irijitorejajiaqueneri  
 Aapani Irioshi viratsipae.

### Yashitacojitaquerigueti Paavoro santanaqui

<sup>27</sup> Arikeate pajinigueti onteroncana-  
 jempaji 7 savincaguiteri yogameetsatan-  
 tajiacaca, iriraquea joriojia poneague-  
 tanquitsica Ashiaqui inejajiaqueri  
 Paavoro omiganquirequi oticaacoroqui  
 teemporo yogametsajajiaqueriquea  
 capiocajianquitsica, icatsimajianaque-  
 quea, arikeate yaajiaqueri. <sup>28</sup> Arikeate  
 icajemajianaque icantajigui:

—Shiramparijia ishiraerijia, pamitaco-  
 jiguenshiatsi. Iriotaque irira quenague-  
 tatsica amatavijajiguirica caquinte.  
 Iroguenti isavicaventi itsatacaajiaqueri-  
 queate maasano, iquenquetsatacogui-  
 shetaqueri agonorojia jero aisa maasano  
 itioncacotanaqueca Moishishini. Aisa  
 inijashicaro ocatica teemporo. Aisa  
 yamajiaqueri guriegojia yoguijajia-  
 queri acaniqui teemporoqui, icovaegui-  
 shetacaantacaroca ocatica yashintacaca  
 Aapani Irioshi.<sup>u</sup>

<sup>29</sup> Icantajiacarica yamenajiaqueri  
 itsipajiacari Toropimo poneanquitsica  
 Epesoqui ijiqueji ariji itsipatacari  
 iriatimpia teemporoqui itsaroventantaji-  
 tarica Aapani Irioshi. <sup>30</sup> Opejaianaqueri  
 itsimajenca maasano, ishijaiapojaca  
 yaajiajapoaqueri Paavoro, inoshicajiana-  
 queri sorororo soaa yaajianaqueri

<sup>u</sup> **21.28** icovaeguishetacaantacaroca ocatica yashintacaca Aapani Irioshi. Chooca 3  
 oniganquitejirepae teemporo. Chooca aparo irashi shiramparijia ishiraerijia, chooca otsipa  
 ashi manquigarentsija ishiraero, chooca otsipa irashi itsipajia teeca irio ishiraeri.  
 Inquijajegueti teeca irio ishiraeri niganquitejirentsiqui irashi ishiraeri, irimetojajiteri,  
 icanquequea covaeguishetanaca.

sotsiqui otantotacotacagueti teemporo. Taampina yashijiaquero osotomoro.  
<sup>31-32</sup>Irovepojaca irimetojajiaquerime, cotanquitsi iroompaqueate icamantajita- queri imajirote coaretajia opejajiana- queri itsimajenca maasano Jerosarequi- tica, icajemajiaquequeate icapiocajia- queriqueate igoaretajiate jerijia aisa itsipajia imajirojiate, ishiamajajianaca yoajianaque iramenajiaquiteri. Iroompae- quea inejajavaqueri iriatimpajia, yovashiantajajiriqueate Paavoro teequeate intavaajiajeriji. <sup>33</sup>Ariqueate icoraquepojaque imajirote coaretajia yajiricapojaqueri Paavoro ishiticaaan- queri mavite cavorejatsari. Icoacojia- queri catsimajiaquerica icantiri:

—¿Taa ipajita irica? ¿Taate opajita picatsimamentajiaqueri?

<sup>34</sup>Cotanquitsi iriatimpajia arimpae- queate icajemajianaqueri icantashitati- jaianacaro icantaguetaquerica itsipaqueate cantashitatiavacaroca teequeate aparo incantajigueriji, irootaquequeate tee inquemamajajigueri imajirote coaretajia, yaacaantantacarica Paavoro itsovironaquitequi coreta.

<sup>35</sup>Iroompaqueate yarejejiapocagueti yataitapinijiguigueti coaretajia, icompi- jianacariequeate yogajenocajianaqueri- queate aatonijite yaajiavaqueri catsimajiaquerica. <sup>36</sup>Yoguijaguijaipojaqueri- queate icajemajiaipojaquequeate:

—iImacashia irimeto!

**Paavoro iquenquetsatacaciajiaquerigueti capiocajianquitsica**

<sup>37</sup>Pajinigueti inquijacaanaquerime sotomorontsiqui iquenquetsatanaque Paavoro icantiri imajirote coaretajia:  
 —¿Cameetsampa nonquenquetsataca- guempi?

Icantiri:

—¿Pitsatirompate aviatimpia iguenquetsatsare guiriego? <sup>38</sup>Iroosacani-

cate, ¿teesacanica aviguenti irira Ejepitoquitica nintavetanquitsica iroguisotoaquerime majirontatsica aajianaquerica 4,000 metojantatsica ontaniqui oquitamampororoipojaque- gueti?

<sup>39</sup>Icantiri Paavoro:

—Tee. Naatimpa naroguenti jorio, ariguenti novogui Tarisoqui ora caavijica iquemacomajajiti Shirishaquia- tica. Iintsija pincante nonquenquetsata- caaqueri capiocajianquitsica.

<sup>40</sup>Iriraqueate imajirote coaretajia icantiri:

—Iintsija.

Icatianacaqueate Paavoro yataitampi- nitacaca coareta, icanti vacoc. Imajereji- anaquegueti maasano iquenquetsatacacia- jiaqueri, iquenquetsatantacaro iguenquetsatsare evereo, icanti:

**22** <sup>1</sup>“Nogonorojia aisa nomajiro- jiate, pinquemisantajiaquena nonquenquetsaventanaquempagueti.”

<sup>2</sup>Iquemajiaquerigueti iquenquetsa- tantanacaro iguenquetsatsare evereo iquemisantamajajiaquaqueri. Ariqueate icanti Paavoro:

<sup>3</sup>“Naatimpaqueate naroguenti jorio, ariguenti novogui Tarisoqui choocatan- quitsica Shirishaqui, cotanquitsiqueate ariguenti noquenquevaritaque acaniqui Jerosarequi. Iriguenti tsatacagana Gamarieri maasano itsatacaantica avaesatinijiate. Ogantaga noquemisanta- majatiri Aapani Irioshi noquejejia- quempi aviatimpajia imaica. <sup>4</sup>Coramani caaviji nocatsimamajatiri guijatacojigui- roca ocatica icantajitica Quenavoqui- rontsi. Naajianaqueri shiramparijia aisa manquigarentsijia irashitacojitaqueri- queate santanaqui irosatiqueate irimeto- jajiguetaqueri. <sup>5</sup>Irira saserorote anaantamajatanquitsica, jerijia majiron- tajatiatsica itsamajajiaquena arimaja nocantamajataque imaica, iriojiatarite

jocajiaquenaroa paperi naajianaque-  
neri agonorojia guntenijiatsica  
Tamashicoqui cameetsanijite naimenta-  
jiaquerinijite quemisantajiatsica  
naajianaqueriqueate Jerosarequi  
irantsipetacaimentajitaquempariniji.

<sup>6</sup>“Cotanquitsiqueate irooompaqueate  
naavetanacarogueti oquempejipojaque-  
gueti Tamashico pajinigueti intampati-  
catapojaque catsirincaiteri ocantanaqui-  
tigueate morec oponeaca jenoqui  
inquitoequi oashitapojaquena anquirita-  
cotapojaquena.<sup>v</sup> <sup>7</sup>Notejanaque isaviji  
quepatsiqui toren noquemiqueate  
icantajipojana: ‘Saoro, Saoro, ¿taa  
picatsimatantaquenaca?’ <sup>8</sup>Naatimpa-  
queate nocantsitariqueate: ‘¿Taampate  
aviatimpa, Nomajirote?’ Icantanaqueate:  
‘Naatimpa naroguenti Jesoshi Nasare-  
quitica picatsimaqueca.’ <sup>9</sup>Iriraqueate  
notsipajiacaca yamenavaquerogueti  
ocantaquegueti morec, itsaroajianaque-  
quea, cotanquitsiqueate teequeate  
inquemajiqueriji quenquetsatanquitsica.  
<sup>10</sup>Naatimpaqueate nocantiri: ‘Nomajiro-  
te, ¿quero noncoquempani?’ Ican-  
ti iriatimpa: ‘Imaica pintinajanaque  
poanaque Tamashicoqui, ariqueate  
incantajiquempiqueate ontaniqui  
maasano taaca pisavicaventaqueca.’  
<sup>11</sup>Namenavaquerogueti ocantanaque-  
gueti morec ariqueate tee namenajeji,  
manaqueate yacatsajianajanaquea intati  
notsipajiacaca, yaajianaquena Tamashi-  
coqui.

<sup>12</sup>“Arikeate ichoocaque oraniqui  
apaniro icantajitica Ananiashi tsamajati-  
roca itioncacotanaqueca Moishishini.  
Maasano jorioja guntenijiatsica  
ontaniqui Tamashicoqui cameetsaqueate  
iquenquetsatacojiaqueri. <sup>13</sup>Icoraquequi-  
tiqueate inejaquitanaqueate. Yarejetapo-  
jacaguetti icampojaquenaqueate:

‘Napiguemisantarite Saoro, pamena-  
naje.’ Arikeate nocotanaja namenanaji,  
nonejaqueriqueate. <sup>14</sup>Arikeate  
icanquena: ‘Irira Irioskite avaesatinijiate  
icoguiaquempiqueate cameetsanijite  
pintsaqueronijite inintaguequeca.  
Icoguiaquempi cameetsanijite  
pinejaquerinijite irira Caavijica Icomaja-  
majata aisa pinquemaqueronijite  
icanqueca ivagantequi. <sup>15</sup>Aviatimpa  
pintsvetanqueri pintsvatacaajiaqueri  
maasano caquinte pincamanteri  
maasano pamenaguetaqueca aisa  
piquemaqueca. <sup>16</sup>¿Taampa opajita  
poguijavaque? Pincatianaqueja  
poviñacajatempa paventemparija  
Amajirote, pincajemaqueri ivajiroqui,  
cameetsanijite inquivitsitajempironijite  
piguempevare.’

<sup>17</sup>“Arikeate nopianaja Jerosarequi  
noanaquequeate tetemporoqui itsaroven-  
tantajitarica Aapani Irioshi namanaque-  
riqueate. Arikeate nonejaitatigiro  
manaqueate oquejetimotaquena  
noguimaanequi. <sup>18</sup>Inegaquena  
Amajirote icanquena: ‘Pijashiatsi  
taampina, pisotoantanaquemparo  
Jerosare, acanquitarite pintsvetantave-  
quenaqueate aato iquemisantajiguim-  
pitsi.’ <sup>19</sup>Naatimpa nocantiri: ‘Nomajiro-  
te, iriatimpajia yamenamajajiaquena  
coramani noapinitaquegueti shinagoga-  
paequi icapiocapinijiacaguetti jorioja  
naajianaqueri tsaroventajiguimpica  
nashitacojiaqueri santanaqui notavaa-  
caantajiaqueri. <sup>20</sup>Aisa coramani imetoja-  
jitaqueriguetti tsaventantimpinica  
Ishitivano, ariqueate nochoocaque  
naatimpa noshinevaetanacaqueate,  
irootaquequeate nonetsanatsitantavaja-  
ricaqueate iitsaarejia metojajiaquerica.’  
<sup>21</sup>Cotanquitsiqueate iriatimpa icantana:  
‘Pija, nontigarancaquempitarite osamani

pinquenquetsatacaa jiaqueri teeca iriojia joriojia.””

<sup>22</sup>Ariqueate iroaquequeta iquenquetasatanaquequeta Paavoro iquemisantajavetavacariequeate maasanojia, cotanquitsi iroompaqueate iquemajiaavaquerigueti iquejetanaquero imaica icantigueti inquenquetsatacaa jiaqueri teeca iriojia joriojia icajemajianaqueate:

—Imaicashia irimetoje aatoniji ichoocataji acaniqui quepatsiqui. Teequeate oncameetsateji iranijajegueti.

<sup>23</sup>Arimpaqueate icajemajianaqueri ipishoncamagojianaqueroqueate otsipamago iitsaare ipishoncavanejianaqueroqueate quepatsivane cameetsanijite intsatimentajiaquerinijite icatsimamajatatiquirinimaja Paavoro. <sup>24</sup>Irira imajirote coaretajia yoguijajianaqueri intsompogui intavaacaantajiaqueri cameetsanijite incanquequeate taa opajita icatsimamentajiaqueri.

<sup>25</sup>Iroompaqueate yoishojiavecarigueta intavaajiaquerimequeate iquenquetsata-naque Paavoro icantiri tsipatarica imajirote coaretajia catianquitsica acaniqui:

—Naroguentitarite gonorontarica Iromaqutica. ¿Arimpate pagavejaque pintavaacaanquena tequeratanicate incoacomajajitenaji?

<sup>26</sup>Iroompaqueate iquemavaquitigui yoanaque icamantaquitiri imajirote icanti:

—Aatoshiatsi pitavaacaantiritsi, iriguentisacanicate gonorontarica Iromaqutica.

<sup>27</sup>Ariqueate yoanaque ichoocaque-gueti iriatimpa icantiri:

—Iintsjia pincantena, ćarimaja avirom-paqueate gonorontarica Iromaqutica?

Icantiri:

—Jeejeguitatsi, naroguentiguitatsi gonorontarica Iromaqutica.

<sup>28</sup>Icantiri:

—Naatimpaqueate mana novegaraventaca intati oshequi imentaquipae nompeaquequeta igonorojia Iromaqutica.

Icantiri Paavoro:

—Naatimpaqueate naroguentiqueate nopeaca igonorojia Iromaqutica iroaque-ragueti novoaque.

<sup>29</sup>Ariquea iquenajianaquequea itsaroajianaquequeate tavajaiquerinemea ariquea itsipacarejajapanajantiri. Ariqueate iquejetaca imajirote coaretajia iriatimpa itsaroanaque inejaqueterite ishiticaaanqueri gonorontarica Iromaqutica.

**Yajitanaquerigueti Paavoro incoacojiteri**

<sup>30</sup>Iroompaqueate osavincaguitetana-quitigui inintaque imajirote coaretajia intsamajaquero taaqueate opajita icatsimamentajiaqueri joriojia, ishiticarejacotacaanqueri igavorejatsa-rite. Ariqueate icajemacaantajiaqueri saserorotejia anaantajianquitsica jerija majirontajatiatsica icapiocajiaqueri. Ariqueate yaajitanaqueri Paavoro yogatiajapoaqueri ichoocajiaquegueti iriatimpajia.

**23** <sup>1</sup>Irira Paavoro yamenajiaqueri sorerer majirontajatiatsica icantajiguiri:

—Nogonorojia, naatimpa ogantaga noquemisantamajatiri Aapani Irioshi nocomajamajata irosati imaica. Notsataque tee onchoocateji incatsima-timenquenaca.

<sup>2</sup>Iriraqueate saserorote anaantamaja-tianquitsica icantajitica Ananashi iquemavaquitigui icantajiguiriqueate choocajianquitsica Paavoroqui:

—Pampattoncavaganteteritsija.

<sup>3</sup>Icantanaquequea Paavoro:

—Avirompaqueate irampattoncaque Aapani Irioshi, aviatimpa mana

picameetsatamampeaca intati. Iroorijite imaica iroguenti pisavicaschivetaca acaniqui pimpampiatavaqueroqueate itioncacotanaqueca Moishishini cameetsanijite pincanque aricampate nantaque teeca oncameetsate aricaca tee. Cotanquitsi imaica mana pantaque icantimentantaqueca papatoncavagante tacaantaquenagueti.

<sup>4</sup>Irira choacajianquitsica acaniqui icantajiguiri:

—Oraqueate aato piquejetiri imaica saserorote anaantamajatanquitsica antinirica Aapani Irioshi.

<sup>5</sup>Icantiri Paavoro:

—Nogonorojia, teenicate nontsatenenica nojiqueji tee irioji saserorote anaantamajatanquitsica. Nontsaquemequeate atomequeate noquejetirome imaica. Ocantarite itioncacojiqueca: ‘Aatoja pinjashinataritsi pimajirojiate.’

<sup>6</sup>Arikeate iriraquea Paavoro yamenajiquerigueti majirontajatisca iconagarantajiacarica jerijia saroseojia, itsipa jerijia pariseojia, icajemanaqueate icanti:

—Nogonorojia, naatimpa naroguenti pariseo, iriguenti oacaantana pariseo, cotanquitsi imaica iroguenti icatsimati mentajitaquena nocanquegueti intanco rejajianaje metojajavetanquitsica.

<sup>7</sup>Iroompaqueate icantajitiguiri ariqueate icojianaca iquenquetsatava caajianaca yacavacajaianaca pariseojia jeri saroseojia icatsimatavacaajianaca.

<sup>8</sup>Icantajiaqueterarite saroseojia aato itancorejanaji metojajitsica. Icantajia queate aisa tee inchoocateji irashivantijite Aapani Irioshi, aisa tee inchoocateji jeocanquitsica. Iriraqueate pariseojia icantashitatijaiacaqueate mana icantajiaque intati intancorejajia-

naje metojajavetanquitsica, aisa chooca irashivantijite Aapani Irioshi, aisa choocaqueate jeocanquitsica. <sup>9</sup>Arimpa queate icajemajianaque maasano. Icatiagarantajianacaqueate pariseojia tsatacantajiguiroca itioncacotanaqueca Moishishini icantajiguiri:

—Notsajaqueri teequeate iranteji teeca oncameetsateji. Iriocampate quenquetsatacaqueri jeocanquitsica irioca irashivantite Aapani Irioshi.<sup>w</sup>

<sup>10</sup>Iriatimpajia arimpaqueate icatsimatavacajianaca irootaquequeate yamenantacarica imajirote coretajia yagamajacotanacari Paavoro icanti aricampa iriserajaqueri, icajemacaantantajiacarica igoaretajiate iraapitsajavjeri irajajanajeri intsompogui itsovironaquitequi coretajia. <sup>11</sup>Oraqueate osavincaguitetanajigueti coajica otsitenitanajigueti aisa irira Amajirote yonigaacari Paavoro, icatiapojaca quempeji icantiri: “Pishinetanaquempa, Paavoro, aato pitsaroguitsi. Quejetaca pitsavetanquenagueti acaniqui Jerosarequi, ariqueate pinquejeta quempa ontaniqui Iromaqui.”

### Isariajivecarigueti irimetojajiquerime Paavoro

<sup>12</sup>Osavincaguitetanajigueti iconagarantajiacarica joriojia iquemavacaajiacarica isariajiacari irimetojajiaqueri Paavoro, icantajigui:

—Imaica, aatogueti ametojiri, aato ashecajiaatsi aisa aato amirajijaatsi. Iintsijate irogashinoncrajimentajiro Aapani Irioshi aatogueti anetsanajiguiro.

<sup>13</sup>Yavisajiaquero 40 sariajicarica irimetojajigueri. <sup>14</sup>Yoashitantajianacarica saserorotejia anaantajianquitsica

<sup>w</sup> 23.9 Chooca iroquetinica tioncanquitsica ogavitaquero acaniqui, ocanti: “Oquejetacagueti, shoshoh acatsimatiritsi Aapani Irioshi.”

jerija majirontajiatsica icantajia pojaqueri:

—Naatimpajia noquemavacaajiacanocantajia que aatogueti nometojiri Paavoro, aato noshecajijaatsi. Aatogueti nonetsanajiguero nonintajia que irogashinoncajimentenaro Aapani Irioshi.

<sup>15</sup>Imaica aviatimpa poajiana que pamatajiajiaquiteri imajirote coaretajia pincantajia queriqueate iramajiana quempi Paavoro cameetsanijite pincoacotimentajia querinijite. Naatimpajia nosena cashijiava queempariequeate quenavo quirontsiqui nometojajia queri.

<sup>16</sup>Cotanquitsi iroompaqueate iquemacoquerigueti irijanite itsjoite Paavoro, yoanaque itsovironaquitequi coaretajia icamantapojaqueri Paavoro. <sup>17</sup>IroompPaavoro icajemaqueri itsipataca imajirote coaretajia, icantiri:

—Jeri irica notineri paanaqueri pimajirote qui cameetsanijite incamantimentaguetaquerinijite.

<sup>18</sup>Yoanaque itsipatanacari icamantapojaqueri:

—Irira Paavoro yashitacojita queca santanaqui icanneda namampijaque mpiri irica, inintaque incamantaguetaqueri.

<sup>19</sup>Iriatimpa yacatsatanaqueri yaanaqueri oraniqui icantiri:

—Iintsija imaica pincamantena.

<sup>20</sup>Iriatimpa icantiri:

—Noquemacojiaqueri joriojia iramatavajia que mpiri incantajia que mpiri osaitequera paajianaqueri Paavoro imajirojiatequi incoacomajajia queriqueate. <sup>21</sup>Cotanquitsi aato piquemisan tajiguirts, choocajitarite yavisajia queri 40 senacashijiava quemparineca irimetojajia queri, icantajia queritarite: ‘Aatogueti ametojiri Paavoro, aato ashecajijaatsi aisa aato amirajajaatsi. Iintsijate irogashinoncajimentajiro

Aapani Irioshi aatogueti anetsanajiguero.’ Imaica chooca yoguijacojia queri quero pincanterini.

<sup>22</sup>Iroompaqueate iquemaquitiguiri imajirote coaretajia itigarancajiri icantavajiri:

—Imaica aatoja pitsavetitsi.

<sup>23</sup>Ariqueate icajemajiaqueri mavite itsipataca icantajia queri:

—Pincajemajigueri coaretajia pincapiocajia queri, 200 irovegarajia quempa anijijiananquitsineca, aisa 70 shiacojiananquitsineca quitavaireriqui, ariquea aisa 200 ajiricajiananquitsineca imocorojamento. Oraqueate ompitseca majatana quegueti paajianaqueri Paavoro Sesareaqui. <sup>24</sup>Imaica pinetsanajigueneri Paavoro quitavaireripa irishiacotanta quempaca cameetsanjite parejetacaimentajia quemparinenjite ichooquegueti majirontatsica Perishi.

<sup>25</sup>Yojocajiava queneri paperi itionca quenerica majirontatsica Perishi ocanti:

<sup>26</sup>Narotaque Caraorio Irishia, notioncaqueri, nomajirote Perishi no pincatsatica. <sup>27</sup>Cameetsaca

pichocaque? <sup>27</sup>Imaica nonintaque nontioncacotaqueri irira Paavoro yaajiana quempaca coaretajia. Irira joriojia yaajiaqueri icatsimajiaqueri inintajiavetaca irimetojajia queriqueate, cotanquitsi naatimpa iroompaqueate noquemacoquerigueti iriguenti gonorontarica Iromaquitica noanaque notsipajianacari nogoaretajate namique riqueate naajia vajiri. <sup>28</sup>Ariqueate nonintaque naatimpa nontsataque taa opajita icatsimatimentajia queri. Irootaque queate naantajia vetanacarica ontaniqui ichocajia quegueti imajirojate. <sup>29</sup>Ariquea iriatimpa icamantajia quena iroguenti icatsimatimentajia queri yamenajia querigueti teequeate irinetsanatajeroji itioncacotana queca

Moishishini, cotanquitsi naatimpa namenaqueri tee onchoocateji querocampate iroguijaimentajqueri santanaqui aisa irimetojajitaquerigueti. Manaqueate isarijashijiavecarí intati. <sup>30</sup>Irootaqueate iroompaqueate noquemacoquerigueti isariajiacari joriojia irimetojajigueteri notigarancantacarica aviatimpaqui. Aisa nocantajiaqueri catsimajiaquerica iroajianaque inchiquiotsi incamantajiaquitempi. Imaica ariotapojaque.

<sup>31</sup>Ariqueate irira coaretajia inetsanamajajaquerero icantajiaquerica. Iroompaqueate onianquiitepojigueti yaajianaqueri Paavoro Antipatirishiqui. <sup>32</sup>Osvincaguitetanaquegueti irira coaretajia anijijiananquitsica ipiapaitanaja Jerosarequi. Irira shiacojiananquitsica quitavaireriqui irioqueate tsipajianacari Paavoro. <sup>33</sup>Ariqueate yarejerejeipojacagueta Sesareaqui yojocajiaqueneri majirontatsica paperi, ariquea icantajiguiri:

—Jeri Paavoro irica.

<sup>34</sup>Iteroncaquerogueteate yapatsajavantaquerogueta paperi, icoacoqueri Paavoro icantiri:

—¿Quero piguintenita?

Icantiri:

—Shirishiaqui.

Iquemaquegueti ariguenti iguinentita Shirishiaqui, icantiri:

<sup>35</sup>—Nonquemisanquempi incoraquejiaquegueti catsimajiaquempica.

Ariqueate icantajiaqueri coaretajia irajianaqueri imapipancotequi Erorishini, inquempoguijamajajiaqueriqueate aatonijite ishianajatsi.

Iquenquetsatacotanaca Paavoro  
ipigamentacotanaca

**24** <sup>1</sup>Ariqueate avisanaquegueti 5 savincaguiteri yarejetapojaeca Ananiashi irira saserorote anaantamaja-

tanquitsica, itsipatsipaitacari imajirojiate joriojia jeri cantacoventantatsica icantajitica Teritoro irira amitacoquerineca Ananiashi. Iroguenti icoraquetashitaque incantajigueri Perishi imajirojiate taa opajita icatsimatimentajiaqueri Paavoro. <sup>2</sup>Irira Perishi icajemacaantaqueri Paavoro. Arikeate yarejetapojatiga iquenquetsataque Teritoro icantiri Perishi:

—Noshineventajiaquempiqueate, jeematsiqueate aviguenti peanquitsi nomajirojate. Imaica nochoocajiaque cameetsa, teequeate inchoocateji aserejenaneca. Pinetsanaguetajero oshequini teeca oncemeetsavetempaji acaniqui aguinentiqui, cameetsatari piquenquejitsitacaro. <sup>3</sup>Maasano nogonorojia querocagueta ichoocajiaque itsaquerero, nomajirote Perishi, nocantajiaquempica: ‘Ariotesaa.’ <sup>4</sup>Imaica aato nasereamajajiguimpitsi iroguenti nonintaque pinquemisantaquena capichaji noncanquempica. <sup>5</sup>Irira Paavoro iriguenti caaviji yasereanti aisa yoanaque itsitacaguitejanaquerero iquenquetsatacaajiaqueri nogonorojia joriojia quepatsipaequi, arikeate icatsimatavacaajianaca itsinampirejava-caajianaca. Iriatimpa iriguentitarite jivatirica quemisantirica Jesoshi Nasarequitica. <sup>6</sup>Inintavetaca aisa incovaeguishtaquerome teemporo, irootaque naantajiacarica nonintajavetaca noncasiticajiaquerime noguijatacojiaquerome icantacaantica nomajirojate. <sup>7</sup>Cotanquitsi icoraquetaque Irishia imajirote coaretajia itaviimentaguetapajauenari yaaptsajiaquenari. <sup>8</sup>Icantajiaquena quericaca catsimataquerica Paavoro incoraquejiaque incantajiaquempi taate opajita icatsimatimentajiaqueri. Imaicaquea imaica avirompate pininquegueti pincoacotaqueri, pincoaqueriqueate cameetsanijite pintsati-

menqueronijite taaca opajita nocatsima-timenqueri.

<sup>9</sup>Irirajia joriojia tsipajiacarica icantaji-aque:

—Jeejeguitatsi, arimajaqueate icantamajataquequeate.

<sup>10</sup>Ariqueate icanque vacoc irira majirontatsica inquenquetsatantana-quempaca iriatimpa Paavoro. Ariquea icanti Paavoro:

—Noshinevaetaca pinquemisanquena imaica nonquenquetsaventanaquem-paqueti, notaquetarite pimajirontsitacani coramani, pinetsanatacopinitavajiri nogonororja. <sup>11</sup>Imaica nonintaque noncamanquempi, maasano itsajaque iroaquera avisananquitsi 12 savincagui-teri noaquitiqueate Jerosarequi notsaro-venquitariqueate Aapani Irioshi.

<sup>12</sup>Querocagueta nochoocagueque, aricampa teemporoqui, aricampa shinagogaqui, aricampa ocapiocagueta-gueti tsovironaqui, teequea ariquea noncantimajigueriji choocajianquitsica ontaniqui cameetsanijite onquenanta-quemparo noncatsimatavacaajiaquempi aroguentica incatsimatavacaajiaquempi iriatimpajia. <sup>13</sup>Querocampate irajaiquero iricajia ironigaaquempica incantajiaquequea arimaja inejajiaquena nocatsimajiaquerigueti. <sup>14</sup>Cotanquitsi jero noncamantaqueempica: noguijataco-taquero oratica icantajitica Quenavoquirontsi icantacojiavetacaca iriatimpajia, 'Iro iguemisantashitane.' Irootaque nantaque noquemisantamajataquerigueti Irioshimajaca itsaroventajianica novaesatinijiteni. Notsamajaque iroguenti iroomajaca maasano itionca-cotanaqueca Moishishini, aisa maasano itioncacotanaqueca tsavetantironica icanquerica Aapani Irioshi. <sup>15</sup>Cotanquitsi ariqueate noquejejiacari iriatimpajia notsaroventajiacari Aapani Irioshi, nocantajiaquequeate intancorejajianaje

maasano metojajiavetanquitsica.

Intancorejajianaje antajiguiroca cameetsaguetatsica jerijia aisa antague-tiroca teeca oncameetsateji. <sup>16</sup>Iroota-quequeate nonintantacaca noncoguitem-pani noncomajamaquempsa cameetsa-nijite iramenaquenanijite Aapani Irioshi jerijia maasano caquinte naroguenti comajamajatatsica.

<sup>17</sup>"Naatimpa mana nochoocaque osamani, ariqueate anaapojacagueti oshequi ajagantsi nopianaja Jerosarequi, naajianaqueneri imentaquipae napijori-ojiateni coguitejacojianquitsica, jero aisa nojocaqueneri Aapani Irioshi noguishinejantacarica. <sup>18</sup>Ariqueate noteroncaguetanajirogueti nogameetsa-tanajegueti ontaniqui teemporoqui icorajequiaque joriojia ponejajainqui-tsica Ashiaqui yamenajiaopajana, cotanquitsi tee apaniro nonejeji incapio-caventajiaquenaqueate caquinte, aisa tee nonejeji noncatsimatavacaguempaji.

<sup>19</sup>Iriomete coraquejianquitsineme imaica incantajiaquempsime taa opajita icatsimatimentajiaquenaca onchooca-queme nantaqueca teeca oncameetsateji. <sup>20</sup>Pincantajiguerijate imaica iricajia quero incantajigue. ¿Taate inejaque ontaniqui chapinqui nochoocaquegueti icapiocantajiacaca majirontajatsica? ¿Choocampate nantaqueca teeca oncameetsateji? <sup>21</sup>Aricampa iroocampa inejajiaque nocajemanaquegueti nocanquegueti: 'Iroguenti picatsimi-mentajiaquena nocanquegueti intanco-rejajianaje metojajianquitsica.'"

<sup>22</sup>Irira Perishi iquemacomajaquerota-rite ocatica Quenavoquirontsi Iroomajatatsica, irootaquequeate iquemavaquiti-guir Paavoro icanti:

—Imaicaquea ariotapojaque. Coajica incoraquetaquegueti Irishia imajirote coaretajia, irioqueate camantamajata-quitenane.

Arikeate isanticojianaji.

<sup>23</sup>Arikeate icantaqueri itsipataca imajirote coaretajia:

—Tee onchoocateji otsipa, cotanquitsi aato picantimentajiguiri incoraquepinijiaquequeate itsipajiacaca irinejapinijiaquerigueti iramajiaqueneriqueate taaca opajita icoguitejaguequeca.

<sup>24</sup>Arikeate anaapojacagueti oshequi savincaguiteri icoraquetajiqueate Perishi itsipatacaro imanquigare. Iroatimpa iroguenti jorio icantajitica Toroshira. Arikea icajemacaantaqueri Paavoro iquemisanqueri itsavetanquero-gueti quero ancoquempani aventamaja-quemparigueti Jeso quirishito. <sup>25</sup>Itsavetanquero quero ancoquempa ancomajamaquempa aisa cameetsa anchoo-caque. Aisa icanqueri coajica aapojempagueti savincaguiteri irogashinoncrajajiqueru Aapani Irioshi quempevaejias-tica. Arikeate itsaroanaque Perishi, icanqueri:

—Imaica ariotapojaque. Pijataje. Coajica aatogueti taaca opajita nosavicaventi, arikeate noncajema-caantajempi nonquemisantajempi pinquenquetsataje.

<sup>26</sup>Irguentitarite yoguijacovetavaca irojocaquenerime imentaquipae cameetsanijite irovashiantajeri irootaquequeate icajemacaantantapinicarica inquenquetsatacajaeri.

<sup>27</sup>Arikeate iquejetaquero imaica aavaetanaca mavite ajagantsi. Irioqueate piajari Poroshio Peshito. Irira Perishi manatarite inintaque irogushinejajigueri joriojia irootaquequeate tee irovashiantantajempatica Paavoro.

### Paavoro yaventacarigueti Sesa

**25** <sup>1</sup>Arikeate icoraquepojaque Peshito Sesareaqui impeguempa majirontatsica. Avisanaquegueti 3 savincaguiteri yoanaque Jerosarequi.

<sup>2</sup>Iroompaqueate yarejetapojaque icoraquetashijiaqueri saserorotejia anaantajianquitsica itsipajiacari itsipa joriojia anaantajatijsica itsojeventajapijacari Paavoro. <sup>3</sup>Arikea icantajiguiri: —Nonintajiaque pincajemaacaantenari Paavoro iramajiqueru acaniqui Jerosarequi.

Iroguentitarite icantimentajiaque cameetsanijite irisenacashitimentajavia-quemparinijite quenavoquirontsiqui irimetojajavaqueri. <sup>4</sup>Cotanquitsi Peshito icantiri:

—Irira Paavoro choocatarite yoguijaa-jitaqueri santanaqui Sesareaqui. Naatimpatarite taampinatarite nompia-naje. <sup>5</sup>Imaica pincantajigueriqueate pimajirojiate iroguijajuitanaquena-queate cameetsanijite intsavetacotimen-tajiaquerinijite arigueti arimajaca yantaquero teeca oncameetsateji.

<sup>6</sup>Irira Peshito ichoocaquiti ontaniqui 8 savincaguiteri, aricampa 10, arikeate ipianaja Sesareaqui. Iroompaqueate osavincaguitetanajigueti yoanaque isavicaque icantomajantigueti, arikeate icajemacaantaqueri Paavoro. <sup>7</sup>Iroompa-queate iquijapojaque Paavoro itsipajia-pojacari joriojia ponejaianquitsica Jerosarequi, itsojeventajiacariqueate icantajiaquequea yantaquero oshequi covaeguishemajaca. <sup>8</sup>Cotanquitsi Paavoro ipigamentanaca icantiri:

—Teequea taaca opajita nantagueteji: tee noncantashitatiguemparo icantacaantajitaquenerica jorio; teequea nanteji teeca oncameetsateji teempo-roqui, tee noncovaeguisheteroji; aisa teequeate nonijashinatempariji majiron-tatsica Sesa.

<sup>9</sup>Cotanquitsi irira Peshito ininqua-teite irogushinejajiaqueri joriojia icantiri Paavoro:

—¿Pinintaque poanaque Jerosarequi cameetsanijite noncoacomajauempi?

<sup>10</sup>Icanti Paavoro:

—Oraqueate arimete pincoacomajata-quename acaniqui, aritarite icanque majirontatsica Sesa incoacotantajita-quero acaniqui. Pitsamajataque aviatimpa tee queroca noncantimajigue-riji joriojia cameetsanijite incatsimajia-quenanijite. <sup>11</sup>Oraqueate avirogueti-queate nejaquena nantaquegueti teeca oncameetsateji, iintsija irimetojajitena, nonquemisantacoquempaqueate aatoqueate nopigamentatsi. Cotanquitsi oraqueate teegueti arimaja onchoocateji icantajiaquenaca, aato queri agavejatsi irojocaquena irimetojajiguena. Arimpaqueate nonintaque noanaque Sesaqu, irioqueate coacomajataquenane.

<sup>12</sup>Irira Peshtito icoacojiaqueri itsipatashijiacaca icantomajajiaquerigueti iramene quero incojiaquerini iriatimpajia. Ariqueate icantiri Paavoro:

—Irootarite pinintavintsataque incoacoquempi Sesa, ariqueate poanaque iriatimpaqui.

#### **Paavoro iquenquetsatacaquaquerigueti majirontatsica Aguiripa**

<sup>13</sup>Avisanaquegueti oshequi savinca-guiteri, ariqueate irira majirontatsica Aguiripa<sup>x</sup> yoanaque Sesareaqui irinejeri Peshtito. Ogujatanaquequeate itsijoite Verenise. <sup>14</sup>Ichoocajiaquegueti ontaniqui oshequi savincaguiteri, iriraquea Peshtito iquenquetsatacaquaqueri majirontatsica, itsavetacotaqueri Paavoro. Icantiri:

—Chooca acaniqui apaniro yashitacotaantaqueca santanaqui Perishi.

<sup>15</sup>Ontaniquiqueate noanaquegueti Jerosarequi, irirajia saserorotejia anaantajianquitsica jerijia aisa imajiro-jiate joriojia icoraquejiaque naatim-

paqui, itsojeventajiacari, inintajiaveca nometojacaanquerime. <sup>16</sup>Cotanquitsi naatimpa nocantajiaqueri irira Iromaqutica tee irimetojantajigueji intati, mana iroqueti incajemacaantajia-queri catsimajianquitsica jerijia icatsimajiaqueca, inquenquetsaventa-quempa inquemajiaqueri maasano.

<sup>17</sup>Irootaquequeate iroompaqueate icoraquejiaquegueti iriatimpajia acaniqui tee osamaní nogueroji, iroompaqueate osavincaguitetanaquegueti ariqueate noanaque nosavicaque nocantomajantigueti nocajemacaanqueri Paavoro. <sup>18</sup>Iroaqueragueti nojiqueji ariji incantajiaquena yantaque icantimentantica Sesa, cotanquitsi teequea inquejeteroji imaica.

<sup>19</sup>Iroguenti icantajiaquena yogaquiero yamejigaca itsaroventajigarigueti Irioshi aisa iquenquetsatacaquaqueri apaniro metojatsica icantajitica Jesoshi, cotanquitsi irira Paavoro icanti: ‘Pochatanani.’ <sup>20</sup>Naatimpaqueate anaquena nocooacotantavetacarica Paavoro: ‘¿Pinquine poanaque Jerosarequi incoacojitaquempiqueate ontaniqui?’ <sup>21</sup>Cotanquitsi iriatimpa teequea irininteji, manaqueate inintaque iroashitanaqueri Sesa, irioqueate coacotaquerine. Ariqueate nocantantacaca aato yovashiantjitiritsi ogantaga inchoocaqueni acaniqui irosati nontigarancaquerigueti ontaniqui iriatimpaqui.

<sup>22</sup>Irira Aguiripa icantiri Peshtito:

—Nonintaque nonquemaqueri naatimpa.

Iriatimpa icanti:

—Iintsija osaitequera pinquemaqueri.

<sup>23</sup>Iroompaqueate osavincaguitetanajiguegueti yoanaque Aguiripa inquemaqueri

<sup>x</sup> 25.13 Aguiripa. Irio icantajitica Erorishi Aguiripa II, irio irijanite Erorishi Aguiripa I (pamenero Ya. 12.1, aisa tioncanquitsica isavivanaqui).

Paavoro, itsipatanacaro itsijoite pajitatsica Verenise, jerijia imajirojiate coaretajia jerijia aisa jivajigurica igonorojia, netsanatacojiavaetacaqueate maasano. Iroompaqueate iquijaquijaipojaqueueti, iriraquea Peshito icajemacaanqueri Paavoro.

<sup>24</sup>Icanti Peshito:

—Majirontatsica Aguiripa, aviguenijia maasano, jeri irica Paavoro icatsimajiaqueca maasano jorioja Jerosarequitica jerijia guntenijiatsica acaniqui. Ogantaga icantajiaquena nometojacaanteri. <sup>25</sup>Naatimpaqueate namenaqueri teequeate iranteji querocampate irimetojimentajiquerica, cotanquitsi iriotarite nintanquitsi iroashitanaqueri Sesa, irioqueate coacotaquerine. Irootaquequeate nontigarancantaquemparica iriatimpaqui. <sup>26</sup>Cotanquitsi querocampate noncanteni nontioncaquenerigueti Amajirote Sesa noncamantaquerigueti taa opajita icatsimamatentajitaqueri, teenicate onchoocateji. Irootaquequeate imaica namacaantantacarica pinejajiaqueriniji aviatimpajia, aisa aviatimpa, nomajirote Aguiripa, nonintamajataque aviguenti nejaquerine cameetsanijite pincoacotimentamajataquerinijite, irooqueate nontsatantaquempaca quero noncanteri nontioncaquenerigueti. <sup>27</sup>Namenaquerotari tee oncameetsateji nontigarancashivetaquemparigueti intati santanatacotanquitsica aatogueti notioncacotaqueri taa opajita icatsimamatentajitaqueri.

**Paavoro icatiimotanacari Aguiripa  
ipigamentanaca**

**26** <sup>1</sup>Ariqueate iquenquetasatanaque Aguiripa icantiri Paavoro:  
—Iintsija pinquenquetasaventanaqueempa.  
Irira Paavoro icanti vacoc iquenquetasatanaque icanti: <sup>2</sup>Majirontatsica

Aguiripa, notsataque piquemacojiaqueri apijorijati teni icatsimajiaquenagueti icantajiaquenagueti taaca opajitapae. Imaicaqueate imaica noshinetaca nonquenquetssatacaquempigueti nonquenquetssatacoventanaquempa. <sup>3</sup>Aviatimpa pitsamajitarite yamegue-taca apijorijati teni aisa pitsati taa opajita icatsimamatentajigui. Irootaquequeate nonintantacaca pinquemisantamajatavaquena, aato piperata-natsi.

<sup>4</sup>“Naatimpa noguintenitimojiacari apijorijati teni coramani chaajamiquitirajanagueti irosati imaica. Yamenamajaji-aquena noguintenicagueti Tarisoqui jero aisa Jerosarequi, irootaquequeate itsatantamajajiaquenaca quero nocotani. <sup>5</sup>Irootaquequeate imaica irintantajiaque-gueti incamantajiaquempi, incamantajiaquempiqueate. Naatimpa noponeana-caro iroqueragueti noquenquevaritapojaque noguijatacomajataqueri pariseojia. Iriatimpajia caaviji yanaaque itsamajatiro itioncacotanaqueca Moishishini. <sup>6</sup>Coramani Aapani Irioshi icantajiaqueri avaesatiniteni intancore-jajajieri metojajatiatsica. Arikeate noquejetaca naatimpa notsataque nometojavetaquempagueti intancorejiena, irootaquequeate yaimentajiaquena acaniqui cameetsanijite pincatsimati-menquenanjite pimetojacaanti menquenanijite. <sup>7</sup>Arimajaqueate icanque Aapani Irioshi intancorejajajieri metojajatiatsica, irooqueate yoguijajiaque maasano agonorojia irirajia ichoviqui-guetaqueca 12 irijanijati teni Ishiraerini. Irootaquequeate ogantaga isavicaventajigiro irinetsanamajajiaquero intinguetica Aapani Irioshi cameetsanijite intancorejajajieri coajica. Irootaquequeate, Nomajirote Aguiripa, icatsimamatentajiaquena imaica jorioja yamenajiaquenagueti noquejejacari iriatimpajia

nocanquequeate nontancorejanaje naatimpa aisa. <sup>8</sup>‘Pijijiaqueji aviatimpajia aato itancorejajajiri Aapani Irioshi metojaquiasica?

<sup>9</sup>“Noquenquejavetaca naatimpa coramani cameetsavaetaque nantaguequeate oshequi taaca opajitapae nonticaacotantaquemparoca ivajiro Jesoshi Nasarequitica. <sup>10</sup>Arikeate noquejetaca Jerosarequi nocatsimajiaqueri nonintaquequeate noguijajiaqueri santanaqui. Irootaquequeate nocantantajiacarica saserorotejia anaantajianquitsica irojocajiaquena paperi iroonijite navenquempaca, arikea noguijajiaqueri santanaqui oshequinigomajamajare Aapani Irioshi. Oraqueate imetojajiaquerigueti noshinevaetacaqueate.

<sup>11</sup>Arikea noquejeveca nocatsimapiniji-aqueri ontaniqui maasano shinagoga-paequi icapiocantapinijiacaca cameetsanijite novashiantacaajajerinijite aatonijite itsaroventajajaritsi Jesoshi. Arikeate nocatsimamajajianaqueri irootaquequeate noashitantajianacarica osamanipaequitica aisa, nocatsimajiaqueri natsipetacaajiacariqueate.

<sup>12</sup>“Arikeate naanaquero paperi yojocajiaquenaca saserorotejia anaantajianquitsica, noanaquequeate Tamashicoqui naajigueme aisa itsipapae. <sup>13</sup>Cotanquitsiqueate, majirontatsica, iroompaqueate itampaticatapojaquegueti catsirincaiteri noavetanacaqueate quenavoquirontsiqui, y nonejaitatiguro ocantanaque morec oponeaca jenoqui inquitequi, cavorejavaequequeate anaqueriqueate ivoreguiguetu catsirincaiteri, otsirencapojaquenaqueate anquiritacotapojana naatimpa jerijia maasano notsipajianacaca.

<sup>14</sup>Maasano notejatejaitanaquequeate isaviji quepatsiqui, noquemiqueate

icantajipojaquenaqueate iguenquetsatsarequi evereo: ‘Saoro, Saoro, ñtaa picatsimatantaquenaca? Avisatiqueate atsipetacajatsi. Piquejetanacari caapironcaari impigatanaquemparigueti quempogujirica impateaterogueti inchaquiji, irisatiquea chaticavatsatajatsine.’ <sup>15</sup>Naatimpaqueate nocantsitariqueate: ‘¿Taampate aviatimpa, Nomajirote?’ Icantanaqueate: ‘Naatimpa naroguenti Jesoshi picatsimaqueca.

<sup>16</sup>Imaica pintinajanaque pincatianaque, mana nonigaaquempi noncanquempiqueate nonintaque nontigarancaquempiqueate pintsavetantanaquena pintsavetacotero maasano pamenaguequeca imaica jero aisa maasano nonigaaguequempica coajica. <sup>17</sup>Nontigarancaquempiqueate pinquenquetsatacaajajiqueriqueate joriojia jerijia aisa teeca irojia joriojia. Namiquempiqueate cameetsanijite irajaiavequempigueti irovashiantajajempiqueate. <sup>18</sup>Irooqueate nontigarancantaquempica intsatantajajempaca. Oquejetimovecariqueate opitsecashirentimovecariqueate: teetarite intsajigueriji Aapani Irioshi, iriguenti Satanashi amatavijajaqueri. Poashitanaqueriqueate pintsatacaajajiqueriqueate cameetsanijite irovashiantimentajajeronijite iquenquejaguishejiguica taaca opajitapae, aatonijite iquemisantajajajiritsi Satanashi, irioqueate inquemisantajianaje Irioshi, aisa inquemisantamajajiaquenaqueate naatimpa cameetsanijite nonetsanajajjeri, aato noquenquejacaajajiritsi iguempevaerejia, inconoajiaquempariqueate maasano nomeshiajiaqueca.’

<sup>19</sup>“Irootaquequeate imaica, majirontatsica Aguiripa, nonintaque noncanquempi nonetsanaquero maasano icanquenaca Jesoshi yonigaaquenagueti

ontaniqui quenavo quirontsiqui.  
<sup>20</sup>Iriquetiquea noquenquetsatacajiaque  
 quintenijiatsica Tamashicoqui.  
 Ariqueate noquejejaqueri quintenijia-  
 tsica Jerosarequi jerijia maasano  
 quinteniguetatsica Jore aqui. Noquen-  
 quetsatacajiaqueri aisa teeca iriojia  
 joriojia nocantajiaqueri incantashitati-  
 jianajempa irovashiantajianajero  
 iguempevaerejia, irioqueate intsaroven-  
 tamajajiaquempa Aapani Irioshi,  
 cameetsaqueate inchoocajianaje  
 intsatantajiaquemparica caquinte  
 arimaja iquemisantaqueri Aapani  
 Irioshi. <sup>21</sup>Irootaquequeate yaimentajia-  
 quenaca joriojia teemporoqui itsaroven-  
 tantajitarica Aapani Irioshi inintajiae-  
 taqueate irimetojajiaquename.  
<sup>22</sup>Cotanquitsi yamiquena itampishita-  
 caa quena Aapani Irioshi, arimpaqueate  
 notsavetantaqueri arejevaetanaca-  
 queate imaica, notsatacajiaqueri  
 irirajia anaantajjatsica jerijia aisa teeca  
 iranaantajigueji, mana notsatacajia-  
 queri icantajiguinic tsavetantirinica  
 Aapani Irioshi jeri aisa Moishishini.  
 Teequeate naashitemparo intati.  
<sup>23</sup>Iriatimpa icantajiaqueterite irantsipe-  
 vaetaquempa irira Quirishito, ariquea  
 irimetojavequempa impochatanaje.  
 Iriqueti jivatanajatsine impochatanaje  
 cameetsanijite intsavetantero tsirencu-  
 guiterimajaca intsatimenqueronijite  
 maasano joriojia jerijia teeca iriojia  
 joriojia.”

<sup>24</sup>Iroompaqueate iquemavaquerigueti  
 Peshito iquejetanaquero imaica  
 iquenquetsaventanacaguetti icajemana-  
 queate:

—iPaavoro, ariqueate pishoncacotanaca!  
 Iroorijite pisavicaventanaquero pivaperite  
 manaca oshoncacotanaquempi intati.

<sup>25</sup>Icanti Paavoro:

—Teequeate noshoncacotempaji,  
 nomajirote Peshito. Maasano

nocanquempica iroguenti arimajaca  
 teequeate namataguempaji. <sup>26</sup>Irica  
 majirontatsica Aguiripa iriatimpa  
 itsamajatiro oca nocantajiaquempica,  
 irootaquequeate noshinetantacaca  
 iquemaquerogueti maasano. Itsatiro  
 iroguenti arimajaca, teenicate iromana-  
 cojiteroji noquenquetsatacoguetaqueca  
 imaica. <sup>27</sup>Aviatimpa majirontatsica  
 Aguiripa, ¿quero pincante aviatimpa?  
 Oraqueate itioncacojaqueca tsavetanta-  
 jiguirica Aapani Irioshi coramani iro  
 iroomajaca?

<sup>28</sup>Icanti Aguiripa:

—Pajiniqueate pinquemisantacaguena  
 naatimpa aisa, nonquemisantantaquem-  
 parica Quirishito.

<sup>29</sup>Icanti Paavoro:

—Aricampa imaica, iroocampa  
 coajica, naatimpa nonintavetaca pinque-  
 misanqueme, cotanquitsi aato apaniro  
 aviatimpa piquemisanti, inquemisantaji-  
 aquequeate aisa maasano quemajiae-  
 naca imaica inquejejaquena naatimpa,  
 cotanquitsi aato yoishojitiri cavorejatsa-  
 riqui.

<sup>30</sup>Iroompaqueate icantuitigui imaica  
 icatianaca majirontatsica Aguiripa aisa  
 majirontatsica Peshito itsipajianacaro  
 Verenise. Ariqueate iquejejjianaja  
 maasano itsipajiacaca. <sup>31</sup>Yoajianaque-  
 gueti iquenquetsatacoguaqueri Paavoro,  
 icantajiaquequeate:

—Namenaqueri naatimpa teequeate taaca  
 opajita iranteji irimetojimentajiquerica aisa  
 aatomesano yoguijaa jitirime santanaqui.

<sup>32</sup>Icantiriquea Aguiripa Peshito:

—Aatomeguitatsi inchiquiotsi icantime  
 iriatimpa ininque incoacoqueri majironta-  
 tsica Sesa, ovashiantajajerimequeate.

### Yaajitanaquerigueti Paavoro Iromaqui

**27** <sup>1-2</sup>Icantajiaquequeate iroanaque  
 Paavoro Itariaqui. Icamantajia-  
 queri imajirojiate igoaretajiate majiron-

tatsica Sesa Aogoshito irajaianaqueri. Iriatimpa ipajita Joorio. Itsipatacaantajianacari itsipapae yoguijaajiguequeca santanaqui. Naatimpa notsipajianacari Arishitarico noguijaguijaitanaqueri Paavoro. Irira Arishitarico ariguenti iponeaca Tesaronicaqui Maseroniaqui. Notejianaca inirojeguiqui quenajarontsi poneanquitsica Ataramitioqui, pajini oanaque Ashiaqui onquenanaque quinteninintspaequi ontaniqui otsapijaqui quentija. Arikeate noajianaquequeate namajatacojianaque- queate.<sup>3</sup> Osavincaguítetanajigueti nagatacojipoaque Shironequi. Irira Joorio icavintsajaqueri Paavoro icantiri:

—Pijashiatzi pinejajiaquiteri pitsipavijijiaca irojocajiaquempinijite taaca opajita pintajiaqueca.

<sup>4</sup>Arikea nogaajianaca aisa, noajianaque. Pajini oguipiacotajename tampie, irootaquequeate nopitsocacottantanacaroca ovogore Tsipere antaque- ronta. <sup>5</sup>Nosenaguijacojianacaro Shirishia aisa Pampiria narejerejeipojaca Miraqui chocatanquitsica Irishiaqui. <sup>6</sup>Arikeate inejapojaquero imajirote coaretajia quenajarontsi poneanquitsica Arejantiriaqui oananchintineca Itariaqui. Irooqueate itetantajianaquena nogaajianaca aisa noajianaque. <sup>7</sup>Inchiquojisano nocantacojianaque namajatacojianaque nopomerentsijianacaro oshequi savincaguiteri. Osamani nantajiaquero cotanquitsi noquempejipojaquerogueti Guiniro oguipiacojiavaquena tampie, irootaquequeate nocononcacetantajianacaca nomonteja- cojianaqueate niganquivogorequitica icantajitica Quereta. Nopitsocacotanaca ariquerora ontaniqui oquempejigue- gueti Saramona. <sup>8</sup>Nopomerentsijianajaro nosenaguijacojianacaro Quereta, irosati narejerejeivaetani nagatacojipo- jaqueni agapiniquegueti quenajarontsi

icantajitica Cameetsatatsica Agatapini- taquegueti, oquempejiquegueti quinteninintsi icantajitica Irasea.

<sup>9</sup>Irorijite oshequiacotanaquena savincaguiteri noponeajiacagueti Sesareaqui pajini nontejaatacotaje, irootaquequeate arimpaqueate ojamajatiri ocovejencatanaqueni namajatacojianaquegueti, irootaquequeate icantantajacarica Paavoro:

<sup>10</sup>—Naatimpaqueate notsataque oajianaquegueti imaica mana antsipejianaquempa. Aato apaniro ojocajajigui quenajarontsi aisa ajaararontsi aricampa ojocajajiaquempa aatimpajia aisa.

<sup>11</sup>Cotanquitsi irira imajirote coaretajia teequeate inquemisanteriji Paavoro, iriguenti iquemisantajiaque taquijatanaqueroca quenajarontsi aisa ashintaroca.

<sup>12</sup>Oraqueate agapiniquegueti quenajarontsi teenicate oncameetsateji tejaron- tsiqui, irootaquequeate inintantajiacaca oshequini irogaajianajempa aisa, ijijiaqueji iragavejajiaquempa irarejejia- quempaji ontaniqui Penisequi chocata- tsica aisa Queretaqui, inchoocajiaque- mequeate ontaniqui iroosati irivoreana- jegueti catsirincaiteri. Ontaniquiqueate Penisequi aato yarejeta choviga ponean- quitsica oquempejitoqueroquogueti isotoguigueti catsirincaiteri. <sup>13</sup>Arikeate yamenajiavaquerogueti inchiquioji otampijatapojaque ijijiaqueji cameetsa- takeji iroajianaje arinijite aacotimenta- jianaquerinijite iquenquejajiaquegueti, arikeate inoshicajatajiro cavorejata- tsica agaparancajatatsica itetajiro- queate, arikea noajianaque nopantsapi- jatacojianaquero otsapijaqui quentija Queretaqui. <sup>14</sup>Cotanquitsi capichaji osamanijengauitepojatigui otampijata- poqueate inirojencamajaca choviga poneanquitsica oquempejitoquero- gueti isotoguigueti catsirincaiteri, ocantavaetanaquequeate jeoc jeoc.

<sup>15</sup>Nonintajiavetacaquea nonquenajata-cojianaqueme oquenapojaquegueti choviga, taaja esho oguipiacotanaquena, ariquea aacotanaquena intati choviga quenajarontsiqui. Naatimpajia noquemisantacojiavaca querocampate noncojia-vajeroni. <sup>16</sup>Arikeate noacojianaque antaqueronta otsipa niganquivogorequita icantajitica Caraora, arikeate teesaconaqueate ontampijamajatajeji. Osamaní nantajianaquero chaajaniquita quenajarontsi ishiticacojitica, najiricamajaquero. <sup>17</sup>Arikeate itejiaquero. Arikea ijijiaqueroji otsiratsiraitanaque ogotapae ipeacaantacaroca inirojegui quenajarontsi, arikeate yaguaguaataquero ishiticaquero. Aisa itsaroajianaquequeate irivanquetacojia-quemparome onicoaquegueti impanequi icantajitica Shirete, ishiticarejaquero quitsaarentsimago yogaguijijaquero cameetsanijite aacojianaquena choviga. <sup>18</sup>Cotanquitsiqueate osavincaguitevetanacagueti arimpaqueate ojatiri otampijamajatanaqueri, arikeate iparianacaro ipishoncrajaguequero ajaararontsi yamajiavetacaca. <sup>19</sup>Arikeate otsipatapojacaguetai savincaguiteri narosati-queate pishoncrajajaquero inriomagotanquitsica, ovoapae, otsipapae ashincaca quenajarontsi. <sup>20</sup>Oraquea oshequianaquegueti savincaguiteri opitsecanaquequeate teequeate irivoreajeji catsirinacaiteri aisa impoquiropae. Arimpaqueate ojamajatatiguiri otampijamajatatiguinimaja nojiqueji arijite nojocacojiaquempaji. <sup>21</sup>Naanaatacoguetanaque tee noshecajajempaji, icatianacaqueate Paavoro icantiri:

—Aviguentijiatarite cotanquitsi, pinquemisantajiaquenamegueti iroaque-raguetai nocantajiaquequempigueti arimequeate anchoocajianaqueme Queretaqui, aatomecate atsipejigame imaica, aisa aatomequeate opeagueutame

maasano pamajiavetacaca. <sup>22</sup>Imaica aato pitsaroajiguitsi ontsitiavetana-quempaqueate quenajarontsi, cotanquitsi aatimpajia aatoqueate ojocajajigatsi. <sup>23</sup>Incajaranqui tsiteniriqui icatiimotopojaquena irashivantite Aapani Irioshi ashintanaca nantavaetica, <sup>24</sup>icampojaquena: ‘Paavoro, aato pitsaroguitsi, poanaqueterite pinejeri majirontatsica Sesa. Aato yojocajatima-jigatsi apaniro pitsipajiacaca quenajarontsiqui, icavintsajaquempitarite Aapani Irioshi.’ <sup>25</sup>Nocantantajiaquem-pica aato pitsaroajiguitsi pishineji-guempa. Naatimpa notsataque irinetsa-nataquero Aapani Irioshi maasano icanquenaca irashivantite. <sup>26</sup>Cotanquitsi mana ovanquetacotacaji tampie ovogorequi.

<sup>27</sup>Arikeate anaapojacaguetai 14 savincaguiteri noquenacotashijianaca quentijaqui icantajitica Ariratico, oraqueate tampie arikeate aacojianaquena. Oraqueate onianquitepójiguetai irira taquijajajaqueroa iquenquejajiaque quempejitarojo quepatsi. <sup>28</sup>Igomarojia-quero osaanajataquegueti, arikeate ovegarapojani 36 meetero. Arikea osamanijencaguitepojiguetai imajaijiro aisa, arikea ovegarapoja 27 meetero. <sup>29</sup>Itsaroajianaquequeate itsinacacota-rotsi mapi yogaguijitantajiacaroca ovataquiqui cuatro cavorejatatsica agaparancajatanquitsineca quishotaca-aqueroneca quenajarontsi. Ishoshoguiteji-anaca yoguijajavairo savincaguiteri. <sup>30</sup>Irira taquijajiguiroca inintajiavetaca irishiajianaqueme irovashiantajianaje-namequea, yantamampeajianacaqueate iroajianaque irojocajajajaquero cavorejatatsica quishotacaaqueroneca otsovi, cotanquitsi iroguenti irojocajajajaqueme chaajaniquitica quenajarontsi inquenajatacotajianaquempameca. <sup>31</sup>Cotanquitsi iquenquetsatanaquequea Paavoro,

icantajiguirí imajirojate coaretajia jerijia aisa igoaretajiate:

—Iramerencaptsajanaquempigueti ariqueate pojocajajiaquempa aviatimpajia.

<sup>32</sup>Iroompaqueate iquemavaquitigui ipeshacojiaquero chaajaniquita quenajarontsi, ariqueate opariajatanaqueate. <sup>33</sup>Ariqueate iroompaqueate osavincaguitetanaquitigui irira Paavoro icantajiguirí maasano irishecajiguempa, icantajiguirí:

—Manaqueate anaapojacaqueate 14 savincaguiteri irosatiqueste piquempoguijajiaquero, aisa teequeate pishecajajempa. <sup>34</sup>Nocantantajiaquempica pishecajiguempa cameetsanijite pintam-pishitimentajanaquenijite, aatotarite opeimata capichajaniqui pimajeaniqui.

<sup>35</sup>Iroompaqueate iteroncanaquero-gueti icantajiaquerigueti, yaaquero pan, icatiimojiacarieate maasano, icanque-riquate Aapani Irioshi: “Ariotesaa pojocajiaquenaro nosheca”, icotareja-quero ishecatacaqueate. <sup>36</sup>Yamenacojia-querigueti maasano itampishishirejia-naji ishecajiaqueate. <sup>37</sup>Ari novegarajia 276 maasano quenajarontsiqui. <sup>38</sup>Arikea yagashecajaiyanacagueti ipishoncayaquero tirigoitsoqui cameetsanijite ogajenocajamajimenta-naquempanijite quenajarontsi.

<sup>39</sup>Ariqueate osavincaguitemajatanajigueti teequeate intsaipajeroji quepatsi, mana yamenacojiaquero ocasoguiroqui-jaatacagueti ariqueate ochoocaqueni impanequi, inintantajiacaca impanque-najianaquemparo ijijiaqueji iragavejajiaque intsinampijatacojiaquempa.

<sup>40</sup>Ipeshacojiaqueroquea cavorejatatsica agaparancajatatsica quishotacaquerocia quenajarontsi, ari ochococataji quentijaqui. Ariqueate itsajacojiaquero itaquiajatantajigaroca. Arikea itinajacotajiro quitsaarentsimago

choocatajatsica otsoviqui cameetsanijite aacotimentajanaquenanijite tampija impanequivi. <sup>41</sup>Cotanquitsi aacojiavetanaquena mana opishoncacojiaquena otampishijamajataquegueti oja, ovanquetantamajatapojacaroca impanequi otsovi. Oraqueate ovataquii otsirajanaquero otampishiaca ovore quentija. <sup>42</sup>Irira coaretajia inintajaveta irimetojajiaquerimequeate yoguijajiguettica santanaqui aatonijite yamajamajaitanaquetsi ishijaiyanacatsiqueate.

<sup>43</sup>Cotanquitsi irira imajirote coaretajia teequeate irininteji intsipatacantempari Paavoro, icantantajiacarica:

—Ariotaque icojiacani. Quericaca tsajatsica yamajajigui iriqueti jivajiananquitsine iramajamajaitanaque iragajianaque. <sup>44</sup>Iriraqueate teeca intsajigueji iramajajigueji irajaianaque inchacotapae aisa taaca opajitapae cameetsanijite iragatimentajianenijite.

Arikeate noquejetacaajianacaro imaica nagajiapojaque maasano otsapijaqui.

### Ichoocajianaquegueti Paavoro Marataqui

**28** <sup>1</sup>Iroompaqueate nagajiapoja-quegueti maasano, icamantajitaquena ocatica ovogore opajita Marata.

<sup>2</sup>Irira guntenijiatsica oraniqui cameetsaqueate yaajiavaquena icavintsaipajivaquena itsitacashijiavaquena paamari, catsincaguitevaetaque-tarite otejaqueterite incani. <sup>3</sup>Irira Paavoro yaviguetapojaque inchajem-pequi. Iroompaqueate itsitacavetacarogueti iquemaitatiguirí tac camaarini iracoqui, isoaancanaca oguishianaqueri paamari. <sup>4</sup>Iriraqueate guntenijiatsica oraniqui yamenajiavaquerigueti itsatanaca iracoqui, icantavacaajianaca:

—Iriocajate metojantsica, irootaqueate yagavetajagueti yojocajavetaca-gueti, imaica irioqueate atsicaqueri

camaarini. Aricajate yogashinoncajimentaqueri Irioshi.

<sup>5</sup>Irira Paavoro ipotecaqueri paamariqui, cotanquitsi teequeate ireeretanaqueri. <sup>6</sup>Iriatimpajiaqueate ijijiaqueji arijite ireeretanaque ariqueate inquenaque intejanaque irimetojanaque, cotanquitsi yoguijajiavecari intati tee iragavejeriji. Arikeate icantajiaque:

—Iriocajate irioshitatsica.

<sup>7</sup>Choocaqueate quempeji iguepatsi-tepae Povirio, irio jivatanquitsica ovogorequi. Iriatimpayaaquena icavintsaajajavaquena, ariqueate nomaimojianaqueri 3 savincaguiteri. <sup>8</sup>Yojequijitacaquea iriri Povirio, inorijaca, icatsirincajencatanaque, ishijatacotaquero iriraja. Arikea yoanaque Paavoro irinejeri. Yamanaco-ventapojaqueri ipamitapojaqueri, ariqueate ipeanaja. <sup>9</sup>Iroompaqueate iquemacojiaquitiguiri icoraquetashijiaqueri maasano ashinoncajajitsica iroveajajerita, ariqueate iriatimpayoveajajiri. <sup>10</sup>Iriatimpajia ishineventajiquenaqueate icavintsaajajavaquena. Arikeate nonetsanajianaja noajianaje, yojocajajavaquenaqueate maasano nocoguitejajiaqueca.

#### **Yarejetapojacaguetti Paavoro Iromaqui**

<sup>11</sup>Arikeate nochoocajianaqueni 3 taai ontaniqui ovogorequi. Notejianaja quenajarontsiqui poneanquitsica Arejantiriaqui. Chooca isheroncaguetica ontaniqui otsoviqui, iquejetacaacari irioshivijrentsitsipari, aparo icantajitica Caashitoro, itsipa Poroquishi. Irira ashintaroca ichooxcavaetanaquequeate oraniqui niganquivogorequitica nochoocatantajiacaca naatimpajia, yoguijajauquero osariapojaqueate. <sup>12</sup>Arikeate noajianaji nagatacojiapanajanti Shiracosqui, ariqueate nochoocajianaque 3 savincaguiteri. <sup>13</sup>Arikeate nogajia-

naca aisa, noquenacojianaque otsapijaqui narejevaetaniqueate Irejioqui. Osavincaguitetanajigueti otampijapojaqueate aacojianaquena noquenquejaquegueti. Namajatacojianaque mavite savincaguiteri, narejejiaica Potejoriqui. <sup>14</sup>Arikea oraniqui nonejajia-pojaqueri napiguemisantarijiateni. Iriatimpajia yaajiaquena icantajiaquenatarite: “Pinchoocatimojianaquenataja 7 savincaguiteri.” Arikeate noajianaque Iromaqui. <sup>15</sup>Irira napigue-misantarijiateni Iromaquitica iquemacojiaquenagueti iconoagarantajiaquaqueate icoraquejiaque itonquivojajavaquenaquea Pororeapioqui. Itsipa mana icoraquejiaque yoguijajavaquena ontaniqui icantajitica Tereshi Taverenqui. Irira Paavoro iroompaqueate yamenajiaipojaquerigueti icampojiri Aapani Irioshi: “Ariotesaa”, ariqueate ishinevaetanaca. <sup>16</sup>Arikea noajianaque narejejiaica Iromaqui. Irira imajirote coaretajia yaajianaqueri yashitacojitica, yojocajiaipojaqueneri imajirote coarefa santanaqui. Icantajiqueriquea Paavoro inchoocatashiquempa iriatimpay, iramenaqueate apaniro coarea.

<sup>17</sup>Ichoocatapojigueti 3 savincaguiteri irira Paavoro icajemacaanqueri joriojia anaantajajitsica icantajiguiri:

—Napijorijiateni, teequeate nonijashiji-guempariji agonorojia, aisa teequeate noncantashitatiguemparoji icanqueca avaesatinijiate coramani, cotanquitsi iriatimpajia yaajiaquena Jerosarequi, ariqueate yojocajiaquenari yaajianaquena Iromaquitica. <sup>18</sup>Arikea yagajianaquegueti majirontajajitsica icoacojiaquenagueti inintajjavetaca irampaquijajajename, itsaqueterite teequeate taaca opajita nanteji querocampate irimetojimentajiquenaca. <sup>19</sup>Cotanquitsi irira agonorojia joriojia tee irinintajigueji irampaquijajajena, irootaquequeate nocantantajiacarica

Peshito noncoraquetaque acaniqui cameetsanijite incoacoquena Sesa. Cotanquitsi teequeate noncatsimajiqueriji agonorojia, iroguenti nonintaque nonquenquetsaventaquempa.<sup>20</sup> Irootaquequeate nocajemimentajiaquempica imaica cameetsanijite namenajiaquempi nonquenquetsatacaajiaquempi. Pinejantajiaquenaca ishitajiaquena cavorejatsariqui mana notsavetanqueri irira Quirishito agujajia-vaqueua atimpajia ishiraerijia.

<sup>21</sup> Iriatimpajia icantajiguiri:

—Irira guntenijiatsica Joreaqui teequeate impacaantimajiguenuji paperi tsavetanta-quempineca, aisa agomorojia coraquejianqui-tsica teequeate incantimajigueji: ‘Chooca yantaqueca’, teequeate incantaguishetacojiguempiji.<sup>22</sup> Imaica nonintaque nonquemisantajiaquempi quero pincantenri aviatimpa. Noquemacojiaqueritarite maasano gunteninintispaequi icatsimajiguiritarite quemisantajiguirica Jesoquirishito.

<sup>23</sup> Arikeate yoajianajigueti icantajianaqueri querocaguetti savincaguiteri incoraquetantajiaquempaca inquemisantajiaqueri. Arikeate aapojacaguetti incoraquetantajiaquempaca icorakejiaquequeate oshequi iquemisantajiaqueriqueate. Iriatimpa imapocanaquero iquenquetsatanaque-queua iroquerasano savincaguitetamananquitsi arikeate itsitenijenaguitetacovaetanaque itsavetanqueri Aapani Irioshi quero icota imajirontaguetti. Iquejejianaquerigueti imaica cameetsanijite inquemisantimentajiaquerinijite Jesoshi, iroguenti ipampiataque itioncacotanaqueca Moishishini jero aisa itioncacotanaqueca tsavetantajiguirinica Aapani Irioshi.

<sup>24</sup> Iconoagarantajiacaqueate iquemisantajiaqueri, choocaqueate itsipapae teeca inquemisanteriji.<sup>25</sup> Arikea iriatimpajia yamenajiaquegueti tee inquemavacaajiguempaji, arikea

yoajianaji. Irira Paavoro icantajiajavajiriqueate:

—Arimajasacanicate icantamajataque Ishire Aapani Irioshi coramani iquenquejacaquerigueti tsavetantirinica Isaashini, ariqueate irioqueate cantajiaqueri avaesatinijiate icanti:

<sup>26</sup> ‘Pijashia pincantajiaquiteri irica caquinteja:

“Pinquemajiavequempaquea, cotanquitsiquea aato piquemajiajirotsi.

Pamenajiavequempaquea, cotanquitsiquea aato pitsatimajavajirotsi.”

<sup>27</sup> Iquishoshirentanaqueterite iricajia.

Oraquea iguempita tee inquemama-jatantajemparo, aisa imatsivocajataque, aatonijite inejantajiajarotsi iroquija, aatoniji iquemantajiajarotsi iguem-pita,

aatoniji itsajigui ishirequi, aatoniji ipitsocashijigana nogueshi-shirentantajemparica.’

<sup>28</sup> “Imaica nonintaque noncamantamajiaquempi iriotaquequeate inquenquetsatacaajitaque teeca iriojia joriojia incamantajitaqueriqueate quero icota Aapani Irioshi imeshantigueti. Iriatimpajia inquemisantamajajaque.”

<sup>29</sup> Iroompaqueate icantitigui Paavoro arikeate yoajianaji joriojia, itampishi-jencajianaque iquenquetsatavacaajianaca.

<sup>30</sup> Iriraqueate Paavoro ichoocaguitini mavite ajagantsi. Ogantaga ivesgaraqueri ashintacaroca tsovironaqui cameetsanijite irimaantimentaquemparonijite. Yaajiavaqueri maasano coraquejiatsica.

<sup>31</sup> Itsavetantiri Aapani Irioshi quero icota imajirontaguetti. Itsatacaajiaqueriqueate itsavetanqueri Amajirote Jesoquirishito. Teequeate intsarogueji, aisa tecatsiqueate ticaguerineca.

# PAAVORO ITIONCAJIAQUENERI IROMAQUITICA

**Antsatantaquemparoca**

Ocatica iroguenti antsatantaquemparoca itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica quinteninintsiqui pajitatsica Iroma. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31). Itioncacotaqueri ichoocaquegueti Iromaqui otsapapaequi Ya. 28.14-31. Tequeratagueti intioncacaanteroji Paavoro ocatica itioncacaanquero otsipapae mavite paperi itioncajiaqueneri Tesaronicaquitica, aisa otsipa mavite paperi itioncajiaquenerica Corintoquitica, otsipa paperi itioncajiaquenerica choocajianquitsica provinciaqui pajitatsica Garashia. Coajica icamantaqueri Tereshio intionquero ocatica paperi intioncagigueneri choocajianquitsica Iromaqui (16.22). Paavoro icantaqueri Tereshio maasano intioncaqueca ocaniqui ocatica paperiqui. Itioncacaantaqueco ajagantsiniqui irooca 56 irooca 57, otsipatapojacaguetti iquenaguetanaquegueti quepatsipaequi itsavetantavaequerigueti Jesoquirishito. Itioncacaantiquerogueti Paavoro ocatica paperi iquenquejajitaque ichoocaque Corintoqui irooca otsipaqui quinteninintsi choocatanquitsica quepatsiqui pajitatsica Guereshia.

Ocaniqui paperiqui itioncacaantaqueca Paavoro itsatacaajiacaji maasano atimpajia caquinteja yamenajiacaji Aapani Irioshi chooca antaqueca icantimentantaqueca iriatimpa. Irirampani Jesoquirishito yamenaquevi Aapani Irioshi teequea inquempevaetimatempaj. Itsatacaacaji quericaca aventaqueempareca Jesoquirishito metojaventajiacajica iramenaquevi Aapani Irioshi quejetaca tee inquempevaetimatempaj. Itsatacaajiacaji quero ancojiaquempani aatimpajia quemisantajiaquerica Jesoshi anchoocajiaqueniji cameetsa, anetsanaguetaqueroniji inintaguetica Aapani Irioshi yamitacojiajigueti Ishire.

---

**1** <sup>1</sup>Naroguenti Paavoro tiona-  
quempica, iriguenti ashinquena  
Jesoquirishito, icajemashirenta-

quena nompeaquempa itigarancane,  
inintacaquenaquea nontsavetantero  
Quenquetsatsarentsi Oganejencata-

tsica<sup>a</sup> itigarancaqueca Aapani Irioshi. <sup>2</sup>Oraticaquea Quenquetsatsarentsi Oganejencatatsica irootaquea icantsitacaca coramani itioncacaquerigueti tsavetantajatsica tioncaqueroca Tionarentsi Iroomajatatsica. <sup>3</sup>Iriguenti icantacoque Irijanite Aapani Irioshi, iriotari Amajirote Jesoquirishito. Oraquea icaquintetapojaquegueti, iriguenti choviquivaetanaqueri majirontatsica Taavini. <sup>4</sup>Arikea imetojavecagueti Amajirote Jesoquirishito manaquea ipochatanaji, yonigaantantacaroca iriguenti Irijanite Aapani Irioshi, aisa irooqua itsatantajitaroca iriguenti caaviji yagavejamajati, yonigaantaqueriquea Ishire Iriomajaca. <sup>5</sup>Iriraquea Aapani Irioshi icavintsajamajajiaquenaquea, inintacaantajiaquenaca Jesoquirishito nomeajiaquemparaeua itigarancane nontsavetantimojiaqueri maasano caquinteguetatsica cameetsaniji inchoocagarantajiaqueniji aventaventaiquemparineca Aapani Irioshi tsaroventajiaquemparineca irinetsanatantajiaquemparoca icanquerica. <sup>6</sup>Arikeate iquempatajiaquempiquea aviatimpajia inintacajiaquempi Aapani Irioshi irashintajiaquempiquea Jesoquirishito.

<sup>7</sup>Nontioncajiaquempiquea aviatimpajia guitenijiatsica oraniqui Iromaqui, ipintsajiacaca Aapani Irioshi icajemantajiaquempica pimpeajiaquempaniji igomajamajare.

Namanacoventajiaquempiquea incavintsajajiaquempinijite Aapanite

Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

### Inintaveca Paavoro iroanaquemequeate Iromquiniqui

<sup>8</sup>Imaica iroquetitaquea noninque noncamanquempi, querocagueti quepatsipaequi itsavetacojiquempiquea aviatimpajia caaviji pitsaroventamajianacari Aapani Irioshi. Irootaqueuea nariotesatantanacarica Aapani Irioshi, iriotaqueuea agavejacaquenaca Jesoquirishito noquempetancaroca imaica. <sup>9</sup>Yamenaquea Aapani Irioshi nocantacoguitani namanacoven-tajiaquempiquea, aparo iriatimpa nosavicaventaqueuea, notsavetanta-quero Quenquetsatsarentsi Oganejencatatsica tsavetacoquerica Irijanite.

<sup>10</sup>Oraqueate namanacoventajiguimpi-gueti nocanqueri Aapani Irioshi iriogueti nintanquitsine intigarancaque-naqueate noanaquequea oraniqui aviatimpajiaqui namenajajatempi.

<sup>11</sup>Noninquequea namenajajatempi namitacojiaquempiniji pishirequi pintampishishirentantamajajianaquempaca. <sup>12</sup>Teequea arikeate noncanteji aparo nontsatacaajiaquempiquea naatimpa, iroguenti nocanque noninque antampishitavacaajiaquemparaeua aatimpajia, arikeate aquejetavacaa-jiacata atsariventajiacarigueti.

<sup>13</sup>Napitsaroventarijateni, noncamanquempi nopintsapintsavecaqueate namenajajatempiquea, cotanquitsiquea teequea nagavejeji noncoraqueteji arejevaetanaca imaica. Iroguenti nopintsatashivetaca nontsavetantimojia-

**a 1.1** *Quenquetsatsarentsi Oganejencatatsica*. Irootarite tsavetantaquerica Jesoshi Irijanite Aapani Irioshi, shetacoshirentajiaquerineca maasano coguisherijia aventaventaiquemparineca.

quitempi pimpishivoroquijacoshirentimentanaquempanijite pinquempetanta jianaquemparica guinteniguetatsica osamanipaequitica notsavetantimojia querigueti.<sup>14</sup> Ininqueuate Aapani Irioshi nontsavetantimojiaqueriquea maasano, irioca gurilego irioca teeca iriguiriegote, irioca tsavaetatsica irioca teeca intsavaeteji, namenajiaqueritarite inchoocatetajate tsavetantimotaquerineca.<sup>15</sup> Irootaquequea nonintantacaca noncoraquetaquequea nontsavetantimojiaquempiqueate aviatimpajia guintenijatsica oraniqui Iromaquiniqui, nontsatacayaquempiro Quenquetsatsarentsi Oganejencatatsica.

#### **Agavejica Quenquetsatsarentsi Oganejencatatsica**

<sup>16</sup> Teequea nompashiventacaguemparoji Quenquetsatsarentsi Oganejencatatsica tsavetantaquerica Jeso quirishito, iroguentitarite iragavejane Aapani Irioshi irimeshiantajiaquemparica maasano aventaventaiquemparineca. Iriquetitaquea intsavetantimojitaque quea joriojia, iroompaquea inquempetsijiguempariquea teeca irijorijoigueji.<sup>17</sup> Oratica quea Quenquetsatsarentsimajaca otsatacayaquici quero icota Aapani Irioshi icomajashirentacaajarigueti caquinteja. Iroguenti icomajatacaya jaa irirajia aventaventajiacarica aisa nintanajatsiquea yaventajiacari. Arikea ocanque itioncrajiquea: “Irira quea comajashirentanquitsica incoquempani inchoocaguiteni irooriji yaventaguitarini Aapani Irioshi.”<sup>b</sup>

#### **Aapani Irioshi icatsimajiaqueri covaeguishejiatsica**

<sup>18</sup> Irira quea Aapani Irioshi choocata tsica inquitequi yonigaantacaro

igatsimare, icatsimamajatiriquea maasano teeca intsaroventempariji aisa maasano peacaaguishejiacaroca covaeguisherentsipae. Iriatimpajia iticaaqueroreua iroomajatatsica, iticaantavacaro igovaeguishere.<sup>19</sup> Chocaguetaqueterite iragavejaqueca caquinte intsaguetaque quero icoguetani Aapani Irioshi, ariquea itsajavecara quea iratimpajia, inchiquiojita yoguiconijataqueneri iratimpajia.<sup>20</sup> Aatimpajia teequea amenajavetempariji Aapani Irioshi, cotanquitsiquea oraqueate yamenajiguetirogueti maasanopae ipeacaaguecaca paesatoniqui iroaqerugueti ipeacaacarogueti quepatsi aisa maasanopae chocatantaguetaroca, ariquea iroguenti itsajiquero iriguenti Irioshimajaca caavijica yagavejamajati, incoguitempani iragavejaguiten, jero aatoquea queri agavejatsi incantamate: “Naatimpa teequea nontsateroji.”<sup>21</sup> Itsajievashinete chooca Irioshi, cotanquitsiquea teetari intsaroventajiguempariji, teequea intsaroacaajiguempariji, teetarite incanteriji: “Ariotesaa”, iroguenti iquenquejaguishevaequero covaeguisherentsi, jero teeca intsatimajigueji, quejetaca quea ipitsecashirentacojiana que. <sup>22</sup> Icantajia vecaquea: “Notsamajajigui”, cotanquitsiquea teequea intsajigueji.<sup>23</sup> Yovashianta queri iroganejencare Irioshimajaca icocanica ichoocati, iroguenti ishineventajaja irioshivijijiacaca intati ipeacaacaca iratimpajia, iquejetaca avevari caquinte teeca inquishometojaneteji, iquejetaca avevari aisa quejearica araguetatsica, canaaguettatsica, soaancaguettatsica.

<sup>24</sup> Irootaquequea iticaarejantanacaca Aapani Irioshi impeacaaguishejiguemparota taaca inintaguishejiaqueca iratimpajia, ariquea yaagavacaajianaca

impashiventacaquempameca.  
<sup>25</sup>Teequea inquemisantajigueroji  
 iroombajaca quenampojacarica  
 Irioshimajacaqui, manaquea ipiacaanta-  
 jaro amataarontsi. Itsaroventsijavetari-  
 quea ipeacaajicaca, ishineventaguitarini,  
 teequea intsarovenatajiguemparaji  
 Peacaavecari. Cotanquitsiquea  
 iriatimpa ancoguitempani ashineventa-  
 guitemparini ancantajiaqueriquea:  
 "Caaviji poganejencamajata." Ari  
 oncoquempa.

<sup>26</sup>Irootaquequea iticaarejantanacaca  
 Aapani Irioshi impeacaagushejiguem-  
 parota inintaguisheguetaqueca impash-  
 ventacaquempameca. Oraquea  
 manquigarentsijia teequea onintajiajeji  
 irimanquigatajemparoji shirampari,  
 manaquea onintaguishetavacaajanaca  
 apimanquigarojate. <sup>27</sup>Arikea iquempe-  
 jiaca shiramparijia teequea irinintajia-  
 jeji irimanquigatajemparoji manquig-  
 rentsji, manaquea yaagavacaajanaca  
 irapishiramparijiate opeacojianaqueri-  
 quea itiontare. Inchiquiojita iquempeta-  
 caantajiacaquea iriatimpajia yatsipetan-  
 tajiacaca iroorijite ipeacaagushejiana-  
 caro ovashiventajantaguetatsica.

<sup>28</sup>Teequea irinintajigueji inquenqueja-  
 cojiajeriji Aapani Irioshi, irootaquequea  
 iticaarejantanacaca inquenquejaguise-  
 jianaquero tontarentsijencani ipeacaag-  
 guishejianaqueroa covaeguisherentsi.  
<sup>29</sup>Iroguenti isavicaventajiaque cantashi-  
 tatiaguishejencatatsica: ipeacaagusheji-  
 anacaroquea tontarentsijencapae,  
 inintsiguequeriquea irashijiapae  
 itsipapae, itsipatacaantavacaro  
 covaeguisherentsi, icatsimatacotan-  
 taque, imetojantajiaque, icatsimatantaji-  
 aque, yamatavijantajigui, iquenashivae-  
 pojaca intati, aisa icantaguishetacojia-  
 queri igonorojia. <sup>30</sup>Itsojeventajiacari  
 itsipapae, isemajiacari Aapani Irioshi,  
 caaviji ipigatsatanta, yamenajiaque

caaviji yanaajencavaeque, yaventajia-  
 caro maasanopae itsanirore. Yaagushe-  
 tashiguetaqueroa impeacaagushejia-  
 quempaca. Teequea inquemisantajigue-  
 riji irijanintajiacarica. <sup>31</sup>Tee irinintajig-  
 ueji intsajiaque, tee irinetsanajigueroji  
 icanqueca, tee impintsatantajiguempaji,  
 tee impeacotantempaji, tee impintsata-  
 cotantempaji. <sup>32</sup>Itsajiavecaroquea  
 icanque Aapani Irioshi quericaca  
 quempetanquitsineca imaica irimetoja-  
 quegueti iroanaque camorecariqui,  
 cotanquitsiquea iriatimpajia teequea  
 inquemajigueji, arimpaquea yogaajia-  
 naca ipeacaagushejianaqueroa  
 covaeguisherentsi, yogavitsitaroqua  
 ishineventajiacari yamenajiaquerigueti  
 itsipajia ipeacaagushevaetacarogueti  
 covaeguisherentsi.

#### Aapani Irioshi teequea incatsimatantashitempaj intati

**2** <sup>1</sup>Piconoagarantajiacaquea aviatim-  
 pajia manaquea picantajiaque  
 cameetsavaeque incatsimamajajiquer-  
 quea quempejiaqueroca imaica.  
 lintsijate pamenajiguejate intati.  
 Oraquea picantajiaquegueti imaica  
 aviguentiquea quempetacaantajianqui-  
 tsica, pipeacaagushejiacarotari aviatim-  
 pajia aisa ipeacaagushejiacaca  
 iriatimpajia. ¿Arimpate quero pincojia-  
 querini Aapani Irioshi aatonijite  
 icatsimajiguimpitsi? <sup>2</sup>Oraquea icanque-  
 gueti Aapani Irioshi incatsimajiaqueri  
 quempeguequeroca imaica, itsamajaj-  
 quero manaquea ipeacaagushejiacaro-  
 quea covaeguisherentsi, teetarite  
 incatsimatantashitempaj Aapani Irioshi  
 intati, iroombajaca maasano icanqueca.  
<sup>3</sup>Aviatimpajia picantajiaveca incatsimaj-  
 jiqueriquea quempeguequeroca imaica,  
 cotanquitsiquea irooriji piquejejiavaca  
 pipeacaagushejianaqueroa quempe-  
 guetaroca ipeacaagushejiacaca

iriatimpajia, ¿arimpate quero pincojia-quempani aatonijite icatsimajiguimpitsi Aapani Irioshi? <sup>4</sup>Jmm aricajate pimanintavaquero igavintsajare icavintsajantantamajatigueti, aisa yatsipetacojiaquempigueti, pamenaji-aque tequerata incatsimajiguempi.

¿Arimpate teequea pintsajigueji manaquea icavintsajajiaquempi cameetsaniji povashiantajianajeroniji pipeacaagushejiacaca pincantashitati-jaianajempaja? <sup>5</sup>Cotanquitsiquea piquishoshirentajiaque, aisa teequea pinitajiguenica povashiantajigueroji pipeacaagushejiacaca cameetsaniji pincantashitati-jaianajempaniji. Arimpaqueate picovaeguishejianaca, teequea pinquenquejajigueroji oncoramanitapo-jajegueti arejetapojaquemparogueti incatsimatantajiaquemparica Aapani Irioshi caquinteja, caaviji irogaamajajiaquempiquea incatsimajiaquempi, pinquejetacaantajiaquempsa. Iriraquea Aapani Irioshi incantamajajiaqueri maasano querocaca icojiacani.

<sup>6</sup>Iriatimpa itsamajatiroquea ipeacaaguishejiacaca maasano, aisa itsamajatiro cameetsaguetatsica ipeacaaguetacaca maasano, incantantaquemparica quero incojiquerini. <sup>7</sup>Iconoagarantajiaaca caquinte icantacotacaaguitarini icomajamajaca, irooriji intintajiaque iroganejen-catacaavajempari Aapani Irioshi, irishineventajavajempari inquitequi, incoguitempani iranijaguiten. Maasano quempejiatsica imaica incantajiaqueri Aapani Irioshi incoquempani inchoocajiaque iriatimpapui. <sup>8</sup>Cotanquitsiquea caaviji incatsimamajajiaqueriquea maasano iroguentigueti irisavicaventajigue taaca intintajiguica iriatimpajia, maasano teeca irinintajigueji inquemi-santajigueroji iroomajatatsica, manaquea ipeacaagushejiacaroquea covaeguisherentsi. <sup>9</sup>Irantsipejiaquempsa

quea incanquempsa maasano caquinte peacagaroca covaeguisherentsi, irishimampojancajiaquempaqueate. Irantsipejiaquempsa joriojia, iroompaquea inquejetsijianaquempsa aisa teeca irijorijoigueji. <sup>10</sup>Cotanquitsiquea iriraquea comajamajajatiatsica iroganejencatacaaajavajempari Aapani Irioshi, irishineventajavajempari inquitequi, inchoocamajapojae cameetsa, aatoquea ochoocatimatajitsi asereajerineca. Ariqueate inquempeta-caajiaquempsa maasano iriatimpajia, joriojia aisa teeca irijorijoigueji. <sup>11</sup>Aapani Irioshi yamenajiaqueriquea caquinteguetatsica ijimirincae, aato ichoocatitsi impeacoquempaca.

<sup>12</sup>Maasano covaeguishejiatsica incatsimajiquer. Irirajia teeca intsajiavetem-paroji igantacaantane Aapani Irioshi itioncacotanaqueca Moishishini incatsimatimentajitaqueriquea iriatimpa igovaeguishere aisa, cotanquitsiquea aatotarite icantajiguiritsi Aapani Irioshi: “¿Queroquea ococani teequea pinetsanajigueroji nogantacaantane?” Iriraquea tsajiavecaroca cotanquitsiquea nintanatsi icovaeguishejiaca irioquea iriguenti incatsimamajajiaque Aapani Irioshi inquenquejacaajiaqueriquea, teetarite irinetsanajigueroji. <sup>13</sup>Teenica irioquea yamenajiaque Aapani Irioshi icomajashirentaca irirajia quemajajavetaroca intati igantacaantane, iriguenti-quea incantacojiaque icomajashirentaca netsanamajatiroca. <sup>14</sup>Iriraquea teeca irijorijoigueji teequea intsajiavetemparoji igantacaantane itioncacotanaqueca Moishishini, cotanquitsiquea oconoaca-queate icomajamajaca iquempetacajia-caroquea itioncacojiquerogueti, inchiquiojita itsatashijiacaroquea iriatimpajia. <sup>15</sup>Oraquea iquempejiacu-gueti imaica itsajiquero itsajiaqueriquea iriatimpajia querocaca

incojiaquempani incomajamajajiaquem-pagueti, iriguentiquea tsatacajiaqueri-quea Aapani Irioshi quejetacaquea itioncajitaro iguenquejanequi, oconoaca-quea iquenquejantajiacaca: "Nocovae-guishetaca", oconoacaquea aisa iquenquejanaque: "Cameetsataque nantaqueca." <sup>16</sup>Ariqueate onquempeta-naquempa oncoramanitapoja jegueti arejetapojajempagueti incantantaquem-parica Aapani Irioshi Jesoquirishito incatsimajiaqueri maasano senacajive-caroca ipeacaagushejiacaca. Irootaque ocanque Quenquetsatsarentsimajaca Oganejencatatsica notsavetanqueca.

### Joriojamajaca

<sup>17</sup>Cotanquitsiquea piconoagarantaca picanque: "Naroguenti jorio, aatoquea icatsimatanatsi Aapani Irioshi, notsama-jatirotarite itioncacotanaqueca Moishishini." Manaqueate aisa pisemeti pijiqueji aviguenti ivintsaremajaca Aapani Irioshi. <sup>18</sup>Pijivecaji pitsaqueroji inintica Aapani Irioshi, aisa pitsatiro-quea taaca opaji cameetsatatsica irooca aisa taaca opaji covaeguishetatsica.

<sup>19</sup>Aisa pijivecaji caaviji panaaque pitsati, jero pinitantacaca printsatacaa-queriquea teeca intsateji, pijivecaji piquejetacari acatsavacotanaquerica shamponcrajari, pijivecaji piquejetacari tsirencacotaquerica pitsecacotsatsica.

<sup>20</sup>Inchiquiojita pipeaca tsatacaantanta-tsica pamenaque ariqueate pagavejaque printsatacajiaqueriquea teeca intsateji aisa iriaqueraca tsajiananquitsica taaca opajita cameetsaguetatsica aisa taaca opajita covaeguisheguetatsica, pamena-queterite pitsamajaqueroquea itioncacotanaqueca Moishishini, aisa pamenaque irooqua tsatacaaqueroniji maasanopae taaca opajitapae itsavaejitica irooca aisa maasanopae iroomajaca. <sup>21</sup>Iriguenti-

quea pitsatacajianaquequea itsipapae, ɿari pitsatacaacampa aviatimpa? Arikea oquempetaca picanque: "Teequea oncameetsateji paitsitante-gueti", ɿarite paitsitantimpa aviatimpa? <sup>22</sup>Irootaquequea picanti aisa: "Teequea oncameetsateji poashitirotsi manquigarents", ɿarite poashitantimpa aviatimpa? Arikea iquempetaca ipeajitica irioshivijijitacaca intati, irootaquequea pamenaquequeate covaeguishevaeca, ɿarite paitsitirimp yashintacajaigueta carica choacagueta-tsica iteemporotequi? <sup>23</sup>Pisemetacocaro pitsavetarogueti igantacaantane Aapani Irioshi itioncacotanaqueca Moishishini, cotanquitsiquea aatogueti pinetsanatiro ocanqueca manaquea oquejevetaca picantaguishetacotaqueri Aapani Irioshi. <sup>24</sup>Arikea otioncacaquea ocanque: "Irirajia teeca irijorijoigueji icantagui-shejiaqueriquea Aapani Irioshi, aviguentijiaqueate quempetacaantajiaqueri."

<sup>25</sup>Aviatimpajia napijorijati teni pamenajiaque totsaiquijiaquempi pichonquimashi pijijaqueji arikea irishineventajiaquempi quea Aapani Irioshi, cotanquitsiquea naatimpa noncantajiaquempi quea pinetsanamaja-jiaqueroja maasanopae itioncacotana-queca Moishishini, arikea iroguenti irishineventajiaquempinijite pitotsaiquijiacagueti. Oraqueate aatogueti pinetsanajiguorts maasano igantacaantane, quejetaca teeca intotsaiquijiterojo pichonquimashi. <sup>26</sup>Irirajiaquea teeca irijorijoigueji teequea intotsaiquijive-tempariji, cotanquitsiquea intampatica-terogueti inintaguetica Aapani Irioshi, iriatimpa iramenajiaqueri quempeca totsaiquijiacaca. <sup>27</sup>Iramenajiqueriguetu teeca intotsaiquijivetempariji cotanquitsi inetsanataquero inintague-tica Aapani Irioshi, arikea onconijavae-quequea manaquea piquempetacaanta-

jiaca aviatimpajia totsaiquijiavetanquitsica tsajiavecaroca itioncacotanaqueca Moishishini, cotanquitsiquea teequea pinetsanamajajigueroji.<sup>28</sup> Iriraquea managueti itotsaiquijiqueriquea imeshinaqui teequea irio joriomajaca yashintamajatacaca Aapani Irioshi, aisa teequea irishineventempariji Aapani Irioshi iramenauerigueti mana itotsaiquijiqueru itsinoqui.<sup>29</sup> Iriraquea tsaroventamajatarica Aapani Irioshi, aisa inetsanamajaquero icantica, irioquea iriguenti joriomajaca yashintamajatacaca Aapani Irioshi, icantashitati-amajatanajatari ishirequi, teequea irooqua iraventempajia itotsaiquijiquerigueti. Teetari irooqua cantashitatiaca-jempariji inetsanatirogueti itioncacotanaqueca Moishishini, iriguenti cantashitatiacaajari Ishire Aapani Irioshi. Iriraquea quempetiroca imaica ishineventajicari, cotanquitsiquea teequea irioquea shineeventajajemparine caquinteja, iriguentiquea shineventajari Aapani Irioshi.

**3** <sup>1</sup>Irosacanica ¿taa opajita ocameetsa-tantacaca irijorijoitegueti? ¿Taaquea opajita ocameetsatantacaca intotsaiquijirigueti? <sup>2</sup>Osquequeate ocameetsavaetan-tacaca. Aatimpajiatari joriojia icavintsajamajajaquea Aapani Irioshi. Jeroquea anaavaequeroca maasanopae: yojocacota-caantajiacajiro Iguenquetstsare cameetsaniji anquempoguijajakero agaajiaqueneri itsipajia. <sup>3</sup>Oraqueate choocagueti teeca irnetsanateroji inintacaquaquerica, ¿arimpate iquejeta Aapani Irioshi aato inetsanatiro icanqueca?<sup>4</sup> iAatoshine! Intsojeajavetaquempaqueate maasano caquinteja, cotanquitsiquea Aapani Irioshi aatoquea itsojegatsi, irnetsanamajaquerou-quea icanqueca. Ariquea itioncacojitiri-quea cantatsica:<sup>c</sup>

“Iramenajiquempiquea picoguitani pitampaticamajatiro, teequea pintsojeguempají.

Incantacojivequempigueti chooca pipeacaagushetacaca, panaantequea iramenajique picomajama-jata.”

<sup>5</sup>Oraquea apeacaagushetagueti covaeguisherentsi onigaantavecaroqua icomajamajata Aapani Irioshi, Iriomajaca. Iroosacanica, ¿querocaca ancantajigueni imaica? Aricaja ancante: “Irooqua nogovaeguishere nigaanta-queroca icomajamajata Aapani Irioshi, ¿querocaquea octacani icatsimati-men-tataquenaroa nigaantaqueroca icomajamajata iriatimpa? Teecajate intampaticateroji.” (Irootarite icantica caquinte.) <sup>6</sup>iAatoshinete acantirotsi! Aatomegueti itampaticamajatirome Aapani Irioshi, ¿querocampate incoquempani intsatantajiaquemparica quepatsiquitica incatsimatiamentajigueri igovaeguishere? <sup>7</sup>Aricajate incante nintavetanquitsineca irrompetacotan-jempa: “Notsojeaguesti irooqua yamenantajitarcarica Aapani Irioshi iriguenti tampaticamajatiroca, onquenantanaquempaca intsaroven-tajitaquemparica. ¿Quero octacani incatsimatiamentantaquenaroa Aapani Irioshi notsojeaguesti incanke: ‘Iriosacanica covaeguisheri?’” <sup>8</sup>Arimequeate onquempetaquempamequeate, ¿quero ococani teequea ancantajigueji: “Jaame ampeacaagushejiguempajate covaeguisherentsi cameetsaniji anigaantajiaqueriniji Aapani Irioshi teequea incovaeguishetimatempaji?” Ariqueate chooca cantashijavetatsica: “Ari icanque Paavoro, irooqua itsatacaantaque”, manaquea itsojeaca intati. Cameetsata-queua incatsimatiamentajiaqueri

c 3.4 Sar. 51.4. Iriraquea Taavini itioncacotanaqueri Aapani Irioshi.

Aapani Irioshi, iriotari quempetacaanta-jianquitsi.

**Maasano aatimpajia agavejajiacaji covaeguisherentsi**

<sup>9</sup>Iroosacanica imaica ¿querocaca ancantajigue? ¿Arica ancantajiguequea aatimpajia joriojia caaviji anaavaequeriquea teeca irijorijoigueji? iAatoshine acantajiguitsi! Aritaque nocantaque incajaranqui, maasanoquea aatimpajia agavejajiacaji covaeguisherentsi, iquempejiaca joriojia aisa teeca irijorijoigueji icovaeguishejiaca.

<sup>10</sup>Arikea itioncacojitiroquea, ocanti: “Teequea inchoocatimateji caquinte comajarimajaca teeca incovae-guishetimatempaji, tee inchoocateji aparo.

<sup>11</sup>Teequea quericaca tsamajatatsineca, teequea queri nintamajatatsineca intsaqueri Aapani Irioshi.

<sup>12</sup>Maasano itomicapitsajiaqueri, maasanoquea ipomatsajiac. Tee inchoocatimateji comajamaja-tanquitsica, tee inchoocateji aparo.”<sup>d</sup>

<sup>13</sup>“Iquenquetsaguishemajaqueroquea chomisaaromajaca, quejetaca itsano iroome omoro yojoquiji-tantajitarica metojari. Yamatavijanenetantapinitacaro inene.”<sup>e</sup>

“Iquepigavagantevaetaque iquejeta-cari camaarini irooriji icanta-guishetacoqueri igonorojia.”<sup>f</sup>

<sup>14</sup>“Icantacoguitaniquea icatsimatsa-jencaguitirini igonorojia, mana-quea osotoajencatanaque igatsi-majencare.”<sup>g</sup>

<sup>15</sup>“Yamejiacaro iguiti yanjitantacaro ishintsitashitanaquero irimeto-

jantajigue oshivaririncajata-naque iriraja.

<sup>16</sup>Querocaguetti iquenajiaqueni yatsipetacaajiacariquea itsipapae, ishimampojancaca-guitarini.

<sup>17</sup>Teequea intsajiajeji iraavacaajajem-paji inchoocajiajeji cameetsa.”<sup>h</sup>

<sup>18</sup>“Teequeate intsaroacaajiguempariji Aapani Irioshi.”<sup>i</sup>

<sup>19</sup>Imaicaquea atsajiaque oraquea maasanopae Itioncacaantaqueca Aapani Irioshi, itioncajiaqueneriquea irirajia inintacajiaqueca irinetsanjiguero. Itioncacaanqueroquea cameetsaniji irimajeretacaajiaqueriniji maasanojia, iramenajiqueriquea maasano caquinteja teequea irinetsanjigueroji, ariquea incanque Aapani Irioshi quero incojitaquerini maasano. <sup>20</sup>Teequea inchoocateji agavejatsica irinetsanama-jatero maasano Itioncacaantaqueca Aapani Irioshi iroome incantantaquem-pameca Aapani Irioshi: “Irquenti comajarimajaca, tee incovaeguishetima-tempaji.” Oraquea itioncacaanqueca manaquea otsatacaciajaci arosacanica covaeguisherijia.

**Incomajatacayaqueri Aapani Irioshi  
maasano aventajiaquemparineca  
Jesoquirishito**

<sup>21</sup>Cotanquitsiquea imaica yonigaaca-jiro Aapani Irioshi quero icotani icomajatacantaquetu. Teequea onqueje-temparoji ipanquenajivetarogueti igantacaantane. Yonigaacajica imaica irootaquea itioncacojiaqueca coramani Moishishini aisa itsipajia tsavetantajitsica. <sup>22</sup>Incomajatacayaqueri Aapani Irioshi maasano aventajia-quemparineca Jesoquirishito, irioca

d 3.10-12 Sar. 14.1-3; 53.1-3; Eeq. 7.20. e 3.13 Sar. 5.9. f 3.13 Sar. 140.3. g 3.14 Sar. 10.7. h 3.15-17 Is. 59.7-8. i 3.18 Sar. 36.1.

joriojia, irioca teeca irijorijoigueji, iconoacaantajiacari,<sup>23</sup> aritarite icovaeguishejiaca maasano, tee inchoocateji moncarateroneca iroganejencare Aapani Irioshi.<sup>24</sup> Cotanquitsiquea iriatimpa icavintsajacojiaqueri itigarancaqueri Quirishito Jesoshi imetovaventajiacaji ariqueate imeshiajiaqueriquea maasano aventajiacarica. Aatimpajia teequea taaca opaji ampeacaajiaquem-paca cameetsaniji irimeshiajiacajiniji, inchiquiojita ininque iriatimpa irimeshiajiacaji.<sup>25</sup> Paesatoniqui tequeratagueti incoraqueteji Jesoquirishito yamenajia-vecari Aapani Irioshi coramanipaequi-tica covaeguishemajataca, cotanquitsi-quea yatsipetacojiacari itsaquequea irimetovaventajiaceri oncoramanitapo-jajegueti Jesoquirishito. Ocoramanipo-jaquegueti inchiquiojita itigarancaqueri irantsipeventajiacaji irimetovaventajia-caji maasano covaeguishejatsica, ipiapijajaji. Oraquea yompajacojiquerigueti ochovivincajatanaquequea iriraja aatonijite icatsimajiguiritsi Aapani Irioshi aventajiaquemparineca Jesoquirishito incantajiaquegueti: "Arimajasa-canica imetovaventajiaquena." Ininque-quea Aapani Irioshi intsajiaque maasano teequea quericaca irishetacotantashi-quempaquate intati, aisa teequea quericaca incatsimatantashitaquempa-quea intati.<sup>26</sup> Ariquea oquempetaca imaica cameetsaniji antsajiaqueriniji aatimpajia iriraquea Aapani Irioshi icocani tampatica iroquero. Oraquea ishetacojiaquerigueti aventajiacarica Jesoshi, teequea irimeshiantashitempaji intati, manaquea yamenajiaqueriquea yaventajapojari, itsajiaquequea imetovaventajiaceri.

#### Taaqueate asemejianquempacate

<sup>27</sup>Iroosacanicate taaqueate opaji asemetantajiaquempacate aatimpajia?

iTaampate! ¿Arimate quero ococani? Teequea irooqua irishetacotantajiaji Aapani Irioshi iramenajiacajigueti anetsanamajajiaquero maasanopae igantacaantane, manaquea icavintsaja-majajiacaji yamenajiacaji aventaventa-shirentajianajari Jesoquirishito.<sup>28</sup> Irootaquequea noncantantajiaquem-pica irishetacojiaqueriquea Aapani Irioshi maasano aventajiaquemparineca Jesoquirishito, teequea incantacojitaje-roji imaica: "Intsishiatsi pinetsanatajero-shiatsi itioncacotanaqueca Moishishini irishetacotimentajitaquempinijite."<sup>29</sup> Iriraquea Irioshimajaca carimpare apaniro irioshicari joriojia? ¿Arimate teequea irioshitempa ji caquintegueta-tsica? Jeejeguitatsi, irioshitacari aisa caquintegueta-tsica.<sup>30</sup> Tee inchoocateji itsipa Irioshimajaca, apaniromajaca icocani iriatimpa yamenajiaqueri maasano aventajiacarica Jesoquirishito quempejiaca teeca incovaeguishetima-tempaji, irioca totsaiquimashitacaanta-tsica, irioca teeca intotsaiquimashita-caantempaji.<sup>31</sup> Iroosacanicate aquempe-jiakerogueti imaica aventajiacarigueti Jesoquirishito carimpare ovashiantajia-naqueroqueate itioncacotanaqueca Moishishini? iTeequeate! Arimpaquea anquempejianaquero imaica iroquera-gueti, anetsanamajajiaqueroquea.

#### Quero icocani Averaameni

**4** <sup>1</sup>Imaica iroguenti noninque nonquenquejacaajiguempirijate Averaameni choviquimajajiaquenaca naatimpajia joriojia, querido icocani iriatimpa?<sup>2</sup> Iroomequea irishineven-quempamequeate Aapani Irioshi Averaameni taaca opajitapae ipeacaagueta-caca, iragavejaqueme irisemetaco-vaequemparomequeate, cotanquitsiquea yamenajiaqueriquea Aapani Irioshi tee onchoocateji taaquea irisemetacotem-

paca.<sup>3</sup> ¿Quero ocanque Tioncarentsimajaca? Ariquea ocanque: "Iriraquea Averaameni yaventanacariquea Aapani Irioshi,<sup>j</sup> jeroqueate yamenantacarica quejevaecaquea tee incovaeguishetimtempaji."<sup>k</sup> <sup>4</sup>Iroguenti oquempetacarоquea ocatica, quericaca shiacotatsica, iroompaquea irivegarajitavajeri teequea incantajiteriji: "Manaquea nojocashi-quempi intati, nocavintsa jashiquempi-quea", manaquea ivesgaratsjitaroquea ishiacoquegueti irooriji yaacotantaque.<sup>5</sup> Cotanquitsiquea inchoocategueti itsipa aatoquea taaca opajita ipeacagatsi cameetsaniji irishetacojiquerinijite manaquea iraventapojempari Aapani Irioshi, inquenquejanaquequea incanque: "Notsamajaque iriraquea Aapani Irioshi ishetacotiri covaeguishejiatsica", ariquea iroguenti irishetacotaqueriqueate yamenaueritari yaventapojajari.<sup>6</sup> Arikea iquempetaca Taavini coramani icanque irishinevaequempa quericaca iramenaqueca Aapani Irioshi quempeca teeca incovaeguishetimtempaji, manaquea inchiqiojita icavintsa jashivaecari intati, teenicate onchoocatenica cameetsatsica impeacaguem-paca caquinte incavintsa jactantaqueu-parica Aapani Irioshi.<sup>7</sup> Arikea icanque:

"iIshinevaetanaja maasano ipeacotsitajaca Aapani Irioshi ipeacaa-guishecaca, irirajia imaperincacotsitaqueca igovaeguisherejia!"<sup>8</sup>

<sup>8</sup> iIshinevaetanaja irirajia teeca inquenquejacagueriji Amajirote igovaeguisherejia!"<sup>l</sup>

<sup>9</sup> ¿Arimpa apaniro irio shinejianquisine irirajia icantajitica "totsaiquima-

shitacaantatsica"? ¿Aatompa irio shinejianquitsine teeca intotsaiquimashitacaantempa? Iintsijate pinquenque-jajiguerijate Averaameni. Iriatimpia iquemisanqueri Aapani Irioshi iquenquejanaque: "Arimaja Aapani Irioshi irinetsanaquero icanqueca", irootaqueuea yamenantacarica quempeca teeca incovaeguishetimtempaji.<sup>10</sup> Cotanquitsiquea ¿querote yamenantacarica Aapani Irioshi quempeca teeca incovaeguishetimtempaji? ¿Ari yamenaueri itotsaiquijique-rogueti ichonquimashi, irooca tequertagueti intotsaiquijiteriji? Teequeate ariquea irameneriji itotsaiquijiquerigueti, manaquea yamenaueri tequertagueti intotsaiquijiteriji.<sup>11</sup> Iriraquea Averaameni iroquetitaquea iquemisanqueri Aapani Irioshi icanquerigueti incavintsa jamaquaqueri, ocoramanitaco-vatanaquequea itotsaiquijiqueriquea intsatantajiquemparoca jac yamenaueriquea Aapani Irioshi quempeca teeca incovaeguishetimtempaji irooriji yaventanacari. Quempetacaquea ipeantajaca choviquishirentajianaquerineca maasano aventaventa ipojaemparieca Aapani Irioshi, totsaiquivetatsica aisa teeca intotsaiquijivetempariji. Arikeate iquempetsijigari Aapani Irioshi iriatimpajia aisa, yamenaueriquea quempeca teeca incovaeguishetimtempaji.<sup>12</sup> Arimajaguitatsi Averaameni iriguenti choviquijianaquerica irirajia itotsaiquijiqueca, cotanquitsiquea teequea noncantacoteriji itotsaiquitampeashijitacaca intati, iriguentiquea ichoviquimajajianaqueca irirajia quempemajatajarica iriatimpia

<sup>j</sup> 4.3 Ocanquegueti *Iriraquea Averaameni yaventanacariquea Aapani Irioshi* manaquea ocanque itsamajaquero iriatimpia irinetsanaquero Aapani Irioshi maasano icanquerica, yaventanacarica. (*Abraham creyó a Dios.*) <sup>k</sup> 4.3 Jen. 15.6; Ga. 3.6. <sup>l</sup> 4.7-8 Sar. 32.1-2.

Averaameni itsaroventacagueti, itsaque irinetsanamajaqueroquea Aapani Irioshi icanquerica. Arikeate iquempetaca imaica tequeratagueti intotsaiquijiteriji.

**Aapani Irioshi inetsanamajaqueroquea  
icanquerica Averaameni**

<sup>13</sup>Iriraquea Aapani Irioshi icanqueri Averaameni oncoramanitacovaetana- quegueti irojocauqueneri maasanopae quepatsi, irashinquemparoquea iriatimpa aisa inchoviquijiaqueca, cotanquitsiquea teequea ariquea incanteriji imaica yamenauerigueti inetsanataqueroquea itioncacotana- queca Moishishini, tequeratanica onchoocatenica. Manaquea icanqueri inejaquerigueti iquemisanqueriquea icanquerigueti incavintsajamajaqueri- quea incaramirincajianaquequea inchoviquijianaqueca. <sup>14</sup>Oraquea riomegueti ashintajiaquemparomequea maasanopae quepatsi irirajia netsanamajajiaqueroca itioncacotanaqueca Moishishini, aatomequea amitacotajime aventaventaivequemparigueti Aapani Irioshi, aatomequea ashintajigarotsi icantacaamerica Aapani Irioshi Avera- meni yamenauerigueti itsarovencari. <sup>15</sup>Iriraquea tsajiavecaroca icantagueta Aapani Irioshi irinetsanamajajiqueca cotanquitsiquea teequea irinetsanamajateroji, incatsimati menqueriquea. Oraquea aatomegueti itsajitiromequea querocampate incojiqueroni irinetsanajiquero, teitarite intsajiteroji, aatomequeate querica quempetaca antatsineca.

<sup>16</sup>Iroosacanica imaica, inchiquiojita ininque Aapani Irioshi incavintsajaco- queriquea Averaameni aisa inchoviquijianaqueca, icanqueri arikea inquempe- taqueroquea imaica. Cotanquitsiquea oraquea icanquerigueti incavintsajaco-

majaqueriquea inchoviquijianaqueca, teequea apatiroti iriguentijia inquenque- tsatacogigueji inchoviquijianaqueca netsanajiaqueroneca itioncacotanaqueca Moishishini. Iriguentiquea aisa icantaco- jiaque maasano aventajianajemparineca Aapani Irioshi quempemajajiaquempari- neca Averaameni yaventsitarigueti.

Irootaquea icantantajicarica Avera- meni iriguenti choviquijianacajica maasano atimpajia aventajiacarica Aapani Irioshi. <sup>17</sup>Arikeate ocanque Tioncarentsimajaca: “Nopeacaquempi choviquijianaquerineca oshequin caquinteguetananquitsineca.”<sup>m</sup> Iriguen- tiquea cantanquitsi Aapani Irioshi yamenauerigueti Averaameni yaventanacari. Iriatimpa iriguenti tancoretanco- rejajiajerineca metojaquevetatsica, aisa iquenquetsatacotsitacaro tequerataca onchoocateji quejetaca chooca.

<sup>18</sup>Oraquea icanquerigueti Aapani Irioshi Averaameni ipeacaacariquea choviquijianaquerineca oshequin caquinteguetananquitsineca, jac icantapaeni quenquevarivaetanaji, tequerataquea irijanintempaji.

Querocampate incaramirincatantajiana- quempaca inchoviquijianaquempaca. Cotanquitsiquea iriatimpa yaventana- guitarini Aapani Irioshi yoguijaguitini- quea irinetsanatavaquerotajate icanque- rica, icanqueriqueate: “Arikeate inquejijaquempaquea pinchoviquijia- naqueca iroshequiavaetanaquequea.”<sup>n</sup>

<sup>19</sup>Iriraquea Averaameni irooshipoji irajagantsitacotanaque 100, yamenaca iriatimpa jac quenquevarivaetanaji icanca irooshipoji irimetoje, querocam- pate incoquempani iroacaantaquegueti. Arikeate oquempetaca Sara imanqui- gare, pirijavaetaque oamento, cotanqui- tsiquea irira Averaameni teequea

**m** 4.17 Jen. 17.5.   **n** 4.18 Jen. 15.5.

irimagoshirentanaqueji arimpaqueate yaventamajatanacari Aapani Irioshi.  
<sup>20</sup>Teequea incanteji: “Aricajate irinetsanataqueroquea Aapani Irioshi icanquenaca.” Manaquea arimpaquea yaventamajatanacari, aisa arimpaquea ishineventamajatanacari icanque: “Caaviji yagavejamajati Aapani Irioshi.”  
<sup>21</sup>Itsamajaquequea teequea omanapitsatempariji irinetsanaqueroqueate icanquera, yagavejamajatitari.  
<sup>22</sup>Irootaquequea yamenantacarica Aapani Irioshi Averaameni quempeca teeca incovaeguishetimatempaji.  
<sup>23</sup>Cotanquitsiquea otioncacagueti “yamenantacarica quempeca teeca incovaeguishetimatempaji”, teequea apaniro intioncacotimentajiteriji Averaameni.  
<sup>24</sup>Itioncacotsijitacajiquea aatimpajia aisa, yamenajiacajiqueate quempeca teeca ancovaeguishetimatempaji aventajianajaritari iriatimpa, iriotaquequea vochatajiri Amajirote Jesoshi imetojavecagueti.  
<sup>25</sup>Irraquea Amajirote iriotaquequea itigarancaquea Aapani Irioshi irimetojaventajacajiquea aatoniji icatsimamentajajirotsi agovaeguisherejia. Ariquea imetojaquegueti ivochatajiri cameetsaniji iramenimentajajinijite quempeca teeca ancovaeguishetimatempaji.

#### Aapani Irioshi yamenajiacaji quempeca teeca ancovaeguishetimatempaji

**5** <sup>1</sup>Imaicaquea imaica jac yamenajiacaji Aapani Irioshi quempeca teeca ancovaeguishetimatempaji, yamenajiacajitarite aquemisanqueroquea icanquegueti irishetacojiaqueriquea iguempevaere maasano aventajiaquemparineca Jesoquirishito. Jero imaica teequea antsaroacaajajempari incatsimajiacaji manaquea ashinejiaca, iriotaquequea quempetakeroca imaica Amajirote Jesoquirishito. <sup>2</sup>Iriotaquequea metoja-

ventajiacaji, jero icocani icavintsajama-jacaji Aapani Irioshi yamenajiacajitarite aventajiacari. Ashinejiaca acanca aguijacojacagueti oncoramanitapoja-gueti amenajapijero iroganejencare Aapani Irioshi. <sup>3</sup>Cotanquitsiquea teequea aparo onchoocateji ocatica. Aisa ashinevaetacaquea atsipevaeca-guetai, atsamajajiaquetari antsipevaeta-quempagueti irootaquequea antsatanta-jianaquempaquea cameetsaniji agaveja-jiaqueniji antampishitashijiaqueroniji covaeguishetantatsica arimpaquea antsaroventamajatanaqueempari.  
<sup>4</sup>Oraquea antampishitashijiaquerogueti antsipevaequempagueti intsajiquero-quea arimajaca otampaticataque atsaroven tamajacari, iroompaqeua aguijacojanaca anquempejianaquempa-riuea iriatimpa oncoramanitapoja-gueti. <sup>5</sup>Oraquea aguijacotavajerogueti onetsanatantaquempaca icanqueca Aapani Irioshi aatoquea ovashiventajaji. Choocatarite ichoocashirentajiacaji Ishire Aapani Irioshi yojocajiacajica, iriotaquequea tsatacaajiacaji ipintsamajajiacaji Aapani Irioshi.

<sup>6</sup>Coramani aatimpajia teequea antsajigueji querocampate ancojiaquempani ashetacotacaantajiaquempagueti, cotanquitsiquea ocoramanitapojaquegueti arejevaepojaca savincaguiteri inintantacaroca Aapani Irioshi, ariquea imetojaventajiacaji Quirishito maasano aatimpajia covaeguishejatsica. <sup>7</sup>¿Arim-pate quericampate nintanquitsineca irimetojavenqueri irapicaquintejiate comajamajatatsica? Iroompaqeua inchoocategueti cavintsajantamajatantsica, iriotaquequea arica iragavejajite irimetojaventajiqueru. <sup>8</sup>Cotanquitsiquea jeroquea yonigaantantacajiroca Aapani Irioshi arimaja ipintsamajajiacaji: Quirishito imetojaventajiacaji aatimpajia maasano covaeguishejatsica

tequeratatirajagueti ancantashitatiaji-guempaji.

<sup>9</sup>Ochovivincaventanacaji iriraja, irootaquequea yamenantajiacajica Aapani Irioshi quempejiacaji teeca ancovaeguishetimatempaji. Jero atsamajatantacaca arimajacatari yaajavajajitari Quirishito aatonijite icatsimatumtajirotsi Aapani Irioshi agovaeguishere oncoramanitapoja-jegueti. <sup>10</sup>Coramani teequea ashineventajavetempariji Aapani Irioshi. Ariquea iquempetaca iriatimpa teequea irishine-ventajavetajaji aatimpajia, cotanquitsiquea ocoramanitapojaquegueti itigarancaqueri Irijanite imetojaventajiacaji cameetsaniji ashineeventavacaajiaquempaniji. Quempeca imaica ashineeventava-caajiacagueti, iroompaqueate caaviji iraajavajajti aatoniji apegas camoreca-riqui, pochatanajitarite ariquea icocani ichoocati. <sup>11</sup>Teequea aparo ocatica, yoguishinejajiacaji Aapani Irioshi aisa, irootaquequea quempetaqueroquea imaica Amajirote Jesoquirishito metoja-ventajiacajica cameetsaniji irishineven-tajajiniji Aapani Irioshi.

#### Araini aisa Quirishito

<sup>12</sup>Paesatoniqui apatsinoro caquinte covaeguishetanquitsica, ariquea icanqueri Aapani Irioshi irimetojanetanaje. Irootaquequea imetojantajajaca caquinteguetsica iroguentiquea quejetacaajiajariquea igovaeguisherejia, maasanotari icovaeguishejiaca.

<sup>13</sup>Coramani tequeratagueti intioncacoteroji Moishishini maasanopae icanque-rica Aapani Irioshi, jac covaeguishejiaca maasan caquinteguetsica, cotanquitsiquea teequea incanteji Aapani Irioshi: “Teequea irinetsanajigueroji noganta-caantane, nonquenquejacaajiaqueriquea oncoramanitapojaquegueti.” Tequerata-queate intioncacaanteroji. <sup>14</sup>Irirajiaquea

caquinteguetsica ichoviquijianaqueca Araini maasano icovaeguishejiaca, cotanquitsiquea teequea inquempemajatemporiji Araini peacaagushecaroca icantimenquerica Aapani Irioshi.

Icojiacaniquea iquempetaca imaica arejevaecaroequa itioncacotantanacaroca Moishishini icanquerica Aapani Irioshi. Oraquea icovaeguishecagueti Araini irooquea oshimerancantapojaca yamenantajajaroca maasano imetojane, cotanquitsiquea iriraquea coraquetaquittatsica ocoramanitapojaquegueti manaquea imetojaventsijigari maasano cameetsaniji irimeshiajiaquerinijite.

<sup>15</sup>Apatsinoroquea covaeguishevetsica Araini ariquea yamenajiaqueroquea imetojane maasano caquinteguetsica, cotanquitsiquea Aapani Irioshi caaviji icavintsajamajajiacaji niganquiquea anaavaetanaqueroquea icovaeguishecagueti Araini metojacaajiavecajica. Itigarancantacarica apatsinoro Jesoqui-rishito irimetojaventajajaci. Ocoramanitapojaquegueti icoraquetaque iriatimpa ariquea iquempetaqueroquea imaica ipintsamajajiacaji imetojaventajajaci irimeshiajiaqueriquea incaramirin-cajianaque caquinteguetsica.

<sup>16</sup>Oraquea icavintsajacajigueti Aapani Irioshi, tee onquempetemparoji icovaeguishecagueti Araini. Iroquera-gueti apatsinoroquea Araini icovaeguishecagueti ariquea ishimerancacajiro yamenantajajicaja Aapani Irioshi maasano acovaeguishejiaca, cotanquitsiquea caaviji ipintsamajajiacaji aatimpajia caramirincatacacaaroca covaeguisherentsi, ivetsinantacotajaji yamentantajajica quempeca teeca ancovaeguishetimatempaji. <sup>17</sup>Iroquera-gueti icovaeguishecagueti apatsinoro ari aapojacaji metojagantsi, imaicampani icavintsajacopojajigueti apatsinoro Amajirote Jesoquirishito yanijacaashi-

rentapojajaji imajirontacaashirentapoja-  
jaji maasano aatimpajia ishetacojia-  
queca apeantanajaca comajari.

<sup>18</sup>Icovaeguishecatarite apatsinoroveca Araini icantomajacotantajitacarica maasano caquintejia imetojanetantanca-  
caca. Ariquea iquempetaca coramani apatsinoroquea Jesoquirishito imetoja-  
ventajaquei maasano cameetsaniji iramenajiaqueriniji Aapani Irioshi quempeca teeca incovaeguishetimate-  
mepaj iroompaquea incoquempani inchoo-  
cajiae. <sup>19</sup>Apatsinoroquea icocani Araini teequea inquemisanteriji Aapani Irioshi, ariquea icovaeguishetantajianacaca maasano caquinteguetatsica. Ariquea oquempetaca aisa apatsinoroquea icocani Jesoquirishito iquemisantamaja-  
queri Aapani Irioshi, yamenantajicarica caramirincajianquitsica quempeca teeca incovaeguishetimate-  
tempaj.

<sup>20</sup>Coramani Aapani Irioshi icanqueri Moishishini intioncaqueroquea maasanopae icantagueta cameetsaniji intsajiaqueniji ishiraerijia manaquea icovaeguishejiaca, teequea irantajigueroji inintagueta iringatimp, cotanquitsiquea arimpaquea itiroroncamajatanacaro. Cotanquitsiquea icaramirincatacaajav-  
ecarogueti covaeguisherentsi, arimpaquea icavintsajamajajiaqueriquea Aapani Irioshi anaavaetanaqueroquea jmm. <sup>21</sup>Coramani mana oquejevetaca omajironca covaeguisherentsi imetojanetantacaca caquintejia. Cotanquitsiquea imaica iroguenti majiron-  
tamajapojajatsi igavintsa-  
cotantare Aapani Irioshi ancomajatimenquempaniji anijaguiteniji. Iriotari quejequero Amajirote Jesoquirishito.

#### Ametojapitsajiaqueroquea covaeguisherentsi

**6** <sup>1</sup>Iroosacanica ¿querocaca ancantajigu-  
ueni imaica? <sup>2</sup>Arimpa jatanatsi ancovaeguishejiguempani cameetsaniji

incavintsajamajajiacjinijite Aapani Irioshi? <sup>3</sup>iAatoshinete! Pamenerijate metojarí imetojimaque teequea jatanatsi incovaeguishetajatempaquea, jac metojaque. Arikea aquempejiaca aatimpajia aisa atsaroventimajaciari Quirishito quempetaca ametojapitsajia-  
queroquea covaeguisherentsi, <sup>4</sup>ariquea quero ancojiaquempani jatanatsi ancovaeguishetajatempataja? <sup>5</sup>¿Arimpa tee pinta-  
jigueji, maasanoquea aviñacajatimentajacarigueti Quirishito Jesoshi, oquempetaca atsipajiacari imetojaquegueti? <sup>6</sup>Oraquea imetojaque-  
gueti Quirishito yoguijaajivequitari omoroqui. Arikea oquempetaca aviñacajajiacagueti aatimpajia iroguenti ocantacoque yoguijaajivetaquitarigueti coramani, quempetaca aricaca aconoita-  
jari yoguijaajiquerigueti, cotanquitsi ipochatananji. Iroguentiquea vochatajiri iroganejencare Aapani Irioshi. Arikea oquempetaca aisa asotoajajianajigueti ojaaqui quempeca aricaca aconoita-  
jari ipochatanajigueti cameetsaniji ancanta-  
shitatijaianajempanijite aatoniji aquempejajatsi tequeratagueti antsaro-  
ventemporiji.

<sup>5</sup>Jac aconoajiacari Quirishito imetoja-  
quegueti quejetaca ametojajiaque aatimpa, arikea anquejejiaquempa anconoajiaquempari aisa ipochatanajigueti. <sup>6</sup>Imaica atsamajajiaque oraquea yompajacojiquerigueti Quirishito quempetaca aricaca itsipatacaantajaci-  
jiri ampajacojiaaca aatimpajia ametojapi-  
tsajiaqueroquea covaeguisherentsi aatonijite omperaperaatajaji. <sup>7</sup>Iriratari metojarí tee inquemajeroji covaeguishe-  
rentsi omperaperaavecarica. <sup>8</sup>Imaica jac atsipajajari Quirishito ametojajiaque, atsajiaquequea anijajianaje anconoapo-  
jajempari. <sup>9</sup>Atsamajajiaquequea ipochatimatanaji Quirishito imetojave-  
tagueti aatoquea imetojimatajitsi aisa,

yagavejamajaqueroquea metojagantsi, aato agavejajiri.<sup>10</sup> Oraquea imetojantacaca iroguenti imetojimentaque agovae-guisherejia, aparo imetojaquiti iteronca-quitiro. Cotanquitsiquea yanijanajigueti iriguentiquea yanijimentanaji Aapani Irioshi.<sup>11</sup> Imaica ariquea pinquempejia-quempa aviatimpajia, pamenempajate quempeni pimetojapitsaquiero covaegui-sherentsi, iriguentiquea panijimentanaji Aapani Irioshi, itsipatanajimpitari Quirishito Jesoshi.<sup>12</sup> Shoshoh pimajirontacajaarotsi covaeguisherentsi pitsinometojanequi, piquemisantajirotsi pinintagushevecaca.<sup>13</sup> Oraquea pacopae, piguitipae, pinene, poquija, maasanopae, aatoja pipeacaaguishetan-tajarotsi taaca opajitapae covaeguishe-rentsi, iriguentiquea ashintajemparone Aapani Irioshi. Pincantsitempariquea irashintamajatempi iroorijite yanijaca-ajimi pimetojashirentavecagueti. Manaquea irashintatsinotajempi maasano pimpeacaantanajemparoca cameetsaripae.<sup>14</sup> Aatotarite omperape-raatajimpitsijate covaeguisherentsi, teetarite onquejetajemparloji ipanquena-panquenajiveguitaroni itioncacotana-queca Moishishini, manaquea icavintsa-jacojaquempi Aapani Irioshi yagaveja-caajaquequempi.

**Quero icotani savicaventiroca  
covaeguisherentsi aisa savicaventiroca  
inintaguetica Aapani Irioshi**

<sup>15</sup>Iroosacanica ¿querocaca ancanta-jigue imaica? Amenajiaqueriquea icavintsajamajajiacaji Aapani Irioshi, teequea incantajiajaji anetsanajajeroji maasanopae icantaguetic a coramani irinetsanajitaje, carimpate nintanatsi ancovaeguishejiguempanijate? iAatojate aquempejiguirotsijate imaica!

<sup>16</sup>Aviatimpajia pitsajiguitarite inchooca-tegueti aparo caquinte inchiquiojita

impimantaquempa irashintajiquempari, inquemisantamajaqueriquea ashinquemparineca iroompaquea irashintaquiti-guempari incoquempani inquempeta-quempaquea imaica, carimpate queroquea incoquempani iroanaje osamani inchoocatashitajempanijite intati? iAatoja yagavejitsi! Arikea piquempejiaca aviatimpajia imaica, iroogueti pishineventajiaquempaquea pincovaeguishejiguempanijate, quempe-quea ashintamajaquempi covaegui-sherentsi, iroompaquea pimetojajia-naque poapoaitanaque camorecariqui. iQuerocampate pincojiaquempani povashiantajianajerojate! Oraquea iroogueti pishineventajiaquempaquea pinquemisantajianajeri Aapani Irioshi, intampishitacaajianaquempiquea cameetsaniji pincomajamajajianaquem-paniji.<sup>17</sup> Coramani oquejetaca ompera-peraavetaquempi pigovaeguishere ashintavetaquempi, cotanquitsiquea imaica iroguenti piquemisantajiajiji itsatacaaajitaquempica pinintamajajia-querico, irootaquequea nocantantacarica Aapani Irioshi, “Ariotesaa.”<sup>18</sup> Yaajitana-jimi, tee ashintajempi covaeguishe-rentsi, irooqua imaica omperaperaata-najimpi comajamajatagantsi.

<sup>19</sup>(Iroguenti notsavetacoguetanaque-quea imaica yamenaguetica caquinteja cameetsaniji pinquemajajaueniji taaca opaji nocanqueca, namenaquequeate aatogueti noquempetiroquea imaica manaquea omanapitsajiaquempiquea.) Quejetaca coramani pipimantatsinove-taca pimpeacaaguishetaquepaniji covaeguisherentsijia pintigariseavaeque-roniji, imaicampani iroguentiquea pimpimantatsinotajempa pimpeacaanta-jemparoca cameetsaguetatsica pincoma-jatimentajempaniji.

<sup>20</sup>Ogantagatirajagueti omperaperaa-quempi covaeguisherentsi, teequea

pincomajamajiguempaji.<sup>21</sup> Oraquea piquempejiavecagueti, ¿arimpate queroquea ocojiaquempini? ¿Arimpate ococani oshinetacaajiaquempi ovashiventajajaqueempica imaica? iTeequeate! Teequea anijacaanteji quempeguetacaroca imaica, manaquea oacaanti camorecariqui.<sup>22</sup> Cotanquitsiquea imaica jac yaavajimpiquea Aapani Irioshi aatonijite omperaperaatimpi covaeguisherentsi, iriguentiquea ashintajajimpi, pisavacaventanajiroquea intaguetica iriatimpa, ariquea picotanaca picomajamajajianaca, pincantacoguitempani panijaguiteni.<sup>23</sup> Oraquea irivegararatantajitaquemparica peacaacaroca covaeguisherentsi, iriguenti metojanentsi. Cotanquitsiquea ora irojocashijiaquenerica Aapani Irioshi tsipashirentajajaqueemparineca<sup>o</sup> Amajirote Quirishito Jesoshi, iriguenti anijagantsi, incoguitempani iranijaguuteni.

**Tsarоventajiatsica iquempejiacaro ometojacotegueti manquigarentsi**

**7** <sup>1</sup>Napitsaroventarijiate, iintsjate pamena jigue intati. Aviatimpajia pitsajiguotarite quer o cotani maasanopae icantimentantajiguetica. Iroguentiquea icantimentajiqueriquea tequeratagueeti irimetoje. Oraquea irimetojaqueguedi ariquea iriguenti aatojate icantimentajitajiritsi, metojarquetarite. <sup>2</sup>Pameneja icantantajicaroca manquigarentsi shiramparitacotsica teequea oncameetsateji ovashiantsitaquemparigueti manquigataroca tequeratagueeti irimetojeji irimanquigatajempa-roquea itsipa. Oraquea arigueti irimetojanaje, ariquea iriguenti aatojate icantimentajitajirotsi. <sup>3</sup>Cotanquitsiquea

oraquea choocatirajagueti ichoocati manquigataroca iroompaquea oncanqueri irimanquigatajemparoquea itsipa, ariquea iroguenti manaquea opeacaaguisheca covaeguisherentsi. Oraquea arigueti irimetojanaje manquigataroca, ariquea iroguenti querocam-pate incantimentajiqueroquea, cameetsavaeque irimanquigatajemparo-quea itsipa, aatoquea icantajititsi: “Opeacaaguishecaro covaeguisherentsi, aimentacari manquigataroca.”

<sup>4</sup>Irootaquequea imaica, napitsaroventarijiate, aviatimpajia quempejiaquempiquea pimetojapitsajiaqueroquea itioncacotanaqueca Moishishini, piconoitajari Quirishito imetojaqueguedi cameetsaniji irashintamajajajempiniji, iriotaquequea tancorejanajatsica yoguijaivecarigueti. Arikea oquempetaca imaica cameetsaniji pinetsanamajaqueronijite intaguetica Aapani Irioshi. <sup>5</sup>Oraquea tequeratagueeti antsaroventajiguempariji manaquea asavacaventajiaqueroquea apeacaagui-shejiacaroca quea taaca opaji anintajiguica aatimpajia. Oraquea atsavetacarogueti icantimentantajiguetica caaviji anintamajajiana que ampeacaaguishejianaquemparoquea taaca opajitapae covaeguisherentsi, nintanatsimequea anquempejiaqueempamequea imaica oahoaitanaquemequeate camorecariqui. <sup>6</sup>Cotanquitsiquea imaica quempeca aricaca ametojapitsajiaquero-quea itioncacotanaqueca Moishishini cantimentajiavecajiroca taaca opajitapae covaeguisherentsi. Imaica manaquea asavacaventajianaje anetsanamajajianajeroquea maasanopae intaguetica Aapani Irioshi. Teequea irooqua quempejajine itioncacoji-

**o 6.23 tsipashirentajajaqueemparineca Amajirote Quirishito Jesoshi.** Iriliojiaquea aventajigarica Quirishito, tsaroventajigarica. Pamenero aisa 8.1; 2 Co. 5.17.

queca, iriguentiquea cantashitatiajicaji Ishire Aapani Irioshi.

**Covaeguisherentsi  
pantashirentavaetaquenaca**

<sup>7</sup>Iroosacanica, ¿querocaca ancanta-jigue imaica? <sup>8</sup>Arimpate ariquea ancantajigue ooquea coguisherero itionca-cotanaqueca Moishishini? <sup>9</sup>AAatoshine! Oraquea aatomegueti notsatiromequea queroca ocanti, aatomequeate notsati-mequea manaquea nocovaeguisheca. Pameneja aatomegueti ocanti: “Aatoja pinintsiguetiritsi yashintaguecaca itsipa”,<sup>10</sup> aatomequeate notsatiromequea covaeguisherentsi nonintantagueque-gueti. <sup>11</sup>Imaicaquea imaica notsaquero-quea, irootaquequea oshimerancantapo-jaca nonintamajaqueroquea nompeaca-a-guishejiaquemparoquea taaca opajitapae covaeguisherentsi natsireca-cotanacaroquea, nashiquea noaquero iroaqueragueti nocovaeguishevaeca-gueti. Oraquea aatomegueti atsajiguime-quea icantimentantajitiroquea taaca opajitapae, aatomequeate anintamajati-mequea ampeacaagushejiaquemparo-quea, cotanquitsiquea atsajiaquerogueti icantimentantajiqueroquea manaquea anintamajajianaque ampeacaagushejia-naquemparoquea taaca opajitapae covaeguisherentsi. <sup>12</sup>Coramani tequerata-gueti nontsamajateroji itioncacotana-queca Moishishini tee anejeroji querocampate shoshoguitetacaavaeque-naneca, teequea nontsatenica manaquea nocovaeguishetaca, cotanquitsiquea iroompaquea notsamajatanaquerogueti namenamajataquequea manasacanica nocovaeguishevaeca ariquea noshimam-pojancavaetanaca, notsatanaquequeate incatsimatenanishiatsi Aapani Irioshi oncoramanitapojaxegueti. <sup>13</sup>Coramani

Aapani Irioshi itioncacaqueriquea Moishishini maasanopae icanquerica irinetsanajiqueroquea cameetsaniji inchoocatimentajiaqueniji maasano netsanajiaqueroneca, cotanquitsiquea naatimpa namenaqueroquea irooqua oshimerancantapojaquempaca incatsimatantaquenaca Aapani Irioshi oncoramanitapojaxegueti, teequea nonetsanamajajigueronica. <sup>14</sup>Irooqua notsamajaquerogueti itioncacotana-queca Moishishini, teequea noshineven-tajemparoji nonetsanamajatajeroja, iroguentiquea noshineventavaetanaca maasanopae icantimentantajitica, irooqua nopeacaaguecaca. Irootaque-quea itsatantajicaroca manaquea incatsimatenanishiatsi Aapani Irioshi, naroguentiquea quempetacaantanquitsi-neca. <sup>15</sup>Cotanquitsiquea atsajiaque oratica itioncacotanaqueca Moishishini iroguenti caaviji oganejencaca, irootaquequea itioncacotaqueca icantaguetica Aapani Irioshi, aisa otsatacajiajaci ancomajamajajiaquem-paja.

<sup>13</sup>Oraticaquea cameetsatatsica itionca-cotanaqueca Moishishini, ¿arimpa irooqua oacaantaquenameca camoreca-riqui? <sup>16</sup>AAtoquea! Oraquea covaeguisherentsi, iroguenti metojacaantaquena-meca noantanaquempameca camoreca-riqui. Notsavecaroquea icanqueca Aapani Irioshi, cotanquitsiquea iroguen-tiquea oshimerancantapojacaroquea nopeacaagushevaetanacaroquea icantimentantajitica. Irooqueate itsatantajicaroca caaviji anaquieroquea nocovaeguisheca. <sup>17</sup>Atsajiaquetari itioncacotanaqueca Moishishini oponeaca Ishirequi Aapani Irioshi, cotanquitsiquea naatimpa naroguenti caquinte, oquejetvaca ipimantajita-

quena irooqua ashintajana covaeguisherentsi.<sup>15</sup> ¿Querocaca nococani naatimpa? Nonintaveca nonetsanaqueromequea icanqueca Aapani Irioshi, cotanquitsiquea teequea nagavejeji. Iroguentiquea nopeacaanacaquea teeca nonintavetemparoji nomepacaguemparoqua. <sup>16</sup>Oraquea nopeacaacagueti teeca nonintavetemparoji nomepacaguemparoqua, notsaque iroguenti covaeguisherentsi, irootaquequea nocantantacaca caaviji oganejencaca itioncacotanaqueca Moishishini, ocamtinenquenaroquea nopeacaacaca. <sup>17</sup>Aritarite teequea naroguenti quejetatsine, iroguentiquea quejetacaquena covaeguisherentsi pantashirenquenaca. <sup>18</sup>Notsaquequea ariquea nococani naatimpa, teequea nagavejeji noncomajatemppaji, caquinte nonaque. Nonintavecaquea noncomajamajaquem-pamequeate, cotanquitsiquea teequea nagavejeji. <sup>19</sup>Nonintaveca nonetsanaqueromequeate inintaguetica Aapani Irioshi, cotanquitsiquea teequea nagavejeji. Manaquea nopeacaacaroquea covaeguisherentsi teeca nonintavetempaji naatimpa nomepacaaquemparoqua. <sup>20</sup>Arigueti nomepacaaquemparo teeca nonintavetempaji, teequea naroguenti quejetatsine, iroguenti quejetacaquena covaeguisherentsi pantashirenquenaca.

<sup>21</sup>Jeroquea namenaqueca: noninque-gueti nomepacaaquemparo cameetsari, quishotia oaquena covaeguisherentsi. <sup>22</sup>Noshineventavecarotari noshirequi maasanopae icantaguetica Aapani Irioshi, <sup>23</sup>cotanquitsiquea namenaquero otsipa notsinoqui quejetevata ashimirin>taguenquejanetacaro nonintavecaca, quejetaca oishotacotaquena covaegui-

sherentsi. <sup>24</sup>¡Querocashiatsi noncotem-pani naatimpa! ¿Quericampate oishore-jacoquenane aatonijite agavejajana covaeguisherentsi choocatirajanagueti notsinometojanequi? <sup>25</sup>Noshineventavaetanacari Aapani Irioshi, nocantanaqueri: “¡Arioteesa!” iriotaquetari oishorejashirentacotajana Amajirote Jesoquirishito.

Jeroquea namenaqueca: naatimpa-quea noguenquejanequi nonintamaja-taque nonetsanataqueroquea maasano igantacaantane Aapani Irioshi, cotanquitsiquea notsinoqui noquemisantavecaro-quea covaeguisherentsi.

### Queroca icojigani ichoocashirentajiaqueca Ishire Aapani Irioshi

**8** <sup>1</sup>Imaicaquea imaica aatoquea icatsimajiguiritsi Aapani Irioshi irirajia tsipashirentajiacarica<sup>q</sup> Quirishito Jesoshi, irioquea irirajia teeca irisavica-ventajajeroji impeacaaguishetajemparo taaca opaji inintajiguica iriatimpajia, manaquea isavicaventajajai mintague-tica Ishire Aapani Irioshi. <sup>2</sup>Aritarite itsatacaantane Ishire Aapani Irioshi anijacaquerica maasano aventajigarica Quirishito Jesoshi ocanquequea aato agavejajana tioncarents cantatsica irimetojaque maasano covaeguishejia-tsica. <sup>3</sup>Oraquea teeca agavejempajia itioncacotanaqueca Moishishini irooriji acojiaca caquinteja teequea antampi-shitashiteroji covaeguisherentsi, yantaqueroquea Aapani Irioshi itigaran-caquerigueti Irijanite irimetojaventajacija. Iriatimpa iquempetsinomajatacaji aatimpajia covaeguisheri, cotanquitsiquea teequea incovaeguishetimatempaji, jero yagavejantacaca imetojaventajia-

**q 8.1** *tsipashirentajiacarica Quirishito Jesoshi*. Iriojiaquea aventajigarica Quirishito, tsaroventajigarica. Pamenero aisa 2 Co. 5.17.

caji. Oraquea imetojaventajiacajigueti icatsimati menqueri Aapani Irioshi agovaeguisherejia aatonijite icatsimajajitsi aatimpajia oncoramanitapoja-  
gueti.<sup>4</sup> Iquempetaqueroquea imaica cameetsaniji agavejajiaquenijite anetsanamajajiaqueromijite maasanopae icanqueca Aapani Irioshi, teequeate irooquea asavicaventajajieji ampeacaaguishetajemparoquea taaca opaji anintajiguica aatimpajia, manaquea asavicaventajajie inintaguetica Ishire Aapani Irioshi.

<sup>5</sup> Irirajiaquea savicaventajiguiroca taaca opaji inintajiaqueca iriatimpajia, iroguenti iquenquejacogueque irashipae caquinte, cotanquitsiquea irirajiaquea savicaventajiaqueroca inintaguetica Ishire Aapani Irioshi manaquea iquenquejacoguequeroca irashipae Ishire Aapani Irioshi. <sup>6</sup> Irirajiaquea savicaventajiaqueroca inintajiguica iriatimpajia irimetojajianaque. Cotanquitsiquea irirajiaquea savicaventajiguiroca inintaguetica Ishire Aapani Irioshi iranijacaajitaqueriquea ishirejiaqui aatonijite itsaroacaajajaritsi incatsimajajieriquea Aapani Irioshi. <sup>7</sup> Irirajiaquea maasano savicaventajiguero-  
roca inintajiguica iriatimpajia iriguentija catsimacatsimati rica Aapani Irioshi. Teequea irinetsanajigueroji icanqueca, aisa aatoquea yagavejajiguitsi irinetsanajiaqueroquea. <sup>8</sup> Irirajia savicaventiroca inintaguishejiaqueca teequea iragavejajigueji iroguishinejajiaqueriji Aapani Irioshi.

<sup>9</sup> Cotanquitsiquea aviatimpajia teequea irooquea pisavicaventajigueji pinintajiguica aviatimpajia, iroguenti pisavicaventajaque inintaguetica Ishire Aapani Irioshi, arimajagueti ichoocashirentajiaquempi. Quericaca teeca inchoocashirenterji Ishire Quirishito, teequea irioquea ashintemparine

Quirishito.<sup>10</sup> Cotanquitsiquea imaica ichoocashirentajiaquempiquea Quirishito, oraquea pitsino iroguentiquea metojanquitsine irooriji picovae-  
guishejiavetaca, orampani pishire anijanaji, yamenajiaquempitari quempeca teeca pincovaeguishetima-  
tempaji.<sup>11</sup> Iriogueti choocashirentajia-  
quempi Ishire vochatajirica Jesoshi imetojaventajiacajigueti, ariquea irira vochatajirica Quirishito Jesoshi inquem-  
petacaajiaquempiquea aviatimpajia aisa, iranijacaajajempiro pitsino teeca onquishometojaneteji. Iriotaquequea anijacaajempironne Ishire choocashire-  
taquempiica.

<sup>12</sup> Naptsaroventarijiate, irootaquequea imaica apatsinoroquea iriatimpa antsaroventajiaquempaca aatonijite irooquea asavicaventajiguitsi taaca opaji anintajiguica aatimpajia.<sup>13</sup> Iroogueti pisavicaventajiaquequea taaca opaji pinintajiguica, ariquea pimetojajinaque, cotanquitsiquea pinquemisantaji-  
aquerigueti Ishire Aapani Irioshi, iragavejacaajiaquempiquea panaantava-  
quemparoca maasanopae pipeacaagu-  
shejiavecaca, oncoramanitapoja-  
jegueti panijaguiteni iriatimpaqui.<sup>14</sup> Maasano-  
tari ijivatanaqueca Ishire Aapani Irioshi, iriguentijia irijanijiate Aapani Irioshi.<sup>15</sup> Iriraquea Ishire Aapani Irioshi ichoocashirentajiaquempiquea, teequea irooquea inchoocashirentashijiguempi-  
niji iromintsaroajiaquempiquea pinquempejiaquempa tequerataguetai  
pintsaroventajiguempariji Aapani Irioshi pitsaroacaamajatarigueti incatsimajaj-  
quempiquea. Iroguentiquea ichoocashi-  
rentashijiaquempiquea impeacaajia-  
quempiquea irijanijiate Aapani Irioshi, jero amanantajiacarica Aapani Irioshi acantantajiacarica: “iAapani!”<sup>16</sup> Iquen-  
quetsashirentacaajiacaji Ishire Aapani Irioshi atsatantajiacaca aroguentijia

irijanijiate Aapani Irioshi.<sup>17</sup> Aromajueti irijanijiate atsajiaque irojocajiacajiro Aapani Irioshi maasanopae inintacaitsijiacajica, cotanquitsiquea iroguentiqueate coguitejacomajatanquitsica antsipejiaquempaquea anquempejiaquempari Quirishito yatsipevaetacueti cameetsaniji anquempejiaquempariniji iriatimpa oncoramanitapojaegeti, antsipatsipaitanajempariequa ashintashintaipojajemparo maasanopae yashintacaca iriatimpa, anquempetapojajempari yoganejencacagueti.

### Oncoramanitapoja jegueti anquempemajajaquempari Quirishito

<sup>18</sup>Iroomajaca noncantajiaquempica caaviji ashinevaequempaquea oncoramanitapoja jegueti oahoaitanaquegueti jenoqui amenajajerigueti Quirishito anquempejiaquempariequa, anaavaetaqueroquea maasanopae atsipevaetacaca imaica.<sup>19</sup> Maasanopae ipeacaaguecaca Aapani Irioshi oguijajiaquequea aapojempagueti ironigaantantajitaquemparica irijanijiate Aapani Irioshi.<sup>20</sup> Maasanojiatari ipeacaagueta caca teequea onquempetajemparoji iroaqueragueti ipeacaacarogueti, imaicampani atsipsipeica, otsoroavequita, ichoocavequita. Teenica irio ninterone iveacaane, iriguenti quejequero peacacarica yamenaquerigueti icovaeguishtaca caquinte. Manaquea yoguijajaijiquero onetsanatantanajempaca.

<sup>21</sup> Aatotari icotani i quempejajatsi imaica yatsipejiacarogueti maasano imetojane, yavejancajiacaquea maasano, manaquea intspatsipaitanaquempariquea maasano irijanijiate Aapani Irioshi incantashitatijaianaquempaquea iroganejencajiaquempa. Ariquea onquempeguetaquempa maasanopae ipeacaagueta caca aisa, aatonica ochoocatimatajitsi avejancagueta jatsi-

neca.<sup>22</sup> Atsamajajiaqueroquea maasanopae ipeacaaguecaca Aapani Irioshi atsipeguitani oguijajiaquequea oncantashitatianaquempaquea, quempetacaqueate atsipevaetagueti manquigarentsi ocantaguetirogueti.<sup>23</sup> Cotanquitsiquea teequea aparo atsipetatsine ipeacaaguecaca Aapani Irioshi, atsipevaeca queate aatimpajia aisa. Ichocashirentajiacaji Ishire Aapani Irioshi atsatantajiacaca incantashitatijaacaji Aapani Irioshi oncoramanitapoja-jegueti, cotanquitsiquea imaica atsipeshirentavaeguitani aguijacojicajica irojocajiaciroquea Aapani Irioshi inintacaajiacajica maasano irijanijiate, ampeamajaquempaquea irijanijiate, incantashitatijaajaji aatoniji ametojatsi-notaji.<sup>24</sup> Oraquea iroqueragueti atsaroven tajiacarigueti Quirishito atsajiaque oncoramanitapoja jegueti ancantashitatijaianajempaquea aatoniji ametojaji, irootaquequea aguijajiaqueca imaica. Cotanquitsiquea arimequea amenajajiqueromequea imaica irishinejicajimequeate Aapani Irioshi aatomequea aguijacojiguromequea, jac amenajajiqueromequea. ¿Arimate nintanatsi aguijacojiguitempani? ¡Aatoshine!<sup>25</sup> Cotanquitsiquea iroquea aguijacojicacquea tequerataca amenajigueroji, imaica netsana aguijacojiaquempaquea antsipetacojiaquemparo quea maasanopae.

### Iquenquetsaventajiacaji Ishire Aapani Irioshi

<sup>26</sup> Arikea oquempeca aisa iriraquea Ishire Aapani Irioshi iramatacojicajai intampishitacaajiacaji, teetari antampishijigueji. Aatimpajia amanajigurigueti Aapani Irioshi teequea antsajigueji querocaca ancantajiguerini, cotanquitsiquea iroguentigueti ancantashirentajavequitempa quea shirerec inquenquetsa-

ventajiacaji Ishire Aapani Irioshi, incanqueriquea teeca agaveji aatimpa ancanteji.<sup>27</sup> Iriraquea Aapani Irioshi amenamajatsicajiroca aquenquejajaquea anintajiaqueca itsaquieroqua ininqueca Ishire, irooriji yamanacoven-tavaquenerigueti igomajamajareja iroguenti iramanacovenqueneri inintaguetica Aapani Irioshi.

**Antampishitashijianaqueroqueate  
maasanopae**

<sup>28</sup>Aisa atsajiaque maasanoquea irantsipejivetaquempaca pintsajigarica Aapani Irioshi osotoanaqueneriquea cameetsa, irojiatari icajemajiaqueca onetsanatimentanaquempanijite inintaguetica Aapani Irioshi.<sup>29</sup> Paesaton-niqui itsaquieroqua Aapani Irioshi queri tsaroventajiaquemparineca, jero icantantacarica oncoramanitapoja- gueti inquempemajiaquempariquea Irjanite, irijivajiaquerinijite iriatimpa iriguentijeguijate incaramirincraj- vaeque jmm.<sup>30</sup> Irirajiaquea icanqueca inquempemajiaquempariquea Irjanite icajemashirentajiaqueriquea cameetsa- niji intsaroventajiaquemparinijite. Irirajiaquea icajemashirentajiaqueca manaquea yamenajiaqueriquea quempeca teeca incovaeguishetimatem- paji, iroompaquea iroganejencatacabajia- quempariquea.

<sup>31</sup>Iroosacanica imaica ishineventajia- caji Aapani Irioshi itsipatsipaicaji, ¿arimpate quericampate agavejajiacaji- neca? iAatoshine queri agavejatsineca!<sup>32</sup> Iriraquea teeca intsaneguempariji Irjanitemajaca, manaqueate itigaranca- queri imetojaventajiacaji, ¿aatompate yojocajajirotsi aisa maasanopae cameetsaripae?<sup>33</sup> Aatimpajia iroguenti inintacaajiacaji Aapani Irioshi irashinta-

jiacaji. Imaica jac yashintajiacaji. ¿Arimpate quericampate cantajiacaji- neca chooca agovaeguishereja? iAatoshine queri agavejatsineca icantaji- guits! Iriotaquequea Aapani Irioshi amenajiacaji quempeca teeca ancovae- guishetimatempaji,<sup>34</sup> ¿arimpate quericampate agavejanquitsineca inquempetacaantajiacaji incatsimajiacaji- jinijite Aapani Irioshi? iAato queri agavejatsineca! Iriotaquequea Quirishito Jesoshi metojaventajiacaji. Teequea aparo irimetojaventajiaji, manaquea itancorejanaji aisa, imaica ichocapojaji isenampijapojajari Aapani Irioshi itincamijempequiqui iquenquetsaventa- jiacaji.<sup>35</sup> ¿Arimpate quericampate agavejanquitsineca irovashiantacaaita- jeri Quirishito aatoniji ipintsamajajiajaji icavintsajamajajiacaji? iAatoshine queri agavejatsineca! Antsipevaevetaquempa- queate irooca ashimampojancajiae- quempaquea, cotanquitsiquea iriraquea Quirishito incoquempaniquea impintsamajajiacaji incavintsajamajatanacaji. Iroocaquea irantsipetacaajiajivetacaji itsipapae incatsimajiacajiquea intati, irooca antsipevaevetempaqua- atase, aricaca aatoquea ochoocaveta querocampate anquitsaajiaquempaca, irooca onchoocaguevetaquempaquea taaca opajita managuetanquitsineca, aisa ametojajavetanajempaquea, cotanquitsiquea iriraquea Quirishito incoquempani impintsamajajajiacaji incavintsajamajajiacaji.<sup>36</sup> Ocanque tioncanquitsica:

“Icantacoguitani inintajiaque irimeto- jajiaquenaquea yamenajiaquena- gueti notsaroventajiaquempiquea, inquempetacaiaquenaqueate oveja irooshipojigueti irijitorejajita- queri.”<sup>r</sup>

<sup>37</sup> Jero antsipejia quequempaquea quejeguetacaroca ocatica, cotanquitsiquea yagavejacaajiacajiqueate pintsamajajiacajica arimpaqueate antampishitashimajajinaqueroqueate maasanopae, caaviji anaamajatantajianaquemparoca maasanopae. <sup>38</sup>Irootaquequea imaica naatimpa notsamajaque aatoquea queri agavejatsineca irovashiantacaqueriquea Aapani Irioshi aatoniji ipintsamajajiajaji icavintsajamajajiacaji. Aatoquea yagavejajiguitsi irashantijite Aapani Irioshi. Ariquea iquempejica ampatsinipae aisa quericaca itsipapae majirontajatsica, aatoquea yagavejajatsi. Irooca ametojajia-vequempaquea, irooca choocatirajajigueti anchoocajiaje, incoquempani impintsamajajiacaji. Ariquea oquempetaca maasanopae imaicitica aisa ocaraquigueta-nanquitsineca. <sup>39</sup>Ariquea oquempetaca aisa choocatatsica jenoqui, irooca isavijitica, aisa taaca opajitapae otsipapae ipeacaaguetaacaca Aapani Irioshi aatoquea agavejitsi ovashiantacaguiri Aapani Irioshi aatoniji ipintsamajajajaji, icoguitaritarite ipintsamajacaji aatimpajia maasano tsaroventajiacarica Amajirote Quirishito Jesoshi.

**Aapani Irioshi intintacaajiaqueri  
ishiraerija incavintsajamajaqueri**

**9** <sup>1</sup>Naatimpa naroguenti tsaroventarica Quirishito, aisa ichoocashirenenquea Ishire Aapani Irioshi. Irioquea nigaimoquenaqueate quero nococani noshirequi, irootaquequea notsatantacaca imaica manaquea iroomajaca noncanquempica aatoquea notsojega intati. <sup>2</sup>Noshimampojancavaetacaqueate noquenquejacotaquerigueti nogonorojia

teeca iraventajiguempariji Jesoshi, nocantacoguitani ocatshishirentavaetana-quena. <sup>3</sup>Nonintavecaquea nompiapiaita-jemparime napijoriojiate nashimaja nogonorojia cameetsaniji naroguentiniji incatsimataque Aapani Irioshi, iriatimpajica irishetacojaque, aisa naatimpa irovashiantaquequea Quirishito, irioqueate impintsamajatanaquempaca incavintsa-majajiaqueri. <sup>4</sup>Irirajiaquea nogonorojia ichoviquijiani Ishiraeri iriguentijia inintisji-acaca Aapani Irioshi coramani impeajia-queriquea irijanijiate. Iriatimpajiaquea itsipajica coramani, jero iquejetantacarica itsircashimpoquirerejimojiaqueriquea cantavaetaque tsiren. Aisa iriguentijia yojocajiaqueneca Aapani Irioshi oratica paaquitopae,<sup>5</sup> icantajiaqueri intsaroventajiaquemparigueti incavintsajamajaqueriquea. Itioncacaanqueneriquea maasanopae inintaguequea irinetsanajiaqueca. Aisa itsatacaquaqueri Moishishini quero incojiaquaqueri intsaroventajiaquemparigueti ontaniqui Taverenacoroqui. Iroompaquea icamanqueri aisa quero incojiaquerini incavintsajamajaquerigueti. <sup>5</sup>Iriatimpajia iriguentijia ichoviquijiani Averaameni, Ishaaconi, Jacovoni aisa irijanijiate. Ocoramanitapojaquegueti ivoapopajue Quirishito ocaniqui quepatsiqui, aisa iriguenti ichoviquitanaqueca, iriguentequea Irioshimajaca, iriguenti ashintaguecaroca maasanopae. ilintsjate incoquempanijate irishineventajiguemparinijate! Ari oncoquempa.

<sup>6</sup>Iroosacanica, ¿arimpate ancantajigue manaquea yamatavijajiaqueri Aapani Irioshi ishiraerija, teequea irinetsanateroji icantajiaquerica coramani? Teequeate iramatavijajigueriji, teetarite maasano

**s 9.4** Oraquea *paaquito* iroguenti icantamajajitirica itsipa irinetsanamajajitenerica. Ochoocaguetaquequea paaquitopae iroquetinica icanquerica Aapani Irioshi caquintepae: chooca aparo icanquerica Noeni, otsipa icanquerica Averaameni, otsipa icantajiaquerica ishiraerija ichoocaquegueti Moishishini, otsipa icanquerica Taavini.

ichoviquijiani Ishiraeri impeajiguempaji ishiraerijamajaca irashimajaca Aapani Irioshi.<sup>7</sup> Ariquea iquempetacaajiacari coramani ichoviquijiani Averaameni, iquenquetsatacopiaquerigueti Aapani Irioshi teequea inquenquetsatacopiajueriji maasano, irootaquequea icantantacarica Averaameni: “Iriguentiquea nocantacotsitacaca Ishaaco pinchoviquivaetantana-quempaca.”<sup>t</sup><sup>8</sup> Irootaquequea atsatantajiacarica Aapani Irioshi teequea impeajigue-riji ishiraerijamajaca maasano ichoviquijiani Averaameni. Iriguentiquea peamajaji-anquitsica ichoviquijiani Ishaaconi,<sup>9</sup> irootaquetari icanqueca Aapani Irioshi coramani iquenquetsatacopiaquerigueti Averaameni icanqueri: “Ontsipatapojem-pagueti ajagantsini onquejetapojajempa-gueti imaica, noncoraquetajate namenaja-tempi, ariquea irivoaje oshiramparjani-quite Sara.”<sup>u</sup>

<sup>10</sup>Cotanquitsiquea teequea aparo onchoocateji ocatica. Irirajia irijanijiare Ireveca, apatiroti irijanincarica, irootaquequea avaesatimite Ishaaconi. <sup>11-13</sup>Oraquea tequeratagueti ovojaquieriji, iriraquea Aapani Irioshi icanquero: “Iriraquea jivavetapojatsineca manaquea impejajati-jeri iromperare carapojatsineca.”<sup>v</sup> Oraquea icanquerogueti Aapani Irioshi tequeratati-raja impeacaguemparo cameetsatsatsica aisa covaeguishetatsica, tequeratatirajanica ovojaquieriji. Ariqueate icanque tioencar-ntsiqui: “Nopintsatacariquea Jacovo, irirampani Esao nomanintaqueri.”<sup>w</sup> Irootaquequea itsatantajicaroca

maasanopae ocatica inchiquiojita icanque Aapani Irioshi iriatimpa queri inintaca-aqueca incoguigue incavintsa jamajiqueru, ariquea irinetsanamajiqueru queca. Teequea iroqueti iramenajiqueriji ogameetsareni ipeaca-guecaca, inchiquiojita icajemashirenta-queri iriatimpa.

<sup>14</sup>Iroosacanica ¿querocaca ancantajigue imaica? ¿Arimpate ancantajigue teequeate intampaticateroji Aapani Irioshi, mana icoguashitata intati? ¡Aatoshine! <sup>15</sup>Icanque-riquete Moishishini coramani icanque:

“Quericaca noninque naatimpa  
nompintsatacoquempari  
nompintsatacoquempari-  
queate.

Aisa quericaca noninque ca nonca-vintsajamajiqueru noncavintsa-jamajiqueru queate.”<sup>x</sup>

<sup>16</sup>Irootaquequea imaica teequea iroquea impintsatacotimentajacaji iramenajiacaji-gueti inchiquiojita anintajiaque aatimpajia impintsatacojicajiji, irooca irooriji apanquenapanquenavaecaro antajiaque cameetsa, manaquea inchiquiojita ininque iriatimpa impintsatacojicajiji, irootaquequea ipintsatacotantajicajica. <sup>17</sup>Itioncaco-jitaqueroquea aisa icanquerica Aapani Irioshi Paraone, icanque: “Manaquea nopeacaquempiquea majirontatsica cameetsaniji aviguentiniji intsatantajita-quempaca nagavejamajati, cameetsaniji intsavetacotimentajitaquenaniji ontsitacaguitejanaquemparo maasano quepatsi, intsavetacojitaqueroquea novajiro.”<sup>y</sup>

**t** 9.7 Jen. 21.12   **u** 9.9 Jen. 18.10.   **v** 9.11-13 Jen. 25.23.   **w** 9.11-13 Mara. 1.2-3. *nomanintaqueri*. Oguipitsocaquerogueti acanqui “nomanintaqueri”, iguenquetsatsarequi guiriego agavejaque oncanque “nomanintaqueri” irooca “nosemacari”.   **x** 9.15 Eeq. 33.19.   **y** 9.17 Eeq. 9.16. Yomperaperaitacarigueti Paraone maasano ishiraerija ichoocajaquegueti Ejepitoqui, Aapani Irioshi incantacaantaqueriquea Paraone: “Poguipaquijajerija nashintajiacaca”, cotanquitsiquea iquishoshirentanaque Paraone, tee inquemisanteriji, irootaquequea itigarancantacanarica Aapani Irioshi atsipetagantsipae caratanquitsica 10. Iquemacojaquequea caquinteguetatsica itsatantajiacaca arimaja yagavejamajati Aapani Irioshi.

<sup>18</sup>Ariqueate iquempetaca Aapani Irioshi imaica. Ipintsatacojigari quericaca ininqueca impintsatacojiguempari, aisa quericaca ininqueca inquishoshirentacaqueri, ariqueate inquishoshirentacitempariquea.

<sup>19</sup>Cotanquitsiquea arica chooca aparo cantenaneca: “Iroosacanica, oquempetacagueti imaica ¿quiero quea ococani icatsimantanajiacarica Aapani Irioshi teeca intsaloventajiguempariji? ¿Arimpate quericampate agavejanquitsineca incantashitatiempoquea icanqueca Aapani Irioshi?” <sup>20</sup>¿Arimpate quericampate aviatimpa cameetsaniji pimpigajentavaquempari Aapani Irioshi? Pinquenquejeroja chomo quepatsinaqui ipeacajaitarogueti, ¿arimpate oncanqueri peacaacaroca: “¿Quiero quea ococani piquempetanquenaca?” <sup>21</sup>Iraquea vichajari ¿aatompate yagavejitsi impeacaquempa taaca opajitapae inintaguequeca? Iraitsitemporea apapitsaro iraagarantsitempoquea impeacaaguequemparo inintaguequeca, irooca cameetsamajatanquitsineca irishineventamajajempaca, irooca aatoca ishineventtamajajita.

<sup>22</sup>Arikea iquempetaca Aapani Irioshi iriatimpa, inintavetaquea ironigaanquero igatsimaca aisa iragavejane, cotanquitsiquea teequeate incatsimantanjeji taampina, manaquea yatsipetacovaejiacariquea ipeacajaijacaca catsimatacaajiaquerica teroncajanquitsinemeca.

<sup>23</sup>Manaquea iquempetaca imaica cameetsaniji iramenajitaqueriniji caaviji yoganejencamajata icavintsajamajatanajiacarica ipeacajaijacaca inintacotsijacaca paesatoniqui incavintsajamajajia-

queri cameetsaniji iramenajajeroniji iroganejencaca. <sup>24</sup>Irootarite icajemashi-rentantajiacajica aatimpajia maasano, teequea aparo incajemashirentajiqueriji joriojia, icajemashirentajiquerija aisa teeca irijorijoigueji. <sup>25</sup>Ariqueate itionccaquerigueti Oseashini icanque:

“Irirajia teeca nashintajiajetempari oncoramanitapoja jegueti nashintajajempari.

Arikea inquempejiaquempa irira teeca irio novintsare, nompea queriquea novintsare.”<sup>z</sup>

<sup>26</sup>“Querocagueti oraniqui ichocajia- queni nocantajiavecaca: ‘Teequeate nashintajiguempiji’, arikea oraniqui inquenquetsataco- jitaqueri incantajitaque: ‘Irigeniti irijanijiate Aapani Irioshi anijatsica.’”<sup>a</sup>

<sup>27</sup>Cotanquitsiquea Isaiashini itionca- cojiaqueri ichoviquijiani Ishiraeri icanque:

“Incaramirincajiajetanaquempa- quea ichoviquijiani Ishiraeri inquempejiajetanaquemparo- quea impanequi ocaratsapijaja- quitica inirojani quentijani, cotanquitsiquea iriguentijiani choocajajatsineca apaopae iraajavajeca Aapani Irioshi.

<sup>28</sup>Irinetsanamajajeroqueate Amajirote icanqueca coramani, catsiqueti incatsimatimentajiaqueri- quea quepatsiquitica igovaegui- sherejia, intampaticamajatero- quea.”<sup>b</sup>

<sup>29</sup>Arikeate icanque aisa Isaiashini coramani icanque:

y 9.17 Eeq. 9.16. Yomperaperaitacarigueti Paraone maasano ishiraerija ichocajiaquegueti Ejepitoqui, Aapani Irioshi incantacaantaqueriquea Paraone: “Poguipaquijajera nashintajiacaca”, cotanquitsiquea iquishoshirentanaque Paraone, tee inquemisanteriji, irootaquequea itigarancantacanarica Aapani Irioshi atsipetagsipsae caratanquitsica 10. Iquemacojiaqueriquea caquinteguetatsica itsatantajiacaca arimaja yagavejamajati Aapani Irioshi. z 9.25 Os. 2.23. a 9.26 Os. 1.10. b 9.28 Is. 10.22-23.

“Aatomegueti ipintsatacojajimequeate Agavejamajatsica  
Imajirojiate caramirincajatiacsica,  
interoncamajajiacajimequeate  
maasano,  
anquempejiaquemparimequea  
guintenijiavetatsica coramani  
Soromaqui,  
anquempejiaquemparimequea aisa  
Gomoraquitica.”<sup>c</sup>

### **Irirajia joriojia teequea irishineventajiguempariji Jesoquirishito**

<sup>30</sup>Iroosacanica ¿querocaca ancanta-jigue imaica? Atsajiaquequea irirajia teeca irijorijoigueji teequea inquenque-jajavetempaji quero incojiaquempansi cameetsaniji irishineventajiguempariniji Aapani Irioshi, cotanquitsiquea imaica yamenajiaqueri quempeca teeca incovaeguishetimatem-paji, yaventaven-taicaritari Jesoquirishito. <sup>31</sup>Irirajia ishiraerijia iroguenti yoguijaguiaiveca icanqueca Aapani Irioshi itioncacaanta-jiaquenerica, inintajiavecquea irinetsanajiaqueromequeate cameetsaniji irishineventajiguempariniji Aapani Irioshi, cotanquitsiquea teequea iragavejajigueji. Oraquea irinetsanajiaqueromegueti maasanopae, ariquea iroguenti irishineventajiguemparime-queate Aapani Irioshi. <sup>32</sup>¿Queroquea ococani teeca irishineventajiguempariji Aapani Irioshi? Manaquea yaventaven-taicaroquea itioncacotanaqueca Moishishini inintajiavecia irinetsanama-jiaqueromequea cameetsanijite irishineventajiguempariniji Aapani Irioshi, teequea iro irinintajigueji iraventaventaiquempariquea Quirishito, icomijiacariequeate. Irootaquequea itsavetacotantajitarica Quirishito

iquempetacaajitacari mapi tivatanta-tsica. <sup>33</sup>Jero itioncacotantajitarica coramani ocanque:

“Oncoramanitapoajegueti nojouqui-  
jique mapi ontaniqui  
Shionequi,  
manaquea intivatantajitaquemparo-  
quea,  
cotanquitsiquea quericaca  
avenquemparoneca aatoquea  
yoguipashiventajitiri, atonica  
yaventashitarotsi intati.”<sup>d</sup>

**10** <sup>1</sup>Napitsaroventarijate, caaviji nonintamajaque irishetacoji-queri nogonorojia ishiraerijia, irooqua nocanqueri namanaquerigueti Aapani Irioshi. <sup>2</sup>Naatimpaquea namenajiaqueri arimajaca inintajiavecia intsaroventama-jiaquemparimequeate Aapani Irioshi, cotanquitsiquea teequea intsajigueji taaqueate ininque Aapani Irioshi, manaquea omanimojiacari. <sup>3</sup>Teequea intsajigueji querocaca incojiaquempansi cameetsaniji Aapani Irioshi iramenajiaquerinijite quempeca teeca incovaeguishetimatem-paji, iroguentiquea inintajia-veca inchiquiojita irishinetacaajiaquem-pari iriatimpajia. Teequea irinintajigueji iraventaventaiquempari cameetsaniji Aapani Irioshi iramenajiaqueriniji quempeca teeca incovaeguishetimatem-paji. <sup>4</sup>Iriratari Quirishito inetsanataco-majaqueroquea Icantacaantaqueca Aapani Irioshi itioncacotanaqueca Moishishini, icaratacaapojajiro irigoma-jaretacaajanajempariniji maasano aventaventaiquemparineca.

<sup>5</sup>Iriraquea Moishishini itioncacojia-queri nintajiavetanquitsica irinetsanama-jiaqueroquea icanqueca Aapani Irioshi cameetsaniji iramenajiaqueriniji quempeca teeca incovaeguishetimatem-

<sup>c</sup> 9.29 Is. 1.9. Pamenero Jen. 19.24-29. <sup>d</sup> 9.33 Is. 8.14; 28.16. Pamenero 1 Pe. 2.4, 6-8 aisa Irc. 20.17-18.

paji, icanque: "Iriraquea netsanamaja-queroca maasano ocacia, irooqua iranijantajempaca."<sup>e</sup> <sup>6</sup>Cotanquitsiquea quericaca aventaventaiquemparineca Quirishito cameetsaniji irigomajareta-caanajempariniji, aatoquea icantashi-rentitsi: "¿Quericampate atsomajanan-quitsineca jenoqui inquitequi?" iraguijita-acaapojaquerime Quirishito. <sup>7</sup>Ariquea oquempetaca aisa aatoquea icantitsi: "¿Quericate oananquitsineca isaviji oagantavaequegueti ichoocajiguigueti metojari?" intancorejajerime Quirishito iramajerime.<sup>f</sup> <sup>8</sup>Iroosacanica, ¿querocampate ocanqueni Tioncarentsimajaca? Manaquea ocanque: "Oraquea icanqueca oquempejimajauempi, ochoocavagantetaquempi aisa ochoocashirenquempi."<sup>g</sup> Irootaquequea notsaventajiguica naatimpajia aisa nocantajia-quempica: paventaventaiquemparija Quirishito cameetsaniji irishetacojia-quempiniji Aapani Irioshi. <sup>9</sup>Pincanquegueti pivagantequi: "Jesoshi iriguenti Majirontamajatatsica", aisa pintsashirentamajaquegueti iroomajaca ivochata-jiri Aapani Irioshi imetojavecagueti, ariquea iroguenti irishetacotaquempi-quea Aapani Irioshi. <sup>10</sup>Irootarite ashire antsashirentantamajaquempaca iroomajaca aventaguitempariniji irigomajareta-caantajicajica, aisa irooqua avangante ancantantempaca: "Iriguenti Majirontamajatatsica", irishetacontajiacajica.

<sup>11</sup>Ocanquequea Tioncarentsimajaca: "Quericaca avenquemparineca iriatimpa, aatoquea yoguipashiventimajitiritsi, aatonica yaventashitaritsi intati."<sup>h</sup> <sup>12</sup>Oraquea icanquegueti imaica, iriguenti icantajiaque maasano caquinteguetsica, iriatimpa yamenajacajiquea ajamirincajiaque, aquempeta-

vacaajiaca joriojia aisa teeca irijorijoi-gueji, iriguentitari Amajirote maasano. Jero caaviji icavintsajamajajacaji maasano cajemajianaquerica. <sup>13</sup>Aritarite "maasano aventajiaquemparoneca ivajiro Majirontamajatatsica, iraajiavajeri."<sup>i</sup>

<sup>14</sup>Cotanquitsiquea aatogueti itsajiguritsi iriguenti itigarancaqueca Aapani Irionshi ¿querocampate incojiaquempani incajemantajiaquemparica iraavajerini-jite? Aisa aatogueti iquemacojiguiritsi, ¿querocampate incojiaquempani iraventantajianaquemparica? Aisa aatogueti itsavetantimojiritsi, ¿querocampate incojiaquempani inquemaco-tantajiaquemparica? <sup>15</sup>Aatogueti ichoocatitsi tigarancajiaquerineca, ¿querocampate incojiaquempani iroaroaitantanaquempaca intsavetante? Arikea ocanque tioncanquitsica: "iCameetsaguitivaeque iguiti amiroca quenquetsatsarentsi oguishinejantsatsica tsavetanqueroca cameetsaguetatsica!"<sup>j</sup>

<sup>16</sup>Cotanquitsiquea itsavetantimojivecarí, teequea maasano inquemisantajigueroji Quenquetsatsarentsi Oganejencatatsica. Aritari icanque Isaiahini coramani: "Nomajirote, ¿choocampate quemisanta-queroca notsavetantimojiaquerica incantantaquempaca: 'Iroomajaca'?"<sup>k</sup> <sup>17</sup>Irootaquequea nocantantaquempica, anquemajiaquerogueti itsavetantajitaqueca agavejaque aventaventaiquempari Quirishito. Iroguentiquea anquemajia-vaque icanqueca Aapani Irioshi.

<sup>18</sup>Cotanquitsiquea naatimpa nocanque: Iroosacanica, ¿teecacajate inquemajigueroji? Ilquemajiavecarоque! Otioncacatari ocanque:

e 10.5 Irev. 18.5. f 10.6-7 Ireo. 30.12-13. g 10.8 Ireo. 30.14. h 10.11 Is. 28.16. i 10.13 Joere 2.32. j 10.15 Is. 52.7. k 10.16 Is. 53.1.

“Yoayoaitanaquequea tsavetantajiasica itsitacaguítajavaetanaque-roquea maasano quepatsipae, iquemajavaqueriquea itsavetanti-mojojaquerigueti ocaraguepoja-quegueti.”<sup>l</sup>

<sup>19</sup>Cotanquitsiquea noncantsijajempiqueate aisa: ¿Aricajate iroocajate cotanquitsiquea teecajate inquemajigueriji ishiraerijia taaca opaji icantajia-queca irirajia tsavetantimojiaquerica? iQuemajiavecaqueate!, cotanquitsiquea teequea irishineventajiguemparoji icamantajiavecarica. Itioncacotanaquero Moishishini coramani icanqueca Aapani Irioshi, icanque:

“Pincatsimatacotsitaqueri itsipajia teeca irigonorontavacaajiguempaji noncavintsajajiaquerigueti.

Noncatsimatacaaquempi caquin-tejia teeca intsajavetempaji.”<sup>m</sup>

<sup>20</sup>Iroompaquea Isaiashini teequea intsarogueji, tampatica yoquiero-quea itioncacoqueroquea icanqueca Aapani Irioshi iquenquetsatacojia-querigueti teeca irishiraerijate, icanque:

“Irirajia teeca inquenquejajavetenaji intsajiaquenaniji, imaica itsajapoajana.

Ariquea iquempejaca irirajia teeca incoacojajavetenaji, imaicaquea imaica naatimpa notsatacaajiaqueri quero nocotani.”<sup>n</sup>

<sup>21</sup>Oraquea itioncacotaqueroquea icanqueca Aapani Irioshi iquenquetsata-cojiaqueri ishiraerijia, icanque:

“Nocajemavacoveguitarini caquin-tejia pigapigatsatantanerija, eeshotia inaque.”<sup>o</sup>

Inconoagarantajaquempaquea ishiraerijia choocagarantajatsineca tsaroventamajianaquemparineca Aapani Irioshi

## 11 <sup>1</sup>Iroosacanica imaica nocanque:

1 Aricajate yovashiantajianajiri Aapani Irioshi maasano ichoviquijiani Ishiraeri icantajiavecaca: “Iriguenti nashijia”? iTeequeate! Pamenejate naatimpa naroguenti igonorona ishiraerijia, iriguenti choviquitanaquena Vejamime ichoviquini Averaameni, cotanquitsiquea irirajea Aapani Irioshi teequeate irovashiantanajenaji. <sup>2</sup>Arikea iquempejiaqueri nogonorojia teequea irovashiantajianajeriji, itsatsitacariequa coramani, icoguijiaqueri, ariquea imaica icocani yashintajiacari. Pitsajiguerotarite itioncacojitaquerigueti Iriashini iquenque-tsatacaajiaquerigueti Aapani Irioshi, icamanneri quero icoguishejiajaci ishiraerijia, icanqueri: <sup>3</sup>“Nomajirote, iteroncaciaqueriquea imetojajiaqueri tsavetantajatsica pitigarandiquimojiavecarica. Aisa ipishon-quitaguequempiroquea paretaretepae. Aparoquea nochoocataji naatimpa, cotanquitsiquea isariimenquenaro irmetojajiaquena.”<sup>p</sup> <sup>4</sup>Cotanquitsiquea quero icanqueri Aapani Irioshi? Icanque: “Noquempoguijajajiri quea 7,000 shiramparijia tsaroventamajaqueunaca teeca iroguerorentempariji Vaare ipeajiaquea pigonorojia irioshitashijia-caca.”<sup>q</sup> <sup>5</sup>Arikea oquempetaca imaica ichoocajiaque apaopae tsaroventajiacarica Aapani Irioshi, inchiquiojita icavintsajamajajiaqueri iriatimpa, iriotari cavintsa-jantaneri, icoguijiaqueriquea cameetsaniji intsarovenajiaquemparinijite. <sup>6</sup>Teequea irooquea incavintsajimentajigeriji yamenavecagueti icomajavaeca

<sup>1</sup> 10.18 Sar. 19.4. <sup>m</sup> 10.19 Ireo. 32.21. <sup>n</sup> 10.20 Is. 65.1. <sup>o</sup> 10.21 Is. 65.2. <sup>p</sup> 11.3 1 Maj. 19.10, 14. <sup>q</sup> 11.4 1 Maj. 19.18.

iriatimpajia, manatari intati icavintsajashjiacari iriatimpa. Aatomegueti oquempetaca imaica, aatomequeate otampaticatime igavintsajantantanerini Aapani Irioshi.

<sup>7</sup>Iroosacanica, ¿querocampate ococani? Manaquea oquempetaca imaica. Iriraquea ishiraerijia imintajaveca irishineventajavaquempari Aapani Irioshi, cotanquitsi teequea irishineventajigueriji maasano, manaquea ishineventajiacari icoguajiaqueca paesatoniqui irashintajiaquempari. Irirajaquea igonorojia arimpaquea iquishoshirentajianaque.<sup>r</sup> <sup>8</sup>Ariquea itioncacojiquero coramani ocanque:

“Aapani Irioshi imaguempishirenta caitsijigari.

Yoquijatacaitsivetari, teequea irinejantajiguemparoji.

Iguempitatacitavetari, teequea inquemantemparoji.

Icocaniquea iquempejiaca coramani arejevaetanacaquea imaica.”<sup>s</sup>

<sup>9</sup>Aisa icanque Taavini:

“Irishecashecaivequempagueti irivaracajiterita ontsatojiguerita.

Intivativaitempata, onquejetacaa-jemparita icatsimavecaca.

<sup>10</sup>Impeacaitsijitemparita teeca iramenimateji.

Omitsatacaaguitemparinita yantagushequeca.”<sup>t</sup>

**Aapani Irioshi ishetacojiaqueriquea teeca irijorijoigueji**

<sup>11</sup>Imaica noncanque: Iroosacanica ariqueate iquempejiacagueti imaica joriojia teequea irinintajigueriji intsaro-

ventajiaquempari, ¿arite yovashiantamajajianaqueri Aapani Irioshi aatonijite ishetacojiguiritsi? ¡Teequeate! Arimpaquea iquempejiacagueti imaica teequea intsaroventajiguempariji irootaquequea ipitsocashitantajiacarica itsipapae teeca irijorijoigueji irishetacojiaqueriniji cameetsaniji irinintajiaquenijite joriojia impitsocashijiaquempari inquejetsijajempariquea iriatimpajia aisa incavintsajamajajiaqueri irishetacojiaquerinijite. <sup>12</sup>Oraquea teequea intsaroventajiguempariji iriatimpajia joriojia, irooqua oshimerancantapojaca icavintsajamajajiaqueriquea maasano caquinteguetatsica. Aisa inintaveca Aapani Irioshi incavintsajamajajiaquerimequea joriojia, irishetacojiaquerimequeate, cotanquitsiquea teequea irinintajigueriji, irootaquequea oshimerancantapojacaca icavintsajamajajiaqueri teeca irijorijoigueji ishetacojiaqueri. Oquempetaca imaica oshimerancantapojacaroquea icavintsajamajajiaqueri teeca irijorijoigueji, iiroompaqueate intsaroventajiaquemparigueti iriatimpajia joriojia, caavijiquea oshimerancantamajajauquemparoqua incavintsa-majajqueriqueate iroshequiamajatatiguenimaja!

<sup>13</sup>Cotanquitsiquea piconagarantajia-caquea teeca aviguentijia joriojia. Imaica noninque noncantajiaquempi iriguenti tigarancaquenaquea Aapani Irioshi noanaquequea nontsavetantimojiaqueri pigonorojia, irootaquequea noshineventantacaroca nosavicaventamajatantacaroca,<sup>14</sup> namenaquetari aricaquea iramenajiaquempiquea

**r 11.7** Pamenero 9.32: “¿Queroquea ococani teeca irishineventajiguempariji Aapani Irioshi? Manaquea yaventaventacaroca quea itioncacotanaqueca Moishishini inintajaveca irinetsanamajajiaqueromequea cameetsanijite irishineventajiaquempariniji Aapani Irioshi, teequea iro irinintajigueriji iraventaventaiquempariquea Quirishito, icomijiacariqueate. Irootaquequea itsavetacotantajiacarica Quirishito iquempetacaajicari mapi tivatantatsica.”

**s 11.8** Ireo. 29.4; Is. 29.10.    **t 11.10** Sar. 69.22-23.

nogonorojia pitsaroventajiacari Quirishito aviatimpajia, ariquea irintintajiaque impitsocashijianaquempari Aapani Irioshi incavintsajamajajquerija iriatimpajia aisa, cameetsaniji inquempejanajempinijite aviatimpajia irishetacogarantajiquerij. <sup>15</sup>Oquempetaca imaica oshimerancantacaroquea icatsimajiaquerigueti Aapani Irioshi joriojia irioquea ipitsocashijianaca teeca irijorijoqueji imeshiajiaqueri, arimpaqueate intsaroventajianaquemparigueti joriojia caaviji oshimerancantapojemparoqua irishineventajiaquempariquea Aapani Irioshi iriatimpajia aisa, irishetacojiajeriquea. Iroqueragueti quempeta-  
catari manaca imetojajiveca, cotanquitsiquea irimeshiajiaquerigueti ariqueate onquempetaquempa ipochajianaji.

<sup>16</sup>Nonquejetacaguempiroja irojocagarantajitenerigueti Aapani Irioshi capichase ose pan iroquetica impeacaa-jitempaca, iramenajiqueroquea maasanose irashintacoquemparo Aapani Irioshi. Ari oquejetaca aisa irashintquemparogueti Aapani Irioshi ovarishitsa inchato, maasanoshimpoqueja irashintacoquemparo.<sup>u</sup>

<sup>17</sup>Iriraquea joriojia teeca intsaroventajiguempariji manaqueate iquempejicaroquea ojempequipae orivo ometojajempequitigueti icaratsijitaroqua ipishonquitajitaro. Iroompaquea yaashitsijitaroqua orivojempequiniro yovinchacantsantajitajaro cameetsaniji anijacaavajeroniji ojaviare. Cotanquitsiquea maasano aviatimpajia teeca pijorijogueji, manaquea piquempejiacaro orivojempequiniro yovinchacantsajitarogueti metojajempequivetanquitsica. Aviguentiquea ipitsocashijiaja Aapani

Irioshi ishetacojiajimpiquea, yanijacaashirentajiaquempi aviatimpajia, teetari intsaroventajiguempariji joriojia.

<sup>18</sup>Cotanquitsiquea inchiquiojita pisemejiguitijate pamenaquiaque panaajiaqueriquea iriatimpajia, aviguentijiaquea ishetacojiaqueca Aapani Irioshi. Pisemejiaquegueti iintsija pinquenquejajiguerroja iriquetiquea tsaroventacari coramani Averaameni, irooquea oshimerancantantacaroca pitsaroventajiacari aviatimpajia imaica, teequea aviquetica tsaroventajiguemparine. Pameneja orivo teequea irooquea anijacagueroneca ojempequi, iroguenti anijacaguiroquea ovarishitsa.

<sup>19</sup>Iroompaquea arica pincante: “Pican- tamajataque, cotanquitsiquea icatsimajiaqueri Aapani Irioshi joriojia teeca intsaroventajiguempariji, naroguentiqueate ipitsocashijiaji irishetacojiae, quempetaca icarajitirogueti metojajempequivetanquitsica irooqueate iquejeta-  
caantajitajaro yovinchacantsajitaroqua orivojempequiniro.” <sup>20</sup>Arimajata-  
rite, cotanquitsiquea teequea incatsimashijiguempari Aapani Irioshi intati, iroguentiquea icatsimatantajiacarica yamaenaqueriquea tee iraventempariji. Aviatimpa manaquea parentajianacari, irootaquequea ishetacotantajiaquem-  
pica. Jero noncantantaquempica imaica aatoja pisemejiguitijia, manaquea pintsaroajiaque. <sup>21</sup>Iquejetacarogueti Aapani Irioshi orivojempequimajaca icaratsitaro, ¿arimpate aato iquejetacitarotsi orivojempequiniro? Aviguentijia  
ocantacoque piquejejiacaro orivojempequiniro.

<sup>22</sup>Iintsija pamenejate intati. Caaviji icavintsajantamajati Aapani Irioshi,

**u 11.16** Capichase ose ocantacoqueri ivaesatiniteni joriojia iriquetinica tsaroventajiacarica Aapani Irioshi, maasanose ocantacoqueri ichoviquijianaqueca iriatimpajia. Ari oquejetaca ovarishitsa inchato ocantacoqueri ivaesatiniteni joriojia.

cotanquitsiquea aisa caaviji incatsimajiaqueri covaeguisherija. Irootaquequea icatsimatantajiacarica joriojia tivashirempojatsica, aviatimpa manaquea icavintsajamajaquempiquea, cotanquitsiquea pincocompanija pintsaroventamajatanaquemparija cameetsaniji incoquempaniniji incavintsajamajaquempiquea. Oraquea aatogueti piquempetirotsi imaica, incatsimaquempiquea aviatimpa aisa, pinquempetaquemparo quea metojajempekuero icarajitica.<sup>23</sup> Iriatimpajaquea aatogueti icancani iquenquejajiaji: "Aato naventari", iriraquea Aapani Irioshi inconoacaantsijajempariequa irapijorijate tsaroventajiacarica, onquempetajemparo ivinchacantajitajerogueti ojempequi inchato, yagavejaquequea iriatimpa irivinchacantajajempari.<sup>24</sup> Pinquenquejajeroja orivojempequiniro, yaajivaequitiroquea ontaniqui otsoroashitanacaguetti, yamajiro ivinchacamposajaro orivomajaca iniganquitejirequi. Imaica iramanajerogueti ojempequimajaca icarajivetacaca choocatiraja teequea ometojamajateji, taampina iraitsitemparo irivinchacantajemparo ashimajaca ovoa. Quempeca aviatimpa ariqueate ishetacotimpiquea Aapani Irioshi itsipatacaaquiaquempiri maasano tsaroventajiacarica, iriompaqueate joriojia intsaroventajiaquemparogueti caaviji intsipatacaaquiaquempari igonororojia tsaroventajiacarica coramani.

#### Ishiraerija iraventajianajempari Aapani Irioshi

<sup>25</sup>Imaica, napitsaroventarijate, noninque pintsajiaqueroquea teeca intsajivetemparo joriojia coramani cameetsaniji aatoniji pisemejiguitsi pincantajaque pitsajigui. Iconoagarantajaci

ishiraerija iquishoshirentajianaque, cotanquitsiquea oncoramanitapojaegueti intsaroventajiaquempariguetti maasano teeca irijorijo queeji tsaroventajianquitsineca, ariquea aato iquempejiaja imaica.<sup>26</sup> Onquempetanaquemparogueti imaica ariquea irishetacojiqueriquea maasano ishiraerija, ariquea ocanque Tioncarentsimajaca:

"Incoraquetaque Ompetantsica  
irisotoantapojoemparo  
Shionequi,  
irovashiantacaajiapojajeri icovae-  
guishejiacaguetti ichoviquijiani  
Jacovo."<sup>v</sup>

<sup>27</sup> "Irootaketari nocantajiaquerica  
nonetsanajiaquenerica  
noshetacojiaqueriguetti igovaeguishere."<sup>w</sup>

<sup>28</sup> Irirajia nogonorojia joriojia tee irinintajavajero Quenquetsatsarentsi Oganejencatatsica irootarite icatsimati-mentantacarica Aapani Irioshi, cotanquitsiquea imamintaquerogueti irooqua amishirentantajimpica aviatimpajia teeca pijorijo queeji itsavetantimojitaquempiro-tari. Cotanquitsiquea iroorijite icoguiaco-vaequeri ivaesatiniteni irashintajiaquempariniji, icocaniquea ipintsajajari.<sup>29</sup> Aritarite aatoquea icantashitatijaarotsiquea Aapani Irioshi icanqueca. Taaca opaji irojocajiacaji aatoquea yaapitsajajirotsi. Ariquea oquempetaca quericaca icajemashirentajiaqueca aatoquea icantiritsi: "Teetari noncajernempinic." <sup>30</sup> Oraquea coramani aviatimpajia teequea pinquemisantajiavetempari Aapani Irioshi, cotanquitsiquea iriatimpa ipintsatacomajaquequempiquea imaica, yamenajiaqueritari joriojia teequea inquemisantajiguerriji.<sup>31</sup> Ariqueate iquempejiaja iriatimpajia imaica teequea inquemisantajiguerriji, cotanquitsiquea oncoramanitapojaegueti impintsatacojia-

<sup>v</sup> 11.26 Is. 59.20. <sup>w</sup> 11.27 Jer. 31.33-34.

quempariquea Aapani Irioshi inquempeta-caajaquempiquea aviatimpajia ipintsata-cojiaquempigueti.<sup>32</sup> Yamenajiaqueriquea Aapani Irioshi icovaeguishejiaca maasano caquintejia, teequea inquemisantajiguerriji, irootaquequea icantantacaca: "Ari icojiaca maasano caquinte." Manaquea iquempeta-caajiacari imaica cameetsaniji impintsata-cojiaquemparinijite maasano incavintsajajaqueri.

<sup>33</sup> iJeejeguitatsi, caaviji icavintsajanta-majati Aapani Irioshi!

iCaaviji itsmajati, itampaticamaja-tiro maasanopae!

Aatoquea atsajiguirotsi iquenqueja-guetica iriatimpa,  
ariequa oquempetaca aisa aatoquea  
atsajiguitsi quero icotani  
iriatimpa.

<sup>34</sup> ¿Quericampate tsatiroca iquenque-jaguetica Aapani Irioshi?

¿Quericampate agavejanquitsineca  
intsatacaqueri?"<sup>x</sup>

<sup>35</sup> ¿Quericampate agavejanquitsineca  
irojocaueneriquea taaca  
opajitapae cameetsaniji irogui-piantajate iriatimpa?"<sup>y</sup>

<sup>36</sup> Maasanoquea yamenajiguettica  
iriguenti peacaaguecaro, aisa  
iriguenti tampishitacaaguettiro-quea, irootaquequea ashintague-caroeua maasanopae.

Irioshiatsi antsarotentamajatem-paca, ancoguitepaniqueua  
ancantajiaqueri: "iCaaviji  
poganejencamajataca!" Ari  
oncoquempa.

#### Pimpaquerija Aapani Irioshi pitsino

**12**<sup>1</sup>Imaicaquea imaica, napitsaro-ventarijateni, aritaquequea  
ipintsatacojiaquempi Aapani Irioshi,  
irootaquequea nocantantajiaquempica

iintshiatsi pimpaquerija pitsino,  
pinquejevequempariquea viratsi  
imetojajiquerica, cotanquitsiquea  
aviatimpajia panijimojianajiri, pincoma-jamajaventanajempari pishinetacaajem-parinijite, irootarite pintsaroventashir-rentantamaquemparica.<sup>2</sup> Aatoja  
piquejejiajartsijate choocajianquitsica  
imaicatica quepatsiqui, manaquea  
piroaqueraquenquejanetanaje pincanta-shitatiantanajempaca, cameetsaniji  
pintsajiaqueniji oganejencaropae  
inttaguetica Aapani Irioshi, iroguenti-tari shinetacantatsica, oganejenca-vaea.

<sup>3</sup>Iriraquea Aapani Irioshi icavintsaja-quenaquea intintacaquenaquea  
nontsavantimojiaqueri maasano,  
irootaquequea imaica nocantantajia-quempica aatoquea pisemejiguitsi  
pincantajiaque: "Nanaaqueri itsipapae",  
manaquea iroquetiquea pamenamaja-quempa apaniropae quero picojiacani  
cameetsaniji pintampaticamajiqueroniji  
poaquieroqua. Irooqua pamen-aquempa quero picojianacani yagaveja-  
caaquempigueti Aapani Irioshi paventa-jiaquemparigueti: irooca pitampishita-shimajatanaquero paventacarigueti,  
irooca mana paventavetaquitari  
capichaji. <sup>4</sup>Quempetaca aatimpajia  
chooca acojia, aquijajia, aguitija,  
maasanopae. Teequea arikea onquem-pemajatemparoqua ogonoropae,  
apaniropae ocantashitatiajicaca. Pamene-roja acotsi manaquea yajircantajicaro,  
oraquea oquijantsi manaquea yamenan-tajicaroquea, irooqua guitis  
manaquea yanijitantajitaroqua.

<sup>5</sup>Arikea aquempejiaca aatimpajia  
tsarotentajiacarica Quirishito, acarami-rincavaeveca cotanquitsiquea iriatimpa  
yamenajiacaji aparo achoocajiaque,

<sup>x</sup> 11.34 Is. 40.13. <sup>y</sup> 11.35 Jope 41.11.

aque mpejiacaroquea itsino apatsinoro ocantaca, ari queate atsipatavaca ajiaca atsaroventajiacari. <sup>6</sup>Aapani Irioshi icantashitatiaca ajiacaji apaniropea yagavejaca ajiacaji. Taaca inintaca ajiacaji cica iriatimpa antajia queca yagavejaca ajiacaji. Choocagueti aparo iroogueti yagavejaca querica intsavetantero ican querica, ii tsija intsavetantero, cotan quitsiquea incoquempanija iraventanaquempari. <sup>7</sup>Iroogueti yagavejaca querica iramitacotantavae quegueti, intampaticamajauqueroja iro aquero iramitacotantavae quegueti. Iroogueti yagavejaca querica intsataca antanta quequea, iro quea irisavica ventaque intsataca antanta vaeque. <sup>8</sup>Ari quea oquempetaca iroogueti yagavejaca querica intampishitaca antanta que, iro quea irisavica ventaque. Arigueti ican queri Aapani Irioshi incavintsa jaja queriquea iraptsa roventarijiate ni irojocagarantajia queri yashintaguecaca, cameetsavae que irojocajia queriquea aato quea itsanea pitsataritsi. Iroogueti yagavejaca querica irijivajivaitante, cameetsaja iro aquero. Iroogueti yagavejaca querica impintsatacoquempariquea atsipejian quitsica, irishineva eque pauea incavintsa ja querigueti.

#### **Quero incoquiaquempani tsaroventamajatarica Aapani Irioshi**

<sup>9</sup>Pimpintsamajatantempaja, aato quea pipintsatantamampega intati. Pisema quempar oja covaeguisherentsi, quisho poaquer oja cameetsaripae. <sup>10</sup>Pimpintsamajauquemparijate papitsaroventarijiate ni, pinquempetaca amajauquemparija iriguentica pigonromajaca. Pamenajia querijate yanaajia quempiquea pishine ventajiaquempari. <sup>11</sup>Taaca opaji pantajaque aato quea peeshojiguitsi, manaquea pishine ventajiaquemparo quea,

pitsajia que iriguenti pantajia que eque Amajirote. <sup>12</sup>Pishineva eque pa queate pincanquempa, pitsajia que tar irinetsana quero quea Aapani Irioshi inintacotsija quempica incavintsa jaja quempiquea. Cameetsavae que pantsipe tacovae quemparo taaca opaji pantsipejiaquempac a, picancanija pamanapini queriquea Aapani Irioshi. <sup>13</sup>Pincavintsa jaja queriquea igomajamajarejia Aapani Irioshi coguitejacojianquitsica, pojocagarantajia queri icoguitejacojicaca. Quericaca arejetimojiguimpica paacameetsatava queri.

<sup>14</sup>Pamanacoventajiana querijate atsipeca ajiacuempica. Aatojate picantiri Aapani Irioshi: “Pincatsimati menteri”, manaquea pincantsitempariquea: “Pincavintsa jaja.”

<sup>15</sup>Pamena querigueti pigonoro irishineva eque pauea, pishineva etanaquempa quea aviatimpa aisa. Ora quea pamena querigueti ishimampo janca vaeca, pishimampo janca cotanaquempariqueate aviatimpa.

<sup>16</sup>Aatoja picatsimata vaca ajiatsi, cameetsaja paavaca ajiacuempaja. Aisa aatoja pisemetimatisi, manaquea pinconoa jiaquemparija teeca irana anteji. Aato quea piquen queja jiguitsi: “Notsamajati nocanca.”

<sup>17</sup>Querocagueti incoquempini itsipa, aatojate pipigajigaritsijate. Pincomajajia quempaja pinchoocajia que niji cameetsa, iramenajia quempinijite maasano arimajaca otampaticata que picomajajajac a tee quea pamatavijanteji. <sup>18</sup>Arigueti pagaveja que, pivetsinanta vaca ajiacuempa paavaca cimentajia quempaniji. <sup>19</sup>Napisar oventarijiate ni nopintsamajataca, aato quea pipigatanta, manaquea poguijaya queri igatsimare Aapani Irioshi. Otioncacatari: “Icanque Amajirote: Naro ashincaro pigamen-

tagantsi, naroquea vegaratacaaque-rine.”<sup>z</sup> <sup>20</sup>Irootari ocanque:

“Pamenavequemparigueti catsima-quempica taseanaque, pojoqui-tsitenempariquea isheca.

Irooca imire, pojoquitsitenempari-quea irimireta.

Pinquempetaquerogueti imaica  
ariquea incotanaquempa  
ovashiventajavaetanaqueri-  
quea,  
onquempetanaquemparoqua  
pogataacotenerigueti ishinqui-  
reguishiqui quichagantemen-  
quiro.”<sup>a</sup>

<sup>21</sup>Aatojate pishinetirotsi agavejimpitsija covaeguisherentsi, manaquea panaana-quero, jeroquea panaantantanaquemparoca pincavintsajacotantanaque.

**13** <sup>1</sup>Imaica noncantajiaquempi cameetsavaeque maasanojia-quea pinquemisantajiaquerija pimajiro-jiate. Ijamirincajiaque teequea inchiqui-ojita impeajiguempaji intati pimajiro-jiate. Iriguenti majirontacaacari Aapani Irioshi. <sup>2</sup>Jero quericaca catsimatashita-quemparineca imajironcaca pigatsata-quemparineca, incatsimaqueriquea Aapani Irioshi, teetari inquemisanteri-queate ipeacaavecaca imajirote. Iriatim-pauea quempetacaantansineca.  
<sup>3</sup>Irirajiaquea pimajirojate teequea irooqua inchoocatashiteji iromintsaro-mintsarovaequeriquea comajamajajian-quitsica, iroguentiquea ichoocatashiji-aque iromintsaromintsarovaequeri peacaaguishetanquitsica covaeguishe-rentsi. Teegueti pininteji iromintsaro-mintsarovaequemquea pimajirojate,

iroosacanica pinchoocajiguequeate cameetsa irishineventajiaquempinijite.

<sup>4</sup>Iroguentitari ipeacaimentajiacariequa Aapani Irioshi pimajirote irinetsanajia-quempiniji pinchoocatantajiaquempaca cameetsa. Oraquea aatogueti piquemi-santajiguiritsi, ariquea iroguenti pintssaroacaajaquempariquea, teequea intati impeacaajiguempariji Aapani Irioshi pimajirojate. Iroguentiquea ipeacaimencari incatsimajiaqueriquea peacaaguishetatsica covaeguisherentsi.

<sup>5</sup>Irootaquequea noncantantajiaquem-pica pinquemisantamajajuerija pimajirojate. Aatoquea aparo piquemi-santajiguiritsi aatoniji icatsimajiguim-pitsi, manaquea aisa pinquemisantajia-queri irooriji pitsajiaque ininque Aapani Irioshi pinquemisantajiaqueriquea.

<sup>6</sup>Irootaquequea povegaratantacaroca icantajitica *impuesto* <sup>b</sup> pojocagarantanta-jiacanarica majirontatsica pimentaqui-tsipae, iroguentiquea isavicaventaji-aque inintacaajiaquerica Aapani Irioshi irantajiaqueca irimajironquempa.

<sup>7</sup>Povegarajigueri maasano paacotiri-gueti. Incanquegueti majirontatsica povegarataqueroquea icantajitica *tributo* <sup>c</sup> irooca *impuesto*, povegaraque-roquea pojocagarantajiaqueneriquea pimentaquisite, aatoquea pipeacojigajitsi. Irirajia comajarijia, pinquenqueja-cameetsatacovaequeri, pinquenquetsata-coventaquerija cameetsa.

<sup>8</sup>Onchoocategueti paacotantegueti aatoja pipeacotantajigui, manaquea poguipiajeneri taampina paacoquea. Pincoguitempani pimpintsatavacaamaja-quempaquea. Aritarite quericaca

**z** 12.19 Ireo. 32.35. **a** 12.20 Tsa. 25.21-22. Pinquejetaquempagueti arica incantashitatianaquempa iraventanaquempari Aapani Irioshi irishetacotajeriniji.

**b** 13.6 *impuesto*. Oraquea icantajitica *impuesto*iroguenti icantaqueca majirontatsica irojocajiqueneri cameetsaniji irovegarataqueneri amitacojiaquerica quejecarica coareta, itsipajia netsanatiroca quenavoquirontsipae, maasano. **c** 13.7 *tributo*. Iroguenti quejevecaroca *impuesto*. (Pamenero otsapa 6.)

pintsamajacarica irapicaquintete, jac netsana inetsanaqueroquea icantacaantaqueca Aapani Irioshi itioncacotanaqueca Moishishini.<sup>9</sup> Icantajiquerotarite: "Pimpintatsataquemparija pigonoro pinquejetacaajempa pipintatsagueti aviatimpa." Iriraquea quempetiroca imaica inetsanataqueroquea itioncacojiqueca ocanti: "Aatoja picantatsatacotantsi, aatoja pimetojanti, aatoja paitsitantitsi, aatoja pitsojeventaritsija pigonoro, aatoja pinintsiguetirtsija yashintajiacaca itsipa." Aisa irinetsantaquemparoqua ogonoro quempeguetacaroca ocatica.<sup>d</sup><sup>10</sup> Maasanoquea pintsamajatarica igonorote queocaca incojiguerini. Irootaquequea nocantantacaca iriraquea pintsatamajatatsica inetsanaqueroquea maasanopae itioncacotanaqueca Moishishini.

<sup>11</sup> Imaica noncantajiaquempiquea pinquempejiaquempaquea imaica, pinquenquejacoma jateroja savincaguiteripae achoocatantacaca. Aapojaquea pintinajashirentantajianaquempaca, iroshipojitaro incoraquetajate Amajirote iraajajatajiqueate intspatsipaitanajaji inquitequi. Oquempejitatapojacaci imaica incoraquetantajempaca, anaqueroquea oquempejitatcovetapoja cajigueti iroqueragueti atsarorentajacarigueti.<sup>12</sup> Imaicaquea imaica achoocajiaquequea ocaniqui oncaviacagueta covaeguisherentsi iroguentica quempetaca manaca amanquimanquitacovae quequea, cotanquitsiquea iroshipojaji incoraquetajate Amajirote. Oraquea incoraquetajategueti ariuea iroguenti onquempetaquemparoqua asavincaguettacojiguigueta, aatoqueate amenajajrotsi covaeguisherentsi. Irootaquequea imaica jaame ampishoncajanajerojate

maasanopae isenacajigueta pitsecacotanquitsica, irooqua asavicaventajajanje inintaguetica Aapani Irioshi, onquempetaquemparoqua anquitsata-jemparo aguishorijiate tsirencanquitsica ticaavaqueroneca covaeguishetacaajime-meca.<sup>13</sup> Ancomajamajajianaquempaqueate quejetaca savincaguitetacotajaji. Aatoja apeacaajiatsijate taaca opajitapae ovashiventajantaguetsica. Aatoquea oimatitsi yomporoguijajacagueta ipeacaaguishejiacarogueti tionsarentsjencani covaeguisherentsi. Aatoja ashinquitati. Aatoja oashitirotsi manquigarentsi. Aatoja ationtajigatsi. Aatoja acatsimatavacaajigatsi, aisa aatoquea acatsimatacotsitiritsi itsipa.<sup>14</sup> Iriguentiquea pinquitsaatajempa Amajirote Jeso quirishito, aatoja piquenquejajiguitsi queroquea pincoqueroni pimpeacaaguishetacuemparogueti pinintagushevecaca.

#### Irrajia teemajaca intsateji quero ancojiaquempani aventamajacarigueti Quirishito

**14**<sup>1</sup> Choocagueta papitsaroventari-jate teemajaca intsateji quero ancojiaquempani aventamajacarigueti Quirishito, cotanquitsiquea ininquequea inconoajiaquempiquea ontaniqui picapiocajigagueta, aviatimpajia paajiavaqueriqueate aatoja picantajiguetsija: "Teemajacatarite pintsamajateji."<sup>2</sup> Pamenejate iconoagarantajacaquea icantajiaque cameetsavaeque ashecajiaquempaquea taaca opajitapae: iteshipae, maasano. Itsipa teemajacaca intsajigueji teequea irishecajiguempariji iteshi.<sup>3</sup> Iriraquea shecajiacarica iteshi aatoquea icantajiguiritsi teeca irishecajiguempariji: "Teequea pintstateji." Iriogueti teeca irishecatempariji aatoja icantajiguiritsi

<sup>d</sup> 13.9 Irev. 19.18; Eeq. 20.13-15, 17; Ireo. 5.17-19, 21.

shecajiacarica: "Manaquea pipeacaaguishecaroqua covaeguisherentsi pishecatacarigueti iteshipae", jac yashincariqua Aapani Irioshi ipeaqueriquea irijanite.<sup>4</sup> ¿Arimpate taampate aviatimpa cameetsaniji pincanqueriniji papitsaroventarite arigueti ichoocaque cameetsa aricaca tee? Iriotari ashincari Amajirote. Inchiquojita incanqueri iriatimpa, iriotaquequea amenamajaqueriquea quero icotacani. Cotanquitsiquea inchoocaque cameetsa, iragavejacaqueritari Amajirote.

<sup>5</sup>Oquempetaca aisa iconoagarantajiaca chooca cantajitsica: "Chooca savincaguiteri caavijica anaaque oganejencavaeca, manaquea irisavica-ventajiquerojate irishineventajiaquemparinijite Aapani Irioshi." Itsipapaequeate cantajianquitsica: "Ojamirincavaeque savincaguiteri ariquea oquempetavacaaca." Cotanquitsiquea aviguentimpate aviatimpajia, apaniropae pinquenquejamajajiaqueroquea quero pincojiaquempani cameetsaniji irishineventajiaquempinijite Amajirote.<sup>6</sup> Iriraquea cantajitsica chooca savincaguiteri caavijica anaaque oganejencavaeca, manaquea icanque imaica cameetsaniji iroguiapaquijajateronijite yantavaequegueti irionijite irisavica-venquerinijite Aapani Irioshi irishine-venquempariquea. Arikeate iquempetaca aisa shecajiacarica iteshi, ishecajiacari yamenajiaquetari irooquea ininqueca Aapani Irioshi, jero icantacoguitani ishecajiacagueti ishineventajiacari Aapani Irioshi, yamanajiaqueri icanqueri: "Ariotesaa, Aapani." Arikeate iquempejiaca teeca irishecajiguempa-

riji iteshipae, yamenajiaque arica teeca irininteji Aapani Irioshi irishecajiaquempari. Aisa iriatimpajia icantacoguitani ishecajiacagueti ishineventajiacari Aapani Irioshi icantajiaqueri: "Ariotesaa, Aapani."

<sup>7</sup>Teequea anchoocatashijiguemparojo intati cameetsaniji antajiaqueroquea taaca opaji anintajiguica aatimpajia. Arikeate onquempetaquempa ametojajiaquegueti, aatoquea inchiquojita ametojimentiro anintajiguica aatimpajia. <sup>8</sup>Choocatirajajigueti, iroguentiquea achoocatashijiaque antajiaqueroquea inintaguetica Amajirote. Oraquea ametojajiaquegueti, manaquea oahoaitanaque iriatimpaqi antsipatsipaipojempari. Arikeate oquempetacaquea imaica, arica anchoocajiaque irooca ametojajiaquequea, icocani irashintajajaji Amajirote.<sup>9</sup> Imetojaquititarite Quirishito ariquea ipochatanaji cameetsaniji impeaqueampaqueate Imajirojiate maasano tsaroventajiacarica, choocatajatsica iriguentijia aisa metojajianquitsica.

<sup>10</sup>Iroompaquea aviatimpaquea,<sup>10</sup> ¿quero ocotacani picantacotancarica papitsaroventarite incatsimatimentajiterinishiatsi iquejequerogueti imaica? Aviatimpampani aisa ¿quero ocotacani pitsojencancarica papitsaroventarite? Maasanoquea aatimpajia ancatintiitimojiaqueriquea Aapani Irioshi oncoramanitapojaegueti incantajiacaji aricaca atampaticamajajiaqueroquea ininqueca iriatimpa aricaca tee.

<sup>11</sup>Choocaquea tioncanquitsica ocanque: "Icanque Amajirote: 'Arimajaca nochoocaque naatimpa, maasanoquea irogueroventajapirojena,

e 14.10 Icanquegueti Paavoro *aviatimpaquea* iriguenti icanque teeca irishecatempariji itshehipae. Icanquegueti *aviatimpampani* manaquea ipitsocashitari itsipa shecatarica iteshi.

incantajiaquequea: Arimajacatarite aviguenti Irioshimajatatsica.’ ”<sup>12</sup>

<sup>12</sup>Irootaquequea atsatantajiacaca oncoramanitapojaqegueti ironigaajiaca-jiro Aapani Irioshi maasano agoguishe-rejia, incoacotsitaji maasanojia apaniropae: “¿Quero ococani piqueje-tancaca?”

#### Aatojate ativashirentacagaritsi apitsaroventarijate

<sup>13</sup>Irootaquequea ovashiantantanajem-paroca acantaguishetacotavacaavetaca-gueti. Manaquea pincantajigue: “Aatojate notivashirentiritsi napitsaro-ventarite, ocoguishetanaqueritsi. Aatojate noticaashirentiritsi.”

<sup>14</sup>Naatimpa notsaroven tamajatacari-queate Amajirote Jesoshi notsamajatan-tacaca tee onchoocateji shecatsipae covaeguisheshirentacaantatsineca, cotanquitsiquea inchoocalegueti quenquejanquitsineca: “Shoshoh ashecataritsi, icoguisheshirentacaanaca-jitsi”, aatoquea ishecataritsi. Irisheca-quemparigueti manaquea impeaca-aquempa covaeguisherentsi. <sup>15</sup>Arigueti pishimampojancaacari papitsaroventarite pishecataquemparigueti iteshi icanqueca teequea oncameetsateji irishecajiquempariquea, oraquea pinquejetaquerogueti imaica, teequea pimpintsamajatempariji papitsaroventarite. Shoshoh picovaeguishetacagaritsi-jate iramenaquempigueti oo shecaquempi, ariuea incotanaquempa aato itsaroventajaritsi Quirishito. Iriguentitari imetojaventaqueca Quirishito. <sup>16</sup>Pamenaquegueti aviatimpa cameetsavaeque pishecataquempariquea iteshi, cotanquitsiquea choocagueti itsipapae papitsaroventarite cantanqui-tsineca teequea oncameetsateji pisheca-

taquemparigueti, iroosacanica aatoquea pishecataritsi aviatimpa aatonijite icantitsi picovaeguisheca. <sup>17</sup>Aritarite imajirontacagueti Aapani Irioshi teequea irooqua anaantamajatatsine ashecapae irooca amirepae. Jero anaantamajatanquitsica ancomajamaja-quempagueti, antsipatavaca aquem-paquea cameetsa aisa aatoja ashoshoguite-tatsi, manaquea ashineshirentajavae-quempa, irioqua agavejacaacajirone Ishire Aapani Irioshi. <sup>18</sup>Quericaca quempetemparineca imaica irantavente-nerigueti Quirishito, iriguenti ishinevenca Aapani Irioshi, ariuea inquempequempeitanaquempa caquinteja.

<sup>19</sup>Iroosacanica imaica jaameshiatsi ancomajamajajianaquempariquea cameetsaniji aatoniji acatsimatavacaajia-ajatsi, iroonijite amitacotavacaajia-quempaniji arimpaqueate antsaroventamajatanaquempariquea Aapani Irioshi.

<sup>20</sup>Aatoja pipomatsatirotsi yantaqueca Aapani Irioshi ishirequi pigonoro pishecaquemparigueti icantimentanta-vetacaca papitsaroventarite. Cameetsaveca pishecajiaquempariquea cantashi-tatiaguetsanquitsica iteshipae, cotanquitsiquea oraquea pincovaeguishetaca-aquemparigueti papitsaroventarite pishecatacarigueti iteshi, ariuea iriguenti teequea oncameetsateji pishecaquemparigueti. <sup>21</sup>Cameetsama-jataque aatoja pishecataritsi iteshipae, irooca pimirrotsija quepishjaripae, irooca pantaguetaque taaca opajitapae pamenaquegueti ontivashirentacaana-quempari papitsaroventarite. <sup>22</sup>Oraquea pamenacagueti aviatimpa cameetsavaeque pishecaquempariquea iteshi, aatojate pisemetitsi picamantiritsi itsipa, iriguentiquea pincamanque Aapani

f 14.11 Is. 45.23.

Irioshi. Cameetsavaeque iroquetitaja pinquenquejamajaueroja taaca opaji cameetsatatsica pimpeacaguempaca, ariquea pimpeacaquemparogueti pishinevaequempaquea irooriji pintsaque teequea pincovaeguishetimtempaji.<sup>23</sup> Cotanquitsiquea iriraquea teeca intsamajate aricaca cameetsavaeque irishecaquempariquea iteshi aricaca tee, ishecatacagueti iroguentiquea icovaeguisheca, ariqueate icanque: "Aricajate teecajate oncameetsateji noshecataquemparigueti." Aritarite taaca opaji antajiaque, arigueti ancantajiaque: "Aricajate teecajate oncameetsateji nompeacaquemparoqua", iroguentiquea acovaeguishejaca.

#### Anquenquejacojiaqueri itsipajia

**15**<sup>1</sup>Irootaquequea imaica aatimpajia tampishishirentajatsica cameetsavaeque antampishitacajajiqueriquea apitsaroventarijate teeca intampishishirentamajateji. Aatoja aparo aatimpa aquenquejacotajatsi anetsanajiaquero anintajiguica aatimpajia.<sup>2</sup>Anquenquejacotsijiguempairea apitsaroventarijate ancavintsajajiaqueri ashinetacaajiaquemparijate cameetsaniji arimpaquea intsaroventamajatanaquempariquea Aapani Irioshi.<sup>3</sup>Aritarite iquempetaca Quirishito, teequea irioquea quenquejacotajatsineca iriatimpa iranquequeate ininqueca iriatimpa, manaquea iquejetacari itioncacojiquea Tionarentsimajacaqui, ocanquegueti: "Oraquea icantaguisheta-cojiaquempigueti, narquentiquea otiaavaetapojaca."<sup>4</sup>Maasanoquea Itioncacaantaqueca Aapani Irioshi manaquea itioncantajicaroca ontsatacaacaji, cameetsaniji antsipetacoguitempanigueti ontampishishirentacaacaji

arimpaquea aguijacoshirentajiana-quempa irinetsanatanquemparoca maasanopae icanqueca paesatoniqui.<sup>5</sup>Iriotaquequea Aapani Irioshi agavejacaajiacaji antsipetacovaequempaquea, aisa irioquea shinetacaajiacajine. Noninquequea iragavejacaajiaquempiquea pintsipashirentavacaajiaquempa pinquejejiaquemparigueti Quirishito Jesoshi,<sup>6</sup>cameetsanijite pintsipashirentavacaajiaquempa pishineventajiaquemparigueti Irioshte Amajirote Jesoquirishito, iriotaque aisa Iriri, pincantajiaque: "Caaviji yoganejencavaeca Aapani Irioshi."

#### Teeca irijorijoigueji itsavetantimojiquer Quenquetsatsarentsi Oganejencatatsica

<sup>7</sup>Irootaquequea imaica noncantatjiaquempica paavacaajiaquempajate, aritarite iquempetacaajiacaji Quirishito aatimpajia icavintsajavajaji yaavajaji. Iquempetacaajiacaji imaica cameetsaniji iramenajiquerinijite Aapani Irioshi caaviji yoganejen-camajataca.<sup>8</sup>Imaica noncantajiaquempiquea, coramani icoraqueta-quit Quirishito Jesoshi ocaniqui quepatsiqui ichoocatimojiaquitiri nogonorojia joriojia yamitacojiaqueriquea cameetsaniji onetsanatimenta-quempaniji icantajiaquerica Aapani Irioshi coramani choviquijiaquenaca naatimpajia joriojia iroonijite intsati-mentajiquerinijite Aapani Irioshi teequea incantashitatiguemparoji icanqueca.<sup>9</sup>Icoraquetashijiaqueriquea aisa teeca irijorijoigueji cameetsaniji irishineventajiaquemparinijite Aapani Irioshi, incantajiaque: "Caaviji ipintsatacotantaca Aapani Irioshi." Ocanquequea Tionarentsimajaca:

"Irootaquequea noshineventantajia-  
quempica nontsipatsipaitaquem-  
parigueti teeca irijorijoigueji,  
namashaiventajiaquempiquea."<sup>h</sup>

<sup>10</sup>Aisa chooca otsipa itioncacojiquero-  
quea ocanque:

"Maasano teeca pijorijoigueji,  
ipishinejiaquempaja pintsipatsi-  
paitaquempariquea igaquinte-  
jiate Aapani Irioshi!"<sup>i</sup>

<sup>11</sup>Ariqueate chooca otsipa ocanque:

"Pishineventajiaquemparija  
Amajirote maasano teeca pijori-  
joigueji,  
maasanoqueate caquintejia pincan-  
tajiaqueri caaviji icavintsajanta-  
majati."<sup>j</sup>

<sup>12</sup>Itioncaque aisa Isaiashini coramani  
icanque:

"Oncoramanitapojaque irivoaque  
aparo ichoviquini Isaini.  
Iriatimpa peanquitsineca oncorama-  
nitapojaquegueti Imajirojiate  
maasano caquinteguetatsica.  
Irirajia teeca irijorijoigueji iroguija-  
cojiaquemparija incavintsajajia-  
queriquea."<sup>k</sup>

<sup>13</sup>Iriraque Aapani Irioshi iriotaquequea  
agavejacaajiacajica agujacojiaquempa-  
gueti onetsanamajaquempa maasanopae  
icanqueca paesatoniqui inintacaitscajica  
irishetacojiaqueca. Noninquequea  
iroguishinejiaquempiquea aatoniji taaca  
pishoshoguiteventsija, paventaventacarita-  
rite. Aisa noninque iragavejacaaji-  
quempiquea Ishire Aapani Irioshi aatonijite  
piperataro poguijacoquemparigueti.

<sup>14</sup>Napitsaroventarijate, imaica tsamaja-  
taquenaquea picavintsajantamajataque,  
aisa pitsamajatanaquero maasanopae  
icanqueca Aapani Irioshi, pagavejamajaji-  
aque pincantomajavacaajiaquempa

cameetsa, aisa pintsatacaavacaajiaquempa  
cameetsa. <sup>15</sup>Cotanquitsiquea naatimpa  
teequea nontsarogueji nontioncajiaquem-  
piquea quempetaca imaica noquenqueja-  
caajiaquempiroquea nocamantajiaquem-  
pica coramani aatonijite pipeacojigarotsija.  
Notioncantajiaquempica imaica icavints-  
jaquenaqueate Aapani Irioshi, <sup>16</sup>inintaca-  
quenaquea Jesoquirishito nontsavetanti-  
mojiaqueriquea teeca irijorijoigueji,  
noquejetanacariequa saserorote notsave-  
tantavaequero Quenquetsatsarentsi  
Oganejencatatsica itigarancaquea Aapani  
Irioshi, cameetsanijite irinetsanashirenta-  
caajiaquemparigueti Ishire Aapani Irioshi  
iriraquea teeca irijorijoigueji, onquempete-  
taquempa irio namaquenerica Aapani  
Irioshi nojocapojaqueneri irishineventajia-  
vaquempariniji.

<sup>17</sup>Cameetsavaeque noshinevaequempa-  
quea namenaquerogueti yantacaquenaca  
Quirishito Jesoshi nantirigueti Aapani  
Irioshi. <sup>18</sup>Iroguenti nonquenquetsatacoque  
yagavejacaquenagueti Quirishito notsaro-  
ventacaajiacariequa teeca irijorijoigueji  
iquemisantantajiacarica Aapani Irioshi.  
Iquemajiaquenaqueate notsavetantimojia-  
querigueti, aisa yamenajiaquenaqueate  
quero nococani naatimpa. <sup>19</sup>Yagavejaca-  
quenaqueate Ishire Aapani Irioshi  
nonigaantantaqueroquea oacaantantatsica  
intati cameetsaniji intsajiqueronijite  
arimajaca iriguenti tigarancaquenaquea  
Aapani Irioshi. Noquempetaca imaica  
notsavetantavaequero Quenquetsatsarentsi  
Oganejencatatsica tsavetacoquerica  
Quirishito. Nopariapanajantaraoquea  
Jerosarequi notsitacaguitejavaetanaquero-  
queate oraniqui arejevaequemparoquea  
Iriricoqui. <sup>20</sup>Iroguentiquea noninque  
nontsaveterogueti Quenquetsatsarentsi  
Oganejencatatsica nontsavetantimojiaque-

**h** 15.9 2 Sam. 22.50; Sar. 18.49.    **i** 15.10 Ireo. 32.43.    **j** 15.11 Sar. 117.1.    **k** 15.12 Is. 11.10.

riquea irirajia tequerataca inquemacotima-  
teriji Quirishito aatonjite iriguenti  
nosavicaventajiguitsi nontsavetantimojia-  
queriquea irirajia itsavetantimojiquea.  
<sup>21</sup>Iroguentiquea noninque onetsanamama-  
quempa ocanqueca coramani Tioncarentsi-  
majaca ocanque:

“Inquemacojiaqueri teeca inquema-  
cojaviertempariji,  
intsajianaque teeca inquemacotima-  
jiavetempariji.”<sup>l</sup>

**Paavoro intintaveca iroanaquemequeate  
Iromaquiniqui**

<sup>22</sup>Notsavetacotimojiaquerigueti  
itsipapae, iroquea tempajacaaqueñaca,  
nonintagueveca noanaquemequeate  
namenajiajatempiquea. <sup>23</sup>Cotanqui-  
tsiquea imaica notsitacijaqueriqueate  
notsavetantimojiaqueriquea guitenijia-  
tsica ocaniqui. Nocaniquea nopintsa-  
taca namenajiajatempiquea. <sup>24</sup>Ariquetae  
noanaquegueti Esepañaque noninque  
narejetimotapanajantempi. Aapojempa-  
gueti noncoraquequegueti oraniqui  
namenajapanajantempiquea noshine-  
vaequempa noncanquempa amenava-  
caajiaquempaqueate. Iroompaquea  
navisanaquegueti Esepañaque noninque  
poavoquijiaquitenaqueate, arica pagave-  
jajigue pojocajivaquenaqueate  
nocoguitejacovaecaca.

<sup>25</sup>Cotanquitsiquea imaica iroqueti-  
quea narejetapanajantemparoqua  
Jerosarequi, namitacojiaqueri  
apitsaroventarijiate guitenijatsica  
ontaniqui. <sup>26</sup>Icapiocajiaqueneritari  
Maseroniaquitica aisa Acayaquitica  
imentaquipae itigarancacaantajiaque-  
neriquea apitsaroventarijiate coguite-  
jacovaetanquitsica guitenijatsica  
ontaniqui Jerosarequi. <sup>27</sup>Iriatimpajia  
teetari irio joriojia cotanquitsiquea

iquenquejacojiaqueriquea iramitacoji-  
aqueri joriojia tsaroventajatiacsica,  
yamenajiaqueriqueate irioquea  
joriojia tsavetantimojiaqueri icaman-  
queriquea quero incojiaquempani  
irishetacojiquerigueti. Inintantajiana-  
caca iraagarantajiaquequea yashinta-  
jiacaca iriatimpajia intigarancacaan-  
tajiaqueneriquea. <sup>28</sup>Irootaquequea  
imaica noantanaquempaca Jerosa-  
requi nojocajapanajantenerija,  
iroompaquea nontempajantanajem-  
paro Eseaña, ariquetae namenajapan-  
ajantempiquea pichoocajiaquegueti.  
<sup>29</sup>Notsamajaquequea noncoraqueque-  
gueti oraniqui incavintsjamajaque-  
naquea Quirishito iragavejacaquena-  
queate nontsavetantimojiaquempi-  
queate cameetsaniji ashinejiaquem-  
niji.

<sup>30</sup>Napitsaroventarijiate, aviatimpajia  
pitsaroventajiacari Amajirote Jesoquiri-  
shito, aisa yagavejacaajiaquempiquea  
Ishire Aapani Irioshi pipintsaquiaquea.  
Noncantantajiaquempica imaica  
nonintamajataque pamanacoventajia-  
quenajate. <sup>31</sup>Pincantajiaqueriquea  
Aapani Irioshi irompetaquenaqueate  
aatonjite queroca icojianatsi Jorequiti-  
ca teeca intsaroventajiguempariji, aisa  
cameetsanijite iraajivaquerinijite  
imentaqui namajiaquenerica apitsaro-  
ventarijiate Jerosarequitica, <sup>32</sup>cameetsan-  
ijiji iroompaquea iriogueti nintanquitsi-  
neca Aapani Irioshi narejevaequempa-  
quea oraniqui noshinevaequempaquea  
namenajiaquempigueti, ariquetae  
ashinetacaavacaajiaquempaquea.  
<sup>33</sup>Imaicaquea noninque maasano  
aviatimpajia quisho iroaroaitanaquempi  
Aapani Irioshi, iriguentitari choocata-  
caajiacajica cameetsa aatoniji ashoshog-  
uiteta. Ari oncoquempa.

**Paavoro iquenquejacojaqueri  
irapitsaroventarijate quintenijiatsica  
Iromaqui**

**16** <sup>1</sup>Aricaca pamenajavaqueroquea oratica apitsaroventarote Peve arejetaquempagueti oraniqui. Iroatimpa iroguenti amitacopinijiguirica tsaroventajatisca capiocapinijiatsica Senquere aqui.  
<sup>2</sup>Cameetsaja paajjajavaquerojate ariqueate oquempejajauquempiquea aviatimpajia otsarovencarigueti Amajirote. Pinetsanajavaqueroja, aviguentijatarite tsaroventamajatiatsica. Pamitacojaqueroqueate, aisa pojocajaaqueneroquea taaca opaji oncoguitejacoquempaca. Ariqueate oquempetaca iroatimpa amitacotantavaeque, amitacotanaquenaqueate naatimpa aisa.

<sup>3</sup>Pincantajiaqueroquea Pirishira<sup>m</sup> aisa irira Aquira noquenquejajiaqueri cameetsaca ichoocajiaque. Iriguentija notsipatashijiacaca coramani nantavae- quenerigueti Quirishito Jesoshi. <sup>4</sup>Ipajavetanacaroquea imetojane aatonijite naroguenti metojatsi, irootaquequea imaica noshineventantajiacarica nocanca, cotanquitsiquea teequea aparo naatimpa noshineventajiaquempari ishineventajiacariquea aisa maasano tsaroventajatiatsica teeca iriorijoigueji capiocapinijiatsica osamanipaequitica.

<sup>5</sup>Pincantajiaqueri aisa noquenquejajiaqueriquea apitsaroventarijate capiocapinijiatsica itsovironaquitequi. Noquenquejajiaqueri aisa nopintsatacaca Epeneto iriquetica tsarovencari Quirishito ontaniqui Ashiaqui.

<sup>6</sup>Pincantajiaqueroja aisa Maria noquenquejajiro, namenaquequea antavaeque amitacojiaquempiquea aviatimpajia.

<sup>7</sup>Noquenquejajiaqueri nogonorojia Anteronico aisa Joniashi itsipatacantaji-

quenaca coramani isantanatacojitaquenagueti. Iriatimpajia iriquetica tsarovencari Quirishito tequeratagueci nontsaroven tempariji naatimpa. Maasano itigarancanejia Quirishito ipintsamajajiacariequeate icancami ishineventamajatacari.

<sup>8</sup>Pincantajiaqueriquea aisa Ampiria noquenquejajiaqueri, iriguenti napitsaroventarite nopintsamajacari.

<sup>9</sup>Noquenquejajiaqueri aisa Orovaano, notsipatashijiacaca coramani nantavaejia- quenerigueti Quirishito Jesoshi. Noquenquejajiaqueri aisa nopintsamajatacaca Esetaqui.

<sup>10</sup>Noquenquejajiaqueri aisa Apereshi. Iriatimpa yatsipevaeca cotanquitsiquea arimpaquea itampishitanaquequea itsaroventanacari Quirishito. Iriguentija aisa choocatimojiacarica Arishitovoro noquenquejajiaqueri.

<sup>11</sup>Pincantajiaquerija aisa Eroriono noquenquejajiaqueri, iriguenti nogonoro. Iriguentija aisa choocatimojiacarica Narishiso tsaroventajiacarica Amajirote pincantajiaquerija noquenquejajiaqueri.

<sup>12</sup>Noquenquejajero aisa Tiripena aisa Tiriposa antajiguinirica Amajirote.

Noquenquejajero aisa Perishira apintsamajajiacaca. Arikea oquempetaca iroatimpa antavaequeneri Amajirote.

<sup>13</sup>Pincantajiaqueri aisa Iropo icoguia- queca Amajirote noquenquejajiaqueri. Arikea oquempetaca iriniro iroatimpa noquenquejamajajeroquea, oquempetaca amajajaquea naroguentica ashimajaca irijanite.

<sup>14</sup>Pincantajiaqueri noquenquejajiaqueri aisa Ashinquirito, Peregonte, Eremeshi, Paterova, Eremashi, iriguentija aisa apitsaroventarijate tsipajiacarica.

<sup>15</sup>Noquenquejajiaqueri aisa Pirorogo aisa Joria, iriguenti aisa Nereo aisa

**m 16.3** *Pirishira* aisa opajita Pirishica. Pamenero 2 Ti. 4.19.

itsijoite. Noquenquejaqueri aisa Orimpashi iriguentijia aisa maasano apitsaroventarijiate tsipajiacarica.

<sup>16</sup>Netsana pinintavorotavacaavaquempa.<sup>n</sup> Maasanoquea tsaroventajacrica Quirishito capiocapinijiatsica inintajiaque pinquemacojiaqueriquea choocajia iquenquejajiaquempiquea.

<sup>17</sup>Imaica napitsaroventarijiate, noncantajiaquempi shoshoh yamatavijajiguimpitsijate itsipa tsatacaantajiguiroca teeca onquempetemparojo notsatacaaajaquemtica naatimpa aisa itsipajia tsavetacotanta-jaquerica Quirishito. Pinquemisantajiaquerigueti iriatimpajia ariuea pincocajianaquempaquea pincatsimatavacaajaquempacea iroompaquea pintsinampirejavacaajianaquempa aatoquea pitsipatavacaajatsi. Aatoja piconaojigaritsija. <sup>18</sup>Iriatimpajia teequea irioquea irantajigueneji Amajirote Jesoquirishito, iroguenti isavacaventajiguitaaca opaji inintajiguica iriatimpajia. Iquenquetsavijitanaque cameetsaja itampaticamajaveca ariuea yamatavimativaequeri teeca intsamajajigueji.

<sup>19</sup>Maasanoquea iquemacojiaquempi piquemisantamajataque, irootaquequea noshineventantajiaquempica, cotanquitsiquea noninque pintsamajajiaquequea cameetsaniji ponigaantajiaqueronijite intaguetica Aapani Irioshi. Oraquea taaca opaji covaeguisherentsi irooqua iroguenti aatoja piquenquejajiguitsijate. <sup>20</sup>Pinquempejiaquempagueti imaica, iriraquea Aapani Irioshi choocatacaaja-jiaca cameetsa caarica ashoshoguitetanta incatimatsitempiquea iragavejacaajiaquempi pagavejajiaquerinijite Satanashi, onquempetaquempa pagaticanaqueri impotsocanaque. Imaica noninque incavintsajavaequempiquea Amajirote Jesoquirishito.

<sup>21</sup>Iriraquea Timoteo notsipatashitaca nantinirigueti Amajirote ininque pinquemacojajjeri iquenquejajiaquempi. Ariuea iquempejiaqua nogonorojia Iroshio, Jasoni aisa Soshipatero iquenquejajiaquempi.

<sup>22</sup>Ariuea noquempetaca naatimpa noquenquejajiaquempi. Naroguenti papitsaroventarijiate nopajitaca Tereshio. Naroguenti tioncavauqueneriquea Paavoro icanqueca ocaniqui paperiqui.

<sup>23</sup>Iquenquejajiaquempi aisa Gayo nomaimoqueca, iriotaquequea imaimo-jiuica maasano tsaroventajacrica avisavisaitatsica ocaniqui. Ariuea iquempetaca Erashito iriatimpa iquenquejajiaquempi. Iriguenti *tesorero* amitacotirica majirontatsica guinteninntsiqui, inetsanaguetaqueneri imentaqui icapiocajiguica guintenijiasica ocaniqui ashi irinetsanatantaquemparoca iriguinteninitantajiaquempaca. Aisa apitsaroventarijiate Coareto ininque pinquemacojiaqueri iquenquejajiaquempiquea.

<sup>24</sup>Imaica, napitsaroventarijiate, noninque incavintsajamajajauquempiquea Amajirote Jesoquirishito. Ari oncoquempsa.

#### Ashineventajiaquempari Aapani Irioshi

<sup>25</sup>Imaicaquea imaica jame ashineventajiaquempari Aapani Irioshi, iriotaquequea agavejanquitsineca intampishitacaantajiaquempiroquea Quenquetsatsarentsi Oganejencatatsica camantajiacajica quero icotani iriatimpa ishetacotantigueti. Irootaquequea notsavetantica naatimpa notsavetantirigueti Jesoquirishito. Aisa irootaquequea yonigaimojiacajica Aapani Irioshi imaica. Iriatimpa icocani inintaco-

<sup>n</sup> **16.16** *Netsana pinintavorotavacaavaquempa.* Yamejiaaca coramani inintavorotavacaajiajavaca yamenavacaajiacagueti, ari iquejejiaaca tsaroventajigarica Quirishito coramani.

tsijiacaji coramani irishetacojiacaji,  
 cotanquitsiquea teequea intsajivetemparojo.  
<sup>26</sup>Imaicaquea imaica jeroquea itsatantaji-  
 caroca, onigaacajiroquea itioncacojiana-  
 queca coramani tsavetantajitsica,  
 iriotaquequea cantanquitsica Aapani  
 Irioshi onquempetaquempaquea imaica.  
 Iriatimpa icoguitani ichoocaguitini  
 coramani tequerataguetsi onchoocaguateji,  
 aisa incoguitempani inchoocaguiteni.  
 Icanque onquempetaquempaquea imaica

cameetsanjite ontsitacaguitejavaetana-  
 quemparonji jmm inquemajiaquenijite  
 maasano caquinteguetatsica, cameetsanjite  
 incaramirincajiaque iraventaventaiquem-  
 pari inquemisantajiaqueriquea. <sup>27</sup>Iroosaca-  
 nica imaica iintsijate incoquempani  
 irishineventajiaquempari Aapani Irioshi,  
 aparo icota iriatimpa itsamajati, irioquea  
 Jesoquirishito amenacaajiaquerineca  
 maasano arimajaca caaviji yanaaque  
 yoganejencamajataca. Ari oncoquempani.

# **PAAVORO ITIONCAJIAQUENERI**

## **CORINTOQUITICA**

**Antsatantaquemparoca**

Ocatica iroguenti antsatantaquemparoca iroquetica itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica guinnenintisqui pajitatsica Corinto. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti Paavoro Corintoqui otsapaqui Ya. 18.1–18. Tequerataguetti intioncacaanteroji ocatica Paavoro itioncacaanquero otsipapae mavite paperi itioncajiaqueneri choocajianquitsica guinnenintisqui pajitatsica Tesaronica. Paavoro icamantaqueri amitacoquerica intioncajiaquenerica Corintoquitica. Itioncacaantiqueru ocatica paperi ajagantsini irooca 54 irooca 55, otsipatapojacaguetti iquenaguetanaquegueti quepatsipaequi itsavetantavaequerigueti Jesoquirishito. Itioncacaantiquerogueti Paavoro ocatica paperi ichoocaque guinnenintisqui pajitatsica Epeso (16.8; Ya. 19).

Ocaniqui paperiqui itioncacaantaqueca Paavoro itsatacaajiacaji aatimpajia tsaroventajigarica Jesoshi quero ancojiaquempani anchoocajiaquegueti. Yoguiisotoajiaqueneri icoacojiaquerica Corintoquitica itioncajiaquenerigueti. Icoacojiaqueri quero incojitaquempani irimanquigajitempagueti (capítulo 7), quero incojitaquerini iteshi yojocajitiricira irioshivijirentsi (cap. 8), aisa quero incojiaquempani intsatantajiaquemparoca cantashitatiagueutanquitsica yagavejacaajiaquerica Ishire Aapani Irioshi apaniropae tsaroventajiacarica (cap. 12–14). Itsatacaajiaqueri quero incojiaquempani incapiocajiaquenerigueti imentaquitsitepae intigarancacaantajiaquenerica coguitejacojianquitsica quemisantajiaquerica Jesoshi choocajianquitsica Jerosarequi (cap. 16). Aisa icantomajajiaqueri quemisantajiasica Corintoqui yamenaquerigueti mana itsinampirejavacaajianaca tee intspatavacaajajempaji (cap. 1–3), aisa yamenaquerigueti choocajianquitsica Corintoqui teequea incantomajajigeriji irapiguemisantariteni icovaeguishetacaguetti (cap. 5). Icantomajajiaqueri aisa yamenaquerigueti icatsimatavacaajiacaguetti teequea irivetsinavacaajajempaji, irioquea yaventajianaca joesepae teeca intsaroventajiguempariji Jesoshi (cap. 6). Otsipaquauea icantomajimentajiaqueri yantajiaqueca teeca oncameetsateji icapiocajiacaguetti (cap. 11). Paavoro itsatacaajiaqueri quero incojiaquempani

quemisantajiatsica, inquejejiaquempariquea itigarancaneja Jesoshi (cap. 4), aisa icamantaqueri inquejejiaquempari iriatimpa (cap. 9), aisa iquenquejacaajajiri ishiraerijia quemisantajiaquerica Aapani Irioshi coramani (cap. 10). Aisa iquenquejacaajajiri Quenquetsatsarentsi Oganejencatatsica tsavetacoquerica Jesoshi (cap. 15).

---

**1** <sup>1</sup>Naroguenti Paavoro itigarancane Jesoquirishito, iriotari nintacaa-quena Aapani Irioshi. Iriguenti notsipataca apitsaroventarariteni Soseteneshi. <sup>2</sup>Imaica nonintaque nontioncrajiaquempi aviatimpajia choocajatsica Corintoqui tsaroventajigarica Aapani Irioshi. Inintacajiaquempi pintsaroventajia-quempari Quirishito Jesoshi cameetsan-jite irashintamajajiaquempiniji. Aisa inintacajiaquempi povashiantajiana-quero maasano teeca oncameetsateji irooqueate pisavicaventajianaje maasano inintaguetica iriatimpa, pintsipajiaquempari maasano choocajia-tsica osamanipaequitica aventajigarica Amajirote Jesoquirishito. Iriatimpa-queate iriguenti irashijia Imajirojiate, aisa iriguentiqueate ashijia Amajirojiate maasano aatimpajia. <sup>3</sup>Namanacoventajia-quempiqueate incavintsajajiaquempiniji Aapani Irioshi aisa Amajirote Jesoquirishito, inchoocatacaaajaquempi-nijite cameetsa aatonijite pishoshoven-tajigaro taaca opajitapae.

### Paavoro ishineventacari Aapani Irioshi yamenaquegueti icavintsajajiaquerigueti Corintoquitica

<sup>4</sup>Nocancaniquea nocanqueri Aapani Irioshi, “Arioteesa!”, namenaquegueti icavintsajajiaquempi aviatimpajia, pitsaroventajiacaritarite Quirishito Jesoshi. <sup>5</sup>Piquemisantajiaqueriquea irootaquequeate yagavejacaantajia-quempica piquenquetsajajiaquegueti aisa pitsajiaquegueti. <sup>6</sup>Pitsajiaquetarite arimajaquea nocantamajataque notsave-

tanquerigueti Quirishito noquenquetsa-tacaajiaquempigueti iroaueragueti. <sup>7</sup>Irootaquequeate tecatsi coguitejacoja-quempine pishirequi yagavejashirenta-caajiaquempigueti Aapani Irioshi pantajiaqueneriniji poguijajavajirigueti ironigaantajajempaca Amajirote Jesoquirishito. <sup>8</sup>Iriatimpaqueate igantagaquea intampishitacajiaquempi aatonijite povashiantajajanajirotsi pitsaroventajiacarigueti, aatonijite ochoocati querocaca incantomajimenta-jiaquempica Amajirote Jesoquirishito savincaguiteriqui incoraquetantapoja-jempaca. <sup>9</sup>Irira Aapani Irioshi igantaga-queate inetsanatiro icantaguequeca, iriotaquequea cajemajiaquempica inintacaaquempiri pintsaroventajia-quempari Irianite, irootaketari pitsipamatantajianacarica Amajirote Jesoquirishito.

### Icantajiaqueri: “Pinquemavacaajiaquempaja”

<sup>10</sup>Imaica, napiguemisantarijate, noncantajiaquempi quejetaca iriguen-tica cantanquitsi Amajirote Jesoquirishito, pinconoavacajiaquempa pintsipatavacaamajajiaquempa, aatoqueate picatsimatavacaajati mana pinquemavacaajiaquempa. <sup>11</sup>Mana-queate noncantajiaquempi imaica, napiguemisantarijate, noquemacoja-quempitarite picatsimatavacaajica, icamantajiaquenatarite oconogaca Coroe. <sup>12</sup>Apaniropae picantajiae: “Naatimpa iriguenti noquemisantaque Paavoro.” Itsipaqueate mana icantaji-

aque intati: "Iriguenti noquemisantaque Aporoshi." Itsipaqueate mana icantajiaque: "Iriguentiqueate noquemisantaque Sepashi."<sup>a</sup> Itsipaqueate cantajanquitsica: "Naatimpa iriguentiqueate noquemisantaque Quirishito."<sup>13</sup> ¿Arimpate ivorocacampate Quirishito irootaquequeate piquejetantajiacaroca imaica? ¿Arimpate naroguenti yompaja-cojitaqueca nometojaventajiaquempi naatimpa Paavoro? ¿Arimpate povinacajatacaantajiaca ivajiroqui Paavoro?<sup>14</sup> Noshinevencari Aapani Irioshi namenaqueguedi tee noviñacajajiaquempiji naatimpa, iriguentiqueate apaniro noviñacajataque Quirishipo, jeri aisa Gayo.<sup>15</sup> Irootaquequeate aatoqueate quericaca cantashitatsine mana iviñacajatashijitaqueri impampiatacoquenaniji naatimpa.<sup>16</sup> Aisa noviñacajataqueri Esetepana jerija iconoajiacaca itsovironaquitequi. Arigueti noviñacajataqueri itsipa tee nonquenquejajeroji.<sup>17</sup> Teenicate iroguenti intigarankumentenaji Quirishito noviñacajatantaguiteni, iroguentiqueate itigaranquimenquena nontsavetantero Quenquetsatsarentsi Oganejencatatsica. Cotanquitsiqueate nocamantajiaqueriguedi, tee nontsatacagueriji iquenquejaguetaqueca intati caquintejia. Iroomeguedi nontsatacaaquerime iquenquejaguetaqueca caquinte, aatome yaventajigarime Quirishito metojaventajiacajica coroshiqui.

**Aapani Irioshi caaviji itsamajati, yanaajiaqueri maasano tsajivetascsica**

<sup>18</sup> Oraqueate atsavetanqueriguedi Quirishito imetojaventajiacajiguedi coroshiqui irirajaqueate oananquitsneca camorecariqui yamenajiaqueriqueate teequeate querocaca oncamee-

tsatantempaj. Cotanquitsiqueate aatimpajia imeshiajiaqueca Aapani Irioshi atsajiaque irootaquequeate imeshiantajiacajica.<sup>19</sup> Aritarite ocanque Itioncacaantaqueca ocanti:

Coajica iramenitajiqueriqueate teequeate intsimateji irirajia tsaguevetatsica.

Ariqueate onquejetaquempaqueate maasano iquenquejajiguica tsatamampeajatsica iramenajitaqueroqueate tee ontampaticamajateji. Naroguentitarite quejeguetaquerone imaica.

<sup>20</sup> ¿Taa opajita ocameetsantacaca itsatamampeajiacaca tsatamampeajatsica, jeri aisa tsatacaantamampeajatsica, jeri aisa quenquetsatacoventajiguirroca taaca opajitapae quepatsipaequitica? Yonigaanquerotarite Aapani Irioshi maasanopae ocatica itsatamampeajiacaca quepatsipaequitica teequeate onetsanamajatempaj. <sup>21</sup> Iriraqueate Aapani Irioshi caavijkeate itsamajati, irootaquequeate icantantacaca aato inchiquioji itsatashtari caquintejia iraventajiavetaqueparoguedi itsatamampeajiacavetacaca, iriguentiqueate ininque irimeshiajiaque quemisantaqueroneca Quenquetsatsarentsi itsavetantajitaqueca, yamenajiavetacaroqueate itsipapae ijquieroji teequeate onetsanamajatempaj.

<sup>22</sup> Iriraqueate joriojia inintajiaque iramenacaajitaqueri oacaantantatsica intati. Iriraqueate guiriegojia manaqueate inintajiaque intsajiaque.<sup>23</sup> Cotanquitsiqueate naatimpajia manaqueate notsavetantajiaqueriqueate Quirishito yompajacojitaqueriguedi. Iriraqueate joriojia manaqueate ocatsimatacijaiaqueri. Iriraqueate teeca irijorijoigueji manaqueate yamenajia-

a 1.12 *Sepashi*. Irootaque otsipa ivajiro Shimo Peerero. Pamenero Jn. 1.42.

quero ijiqueroji teequeate onetsanatem-paji. <sup>24</sup>Cotanquitsiqueate maasano inintacajaiaqueca Aapani Irioshi intsaro-ventajaqueempari iriogueti joriojia jerijia aisa quiriegojia itsajiaquequeate iroguenti imeshiimentajiaqueri Aapani Irioshi itsaroventajiacarigueti Quirishito. Aatomegueti yaventajiga-rime querocampamequea incojiaquem-pame irimeshiajiajempame, igantagata-rite icanquequeate Aapani Irioshi paesatoniqui onquejetaquempa imaica, caavijitarite itsamajati. <sup>25</sup>Oraqueate itsatica Aapani Irioshi yamenajiavecaca caquintejiatsica ijiqueroji teequeate ontampaticamajateji, caaviji anaamaja-quero itsajiguica iriatimpajia. Arikeate oquejetacaqueate yagavejica Aapani Irioshi, yamenajiavecaroqueate iriatimpajia ijijiaquejite teeji iragavejeji Aapani Irioshi, caaviji anaamajaquero yagavejajavetacaca iriatimpajia.

<sup>26</sup>Pinquenquejajiguer, napiguemisan-tarijate, quero picojiacani icajemajia-quempigueti. Teequeate poshequigueji tsamajajiavetacaroa itsatica caquinte, teequeate poshequigueji agavejajia-ven-tanquitsica, teequeate poshequigueji anaantajavetanquitsica. <sup>27</sup>Inintacajai-queritarite intsaroventajiaquempari teeca intsajavetempaji cameetsanijite iroguiplashiventajimentajiaquerinijite caavijica itsajaveta. Arikeate iquejia-queri aisa inintacajaiqueri teeca iragavejajavetempaji cameetsanijite iroguiplashiventajiaquerinijite agavejajia-vetatsica. <sup>28</sup>Inintacaqueritarite intsaroventajiaquempariqueate teeca iranaantajigueji, jeriquea aisa teeca irinintajiteriji, jeriquea aisa teeca irishineventajitempariji aatonijite yanaantajajitsi yamenapinijivetacaca yanaantajiaque. <sup>29</sup>Arikea iquejia-queri Aapani Irioshi imaica aatonijite quericaca agavejatsi isemetimotiri.

<sup>30</sup>Iriguentiquea Aapani Irioshi tsipashi-rentacajaiaqueempirica Quirishito Jesoshi. Iriotari itigarancaqueca Aapani Irioshi antsatimentamajajiaquenijite. Iriatimpia iriguentiquea shetaqueroca aguempevaerejia cameetsanijite iramenimentajacajinijite Aapani Irioshi quejevaetanaca teenica anquempevaeji-guempaji. Aisa iriguentiquea agaveja-caajiacaji ancomajajiaquempa asavica-ventajiaqueroqueate inintaguequeca Aapani Irioshi. Imetojaventajiacaji imeshiajiajaci aatonijite yashintajiajai ampatsini, iriguentiquea ashintajajine Aapani Irioshi. <sup>31</sup>Aritarite ocanqueni itioncajitaquerogueti ocanti: “Aatoqueate aventacota, irioquea ashineventamajataquempa Amajirote.”

### Quero icoca Paavoro itsavetanquerigueti Quirishito

**2** <sup>1</sup>Napiguemisantarijiate, coramani noaquitigueti noquenquetsatacaa-ji-aquitimpigueti notsavetanquerigueti Aapani Irioshi quero icota imeshianti-gueti, teequeate nonquejetempariji iquenquetsajavetacagueti tsamajaveta-roca itsatica caquinte, teequea nonquen-quetsateji cameetsanijite pishineventa-quena naatimpa. <sup>2</sup>Aisa teequeate nonintimateji nonquenquejajeji otsipa nochoocatimojiaquempigueti, iriguenti-queate noquenquejamajataque Jesoqui-rishito imetojaventajiacajigueti coroshipui. <sup>3</sup>Oraqueate nocatiimojia-quempigueti noquenquetsatacaa-ji-aquempigueti manaqueate notsaroana-queea intati nompioncanacaqueate, namenacatarite teequeate inchiquioji-tsita nagavejempaji naatimpa. <sup>4</sup>Arikeate oquejetaca aisa noquenquetsatacaa-ji-aquempigueti notsavetanque-rogueti Iguenquetsatsare Aapani Irioshi teequeate arikea nonquejejiguempariji tsamajavetaroca itsatica caquinte

iquenquetsajiguigueti, teequea noninteji nagavejanquempiro nocanqueca naatimpa, inchiquiojitsiqueate yagavejajaqueempiqueate Ishire Aapani Irioshi iquemisantacajajaqueemp, pamenajiaquetarite iriguentiquea agavejaca aquena Aapani Irioshi. <sup>5</sup>Oraqueate noquejetancaroca imaica aatonijite iroguenti piquemisamentajigui pishinetimentajigiro itsatica caquinte, manaqueate pinquemisantajiaque pamenajiaquegueti iriguenti agavejaca aquena Aapani Irioshi.

<sup>6</sup>Cotanquitsiqueate oraqueate noquen quetsatacaa jiaquerigueti irirajia quemisantamajajiananquitsica ariqueate nocamantajiguirqueate taaca opajitapae managueta nquitsica, cotanquitsiquea teequeate iroguenti itsatica quepatsiquitica, aisa teequeate iroguenti itsajiguica majirontajavetan quitsica imaica teroncaguetanajatsineca coajica. <sup>7</sup>Iroguentiqueate notsavetac tanque iquenquejagueta Aapani Irioshi teeca intsajivetemparojo coramani. Aritarite tequeratagueti impeacaguem parojo quepatsi intintacajaiacaji irimeshi ajiacaji intspajianacaji ontaniqui jenoqui inquitequi. <sup>8</sup>Teequea intsatima jigueroji majirontajavetanquitsica quepatsiqui imaica. Oraqueate intsajia querome aatomecajate yompajacojigui rime Amajirote caavijica yoganejenca majata. <sup>9</sup>Cotanquitsiqueate aritarite ocanque itioncacojitaquerogueti ocantiquea:

Choocaquea oshequi cameetsaguetsica inetsanataqueca Aapani Irioshi cameetsanijite incavin tsajimentajiaquerinijite irirajia pintsajigarica, cotanquitsiqueate teequeate querica nejerone, tee inquemacotimajiterojo, aisa tee inquenquejimajiterojo.

<sup>10</sup>Cotanquitsiqueate aatimpajia yonigaa jiaca jiroqueate Ishire Aapani Irioshi, itsamaja querotarite maasano iquenque jaguetica Aapani Irioshi teeca intsajiterojo, iteroncamaja queroqueate. <sup>11</sup>Arimate caquinte teequeate inchoocateji tsateroneca taaca iquenquejaque, apaniroqueate itsataque iriatimpa ishirequi. Iriompa Aapani Irioshi aatoqueate quericaca tsatatsi taaca iquenquejaque, apaniroquea itsataque roqueate Ishire. <sup>12</sup>Aatimpajiaquea imaica teenicate anquenquejajajeji onquejetajemparojo iquenquejajiguica teeca intsaroventajiguemparojo Aapani Irioshi, itigarancajiacjiritarite Aapani Irioshi Ishire cameetsanijite antsajiaque nijite inintacajaiacajica icavintsajajicajigueti. <sup>13</sup>Oraqueate notsatacaantajigu rogueti maasano ocatica teequeate inchiquiojitsita nontsatacaantashiji guemparojo intati naatimpajia, iriguenti tarite tsatacajiaquenaroquea Ishire Aapani Irioshi. Aisa itsatacajiaquenaro quero noncantajiaque nontsatacaantajia quegueti, irooqua notsatacajiaqueri irirajia ichoocashirentajiaqueca Ishire Aapani Irioshi.

<sup>14</sup>Irirajiaqueate teeca inchoocashirentajigueroji teequeate irishineventajiaava quemparoqueate itsatacajaiacajica, yamaqua querotarite ijiqueroji tee onetsanatemparojo. Teequeate iragavejeji intsatavaqueroji, teenicate inchoocashirenterji Ishire Aapani Irioshi tsatacaquerineca. <sup>15</sup>Cotanquitsi iriraqueate ichoocashirentaqueca irioquea tsatavaquero, aisa itsaque queroca cameetsatasica aisa queroca teeca oncamenteateji. Iriraqueate teeca inchoocashirenterji aatoquea yagaveji itsatacaguiritsi ichoocashirentaqueca, aato yagaveji icantiri queroca cameetsaguetatsica aisa queroca teeca oncamenteatsgueteji. <sup>16</sup>Aritarite ocanque itioncacojiquero-

gueti ocanti: “¿Queriqueate tsataque-roca iquenquejica Amajirote cameetsa-nijite intsatacaaquerinijite?” Cotanqui-tsiqueate aatimpajia iriguentiqueate tsatacaaajiaca Ishire Aapani Irioshi, irootaquequea atsatantajiacaroca iquenquejaguetica Quirishito.

**Itsinampirejavacajaianacaqueate  
Corintoquitica**

**3** <sup>1</sup>Imaica, napiguemisantarijijateni, noncantajiaquempiqueate oraqueate noquenquetsatacayaatimpi-gueti teequeate nonquejetacaajiguempiji noquenquetsatacayaajiguiringueti quemisantamajajigurica Ishire Aapani Irioshi, manaquea noquenquetsatacaya-ji-aquempi noquejetacaajiaquempiqueate teeca inquemisantamajajigueraji, noquejetacaajiaquempi iriaqueraca aventajianacarica Quirishito, quejeja-quempitarite chaajaniquitirajaca iriaqueraca voananquitsica. <sup>2</sup>Iriguenti-queate notsatacayaquempica teeca omanempaji, noquejetacaajiaquempi-queate yatsojiritigueti chaajaniquitirajaca iriaqueraca voanquitsi tequeratati-rajaca intijaiteriji, tequeratatirajatarite pagavejajigueji pintsajivaqueroqueate mananquitsica. Arimpate imaica tequeratatirajaca pagavejajigueji pitsajia-queroqueate, <sup>3</sup>tequeratatirajatarite pinquemisantamajajigueraji Ishire Aapani Irioshi. Pigantagatiraja picatsimamentajiguiriqueate querocagueti icojiacani papiguemisantarite, aisa picatsimatavacaajiacaqueate pitsinampi-rejavacajaianacaqueate. Pigantagatiraja piquejejiacari tequeratatirajaca inquemisantajigueraji Aapani Irioshi. <sup>4</sup>Choocatarite cantanquitsica: “Naatimpa iriguenti noguijatacotaque Paavoro.” Itsipaqua cantanquitsica: “Naatimpaqueate iriguenti noguijatacotaque Aporoshi.” Piquejejiacuquogueti-

queate imaica manaqueate piquejeji-  
cari intati teeca intsarovenempariji  
Aapani Irioshi.

<sup>5</sup>¿Taampa ipaji Paavoro? ¿Taampa ipaji Aporoshi? Mana amitanatsica nonajiaque intati, naroguentijiatari irajaanire Aapani Irioshi itigaranca-queca nonquenquetsatacayaquempiniji paventantajiacarica. Apaniropequeate nonetsanajiaquero icantajiaquenaca Amajirote. <sup>6</sup>Naatimpaqueate quejetaca manaca noquitataquero oitsoqui, naroguentitarite tsatacayaajiguimpiroca Icanqueca Aapani Irioshi. Iriraqueate Aporoshi quejetacaquea iriguentica orencacotavaqueroca, iriguentitarite tsatacamamajajiaquempiroqueate. Cotanquitsiqueate apaniroqueate Aapani Irioshi itampishitacayaquempi-queate arimpaniji pintsaroventamajajia-naquempariequeate. <sup>7</sup>Teequea omanem-paji iquitajitirogueti oitsoqui aisa yorenccacojitirogueti, cotanquitsiqueate apaniroqueate Aapani Irioshi yagaveja-queate intsoroacaquero. <sup>8</sup>Iriraqueate quitajatiacsica jeriqueate aisa orencacotiroca ariqueate iquejetavaca-jiaca, cotanquitsiqueate coajica irovegarajitajeriequeate apanirope querocagueti ovegaraquempani yantajiaque-gueti. <sup>9</sup>Naatimpa ariqueate noquejetaca-riqueate Aporoshi, iriguentitarite notsipatashitaca nantajiguinirigueti Aapani Irioshi. Aviatimpajia manaqueate piquejejiacaro imiganquite-jire Aapani Irioshi, aisa manaqueate piquejejiacaroqueate mapipanco itsinetacojitica.

<sup>10</sup>Naatimpaqueate naroguenti quejetaca caavijica itsatiro tsinetacoma-jatiroca mapipanco, inintacaquenata-rite Aapani Irioshi naroqueti jivaque-roca noqueecashiquero notsinetacotan-tamajatacaro mapicota isavi cameetsa-niji onquishomajatanaqueniji.

Itsipaquea itantotavaquero. Cotanquitsiqueate apaniropae tantotavaquero ca irinetsanamajatavaqueroja aatonijite omanimotari.<sup>11</sup> Aatoquea queri agavejatsine inqueecaje otsipa quishotaca aero-neca. Iriotaque ocantacotaque Jesoquirishito quishotaca aqueroca. Iriotaque nocantacotaque notsatacaya queempigueti.<sup>12</sup> Cotanquitsiqueate irirajaqueate tantojiavaqueroneca intantotantajavauemparoqueate cavorejamajatatsica icantajitica ooro, irguentica itsipa cavorejatatsica icantajitica perata, iroguentica oganejencaguetatsica mapi, irooca ogota, irooca savoroquiji, irooca ovashi.<sup>13</sup> Oraqueate coajica queate aapojempagueti incatsimatantajiaquemparicaquea Aapani Irioshi maasano teeca intsaroventajiguempariji, ariqueate iramenajitaqueroqueate taa opajita itantotantajiacaro apaniropae. Iriguenticaqueate itantotantacaro ooro, iriguenticaqueate perata, iroguentica queate oganejencaguetatsica mapi, aatoqueate otoguirotsi paamari, quishovaetaquetarite. Cotanquitsiqueate iroguentigueti itantotantacaro ogota, iroguentica savoroquiji, iroguentica ovashi, ontaquemparaqueate.

<sup>14</sup> Aatogueti otaga yantaqueca irovegarajiqueriqueate.<sup>15</sup> Oraqueate ontaaquem-pagueti ompomatsaqueempaqueate maasano yantaqueca, cotanquitsiqueate iriatimpa aato itaga, onquejetaquempa manaqueate irajaitavajeri pajinigueti intaguempame.

<sup>16</sup> ¿Arimpate teequeate pintsajigueji aviatimpajia quejejiaquempi iteemporote Aapani Irioshi, ichoocashirentajia-quempitarite Ishire?<sup>17</sup> Taacagueti pomatsataquerone iteemporote Aapani Irioshi, ari inquejetaqueri Aapani Irioshi, impomatsataqueriquea

iriatimpa, yashintamajata carotarite. Aviguentijiatari iteemporote.

<sup>18</sup> Aato pamatavijatsi avisati. Choocagueti oraniqui aviatimpajia qui jivetatsica itsamajati taaca opajitapae itsanirovecaca quepatsiquitica, iintsiya iramenaqueempaqueate iriatimpa teequeate intsati mateji. Iramanaquerigueti Aapani Irioshi ariqueate intsataca queriqueate, coajica ariqueate intsamatana quequeate.<sup>19</sup> Maasanorite itsajiguica quepatsiquitica ijivetacaroji cameetsavaeque, iriraquea Aapani Irioshi yamena queroqueate teequeate oncameetsateji. Choocaqueate itionca-cojiqueca ocanti: “Iriraqueate Aapani Irioshi manaquea yoguipiashitantajigari intati tsanirojivetsica yamatavijantajiaqueguedi, irisatitari amatavijaatsi, manaquea apitivitanajari iriatimpaqui.”

<sup>20</sup> Aisa ocanti: “Iriraqueate Amajirote itsamajatiroquea maasano iquenquejajiguica caquinte tsanirovetatsica yamenitaqueriquea teequea oncameetsateji.”

<sup>21</sup> Irootaquequeate imaica aatoquea pisemetacotsitajari irirajia caquintepae, maasanotarite choocaguetatsica ipeacaajaquempiroquea Aapani Irioshi.<sup>22</sup> Ariqueate noquejetaca naatimpa aisa Aporoshi jeri aisa Sepashi,<sup>b</sup> itigarancajiaquenaqueate nontsatacaya queempipi. Aisa ipeacaajaquempiro maasano choocaguetatsica quepatsiqui. Ariguetiquea pinchoocajiaqueguedi manacampaqueate pimetojajiaque intati, pishine-ventajiaqueempaqueate. Pishinetimen-tajiaquemparoqueate choocaguetatsica imaica jeroqueate aisa choocaguetan-quitsineca coajica, aviguentijiatarite ashintajigaroqueate maasano.

<sup>23</sup> Aviatimpajia iriguenticaqueate ashintajiguimpi Quirishito. Iriraquea Quirishito irioquea tigarancaqueri Aapani Irioshi.

**b** 3.22 *Sepashi*. Irootaque otsipa ivajiro Shimo Peerero.

#### Itigarancanejia Jesoquirishito

**4** <sup>1</sup>Pitsajiaquequea naroguentijiaquea irajaanirejia Quirishito, intintacajai-aquenatarite nontsatacayaquempiro iquenquejaguetica Aapani Irioshi teeca intsafteroji. <sup>2</sup>Quericacaqueate intintacajiaqueca iroguentiqueate intintajiti irinetsanamajataquero maasano icanquerica nintacaquerica. <sup>3</sup>Cotan-quitsi queroca pincantajiaquena aviatimpajia aatoqueate querocaca nocantsi naatimpa. Aviguentijia cantajiaquenane, iriguentica cantajiaquenane itsipa nonetsanajiaquerogueti icanquenaca Amajirote, aatoqueate querocaca nocanti. Iroguentica pincantajiaquena tee nonetsanateroji, ariqueate nonquejetajquempaqueate aisa, aatoqueate querocaca nocanti. Noquejetaca naatimpa namenacocaguetai, teequeate nonanteji. <sup>4</sup>Namenave-caqueate naatimpa nonetsanaquero-queate, cotanquitsiquea jmm iriompate Amajirote, inchiquiojitsitarite incanta-quenaqueate iriatimpa. <sup>5</sup>Irootaque-queate nocantantajiaquempica imaica aatoqueate inchiquiojitsita picantajigu-ritsi aviatimpajia papiguemisantarijia-teni arica inetsanamajajiaquero icanquerica Amajirote, arica tee. Oraqueate incoraquepojajegueti iriatimpa ariquea ironigaajiapojaqueri tsitivetanquitsica ariqueate intsaftero-queate quero iquenquejaguetaqueca apaniropae. Arikeate irira Aapani Irioshi irishineventamajajquempariequea maasano netsanamajajiaquerocca inintaguetica, incantajiaqueriqueate: "Cameetsavaeque." Cotanquitsiquea irirajia teemajaca irinetsanamajatero aato ishineventajigari.

<sup>6</sup>Napiguemisantarijate, maasano ocatica nocantaqueca imaica noquen-quetatsatacagueti naatimpa,

jeroqueate aisa noquenquetatsatacotaque-rigueti Aporoshi, manaquea nocantajia-quempiqueate cameetsanjite pintsajia-queroniji pinetsanajiaquero Itioncacaan-taqueca Aapani Irioshi, aatoniji ichooca-tajitsi pisemetacojiaquempaca itsipaqueate pincatsimajiaqueca.

<sup>7</sup>¿Ariqua quericampa amenajiaquempi-neca panajajiaqueri itsipa? ¿Arimpate pagavejaque aviatimpajia inchiquiojitsita aatogueti yagavejacaguimpi Aapani Irioshi? Iriogueti agavejacaquempi, iroosacanicate ¿queroqueate octaca panaantacaca quejecaquea inchiquiojitsita pagavejajiaque aviatimpa?

<sup>8</sup>¿Arimpate jac tsamajajiaquempi maasano Iguenquetatsare Aapani Irioshi, teempauea pincoguimentajem-pajia intsatacayaquempi? ¿Arimpate jac agavejamajajiaquempi? ¿Arimpate pipeajiacma majrontajjatsica panajajia-quenampa naatimpajia? ¡Arimajame-quea pimpeamajajiaquempame majiron-tajjatsica cameetsamequea nonquejejia-quempamequea naatimpajia nomajiro-pojaquempamequea! <sup>9</sup>Namenajiaqueta-rite naatimpajia itigarancane Amajirote quejecaqueate manaca iquejetacaavaejia-quenaqueate Aapani Irioshi irirajia ipincajatica, quejecaqueate manaca inintajitaque irimetojajitaquena. Yamenajajiaquenaqueate maasano: caquintejiatsica jerija aisa irashivantijete Aapani Irioshi. <sup>10</sup>Naatimpajia notsavetantajiaqueriqueate Quirishito irootaquequeate yamenantajjavetaque-naca teeca intsaroventajiguempariji teequeate nontsajigueji, cotanquitsi-queate aviatimpajia pitsaroventajiacari-gueti Quirishito arikeate pamenajiacaqueate pitsamajajiaque. Naatimpajia mana yamenajajiaquena teequeate nagavejajigueji, cotanquitsiqueate aviatimpajia pamenajiacaca pagavejama-jajiaque. Aviguentijia ishineventajiacaca-

naatimpajia tee irinintajavetenaji.  
<sup>11</sup>Natsipejiacaqueate notase jero aisa nomirejia, aisa notsoncashitequijacoca irosatiquea imaica. Itavatavaajiquenaequa, noanoaitapiniquequea, teequeate onchoocatajeji notsovironaquite.  
<sup>12</sup>Natsipejiacaqueate nantajiaquegueti nacoqui naanquempaca. Icatsimatsajivequenaquea, cotanquitsiqueate naatimpajia tee nompigajiguempariji, manaqueate nocantajiaqueri Aapani Irioshi incavintsajajiaqueri. Yatsipetacaajivetaquenaqueate, cotanquitsiqueate natsiperejaciacaro. <sup>13</sup>Icantacantajivetaquenaquea, cotanquitsiqueate naatimpajia cameetsa noanaqueri. Iquempetacaajitaquena otaqui, quejevaequena cantaitero irosati imaica.

<sup>14</sup>Teequeate iroguenti nontionquimentajiguempiji noguipashiventajiaquempi, manaqueate nonintaquequeate noncantomajajiaquempi nonquejetacaajiaquempi aviguentijiaca nirijanitejia nopintsamajajiacaca. <sup>15</sup>Inchoocajavetaquempaqueate iroshequiamajavequempaqueate tsatacaaajaquempineca pintsaroventamajajiaquemparinijite Quirishito, cotanquitsiquea aatoquea yoshequiguitsi irijanintajiaquempineca, apanirotarite nococa naatimpa nirijanintajiaquempi, naroguentitari quemisantaajiaquempi iroqueragueti notsavetanquerigueti Quirishito Jesoshi notsatacaajiaquempirogueti Quenquetsartsrentsi Oganejencatatsica. <sup>16</sup>Irootaqueate imaica nonintantacaca pinquejemajajiaquena naatimpa. <sup>17</sup>Irooqua nontigarancantaquemparica imaica Timoteo quejemajatacaquea irijani, nopintsamajatari. Iriatimpaqueate isavicaventamajatiro inintagueta Amajirote. Oraqueate iroanaquegueti oraniqui inquenquejacaajiaquempiroqueate quero nocotaca naatimpa notsaroventarigueti Quirishito notsata-

caantigueti querocagueti oraniqui icapiocajigagueeti tsaroventajigarica Quirishito.

<sup>18</sup>Piconoagarantajiaqueate aviatimpajia panaantajiaque pijijiaqueji aato noanaque namenajajatempi. <sup>19</sup>Cotanquitsiqueate iriogueti nintanquitsine Amajirote noanaquequea taampina, arikeate namenajajateri irirajia anaantaguetatsica arimajacagueti yagavejajiaque, manaca iquenquetsatashijiaca intati. <sup>20</sup>Aritarite imajirontagueti Aapani Irioshi, teequeate aparo inquenquetsatashitempa intati, manaqueate yagavejacaantiqueate aisa. <sup>21</sup>¿Taaqueate pintintajiaque aviatimpajia? ¿Aricaqueate pintintajiaque noncantomajajiajapojempi, irooca pinintajiaque noncavintsajajiajapojempi cameetsaqueate nonquenquetsatacaajiajapojempi?

### Icantimentajiaqueriqueate inconoajiaquemparigueti antanquitsictontagantsi

**5** <sup>1</sup>Noquemacojiaquempi chooca apaniro papiguemisantarite peacaacaroca tontagantsi caarica iquemacojiti inquempetajemparo impeacaguemparo teeca intsaroventajiguempariji Aapani Irioshi: ipashinincacarotari imanquigavetacaca iriri, yaajiroquea. <sup>2</sup>¿Querocaquea picojiacaniquea aviatimpajia aventacojiaquempi? ¿Quero octocaniteequea pishimampojancacotempariji? Pincantajiaqueriqueate quejequeroca imaica aatoqueate itsipajijaimpi. <sup>3</sup>Teequeate nontsipajiavetempiji, cotanquitsiqueate noquenquejajiaquempiquea quejeca manaca notsipajiaquempi. Iriraqueate quejequeroca imaica jac nocanquequea manaquea ipeacaaca covaeguisherentsi. <sup>4</sup>Irootaqueate nocantantajiaquempica imaica queroqueate pincojiaquerini,

quejevaetaca iriguentica cantanquitsi Amajirote Jeso quirishito. Pincapiocajia- quempagueti pintsajiaque nocancani noquenquejajiaquempiquea, aisa iragavejacaajiaquempiqueate Amajirote Jesoshi,<sup>5</sup> pincantajiaqueri aatonijite itsipajijaimpitsi picapiocapinijiacaguetsi cameetsanijite irantsipetacaimenquemparinijite Satanashi itsinoqui. Pinquejijaquempaquea irovashiantanajeronijite yantaqueca imaica arinijite iraimentatavajerinijite ishire coajica incoraqueta- jegueti Amajirote Jesoshi.

<sup>6</sup>Teequeate oncameetsateji paventaco- jiacaguetsi piquejejacaguetsi imaica. ¿Arimpa tee pintsajigueroji icantajitiro impeacajaitemparogueti pan: “Onconoa- quemparogueti capichajaniqui anempo- acaaqueroneca, ariqueate oncotana- quempa anempoanaquequea maasano ose”? <sup>7</sup>Imaicaqueate pincantajiaqueri- queate irira quejequeroca imaica aatoqueate itsipajijaimpi cameetsanijite pinquejijaquemparonijite pan ishecajita- taca Paashicoaquí teeca onconoguempa- roji anempoantaca. Iriatimpa manata- rite iquejetacaroqueate iroquetinica anempoantaca pan. Oraqueate aatogueti piquejejiguiritsi imaica manaqueate paajencatsijiaqueriqueate aviatimpajia aisa, pinquejianaquempariequeate iriatimpa. Aviatimpajia manatarite piquejejacaro oraqueate pan ishecajita- taca Paashicoaquí teeca onconoguempa- roji anempoantaca, imetojaventajiacajita- rite Quirishito ishetakeroqueate aguempevaerejia. Iquejetacariequeate ovejajaniqui imetojajitica ishecajita- Paashicoaquí. <sup>8</sup>Iroosacanicate imaica anquejetaquempariqueate shineventaca- roca Paashicoa ipishoncaquerogueti maasano iroquetinica anempoantaca pan, iintsiya avashiantamajajianaquero- queate maasano teeca oncameetsateji ancomajamajajianaquempa, ancantama-

jajianaque aatoqueate amatavijantajia- jitsi.

<sup>9</sup>Oraqueate notioncaciaquempigueti iroquetica nocantajiaquempiqueate aatoqueate piconoajigaritsi oashitiroca manquigarentsi teeca iro irashimajaca. <sup>10</sup>Cotanquitsiquea teequea irio noncan- tacoteji irirajia teeca intsaroven- tajiguempariji Quirishito oashitaqueroca manquigarentsi, jerijia nintsitantagueti- roca yashintaguetacaca igonoro, jerijia aitsitantajitsica, iriguenticia irioshiviji- tashitatsica irioshivijire. Oraqueate iriomeguedi noncantacojiaqueme, queroquea poajianaqueme aatonijite piconoajijaaritsi. <sup>11</sup>Iriguenticuate nocantacojiaquequeate irirajiaquea cantajitsica: “Naroguentiqueate papiguemisantarite, naroguenti tsaroven- tarica Quirishito”, cotanquitsi- queate igantagatirajaquea ya- cojiguiro manquigarentsi, aricaquea igantagati- raja inintsiguetiri yashintaguetacaca igonoro, aricaquea irioshivijitashitaca irioshivijire, aricaquea igantagatiraja iquenquetsaguisheguetaquequeate intati, aricaquea igantagatiraja ishinqui- taca, aisa aricaquea igantagatiraja yaitsitantagueti. Irioqueate iriguenticuate nocantaquequeate aatoquea piconoajijaari, aatoqueate pitsipajijaari pishecaji- aquempagueti. <sup>12-13</sup>¿Arimpa querocam- pate noncantajiaqueriqueate irirajia teeca intsaroven- tajiguempariji Quirishito? Iriguenticuate Aapani Irioshi inchiquiojitsiquea incanqueri iriatimpa. Cotanquitsiqueate aviatim- pajia pincantajiaqueriqueate quero incojitaquerini papiguemisantarite antaqueroca quempevaerentsi. Irootaquequeate nocantantajiaquempica imaica pincantajiaqueriqueate iriraquea manquigatacaroca imanquigavetacaca iriri aatonijite iconoajajimpitsi picapi- capinijiacaguetsi.

**Queroquea pincojiaquempani  
pivetsinantavacaajiaquempagueti**

**6** <sup>1</sup>Arigueti pincatsimamaquerigueti papiguemisantarite pamenaquerigueti querocagueti icotaquempi, ¿arimpate oncameetsataque poanaque pincamantaqueri joese cantacotantatsica teeca intsaroventajiguempariji Quirishito cameetsanijite incanque quero incojitaqueri irira pincatsimataquea? Iriguentijiaquea pincamantajiaquequeate papiguemisantarijate cameetsanijite incantajiaquempinijite quero incojitaqueri. <sup>2</sup>¿Arimpaqueate tee pintsajigueji aviatimpajia irirajiaqueate tsaroventajigarica Aapani Irioshi iriguentiqueate cantajianquitsine coajica queroqueate incojitaqueri maasano caquintejiatsica? Oraqueate arigueti pinquejejiaquempa imaica, caavijkeate pagavejajiaquequeate pincantajiaque imaica quero incojitaquerini querica catsimataacaquerineca irapiguemisantarite. <sup>3</sup>¿Arimpate teempa pintsajigueji aroguentijiaquea cantajianquitsine quero incojitaqueri ashivanti-jite? Atsajiaquetarite ariqueate onquejetaquempsa imaica coajica, iroosacanicate imaica caavijkeate agavejajiaquequea ancantajiaque quero incojitaqueri taaca opajitapae amenajiaqueca teeca oncameetsateji. <sup>4</sup>Arigueti pincatsimatava-caajica querocagueti picotavacaajacani, ¿queroqueate ocotaca iriguentiqueate paventajiaca teeca intsaroventajiguempariji Quirishito incantajiaquempiqueate quericaca quejetanquitsica? <sup>5</sup>Imaicaqueate imaica ariqueate mana notionquimentajiaquempi oca noguipashiventajiaquempinijite. ¿Arimpaqueate teempa inchoocatimateji apaniro papiguemisantarite tsatanquitsineca cantanquitsineca quero pincojiaquempani pivetsinantavacaajiaquempagueti?

**6**Cotanquitsiquea picatsimataquerigueti papiguemisantarite, iriguentiqueate paventajiacaqueate joese cantacotantsica teeca intsaroventajiguempariji Quirishito.

**7**Oraqueate piquejejiaquagueta imaica teequeate oncameetsateji. Arimequeate pantsiperejacojivaquemparome querocagueti icojiaquempini papiguemisantarite. Quejecaqueate impomatsisjiaquempirogueti taaca opajitapae pashintaguecaca irooca iramatavijaquempigueti, pantsiperejacojiaquempa-roqueate. <sup>8</sup>Cotanquitsiqueate aviatimpajia patsipetacaantajiaquequeate, pamatavijantajiaquequeate, piquejeta-caajianacariqueate aisa papiguemisantarijate iriatimpajia.

**9**¿Arimpaqueate tee pintsajigueji maasano antajatiatsica teeca oncameetsateji aatoquea yoguitsi ichoocaquegueti Aapani Irioshi? Inchiquiojija picomijigrotsi ocatica. Aatotarite yoajiguitsi ichoocaquegueti Aapani Irioshi oashitanaquerroca teeca iro imanquigare, jerijia irioshivijitashitatsica, jerijia aimentaroca imanquigare, jerijia cantatsajiguirica irapishirampariteni, <sup>10</sup>jerijia aitsitantajatiatsica, jerijia nintajatiatsica irajaarantajiaquempa, jerijia shinquijitatsica, jerijia cantacotashitantsica, jerijia aisa amatavijantatsica. <sup>11</sup>Piconoagarantajiacaqueate aviatimpajia ariqueate piquejejiavecaqueate imaica, cotanquitsiqueate oraqueate pitsaroven-tajiacarigueti Amajirote Jesoquirishito ishejiaquempiroqueate maasano piguempavaerejia, yamenantajiaquempicaqueate Aapani Irioshi quejevaeca teeca pinquempevaetimajiguempaji, ariqueate yagavejacaajiaquempi Ishire Aapani Irioshi povashiantamajajiana-queroqueate pantagushejiavetaca, ariqueate pisavicaventajianaqueroqueate inintaguetica Aapani Irioshi.

**Yashintajacaji Aapani Irioshi atsinojia**

<sup>12</sup>Choacaqueate taaca opajitapae teeca incantimentenaroji Amajirote, cotanquitsiqueate mana nonquenapitsatapanajantero intati querocagueti namenaqueca naatimpa manaqueate ovashiantacaanaquenaro notsaroventamajatarigueti Amajirote. Teequeate incantimentenaroji Amajirote, cotanquitsiqueate querocagueti namenaqueca arica agavejaquena coajica, manaquea nontomicapitsapanajantero intati.

<sup>13</sup>Arimajaqueate ipeacaaguecaroqueate Aapani Irioshi maasano ishecajiguetaca cameetsanijite oanaquenijite atsicotoqui anquemimentajanaquempanijite. Arikeate oquejetaca atsicoto iroatimpa manaqueate ipeacaashitacaroqueate ontetantaquemparo ashecaguequem-paca, cotanquitsiqueate coajica aatoqueate oquejetajatsi imaica, impejaerotarite Aapani Irioshi atsicoto aisa asheca. Cotanquitsiqueate atsino teequeate iroguenti impeacaashijigaji Aapani Irioshi oashitantajiaque. Iroguentiqueate ipeacaantajiacajica antsaroventajiaquempariqueate Amajirote, iriatimpaqueate Amajirote inchoocashirentajiacajiqueate.

<sup>14</sup>Arikea iquejetacaacariequa Aapani Irioshi Amajirote ivochantajiri queate, ariqueate inquejejiacaji aatimpajia aisa irovochantajiaajiqueate coajica, yagavejamajatitarite.

<sup>15</sup>¿Arimpate teequeate pintsajigueji aviatimpajia yashintamajajiaquempi-queate Quirishito? Pitsino iroguenti irashi iriatimpa. ¿Queroqueate incoquempani yashincaca Quirishito iroashitanaquerogueti icantatsapiniji-tica? Inquejetaquerogueti imaica

iooshiatsi, quejevaecaqueate irigu-en-tica quejequero Quirishito imaica!

<sup>16</sup>¿Arimpaqueate teequeate pintsajigueji querica oashitanaqueroneca icantatsapinijitica arikeate incotana-quempa intsipamajataquemparo-queate quejequeate apanironica inchoocatanaquequeate? Aritarite ocanque itioncacojiquerogueti ocanti: “Iroaqueragueti mavite icarajive-taca, cotanquitsiqueate arikeate icojianaca quempetanaja apatsinoro-nica icantaja.” <sup>17</sup>Cotanquitsiqueate quericaca tsaroventamajatarica Amajirote itsipamajatacariqueate arikeate iquejetanacariqueate iriatimpa quejetaca apanironica ichoocatanaque ishire.

<sup>18</sup>Pishipitsatanaqueroja quempe-vaaetagantsi: aatoquea picantatsatima-jiguirotsi teeca pimanquigatem-paji; aisa manquigarentsi aatoquea pineve-jigaritsi caarica manquigatimpi. Maasanotarite otsipapae quempevae-tagantsi yantagushejitic teesacona onquejetemparoji ocatica: iriraqueate cantatsataqueroca teeca iro imanqui-gare iquempevaetacaacaroquea itsino iriatimpa. <sup>19</sup>¿Arimpate tee pintsajigueji aviatimpajia oraquea pitsino iroguentiquea ichoocatantacaca Ishire Aapani Irioshi itigarancajiaquempica? Oquejetacaroquea iteemporote. Teequea aviguenti ashintajatsine, <sup>20</sup>yamanantaquempitarite yovellarata-quempi cameetsanijite irashintama-jajiaquempinijite. Irootaquequeate imaica nocantantajiaquempica pincomajamajajiguempaqueate cameetsanijite pamenacajajquerini-jite maasano caavijkeate yogane-jencamajata Aapani Irioshi. Pinqueje-

c 6.20 yamanantaquempitarite yovellarataquempi. Irootaque yovellaratantaquempica imetojane Quirishito. Pamenero 1 Co. 7.23; Yonig. 5.9; Irm. 3.24.

jiaquempaquea pitsinoqui [aisa pishirequi, iriotari ashintaroca].

**Icamantajiaqueri quero incojiaquempani manquigaiatsica**

**7** <sup>1</sup>Imaicaqueate imaica irooqueate noncamantajiaquempi picoacojiaquenaca pitoncajiaquenagueti. Cameetsavaetaqueate aatogueti imanquigajigatsi shirampari. <sup>2</sup>Cotanquitsiqueate aatonijite yoashitajirotsi manquigarentsi cameetsavaetaqueate irimanquigajaquempa apaniropae shirampari imanquigare. Arikeate onquejejiaquempaqueate manquigarentsijia iroatimpajia omanquigajiaquempaqueate omanquigare. <sup>3</sup>Oraqueate manquigarentsi aatoqueate otsinampirejiritsi manquigataroca irininqequeti inquishotajemparo. Arikeate inquejetaqueate iriatimpa aatoqueate itsinampirejirotsi iroatimpa. <sup>4</sup>Oraqueate manquigarentsi manquigatatsica teenicaqueate ashintemparo otsino, iriguentitarite ashintaroqueate omanquigare. Arikeate iquejetacaqueate manquigataroca, teequea irashintemparo iriatimpa itsino, iroguentitari ashintaroquea imanquigare. <sup>5</sup>Noncantantajiaquempicaqueate aatoqueate pitsinampirejavacajaiatsi, cotanquitsiqueate mavitegueti pinintajiaquegueti pinorijashijiajempa cameetsavnijite pisavicaventajiaquero pamanajiaqueri Amajirote cameetsavaetaqueate. Coajicaqueate pintspipavacajajempaqueate aatonijite iquempevaetacaajiguimpitsi Satanashi imajirote ampatsini, aatotarite pagaveji pitamphishtashijiguero pinchoocatashijiaquempagueti. <sup>6</sup>Cotanquitsiqueate nocantajiaquempigueti imaica teequeate arikeate noncantajiguempiji pimanquigajiaquempaja, manaqueate nocantajiaquempiqueate arigueti pinintajiaquegueti

pimanquigajiaquempa cameetsavaetaqueea. Oraqueate aatogueti pinintajiguitsi cameetsavaetaque aisa.

<sup>7</sup>Naatimpa nonintavecaqueate inquejejiaquename naatimpa maasano shiramparjia, cotanquitsiqueate irira Aapani Irioshi icantashitatijaiacaji apaniropae yagavejacaajiacajigueti.

<sup>8</sup>Irirajiaqueate tequeratatirajaca irimanquigajiguempaj cameetsataquequea inchoocatashijiaquempa intati inquejejiaquenaqueate naatimpa. Arikea onquejejiaquempa tequeratatirajaca omanquigajiguempa, jerojiaqueate metojacoguetanquitsica manquigataroca. <sup>9</sup>Cotanquitsiqueate aatogueti pagaveji pinchoocatashitempa cameetsavaequequea pimanquigatempa, anaquieroqueate pinevetashiguecarogueti intati. <sup>10</sup>Cotanquitsiqueate oraqua manquigaiatsica noncantajiaqueroqueate aatoquea ovashiantajiguritsi manquigataroca, teequea naroguenti cantatsine, iriguentiqueate cantanquitsi Amajirote. <sup>11</sup>Arigueti ovashiantanaqueri manquigataroca, aatoqueate omanquigatimatajatsi itsipa, cotanquitsiqueate oninquegueti ompliasitanajeriquea manquigataroca cameetsavaetaquequea. Arikea inquejetaquempa shiramparjia aatoqueate yovashiantimajiguirotsi imanquigarejia.

<sup>12</sup>Imaicaqueate imaica irioquea nonquenquetsatacaciajaque tsaroventajigarica Quirishito choocajatsica imanquigarejia teeca ontsaroventajiguemparji, cotanquitsiqueate teequeate iriguenti cantatsine Amajirote, naroguentiquea cantanquitsi. Noncantajiaqueriqueate arigueti onintaque imanquigare quisho oanaqueri, aatoqueate yovashiantirotsi. <sup>13</sup>Arikeate onquejetaquempa manquigarentsi tsaroventarica Quirishito choocagueti

manquigataroca teeca intsaroventempari, arigueti inintaque quisho iroaquero, aatoqueate ovashiantiritsi.<sup>14</sup> Iriatimpa teequea intsaroventavetempariji Quirishito, cotanquitsiqueate otsaroven-tacaritarite iroatimpa ariquea intsipata-caanquemparoqueate Aapani Irioshi incavintsajaqueri. Arikea oquejetaca-quea aisa manquigarentsi teeca ontsaro-ventempariji Quirishito, irioguetiqueate tsaroventarica manquigataroca ariqueate intsipataaanquempariqueate Aapani Irioshi incavintsajaquero. Aatomequeate oquejetame imaica irijanijiate inquejemajajaqueemparime irijanijiate teeca intsaroventempariji Quirishito, cotanquitsiqueate imaica iriri iriguentequea tsaroventarica irootaquequeate incavintsajantajia-quemparica Aapani Irioshi.<sup>15</sup> Cotanquitsiqueate choocagueti teeca intsaroventempariji Quirishito, iriogueti nintanquitsine irovashiantanajero imanquigare tsaroventarica, manaquea oncanque: "Querocagueti pininque, avirompate." Arikea oquejetacaquea manquigarentsi teeca ontsaroventempari Quirishito irooguetiqueate nintanquitsineca ovashiantajeri omanquigare tsaroventarica, manaquea incanquero: "Querocagueti pininque, avirompate." Ininquetarite Aapani Irioshi anchoocajiaquequeate cameetsa, teequeate irininteji ancatsimatavaca-guempa.<sup>16</sup> Aviatimpaqueate manquigarentsi, tee pintsateji arica pagavejaque pimeshiacaanqueri manquigatimpica, arica aato. Arikea piquejetacaqueate aviatimpa shirampari, tee pintsateji arica pagavejaque pimeshiacaanquero pimanquigare, arica aato.

<sup>17</sup>Querocagueti picotacani iroaqueragueti icajemajiaquempigueti Aapani Irioshi imaicaqueate pantauqueneri iriatimpa, iriotarite nintacaaquempica

pinquejetaquempaqueate imaica. Aritarite noquejejiguiriqueate imaica nocantajiguirigueti maasano tsaroventajigarica Aapani Irioshi querocagueti icapiocaventajiacari.<sup>18</sup> Arigueti itotsaiquijquiero pichonquimashi poguijatacotaquerogueti yamejigaca joriojia tequeratagueeti incajemepi Quirishito, ari ocotaca aato pipashiven-tacagaro imaica. Oraqueate teegueti intotsaiquijitempiji ariqueate onquejetaquempaqueate aisa, ariqueate pincoquempani imaica aatoquea pitotsaiquitacaantatsi.<sup>19</sup>Teenicaqueate iroguenti irishineventempa Aapani Irioshi iramenaquempi itotsaiquitsijita-quempiro pichonquimashi, iroguentica tee intotsaiquijitempiji, manaqueate ishineventamajacaroqueate pinetsanapiniataquerogueti icantaguetaqueca iriatimpa.<sup>20</sup> Irootaquequeate nocantanta-caca querocaqueate picojiacani iroaqueragueti icajemajiaquempigueti Aapani Irioshi, aritaque picotaca.<sup>21</sup> Arigueti yashintajitaquempi icajemaji-aquempigueti Aapani Irioshi, aatoquea pishoshoventartotsi queroca pincojia-quempani pinchoocatashijiaquempa-gueti intati, cotanquitsiqueate arigueti irovashiantajitajempi cameetsavaeta-quequeate irovashiantajitajempiqueate.<sup>22</sup> Maasanotarite yashintajitaca icajemajiaquerigueti Amajirote, quejequeate manaca ichoocatamacajairiqueate intati, teetari irashintajempariji ampatsini. Irirajiaqueate teeca irashintajitempariji icajemajiaquerigueti Quirishito, iriguentequea ashintajari Quirishito imaica.<sup>23</sup>Oquejetaca yamanantaquempi iriatimpa, imetojaventajiaquempitarite cameetsanjite irashintimentajiaquempinijite Aapani Irioshi. Imaicaquea imaica, aatoquea pishinetiri irashintajajempi caquinte.<sup>24</sup>Irootaquequeate nocantanta-jiaquempica, napiguemisantarijateni,

queroquea picojiacani iroaqueragueti icajemajiaquempigueti Aapani Irioshi, ariquea picoca pintsipamajajaquempigueti iriatimpa, ariqueate irio tsipamajajaquempine.

<sup>25</sup>Imaica irooqua nonquenquetsatacopiaque tequerataturajaca omanquigajiguempaji, cotanquitsiqueate teequea iriguenti cantenane Amajirote nonquenquetsatacopiaquero, inchiquojiqueate naatimpa nonquenquetsatacopiaquero, namenaquequea icavintsajaquena Amajirote yagavejacaquena nonquemsantamajataqueri. <sup>26</sup>Imaicaquea chooca atsipetagantsi, irootaquequea namenatacaca naatimpa oca: querocaca picocani imaica, aritaque pincoquempa. <sup>27</sup>Choocagueta pimanquigare, aato pinintitsi povashiantero. Oraqueate teegueti onchoocateji, aatoqueate pinintitsi pimanquigatempa. <sup>28</sup>Cotanquitsiqueate pimanquigatempagueti cameetsataquequeate, aatoquea icatsimatentimprotsi Aapani Irioshi. Arikea oquejetacaqueate manquigarentsi iroatimpa omanquigaquemigueta comeetsataquequeate aisa. Cotanquitsiqueate quericaca manquigantanquitsineca irantsipetaquempaqueate taaca opajitapae yatsipejigaca caquinte. Nonintavecaqueate aatosacona patsipemajajiga, irootaquequeate nocantantajiaquempica imaica.

<sup>29</sup>Imaicaqueate imaica, napiguemisantarijate, manaqueate nocantajiaquemipi namenaque aatoquea osamanitisii agavejajigu antajiaqueneri Amajirote. Irootaquequeate noncantantajiaquempica imaica irirajia manquigajiatsica aatoqueate iroguentiqueate iquenquejajiguitsi imanquigarejia, manaqueate inquenquejamajajiaquequeate quero incoquiaquempani irisavicaventajiaqueronijite maasano ininqueca Amajirote. <sup>30</sup>Arikeate inquejejiaquempaqueate

irirajia shimampojancajianquitsica irisavicaventajiaqueroqueate ininqueca Amajirote quejecaqueate teeca irishimampojancajempa. Arikeate inquejejiaquempaqueate aisa shinejianquitsica. Iriojiaqueate quericaca ashintajianquitsica taaca opajitapae aatoqueate iroguenti ishineventatsi, quejetacatari tee irashintajiguemparoji, aatotarite icoguitani yashintajigaro. <sup>31</sup>Arikeate inquejejiaquempaqueate aisa shineventajigarocca cameetsaguetatsica choocaguetsica quepatsiqui, aatoqueate iroguenti ishineventamajajigatsi, aatonicate ocoguitani ochoocatitsi.

<sup>32</sup>Teequeate nonintejpi pinquenquejajiaquero taaca opajitapae pishoshoventajiaquempaca. Iriraqueate teeca irimanquigatempajji iragavejaquequeate inquenquejaque quero incoquempani irisavicaventajeronijite ininqueca Amajirote. <sup>33</sup>Cotanquitsiqueate iriraqueate choocatanquitsica imanquigare iquenquejaqueroqueate aisa choocaguetsica quepatsiqui, iquenquejagetarite quero incoquempani oshinevabantanaquempaca imanquigare.

<sup>34</sup>Arikeate oquejetacaqueate aisa manquigarentsi choocatanquitsica omanquigare, teequeate onquejetemparoji teeca omanquigatempajji. Oraqueate teeca omanquigatempajji agavejaque onquenquejaque quero oncoquempani osavicaventajeronijite ininqueca Amajirote, oncomajajiaquempaniji otsinoqui aisa oshirequi. Cotanquitsiqueate oraqueate manquigatatsica oquenquejaqueroqueate aisa choocaguetsica quepatsiqui, oquenquejagetarite quero oncoquempani irishinevabantanaquempaca manquigataroca.

<sup>35</sup>Oraqueate nocantajiaquempigueti imaica teequea arikeate noncantimentajiguemparoji pimanquigajiaquempagueti, aparoqueate nocantajiaquempiqueate caaviji anaantaque ocameetsataque pinchoocajiaquegueti intati aatonijite taaca

píquenquejajiguitsi otsipa, iroguentiqueate pisavicaventajaquequea inintaguética Amajirote pincomajamajajaqueempaquea pinchoocajaquequea cameetsa.

<sup>36</sup>Choocagueti cashianquitsica iroaqueru-gueti ininque irimanquigataquemparo manquigarentsi coajica, iramenavaquero-gueti oquenquevarotanaque ariquea inintanaque irimanquigaquemparo, cameetsaquea irimanquigataquemparo, teequea incantimentanteroji Aapani Irioshi. <sup>37</sup>Cotanquitsiqueate choocagueti itsipa cashiavetanquitsica manaqueate iramen-aquero cameetsataque aatogueti imanquigata-ro manquigarentsi, aisa aatogueti ochoocati taaca opajitapae onquenanta-quempaca irimanquigatantaquemparoca, cameetsataquequeate aatoqueate imanqui-gataro. <sup>38</sup>Irootaquequeate noncantantaja-quempica imaica quericaca manquigata-quemparoneca manquigarentsi icashiacaca cameetsavaetaquequeate, cotanquitsi-queate iriraqueate aatogueti imanquigata caavijiqueate ocameetsataque.

<sup>39</sup>Oraqueate manquigarentsi manquiga-tanquitsica teequeate oncameetsateji ovashianquerigueti manquigataroca, cotanquitsiqueate arigueti irimetojanaje cameetsataquequeate omanquigatajempa itsipa quericaca onintaqueca iroatimpa, cotanquitsiqueate iriguentiqueate omanquigaquempsa tsaroventarica Amajirote. <sup>40</sup>Cotanquitsiqueate naatimpa namenaque caavijiqueate oshinemajata-quempaquea aatogueti omanquigatajatsi itsipa, aisa namenaquequea iriguentiquea cantaquena Ishire Aapani Irioshi.

#### Iteshi viratsipae yojocajiquenerica irioshivijitashijiguetaca

**8** <sup>1</sup>Imaicaqueate imaica irioqueate nonquenquetsatacotaque iteshi viratsipae imetojajitaqueca yojocajique-nerica irioshivijitashijiguetaca. Arimaja-guitatsi atsajiavetacaqueate cameetsa-

taque irishecajitaquemparigueti irira iteshipae, cotanquitsiqueate querica amenanquitsineca itsamajaquequeate manaqueate iraventacotanaquem-paqueate. Cotanquitsiqueate oraqueate arimajagueti ancoquempani ampintsaji-aquemparigueti apiguemisantarite, manaqueate antampishitavacaajiaquem-paqueate cameetsanijite anquemisanta-majajianaquerinijite Aapani Irioshi. <sup>2</sup>Quericaqueate jivetanquitsica itsaque, teequeate intsamajateji. <sup>3</sup>Cotanquitsi-queate ampintsajiaquemparigueti Aapani Irioshi, itsamajajiacajiquea iriatimpa.

<sup>4</sup>Imaicaqueate nonquenquetsatacotaque-riquate iteshi viratsipae imetojajitaqueca yojocajiquenerica irioshivijitashijiguetaca. Aatimpajia atsajiaquequeate maasano irioshivijitashijiguetaca intati teequeate queroca iragavejaquequeate, apaniroquea icoca Aapani Irioshimajaca ichoocaque-queate yagavejamajaquequeate. <sup>5</sup>Ichooc-a-vetacaqueate ontaniqui jenoqui inquitequi jeroqueate aisa quepatsiqui oshequimi itsaroventajiguevetacaca, jerijiaqueate imajirontajiguevetacaca, <sup>6</sup>cotanquitsiquea aatimpajia atsajiaquequeate teequeate inchoocateji itsipa Irioshimajaca, apaniro-quea icoca Aapani Irioshi ichoocataque-queate. Iriguentitarite choocatacaaquiero maasano choocaguetatsica, aisa aatimpajia iroguentiqueate achoocatasjiji que asavicaventajiaquerouqueate maasano inintaguequeca. Aisa choocaqueate apaniromajaca Amajirote, irioquea Jesoquirishito. Iriguentitarite peacaagueta-caroca maasano choocaguetatsica, aisa iriguentiqueate anijacaajiacajica aatimpajia.

<sup>7</sup>Cotanquitsiqueate choocaqueate tsaroventajigarica Aapani Irioshi teeca intsamajateroji oca nocamantaquem-pica. Iconagarancaqueate irirajia amejavetatsica ishineventajavetari-

queate irioshivijitashiguetaca, igantagatirajaqueate itsaroacagari irishecajiaquemparigueti iteshi yojocajiquenerica irioshivijitashirentsi, yamenajaqueate irishecajiaquemparigueti manaqueate irantajaquequeate teeca oncameetsateji quejecaqueate manaca ishineventajiacariequeate irioshivijitashijugetaca. <sup>8</sup>Irraqueate Aapani Irioshi aatoqueate iroguenti ishineventajaijiqueate ashecajiaquemparigueti, aatonicate ishineventamajajigaritsi shecajigarica, aisaeua aatoqueate icatsimativamentajiguiritsi teeca irishecajiguempariji. <sup>9</sup>Cotanquitsiqueate oraqua pincantajiaquegueti cameetsataque irishecajitaquemparigueti iteshi yojocajiquenerica irioshivijirentsi inchiquiojitsitaja piquempevaetacaajigartsija papiguemisantarite tequeratatirajaca intsajigueji. <sup>10</sup>Pamenejate arigueti iramenaquempigueti papiguemisantarite tequerasanotirajaca intsateji shecaquempiqueate tsovironaquiqui itsaroventantajitarica irioshivijirentsi, ariqueate arica irinintaquequeate inquejetaquempaqueate iriatimpa, yamenajquempitarite aviguenti irapiguemisantarite. <sup>11</sup>Arigueti inquejetaquempa imaica aviguenti quejetacaantaqueri, aviguentitarite iramenacotaquequeate pinquejetaquerogueti imaica, ariqueate irovashiantanaqueroqueate iquemisantavetacagueti. Aviguentiquea quejeta caantaqueriquea papiguemisantarite imetojaventaquea Quirishito.

<sup>12</sup>Oraqueate pinquejetaquempagueti imaica pinquempevaetacaquemparigueti papiguemisantarite tequeratatirajaca intsateji, iriraqueate Quirishito iramenaquempiqueate mana pantaque teeca oncameetsateji, iriatimpaqueate teenica irininteji anquempevaetaca-

guempari apiguemisantarite. <sup>13</sup>Irootaqueate nonquejetantanaquempaca naatimpa namenaquegueti manaqueate nonquempevaetacaquempari napigue misantarite noshecatemparigueti iteshi, aatoja noshecatajaritsi aatonijite noquempevaetacagaritsi.

**Quero icocani Paavoro  
isavicaventirogueti ininqueca Aapani  
Irioshi**

**9** <sup>1</sup>Naatimpaqueate naroguenti itigarancane Amajirote Jesoshi, namenaqueritari, aisa iriguentitarite tigarancaquena notsavetantimojiaquem-piqueate pitsaroventantajianacarica. Nagavejaquequeate nantaque taaca opajita teeca incantimentenaroji iriatimpa. <sup>2</sup>Arigueti choocagueti itsipa teeca irinintajigueji incantajiaquena itigarancane Quirishito, cotanquitsiqueate aviatiempajia pitsamajajiaque iriguentiqueate tigarancaquena, naroguentitarite quenquetsatacaaajia-quempi pitsaroventantajiacarica. Aviguentijia imaica iramenajitaque intsatantajitaquempa naroguenti itigarancane Amajirote.

<sup>3</sup>Jero imaica noncantajiaquerica irirajia tsojencaguevetaquenaca, noncantajiaqueriquea: <sup>4</sup>Cameetsavetacaqueate irojocajitaquena intati nosheca jeroqueate nomire querocagueti oraniqui nonchoocaqueni nontsavetanti-moquerigueti. <sup>5</sup>Aisa cameetsavetacaqueate nomanquigataquempa manquigarentsi quemisantamajataquerica Quirishito nontsipatanaquemparonijite nonquejejiaquempariqueate itsipapae itigarancanejia Amajirote, jerijia iriguentijeguijate, jerijia aisa Sepashi,<sup>d</sup> cotanquitsiquea teequea nonquejetero imaica. <sup>6</sup>Iriatimpajia teequea irishiacoji-

**d** 9.5 *Sepashi*. Irootaque otsipa ivajiro Shimo Peerero.

gueji irisavicaventajiaqueronijite  
intsavetacotaqueri Quirishito, ḋarimpate  
pamenajiaque apaniro naatimpa  
nontsipataquempari Verenave nantsipe-  
ventajiaquemparo novegarajiaqueronijite  
nosheca? <sup>7</sup>Nonquejetacaguempiro:  
Iriraquea coareta ḋarimpate irovegarataque  
inchiquiojitsita iriatimpa isheca?  
Ariquestate iquejetaca sevaguetiroca ova  
ጀarimpaqueate isevatashitacaro intati  
teequea irishecatavaquemparo?  
Ariquestate iquejetaca quempogujirica  
oveja iriatimpa ḋarimpaqueate incantimen-  
tajiqueriqueate irimiraquerogueti  
itsomija?

<sup>8</sup>Imaica aatoja pijijiguitsi mana  
noquenquetsatacoguetaque intati  
itsatacantica caquinteguetatsica.  
Irosatiquea iquejetantacaroca Aapani  
Irioshi itioncacaaquerigueti Moishishini  
coramani. <sup>9</sup>Ocanquetari itioncanaqueca  
Moishishini: “Aatoquea pisavotsovati-  
tsija caapironcaari pisagorejacaanta-  
quemparigueti tirigoqui.” Oraqueate  
ocanqueguedi imaica, ḋarimpate apaniro  
iriguenti icavintsaque Aapani Irioshi  
caapironcaaripae? <sup>10</sup>¿Teampaquea  
aroguentijia oshiacaantaca? Jeeje,  
aroguentijia itionquimentajiaquero,  
irooriji iriraqueate quitencavatsatashitiroca  
tirigo<sup>e</sup> inquitataqueroniji itsaque-  
queate irojocajitajeneriqueate coajica  
onchoocatanaqueguedi. Ariquestate  
iquejetaca isagorejacaajitica itsaque-  
queate irojocagarantajiqueneriqueate.

<sup>11</sup>Imaica naatimpajia notsatacaa-  
jiaquempiroguedi Icanqueca Aapani Irioshi  
quejecaqueate manaca noquitaguijia-  
queroqueate Icanqueca pishirequi.  
¿Imaicaquea aatompa pagavejajigi  
pojocagarantajiaquena nosheca,  
noitsaare, taaca opajitapae? ¿Pamenaji-  
aquerompa tee oncamenteateji? Camee-

tsavetacaqueate, oquejetacatari  
yojocagarantajitinrigueti quitaguijia-  
tsica. <sup>12</sup>Aritarite pojocagarantajiaquene-  
riqueate itsipapae tsatacaajiguimpica,  
naatimpajiaqueate caavijiqueate  
pojocagarantajiaquenamequeate.  
Cotanquitsiqueate naatimpajia  
teequeate noncantimajiguempiji  
pojocagarantajiaquena taaca opajitapae,  
manaqueate natsipetacaqueate aatoniji  
querica cantanquitsine mana notsav-  
tanqueri Quirishito irovegarajiquenani-  
jite, iroompa arica aato ininti iquemi-  
santiro Quenquetsatsarentsi Oganejen-  
catatsica tsavetacotaquerica. <sup>13</sup>Aviatim-  
pajia pitsajiguitarite maasanoqueate  
amitacotantajatiatsica teemporoqui  
itsaroventajitarigueti Aapani Irioshi  
ishecagarantajiacaroqueate maasano  
yamapinijiguequeca irojocajitaqueneri  
Aapani Irioshi. Irirajiaqueate savicaven-  
tajiguica itajaiqueneriqueate iteshi  
viratsipae yojocajiquenerica Aapani  
Irioshi aretarequi yaagarantajiaque-  
queate ishecajiacariequeate, iriguentita-  
rite cantanquitsi Aapani Irioshi.

<sup>14</sup>Ariquestate oquejetacaqueate imaica  
iriguenti cantanquitsi Amajirote  
maasano tsavetantajiguiroca Quenque-  
tsatsarentsi Oganejen-  
catatsica cameetsataquequeate irojocajitaqueneriqueate  
taaca opajita coguitejimo-  
tacarica, iriguentiqueate jocajiaquenerine irirajia  
itsavetantimojiaqueca.

<sup>15</sup>Cotanquitsiqueate naatimpa  
teequeate noncantajiguempiji pojocajia-  
quena taaca opajita coguitejimojiaque-  
naca, aisa imaica teequeate irooqueate  
nontionquimentajiguempiji noncantajia-  
quempi pojocajiaquena. Arimpate  
ometojanaquenaguedi notase ometojenataquea,  
caavijiqueate anaaquequeate  
noshinemajacaguedi notsavetantiguedi

e 9.10 quitencavatsatashitiroca tirigo. Pamenero ivaantorite Irocashiqui 9.62.

intati aatoqueate taaca opajita namanimpitsi. <sup>16</sup>Naatimpaqueate notsavetantirogueti Quenquetsatsarentsi Oganejencatatsica teequeate nosemetimateji, iriguentitarite cantaquena Aapani Irioshi nontsavetantaqueroquea. Oraqueate aatogueti notsavetantiro iooshiatsi! <sup>17</sup>Oraquea inchiquiojitsimequea noninque naatimpa nontsavetantaquero ariqueate noncantaquemequea irovegarajiquenaquea, cotanquitsiqueate teequea onquejetempaji imaica, iriguentitarite nintacaquaen Aapani Irioshi nontsavetantaquero. <sup>18</sup>Arisacanicate imaica ¿taaquea shinetaquaenane? Teequea nonintej irovegarajiquena nontsavetanterogueti Quenquetsatsarentsi Oganejencatatsica, mana noshinevaetacaqueate nagavejaque nontsavetantero intati.

<sup>19</sup>Cotanquitsiqueate imaica teequea inchoocateji ashinquenaneca, aatoqueate querica cantana taaqueate nosavicaventaque. Inchiquiojitsitaquea naatimpa noquejetacaacaquea naroguentinica irajaanireja maasano, natsipeventajiacarieate maasano nonintamajataque nonquemisantacaajiaqueri intsariventajiaquemparinijite Quirishito. <sup>20</sup>Oraqueate notsipajiacariqueti nogonorojia joriojia noquejemajiacarieate iriatimpajia cameetsanijite nonquemisantacaimentajiaquerinijite. Teenicaqueate noguijatacovetajemparoji naatimpa itioncanaqueca Moishishini, cotanquitsiqueate noquejejiacarieate iriatimpajia, noninquetarite nonquemisantacaajiaqueri. <sup>21</sup>Oraqueate notsipajiacarigueti teeca iroguijatacojigueroji itioncanaqueca Moishishini, ariquea noquejejiacari iriatimpajia cameetsanijite nonquemisantacaajiaqueri iriatimpajia aisa, cotanquitsiqueate nocancaniquea nonetsanamajatiro inintaguetica Aapani Irioshi, noquemisantaqueritarite

Quirishito. <sup>22</sup>Oraqueate notsipajigariqueti quemisantajigurica Quirishito tequeratatiraja intsamajajigueji, noquejejianacarieate iriatimpajia cameetsanijite nontampishitacajaiqueriniji arimpanijite inquemisantamajajainaqueriniji. Arimajatari noquejetaquerorequeate imaica quericaca notsipajiacaca manaqueate noquejejiacari iriatimpajia cameetsanijite nonquemisantagarantacaajiaquerinijite irimeshiajiaquerinijite Aapani Irioshi. <sup>23</sup>Nosavicaventaqueroratare Quenquetsatsarentsi Oganejencatatsica, irootaqueate noquejetantacaroca imaica aisa nonintaqueterite nontsipajiaquempariqueate maasano icavintsajajiguica Aapani Irioshi.

<sup>24</sup>Aviatimpajia pitsajigurotarite oraqueate ishiashiavijijigagueti iramenajiaque quericaca anaantanquitsineca, maasanoqueate ishiashiajiana, cotanquitsiqueate coajica teequeate maasano iramatsaejiteriji, apaniroquea yamatsaejitaqueri iriraqueate anaantamajatanquitsica. Imaica aviatimpajia pinquejejiquempari iriraqueate anaantamajatanquitsica pintampishitashijiaqueroqueate taaca opajitapae inintacajiaquempica Aapani Irioshi cameetsanijite irishineventaquempinijite. <sup>25</sup>Maasanotarite nintajiasica iranaantajigue irishiashiavijijiaqueri icomajamajajiacaqueate cameetsanijite iragavejimentajiaquenijite iranaantajiaqueniji. Iriatimpajia manaqueate inintajiaque iranaantajiaque cameetsanijite iramatsaetimentajitaquerinijite amatsaerontsi teeca onquishoteji teroncanajatsineca. Cotanquitsiqueate aatimpajia iroguentiqueate ancomajatashijiaquempaqueate cameetsanijite irishineeventajiacaji Aapani Irioshi irojocajiacajiro amatsaerontsimajaca caarica teroncatsi. <sup>26</sup>Irootaqueate naatimpa noqueje-

tantacarica shianquitsica teeca irishiashiavijitashitempaji intati. Aisa noquejetacariequa capojantatsica teeca incapojaguiteteji intati.<sup>27</sup> Oraqueate onintacaaguevetaquenaca notsino teequea nonquemisantavaquero, naroquea cantavaquero quero oncoquempani. Manauea nocomajama-jatanaca intati. Namenaquetari naatimpa notsatacrajaiqueriqueate itsipa intsaroventajaqueempari Aapani Irioshi, teequeate nonintejincanquena iriatimpa coajica: “Tee noshineventem-piji.”

**Icantajiaqueri aatoquea  
itsaroventajigaritsi  
irioshivijitashijiguetaca intati**

**10** <sup>1</sup>Imaica, napiguemisantarrijate, nonintaque nonquenquejacaajia-jempiro quero ocotacani paesatoniqui ichoocajiaquegueti novaesatinijateni ontaniqui oquitamampororoipojaque-gueti. Maasanoqueate omararotacojia-queriqueate mararo, aisa maasano-queate yagategateitanaquero Quentijani Quityoncajaro ocaranarejajatanaque-quea niganquia opijoncaguitetanaque-quea.<sup>2</sup> Ontaniqui mararoqui aisa quentijaniqui quejecaqueate manaca iviñacajajitaqueriqueate ironijite intsantajitaquemparoca iriguenti iroguijatacojigue Moishishini.<sup>3</sup> Arikeate oquejetaca aisa maasano ishecajiacaroqueate manaa yojocajia-quenerica Aapani Irioshi. <sup>4</sup>Aisa maasanoquea imirajiacaroqueate oja yojocajiaquenerica Aapani Irioshi imotojataqueneriquea mapiqui. Oraqueate mapi iriguenti quejecaro Quirishito tsipajiacarica ontaniqui oquitamampororoipojaquegueti.<sup>5</sup> Maasanoquea yamenajiavecaroquea maasano ocatica, cotanquitsiqueate iriraquea Aapani Irioshi tee irishineven-

tajiguempariji oshequini yamenajiaque-rigueti teequeate inquemisantamajaji-gueriji, irootaquequeate imetojantajia-nacaquea ontaniqui oquitamampororoi-pojaquegueti.

<sup>6</sup>Arikeate oquejetacaquea imaica cameetsanjite amenajiaquero aatimpajia aatonijite aquempejigaritsi iriatimpajia anintajiaque antajiaque teeca irininteroji Aapani Irioshi antajiaque.<sup>7</sup> Irootaquequeate nocantan-tajiaquempica aviatimpajia imaica aatoquea pitsaroventajigaritsi irioshiviji-tashijiguetaca intati pinquejejiaquem-parieate iriatimpajia, iconoagarantajia-catarite itsaroventajiacari. Arikeate ocantaquequeate Itioncacaantaqueca Aapani Irioshi ocanti: “Iriatimpajia isavicaventajiaqueroqueate ishecajiaaca aisa imirajiacaca, arikeate iteroncajiana-querogueti icatintiitanaca itontoronca-ventajiaqueri irioshivijitashitaca itsaroventajiacariqueate.”<sup>8</sup> Aisa aatoquea oashitantajigui aquempejigaritsi iriatimpajia yoashitantajiguigueti arikeate imetojajiaquequeate aparo savincaguiteri 23,000.<sup>9</sup> Arikeate oquejetaca aisa aatoqueate amenantajigaritsi Amajirote. Aatoquea aquejejigari iriatimpajia iconoagarantajiacaqueate yamenantajiacari irosatiquea itigaran-cantajiacanarica camaarini yatsicajia-queriquea, arikeate imetojajianaque.<sup>10</sup> Jeroqueate aisa aatoqueate atsojenquiriti Aapani Irioshi irioca itsipa, aquejejigari irootaqueate itsojenquitsijiaqueri, ipincajiaquero yojocajiaquenerica icantajiaqueri tee oncameetsateji, arikeate itigarancajiaqueneriqueate irashivantite imetojajiaqueri.

<sup>11</sup>Arikeate iquejejiaqueriqueate Aapani Irioshi imaica anquenquejajia-queronijite, arikeate itioncacojiquero-queate antsajiaquenijite aatimpajia

choocajatiſica imaica pajinigueti aapojempa savincaguitteripae vegarata-pojaatsineca. Ininquetarite Aapani Irioshi antsajiaquero aatoniji aquejejigariſti iriatimpajia.<sup>12</sup> Pamenavequem-pa-gueti pagavejaque pitampishitashiquero quempevaerentsi, iſhoshoh! Pagamaja-majaquemparoja aatoniji piquem-pe-veta.<sup>13</sup> Taacaqueate opajita coraqueta-shijiaquempica teequeate apaniro oncoraquetashijiguempi aviatimpajia, ocoraquetashijiguriquea aisa maasano caquintejiſtica. Cotanquitsiqueate Aapani Irioshi icoguitanitari inetsana-tiro icantica, paventajiaquemparigueti aatoquea yoguishinejiro oncoraquetashijiaquempime agavejajianaquempimeca, manaqueate intsatacayaiaquempiqueate quero pincojiaquempani aatonijite agavejajiguimpi taaca opajitapae coraquetashijiaquempica.

<sup>14</sup> Irootaquetari nocantantajiaquem-pica imaica, nopintsamajajiaca, aatoqueate pitsaroventajigaritsi irioshivijitashijiaca intati.<sup>15</sup> Manaquea noquenquetsatacayaiaquempiquea imaica notsaquetari pinquemajia-quaena, aisa pitsajiaque pincantajiaque arica nocantamajataque arica tee.<sup>16</sup> Oraqueate atsipatavacaajiacagueti aquenquetsatacayaiaqueriqueate Aapani Irioshi ashineventajiacaro amire cantacotaqueroca iriraja Quirishito osotoajatanaquegueti imetojaventajiacajigueti. Oraqueate aquejejiacagueti imaica manaqueate iramenajitaquero atsipatavacaajiac aquenquejajiaquero-quea iriraja shetaqueroca aguempvae-reja. Arikeate oquejetaca aisa ashecajigarogueti pan quejecaroca itsino manaquea iramenajitaqueroquea atsipatavacaajiac aquenquejajiaquero yompajacojitaquerigueti.<sup>17</sup> Oshequi acarajiavecauea aatimpajia tsaroventa-jigarica Quirishito, cotanquitsiqueate

maasanoqueate atsipatavacaajiac-queate ashecajicarogueti ocatica pan, aparotarite ocanca. Irootaquequeate maasano aatimpajia ashecajigarogueti atsipatavacaamajajiaqueate quejec-queate apaniroca achoocajiaque.

<sup>18</sup> Pinquenquejajiguerijate ichoviqui-jiani Ishiraerini queroqueate icojigan. Iriraqueate shecajigarica iteshi viratsipae yojocajiquenerica Aapani Irioshi aretarequi itsipamajatariqueate Aapani Irioshi.<sup>19</sup> Cotanquitsiquea iriraqueate irioshivijitashijiguetaca intati teequeate nonanteji arimaja irioshivaequempare, aisa teequeate noncantempi iriraqueate viratsipae yojocajiguetinirica icantashitatiaca, manaqueate iquejetacariequea itsipapae iteshi.<sup>20</sup> Manaqueate nocanque irirajia-queate jocajiguinirica iteshi irioshivijita-shijiaca iriguentequea yojocaque-ampatsinipae, teequeate iriguenti irojoquene Aapani Irioshi. Naatimp-quea teequea nonintimateji pintspajia-quempari ampatsinipae.<sup>21</sup> Oraqueate pimirajigarogueti vinoja quejetacaroca iriraja Amajirote, aato pagaveji pimiraventajigari aisa ampatsinipae pishineventajiaquempari. Arikeate oquejetacaqueate aisa pitsipatavacaajigagueti pishecaventajigarigueti Amajirote piquenquejajiaquerigueti imetojaventajiacajigueti, aatoqueate pagavejimajiguitsi pishecaventajigari aisa ampatsinipae.<sup>22</sup> ¿Arimpa anintaji-que incatsimajiacaji Amajirote ashineventajiaquemparigueti irioshivijitashijitaca intati? ¿Arimpate atampishi-majati anajaiqueri Amajirote?

<sup>23</sup> Arimajaqueate chooca taaca opajitapae teeca incantimenteroji Amajirote, cotanquitsiqueate querocaca anejajiaqueca manaqueate ovashianta-cajaiacajiro atsaroven-tamajajigari-gueti Amajirote, teequeate oncameetsa-

teji antajiaquerogueti. Teequeate incantimentajiavetajiroqueate, cotanquitsiqueate querocaca anejajiaqueca arigueti aato otampishitacajaiguiritsi apiguemisantarijitateni inquemisantamajajianaqueniji, arisacanicate aatoqueate antajiguirotsi.<sup>24</sup> Aatoqueate aparo aquenquejatsi aatimpa, anquenquejajiaqueriqueate apiguemisantarijitate aisa.

<sup>25</sup>Cameetsataquequeate pishecajiaquempariqueate iteshipae yojocajiqueca ontaniqui yovegaratapinijitigueti iteshi, aatoqueate picoacojiguiritsi queroqueate yaajitaquerini aatonijite piquenquejajigurotsi aricaqueate cameetsataque pishecajiaquemparigueti arica tee.<sup>26</sup> Maasanotarite quepatsi jeroqueate aisa maasano choocagueta-tsica iriguentiquea ashintaro Amajirote.

<sup>27</sup> Arigueti incajemajiaquempi teeca intsaroventempariji Quirishito irishecajuempagueti pincavintsajajiaqueriqueate aviatimpajia poajianaque, cotanquitsiqueate pishecajiaquemparoqua taaca opajita yojocajiaquempica. Aatoqueate picoacojiguiritsi iteshi aricaca yojocajivetacanari irioshivijitashijiguetaca intati aatonijite piquenquejajirotsi aricaca cameetsataque pishecajiaquemparigueti aricaca tee.

<sup>28-29</sup> Cotanquitsiqueate oraqueate choocaguetu cantajiaquempineca incanquegueti: “Iricatica irica iteshi yojocajivetacanaria irioshivijitashiguetaca intati”, ariquate aatoqueate pishecajigaritsi, manaqueate pinquenquejajiaqueriqueate irira camantajiaquempica. Iriatimpapea yamenaqueatirite arica tee oncameetsateji irishecajuemparigueti irootaquequeate icantatacaca imaica. Iroosacanicate arigueti yamenaque iriatimpa tee oncameetsateji irishecajuemparigueti, aatoqueate pishecataritsi. Pishecajiaquemparigueti aatoqueate queroca icojiguimpitsi

pishecajiaquempaca, cotanquitsiqueate irioqueate pinquenquejajiaque irira camantajiaquempica aatonijite piquempevaetacaimajigaritsi.

Cotanquitsiquea arica chooca cantanquitsineca: “¿Querocaca octacani tee oncameetsateji noshecataquempari iteshi yamenaqueca itsipa arica teeca oncameetsateji, teenicaqueate incantimenteroji Aapani Irioshi?<sup>30</sup> Nocancaniquea noshecatarigueti iteshi noshineventariqueate Aapani Irioshi notsaquequea iriguenti jocaquenari. ¿Querocampaquea oncoquempa incantajiaquena tee oncameetsateji noshecataquemparigueti?”<sup>31</sup> Imaicaqueate imaica noncantajiaquempiqueate quero octacani. Maasanoqueate taaca opajita pantajiaque pamenacajajiqueriqueate maasano arimaja yagavejamajati Aapani Irioshi, iroogueti pishecajiacagueti, iriguentigueti pimirajiacagueti, aisa taaca opajitapae pantajiguica.<sup>32</sup> Aatoqueate aquempevaetacajigaritsi apiguemisantirite. Aisa aatoqueate antajiguitsi taaca opajitapae iramenajiacajigueti teeca intsaroventajiguempariji Quirishito ariquate aato inintajiguetsi intsaroventajiguempari iriatimpajia aisa, iriguenticaqueate joriojia, iriguenticaqueate teeca irijorijoigueji.<sup>33</sup> Ariqueate noquejetaca quea naatimpa manaquea nonintaque noshinetacaajiaquempariequea maasano, teequeate narosati quenquejaatsine, iriguentiqueate noquenquejajiaque itsipa queroquea noncojiaqueri cameetsanjite irimeshiimentajiaquerinijite Quirishito.

**11** <sup>1</sup>Noninquequeate poguijatacojia quenaqueate pinquejejiaquena naatimpa noguijatacotirigueti Quirishito.

**Quero oncoquempani manquigarentsi  
amanaquegueti Aapani Irioshi  
icapiocajiacagueti**

<sup>2</sup>Noshineventajiaquempiqueate namenaquegueti picancaniquea piquen-

quejajiaquena, aisa picancani piquenquejajiaquero notsatacayaquempica pinetsanajianaqueroqueate. <sup>3</sup>Cotanquitsiquea jeroquea ocatica noninque pintsajiae: iriraquea shirampari irio cantaquerine Quirishito quero incoquempani, oraqueate manquigarentsi irioquea cantaquerone manquigataroca, ariquate iquejetacaquea Quirishito iriatimpa irioquea cantaquerine Aapani Irioshi. <sup>4</sup>Irootaquequeate iriraquea shirampari iramaniquerigueti Aapani Irioshi ontaniqui icapiocajagueti aisa intsavetanterogueti Icanqueca Aapani Irioshi, teequea irametemparojo intatainatempa. Oraqueate intatainataquempagueti quejecaqueate iriguentica iquemisanti irapicaquinteteni, teequea iriguentiquea inquemisantamajateji Quirishito. <sup>5</sup>Cotanquitsiqueate oraqueate manquigarentsi iroguentiquea ametaro ontatainataquempa amanaquerigueti Aapani Irioshi picapirocajagueta irosati ontsavetanterogueti icanqueroca. Oraqueate aatogueti otatainatatsi manaqueate quejetaca teeca onquemisanteriji manquigataroca aisa quejetacaquea manaca yojocaguinajiqueroqueate. <sup>6</sup>Oraqueate aatogueti onintitsi ontatainataquempa iiintsija ojocaguinataquempaquea. Cotanquitsiqueate teequea ametemparojo manquigarentsi onquejetaquempari shirampari, ompashivenquempatari ojocaguinatacaanquempagueti irooca aamajaquerogueti omae, irootaquequea nocantantacaca iiintsija ontatainataquempa.

<sup>7</sup>Cotanquitsiqueate irira shirampari atoqueate itatainatatsi, aritarite iquejevecariequeate Aapani Irioshi, aisa irootaquequeate iramenantajiquemparoca arimaja yagavejamajati Aapani Irioshi. Oraqueate manquigarentsi ontatainataquempagueti irootaquequeate iramenantajitaquemparoca

yanaantaque shirampari. <sup>8</sup>Iriquetitarite ipeacaaca Aapani Irioshi shirampari, ariquate yaqueroqueate imerequi ipeacaantacaro manquigarentsi, teequeate iroquetiqueate impeacaguempa manquigarentsi. <sup>9</sup>Teequea impeacagueriji shirampari ashi manquigarentsi, iroguentiquea ipeacaacanariquea manquigarentsi irashi shirampari. <sup>10</sup>Irootaquequeate imaica cameetsataque ontatainataquempa manquigarentsi cameetsanijite iramenajiaqueronijite irashivantijitete Aapani Irioshi arimajaquea oquemisantaqueriqueate manquigataroca. <sup>11</sup>Cotanquitsiquea atsaroventajiacarigueti Amajirote yamenajiacajiquea ariquate aquejetavacaajicaquea: teequeate inchoocatashtajempa intati shirampari, ariquate oquejetacaqueate manquigarentsi teequeate onchoocatashitempa intati. <sup>12</sup>Iroorijite iroqueragueti ipeacaacarogueti Aapani Irioshi manquigarentsi iroguentiquea ipeacaantacaro imerequi shirampari, ariquate iquejejiacaquea shiramparijia iroguentiquea oajiaqueri manquigarentsijia, cotanquitsiqueate iriguenti anijacaajiaqueriqueate Aapani Irioshi peacaaguetacaroca maasano. <sup>13</sup>Iintsijate pamenajigueroqueate aviatimpajia: ¿Ari cameetsataque amaneri Aapani Irioshi manquigarentsi aatogueti otatainata? <sup>14</sup>Aatimpajia teequeate amejiguemparoji irontijavenajauempaquea shirampari, impashivenatacaquemparoquea. <sup>15</sup>Cotanquitsiqueate oraqueate manquigarentsi irooqua iroguenti cameetsataque quea ontijavenajauempaqueate. Irootarite oshineeventacaqueate irootimpia, aisa iroguentitarite ochoocatashitaque omae onticaacotaqueroqueate aatonijite ejeguinatisi. <sup>16</sup>Cotanquitsiqueate choocaguetai cantanquitsineca teequea ariqua onquejetempajimaica,

nonintaque intsataque naatimpajiaquea irooqua namejigaquea noquejejiga imaica. Arikea iquejejiacaquea aisa maasano tsaroventajigarica Aapani Irioshi querocagueti icapiocapinijiaca.

**Paavoro icantomajajiaqueri  
Corintoquitica**

<sup>17</sup>Cotanquitsiqueate orauea noncantajiaquempigueti imaica aatoqueate noshineventajiguimpitsi manaqueate noncantomajajiaquempiquea, irosatirite picapiocajagueta tee oncameetsateji pantajiaqueca, teequea pintampishitava-caajiguempa pinquemisantamajajiana-quinji. <sup>18</sup>Noquemacojiaquempitarite irosati picapiocajiacagueta teequeate pinconoavacaamajajiguempaji. Naatimpa nocantanaque arimajacampate. <sup>19</sup>Aritarite oquejetantanacaca imaica pitsinampirejavacaantajianacaca irootari yamenantajitacaca queriquea caavijica yanaaque itsaroventamajatari Amajirote. <sup>20</sup>Irootaquequeate picapiocajavetacaqueate pishecaventajiacarigueta Amajirote piquenquejajiaquerigueta imetojaventajiacajigueta, teequeate arikea pinquejetacaajiguemparo itsatac妖aiacajica iriatimpa, quejevaecaqueate teeca iriguenti pinquenquejajigue. <sup>21</sup>Teetari poguijava-caajiguempaji pintsipatavacajia-quempa pishec妖iaquempagueti. Manaqueate pishecatapitsatavacaajiaqueate pamajavetacaca. Iconoagaranta-jiacaqueate tee inquemajiguempaji, itsipaqueate mana iquenajiaquero intati imirajiaca iroosati ishinkuitantajianaca. <sup>22</sup>Atoquea piquejiguiro imaica.

Pamenajiavecaquea piquejejiaquerogueti imaica arimequeate pishecajiaquempame pitsovironaquitepaequi. Oraqueate piquejejiaquerogueti imaica mana panaimanajiaqueriquea papigue-misantarijate, aisa mana poguipashi-ventajiaqueriquea coguitejacojianquitsica. Imaica ¿quieroquete noncojia-quempi? ¿Arimpa noshineventajiaquempiqueate? Aatoquea noshineventajiguimpitsi piquejejiaquetuimaica.

**Quero ancojiaqueroni  
ashecaventajiaquemparigueta Amajirote  
anquenquejajiaquerigueta  
imetojaventajiacajigueta**

<sup>23</sup>Notsatac妖aiavequempitarite coramani itsatacaaquenaca Amajirote, nocanti: Iroompaa opitsecanaquegueti iraacaantantajiquemparica Amajirote Jesoshi irimetojantajitaquemparica, yaaqueroquete pan yajiricquero, <sup>24</sup>icantiquea: "Arioteesa, Aapani." Arikeate icotarejaquero, icanti: "Paaajiavaqueja pishecajiaquemparo. Iroguenti notsino,<sup>f</sup> metojaventajiaquempineca. Pinquejepinijiaquempa imaica pishecaventajiaquena pinquenquejajajenaqueate naatimpa." <sup>25</sup>Arikeate iteroncanaquegueti ishecajiacagueta, iquejetaqueroquea chovintyoriqui, yaacotaquero, icanti: "Ocatica choocatanquitsica chovintyoriqui qui ocantacoquero iroqueraro paaquito<sup>g</sup> nonetsantaqueca osotoajatanaquegueti noriraja. Pinquejepinijiaquempa imaica pimirapiniquiaquerogueti, pinquenquejajajenaqueate naatimpa." <sup>26</sup>Aritarite pishecatapinijiaquemparogueti ocatica pan,

**f 11.24 Iroguenti notsino.** Pamenero Mt. 26.26-28. **g 11.25 Orauea paaquito iroguenti** icantamajajitirica itsipa irinetansanamajajitenerica. Ocaticaquea *iroqueraro paaquito* icantajiacajiquea Aapani Irioshi irishetacotajeri igovaeguishere maasano aventaventaqueempineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

pimirajiaquerogueti choocatanquitsica chovintyoriquipi, ariquea irooquea pintsavetacotantemparoca imetojane Amajirote arejevaetempa incoraquetanta tapojajempaca.

<sup>27</sup>Irootaqueate imaica nocantantajiaquempica quericaca shecatashitaquemparoneca intati, irooca irimirashitaquemparogueti intati aatogueti iriguenti iquenquejitsi Amajirote imetojaventajiacajigueti, inchiquojitsataquea inquejetacaanquempa iriatimpa, icovaeguishequerotarite itsino jero aisa iriraja Amajirote. <sup>28</sup>Irootaqueate quericaca nintanquitsineca irishecquemparo pan aisa irimiraquero vinoja inquenquejajerigueti Amajirote imetojaventajiacajigueti iroquetiquea inquenquejamajaquequeate, iroompaqueate arigueti icomajamajaca cameetsataqueate irishecaquemparo aisa irimiraquero. <sup>29</sup>Quericacatari shecatashitaquemparoneca intati, aisa irimirashitaquemparogueti intati, aatogueti iquenquejirotsi iroguenti ocantacotaque itsino Amajirote, inchiquojita inquejetacaantauquempa iriatimpa irishecataquemparogueti aisa irimiraquemparogueti, incatsimatimentajiqueruea. <sup>30</sup>Irootaqueate pojoquijigarantantajianacaca, itsipaquea teequeate intampishijigueji, itsipaquea mana imetojajaque. <sup>31</sup>Oraqueate iroquetitaquea amenashirentamajajiaquempaqueate acomajajiacaca ariquea querocampa incatsimatimentantajiacajica Aapani Irioshi. <sup>32</sup>Cotanquitsiqueate oraquea iramenajiacajigueti Aapani Irioshi antajiaquerogueti teeca oncameetsateji, incantomajajiacajiqueate aatonijite itsipatacaantajajiritsi teeca intsaroven-tajiguempariji incatsimatimentajiquerogueti coajica.

<sup>33</sup>Irootaqueate imaica, napiguemisantarijiate, nocantantajiaquempica

oraqueate pincapiocajiaquempagueti pishecaventajiaquemparigueti pinquenquejajajerigueti Amajirote imetojaven-tajiacajigueti poguijavacaajiaquempa pintsipatavacajiaquempa. <sup>34</sup>Quericaqueate taseanquitsica irishecatanaquempa itsovironaquitequi aatonijite icatimatiro ontaniqui picapiocajiacajigueti, aatonijite icatsimatimentiri Aapani Irioshi. Oraqueate otsipapae picoacojiaquenaca noncamantajiaquempiquea coajica noanaquegueti nonejajiaquitempigueti.

Quero icota Ishire Aapani Irioshi  
yagavejacaajiacajigueti

**12** <sup>1</sup>Imaica napiguemisantarijiate, noninque noncamantajiaquempi quero icota Ishire Aapani Irioshi yagavejacaajiacajigueti apaniropae. Noninque pintsamajajiaquero aatoniji picomijigaro. <sup>2</sup>Aviatimpajia pitsajaque-tarite tequeratagueti pintsaroventajiguempariji Quirishito manaquea yamatavijajiaquempiqueate ampatsini pishineventantajiacarica irioshivijitashijuguetaca intati teeca inquenquetsajigueji. <sup>3</sup>Irootaqueate nonintantacaca pintsajaque teequeate iriguenti quenquejacaguerine Ishire Aapani Irioshi quericaca cantanquitsineca: “Tee incameetsateji Jesoshi.” Aisaquea aatoqueate querica cantanquitsineca inchiquojiqueate: “Jesoshi iriguenti Majirontamajatatsica”, aatogueti iriguenti quenquejacaguiri Ishire Aapani Irioshi.

<sup>4</sup>Icantashitatiajaiavecajiqueate yagavejacaajiacajigueti apaniropae, cotanquitsiqueate iriguenti agaveja-cajajaci Ishire Aapani Irioshi. <sup>5</sup>Aisa acantashitatiajaiavecaqueate antajia-queca apaniropae, cotanquitsiqueate apaniroqueate antajiaqueneri Amajirote. <sup>6</sup>Teequea anquejetacaama-

jajiavetemparoji querocagueti icojiguiro itsipa yantajiguigueti, cotanquitsiqueate iriguentiquea agavejacaajiacaji Aapani Irioshi apaniropae.<sup>7</sup> Yagavejacaajiacajitarite Ishire Aapani Irioshi apaniropae cameetsanijite amitavacaimentajia- quempanijite arimpanijite anquemi- santamajajianaqueri Amajirote.

<sup>8</sup> Apaniroquea yagavejacaajueri- queate Ishire intsavetanquero itsatacaajuerica. Itsipaqueate iroguenti yagavejacaajueri intsatava- quero itsavetantajiquerogueti Icanqueca Aapani Irioshi ariqueate intsatacaantanaquequea iriatimpa.

<sup>9</sup> Itsipaqueate iroguenti yagavejacaajueri intsamajaque caaviji yagaveja- majati Aapani Irioshi yaventashirentamajatantarcarica. Ariqueate itsipa iroguenti yagavejacaajueri irogueshi- jiaqueri joquijiguetatsica.<sup>10</sup> Iconoagar- rantajiacaca itsipa iroguenti yagaveja- caajiaqueri ironigaantajiaquero oacaantantatsica intati. Itsipaquea iroguenti yagavejacaajiaqueri intsavetanquero icanagerica Aapani Irioshi. Itsipaquea iroguenti yagavejacaajueri intsatavaqueri quenquetsatatsica iriguentica agavejacaajueri Ishire Aapani Irioshi iriguentica agavejacaajueri ampatsinipae. Choaqueate itsipa iroguenti yagavejacaajueri inquenquetsatantaguetaquemparo otsipapae quenquetsatsarentsipae teeca inquenquetsatantajitemparoji, ariqueate itsipa yagavejacaajueri- queate intsaque impitsocavaquero cameetsaniji intsatimentajiaqueron- jite maasano queroqueate icanti.

<sup>11</sup> Pamenequeate imaica yagavejacaajia- javetacajiqueate taaca opajitapae cotanquitsiqueate iriguentiqueate Ishire Aapani Irioshi agavejacaajia- jiquea, apanirotarite icota. Yagaveja-

caajiacajiqueate apaniropae antajiaque taaca ininqueca iriatimpa antajiaque.

<sup>12</sup> Apaniroqueate ochoocavetaca itsino caquinte, cotanquitsiqueate choocague- quequeate iraco, iguiti, iguempita, maasano. Arikeate aquejejiaqueate maasano aatimpajia tsaroventajigarica Quirishito oshequiajiajavecaqueate aisa acantashitatijaiavetaca, cotanquitsi- queate apaniroquea ichoocataque atsaroven tajiacaca quejetaca apaniro- quea achoocajiaque.<sup>13</sup> Arikeate oquejetaca aisa apanirotarite icotaca Ishire Aapani Irioshi viñacajatacaajia- jica, ariqueate atsipatavacaajiaqueate quejeca apaniroca achoocajiaque. Aconoagarantajiajavecaqueate aroguen- tija joriojia aisa guiriegojia. Arikeate oquejetaca aisa aconoagarantajiajaveca- queate manaquea yaajanijitacaji, aisa aconoagarantajiajavecaqueate manaquea achoocajiaque intati, cotanquitsiqueate ichoocashirentajiacajigueti Ishire Aapani Irioshi aquejetavacaajia- queate.

<sup>14</sup> Oraquea itsino caquinte teequea manaquea onchoocatashitempaji yamenantaca intati. Choaqueate aisa yajircantaca, jero aisa yanijitantaca, jeroqueate aisa iquemantaca, maasano.<sup>15</sup> Oraqueate onquenquetsataquemegueti iguiti oncanquemegueti: “Iroorijite imaica tee nonquejetemparoji iraco, teequea irashintenaji”, aatoqueate yovashiantajiro, igantagaqueate irashin- temparo.<sup>16</sup> Iroomegueti quenquetsatan- quitsinemegueti: “Iroorijite tee nonquejetemparoji iroquija, teequea irashintenaji”, aatoquea yovashiantajiro, igantagaquea irashintemparo.<sup>17</sup> Iroomegueti choocat- tanquitsine intati iroquija, étaaquea inquemantaquempame? Arikea oquejetaca aisa iroomegueti choocatan-

quitsine intati iguempita, ¿taaquea inquemajencatantaquempame? <sup>18</sup>Cotanquitsiquea Aapani Irioshi inetsanataquero atsino ipeacaacarogueti, irootaqueate ochoocatantaguetacaca aquemantajiacaca, aisaquea amenantajiacaca, jeroqueate aisa anijitantajiacaca, maasano. Aisa ichoocatacaaguetacajiroqueate querocagueti ininqueca inchoocatacaacajiro. <sup>19</sup>Oraqueate iroomegueti choocatanquitsine intati amenantaca ¿querocampate onchoocaguensi atsino? <sup>20</sup>Cotanquitsiquea teequea ari onquejetempaji imaica, manaquea ochoocaguetaqueate aisa aguiti, aguempita, aco, maasano. Oquejeguevetacaqueate imaica ochoocaguetaqueate maasano, cotanquitsiquea apaniroqueate ochoocaque atsino.

<sup>21</sup>Oraqueate aquija aatoqueate ocantimajiguirotsi aco: “Teequeate nonintempiji.” Arikea oquejetacaquea aguito iroatimpa aatoquea ocantimatiro aguiti: “Teequeate nonintempiji.”

<sup>22</sup>Choocatarite atsinoqui taaca opajitapae teeca ontampishiteji, cotanquitsiqueate anintamajajiaquerouqueate, teequea onchoocatashitempaji intati. <sup>23</sup>Arikea oquejetaca aisa teeca anintajigueji iramenajiguerero, caavijiqueate acomajamajajiaquerouquea irootaqueate aquitsaatantajiacaca aatonijite yamenajiguetirotsi, apashiventacajaiacarotarite. <sup>24-25</sup>Cotanquitsiquea oraquea teeca ampashiventacajaiguemparojo teequea anquejejigue-roji imaica. Arikeate iquejetacaajaciiqueate Aapani Irioshi aatimpajia tsaroventajigarica, itsipatacaantajiacaji cameetsanijite ancavintsajajiaqueriniji caarica inintajiveta aatonijite acatsimatavacaajiatsi antsinampirejavacajia-quempaqueate, manaquea anquenquejavacajiaquempaquea ancavintsajavacajiaquempa intati. <sup>26</sup>Arigueti yatsipetaca-

gueti apaniro, maasanoqueate atsipejiaca. Oraqueate managueti ishineventajitarigueti itsipa, ariqueate aquejejiacaquea aatimpajia maasano atsipajiacariqueate ashinejiacaquea.

<sup>27</sup>Irootaqueate aviatimpajia imaica pitsaroventajiacarigueti Quirishito piconoavacaajiacaqueate quejecaquea apaniroca pichoocataque, piquejejiacarotarite itsino Quirishito.

<sup>28</sup>Avegarajiacaquea oshequi tsaroventajigarica Quirishito cotanquitsiqueate Aapani Irioshi inintacajaiacajiqueate apaniropae antajiaqueneri. Iriquetiquea yoguijivajiaquequeate itigarancaneja Quirishito intsavetantajiaqueriqueate. Itsipajia inintacajaiaque tsavetantajiaqueroca icantajiaquerica. Arikeate iquejejiaqueriquea aisa tsatacantajiaqueroca Iguenquetsatsare Aapani Irioshi. Arikeate iconoagarantajiacaqueate itsipa inintacajaiqueri ironigaantajiaquerero oacaantantatsica intati. Itsipaqueate manaqueate inintacajaiqueriqueate irogueshijiaqueri joquijiguetatsica, itsipaquea manaquea incavintsajantajiaque, itsipaquea manaquea incantajiaqueriqueate irapiguemisantarite taacaqueate irantajiaque, arikeate itsipa manaquea inquenquetsatantajiaquemparoqueate otsipapae quenquetsatsarentsipa teeca inquenquetsatantajitempaji. <sup>29</sup>¿Arimpa maasano iriguentijia itigarancaneja Quirishito? ¿Arimpa maasano iriguentijia tsatacantajiguiroca Iguenquetsatsare Aapani Irioshi? Arikea oquejetacaquea aisa ¿arimpa maasano yagavejajiaque ironigaantajiaquerero oacaantantsica intati? <sup>30</sup>¿Arimpa maasano yagavejajiaquequeate irogueshijiaqueri joquijiguetatsica? ¿Arimpa maasano iquenquetsatantajiacaro otsipapae quenquetsatsarentsipa teeca inquenquetsatantajitempaji? Arikea oquejeta-

caquea aisa ćarimpa maasano yagaveja-  
jiaquequeate impitsocajavaquero  
cameetsaniji intsatimentajiaqueronijite  
maasano queroca icanti quenquetsatan-  
taroca? Teequeate.<sup>31</sup> Cotanquitsiquea  
pinintamajajiaquequeate iragavejacaaji-  
aquempi Aapani Irioshi pantajiaqueneri  
caavijica anaantaque ontampishitacajai-  
aqueriniji papiguemisantarite. Cotanqui-  
tsiquea choaqueate otsipa noninque  
nontsatacajajiaquempi imaica,  
caavijiqueate oganejencamajataca.

**Quero icotani pintsatantatsica**

**13** <sup>1</sup>Arigueti nonquenquetsatanta-  
guevetaquemparoqueate  
otsipapae quenquetsatsarentsipae irooca  
iguquetsatsare irashivantijite  
Aapani Irioshi, cotanquitsiqueate  
aatogueti nopintsamajatanta,  
manaqueate noquenquetsatamampeaca-  
quea intati, quejacaqueate cavorejam-  
tatatsica iteencajitirogueti opojimatana-  
quequea teen teen teen, teequea  
queroca oncantajei.<sup>2</sup> Aisa manaca  
nagavejavetaquempagueti nontsavetan-  
tavequemparo icanquenaca Aapani  
Irioshi, cotanquitsiqueate aatogueti  
nopintsamajatanta, teequea noncamee-  
tsatimateji. Arikeate oquejetaca aisa  
arigueti nontsaguevequemparo taaca  
opajitapae teeca intsaivetemparoji,  
managueti nontsitacaguevequemparo  
nontsaguevequemparoqueate maasano,  
cotanquitsiqueate aatogueti nopintsama-  
jatanta, nontsatashiquemparoquea  
intati. Aisa managueti nontsavetaquem-  
paroqueate yagavejaque Aapani Irioshi  
iragavejacaquena nogaaquero otsempy,  
cotanquitsiqueate aatogueti nopintsama-  
jatanta, manaquea nontsatashiquemparo-  
queate intati, teequea noncameetsati-  
mateji.<sup>3</sup> Arikeate oquejetaca aisa  
arigueti nojocashijiavetaquenempari  
coacojianquitsica maasano nashintague-

vetaca, aisa arigueti incatsimatimentaji-  
quena nontsaroventauquemparigueti  
Aapani Irioshi intamentantajiquenaca,  
cotanquitsiqueate aatogueti nopintsama-  
jatanta, ćarimpa irishineventaquena-  
quea Aapani Irioshi?

<sup>4</sup>Iriraquea pintsatantamajatatsica  
yatsiperejacoca intati, aisa caavijiquea  
icavintsa janti. Teequea incatsimatimen-  
teriji itsipa yamenauerigueti  
yanaaqueri, teequea irisemeteji, aisa  
teequea iraventacotimatempaj.

<sup>5</sup>Iriraquea pintsatantamajatatsica  
ichoocaque cameetsa, manaquea  
yamenauerogueti guipashiventajague-  
tirica itsipa aatoquea iquejetiro imaica.  
Teequeate apaniro inquenquejacotem-  
paj iriatimpa. Teequeate incatsimateji,  
aisa teequea incoguitempani inquenque-  
jaguiteroni querocagueti icoquerini  
itsipa, manaqueate ipeacotajaro intati.

<sup>6</sup>Iriraquea pintsatantamajatatsica  
yamenauerogueti yantajitaqueroqueate  
teeca oncameetsateji, teequeate  
oshinetacaguempariji, manaquea  
oshimampojancacaanacari intati.  
Cotanquitsiqueate iroguentigueti  
yantajitaque cameetsaguetatsica irosati  
iquenquetsajitaqueroqueta arimajata-  
tsica, arikea irishinevaetanaquempa.

<sup>7</sup>Querocagueti incovetaquempariquea  
igonoro irantsiperejacotemparo,  
manaqueate incoguitempani impintsama-  
jatanaquempari. Arigueti inquemaco-  
taqueri inijashinajitacari aato yaquiro  
iriatimpa, manaqueate incantanaque  
intati: “Jmm arica tee inquejetempaj  
iriatimpa.” Arigueti iramenavetaquem-  
paro yantaguishetaque teeca oncamee-  
tsateji manaquea inquenquejanaque  
intati: “Arica impishoncajero coajica.”  
Arigueti irantsipetacajaitempari  
icancaniquea impintsatantanaquempa.

<sup>8</sup>Aatoquea opega pintsamajatagantsi.  
Intsavetantajivetemparogueti icanque-

rica Aapani Irioshi, ari ovegarapojempa; inquenquetsatantajivetemparogueti quenquetsatsarentsipae teeca inquen- quetsatantajitemparoji, majere incanta- najempa; intsa jiguevetempaca, mana oshetajempa intati.<sup>9</sup> Imaica quea imaica teequea antsamajajigueji, aisa teequea antsamajajigueji antsavetantajigueroji Iguenquetsatsare Aapani Irioshi.<sup>10</sup> Cotanquitsiquea oraquea coajica incantashitatiamajajiacajigueti Aapani Irioshi, aatoquea aquejejijaa imaica teemajaquea antsajigueji.<sup>11</sup> Oraqueate chaajaniquitirajanagueti noquejemajata- cariqueate maasano chaajaniquitica iquenquetsatigueti aisa iquenquejajigu- gueti. Cotanquitsiquea noquenquevar- tanaquegueti teequea nonquejetajempa- riji chaajaniquitirajaca.<sup>12</sup> Arikeate oquejetaca imaica teemajaquea antsamajajigueji quero icota Aapani Irioshi, quejeca quea manaca amenanta- jjacaroquea amenajarontsi teemajaca onconijateji, cotanquitsiqueate coajica- quea amenamajajiaqueriquea ariquea antsamajajiaque quero icota quejetaca yamenamajajiacajigueti aatimpajia, itsamajajiacajiquea.<sup>13</sup> Ancoguitempani- quea antsarotentamajajiaquempari Aapani Irioshi, ancoguitempani antsamajajiaquequea irinetsanamajajia- quero maasano icantaquea, aisa ancoguitempaniquea ampintsamajatan- tajiaquempaquea, cotanquitsiquea caaviji ocameetsamajataque ampintsa- majatantajiaquempaquea.

#### Quero incojiaquempani

tsavetantajiguiroca icanquerica Aapani Irioshi aisa quero incojiaquempani quenquetsatantajigaroca quenquetsatsarentsipae teeca intsajiteji

**14** <sup>1</sup>Pintajiaquequeate pimpintsa- tantamajataquempa, aisa pinintaquequeate iragavejacaajiaquempi

Ishire Aapani Irioshi taaca inintaque iragavejacaajiaquempi, iroguentuea pinintamajajiaqueja pintsavetantajia- queroqueate incantajiaquempica Aapani Irioshi.<sup>2</sup> Iriraquea quenquetsatantaroca quenquetsatsarentsi teeca inquenquetsa- tantajitemparoji, iriguentequeate iquenquetsatacaa quequea Aapani Irioshi. Teequea iriguenti inquenquetsatacaa quequea igonorojia, teenicate inquemajigeriji. Iriguenti agavejaca- queri Ishire Aapani Irioshi iquenquetsa- tantacaroca, cotanquitsiquea iriguenti iquenquetsatacotaque teeca intsajiteroji.<sup>3</sup> Cotanquitsiquea iriraquea tsavetanta- queroca icanquerica Aapani Irioshi, iriguentequeate iquenquetsatacaa quequea irapiguemisantarijiate itampishitacajai- queriqueate arimpaniji inquemisanta- majajiana quequea manaquea aisa irishinetacajaiquempariquea.

<sup>4</sup> Iriraquea quenquetsatantaroca quenquetsatsarentsi teeca intsajiteroji, irisati quea tampishitacajatsi inquemi- santamajatanaquequeate. Cotanquitsi- quea iriraquea tsavetanta queroca icanquerica Aapani Irioshi, iriguente- quea itampishitacajai quequea maasano irapiguemisantarijiate ni arimpaniji inquemisantamajajiana quequea.

<sup>5</sup> Nonintaveca queate iragavejacaajia- quempi Ishire Aapani Irioshi maasano aviatimpajia pinquenquetsatantajia- quemparoqueate quenquetsatsaren- tsipae teeca inquenquetsatantajitempa- roji, cotanquitsiquea caavijiquea nonintamajataquequea iragavejacaajia- quempiqueate pintsavetantajiaquero icanquempica Aapani Irioshi, caavijitari oganejencavaetaca pintsavetanquegueti anaquiero quea pinquenquetsatanta- quemparo queeti quenquetsatsarentsi teeca intsajiteroji aatogueti ichoocati pitsocavaqueroneca pincantajiaquero- queeti cameetsaniji pintampishitacaimen-

tajiaqueriniji papiguemisantarijateni incoguitempaniquea inquemisantamajajianaque.

<sup>6</sup>Imaicaquea, napiguemisantarijiate, arigueti noanaque namenajaqueempigliueti iroogueti nonquenquetsatsantaquemparoqueate quenquetsatsarentsipae teeca intsajiteroji ɿarimpate irooqueate nontampishitacaantajiaquempi? Cotanquitsiquea oraquea managueti nonquenquetsatacaantajiaquempiroquea piguenquetsatsare nontsatacayaquempi yonigaaquenaca Aapani Irioshi irooca itsatacaaquenaca, iroogueti noncamantajaqueempigliueti icanquenaca Aapani Irioshi nontsatacayaquempigueti, ariqueate irooqua nontampishitacaantajiaquempiquea.

<sup>7</sup>Nonquejetacaaquempiroqueate soncar: teequea anijavetempaj i cotanquitsiquea pojimavaetaquequea. Oraquea isoncaji-tirogueti, aatogueti inetsanajitrotsi, aatoqueate itsajitavaquero querocaca ocantini. Arikeate oquejetacaquea itencatsajitica iroatimpa itencatsajitirogueti. <sup>8</sup>Arikeate oquejetacaqueate aisa yoajiguigueti yashimirintajigagueti, aatogueti inetsanajitrotsi itivojitigueti tivorentsi, aatoquea itsajitavaquero taaquea itivotantajitacaroca, aatoquea quericaca netsanatatsi iroanaque irashimirintaquempa. <sup>9</sup>Arikeate piquejejiaqueate aisa aviatimpajia pinquenquetsatantajiguemparogueti quenquetsatsarentsipae teeca intsajiteroji ɿqueroquea incojitaquempani inquemantajitavaquempsa pincantavequemparogueti? Quejetacaquea mana piquenquetsatashitaca intati. <sup>10</sup>Choocavequea oshequini quenquetsatsarentsipae cantashitatiaguetanquitsica, cotanquitsiquea maasano aquemajiguiro aguenquetsatsare. <sup>11</sup>Cotanquitsiquea arigueti inquenquetsatacaaquenaqueate itsipa teeca nontsateroji iguenquetsa-

tsare intsaquequea teequea naroguenti igonoro. Arikea nonquejetaquemparoqueate naatimpa nontsataquequea teequea irio nogonoro. <sup>12</sup>Irootaquequea noncantantajaqueempica imaica notsataquequea pincintajaquequeate iragaveja-caajaquempigliueti Ishire Aapani Irioshi taaca opajitapae, ariqueate imaica iroomajaquea pincintamajajaqueja oraqueate tampishitacajajiquerineca papiguemisantarijiate incoguitempaniniji inquemantamajajianaqueri Amajirote.

<sup>13</sup>Quericaquea quenquetsatantaquemparoneca quenquetsatsarentsi teeca intsajiteroji iramaniqueriqueate Aapani Irioshi iragavejacaqueri imptsocavaqueroquea icanquerica. <sup>14</sup>Pamenenaja naatimpa arigueti nonquenquetsatacaaqueri Aapani Irioshi quenquetsatsarentsiqui teeca intsajiteroji manaqueate nonquenquetsatacaaqueri noshirequi, cotanquitsiquea aatoquea notsati quero nocanti. <sup>15</sup>Iroosacanica ɿqueroquea noncoquempaquea? Nonquenquetsatacaaqueriqueate Aapani Irioshi noshirequi, cotanquitsiquea nontsatavaproqueate aisa nocanquerica. Namashaiventiqueriquea noshirequi, cotanquitsiquea aisa nontsatavaproqueate namashaisquegueti. <sup>16</sup>Pamenejate aviatimpa arigueti pishineventaquempari Aapani Irioshi cotanquitsiquea iroogueti pinquenquetsatantaquempa quenquetsatsarentsi teeca intsajiteroji, arikea ɿquero incoquempani intsatan-tavaquemparoca papiguemisantarite teeca intsateroji quenquetsatsarentsi piquenquetsatantacaca cameetsanjite intsipataquempinjite irishinevenquempariquea iriatimpa aisa? <sup>17</sup>Pinquejetiquerogueti imaica oncameetsaguevetaproquea pincanquerica Aapani Irioshi, cotanquitsiquea aatogueti iquemajiguimpi papiguemisantarite aatoquea otampishitacajajiguiri.

<sup>18</sup>Naatimpaquea noshineventacariequa Aapani Irioshi namenaquegueti yagavejacaquenaquea Ishire noquenquetsatantacaroca quenquetsatsarentsipae teeca intsajiteroji. Noquenquetsatantacaroca naatimpa oshequi. Piquenquetsatantacarogueti aviatimpajia maasano teequea omoncaratemparoji. <sup>19</sup>Cotanquitsiqueate nontsipajiaquemparigueti napiguemisantarijiate noncapiocajiaquempagueti, namenaquequea caavijiquea anaaque ocameetsataque nonquenquetsataquequeate capichaji notsataqueca naatimpa cameetsanjite nontsatacajaiqueri, anaqueroqueate noncantacoguitempanigueti nonquenquetsaguitenigueti oshequini quenquetsatsarentsiqui teeca intsajiteji, aatotari iquemajitavaquena.

<sup>20</sup>Imaica, napiguemisantarijiate, noncantajiaquempiquea aato piquenquejajigui quejejiajaca iquenquejajiguica chaajaniquitirajaca, manaqueate pinquejejiaquempariquea maasano quenquevarrijia tsajiasica iquenquejamati. Aparoqua pinquejejiaquempariquea iriaqueraca voanquitsi, teequeate inquenquejero quero incojiaquempani irantajiaquero teeca oncameetsateji.

<sup>21</sup>Ocantiqueua Itioncacaantaqueca Aapani Irioshi:

“Icanti Amajirote: ‘Nontigarancajiaqueneri itsipapaetica quenquetsatantajigaroca otsipapae quenquetsatsarentsi, inquenquetsatacajiajapojaqueri iricaticajia incamantajavetaquempariquea nocanqueca, cotanquitsiquea igantaga aato iquemisantajigana.’”

<sup>22</sup>Irootaqueuea atsatantajiacaca yagavejacaajiacaji Ishire Aapani Irioshi anquenquetsatantajiaquemparo otsipapae quenquetsatsarentsi teeca intsajiteji cameetsanjite intsajianaque-

niji teeca inquemisantajigueji incatsimajiaqueriquea Aapani Irioshi. Cotanquitsiquea anquenquetsatantajiaquemparogueti aguenquetsatsare yagavejacaajiajigueti antsavetantajiaquero icantajiajajica Aapani Irioshi, iroguentiquea tampishitacajajiaquerine quemisantajiasica, ariquea irijamajatanaque intsaroventamajatanaquempari. <sup>23</sup>Oraquea pincapiocajiaquempagueti iroguentigueti maasano pinquenquetsatantajiaquempa quenquetsatsarentsipae teeca intsajiteroji, ariguettea inquijapoaque itsipa teeca intsaroventempariji Quirishito iriguentica tequeratatirajaca intsateji quero picojiaca piquejejiaquetai imaica, ¿arimpate aato icomiji-guimpi ijiquequeate ariji pishoncacojacaeua? <sup>24</sup>Cotanquitsiquea irooca pinquenquetsatantaquemparo piguenquetsatsare pintsavetantajiaquerogueti icanquempica Aapani Irioshi, ariguette inquijapoaque itsipa teeca intsaroventempariji iriguentica tequeratatirajaca intsateji, inquemajiaquempigueti ariqueate iramaquempa iriguentiquea quempevaetatsica inquenquejanaqueroquea yantavetacaca. <sup>25</sup>Intsapojaqueuea covaeguishetaca iquenquejaguetaqueca itsivitetacaca, ariquea irogueroventanaquempariquea Aapani Irioshi intsaroventauquempariquea, incantaque: “Arimajasacanicate itsipajiaquempi Aapani Irioshi.”

<sup>26</sup>Irootaqueuea imaica, napiguemisantarijiate, noncantantajiaquempica oraquea pincapiocajiguempagueti iroguentiquea pincapiocaventajiaquempa pintampishitavacaajiaquempaquea. Pinconoagarantajiaquempa pincantajiaqueriqueate maasano: “Iintsija amashaiventajigueri Aapani Irioshi.” Arikea itsipa manaqueate intsatacaantaque. Itsipaquea manaqueate intsavetanqueroqueate icanquerica Aapani Irioshi. Itsipa manaqueate inquenquetsa-

tantaquemparoqueate quenquetsatsarentsi teeca intsajiteroji, ariquea itsipa impitsocavaquero icantaqueca.<sup>27</sup> Oraquea pinquenquetsatantajiguemparogueti quenquetsatsarentsipa teeca intsajigueteroji ariquea inquenquetsate mavite arica mavitepae, cotanquitsiquea apanirota quenquetsatavauquitsine, aisa inchoocataquequea apaniro pitsocavaqueroneca.<sup>28</sup> Oraquea aatogueti ichooocati pitsocavaqueroneca ariquea aatoquea piquenquetsatantarao picapiocajiacagueti, manaquea pamenajiaque pinchoocaquegueti apaniro, ariquea cameetsavaequequea pinquenquetsatantajiaquemparoqueate inquemajiaquempiquea Aapani Irioshi.<sup>29</sup> Arikea oquejetaca aisa iroguentigueti pintsavetantajiaquequeate icantajiaquempica Aapani Irioshi, ariquea inquenquetsate mavite arica mavitepae, ariquea itsipajia capiocajianquitsica incantajiaquequea irguentica agavejacaqueri Ishire Aapani Irioshi aricampa teeca.<sup>30</sup> Cotanquitsiqueate choocagueti itsipa savicanquitsica iquenquetsashirentacaqueriqueate Aapani Irioshi irioquea tsavetantaquerone imaica, iriraqueate iriquetica quenquetsatanquitsica interoncanajeroqueate cameetsanijite irioquea quenquetsatapojaatsine.<sup>31</sup> Arikeate pinquejejiaquempaquea imaica apaniropae quenquetsatanquitsine arinijite pagavejimentajiaqueronijite maasano pintsavetantajiaquero icanquempica Aapani Irioshi cameetsanijite pintsatacimentajiaquerinijite maasano papiguemisantarijate, aisa pintampishitacimentajiaquerinijite.<sup>32</sup> Iriraquea yagavejacaajiaqueca Ishire Aapani Irioshi intsavetantajiaquero icanquerica Aapani Irioshi irinetsanajiaqueroquea intsavetantajiaquerogueti, aatoquea ininti apaniro inquenquetsaquequea iriatimpa.<sup>33</sup> Teetari irininteji Aapani Irioshi ancantavacaajiaquempa manaqueate ininque anetsanajiaqueroqueate maasano. Arikea iquejejiaca

igomajamajareja Quirishito querocagueti icapiocapinijiaca.

<sup>34</sup> Oraquea pincapiocapinijiacaquemparogueti majereniquea oncanquempa manquigarentsijia, teenica irishinejiteroji onquenquetsategueti iroatimpajia. Aritarite ocanquequea itioncanaqueca Moishishini onquemisantajiaquequea.<sup>35</sup> Oraquea onintajiaquegueti ontsajiaque taaca opajita, oncoacotaqueriqueate manquigataroqua otsovironaquitequi. Teequea oncameetsateji onquenquetsajiaquegueti manquigarentsijia icapiocapinitagueti maasano.<sup>36</sup> ¿Arimpate oponeaca Iguenquetssare Aapani Irioshi aviatimpaqui? ¿Iroocampa apaniro aviatimpaqui arejetapojaca?<sup>37</sup> Quericaquea amenanquitsineca yagavejacaqueri Ishire Aapani Irioshi intsavetanquero icanquerica Aapani Irioshi, iroguentigueti yamenaque yagavejacaqueri taaca opajitapae otsipa, intsaquequeate irguentiquea cantaquena Amajirote noquejetancaroca imaica notioncajiaquempigueti.<sup>38</sup> Aatogueti iquemisantiro oca, aatoquea piquemisantiri iriatimpa.

<sup>39</sup> Irootaquequea imaica, napiguemisantarijate, noncantantajiaquempica pinintamajajiaqueja iragavejacaajiaquempi Ishire Aapani Irioshi pintsavetantajiaquero icanquempica, aisa aatoqueate picantimentajiguiritsiqueate itsipa inquenquetsatantajiguemparogueti quenquetsatsarentsipa teeca intsajiteroji.<sup>40</sup> Maasanoquea pantajiaqueca pinetsanatavaqueroquea cameetsa.

### Ipochatanajigueti Quirishito

**15**<sup>1</sup> Imaica, napiguemisantarijate, nonintaquequea nonunquejacaajiajempiroqueate Quenquetsatsarentsai Oganejencatatsica notsavetantajiaquempica, arikeate piquemisantajiaquero, irosati imaica picancaniquea piquemisantajianaque, pitsamajajiaque-

quea iroomajaca. <sup>2</sup>Irooqua meshiantaji-aquempica arigueti quisho poajiguer Quenquetsatsarentsi notsavetantimo-quempica, aisa teegueti pinquemisanta-mampeajiguempaji intati.

<sup>3</sup>Ariqueate iroquetiquea notsatacayaia-quempiqueate itsatacayaquenaca naatimpa, nocantajiaquempiquea imetojaventajiacijkeate Quirishito irishetajero aguempevaerejia, aritarite ocantsitaca Itioncacaantaqueca Aapani Irioshi. <sup>4</sup>Yoguijaajivetacariqueate omoroqui, ariquea aapojacagueti 3 savincaguiti ipochatanajiqueate, aritarite ocantsitaca aisa Itioncacaanta-queca Aapani Irioshi. <sup>5</sup>Arikeate yonigaacariquea Sepashi,<sup>h</sup> ariquea iquejetacaajiacariqueate aisa itsatacaanejia carajavetanquitsica 12. <sup>6</sup>Coajica-quea yonigaajiajariquea aisa oshequini apiguemisantarijiate icapiocajiacagueti. Icarajiavaetaquea yanaaquerorequea 500. Imaica choocatirajaqueate oshequi amenajiaquerica, cotanquitsiquea iconoacaquea imetojajiaque. <sup>7</sup>Yonigaa-cariqueate aisa Santiago<sup>i</sup> ariquea iquejetacaajiacari maasano itigaranca-nejia. <sup>8</sup>Coajicaquea yonigaaquenaquea naatimpa, manaquea noquejetacariquea chaajaniquitirajaca voashitatsica niganqui. <sup>9</sup>Caavijitarite yanaaquerena-quea iriquetica peajianquitsica itigarancane, teenicaquea nomoncaratempariji iriatimpajia. Aatomequea naroguentime itigarancane, caavijitari nocatsimajiev-tacari quemisantajigurica Quirishito natsipetacaajiacariquea. <sup>10</sup>Cotanquitsi-quea icavintsaquenaquea Aapani Irioshi iquejetacaquenaqueate itigarancane, ariquea nanajaiqueriquea

maasano itigarancane nantaqueneri-gueti, cotanquitsiquea teequea inchiqui-ojitsi nagavejashitempa naatimpa nantaqueneri, iriguentiqueate agaveja-caaquenaquea Aapani Irioshi cavintsaja-quenaca. <sup>11</sup>Cotanquitsiquea imaica aatoquea iroguenti noquenqueji queri caavijica yanaaque, naroguentica, iriguentica itsipapae itigarancanejia, maasanotarite notsavetantajiaqueri-queate Aapani Irioshi nocamantajia-quempiquea quero icota Aapani Irioshi imeshiantigueti, irootaquequea piquemisantantajiacaca.

### Intancoretancoreitanajegueti

<sup>12</sup>Itsavetantajiqueritarite Quirishito ipochatanajigueti imetojavetacagueti. ¿Queroqueate ocotaca piconoagarantajia-acaquea aviatimpajia picantajiaque aatoquea itancorejajiti? <sup>13</sup>Aatomegueti arimajatime itancorejajiti, aatome ipochatime Quirishito. <sup>14</sup>Aatomegueti ipochatime Quirishito, manamequea nonquenquetsavijitashitaquempame intati, arimequea pinquejejiaquempame aviatimpajia manamequea pinquemisan-tampeaquempame intati. <sup>15</sup>Aatome-gueti itancorejajitime, antsauqueme teequea irovochateriji Aapani Irioshi Quirishito. Arime onquejetaquempame imaica naatimpajia manameca namataa-ventashijiaquemparime Aapani Irioshi notsavetantajiaquerigueti nocantajia-quegueti yovochantajiriqueate Quirishito. <sup>16</sup>Picantajiaqueterite aatoquea itancorejajiti, iroosacanica aatomegueti arimajatime itancorejajiti, arime inquejetaquempame Quirishito iriatimpa aatome ipochatime. <sup>17</sup>Oraquea

**h 15.5 Sepashi.** Irootaque otsipa ivajiro Shimo Peerero. **i 15.7 Santiago.** Iguenquetsatsarequi guiriego ipajita *Iakobos*. Icoagarantaca quimajarerri yoguipitsocaquerogueti ivajiro ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*.

aatomegueti itancorejajime Quirishito maname pinquemisantashijiaquempame intati, aatome imeshiajiguimpime Aapani Irioshi choocatirajamequea piguempеваereja incatsimatantajia-quempimeca.<sup>18</sup>Arimequea onquejetaquempame, inquejetaquempamequea aisa metojajianquitsica tsaroventajacarica Quirishito iroajianaquemequea camorecariqui.<sup>19</sup>Oraquea aatomeguetiquea arimajatime antancorejajianaje coajica, iroosacanica maname antsaroventashijiaquemparime Quirishito intati, maname ancantashijiavetaquempame imaica intancorejajitanaje, cotanquitsiquea coajicaquea amenajia-quempame caavijiquea acota aatimpajia amatavijajiacaquea aatimpa, incantacojitacajime: "Oo caaviji yatsipetashitaca intati."

<sup>20</sup>Cotanquitsiquea teequea ariquea onquejetempajiqueate imaica, atsajiaqueterite arimaja ipochatanajiqueate Quirishito imetojavetacaguetti. Iriotarite pariacaroca ipochatanajiqueate iroqueraguetti, ijivajijaqueriquea maasano metojajianquitsica tancorejajianajatsineca oncoramanitapojaegueti.

<sup>21</sup>Aritarite oquejetacaquea iroqueraguetti apaniroquea pariacaro metojavetanquitsica ariquea imetojajitanaquequea imaica, ariquea oquejetacaquea aisa apaniroqueate jivatanquitsica ipochatanajiquea imetojavetacaguetti.

<sup>22</sup>Maasanoqueate ichoviquijianaqueca Araini ametojaquequea. Arikea oquejetacaquea aisa maasanoquea tsaroventajacarica Quirishito intancorejajianaje.<sup>23</sup>Cotanquitsiquea iriquetitari pochatanajatsi Quirishito. Arikea incoraquetajategueti intancorejajianajequate maasano tsaroventajacarica.

<sup>24</sup>Arikea oncaratapojaque maasano, iriraqueate Quirishito iragavejajiaqueriqueate maasano imajirojiate quepatsi-

quitica, jerijiaquea imajirojiate teeca inconjateji, jerijiaquea aisa agavejajatsica, apaniroquea iriatimpa irimajiron-tajiaquemparieate maasano choocajatsica acaniqui quepatsi qui jero aisa jenoqui inquitequi. Arikea incanqueriquea Aapani Irioshi: "Jero imaica, Aapani, apaniroquea aviatimpa pimajirontamajata."<sup>25</sup>Iriraquea Quirishito irimajirontaqueate irosati quea iragavejajiaqueriguetti Aapani Irioshi maasano catsimajiaquerica, impincatsajiaquerinijite Quirishito.<sup>26</sup>Coajicaquea aato imetojajitisi.<sup>27</sup>Aritari iriraquea Aapani Irioshi yagavejacaamajaqueriqueate Quirishito yanaamajatantacarocaqueate maasano. Cotanquitsiquea oraquea ocanqueguetitioncajitaquerogueti yanaamajataquero maasano, teequea arikea oncanteji yanaaqueri Aapani Irioshi aisa, iriguen-titarite agavejacaqueriquea.<sup>28</sup>Arikea iragavejajiaqueriguetti Aapani Irioshi maasano, irimajirontajiaquempariguetti Quirishito maasano, iriatimpaquea incanqueri Aapani Irioshi agavejaca-aquerica: "Imaica, Aapani, apaniroquea picoca aviatimpa pimajirontamajatacaqueate, aviguenti anaaquena." Arikea onquejetaquempaquea cameetsanijite apaniroquea irimajirontamajaquempanijite Aapani Irioshi, iranaajiaqueriquea maasano.

<sup>29</sup>Choocaquea aviatimpaqui irirajia cantajatsica aato itancorejajiti, cotanquitsiquea iconoagarantajiacqueate iviñacajatashitavajariquea metojaguetatsica. Iroomajataquemiguetti icantavetacaguetti aatoquea itancorejajiti, ¿queroquea ocotaca iviñacajatashitavajarica?<sup>30</sup>Arikea noquejejiacaquea naatimpajia oraquea aatomegueti itancorejajiti ¿arimpa nantsipeventapinijiaquero nantajiaqueriguetti Amajirote? Maname nantsipe-

tashitaquempame intati.<sup>31</sup> Nocantaguitanitarite natsipetacaqueate. Maasano savincaguiteriqui chooca nintavetanquitsica irimetojena, arimajaquea nocantamajataque. Arikea oquejetaca aisa arimajaqueate noshinemajaca namenajiaquempigueti pitsaroventajacarigueti Amajirote Jesoquirishito.<sup>32</sup> Yatsipeta-caajitaquenaquea Epesouqui icatsimajitaquenaquea, quejeca manaca ipishoncijataquena casecariqui irishecaquena. Oraqueate arimajame aatomegueti itancorejajiti maname nantsipetashitaquempame intati, cameetsame nonquejejiaquemparime cantajiatsica: “Jame ashecajiguempa aisa ashinquijiguempa, osaitequeratari ametoje.”

<sup>33</sup>Inchiquiojitata yamatavijajitimpitsi piquejigartsi. Icantamajajititari: “Pintsipajiaquemparigueti teeca incomajajuempají manaqueate pinquejetanaquempari iriatimpa.”<sup>34</sup> Lintsija pinquenquejamajataje, manaquea pincomajamajajiaquempaquea intati, aatoquea piquempevaejiaja. Piconoagarantajacitarite teequeate pintsajigueriji Aapani Irioshi. Manaquea intati nocantajiaquempiqueate imaica irooniji pimpashiventantajianaquempaca.

**Quero oncoquempani  
intancoretancoreitanajegueti  
metojajiavetanquitsica**

<sup>35</sup>Cotanquitsiquea arica inchooaque nintanquitsineca incanque: “¿Queroca oncoquempani intancorejantajianajempaca metojajianquitsica? Oraqueate intancoretancoreitanajegueti ¿querocaca oncotajempani itsino?”<sup>36</sup> Quericaca quejejeroneca imaica cantanquitsineca, teequea intsateji. Itsajitaquerotarite aatogueti iquitaguijitiro, aatoquea otsorogui. Ontsoroanaquegueti ompejaempaquea oratica oitsoqui.<sup>37</sup> Oraquea iquitajitirogueti teequea iro

inquitatacojite otasaquiji, ojempequi, ovana, maasano; iroguentiqueate iquitajiti oitsoqui, irooca tirigo irooca taaca opajitapae otsipa choocatatsica oitsoqui.<sup>38</sup> Arikea inchiquiojita yoguitsoroaquiero Aapani Irioshi iriatimpa, iquejetacaamajatajaroquea querocagueti inintacaqueroni. Pameneroja iquitajitirogueti tirigoitsoqui iroguentiquea tsoroananquitsi tirigo. Arikea oquejetacaquea oitsoquipae iquitajiquerogueti irosati tsoroanajatsine. Ocantashitatiaguecaquea teequea onquejetavacaguempají.<sup>39</sup> Arikeate oquejetaca aisa maasano anijagueltasica, teequea inquejetavacaguempa manaquea icantashitatiaguecaquea. Pamenerija caquinte teequea inquejetempariji canaaguetatsica. Arikea iquejeguecaquea aisa araguetatsica, teequea inquejetempariji choocagueltasica ojaauquiniqui. Maasanoquea icantashitatiaguecaquea.<sup>40</sup> Arikea oquejetaca aisa choocaqueate choocajatsica jenoqui inquitequi aisaquea acaniqui quepatsiqui, cotanquitsiquea teequea inquejetavacaguempa yoganejencaguecagueti, icantashitatijacatarite yoganejencajiacagueti choocajiansquitsica jenoqui inquitequi, arikea iquejejiaca aisa choocaguetatsica quepatsiqui icantashitatiaguecaqueate yoganejencajiacagueti.<sup>41</sup> Pamenerijate catsirincaiteri ivoreguigueti teequea inquejetempariji iquitasetigueti taai, aisaquea teequea inquejetempariji iquitamiriaquitigueti impoquirope, cotanquitsiquea iconoagarantacaquea irira anaantanquitsica iquitamiriaquimajatanaquequea, itsipaquea teesaconaquea.

<sup>42</sup>Arikea oquejevecaquea aisa intancorejajianajegueti metojajianquitsica. Oraquea iquitajiquerogueti yavejancavetanacaquea, cotanquitsi-

quea intancorejanajegueti aatoquea yavejancaja. <sup>43</sup>Oraquea iquitajiquerigueti itsino teequeate irishineventajitajemparoji, cotanquitsiquea intancorejanajegueti aatoquea oquempetaja imaica manaquea oganejencamajatanaquempaquea. Ari oquejetaca aisa iquitajiquerigueti teequea intampishiteji, cotanquitsiquea intancorejanajegueti incantapanajante intampishimajatanaqueuea.

<sup>44</sup>Iroqueragueti irooqua iquitajitaque itsino gametatsica ocaniqui quepatsiqui, cotanquitsiquea coajica manaquea ontancorejanaje otsipa itsino iroaquerari gametanquitsineca ontaniqui jenoqui inuitequi. Choocatarite gametatsica ocaniqui quepatsiqui. Arikeate oquejetaca aisa choocaquea gametatsica jenoqui inuitequi. <sup>45</sup>Aritarite ocanquequea itioncajitaqueca ocanti: Iriraqueate Araini iriquetica pariavecaro “ipeacajitacari anijatsica”. Imaicaquea irira Arai imoitajatsica/irioquea anijacaantantatsica, yanjacaa-cajitarite Ishire. <sup>46</sup>Cotanquitsiquea teequea iroqueti pariguemparone atsinojia gametanquitsineca jenoqui inuitequi. Iroquettequea pariacaro gametatsica quepatsiqui, arikea omapojempaquea gametanquitsineca jenoqui inuitequi, imoitapojequea.

<sup>47</sup>Iriraquea iriquetica ipeacajitacaca iroguentiquea ipeacaaantajitacariequeate quepatsi, aisa manaquea ichoocataque ocaniqui quepatsiqui. Iriraquea imoitajatsica manaquea iponeaca jenoqui inuitequi. <sup>48</sup>Ijamirincataquequea caquinte arikea iquejetacariequea Araini ipeacaaantajitacariequea quepatsi, iriotarite paesatijianaquerica iroqueragueti. Arikea inquejejiaquempaquea aisa maasano tsaroventajiacarica iriraquea poneanquitsica jenoqui

inuitequi, arikea inquejejianaquempairequea iriatimpa. <sup>49</sup>Aritarite aquejejiacariquea iriraquea ipeacaantajitacaca quepatsi, arikeate anquejejiaquempairequeate aisa irira poneanquitsica jenoqui inuitequi.

<sup>50</sup>Imaica, napiguemisantarijate, nonintaquequea noncamantajiaquempi oraqua aquejejigagueti acaniqui atsinojigagueti aisa arirajajiguiguetu, aatoquea ojaiguitsi jenoqui ichoocaquegueti Aapani Irioshi. Oraqua atsinojia teequeate onquishoteji irotaquequeate aatoquea agavejajigui oantajianaquemparo ontaniqui jenoqui inuitequi, ontaniquitarite aatoquea ametojajajitsi.

<sup>51</sup>Aisa imaica nonintaquequea pintsajiaque teeca intsajiteji. Aatoquea ametojajigui maasano, cotanquitsiquea maasanoquea ancantashitatijaianajempaquea, irojocajiacajitarite Aapani Irioshi atsinojia iroquerari. <sup>52</sup>Iroompiqueate anquemajiajavaqueroguerti intivojiqueroguerti tivorents carapojeroneca, arikea ancojianaquempa ancampa-jante ancantashitatijaianaquempa. Intivojitaqueroguerti tivorents arikeate inquenapanajante intancorejajianajequa metojajavetanquitsica, arikea aatoquea imetojimajiaji, aatimpajiaquea tequeratatirajaca ametojajigueji ancantashitatijaianaquempaqueate.

<sup>53</sup>Oraqua atsinojia avejancatsica aatotarite irooqua anijanajatsine, otsipaqua piajeroneca aato avejancajatsi. Ocaticaquea imaicatica iroguentiquea metojatsica, jeroquea otsipa piajeroneca aatoquea ometojajitsi.

<sup>54</sup>Aapojempagueti avejancatsica ompeajempagueti caarica avejancatsi, aisa oratica metojatsica ompeajempagueti caarica metojatsi, ari onetsanata-naquempaquea itioncajitic cantatsica:

j 15.45 Ocanquegueti *Arai imoitajatsica* iriotaque ocantacotaque Quirishito.

“Iteroncajiquero metojagantsi yanajaiquero.”

<sup>55</sup> “Metojagantsi, ¿querocaquea pitseji?

Areshi,<sup>k</sup> ¿arimpa pagavejaque panaante imaica?”

<sup>56</sup> Oraquea quempevaerentsi, iroguenti otseji metojagantsi. Oraquea cantacaantanentsi, iroguenti otampishica quempevaerentsi. <sup>57</sup> Cotanquitsiquea imaica arioteesaa icavintsajajacajiquea Aapani Irioshi yagavejacaajacaji antampishishitimentajiaqueronijite quempevaerentsi aatoniji aquempevajiaja, atsaroventajiacaritarite Amajirote Jesoquirishito. <sup>58</sup> Irootaquequea imaica, napiguemisantarijate nopintsamajajacaca, nocantantajiaquempica picancaniquea pinquemisantamajajiaqueri Amajirote pintampishitashimajajiaqueri nintajavetanquitsica irovashiantacaajiaquempiro piquemisantajiaquegueti. Aisa picancaniquea pantamajajiaqueneri, aatoquea piperajiga, pitsamajajiaquetaite aatoquea mana pantajiguiniri intati.

Incapiocajiaqueneriqueate imentaquipae intigarancajiaqueneri irapiguemisantarijate

**16** <sup>1</sup>Imaicaquea imaica irooqua noncamantamajajiaquempi quero pincojiaquempani pincapiocajiaquenerigueti imentaquipae pintigarancajiaquenerigueti igomajamajarejia Aapani Irioshi. Manaquea noninque pinquejetacajiaquemparoqueate nocantajiaquerica apiguemisantarijia-teni Garashiaquitica. <sup>2</sup>Pincoguitempaniquea savincaguiteriqui pariantajempa-roca semana<sup>l</sup> apaniropae aviatimpajia paagarantajiaque pimentaquitsitepae

ivegarajitimpirogueti pantajiguica. Iriraquea aamajatanquitsica iraagarantaquequea oshequi. Iriraquea capichajica aanquitsica iraagarantaquequea capichajiquea. Arikea pojoquijijiaqueriquea ontaniqui pitsovironaquitequi pojoquijitashiquempariquea tijacōnaji aatoniji iroaqera pincapiocajianaqueri noncoraquepojaquegueti. <sup>3</sup>Arikea narejetapojaquempagueti nontigarancajiaqueriqueate irirajia pinintajiaqueca iroajianaque Jerosarequi. Nontioncavaqueate paperi irajaianaquenerinijite imentaquipae pintigarancajiaqueneriquea apiguemisantarijate choocajatiacsica ontaniqui. <sup>4</sup>Arigueti namenaque cameetsataque noanaque naatimpa aisa, ariquea nontsipajianaquempariquea.

<sup>5</sup>Oraquea noncoraquequegueti manaquea noapanajante Maseroniaqui, ariquea narejevaetapojaquempa oraniqui Corintoqui. Noninquetarite noapanajante Maseroniaqui. <sup>6</sup>Aviatimpajiaqui arica osamani nonconoaajiaquitempiquea, arica nontejaatacovaequitequea irosatiquea ajagantsitanajegueti, ariqueate pagavejajiaquequea pincavintsaajiaquena noanaquegueti querocagueti noncantanaquempa aisa. <sup>7</sup>Teequea noninteji mana namenajapanajantempi intati, manaquea nonintaquequea osamani nonconoaajianaquempiquea, iriogueti nintanquitsine Amajirote.

<sup>8</sup>Cotanquitsiquea imaica mana noninque nonchoocatanaque acaniqui Epesoqui irosati arejetantapojempacasavincaguiteri Pentecoshite. <sup>9</sup>Namenavecaquea choocaquea oshequi catsimajiaquenaca, cotanquitsiquea aisa choocaquea oshequi tsaroventajigarica Aapani Irioshi. Arikea oquejetacaquea aisa

**k** 15.55 Oraquea Areshi iroguenti ichoocajiaquegueti metojatsica. Iquejetacaaca acaniqui, quejetaca iquenquetsatacaaqueru “Metojagantsi” aisa “Areshi”. **l** 16.2 Iroguenti opariantanaja semana savincaguiteri tomino.

choocaquea oshequi nintanquitsica nonquenquetsatacaa jiaqueri.

**Iteroncaquerogueti itioncaguetaqueca**

<sup>10</sup>Arigueti irarejetapojaquempagueti Timoteo oraniqui pincavintsajajavaquerija pinconoajiaquempariquea cameetsanijite irishinetaquempanijite, aatoniji ishoshoguiteta. Aritarite iquejetaquena- quea naatimpa, yantiniriquea Amajirote. <sup>11</sup>Irootaqueuea nocantantajiaquempica inchiquiojija pitsojencavacheritsi. Arigueti- quea incantanajempagueti pincavintsajajavajerija pinquenquetsatacaa jiajavajeriquea cameetsanijite incoraquetaje acaniqui, noguijajiritarite incoraquetaje iriatimpa jerijia aisa apiguemisantarijiate oguijajia- jitaquerineca. <sup>12</sup>Iriraquea apiguemisanta- rite Aporoshi nocantavecariqueate iroanaque oraniqui irinejajiaquitempime, intsipajianaquemparime itsipapae tsaroventajigarica Quirishito. Teequeate irininteji iroanaque imaica, cotanquitsi- quea coajica iragavejaqueguedi ariuea iroanaque.

<sup>13</sup>Inchiquiojija yamatavijitimpitsja yovashiantacajalguimpirotsi piquemisantajia- queguedi. Manaquea picancaniquea pinquemisantamajajianaque. Aatoquea pitsaroimentajiguiro piquemisantajiaqueri- gueti Quirishito, manaquea pintampishitashi- jiaqueroquea. <sup>14</sup>Taaca opajitapae pantajia- queca pimpintsatavacaajiaquempaquea.

<sup>15</sup>Napiguemisantarijiate, aviatimpajia pitsajiaqueterite iriraqueate Esetepana jerijia iconoajiacar iргiguentijia iriquetica tsaroventajiacari Amajirote Acayaqui, ariueate isavicaventajiaqueroquea icavintsajajiaqueri igomajamajarejia Aapani Irioshi, yamitacojiaqueriquea. <sup>16</sup>Imaicaquea noninque pinetsanajia- queroja incanquempiguedi iriatimpajia,

cotanquitsiquea aatoquea apaniro iriatimpajia. Ariuea pinquejejiaquem- pariquea aisa maasano quejejigarica iriatimpajia yamitacantajiguiguetu, aisa yantajiguinrigueti Amajirote.

<sup>17</sup>Jeematsitia icoraquegajoitaquequea acaniqui Esetepana, aisa Jorotonato, jeriqueate aisa Acaico, yoguishinejajia- quenatarite noquenquejajiaquempiguedi pichoocajiaqueguedi osamani. <sup>18</sup>Yogui- shinejajiaquenaquea naatimpa aisa aviatimpajia. Pishineventajiaquempari- quea iriatimpajia pamenajiaqueriguedi caaviji yantajiaqueneri Amajirote.

<sup>19</sup>Iriraquea tsaroventajigarica Quirishito capiocapinijiatsica iguinteni- paequi Ashiaqui intantajiaquequea pinquemacojiaqueriqueate irosatiquea iquenquejajiaquempi. Ariuea iquejeta- caquea Aquira aisa iroatimpa Pirishira jerijiaquea aisa maasano capiocapiniji- tsica itsovironaquitequi, intantajiaque- quea pinquemacojiaqueri irosatiquea iquenquejajiaquempi, iquejejiaquempi- tari pitsaroventajiacariguedi Amajirote. <sup>20</sup>Ariuea iquejejiaquea aisa maasano apiguemisantarijiate acaniqui icancani iquenquejajiaquempi. Netsana pininta- vorotavacaavaquempa.<sup>m</sup>

<sup>21</sup>Naatimpa Paavoro ocatica imaica inchiquiojita notioncaquero nacoqui, noncantajiaquempiquea noquenquejajia- quempi.

<sup>22</sup>Quericaquea teece impintsamajatem- pariquea Amajirote incatsimajitaqueriquea. iNomajirote, pincoraquetajequeti!

<sup>23</sup>Namanacoventajiaquempiquea incavintsajimentajiaquempinijite Amajirote Jesoquirishito. <sup>24</sup>Nopintsa- majataquempiqueate maasano aviatimpajia, atsarоventajiacaritari Quirishito Jesoshi. Ari oncoquempa.

**m 16.20** *Netsana pinintavorotavacaavaquempa.* Yamejiaca coramani intantavorotavacaajiajavaca yamenavacaajiacaguedi, ari iquejejiaqua tsaroventajigarica Quirishito coramani.

## PAAVORO ITIONCAJIAJINIRI CORINTOQUITICA

Antsatantaquemparoca

Ocatica iroguenti antsatantaquemparoca mavitetapojatsica itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica quinteninintsiqui pajitatsica Corinto. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti Paavoro Corintoqui otsapaqui Ya. 18.1–18. Tequeratagueti intioncacaanteroji ocatica Paavoro, itioncacaanquero otsipapae mavite paperi itioncajiaqueneri choocajianquitsica quinteninintsiqui pajitatsica Tesaronica aisa itioncaantaquero iroquetica paperi itioncajiaquenerica Corintoquitica. Itioncacantaquero ocatica paperi ajagantsini 55, otsipatapojacaguetti iquenaguetanaquegueti quepatsipaequi itsavetantavaequerigueti Jeso quirishito. Iquenquejajitaque itioncacaantaquero guetui Paavoro ocatica paperi ichoocaque quinteninintsiqui pajitatsica Piripo choocatatsica Maseroniaqui (Ya. 20.1–2).

Ocaniqui paperiqui itsavetanqueroquea Paavoro quero icojiaquerini Aapani Irioshi aventajiacarica Jesoshi iramenajiaqueriniji quempetaca tee incovaeguishetimatempaji. Icanti Paavoro itsatacaaquaqueri iroomajatatsica ichoocatimojiaquerigueti Corintoquitica, cotanquitsi imaica chooca tsatacaantamampeajatiatsica ontaniqui tsatacaantantajiguiroca teeca iroomajateji, icantajavetaca itsavetacojiaqueri Jesoshi. Iriatimpajia icantashijiacari Paavoro teequea irio itigarancane Jesoshi. Niganquiquea itioncacaantajiaquenerica Paavoro icamantajiaqueri quemisantajiajatsica incapiocajiaqueri imentaquitsitepae iramitacojiaqueriniji quemisantajiajatsica coguitejacojianquitsica (cap. 8–9).

---

**1** <sup>1</sup>Naroguenti Paavoro itigarancane Jeso quirishito, iriotari nintacaa-quena Aapani Irioshi. Imaica noninque nontioncajiaquempiquea aviatimpajia Corintoquitica tsaroventajiacarica Aapani Irioshi aisa maasano igomajama-

jarejia choocatantaguetaroca Acaya. Iriguenti notsipataca apitsaroventariteni Timoteo.

<sup>2</sup>Namanacoventajiaquempiquea incavintsa jamajajiaquempinijite Aapani Irioshi aisa Amajirote Jeso quirishito,

inchoocatacaajiaquempinijite cameetsa aatonijite pishoshoventajigaro taaca opajitapae.

### Ishinetacagari Aapani Irioshi atsipejiatsica

<sup>3</sup>Jaameshiatsi ashineventajiaquempiriquea Irioshite Amajirote Jesoquirishito, iriotaque aisa Iriri, ancanqueriquea: "Poganejencamajata", ipintsatocomajajiacaji yoguishinejajiacaji <sup>4</sup>atsipevajiacagueti cameetsanijite agavejajiaquenijite oguishinejajiaquerinijite itsipapae atsipevaetanquitsica anquempejiaquempari iriatimpa yoguishinejajiacajigueti. <sup>5</sup>Quejetacaquea atsipejiaca atsipajiajirigueti Quirishito, ari onquejetaquempa aisa iroguishinejavaejjiacaji iriatimpa. <sup>6</sup>Oraquea natsipejiacagueti naatimpajia iroguenti cameetsanijite iroguishinejajiaquempinijite aviatimpajia, aisa iroguentinijite irimeshiumentajiaquempiniji. Arikea oquejetaca aisa yoguishinejajiaquenagueti Aapani Irioshi iroguenti cameetsanijite pintsatimentajiaqueniji arikea inquejetacaajiaquempi aviatimpajia aisa iroguishinejajiaquempi iramenajiaquempigueti pantsipevaetaquempaquea pinquempejiaquenaquea naatimpajia natsipevaetagueti. Iroguenti iroguishinejajiaquempiquea iroonijite pantsipevаетantaquemparoca. <sup>7</sup>Notsamajajiaquea pinquejijaquenagueti pantsipejiaquempagueti, arikea pinquejijaquena naatimpajia aisa iroguishinejajiaquempiquea Aapani Irioshi.

<sup>8</sup>Imaica, napitsaroventarijate, nonintajiaque pintsajiaquequea natsipevacea quea Ashiaqui namenajiaque aricaca nometojajiaque, namenajiavacqua teequeate nagavejajiajeji nontampishitashijajeroji. <sup>9</sup>Noquenquejantavetacaca: "Imaicashatsi nometojavaeteni." Cotanquitsiquea iroguenti

oquejetacaquea imaica cameetsanijite nontsamajajiaquenijite aatoquea inchiquiojiquea naatimpa nagavejajiguitsi nontampishitashijiaquero, iriguenti naventajiaquempa Aapani Irioshi tancoretancoreitirica metojajavetaatsica. <sup>10</sup>Arikea iriatimpa yompejiaquenaquea, jero teeca nometojantajiguempaji. Arikea inquejetanaquempa imaica irompejianaquena. Notsajiaquea quea icocaniquea iramatacojiaquenaquea taaca opaji nantsipevaequempaca. <sup>11</sup>Pamijiaquenaquea aviatimpajia pamanacoventajiaquena. Iroshequiavaequegueti amanacoventajiaquenaca, arikea onquempetaquempaquea aisa incaramirincavaequequea shineventajiaquemparineca Aapani Irioshi iramenajiaquegueti icavintsajamajajiaquena, incankequea: "Arioteesaa."

### Quero ococani teeca iroantempaji Paavoro Corintoqui

<sup>12</sup>Noshinevejiaquenagauea nocanca namenajiaquegueti nococani nocomajamajajica acaniqui quepatsiqui, aisa teequea namataajiguempaji, pamenamajajiaquenaquea aviatimpajia noguintenitomojiaquitimpigueti. Cotanquitsiquea noquejijacagueti imaica, teequea noguijatacojigueroji itsatica caquinte, manaquea icavintsajajena intati Aapani Irioshi yagavejacaantaquenaca. <sup>13</sup>Oraquea notioncijaquempiagueti maasanopae tee nomanacaguempa-roji aatonijite omanapitsajiguimpitsi pampatsajavantajiaquerogueti, manaquea pinquemamajajiaquero, noninquetari <sup>14</sup>pintsamajajiaquenaquea querocaca nococani naatimpajia. Pitsajiaqueuna capichaji, noninque pintsamajajiaquenaquea cameetsanijite pishineventamajajia-naquenajite oncoramanitapojaquegueti incoraquetajategueti Amajirote Jesoshi, pinquempejiaquenaquea naatimpajia noshineventajiaquempigueti.

<sup>15</sup>Irootaquequea nopensatantavecaca iroaqueragueti avquietime nonejajiaatem, cameetsaniji pishinevaequempa-niji mavite narejetimotajatempime.  
<sup>16</sup>Nopintsaveca noanaquegueti Masero-niaqui ariuea noncoraquetaquemequea oraniqui narejetimojiapanajantempime-quea aviatimpajia. Iroompa noanage-gueti ari narejetsitimopanajantempime-quea aisa. Iroompaquea aisa noquen-quejavecaquea nonchoocaquemegueti oraniqui nonquenapojequea aviatimpaji-aqui noanaquequea Joreaqui pincavin-tsajajavajena pojocajavajena noncogui-tejacoquempaca, ariuea pamenajia-vajena. <sup>17</sup>¿Nopintsavecagueti arimpate tee nonquenquejamajatero? ¿Arimpate noquejejiacari teeca intsaroventempariji Aapani Irioshi icantajiguigueti manaquea icantashitatiajavajiro intati teequea irinetsanajigueroji? <sup>18</sup>Cotanqui-tsiquea Aapani Irioshi teequea inquem-petempaji imaica, manaquea inetsana-majatiro icanqueca, ariuea noquempe-jiaca naatimpajia, teequea namatavijanteji, nocanquegueti: “Jeeje”, teequea noncantashitempaji aisa: “Tee.”

<sup>19</sup>Ariuate iquejetacaquea aisa Jesoquirishito, Irijanite Aapani Irioshi, notsavetacotaqueca naatimpa notsipata-shijiacarigueti Shirivano<sup>a</sup> aisa Timoteo notsavetantimojiaquempigueti aviatimpajia. Pinquenquejerija iriatimpa queroca icanque icocani inetsanamaja-tiro. <sup>20</sup>Aisa oraquea icoraquequitigueti iroguenti netsanamajajiqueroquea maasanopae icanqueca Aapani Irioshi paesatoniqui icanquegueti intigaranca-queri Meshiantanquitsineca. Irootaque-quea imaica ashineventantajiacarica Aapani Irioshi acanqueriquea: “Ari netsana”, atsajiaquetari iriguenti Jesoquirishito quempetacaaguecaroca.

<sup>21</sup>Iriotarite Aapani Irioshi tsaroventa-caamajatacjiri Quirishito, naatimpajia aisa aviatimpajia, cameetsanijite aguijamajajueriniji aatoniji oguipaqui-jajiguirotsi atsaroventajiacarigueti. Icoguijaiacaji. <sup>22</sup>Ariuea oquejetaca iseyotacaji ocanque aatimpajia irashimajaca, jero itigarancantacajirica Ishire inchoocashirentajapijacaji cameetsanijite antsajiaquenijite irinetsa-namajajiacajiro maasanopae icanqueca.

<sup>23</sup>Imaica pamenajiaque teequea nogueji oraniqui Corintoqui namenajia-jatempime, teetarite noninteji noshimampojancacaajapijempa, nopensatacojaquempitarite. Yamena-queaquea Aapani Irioshi teequea namatavijajiguempiji arimajacatari nocanque. <sup>24</sup>Teequea irooqua noninta-jigueji noncanquempiquea pinquemi-santamajajiaquenaja naatimpajia pinetsanamajajiaqueroquea nocantajia-quempica, iroguenti nonintamajajaque nontsatacaaajiaquempiroquea otsipapae cameetsanijite pincoguitempaninijite pishinevaejiaquempanijite, iroorijite paventaventaicarigueti Aapani Irioshi pitampishirentantajianacaca.

**2** <sup>1</sup>Irootaquequea noquenquejanta-caca aatotaja noguitsi namenajiaja-tempi cameetsanijite aatonijite noshimampojancacaajiguimpitsi ariuea noshimampojancanaquempaquea naatimpa aisa. <sup>2</sup>Namenaquetari arigueti noshimampojancacaajiaquempi, ¿quericampate oguishinejanajenaneca? Aparo picojiacaquea aviatimpajia poguishinejajiaquenaquea, cotanquitsi-quea arigueti noshimampojancacaajia-quempi ¿querocampate noncotajempani naatimpa noshinetantajempaca?

<sup>3</sup>Irootaquequea notioncantajiaquempica nocantajiaquempi pincomajamajajiana-

a 1.19 Iriraquea Shirivano icantajitiri aisa Tsirashi.

quempaja, namenaquequea noncoraque-  
vetaquempagueti manaquea pishimam-  
pojancacaajiaquenaquea, teetarite  
irooquea nonintejí onquempetaquempa-  
quea imaica, iroguentiquea noninque  
poguishineajiaquenaquea naatimpa  
cameetsanijite pishinetimentajiaquem-  
panjite aviatimpajia aisa.<sup>4</sup> Oraquea  
notioncajiaquempigueti coramaniqui  
taaja noshimampojancavaequea  
nocanca noquenquejacojiaquempigueti,  
niganquiquea niraanaca. Cotanquitsi-  
quea teequea irooquea nontionquimen-  
tajiguempiji noshimampojancacaajia-  
quempiniji, iroguenti noninque pintsaj-  
aque caaviji nopintsamajajiaquempi-  
quea.

### Icantajiaqueri impeacojiajemparijate peacaanquitsica covaeguisherentsi

<sup>5</sup> Iriraquea peacaanquitsica covaegui-  
sherentsi teequea aparo irishimampo-  
jancacaguenaaji naatimpa, aviguentijia-  
maja ishimampojancacaajiaquempiquea,  
cotanquitsiquea teequea nonintejí  
noncanque caaviji ishimampojancaca-  
majajiaquempi, teequea nonintejí  
nontiavaetacaantempiro. <sup>6</sup> Ariquea  
picapiocajiacaguetti piconagarancaquea  
picantajiaque incantimentajiqueriquea  
peacaaguishetanquitsica covaeguishe-  
rentsi. Itsipapae cantanquitsica aatoja  
icantimentajitiritsi, cotanquitsiquea  
iriguenti oshequijianquitsica cantajian-  
quitsica incantimentajiqueriquea, jero  
piquempejiaqueri imaica. Cotanquitsi-  
quea imaica ariotapoji oncaratapoje  
picantimentajiaquerigueti. <sup>7</sup> Irootaque-  
quea nocantantajiaquempica imaica  
pimpeacojiajemparija, aisa poguishine-  
jajiajerija aatonijite otiroroncavaetana-  
cari ishimampojancare irishoshoguite-  
vaetanaque. <sup>8</sup> Aisa aviatimpajia noncan-  
quempiquea imaica pamenacaajiajerija  
picocani pipintsajiacari. <sup>9</sup> Oraquea

notioncajiaquempigueti coramani,  
nocantajiaquempigueti querocaca  
pincopincoitaquerini, manaquea  
noninque nontsaque aricaca pinquemi-  
santajiaquenaquea pinetsanamajajia-  
quero nocantajiaquempica.<sup>10</sup> Quericaca  
pimpeacojiajempaca aviatimpajia,  
ariequa nonquejetaquempaquea  
naatimpa nompeacotajemparieuate.  
Teequea querocaca incovetenaji,  
cotanquitsiquea yamaenaquenaquea  
Quirishito arimajaca nopeacotsitajari,  
iroorijite noplantsatacojiaquempi.<sup>11</sup>  
<sup>11</sup> Iroguenti noquempequeroquea imaica  
cameetsanijite aatoniji ochoocatitsi  
ompampiatantaquempaca iragavejajia-  
caji Satanashi, atsamajajiguiritar  
queroquea icota iriatimpa icocani  
isemajiacaji iramatavimatavivaecaji.

### Icanqueri iriguenti agavejacaajiaqueri Quirishito

<sup>12</sup> Narejetsipojacaguetti Toroashiqui  
nontsaveteroniji Quenquetsatsarentsi  
Oganejencatatsica tsavetacoquerica  
Quirishito, choocajia icaramirinca-  
vaeque nintajianquitsica nontsavetanti-  
mojiaqueri, iriguenti nintacaajiaqueri  
Amajirote, oquejetetaca yashirejacota-  
quena Amajirote sotomorontsi. <sup>13</sup> Cotan-  
quitsiquea naatimpa noshoshoguite-  
vaeca teequea nontonquivojapojempari  
apitsarovenstarite Tito, ariquea nocanta-  
jianajari choocajatsica oraniqui  
noanaquequea Maseroniaqui.

<sup>14</sup> Noshineventajiacariquea Aapani  
Irioshi, nocanqueriquea: "Arioteesaa",  
yagavejacaajiaquenatari nagavejajiaque-  
riniji maasano catsimatashitarica,  
notsipamajajiacaritari Quirishito,  
irootaquequea yagavejacaantajiaque-  
naca nontsavetacojiaqueriquea  
iriatimpa, nontsitacaguitejavaetanaque-  
roquea maasano quepatsi. <sup>15</sup> Aquempeta-  
caroquea casancajencaro. Iriraquea

Aapani Irioshi ishineventajiacjiquea yamenajiacjigueti atsavetacojiaqueriquea Quirishito atsavetantimojiaqueriquea irimeshiajiaqueca aisa aatoca imeshiajiti.<sup>16</sup> Iriraquea aatoca imeshiajiti teequea irishineventavaquemparojo, yamaquero quejetaca aajencatirogueti metojantatsica, cotanquitsiquea irirajia irimeshiajiqueca ishineventajavacaro, oquempetimotacari aajencatirogueti organijantatsica casancajencatatsica. Cotanquitsiquea ?taampate agavejanquitsineca intsaroventacaajiaquempariquea itsipapae aatogueti irioquea agavejaca-guiritsi Aapani Irioshi?<sup>17</sup> Choocajiatrite icaramirincavaeque amatavijantajitsica manaquea itsavetantamampeajacaroquea intati, inintajiaque iraantajiaquemparo imentaquipae. Cotanquitsiquea naatimpajia teequea nonquempejiguempariji iriatimpajia, manatarite itigarancajiaquenaquea Aapani Irioshi nontsavetantajiaquero Iguenquetsatsare. Itsaquequea iriatimpa arimajaca nocantamajaque teequea namataguempaji, iriguenti agavejacaajiaquena Quirishito.

**Irimeshiajiqueriquea maasano  
tsaroventajiaquemparineca Quirishito**

**3** <sup>1</sup>Oraquea nocantajiaquempigueti imaica, aricaca pamenajiaque naroguentica semetajatsi nocanquegueti cameetsatia nochoocavaejogui. Teequea ariquea nonquempejiguempaji imaica, aisa teequea noncoguitejacojiguempaji nontigarancacaantajiaquempiroquea paperi itioncacojiquenagueti itsipa icantacojiaquena cameetsatia nochooca-

vaejogui. Arikea oquempetaca aisa teequea nonintajigueji pintioncacojiaquenaquea aviatimpajia pintsavetacojiaquena nocomajamajajiacagueti.

<sup>2</sup>Aviatimpajiatari piquejejiacaro paperi itioncajitaquenaca, itioncajitaquea noshirequi, cotanquitsi itsajiaquero maasano, quejetaca yapatsajavantaquero maasano. <sup>3</sup>Manaquea piquejetacaro paperi itioncaquea Quirishito. Teequea intioncacotenaji paperiqui, cotanquitsiquea itigarancajiaquena notsavetantimojiaquempigueti, arikea Ishire Aapani Irioshi anijatsica icantashitatiajiaquempi, jero itsatantajiacaca maasano tee namatavijanteji. Teequea intioncacotantajitenaroji mapicot aqui, manaquea oquejetaca iroguenti itioncacojiquena pishirequi.

<sup>4</sup>Notsamajajiaque nocantajiaquempi-gueti imaica teequea noncantashitempaj, yamaquenatari Aapani Irioshi notampaticamajajiaqueroquea, iriguentitari agavejacaajiaquena Quirishito noquejetantajiacaca imaica. <sup>5</sup>Teequea noncanteji inchiquiojiquea nagavejajiaque naatimpajia nompeacaajiaquempa cameetsaripae, iriguentiquea agavejacaaji-aquena Aapani Irioshi. <sup>6</sup>Yagavejacaajiaquenaquea ipeacaajiaquena tsavetantiroca iroqueraro paaquito.<sup>b</sup> Teenicate onquejettimparoji iroquetinica tioncanquitsica mapicot aqui, ocaticaquea iroqueraro yamaqueroquea Ishire. Oratica tioncanquitsica, aatogueti inetsanajitiro aanaqueri camorecaripui. Cotanquitsiquea Ishire Aapani Irioshi yanijacaanti.

<sup>7</sup>Coramani itioncajiaquenerigueti Aapani Irioshi ishiraerijia maasanopae

**b** 3.6 Oraquea paaquito iroguenti icantamajajitirica itsipa irinetsanamajajitenerica. Ocaticaquea iroqueraro paaquito icantajiacajiquea Aapani Irioshi irishetacotajeri igovaeguishere maasano aventaventaquejemparineca Meshiantatsica metojaventajiacajica. Ochoocaguetaquequea paaquitopae iroquetinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

ininqueca irinetsanajiaqueca  
iriatimpajia, iroguenti itioncancaro  
mapicota, iroompaquea yojocaueneri  
Moishishini irajaianajeneri. Iroompau-  
quea icoraquevetaja Moishishini  
ichoocajiaquegueti iriatimpajia tsirena-  
shimpoquirerencavaetanaca icanca  
ivoroqui. Querocampate incohincota-  
quempani iramenajavagerigueti,  
itsirencajiajapoqueritari, cotanquitsi-  
quea opeitanaja. Ocaticaquea ocatica  
itioncijaquenerica Aapani Irioshi  
ishiraerijia iroguenti oquempetacaanta-  
jaqueri maasano teeca irinetsanamaja-  
jigueroji, cotanquitsiquea oraquea  
yojocauenerigueti Moishishini  
manaquea itsirencacaqueri. <sup>8</sup>Oraquea  
yojocavecanarigueti quempetacaantant-  
atsica ariqueate itsirencashimpoquire-  
rejacaavaequeri, iroompauqueate  
yonigaimojiacajica Ishire Aapani Irioshi  
ashirejiaqui caaviji anaavaequero  
oganejencamajataca, <sup>9</sup>otsatacaaajiaca-  
tari yamenajiacaji Aapani Irioshi  
quempeca teeca ancovaeguishetimate-  
mpoji. Ocaticaquea ocatica caaviji  
anaaque oganejencamajataca, anaavae-  
taqueroquea yamenacaajiaquerica  
Aapani Irioshi ishiraerijia coramani  
yamajiaquenerigueti Moishishini  
itioncaquea Aapani Irioshi quempeta-  
caantajiaquerica maasano teeca irinetsa-  
najigueroji. <sup>10</sup>Oganejencaveca itioncajia-  
quenerica otsatacaaajiavecari quero  
icotani iriatimpa, cotanquitsiquea  
caaviji anaavaeque oganejencamajataca  
yonigaimojiacajica Ishire Aapani Irioshi  
imaica. <sup>11</sup>Yojocavecanarigueti carapo-  
tsineca itsirencashimpoquirerejacaavae-  
vetacari, imaicampani  $\triangleleft$ atompate  
oganejencamajatatsi caaviji anaama-  
jaque iroaqueraca coguitatsica?  
Anaavaequeroquea.

<sup>12</sup>Notsajiaque arimaja onqueje-  
quempa, irootaquequea notsavetantajia-

quegueti noguisotoamajatantacaroca  
caarica nopashiventacaantantaro.  
<sup>13</sup>Teequea nonquempejiguempariji  
Moishishini iticaacoquerogueti ivoro  
paañoqui aatonji yamenajiguirotsi  
ishiraerijia ompeanajempatajate otsire-  
cashimpoquirerejanequi. <sup>14</sup>Manaquea  
oqujeveca oticaacagueti paaño, icocani  
ishiraerijia arejevaeca imaica yapatsaja-  
vantavetacarogueti iroquetinica  
paaquito itioncanaqueca Moishishini tee  
intsatacoterijo, quempetaca opaañotaco-  
taca. Tequerataquea impaañorejacojite-  
neriji, iriguentitari Quirishito paañoreja-  
coquerone antsarovenquemparigueti,  
ironigaajiacajiro. <sup>15</sup>Yarejetacovaetaca  
imaica yapatsajavantajiavecarogueti  
itioncanaqueca Moishishini teequea  
inquemajigueroji, quempetaca  
ipaañoshirentacoca. <sup>16</sup>Cotanquitsiquea  
taacagueti pitsocashitanajemparine  
Amajirote, impaañorejashirentacotajeri,  
inquemamajaquero. <sup>17</sup>Iriraquea  
Amajirote iriotaque Ishire. Querica  
ichoocashirentajiaqueca Ishire  
Amajirote tecatsi omperaperaashirenta-  
jemparineca. <sup>18</sup>Arikea oqujeveca  
ipaañorejacojicaji atsirencashimpoquire-  
rejanaque itsirencanequi Amajirote,  
icantashitatianacajitari anquejetanta-  
quemparica iriatimpa, yoganejencata-  
caanacaji oavaetanaque anquejemaja-  
tantanaquemparica. Irioquea quejeta-  
caacaroca Ishire Amajirote.

**Paavoro tampatica yoquiero  
itsavetantavaequerogueti  
Iguenquetsatsare Aapani Irioshi**

**4** <sup>1</sup>Ipintsatacobiaquena Aapani Irioshi  
inintacajiaquenaquea nontsavetan-  
tavaequeri Iguenquetsatsare, irootaque-  
quea pamenantajiaquenaca teeca  
noshimampojancamajatempoji, teeca  
novashiantimajigueroji. <sup>2</sup>Teequea  
noshineventemparojo isenacashijigueta-

caca guipashiventantatsica. Teequea namatavitanteji, aisa teequea noncantashitatuempoji Iguenquetsatsare Aapani Irioshi. Yamenajiaquenaqueate iriatimpa aisa maasano caquintejia notampaticatacotaquero notsavetantirogueti iroomajaca. <sup>3</sup>Cotanquitsiquea arigueti omanaca Quenquetsarentsi Oganejencatatsica notsavetantajiaquea quempetaca ipashicaptisajitaqueri iguenquejanequi quemajavetavacaroca, iriguentijia omanaptsajiacaroca irirajia peajianquitsineca. <sup>4</sup>Iriraquea Satanashi icantajitica “irioshite quepatsiquitica” ishamponcajashirentajiaqueri maasano teeca iraventempariji Quirishito, aatonijite yagavejajiguitsi intsajiaquero Quenquetsarentsi Oganejencatatsica. Quejetacaquea tee irinejeroji tsirencari shiacaroca iroganejencare Quirishito quempemajatacarica Aapani Irioshi. <sup>5</sup>Teequea naatimpa tsavetantajatsineca, iriguenti notsavetantajiaque Jesoquirishito nocantajiaque iriguenti Imajirojiate maasano. Nantajiaqueneri Jesoshi jero nocantantajiacaca quempejiaca naroguentijiacaca paajanire, intintacaquenatari namitacojiaquempi. <sup>6</sup>Iriraquea Aapani Irioshi irioquea cantanquitsi: “Ontsirenquempaja pitsecamajavetanquitsica”, aisa irioquea tsirencashirentacotacajia quemparoca quero octani iroganejencare Aapani Irioshi otsirencashimpoquierencavaetanaca ivoroqui Jesoquirishito.

#### **Quero icoqueroni**

**itsaroventamajatacarigueti Jesoquirishito**

<sup>7</sup>Quempetacaquea itejitajirogueti cavorejatatsica oganejencaro chomopitoqui ipeacaantajitacaca quepatsi. Mana noquempejiacaro chomo teeca ovegaramajatempaji, cotanquitsiquea oraquea notsavetanquea iroguenti

oganejencamajaro. Teequea taaca opaji nagavejajiguempaji naatimpajia inchiquiojita, cotanquitsiquea yagavejacaamajajaquea Aapani Irioshi notsavetantajiaquerigueti cameetsaniji intsatimentajiqueroniji teequea inchiquiojita nagavejashijiaquempoji naatimpajia, iriguenti agavejacaajiaquenaqueate Aapani Irioshi.

<sup>8</sup>Jero natsipevaaevacaroqueate covaeguishetacaantatsica cotanquitsiquea teequea agavejajiguenuaji, choocatirajana tsavetacotanatsinaqueate Quirishito. Aisa ochoocaveca oshequi noquenquejajiaquea teeca nontsavetemparoji quero noncoqueroni, cotanquitsiquea tee noshoshoguiteteji. <sup>9</sup>Yatsipetacaavaequenaquea caquintejia, cotanquitsiquea tee intsinampirejenaji Aapani Irioshi. Aisa yoncaracaravaevequena, cotanquitsiquea tee irimetojajiguenuaji. <sup>10</sup>Querocagueti noanoaitaquesi icatsimacatsimavaetaquenaquea iquempetacaavaequena Jesoshi inintajiaque irimetojajiaquena, irootaquequea yamenantajicaroca ariuea noquempejiacari natsipevaaevacaguetai. Cotanquitsiquea iriatimpajia teequea iragavejajiguenuaji, irootaquequea itsatantajitacaroca iriraquea Jesoshi icocani ichoocati, iriguenti agavejacaajiaquenaca. <sup>11</sup>Naatimpajia anijajajatsica, nocantacoguitani natsipevaaevacaguetai icatsimajiaquenaguetai, inintavecaquea irimetojajiaqueename irooriji noguijatacomajajaveri Jesoshi. Noquejetantajiacaca cameetsaniji namenacaajiaqueriniji maasano teequea inchiquiojita nagavejajigueji naatimpajia, irioquea agavejacaajiaquena Jesoshi notsino-metojanequi. <sup>12</sup>Notsavetavvaequerigueti iroovepojaca irimetojajique-name, cotanquitsiquea aviatimpajia

pique misantajiaqueri irootaquequea pinchoocatantajajempaca pincoguitampani.

<sup>13</sup>Chooca itioncacojiqueca ocanque: “Notsatajimpi naventanaquempi, irootaquequea noquenquetsatantacaca.”<sup>c</sup> Irootaquequea noquempetantajiacaca naatimpajia imaica, notsamajajaquequea caaviji yagavejamajati Aapani Irioshi, jero nontsavetacotantajiacarica.

<sup>14</sup>Naatimpajia notsamajajiaque iriraquea vochatajirica Amajirote Jesoshi imetojavetacaguetti inquempeta-caajajenaquea naatimpajia aisa, irivochajajena intspatsipaitanajena jenoqui ichoocatigueti iriatimpa, intspatatacantajiaji ironigaantajia pojajaji. <sup>15</sup>Aviguentijia natsipeventajiacaca cameetsaniji inchoocajiaqueniji incaramirincatimentanaqueniji incavintsaajajaquea Aapani Irioshi, iroompapeua inchoocajiaque aisa incaramirincae quequea cantajajiquerineca: “Ariotesaa”, ariqueate iramenajiqueruea iriatimpa caaviji icavintsaajamajanti.

<sup>16</sup>Irootaquequea noquempetantajiacaroca imaica teequea noshimampojanca-majatempaj. Manaquea natsancotsinojia-avetanaca, cotanquitsiquea noshirejiaqui itampishishirentacajitanajana maasano savincaguiteri, ijanaleshiren-tacajitanajana. <sup>17</sup>Notsajiaque ocatica capichajaniqui natsipevaelvecaca imaica, taampina ompeanajempa. Ompampiatantanaquempaca noshine-vaetantajempaca ontaniqui inquitequi oganejencavaetapojajempa, noncoguitampani nonchoocajia pojaje, anaavaeta-jero maasano natsipevaelvecaca.

<sup>18</sup>Irootaquequea teeca nonintamajatan-tajiguemparoji yamenajiguetica imaica, iroguentiquea nonintamajajiaji teeca

iramenajiteji. Maasanotari yamenajigue-tica imaica taampina onteroncaguetana-jempa, cotanquitsiquea oraqueate tequerataca iramenajiteji aatotari oteroncatsi, oncoguitepaniquea onchoocaguiteni.

### Paavoro itsamajaque irimetojanajegueti iroanaje inquitequi

**5** <sup>1</sup>Naatimpajia notsajiaque aricagueti irimetojajiquena oraquea notsinojia imaicatica avejancanajempa, mana onquempetaquemparo isoveajitiroguedi quitsaarentsivanco, cotanquitsiquea onchoocataje notsinojia otsipa impeacaajempaca Aapani Irioshi inquitequi, oncoguitepani onchoocaguiteni, aatoquea oquejetajarotsi quitsaarentsivanco ipeacaacaca caquinte. <sup>2</sup>Ocaniquiquea ocaniqui quepatsiqui noshimampojancavaeca natsipevaeca nonintantajiacaca incanta-shitatajiajenaqueate Aapani Irioshi, onchoocaque notsinojia iroqueraro, onquejetajemparo tsovironaquimajaca inquitequitica. <sup>3</sup>Onquejetajemparo aisa oitsaare noshire, nonquitsaatajempa-gueti aato nocajarashirentajitsi.

<sup>4</sup>Oraqueate choocatirajanaguetti ocaniqui quitsaarentsivanco qui noshimampojancavaevertacaqueate natsipevaeca, cotanquitsiquea teequeate irooqua nonintajigueji irisoveajitero, iroguentiquea noninque nonchoocatan-tapojajemparo notsovironaquitemajaca inquitequitica. Aritarite choocatirajanaguetti notsinoqui teequea nonintajigueji nometojajiaque avejancanajempa notsinojia, iroguenti nonintajia veca nojoquijipanajantero noanoaitanaque inquitequi onchoocaque iroqueraro notsinojia aatoca oteroncatsi. Ocatica-quea ocatica teequea onquishometojane-

teji, cotanquitsiquea ontaniquiquea ontaniqui noncoguitempani nonchoocajaguiteni.<sup>5</sup> Iriraquea peacaajiacajica cameetsaniji anchoocajaguiteni, irio Aapani Irioshi. Irootaquequea aisa tigarancajiacajirica Ishire, atsatantajacaca irinetsanamajaquero maasano otsipapae icantaguequeca icanquegueti quero oncotaquempani oncoramanitapojagueti.

<sup>6</sup>Irootaquequea imaica nocantacoguitani notampishishirentanaque. Notsajiaque choocatirajana nochoocajiaquegueti ocaniqui notsinojiaqui tequeratamajaca nonconoamajatempariji Amajirote.

<sup>7</sup>Imaica tequerata namenajavetempariji cotanquitsiquea notsajiaque oncoramanitapojagueti namenajiaqueri, noquemisanta jiaqueri icanquegueti irajainaquenaquea iriatimpaqui.<sup>8</sup> Irootaquequea teequea nontsaroacajaguemparoji nometojane, caaviji anaaque oganejencia nojocanajero notsino noanoaitanaque ontaniqui jenoqui nonconoamajapojaquempari Amajirote.

<sup>9</sup>Irootaquequea nonintamajajiaquequea nantajiaque inintaguetica iriatimpa cameetsaniji noshinetacaajiaqueparinijite, arigueti choocatirajanagueti notsinoqui ocaniqui quepatsiqui irooca noanoaitanaque ontaniqui jenoqui nonintajiaque nonquempejiaquempaquea imaica.<sup>10</sup> Iriraquea Quirishito yamenamataqueroquea maasanopae taaca opaji antajiaqueca tequerataca ametojajigueji, jero oncoramanitapojagueti arejetapoja jempagueti incapiocantajajajica maasanojia, ancatintitimojiaqueri imajirontamentoqui incantajiacaji taaca ontampaticajiacaji maasano, intsitacajia caji.

#### Aapani Irioshi yamenajiacaji quempetaca teeca ancovaeguishetimatempai

<sup>11</sup>Nocantacoguitani nontsaroacaamajajacari Amajirote irootaquequea

nopanquenapanquenaguitarini maasano caquinteja nontsaroventacaajiaquempari. Iriraquea Aapani Irioshi itsamajatiro arimajaca nocomajamajajica notsavetantimojiaquempigueti teequea namatavijiguempiji. Imaica nonintajiaque pintsajiaque aviatimpajia aisa.

<sup>12</sup>Oraqueate nocantajiaque imaica teequeate nonintajigueji naatimpajia semetacojajatsine noncantajiaquequea noganejencare nocojica nantajiaqueneriquea Amajirote, manaquea noncantajiaquempiquea aatoniji pipashiventacaajiganatsija, manaquea pishineventajia quenaquea cameetsaniji pagavejajiaque niji pimativicacajajiquerirajia cantimanajianaca. Iriatimpajia isemejiaque, cotanquitsiquea manaquea itsaroventamampeajiaca intati.

<sup>13</sup>Oraqueate yamenajiaquenagueti iriatimpajia manaquea noshoncacojiaca, teequea noshoncacojiguempaji, iroguenti nantajaguitinirini Aapani Irioshi noshinetacaajiaquemparinijite. Oraqueate notsatacamajajiaquempi gueti aviguentijia noquenquejacojia queca cameetsaniji pintsaroventamajajianaquemparinijite Aapani Irioshi.

<sup>14</sup>Ipintsamajajiaquenaquea Quirishito icavintsajamajajiaquenaquea, irootaque quea tigarancavaquenaca. Oraqueate imetojaventajiacajigueti Quirishito quempetaca aricaca ametojajiaque aatimpajia.<sup>15</sup> Imetojaventajiacaji maasano cameetsaniji imaica aatimpajia yanijashirentacaajiaqueca aato asavica ventajajiro anintajiaqueca, iroguenti asavicaventajiaque inintaguetica iriatimpa metojaventajiacajica ariquea ipochatanaji.<sup>16</sup> Irootaquequea teeca namenantajiguemparica itsipajia quejetaca yamenajiaqueri teeca intsaro ventempariji Aapani Irioshi, teequea irooqua noshineventimentempariji aricaca yanaajencavaevetaca irooca tee.

Ariquea noquempetacaajiavecari  
Quirishito coramani manaquea namena-  
jiavecari tee iriomajateji, cotanquitsi-  
quea teequea nonquempetajempaji  
imaica.<sup>17</sup> Irootaquequea noncantantajia-  
quempica imaica iriraquea tsipashiren-  
tacarica Quirishito imaica, iroaquerashi-  
retanaji icantanaja. Teequea inquem-  
petajempaji coramani, icantashitatianaja-  
tari, maasano iroaqueratimotanajiritari.

<sup>18</sup> Irootaquequea quempequeroca Aapani  
Irioshi imaica. Itigarancaqueri Quirishito  
iraajavajajinjite, yovetsinrantantajajajica.  
Imaica intintacaajiaquenaquea nontsavetan-  
timojianaqueri maasano irovetsinrantantaj-  
ajemparica.<sup>19</sup> Itigarancaqueriquea  
Quirishito coramani acanqui quepatsiqui  
irovetsinrantajiaqueriniji quepatsiquitica  
cameetsaniji iramenajiaqueriniji quempeca  
teeca incovaeguishetimatempaji. Imaica  
intintacaajiaquenaquea naatimpajia  
nontsavetantero quenquetsatsarentsi  
vetsinrantantsica.<sup>20</sup> Irootaquequea imaica  
itigaranquimenquenaca Quirishito  
noncantajiaquempi intintacaaquempica.  
Manaquea nonquenquetsatacaciajiaquempi  
quempeca irioca cantanquitsica Aapani  
Irioshi. Intsishiatsi ininque Quirishito  
pivetsinrantajajerija Aapani Irioshi.

<sup>21</sup> Iriraquea Quirishito teequea incovaegui-  
shetimatempaji, cotanquitsquea icatsima-  
timenqueri Aapani Irioshi agovaeguishe-  
reja, iquempetacaacari covaeguisheri  
cameetsaniji irimetojaventajiacajiniji  
aatimpajia. Arikea iquempetaquero  
imaica Aapani Irioshi cameetsaniji  
aventaventaiquempariniji Quirishito  
iramenajiacajiniji Aapani Irioshi quempeca  
teeca incovaeguishetimatempaji.

**6** <sup>1</sup>Naroguentijia amitacojiaquempica,  
**6** irootaquequea noncantantajiaquem-  
pica imaica, shoshoi pitsaroventamam-  
peajatijsiate intati, pipomatsajigurotsi-

jate icavintsajacotaquempigueti Aapani  
Irioshi.<sup>2</sup> Icanquetari:

“Oraquea aapojacaguetti savincagui-  
teri ocameetsatantanacaca  
nonquemaquempi, noquema-  
quempiquea.

Aapojacaguetti savincagui-  
teri naantavajimpica, arikea  
nocavintsajitsitimpiquea.”<sup>d</sup>

Imaicaquea imaica jac aapojaca  
ocameetsatantanacaca inquemaquempi-  
quea, imaicaquea aapojaca iraantava-  
jempica.

<sup>3</sup>Teequea nantajigueji taaca opajita  
intivashirentajitaquempaca aatonijite  
icantaguishetacojigana nontsavetantaj-  
aquegueti. <sup>4</sup>Maasanopae taaca opaji  
nantajigui manaquea nocomajamajaca-  
queate cameetsaniji nonigaajiaquempa-  
riniji maasano arimajaca naroguentijia  
intintacaajiaqueca Aapani Irioshi  
nontsavetantaqueroquea Iguenque-  
tsatsare. Manaquea natsiperejaguitaroni  
taaca opajitapae coraquetashijiaque-  
naca: yatsipetacaajitaquenaquea,  
oconoaca nocoguitejacovaejiaca,  
natsipevaecaquea. <sup>5</sup>Itavatavaavaejiaque-  
naquea catsimajiaquenaca, oconoaca-  
quea manaquea isantanatacojitaquena-  
queate. Ochoocaque manaquea itiavaeji-  
apojana icatsimajiaquenagueti. Nantaji-  
aque oshequi, otiavaetanaquenaquea  
pochoquirentsi manaquea aisa aajiae-  
tanaquenaqueate notase. <sup>6</sup>Cotanquitsi-  
quea nococaniquea nocomajamajajica,  
aisa notsamajajaque iroomajatatsica.  
Natsipetacovaecari catsimajiaquenaca,  
aisa nocavintsajamajajiaqueriquea  
maasano, ichoocashirentajiaquenatari  
Ishire Aapani Irioshi yagavejacaajiaque-  
naqueate. Arimajaca nopintsatantamaja-  
jiaca. <sup>7</sup>Nocantacoguitani taaca nocanta-  
jiaque arimajaca notampaticamajaque-

d 6.2 Is. 49.8.

roquea teequea namataajiguempaji. Aisa icocani yagavejacaajiaquenaqueate Aapani Irioshi. Oquejetataca nashimiriintajiac, najiricaquero nogotsirote notincamijempequiqui aisa noguishorite najampatequi aatoniji taaca quempevae-tacagana.<sup>8</sup> Oconoacaquea ishineventajitaquenaquea, oconoacaquea manaquea intajitaque iroguiplashentajitaquena. Oconoacaquea icantaguishetacojitaque-naquea, oconoacaquea itsavetacojitaquena cameetsa. Oconoacaqueate aisa manaquea icantashijitaquenaquea: "Iriguentija amataatsica", cotanquitsiquea nocantacoguitani notampaticama-jataqueroquea teequea namatavijanteji.<sup>9</sup> Oconoacaquea ariqueate icantashijita-quenaquea: "Tee intsajiteriji", cotanquitsiquea maasano notsavetantimojia-queca itsamajajiaquena quero nocojigani. Nococani nopajiavecaroquea nometojane, cotanquitsiquea choocata-tsitrajana nochoocajiaji. Itavatavaajive-taquena, cotanquitsiquea tee irimetojajitenaji.<sup>10</sup> Noshimampojancajiaveca, cotanquitsiquea nococani noshinevaeca. Teequea nashintajiatempaji, cotanquitsiquea quempeca iroguentica naajaranta-aaajiacari itsipapae icaramirinca-vaeque, irooriji nopaguensejanequeri. Teequea taaca opaji nashintajiguempaji naatimpajia, cotanquitsiquea Aapani Irioshi icavintsajamajaquenaquea, jero quempetaca naroguentica ashintajiga-roca maasano.

<sup>11</sup>Corintoquiaquitica, nocamanquempi-quea maasanopae, teequea taaca opaji nontsititmateji, nopintsamajajiaquempi.<sup>12</sup> Teequea nomashitsatapitsatimoji-guempiroji pintsatagantsi nopintsajia-quempigueti, aviguentija quejejian-

quitsi, tee pimpintsamajajianaquenaji naatimpajia.<sup>13</sup> Imaica noncantajia-queMPI quempeca aviroca nirijanijiate. Nonintajiaque pimpintsamajajiaquena-quea, pinquempejiaquenaquea naatim-pajia nopintsamajajiaquempi.

### Aatimpajia aroguentijia itsovironaquite Aapani Irioshi

<sup>14</sup> Quejetaca irira ashintarica caapironcaari aato itsipatacaantari tampishitatsica aisa teeca intampishiteji titonquirontsiqui ishiguitiqui, ari pinquejejiaquempa aato pitsipamajajigari caarica tsaroventari Aapani Irioshi, teequea arikea pinquejetavacaaji-guempaji. Iriraquea comajamajaiatsica ɿarimpate iragavejajiaque intsipatsipa-tuquempari savicaventajigueroa covaeguis-rentsi inquemavacaajiaquempaquea?  
iAatotarite yagavejitsi! ɿArimpate agavejaque tsirencari onconoquemparo pitsecari?<sup>15</sup> Quempeca Quirishito ɿarimpate iragavejaque inconoquempari Veriarie<sup>e</sup> inquemavacaajiaquempaquea? iAatoquea yagavejitsi! Arikea iquempetaca aisa tsaroventajaiatsica ɿarimpate iragavejaque intsipatsipaquaquempari caarica tsaroventatsi inquemavacaajiaquempaquea? iAatotarite yagavejitsi!<sup>16</sup> Oraquea itemporote Aapani Irioshi, ɿarimpate ocameetsataque inchoocata-tantajiguemparo ipeajitica irioshivijirents intati? iAatotarite ocameetsati! Aatimpajia aroguentijia itemporote Aapani Irioshi anijaguitatsica.<sup>f</sup> Icanque Aapani Irioshi:

"Nonchoocatimojiaqueri nontsipa-tsipaquaquempari;  
iriatimpajia impeaqueñaquea Irioskite  
intsaroventajiaquempaca,  
naatimpa nashintajiaquempaci."<sup>g</sup>

<sup>17</sup>Irootaquequea icantantacaca aisa Amajirote Irioshi:

<sup>e</sup> 6.15 *Veriari*. Jero otsipa ivajiro imajirote ampatsinipae, icantajitiri aisa Satanashi. (Iguenquetsatsarequi quimajarerititoncrajiquero *Belial* ocaniqui.) <sup>f</sup> 6.16 1 Co. 3.16; 6.19. <sup>g</sup> 6.16 Irev. 26.12; Jer. 32.38; Esq. 37.27.

"Pintsinampirejajianajerija pisotoa-pitsapanajanteri,  
pomporoguijashijianajempajate.  
Aato pantajiguiro covaeguis-rentsi.

Pinquempejiaquempagueti imaica-naatimpa noshineventajava-quempi."<sup>h</sup>

<sup>18</sup> "Ariquate nompeaqueampaquea Piri,  
nompejaiaquempiquea nirijanijiate  
aisa orijanijia.

Ariquate icanque imaica Amajirote  
Agavejamajatscica."<sup>i</sup>

**7** <sup>1</sup>Imaica, nopintsajiacaca, atsajiaquero ocatica icanqueca Aapani Irioshi irinetsanaqueca, iintsijate ampishoncamajajianaqueroquea maasanopae covaeguisherentsipae irooca aquenquejaguishejiaqueca irooca apeacaaguishejiacaca, maasanopae covaeguishetakeroneca atsino irooca ashire, manaquea antsaroacaajiaquemparija Aapani Irioshi ancomajamajajinaquempa, isaancashirencajitarite.

### Paavoro ishineventajiacariquea Corintoquitica

<sup>2</sup>iPishinetacaamajatenaja pimpintsamajajiaquenajate! Naatimpajia teequea quericaca noncotimajigueriji, teequea querica noncovaeguishetacaimatemppaji, aisa teequea querica namatavijimajigueji. <sup>3</sup>Teequea irooqua nontionquimentajiguempiji noncantajiaquempiquea pipeacaaguishejiacarogueti covaeguisherentsi. Nocantajiaquempiquea coramani nopintsamajajiaquempiquea oshequi. Notsajiaque ancoquempani antsipatavacaajiaquempaquea choocatirajajajigueti irooca ametojajajajegueti ancoquempaniquea antsipatavacaaajiaquempaquea. <sup>4</sup>Notsamajajiaque-

quea piquemisantajiaquenaquea jero noshineventantajiaquempica. Natsipe-vaevetacaqueate cotanquitsiquea nocantacoguitani noshinevaeca, aviguentijiaquea shinetaacaajiaquena.

<sup>5</sup>Irooqua narejejiacaguetti Maseroni-aqui teequea nomagoremagorejiteji, ichoocejiaque icaramirincajiaque catsimajiaquenaca teeca intsaroventajiguempariji Quirishito. Aisa noshoshoguitejiaqua nocanca notsaroaneguintavaetanaquequea. <sup>6</sup>Cotanquitsiquea Aapani Irioshi ishinetacaantatarite ishimampojancajitaguetti, ishinetacaajiaquenaquea namenajiajavajiriguetti icoraquetaji Tito. <sup>7</sup>Teequea aparo noshinejiaquempaji namenajiajavajiriguetti, manaquea aisa icamantajiajapana pishinetacaajiacari iriatimpa, aisa pinintajigi pamenaajajena, pishimam-pojancacovaejiacaroquea notioncacia-quempica coramani pishoshoguitetimen-tajiaqueroquea pintajiaque pinetsanamajajiaqueroquea maasanopae nocanta-jiaquempica cameetsaniji pishinetaca-jaijenaniji. Iroompaquea irooqua noquemavaquitiguiquea noshinemajata-nacaquea nocanca.

<sup>8</sup>Coramani notioncaciaquempiquea noshimampojancacaajiaquempiquea, ariquea noquemacojiaquempiguetti noshimampojanquitsitanacaqueate naatimpa aisa. Cotanquitsiquea teequea oncantacoguitempani noshimampojancaguitempani, ariquate piquempejiaaca aviatimpajia teequea pincantacoguitempani pishimampojancaguitempani.

<sup>9</sup>Imaica shinevaetajana. Teequea irooqua noshineventempajipishimam-pojancajiacaguetti, iroguenti noshinevenca namenaquea pishimampojancavaetanacaguetti pamenaajiaqueguetti pipeacaaguishejiacaro covaeguisheren-

<sup>h</sup> 6.17 Is. 52.11. <sup>i</sup> 6.18 2 Sam. 7.14; 1 Crn. 17.13.

tsipae, iroompaquea picantashitatijaianaja. Oraqueate piquempejiacagueti imaica picantashitatijaianacagueti manaquea pishinetacaajiacari Aapani Irioshi. Irootaquequea noshinevaetanacaca namenaquequea teequea ariquea novashiantacaajiguempiroji pitsaroven-taijacarigueti.<sup>10</sup> Oraquea shimampojan-carentsi inintica Aapani Irioshi irooqua ashimampojancacotaquemparogueti aguempevaere avashiantanajero cameetsaniji irishetacojacajinijite iraajavajaji aatoniji apejaiga. Oratica-quea shimampojancarentsi aato aquenquejacotiro: "Aatomesano noshimampojancame." Cotanquitsiquea irishimampojancashitanaquempagueti intati irirajia teeca intsaroventempariji Aapani Irioshi, mana irimetojashirenta-naque.<sup>11</sup> Aviatimpajia arimaja ishimam-pojancaajiguimpi Aapani Irioshi yamenajiaquempigueti pipeacaagushe-vaeclarquea covaeguisherentsipae, iroompaquea pinintamajajiaque pintsaroventajianaquempari pincomaja-majajianaquempa, osemajencatacaa-ja-naquempi pamenaquerogueti ipeacaaguishejicaca, aisa pitsaroajianaque. Iroompaquea pinintamajajiaquequea noanaque nontsipatsipaquetuquempi, cotanquitsiquea iroquetitaquea pinintamajatanaquequea pintampaticamajajia-queroquea nocantajiaquempica. Imaica-quea imaica pinetsanamajatanaquero-quea maasanopae, tee anejeroji querocampate incatsimatimentajia-quempica Aapani Irioshi, jac comajama-jajiaquempica. <sup>12</sup> Oraqueate notionca-jaquempica teequea aparo nonquen-quejajigueriji irira peacaagushetanqui-tsica covaeguisherentsipae, iriguentica aisa ishimampojancacaacaca. Aviguenti

noquenquejajiaque aisa noninquequea pintsamajajiaque yamenaquempitari Aapani Irioshi arimajacaca pipintsama-jajiaquenaquea.<sup>j</sup>

<sup>13</sup>Imaica noquemacojiaquempiquea piquempejiiquerogueti imaica pishine-ventajiaquena, irooqua shinetaacaajia-quequea, cotanquitsiquea caaviji noshinevaetanaca namenajavajirigueti Tito cameetsa icoraquetaji ishinevaeta-poja, aviguentijiaquea shinetaacaajiacari, paajjavaqueri cameetsa pinetsanajava-queriquea.<sup>14</sup> Oraquea tequeratagueti nontigaranqueriji Tito oraniqui aviatim-pajiaqui nocanqueri: "Noshineventajia-cari tsaroventajatiatsica Corintoquiaquitica, notsaque cameetsa iraajavajempiquea." Arikea imaica yamenajiaquempigueti itsaque arimajaca nocamanquerica teequea namatavijeriji, manaquea noquempejiaqueempi aviatimpajia teequea namatavitempiji.<sup>15</sup> Imainaquea imaica iriatimpa caaviji ipintsajia-quempi, yamenaquequea piquemisanta-majajiaqueriquea taaca opaji icantajia-quempica, aisa paajjavaqueri cameetsa, pishineventajiavacari.<sup>16</sup> Naatimpa aisa noshineventajiaquempi oshequi notsaque pinintajiaque pincoquempani pisavicaventajiaquero inintaguetica Aapani Irioshi.

### Icavintsajantajiaque Maseroniaquitica

**8** <sup>1</sup>Imaica, napitsaroventarijiate, noninque noncamanquempiquea quero icocani Aapani Irioshi icavintsaja-jiaquerigueti tsaroventajatiatsica capiocau-tenquitsica quinteninintipsipaequi Maseroniaqui, jero arikea iquempe-jiaca iriatimpajia ipintsantajiacaca.<sup>2</sup> Yatsipejiavequea iquemisantajiaque-gueti, cotanquitsiquea ishinejiaca

<sup>j</sup> 7.12 Ochoocataquetari otsipa paperi iguenquetsatsarequi guiriego ocanti ocaniqui: "pintsamajajiaque yamenaquenatari Aapani Irioshi arimajacaca nopintsamajajiaquempi."

icanca. Teequea irashintajavetempaji cotanquitsiquea icavintsajantajiaque quempeca iroguentica yashintajiac. <sup>3</sup>Namenaquequea naatimpa manaquea yaagarantajiaquequea imentaquitsitepae itigarancacaantajiaqueneri irapitsarovertarrijate coguitejacovaetanquitsica. Teequea irioqueate iraagarantajigueji choocagarantajatsica ichocataji teeca incoguitejacotempariji, yaagarantajiaque aisa icoguitejacovetacaca iriatimpajia. <sup>4</sup>Iroompaquea inchiquiojita icantacantajiaquenaquea inintajiaque-gueti inquejejianaquempaquea iriatimpajia incavintsajajiaqueri irapitsarovertarrijate guntenijiatsica Jerosarequi. <sup>5</sup>Cotanquitsiquea teequea aparo irinintajigie incavintsajajigueriji irojocagarantajiaqueneri imentaqui, manaquea inintamajajiaque irantajiaque taaca opaji ininque Aapani Irioshi, aisa inintamajajiaque iramitacojiaquenaquea naatimpajia aisa, irootaquequea ininque Aapani Irioshi. Yanaitsipojanaroquea noquenquejajiavetacaca. <sup>6</sup>Jero noquen-quetsatacacaancarica Tito iroanaque-queate oraniqui iramijajatempi paagarantajiae itsipa pimentaqui-tsitepae pintigarancajajenerija papitsarovertarrijate pinetsanajajerojate pipariajiavetanacaca coramani icantajiaquitimpica yoquitigueti yamenajiaquitimpigueti. <sup>7</sup>Aviatimpajia caaviji picojiaca, caaviji pitsamajajiaque inetsanamaja-queroquea Aapani Irioshi maasanopae icantaguetica. Pitsamajajigui pitsavetantajiaquerogueti Iguenquetsatsare Aapani Irioshi, aisa pitsamajajiaqueroquea queroca ocanque. Pishineventamajacaroquea pantavaequenerigueti Amajirote, manaquea aisa pipintsamajajiaquena-

quea. Imaica noninque aisa pinetsana-majaquero ocatica pincavintsajantegueti pojocashigueta canarigueta itsipapae.<sup>k</sup>

<sup>8</sup>Cotanquitsiquea teequea noncantajiguempiji: "Iintsijate pinetsanamajajiaqueroya." Manaquea noninque nonquenquejaca jiaquempiroquea quero icojiacani icavintsajantajiaqueguedeti itsipa papitsarovertarrijate pinquejetantajianaquemparica aviatimpajia, irootarite intsamajatantajitanaqueemparoca arimajaca pipintsatantajianaca. <sup>9</sup>Pitsajiaquequea icavintsajamajapem-piquea Amajirote Jesoquirishito. Yashintamajavetacaroquea iriatimpa maasano coramani, cotanquitsiquea yojocapanajantiro iquempetacotapoja-cari teeca irashintimatempajia cameetsa-niji incavintsajajiaquempiniji aviatimpajia, inquempetacajaaquempiniji ashintavaejati-sica.

<sup>10</sup>Imaica namenaque cameetsa pinetsanajajiaqueroquea pipariajianacaca coramani cameetsaniji pishinejiaquem-paniji, aviguentijiaquea nintajianqui-tsica iroaqueragueti paagarantajajeneri pimentaqui-site, iroompaquea ariquea pipariajianacaroquea. <sup>11</sup>Imaica pincoquempanija paagarantajiaquene-rija pinetsanajajiaqueroquea pipariajiana-caca aviatimpajia iroaqueragueti, pishineventajiacarotari. Inchiquiojijate pinquenquejajiaqueroquea aviatimpajia querocaca pagavejajiaque paagarantajiaque. <sup>12</sup>Arimajacagueta netsana pininta-majajiaque pojocantajiaquequea, irishineventajiaquempiquea Aapani Irioshi querocaca pojocantajiaque. Iriraquea ashintamajatanquitsica irojocantajiaquequea oshequi. Iriraquea teemajaca irashintempajia capichajaniqui

<sup>k</sup> 8.7 Pamenero 1 Co. 16.3. Icantajiaque Corintoquitica inintajiaque impintsatacojiaquempari irapitsarovertarrijate Jerosarequitica iraagarantajiaqueneri imentaquitsitepae intigarancajiaqueneri.

irojocantaque, teequea incanteji Aapani Irioshi pojocantajiaquequea teeca pashintempaji.

<sup>13</sup>Teequea ariquea noncantajiguempiji pincavintsajajiaquerijate itsipapae papitsaroventarijate cameetsaniji onchoocauenijite icoguitejacojiacaca iriatimpajia ariquea aviatimpajiaquea atsipejianquitsineca pincoguitejacovae-guitempani. <sup>14</sup>Iroguenti noninque pinquempetavacaajiaquempaquea. Imaicaquea imaica aviatimpajia pashintajiac aero picavintsajantajiacarica papitsaroventarijate, cotanquitsiquea iroompaquea ariqueate avirogueti coguitejacojianquitsineca irioqueate cavintsajajajempineca. Pinquempetajia-quempagueti imaica ariquea iroguenti manaquea pinquejetavacajiaquempa. <sup>15</sup>Otioncataritarie: "Iriraquea aamajatan-quitsica teequea onchoocatajeji choocatatsica. Arikea iquempetaca aanquitsica capichajaniqui teequea interoncactempaji."<sup>17</sup>

#### Iroajate Tito iramenajajateri

<sup>16</sup>Noshinevencari Aapani Irioshi namenaquequea iquenquejacaqueriquea Tito iquenquejacojiaquempi iquempetaquenaquea naatimpa noquenquejacojiaquempigueti. <sup>17</sup>Jero ishinevaetantacaca nocanquerigueti nonintaveca iroajateja iramenajia-quempi, irootaquequea inintamajaque iriatimpia. <sup>18</sup>Nontigarancajiaqueri aisa itsipa papitsaroventarite intsipatana-quempaca. Ishineventamajajiacari maasano tsaroventajatiatsica capiocapini-jatiatsica, icamantacojiaqueriquea yamenajiaqueriquea caaviji itampishiventamajauero Quenquetsatsarentsi Oganejencatatsica. <sup>19</sup>Cotanquitsiquea teequea aparo onchoocateji ocatica,

inintacaajiaqueriquea aisa nontsipatana-jempari oncoramanitapoja jegueti naajianaquenerigueti imentaquipae pojocashijiaquenemparica coguitejacoji-anquitsica. Arikea nonquempejiaquem-paquea imaica cameetsaniji iramenajita-queriniji Amajirote caaviji icavintsajan-tavaeti arikea irishineventajitaquem-pari, aisa cameetsaniji iramenajitaque-roja arimajaca nonintajiaque naatim-pajia noncavintsajajiaqueriquea apitsaroventarijate. <sup>20</sup>Noshinevaeca intsipatsipaitanaquenaquea aatoniji icantaguishetacotimentanaritsi imentaqui iriraquea aagarantajiaque-rica. <sup>21</sup>Teequea aparo nonintajigueji iramenajiaquenaqueate Amajirote nocomajamajaca, iroguentiquea nonintajiaque intsamajajiaque caquinteji aisa.

<sup>22</sup>Imaica nontigarancaqueri aisa itsipa apitsaroventarite intsipatsipaitanaquem-pari, namenamajajiaqueriquea iriguenti caavijica itsaroventamajatari Aapani Irioshi. Aisa nocamantaqueri caaviji pinintajiaque pincavintsajajiaqueri papitsaroventarijate, irootaquequea inintantacaca iroaquite oraniqui iramenajiaquitempi. <sup>23</sup>Iricatica Tito, iriguenti notsipamajare nantinirigueti Quirishito noconoajiaquempigueti. Irirajia apitsaroventarijate intsipatsipai-tanaquempaca iriguenti itigarancajia-queca tsaroventajatiatsica capiocapini-jatiatsica gunteninintsipaequi. Iriatimpajia caaviji itsaroventamajatariquea Quirishito. <sup>24</sup>Irootaquequea noncantan-tajiaquempica imaica netsanaja paamajajiaavaqueri cameetsaniji intsajia-queniji maasano tsaroventajatiatsica capiocapini-jatiatsica arimaja notampaticamajaueroquea nocantajiaquerigueti caaviji pipintsamajatantaca.

**Incapiocajiaqueri imentaquitsite  
intigarancacaantajiaqueneri  
irapitsaroventarijate**

**9** <sup>1</sup>Nocantajiaqueuempi imaica cotanquitsiquea notsaque teequea pincoguimentacojiguemparojo nontioncajiaquempiquea noncantajiaquempi paagarantajiaquenerijate pimentaquitsitepae papitsaroventarijate. <sup>2</sup>Notsamajaque caaviji picavintsajantajiaque. Nocantantajiacarica apitsaroventarijate Maseroniaquitica pinintamajajaquequea aviatimpajia quintenijiatsica Acayaqui paagarantajiaqueneriquea pimentaquitsitepae Jerosarequitica, pipariavaetanacaroquea otsipaniqui ajagantsiniqui. Oraqueate iquemajiaquegueti iriatimpajia ariqueate intintagarantajiaque inquempejiaquempiquea aviatimpajia iraagarantajiaqueneriquea iriatimpajia aisa. <sup>3</sup>Irootaquequea imaica nontigarancantajiaquemparica apitsaroventarijate iramijiaquempiquea paagarantajiaquerigueti aatoniji manaquea intati noncamanqueri Maseroniaquitica pinetsanajiaqueroquea maasanopae. <sup>4</sup>Noncoraquetquetarite namenajiaquempiquea aricaquea nontsipagarantajiaquempari Maseroniaquitica. Oraqueate noncoraquetcoraqueivequempagueti arigueti namenajapirojempiquea teequea pinetsanamajajigue-roji nocantajiaquerica, manaquea ovashiventajavaetanaquenaquea, ariqueate pinquempejiaquempaquea aviatimpajia ovashiventajavaetanaquempiquea. Iroompaquea noncanque: “Arimpate nocanque irinetsanajiquerojate maasanopae.” <sup>5</sup>Irootaquequea namenantacaca aricaquea cameetsaca nontigarancajiaqueri iriatimpajia apitsaroventarijate iriquetitaquea oahoaitanquitsineca iramenajiaquempiquea iramijiaquitempi paagarantajia-

querigueti pimentaquitsitepae pinetsanamajajiaqueroquea picantajiaqueca coramani. Pinquempejiaquempagueti imaica intsajiquereroquea inchiquiojita aviatimpajia pinintajiaque pincavintsa-jantajiaquequea, teequea naatimpajia cantajiguempironeca.

<sup>6</sup>Iintsija pinquenquejajiguerojate ocatica:

Quericaca vintyacatsica capichajaniqui,

capichajaniqui iraaje.

Iriraquea vintyacamajatatsica, oncarapiovaetanaquequea iraaje.

<sup>7</sup>Inchiquiojiquea pamenajiaquempa aviatimpajia querocaca incarajigueni pimentaquitsite pinintajiaque pojocagarrantashitantempa, irooqua pojocantajigue; cotanquitsiquea aatoja picatsimajencatacojiguiritsijate pojocantajiaquegueti. Aisa aatoja irooqua pojocantantajiga pamenajiaquegueti incantajitaquempi: “Pojocantetsija.” Iriraquea Aapani Irioshi iriguenti ishinevenca shinevencaroca irojocantavaetaquequeate. <sup>8</sup>Yagavejaquequea Aapani Irioshi incavintsjamajajiaquempi cameetsaniji pagavejajiaqueniji pincantacoguitempani pincavintsa-jantajiaque aviatimpajia aisa. Irioquea oshequiajempirone pincoguitejacojia-quempaca onchoocatantaquempaca otsipa cameetsaniji pojocagarantajiaqueneri coguitejacovaetanquitsica.

<sup>9</sup>Otioncacatari:

“Ipintsatacotacari coguitejacovae-tanquitsica yojocaguetaqueneri; itampaticamajataquero yoquiero, ariquea incantacoguitempani.”

<sup>10</sup>Iriraquea Aapani Irioshi iriotaquequea jocaqueneri vintyacatsica oitsoqui aisa ishecaguetacaca, ariquea inquempetacaaquempiroquea aviatimpajia aisa, iroshequiaqueroquea pashi pincavintsa-jacomajatantanaquemparica itsipajia.

<sup>11</sup> Arimajaca iramitacoguetaquempiquea Aapani Irioshi onchoocamaqueniji cantashitatiaguetatsica cameetsaniji pagavejajiaqueniji pincoguitempani pincavintsajantajaque. Oraqueate arejetapojaquempagueti naajianajenerigueti paagarantajiaquenerica papitsarovertarrijate irishineventamajajitaquempriquea Aapani Irioshi incantajiaque caaviji ipintsamajatantaca. <sup>12</sup> Aritarite pojocantajiacanarica, teequea mana pojocajigueneri intati icoguitejacojia-caca igomajamajarejia Aapani Irioshi, irooqua onquenantaquempaca aisa incantantajiaquemparica: "Arioteesa, Aapani." <sup>13</sup> Arikeate iramenajiaque-gueti pintigarancacaantajiaqueneri pimentaquisite intsajiaque teequea pimashitsajiguempaji manaquea pipintsajiacariequa iriatimpajia aisa maasano tsaroventajatisca, ariquea irishineventajiaquempriquea Aapani Irioshi iramenajiaquetari tee pincantashijiguempaji intati: "Noquemisanta-quero Quenquetsatsarentsi Oganejen-tatsica tsavetantaquerica Quirishito", iroguentiquea iramenajiaque arimaja pitsaroventamajajiacari Quirishito pinetsanamajajeroquea icanqueca. <sup>14</sup> Arikeate iramanacoventajiaquempiquea impintsamajajiaquempi iramenajiaquempigueti picavintsajajiaqueri, iriguentitari chagashirentajiaquempiquea Aapani Irioshi piquempetantajiac-roca imaica. <sup>15</sup> Jaameshiatsi ashineven-tajianaquemparija Aapani Irioshi, ancantajiaqueri: "Arioteesa", caavijitari ipintsamajatantaca!

### Icanque Paavoro iriguenti tigarancaqueri Quirishito

**10** <sup>1</sup>Imaica naatimpa Paavoro noncantajiaquempigueti nonin-tacotaquempica, noninqueuea nonque-jetaquempari Quirishito yatsipetacovae-

tagueti icavintsajantigueti. Icantacojive-taquena notsaroanaque nochoocatimoji-aquempigueti, cotanquitsi nochoocaque-gueti osamani notampishivetaca.

<sup>2</sup> Nonintaquequea nonchoocatimojia-quempigueti aato noshiramparitimoji-guimpi noncantomajajiaquempiniji, irirampani jivetanquitsica noguijataco-tiro iquenquejaguetaquica caquinte, arica irioquea noncantomajajipojaque.

<sup>3</sup> Arimajasacanica naroguentijia caquinte, cotanquitsiquea teequea nonquempejiguempariji itsipajia caquinte nashimirintempagueti. <sup>4</sup> Nashimirintamentopae teequea onquejetem-paroji yaventajiacaca teeca intsaroven-tempariji Aapani Irioshi, iroguentiquea navenga itampishica Aapani Irioshi, nagavejantacarica tampilijiavetatsica.

<sup>5</sup> Nagavejajiaqueriquea maasano teeca irishineventemparoji Iguenquetsatsare Aapani Irioshi manaquea itampishitashi-javetavacaroquea. Jero yagavejacaantajiaquenaca cameetsanijite nomajereta-cajiaqueriniji maasano ticatcaaqueri-neca itsipajia aatoniji itsajiguiri Aapani Irioshi. Iquenquejaguetaqueca caquinte oquejevecariequa ashimirintavecajica aajiavaqueca. Yagavejacaajiaquenaquea aisa Aapani Irioshi nagavejajiaqueriquea quenquejagushejiatsica covaeguisherentsi cameetsaniji aatoniji iquenquejagushevaetajitsi irioquea inquemisantamajajianaque Quirishito.

<sup>6</sup> Iroquetataquea noninque pinquemisan-tamajajianaqueriquea, iroompaquea noncantimentsijiguempriquea irirajia maasano pigatsatagarica.

<sup>7</sup> Aviatimpajia pijijiaqueji pitsajiaque, cotanquitsi tee pamenamajajigueroji. Cotanquitsiquea choocagueti amenan-quitsineca iriguenti tigarancaqueri Quirishito, iintsijate intsque iriatimpa itigaranquitsijianaquea naatimpajia aisa. <sup>8</sup> Choocagueti quenquejashitanquitsica:

“Mana isemetaque”, nocantajiaquempi-gueti iriguenti tigarancajiaquenaquea Amajirote, cotanquitsiquea teequea ovashiventajenaji nocanqueca, arimaja-catari iriguenti tigarancajiaquenaquea yagavejacaajiaquenaqueate nontsatacayaquempi arimpaqueate pintaroven-tamajajianaquempari pintspatavaca-a-majajianaquempa, aatoquea nopeacota-cajaiguimpiro pitsaroventajaciagueta-pincampanajante pintsinampirejavaca-a-jianaquempa. <sup>9</sup>Teequea nonintejionquempetimojiguempi notioncajia-quempi nomintsaraojiaquempiniji.

<sup>10</sup>Iconoagarantajiacatari icantajiaque: “Oraquea itioncajianaqueca Paavoro ooqueate itampishijaniquique icatsima-jiaquenaquea, cotanquitsiquea oraquea ichoocagueta quempeji itsaroaque teequea intampishiteji, aisa teequea intsatimateji inquenquetsateji.” <sup>11</sup>Cotan-quitsiquea imaica noncantajiaqueriquea irirajia cantajanquitsica imaica, noncoraquequeguetai oraniqui aviatim-pajiaqui, ariquestate nonquempetacaajia-quemparo notioncajiaquempica nontam-pishimajaquequea noncanquempa.

<sup>12</sup>Naatimpajia aatoja noquempejigartsi irirajia aventajatsica cantajatsica: “Notsajiaque nocanca”, inchiquoitaja icantajiaja iriatimpa. Iriatimpajia yamenavacaavetaca ijiqueji irioji cameetsari, cotanquitsiquea teequea intsatimateji taaca opaji cameetsata-tsica, aisa taaca opaji covaeguisheta-tsica. <sup>13</sup>Naatimpajia teequea nonintajigueji nosemejigue nonquempejiaquem-parimequea iriatimpajia. Oraqueate nocantacojiaquerogueti nantajiaquene-rica Amajirote, teequea nonquenacaa-shitemparoji, manaquea tampatica noajiaquero, iriguenti cantanquitsi Aapani Irioshi iroqueragueta queroca-

gueti oraniqui nonchoocajiaque nontsavetantajiaquerogueti Iguenquet-tsatsare, jero arejetantajiacaroca oraniqui aviatimpajiaqui. <sup>14</sup>Oraquea aatomegueti notsavetantimojiguimpime-quea, ariqua iroguenti manamequea noncanqueme intati naatimpajia tsaroventacaajiaquempi, cotanquitsiquea teequea ariqua nonquempetem-pajji imaica, naroquetitarite itigaranca-queca Amajirote nontsavetantimojiaqui-tempiroquea Quenquetsatsarentsi Oganejencatatsica tsavetantirica Quirishito. <sup>15</sup>Teequea ariqua naitsiva-cotantimateji noncantajiaque naroguen-tijia tsaroventacaajiacari itsavetantimo-jiaqueca itsipa. Imaica manaquea nonintamajajiaque pintaroven-tamajajia-naquempari cameetsaniji nontsatacayaquempiniji otsipa nontampishitaca-a-jiaquempiniji arimpaquea pintaroven-tamajajianaquempari. <sup>16</sup>Iroompaquea namenajiaquempigueti pinquempejia-quempa quea imaica, ariqua noanoai-taque osamanipaequi tijacofajisano ontaniqui ichoocajiaqueguetai tequera-taca intsavetantimojiteriji noncamanta-queriquea iriatimpajia aisa Quenquetsa-tsarentsi Oganejencatatsica. Manaquea nonquempejiaquempa quea imaica aatoniji nopolajavacovaetantsi. <sup>17</sup>Irira shineventacatatsica, iriguenti irishine-ventacotimentempa Amajirote.<sup>m</sup>

<sup>18</sup>Aatoquea irio ishineventajita irira cantacotatsica: “Caaviji nonetsanamaja-tiro.” Iriguentiquea irishineventajitempa incantacotaqueca Amajirote: “Caaviji inetsanamajatiro.”

Paavoro aisa irirajia  
tsavetantamampeajatsica

**11** <sup>1</sup>Teequeate nonintavetempajinonquempetacaquempariquea

aventacovaetatsica intati, cotanquitsiquea pantsipetacovaejaquenaquea nonquempetaquempagueti imaica. <sup>2</sup>Oshequi nagamajacotaquempi, irira Aapani Irioshi quejetacaquenaro, namenaqueroquea naroguenti tsaroven-tacaajaqueempica jero nonintantacaca apaniro poamajaqueri Quirishito cameetsaniji oncoramanitapojaquaguetai incoraquetajategueti iramenajapojem-piniji comajamajajiaquempiquea quempejiaquempiqueate majinaro comajamajatatsica, aparo oguijaqueri manquigataquemparoneca. <sup>3</sup>Pinquentejerija coramani iriraquea camaarini<sup>n</sup> manaquea yamatavijaquero Evani icovaeguishevaetacaacaroquea, irootaquequea notsaroantacaca imaica namenaque choocagueti irirajia amataa-jiatsica inquempetacaajiaquempiquea aviatimpajia aisa, iroompaeua pinque-nashijianajempa aatoquea quisho poajajiritsi Quirishito, aatoquea pitsaroventajajari. <sup>4</sup>Namenajiaquempi-tari iriguenti pishineventamajajiaca iriatimpajia. Oraqueate itsavetantajiae-carigueti Jesoshi teequea intampaticate-roji iroajigueroji, quempetaca iriguen-tica itsipa itsavetantajiaque. Arikea oquempetaca aisa manaquea pinintajia-quequea irishaquiajapojempiquea itsipa teeca irioquea Ishire Aapani Irioshi choocashirentajiaequeempica iroaqueraguetai. Aisa piquemisantamajajiaguitirini tsavetantajiavecaroca otsipa oganejen-cavetatsica teeca onquempetemparoji Quenquetsatsarentsi Oganejencatatsica notsavetantimojiaquempica piquemisan-tajiaqueca iroaqueraguetai. <sup>5</sup>Cotanquitsiquea namenaque teequea iranaajigue-naji irirajia tsavetantajatsica amenajatatsica iriguentijia itigarancanemajaca

Jesoshi. <sup>6</sup>Arica tee nonquenquetsave-tempaji cameetsa notsavetantigueti, cotanquitsiquea oraqua notsaquea cameetsavaeque onaque. Irootaquequea pamenantajiaquenaca notsatacaajia-quempigueti, noguiconejamajataquem-piro.

<sup>7</sup>¿Arimpate pinejaquero tee oncameetsateji teegueti novegaratacayaiguempi-roji notsavetantaquempirogueti Quenquetsatsarentsi Oganejencatatsica itigarancaqueca Aapani Irioshi? ¿Arimpa pinejaquero iroguenti coguisherentsi teegueti nanaajencajapoa-jaquempi, aviguentiquea nanaajencata-caajapoaque? <sup>8</sup>Aisa manaquea quempeca iroguentica naapitsajiaqueri-quea imentaquitsitepaes tsaroventajia-tsica osamanipaquitica, yojocajiaque-natarite cameetsaniji onchoocaueniji nocoguitejacocaca nagavejaquenijite nontsavetantimojiaquempiniji aviatim-pajia intati. <sup>9</sup>Quempeca nocoguitejacovaegueti teequea arikea naseresere-tempiji namanajiaquempiquea. Oraqueate icoraquecoraqueiquegueti apitsaroventarijate Maseroniaquitica arikea yojocajiaquenaquea. Arikeate noquempetaqueroquea coramani teequea nonintejis naseresejiaquempi, imaica nococani noquempetaqueroquea imaica. <sup>10</sup>Notsamajaquequea iriguenti nintacaquenaquea Quirishito nontsave-tacoqueriquea, arikea oquempetaca aisa notsamajaque teequea namata-guempaji. Irootaquequea noncantantaji-aquempica imaica naatimpa aatoja yojocumajiganatsi imentaqui quintenijiatsica Acayaqui, aatonica nonintitsi, iroguentiquea noninque nontsavetanti-mojiaquempiquea intati. <sup>11</sup>¿Queroquea ococani noquempetantacaroca imaica?

<sup>n</sup> 11.3 *camaarini*. Pamenero Jen. 3.1-7. Iriraquea Satanashi yonigaacaroquea Evani, iquejetapojacari camaarini.

¿Arite teete nompintsamajajiguempiji? iIriraquea Aapani Irioshi itsamajaque arimajaca nopolintsamajaqueempiquea! <sup>12</sup>Cotanquitsiquea arimpaquea nonquempetanaqueroqueate imaica aatonica nonintsijiguimpirtsu pimenta- quitsite cameetsaniji aatoniji yagavejajiguitsi semejatiatsica tsavetantamampeaj- atsica intati incantajiaque: “Manaquea noquempejiacari Paavoro notsavetanta- jiaquegueti.” <sup>13</sup>Iriguentijia amatavijan- tajatsica, teequea irioquea tigaranque- rine Aapani Irioshi, manaquea ipeamampeajiacia intati itigarancanejia Quirishito. <sup>14</sup>Iriatimpajiaquea caaviji iquempejiaca imaica, quempeca Satanashi ariqueate iquempetamampe- jaariequa irashivantite Aapani Irioshi iramatavijanquenijite. <sup>15</sup>Arikeate iquempetacaquea iriatimpa imaica, jero irirajia antajiguinirica ariquea inquem- pejaquempa iriatimpajia aisa impeamampeajiaquempaquea tsatacaan- tantajiguiroca comajatagantsi, cotanqui- tsiquea incatsimamajajitaqueriquea oncoramanitapojaquegueti, yamatavima- tavitantavaequetari.

#### **Paavoro yatsipeventavaetacaroquea itsavetantavaetaquegueti**

<sup>16</sup>Noncantsijajempiquea aisa aatoja pijijiguitsijate ariji nopoligataca intati, pantsipetacovaequenaquea nonquempetaquempagueti imaica cameetsaniji naventacovequitempanijite capichajani- qui. <sup>17</sup>Oraquea nocanqueca imaica teequea irioquea cantenane Amajirote inchiquiojitaquea nocanque naatimpa naventacoquempagueti quempequena- quea naroguentica shoncacori. <sup>18</sup>Quem- petaca irirajia catsimajiaquenaca icantaguishetacovaequenagueti icantacoguitani yaventacojica, irootaquequea namenantacaca aricajate nonquempetaquempajate naatimpa

naventacotempajate. <sup>19</sup>Aviguentijia tsajiyavetatsica, patsipetacotantavaevecaria irirajia shoncacorijia, aisa pishine- ventajiacari. <sup>20</sup>Aisa patsipetacojica yomperaperreira queempigueti quempeca irioca ashintajiguimpi, aisa yamanamanavaequeempiquea cantashi- tatiaguetanquitsica taaca opaji inintajia- queca, manaquea aisa yanaajencavaeta- quequea, ariquea aisa yapatoncavorotsi- jiguimpi. <sup>21</sup>Aricaquea pintajiaveca aviatimpajia nonquempejiaquemparime- queate iriatimpajia, cotanquitsiquea teequea nagavejeji, teequea ariquea nonquempejiguempariji iriatimpajia itampishijiguigueti.

Manaquea noncantajiaquempiquea aisa taaca opaji yaventacojica iriatimpajia, ariqueate nonquempeta- quempa naatimpa naventacovaequem- pajate (irooguenti noquenquetsaque quempeca naroguentica shoncacori). <sup>22</sup>Iroogueti yaventacojica icantajiaque iriguenti evereojoia, ariqueate noquem- petaca naatimpa aisa naroguenti evereo. Iroogueti icantajiaque iriguenti ishiraerijia, ariqueate noquempetaca naatimpa aisa naroguenti ishiraeri. Iroogueti icantajiaque iriguenti ichoviquijianaqueca Averaameni, naatimpa naroguenti aisa ichoviquini. <sup>23</sup>Arica icantajiaque iriguenti yantajia- quene Quirishito, ariqueate noquempe- taca naatimpa aisa iriotaquequea nantaquene, cotanquitsiquea caaviji nanajaiqueri iriatimpajia. Manaquea noquempetacari shoncacotatsica noquenquetsaquegueti, cotanquitsiquea caaviji nanajaiqueri nantiniri Amajirote. Aisa caaviji nanaaque naatimpa itavatavaavaetanaquequea, aisa isantanatacojitanaquenaqueate. Aisa caaviji nanaaque natsipevaeguita- niqueate irooshivetapojaca irimetojajite- namequea. <sup>24</sup>Ipasapasavaetaquenaquea

nogonorojia joriojia agompiacuitana ocaravaeque 39. Yaitositajanaquea aisa yarejetacaavaetanaro 5. <sup>25</sup>Ariquea oquempetaca aisa itavatavaajitaquena- quea inchaquijiqui, yarejetacaavaeque- naro 3. Itsipajia itsinatsinavajejaquena. Ocarataque 3 notsitijaatacavetanaca quenajarontsiqui noquenajatantavetana- caca. Aisa notsitijaatacotanaquegueti ontaniqui niganquijaqui inirojani quentijani teequea noncatimatajempají nagatsitajempají, manaquea nopolsec- cotanaque apajencaro aisa nocantaco- guitani namajaguitini apajencaro savincaguiteri. <sup>26</sup>Oshequi noquenague- tanaque. Ochoocaguetaque covejenca- guetatsica: chooca covejencatatsica ojaquiniqui, chooca aisa aitsitantague- tatsica senacashitaquenaca. Iriraquea nogonorojia iquejetsijianacaquea iriatimpajia aisa, iroshivetapojaca irimetojaquename. Arikea iquempe- jiaca itsipapae caquinteja teeca irioquea nogonorojia. Choocaquea covejencatatsica nochoocaquegueti quinteninintsipaequi, aisa noanaque- gueti teegueti inchoocamajateji caquinte, chooca aisa noquenajatana- quegueti inirojaniqui quentijaniqui. Aisa arikea iquempejiaca cantajavetanqui- tsica iriguenti tsaroventajatiatsica inintaji- aveca irimetojajiaquename. <sup>27</sup>Natsipe- vaeca nocanca nantaquegueti, natsipe- vetacaroqueate taaca opajitapae. Otiavaetanaquenaqueate novochoqueire, aisa otavaetanaquenashiati notase aisa nomire. Oconoacaquea nosavicasilitaca- queate intati teequea noshecatimajani- quitempají. Natsipevaecaro catsincagui- teri, aisa nocajaratinsinovaetanaque. <sup>28</sup>Teequea aparo nantsipetemparoji ocaticapae, manaquea oavaetanaque savincaguiteriqui noquenquejacojiaque- riquea aisa maasano tsaroventaripae noshoshoguitetimentajiacari. <sup>29</sup>Queri-

caca noquemacoqueca teeca intampishi- teji irooca yojoquijitaca oquejetimota- quenaquea naroguentime joquijitan- quitsi. Quericaca noquemacoqueca icovaeguishetacijaicari manaquea ocatsishirentavaetanaquena.

<sup>30</sup>Oraquea naventacoquempamegueti iroomecaquea naventacoquempame namenaquequea teequea nagavejeji.

<sup>31</sup>Iriraquea Aapani Irioshi Iriri Amajirote Jesoquirishito itsaque teequea namatavijanteji. Iriatimpa caaviji yoganejencamajataca ancoquem- panija ashineventajiaquemparija.

<sup>32</sup>Oraqueate coramani nochoocagueti Tamashicoqui iriraquea iramajirore majirontatsica Aretashi itigaransquitsijia- vecari igoaretajiate isenacashijaquena- quea sotomorontsiqui yanquitsaegota- tantarogueti mapi ocapiocagueti tsovironaquipae iraajivaquename- queate irisantanatacojiaquenamequea. <sup>33</sup>Cotanquitsiquea iriraquea napitsaro- ventarijiate itetsijianaqueate cantiriqui yoguisotoacotsitana ishagaraquirejaji- querogueti yoguivarintsajacojiaquena- quea yovanquuirejacojiaquena antaque- ronta noshiapitsatapanajantari.

### Paavoro itsavetantajiro yonigaimojiquerica

**12** <sup>1</sup>Teequea nomintavetempají nosemetaque namenaquequeate nosemevequempagueti arikea queroca noncoqueroni, cotanquitsiquea imaica irooqueate nontsavetacotaque yamenaji- guetaqueca quejevecaroca yoguimaaca- gueti aisa yonigaantaqueca Amajirote. <sup>2</sup>Notsataqueri irira shirampari yashinta- caca Quirishito, ocoramanivaetapoja- quegueti ocarataque 14 ajagantsini imaica, yatsomajajitaquitiri inquitequi jenoquimajatanquitsica, cotanquitsi- quea teequea nontsateji aricaca yatsomajajitanaqueri maasanotsino

irooca yaashirentajitanaqueriqueate, aparo itsaquiero quea Aapani Irioshi.

<sup>3</sup>Noncantisijajempiquea aisa, teequea nontsateji aricaca yatsomajitanaqueri maasanotsino manaca yaashirentajitanaqueriquea, aparo itsaquequea Aapani Irioshi. <sup>4</sup>Iroguenti notsaque arimajaca yatsomajitanaqueriquea ontaniqui jenoqui paraisoqui,<sup>o</sup> ariquea oraniqui iquemagueque cantashitatiajencaro iquenquetsajencajitaquegueti, cotanquitsiquea teequea iragavejeji caquinte incante queroca icantajiqueni, teequea irinintjei Aapani Irioshi intsavetantero. <sup>5</sup>Nagavejaque notsavetacoteri quempecarica, cotanquitsiquea aatoquea nosemetitsi, iroguenti nosemetacoquem-paqua namenaquegueti teequea nagavejempaji. <sup>6</sup>Arimegueti noninque-megueti notsavetacotaca maasano cameetsaguetsatsica nantaguetaqueca, aatomequea querica agavejatsi incanque manaquea isemetaque intati, arimajacatari nocantamajati notsavetacotagueti. Cotanquitsiquea aatoja noquejetimatiro-tsijate imaica aatonijite pitiavaetacaantajigarotsi pishineventajianaquena, iroguentiquea noninque pishineventajia-quemparoja pamenaqueca nantaguetaqueca aisa nocanqueca.

<sup>7</sup>Oraqueate yonigaimoquenaca Aapani Irioshi caaviji oganejencamajataca oacaavaequenaqueate intati, cotanquitsiquea iriatimpa teequea irinintjei nosemete jero iticaarejantacarica Satanashi irantsipetacaavaequenaquea. Oquejeventacaquea otseji opirijapatitacoquena. <sup>8</sup>Tres nocantavecari Amajirote intsoparejacotajenaromequea aatonijite natsipevaetajatsi. <sup>9</sup>Cotanquitsiquea iriatimpa icanquena: “Aritaue ococani

noncavintsajacoguitempini. Iroguenti nonigaanquero nagavejane caquintequi caarica agavejamajatatsi.” Jero imaica noshinevaetantacaca nontsavetantaque-rogueti teequea inchiquiojita nagavejeji naatimpa, cameetsaniji iroguenti agavejacaamajaquenane iragavejane Quirishito. <sup>10</sup>Iroota quequea noshinevaetantanacaca namenaquegueti teequea inchiquiojita nagavejempaji naatimpa, aisa icantagushejitanaquegueti, natsipevaetacagueti, aisa yatsipetacaa-vaequenagueti catsimajiaquenaca, manaquea aisa taaca opajitapae tiavaequenaca natsipevencarigueti Quirishito. Namenaquetari oraquea teegueti nagavejeji naatimpa, chooca-quea agavejacaquenaca.

### Paavoro ishoshoventajiacari Corintoquitica

<sup>11</sup>Aviguentijitarite quejetacaajia-quena imaica notsavetacotantacaca quempeca manaquea noshoncacoca, aviguentijamequea quenquetsatacoventanaquename pishineventajianaquename. Naatimpa arimajaca teequea taaca opaji nagavejempaji, cotanquitsiquea teequea iranaajiguensi irirajia tsavetantamam-peajiatsica pishineventajiacaca piquemi-santajiaqueca pajitashitajatsica “itigarancanemajaca Jesoshi”.

<sup>12</sup>Oraqueate nochoocaquitigueti aviatimpajiaqui notsavetantimojiaquitimpigueti natsipetacovaecaroquea nonigaimoguevetaqueempirogueti oganejencaropae teeca iragavejeji caquinte oacaantantatsica intati pintsatimentajiaqueniji arimajaca naroguenti itigarancane Jesoshi.

<sup>13</sup>Ariquea noquempetacaamajaquempiri

**o 12.4 paraíso.** Irimetojaquegueti tsaroventarica Aapani Irioshi, ari iroanaque ontaniqui paraisoqui, ari inchooaque irosati aapojempagueti savincaguiteri intancorejantana jempaca. Pamenero aisa Yonig. 2.7; Irc. 16.22; 23.43.

maasano tsaroventajiatsica capiocapini-  
jiatsica tsovironaquipaequi, apanivan  
arica pamenajiaquena tee nasereacotsi-  
tempiri noncantajiaquempi pojocajia-  
quenaquea nocoguitejacoguetacaca.  
iImaica iintsija pimpeacotsitajenaro  
pamenajiaquenagueti noquempetaque-  
roquea imaica teequea taaca opaji  
namanajiguempi!

<sup>14</sup>Imaica noanaque namenajiaquitem-  
piquea aisa. Oraqueate noanaquegueti  
irooqua trestapojatsineca namenajiaja-  
tempiquea. Cotanquitsiquea aatoja  
nasereseretimpitsi namanajiguimpitsi,  
teequea irooqua noashite pashintajia-  
caca, aviguentijiaquea noashijianaque  
nontampishitacaajiaquempiquea  
arimpaqueate pintsaroventamajatana-  
quempari Quirishito. Iriraquea irijanin-  
tajatsica irioquea jocajiaquenerineca  
irijanijiate icoguitejacojiacaca, aatoquea  
iriatimpajia jocajiguinirts irijanijiate.  
<sup>15</sup>Naatimpa noshinevaequempaquea  
noncanquempa nonteroncacaamaja-  
quempiro maasanopae nashincaca,  
cotanquitsiquea aatoquea aparo  
noteroncacaajiguimpiroquea  
nashincaca, manaquea nonquejetana-  
quempaquea naatimpa nantsipeventajia-  
quempiquea pajinitia ometojanaquena  
magorentsi. Oncantacoguitempanigueti  
nompintsamajajianaquempi naatimpa,  
carimpaqueate aviatimpajia capichaja-  
niqui pimpintsavequena? <sup>16</sup>Iconoaga-  
rantajiaca catsimajiaquenaca, yamenaji-  
aveca teequea noncantimatempiji  
pojocajiaquenajate nocoguitejacojia-  
caca, cotanquitsiquea icantajiaque:  
“Teequea iramanajavetempiji imenta-  
quipae, cotanquitsiquea caaviji  
itsamajati yamatavijantigueti, jero  
teequea pamenacojiguempaj yaitsijia-  
quempirigueti pimentaquisitepae.”  
<sup>17</sup>¿Arimpate ariquea nocantajiaqueri  
irirajia notigarancajiaqueca iramenajia-

jatempiquea iramanamanavaequempi-  
niji pimentaquisite cameetsaniji  
naagarantavaqueniji naatimpa?

<sup>18</sup>Coramani nocanqueri Tito iroaqueite-  
quea oraniqui iramenajiaquempiquea.  
Oraqueate yoanaquegueti notigarancui-  
tsitaquea itsipa apitsaroventarite  
intsipatanaquempaca. ¿Arimpate  
yamatavijijiaquempi Tito? Mavitepae-  
tari naatimpajia arikea noquempetava-  
caajiacaca noquenquejajiguigueti, aisa  
arieqa noquempetavacaajiacaca nantini-  
rigueti Amajirote.

<sup>19</sup>Oraqueate nocantajiaquempigueti  
imaica aviatimpajia arica pamenajiaque  
aricajate nonintajiaque nonijacoventajia-  
anaquempa, cotanquitsiquea teequea  
irooqua nonintajigueji. Yamenakena-  
queate Aapani Irioshi manaquea  
noquempejiaqueroquea imaica  
cameetsaniji nontampishitacaajia-  
quempi arimpaqueate pintsaroventajia-  
naquempari, aviguentijiaquea napitsaro-  
ventarijiate noppintsajacaca, aisa  
iriguenti nintanquitsica Quirishito  
noquempetantajiacaroca imaica  
noquenquetsatacaaajiaquempi. <sup>20</sup>Otsaro-  
neguintavaequitanaqueate namenaque-  
quea arica noavetempagueti oraniqui  
namenajiaevojajempiquea cotanquitsi-  
quea aato noshineventajiguimpitsi,  
iroompaquea arikea pinquempejia-  
quempaquea aviatimpajia aisa aatoquea  
pishineventajanatsi. Aisa arica  
manaqueate namenajiajapojempiquea  
catsimatsatavacaajiaquempi, catsima-  
jencatacotantajiaquempi, catsimatsitan-  
tajiaquempi, aviguentijiaquea quenque-  
jacojiajatsi, tsojeventantavacaajia-  
quempi, nijashitavacaajiaquempi,  
nintajiaquempi panaimanatavacaajia-  
quempa, aisa teequea pinquemavacaaji-  
guempaj. <sup>21</sup>Otsaroneguintavaequitanaqueate  
namenaquequea noncoraquetajate-  
gueteti aisa namenajajatempiquea arica

manaquea irovashiventajavaequenaqueate Aapani Irioshi namenajipoja-jempiquea picaramirincavaeque aviatimpajia teequeate povashiantaji-gueroji pigovaeguisherejia, nintanatsi-queate poashitantajiaquequea, aisa pipashinincajiaca irooca aisa teequea pinejashitemparojo manquigarentsi, ariuea niraacojiaguitempiniquea.

**Icanque Paavoro ininque  
irinetsanavaejiaquempa**

**13** <sup>1</sup>Imaicaqueate imaica otrespo-jaque noncoraquetantaquem-paca namenajiajatemp. Otioncacaquea: “Choocagueti mavite irioca 3 amenajia-querica itsipa icovaeguishecagueti, ariuea iroguenti pincantomajitsitempa-riuea.”<sup>p</sup> <sup>2</sup>Coramani namenajiajatimpi-gueti nocantajiaquitiri irirajia covaegui-shejianquitsica irovashiantajianajeroja maasanopae ipeacaagushejiacaca. Imaica nochoocaveca osamani, cotanquitsiquea noncantsijajempa-queate iriatimpajia aisa maasano quericaca peacaagushejiacaroa covaeguisherentsipae, noncoraquetajate-gueti noncantajamajajiaqueri. Aatotarite notsaroacaafigaritsi. <sup>3</sup>Pininta-jiaqutarite pamenajiaque arimajacaca iriotari Quirishito quenquetsatantaca-roca novagantequi. Iriatimpa teequea intsarogueji incatsimatimentajiaquempi-roquea pipeacaagushejiacaca. <sup>4</sup>Oraquea yompajacojitaquerigueti quempeca teeca iragavejajeji, cotanquitsiquea arejetapojaxueti ivochatajiri Aapani Irioshi yagavejacaajiri. Ariqueate noquempejia naatimpajia imaica teemajaca nagavejajigueji, cotanquitsi-quea iriraquea Aapani Irioshi yagaveja-caajiaquenaquea iquempetacaajiaquena-riuea Quirishito yagavejacaqueri-

gueti, irootaquequea nagavejantajia-quempaca noncantomajajiaqueriquea peacaagushejiacaroa covaeguisheren-tsipae.

<sup>5</sup>Iintsija pamenajajempaqueate aviatimpajia arimajacaca pitsaroventamajajiacari. Noncantsijajempiquea aisa iintsijate pamenajajempajate.

<sup>6</sup>Arimpate teequea pintsajigueji ichoocashirentaquempi Jesoquirishito? Teegueti pintsaroventamampeajiguem-pariji intati, ichoocashirentaquempi.

<sup>7</sup>Ariuea oquempetaca imaica noninque pintsajiaquequea arimajaca naatimpajia naroguentijia itigarancanejia Jesoquiri-shito, teequea naroguentijia amataajias-tica. <sup>8</sup>Namanacoventajiaquempi nocantajiaqueri Aapani Irioshi intampi-shitacaajiaquempiniji aatoniji pipeacaaguishetajarotsi taaca opaji covaeguisherentsi. Cotanquitsiquea teequea ariuea noncantajigueji imaica cameetsaniji iramenajiqueroniji cameetsa nantajia-queneriquea Amajirote, manaqueate nonintamajataquequea pincomajamaja-jiaquempajate. Iroompaquea aricagueti oshimerancavetapojempa incantacojive-taquenqueate: “Teecajate iriguentijia itigarancanemajaca Jesoquirishito”, aviatimpajiaquea pincantacoguitempani pincomajamajajiaquempsa. <sup>9</sup>Teetari nagavejajigueji naatimpajia nonticaajiguero Iroomajatatsica, manaquea noninque nontampishiventajiaqueri.

<sup>10</sup>Nonintamajajiaquequea pintsaroventamajajiaquempiniji. Oraqueate arimajamegueti pintsaroventamajatempaime-gueti noshinevaetaquempamequeate, aatomequeate querocaca ocojiganame-quea naatimpajia pamenajiaquenagueti teequea nagavejajigueji. Manaquea nintanatsi namanacoventajiaquempi-quea cameetsaniji arimpaquea pintsaro-

ventamajajianaquemparijate pincomaja-majajianaquempaja.<sup>10</sup> Irootaquequea notioncantajiaquempica ocatica paperi tequeratagueti noanoaiteji namenajajatempiquea cameetsaniji pincomajamajajianaquempaniji aatoniji nocantomajamatapojimpi. Iriraquea Amajirote itigarancaquenaqueate nontsatacaaajia-quempiquea arimpaquea pintsaromentamajajianaquempariniji pintsipatavacaamajatanaquempaquea, aatoquea iroguenti novashiantacaajiguimpitsi pintsinampirejavacaajiaquempa.

**Paavoro iteroncanajiro icantajiaquerica**

<sup>11</sup> Imaicaquea imaica, napitsaroventarijate, noninque pishinejiguempajate, aisa noninque pincomajamajajiguempajate. Pinquenquejacoma jateroja

notioncajiaquempica imaica. Pinquemavacaajiaquempajate aatoja picatsimava-caajiatsi. Pinquempejiaquempagueti imaica intsipamajajiaquempiquea Aapani Irioshi, iriatimpa iriguenti pintsatantamajatantsica, iriguenti choocatacaacajica cameetsa aatonijite taaca opaji ashoshoventajiajatsi.

<sup>12</sup> Netsana pinintavorotavacaava-quempa.<sup>9</sup> <sup>13</sup> Maasano ipeacaajiacaca Aapani Irioshi igomajamajarejia inintajiaque pinquemacojiaqueri chooca iquenquejajiaquempi.

<sup>14</sup> Noninque incavintsajamajajiaquempiquea Amajirote Jeso quirishito. Aisa noninque pintsamajajiaquequea iriraquea Aapani Irioshi incoguitempani impintsamajajiaquempiquea, aisa Ishire intsipamajajiaquempiquea.

---

**q 13.12** *Netsana pinintavorotavacaavaquempa.* Yamejiaca coramani inintavorotavacaajavaca yamenavacaajiacagueti, ari iquejejiaca tsaroventajigarica Quirishito coramani.

# PAAVORO ITIONCAJIAQUENERI

## GARASHIAQUITICA

**Antsatantaquemparoca**

Ocatica iroguenti antsatantaquemparoca paperi itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica quepatsiqui pajitatsica Garashia. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsarentsi Oganejencatatsica, teetarite inquemisantajigueroji jorio itsavetantimojiajavecanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncacotaqueri ichoocaquegueti Paavoro Garashiaqui paperiqui Yantajiguica 13–14; 16.1-6. Chooca quenquejanquitsica itioncacaantaquero Paavoro ocatica paperi ajagantsiniqui 48, ichoocaquegueti guinteninintsiqui pajitatsica Antioquia quepatsiqui icantajitica Shiria. Itsipajia iquenquejajiaque itioncacaantaquero ajagantsiniqui 52, mavitetapojacaguetti iquenaguetanaquegueti quepatsipaequi itsavetantavaequerigueti Jesoquirishito, ichoocaquegueti guinteninintsiqui pajitatsica Corinto. Itsipajia iquenquejajiaque itioncacaantaquero ajagantsiniqui 56, otsipatapojacaguetti iquenaguetanaquegueti quepatsipaequi itsavetantavaequerigueti Jesoquirishito, ichoocaquegueti guinteninintsiqui pajitatsica Epeso.

**1** <sup>1</sup>Naroguenti Paavoro tionscaciaquempica imaica. Naroguenti itigarancane Jesoquirishito. Teequea iriguenti nintacaguenane caquinte, teequea iriguenti tigaranquenane caquinte, iriguentitarite tigarancaquena Jesoquirishito jeri aisa Aapani Irioshi vochantajirica. <sup>2</sup>Notsipajia-cariqueate apitsaroventarijiate notioncaciaquempigueti maasano aviatimpajia choocajiascica ontaniqui Garashiaqui capiocapinijscica tsovironaquipaequi. <sup>3</sup>Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacajiaquempinijite cameetsa aatonijite

pishoshoventajigaro taaca opajitapae.

<sup>4</sup>Ipacajiroquea Quirishito imetojane irishejajajironijite agovaeguishereja aatonijite aquejejijaari choocajianquitsica imaica antagushetiroca covaeguisherentsi, irootaquetari ininqueca Aapani Arioshite.

<sup>5</sup>Cameetsaquea ancoguitempani antsarovenajiaguitemparini Aapani Irioshi. Ari oncoquempa.

**Tee onchoocateji otsipa  
Quenquetsarentsi Oganejencatatsica  
itigarancaqueca Aapani Irioshi**

**<sup>6</sup>Icajemaquiaquempiquea Aapani Irioshi  
incavintsajajiaquempiniji Quirishito.**

Imaicaquea manaquea namenanaque intati noquemacojiaquempigueti teequea picancani pinquemisantamajajigueroji Quenquetsatsarentsi Oganejencatatsica itigarancaqueca Aapani Irioshi, iroguentiquea taampinaquea pipitsocashijianacaro icantajiaqueca cantashitatigaroca.

<sup>7</sup>¿Pijiqueji chooca otsipa Quenquetsatsarentsi Oganejencatatsica itigarancaqueca Aapani Irioshi? ¡Teequea onchoocateji! Manatarite ichoocajiaque intati cantashitatiacaroca Quenquetsatsarentsimajaca tsavetantaquerica Quirishito, iriotari asereajiaquempi. <sup>8</sup>Quericaca cantashitatiacumparoneca Quenquetsatsarentsi Oganejencatatsica notsavetantimojiaquempica cameetsataquequea iroanaque camorecariqui. Arigueti naatimpa noncantashitatiacumparo incatsimati-menquenaroquea Aapani Irioshi. Ariquea inquejetaquempagueti irashivantijite manaquea inquenavepojaquempa jenoqui inquitequi, irigueti cantashitatiacumparone incatsimatinemeriquea iriatimpa. <sup>9</sup>Nocantajiaquempiqueate coramani imaicaquea noncantsitajempiqueate aisa: cameetsataque iroanaque camorecariqui quericaca cantashitatiacumparone Quenquetsatsarentsimajaca paajiaquequea nocamantajiaquempigueti. <sup>10</sup>Teequea iroquea noninte irishineventena caquinte. Iroguentiqueate nonintaque irishineventaquea Aapani Irioshi. Irimeguelti nonintaque noshinetacaquemparime caquinte atomequea nopegame itigaranquica Quirishito, atome nocantirime: “Quirishito, pashintenaja.”

### Quero oquenapojini itsavetantica Paavoro

<sup>11</sup>Napitsaroventarijate, imaica nonintaque pintsamajajiaquequea oratica Quenquetsats-

rentsimajaca Oganejencatatsica notsavetantaqueca teequeate iroguenti irashijia caquinte iguenquejane. <sup>12</sup>Teetari irioquea camantenerone caquinte, teetari irioquea tsatacaajiguene. Iriotaquequea tsatacaquenaro Jesoquirishito. <sup>13</sup>Piquemacojiavetakenatarite quero nocotani coramani noquejejiavetariecate nogonorojia jorioja savicaventiroca itioncanaqueca Moishishini, caavijiquea nocatsimajiguiri tsaroventajigaria Quirishito, natsanajiacariequea nonintavecaquea nonteroncajiaquerimequea maasano. <sup>14</sup>Noquejejiavecariequea nogonorojia jorioja nometsanamajavetacarоqueate icantajiguica novaesatinijiateni nanaaqueriquea maasano notsipajiacaca noquenquevarijiguigueti. <sup>15</sup>Cotanquitsiquea caaviji icavintsajamajataquena Aapani Irioshi, icoguiaquenaquea coramani tequeratagueti novogueji, ariquea icajemaquena. Aapojacagueti savincaguiteri inintantacaca <sup>16</sup>yonigaquenariequa Irijanite cameetsanjite nontsavetantaqueriniji noncamantajiaqueriquea caquinteguetatsica teeca irijorijoigueji. Yonigaquenarigueti teequeate quericaca caquinte naventanaquempariquea noashitanqueriquea noncoacotaquieri taa nantaque. <sup>17</sup>Teequea ariquea noncantanaquempají Jerosarequi ichoocajiaquegueti iriquetica peajianquitsica itigarancane Jesoshi naventajianaquemparimequeate noncoacojiaquierime, manaquea taampina nocantanaca Araviaqui. Coajica noanaji Tamashicoqui.

<sup>18</sup>Ariqueate avisanaquegueti 3 ajagantsi ariquea noaquití Jerosarequi nonejaatiriquea Peerero, noconoaoquitariecate 15 savincaguiteri. <sup>19</sup>Ontaniquiqueate aisa nonejaqueri Santiago<sup>a</sup> iriguentijeguite Amajirote. Tee nonejeriji itsipajia itigarancanejia Jesoshi. <sup>20</sup>Yamenamajataquena Aapani

<sup>a</sup> **1.19 Santiago.** Iguenquetsatsarequi guiriego ipajita *Iakobos*. Iconoagarantaca quimajareri yoguipitsocaquerogueti ivajiro ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*.

Irioshi teequeate namatavijajiguempiji, arimajaquea nocantajiaquempi.<sup>21</sup> Ariquea noanaque nochoocaquitiquea Shiriaqui jero aisa Shirishaqui.<sup>22</sup> Iriraqueate Joreaquitica tsaroventajigarica Quirishito tequerataquea irinejajiguenuaji.<sup>23</sup> Manaquea iquemacojiaquena intati icantacojitaquenagueti icantajiti- queate: "Irira catsimavetacajica nintavetan- quitsica interoncajiacajime imaica choaca icamantajiaqueri maasano: 'Paventempari Jesoquirishito irimeshiantaquempica.'"<sup>24</sup> Irootaqueate ishineventantajianacarica Aapani Irioshi iquemacojiaquenagueti.

#### Yoanaqueguedi Paavoro Jerosarequi

**2** <sup>1</sup>Ariqueate ocoramanivaetapoji- gueti 14 ajagantsi ariqueate noajati aisa Jerosarequi, iriguentiqueate notsipatanaca Verenave notsipatsipaitanacariqueate Tito. <sup>2</sup>Iriguentitari tigaran- caquena Aapani Irioshi noantanacaca- quea. Ontaniquiea Jerosarequi iriguentiqueate noconoajapiro quempoguijajigurica quemisantajitsica, nocapiocajiacaqueate nocamantamajaji- aqueriquea quero nococa notsavetanti- mojiaqueriguedi teeca irijorijoigueji notsavetacotaquerogueti Quenquetsatsa- rents Oganejencatatsica. Nocamantanta- tajiacarica cameetsanijite iramenimen- tajiaquenijite iriatimpajia teequea ari nonquenquetsashitimpaji intati. <sup>3</sup>Iriraqueate Tito iriguentivetacaqueate guiriego cotanquitsi teequea quericaca cantatsine intotsaiquimashitacaanta- quempa inquejetantanaquemparica joriojia. <sup>4</sup>Oraqueate nocapiocajiacaguetai ariquea iconoapojana irira tsaroventamampeajitsica. Icantavetacaquea quemisantajiaqueri Quirishito cotanquitsiquea manaqueate icoraquetashijia- quequea intati iramenajiaquena querocaca nocojiacani notsarоentama-

jajiacariguedi Quirishito Jesoshi. Teequea incantajiaji Quirishito anetsanajajero itioncanaquea Moishishini cameetsaniji irimeshiantajajica, cotanquitsiquea inintajiavetaca- quea iriatimpajia acancani anetsanajia- querome quejetaca omperaperaatajaji.<sup>5</sup> Cotanquitsi naatimpajiaquea teequeate nonquemisantimajigueriji aatonijite icantashitatiimajitarotsi Quenquetsatsa- rentsimajaca itigarancaquea Aapani Irioshi, noninquetari pintsamajajiaque- roqueate Quenquetsatsarentsi Oganejen- catatsica.

<sup>6</sup>Choocajiavetaca jivatatsica, teequea intsatacaguenaji otsipa, manaquea icantajiaque: "Cameetsavaeque pitsavetanqueca." Irivecaquea jivatatsica cotanquitsiquea teequeate irooqua nameneji, manaquea yamenajiacaji Aapani Irioshi maasano ari aquejetava- caajiacaca. <sup>7</sup>Teequeate intsatacabajia- quena, yamenajiaqueterite iriguenti tigarancaquena Aapani Irioshi notsavetanquero Quenquetsatsarentsi Oganejen- catatsica, notsatacabajiaqueri teeca irijorijoigueji. Aritarite iquejetacaacari Peerero itigarancaqueriguedi Aapani Irioshi intsavetantimojiaqueriniji joriojia. <sup>8</sup>Irira Aapani Irioshi tigaranca- querica Peerero intsatacabajiaqueri joriojia, iriotarite tigarancaquena naatimpa aisa nontsatacabajiaqueri teeca irijorijoigueji. <sup>9</sup>Oraqueate nocapiocajia- caguetai ariquea ichoocajiaque Santiago, Sepashi,<sup>b</sup> jeri Joanca. Iriatimpajia iriguentijia quempoguijajigurica quemisantajitsica. Arikea yamenajia- quenagueti iriguenti cavintsajaquea Aapani Irioshi, iriguenti tigarancaque- naca nontsavetante, yaajiaquenaquea yaavacojiavaquena naatimpa aisa Verenave, icantajiaquenaqueate:

**b** 2.9 Sepashi. Irootaque otsipa ivajiro Shimo Peerero. Pamenero Jn. 1.42.

“Aviatimpajia cameetsavaetaque pisavicaventajiaqueriqueate teeca irijorijoigueji pintsavetantimojiaqueri. Naatimpaquea nocancaniquea nosavica- ventajiaqueriqueate agonoro jorio nontsavetantimojiaqueri. <sup>10</sup>Cotanquitsi aparo nonintajiaque pincavintsajajia- queriqueate irira apitsaroventarijiate teeca onchoocatimoteriji, aato pipeaco- jigari.” Tampatica yoquiero, irootaque- quea nonintamajataqueca naatimpa, irootari nameta.

#### **Paavoro icantomajaqueriqueate Peerero Antioquiaqui**

<sup>11</sup>Ariquea icoraquequegueti Peerero Antioquiaqui nocantomajaqueriquea namenaqueritarite mana yantaque- queate teeca oncameetsateji.

<sup>12</sup>Oraqueate tequeratagueto incoraqueje- gueji itigarancajiaqueca Santiago<sup>c</sup> iriraquea Peerero manaquea iconoava- jari ishecatapinicagueti apitsaroventari- jiate teeca irijorijoigueji, cotanquitsi- quea coajica yamenajiavaquerigueti- quea icoraquejiaque arikeate icantapa- najanta itsinampirejajianaqueriquea, itsaroacaajiacaritarite incatsimatimenta- jiapojaqueri iramenajiaopojaquerigueti inconoajiaquempari teeca irijorijoigueji irishecrajiaquempagueti. <sup>13</sup>Ariquea yamenajiaquerigueti itsipapae jorio, arikeate iquejetanacari itsinampirejajia- anaqueriquea apitsaroventarijiate teeca irijorijoigueji, aisa Verenave iquejetsita- nacaquea iriatimpa aisa. Itsajiavetacarо- quea cameetsataque inconoajiaquem- pari irishecrajiaquempagueti, cotanquitsi- quea manaquea itsaroajianaque intati iquejetantanacaroca imaica itsinampire- jantajianacarica. <sup>14</sup>Cotanquitsiquea naatimpa namenajiavaquerigueti iquejelianacagueti imaica notsaquequea

teequea irinetsanatajeroquea ocatica Quenquetsatsarentsimajaca. Nocantsita- riquea Peerero nocapiocajiacagueti: “Joriovequempiquea aviatimpá, cotanquitsi tee poguijatacotajeroji yameguetaca jorio, mana piquempeta- cotacari teeca irijorijoigueji. ¿Quero- quea ocotacani imaica picantantacaca irirajia caquinte teeca irijorijoigueji iroguijatacotoera ja yameguetaca jorio?”

<sup>15</sup>Naroguentijia joriojia, iriguentitari irijanintajiaquena. Teequea iriguenti irijanintajiguenane irirajia teeca irijorijoigueji, irirajia teeca intsateroji itioncanaqueca Moishishini. <sup>16</sup>Cotanquitsiquea notsajiaquequea aatoquea iroguenti imeshiimentajiganatsi Aapani Irioshi iramenajiaquenagueti nonintajia- vetaca nonetsanajiaquero maasano itioncanaqueca Moishishini, aatotarite nagavejajigu nonetsanajiguero. Notsajia- quequea iroguentiquea imeshiimenta- jiacaji aventaqueemparigueti Jesoquiri- shito anquemisantaquerigueti, irooqueteate iramenantajiacajica Aapani Irioshi quejetaca tee ancovaeguisheti- matempaji. Irootaquequea noquejetan- tajiacaca naatimpa aisa, naventajia- nacariequa Jesoquirishito cameetsaniji irimeshiajiaquenaniji. Noncantijajem- piqueate aisa aatoquea iroguenti imeshiimentajaji anintajiaivequempa- gueti anetsanajiaquero itioncanaqueca Moishishini.

<sup>17</sup>Cotanquitsiqueate anintajiaquegueti irimeshiajicají Aapani Irioshi aventajia- quemparigueti Jesoquirishito arigueti incantajite: “Jeriquetisa covaeguishetan- quitsica teeca inquemisanteroji itioncana- queca Moishishini”, “iroompa oncanque icovaeguishetacajacají Quirishito? ¡Teequeate! <sup>18</sup>Oraqueate arigueti nompia- shitanajerogueti novashiantaguetanaqueca

**c 2.12 Santiago.** Yoguiptsocajitirogueti ivajiro icantajitiri aisa Jacovo.

noquemisantavetacagueti iroqueragueti, ariquea manaquea noncovaeguisheta-quempaqueate intati.<sup>19</sup> Coramani nonintavetacaqueate nonetsanataquero maasano itioncanaqueca Moishishini, cotanquitsiqueate teequea nagavejeji nonquejetacaamajauemparoqua. Irootaque notsatantaca naroguenti covaeguishetatsica.

Imaicaquea teequea iroguenti nonquenquejacotajeji itioncanaqueca Moishishini nonetsanaquero iroomijite irimeshiimenquena Aapani Irioshi, manaquea namenquero quejetaca teeca onchoocatajeji. Iriguentitarite noquemisantamajatanaque Aapani Irioshi nonetsanatanaqueroqueate maasano icanqueca iriatimpa.<sup>20</sup> Oquejetaca quea yompajacojitaquerigueti Quirishito coroshiqui mana itsipatacaantajiquenari yompajacojitaquena naatimpa aatonijite noquenquejacotajiro maasano covaeguishetacaquenaca. Oquejetanacaquea mana nometojapitsatanaquero intati. Choocavequenaquea cotanquitsiquea teequea ariquea nonchoocatashitajempají intati, iriguentitarite choocatanaquena Quirishito. Imaica choocatirajanagueti notsinoqui irioquea agavejacaquena Irijanite Aapani Irioshi noquemisantamajatanaquerigueti. Iriatimpa caaviji ipintsamajataquena imetojaventantaquenaca.<sup>21</sup> Irootaquequea naatimpa aatoquea nocantisquea mana imetojaque Quirishito intati. Oramequea iroomegueti irimeshiimentajiacajime Aapani Irioshi anetsanamajajiaquerogueti itioncanaqueca Moishishini manamequea imetojaqueme Quirishito intati.

**Ichoocashirentajiguiriqueate Ishire  
Aapani Irioshi maasano  
quemisantajiguirica**

**3** <sup>1</sup>Aviatimpajia, Garashiaquitica, ¿arimpate tee pintsatimateji?  
¿Teequea pamenacojiaquempají yamatavijitaquempigueti? Pitsajavetaquea noquenquetsatacaaajiaquempi-

gueti coramani iriguenti notsavetantaque Jesoquirishito yompajacojitaquerigueti coroshiqui. Oconijatimomajajaquempiqueate, notampaticamajataquerotari nocantajiaquempica.<sup>2</sup> Imaica pincantajiguena, ¿taaqueate itigarancantacarica Aapani Irioshi Ishire ichoocashirentajiapojaquempigueti? Teequea iro intigarancantacaquemparica pinetsanamajajiaqueromeguedti itioncanaqueca Moishishini. Iroguentiquea itigarancantacarica manaquea yamenajiaquempi piquemacotavaquerigueti Quirishito Meshiantatsica ariquea piquemisantajianaqueri.<sup>3</sup> ¿Queroquea ocotanacani teequeate pintsajajeji? Pipariajianacarogueti iroqueragueti piquemisantajiaquerigueti Quirishito, iriotaque agavejacaajiaquempi Ishire. ¿Pijiqueji imaica pagavejaquero aviatimpa pitampishicaqui?<sup>4</sup> Iroqueragueti piquemisantajiaquerigueti oshequiquea patsipeventajiacariea Jesoquirishito. Imaicaquea aatogueti poguijatacotanajiri manaquea patsipetashtiquita intati.<sup>5</sup> Aapani Irioshi itigarancajiaquempi Ishire yagavejacaajiaquempiquea ariquea pamenacaantajiaquero oacaantantatsica intati, cotanquitsiquea teequea iroquea intigarancantajiguempiri pinetsanamajajiaqueromeguedti itioncanaqueca Moishishini. Iroguentitarite itigarancantajiaquempirica yamenajiaquempitari piquemacojiaquerigueti Quirishito Meshiantatsica piquemisantajianaqueriqueate.

<sup>6</sup> Arikea iquejetaca Averaameni iquemisanqueriqueate Aapani Irioshi, irootaquequea yamenantacarica iriatimpa quejevaequea tee incovaeguishetimatempají.

<sup>7</sup> Irootaquequea pintsatantajiaquempaca maasano quemisantamajajiaquerica quejejiacaquea iriguentica ichoviquini Averaameni, iquejejiacaritarite.<sup>8</sup> Coramani

itsaquequea Aapani Irioshi incavintsa jajiaqueri caquinteguetatsica teeca irijorijogueji, irimeshiajiaqueriquea maasano aventajiaquemparineca iramenantajiaquemparica quejevaeca tee incovaeguishetimatempaji. Arikea icantacotsijiacari quea icanquerigueti Averaameni, itsavetantaqueroquea oguishinejantatsica, ocanquetari itioncacaantaquerogueti ocanti: "Aviguentiquea noncavintsa jactantajiaquemparica maasano caquinteguetatsica quepatsipaequitica." <sup>9</sup>Arikeate iquejetacaajiacariecate Aapani Irioshi maasano aventajiacarica icavintsa jajiaqueriquea iquejetacaajiacari Averaameni yaventacarigueti.

<sup>10</sup>Maasanotari aventavetaroca yantaqueca ipanquenavetacarogueti irimoncarataquerome Cantacaantanentsi itioncanaqueca Moishishini, arikea incatsimatimentajiaqueri Aapani Irioshi. Itioncacojiquerotarite ocanti: "Incatsimatmenqueriquea Aapani Irioshi maasano teeca irinetsanamajatanaqueroji maasano Cantacaantanentsi itioncanaqueca Moishishini." <sup>11</sup>Itsamajajitaqueroquea teequea quericaca agavejatsine irinetsanamajataqueroquea maasano Cantacaantanentsi itioncanaqueca Moishishini iroonijite iramenanquemparime Aapani Irioshi quejecaqueate tee incovaeguishetimatajempaji. Choocatarite otsipa itioncajitaqueca ocantiquea: "Iriraquea comajashi-rentanquitsica incoquempani inchoocaguiteni irooriji yaventaguitarini Aapani Irioshi." <sup>12</sup>Oraqueate Cantacaantanentsi teequea oncantejii mana aventajiguempari Aapani Irioshi anquemisantajiguera cameetsanijite acancani anchoocaguiteni, manatarite ocantavecaquea: "Quericaca-quea netsanamajataquerone ocaticapae incoguitempa quea inchoocaguiteni."

<sup>13</sup>Cotanquitsiquea ivergaraventacajiro Quirishito aatoniji icatsimatimentajitacajiro tioncanquitsica teeca anetsanaji-

gueji, iriguentitari piajaji yatsipetacaantajitarica iriatimpa. Choocatarite tioncanquitsica ocanti: "Yompajacojiti-riqueti caquinte inchapoaqui yonigaantajiqueriquea mana icatsimati menqueri Aapani Irioshi igovaeguishere."

<sup>14</sup>Iriraquea Quirishito Jesoshi teequea apaniroquea irimetojaventajiguena-ji naatimpajia joriojia, imetojaventajiaqueriqueate aisa teeca irijorijo queguescameetsanijite irimeshiajiaquerinijite maasano aventajiaquemparineca quemisantajiaquerineca, aritarite icanquerini Averaameni coramani. Imeshiajiajiquea cameetsanijite intigarancaquerinijite Ishire inchoo-sshirentajiacaji aatimpajia aventajiaquemparineca, icanquetari coramani intigarancacajiri.

#### Icanquerica Aapani Irioshi Averaame

<sup>15</sup>Imaica, napitsaroventarijate, nonintaquequea pinquenquejajiguero ocatica amejigaca. Taaca opajitapae anintacaanaquerica ojocanajenerica itsipa, manaquea antioncacotsitemparo-quea paperiqui, arikeate aisa antionca-quero avajiro aatoniji yogaashijitajaro acantajiaqueca. <sup>16</sup>Coramani icamanta-querigueti Aapani Irioshi incavintsa-queri Averaameni icantiriquea inquejetacaaquea quea aisa inchooviquitan-queca. Teequea incanteriji: "pinchovi-quijianaqueca", manaquea icantiri: "pinchoviquitan-queca", iriguentitarite icantacoque Quirishito. <sup>17</sup>Arikea ocoramanitapojaquegueti aapojacagueti 430 ajagantsini iquenquetsajencataca-queriquea Moishishini icamanqueriquea quero incojiaquempa ishiraerija intsaroventajiaquemparigueti. Arikea itioncavaqueroquea Moishishini, cotanquitsiquea Aapani Irioshi teequea incantashitatiguemparojo icanquerica Averaameni coramani, iroorijite

icanqueri irinetsanataqueroquea  
icanquerica.<sup>18</sup> Iroomequea incavintsajimentajacajime anetsanajiaquerogueti  
itioncanaqueca Moishishini arimequea  
aatomequea icantirime Averaameni  
mana incavintsajaqueri intati yamena-  
querigueti iquemisantaqueri. Cotanqui-  
tsiquea inchiquiojitsita inintanaque  
Aapani Irioshi incavintsajaqueri,  
ariquea irooqua ea icantajerica.

<sup>19</sup>Iroosacanicate ¿taaqueate ition-  
caantacaricaquea Aapani Irioshi Moishi-  
shini? Manatarite itioncacaantacarica  
intsamajatimentajiqueronijite mana  
yantaguishejiguiro covaeguisherentsi  
maasano caquinte. Manatarite inintaque  
Aapani Irioshi irinetsanajitaquero  
itioncacotanaqueca Moishishini  
arejevaetapojoempreo quea irinetsanata-  
quero icanquerica Averaameni coramani  
incoraquepojaquegueti inchoviquitana-  
queca. Itigarancaqueritarite Aapani  
Irioshi irashivantijitete incamantajiguera  
Moishishi maasano icantajiaquerica,  
irioquea tsatacaajiaquerine ignorojia.  
Ariquea yogaajivaqueneri.<sup>20</sup> Cotanqui-  
tsiquea icamanquerigueti Averaameni,  
inchiquiojitsitaquea icamanqueri  
iriatimpa, teequeate iriguenti incajemeji  
itsipa aanaquenerineca.<sup>21</sup> ¿Arimpate  
oratica itioncanaqueca Moishishini  
mana ocantashitatiacaro icanquerica  
Aapani Irioshi Averaameni? iTeequeate!  
Oraquea anijacaantemegueti itioncana-  
queca Moishishini acancaninijite  
anchocajiaque, iroomequea anetsana-  
shirentantajiaquempamequea.<sup>22</sup> Cotan-  
quitsiquea oraquea Tioncarentsimajaca  
ocanti agavejajiaqueri covaeguisherentsi  
maasano caquinteja, oquejevetaca  
osantanatacotaqueri, teequeate iragave-  
jajigueji irovashiantajigueroji. Oqueje-  
tantacaca imaica cameetsanijite  
onetsanatimentaquempanjite icanqueca  
Aapani Irioshi coramani, irinetsanata-

queneriquea maasano aventajiaquempa-  
rineca Jesoquirishito.

<sup>23</sup>Coramani tequeratagueti aguempaji  
ocatica aventashirentagantsi, oquejevetaca  
oquempogujajacaji itioncanaqueca  
Moishishini, oquejevetaca ashitacojicajac  
arejevaetantacaro yonigaantantajitaroca  
aventashirentagantsi.<sup>24</sup> Oraquea itioncana-  
queca Moishishini oquejetacari quempo-  
gijantatsica aajianacajineca Quirishitoqui  
irinetsanashirentajacajiniji aventajiaquem-  
parigueti.<sup>25</sup> Cotanquitsiquea imaica  
aventashirentaquemparigueti, teequea irio  
camantajajine quempogujantatsica.

**Maasano quemisantamajajitsica  
quejejiaquea iriguentica  
ichoviquitanaqueca Averaameni**

<sup>26</sup>Maasano aviatimpajia aviguentijia  
irijanijite Aapani Irioshi, piquemisantajia-  
queritarite Quirishito Jesoshi, paventajia-  
cari.<sup>27</sup> Maasanotarite aviatimpajia  
viñacajajianquitsica quemisantajiaquerica  
Quirishito manaquea piquejejicari  
iriatimpa, oquejetaca piquitsaajajari.<sup>28</sup> Imaica acarajiavetacaquea jorio jeri  
teeca iriorioteji, yaajanijitacaca jeri teeca  
irajaanijitempariji, shirampari jero aisa  
manquigarentsi, cotanquitsiquea aquejeta-  
vacaajiacaquea maasanotarite atsipajiac-  
riquea Quirishito Jesoshi ariquea aquejejia-  
nacari.<sup>29</sup> Quejejiajiquea apatiroti acanca.  
Imaica aviatimpajia quemisantajiguirica  
Quirishito quejejiaquempiqueate aviguen-  
tijia ichoviquitanaqueca Averaameni,  
icavintsajantajiaquempica Aapani Irioshi  
inetsanaqueroquea icanquerica  
Averaameni.

**Quero icojiavetani tequeratagueti  
incoraqueteji Quirishito**

**4** <sup>1-2</sup>Jero imaica nonquejetacajia-  
quempiroquea aisa. Quericaca  
irijanintanquitsica incanquequea:  
“Oraquea nometojanajegueti irioqueate

ashintajemparone irijani maasano nashintaguetacaca, cotanquitsiquea aatotaquea yojoquitajitanari. Oraqueate inquenquevaritanajegueti ari irojocajitajeneri irashintamajatajemparoqueate.” Pamenerija, irira irijanite yashintaguevetacaroqueate maasano, cotanquitsiquea tequeratanicate inquenquevariteji manaquea iquejemajatajariqueate aajanirents, chocatarite aajanitajarica oguimoncajirica. Iriatimpaqueate yoguijaqueriquea inquenquevaritanajeta, ariquea irojocajitajeneri irashintamajatajemparoqueate.<sup>3</sup> Arikeate aquejejiacaquea aatimpajia iroquaqueret tequeratagueti anquenquevarishirenteji, apampiatacojivatacaroquea yamejigaca caquinte, itsatacantica quepatsiquitica. Quejetacaequea aajanijacaji.<sup>4</sup> Cotanquitsiquea aapojacagueta savincaguiteri inintacaquea Aapani Irioshi coramani, ariquea itigarancaqueri Irijanite, ovoaqueriquea manquigarents, inetsanatantacaroca iriatimpa itioncanaqueca Moishishini.<sup>5</sup> Oquejetantacacaquea imaica cameetsanijite irovegarajajataji aatimpajia maasano irooriji omperatacaji itioncanaqueca Moishishini aguijatacojiaquerogueti. Yovegarajajatajiqueate cameetsaniji impeantajajajica Aapani Irioshi irijanijate.<sup>6</sup> Aroguentijia irijanijate imaica, irootaquequea itigarancantacarica Ishire Irijanite inchoocashirentajacaji, icajemaquequea: “iAapani! iAapani!”<sup>7</sup> Teequea omperatajempemperavetaquempica, imaicaquea avirotaquequea irijanite Aapani Irioshi. Irijanintamajauempiquea Aapani Irioshi, icavintsajajauempitarite yojcantaquempiroca maasano irojocajiaquenerica irijanintajiacaca.

<sup>8</sup>Coramani tequeratagueti pintsajiavetempariji Aapani Irioshi, iriguentiquea pirioshimajajivataca caarica irioshima-

jatatsi, ariquea yomperajiaquequempi. <sup>9</sup>Cotanquitsiquea imaica pitsajiaqueriquea Aapani Irioshi, arimequea noncanteme iriatimpa itsajiaquempiquea icavintsajajauempiquea. Imaicaquea ¿quero ococani pinintantajiacaca pinquejetanajempa coramani pogujatacojivatacarogueti yamejigaca caquinte teeca agavejeji omeshiante? ¿Arimpa pininque omperajajempi?<sup>10</sup> Aviatimpajia pishineventajianajaroquea savincaguiteripae aapojacagueta pishinetantacaca, aisa iroquaquerogueti isotojitaai, jero aisa ishinetantajitaca yogavisajajagueta arejetajagueta ajagantsipojajigueta, maasanoqueate pishineventajianajaro pijijaqueji ariji poguishinejantajiaquemparica Aapani Irioshi.<sup>11</sup> Notsaroacojianaquempiquea aricaja natsipeventashijiaquempi intati notsatacajajauempigueti piquejetanjampaquea coramani pogujatacotantanajarica itsatacantajiguica caquinte.

### Paavoro iquenquejajiaqueriqueate quemisantajatsica

<sup>12</sup>Napitsaroventarijiate, coramani teequeate pogujatacojivatetemparoji itioncanaqueca Moishishini. Arikeate noquejejiaquempi naatimpa iroquaqueret noquemisantaque novashiantanaquero teequeate nonetsanatajeroji. Imaicaquea aviroquea pogujatacojivatanajaro, cotanquitsiquea nonintaquequea pinquejejianaquena naatimpa povashiantajianajeroqueate, aatoqueate pogujatacojajirotsi. Coramani noimojjataptimpigueti cameetsa paajivaquena intati teequea pimanntenaji.<sup>13</sup> Pitsajiaquetari nashinoncajacagueta teequea nagavejajempaj noaguetajeji osamani, manaquea aviguentiquea nochoocatimoguitimpini nopariantanacaroca notsatacajiaquempi notsavetantaquero Quenquetsatsarentsi Oganejencatatsica.

<sup>14</sup>Nashinoncajamajavetacaquea cotanquitsiquea teequea pimanintajiguenaji, manaquea patsiperejacocaro intati. Piquemisantajavaquenaquea manaquea piquejetacaajiavaquenaquea iriocaquea coraquetanquitsi irashivante Aapani Irioshi, aisa quejetaca iriococa quenajita Quirishito Jesoshi.

<sup>15</sup>Coramani pishinevaejianacaquea noconoajiaquempigueti. Noncantajiaquempimeguetiquea “Pojoquenaroshatsu poquia”, pinquitsorejaquenarome pojocajaquenaromequea. ¿Quero ocozacani imaica teequea pishineventajiajenaji? <sup>16</sup>Notsatacamajajiaquempi-tari iroomajatatsica. Imaica ¿iroocampa picatsimamentajiaquena?

<sup>17</sup>Iriraqueate itsipa caquinteja manatarite intintajiaquequea povashiantajianajenaquea aatoquea piquemisantajianajana, irootaquequea intintantajacaca intsatacayaquempiquea itsatacantajiguica iriatimpajia cameetsaniji pishineventajiaquempariniji pinquejedajiaquempariquea. Irootaquequea yoguishinejantamampea-jiaquempica. <sup>18</sup>Cameetsavecaqueate irinintajiaquegueti itsipa pishineventajiaquempari, cotanquitsiquea cameetsaquea irinintajiaquegueti, aatoquea yamatavijajiguimpi. Arimpa naatimpa teequea namatavijajiguempiji tampatiquea noaquiero notsatacayaquempi-gueti, cotanquitsiquea imaica nochoocaquegueti osamani jac pimaitsantajianajanaquea. Aatomesano piquejejiga imaica, nonintavecatarite picancaniquea pishineventajiaquenaquea. <sup>19</sup>Nirijani-jiate, naatimpaquea natsipeventajiaquempiquea aisa, nonintamajataqueterite namenajiaquempi pinquejemajajiaquempariquea Quirishito, caavijiqueate natsipeventajiaquempi quejecaquea atsipetagueti manquigarentsi ovoacotigueti. <sup>20</sup>Nonintavecaquea imaica

nonchoocaqueme aviatimpajiaqui anquenquetsatavacaquempa, nontsaqueroniji queroca ococani piquejetantanajaca.

### Iquejetacaacanari Agare aisa Sara

<sup>21</sup>Pincantajiguajate aviatimpajia nintajatiatsica pinetsanajiaqueroqueate itioncanaquea Moishishini: ¿arimpate tee pintsamajajigueroji maasano ocanqueca? <sup>22</sup>Itioncacojiquerotarite ocanti choocaquea mavite irijanite Averaame, aparoquea ash iroatimpa ashincaca imanquigaremajaca, choocaquea itsipa ash iroatimpa imanquigaremajaca teeca irashintajitemparoji.

<sup>23</sup>Iriraquea irijanite ovoaquea yashintajitaca manaquea ivoaque iroorijite intintashitacari caquinte, cotanquitsiquea irira irijanite ovoaquea teeca irashintajitemparoji ivoaque iroorijite iriotaque icantacotsitacaca Aapani Irioshi irojocaueneri Averaameni.

<sup>24</sup>Choocaquea oshiacaa ntacaca ocatica, oraqua manquigarentsijia oshiacaa ntacarotari mavite paaquito. Aparo paaquito oponeaca otsempiqui icantajitica Shinai, iroguenti quejetacaro Agare voaquerica chaajanquirija peajianquitsineca yashintajitaca. <sup>25</sup>Oraquea Agare ocantacotaquero otsempii Shinai choocatanquitsica Araviaqui, aisa ocantacotaquero Jerosare choocatanquitsica imaica, maasanotari joriojia ipomeren-tsiventajavetacaro itioncacotanaqueca Moishishini irinetsanajiaquero, quejetaca omperaperaajiacari. <sup>26</sup>Cotanquitsi aa timpajia aroguenti aquejejiajaci ochoviquijianaqueca imanquigaremajaca Averaame teeca iromperaperaajitempaji. Iroatimpa iroguenti ocantacotaque otsipa Jerosare inquitequitica. <sup>27</sup>Choocatarite itioncanaquea Isaiashini ocanti:

Pishinetempaja shiravaro, aviatimpa teeca pogueji.

Tequerataquea pantsipetimatempa-riji pirijanite, imaica queca pishinevaetempaja.

Iroshequiamajatanaquetari pincho-viquijanaqueca,  
iranaamajajanaqueriqueate oncho-viquijanaqueca pomperare  
irijanintacaacaca manquigatim-pica.

<sup>28</sup>Napitsaroventarijate, aatimpajia quejejiacajiqueate Ishaaco, irijanintajacajitarite Aapani Irioshi quejetaca icanagerica Averaame. <sup>29</sup>Coramani iriraquea irijanite voanquitsica irooriji intashicari iriatimpa, icatsimapinique-riquicate Ishaaco ovoaqueca Sara yagavejacaquerogueti Ishire Aapani Irioshi. Ariqueate iquejejiacariqueate imaica netsanajiaqueroca itioncana-queca Moishishini icatsimapinijiacajiqueate aatimpajia irijanintajiacaca Ishire Aapani Irioshi. <sup>30</sup>Cotanquitsiqueate ¿quiero ocanque Tionarentsi? Ocantiquea: “Manaquea pintigararanque-rotsija osamani oratica omperarentsi ontsipatanaquempariqueate irijanite. Irrijanite omperarentsi aatotarite itsipatashitimiritsi irijanite manquigarentsi teeca iromperaperaajitemparojo irashintaquemparogueti yashintaguevetacaca iriri.”

<sup>31</sup>Imaicaqueate, napitsaroventarijate, teequea iro choviquitajine omperarentsi, oquejevecaquea irooqua choviquijia-caji teeca iromperaperaajitemparojo.

Aatoqueate piquemisantajiguiritsi cantajiatsica: “Pinetsanajiaqueroc itioncanaqueca Moishishini”

**5** <sup>1</sup>Yoguipaquijacaantajiacajiqueate Quirishito aatoniji atsipeventaja-rotsti aquemisantajajirotsi omperaperaajavetacajica, mananijite anchoocatashijajempa intati. Imaicaquea pintima-naque, aato piquemisantajirotsi omperajavetaquempica. <sup>2</sup>Naroguentiquea Paavoro tioncaquempiroca. Pinquemi-santamajajiaqueroja noncamantajia-

quempica imaica: pintotsaiquimashita-caantavequempagueti pijiquegueti irooqua irishetantajempiroca Aapani Irioshi pigovaeguishere—pinquejejia-quempagueti imaica aato yagaveji Quirishito irimeshiguempi. <sup>3</sup>Noncantajijajempiquea quericaca nintanquitsineca intotsaiquimashijiqueru, manaquea irinetsanamajateroja maasano itioncana-queca Moishishini, teequea apaniro oncanteji intotsaiquimashijiqueruea. <sup>4</sup>Aviatimpajia nintajianquitsica pinetsanajiaquero itioncanaqueca Moishishini iroonijite irimeshantajiaquempicaquea Aapani Irioshi, manaquea piquenashijianaca intati teequeate pintsipajajempariji Quirishito, aisa teequeate pintintajigueji incavintsaqajiguempiji Aapani Irioshi. <sup>5</sup>Cotanquitsiquea naatimpajia noguijajiaquequea incavintsaqajiaquena-quea oncoramanitapoajegueti, incameetsamajajajena iramenajiaquenaquea quejetaca tee noncovaeguishetimajiguempaji. Irioquea agavejacaguene Ishire noguijatanquemparica, naventacaritarite. <sup>6</sup>Arimajagueti aquemisantamajajiaqueri Quirishito Jesoshi iriraqueate Aapani Irioshi aatoquea iquenquejacotiro aricaca atotsaiquimashijiaca aricaquea tee, iroguentitarite intintamajati iriatimpa anquemisantamajajiaqueri. Anquemisantamajajiaqueri-gueti ariquea ampintsaqianaquempari maasano caquintepae.

<sup>7</sup>Oraqueate iroqueragueti piquemisantamajajiavecaroquea iroomajatatsica. Arikea iticaajitavaquempi irootaquequea povashiantantajianacaroca.

<sup>8</sup>Teequeate irioquea quejetacaiguempine Aapani Irioshi, iriguentitarite cajemajajauempiquea iroqueragueti.

<sup>9</sup>Icantajitiquea: “Onconoquemparogueti capichajaniqui anempoacaqueroneca pan, ariquea oncotanaquempa anempoanaquequea maasano ose.”

Ariqueate iquejejiaca caquinte inchoo-  
caqueguetiquea apaniro amataatsica  
impajencajqueriqueate igonor.

<sup>10</sup>Naatimpaquea notsaqueriquea  
Amajirote, irioquea amitacojiaquempine  
aatoniji piquenashitanaca pipampiataco-  
tirotsi teeca iroomajaca. Cotanquitsi-  
quea quericaca asereaqueempica  
incatsimaqueriquea Aapani Irioshi.

<sup>11</sup>Napitsaroventarijiate, naatimpaquea  
arimegueti nocancanimegueti noncan-  
queme intotsaiquimashitacaantajia-  
quempaquea maasano inquejetantajia-  
naquemparica joriojia, aatomequea  
icatsimajiganame nogonorojia joriojia,  
aisa aatomequea icatsimatimentajigana-  
rome notsavetanquerigueti Quirishito  
imetojaventacajigueti coroshiqui.

<sup>12</sup>Iroosacanicate iquejevintsaquiaqueri-  
guetiqueate imaica, iarimesano  
incanquempame tsein tsatic iriatimpa  
maasano asereajiaquempica cantajia-  
tsica pintotsaiquimashijiaquempa!

#### **Arigueti pimpintsatavacaajiaquempa, ari ovegarapoja**

<sup>13</sup>Aviatimpajia, napitsaroventarijiate,  
icajemajiaquempiqueate Aapani Irioshi  
irimeshiajiaquempiniji, aatoniji patsipe-  
ventajijaaro pinetsanajajero itionanca-  
quea Moishishini, cotanquitsiquea  
teequea irininteji ancovaeguishejia-  
quempa, aatoquea picantajiguitsi:  
“Imaicaquea cameetsavaeque nantaque-  
queate taaca opajitapae noninqueca  
naatimpa.” Manaqueate pimpintsatava-  
caajiaquempa pamitavacaajiaquempa  
intati. <sup>14</sup>Icanquetarite Aapani Irioshi  
itioncacaquerigueti Moishishini:  
“Pimpintsataquemparija pigonoro  
pinquejetacaajempa pipintsatagueti  
aviatimpa.” Pinquejetacaajiaquemparo-  
gueti imaica piteroncaqueroquea  
pinetsanaqueroquea maasano itionca-  
caaquerica. <sup>15</sup>Cotanquitsiquea namena-

jiaquempi manaqueate picatsimatava-  
caajianaca intati, piquejejianacari  
chaonarijite yatsicavacaacagueti.  
Inchiquiojisanoja pitsinampirejavacajai-  
anacatsijate aatoquea pitsipatavacaaja.

#### **Pinquemisantamajajiaqueri Ishire Aapani Irioshi**

<sup>16</sup>Imaica noncamantajiaquempiqueate  
pincoguitempanija pinquemisantamaja-  
jiaquerijate Ishire Aapani Irioshi  
tsatacashirentajiaquempica. Pinquejeji-  
aquempagueti imaica aatoquea pipeaca-  
jajaa pinintaguishejiguica aviatimpajia.

<sup>17</sup>Choocatarite covaeguishetacaacajica  
anintajiguica ampeacaagushejiguempa,  
cotanquitsiquea irira Ishire Aapani  
Irioshi iroguentiquea inintaque ancoma-  
jamajajiaquempa, irootaquequea  
ampeacaajiaquempagueti anintaguishe-  
jiaqueca aatimpajia aatoquea aquemi-  
santajiguiritsi iriatimpa. Oraquea  
anquemisantajiaquerigueti, aatoquea  
apeacajajaiatsi anintaguishejiaqueca  
aatimpajia. <sup>18</sup>Iriogueti choocashirentaji-  
aquempine Ishire Aapani Irioshi,  
aatoquea irooqua patsipeventajajaatsi  
pinetsanajajero itioncanaquea  
Moishishini aatoniji icatsimajiguimpi  
Aapani Irioshi.

<sup>19</sup>Atsajigurotarite yantaguishejiguica  
irirajia quemisantaqueroca inintashigue-  
vetacaca: yoashijiguiro teeca iro  
imanquigare, manaquea icovaeguishe-  
jiaca intati, yantaguishejiaquerogueti  
teequeate impashiventacaguemparo.

<sup>20</sup>Itsaroventajiacari irioshivijitashita-  
caca, imatsitantajigui, icatsimatanta-  
jigui, yantashitantajiga, icatsimatacotsi-  
tantaguetiro taaca opajitapae, icatsima-  
jiaquequea, iriguenti quenquejacota-  
jatsi, aisa teequea intsipatavacaajiguem-  
paji manaquea itsinampirejavacajiaci-  
intati. <sup>21</sup>Inintsjiguiriqueate yashinta-  
guetaca itsipa, imetojantajigui, ishinqui-

jiga, aisa iconoajiaqueroquea yantaguishejiaquequea taaca opajitapae. Noncantsijajempiqueate iriraquea quejejiaqueroca imaica aato yoajigui ichoocatigueti Aapani Irioshi.

<sup>22</sup>Cotanquitsiquea ichoocashirentajacajigueti Ishire Aapani Irioshi apintsavacaajiacaquea, ashinevaejiacaquea, teequea ashoshoguitejiajempa, manaquea atsperejacojaca intati, apintsatantajianacaquea, acavintsa jianaquequea, netsanaquea oaquero acanqueca. <sup>23</sup>Aisa aquemisantacojiacaquea intati teequea ampigatantajiguempaji, aisa atampishitashiguetaqueroquea taacaguetsi opajitapae. Teequea incantimentajitajiroji anquejejiaquempaqueate imaica. <sup>24</sup>Iriraqueate tsaroventamajajigarica Quirishito Jesoshi quejetanaca quea itsipajiacari yompajacojitaquerigueti coroshipiqui, manatarite imetojapitsajianaquero inintajiavecaca, irootaquetari teeca irrantantajiajempapiroji. <sup>25</sup>Ichoocashirentajiacajigueti Ishire Aapani Irioshi itsatacaa jitacajiqueate, iroosacanicate imaica jamequetirote anquemisantamajajianaqueriquea anetsanajiaqueroqueate maasano inintaguequeca. <sup>26</sup>Aatoquea aventacojiga, aatoquea acatsimatacaguiri itsipa, aisa aatoquea amintajigui anaimanantanajiaquequeate.

#### Pamitacotavacaajiaquempa

**6** <sup>1</sup>Napitsaroventarijate, aviatimpajia ichoocashirentamajajiaqueca Ishire Aapani Irioshi pamenajiaquerigueti pigonoro ipeacaaca covaeguisherentsi cameetsaquea poaqueri pincantomajajiaqueriquea cameetsanjijite impishonquimentanajeronijite, cotanquitsiquea inchiquiojia picatsimajiguiritsi, manaquea pincavintsa jeriquea. Ariquea pamenamajajiaquempaquea aatonijite piquejelianaca aviatimpajia aisa

pincovaeguishejianaquempa. <sup>2</sup>Pamitacotavacaajiaquempaquea pintampishitasitementajiaqueronijite covaeguishetacaantatsica. Pinquejejiaquempagueti imaica jac pinetsanajiaqueroquea itsatacajaiacajica Quirishito. <sup>3</sup>Choocaguetsi teeca iranaantimateji cotanquitsiquea iramaenauempagueti ijiquejiaaviji yanaantaque, irisatiquea amatavijaatsi. <sup>4</sup>Pamenajiguempaja maasano aviatimpajia, pamenajiaquempaguetiquea picomajamajajicavaiguentiquea shineventajatsine. Aatoqueate iro pishineventajiga pijiguegueti panaaqueri itsipa. <sup>5</sup>Maasanojiatari inchiquiojitsitarie iquejetaca iriatimanya tajiguiguetsi irooca cameetsatatsica irooca covaeguishetatsica, tee iro itsipa quejetacaguemparine.

<sup>6</sup>Imaica nonintaque noncamantajiaquempiquea ancavintsa jajiaqueriquea tsatacajaiacajica Iguenquetsatsare Aapani Irioshi, ojocajiaqueneriquea taaca opajitapae cameetsaguetatsica.

<sup>7</sup>Inchiquiojitsaja pamatavijasti aviatimpajia: iriraqueate Aapani Irioshi incatsimajiaqueri maasano cantimanajiguirica. Taaca opajita itsaqui caquinte, irootaque iraavaje. <sup>8</sup>Irira antaguishejigiroca inintashiguetaqueroquea, quejetaca iro itsaqua, coajica ontsoroanaque, ariquea iraviguitaje covaeguisherentsi; cotanquitsiquea iriraquea savicaventiroca inntaguetica Ishire Aapani Irioshi, quejetaca iro itsaqua, ariquea iraavaje anijagantsi poneanquitsica Ishirequi Aapani Irioshi, incoguitempani iranijaguiten. <sup>9</sup>Imaica jamejate antampishitashijiaquero antajiaquequea cameetsaguetatsica, aatoquea aperataro. Aatogueti aperajiga anquejetaquempariquea aavajiroca oitsoqui, incavintsa jajitari Aapani Irioshi oncoramanitapoja jegueti. <sup>10</sup>Irootaquequea nocantantajiaquempica jaameja ancavintsa jajiaqueri-

quea maasano, ariquea agaanaquempa ancavintsa jamajata queri apitsaroven-tarijate tsaroventajiacarica Quirishito.

#### **Iteoncajiana jinirigueti icantajia querica**

<sup>11</sup>Imaica narotaque Paavoro tioncava-quempiroca ocatica. Irootaque pintsatantava-quemparoca: inirojegui nocanquero notioncaquerogueti nacoqui.

<sup>12</sup>Irira queate cantajiat sica pintotsa iquima-shitaca antajia quempa manatarite inintajia que irishinetimentajia quempari igonorojia joriojia. Yamenajia querari incantajia vequempagueti: “Iriguentiquea anquemisantajia que Quirishito metojaventa-jiacjica corosiqui”, manaquea irantsipeta-caja quempa riquea incatsimajia queri. Irootaque quea icantantajia quempica pintotsa iquimashita caantajia quempa.

<sup>13</sup>Jeriquea totsaiquimashita caantajiat sica teequea arimaja irinetsanamajajigueroji itioncana queca Moishishini, cotanquitsiquea manaquea inintajia que pintotsa iquimashita-ccaanquempa iroquea iraventantajiana-quempaca iramenajia queguedi yagavejajia-quempi itotsa iquimashita caajia quempi quea pinquejetantajiana quempa ririatimpajia

pitsinoqui. <sup>14</sup>Cotanquitsiquea naatimpa teequea nonintej i naventacotempaji, iroo quea noshineventamajataca imetojaven-tacajigueti Amajirote Jeso quirishito corosiqui, teequea noshineventajemparo-quea maasano ishineventaguishetacaca quepatsipa equitica, quejetaca quea mana ometojapitsatanaquena intati, aisa oquejetaca nometojapitsatanaquero, teequea nonintimatageroji nonquenquejaguerajeri.

<sup>15</sup>Aritarite aventajia quempa rigueti Quirishito Jesoshi, teequea iro incoacotempaji antotsai-quimashita quempa irooca aato, irogueuti-quea icoacotaca iroquerashirentajianajaji.

<sup>16</sup>Maasano quemisantajia queroneca ocatica, noninque Aapani Irioshi inchoocata caajia-queri cameetsa, incavintsa jajia queri, irojia quea yashintama jajiacaca quejetaca yashintajiacari ishiraerijiani coramani.

<sup>17</sup>Imaica quea ariotapojaque yasereaji-ta quena ipigapigajiquena, choocatarite notsinoqui piropiroi nipiropiroitimenta-jiquenari Amajirote Jesoshi.

<sup>18</sup>Imaica, napitsaroventarijate, noninque quea incavintsa jajia quempa Amajirote Jeso quirishito pishirequi. Ari oncoquempa.

# **PAAVORO ITIONCAJIAQUENERI EPESOQUITICA**

**Antsatantaquemparoca**

Ocatica iroguenti antsatantaquemparoca paperi itioncacaantaqueca Paavoro itioncajiaquenerigueti tsaroventajiacarica Jesoshi chocajianquitsica quinteninintisqui pajitatsica Epeso. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncacotaqueri ichoocaqueguedi Paavoro Epesoqui paperiqui Yantajiguica 18.19–20.1; 20.17-38. Tequeratagueti intioncacaanteroji ocatica paperi, itioncacaantaqueo otsipa mavite paperi itigarancajiaquenerica quemisantajiatsica chocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica chocajianquitsica quepatsiqui icantajitica Garashia, aisa otsipa irashi quemisantajiatsica chocajianquitsica Iromaqui. Chooca quenquejajianquitsica tequeratagueti intioncacaantajiaqueneri Epesoquitica, itioncacaantajiaqueneri Piripoquitica. Paavoro itioncacaantaqueo 3 paperipae ajagantsiniqui 60, ichoocaqueguedi santanaqui Iromaqui: aparo itioncacaantajiaqueneri quemisantajiatsica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaqueri ocatica 3 paperipae yoanaqueguedi quepatsiqui pajitatsica Ashia.

Ocaniqui paperiqui Paavoro icantaque, tequeratagueti impeacaguemparojo Aapani Irioshi maasano ipeacaacaca, itsatsitacaquea incapiocajiaqueriquea maasano quemisantajiaquerineca Jesoquirishito, irioca jorio aisa teeca irijorijoigueji, maasanoquea irimajirontajajempari Jesoquirishito. Chooca 3 iquempetacaacaca Paavoro antsatantajiaquemparoca ichoocashirentacajigueti Quirishito quejetaca aparo anajiae. Jero imaina: (1) aatimpajia aquejejiacaro tsovironaqui ipeacaajitaca mapipanco, irira Quirishito irio quejetacaro mapi anaantamajatanquitsica itampaticatacotantacaroca otsipapae (2.20-22); (2) aatimpajia aquejejiacaro tsinotsi, iriraquea Quirishito irio quejetacaro aguito (4.15-16; 5.23); aatimpajia aquejetacaro manquigarentsi, irira Quirishito irio quejetacari manquigatacjica (5.25-32). Icamantajiaqueri Paavoro maasano quemisantajiaquerica Quirishito irashimirintajiaquempari ampatsini,

iquejetacaacari coareta Iromaquitica yashimirintagueti chooca yashimirintantague-tacaca (6.11-17).

---

**1** <sup>1</sup>Naroguenti Paavoro itigarancane Jesoquirishito, iriotari nintaca-aquena Aapani Irioshi. Imaica nontionca-jiaquempiqueate maasano aviatimpajia choacajianquitsica Epesoqui yashintajia-caca Aapani Irioshi, aisa tsarorentama-jajarica Quirishito Jesoshi.

<sup>2</sup>Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaa jiaquempinijite cameetsa aatoniji pishoshoventajigaro taaca opajitapae.

#### Icavintsajajiacajiquea Quirishito

<sup>3</sup>Iintsija ashineventajiguempari Irioskite Amajirote Jesoquirishito, iriotaque aisa Iriri, ancantajiaque caavij yoganejencamajata. Irio cavintsajajiac-jica ontaniqui inquitequi, icavintsaja-majajiacaji ashirequi yashintajiacaj-gueti Quirishito. <sup>4</sup>Coramani tequerata-gueti impeacaguemparo quepatsi icoguiajiacajiquea inintacaajiacaji acancaniquea antsarorentajiaquemparie-queate Quirishito ancomajatimentajia-quemparinijite aatoniji acovaeguishe-jiaja, aisa iramenimentajiacajiniji quejevaecaquea teeca ancovaeguisheti-matempaj. <sup>5</sup>Aritarite iquejetaquero imaica icantsicaroquea paesatoniqui impeajiacaji irijanijate, ipintsajiacajita-rite, itigarancantacarica Jesoquirishito irimetojaventajiacaji, iriotarite nintanquitsi Aapani Irioshi irootaque iquejetancaroca imaica. <sup>6</sup>Iintsija ashineventajiaquempariequeate Aapani Irioshi irootriji icavintsajamajajiacaji itigarankimojicajiriquea Irijanite ipintsamajataca. <sup>7</sup>Iriotaque oguisotoajia-jaji yovregaratantacaji iriraja, ipeacojia-

cajiroquea agovaeguisherejia, caavijitari icavintsajanti Aapani Irioshi, <sup>8</sup>icavintsjamajatantajiacajica, anaavaetaquetari itsamajare, iroomajaca iguenquejane.

<sup>9</sup>Coramani teequeate antsajajavetempaji intigaranquimojicajiri Quirishito irimetojaventajiacaji, tequeratratirajatari ironigaanteroji icanquerica iroaqueragueti. Cotanquitsiquea imaica atsajiaqueroquea, jac netsanatapoja itigarancaqueriquea. <sup>10</sup>Icanquetarite coramani: “Noncapiocamajajajeri-queate maasano choocajjatsica jenoqui inuitequi jerijia aisa quepatsipaequi-tica cameetsaniji irimajirontajiaquemparinji Irijani Quirishito.” Oraqueate oncoramanitapoja jegueti aapojempa-gueti irinetsanatantaguequemparoca, irinetsanataqueroqueate icanqueca.

<sup>11</sup>Icoguiajiacajiquea aatimpajia tsarorentavaquemparineca Quirishito intsipatimentavajajiniji jenoqui inuitequi inquejetacaamajajajicajiqueate irijanite. Coramanitari tequerata-gueti onchoocatimagueteji inintacaitajiacajiqueate irashintajiacaji. Iriatimpapea inintaquequea ariquea oncoguenta-naquempani imaica, iriotaquequea amenaguequeroquea cameetsavaeque-quea. <sup>12</sup>Inintaqueterite Aapani Irioshi noshineventajiaquempariequea naatim-pajia, noncantajiaqueriquea iriguenti caavijica yoganejencamajata. Naroquetiquea pariacaro noquemisantajiaqueri Quirishito. <sup>13</sup>Ariquea piquejejiacaquea aviatimpajia iroompaquea piquemajia-viquerogueti Quenquetsatsarentsimajaca tsavetanquerica Quirishito meshia-jiaquempineca, paventamajajianacari-quea, irootaquequea icoraquetantacaca Ishire Aapani Irioshi ichocashirentajia-

quempiquea, pitsatantajiacaca aviguentija irijanmajajiate. Aritarite icanque Aapani Irioshi coramani intigarancaqueri.<sup>14</sup> Arimajaquea itigaranoquimojajacajiriquea Ishire, ichocashirentajiacajiquea aatimpajia cameetsanjite antsatimentamajajaqueñijite irinetsanjaqueroquea Aapani Irioshi maasano icantajiacajica, intsipajianacajiqueate jenoqui inquitequi incavintsajajacajiqueate maasano aatimpajia yashintajacaca. Iroosacanicate iintsija ashineventamajajiguempariquea, ancantajiaqueri: "Poganejencamajata."

**Paavoro yamanacoventajiaqueri quemisantajiaquerica Quirishito**

<sup>15</sup>Coramani noquemacojiaquempiqueate pitsaroventajiacari Amajirote Jesoshi aisa pipintsamajajiacari maasano igomajamajarejia, irootaquequea<sup>16</sup>noquenquejantajiaquempica namanaquerigueti Aapani Irioshi nocancaniquea nocantacoventajiaquempi: "Arioteesaa."<sup>17</sup>Namanaqueriquea Irioshite Amajirote Jesoquirishito, iriotaquequea Aapani oganejencatatsica, namanacoventajiaquempi intsatacajaiaquempi Ishire pintsatimentamajajiaqueronijite maasano inttaguetica, aisa namanaqueri ironigaajiaquempi quero icota iriatimpa pintsatimentamajajiaqueriniji.<sup>18</sup>Namanacoventajiaquempiquea intsatacajaiaquempi cameetsanjite pintsamajajiaquenijite quero oncotanquempani oncoramanitapojaegueti anchoocajiaqueguedti ontaniqui iriatimpaqui, oganejencavaetacaquea. Icajemaquiaquempitarite incavintsajajiaquempi-niji irishinetacaamajajiaquempi. Arikea inquempetacaajiaquempari maasano igomajamajarejia.<sup>19</sup>Aisa namanacoventajiaquempiquea pintsamajajiaque iriraquea Aapani Irioshi iriguentiquea caavijica yagaveja-

majati yanaajiaqueriquea maasano, yagavejacaantajiacajicaquea aatimpajia atsaroventajiacarigueti.<sup>20</sup>Pamenejate arimajaguitatsi yagavejamajati, yonigaanquerotarite yagavejica coramani ivochantajirigueti Quirishito imetojavetacagueti. Arikeate yaanajiri-quea jenoqui inquitequi yoguisavacajiri-quea itincamijempequiqui.<sup>21</sup>Yanaamatantajiacaricaqueate maasano majirontaguetatsica, iramajirorepae, agavejaguevetatsica, jivaguetatsica, maasano. Yanaajiaqueriqueate maasano choocajianquitsica imaica jerijia aisa coajicajianajatsineca.<sup>22</sup>Aapani Irioshi yanaacaquaqueriquea Quirishito yashintacauecariquea maasano, aisa ipeacaavajari imajiromajajiate maasano imeshiajiaqueca.<sup>23</sup>Aatimpajia quemisantajiaquerica aquejejiacaroquea itsino Quirishito, aroguentijia ichocashirentamajataqueca. Iriguentiquea peacaaguetacaro maasano choocagueta-tsica inetsanamajajeroqueate itsitacamajaguetaqueroqueate maasano.

**Icavintsajajacajiqueate Aapani Irioshi yaajiajajiqueate**

**2** <sup>1</sup>Coramani oquejetacaquea metojajiaque pishirejia, pantajavetacarotari icantimentaguetaquea Aapani Irioshi, pipeacaajavetacaquea covaeguisherentsipae.<sup>2</sup>Irooquea pantapinijavetaca, pogujatacojiaqueroquea iquenquejajiguica quepatsiquitica, piqemisantajiaqueriquea imajirote ampatsinipae quenaguetatsica otampajaguitetigueti. Iriatimpa iriguentitarite omperajigarica maasano pigatsajigarica Aapani Irioshi.<sup>3</sup>Aatimpajia maasano aritarite aquejejiavectoriqueate iriatimpajia. Aquenquejaguishevetaquea, aisa antagushejavietaquea taaca opajitapae anintajiguica. Irootaquequea icatsimatantajiavecajica Aapani Irioshi,

iquejetacaajiavetacajiquea iriatimpajia.  
<sup>4</sup>Cotanquitsiquea Aapani Irioshi cavintsajantamajatantsica yagamaja-comajajiacajiquea, caavijitari ipintsama-jajiacaji, <sup>5</sup>yanijacaantajiacajicaquea ashirequi ometojashirentavetacajigueti agovaeguishere, itsipatacaantajiacajiri Quirishito yanijacaajirigueti. (Inchiquio-jitaquea icavintsajajiacaji imeshiantajia-cajicaquea.) <sup>6</sup>Ariquea itsipatacaantajia-cajiriqueate Quirishito Jesoshi ivochan-tajajajiquea, ariquetae yaajianacaji-queate jenoqui inquitequi yoguisavicaji-avacajiquea iriatimpaqui. <sup>7</sup>Iquejetaca-ajajiquea imaica cameetsaniji oncogui-tempaniquea intsamajajaque maasano caavijiquea ipintsamajajiacaji. Aritarite icotaca iriatimpa, irootaquequea icavintsajantajiacajica aatimpajia tsaroventajigarica Quirishito Jesoshi.  
<sup>8</sup>Inchiquiojitaquea icavintsajajiaquempi-quea Aapani Irioshi imeshiajiaquempi-quea paventajiacarigueti Quirishito, pamenajiaqueterite arimaja imetojaven-tajiaquempi. Teequeate inchiquiojitsita pimeshiajiguempaji, inchiquiojitsitarite inintaquequea iriatimpa irimeshiajia-quempi. <sup>9</sup>Tee onchoocateji ampeaca-guempaca aatimpa ameshiantaquemparome-meca, arimequea aventacoquemparome-quea. <sup>10</sup>Iriotaquetari peacaajiacaji Aapani Irioshi, imeshiajajacajiquea aventaventajicarigueti Quirishito Jesoshi. Icantashitatijaiacajiquea anetsanajaqueroniji maasano cameetsa-guetatsica inintsitacaajiacajica coramani tequeratagueti anchoocajigueji.

#### **Arikea aquejetavacaajiacaquea maasano tsaroventajigarica Quirishito**

<sup>11</sup>Imaicaqueate imaica aviatimpajia teeca pijorijoigujeji, iintsijate pinquen-quejajeroja queroqueate picojavieran coramani, manatarite teequea inconoaji-avetempiji joriojia yamenajiaquempi-

queate teequea pinquejejiguempariji iriatimpajia itotsaiquijitiroguedi ichonquimashi, irootaquequea icantan-tajiaquempica teequea pintsajigeriji Aapani Irioshi. <sup>12</sup>Pinquenquejacojigue-roja coramani teequea pintsajavetem-pariji Quirishito, yamenajquemquea teequea irashintajiaquemquea Aapani Irioshi jero aisa teequea pintsajavetem-paroji icantajiaquerica Aapani Irioshi ishiraerijia coramani irinetsanatavaque-neruea incavintsajajiaquerigueti, teetari aviguenti igonorojia. Pichoocata-shijiavetaca quepatsiqui, tecatsi poguija-covetempaji, teetari pintsajavetempaji ininque incavintsajajiaquempi, teequea pintsajavetempariji Aapani Irioshi.  
<sup>13</sup>Coramani teequeate pintsajavetempa-riji Aapani Irioshi, quejevetacaquea pichoocavaetini jmm osamani. Cotanquitsiquea imetojaventajiaquempi-quea Quirishito Jesoshi, osotoajatimen-tajiaquempi iriraja. Imaicaquea paventajiacariquea yaantajiaquempi-caquea, quisho yoajimpi.

<sup>14</sup>Coramani maasano naatimpajia joriojia nocatsimaneguintajiaquempi-quea maasano aviatimpajia teeca pijorijoigujeji, tee pinquemisanteroni-cate itioncanaqueca Moishishini. Arikea acatsimaneguintavacaajiae-taca, cotanquitsiqueate imeshiajiacaji-queate Quirishito, ipejairoquea acatsimaneguintacojiavetacaca. Imaica-quea teequea ancatsimatavacaajajem-paji, manaquea aconoavacajaiancaca-quea, yamenajiacajitari Aapani Irioshi arikea aquejetavacaajiaquea maasano quemisanquerica. <sup>15</sup>Imeto-jaque Quirishito itsinoqui aatonijite quericaca atsipeventajemparone irinetsanatajero itioncanaqueca Moishishini iroonijite irimeshiantajempa. Irootaquequea imaica teeca ancantashitatijaiguempaji, arikea

aquejetavacaajiacaquea maasano irioca joriojia iriguentica teecca irijorijoigueji. Imaicaquea aquemisantajiaqueriquea iriatimpa teequea ancatsimatavacaajia-jempaji.<sup>16</sup> Imetojaventajiacitarite Quirishito coroshiqui cameetsanijite antsaroventajiaquempariniji, ariqueate imaica atsarоventajiacarigueti ariqueate ashineventajiacariqueate Aapani Irioshi. Arikeate iquejetaca iriatimpa ishineventajiacaji maasano. Imaicaquea imaica arikea aquejetavacaajiacaquea atsarоventajiacarigueti, teequeate ancatsimatavacaajiajempaji icameetsatacojijaajitari.

<sup>17</sup> Naatimpajia joriojia notsajavetaro Icanqueca Aapani Irioshi, cotanquitsiquea teequea nontsarоventamajajiguempariji. Aviatimpajiaquea teequea pintsatimajavetempariji, cotanquitsiquea oraquea icoraquequitigueti Quirishito arikea itsatacayaacajiquea maasano aatimpajia quero ancojiaquempani antsaroventajiaquemparigueti Aapani Irioshi arinijite antsipatavacaajiaquempaquea aatonijite acatsimatavacaajiajatsi.<sup>18</sup> Imetojaventajiacaji Quirishito, irootaquequea nagavejantajiacaca naatimpajia joriojia nocancani noncoraqueta shiqueri Aapani Irioshi namanajigueri, cotanquitsiquea teequea apaniro nagavejajigueji naatimpajia, pagavejajiguquea aviatimpajia aisa pamanajigueri, iriguentitarite agavejaaquampepi Ishire Aapani Irioshi agavejacaajiaquenacquea.<sup>19</sup> Coramani teequea pigorontajiavetenaji, teequea pintsajavetemparinica Aapani Irioshi, cotanquitsiquea imaica manaquea piquejelianajana maasano tsaroventajigarica Aapani Irioshi, pitsaroventajiacitarite aviatimpajia aisa, irootaquequeate irijamintantajiaquempicaquea, arikea agonorontavacaajiacaquea.<sup>20</sup> Aquempejiacaro aisa imapipancote

itsinetacotica. Irirajiaquea itigaranca-neja Jesoquirishito jerijia tsavetantajiguiroca icantajiaquerica Aapani Irioshi, irio quempejiacaroa mapicotapae isavijitica itsinetacotantamajatacaca cameetsaniji onquishomajatanaqueniji. Iriraquea Jesoquirishito, irioquea quempetacaroa mapi anaantamajatan-quitsica itampaticatacotantacaroa otsipapae.<sup>21-22</sup> Imaica maasanoquea aatimpajia tsaroventajiacarica Quirishito aroguentijia itsovironaquite Aapani Irioshi, aroguentijia iteepro-rote, ichoocashirentajiacajitarite Ishire. Yagavejacaajiaquempaquea maasano antampishitavacaajiaquempaqueate antsaroventantamajajianaquemparica-quea. Pitsipajiaquenaqueate aviatim-pajia aisa, pitsaroventamajajianacarita-rite, aisaquea ichoocashirentajiaquempi-tarite Ishire.

### Isavicaventica Paavoro

**3** <sup>1</sup>Naroguenti Paavoro isantanataco-jitaqueca notsavetantaquerigueti Quirishito Jesoshi nosavicaventajia-quempigueti aviatimpajia teeca pijorijoigueji.<sup>2</sup> Piquemacojiaquenampa-quea icavintsajaquenagueti Aapani Irioshi itigarancaquenagueti nontsav-antimojiaquempiqueate maasano aviatimpajia teeca pijorijoigueji.<sup>3</sup> Iriatimpa yonigaaquenaroqueate isenacavetacaca, itsatacaaquenaquea notioncantavacarocaquea capichaji.<sup>4</sup> Imaica papatsajavantajiaquerogueti pintsamajajiaquequea arimaja notsaquero maasano yonigaaquenaca Aapani Irioshi yonigaanquerigueti Quirishito.<sup>5</sup> Coramaniquea tee inchoocateji caquinte tsataqueroneca, cotanquitsiquea imaica irira Ishire Aapani Irioshi icoguajiaquenaquea yonigajiaquenaroquea naatimpajia itigarancanejia Jesoshi jerijia aisa

tsavetantajiguirica.<sup>6</sup> Jeroquea teeca intsaiajave tempaji: Aapani Irioshi incavintsaajiaqueriquea maasano teeca irijorijoigueji quemisantajiaqueroca Quenquetsatsarentsi Oganejencatatsica tsavetacoquerica Quirishito Jesoshi, inquejetacaajiaquempariquea icavintsaajiguirigueta i shiraerijia quemisantamajatatsica. Oraquea icantajiaquerica jorioja coramani, ariquea inquejetacaajiaquempariquea iriatimpajia imaica, aritarite igonorontavacaaja.

<sup>7</sup>Irooqua notsavetanque, icavintsaajauenatari Aapani Irioshi inintacaaque-naquea nontsavetanqueri Jeso quirishito, irootaquequea inchiquojitsitaquea iriatimpa itigaranaquena yagavejaca-aquena. Irootaquequea imaica nagavejan-caca notsavetantaqueri. <sup>8</sup>Caavijiquea yanaajiaquena maasano itsipajia tsaroventajigarica Aapani Irioshi, cotanquitsiquea icavintsaajauenaquea Aapani Irioshi itigaranaquena nontsavetantimojiaqueri teeca irijorijoigueji noncamantajiaqueri quero icota Quirishito, caavijiquea icavintsajamajiaqueri. <sup>9</sup>Iriraquea Aapani Irioshi peacaaguetaroca maasano igantagaquea coramani inintaque irimeshiajitareri teeca irijorijoigueji, cotanquitsiqueate mana isenacacovecaroquea ininqueca. Arikea itigaranaquenaquea nontsata-cajiaqueri quero incojiaquempa cameetsanijite irimeshiaimentajiajeriniji. <sup>10</sup>Arikeate iquejetaca imaica ininque-quea irimeshiajiaqueri quericaca tsaroventajiaquemparineca iroonijite intsatantajiaquempaca maasano majirontajati sica choocajati sica jenoqui inquitequi jerijia aisa agavejajati sica choocajati sica inquitequi caavijiqueate itsamajaque Aapani Irioshi. <sup>11</sup>Igantaga-quea coramani iroaqueragueta inintaque irimeshiajiaqueri maasano tsaroventajiaquemparineca Amajirote Quirishito

Jesoshi. <sup>12</sup>Imaica atsaroventajiacariea teequea antsaroajigueji amanajiguiriguetai Aapani Irioshi, atsajiaquetarite igantagaquea i quemajiacaji. <sup>13</sup>Imaica pitsajiaquequea choocatirajana acaniqui, isantanatacojiquena natsipeta-caquea, cotanquitsiquea pishinejiguem-pa quea aatoquea pishimampojancajia-jatsi, aviguentijitarite natsipeventajia-caca.

### Paavoro yamanacoventajiaqueri Epesoquitica

<sup>14</sup>Irootaquequea nogueroventantaca-rica Iraapanite Amajirote Jeso quirishito. <sup>15</sup>Iriguentitarite ashintajigarica maasano tsaroventajigarica, irirajia choocajia-tsica jenoqui inquitequi jerijia aisa choocajati sica acaniqui quepatsiqui, icantantajitarica “irijanijate Aapani Irioshi”. <sup>16</sup>Iriatimpa iriguenti caavijica yoganejencamajata, aisa caaviji yagave-jamajati, irootaquequea namanantaca-rica nocanqueriquea nonintaque iragavejacaantajiaquempi Ishire, intampishitacajiaquempi intsompogui pishirequi. <sup>17</sup>Namanacoventajiaquempi-quea aisa nocanqueriquea noninque incoguitempani inchoocashirentajia-quempi Quirishito, piquemisantajiaqueritarite. Noninquequea taaca opajitapae pantajiaque picancaniquea pimpintsa-tantamajajiaquempa, <sup>18</sup>iragavejacaajia-quempiniji aviatiimpajia aisa maasano itsipajia igomajamajarejia pintsaque-quea caavijiquea yanaaque ipintsamajajiaquempiquea Quirishito. <sup>19</sup>Atsajiave-tacaquea ipintsamajajiacajiquea Quirishito, cotanquitsiquea aatoquea agavejajiguetsi antsamajajiaqueroqueate, anaamajaquerotari apintsatantajigaguetai aatiimpajia caquinteja. Cotanquitsiquea nonintaquequea pintsamajajiaque caavijiquea yanaaque ipintsamajajia-quempiquea. Pintsamajajiaquerogueti

ariquea pinquenquejamajajiaqueriquea Aapani Irioshi aisa inchoocamajajia- quempiquea.

<sup>20</sup>Caavijiquea yagavejamajataquequea iriraquea choocashirentajiacajica, yagavejaque iranaamajatavaqueroquea taaca opajita amanaquerica, jero aisa maasano anquenquejavequempaca.  
<sup>21</sup>Irootaquequeate imaica maasano aatimpajia quemisantajiaquerica Quirishito Jesoshi iintsija ashineventajiguempariquea Aapani Irioshi. Iintsija acancaniquea ashineventajiaquempariquea. Cameetsaquea inquejeliaquempa aisa maasano anchoviquijianaqueca, incoguitempani intsarovenatajiaquempari ajagantsinipaequi. Ari oncoquempa.

**Icantajiaqueriqueate  
intsipashirentavacajiaquempa maasano  
tsaroventajigarica Quirishito**

**4** <sup>1</sup>Notsavetacotaquerigueti Amajirote, irootaquequea isantanta- tacotimentantajiquenarica. Imaica noncantajiaquempiquea pincomajamajajiaquempaquea pinetsanatimenqueroniji inintacaquempica Aapani Irioshi iroqueragueti icajemajiaquempigueti.  
<sup>2</sup>Aatoquea panaanatavacaajiga, pincavintsajavacaajiaquempaquea, pamencoajianaquempaquea intati irantashijitaquempigueti. Pimpintasata- vacaajiaquempaquea pantsiperejacota- vacaajiaquempa. <sup>3</sup>Imaica piquemisanta- jiaquerigueti Aapani Irioshi ichoocashi- rentajiaquempiquea Ishire, irotaque- queate agavejacaajiaquempica pitsipata- vacaantajiacaca cameetsa, piquemava- caajiacaca. Cotanquitsiquea pincoguitem- pani pinquejianaquempa imaica.  
<sup>4</sup>Maasanotarite aatimpajia tsaroventa- majajigarica manaquea atsipatavacaaji- acaeque quejecaquea apanironica achoocajiaque, apatirotitarite ichoocaque Ishire Aapani Irioshi

choocashirentajiacajica. Aisa maasano icajemajiacajiquea Aapani Irioshi cameetsaniji incavintsajajiacajiniji oncoramanitapoajegueti ontaniqui jenoqui inquitequi. <sup>5</sup>Chooca apatiroti Amajirote, apatiroti aventajiacaca aatimpajia maasano, apatiroti aviñacajatimentajiacaca maasano.

<sup>6</sup>Chooca apatiroti Aapani Irioshi, iriguentiquea Aapanite aatimpajia maasano. Iriatimpa iriguentiquea Amajirojitate maasano, iriguentiquea agavejacaajiacajica maasano, aisa iriguentiquea choocashirentajiacajica maasano.

**Icantashitatiacaaguecajiquea  
yagavejacaajiacajigueti Quirishito**

<sup>7</sup>Caaviji icavintsajamajajiacajiquea Quirishito maasano, cotanquitsiquea icantashitatiacaaguecajiquea maasano yojocaguecajigueti yagavejica antajia- queneriniji inintacaajiacajica. <sup>8</sup>Itionca- cojiqueriguetiquea coramani ocanti:  
“Yoanaji jenoqui, ijivajianaqueri yaajiaqueca yanaajiaqueca.  
Arikea yojocajiaqueneriquea caquinteja inintacaajiaque- rica.”

<sup>9</sup>Imaica ñtaaca opaji oncanque “yoanaji jenoqui”? Jeroquea oncanque aritarie iquenapoji iroqueragueti ontaniqui jenoqui inquitequi icoraque- quitigueti acanqui quepatsiqui.

<sup>10</sup>Iriraquea quenapojatsica jenoqui inquitequi iriotaquequea atsomajanaja- tsica, yoavaetanaji jenoqui yavisananaji inquite, intsitacamajaguetaqueronijite maasano, yanaajiaqueriquea maasano.

<sup>11</sup>Iriatimpaquea yagavejacaajiaqueri- quea quemisantajiguirica irantajiaque- neriniji inintacaaguetaquerica: iconoagarantajiacaquea ipeacajaiacari- queate itigarancane; itsipaquea ipeacajaiacariequea tsavetantajiguiroca

icanquerica; itsipaquea yagavejacaajiaquerigueti yaanaqueroquea Quenquetsatsarentsi Oganejencatatsica, itsavetanta-jiaquero; itsipaquea ipeacajaiacariequa quempoguijajigurica quemisantajatiatsica itsatacayaqueriqueate.<sup>12</sup>Ariuea iquejetacayaquemipa quea maasano aatimpajia yashintajiacaca cameetsan-jite agavejajiaqueniji amitacotavacaajia-quemipa antampishitavacaajiaquemipa arinijite anquemisantamajajianaqueri Quirishito maasano aatimpajia quejejia-caroca itsino.<sup>13</sup>Acancaniquea anquejejianaqueroquea imaica arejevaetapo-jempa antsipatavacaamajajiaquemipa-gueti maasano, anquemisantamajajiaqueriquea Irijanite Aapani Irioshi, aisa antsamajajiaqueri. Ariuea anquenque-varishirentanaque, anquejemajaquem-pariquea Quirishito.<sup>14</sup>Aatoquea aquejejijaaritsi chaajaniquipaetirajaca tequeratirajaca intsajigueji, shineti-mentajatiatsitirajaquea taaca opajitapae icantajiquerica. Aatoquea aquemisanta-jiguiritsi cantashitatigaroca Iguenque-tsatsare Aapani Irioshi. Iriatimpajia-trite itsanirojiguitari yamatavijantajigui, manaquea intintajiaque intati iramatavi-jajiacaji aatoniji aquemisantamajajajiri-itsi Quirishito.<sup>15</sup>Cotanquitsiquea aatimpajia iintsija ampintsamajajiguem-pariquea maasano, ancantamajataque-quea anquenquetsatacayaquemipa quea arimpanijite anquenquevarishirentana-quea arejevaetajemparoniji anqueje-jianaquempariquea Quirishito anetsana-jiaquerigueti maasano intintacaya-cajica, iriguentitarite Amajirote.<sup>16</sup>Iriguen-titarite agavejacaajiacajica antsipatava-caantajiaquempacaqueate asavicaventa-jiaquerigueti taaca opajita ininqueca iriatimpa, maasanotarite icantashitatia-caaguecajiquea yagavejacaajiacajigueti antajiaque taaca opajita intaguetica. Iroosacanicate maasanojia asavicaventa-

majajiaquerigueti ariqueate anquemi-santamajajianaqueriquea antampishita-vacaajianaquemipa quea ampintsatava-caamajajianaquemipa quea.

### **Aatoquea piquejejijaatsi tequerataguetai pinquemisantajigueji**

<sup>17</sup>Imaica noncantajiaquemipa queate aatoja piquejejijaaritsi teeca inquemi-santajigueji quenquejaguishejatiatsica intati, teenicate irininteji Amajirote pinquejejiajempa quea imaica.<sup>18</sup>Iriatim-pajia ipitsecaquenquejanetanaque, teequea iranijashirentacaajigueriji Aapani Irioshi aisa teetarite irinintaj-igueji intsajiaqueriquea, manaquea iquishoshirentajianaque.<sup>19</sup>Iroguenti-quea yantajigui yantaguishejiaquequea taaca opajitapae covaeguisherentsi, manaquea itsanirojiaquequea intati, teequea impashiventacajiguemparojo, ishineventajiacarotarite intati.<sup>20</sup>Cotan-quitsiquea aviatimpajia teequea iro itsatacayaquemipa pitsapojaquerigueti Quirishito,<sup>21</sup>arimajagueti piquemajajiaqueri, arimajagueti iro itsatacayaquemipa iroomajatatsica itsatacaantica Jesoshi.<sup>22</sup>Imaica aatoquea piquempejijaquea paesato-ni qui pantaguishejiavetacagueti covaeguisherentsi, aritarite picojiacani pishineventajiacaroquea, manaquea amatavijajiaquempi.<sup>23</sup>Imaicampani iroqueraro oncantanajempa pishire aisa piguenquejane.<sup>24</sup>Piroquerashirentajianaje, irootaquetari ipeacaimentan-tajiaquemipa Aapani Irioshi pinquem-pejiaquempariniji iriatimpa, comajashi-remajaca pincantajempa, pincomaja-majajianajempa.

### **Icantajiaqueriqueate quero incotajempa incomajajajiaquempagueti**

<sup>25</sup>Aatoquea pamatavijajajiritsi pigonoropae, manaquea pincantamaja-

taque, aatoquea picantashita intati, maasanotarite aatimpajia manaquea atsipatavacaajiacaquea intati atsaroven-tajiacarigueti Amajirote Jesoquirishito.

<sup>26</sup>Piquemavaquerogueti oncoraquetaquegueti pigatsimare, aatoja picovaegui-sheta, taampinaquea pimpetsimarejajia-naje tequeratagueti ompitsequeji,

<sup>27</sup>aatonijite yagavejajiguimpitsi ampatsini incovaeguishetacaajiaquem-puea.

<sup>28</sup>Irraquea aitsitantajatisca ariotapo-jaque paitsintaque, manaquea pincatsiquetaque intati, irooca pantaji-aque otsipa cameetsaguetatsica irootaquequea onchoocatantaquempaca pincavintsajanquemparica coguitejacoji-anquitsica.

<sup>29</sup>Aatoquea picantaguishetitsi, manaquea pincankequea cameetsague-tatsica amijaquerineca quemisantajia-vaquempineca pintampishitacaantajia-quemparica. Cameetsaquea pinquenque-tsatacaajiaqueri irooqua pincavintsajanquemparica. <sup>30</sup>Aatoquea pishimam-pojancacaaajigaritsi Ishire Aapani Irioshi, iriotaquetarite itigaranquimojiaquem-pica Aapani Irioshi ichoocashirentajia-quempiquea, quejetaca iseyotaquempi intsatantajitaquempaca aviguentijia irashimajaca arejevaetantapojempaca savincaguiteri iraantajiavajerica Amajirote maasano yashintajiacaca.

<sup>31</sup>Imaicaquea pimpishoncajero picatsi-mashirentajiguigueti, aatoquea picatsimajencajiaji, manaquea povashi-antanajero pigatsimaca. Aatoquea pitampishijencatantajiaji, aatoquea picantashitari itsipapae. Povashiantajia-naqueroqueate maasanopae covaegui-sherentsi quejecaroca ocatica. <sup>32</sup>Pinca-vintsajajiaqueriqueate pigonorojia, aisa pimpintsamajajiaquempariquea. Aatoquea picatsimashirentiri itsipa querocagueti incoquempini, manaquea

pimpeacotajemparo intati, pinquempeji-aquempariqueate Aapani Irioshi ipeacotsitajimpirogueti picovaeguisheji-acagueti, aatoquea icatsimatimentim-piro, paventajiacaritarite Quirishito.

### Icantajiaqueriqueate inquejejaquempariqueate Quirishito

**5** <sup>1</sup>Aviatimpajia aviguentijiarite irijanijiate Aapani Irioshi ipints-majajiacaca, imaica pinquejejiaquempariqueate iriatimpa. <sup>2</sup>Picancaniajia pimpin-tsatantamajataquempa, quejetaca Quirishito ipintsamajajiacaji ipimantan-tacaroca imetojane imetojaventajiacaji-quea. Irootaque oquempetacaro cameetsajencatatsica yojocajitaquene-rica itaajitaquenerica Aapani Irioshi, ishineventavacaro.

<sup>3</sup>Aatoquea poashitimajiguirotsi manquigarentsi teeca irooqua pimanquigare. Ari pinquejejiaquem-paea aisa manquigarentsijia, aato poashitiritsi shirampari teeca irio pimanquigare. Aatoquea piquenquejacotimajiguirotsi taaca opajitapae covaeguishetatsica. Aato pinintsiguetiri yashintaguecaca itsipa, aisa aatoquea pinintavaque pinintavaque. Icoguiajia-quempitarite Aapani Irioshi pincomaja-majajiaquempaniji. <sup>4</sup>Aatoquea piquen-quejajiguitsi taaca opajitapae oguipashi-ventajantatsica. Aatoquea picantagui-shejgui intati, aisa pinquenquetsataque-gueti aatoquea piconoantavacaro covaeguisherentsi, manaquea pinquen-quetsajiaque cameetsa pishineventajia-quempariqueate Aapani Irioshi cavintsa-jajiaquempica. <sup>5</sup>Pitsamajajiaqueterite aato yogui ontaniqui imajirontagueti Quirishito jeri aisa Aapani Irioshi quericaca oashitiroca manquigarentsi, jeri aisa antagushteriroca taaca opajitapae covaeguisherentsi, jeri aisa nintsiguequerica itsipa yashintagueta-

caca, jeri aisa quejecarica irinintavaque irinintavaque. Iriraqueate nintatsica irajaarantamajauempa quejevaetacea- quea manacaquea iroguenti irioshivi- jique irajaararopae.<sup>6</sup> Inchiquiojita ya- matavijajiguimpitsija cantashijiatsica intati. Icatsimamajajiguiritarite Aapani Irioshi maasano quejejiguiroca imaica teeca irinintajigueji inquemisantajigue- riji.<sup>7</sup> Irootaquea noncantantajia- quempica aatoquea pitsipaguishejiga- ritsi iriatimpajia.

<sup>8</sup> Paesatoni oquejeveca pipitsecacoji- aque iroorijite pantaguishejiavetaca- queate taaca opajitapae covaeguishe- rentsi teenicate pintsajiavetempari- ji Aapani Irioshi, cotanquitsiquea imaica pitsajiaqueriquea piquemisantajiaqueri- gueti Amajirote, quempecaquea itsirencacotapoajimpi. Irootaquea noncantantajiaquempica: arimpaquea pinquempejianajempariea choocata- tsica savincaguiteriqui, manaquea pincomajamajajianaquempa.<sup>9</sup> Maasano- tarite tsamajajiguirica manaquea icavintsajantajiguiquea intati, icomaja- majajigaquea, aisa icantamajajiaque- quea, teequea iramataajiguempajia.

<sup>10</sup> Irooqua pintsajiaque ishineventague- taca Amajirote.<sup>11</sup> Aatoqueate pishine- ventimajijaarotsi maasano yantagushe- jiaqueca irirajia pitsecacojianquitsica, manaquea pincantimentantajiaquero- quea, teatarite irishineventemparo- ji Aapani Irioshi.<sup>12</sup> Aato ocameetsati anquenquetsaguishetacotsitantaquero- gueti taaca opajitapae yantagushejigue- tica imanavecaca, oguipashiventajanti- tarite intati.<sup>13-14</sup> Cotanquitsiquea aviatimpajia pincomajamajajianaquempa- gueti, iriraquea antagushejiguiroca covaeguisherentsi inchiquiojitsitarite iriatimpajia iramenajiaquempa manaquea icovaeguishejia- caca, iroomp- quea arica irinintajiaquequea inquejejia-

naquempi aviatimpajia inquemisantajia- naqueriquea Quirishito. Irootaque- queate itioncacojiquerogueti ocantiquea:

“Pintinajanaqueuea aviatimpa  
maanquitsica,  
aviatimpa metojanquitsica pimpo-  
chatanajequea,  
ariquea intsirencacotaquempiquea  
Quirishito.”

<sup>15</sup> Imaica pincomajajiguempaqueate aatoquea piquempejijaaritsi teeca intsajigujeji, manaquea pinquejeliaquempa- riquea tsajatsica icomajajigagueti.

<sup>16</sup> Pisavicaventamajajiaqueroqueate pantsipeventamajajiaquempariea Aapani Irioshi imaica, choocatarite oshequini antagushejiguiroca covaegui- shersentsi.<sup>17</sup> Irootaquea noncantantajia- quempica aatoquea piquejigari teeca intsajigujeji inquenquejajigue, manaquea pincantajiaqueriquea Amajirote intsataca- jaiaquempiro maasano inintaqueca pantajiaqueca.<sup>18</sup> Aatoqueate pishinquijiga, piquenanaquetsiqueate picovaeguishetatsi. Irooqua pinintamajate inchoocamajatana- quempi Ishire Aapani Irioshi.<sup>19</sup> Pinquen- quetsatavacaajiaquempaquea, pincantsi- temparoquea ocanqueca amashairentsipae itsaroventantajitarica Aapani Irioshi. Pamashaiventajiaqueri Amajirote, pintsaroventamajajianaquempariea onquenavaetanaque pishirequi.<sup>20</sup> Paventa- jiacaritarri Amajirote Jeso quirishito imaica, iiintsija pincoguitempani pishineventajia- quempariea Aapani Irioshi pincantapini- taqueriquea: “Ariotesaa”, iroorijite icoguitaniquea icavintsajajiaquempiquea.

**Quero incojiaquempani  
inchoocajiaqueniji cameetsa  
manquigaijatsica aisa imanquigare**

<sup>21</sup> Arigueti pitsaroventamajajiacari Quirishito aatoquea pinintajiguitsi panaanaatavacajiaquempaquea,

maasanoquea pinquemisantavacaajia-  
quempaja pamitavacaajiaquempaquea  
intati.

<sup>22</sup>Manquigarentsijia, pinquemisanta-  
majajiaqueri manquigatimpica quejeta-  
cauea piquemisanquerigueti Amajirote.  
<sup>23</sup>Iriraqueate shirampari iriguentitarite  
jivatiroca imanquigare iquejetacari-  
queate Quirishito ijivajiguirigueti  
maasano tsaroventajigarica, aisa  
irioquea meshiajiaquerica. Iriraquea  
Quirishito yamenajiaqueri quemisantaji-  
atsica quempetacauea iriojia itsino,  
Quirishito irio quejecaroca iguito.

<sup>24</sup>Aritarite oquejetacauea imaica  
maasano tsaroventajigarica iquemisan-  
tajiaqueriquea Amajirote Quirishito,  
ariequa onquejejiaquempaquea manqui-  
garentsijia onquemisantamajajiaqueri-  
queate manquigataroca, aatoquea  
opigapigatsajigariquea.

<sup>25</sup>Shiramparijia, pimpintsamajajia-  
quemparoqueate pimanquigare, pinque-  
jeliaquempariqueate Quirishito  
ipintsamajajiacarigueti maasano  
tsaroventajigarica, iquejetacaacari  
imanquigare, ipacaro imetojane  
imetojaventaqueroquea, <sup>26</sup>cameetsani-  
jite irogameetsantajiaquero, apanironi-  
jite irashintajiaquemparo. Isaancanta-  
caro iquivantacaro oja aisa iguenquetsa-  
tsare.<sup>a</sup> <sup>27</sup>Ininquietarite iramajero  
intsipataquemparo, aato opintatimata,  
aato otsñoamagoti, aato ochoocati  
quejecaroca, manaquea oganejencata-  
quempa oncameetsamajataque. Arikea  
inquejetacaajiaquempari maasano  
igapiocene, iroganejencatacaaajiaquem-  
pari. <sup>28</sup>Imaica aviatimpajia shirampa-  
rijia, pimpintsaiguemparojate  
pimanquigare pincavintsajajiaquero-

quea pinquejetacaajiaquemparo  
pipintsajigagueti aviatimpia. Iriraquea  
cavintsajiroca imanquigare irisatiquea  
cavintsajaatsi. <sup>29</sup>Tecatsi sematsine itsino  
iriatimpia, maasanoquea acavintsajajia-  
quea ashecajiacaquea aatonijite  
ametojajiguitsi, aisa amenanontajiac-  
quea aatoniji taa oajigaji. Arikeate  
iquejetacaajiacariqueate Quirishito  
maasano tsaroventajigarica ipintsajiga-  
rigueti. <sup>30</sup>Aatimpajia aisa tsaroventajig-  
arica maasanoquea atsipajiacariqueate  
atsaroventamajajigarigueti quejevaeca-  
quea aroguentica itsino, irootaquea  
icavintsajantajajajica. <sup>31</sup>Arikea  
itioncacojiquerogueti ocanti: "Iroota-  
quea imaica shirampari intsinampi-  
rejanaqueriqueate iriri aisa iriniro,  
quisho iromajataquero imanquigare,  
apatsinoroquea incantanajempa.  
Arikea iroaqueragueti tequeratagueti  
irimanquigatemparoji, mavite icarajia-  
vetaca, arikea imanquigacarogueti  
ariequate icojianaca tee irimavitetajem-  
paji, quempetanajaqueate apatsinoro-  
nica icantaja." <sup>32</sup>Omanavecaquea  
ocatica, cotanquitsiquea mana nocanta-  
jiaquempiroquea iroquea pintsatantaji-  
aquempaca arikea iquejetacaajiacaji-  
quea Quirishito maasano aatimpajia  
atsaroventajigarigueti. Itsipajiacaji-  
queate iriatimpia quejevaecaquea  
aparoquea acantaja, quishoquea  
yoajiacaji. <sup>33</sup>Noncantisijajempiqueate  
aisa maasanopae shirampari impintsa-  
majataquemparoqueate imanquigare,  
incavintsajajeroquea inquejetacaajia-  
quemparoquea icavintsajagueti  
iriatimpia. Aisa maasanopae manquig-  
arentsi onquemisantamajajiaqueriquea  
manquigataroca.

<sup>a</sup> 5.26 Coramani ontaniqui Joreaqui yamejigaca iroshipojigueti irimanquigajitaquemparo  
manquigarentsi, otsipataca onquivamajataquero aisa onetsanamajataquero  
onquitsaatajemparo saancamorenaro teeca ontsñoamagoteji.

**Quero incojiaquempani irijanintajiatsica  
aisa irijanijiate**

**6** <sup>1</sup>Aviatimpajia chaajaniquipaetirajaca, arigueti piquemisantajiaqueri Amajirote ininque pinquejetacaitempariquea piri aisa piniro pinquemisantajiaqueriqueate, caavijiquea ocameetsati pinquejetaquerogueti imaica. <sup>2-3</sup>Paesatoniqueate Aapani Irioshi icantavecariqueate Moishishini taaca opajitapae, ariuea itioncacoguequieroqua cameetsanijite irinetsanajiaqueroavaesatinijitatene, cotanquitsiqueatteequea incanteji irinetsanajiaqueroguequea maasano osamaniqueate inquishojaque acaniqui quepatsiqui. Cotanquitsiqueate choocaquea apatiroti icantaquerica irinetsanataquerogueti osamaniquea inquishojaque acaniqui quepatsiqui, irootaquequea ocatica: “Pinquenquejacameetsatacotaquerija piri aisa piniro.” <sup>4</sup>Aviatimpajiaquea irijanintajiatsica, aatoquea picatsimatacashaqigartsiquea intati pirijanijiate aisa porijanijiate, manaquea pintsatacaajiaqueriquea maasano icanqueca Amajirote, aisa pincantomajajiaqueriquea irantajiaquerogueti covaeguisherentsi.

**Quero incojiaquempani yashintajitaca  
aisa ashincarica**

<sup>5</sup> Aviatimpajia yashintajitaca, pinquemisantamajajiaqueriqueate ashinquempica acaniqui quepatsiqui, aatoquea pipigapigajigari manaquea pintsaroaaajiaquempariqueate, aisa aato pamatavijajiguiri, manaquea pincatsi-quejiaqueneriqueate quempecaquea iriguentica picatsiquejiaqueneca Quirishito. <sup>6</sup>Aatoquea apatiroti pinetsanajigurotsi icantajiaquemmpica yamenajiaquempigueti irooqueate pishineta-cantajiaquemparica, picancaniquea

pincatsiquemajajiaquequeate, iriotaque-tari ashintamajajiaquempica Quirishito, aviguentijiatarite irajaanirejia Quirishito. Pinintamajajigueja pinetsanamajajiguero maasano intantaguatica Aapani Irioshi. <sup>7</sup>Pinetsanamajatanaque-roja incanquempigueti ashinquempica quejecaquea irioquea pantamajajuene Amajirote Quirishito, aatoquea aparoquea pishinetacagari papicaquinte-teni. <sup>8</sup>Pitsajiaqueterarite iriraquea Aapani Irioshi irishineventajiaquempariquea maasano antiroca cameetsatatsica, irivegarajiaqueneriquea. Inquejetacaaji-aquempariquea irirajia yashintajitaca, jerijia aisa teeca irashintajitempariji, maasano.

<sup>9</sup> Aviatimpajiaqueate ashintajigarica caquinte yojocantajitica, iintsijate pinquenquejajigueroquea ocatica. Choocaqueate apaniromajaca ashintajiguimpica aviatimpajia jerijiaquea aisa pashintajiacaca, iriotarite pimajiromajate choocatatsica jenoqui inquitequi. Iriatimpaquea yamenajajquempi teequea pincantashitatiqaiguempaj, ariuea piquejetavacaajiaquea maasano. Irootaquequea noncantantajiaquemmpica pincavintsaajajiaqueriqueate pashintajiacaca, aatoquea picatsimajiguiritsi.

**Quemisantajiatsica iquejetacariquea  
ashimirintajiatsica**

<sup>10</sup> Napisaroventarijate, apanivani-queate noncantajiaquemppiqueate, aviguentijiatarite tsaroventajigarica Amajirote imaica pamaneriquea pincantajiaqueri intampishitacaamajaji-aquempi, aisa iragavejacaamajajia-quempi, caavijitarite yagavejamajati. <sup>11</sup> Iriraqueate ashimirintajiatsica yashimirintavacaajiacagueti irogueniquea yaventajiga iguishoritepae aatoniji isatajajitiri. Imaica aviatimpajia pinque-

jejianaquempariquea paventajiana-quempariqueate Aapani Irioshi irojocajiaquemriquea maasano pimpigatantajiaquemparica ampatsini aatonijite yagavejajiguimpitsi yamatavijajiguimpitsi.

<sup>12</sup>Aatimpajiaqueate teetari iriguenti ashimirintajiguempa choocatanquitsica itsino, iriraja. Iriguentijiaquea ashimirintajiacaquea majirontajavetanquitsica teeca inconijajigueji, iriraja tigarancajiaquerica quemisantajiaquerica, iriguentijia agavejajiaquerica pitsecashirentacojianquitsica acaniqui quepatsiqui, iriguentijia ampatsinipae quenaguetanquitsica inquitequi peacagaroca covaeguisherentsi.

<sup>13</sup>Irootaquequeate nocantantajiaquem-pica imaica, pinquejetempariquea ashimirintatsica yaventarogeti iguishoritepae, paventamajajiaquempariquea aviatimpajia Aapani Irioshi yojocaquempitari maasano pimpigatanquemparica ampatsini pagavejajiaqueniji pintampishitashitimentajiaquerinijite incoraque-tashijiaquempigueti, aatonijite yagavejajiguimpitsi, manaquea pinquemisanta-majajianaqueriquea Aapani Irioshi.

<sup>14</sup>¡Pintimanaqueshiatsi! Picancaniquea pinquenquejajiaqueroqueate maasano arimajatatsica teecaquea amatavijanteji, oquejetacaquea yoishotacomajatacarogeti ashimirintatsica ichompimashite. Pincomajamajajiaquempaqueate pinquejetantanaquemparicaquea ashimirintatsica yavencarogueti isavoneguitacaca. <sup>15</sup>Quejetacaquea irira ashimirintatsica icavimajatanaca-queate cameetsanijite iranijitantana-quemparonijite, ariqueate pinetsanata-naquempaquea poajianaquequea, pinquenquetsatacaapojeriquea caquintepae pintsatacaaajiapojeriquea Quenquetsatsarentsi Oganejencatatsica inchoocatantajiaquempaca cameetsa.

<sup>16</sup>Aisa choocaquea ashimirintatsica

iticaancaca, iticaantavacaroquea shquiripi morecatsica aatoniji iquentajitiri. Aisa aviatimpa, paventamajatana-quemparija Aapani Irioshi, pinquemi-santamajatanaqueriquea aatonijite yagavejimpitsi ampatsinipae incovae-guishetacaquemriquea. <sup>17</sup>Aisa, quejetacaquea ashimirintatsica yasatirijarogueti cavorejatatsica ichoocatanta-jaca, pintsamajajiaquequea arimajaquea imeshiajiaquempi Quirishito pinchoocatantajempaca. Choocaquea aisa ashimirintatsica itsaampimenirite yagavejantarica yashimirincaca. Oquejetacaroquea Iguenquetsatsare Aapani Irioshi yojocajiacajica Ishire agavejan-quemparicaquea ampatsinipae. <sup>18</sup>Pican-caniquea pinquenquetsatacaqueri Aapani Irioshi, pamanamajapinjiaqueriqueate pincantajiaqueriquea incavintsa-jajiaquempi iramitacojiaquempi. Pinquemisanqueriquea Ishire intsatacaajiaquempigueti querocaca pincanqueni. Pinquenquejamajajigue pamanaquerigueti, aatoquea piperajigarotsi. Picanca-niquea pamanacoventajiaqueri maasano tsaroventajatisca.

<sup>19</sup>Pamanacoventajiaquenaqueate naatimpa aisa, intsatacaguenaniji Aapani Irioshi quero noncanqueni aatoniji notsarogui nontsavetanquero-gueti Quenquetsatsarentsi Oganejenca-tatsica teeca intsajivetempaji. <sup>20</sup>Aapani Irioshi itigarancaquenaquea nontsavetanqueroquea, irootaquequea isantana-tacotimentajitaquenaca yoishoitsijitanaquea cavorejatsariqui. Pamanacoventajiaquenaja cameetsanijite nontsavetanta-queronijite, pincantaqueriquea intampishitacaquena aatoniji notsaroacaga-rotsi, irootaquetari inintacaquenaca.

### Interoncacaajianajerica

<sup>21</sup>Arikeuea ichoocataquequea apitsaro-ventarite Tiiquico apintsajigaca.

Iriatimpa yantamajatiniriqueate Amajirote. Imaica nontigarancaqueriquea iroanaquequea aviatimpajiaqui pinquemacotimentajiaquenamijite, inchiquiojitsitarite incamantajiapojempiroquea maasano.<sup>22</sup> Irootaquequea nontigaranquimenquerica irishinetacijaipojempiquea intampishitacajaiapo-jempiquea.

<sup>23</sup> Imaica, napitsaroventarijiate, nonintaque irishinetacajiaquempi

Aapani Irioshi jeri aisa Amajirote Jesoquirishito inchoocatacaa jia-quempiquea cameetsa, aatonijite taaca opajita pishoshoventajajatsi, aisa intampishitacajiaquempiquea pintsaroventamajajianaquempari-niji, aisa pimpintsatavacajiaquempaniji. <sup>24</sup> Aisa nocanqueriquea incavintsa jiaqueriquea maasano pintsamajajia guitarica Amajirote Jesoquirishito.

# **PAAVORO ITIONCAJIAQUENERI**

## **PIRIPQUITICA**

**Antsatantaquemparoca**

Ocatica iroguenti antsatantaquemparoca paperi itioncacaantaqueca Paavoro itioncajiaquenerigueti tsaroventajiacarica Jesoshi chocajianquitsica quinteninintisqui pajitatsica Piripo. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncacotaqueri ichoocaqueguedi Paavoro Piripoqui paperiqui Yantajiguica 16.11-40; 20.1-6. Itioncacaantaquero Paavoro ocatica paperi isantanatacotacagueti. Chooca quenquejajianquitsica itioncacaantaquero ajagantsiniqui 55 isantanatacotacagueti Epesoqui. Itsipajia iquenquejajiaque itioncacaantaquero irooca ajagantsiniqui 60, irooca otsipa ajagantsini arejevaetacaro ajagantsini 63, isantanatacotacagueti Iromaqui. Irootaquequea iquenquejantajitacaca, tequeratagueti intioncacaanteroji ocatica, itioncacaantaguequero paperipae itigarancijaquenerica Tesaronicaquifica, aisa mavite paperi itioncacaantajiaquenerica Corintoquitica, aisa paperi itigarancijaquenerica Garashiaquitica. Chooca itsipajia quenquejajianquitsica itioncacaantajiaqueneri Iromquitica, Epesquitica, Corosquitica, jeri aisa Piremoni tequeratagueti intioncacaantajigueneri Piripoquitica.

Ocaniqui paperiqui Paavoro iquenquejacaajajiri tsaroventajiatsica Piripoquitica icavintsajajiaquerigueti itigarancijaqueneri imentaquitsitepae iramitacojiaqueriniji itsavetacotantaquerigueti Quirishito (2.25; 4.14-19). Isantanatacojivetacarigueti Paavoro, ogantaga ishinemajataca (1.12-26; 2.17-18; 3.20–4.1; 4.10-13). Itioncacaantajiaquenerigueti itsatacaajiaqueri iro ininqueca Aapani Irioshi ogantaga irishinejiaquempa quemisantajiaquerica, irooca onchoocaqueguedi cameetsaguetatsica, irooca aisa managuetanquitsica ichoocajaqueguedi acaniqui quepatsiqui, ari iquejetaca iriatimpa Jesoquirishito (2.5-11). Itioncacotaqueri Timoteo (2.19-23), aisa Epaperorito (2.25-30), aisa itsavetacotaca yantaguetaqueca iriatimpa (1.3-8, 12-26; 3.4b-14), aisa icamantajiaqueri quero incojiaquempani inchoocajaquenijite cameetsa quemisantajiaatsica (1.9-11, 27–2.4; 2.12-16; 3.1-4a; 4.2-9).

**1** <sup>1</sup>Naroguenti Paavoro, notsipatacari Timoteo, naroguentijia intantacaia queca Jesoquirishito nantajiaqueneri. Imaica nontioncajiaquempiqueate maasano aviatimpajia choocajatsica Piripoqui yashintajiacaca Aapani Irioshi, pitsaroventajiacaritarite Quirishito Jesoshi. Notioncajiaquempi maasano, aviatimpajia aisa quempoguijajuirica quemisantajiatsica jerijia aisa amitacoji-aquerica. <sup>2</sup>Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaaajiaquempinijite cameetsa aatonijite pishoshoventajigaro taaca opajitapae.

### **Paavoro yamanacoventajiaqueriqueate quemisantajiatsica**

<sup>3</sup>Nocoguitaniqueate noquenquejajiaquempigueti nocantaqueri Aapani Irioshi noshinevaeca. <sup>4</sup>Namanacoventajiaquempigueti noshinevaetacaqueate <sup>5</sup>namenaquequea aquejetavacaajiacaa ntajiaqueneri Amajirote cameetsanjijite intsavantimentajiqueronijite Quenquetsatsarentsi Oganejencatatsica, piparianacaroquea iroqueragueti piquemisan-tajiaquegueti arejevaecaquea imaica. <sup>6</sup>Notsamajaquequeate incoguitempani incavintsajajiaquempi Aapani Irioshi iragavejacaajiaquempi, incoguitempaniqueate incavintsajajiaquempi inquejeta-caajiaquempi iroqueragueti piquemisantajianaque arejevaetapojempa aapojajempagueti incoraquetantapoja-jempaca Jesoquirishito. <sup>7</sup>Noshinetimentajianaquempiquea. Cameetsatarite nonquejetaquempagueti imaica, nopintsamajajiaquempitarite, namenaquempiquea yagavejacaajiaquempi-queate Aapani Irioshi patsipeventajiacaroquea Iguenquetsatsare, piquejejiaque-naqueate naatimpa nantajenerigueti Amajirote. Coramaniquea tequerata-

gueti irisantanatacojitenaji choocana-queate notsavetantaqueroquea Quenquetsatsarentsi Oganejencatatsica tsavetantaquerica Jesoquirishito, nocantajiaqueriqueate maasano iroguentiquea iroomajaca. Aviatimpajiaqueate picavintsajajiaquenaqueate pamitacojiaquenaquea. Arikeate oquejetacaqueate imaica yoguijajita-quenagueti santanaqui picoguitani-queate picavintsajajiaquenaqueate. <sup>8</sup>Itsamajaqueroquea Aapani Irioshi nopintsamajajiaquempiquea noquenquejajiaquempica, iriguentitarite quenquejacaamajataquenaqueate Jesoquirishito. <sup>9</sup>Irootaquequea namana-coventantamajajiaquempica arimpaniji pimpltsatsavacaamajajianaquempa-queate, pinquenquejamajajianaquero-queate oganejencamatatsicaquea, aisa pintsamajajianaqueroqueate maasano ininqueua Aapani Irioshi. <sup>10</sup>Namanaco-ventajiaquempiqueate pintsamajajiaque-ronijite querocaca cameetsaguetatsica, pincomajamajajiaquempinijite, aatonijite ochoocati querocaca incanto-majimentajiaquempica Quirishito savincaguiteriqui incoraquetantapoja-jempaca. <sup>11</sup>Yagavejacaajiaquempitarite Jesoquirishito pincomajamajajiana-queampaqueate onquejetanaquemparo pimpltsaraquijacomajajianaquempa, irooqua irishineventantamajajitana-quemparica Aapani Irioshi, incantajite-quea caavijiquea yoganejencamajata Aapani Irioshi.

### **Ishinevaecaquea Paavoro itsavetantajiquerigueti Jesoquirishito**

<sup>12</sup>Napitsaroventarijate, noninquequea pintsajajiaquequeate isantanatacojiveque-naqueate, cotanquitsiquea arimpaquea itsavetantamajajitanaqueroqueate Quenquetsatsarentsi Oganejencatatsica tsatacaajiacajica quero icota Jesoquiri-

shito imeshiantigueti.<sup>13</sup> Maasanotarite coareta quempoguijajiguinirica itsoviro-naquite majirontatsica jerijiaquea maasano quemacotaquenaca isantanata-cojitaquenaguetai itsajiaquequeate iroguentiquea isantanatacotimentajique-naqueate nococanitari notsavetanqueri Quirishito.<sup>14</sup> Choocaquea oshequi apitsaroventarijiate tsaroventajigrica Quirishito yamenajiaquenaguetaiquea yoguijajitaquenaguetai santanaquii teequeate intsaroajianaquequeate iriatimpajia, icocaniquea itsavetantajia-queroquea Iguenquetsatsare Aapani Irioshi.

<sup>15</sup> Cotanquitsiqueate ichoocagarantaji-aquequea itsipa manaqueate icatsimati-mentajiaquenaroqueate intati yamenajiaquenaguetai icaramirincatimentajiana-quaquea ontaniqui caquinte, irootaquequeate itsavetacotantavecarie-queate, inintajavetacatarite iranaajia-quename intati. Cotanquitsiqueate ichoocagarantajiacaqueate itsipa manaquea itsavetacovintsamajajiaqueri Quirishito, ishineventamajajiacarotarite Iguenquetsatsare Aapani Irioshi.

<sup>16</sup> Iriatimpajiaquea ipintsamajajiaquena-quea yamenajiaquenaguetai iriguenti-quea nintacaaquena Aapani Irioshi nontsavetantajiaqueriquea Quirishito nontsatacajaiqueriquea maasano quero icota imeshiantigueti.<sup>17</sup> Cotanquitsiquea irirajiaquea nintajavetanquitsica iranaajiguena teequea irantamajatene-riji Quirishito, manaquea itsavetantave-tacariequa intati ijiqueji ari noshimam-pojancanaquempa, yamenajiaquenata-rite isantanatacojitaquena.<sup>18</sup> Noncaman-tajiaquempiqueate choocaqueate tsavetamtamajajiaquerica Quirishito. Choocajiaqueate aisaa itsipa tsavetantajigrica manaqueate inintajiaquequea intati irishimampojancacajiaquena, cotanquitsiqueate naatimpa teequea

noshimampojanquempoji, manaqueate noshinevaetanacaquea namenaqueri-gueti iriguentiquea itsavetantaquequea Quirishito.

Imaicaquea arimpa noamajatanaque noshinemajatanaquempaquea,<sup>19</sup> notsa-quetari pamanacoventajiaquenaguetai aisa yamitacotaquenaguetai Ishire Jesoquirishito, irooqua iraantajitavajenaca.<sup>20</sup> Teequea nonintejii nantaque taaca opajita guipashivenquenaneca, manaquea noninque nonquemisantama-jatanaqueriquea Quirishito, aatoquea notsaroguitsi. Ariguetai osamanigueta-quea nonchoocaque, aricampa irimeto-jajiquenaquea, noninquequeate noncoguitempaniquea nonquejeta-quempa imaica intsaroventimentamaja-jiquemparinijite Quirishito.<sup>21</sup> Imaica-queate imaica choocatirajanaguetai iroguentiquea noninque nonchoocaven-taquieroqueate nantaqueneriqueate Quirishito. Cotanquitsiquea caavijiquea anaaquero nometojaqueguetai, noninquequeate manaquea noanaque iriatim-paqui noncoguitempaniquea nonconoa-pojempariquea.<sup>22</sup> ¿Querocacaquea caavijica anaantamajatanquitsica? Jmm, teequea nontsateji. Iroguentiqueate notsaquequea choocatirajanaguetai acaniqui quepatsiqui noncoguitempani nontsavetanqueriqueate Quirishito intsaroventimentajiaquemparinijite itsipa caquinte.<sup>23</sup> ¿Querocacaquea noncoquempani? Omanamajatacaquea, mavitarite noninquequea. Nonintave-caqueate nometojaque imaica noanaquequea nonconoapojajempariquea Quirishito noshinevaetapojajempariquea.<sup>24</sup> Cotanquitsiqueate ariquea nonintavajiqueate aatotaquea nometoji, namenaqueterarite caaviji ocameetsa-taque nonchoocataquequea namitaco-majajiaquempinijite.<sup>25</sup> Irootaquequeate notsatantacaca aatotaquea nometojitsi,

iroquentiquea nonchoocatashitaque nontampishitacajiaquempiquea pishinevaejiaquempanijite pintsaroven-tamajajianaquemparigueti Jesoquirishi. <sup>26</sup>Oraquea irovashiantajitajenagueti ariquea noncoraquetajatequea namenajajatempa pintsatimentajiaque-nijite manaqueate icavintsajamajataque-naqueate Quirishito Jesoshi, ariquea pishineventtamajajianaquempari.

<sup>27</sup>Jeroquea aparo pinquempejiana-quempa: pincomajamajapinijiaquempa-quea pinquejetantanaquemparoca ocanqueca Quenquetsatsarentsi Oganejen-catatsica tsavetantirica Quirishito. Pinquejejiaquempagueti, aricagueti noashijianaquempiquea iroquenticaquea nonchoocavetaquempa quea osamani, nonquemacojiaquempiquea picancani pitsaroventtamajajianacari Quirishito teequeate povashiantajigeriji, aisa piconoavacajajanacaquea patsipeventajia-caroquea Quenquetsatsarentsi Oganejenca-tatsica pitsatacayaqueriquea maasano quero ocanti. <sup>28</sup>Aatoquea pitsaroacagaritsi catsimajiaquempineca, ariqueate iramena-jiaquempigueti teequea pintsaroacajia-guempariji ariquea intsamajajiaquequea iriatimpajia arimajaquea incatsimamajajia-queriquea Aapani Irioshi oncoramanitapo-jagueti, cotanquitsiquea aviatimpajia manaquea iraaJIavajempiquea.

<sup>29-30</sup>Teequeate apaniroquea irinintacaaaji-guempiji Aapani Irioshi pitsaroventtamajajiaquempariquea Quirishito. Inintacajiaquempiqueate aisa pantsipeventajiaquem-pariqueate pinquejejiaquenaquea naatimpa natsipeventarigueti Quirishito, aisa imaiica piquemacojiaquenaquea atsipetanatsinaqueate.

#### Pinquejejiaquempariqueate Quirishito

**2** <sup>1</sup>Imaiica itampishitacajiaquempiquea Quirishito, aisa ipintsamajajiaquempi irootaquequea pishinevaetanta-

jiacaca. Aisa ichoocashirentajiaquempi-quea Ishire Aapani Irioshi aisa picavin-tsajavacaajiacaquea pipintsatavacaajia-quea. <sup>2</sup>Irootaquequea nocantantajia-quempica pinintajiaquegueti pishineta-caajiaquenaquea, pincomajajiaquempa-queate aatoquea picatsimatavacaajiga, pimpintsatavacaamajajiguempa queate, pinquemavacaamajajiguempa quea aisa pintsipatavacaamajajiguempa quea pantajiaquenerigueti Amajirote.

<sup>3</sup>Aatoquea pinintajiguitsi panaimanaji-gueri papitsaroventtarite. Aatoquea piquenquejajiguirotsi pantajiaque paventacojiaquempaca. Majereni pincanquempa, pimpintsamajajiaquempa-riquia maasano pinquejetacaguempa-riquia pipintsamajatacarigueti anaamajajiaquempica. <sup>4</sup>Aatoquea apaniro piquenquejatsi aviatimpa, pinquenquejacojiaqueri-queate aisa itsipapae.

<sup>5</sup>Pincoguitempaniquea pinquejejia-quepariquea Quirishito Jesoshi, pinquenquejajigue quejetaca iquenque-jaqueca. <sup>6</sup>Arimpate iriatimpa iriguenti-vetaca queate Irioshimajaca, cotanquitsiquea teequeate iranaanteji. Irootaque-queate icanquerigueti Iriri incoraque-queate acaniqui quepatsiqui irivoaque inquejejiajajiquea aatimpajia, teequea incantanaquequea: "Aatoquea noguitsi, naroguentitari Irioshi."

<sup>7-8</sup>Manaquea yovashiantaguetanaquero-queate maasano yashintaguevetaca icoraquequitiquea acaniqui quepatsiqui, ivoauquitiquea icaquintemajataque-quea, teequea irimajirontajempaji, manaquea iquejetanacariquea yompera-peraitaca. Yatsipetacaqueate iquemisan-tacocaquea intati. Icoguitaniquea iquemisantamajataqueri Iriri, jeroquea inchiquiojita ipanacaroquea imetojantaca imetojaventajiacajiqueate coroshiqui. <sup>9</sup>Irootaquequeate icajeman-tanacarica Aapani Irioshi irimajironta-

majatapojajempanijite, yanaacaavaeta-jiri irootaquequea ivajiro anaavaetanta-caroca ivajiro pae maasano.<sup>10</sup> Iquejetan-tacaricaqueate imaica iroguerorentajia-quemparinijite Jesoshi maasanojia choocaguetatsica jenoqui inquitequi, acaniqui quepatsiqui, aisa isavipatsaqui.<sup>11</sup> Maasanoquea incantajiaquequea: “Jesoquirishito iriguentiquea Majironta-majatatsica”, ariuea intsaroventajita-quempariquea Aapani Irioshi.

**Ironigaacaantajiaquempa arimajaca itsaroventamajatacari Jesoquirishito**

<sup>12</sup> Nopintsamajajiacaca, coramaniquea nochoocavecagueti aviatimpajiaqui piquemisantamajajiaquenaqueate pinetsanamajajiaqueroquea maasano nocantajiaquempica. Cotanquitsiquea imaica nochoocaquegueti osamani noninquequea arimpaquea pinquemi-santamajajianaquenaqueate. Imeshiajia-quempitarite Aapani Irioshi nocantanta-jiaquempicaquea pimpincatsamajajia-queriqueate pinetsanamajajiaquero-queate maasano inintaqueca.<sup>13</sup> Iriguen-titarite quenquetsashirentacaajiaquem-piqueate Aapani Irioshi pinintimentajia-quenijite pantajiaquequea maasano ininqueca iriatimpa, aisa iriguentiquea tampishitacaajiaquempineca pagavejan-tajiaquempaca pantantajiaquemparoca.

<sup>14</sup> Maasanoquea pantaguequeca arigueti asereaqueMPI aatoquea picanta-naque pitse pitse, manaquea pishinevaetanaquempaquea intati, aisa aatoquea pipigatsatavacaanaca,<sup>15</sup> aatoniji ochocatitsi querocaca incantomajimen-tajitaquempica. Aisa netsana poguero piguenquejane, aatoquea piconaagu-shetiroquea covaeguisherentsi pinqueje-majatimentajiaquemparinijite Aapani Irioshi, aviguentijitarite irijanijiate. Ariuea irirajiaquea antagushejiaque-roca covaeguisherentsi iramenajiaquem-

piqueate quejevaejiaquempi impoqui-ropae iquitamiriaquitigueti opitsecaque-gueti, teetari pinquejiguempariji iriatimpajia, manaquea picomajamajata-nacaquea intati,<sup>16</sup> aisa pitsatacaantama-jajiaqueroquea Quenquetsatsarentsimajaca Anijacaantantatsica. Ariqueate incoraquetajategueti Quirishito noshine-vaequempaqueate, iramenaquenatarite teequea nantsipeventsashitempariquea intati, manaquea noquemisantacaamajajiaquempiquea.<sup>17</sup> Noquejetacaroquea imirajitaca ishaguitsijitancarica viratsi itaajiquenerigueti Aapani Irioshi, aviguentijia quejejiaquempiquea itaajiquenerica, patsipeventajiacaritari parentajiacaca pantajiaqueneriquea. Natsipevetacaquea, iro cotanquitsi noshinevaetaca namenajiaquempigueti aviatimpajia pishinevajianaca.<sup>18</sup> Imaicaquea ariuea pinquempejia-quempaqueate aviatimpajia aisa pishinejiaquempaquea pamenajiaquena-gueti nococaniquea noshinevaetanaca-quea natsipeventacarigueti.

**Timoteo aisa Epaperorito**

<sup>19</sup> Irininqequegueti Amajirote Jesoshi, iroquerasanoquea nontigarancaqueriquea Timoteo iramenajiaquitempi. Irarejepoja-jempagueti incoraquetajegueti noshinevaetanaquempaquea nonquemacojijajempi-gueti.<sup>20</sup> Tee anejerijiquea itsipa quejetaquemparineca iriatimpa, iquejeta-quenaqueate naatimpa noquenquejamajajiguimpigueti.<sup>21</sup> Itsipapaequea iriguentiquea quenquejacojijajatsi, teequea irioquea inquenquejamajajigue Quirishito Jesoshi.<sup>22</sup> Cotanquitsiquea aviatimpajia pitsamaja-jiguiritali Timoteo itsipamajatanaqueate yamiquenaquea notsavetantirogueti Quenquetsatsarentsi Oganejencatatsica quejevaequaquea irio mirjanitemajaca.<sup>23</sup> Arigueti nontsaqueguetiquea quero

nontigarancaqueriquea iramenajiaqui-tempi.<sup>24</sup> Arikea nonquejetaquempaquea naatimpa, noquenquejaquetari inintaque Amajirote iroguiupaquijajajena taampina, arikea noncoraquetaquitequea namenajajatempa.

<sup>25-26</sup>Coramani pitigarancajiaqueriquea papitsaroventariteni Epaperorito iramitaco-quena. Irioquea notsipatashitaca notsavetantaquerigueti Quirishito. Imaicaquea namenaqueuea cameetsataque nontigarancajeri iroanaje pinejajiajaveriquea, ininqueatee inchiquiojita iramenajapojajempi, itsaquerite piquemacojiaqueri yashinoncayaetaca.<sup>27</sup> Arimajaquea yashinoncayamajatacquea pajinimequea irimetojeme, cotanquitsiquea icavintsajaqueriquea Aapani Irioshi. Teequea apaniroquea incavintsajeriji iriatimpa, icavintsajaquenaqueate naatimpa aisa aatoniji noshimampo jancamajata.<sup>28</sup> Irootaqueuea nonintantacaca nontigarancajeri taampina iroanajequea aviatimpajiaqui cameetsaniji pishinetimentajianajempaniji, aatoniji noshimampojanquimentajiguimpitsi.<sup>29</sup> Iriatimpa iriguentiqueate papitsaroventarite pinconoajiajempairequea pincavintsajajaveriquea, arikea pinquejetacaajiaquempairequea maasano quejejiacrica iriatimpa.<sup>30</sup> Coramaniquea pajinimetrare irimetojaventanaquerome yantaquenerica Quirishito. Iriguentiqueate coraquetanquitsiquea yamiquenaquea, teenicate pagavejajigueji aviatimpajia pinchoocajiaque naatimpaqui pamijiaquenaquea.

### Inchiquiojitala piconoajigaritsijate cantashitatigaroca Quenquetsatsarentsimajaca

**3** <sup>1</sup>Imaica, napitsaroventarijate, pishineventamajajiguempairequeate Amajirote. Teequea nomperatemparo-

quea notioncajajimpigueti aisa, napijiji-ajimpiquea nocantajiaquempica coramani pincomajatimentajauquempajite aatonijite querica amatavijajiguimpitsi.<sup>2</sup> Pagamajajiaquempari irirajia amatavijantatsica quempevetacarica shiishi, pagamajajiaquempari irirajia peacagarroca covaeguisherentsi, irirajia nintanquitsica intotashivijitacaantempi intati pitsinoqui.<sup>a</sup> <sup>3</sup>Aroguentijiatari totsaiquimashimajatanquitsica, atsaroven tamajajicaritarite Aapani Irioshi yagavejacaajiacajigueti Ishire, yashintajiacajiquea Quirishito Jesoshi irooquea ashineventajiac, teequea aventajiguemparo amenavequempaca atsinoqui.<sup>4</sup> Cotanquitsiqueate naatimpa noninquemeguetiquea naventavetaquemparo amenaqueca atsinoqui, nagavejaquemequeate. Choocagueti jivetatsica iragavejaque iraventemparo amenaqueca itsinoqui cameetsaniji iro irimeshiantajitaquemparica, caaviji anaque nashi naatimpa naventavetaquempameca.<sup>5</sup> Iroorijite novoaqueguetiquea iroompaquea aapojacaguetti 8 savincaguiteri itotsaiquijquieroqueate nochonquimashi, naroguentitarite ishiraeri ichoviquini Vejamineni, evereomajaca nonaque, noguenquetsatsare iroguentiqueate evereotsa, naroguentiquea pariseomajaca notsipajiacariqueate nogonorojia pariseojia nonetsanajiavetacaroquea itioncacota-naquea Moishishini.<sup>6</sup> Caavijiquea nonintamajaveca nontsaroven tamajataquemparime Aapani Irioshi, nocatsimantan tajianacaricaquea tsaroventajiacarica Quirishito, nojiqueji arijiquea icantashitatiacaro nonetsanaguevecaca, namenavectarite caavijiquea nocomajamajata-

<sup>a</sup> 3.2 nintanquitsica intotashivijitacaantempi intati pitsinoqui. Iriojia icantacotaque irirajia cantajianquitsica intotsaiquimashitacaantempsa maasano cameetsaniji irishineventavaquempari Aapani Irioshi.

caquea.<sup>7</sup>Cotanquitsiquea imaica teequeate nonquenquejacotajeroji maasano noshineventavetacaca coramani, teequea noshineventajemparoqua iriguentinijite nonquenquejama-jaquequea Quirishito nontsamajatimenquerinijite.<sup>8</sup>Caavijiquea anaquieroqua oganejencamajataca nontsamajataqueri-queate Amajirote Quirishito Jesoshi, anaaguequieroquate maasano. Namenta-guetanaquieroquate maasano nonintaguevetanica quejetanacaquea cajarashitequi nontsamimentamajataquerinijite iriatimpa,<sup>9</sup>aisaquea nonconoinentama-jaquemparinijite. Teequea noncamedtsatashitempaj naatimpa. Nonetsanaguevecaroquea itioncanaquea Moishishini, cotanquitsiquea tee onetsanatenaji. Manaquea naventacari-gueti Quirishito, irootaquequea inetsanatantaquenaca Aapani Irioshi. Arikea inquejetacaguempariquea maasano aventajiaquemparineca irinetسانانجاqueriquea.<sup>10</sup>Imaicaquea naatimpa manaquea nonintamajataque-quea nontsamajaqueri Quirishito. Noninquequea iragavejacaquenaquea naatimpa quejetacaquea yagavejaca-querigueti Aapani Irioshi yovochantajirigueti. Aisa noninquequea nantsipeven-quempari nonquejetaquempariquea iriatimpa yatsipeventajiacajigueti. Teequea noninteji nonquenquejajero-quea nonintaguevetacaca naatimpa, quejecaquea manaca notsipatacari Quirishito imetojaquegueti, arikea nometojapitsatanaquieroqua maasano nonintaguevetacaca.<sup>11</sup>Noninquetarite nontancorejanaje oncoramanitapoja-geueti nonchoocapojajequea iriatimpaqui.

#### **Isavicaventamajatica Paavoro**

<sup>12</sup>Teequea noncanteji netsanataca maasano nocantacoguequeca imaica,

aisa teequea noncanteji jac cameetsama-jatanajana. Manaquea panquenatanatsi-naquea nonetsanatimenqueroniji intintacaquenaca Quirishito Jesoshi iroorijite yashintajana.<sup>13</sup>Napitsaroven-tarijiate, tequerataqueate nonetsanama-jaguetaquero maasano intintacaque-naca. Cotanquitsiquea jeroquea nosavicaventica imaica: teequea noninteji nonquenquejacotajero querocaca nantaguetaqueca coramani, manaquea arimpaquea noamajatanaque nomoncaraqueroniji intintacaquenaca.<sup>14</sup>Ariqueate noncotanaquempaniqueate imaica incavintsajimenquenanijite Aapani Irioshi iraanaquenaquea jenoqui inquitequi, irootaqueetari icajemanti-mentajiacica aventacarigueti Quirishito Jesoshi.<sup>15</sup>Maasanoqueate tsaroventamajajigarica Quirishito ariqueate inquejejiaquempaquea imaica. Choocaguetiqueate itsipaquea cantashi-tatiacaroca iquenquejajiaquegueti, inchiquiojitaquea ironigaajiaqueri-queate Aapani Irioshi.<sup>16</sup>Cotanquitsi-quea aatimpajia iiintsija anetsanajaque-roquea maasano itsatacajaiacajica iriatimpa.

<sup>17</sup>Napitsaroven-tarijiate, pincomajaji-guempaqueate pinquempejiaquena-queate naatimpa nocomajamajataca, nonigaajiaquempirotarite naatimpajia quero nocojigaquea noquemisantamaja-jiguirigueti Quirishito. Nocantantajia-quempicaquea anquejejianaquempari-queate maasano quejijaqueroca imaica.<sup>18</sup>Nocantajiaquequempiqueate coramani, cotanquitsiqueate imaica noncantsijajempiqueate aisa, chooquaqueate oshequini teeca irinintajigueroji Quenquetsatsarentsi Oganejencatatsica tsavetantaquerica Quirishito imetoja-ventajiacajigueti coroshiqui imeshiajia-cajiqueate. No

imaica, oparijaatantanacaca nojaquija nocantajiaquempigueti.<sup>19</sup> Iriatimpajia iroaroaitanaquequea camorecariqui. Iroguentitarite ichoocaventajiaque- queate isheca, quejetaca iro irioshite. Teequea impashiventajiguempaji yantagushejiaquerogueti covaeguishe-rentsi, manaquea isemetacojiaquero- quea intati. Iroguentiqueate iquenqueja- jiaquequea quepatsipaequitica.<sup>20</sup> Cotan- quitsiquea aatimpajia atsajiaquequea manaquea oajianaquequeate jenoqui inquitequi ancoguitempaniqueate anchoocajiaque ontaniqui. Irootaque- queate imaica oguijantajiacaricaqueate incoraquetajegueti Amajirote Jesoquiri- shito meshiajicajica, iriguentitarite aa- jianajajineca.<sup>21</sup> Oraquea incoraquepo- pajegueti incantashitatijaiapajajiro- queate atsinojia teetarite onetsanamaja- tempajia, oganejencatanajempaquea onquejevetanaquemparoniji irashi iriatimpa itsino oganejencatagueci. Iroguentiquea incantashitatiantajiacaji- roquea iragavejane yagavejancaroca- queate maasano.

#### Icantajiaqueriquea irishinejiaquempaquea

**4** <sup>1</sup>Imaica, napitsaroventarijiate, irootaquequea nocantantajiaquem- pica pincoguitempanija pintsoventamajajianaquemparija Amajirote. Naatimpa noquenquejajajimpiquea noninquequea nonejajiaquitempi iroorijite nopintsajiaquempiquea. Aviatimpajiaquea pishinetacaajiaquena- quea, aviguentijitarite noshinetimenta- jiaca.

<sup>2</sup>Oraqueate Evoria aisa Shintique noninquequea ovetsinrantavacaajiajem- paqueate onconoavacaajajempanjite, iroguentijitarite tsaroventajigarica Amajirote Jesoquirishito. <sup>3</sup>Aviatimpia napitsaroventarite, notsipatashitacaca

antaquenerigueti Amajirote, noninque- queate pintsatacaajiaqueroquea ovetsinrantavacaajajempaqueate onetsanatanajempanjite. Iroguentijitarite notsipatashijiacora mananiqui natsipeventajiacarogueti Quenquetsatsa-rentsi Oganejencatatsica notsavetantaji- aquerigueti Jesoquirishito. Jeriqueate aisa notsipatashijiacaca Querimente jerijia aisa itsipapae amitacojiaquenaca, tioncacoguetacatari ontaniqui jenoqui inquitequi itioncacotantajiacarica Aapani Irishi maasano choocajia- pojajatsineca ontaniqui jenoqui inquitequi aatonijite imetojajajitsi.

<sup>4</sup>Pincoguitempanijate pishinetimentajia- quempariqueate Amajirote. Noncantsijia- jempiquea aisa pishinejiguempa.

<sup>5</sup>Pincavintsajantajiaquequeate, aatoquea pipigatsantajijatsi iramenimentajiaquem- pinjite maasano picomajamajajicaquea intati, irooshipojitari incoraquetaje Amajirote. <sup>6</sup>Aatoquea querocaca pishoshoventajijatsi, manaquea pincamantajiaque- riquea Aapani Irishi pamanajiaqueri- queate taaca pintajiaqueca. Pincoquem- paniquea pishineventaquempariquea pincanqueriquea: “I Ariotesaa!” <sup>7</sup>Pinquejeji- aquempaguetiquea imaica iroguishineja- majajiaquempiquea. Pincoguitempaniquea pishinemajajiaquempaquea pishirequi aatoniji pishoshoguitejajatsi, pitsaroventamajajiacaritarite Quirishito Jesoshi. Cotanquitsiquea aatoquea oquejetarotsi oguishinejantajiguigueti aatimpajia, caavijitarite anaquieroquea. Aatimpajia- quea teequeate agavejajigueji antsajia- quero quero icojijacajini Aapani Irishi yuguishinejajacajigueti.

#### Icantajiaqueriquea inquenquejacojiaqueroquea cameetsaguetatsica

<sup>8</sup>Imaica, napitsaroventarijiate, apanivaniquea noncantajiaquempi

noninquequea pinquenquejacogueque-roja maasano iroomajaguetatsica teeca amatavijanteji, jeroquea aisa maasano atsatacoguetica caavijica ocameetsama-jati. Manaquea pinquenquejajigueja pantajigue cameetsaguetatsica, aatoquea piquenquejajigui pantajigue covaeguisherentsi. Pinquenquejajigueja quero pincojiaquempa pincomajamajaji-aquempagueti, aisa pinquenquejamaja-jigue quero pincojiaquerini pigonoropae pinchoocatantajiaquempaca cameetsa. Pinquenquejacojiguerroja maasano acantacojiaqueca oganejencavaeca. Iroguentiqueate pinquenquejacojigue maasano cameetsaguetatsica caavijica ishineventacaca Aapani Irioshi.

<sup>9</sup>Coramani nochoocatimojiaquitimpi-gueti piquemisantajiaquenaqueate notsatacayaquempigueti, aisa pamena-jiaquena quero nocota. Imaicaquea imaica noninquequea pinetsanamajajia-queroqueate maasano notsatacayaia-quempica, aisa pincomajamajajiaquem-paqueate pinquejejiaquenaquea naatimpa nocomajamajatagueti. Pinque-jejiaquempaguetiqueate imaica iriraquea Aapani Irioshi quisho iroaquempi, inchoocatacaajiaquempi-quea cameetsa aatoniji taaca opajita pishoshoventajiajatsi.

### Iriraquea Piripoquitica icavintsajajiaqueriquea Paavoro

<sup>10</sup>Imaica noshinetacaquea noshineti-mentanacariea Amajirote namena-quegueti piquenquejajajanaquea irootaquequea picavintsajantajajanaca. Cotanquitsiquea teequea noncanteji pipeacojivatajana coramani, notsaque-tarite piquenquejajivatetaquenaquea cotanquitsiquea teequea pagavejajigueji pincavintsajajiguena. <sup>11</sup>Teequea noncanteji nocoguitejacoca, irooriji namecaroquea nococani noshineva-

taca, aatogueti ochoocaveta shinettanta-sinaquea. <sup>12</sup>Notsamajaquerotarite quero noncoquempa nantsipetaquempa-gueti. Ariguetiquea noncoguitejacoc-quempagueti aricaquea aato, irooqua quea nontaseaquegueti ariguetiquea onchoo-caquegueti oshequiavaetaquegueti nosheca, cotanquitsiquea aatoquea noshimampojancatsi, nococaquea noshinevaetanaquempaquea. <sup>13</sup>Nagave-jaguequieroqueate maasano inintaca-aquenaca Aapani Irioshi, iriguentitarite agavejacaquenaqueate Quirishito.

<sup>14</sup>Cotanquitsiquea cameetsavaetaque-quea picavintsajajiaquenaqueu, pitigarancacaantajiaquenaquea nocogui-tejacovetacaca.

<sup>15</sup>Notsaquequea teequeate pimpeacojigue-naquea arejevaecaroquea coramani notsavetanquerogueti Quenquetsatsarentsi Oganejencatatsica Maseroniaqui. Irootapo-geueti nosotoanaque noanaquegueti osamani, apaniroquea picojiaca aviatimpajia Piripoquitica picavintsajajiaquenaqueate pitigarancacaantantajiaquenaca nocoguitejacovetacaca. Itsipapae quemisantajatisca teequea irojocajiguenaji. <sup>16</sup>Arikea piquejetaproquea aisa chocatirajanagueti Tesaronicaqui pitigarancacaantajiaquena-quea nocoguitejacovetacaca, coajicaquea papijitsijajanaquequea aisa. <sup>17</sup>Noshinevaeta-naquea namenaquegueti pojocajiaquena, cotanquitsiquea arimpaqueate noshinemaja-tanacaqueate notsaqueterite incavintsajajia-quempiqueate Aapani Irioshi, yamenaqueu-pitari iriatimpa picavintsajajiguenaqueu.

<sup>18</sup>Yojocapojajanaroquea Epaperorito maasano pitigarancacaantajiaquenaca, choocaquea imaica anaapojajiroquea nocoguitejacovetacaca, oshequiavaepojiquea. Namenaquequea mana pojocajiaquena-queate quejecaquea irioca pojocajiaquene Aapani Irioshi. Ishineventanacaroquea iriatimpa, yamenauerotarite oganejenca-vaece, oquejetimotacari casancajencari.

Oquempetacaro aisa imetojajiquenerigueti viratsipae itajaiqueneri.<sup>19</sup> Ariquea Nirioshite irojocamajajiaquempiro maasano coguitejimojiaquempica, oganejencavaetacatari iragavejane aisa yashintavaetacaca yashintaacarica Quirishito Jesoshi.<sup>20</sup> Ancoguitempaniqueate antsaroventajiaquempariquea Aapani Irioshi, aatotari oteroncajatsi intsarorentajitaquemparigueti. Ari oncoquempa.

**Icamantajiaqueriquea iquenquejajiaqueri  
maasano**

<sup>21</sup> Pincamantajigueriquea maasano tsaroventamajajigarica Quirishito

Jesoshi nococaniquea noquenquejajiaquempi. Iriraquea napitsaroventarijiate notsipatsipaitacaca inintajiaquequea pinquemacojiaqueri icancaniquea iquenquejajiaquempi.<sup>22</sup> Arikea iquejejiacaquea maasano quemisantajatsica choocajatsica acaníqui, ininquequea pinquemacojiaqueri icancaniquea iquenquejajiaquempi. Iriguentiqueate nintamajajianquitsi pinquemacojiaqueri choocajatsica itsovironaquitequi Sesa.<sup>23</sup> Noninquequeate incavintsajashirentajiaquempiquea Amajirote Jeso quirishito maasano aviatimpajia pishirequi.

# PAAVORO ITIONCAJIAQUENERI

## COROSAQUITICA

Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica quinteninintsiqui pajitatsica Corosa. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31). Tee iroavetempaji Paavoro Coros aqui, cotanquitsi ipintsajiacari tsaroventajiacarica Corosaquitica, irootaquequea itioncacaantantajiacanarica (2.1–5), aisa irira Epaperashi icamantaqueri Paavoro quero icojiacani Corosaquitica (1.7–8). Tequeratagueti intioncacaanteroji ocatica paperi, itioncacaantaqueero otsipa mavite paperi itigarancijaquenerica quemisantajiacarica choocajianquitsica Tesaronicaqui, aisa mavite paperi itioncacaantajiaquenerica Corintoquitica, aisa otsipa paperi itioncacaantajiaquenerica choocajianquitsica quepatsiqui icantajitica Garashia, aisa otsipa irashi quemisantajiacarica choocajianquitsica Iromaqui. Chooca quenquejajianquitsica tequeratagueti intioncacaantajiaqueneri Corosaquitica, itioncacaantajiaqueneri Piripoquitica. Paavoro itioncacaantaqueero 3 paperipae ajagantsiniqui 60, ichoocaquegueti santanaqui Iromaqui: aparo itioncacaantajiaqueneri quemisantajiacarica Epesoquitica, otsipa irashijia Corosaquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatsica Ashia.

Ocaniqui paperiqui Paavoro icamantajiaqueri quemisantajiaquerica Jesoshi quero incojiaquempani intsipamajajiaquemparigueti Amajirote (3.1–4.6). Itsavetacojiaqueneri Quirishito, iriotaque peacaacaroca maasano aisa iriotaque choocatacaaqueroca, iriotaque agavejamajatatsica yanaajiaqueri maasano (1.15–23). Apaniro iriatimpa yagavejaque iramitacojiaqueri quemisantajiaquerica incomajamajajiaquempa aatonji yamatavijajiguiri tsatacantamampeajiatsica (2.6–23).

**1** <sup>1</sup>Naroguenti Paavoro itigarancane Jesoquirishito, irirotari nintaca aquena Aapani Irioshi. Choocana acaniqui notsipatacari apiguemisantarteni Timoteo. <sup>2</sup>Imaica nonintaque nontioncajiaquempi paperi maasano

aviatimpajia choocajiacarica Corosaqui comajamajajiaquemparigueti Amajirote (3.1–4.6). Itsavetacojiaqueneri Quirishito, Namanacoventajiaquempiquea incavintsa jiaquempinijite Aapani Irioshi aisa Amajirote Jesoquirishito, inchoocatacaa jiaquempinijite

cameetsa aatonijite pishoshoguiteventajigaro taaca opajitapae.

### **Paavoro ishineventacari Aapani Irioshi**

<sup>3</sup>Nocancani namanacoventajiaquempi-gueti nocanqueriquea Aapani Irioshi, Iriri Amajirote Jesoquirishito: "Ariotesasaa."  
<sup>4</sup>Noquemacojiaquempitari piquemisantamajajiaqueri Quirishito Jesoshi, aisa noquemacojiaquempi pipintsamajajiacari maasano yashintajiacaca, irootaquequea noshinevaetantanacaca. <sup>5</sup>Piquejetantana-caca imaica poguijacojicatarite incavintsaajiaquempi Aapani Irioshi jenoqui inquitequi. Aviatimpajia iroaque-ragueti piquemajiaquerogueti Quenquetsa-tsarentsimajaca, piquemaquegueti irimeshiajiaquempi, ariqueate piquenajia-que poguijacojianaca incavintsaajia-quempi. <sup>6</sup>Ocatica piquemaqueca ojatacoguetanaque otsitacaguitejanacaro maasano quepatsi, icantashitatiantajiana-caca oshequi caquinte iquejejiaquempi aviatimpajia piquemisantajiaquerigueti Aapani Irioshi. Aritarite iroqueragueti piquemajavaquerogueti aviatimpajia, pitsajiajapojaquegueti arimaja icavintsaajia-quempi Aapani Irioshi, ariqueate icantashatijiaquempi. <sup>7</sup>Coramani notigaranca-queri notsipajiacaca Epaperashi nopintsajiacaca itsatacamajajiaquempiquea Quenquetsatsarentsimajaca, iroomajaca. Iriatimpa iriguentiquea aisa savicaventi-roca inintaguetica Quirishito. <sup>8</sup>Arikea icoraquetajigueti icamantapojaquena icanti caaviji pipintsatantajianaca aviatimpajia, yagavejacaajiaquempitari Ishire Aapani Irioshi.

### **Yamanacoventajiaqueri Corosaquitica**

<sup>9</sup>Irootaquequea icamantajiaquena-gueti nocancani namanacoventajia-

quempi nocantajiaqueri Aapani Irioshi iroguiconijajiguempi ininqueca, intsatacayaquempi pintsamajajiaque-niji pishirequi quero pincojiaquempani.

<sup>10</sup>Irooqua namanantajiacarica cameetsaniji pagavejajiaqueniji aviatim-pajia pinetsanavaejianaquempa, irishineventaquemparoniji maasano pantaguetaqueca. Arikea pantajiaque taaca opajitapae cameetsaguetatsica, aisa pintsamajajiaqueri Aapani Irioshi.

<sup>11</sup>Namanacoventajiaquempi aisa intampishitacaajiaquempi Aapani Irioshi, iriotarite tampishitacaantamajatatsica. Nocantiri intampishitacaajia-quempi cameetsaniji pantsiperejacojia-quempaniji maasano, aatoniji pisemarotsi mana pishinevaejiaquempa intati.

<sup>12</sup>Pincanqueri Aapani Irioshi pishinevae-jiaquempa, pitsaquetari imeshiajia-quempi cameetsaniji pintsipajiaquempariniji maasano tsaroventamajajiacarica incavintsaajiaquerigueti coajica ontaniqui otsirencaguitemajaquegueti.<sup>a</sup>

### **Jesoquirishito**

<sup>13</sup>Coramani iriguenti ashintajiavecaji ampatsini, oquejeventaca aguinentiveta-cagueti ontaniqui opitsecamajaquegueti. Imaica yaavajaji Aapani Irioshi, irioqua ashintajaji Irijanite ipintsama-jatacaca, irosati ipeanaca Amajirote.

<sup>14</sup>Irioqua metojaventacaji ochovivinca-javentanacaji iriraja irooqua yovegar-tantacaji cameetsaniji irajaivajaji Aapani Irioshi iroguipejajeroniji aguempevarejia.

<sup>15</sup>Iriraquea Quirishito iquejemajata-cari Aapani Irioshi teeca inconijateji, yonigaajiacajiri. Iriatimpa iriguenti iriquetica choocatatsica, yanaajiaqueri maasano ipeacaajiacaca. <sup>16</sup>Iriotarite

<sup>a</sup> 1.12 *Ontaniqui otsirencaguitemajaquegueti* ocantacotaquero inquite ichoocaquegueti Aapani Irioshi, teegueti onchoocateji covaeguisherentsi.

ipeacaantajiguetacana maasano: choocaguetatsica jenoqui inquitequi aisa choocaguetatsica quepatsiqui, conijaguetatsica irisati teeca inconijajigueji, maasano. Iriraquea teeca inconijajigueji chooca imajirojate, irira itsipa anaantatsica, aisa agavejajiatsica, cotanquitsi iriguenti Quirishito ipeacaantajitacana maasano cameetsaniji irashintajiaquempariniji.<sup>17</sup> Iriatimpa icancani ichoocatini coramani tequeratagueti onchoocagueteji, irioquea aisa netsanamajaquero maasano imaica. Icanqueri maasano ipeacaacaca: "Aritaque pincojiaquempani."

<sup>18</sup> Iriotaque iguito quemisantajiaquerica, aatimpajia quemisantajiaquerica aroguenti itsino. Iriotaque meshiajicajiji, irio aisa jivaqueri maasano tancorejajiananquitsineca cameetsaniji irimajirontamajaquempariniji maasano, iranaamajajiaqueriniji.<sup>19</sup> Inchiquiojitarite ininque Aapani Irioshi icantaguitani inquejemajataquempari iriatimpa.<sup>20</sup> Ininque aisa irogameetsatanajeri maasano catsimajiaquerica choocajatsica quepatsiqui aisa choocajatsica jenoqui inquitequi, irishineventajajempariniji. Irootaque itigarancantacarica Quirishito osotoajatimentajiacajiniji iriraja coroshiqui imetojimentajiacajigueti.

<sup>21</sup> Coramani aviatimpajia tee pintsipashirentajigueempariji Aapani Irioshi, mana picatsimajiaqueri piguenquejanequi, picovaeguishejicatarri. Cotanquitsiquea imaica ivetsinantajajimpi,<sup>22</sup> irooquea yogameetsantanajiaquempica itsino Quirishito imetojaventajajauempigueti. Iquejetantacaca imaica cameetsanijite irinejajicajiji netsanajiacaji quejetacanica tee anquempevaetempajiji, aatoniji icantajigaji: "Chooca piguempevaere."<sup>23</sup> Cotanquitsi imaica pinquemisantamajajiaqueroja Quenquetsatsarentsi Oganejencamajatatsica piquemajiji-

aqueca iroaqueragueti, aato povashiantajigiro, aisa aatoja piquemisantajiguiricantashitatigaroca aatoniji pipeacojigarо imeshiajiaquempi Aapani Irioshi. Irootaquequea ocatica Quenquetsatsarentsi imaica itsavetantajitanaqueca otsitacaguitejanacaro maasano. Irootarite nosavicaventaque naatimpa notsavetantaquero.

### **Paavoro iriguenti amitacojiguirica quemisantajiguirica Quirishito**

<sup>24</sup> Imaica noshinevaeca natsipeventajiaquempigueti, notaquetarite irootanaque nonteronquero acaniqui notsinoqui inintacaaquenaca Quirishito: natsipeventajiacari maasano quemisantajiguirica, maasano irirajia iquejetacajacaca itsino.<sup>25</sup> Iriotaque tigarancaquena Aapani Irioshi nosavicaventajiaquempi maasano tsaroventajigarica, nontsatacamajajiaquempiro maasano Iguenquetsatsare.

<sup>26</sup> Coramani tee intsajiteroji, iroguentitari yomanavecaro Aapani Irioshi, cotanquitsi imaica imaquero yoguiconijajiaqueri maasano quemisantajiguirica.<sup>27</sup> Inquettari Aapani Irioshi pintsajiaquero ocatica: iriraquea Quirishito ichoocashirentajajueri maasano quemisantajiguirica irioca joriojia aisa teeca irijorijoigueji, irootaque ichoocashirentajajauempica aviatimpajia. Iroompia iraanaquempi jenoqui ichoocatigueti pinquejetajempari iriatimpa.<sup>28</sup> Iriotaque notsavetantajiaque. Nocantsijiavacari maasano namitacojiaqueri aatoniji icovaeguisheti, aisa ntsatacamajajiaqueri cameetsaniji intsamajajiaqueriniji, intsaroventtamajajiaqueriniji Quirishito Jesoshi.<sup>29</sup> Jeroquea nosavicaventaquero natsipevencaro, iriguentitari tampishitacaaquena Quirishito, yagavejacaamajadena.

**2** <sup>1</sup>Imaica noninque pintsajiaque oshequi natsipeventajiaquempi namanacoventajiaquempi aviatimpajia,

aisa maasano choocajatsica Iraorise-aqui, aisa maasano teeca irinejajavetenaji. <sup>2</sup>Noquejetaca imaica cameetsaniji pishinejiaquempanji, aisa pimpintsatavacajaiquempanji. Noninque pintsamajaque aatoniji ichoocatamiatavijaquempineca, aisa noninque pintsamajajiaqueri Quirishito. Coramani tee intsaiteji irio meshiajiacajineca, yomanaquerotari Aapani Irioshi, cotanquitsi imaica imataquero atsajiaque, yonigaajiacajirotari. <sup>3</sup>Iriatimpa Quirishito itsamajataque. Apaniro iriatimpa iragavejamajataque intsatacaacají maasano.

#### **Shoshoh yamatavijajitimpitsi**

<sup>4</sup>Irooqua nocamantajiaquempi cameetsaniji aatoniji yamatavijajitimpitsi, pijijigurotsi cameetsa icantave-quempica. <sup>5</sup>Tee nontsipajavetempiji, cotanquitsi oshequi noquenquejajiaquempi. Noshinevaetaca noquemacojaquempi pitsipatavacajiana cameetsa, quisho poamajajanajiri Quirishito, paventajianajiri. <sup>6</sup>Imaicaquea imaica piquemisantajiaqueritari Amajirote Jesoquirishito, picancanija poguijamajajianaquerija. <sup>7</sup>Nonquejetacaquempiro: oratica panqurientsi irooqua oshipaqui anijacaquero, aisa irooqua tampishita-ccaquero. Aisa pinquejejiaquempi aviatimpajia, quisho poanaqueri Quirishito intsatacaquempi, aisa intampishitacaquempi. Picancaniquea pinquemisantamajajianaqueri, pinquejetacaajianaquemparo itsatacaajitaquempica. Picancani pishineventajianaquemparo Aapani Irioshi, pincanqueri: “Ariotesaa.”

<sup>8</sup>Inchiquiojitala yamatavijajiguimpitsi cantashijigaroca iquenquejashigueta-caca caquinte; tee iroonica inquenque-tsatacojigue itsatacaacajica Quirishito, iroguenti iquenquetsatacojiaque

yamejigaca caquinte, itsatacaantica quepatsiquitica.

<sup>9</sup>Aritarite Aapani Irioshi ichoocatsinomajatantacari Quirishito. <sup>10</sup>Imaica piquemisantamajajiaqueritari Quirishito, tecatsi pincoacojajempajipinchoocajajeniji cameetsa, iriotari agavejacaquempineca maasano.

Iriatimpa caaviji yanaanti, yanaajiaqueri maasano majirontaguevetatsica, irirapae anejaqueca aisa teeca irinejajiteji, yagavejamajajatarite. <sup>11</sup>Paventashirentaquemparigueti iriatimpa, quejetaca itotsaiquijitaquempi, cotanquitsi teequea iro totsaiquitempi iraco caquinte, irio totsaiquitempi Quirishito pishirequi, ipishoncadjimpironintagusheveta-caca. <sup>12</sup>Ariquea iviñacajajitaquempigueti ari oquejetaca pitsipajiacari Quirishito yoguijajitaquerigueti yoguijantapinijitarica metojaguetatsica, iroompaquea pisotojaatanajigueti ari oquejetaca pitsipajiaari itancorejanajigueti. Pinejajiaqueriquea caaviji yagavejamajati Aapani Irioshi, iriotari tancorejajiri Quirishito.

Irootaquea itancorejantajimpica paventajiacarogueti iragavejane.

<sup>13</sup>Coramani pipeacaaguishejia-covaeguisherentsi, quejetaca metojajaque pishirejia. Tee pintotsaiquivetempiji, cotanquitsi icavintsa jajiaquempi Aapani Irioshi, itancorejajajimpi, quejetaca pitsipajiaari Quirishito itancorejajirigueti. Ariquea ipeacotsitajajiro maasano aguempevaerejia.

<sup>14</sup>Coramani atsperejacojicaro itioncactanaquea Moishishini antsajiaquerome cameetsaniji irimeshiajiniji Aapani Irioshi, cotanquitsi tee agavejeji irootari oacaanacajinemea camorecariqui. Oquejetaca itioncacojiquero antavetacaca covaeguishetatsica antsipetaquempameca coajica. Cotanquitsi imetojaventajiacajigueti Quirishito coroshiqui

imeshiajajiji ipishoncaquero itioncaco-jitacajigueti aatoniji atsipejiajaro coajica. Quejevetaca yompajacojiquero coroshiqui.<sup>15</sup> Ontaniqui imetojaventaca-jigueti coroshiqui, irooqua yagavejan-tajiacarica maasano agavejaguevetatsica aisa majirontaguevetatsica, yoguipashi-ventajiaqueri, inejacaajiaqueri maasano arimaja yanaamajajiaqueri iriatimpajia maasano.

**Aatoja piquemisantajiguiri teeca  
intsaroventajiguempariji Aapani Irioshi**

<sup>16</sup>Imaica aatoja piquemisantajiguiri cantajatsica pantajiaque teeca oncameetsateji irnejajiaquegueti pishecajiaquemparo irooca pimirajia-quero icantimentantajitica. Irooca aisa incanque piquempevaetaca irnejajia-quegueti tee pishineventajiguemparo savincaguiteripae ishineeventajiacaca iriatimpajia, iroguentica iroqueragueti irisotoaje taai. Iroguentica aisa incanque tee oncameetsateji pantaqueca irnejajia-querogueti pantajiaque icantimentantajitica irivetsicajitempagueti savinca-guiteri imagorejantajitaca.<sup>17</sup> Maasano oratica isavicaventajiaqueca joriojia iroguenti mana oquejevetacaro intati ivaantorite coraquetanquitsineca, ocantacoqueri Quirishito incoraque-taque irimeshiajiacaji. Imaicaquea imaica mataca coraquetaque. Iriguenti iriomajatatsica.<sup>18</sup> Aatoja piquemisantajiguiri irirajia cantajavetaquempineca: “Aatogueti pitsaroventajigari irashivan-tijitete, ɿarimpate irimeshiajiaquempi Irioshi? Teenica pintsajigueji aviatim-pajia. Naatimpa iroguenti iquenquetsataacaquena Irioshi noguimaanequi, irootaque notsatantajiacaca.” Maasano quejejiaqueroca imaica iriguenti amataatsica, mana yaventacojianaca intati, iroguentitari iquenquejajiaque irashipae caquinte.<sup>19</sup> Teenicate intsaro-

ventamajajiguempariji Quirishito Amajirote. Iriotaque tampishitacaajia-caji maasano quemisantajigurica cameetsaniji antsipamajajiaquempari, arimpaquea antsaroventamajajiana-quempari quejetaca ininque Aapani Irioshi.

<sup>20</sup>Ariquea pitsipajiacarigueti Quirishito imetojaquegueti, oquejeta-caro iroguentica pimetojapitsajiaquero itsatacaantajiguica caquinte aatoniji piquemisantajiro. Iriguenti Quirishito pinquemisantaque. Imaicaquea imaica ɿquero ocoocani piquemisantajajacarica teeca intsaroventajiguempariji?

<sup>21</sup>Iriatimpajia icantimentantajiaqueri irishecaquempari maasanopae iteshipae, icantajiaque: “Aatoja pishecatari irira, ari icoca, aisa aatoja pipamitiri. Picogui-shetatsi.”<sup>22</sup> Cotanquitsi maasano irira icantimentajiaqueca iriguenti cantimen-queri caquinte, teenicate irio cantimenterine Aapani Irioshi. Iroguenti ipeacaancarica ashi ashecajiguempaca, iroompa ashecajiacarigueti tee anejeriji.<sup>23</sup> Irirajia quejejiaqueroca imaica ijiqueji iriatimpa itsajiaque, aisa ijiqueji yantajiaque ininqueca Aapani Irioshi, yatsipeji-acaro itijiqui itijiacagueti, cotanquitsi iroguenti yamatavijajica. ɿQueroca-quea incojiguempani ititantajiacaca? ɿArimpa agavejaque onchoocatacaa-queri cameetsa aatoniji ipeacaaguisheta teeca oncameetsateji? Mana yaventacojacaca intati.

**3** <sup>1</sup>Aviatimpajia itancorejajajimpi Aapani Irioshi pishirequi quejetaca pitsipatacaro Quirishito yovochantajiri-gueti, irootaquequea pinquenquejajia-quero choocaguetatsica ontaniqui jenoqui ichoocatigueti Quirishito: isavicaque itincamijempequiqui Aapani Irioshi, itsipatacaro imajirontajiacaqueate. Pinquenquejajiguerouquea ininqueca iriatimpa.<sup>2</sup> Arimpaquea

pinquejejiaquempa imaica pinquenquejamajajianaquero choocaguetatsica jenoqui, aatoquea piquenquejamajiguiro isavijiquitica quepatsiquitica.

<sup>3</sup>Oquejetacatari pimetojaque, aatoquea imaica piquejetaja coramani.

Cotanquitsi tancorejanajitaripishire pintsipajajempariniji Quirishito Irioskiqui. Omanaca pishire imaica, tee irinejajiteroji. <sup>4</sup>Cotanquitsi oncoramani-tapojaquegueti ironigaanquempagueti Quirishito tancorejajajimpica, ariquea ironigaantajiaqueri maasano quero picojiacani, pintsipajiaquempari poganejencavaequempa.

### Pimpishoncamajajianaqueroja pipeacaagushejiavetacaca

<sup>5</sup>Noncantajiaquempi aatoja papijitajiro aisa pipeacaagushejiavetacaca: aatoja poashitantajigui; aato piquenque-tsaguisheti, aisa aato pantaguisheti; aato piquenquejavijiti teeca oncameetsateji, aisa aatoja pantajiro piquenquejaguishequeca; shoshoh aatoja pinevemajataro ajaararontsi, pishineventamajatarotsi quejetaca iro Irioshi. <sup>6</sup>Maasanotarite quempevaetatsica quejecaroca incatsimatimentajiaqueri coajica Aapani Irioshi, teenicate inquemasantajigueriji.

<sup>7</sup>Aisa piquejejiavecari aviatimpajia coramani piquempevaeguishejiavetaca oshequi. <sup>8</sup>Cotanquitsi imaica pimpishoncamajatanaqueroja maasano teeca oncameetsateji. Pimpishoncanaqueroja pitsimajencasia, aatoja picatsimatantajiaji, aatoja picatsimashirentantajiaji, aatoja picaveantajigui, aisa aatoja pinijaguishejigui. <sup>9</sup>Aatoja pamatavijava-caajiaja, picantashitatanacatari. Tee pinquempejajempa coramani, pipishoncaguetanaquerotari pantaguevetacaca.

<sup>10</sup>Ariquea icantashitatijaijaimpi Aapani Irioshi, aisa imaica igantaga icantashitajiaianaquempi cameetsaniji pinquejejia-

jempariniji iriatimpa peacaquempica irosati pintsamajajiaqueri. <sup>11</sup>Arigueti atsarovencari Quirishito yamenajiacaci Aapani Irioshi ari aquejetavacaajiaca maasano aatimpajia. Arikea iquejejiaca joriojia aisa guiriegojia, ari iquejetavacaajiaca. Ari iquejejiaca aisa quenajiajapotsica otsipaqui quinten-nintsi aisa catsimari, itsipajia aisa teeca irinetsanateroji yamejigaca joriojia tee intotsauijiteriji, ari iquejejiijaari netsanatiroca. Arikea iquejetacara aisa yomperanajitaca, iquejetacari irira teeca irashintajitempariji. Maasano iquemi-santajiaquerigueti Quirishito ichocashirentajiaqueriquea, yamenantajajarica Aapani Irioshi ari iquejetavacaaca.

### Pinchoocajigue cameetsa

<sup>12</sup>Maasano aviatimpajia ipintsamajajiaquempi Aapani Irioshi, icoguajia-queMPI inintacaajiaquempi irashintama-jajiaquempi, nocantantajiaquempica: pishimampojancacoventajiaqueri atsipejianquitsica; pincavintsa jante; aatoja panaavacaga; aatoja pipigatana-cari catsimajiaquempineca, pinquenque-tsatacagueri cameetsa; aisa pinquenque-tsatacagueri cameetsa irasereajiaquem-pigueti. <sup>13</sup>Pimpintsatavacaajiguem-pantsiperejacojiguem-pa. Aatoja picatsimajiguiri papiguemisantariteni catsimajiaquempica, iroguenti pimpea-cotajemparo querocagueti icanquem-pini. Irira Amajirote imeshiajicaji imaisantajajiro maasano antavetacaca teeca oncameetsateji. Arikea pinquejejiaquempari iriatimpa pimpeacotsita-jempari papiguemisantariteni. <sup>14</sup>Cotan-quitsi picancani pimpintsatavacaamaja-jiaquempa, caavijitari anaantamaja-taque. Ampintsatavacaajaquempagueti anquejeshirentavacaajiaquempa. <sup>15</sup>Noninque iroguishinejajiaquempi Quirishito aatoniji taaca opajita

pishoshoguiteventa, irootaque intintaque Aapani Irioshi iroaqueragueti intintaca aquempigueti pintsipajajempariniji maasano tsaroventajigarica. Aisa pishineventajiaquempari iriatimpa, pinejaqueritari caaviji icavintsajajaquempi.

<sup>16</sup>Pinquenquejamajatapinijiaqueroja maasano icanqueca Quirishito. Pintatacaavacaajiaquempaja pintampishitava-caajiaquempaja pinquejejiaquempari quenquejamajajiguirica Aapani Irioshi. Pamashaiventajiaquerija Aapani Irioshi, pinquenquejajajerija quero icotacani icavintsajajaquempigueti. Pamashaquia queria saremopae yamashaiventirica joriojia coramani, aisa pamashaitacoqueri Quirishito, aisa pamashaitacoqueri otsipapae itsatacaquempica Ishire Aapani Irioshi. <sup>17</sup>Taaca opajitapae pantajiaque aisa taaca opajitapae pincantajiaque pinquenquejajajerija Amajirote Jesoshi, irooqua pantajiaque ininqueca iriatimpa. Aisa picancani pishineventajiaquempari Aapani Irioshi, pincanqueri caaviji icavintsajanti, itigarancaqueritari Jesoshi.

#### Quero incojiaquempani tsaroventajigarica inchoocajiaquegueti cameetsa

<sup>18</sup>Aviatimpajia manquigarentsijia, pinquemisanqueri manquigatimpica aatoja pipigatsatari, irootaquetari ininqueca Amajirote. <sup>19</sup>Aviatimpajia shiramparijia, pimpintsamajajquemparo pimanquigare aato picatsimajiguro. <sup>20</sup>Aviatimpajia chaajaniquiguetanquitsica, irosatija pinquemisanjtajiaqueri piri aisa piniro, irootaquetari ishineventaca Amajirote. <sup>21</sup>Aviatimpajia choocajatsica pirjanite irooca porjanite, pintsatacagueri cameetsa. Aato picantimentashitari intati. Arica pincantimentashiquemparigueti intati aato intintaji iquemisantajimpi. <sup>22</sup>Aviatimpajia

yashintajitaca, pinquemisanjtamajajeria ashintimpica acanqui quepatsiqui, pantajiaqueroja maasano querocaca incantajiaquempica, cotanquitsi aato apatiro piquemisanti pamenajiaqueri iramenajiaquempigueti poguishinejimenqueriniji, picancani pinquemisanqueri, iriguentitari pinquenquejaque Aapani Irioshi poguishinejantaquemperica. <sup>23</sup>Maasano taaca opajita pantajiaque pishinejiaquempa quejetaca iriotaque pantajiaquene Amajirote, pintampishiventeri teenica apatiro pamitacoqueri omperatimpica. <sup>24</sup>Pitsajiaque icavintsajajempari Amajirote Quirishito irovegaramajajajquempiro ontaniqui jenoqui, iriotaquetari pantajiaquene. <sup>25</sup>Cotanquitsi iriraquea covaeguishetatsica inchiquiojita inquejetacaanquempa iriatimpa irantsipevaequempa, yamenajiacajitari Aapani Irioshi maasano ari aquejetava-caaca.

**4** <sup>1</sup>Choocagueti caquinte povegarataqueca pashintacaca, pincavintsajajiaquerija, choocatarite ashintajiaquempica aviatimpajia aisa ontaniqui jenoqui inquitequi.

<sup>2</sup>Imaica noncantajiaquempi maasano aato piperajiga pamanajiguerigueti Aapani Irioshi, pinquenquejamajajiguero, aisa picancani pishinevenquempari pincanqueri: "Ariotesaa." <sup>3</sup>Aisa pamanacoventajiaquena naatimpajia cameetsaniji nagavejamajajiaqueniji nontsavetantajiaqueri Quirishito noncamantajiaqueri maasano quero icotani imeshiantigueti, irootaque yashitacotantajivequenaca.

<sup>4</sup>Pamanacoventajiguena cameetsaniji quishoniji nontsavetacotantamajataqueri-niji noguisotojajiaqueneriniji maasano, irootaquetari intintacaquenaca Aapani Irioshi.

<sup>5</sup>Aviatimpajia pintsipajajquemparigueti teeca intsaroventajiguempari

Amajirote, pinchoocajiaquequea cameetsa, pinquenquetsatacaajiaqueri cameetsa aatoniji icatsimajiguimpi. Aatoquea pichoocatashijiga intati. <sup>6</sup>Aatoja piquenquetsatashijiga intati jeoc jeoc jeoc. Cameetsaja pinquenquetsajiaque cameetsaniji irinique inquemisantamajajiaquempi, aisa pinquenquejamajajaque cameetsaniji pintsajiaqueniji querocaca pincanqueri taaca coacojiaquempine.

### **Itioncacoqueri Tiiquico**

<sup>7</sup>Imaica nontigarancaqueri apiguemi-santariteni Tiiquico nopintsajiacaca, iroanaque pichoocajiaquegueti, irosati incamantajiaquitempi quero ococani acaniqui nochoocajiaquegueti. Iriatimpia iriguenti caaviji yamitanti. Irioquea notsipataca nantajiguinirigueti Amajirote. <sup>8</sup>Iroguenti nontigarancanta-quemparica ashi iroguishinejajiaqui-tempi pinquemacotantajiajenaca choocatirajana. <sup>9</sup>Iriguenti intsipatana-quempa apiguemisantariteni Oneshimo nopintsajiacaca conoajiaquempsica. Aisa iquejetaca iriatimpia iriguenti quemisantamajatatsica. Iriatimpajia iriotaque camantajiaquempineca maasano.

### **Ovegarapojaca itioncaquenerica**

<sup>10</sup>Iriraquea Arishitarico notsipatacaca nashitacojicagueti ininque pinquema-cojiajeri chooca iquenquejajajimpi. Aisa iquejetaca Maricoshi iriguentijeguis-torite Verenave,<sup>b</sup> iquenquejajajimpi iriatimpia. Imaica noncantajiajempis aisa, arigueti iroanaque irinejajiaquitempi

cameetsaja paajiaavaqueri. <sup>11</sup>Jeri irira Jesoshi icantajitica aisa Joshito, ininque pinquemacotajeri chooca iquenquejajajimpi. Ichoocajiaaveta oshequinjoriojia quemisantajiguirica Quirishito, cotanquitsi apaniroquea iriatimpajia itsipajiaquena notsavetantigueti nocamantajiaquerigueti maasano quero icocani Aapani Irioshi imajirontagueti. Oshequi yoguishinejajiaquena.

<sup>12</sup>Iriraquea pigonoro Epaperashi ininque pinquemacotajeri chooca iquenquejajajimpi. Irio irisati antavaetinirica Jeso quirishito. Irosati yamanacoventaji-aquempi picancaniniji pintsaroven-quempari Quirishito Jesoshi aisa pintsamajajiaqueroniji maasano ininqueca Aapani Irioshi. <sup>13</sup>Nonejaqueritari yatsipeventamajajiaquempi aviatimpajia, aisa yatsipeventajiacari irirajia Iraoriseaquatica aisa irirajia Yeraporishiquitica. <sup>14</sup>Aisa ichoocaque acaniqui aavintantatsica Irocashi, caaviji ipintsajitari. Ininque pinquemacotajeri chooca iquenquejajajimpi. Aisa iquejetaca Temashi.

<sup>15</sup>Pincamantajiguera apiguemisantarijia-teni choocajatsica Iraoriseaqui choocana noquenquejajajiri. Pinquejetaquempsa pincamantero iroatimpia Nimpa, aisa maasano quemisantatsica capiocajianqui-tsica otsovironaquitequi, pincamanquerija choocana noquenquejajajiri iriatimpajia aisa. <sup>16</sup>Pinteroncaquerogueti pampatsaja-vanquerogueti ocatica notioncaquea imaica, pintigarancajiaquenerija quemisantajatsica choocajatsica Iraorise-aqui irampsatsajavanquero iriatimpajia, iroompa iriatimpajia impacaanquempsa

**b 4.10 iriguentijeguisitorite Verenave.** Omanaca oguipitsocaquerogueti ocatica tioncanquitsica acaniqui guriegotsaqui: ocanti *anepsios*. Agavejaque ojicotajeri irioca itineri, irioca aisa iranianishite, irioca iriguentijeguisitorite Verenave. Yoguiipitsocaquerogueti quimajareri versión Reina Valera icanti “el sobrino de Bernabé”, ancanque “itineri”. Yoguiipitsocaquerogueti quimajareri Versión Popular icanti “el primo de Bernabé”, ancanque irooca “iranianishite” irooca “iriguentijeguisitorite”.

notioncacaantajiaquenerica, aviatimpa-  
quea pampatsajavantajiaquero.

<sup>17</sup>Pincantajigueri Arequipo: “Pisavicaven-  
tavaetanaquero maasano inintacaaquem-  
pica Amajirote, pimoncaramajaquero.”

<sup>18</sup>Naroguenti Paavoro, jeroquea inchiquio-  
jita notioncaciaquempiro oca nacoqui.  
Pinquenquejajajena choocatirajana  
yashitacojitaquena. Nonintaque incavintsaja-  
majajiaquempiquea Aapani Irioshi.

# IPARIACANARIGUETI PAAVORO ITIONCAJIAQUENERI TESARONICAQUITICA

**Antsatantaquemparoca**

Ocatica iroguenti antsatantaquemparoca iroquetica paperi itioncacaantaqueca Paavoro itioncajiaquenerigueti tsaroventajiacarica Jesoshi choocajianquitsica quinteninintsiqui pajitatsica Tesaronica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri ichoocaquegueti Paavoro Tesaronicaqui paperiqui Yantajiguica 17.1–10; 20.1–5. Itioncacaantaqueero Paavoro ocatica paperi tequeratagueti intioncacaanteroji maasano otsipapae paperipae itioncacaantaqueca choocajianquitsica paperiqui icantajitica *Tsavetacoquerica Jesoquirishito*. Itioncacaantaqueero ocatica paperi irooca ajagantsiniqui 50, irooca 51, iquenaguetanajigueti mavitetapojatsica itsavetacovaequerigueti Quirishito.

Timoteo icamantaqueri Paavoro quero icojiacani tsaroventajiacarica Tesaronicaqui, cotanquitsi tee iragavejeji Paavoro irogueji iramenajiaqueri, irootaquequea intioncacaantantajiacanarica ocatica paperi (2.17–3.6). Icamantajiaqueri iraventamajajiaquempari Quirishito intampishitacaajiaqueriniji, aatoquea yovashiantajigurotsi yaventajiacarigueti, irantajiaqueroquea inintacaajiaquerica Jesoshi (1.2–10; 3.7–9). Icamantajiaqueri quero incojiaquempani irinetsanajiaqueroniji inintacaajiaquerica Aapani Irioshi (4.1–12; 5.5–22), tee inchoocateji tsatanquitsineca quero oncarateni incoraquetantajatempaca Quirishito acaniqui quepatsiqui aisa intancorejantajianajempaca quemisantajiaquerica (4.13–5.11). Paavoro iquenquejacaajiaqueri Tesaronicaquitica quero icotaca iriatimpa ichoocatimojiaquerigueti, aatoniji iquemisantajiguiri tsojeventajiacarica Paavoro (2.1–12).

---

**1** <sup>1</sup>Imaica naatimpaquea Paavoro notsipatacari Shirivano aisa Timoteo, notioncajiaquempiquea maasano aviatimpajia choocajiacarica oraniqui Tesaronicaqui tsaroventajigajira Aapani Irioshi aisa Amajirote Jesoquirishito. Namanacoventajiaquempiquea incavintsajajiaquempinijite Aapani Irioshi aisa Amajirote Jesoquiri-

shito, inchoocatacaajiaquempinijite cameetsa aatonijite pishoshoguiteventajigaro taaca opajitapae.

**Irirajia Tesaronicaquitica  
iquemisantamajajiaqueroquea  
Quenquetsatsarentsi Oganejencatatsica**

<sup>2</sup>Nocantacoguitaniquea namanaguitirini Aapani Irioshi nocantajiaqueriquea

noshinejiaca namenajiaquempigueti pitsaroventamajatanacariquea Amajirote Jesoquirishito. <sup>3</sup>Aisa namenajiaquerigueti nocantacoguitanquea noquenquejajiaqueroquea pisavicaventamajatanaquero maasanopae inintague-tica iriatimpa, iriotaquetari paventajia-caca. Picocani pantamajajiaqueneri-quea, pipintsajiacaritarite. Aisa patsipe-tacojianaca maasanopae, irooriji poguijajiaqueri incoraquetajategueti Amajirote Jesoquirishito oncoramanita-pojajegueti. <sup>4</sup>Napitsaroventarijate, ipintsamajajiaquempiquea Aapani Irioshi, aisa notsajiaquequea icoguijajia-quempi. <sup>5</sup>Oraquea notsavetantimojia-quempigueti notsatacayaquempiro-quea Quenquetsatsarentsi Oganejencata-tsica, teequea nonquenquetsatacaashiji-guempiquea intati, iriguentequea agavejacaquaquea Ishire Aapani Irioshi. Aisa notsamajajiaquequea oraquea Quenquetsatsarentsi notsave-tantimojiaquempica iroomajaca.

Aviatimpajia pamenanmajajiaquenaquea queroquea nocojiacani nochoocatimojia-quitimpigueti. Noquejetacaajacaroquea imaica cameetsanijite pintsamajatimen-tajauenijite. <sup>6</sup>Iroompaquea pamena-majajiaquenagueti piquejejianaquaquea aviatimpajia, piquejejianaquenaquea naatimpa, aisa piquempejianacariquea Amajirote. Patsipevajiacaquea cotanquitsiquea pishineventamajajia-  
roquea notsavetantimojiaquempica, iriguenti oguishinejaquempi Ishire Aapani Irioshi. <sup>7</sup>Jeroquea irooquea iquemacojiaquempigueti maasano tsaroventajigarica Maseroniaquitica aisa Acayaquitica iquempejianaquequempiquea aviatimpajia. <sup>8</sup>Cotanquitsiquea teetarite aparoquea inquemacojiteroji Quenquetsatsarentsi Oganejencatatsica Maseroni-aquitica aisa Acayaquitica, iquemacojia-vaqueroquea aisa osamanipaequitica,

otsitacaguitejavaetanacaroquea. Aisa iquemacojiaquempi maasano pitsaro-ventamajatanacariquea Aapani Irioshi. Teequea noncamantajajeriji naatim-pajia, <sup>9</sup>itsavetacojiaquempitari maasano, iquenquetsatacojiaquempi querocaca picojiacani pishineventamaja-tacarogueti notsavetantimojiaquitimpigueti coramaniqui narejerejeitaqueta-gueti namenajiaquitimpigueti, ariquea pipishoncrajanaqueriquea pipeaguevetaca-pirioshiguatica intati iriotaquequea pitsaroventamajajianaja Irioshimajaca teeca irimetojimateji. <sup>10</sup>Aisa iquenquetsatacojiaquempiquea icantajiaque picocaniquea poguijajiaqueri incoraque-tajategueti Jesoshi Irijanite Aapani Irioshi ivochatajica, iriotaquequea meshiajaciacajica aatonijite icatsimajajia-quea Aapani Irioshi oncoramanitapoja-jegueti.

### Queroquea icocani Paavoro ichoocaquegueti Tesaronicaqui

**2** <sup>1</sup>Imaicaquea, napitsaroventarijate, pitsajiaquequea coramaniquea narejerejeitaquetagueti namenajiaqui-timpigueti teetarite noanoaitashitempajia intati. <sup>2</sup>Pitsajiaquequea ontaniquiquea ontaniqui Piriponiqui, icantacantaivae-  
quenaquea yatsipetacaajiaquena, cotanquitsiquea nocoraquejiaquegueti aviatimpajiaqu iitampishitacajajiaquena-quea Aapani Irioshi noquenquetsatimo-jiapojaquempiquea notsatacayaipoja-quempirotarite Quenquetsatsarentsi Oganejencatatsica. Ichoocajiavecaquea oshequini catsimajiaquenaca, cotanquitsiquea naatimpajia teequea nontsaroaji-gueji. <sup>3</sup>Manatarite notsavetacovintsajia-naqueroquea Quenquetsatsarentsimajaca, teequea noncantashitatiguemparo-ji. Teetarite nonquenquejajajeroji taampaquea naantajajemparo naatim-pajia, aisa teequea namatavijantajigueji.

<sup>4</sup>Inintacaajiaquenatari Aapani Irioshi nontsavetacojiaqueroquea Quenquetsatsarentsi Oganejencatatsica. Ariquea noquejejiguiroquea imaica notsavetantaetigueti. Teatarite irioquea nonintajigue noshinetacaajiaquempari caquinte, iriguentiquea nonintajaquequea noshinetacaajiaquempa Aapani Irioshi amenamajajiacajica querocaquea acojiacani ashirequi. <sup>5</sup>Pitsajiaquequea aviatimpajia noquenquetsatacaajiaquempigueti teequea noshinetacaamampejaiguempiji intati, aisa teatarite noshoshoventemparoji pivegarajiaquenanijite pimentaquitsitequi. Yamenajiaquenaquea Aapani Irioshi arimajaca nocantajiaquempica. <sup>6</sup>Naatimpajia teequea nonintimateji inquejetacaajiaquenaquea quempeca naatimpajiacma jajirontajatiatsica, tee nonintajigueji pinquejetacaajiaquena aviatimpajia, aisa tee nonintajigueji inquejetacaajiaquena itsipajia. Nagavejajiavecaquea nomperajiaquempime, naroguentijitari itigarancanejia Quirishito, cotanquitsiquea teequea nonquempejiguempajimaica, <sup>7</sup>manaquea inchiquiojiquea nonetsanajiaquempiquea noquempeta caajiaquempi chaajaniquitirajaca oguimoncrajiguirigueti iriniro. <sup>8</sup>Caavijiquea nopintsamajajiaquempi, jeroquea teequea aparo nonintajigue nontsavetantaquempiro Quenquetsatsarentsi Oganejencatatsica itigarancaquea Aapani Irioshi, quempecaquea nometojaventajiaquempi, teetari nontsaroacaguemparoji iroorijite nopintsamajajiaquempi. <sup>9</sup>Napitsaroventarrijate, picocanicajate piquenquejajajiro quero nocojiaca naatimpajia: nantajiaquequea nomagotimentajiaqueroquea nosheca. Noquejejiaqueroquea imaica savincagui teriqui aisa pitsecariqui aatonijite natsipetacaajiguimpi aviatimpajia pojocashijiaquenamegueti intati arinijite

nontsavetantimojiaquempironijite Quenquetsatsarentsi Oganejencatatsica itigarancaquea Aapani Irioshi.

<sup>10</sup>Aviatimpajia tsaroventajigarica Aapani Irioshi pamenajiaquenaquea nochoocatimojiaquempigueti, aisa Aapani Irioshi yamenajiaquenaquea, nocomajamajajiacaa teequea noncovae guishtempaji. Aisa nonetsanamajajiaqueroquea maasanopae icantagueta queca Aapani Irioshi cameetsanijite iramenajiaquenijite teequea taaca opajita nomepacaimatemppajicovaeguisherentsi. <sup>11</sup>Aisa pitsajiaquequea nocantajiaquempiquea arimpaquea pintsaroventamajajianaquempari Aapani Irioshi, jero aisa noguishinejajiaquempi noquempetacaajiaquempiquea aviguentijiacanirijanijate. <sup>12</sup>Notsacaamajajiaquempiquea nocantamajajiaquempi queroquea pincojianaquempani pincomajamajajianaquempanijite cameetsanijite irishineventajiaquempinijite Aapani Irioshi. Iriotaquequea cantatsica iroqueragueti ininquequea pintsipajiaquempari impeaquempagueti Imajirojiate maasano, iramenajiaquerugueti maasanojia yoganejencamajata.

<sup>13</sup>Nocantacoguitaniquea nocantajiaqueri Aapani Irioshi noshinevaetaca quea, namenajiaquequea notsavetantimojiaquempigueti Iguenquetsatsare piquemisantajaviaqueroquea pishine ventajavacaroquea, pamenajiaquetarite teequea iro iguenquetsatsare caquinte, pitsajaviaqueroquea iroguenti Iguenquetsatsare Aapani Irioshi, arimajatarite irootaquequea. Irootaque cantashitatia jianaquempica aviatimpajia quemisan tajianaqueroca, agavejacaajianaquempi. <sup>14</sup>Napitsaroventarrijate, oraquea coramaniqui icatsimamajajianaquempi gueti pagonoropae yatsipetacaajiaquem pigueti manatarite iquejetacaajiaquempiquea tsaroventajigarica Quirishito

Jesoshi choocajatsica Joreaqui capiocaventapinijigarica Aapani Irioshi. Aritarite iquejetacaajiacari igonorojia iriatimpajia joriojia, manaquea yatsipetacaajiacari.<sup>15</sup> Iriatimpajia joriojia metojaacaantajiaquerica Amajirote Jesoshi iquejetacaajiaqueriquea imetojajiaquerigueti coramani tsavetantajiasica. Ari iquejejiaquenaquea naatimpajia, icatsimamajajiaquenaquea, yoguisotojaiquena. Teequea irinetanateroji inintacaquerica Aapani Irioshi, icatsimajiaqueriquea aisa maasanopae caquinte,<sup>16</sup> aritarite inintajiavecaquea irojocaavaquename yamaenagueta nonintajiaque nontsatacayaqueri teeca irijorijoigueji cameetsanijite irimeshiajitaquerinijite. Iquejejiacagueti imaica, icovaeguishemajajiaca, irootaquetari aapojaca imaica, icatsimamajajiaqueriquea Aapani Irioshi.

### Inintavecaquea Paavoro irinejajiajaterime Tesaronicaquitica

<sup>17</sup>Napitsaroventarijate, coramaniquea nojocajianaquempigueti oraniqui Tesaronicaqui teetarite namenajavetajempiji, cotanquitsiquea nococani noquenquejajiaquempi, teetarite nompeacojiguempiji. Imaica nonintamajajiavecaqueate namenajajatempime. <sup>18</sup>Irooshivecaquea noncoraquejiaquemequea, naatimpa Paavoro nonintamajapiniveta noncoraquetaquequea, cotanquitsiquea teequea nagavejajigueji, yojocaavaquenatarite Satanashi. <sup>19</sup>Cotanquitsiquea imaica noninquequea noncantajiaquempi taa ipajita noguijamajatavaje naatimpajia. Iriguentiquea noguijamajatavaje incoraquetajategueti Amajirote Jesoquirishito, oncoramanitapojagueti nontsipatsipaitanaquempi noncantajiaqueri: “Jeeri irirajia notsaroventacaajiacaca.” ¿Quericaquea shinetaajiaquenaneca? ¿Quericaquea

noshineventamajataquempaca oncoramanitapojagueti? Aviguentijiaquea noshineventajiaquempa.<sup>20</sup> Arimajacaquea aviguentijiaquea shinetaajiaquenaneca, aisa aviguentijia noshineventamajajiaquempa.

**3** <sup>1</sup>Coramaniquea nopintsapintsajavetaca cotanquitsiquea namenajiaquea teequea nagavejajigueji noncoraquejigueji, noquenquetsatavaajiacaquea, iroompaquea nocantajiaqueri irioqueate oananquitsine Timoteo, naatimpajia choocajajatsine Atenashiqui. <sup>2</sup>Iroompaquea notigarancaqueriquea Timoteo iramenajajatempiquea. Iriguentiquea apitsaroventarite antaquenerica Aapani Irioshi, iriguenti notsipatashijacaca notsavetantaquerogeti Quenquetsatsarentsi Oganejenatatsica tsavetacotaquerica Quirishito. Namenajiaquequea iragavejaque intsatacamamajajiaquempiroquea, aisa intampishitacaajiaquempi <sup>3</sup>aatonijite quericaca ovashiantirotsi itsaroventamajatarigueti iramenaqueguetis yatsipetacaajitacarigueti, inintacaacajitari Aapani Irioshi antsipeventajiaquempari Quirishito. <sup>4</sup>Oraquea nochoocatimojiaquitimpigueti nocantajiaquempiquea: “Arikea irantsipetacajaicaji.” Imaica pitsajiaque onetsanatanaca. <sup>5</sup>Nonintamajataquequea nonquemacomasajajiaquempi, notigarancantacaricaquea Timoteo iramenajajatempis picantacoguitanica pitsaroventamajatanacariequea Quirishito. Notsaroacaanaquempiquea noquenquejaque arica yamatavijajiaquempi ampatsini nintatsica incovaeguishtacaante. Aricaja manacajate noquenquetsatimojiaquetaquempiquea intati.

<sup>6</sup>Imaicaquea coraquetajiquea Timoteo yamenajajatimpis icamantajiajapojajaquea arimpaquea pitsaroventamajajianaci, aisa pipintsatantajianaca.

Icamantajiaquenaquea piquenquejajia-naquenaquea pinintamajajiaque pamenajajena piquejejiaquena naatimpajia nonintamajajiaquequea namenajajatemp*i*.<sup>7</sup> Natsipevaeliacaquea taaca opajita, aisa yatsipetacaajiaquenaquea itsipa caquinte, cotanquitsiquea poguishinejamajataquenaquea, napitsaroventarijate, noquemacojiaquempi-gueti arimpaquea pitsaroventamajajianacariequa Amajirote Quirishito.

<sup>8</sup> Arimajacaquea noshinemajajianajaquea, noquemacojiaquempitari picoguitaniquea pitsaroventamajaguitarini teequea povashiantajeriji.<sup>9</sup> Jeroquea namananaquerigueti Aapani Irioshi nogaamajatanacaquea noshinemajatana oshequi teequea nontsajigueji querocaquea noncantajigue, caavijitari yoguishinejajianaquena namenajiaquempigueti pitsaroventamajajianacari.<sup>10</sup> Oavaetanaquequea savincaguiteri aisa pitsecariqui namanajiaqueriquea Aapani Irioshi nocantajiaqueri nonintajiaquequea namenajajatemp*i* nontsatacaamajajiaquitempi tequerataca pintsamajajigueji.

<sup>11</sup> Nonintajiaquequea irojocaconon- tavaquena Aapani Irioshi aisa Amajirote Jesoquirishito nagavejajiaqueniji noncoraquejiaquitequea namenajajatemp*i*.<sup>12</sup> Aisa nonintajiaquequea iragavejacaajiaquempi Amajirote arimpaniji pimpintsamajatavacaajianaquempa, aisa arimpaquea pimpintsamajajianaquempari maasano caquinte, pinquempejiaquenaquea naatimpajia nopoltsamajajiaquempigueti aviatimpajia.<sup>13</sup> Arikea pinquejejianaquempa- quea imaica cameetsanijite intampishi-tacaimenquempinijite Aapani Irioshi pishirequi aatonijite pipeacajaiaga covaeguisherentsi manaquea pincomaja-majajianaquempaquea. Oncoramanita-pojajeguetiquea incoraquetajegueti

Amajirote Jesoshi intsipatsipaitaquem-parigueti maasano igomajamajarejia, iramenajiaquempiquea Aapani Irioshi netsanamajajiaquempiquea.

**Queroquea incojitaquempani  
iroguishinejajitaqueriniji Aapani Irioshi**

**4**<sup>1</sup> Napitsaroventarijate, coramaniqui notsatacajajiaquempiquea queroquea pincojiaquempani pincomajajiaquempagueti cameetsanijite pishinetacaajiaquempariniji Aapani Irioshi, arikea piquemisantamajajianaquenaquea nocantajiaquempica. Imaica noncantsijajempiquea arimpaquea pinquejejianaquempa imaica, iriguenti- quea cantanquitsi Amajirote Jesoshi.

<sup>2</sup> Pitsajiaquerotari notsatacajajiaquem- pica icantacaaquenaca Amajirote Jesoshi.<sup>3</sup> Ininquequea Aapani Irioshi pincomajamajajiaquempaquea. Aatoquea poashijiguiro manquigarentsi teeca irooqua pashiquea pimanquigare. Ariquea pinquejejianaquempaquea manquigarentsijia aatoquea poashijigui- ritsi itsipa shirampari teeca irionica pashiquea manquigajiguimpica.

<sup>4</sup> Iriraquea shiramparijia noninque intsajiaque cameetsataquequea irimanquigajiaquempa manquigarentsi, cotanquitsiquea netsanaquea iroajiaquero irimanquigajiaquemparo- gueti.<sup>5</sup> Aatoquea iquejejigaritsi irirajia teeca intsaroventajiguempariji Aapani Irioshi, opeacojianaqueriquea itsanirore yoashijiaqueroquea manquigarentsijia intati.<sup>6</sup> Aisa teequea oncamenteateji pincantatsatacotsijigueri pigonoro. Nocantajiaquempiquea coramaniqui, cotanquitsiquea imaicaquea noncantsijajempiquea aisa, incatsimamajajiaqueriquea Amajirote maasano quempejigui-roca imaica.<sup>7</sup> Teetarite irooqua incajemimentacajiquea Aapani Irioshi cameetsanijite ancoquempaniquea

ampeacaaguitemparoni taaca opajitapae covaeguisherentsi. Iroguentiquea icajemimentajiacajiquea ancomajamaja-jiaquempaniji antajiaqueroquea cameetsaripae.<sup>8</sup> Nocantantajiaquempi-caquea, quericacaquea teeca irininteji inquemisantajigueroji ocatica notsataca-jiaquempica tee naroguentijia irimaninteji, iriguenti imanintaque Aapani Irioshi tigarancaquerica Ishire inchoocashirentajiaquempi.

<sup>9</sup>Notsataquequea Aapani Irioshi itsatacajiaquempiroquea pimpintsata-vacaamajajiaquempaquea. Irootaquea imaica aatoquea notioncajiguimpi noncantajajempiroquea aisa.<sup>10</sup> Aritarite piquejeiacaquea imaica pipintsajiacari-quea maasano papitsaroventarijate choocajatsica gunteninintsipaequi Maseroniaqui, cotanquitsiquea noninta-quequea arimpaquea pimpintsamajajia-naquemparquea.<sup>11-12</sup> Cameetsaquea pinchoocajianaquequea. Iroguentiquea pisavicaventamajajianaquequea pasipae pantajiaqueca. Inchiquiojita-quea pincatsiquetimojajempaquea aviatimpajia irooca otsipa panteca, aatoquea pasereantajiguitsi, manaquea pinquempetacaajiguemparoquea nocantajiaquempica cameetsanijite aatonijite ishirontimentajiguimpi itsipa teeca intsaroventempariji, aisa cameetsanijite onchoocatimenquenijite taaca opajitapae picoguitejacojicaca.

**Quero oncotanaquempani  
oncoramanitapoja jegueti  
incoraquetajategueti Amajirote**

<sup>13</sup>Napitsaroventarijate, nonintajia-quequea pintsajiaque querocaquea incojianaquempani oncoramanitapoja-geueti metojajianquitsica cameetsanijite aatonijite pishimampojancajiga piquem-pejigaritsija itsipa teeca intsajigueji intancoretancoreitanaje.<sup>14</sup> Aatimpajia

atsajiaquequea imetojavitaca Jesoshi, ariquea ipochatanaji. Aisa atsajiaque-quea ariquea inquempetacaajiaquem-pairea Aapani Irioshi irivochajajeriequea maasano tsaroventajiacarica metojajia-vetanquitsica cameetsanijite iramami-rincajajeri oncoramanitapoja jegueti incoraquetajategueti Jesoshi.

<sup>15</sup>Itsatacajiaquenaquea Amajirote notsatantajiacaca, aatimpajia tequerata-caquea ametojajigueji incoraquetajate-gueti iriatimpa aatoquea aro jivajiguiri metojajianquitsica.<sup>16</sup> Arikea iraguiji-poje Amajirote, incantajiacaji iririjen-can, ariquea inquejetsitempa irashivan-tite anaamajatanquitsica iririjencani incanquempa, aisa intivojiquerouquea itivore Aapani Irioshi. Iriquetiquea tancoretancoreitanajatsine metojajiave-tanquitsica aventajiacarica Quirishito.<sup>17</sup> Coajicaquea aatimpajia tequerataca ametojajigueji anconoajianaquempari iriatimpa metojajavetanquitsica oahoaitanaquequea mararoqui antonquivojajivaquempari Amajirote jenoqui, ancoguitempaniquea antsipa-majatajempari iriatimpa.<sup>18</sup> Irootaque-quea noncantantajiaquempica imaica pinquenquejavacaajiaquemparoja ocatica poguishinejavacaajiaquempani-jite.

**5** <sup>1</sup>Imaicaquea, napitsaroventarijate, tee pincoacotajempají nontionca-quempi noncamantajiaquempi quero incarate catsirincaiteri aisa quero oncarate savincaguiteri onetsanatanta-naquempaca ocapae.<sup>2</sup> Pitsajiaquetari oratica savincaguiteri incoraquetanta-jempaca Amajirote manatarite incatimapojajempaquea inquempetapo-jajempari aitsitantatsica icoraquetigueti pitsecariqui.<sup>3</sup> Incantajiaequequempagueti maasano: “Imaicaquea cameetsavaeque-quea achoocajiaque, aatoquea taaca opajita oajiaji”, incatimajiaqueriquea

incatsimamajiaqueriquea Aapani Irioshi irantsipetacaajauempari, querocampate iroaroaitanaqueni. Manaquea onquejetaquemparoqua oncantaguetanajeroqueti manquigarentsi, ocatimapojiro oquemavaquero oncantaguetanajiroqueti, queroquea oncoquempani.

<sup>4</sup>Cotanquitsiquea aviatimpajia, napitsaroventarijiate, teetarite pinquempejiguempariji teeca intsaroventajiguempariji, teequea pimpitsecashirentacojigueji. Aatoja ari iquejetacaajiguimpiquea iriatimpajia oncoramanitapojaegueti incatimapojajerigueti. <sup>5</sup>Aviatimpajia quempetaca pitsrencashirentacojaque, pisavincaguiteshrentacojaque, jeroquea poguijantajavajemparica incoraquetajategueti, teetarite pinquempejiguempariji covaeguisherijia pitseca-shirentacojiatsica. <sup>6</sup>Iriatimpajia teequea inquenquejeroji incoraquetantajempaca Amajirote, quempevetacaquea mana imaaquiaque. Cotanquitsiquea aatoquea aquempejigaritsi iriatimpajia. Jaamejate agamajaguitemparini anquenquejamajajigue. <sup>7</sup>Iriraquea maajianquitsica iroguentiquea imaaquiaque pitsecariqui. Arquea iquempejiacaquea aisa shinqujianquitsica iroguenti ishinquijiacapitsecariqui. <sup>8</sup>Cotanquitsiquea aatimpajia mana asavincaguitetacojaqueua atsaroventajiacaritarite Amajirote, jeroquea Jamejate anquenquejamajajianaqueuea. Oncorauetaschicajugueti covaeguishetagantsi jeroquea anticaanquemparoca: aventaji-aquempariquea Amajirote, aisa ampintsatavacaamajajianaquempaquea, iroocaquea aisa aguijaguiteniquea aapojajempagueti savincaguiteri oahoaitantanaquempaca jenoqui inquitequi antsipajiaquempariquea Jesoquirishito meshiajiacajica. <sup>9</sup>Teetarite incanteji Aapani Irioshi

ininque incatsimajiacaji, manaquea icanque ininquequea irimeshiajiacaji aventajiaquemparigueti Amajirote Jesoquirishito aatonijite oahoaititsi camorecariqui. <sup>10</sup>Iriatimpia imetojaven-tajiacajiquea cameetsanjite ancoquem-paniquea antsipajiaquempari, aricaquea choocatatsitirajajigueti oncoramanitapo-jajegueti incoraquetantajempaca, aricaquea ametojajiaque. <sup>11</sup>Jeroquea nocantantajiaquempica poguishinejava-cajiaquempaquea, aisa pintampishita-vacaajiaquempaja, aritarite picojiaca piqempejiaqueroquea imaica.

#### **Icamantajiaqueri quero incojiaquempani**

<sup>12</sup>Imaicaquea, napitsaroventarijiate, noninquequea pinquemisantajiaqueriquea irirajia inintacajiaqueca Aapani Irioshi intsatacayaquempi aisa intampishitacaajiaquempi pinetsanama-jajiaqueroniji icanqueca Amajirote.

<sup>13</sup>Icoguitaniquea isavicaventamajajia-quero itsatacayaquempica, irootaquequea nocantantajiaquempica pishine-ventamajajiaquemparia pimpintsamaja-jiaquemparia. Aisa noninquequea pintsipatavacaajiaquempagueti pinchoocajiaquequea cameetsa.

<sup>14</sup>Jero aisa, napitsaroventarijiate, nonintajiaquequea pincantomajajiaqueriquea perajatsica, pintampishitacaajigueraija tsarontija aisa teeca intampishitashijigueroji taaca opajita coraquetashijiaquerica, pantsiperejacojiaquempa-roja querocaca incoquempani maasano.

<sup>15</sup>Querocaca incojiaquempini papitsaro-ventarijiate aatoquea pipigajigari, manaquea pincavintsajavacaajiaquempaja aisa pincavintsajitempariquea maasano.

<sup>16</sup>Pincoquempanija pishinejiaquempaja. <sup>17</sup>Pincoquempaniquea pamanajiaqueri Aapani Irioshi. <sup>18</sup>Aricaquea pinchoocajiaque cameetsa, arica

pantsipevaequempa, cotanquitsiquea pincoquempaniquea pishineventamajataquempari Aapani Irioshi, pincanqueriquea: "Ariotesaa", irootaquequea ininqueca iriatimpa, aviguentijiatari tsaroventajigarica Quirishito Jesoshi.

<sup>19</sup>Aatoquea pisantereguriri Ishire Aapani Irioshi. <sup>20</sup>Aisa aatoquea pimanintajiguiro icanqueca tsavetantajiguropa icanquerica Aapani Irioshi. <sup>21</sup>Cotanquitsiquea iroquetiquea pinquemisantajiavaqueriquea itsatacaaajaiaquempica, iroompa pamenajiaquegueti tampatica yoquiero, ariquea pinquemisantsijiguempariquea. <sup>22</sup>Oraquea maasano covaeguisherentsi aatoquea piquenquejajigurotsi, aatoja pipeacagarotsi.

<sup>23</sup>Iriraquea Aapani Irioshi irioquea choocatacaaajiacajica cameetsa aatonijite ashoshoguiteta. Imaicaquea noninque intampishitacaajiaquempiquea cameetsanijite pinquenquejamajaquerinijite iriatimpa, aisa pisavicaventamaja-

queronijite maasanopae inintaguequeca. Noninquequea inquempoguijamajajiaquempiroquea pishire, piguenquejane, pitsino, maasano, cameetsanijite incoraquetapojajegueti Amajirote Jesoquirishito iramenajiaopajajempiquea netsanamajajiaquempi. <sup>24</sup>Iriraquea cajemajiaquempica icancaniquea inetsanamajajero maasano icanqueca, ari irinetsanaqueroquea maasano ocatica.

<sup>25</sup>Imaicaquea, napitsaroventarijate, noninquequea pamanacoventajiaque-naja. <sup>26</sup>Netsana pinintavorojiavaqueri<sup>a</sup> maasano apitsaroventarijate. <sup>27</sup>Ocaticaquea paperi notioncajiaquempica noninquequea pampatsajavantajiaquenerija maasano papitsaroventarijate choocajatsica oraniqui, iriguentiquea nintanquitsica Amajirote.

<sup>28</sup>Namanacoventajiaquempiquea maasano incavintsajimentajiaquempinijite Amajirote Jesoquirishito.

---

**a 5.26** *Netsana pinintavorojiavaqueri*. Yamejiaca coramani inintavorotavacaajavaca yamenavacaajiacagueti, ari iquejejiaca tsaroventajigarica Quirishito coramani.

# PAAVORO ITIONCAJIAJINIRI TESARONICAQUITICA

**Antsatantaquemparoca**

Ocatica iroguenti antsatantaquemparoca mavitetapojsica paperi itioncacaantaqueca Paavoro itioncajiaquenerigueti tsaroventajiacarica Jesoshi choacajianquitsica quinteninintsiqui pajitatsica Tesaronica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31), aisa itioncacotaqueri ichoocaquegueti Paavoro Tesaronicaqui paperiqui Yantajiguica 17.1-10; 20.1-5. Iteroncaquerogueti Paavoro iroquetica paperi itioncacaantajiaquenerica Tesaronicaquitica, avisanaquegueti aparopae taai, ari itioncacaantaquero ocatica ichoocaquegueti Corintoqui, irooca ajagantsiniqui 50, irooca 51, iquenaguetanajigueti mavitetapojsica itsavetacovaequerigueti Quirishito.

Itioncacantaquerogueti Paavoro ocatica paperi icamtajiaqueri Tesaronicaquitica intampishitashitero yatsipeventajiacarigueti Jesoshi (1.3-12; 2.13–3.5), aisa itsatacajiaqueri quero oncotanaquempani incoraquetantajatempaca Jesoquirishito ocaniqui quepatsiqui, aatoniji ijijigu coraquetaji quejetaca icantashijiacarigueti amataajialsica (2.1-12), aisa icantajiaqueri quemisantajiaquera Jesoshi incatsiquejiaque irooca otsipapae cameetsaguetatsica irantajiaque, aato iperajiga (3.6-15).

---

**1** <sup>1</sup>Imaica naatimpaquea Paavoro notsipatacari Shirivano aisa Timoteo, notioncajiaquempiquea maasano aviatimpajia choocajiasica oraniqui Tesaronicaqui tsaroventajigarica Aapani Irioshi aisa Amajirote Jesoquirishito. <sup>2</sup>Namanacoventajiaquempiquea incavintajiaquempinijite Aapani Irioshi aisa Amajirote Jesoquirishito, inchoocatacajiaquempinijite cameetsa aatonijite pishoshoguiteventajigaro taaca opajitapae.

**Aapani Irioshi incatsimajiaqueriquea  
maasano teeca  
intsaroventamajajiguempariji**

<sup>3</sup>Napitsaroventarijiate, noquemacojiaquempiquea arimpa pogaamajajianaca pitsaroventamajajianacariquea Aapani Irioshi, aisa pipintsatantamajajianaca, jeroquea nocantacoguitaniquea namanajiaquerigueti Aapani Irioshi noshinemajajiacaquea nocanqueri noshineventajianaquempi aviatimpajia aisa, notsataquequea irooqua ininque

iriatimpa.<sup>4</sup> Aisa noquenquetsatacojia-quempiquea nocamantajiaqueri maasano tsaroventajigarica Aapani Irioshi capiocapinijianquitsica tsoviro-naquipaequi noshineventajiaquempi oshequi, namenajiaquempiquea patsipetacojiacariquea maasano catsimajia-quempica asereajiaquempica, teequea pimpigajiguepariji, picocaniquea pitsaroventamajatanacariquea Aapani Irioshi.<sup>5</sup> Irootaquequea itsatantajitacaroca iriraquea Aapani Irioshi teequea queri incatsimatashitempariji intati, iriguentiquea Iriomajatatsica, tampatica yoquero. Iriguentiquea tampishitaca-jaiaquempiquea patsipetacotantajiacaroca taaca opajita, cotanquitsiquea oncoramanitapojaquegueti impeaquempari-queti Imajirojate maasano incajemajia-quempiquea poapoitanaquequea pinchoocatimojiaqueri pamenajiaopojo-quea maasanopae patsipeventajiacaca imaica.<sup>6</sup> Otampaticatimotaqueri Aapani Irioshi impigataquempari atsipetacajai-aquempica irantsipetacajaiquempari-quea,<sup>7</sup> cotanquitsiquea incavintsa jia-quempiquea aviatimpajia atsipejianqui-tsica imaica, aatoqueate patsipevajiajia, ariuea inquempetaca jiaquenaquea naatimpajia aisa. Ocaquea onetsanata-naquempsa ironigaantaquempagueti Amajirote Jesoshi, inquenapoja quea jenoqui inquitequi, intispatsipaipo-je pariquea irashivantijite caavijica yagavejamajajigu.<sup>8</sup> Oraqueate incoraquetajategueti anquiritacotapo-je pariqueate paamari, incatsimamaja-jiaqueriquea maasano teeca intsajigue-riji Aapani Irioshi, maasano teeca irinetsanajigueroji Quenquetsatsarentsi Oganejencatatsica tsavetantaquerica Amajirote Jesoquirishito.<sup>9</sup> Ariquea incoquempaniquea irantsipeguitempani camorecariqui. Aatoquea yagavejajigu inchoocatimojiaqueri Amajirote, aisa

atoquea yamenimajajiroquea irogane-jencare ironigaantaquerogueti iragave-jane.<sup>10</sup> Oraqueate incoraquetajategueti manaquea incoraquetashiquequea irishineventajiaquempariquea maasano yashintajiacaca, inquenquetsatacaciajiaqueriquea maasano tsaroven-tajiacarica incanqueriquea iriguenti caavijia yoganejencamajata. Aviatimpajia aisa pintsipatsipaitanaquempariquea iriatimpajia, piquemisantajiaquenatari notsavetacoquerigueti.

<sup>11</sup> Irootaquequea nocantacoguitani-quea namanacoventajiaquempi aviatim-pajia. Namanajiguiri iragavejacaajia-quempi Aapani Irioshi pantajiaquequea maasanopae inintacaaguequempica icajemajiaquempigueti irishineventajia-quempiniji. Aisa namanacoventajia-quempi iragavejacaajiaquempi pantajiaque maasanopae cameetsaguetatsica pintajiaqueca aviatimpajia. Aisa nocantajiaqueri nonintajiaque iragaveja-cajiaquempi pinetsanamajajiaquero maasano pantajiaquenerica pintsaroven-tamajajianaquemparigueti.<sup>12</sup> Arikeate pinquejeliaquempagueti imaica iramenajiaquempiquea caquintejia irioqueate agavejacaajiaquempine Amajirote Jesoshi, irishineventajia-quempariquea. Arikeate inquempejia-quempiquea iriatimpa irishineventajia-quempiquea cameetsaniji iramenajique-quea aviguentijia irashijia, icavintsa-majajiaquempitari Aapani Irioshi aisa Amajirote Jesoquirishito.

**Queroquea oncoquempani  
irooshipojajegueti incoraquetajategueti  
Quirishito**

**2**<sup>1</sup>Imaicaquea, napitsaroventarijate, pitsajiaquequea oncoramanitapoja-je gueti incoraquetajategueti Amajirote Jesoquirishito iromporoguijajiajapocajiji-quea cameetsanijite amporoguijajaventaji-

aquepariquea. Imaicaquea noncantajiaquempiquea,<sup>2</sup> arigueti pinquemajiaqueri incantajiajaveraquea: “Jac coraquetapoja Amajirote”, aatoquea pitsaroajigui aisa aatoquea pishoshoguitjiga. Ariguetiquea inconoagarantajiaquempa incanque: “Iriotaquequea tsatacaaquenaroquea Ishire Aapani Irioshi”, cotanquitsiquea aatoquea piquemisantimatiritsi. Arigueti intsave-tacoguevetanaquempariquea incantajiaquequea: “Arikea ocanque paperi itioncaqueca Paavoro”,<sup>3</sup> cotanquitsiquea aatoquea piquemisantimajiguriquea aatonijite yamatavijajiguimpi. Oraquea irooshipojajegueti incoraquetajategueti Quirishito iroquetiquea inconoagaranquempaquea tsaroventajigarica irovashiantajianajeroquea itsaroventajiavecari-gueti incatsimajianaqueriquea Aapani Irioshi. Iroompaquea ironigaantanaquempa irira caavijica iranaaque pigapigamajataquemparineca Aapani Irioshi, cotanquitsiquea oncoramanitapojaegueti intsjaiqueriquea camorecariqui.<sup>4</sup> Iriatimpa iriotaque catsimacatsimataquerineca Irioshimajaca iranaimanataqueriqueate. Arikea inquempatacajiaquempariquea aisa maasano ipeajiguetaica irioshvijirentsi intati itsaroventajivetacaca, arimpaquea irogaamajatanaquempa incatsimamajajiaqueriquea. Iroompaquea inquijanaquequea teemporoqui itsaroventantajitarica Aapani Irioshi irisavicanaquequea inquejetampeanaquempariquea Aapani Irioshi incanquequea: “Naroguentiquea Irioshimajaca.”

<sup>5</sup> ¿Arimpaqueate teequea pinquenquejajigueroji nocantajiaquempica coramaniqui nochoocatimojiaquitimpigueti? <sup>6</sup> Imaicaquea aviatimpajia pitsajiaquequea taacaquea ipajita ticaacotaquerica aatoniji yonigaantsita, cameetsanijite aapoaquem-pagueti savincaguiteri inintacaquerica

Aapani Irioshi ironigaantanaquempa, ariquea iroguentiquea ironigaantanaquempa.<sup>7</sup> Imaicatari imaica jac icovaeguishtanacaquea, cotanquitsiquea teejemajacaquea onconigamajatejiquea, manaquea isenacacojiqueroquea. Cotanquitsiquea irira ticaacoquerica inquejetanaquempa irosati arejetapojoempagueti irajaitantajem-parica inticaarejantajempaca.<sup>8</sup> Iroompaquea ironigaantajitaquempari iriatimpa, irira caarica quemisantiro icanqueca Aapani Irioshi, cotanquitsiquea iriraquea Amajirote Jesoshi incoraquepojajegueti irimetojantapojempari ijena sotoanquitsica ivagantequi, interoncantapojempari itsirencashimpoquirerejane.<sup>9</sup> Oraquea tequeratagueti irimetojeriji, iriraquea Satanashi iragavejacaqueriquea irantacaaguetaqueriquea taaca opajitapae iramena-menaitanaquequea intati oshequini caquinte cameetsanijite iramatavijijianaqueriquea iramenajiaquerigueti irijijiaquequea ipeacaaguecaro teeca iramenajigue-teji.<sup>10</sup> Arimajacaquea irantaguishetanaquempa taaca opajitapae covaeguisherentsi iramatavijitanqueriquea irirajia oahoitananquitsineca camorecariqui, teetarite irinintajiguejiquea irishineventajiguemparoji Quenquetsatsarentsimajaca irimeshiimentajiquerinijite.<sup>11</sup> Irootaquequea icantantacaca Aapani Irioshi: “Intsiquetiroshiatsi inquemisantamajajigueri amatavijantatsica, inquemisantajiguero tsojetsi.”<sup>12</sup> Arikea oncoramanitapojaegueti incatsimamajajiaqueriquea maasano teeca irininteji inquemisantajigueroji Quenquetsatsarentsimajaca, iroguentiquea ishineventamajaca covaeguisherentsi.

### Aapani Irioshi icocaniquea inintacaajiacaji antsaroventajiaquempari

<sup>13</sup> Napitsaroventarijiate ipintsamajajacaca Amajirote, cameetsataquequea noncoguitempaniquea noshineventajia-

quempariquea Aapani Irioshi, iroorijite notsajiaquequea paesatoniqui tequerata-gueti onchoocatimatejiquea icocaniquea icoguijiaquempi irimeshiajiaquempi. Iroompaquea iriraquea Ishire Aapani Irioshi icantashirentajiaquempiquea cameetsanijite pincomajamajatana-quempaquea pinquemisantamajatana-queroquea Quenquetsarentsimajaca, irootaquequea imeshiantajiaquempica-quea Aapani Irioshi.

<sup>14</sup>Piquemisantajiaqueroqueti Quenquetsarentsi Oganejencatatsica notsavetantimojiaquempica, icajemajia-quempiquea cameetsanijite pinquempe-jiaquempariquea Amajirote Jesoquirishito yoganejencamatagueti. <sup>15</sup>Iroos-canica imaica, napitsaroventarijate, pincoquempaniquea pintsaroventamaja-jianaquempariquea Amajirote, aatoquea pipeacojanajaroquea notsatacaya-quietumpi-gueti, aisa aato pipeacojanajaro notioncajiaquempica paperiqui.

<sup>16-17</sup>Iriraquea Amajirote Jesoquirishito aisa Aapani Irioshi ipintsamajatacajiquea icavintsajamajajiacaji. Oavaetana-quequea ishinetacajaiacaji, aisa itampishitacajaiacaji cameetsanijite ancoguitempaniquea aguijajiaque oahoaitanaquequea jenoqui antsipajia-quempariquea. Irootaquequea namana-coventantajiaquempica iroguishinejajia-quempi, aisa intampishitacajiaquempi pincomajamajajianaquempaquea pinchocamajatanaque cameetsa.

### Paavoro icantajiaqueri:

“Pamanacoventamajajiaquena”

**3** <sup>1</sup>Imaicaquea, napitsaroventarijate, noninquequea pamanacoventamaja-jiaquena naatimpajia cameetsanijite nontsavetacotantajiaquerinijite Amajirote taampinanijite intsitacaguite-jacovaetanaquempaquea, aisa irishine-

ventajiaquemparinijite oshequini caquinte intsaroventajiaquempari Jesoquirishito inquempejianaquempi-quea aviatimpajia pishineventamajajia-cariquea piquemacojiaquerigueti irosatiquea piquemisantajianaqueri. <sup>2</sup>Choocatarite oshequini catsimajiaque-naca antaguishetiroca covaeguishe-rentsi. Irootaquequea nonintantajiacaca pamanacoventajiaquenaquea cameetsanijite irompejiaquenanijite Aapani Irioshi aatonijite quericaca agavejajati irovashiantacaajiaquenaro nonquenque-tsajiaquegueti, teetarite intsaroventajiguempariji maasano. <sup>3</sup>Cotanquitsiquea iriraquea Amajirote icocaniquea inetsanamajajero icanqueca. Iriatimpa intampishitacajiaquempi, aisa irompe-jiaquempi aatonijite yagavejajiguimpi ampatsini. <sup>4</sup>Nonintajiaquequea arimpap-quea pinquempejianaquero imaica pinetsanamajajajeroquea maasanopae nocantajiaquempica. Iriguentiquea agavejacaajiaquempine Amajirote. <sup>5</sup>Namanacoventajiaquempiquea iragave-jacaajiaquempi Amajirote pimptsatantajiaquempanijite pinquejajiaquempari-quea iriatimpa ipintsamajatantagueti, aisa intampishitacajiaquempiquea pantsipetacojiaquempanijite pinquem-pejiaquempariquea Quirishito yatsipeta-cotagueti.

### Aatoquea iperajiga tsaroventajigacarica Quirishito

<sup>6</sup>Imaicaquea, napitsaroventarijate, noncamantajiaquempiquea oca inintacaquempica Amajirote Jesoquirishito. Aatoquea piconojigariquea papitsaroventarijate peratatsica teeca irininteji irantsipevenquemparo ishecapae, aisa teeca irinintajigueji irinetsanajiaquero notsatacayaquempica. <sup>7</sup>Aviatimpajia pitsajiaquequea queroquea pincojiaquempani pinchoo-

cajiaqueniji cameetsa, pinquejejiana que-naquea naatimpajia coramani nochoocati-mojiaquitimpigueti teequea nompera-timatempaji.<sup>8</sup> Teequea noshecatimotan-tempají intati, manaqueate nantajiaque-quea savincaguiteriqui aisa pitsecariqui natsipevencaroquea nosheca novegaraji-aqueroquea aatonijite natsipetacaaji-guimpiquea aviatimpajia pojocajiaque-naromequea intati.<sup>9</sup> Cameetsavaevec-quea namanajiaquempiromequea pojocajiaquenaromequea intati, cotanquitsiquea naatimpajia teequea nonintajigueji. Manaquea nantajiaque-quea cameetsanijite pinquejetimentajia-naquenanjite aviatimpajia.<sup>10</sup> Pamenaji-aquenaquea coramaniqui nochoocati-mojiaquitimpigueti notsatacayaquem-piquea nocantajiaquempi: “Aatogueti intiti irantsipevenquemparo ishecapae, aato ishecata.”<sup>11</sup> Noquenquejacaajia-quempiroquea imaica manatarite noquemacojiaqueriquea iconoajiaquem-piquea perajitsica, teetarite irinintajigueji irantsipevenquemparo isheca, iroguentiquea isavicaventajiaque iquenquetsavijitashijiaca intati yasereantajiaque.<sup>12</sup> Imaicaquea noncan-tajiaqueriquea irirajia perajitsica aatotarite iquejejiajaquea imaica, manaquea irantajiaquequea cameetsanijite inchoocatacojiaquenijite taaca opajitapae icoguitejacojiacaca, iriguenti-quea nintacaajiacajiro Amajirote Jesoquirishito.

<sup>13</sup>Napitsaroventarijiate, aatoquea piperajigar pantajiaquerogueti cameetsaguetanquitsica.<sup>14</sup>Inchoocajia-queguetiquea caarica nintanquitsi irinetsanataqueroquea notioncajiaquem-pica imaica paperiqui, aatoquea piconoajajariquea cameetsanijite impashiventajianaquempanijite.

<sup>15</sup>Cotanquitsiquea aatoquea picatsimaji-guiritsijate, cameetsaquea pincantajia-queriquea pincantomajajiaquerigueti, ariqueate pinquejetacaajiaquempari-queate pitsatacayaqueringueti papitsa-roventarijiate.

### Irovegaratanajerogueti incantajianajerigueti

<sup>16</sup>Amajirote inetsanatacaya vajajiro ashirequi aatoniji ashoshoguiteta. Imaica namanacoventajiaquempiquea incantacoguitempani irinetsanatacava-quempiro pishirequi aatonijite taa opaji pishoshoguitementajitsi, aisa intsipatsipaitaquempiquea querocagueti pinchoocajiaqueni.

<sup>17</sup>Imaicaquea naatimpa Paavoro inchiquiojitaquea nontioncavauquempiro oca acaniqui paperiqui cameetsanijite pintsajaquenijite naroguentiquea tigarancacaantajiaquempiro. Irooquea nametaca noquejero notioncacaan-querogueti paperiqui.<sup>18</sup> Imaicaquea noninque incavintsa jiaquempiquea Amajirote Jesoquirishito aviatimpajia maasano.

# IPARIACANARIGUETI PAAVORO ITIONCAQUENERI

## TIMOTEO

Antsatantaquemparoca

Ocatica iroguenti antsatantaquemparoca paperi iroquetica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri Timoteo paperiqui Yantajiguica 16.1–3; 17.13–16; 18.5; 19.22; 20.4. Tequeratagueti intionquieroji Paavoro ocatica paperi itioncacaanquero otsipapae 10 paperipae choocajianquitsica paperiqui icantajitica *Tsavetacoquerica Jeso quirishito*. Iroaqueragueti iteroncaquerogueti Paavoro ocatica paperi itioncacaantaqueperi Tito, coajica itioncacaantaquepero mavitetapojatsica paperi itioncacaantaqueperenerica Timoteo. Itioncacaantaquepero ocatica paperi ajagantsiniqui 63, ichoocaquegueti quepatsiqui icantajitica Maseronia.

Itioncacaantaqueperi Timoteo acanqui intampishishirentacaqueriniji (1.18–19; 4.1–16; 6.11–21), aisa cameetsaniji incantaqueri Timoteo incamantajiaqueri Epesoquitica aato itsatacaantajajiro caarica iroomajatatsica (1.3–11; 6.3–10), aisa intsatacaaquiaqueri quero incojiaquempani jivajiguirica quemisantajiatsica aisa amijiguirica (3.1–16; 5.1–6.2), aisa intsatacaaquiaqueri quero incojiaquempani intsaroventajiaquempari Aapani Irioshi (2.1–15).

---

**1** <sup>1</sup>Naroguenti Paavoro itigarancane Jeso quirishito, iriguentiquea tigarancanquena Aapani Irioshi Shetacojiacajica, aisa iriguentiquea tigarancanquenauea Jeso quirishito aguijajavajeca aventajiaquempaca, irooqua oguishinejajajajica. <sup>2</sup>Imaica nontioncaquempi, irijani Timoteo. Nirijanintamajataquempi, naroguentitari tsaroventacaaquempica. Noninquequea incavintsajamajataquempi Aapani Irioshi aisa Amajirote Quirishito Jesoshi, nominque impintsatacomajataquempi, inchoocatacaaqueMPI cameetsa aatonijite pishoshoguitetajatsi.

Inchiquiojitaja yamatavijajiguimpitsija amataajaiatsica

<sup>3–4</sup>Coramaniquea noanaquegueti Maseroniaqui nocantanaquempiquea picocani pinchooqua Epesoqui. Imaicaquea noncantsitajempiquea aisa pincoquempanija pinchooquaque oraniqui, choocatarite tsatacaantajiguiroca otsipapae teeca irooqua Quenque-tsatsarentsimajaca, manatarite isavica-ventajiaqueroquea iquenquejajiguica paesatinipaequitica, yapatsajavantacojiaqueroquea ipajiguetagueti choviquijiaquera ariquea itsavetacojiaqueri-

quea. Manatarite isavicaventajiaquero-  
quea intati. ¿Querocampaquea  
incojiaqueroniquea? Irootaquetarite  
oquenantacaca icatsimatavacaantantaji-  
acaca. Teetarite irooqua inintaguetica  
Aapani Irioshi. Iroguenti inintaguetica-  
quea iriatimpa manaqueate antsaroven-  
tamajataquempariquea Jesoquirishito,  
aisa ancomajamajajiaquempaquea.  
Imaicaquea, aviatimpa Timoteo, pincan-  
tajiaquerija irovashiantajianaqueroquea  
oratica itsatacaantaguishejiaquea.  
<sup>5</sup>Nonintaquetari pincomajamajajana-  
quempaquea aatoniji ochoocatiquea  
taaca oguiplashiventajiaquempineca.  
Aisa pintosaroventamajajiaquempariquea  
Aapani Irioshi cameetsanjite pagaveja-  
jiaquenijite pimpintsatavacaamajajiana-  
jempanijite. <sup>6</sup>Choocajiaquea iconoaga-  
ranca manaqueate icantashitatijiacaro-  
quea itsatacaantajiguica. Teequea  
ariequa inquempejajiquea aatimpajia  
atsatacaantajiguirogueti. Iroguentiquea  
iquenquetsatashijiacaquea intati.

<sup>7</sup>Inintajiavecquea intsatacaantajiaque-  
romequea igantacaantane Aapani Irioshi  
itioncacotanaquea Moishishini  
quempeca arimajaca itsamajaquero,  
cotanquitsiquea teequea intsativajigue-  
roji taaca ocantacoque manaquea  
iquenquetsatashicaro intati.

<sup>8</sup>Aatimpajia atsajiaquequea maasano  
igantacaantane Aapani Irioshi iroguenti  
caavijica oganejencavaeca, cotanquitsi  
mana inintajiti intsajite queri icantaca-  
quea aatoniji icomijitaro. <sup>9</sup>Atsamajajia-  
queroquea teequea iriojia incantacajai-  
gueji comajamajajianquitsica, iriguenti-  
quea icantacaaquea teeca inquemisan-  
tajigueji iriguentijia aisa pigatsatantajia-  
tsica. Aisa iriguentiquea icantacaaquea  
caarica tsaroacagari Aapani Irioshi,  
iriguentijia aisa covaeguishevaetaroca  
coguisherentsipae, iriguentijia aisa teeca  
intsaroventajiguempariji Aapani Irioshi,

iriguentijia aisa metojajigurica iriri aisa  
iriniro, iriguentijia aisa maasano  
metojantajiatsica. <sup>10</sup>Aisa iriguentiquea  
icantacaaquea oashijiguiroca manqui-  
garentsi, aisa manquigarentsijia  
oashijiguirica shirampari. Iriguentiquea  
icantacaaquea cantatsajigurica  
irapishirampariteni iquempetacaacari  
manquigarentsi, iriguentijia aisa  
aguirica caquinte irojocantajiaqueri,  
iriguentijia aisa tsojeajitsica, iriguen-  
tijia aisa cantashijitsica: "Yamenaque-  
naqueate Aapani Irioshi tee nontsoje-  
guempají", cotanquitsiquea itsojeajiac-  
quea. Aisa iriguentijia icantacaque  
maasano peacagarroca taaca opajitapae  
ocantimentantaquea Quenquetsatsaren-  
tsimajaca <sup>11</sup>tsavetaquera Aapani  
Irioshi quero icocani imeshantigueti.  
Iroguentiquea caaviji oshinetacaanta.  
Irooqua itigararanquimenquenaquea  
Aapani Irioshi nontsavetantaguiteroni.  
Iriatimpa iriguentica caavijica yogane-  
jencavaeca.

**Paavoro ishinevencariquea Aapani Irioshi  
yamenaqueriquea iriguenti caaviji  
ipintsatacovaeacari**

<sup>12</sup>Noshineventacariquea agavejaca-  
quenaca, iriraquea Quirishito Jesoshi,  
Amajirote, nocanqueriquea: "Ariotesa",  
yamenaquenatari nocoguitani noguija-  
majatanaqueri, inintacaantaqueenaca  
nantavaetaqueneri. <sup>13</sup>Coramaniquea  
caaviji nocantaguishetacovecar, aisa  
nocatsimamajajiavecariquea tsaroventa-  
jigarica natsipetacaajiacari, cotanquitsi-  
quea ipintsatacovaequenaquea Aapani  
Irioshi, yamenavaquenaquea noquejeta-  
querogueti imaica teequea nontsateji,  
teetarite nontsaroventavetempariji  
Quirishito. <sup>14</sup>Cotanquitsiquea coajica-  
quea icavintsjajamajataquenaquea  
Amajirote itsaroventacaquena, aisa  
yagavejacaquenaquea nompintsatanta-

majaquemparica nonquempejiaquempari maasano tsaroventajigarica Quirishito Jesoshi.

<sup>15</sup>Ocaticaquea ocatica noncanquemrica imaica iroguentiquea arimajaca, cameetsaquea paamajajiavaqueroga: iroguentiquea icoraquetashitaquit Quirishito Jesoshi irimeshiajiaqueri covaeguishetatsica. Arikea iquempeta- caaquenaquea naatimpa nanaavecaquea nocovaeguishemajavetaca. <sup>16</sup>Cotanquitsiquea yamenaquenagueti Aapani Irioshi noquejetaquerogueti imaica, ipintsatacovaequenaquea cameetsanijite iramenjitaquenanijite icocaniquea yatsipetacomajaquenaquea Jesoquirishito teequea incatsimatimatenaji. Iroomba iramenajijaquerogueti oshequini caquintejia incantajiaque: "Iroosacanica impintsatacobiaquenashiatyi naatimpajia aisa." Iroompaquea intsalventajianaquemparigueti Jesoquirishito incoguitempaniquea inchoocaguiteni. <sup>17</sup>Jaamejate ancoquempaniquea ashineeventajiaquempari Aapani Irioshi, ancantajiaqueri: "Caaviji poganejencamajata." Iriotaquetari Majirontamajatatsica irimajirontaguitempani, icocaniquea ichoocati, teequea inconijateji, aparoquea icocani iriatimpa Irioshima- jaque. Ari oncoquempa.

#### Itsatacamajaqueri Timoteo

<sup>18</sup>Irijani Timoteo, ocatica nocamanquemrica oquejetaqueroga quea itsatacotsitaquemrica tsaventantajatiatsica coramaniqui. Nocanquemriquea cameetsanijite poguijatacotaquerogueti pinquejetaquempari coareta yashimirintagueti itampishiventaquero icanquerica imajironcaca. <sup>19</sup>Pincoquempaniquea

paventamajatanaquempari Amajirote, pintsaroventamajatanaquempari, pincomajamaquempaquea aatoniji ochoocati chagashirentapojaquempi- neca. Iconoagarantajiacaquea itsaveca- roquea covaeguishevaca taaca opajitapae, cotanquitsiquea arimpaquea ipanacaro, iroomba yovashiantajiana- queroquea itsaloventajiavecarigueta ipomatsatantajiacaroca. <sup>20</sup>Arikea iquejejianaqueroquea Imeneo aisa Arjantero. Irootaquequea nocantanta- caca cameetsaquea irantsipetacaaguitemparini Satanashi<sup>a</sup> intsajiaquenijite aatoquea icantaguishetacotiritsi Aapani Irioshi.

#### Quero incoqueroni iramanajiterigueti Aapani Irioshi

**2** <sup>1</sup>Iroquetiquea noninquequea noncantajuempiquea pamana- ventajiaqueri maasano caquintejia pincantajiaqueri Aapani Irioshi impintsatacobiaquempari, aisa pincanta- coventajiaqueri: "Ariotesa." <sup>2</sup>Pamana- coventajiaqueriquea majirontajatiatsica aisa iguejemajirojate, jivajatiatsica, maasano, anchoocajiaquenijite cameetsa aatonijite ochoocati taaca ashishoventajiaquempaca, manaqueate asavicaventamajaqueroquea maasanopae inintaguetica Aapani Irioshi, ancomajamajajiaquempa.

<sup>3</sup>Cameetsavaequequea anquempejiaquerogueti imaica amanajiaqueriquea Aapani Irioshi Meshiantanquitsica, irootaquequea ishineventaca iriatimpa, <sup>4</sup>irooriji ininque irimeshiajiaqueriquea maasano, aisa ininque intsamajajiaqueroguea Quenquetsatsarentsimajaca.

<sup>5</sup>Choocaqueate aparo Irioshimajaca. Aisa chooca aparo cantacoventajiguirica

<sup>a</sup> **1.20** Pamenero 1 Co. 5.5, 13. Icanqueri aatonijite itsipajiajari tsaroventajigarica icapiocajagueti cameetsanijite irantsipetacaaguitempariniquea Satanashi.

caquinte aatonijite icatsimajiguiritsi Aapani Irioshi, iriotaquequea Jesoquirishito caquintetatsica.<sup>6</sup> Iriatimpa ipanacaroquea inchiquiojitaquea imetojaventajiaqueri maasano aatonijite yashintajiajari ampatsini, irquentiquea ashintajiajempari Aapani Irioshi.

Iroompaquea aapojacagueti savincagui-  
teri intantacaca Aapani Irioshi  
intsajitaqueronijite teeca intsajivetem-  
paroji, itigarancijaqueriquea itigarancane-  
crajia intsatacaajiaqueriquea maasano.<sup>7</sup>  
Jeroquea ipeacaanquenaca itigarancane  
camantantanquitsineca, icanquena-  
quea nontsatacaajiaqueri maasano teeca  
iriorijoigueji queroquea icotani Aapani  
Irioshi imeshiantigueti. Arimajaca  
nocanqueca, teequea nontsojeguempaji.

<sup>8</sup>Imaicaquea noninque querocagueti  
ichoocajaqueni shiramparijia iramanajia-  
queriquea Aapani Irioshi, irancojempe-  
ventanaqueri, cotanquitsiquea incoma-  
jatimenquempari, aatoquea icatsimashi-  
renti, pinquenquetsatavacaquem-  
gueti aatoquea pipigapigatavacaaca.

<sup>9</sup>Aisa noninquequea manquigarentsijia  
netsanaqueate onquitsajiaquempa,  
aatoquea onintajigui osemejiaque-  
queate. Aisa aatoquea iroguentiquea  
osavicaventajiaquequea ampitapitaa-  
queroquea omae. Aisa aatoquea  
caavijiquea oshineventajiaquemparo-  
quea nenquetsiqui, ooro, quitsaaren-  
tsipae aisa taaca opajitapae vegaramaja-  
tatsica.<sup>10</sup> Iroguentiquea osavicaventaji-  
aque oncavintsajantajiaquequea.

Irootarite ininque Aapani Irioshi  
onquempejiaquempaquea imaica  
manquigarentsijia cantajiatsica  
otsaroventajiacari.<sup>11</sup> Oraquea manqui-  
garentsijia onquemisantamajajiaque-  
quea itsatac妖iaqueroca ontaniqui  
tsovironaquiqui icapiocapinijitagueti,  
omativicaquempa.<sup>12</sup> Teequea noshinete-  
roji ontsatacaantajiaquequea iroatim-

pajia icapiocapinijitagueti. Aisa teequea  
oncameetsateji anaimananaqueriquea  
shirampari, manaquea omativica-  
quempa.<sup>13</sup> Iriquetitarite ipeacaaca-  
queate Aapani Irioshi Araini, iroompaquea  
iuejetacaitasitaroqueate Evani.<sup>14</sup> Teequea irio Araini iramatavije  
ampatsini. Iroguentiquea icoraquetashi-  
taque Evani yamatavijitsitaroquea  
ocovaeguishetantacaca.<sup>15</sup> Irooqua  
icantantacaroca Aapani Irioshi antsipe-  
vaequempa irijanintaquempagueti,  
cotanquitsi incavintsajacoqueroquea  
maasano manquigarentsijia arigueti  
oncoquempani avenquempari, aisa  
ompintstacotanquempa aisa onquen-  
quejamajajiaquero quero oncoquempani  
oncomajamajaquempagueti.

**Quero incojiaquempani  
quempoguijajiguirica tsaroventajiacarica  
Aapani Irioshi**

**3** <sup>1</sup>Arimajacaquea noncantajiaquem-  
pica: choocagueti nintanquitsineca  
impeaquequea quempoguijajiguirica  
tsaroventajiacarica Aapani Irioshi,  
cameetsavaeque.<sup>2</sup> Cotanquitsiquea irira  
quempoguijajiguirica tsaroventajiacarica  
incoquempanijate incomajamaja-  
quempajate aatonijite ochoocatitsi  
taampate incantimentajiquerica,  
manaquea iramenajitaqueriquea  
icomajamajaca, aisa irimanquigatimata-  
quempaquea aparo manquigarentsji.  
Aatojate ishinkuitatsi, intsamajaque  
inunquejamajaque, irinetsanamaja-  
quempa, cameetsa iraajivaqueriquea  
iroguisavisaviitavaqueriquea arejetimo-  
jiacarica, intsamajaque intsatacan-  
taque.<sup>3</sup> Aatoquea ishinkuiguitani,  
aatoquea yaashitantatsi, manaquea  
incavintsajantajiaquequea, iroguijshinejan-  
tanaje, aisa aatoquea ishineventaritsi  
imentaquipae incaraquisequivaequeri.<sup>4</sup>  
Intsamajaquequea irinetsanajiaqueri-

quea choocatimojiaquerica, aisa intsalacaajiaqueriquea irijanijiate inquemisantamajajiaqueriquea aatoquea ipigatsataritsi. <sup>5</sup>Quericaca teeca intsalateji irinetsanaqueri choocatimojiaquerica, ñarimpate iragavejaque irinetsanajiaqueri maasano tsaroventajiatsica inquempoguajiaquerigueti? Aatotarite yagavejitsi. <sup>6</sup>Iriraquea iriaqueraca tsaroventatsica tseequeate oncameetsateji impeaqueempaquea quempoguajiguirica tsaroventajiatsica, isemetitsi, iquempetaritsi ampatsini isemetaquegueti jero icatsimatantacarica Aapani Irioshi. <sup>7</sup>Iriraquea quempoguajiguirica tsaroventajiatsica iiintsijate incomajamajatempaja cameetsanijite iramenajiaquerinijite teeca intsalaventajiguempariji Aapani Irioshi manaquea icomajmajataca. Oraquea aatogueti icomajmajata, iroguenti incantaguishetacojiaqueri maasano, iroompaqeua iragavejaqueri ampatsini manaquea incovaeguishtacaamajataquempari.

#### **Quero incojiaquempani**

#### **amitacopinijiguirica tsaroventajiatsica**

<sup>8</sup>Ariqueate inquejejiaquempaquea amitacopinijiguirica irapitsaroventarijiate, incoquempanijate incomajamajajiaquempaquea, aisa irinetsanamajajiaqueroquea icanquea. Aatoquea ishinquiguitani, aisa aatoquea yamatavijiguirtsigonororjia iraitsjiaqueriquea imentaquisitepae intati. <sup>9</sup>Manaqueate incomajamajajiaquempajate intsaqueniji tee anejeroji yantaquea, aisa intsalacaantamajajiaquereroja iroaqueraro yonigaimojojacajica Aapani Irioshi teeca intsaqvitettemparo coramani. <sup>10</sup>Iroquetitaquea iramenamajajitaqueri arimajacaca icomajamajaca, iroompaqeua iramenajiaquerigueti itampaticamajataqueroquea ipeacaaguecaca maasanopae, irooquea iiintsijate impeaquempaqueate

amitacopinijiguirica irapitsaroventarijiate. <sup>11</sup>Ariqueate onquempejiaquempaquea manquigarentsija oncomajamajajiaquempaquea, aisa onetsanamajajiaquerero ocanqueca, aatoquea ocantashijia intati, aatojate oshinquitatsi, aisa ontampishitashijiaquerorequea maasanopae covaeguisherentsipae.

<sup>12</sup>Iriraquea amitacopinijiguirica irapitsaroventarijate irimanquigatimataquempaquea aparo manquigarentsi, aisa intsaque irinetsanamajajiaqueriquea irijanijate aisa maasano choocatimojiaquerica. <sup>13</sup>Intampaticamajataquerogueti yamitantaquegueti, irishineventamajajianaquempari irapitsaroventarijate, aisa iragavejaque intsavetacomajajiaqueriquea Quirishito Jesoshi, aatoquea itsaroimatisi, yaventamajatacaritarite.

#### **Iroaqueraca yonigaimojojacajica**

#### **Aapani Irioshi**

<sup>14</sup>Noninque taampina noanaque namenajajatemp, cotanquitsi notioncantauquempiroca ocatica <sup>15</sup>cameetsaniji aatogueti nagavejitsi noguitsi taampina, pintaqueniji quero ancojiaquempani ancomajamajajiaquempagueti maasano aatimpajia choocatimojiaquerica Aapani Irioshi itsovironaquitequi, maasanotari aatimpajia yashintajiacaca Aapani Irioshi anijatsica, apeanaja quejetaca ovoa titaqueceroca iroombajatatsica, aroguenti ompetanacaroca. <sup>16</sup>Arimajaca caaviji anaaquequea oganejencamajataca maasanopae teeca intsaqvitettemparo iroaqueraca yonigaimojojacajica Aapani Irioshi. Irootaquequea ocatica:

Yonigaampojaca Quirishito icaquin-tepojaquegueti.

Ishire Aapani Irioshi yagavejacaqueriquea intsaqiqueronijite iroguenti Irijanite, aisa irashivantijitete yamenajiaqueriquea.

Itsavetantimojitaqueri caquintegue-tatsica,  
itsaroventajianacariequa quepatsi-quitica.

Yatsomajanaja jenoqui, yaajitavajiri inquitequi.

Ovashiantajianajeroneca  
itsaroentajiavecarigueti

**4** <sup>1</sup>Imaica noninque noncamanquempi iriraquea Ishire Aapani Irioshi icانque oncoramanitapojaquegueti arejetapojaquem-pagueti savincaguiteri inchoocagarantajiana-quequea irovashiantajianajero itsaroentajia-vecarigueti. Iroguenti iroguijatacojianaque-quea amatavijajiaquerica, aisa iroguenti inquemisantajianaquequea itsatacaantica ampatsinipa. <sup>2</sup>Iroguenti inquemisantamajaji-aquequea cameetsatamampeajatsica caavijica yamataamajaca, yamemajatanaja-rotari igovaeguisheret aatotari ochagashiren-tajiri. <sup>3</sup>Irirajia quejejiaqueroca imaica icantimentantajiaquerorequa irimanquigaji-temparogueti manquigarentsijia, aisa manquigarentsijia omanquigajiaquemparo-gueti shirampari. Aisa icantimentantajiaque-roquea irishecajitaquemparogueti taaca opajitapae teeca incantimentantavettemparoji Aapani Irioshi, ipeacaaguetaclarotari irishecajitaquempaca cameetsaniji ashecajia-quemparoniji aatimpajia tsaroentajiajatsica tsamajajiguiroca iroomajatatsica, ancantajia-queri: "Arioteesa." <sup>4</sup>Maasanopae ipeacaague-caca Aapani Irioshi iroguenti cameetsa-vaeque. Aatoquea icantimentantajitirosi ashecajiaquemparogueti arigueti ancantajia-queri: "Arioteesa." <sup>5</sup>Irootarite cameetsataca-querone Iguenquetsatsare Aapani Irioshi aisa amanacoventaquerogueti.

Quero incoquempani Timoteo  
irisavicavenquerogueti inintaguetica  
Jesoquirishito

<sup>6</sup>Pintsatacaajiaquerigueti papitsaro-ventarijate maasanopae ocaticapae,

iramenaqueempiquea Jesoquirishito pinetsanamajaproquoera ininqueca iriatimpa. Arimpaquea pintsamajatana-querorequa Quenquetsatsarentsimajaca piquemisanqueca. <sup>7</sup>Aatoquea piquemi-santajigiro itsavetashijiaca caquinte, irooca otsavetashijiavetacaca quenque-varovaejianquitsica. Iroguenti pisavica-ventajiaquequea inintaguetica Aapani Irioshi. <sup>8</sup>Oraqueate anintajiguigueti antampishijiaquequea atsinoqui cameetsaveca, cotanquitsiquea caaviji anaque ocameetsavaeque anquenqueja-majaqueri Aapani Irioshi asavicaventajia-querorequa inintaguetica iriatimpa anchoocajiaquenijite cameetsa ocaniqui quepatsiqui aisa ontaniqui jenoqui.

<sup>9</sup>Iroomajacaquea ocatica nocanquem-pica imaica, cameetsavaeque inquemisantamajajiquero. <sup>10</sup>Aatimpajia aventaventaicari Aapani Irioshi anijatsica. Irootaquea asavicaventan-tajiacaroca maasanopae inintaguetica, aisa atsipetacovaejiaca taaca opajitapae. Iriatimpa inintavecaquea irimeshiajia-querimequea maasano caquintegueta-tsica, cotanquitsiquea iriguenti imeshia-jiaquequea aventaventaicarica irimeshi-ajiaqueriniji.

<sup>11</sup>Pincantajiaqueriquea maasano tsaroentajigarica irinetsanatavaquero ocatica notioncaquempica, pintsataca-majaqueriquea. <sup>12</sup>Pintsavetantimojia-querigueti Iguenquetsatsare Aapani Irioshi inchiquiojitala pipeacagatsi covaeguisherentsi, manaquea pincomajajiaquempa cameetsaniji iramenajia-quempinijite papitsaroventarijate ariqueate inquempejianaquempaquea iriatimpajia. Pimpintsatacojiaquempari pigonoro, pintsaroventamajataquempari-quea Aapani Irioshi, pincoquempaja pincomajajajiaquempajate. Pinquem-petaqueroquea imaica inquemisantama-jajiaquempinijite aatonijite icantajigui:

<sup>13</sup>“Arisa icota quenquetsatanquitsica iriaqueraca quenquevaritananquitsica, aatoqueate iquemisantiritsi.”

<sup>14</sup>Oraqueate aatotagueti nocoraquetsittati, pisavicaventamajaquerojate pampatsajavanqueroja Iguenquetsatsare Aapani Irioshi picapiocapinijiacaguetti pintsavetantaqueroquea, aisa pintsatacaantamajatanaqueroja. <sup>15</sup>Pinquenquejeja coramani ipamijiaquempiquea pishinquireguishiqui quempoguijajigurica tsaroventajiacarica iquenquetsashirentacaajiaquerigueti Aapani Irioshi icantantajiaquempica pisavicaventamajaquero pintsavetantaguiteni, aisa pintsatacaantajiaquequea, iroompaquea ariquea yagavejacaquempiquea Aapani Irioshi. Iroquea imaica pisavicaventamajaque, inchiquoitaja povashiantanajirotsijate.

<sup>16</sup>Noncantsijajempiquea aisa pisavicaventamajatanaquerojate iramenajiaquempinijite maasano picancani pitsatanaquequea. <sup>17</sup>Pincomajamajaquempajate, cameetsaquea pintsatacaantaguiteni, pintampaticamajatero. Pincoquempanija pisavicaventamajaqueroquea. Pinquempetanaquerojetti imaica incoquempani incavintsamajauempi Aapani Irioshi. Ariquea inquempejiaquempariquea quemisantajiaquempineca.

**Quero incoquempani Timoteo  
intsatacaaajiaquerigueti tsaroventajatiacsica**

**5** <sup>1</sup>Aatojate picantomajiritsijate quenquevarivaetatsica, cameetsaja pintsatacaqueriquea pinquempetacaquempariquea irioca piri. Iriraquea iriaqueraca quenquevarijiananquitsica pinquempetacaajiaquemparija irioca piguentijeguitepae. <sup>2</sup>Oraqueate quenquevarovaetatsica pinquempetaaa jiaquemparoqua irooca irijanintaji guimpica. Iroquea iroqueraca

quenquevarojiananquitsica pinquempetacaajiaquemparoja pitsijoitepae, pincomajaquenquejanequempaja.

<sup>3</sup>Pimpintsamajajiaquemparoja metojacorojia teeca inchoocateji ojitane. Iroatimpajia caaviji ocoguitejacovaijaca. <sup>4</sup>Cotanquitsiquea choocaguetti irijanijiate, orijanijiate, irioca oshaijiate, oshaojiate, intsajiaquequea impintsatacojiaquemparоquea irojocajiaquenerojate ocoguitejacojiacaca, iroorijite coramani iriri, iriniro, ityaine, ityane yojocajiaqueneriquea iriatimpajia. Inquempejiaquerogueti imaica irishinevaetanaquempaquea Aapani Irioshi, irootaquequea ininqueca iriatimpajia.

<sup>5</sup>Oraquea metojacromajaca coguitejacomajatansitsica choocatajatsica apaniro, teeca inchoocateji ojitane, manaquea oguijaguitiniquea incavintsaqueronijite Aapani Irioshi, ocoguitani osavicaventaguitirini amanaguitirini savincaguiteriqui aisa pitsecariqui.

<sup>6</sup>Cotanquitsiquea oraquea metojacoro savicaventiroca taaca opajita oninqueca iroatimpa, manaquea quempetacaqueate metojaque, teetarite ontsaterinica Aapani Irioshi. <sup>7</sup>Pincamanterijate tsaroventajatiacsica irinetsanatavaquero maasanopae ocatica aatonijite icantimajitiritsi. <sup>8</sup>Iriraquea teeca incavintsamajigueriji ijitanepae, teeca irojocajiaqueneriquea icoguitejacojiacaca ijitanemajaca, manaquea yovashiantaquero itsaroventavecaguetti, caaviji yogaamajataquero yantagushequeca teeca intsaroventimatempariji Aapani Irioshi.

<sup>9</sup>Oraqueate pitioncacojiguiroguedi metojacorojia, iroguentiquea pitioncacojiaquequea quenquevaromajatantanquitsica apanirontamajatirica manquigataroca tequerataguetti irimetojeji, teeca omanquigatajempaji itsipa. Oraquea tequerataca ajagantsitacoteji 60

ajagantsite aatoja pitioncacotirotsijate.  
<sup>10</sup>Aisa iroguenti pintoncacojiaquequea iquemacojitaqueca caaviji opintsamajantajia: irooca oquenquevarijajiri irijanijiate onetsanajajiri, aisa netsana aajiajavaqueri apitsaroventarijiate coraquejianquitsica, irooca aisa amijiaqueriquea itsipapae tsaroventajatsica, irooca aisa ocaavintsajacovaequeri atsipevaetanquitsica, irooca aisa taaca opajitapae cameetsaripae. <sup>11</sup>Cotanquitsiquea aatoja pitioncacojiguirotsijate metojacorojia tequerataca onquenquevaromajateji, irorijite iroqueraguetti oncantajiajavequempari Quirishito: “Non coguite tempani nosavicaventaguitempini”, cotanquitsiqueate iroompaquea manaquea onintajianaque omanquigajajempaquea ariqueate ompeacojianajemparoquea ocantajiajavecaca. <sup>12</sup>Inchiquiojitsitaqueate onquejetacaantajiaquempaquea iroatimpajia, aatotarite onetsanajiguirotsi ocantajiajavecaca. <sup>13</sup>Aisa omperamajajianaquempa iroguenti osavicaventajianaquequea onejantajianaquequea. Aatoquea aparo operajigatsi, aisa aajianaqueroquea tsojetsipae, oncantaguequequea veaa veaa, asereseretantaguetaque, onquenquetsaguishetanaque. <sup>14</sup>Irootaquequea nonintantacaca omanquigajajempaja metojacorojia tequeramajaca onquenquevaromajateji, irijanintajiaquempaquea osavicaventajiaqueronijite otsovironaquite onetsanajiaqueroquea aatonijite taaca opaji ompampiatantaquempaca incantaguishetacojiaqueroquea teeca intsarovenatajuempariji Quirishito. <sup>15</sup>Choocatarite oconoagarantajiac metojacorojia opeacojianajaroquea otsaroventajiavecariguetti, iriguenti opitsocashitanaja Satanashi oquemisantajianajiri.

<sup>16</sup>Iriraquea tsaroventajatiatsica choocaguetti ijitane metojacotanquitsica

omanquigare, iintsija impintsatacota-jemparoja iriatimpajia irojocajajenerojate ocoguitejacojiacaca. Aatoquea icantitsi incavintsajerojate itsipa irapitsaroventarite itsipatsipaitacaca icapiocapinijigaguetti, irioquea cavintsa-jerone, iragavejaqueniji itsipajia tsaroventajatiatsica incavintsajacovaequerometojacromajaca teeca onchoocateji ojitane.

<sup>17</sup>Iriraquea quempogujamajajiguirica tsaroventajatiatsica cameetsavaeque irishineventamajajitaquempari, aisa inquemisantamajajitaquerijate. Iriraquea savicaventajiaqueroca itsavetantajiaquero Iguenquetsatsare Aapani Irioshi itsatacaantajiaqueroquea, iriomajaca irishineventamajajiquempa.

<sup>18</sup>Ocanquetari Itioncacaantaqueca Aapani Irioshi: “Aatoquea pisavotsovati-ritsija caapironcaari pisagorejacaanta-quempariguetti tirigoqui, cameetsataquee irishecagarantavaquempari.” Aisa otsipa otioncacoca ocanque: “Iriraquea catsquietatsica irovegarajitaqueriquea.”

<sup>19</sup>Choocaguetti cantanquitsica ipeacaaca covaeguisherentsi quempogujajiguirica tsaroventajatiatsica, aatogueti ichoocajiguitsi mavite irooca 3 amenamajatanquitsica, aatoquea piquemisantiritsi. <sup>20</sup>Cotanquitsiquea choocaguetti quempogujajiguirica tsaroventajatiatsica, aatogueti yovashiantirotsi icovaeguishecaguetti, pincantomajaqueriqueate picapiocapinijiacaguetti cameetsanjite intsaraojianaquenijite igonorojia aatonijite iquempejigaritsi iriatimpajia.

<sup>21</sup>Ariqueate yamenajiacaji Aapani Irioshi, jeri aisa Amajirote Jesoquirishito, aisa irashivantijitete icoguijajaqueca, irootaquequea noncantantajiaquempica imaica pintampaticamajaterojate maasanopae ocatica nocantaguetaquempica. Pintsatacaantegueti aisa

pincantomajantegueti pinquejetacaajia-  
quempari maasano.

<sup>22</sup>Aatoja paguiritsija taampina itsipa  
pimpeacaajiaquempariquea quempogui-  
jaquerineca tsaroventajatiacsica aatogueti  
iroquetita pamenamajajiguiri aatonijite  
piquejetacaantatsi aatogueti icomajama-  
jata. Aviatimpa arimpaqueate pincomaj-  
jamajatanaquempaquea.

<sup>23</sup>Pojoquijijoquijitagueti ocatsitimpi-  
gueti pimotijaqui, aatoquea aparo  
pitsatsiti pimiraroquea oja, pimiragueta-  
vajemparoqueate capichajaji vinoja.

<sup>24</sup>Choocajia iconoagarantajiacaquea  
itsajiquero taampina ipeacaajiacarogueti  
covaeguisherentsipae ariuea icantomaj-  
ajitaqueriquea, cotanquitsiquea  
iconoagarantajiac itsipapae oncorama-  
nitapojaqueuti intsajiqueroquea  
incatsimajiaqueriquea Aapani Irioshi  
maasano peacaaguishetacaroca  
covaeguisherentsi. <sup>25</sup>Ariqueate  
i quempejiaica peacaajianquitsica  
cameetsaripae iconoagarantajiacaquea  
itsajitaquero taaca opaji ipeacaajiacaca.  
Itsipapae teequea intsajiteroji, cotanqu-  
tsiquea oncoramanitapojaqueuti  
intsajitaqueroqueate.

**6** <sup>1</sup>Iriraquea yashintajitacaca  
tsaroventatsica inquemisantamaja-  
taqueri ashincarica aatojate ipigapiga-  
tsataritsijate aatonijite icantaguishetaco-  
jirititsi Aapani Irioshi, aisa aatonijite  
icovaeguishetacojitirotsi atsatacaantajia-  
queca. <sup>2</sup>Oraqueate iriguentigueti  
ashinquemparne tsaroventatsica  
aatoquea icantsitsi: "Teequea nontsaroa-  
caguempariji, iriguentiquea napitsaro-  
ventarite." Caaviji iranaaque irantimo-  
majaqueriquea, yamenaquequeriquea  
iriguenti icatsiquetimoquequea irapitsa-  
roventarite ipintsamajatacaca. Imaica,  
irijani, noninque pintsatacaanqueroquea  
ocatica, pincantajiaqueriquea papitsaro-  
ventarijiate irinetsanamajajivaquero.

### Quero caaviji anaavaeque maasanopae

<sup>3</sup>Oraqueate atsatacaantajiaqueca  
aatimpajia iroguenti Quenquetsatsaren-  
tsimajaca, atsatacaantaquequea  
icanqueca Amajirote Jesoquirishito,  
atsaroventamajatacariquea Aapani  
Irioshi. Cotanquitsiquea choocajiatarite  
teeca irinintajigueji inquemisantamajaji-  
gueriji, iroguenti itsatacaantajiaquequea  
teeca irooqua Quenquetsatsarentsimaj-  
aca. <sup>4</sup>Iriguenti caavijica yaventaco-  
vaeca. Teequea intsimateji. Iroguenti  
ishinevenca impigapigajencatantajia-  
quempa, irootaquequea opampiatanta-  
pojacaroquea isemacotsitanta, icatsima-  
tacaanti, icantaguishetacotanti, aisa  
mana iquenquejashitaca: "Arica chooca  
yantaqueca." <sup>5</sup>Icatsimatavacaapinijiaca  
irirajia quenquejajiguiroca covaeguishe-  
rentsi, teetari inquenquejajeroji irooma-  
jatatsica, manaquea icomajamampeaca  
intati, ijijavetaca igomajamampeane  
iraantajiaquemparome taaca opajitapae.  
Pintsparejitempariquea quejecarica.

<sup>6</sup>Cotanquitsiquea ancomajatimenquem-  
parigueti Aapani Irioshi, aatogueti  
anintavaque anintavaque, manaquea  
ashinevajianaquempaquea, irooqua  
caaviji anaavaeque. <sup>7</sup>Oraqueate iroaque-  
ragueti avojaiguigueti teequea taaca  
opaji ashintempaji. Ariquea onquempe-  
taquempaquea ametojajiaquegueti  
aatoquea taaca opaji aajianajitsi.

<sup>8</sup>Cotanquitsiquea imainaquea imaina  
iroguentigueti choocavetanquitsineca  
ashecajia aisa aitsaarejia, ashinevae-  
quempaquea. <sup>9</sup>Iriraquea nintajatiatsica  
irajaarantajempa irantamampeagui-  
shequemparo taaca opajitapae incarapi-  
otantemparo irajaararo. Ontiavaeta-  
pojempari iguenquejane. Yamenavecaro  
cameetsavaeque, oquejetaca imorotashi-  
jirigueti tomirishiquitica, manaquea  
isanareacotanaque yomposapoja isavi.

Ari iquejejiaca caarica quenquejamajatssi, inintamampeacaro taaca opajitapae, iroompa aapojempagueti irimetojaquegueti impomatsavae-quempa iroaroaitanaque camorecariqui.

<sup>10</sup> Arimajaca irinintamajajiterigueti imentaquipae oshimerancantapojem-paro coguisherentsipae. Choocatarite iconoagarantajiaca tsaroentajavetasica, inintamajaqueri imentaquipae, itsegoantanacaca yovashiantantanacaroca itsaroventavecarigueti, yatsipevae-tantajiacaca.

**Paavoro icanqueriquea Timoteo aatoquea yovashiantimatirotsi itsaroventacaguetti**

<sup>11</sup> Cotanquitsiquea aviatimpa, yashintamajatacaca Aapani Irioshi, aatojate pishineventimatarotsi maasanopae ocatica ishineventajiacaca iriatimpajia, pishiapitsatapanajanteroja. Iroguenti-quea pishineventamajajuempaja pincomajamajaquempajate, pinetsana-majaqueroja inintaguetica Aapani Irioshi, paventamajatanaquemparijate Jesoquirishito, aisa pimplintsatantavae-quempaquea, pantsipetacovaequempaquea, aatoja pipigattantsijate.

<sup>12</sup> Pinquejetemparija ashimirintatsica, pintampishiventenerija Amajirote. Aatoquea povashiantiritsijate pitsaro-ventacarigueti arejvaequemparoquea poanaquegueti piguinentimotajempari-gueti Aapani Irioshi pincoguitempani pinchoocaguiteni, irootaquequea icajemanquempica, irootaquequea coramaní picamantantacarica maasano capiocajianquitsica: “Notsarovencari Jesoquirishito.” <sup>13</sup> Ariqueate yamenajia-caji Aapani Irioshi anijacaaguetirica maasanopae, aisa yamenajiacaji Jesoquirishito tsavetacotantanquitsica icoacoquerigueti Pontsio Pirato, itampa-ticamajaquero, teequea incantashitem-paji. <sup>14</sup> Irootaquequea noncantantajia-

quempica imaica pintampaticamajatero-jate nocanquempica, aatoja picantashi-tatiimatarotsija, aatonijite ochoocatitsi taaca opaji incantimenquempica. Ariquea pinquejetanaqueroja imaica pincoguitempani arejetapojempa incoraquetantajatempaca Amajirote Jesoquirishito. <sup>15</sup> Iroompaquea arejeta-pojajempagueti savincaguiteri incoraquetantajempaca intigarancajeri Aapani Irioshi incoraquetaje ocaniqui quepatsiqui, choocatarite aparo Aapani Irioshi Agavejamajatatsica, iriguenti Irioshimajaca anaajiaquerica maasano majirontajatisca anaaguevetatsica, anaajiaqueriquea maasano anaajencave-tanquitsica. <sup>16</sup> Aparomajaca ichoocaque iriatimpa icoguitani ichoocati paesato-niqui tequeratagueti onchoocatimateji, aisa icocani inchoocaguiteni aatoquea imetojimatitsi. Itsirencashimpoquirere-javaequequea icanca, cantavaeque tsiren, teequea inchoocateji agavejan-quitsineca inquempejitaquempari. Teequea inchoocateji caquinte amenimaterineca, aisa aatoquea yagaveji irameneri. Incoquempanijate irishineventamajajitaquemparija incantajiqueriquea caaviji yanaaque yagavejamajati. Ari oncoquempa.

<sup>17</sup> Pincantajiaqueriquea ajaarantavae-tatsica ashintamajaguetaroca quepatsi-quica, aatoja yaventacotatsija, aisa aatoja ishineventajigarojate yashincaca, onteroncaguetanajempatari oncorama-nitapojaquetu. Iriguenti irishineventamajajuempaja Aapani Irioshi pintsata-cocarica, jocajiacajiroca maasanopae cameetsanijite ashinejiaquempaniji.

<sup>18</sup> Aisa pincantajiaqueriquea incavintsajacotantajiaque, iramitacotantajiaque, irojocagarantajiaqueneri igonoro.

<sup>19</sup> Inquempejiaquerogueti imaica oncoramanitapojaquetu iroaroaitanaquegueti jenoqui, incavintsajamajaqueriquea

Aapani Irioshi iramenacaajiaqueriquea maasanopae yoguijacaquerica, ariquea incoguitempani inchoocajiajapojaje, iroguenti anijagantsimajaca.

**Iteroncanajirogueti Paavoro  
itioncaquenerica Timoteo**

<sup>20</sup>Imaica, Timoteo, pinquenquejamajatavaqueroja Quenquetsatsarentsimajaca itsatacaajitaquempica, pintampaticamajateroja, shoshoh picantashitatigarotsijate. Aatojate piquemisantiritsija cantashijiatsica

intati. Iriatimpajia icantajiavecia itsamajati, cotanquitsiquea teequea intsimateji. Oraqueate itsatacaajiaqueca teetari onquempetemparoji Quenquetsatsarentsimajaca aquemisantajiaqueca aatimpajia.<sup>21</sup> Choocajitarite iconoagarantajiac a quemisan-tajiaqueriquea quempejiaqueroca imaica, iroompaquea yovashiantajianajiro Quenquetsatsarentsimajaca iquemisantajiavecaca.

Noninque incavintsajamajajiaquempi Amajirote.

# PAAVORO ITIONCAJINIRI

## TIMOTEO

### Antsatantaquemparoca

Ocatica iroguenti antsatantaquemparoca paperi mavitetapojatsica itioncacaantaqueca Paavoro itioncaquenerigueti Timoteo. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31), aisa itioncacotaqueri Timoteo paperiqui Yantajiguica 16.1–3; 17.13–16; 18.5; 19.22; 20.4. Ocatica paperi iroguenti teroncapojatsica itioncacaantaqueca Paavoro, choocaquea otsipa 12 paperipae itioncacaantaqueca choocajianquitsica paperiqui icantajitica *Tsavetacoquerica Jesoquirishito*. Itioncacaantaquero ocatica paperi ajagantsiniqui 64, ichoocaquegueti Iromaqui, pajinigueti irimetojaque. Itioncacaanquerogueti iriguenti itsipataja Irocashi, tee irovashianteriji (4.11).

Itioncacaantaquero ocatica paperi itsaquetari iroshipoji imetojajitaqueri, inintaque intampishishirentacaqueri Timoteo aisa icantajeru quero incoquempani inchoocaquegueti cameetsa (1.3–14; 2.1–13; 3.14–4.2, 5). Aisa itsatacaqueri aatoja iquemisantiritsi tsatacaantajiguiroca teeca iroomajateji (1.15–18; 2.14–3.9; 4.3–4). Icamantacotaca quero incojitaquerini (3.10–13; 4.6–8, 14–18). Aisa icanqueri Timoteo iramajeri Maricoshi aisa yashintaguetacaca Paavoro yoanaqueca ontaniqui (4.9–13, 21).

---

**1** <sup>1</sup>Naroguenti Paavoro itigarancane Jesoquirishito, iriguentiquea nintacaaquenaro Aapani Irioshi nontsavetantaqueroquea icantacaacajica icanquegueti iranijacaajaji Quirishito Jesoshi. <sup>2</sup>Imaica nontioncaquempi, irijani Timoteo nopintsamajatacaca. Namanacoventaquempi incavintsajamajajiaquempinijite Aapani Irioshi aisa Amajirote Jesoquirishito, impintsatacotaquempinijite, inchoocatacaaaji aquempinijite cameetsa aatonijite taaca opaji pishoshoguiteventajigatsi.

### Aatojate itsaroguitsi intsavetantaquerigueti Jesoquirishito

<sup>3</sup>Nocoguitani tsiteniriqui aisa savinca-guiteriqui namanaquerigueti Aapani Irioshi noquenquejapinitaquempi, nocanqueri: “Ariotesa.” Iriguentiquea notsaroventacaca, noquempetacari choviquijianaquenaca, teequea onchoocateji nantaqueca chagashirentaquenanea. <sup>4</sup>Noquenquejajiro pijaquija, nonintantacaca namenajatempiquea imaica cameetsanjite noshinevaequempinijite. <sup>5</sup>Aisa noquenquejacoquempi pitsaroventamajatacariquea Aapani

Irioshi piquempemajiacaroquea  
pishaote Iroira aisa piniro Eonise.  
Notsamajaquequea arimajaca piquempe-  
jiacaroquea iroatimpajia pitsaroventa-  
majaciacariquea.

<sup>6</sup>Irootaquequea nonintantacaca  
nonquenquejacaajempiroja coramani  
nopamiquempigueti pishinquiregui-  
shiqui yagavejacaanquempica Aapani  
Irioshi pintsavetantavaeque. Imaica  
noncanquempiquea pintampishiventero-  
jate. <sup>7</sup>Teitarite irooqua intigaranqui-  
menteriji Aapani Irioshi Ishire antsaroa-  
jiaquequea, iroguenti itigaranquimen-  
queriquea iragavejacaamajacaji, aisa  
cameetsanijite ampintsamajajiaquempa-  
rinijite maasano caquinteguetatsica,  
aisa antsajiaqueniji anquenquejam-  
jaque anchoocatimenqueniji cameetsa.  
<sup>8</sup>Imaica noncanquempiquea aatoquea  
pipashiventatsi pintsavetantavaequeri-  
gueti Amajirote. Aisa naatimpa  
aatoquea pipashiventacaanatsi pamena-  
quenagueti isantanatacotimentajique-  
naro notsavetantavaequerigueti.

Manaquea pinquejetaquenaja pantsipe-  
ventaquemparo Quenquetsatsarentsimajaca  
Oganejencatatsica, iriotaque  
tampishitacaajiaquempineca Aapani  
Irioshi. <sup>9</sup>Iriatimpa imeshiajiacaji, aisa  
icajemantacajica asavicaventajiaquerou-  
niji inintaguetica, ancomajamajajia-  
quempa. Teequea irooqua incajemaco-  
tantaji agameetsareni, inchiquiojitaquea  
iriatimpa intintacaajiacaji. Icocani  
icavintsaajajiacaji paesatonqui tequera-  
tagueti onchoocatimateji, icantacogui-  
tani coramani inintaguitini Aapani  
Irioshi incavintsaajajiacaji Quirishito  
Jesoshi, <sup>10</sup>cotanquitsiquea imaica  
yonigaajiaciro iconijataquegueti  
Meshiantatsica Quirishito Jesoshi  
icoraquequitigueti, yanaavaetaquitiro-  
quea metojanentsi, ariquea itigarancaca-  
jiro Quenquetsatsarentsi Oganejencata-

tsica, irooqua atsatantacaroca  
anijagantsimajaca, oguiconijatacapiro-  
quea quero ancojajempani ancoguitem-  
paniniji anijaguiteni. <sup>11</sup>Irooqua  
intintacaquenaca Aapani Irioshi  
nontsavetantavaeque, ipeacaqua-  
quea itigarancane aisa tsatacantanta-  
tsica nontsatacaaqueriniji teeca  
iriiorijoigueji. <sup>12</sup>Irootaquequea natsipe-  
vaetantacaca, cotanquitsiquea teequea  
nompashiventacaguemparoji isantanata-  
cotimenquenarogueti notsavetantavae-  
querogueti, notaquetarite queri  
navencaca. Aisa notsamajaquequea  
aatoquea yamatavijanatsi, yagavejama-  
jati inquempogujamajataquenaro  
nojoquitajanarica, arimpaquea incavin-  
tsajacomajatanaquena arejevaetapo-  
jempa incoraquetajategueti.

<sup>13</sup>Ariqueate imaica pintsatacantavae-  
querogueti pintampaticamajatanaquero-  
quea Quenquetsatsarentsimajaca  
notsatacaaquempica, aatoquea picanta-  
shitatigarotsija. Pinquemisantamajata-  
naquerija Quirishito Jesoshi, aisa  
pimpintsamajataquemparijate papitsaro-  
ventarijate. <sup>14</sup>Pintsavetantavaequeri-  
quea Iguenquetsatsare Aapani Irioshi  
yojocajitaquempica, pintampaticamaja-  
teroja pincanquero, irguentiquea  
agavejacaajquempine Ishire Aapani  
Irioshi choocashirentajiacajica.

<sup>15</sup>Pitsaquequea maasano guintenijia-  
tsica Ashiaqui yovashiantajianajana,  
iquejejiaca Pijero aisa Eremojene.

<sup>16</sup>Namanacoventajiaqueriquea  
ijitanepae Oneshiporo impintsatacojia-  
quempari Amajirote. Iriatimpa  
icavintsaajapiniquena ishinetacaajatana,  
teequea impashiventacaguenuji  
isantanatacojitaquenagueti. <sup>17</sup>Quempe-  
taca yarejetapojacagueti ocaniqui  
Iromaqui icoapojana yamenaguevetapo-  
jana, itsitacavaepojajiro, ariquea  
yamenapoajana. <sup>18</sup>Namanacovenqueri

incavintsajamajaqueriquea Amajirote incoraquetajategueti oncoramanitapoja- jegueti. Aviatimpa pitsaquetarite yamitacovaequenaquea nochoocaquiti- gueti Epesoquiniqui.

**Pinquempetaquemparija igoarestate  
Jesoquirishito**

**2** <sup>1</sup>Imaica, irijani, arimpaequa pintampishitashimajatanaquero- quea maasanopae intaguetica Aapani Irioshi, iriguenti tampishitacaquem- pine Quirishito Jesoshi. <sup>2</sup>Oraqueate maasanopae piquemaquenaca notsata- caantavaequegueti icapiocapinijac- gueti tsarorentajiacarica, imaica aviguentiquea tsatacaajajerineca itsipapae papitsaroventarijate comaja- majajianquitsica agavejajianquitsineca intsatacaajiaqueriquea itsipapae. <sup>3</sup>Aisa pinquempetaquenaja naatimpa pantsipetacovaequemparoqua maasanopae, pisavicaventamajaquer- jate maasanopae intaguetica Amajirote Jesoquirishito, pinquempeta- quempariquea coreta isavicaventiro- gueti maasanopae intaguetica imajirote. <sup>4</sup>Iriraquea coreta teequea inquenquejeroji inintaqueca iriatimpa, iroguentiquea isavicaventavaequequea taaca opaji icanquerica imajirote cameetsanijite irishinetacaquemparinijite. <sup>5</sup>Ariquea iquempetaca neshintsca- tavacagatsica iramenajitaqueriniji queri tampishimajatanquitsica, aatogueti inetsanatavaquero incantajiquerica, taampina iroguisotoitsijiquempari, aatoquea yojocajitiniri amatsaerontsi inintacajaivetacanarica iranaantaqueme- gueti. <sup>6</sup>Ariquea iquempetaca aisa vintyaquitaroca oitsoqui, iriquetiquea aavajatsine. <sup>7</sup>Pinquenquejacoterojate ocatica nocanquempica. Inchiquiojiquea iragavejacaquempi Amajirote pinque- mamajataqueronijite maasanopae.

**Inquenquejamajaquerija Jesoquirishito**

<sup>8</sup>Pincoquempanijate pinquenquejama- jaquerija Jesoquirishito ichoviquitana- queca Taavini, iriotaquequea pochata- najatsica imetojavetacagueti. Irootaque- quea Quenquetsatsarentsi Oganejencata- tsica notsavetantaqueca. <sup>9</sup>Arikeate natsipeventavaecaroquea, icavorejatsa- taccojiquena, iquempetacaavaequena- quea metojantatsica. Cotanquitsiquea oraqueate Iguenquetsatsare Aapani Irioshi aatoquea icavorejatsatacojitziro, arimpaequa ontsitacaguitejavaetana- quempa. <sup>10</sup>Natsipetacovaeccaroquea taaca opajitapae, iriguentiquea natsipe- ventavaetaca maasano icoguajiaqueca Aapani Irioshi, noninquequea iraventa- ventajitanaquempari Quirishito Jesoshi irimeshiajiaquerinijite, iroaroaitanaque- quea ichoocatigueti Aapani Irioshi incoguitempani inchoocaguiteni.

<sup>11</sup>Iroomajaca ocatica icantajitica:  
Imetojanaquegueti Quirishito  
atsipajianacari, anchoocatanta-  
jiapojajempaca iriatimpaqui.

<sup>12</sup>Arigueti antsipevenquempari,  
ankejemajirontaquempari.  
Managueti ancantajiaque: “Teatarite  
nontsateriji”, ariqueate inquem-  
petaquempa iriatimpa  
incanque: “Teequea nontsate-  
riji.”

<sup>13</sup>Arigueti avashiantajianajeri,  
iriatimpa arimpaequeate  
irinetsanamajatanaqueroquea  
maasanopae icantaguequeca,  
teatarite iragavejempaji irama-  
taguempaji.

**Antamajaqueneri Aapani Irioshi  
irishineventantacajica**

<sup>14</sup>Pinquenquejacaajiaquerijate  
papitsaroventarijate maasanopae  
ocatica nocantaguequempica. Iramenaji-

aquempiquea Amajirote pintsatacaaque-  
rigueti. Pincantajaqueriquea inquema-  
vacaajaqueempaja, aatoja queroca  
icotavacaajiatsi. Oraqueate incotavaca-  
jaiaquempagueti querocampate incojia-  
queroni, yovashiantacaguiritsi  
quemaquemaiquerica.<sup>15</sup> Pantamajaque-  
nerija Aapani Irioshi irishineventanta-  
quempica aatonijite ochoocatitsi  
querocampate oguipashiventajaquempi-  
neca oncoramanitapojaquereti. Pintsata-  
caantamajatanaquerojate Quenquetsa-  
tsarentsimajaca, aatojate picantashitatii-  
matarojate.<sup>16</sup> Aatojate picantashigusheta,  
aisa aatoja picantashiguetatsi intati.  
Iriraqueate quejequeroca arimpaquea  
impeacaagushevaetanaquemparo  
covaeguisherentsi.<sup>17</sup> Oraqueate  
itsatacantajaqueca quempejiguiroca  
imaica arimpaquea ontsitacaguitejavae-  
tanaquemparoqua, manaquea onquem-  
petaquemparo ompatsajanaquegueti  
ateshi. Jero yovashiantantajianajaroca  
itsaroventajavcarigueti Amajirote.  
Aritarite iquempejianaqueroquea  
Imeneo aisa Pireto.<sup>18</sup> Iriatimpajia  
iroguenti icantashitatijaijanacaroquea  
Quenquetsatsarentsimajaca, icantaji-  
aque: "Jac avisanaque itancorettancore-  
tantajitaca." Iquejejianaqueroqueti  
imaica manaqueate yovashiantacaaga-  
rantajiaqueri tsaroventajavetatsica.<sup>19</sup>  
Cotanquitsiquea quempetaca tsoviro-  
naqui ivinchajacojitirogueti oquishoma-  
jatigueti, oraticaquea tsovironaqui  
ipeacaacaca Aapani Irioshi  
quishovaeque,<sup>a</sup> aritarite itioncacojique-  
rogueti ocanque: "Iriraquea Amajirote  
itsamajati querica yashintamajatacac."  
Aisa ocanque: "Maasano aventacaroca  
ivajiro Amajirote, iintsijate irovashian-

taguetanaqueroja maasanopae covaegui-  
shertensti."

<sup>20</sup> Oraqueate tsovironaquiqui caratsan-  
tsanaquivaetanquitsica ochoocagueta-  
quequea ipijatantajiguetaroca taaca  
opajitapae. Oconoagarantacaquea  
ipeacaantajiguetaroca cavorejatatsica  
icantajitica ooro, otsipa icantajitica  
perata. Ochoocagarantsitaquea  
ipeacaantajiguetaroca inchatomenta,  
otsipapae ivinchajantajiguetaroca  
quepatsi. Oconoagarantaca ishineven-  
majatacaro iraapinitero, otsipapae  
manaquea itariantajicaro cajarashitequi.<sup>21</sup>

Quericagueti shetacaantaqueroneca  
igovaeguishere pishoncamajatanajero-  
neca covaeguisherentsi, inquempetana-  
jemparoqua ipijatantajitaca ishineven-  
caca ashincaroca. Irishineventsitempari-  
quea Ashincarica iragavejaque  
intigaranquitsitempari irinetsanague-  
queneri taaca opajitapae cameetsaripae  
intintagequeueca.

<sup>22</sup> Pintomicaguenquejanetapitsapana-  
janteroja inintaguishetaqueca iriaque-  
raca quenquevarrijananquitsica.  
Arimpaquea pincomajamatanaquem-  
paja, pintsaroventamajatanaquemparija  
Jesoquirishito, pimpintsatantempaja,  
aisa pinconoajiaquemparija comajashi-  
rentajitsica amanajiguirica Amajirote,  
paavacaajaquempa cameetsa.<sup>23</sup> Aatoja  
piquemisantajiguiritsija quenquejamam-  
pejiatsica cantamampeajigaroca intati  
taaca opajitapae, pitsaquequea maasano  
quempejiacarica iriatimpajia manaquea  
icatsimatavacaajiacaca.<sup>24</sup> Maasanopae  
antajiguinirica Amajirote aatoquea  
icatsimatantajitsi, manaquea impintsaji-  
anaquempari maasano, intsajiaque  
intsatacantajiaque, aisa irantsipetaco-

**a 2.19** Maasano tsaroventajiacarica Jesoquirishito aquempejiacarico tsovironaqui ipeacaacaca Aapani Irioshi. Jesoshi iriguenti quempecaroca quishotacaqueroca. (Pamenero 1 Co. 3.9-11.) Maasano aventaventaquemparineca aato ipega.

vaequempaquea. <sup>25</sup>Netsanajate incanto-majajiaquerija teeca irinintajigueji inquemisantamajajiaqueroquea Quenquetsatsarentsimajaca, aatoja icatsimajiguiritsi. Aricajate inchagashi-rentajaqueriquea Aapani Irioshi, ariquea incantashitajiana jempaquea irovashiantajianajero ipeacaaguishejia-vecaca, inquemisantajianaje, <sup>26</sup>iroompa-quea intsaianaje inquenquejajiana que-roquea cameetsaripae aatonijite yagave-jajiguiritsi ampatsini ashintajia vecarica aisa omperajia vecarica.

**Quero incojianaquempani  
caquinteguetatsica  
oncoramanitapoja jegueti**

**3** <sup>1</sup>Noninque pintsaque oca: oncora-manitapoja jegueti pajinigueti aapojempa savincaguiteri vegaratapo-jaatsineca, omanavaequempa.

<sup>2</sup>Irraquea caquinteguetatsica irisati quenquejacotajatsine, aisa iriguenti inquenquejacojiana quequea imenta-quipae, iraventacovaequempa, irisemejiaque, incantagushejiaqueriquea Aapani Irioshi, aatoquea iquemisantajiguiritsi iriri aisa iriniro, aatoquea iquenquejajia-jiritsi pintsatacojiacarica, aisa aatoquea iquemisantajiajiritsi Aapani Irioshi.

<sup>3</sup>Aatoquea ipintsatacotantajiga, aatoquea ipetsimarejajiajatsi, incanta-guishetacotantajiaque intati, aatoquea yagavejitsi itampishitashijiguirotsi covaeguisherentsipae, irantsipetacaanta-vaejiaquempa, aisa aatoquea ishineven-tajigarotsi maasanopae cameetsaripae.

<sup>4</sup>Iriatimpajia irampigarancashitanta-quempa, aisa irantashitantagueta-quempa, caaviji iraventacoquempaquea. Aatoquea inintajiguitsi irishineventajia-quempariquea Aapani Irioshi, manaqueate irinintajiaquequea taaca opaji ishineventacaca iriatimpajia. <sup>5</sup>Aisa intsaroventamampeajiaquempari Aapani

Irioshi, cotanquitsiquea aato itsaroaca-garitsi, iroguenti iramenajiaqueriquea tee irioshimajateji. Aatojate piconoaji-garitsija quempejiaqueroca imaica.

<sup>6</sup>Iconoagarantajiacaqueate yoayoaita-naquequea otsovironaquitequi manqui-garentsijia teeca ontampishitashijigue-roji ogovaeguisherere yamatavijijiaquero-quea, ocantacoguitaniquea oshineeventa-majatavacari quericaca tsavetantajia-queroca otsipapae quenquetsatsarentsi, oquemisantamajatavaqueroquea.

<sup>7</sup>Iroatimpajia ocantajia veca onintaji-aque ontsamajajiaquero Quenquetsatsa-rentsimajaca, cotanquitsiquea teequea agavejajigueji ontsatimajigueroji, ocancani oquemisantamajatanaqueri-quea amatavitantajatsica. <sup>8</sup>Iriatimpajia iticaacovetavacaro Quenquetsatsarentsi-majaca, manaquea iquempejiacari Janeshini aisa Jaampereshini ticaaveta-vacarica Moishishini coramani. Iquenquejaguishevaequegueti taaca opajitapae covaeguisherentsipae, yovashiantajiajiro itsaroventajia vecarici-gueti. <sup>9</sup>Cotanquitsiquea aatoquea icojigani iquemisantajitajiritsi, maasanotari iramenajiana queri teequea intsimateji, manaquea inquempejia-quempari irirajia ticaavetavacarica Moishishini coramani teequea inquemi-santajitajeriji.

**Paavoro icantanajiri Timoteo  
incoquempanijate  
intsavetavaequeriquea Jeso quirishito**

<sup>10</sup>Imaica, irijani, notsaque pitsamaja-tavaqueroquea notsatacaaguequempica, ariqueate piquejetanacaquea aviatimpa pi quem pemajatanaquenaquea naatimpa. Pitsaquequea teequea nompeacaguem-paji covaeguisherentsi, manaqueate nosavicaventamajajeroquea notsavetavaequereroquea Quenquetsatsaren-tsimsajaca, aisa notsaroventamajacari-

queate Jesoquirishito. Teequea noncatsi-majigueriji teeca irinintajigueji inquemisantajigueroji Iguenquetsatsare Aapani Irioshi, manaqueate natsipetaco-vaea, aisa nocavintsa jajaqueriquea maasano caquinteja, nocoguitani.

<sup>11</sup>Aisa pitsaque yatsipetacaavaequena-queate ontaniqui Antioquiaqui, Iconioqui aisa Irishitiraqui. Caavijuea icat simacatsimavaequena, cotanquitsi-quea ipintsatacota janaqueate Amajirote yoguipaquijacotajana. <sup>12</sup>Ariqueate inquempejiaquempaquea maasano mintajianquitsica intsar oventamajajia-quempari Quirishito Jesoshi, irantsipe-ventavaetanaqueriquea. <sup>13</sup>Cotanquitsi-quea irira quea peaca agushevaecaroca taaca opajitapae coguishe rentsipae, aisa irirajia amataajjatsica, caaviji irogajaja-naquempaquea iramatavimatavitan-ta que, aisa iramatavijitajitempari iriatimpa. <sup>14</sup>Cotanquitsiquea aviatimpa pincoquempanija pinquemisantamajata-querojate itsatacaajitaquempica, pitsaquetari iroguenti iroomajaca, aisa pitsaque quea queri tsatacaaque miroca. <sup>15</sup>Chaajaniquitirajampigueti pitsatima-jacaro quea Iguenquetsatsare Aapani Irioshi. Irootaquequea tsatacaanaquem-pineca pintsatamajatanaquempaca, aisa paventamajatanaquemparica Quirishito Jesoshi poimentanaqueniji ichoocatigueti pincoguite mpani pinchoocaguuteni. <sup>16</sup>Iriguentiquea tioncacaantaquero quea Aapani Irioshi maasanopae Iguenquetsatsare.

Irootaquequea tsatacaajiacajica, ocanto-majaji acaji, otampaticatacaanacajaji, otsatacaanacajiro quero ancojiaquem-pani ancomajamajajianaquempanijite. <sup>17</sup>Irootaquequea oquempetantacaca imaica cameetsanijite intsama jaqueniji yashintajiacaca Aapani Irioshi, iragavejajiaqueniji irinetsanaquero maasano cameetsaguetatsica.

### Paavoro itampishitacaqueriquea Timoteo

**4** <sup>1</sup>Oncoramanitapoja jegueti incoraquetajateguedeti Jesoquirishito impeapojo paqueate imajirojiate maasano choocatajatsica anijajatsica aisa metojajianquitsica, incantajipoja-jeri quericaca peacaatsica cameetsari, aisa quericaca peacaatsica coguisheren-tsipae. Iriatimpa yamenajiacaji imaica. Ariqueate iquempetaca Aapani Irioshi yamenajiacaji iriatimpa. <sup>2</sup>Irootaquequea noncantantaquempica pintsavetantavae-queriquea Jesoquirishito pincantajia-queriquea maasano quero icotani Aapani Irioshi imeshiantigueti. Pintsavetantapiniteroja arigueti irininta-jiaque, aisa aatogueti inintajiguitsi. Pincantomajanta quequea, pintampishi-tacaanta quequea. Netsanaja pintsata-caanta quequea, inchiquiojita pisemashi-rentaritsi. <sup>3</sup>Aapojaquempatarite savinca-guiteri aatonicate inintajiguitsi inquemi-santajajeri tsavetantajiguiroca. Quenquetsatsarentsimajaca, iriguenti-quea irinintajia quequea itsipa tsatacaajia-querineca taaca opajitapae inintajia-queca iriatimpajia irishineventajiana-quempaca. <sup>4</sup>Aatonica iquemisantajajajrotsi iroomajatatsica, manaquea impitsocashijianajemparo iquenqueja-shijiacaca caquinteja. <sup>5</sup>Cotanquitsiquea aviatimpa arimpa quea pincomajamaja-tanaquempaquea, pinquenquejamajata-naquerojate cameetsaripae. Pantsipe-vaetanaquemparo quea maasanopae, pisavicaventavaetanaquero pintsavetan-tavaetanaquero quea Quenquetsatsa-rentsi Oganejencatatsica. Pintampatica-majatanaquero quea maasanopae inintacaquempica Amajirote.

<sup>6</sup>Imaica noquejetacaro imirajitaca ishaguitijitancarica viratsi itaajique-nerigueti Aapani Irioshi, natsipeventaca-

ritari. Irooshipoji noantanaquempaca iriatimpaqui.<sup>7</sup> Noquejetacariequa ashimirintamajatatsica, aisa noquejetsitariquea shiamajatatsica narejetsipojaro ocaratapojaquegueti, nonetsanama-jaquerotari maasanopae icanquenaca Amajirote, teequea novashiantimateroji notsarovencariegueti.<sup>8</sup> Iriatimpa iriguenti Majirontamajatatsica Joesemajaca tampaticamajatiroca maasanopae, incanquequea quero incohincoitaquerini maasano caquinte. Yamenaquea notsaroventamajatacari, irootaqueuea imaica yoguijacaquenaroquea amatsaerontsi<sup>b</sup> iramatzaetantaquenaroquea oncoramanitapojaquegueti, cotanquitsiquea aatoquea aparo naatimpa yamatsaetitsi, inquejetsijiguempariquea aisa maasano oguijamajatavajirica incoraquetajategueti.

### Icaratacaaguetanajiniri

<sup>9</sup>Pinetsanatsitemparoja pincoraquepo-jajejate taampina pinejaatenaja,  
<sup>10</sup>iroorijite itsinampirejanaquenaquea Temashi yoanaque Tesaronicaqui, caavijiquea anaaque ishineventavaetanacaroquea quepatsipaequitica. Iriraquea Queresente yoanaquequea Garashiaqui. Iriraqueate Tito yoanaquequea Tarimashiaqui.<sup>11</sup> Apatiroti notsipatujari Irocashi. Arigueti pincoraquequegueti paajaterita Maricoshi pintispata-jempari, nonintaquetarite iramatcovae-tapojajena nantavaetaquenerigueti Amajirote.<sup>12</sup> Iriraquea Tiiquico notigarancaqueri Epesoqui.<sup>13</sup> Pincoraquequegueti pamajenaroja nogataamorenare nojoquijitanaqueca Toroashiqui itsovironaquitequi Caripo. Aisa pamaje-

naroja novaperitepae, irootarite nonintamajataqueca nomeshinatsitepae notioncantaguetacaca.

<sup>14</sup>Iriraquea Arijantero peacaagueta-roca taaca opajitapae cavorejaguetatsica icatsimatacaantaquena. Inchiquojita-quea inquejequeri Amajirote.<sup>15</sup> Shoo-shoh icatsimatacaantimpitsijate aviatimpa aisa, iticaaquenatari notsave-tantaquerigueti Jesoquirishito.

<sup>16</sup>Iroqueragueti yaajitanaquenagueti jivatatsicaqui teetarite inchoocateji aparo amitacotanaquenaneca, maasano-quea itsinampirejajanaquenaquea, aparoquea noquenquetsaventanaca naatimpa. Cotanquitsiquea teequea nonintej iinquenquejacaajiaqueriquea Aapani Irioshi oncoramanitapojaquegueti.<sup>17</sup> Cotanquitsiquea iriraquea Amajirote yamitacovaequenaquea itampishitaca-naquena, nagavejantacaca notsaveta-vaequeriquea Jesoquirishito cameetsani-jite inquemajiaquenijite maasano teeca irijorijoigueji. Aisa yaajitavajana yatancavequenagueti casecari.<sup>c</sup> <sup>18</sup>Arim-paqueate impintsatacomajatanaquena Amajirote querocaca incojivequenani, iroompa iraanaquenaqueate jenoqui inquitequi imajirontacagueti. Jaameja ancoguitempani ashineventajiaquem-pari, ancantajiaqueri: “Caaviji pogane-jencamajata!” Ari oncoquempa.

<sup>19</sup>Pincamanqueroja Pirishica nococani noquenquejajiro, aisa Aquira noquenqueja-queriquea, aisa ijitanejia Oneshiporo pincamanquerijate noquenquejajiaqueriquea.<sup>20</sup> Iriraquea Erashito ichoocaque Corintoqui. Iriraquea Toropimo nojocanaqueri Miretoqui yojoquijitaca.<sup>21</sup> Aviatimpa, irijani, pincoraquepojajeja taampina tequeratagueti

**b 4.8** *amatsaerontsi*. Manaquea iquempetacaacaro coramani ishiashiavijitagueti iramenajiaqueri quericaca anaantanquitsineca, iriraquea majirontatsica iraitsitempariquea iramatzaetsitempari. **c 4.17** Icanquegueti *yaajitavajana yatancavequenagueti casecari* arica mana iquejetacaajiacanari intati, quejetaca incante: “ipintsatacovetaquena teeca irojocantajitenaji irimetojajiquenajite, quejetacashia yatancavequenagueti casecari”.

oncatsincaguiteteji. Irirajia Eovoro, Porente, Irino, jero Caraoria, aisa maasano apitsarovertarijiate intatjiaquequea pinquemacojiaqueri choocajia iquenquejajiaquempiquea.

<sup>22</sup>Noninque intsipamajaquempiquea Amajirote Jesoquirishito pishirequi, incavintsajamajajiaquempiquea aviatimpajia maasano.

# PAAVORO ITIONCAQUENERI

## TITO

### Antsatantaquemparoca

Ocatica iroguenti antsatantaquemparoca paperi itioncacaantaqueca Paavoro itioncaquenerigueti Tito. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31). Paavoro icantacotaqueri Tito itioncacaantajia-querigueti Garashiaquitica aisa itioncacaantakerogueti paperipae icantajitica 2 Corintoquitica aisa 2 Timoteo (2 Co. 2.13; 7.6, 13–14; 8.6, 16, 23; 12.18; Ga. 2.1, 3; 2 Ti. 4.10) Tequeratagueti intionqueroji Paavoro ocatica paperi itioncacaanquero otsipapae 11 paperipae choacajianquitsica paperiqui icantajitica *Tsavetacoquerica Jesoquirishito*. Pajinigueti itioncacaantakerogueti Paavoro ocatica paperi itioncacaantauqueneri Timoteo, iroquetica itioncacaantauquenerica. Itioncacaantauquero ocatica paperi ajagantsiniqui 63, ichoocaquegueti quepatsiqui icantajitica Maseronia.

---

**1** <sup>1</sup>Naroguenti Paavoro antinirica Aapani Irioshi ashintajanaca, aisa naroguenti itigarancane Jesoquirishito. Iriatimpa itigarancaquena nontsaroven-tacaajiaquempari maasano icoguiajia-queca Aapani Irioshi, cameetsanijite intsamimentajiaqueronijite Quenquetsa-tsarentsimajaca incomajatashitanta-quemparoca. <sup>2</sup>Aisa intsamajajiaquerou-quea iroaroaitanaquequea maasano tsaroventajiacarica inchoocaguenequea Irioshimajacaqui, aatoquea imetojaji. Iriraquea Aapani Irioshi teequea intsojeimatempají. Paesatoniqui tequeratagueti onchoocatimateji, icanque aatoja imetojitsi maasano quericaca tsaroventajiaquemparineca Quirishito, incoguitempani inchoocagu-teni iriatimpaku. <sup>3</sup>Imaicaquea imaica jac aapojaca savincaguiteri intsatantaji-

aqueparoca maasano Iguenquetsatsare Aapani Irioshi Meshiacojiacajica. Irootaquequa itigarankumenquena-quea nontsavetacotaqueriqueate Jesoquirishito, noncamanqueriquea maasano.

<sup>4</sup>Notioncaquempiquea aviatimpa Tito napitsaroventarite, naroguentiquea tsaroventacaquempica nopeantajim-pica nirijanitemajaca. Namanacoven-quempiquea incavintsajamajaquempini-jite Aapani Irioshi aisa Jesoquirishito Meshiajiacajica, noninquequea inchoocatacaaquempi cameetsa aatonijite taaca opaji pishoshoguite-venta.

### Yantavaequequeate Tito Queretaniqui

<sup>5</sup>Oraqueate nojocanaquempigueti oraniqui Queretaniqui nocanquempiquea

pinteroncaguetajerojate maasanopae tequerataca anteronqueji. Aisa nocanquempiquea querocagueti oraniqui quinteninintspaequi icapiocapinijiacagueti apitsaroventarijate, paajiaquenerijate quempoguijajquerineca, pinquempeta caamajaquemparoja nocanquempica.

<sup>6</sup>Iriraquea quempoguijajgurica tsaroven-tajatiatsica incoguitempanija incomajamaja-quempaquea iramenajitaquerinijite inchoocamajaque cameetsa. Irampaniron-quemparoja imanquigacaca. Iriraquea irijanijiate intsaroventamajajaqueemparia Quirishito incomajamajaquempaquea, aisa intsajiaqueriquea iriri aatoja ipigapigaata-ritsi. <sup>7</sup>Iriraquea quempoguijajgurica tsaroven-tajatiatsica iriguentiquea savicaven-tiroca maasanopae inintaguetica Aapani Irioshi, irootaquequea nocantantacaca incoguitempanija incomajamajaquempaja aatoniji ochoocatitsi incantimentajquerimeca. Aatoquea yaventacotatsi, aatoquea itijerequitatsi, aatoja ishinquiguitani, aisa aatoquea yaashitantatsi. Aatoquea yamatavijiguiritsi itsipapae iraaquenijite imentaquipae. <sup>8</sup>Cameetsa iraajiaavaqueriquea iroguisavisaviitavaqueriquea coraquecoraquejianquitsica itsovironaquitequi. Irishineventamajajaqueemparoquea cameetsaripae, intampishitashiguetaqueroquea maasanopae covaeguisherentsipae, incomajamajaquemparoquea, irinetsanamajata-queneri Aapani Irioshi, aisa iramenanonta-majaquempaja cameetsa incomajamajaquempanijite. <sup>9</sup>Iriraquea quempoguijajgurica tsaroven-tajatiatsica aatoja icantashitatigarotsijate Iguenquetsatsare Aapani Irioshi, manaqueate inquenquejamajaqueroquea cameetsanijite iragavejaquenijite intsatacaajiaqueriquea itsipapae, aisa iragavejaquenijite irimajeretacajiaquerinijite maasanopae cantashitatiacaroca Quenque-tsatsarentsimajaca.

<sup>10</sup>Choocatarite icaramirincavaequeta-rite pigapigaatantatsica, manaqueate

icantashijiacaro intati yamatavijanti-gueti. Iriojiatarite quempetanquitsica imaica cantajianquitsica maasano tsaroven-tajatiatsica iroguijatacojajajero itsatacaantica joriojia icantajiaque intotsaiquimashitacaantajiaquempa maasanojia. <sup>11</sup>Irirajia quempejiaqueroca imaica iintsija iramimicacaajitempari, manaqueate yovashiantacaagarantajia-queri tsaroven-tajiavetatsica, iquejeta-caajitsitaroqua imanquigarejia aisa irijanijitate. Itsatacaantamampeajiana-quieroqua intati, teitarite oncameetsa-teji, manaquea inintajiaque iraantajia-quermparo imentaquipae.

<sup>12</sup>Coraman ichoocaque tsavetanta-tsica Queretaquitican. Iriatimpia iquenquetsatacojiaqueri igonorojia icanque: “Ari icojiaca Queretaquitica iriguenti tsojeajiatsica, teequea impintsatacotantajiguempaji quempejia-quea chaonarijite. Iriguentijiaquea shecrajanti perantijia.” <sup>13</sup>Icantamajata-queshiatsi. Irootaquequea nocantanta-quempica pincantomajamajaterija irirajia quempejianquitsica imaica cameetsanijite intsaroventamajatana-quemparinijite Quirishito, <sup>14</sup>aatonijite iquemisantajijiritsi joriojia tsaveta-mampeajigaroca iquenquejashijitacaca intati. Aisa pincanquerijate aatojate iquemisantajiguiritsijate itsatacaantajia-queca itsipa pitsocapitsatanacaroca Quenquetsatsarentsimajaca. <sup>15</sup>Iriraquea comajari icocaniquea iquenquejacoma-jaquero maasanopae, manaquea icomajatacocaro, cotanquitsiquea iriraquea teeca incomajatempajie teeca iraavajeroji iroomajatatsica icancaniquea teequea incomajatacotemparoji maasanopae. Manaquea ocovaeguisher-naca iguenquejane, aisa chagashirenta-vequemparimeca aatoniji icovaeta manaquea ocovaeguisher-naca.

<sup>16</sup>Iriatimpajia icantajiaveca itsatiri

Aapani Irioshi, cotanquitsiquea ipeacaaguishejiacaca onigaantajianaqueri teemajaca intsateriji. Iriguenti coguisherimajaca, tee inquemisantanteji, teequea intsatimajigueji irinetsanajiaqueroquea cameetsaripae.

**Quero ancojiaquempani  
anchoocajiaquegueti cameetsa**

**2** <sup>1</sup>Aviatimpaquea pintsatacaantaquegueti pintampaticamajatanaquerojate Quenquetsatsarentsimajaca. <sup>2</sup>Irirajaquea quenquevarimajajiananquitsica aatoja ishinquitatsi, intampishitashijiaqueroquea maasanopae covaeguisherentsipae, irishineventajiaquemparo cameetsaripae, intsaroventamajajiaquempari Jesoquirishito, impintsatantajiaquempa, incoguitempani. <sup>3</sup>Arikeate onquempejiaquempaquea quenquevaromajajiananquitsica pincantajiaqueroquea oncomajamajajiaquempajate, aisa aatoja ocantashiguetsati intati, aisa aatoquea oshinquitatsi. Iriguentiquea ontsatacaantajiaque cameetsaripae. <sup>4</sup>Onquejetaquerogueti agavejajiaque ontsatacaajiaquero apimanquigarojiate tequerataca onquenquevaromajateji ompintsamajataquemparija manquigataroca aisa irijanijate. <sup>5</sup>Aisa ontsatacaajiaqueroquea onquenquejamajiqueronijite cameetsaripae, oncomajamajaquempaquea, onetsanajiaquero otsovironaquite, oncavintsajantajiaque, aisa onquemisantajiaqueri manquigataroca. Noncantantajiaquempica imaica aatonijite icantaguishetacojitirotsi Iguenquetsatsare Aapani Irioshi.

<sup>6</sup>Arikeate pinquempejiaqueriquea tequerataca inquenquevarimajajigueji pincantajiaqueriquea intampishitashijiaqueroquea maasanopae covaeguisherentsipae. <sup>7</sup>Maasanoquea pantaquea pincomajatimenquemparo cameetsaniji inquejejianaquempiniji. Pintsatacaajia-

querigueti pintampaticamajatero, pinetsanamajateroja. <sup>8</sup>Pinquenquetsatsitemparo cameetsaguetsatsica aatoniji ochoocati incantacoguishetimentajitempimeca, manaquea impashiventanaquempa ticaavequempimeca iramenajiaquegueti tee onchoocatimateji.

<sup>9</sup>Pincantajiaqueri yashintajitacaca irinetsanajiaavaqueroja maasano incantajiaquerica ashincarica cameetsanijite iroguijinejajiaqueriniji, aatoja ipigatsajencataritsi. <sup>10</sup>Aisa aatojate yaitsitiritsi, manaqueate intsamaquaqueri ashincarica aato yamatavitiritsi, cameetsanijite iramenajiaquenijite maasano oganejen-cavaeca Quenquetsatsarentsimajaca tsavetantaquerica Aapani Irioshi Meshiajiacajica.

<sup>11</sup>Yonigaanquerotari imaica Aapani Irioshi icavintsajajiaquerigueti maasano caquinteguetatsica inintantacaca irimeshiajiaqueriquea. <sup>12</sup>Irootaquequea atsatantajiacaca cameetsanijite avashiantantajianacaroca apeacaagshejiavecaca taaca opajitapae covaeguisherentsipae aatonijite aquempejigaritsi teeca intsaroventajiguempariji iquenquejaguishejiaqueroquea taaca opajitapae, manaquea antsajiaque antampishitashijiaquero maasanopae covaeguisherentsipae, anchoocajiaque cameetsa, ancoguitempanija antsaroven-tamajaguitemparini Aapani Irioshi achoocajiaquegueti quepatsiqui.

<sup>13</sup>Aatimpajia arimpaquea ancomajamajatanaquempaquea aguijaguijaitavajerogueti onetsanamajajquempagueti oguishinejavaetacajica: iriguentiquea savincaguiteri ironigaantantajempaca Arioshite agavejamajatatsica Aavajajica, iriotaque Jesoquirishito, arikea iroganejencavaetapoajempa. <sup>14</sup>Aatimpajia apeacaagushevaevecaroquea taaca opajitapae covaeguisherentsipae, cotanquitsiquea ocoramanitapojaji

imetojaventajiacaji ishetacojiajaji yoguipaquijacojiajaji yashintavecagi-gueti ampatsini, aisa ishetacomajatajaji cameetsanijite irionijite ashintamajajajainijite anintamajajiaquenijite anetsanajianaquero maasanopae cameetsaripae.

<sup>15</sup>Irootaqueuea pintsatacaanteja. Pintampishitacaanque, aisa pincantoma-janteja, iriotarite nintacaaquempica Aapani Irioshi. Aato ocameetsatitsi intsojencajiguempi.

### Quero incoquempani tsaroventajatiacsica

**3** <sup>1</sup>Noninque pinquenquejacaajiajeri maasano tsaroventajatiacsica inquemisantajiaqueriquea majirontajatiacsica aisa jivajiguirica, aatojate ipigapi-gaataritsijate, manaqueate irinintan-taitanaque irantajianaquero cameetsa-guetatsica. <sup>2</sup>Aatoquea icantaguishetaco-tiritsi itsipa, aatoquea icatsimatantaji-guitsi, manaquea impeaquempa matinari, aato yanaaguenquejanetanti, manaquea impintsajiaquempariquea maasano caquinteja.

<sup>3</sup>Coramanitari aatimpajia aritarite aquejetaca, teequea antsateji anquen-quejamajajigueji, teequeate anquemi-santanteji. Atimpinashirentaveca, manaquea omperavecaji taaca opajitapae covaeguisherentsipae ashineventajiavecaca. Acatsimajencaja-queriquea agonorojia, acatsimatacotsi-tantagueque. Aatimpa isemaneguintajita-caji, ariqueate acohacitanaca asemaneguintavacaajianaca. <sup>4-5</sup>Cotan-quitsiquea ocoramanitapojaquegueti arejetapojacagueti savincaguiteri ipintsatacotantajiacarica Aapani Irioshi maasano caquinteguetatsica, iquejeta-caajiacaji aatimpajia imeshiajicaji, iriguentitari Meshiantatsica. Teequea irooquea irimeshiantajajaji iramenajia-caji acomajamajajicaca, manaqueate

pintsatacojicajiji intati, irootaquequea imeshiantajiacajica. Oraqueate ishetaco-jiacajigueti agovaeguisherejia manaqueate oncanque jac acantashitat-ajianaja quempetaja iroaquerasano voajajatsi, iriguentiquea cantashitatiajajaji Ishire choocashirentajiacajica.

<sup>6</sup>Aventaventaicaritarite Jeso quirishito Meshiajicajica, jero itigarancantacarica Aapani Irioshi Ishire inchoocashirentaj-ajapocajiji iragavejacaamajajicajiqueate.

<sup>7</sup>Arikeate iquempejicajiji imaica Aapani Irioshi ipintsajiacajigueti iramenajicajinijite quempeca teeca ancovaeguishetimatempaj. Imaica-queate imaica iroguentiquea aguijama-jaquequea antsipatsipaitaquempari jenoqui inquitequi ancoguitempani anchoocaguiteni. <sup>8</sup>Maasanopae ocatica nocanquempica iroguenti iroomajaca, nonintantacaca pintsatacaantamajate-roja cameetsanijite maasano aventaven-taicarica Aapani Irioshi irisavicaventa-majajianaqueroquea irinetsanajiana-quero maasanopae cameetsaguetatsica. Caaviji anaaque ocameetsavaeque, aisa irootaquequea amitacojiguirica maasano.

<sup>9</sup>Imaica noncanquempi aatojate pitsipajiaritsija itsipapae pinquenquetsa-tavacaajiaquempaquea intati pinquen-quetsatacojiaqueroquea taaca opaji teeca irooquea iroomajatatsica, aisa aatoquea piquejetaritsi savicaventajia-queroca iquenquejajiaquero ipajigueta-gueti choviquijianaquerica, aatoja pipigatsajencatavaca, aisa aato piquejetaritsija catsimatimentantajigu-roca itioncacotanaqueca Moishishini. ¿Arimpate amiquempite? ¿Taa opaji ocameetsatantacaca? Teenica onchoocata-teji. <sup>10</sup>Inchoocaquegueti gametsajantan-quitsineca, paitempariquea pincantoma-jitsitempari. Aatogueti iquemisantim-pitsi pinquejetacaitempariquea aisa.

Iroompa inquejetsitajemparogueti aisa aatogueti iquemisantimpitsi pincamientositempari aatoja iquijajitsi picapirocapinijigagueti.<sup>11</sup> Itsajitaquetari quejejia carica irica mana yaacoguishetanaca, aacoguisheni icantanaca, irioquea quempetacaantanquitsineca.

### **Iteroncacaanajiri**

<sup>12</sup>Ariquate nontigarancaquerigueti Aretemashi aisa Tiiquico aviatimpaqui oraniqui pintampinaquea poanaquea Nicoporishiqui. Ariquate noanaquea ontaniqui nonchoocavae-quitequeate arejevaetajempa osaajentantanajegueti catsincaguiteri.<sup>13</sup> Iriraquea Senashi, guisotoguiroca itioncacogue-queca majirontaguetatsica, aisa Aporoshi pinetsanamajajiavaquerijate pojocajiaquenerija taaca opaji

incoguitejacojiaquempaca aatonijite iteroncacojianacatsi quenavoquiron-tsiqui.<sup>14</sup> Pincantajigerijate apitsaroven-tarrijate guntenijianquitsica oraniqui irantapinitaque cameetsaguetatsica cameetsanijite inchoocatacotimenque-niji iramitacotantajiaquemparica coguitejacomajatanquitsica, aatonijite manaqueate irisavisaviitashitaquem-paea intati aatoquea taaca opaji yantitsi.

<sup>15</sup>Maasano tsipatsipaitaquenaca ocaniqui inintajiaque pinquemacojia-queriquea chooca iquenquejajajimpi. Pincamanquerijate maasano apitsaro-ventarrijate pintsajiaquenaca choocajiana ocaniqui noquenquejajajiri. Imaica noninque incavintsajamajajia-quempi Aapani Irioshi aviatimpajia maasano.

## PAAVORO ITIONCAQUENERI

### PIREMONI

**Antsatantaquemparoca**

Ocatica iroguenti antsatantaquemparoca paperi itioncacaantaqueca Paavoro itioncaquenerigueti Piremoni. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1–31; 13.1–28.31). Tequeratagueti intioncacaanteroji ocatica paperi, itioncacaantaquero otsipa mavite paperi itigarancajauquenerica quemisantajiatscica choocajianquitscica Tesaronicaqui, aisa mavite paperi itioncacaantajauquenerica Corintoquitica, aisa otsipa paperi itioncacaantajauquenerica choocajianquitscica quepatsiqui icantajitica Garashia, aisa otsipa irashi quemisantajiatscica choocajianquitscica Iromaqui. Chooca quenquejajianquitscica tequeratagueti intioncacaantaqueneri Piremoni, itioncacaantajauqueneri choocajianquitscica Piripoqui. Paavoro itioncacaantaquero 3 paperipae ajagantsiniqui 60, ichoocaquegueti santanaqui Iromaqui: aparo itioncacaantajauqueneri quemisantajiatscica Epesquitica, otsipa irashijia Corosauquitica, otsipa irashi Piremoni. Isotoanaquerogueti Tiiquico Iromaqui, yaanaquero ocatica 3 paperipae yoanaquegueti quepatsiqui pajitatscica Ashia.

Iriraquea Oneshimo, irajaanire Piremoni, ishiapitsatanacari ashincarica, irosati yarejevaetaca Iromaqui. Ontaniqui iquemaqueri Paavoro itsavetantaquerigueti Jesoquirishito, ariquea iquemisantaque. Aritari ocantaque icantacaantaqueca majirontatscica Iromaqui iraavajerigueti aajanirentsi shiavetananquitscica, iroguiplajeneri ashincarica. Irootaquequea imaica itigarancantajarica Paavoro Oneshimo, cotanquitsi itioncacaantaqueneri Piremoni icantiri incavintsajavajeri Oneshimo, icantiri: “Paavajeri quempetaca naroguentica paavaqueca.”

---

<sup>1</sup>Naroguenti Paavoro, choocana ocaniqui nosantanatacotaca, iroguenti isantanatacotimentajiquena notsavetantaguitirini Jesoquirishito. Notsipatavajari apitsaroven tarite Timoteo notioncaquempigueti aviatimpa Piremoni nopintsajiacaca. Aquejetavacaaca antaventiniri Jesoquirishito. <sup>2</sup>Noquenquejajiro quea aisa apitsaroventarote Aapia,

jeri aisa Arequipa noquejetacaacaca apicoaretate, atsipevencaritarji Jesoquirishito. Noquenquejajiaque riquea aisa maasano tsaroventajiascica capiocapinijiatscica pitsovirona quitequi. <sup>3</sup>Namanacoventajiaquempiquea incavintsajajiaquempinijite Aapani Irioshi aisa Amajirote Jesoquirishito, inchoocatacaa jiaquempinijite cameetsa aatonijite

pishoshoventajigaro taaca  
opajitapae.

### **Caavijisano ipintsatantamajataca Piremoni**

<sup>4</sup>Nocantacoguitani namanaguitirinigueti Aapani Irioshi nocanqueriquea: "Ariotesaa", <sup>5</sup>noquemacoquempitari caaviji pipintsajiacari maasano tsaroventajiacarica, aisa pitsaroventamajatacariquea Amajirote Jesoshi. <sup>6</sup>Aritarite aquejeshirentavacaaca atsaroventacarigueti, nocantacoguitani namanacoventaquempiquea nocanqueri Aapani Irioshi noninque pintsamajata-naqueroquea quero icojiacajini Quirishito Jesoshi icavintsaajajacajigueti maasano aatimpajia tsaroventajigarica. <sup>7</sup>Oshinetacaamajaquenaqueate, napitsaroventarite, namenaquegueti pipintsajiacari igomajamajarejia Aapani Irioshi, pitampishitacaajianajiri, ariuea otampishishirentacaajana.

### **Paavoro icanqueriquea Piremoni cameetsa iraavajeri Oneshimo**

<sup>8</sup>Naatimpa naroguenti itigaranquica Quirishito jero nagavejatantacaca noncanquempime pinetsanamaqueroja noncanquempica. <sup>9</sup>Cotanquitsiquea avirompate aviatimpa, caavijitarite pipintsatantaca. Ariqueate noquempetaca naatimpa nopintsataquempiquea. Naatimpa naroguenti Paavoro jac quenquevatanajana. Imaica choocatstirajana isantanatacotimentajiquenaro-quea notsavetantaquerigueti Jesoquirishito. <sup>10</sup>Irootaquequea nonintantacaca nontioncaquempi noncantacoventaqueriniji irira Oneshimo<sup>a</sup> nopeaquea irijani, notsaroventacaacaritari ocaniqui nosantanatacocagueti. <sup>11</sup>Coramani pashintavecarigueti tee incameetsatimo-

tempiji, cotanquitsiquea imaica peanajaquea amitacotantsica, iramitacotapojajempi, quempetaca naatimpa yamitacovaequena. <sup>12</sup>Imaica nontigarancajempiri, paavajerija pinquejetacaavajempari paavaquenagueti naatimpa, iriguentitari nopintsamajatacaca. <sup>13</sup>Nonintavecaquea inchoocaquemequeate ocaniqui iramitacouenamequea choocatirajanagueti santanaqui, isantanatacotimentajiquenaro notsavetantavaequerogueti Quenquetsatsarentsi Oganejencatatsica. Arimequea inchoocaqueme ocaniqui quempetaca aviguenticaca amitacuena. <sup>14</sup>Cotanquitsiquea teequea nonintejí naavajeri tequeratagueti pincanteji, teetarite nonintenica noncanquempi inchoocateta ocaniqui. Manaqueate noninque inchiquiojitatari pincanquenaqueate aviatimpa pininquegueti. <sup>15</sup>Ishiapitsatanaquempigueti aricaqueate itsinampirejavetaquitimpi cameetsanijite paavajerigueti pincoquempaniquea pintsipatadjempari. <sup>16</sup>Imaica aatoja aparo pashintajaritsi, imaicaquea iriotaque papitsaroventarite pivintsare. Naatimpa nopintsamajatacari, imaicaquea panaavaeque pimpin-tsamajatanaquempari aviatimpa, iriotarite apicaquinteteni, cotanquitsi caaviji anaaque imaica iquejetsaroven-tajimpitari.

<sup>17</sup>Iroosacanica imaica pamenamajataquenagueti naroguenti papitsaroventarite paavajerijate quempetaca naroguentica paavaquea. <sup>18</sup>Querocagueti icoquempini, irooca yaacotaquempi, naatimpaquea pincoacotaje. <sup>19</sup>Naatimpa naroguenti Paavoro tioncaqueroca oca nacoqui imaica, noncanquempi: naro vegaratajerone. Cotanquitsiquea nagavejaqueme nonquenquejacaajemprome: aatome-

<sup>a</sup> 10 Oneshimo oncanque amitacotantsica (pamenero otsapa 11).

gueti notsatacaguimpime pimpoma-  
tsaquempame.<sup>20</sup> Nonintavecaquea,  
napitsaroventarite, pincavintsajacote-  
name, apatsinorotari inaque  
Amajirote. Poguishinejavaequena-  
quea, aguijatacoqueritari Quirishito.

<sup>21</sup> Notsaquequea pinetsanatero  
nocanquempica, irootaquetari  
notioncantauquempiroca ocatica, aisa  
notsaque panaavaetanaquero.  
<sup>22</sup> Imaica nonintaveca pinetsanate-  
naro oraniqui nomaantapojoempaca  
noncoraquequitegueti, namenaque-  
queate aricaca iroguiapaquijajitajena,  
i quemajiaquempiqueate Aapani  
Irioshi pamanacoventajiaquena-  
gueti.

#### Paavoro iteroncanajiro icanquerica

<sup>23</sup> Chooca ocaniqui Epaperashi,  
itsipatacaantajiquenariquea isantanata-  
cotimentajiquenarogueti notsavetanta-  
vaequerigueti Quirishito Jesoshi.  
Iriatimpa ininque pinquemacotajeri  
chooca iquenquejacoquempi.

<sup>24</sup> Arikeate iquempejiaca aisa  
Maricoshi, Arishitarico, Temashi aisa  
Irocashi, intajiaque pinquemacojia-  
queri iquenquejajiaquempiquea, iriatim-  
pajia iriguentijia notsipatashijiacaca  
nantaquenerigueti Jesoquirishito.

<sup>25</sup> Noninquequea incavintsajashirenta-  
jiaquempi Amajirote Jesoquirishito  
pishirequi.

# ITIONCAJITAQUENERICA EVEREOJIA

## Antsatantaquemparoca

Ocatica iroguenti antsatantaquemparoca paperi itioncajitaquenerica evereojia quemisantajiaquerica Jesoshi, ipajijitajiri aisa joriojia. Teequea intsajiteji queri tioncaquerroca ocatica paperi. Cotanquitsi jero atsaguetaqueca: iricatica tioncaquerroca tee irinejeriji Jesoshi, iriguenti iquemaque itigarancanejia itsavetacojiaquerigueti (2.3). Tee intsipajiguempariji itioncajiaqueneca (13.7). Inintaque impianaje ichoocajiaquegueti itioncajiaqueneca (13.19). Inintaque intsipatanaquempari Timoteo iroanaquegueti (13.23). Itsipajiacari quemisantajatsica choocajianquitsica quepatsiqui icantajitica Itaria (13.24). Chooca quenquejajianquitsica irioca Aporoshi tioncaquerroca ocatica paperi (Ya. 18.24-28). Itsipajia iquenquejajiaque irioca tioncaquero Irocashi, yamenauquero oquejeguevetacaro otsipapae mavite paperi itioncaqueca iriatimpa (aparo opajita *Irocashi*, otsipa opajita *Yantajiguica Itigarancanejia Jesoshi*). Itsipajia iquenquejajiaque irioca tioncaquero Verenave (Ya. 11.22-26; Ga. 2.1-21). Tee intsajiteji quero itigarancaqueroni iroqueragueti, aisa tee intsajiteji quero ichoocajueni tioncaquerroca itioncaquerogueti. Chooca cantanquitsica arica itioncaquerogueti ichoocaque irooca Jerosarequi, Antioquiaqui, Iromaquí, irooca Arejantiriaqui. Iquenquejajitaque itioncaquero ocatica paperi tequeratagueti irisoveajigueroji coaretajia teemporoo choocatanquitsica Jerosarequi, iroguentiquea isoveantajitarooca ajagantsini 70. Iquenquejajitaque arica itioncaquero ajagantsiniqui 66.

Irira tioncaquerroca ocatica paperi itioncajiaqueneri joriojia quemisantajiaquerica Jesoshi aatoniji yovashiantajiguiro iquemisantajiaquerigueti. Iquenquejajavetacatari incantashitatiajiaquemparo quero icojiaqueroni itsaroventajiacarigueti Aapani Irioshi, impiashijianajemparo intsaroventajajempari inquejetacaajajemparo coramani itsaroventajiacarigueti tequeratagueti inquemisantajigueriji Jesoshi. Itioncajiaqueneri icantajiaqueri teequea inquenquejamajajigueroji iquenquejajavetacaca. Inquenquejajiaqueme imaicaquea ipochatanajigueti Jesoshi imetojaventajiajaji ishetajajiro aguempevaerejia maasano aventajiacarica Jesoshi, yamenantajiacajica quempejiaaca tee ancovaeguishetimatempaji. Avisanaquequea coramanitica: oratica teemporoo, saserorotejia, aisa ijitorejajiaquenerigueti ivirapae aretarequi. Imaicaquea Aapani Irioshi ipeacaacari Jesoshi Asaserorotete Anaantamajatatsica, apaniroquea iriraja Jesoshi agavejaque ovegaratacapiro aguempevaerejia, apaniro choocatajatsi imaica teemporomajaca inquitequitica. Irira tioncaquerroca

itsatacaajiacaji iroaquerari paaquito inetsanataqueca Jesoshi anaaquero iroquetinica paaquito yojocauenerica Aapani Irioshi Moishishini.

**Aapani Irioshi itigarancaqueri Irijanite  
intsatacaajiacaji**

**1** <sup>1</sup>Paesatoniqui Aapani Irioshi iriguenti iquenquetsatacaaue tsavetantajatsica ajagantsinipaequi, icamantaguetaqueriqueate cantashitatiaropae aisaaocantashitatiagueca quero icoqueroni, iroompaqueate icroquea ogaajjavaqueneri avaesatiniteni. <sup>2</sup>Cotanquitsiquea imaica itigaranquitsitariquea Irijanite intsatacaajiacijkeate quero icotani. Iriotaquequea inintacaaqueca irashintajemparo maasano, iriotaque aisaaipeacaantacroca maasano choocaguetatsica. <sup>3</sup>Iriotaque nigaantaqueroa iroganejencare Aapani Irioshi, iquempemajatacaritari Iriri atsatantacaca quero icotani iriatimpa. Oraquea icanqueca agavejamajatiquea, irootaquequea ichoocatacaantaquero maasano choocaguetatsica ochoocatantanacaca. Ishemajaqueroquea agovaeguisherejia, iroomba iteronacquerogueti yatsomajanajaquea jenoqui inuitequi isavicapojaji isenampijapojajari Oganejencamajatatsica itincamijempequequi. <sup>4</sup>Caaviji yanaavaepojajiri irashivantijitete Aapani Irioshi, iriguentitari Irijanimajate yanaantajiacarica ashivantijite.

**Quirishito caaviji yanaaqueriquea  
irashivantijitete Aapani Irioshi**

<sup>5</sup>¿Choocacampate ashivanti icantaqueca Aapani Irioshi:  
“Aviatimpa aviguenti Irijani,  
imaica ocatica savincaguiteri aviro nashimajaca nirijanite”?<sup>a</sup>  
Teequea inchoocateji. Aisa teequea incantacoteriji irashivantijitete incanteji:  
“Impeaqueriqueate Iriri,

naatimpaquea nompeaqueriquea irijani.”<sup>b</sup>

<sup>6</sup>Cotanquitsiquea oraqueate itigarancaquerigueti Irijanite iriquetica choocatanchantsi incoraquaquequea ocaniqui quepatsiqui, icanti:

“Maasano nashivantijitete intsaroventajiaquemparija.”

<sup>7</sup>Cotanquitsiquea oraqueate icantacojiquerigueti irashivantijitete, iriguenti icantajique:

“Aritari icotacagari irashivantijitete inquempejianaquempariquea choviga.

Aisa irirajia irashivantijitete iriotaquequea itigarancanejia, inquempejianaquemparoqua osamimicatsantsajencatigueti paamari.”<sup>c</sup>

<sup>8</sup>Cotanquitsi iriraqueate Aapani Irioshi icantacoquerigueti Irijanite icantiri:

“Irioshi, pincoguitempani pimajirontaguitempani pimajirontamentoqui pisavanticoguitejacotimatisi.

Pajiriquitemparoqua pimajirontaquijire pintampaticamajatan-temparoca pimajirontagueti.

<sup>9</sup>Caaviji pishineventamajataroqua cameetsaripae, irooqueate pisemaca covaeguisherentsipae.

Irootaquequea nocoguiantaquempica naatimpa Piroshite Irioshimajaca, noshacojatantaquempiro orejiqui pishinquireguishiqui, irootaquequea nonigaantacaca arimaja noshinetacaquemquea,

**a** 1.5 Sar. 2.7.   **b** 1.5 2 Sam. 7.14; 1 Crn. 17.13.   **c** 1.7 Sar. 104.4.

nanaacaajiaquempi maasanopae  
pitsipatsipaitacaca.”<sup>d</sup>

<sup>10</sup>Aisa icanti:

“Majirontatsica, aviguenti peaca-  
caro iroqueragueti quepatsi,  
aisa aviguenti peacaacaro inquite.

<sup>11</sup>Oncoramanitapojaqueguedi

ompeaguetanajempaquea  
maasanopae pipeacaagueta-  
caca,  
cotanquitsiquea aviatimpa picocani  
pichoocati.

Maasanopae ompaesatoguetanaque-  
quea onquempeguetanaquem-  
paroqua opaesatotiguedi  
quitsaarentsi.

<sup>12</sup>Pampiguiricajeroquea pinquempeta-  
caajemparoquea yampiguirica-  
jitirogueti quitsaarentsi,  
aisa pinquejetacaajemparoquea  
otsipa iroquerari,  
pinquempetacaajemparoquea quitsaa-  
rentsi isapocajitarogueti otsipa-  
queate inquitsaajitajempa.  
Cotanquitsiquea aviatimpa aatoquea  
picantashitatiatsi,  
aisa aatoquea pisanticoguitejacota-  
jatsi.”<sup>e</sup>

<sup>13</sup>Choocampate irashivantijite  
icanqueca Aapani Irioshi:

“Pisaviquetaja pisenampijaquenaja  
notincamijempequiqui,  
pintsipataquenaquea arejevaetana-  
quempa nagavejajiaqueriguedi  
maasano catsimacatsimajiguim-  
pica, onquejevequemparo  
povanquegontatsitempari”?<sup>f</sup>

<sup>14</sup>Maasanoquea irashivantijite  
iroquentiquea ichoocatashijiaque  
iramitacotantajiaque. Iriatimpajia  
manaqueate ivejencajiaaca. Icocani-  
queate itigarancijiaqueriquea iramitaco-  
jiaqueriquea maasano irajaitavajeca.

Ancoguitempaniquea  
antsaroventajiaquempari

**2** <sup>1</sup>Irootaquequea noncantantajiaquem-  
pica imaica jaameja ancoguitempani-  
quea anquenquejamajajerojate aquemaji-  
aqueca, aatonijite avashiantanajirotsi.

<sup>2</sup>Paesatoniqui Aapani Irioshi itigarancijia-  
queri irashivantijite incamantanque  
icanquerica iriatimpa intampaticamajaji-  
queronijite. Irirajia teeca irinetsanamajate-  
roji maasano, inchiquiojitaquea iquempe-  
tacaantacaquea iriatimpajia, icatsimati-  
mentantajitarica, itampaticamajatirotari  
Aapani Irioshi. <sup>3</sup>Quempetaca icatsimajia-  
queriguedi irirajia teeca irinetsanajigueroji  
icantajiavecarica irashivantijite,  
imaicampani aatimpajiaqueate aatogueti  
aquemisantirts iacavintsamajacajigueti  
Meshiantatsica carimpate agavejaque  
ashiapitsatanaquempari aatoniji icatsimati-  
mentajiro agovaeguisherejia? Aato agaveji.  
Iriquetitaqueate tsavetantaqueroca  
Amajiro queroca ancojiaquempani  
irimeshiantantajiacajica, iroompa iriraquea  
quemisantajiaquerica itsatacaajiacaji  
aatimpajia. <sup>4</sup>Iroompa iriraquea Aapani  
Irioshi irioquea agavejacaajiaqueriquea  
tsaroventajiacarica Jesoquirishito  
yonigaantajiaqueroquea oacaantantatsica  
intati cameetsanijite intsajitaqueroniji  
tampatica yoquieroqua itsavetantajiaque-  
roguedi. Aisa apaniroopae ocantashitatiague-  
taca yojocajiacajica iragavejane yagaveja-  
caajiacajigueti Ishire Aapani Irioshi,  
iriotaquequea nintanquitsi Aapani Irioshi  
iquempetantaguecaroca imaica.

Jesoquirishito ipeacaajiacaji  
iriguentijeguijate

<sup>5</sup>Iriraquea Aapani Irioshi teequea  
irioquea incanteji irashivantijite  
irashintajiaquemparoqua iroquerari

d 1.8-9 Sar. 45.6-7. e 1.10-12 Sar. 102.25-27. f 1.13 Sar. 110.1.

quepatsi choocatajatsineca nocantaco- queca imaica.<sup>6</sup> Itioncacojiquerotarite icantamajajitaque:

“¿Arimpate yanaantaque caquinte piquenquejacotantajiacarica?

Caquintetari inaque, ¿queroca ocotacani pisavicaventajiaque- riquea?

<sup>7</sup> Panaacaavetaquitariquea capichaji pashivantijite, cotanquitsiquea pishineventajiacari- quea caquinte panaacaavaeque- riquea.

<sup>8</sup> Pinintacajiaqueri maasanopae pipeacaaguecaca inquemisanta- jiaqueri.”<sup>g</sup>

Ariquate iquempetaqueroquea imaica Aapani Irioshi yanaacaamajatsitariquea maasanopae, teequeate iranoncorejana- jeji aparo aatoca yanajaiguitsi, cotanquitsiquea imaica tequerataquea amenajigueji yagavejajiaqueroquea maasanopae.<sup>9</sup> Cotanquitsiquea Aapani Irioshi caaviji ipintsamajajiacaji maasano, itigarancantacarica Jesoshi ocaniqui quepatsiqui. Oraqueate icoraquequitigueti teatarite iranaapoja- jeriji irashivantijite Aapani Irioshi, cameetsanijite irantsipeventajiacajinijite iroompaquea imetojaventajiaquitaji. Ariquate ishineventamajatacari Aapani Irioshi itsipatanajari iriatimpaqui imajirontacaamajatajari yanaajipojajiri irashivantijite.

<sup>10</sup> Maasanopae choocaguetatsica iriguenti peacaaguetacaroquea Aapani Irioshi, iriguenti nintanquitsi ochocanta- tajiacaca, aisa iriatimpa ininque iroaroaitanaquequea maasano irijanijiate inchoocatimojiaqueri inquempequempeivetapojajempariequea yoganejencamajatagueti. Irootaque- queate ocameetsamajatantacaca

itigarancaqueriquea Jesoshi yatsipeta- caajivaecariequea cameetsanijite interon- camajaquero maasano irinetsanaqueca iragavejaquenijite irimeshiajiaqueriniji maasano tsaroventajiaquemparineca.

<sup>11</sup> Ishemajatapiroquea agovaeguisherejia icameetsashirentacaajaji, jero acant- tajiajarica Iriri: “Aapani.” Iriatimpa Jesoshi teetarite impashiventacaajajaji icantajiacaji: “Aviguentijia iguentije- guijia.”<sup>12</sup> Irootaquequea iquenquetsata- caantacarica Iriri icanti:

“Nontsavetantimojiaqueriqueate iguentijeguijia nontsavetacotan- taquempiquea.

Oraqueate incapiocajiaquempagueti nontsipajiaquemparigueti namashaiventajiaquempiquea noshineventajiaquempi.”<sup>h</sup>

<sup>13</sup> Aisa icanti:

“Naatimpa aparoqueate naventana- quempari iriatimpa.”<sup>i</sup>

Ariquate icanti aisa:

“Choocana ocaniqui, notsipatsipai- tacari irijanijiate Aapani Irioshi iquempoguijacaquenaca.”<sup>j</sup>

<sup>14</sup> Maasano irijanijiate ijimirincaji- aque, choocaquea itsinojia, iriraja. Irootaquequea iquempetantacaca Jesoshi ivoaquequea iquempejiapojaca- jiquea aatimpajia caquintejia cameetsanijite irimetojaquenijite iroonijite iragavejantaqueparica ampatsini agavejaguevetatsica irimetojacaante.

<sup>15</sup> Paesatoniqui atsaroacaamajacaroquea ametojane, querocampate ancojiaquem- pani, cotanquitsiquea imaica icoraque- quitiquea iriatimpa imeshiajiacaji, jero imaica teequea antsaroacaajemparoji.

<sup>16</sup> Atsajiaquequeate teequea iriojiaquequeate incoraquetashijigueji irashivantijite Aapani Irioshi impintsa- tajiaquempariquea, aroguentijiaquea

g 2.6-8 Sar. 8.4-6. h 2.12 Sar. 22.22. i 2.13 Is. 8.17. j 2.13 Is. 8.18.

icoraquetashijaquiti, aatimpajiaquea ichoviquijianaqueca Averaameni.

<sup>17</sup>Irootaquequea iquempemajatantapoja-cajica aatimpajia iriguentijeguijiate cameetsanijite iragavejaquenijite impeaquerempa Saserorote Anaantamaja-tatsica pintsatacotacajica, aisa netsana-majataqueroneca maasano inintaguetica Aapani Irioshi. Aisa iquempemajajacaji cameetsanijite irimetojaventajiacajiniji impeacotajemparoqua Aapani Irioshi agovaeguisherejia. <sup>18</sup>Yatsipevaetaca-quea iriatimpa, yamenantajivecariquea irovashiantacaajiquerime aatonijite iquemisantajiritsi Aapani Irioshi, irootaquequea yagavejantacaca iramita-cojiacaji intampishitacaajiacaji aatonijite icovaeguishetacaajitajaji.

#### Jesoshi caaviji yanaavaequeriquea Moishishini

**3** <sup>1</sup>Imaicaquea imaica, napitsaroven-tarijiate igomajamajarejia Aapani Irioshi, noncantajiaquempiquea aviatim-pajia icajemashirentaquea irira Inquite-quitica: pinquenquejamajaterija Quirishito Jesoshi itigarancane Aapani Irioshi, irio Asaserorotete Anaantamaja-tatsica, iriotaquequea atsaroventajia-caca aatimpajia. <sup>2</sup>Iriatimpa iriguenti tampaticamajatiroca inintaguetica tigarancaquerica, iquempetacari Moishi-shini itampaticamajatirogueti yamitaco-jiaquerigueti maasano ishiraerija icantajitica choocatimojiaquerica Aapani Irioshi itsovironaquitequi. <sup>3</sup>Cotanquitsiquea Jesoshi caaviji yanaavaequeriquea Moishishini. Manaqueate iquempetacari peacagaroca tsovironaqui, iriguenti anaanquitsi peacagaroca, yanaaqueroquea tsoviro-

naqui. <sup>4</sup>Maasano tsovironaqui choocata-rite peacaacaroca, cotanquitsiquea maasanopae choocaguetatsica iriguenti peacaaguecaroqua Aapani Irioshi.

<sup>5</sup>Iriraqueate Moishishini iriguenti amitanatatsica netsanaguequeroca maasanopae icantaguequerica Aapani Irioshi, manaqueate isavicaventiro-queate icamantsicariquea maasano ishiraerija incantaguequeca Aapani Irioshi oncoramanitapojajegueti.

<sup>6</sup>Cotanquitsiquea iriraquea Quirishito iriguentiquea Irijanitemajaca Aapani Irioshi netsanamajatapinquieroca icanqueca Iriri, ipeacaancaricate Imajirote maasano choocatimojiaque-rica itsovironaquitequi. Aroguentiquea choocatimojiaquerica itsovironaquitequi arigueti ancantacoguitempani aventajia-naquempari aguijavaquequea irinet-sataqueroquea maasano icantague-queca.

#### Aapani Irioshi irimagorejacaajiaqueri maasano tsaroventajigarica

7Irootaquequea noncantantaquempica ocatica Itioncacaantaqueca Ishire Aapani Irioshi ocanqueguedi:

“Imaicaquea ocatica savincaguiteri pinquemajiaquerigueti Aapani Irioshi inquenquetsatacaaaja-quempigueti,

<sup>8</sup> aatojate piquishoshirentajiguitsijate piquempejigaritsi choviquijiana-quempica ipigapigatsajiacari-gueti,

yamenantajiacarigueti ichoocajia-quegueti oquitamampororoita-pojaquegueti.<sup>k</sup>

<sup>9</sup> [Icanti Aapani Irioshi:] Oraniqu-quea irirajia choviquijiana-

<sup>k</sup> 3.8 Irirajia ishiraerija caaviji yogaajiaca ichoocajiaquegueti oquitamampororoitapojaquegueti, icantajiaque aatoca yagavejitsi Aapani Irioshi irajaianaqueriquea quepatsi qui icantacaajiaquerica, arikeate ipigatsajianacari.

quempica yamenajia vecaroquea  
maasanopae nonigaimoja que-  
rica oavaetanaque 40 ajagan-  
tsini.

Osamaniqueate natsipetacojia-  
veta-  
cari,  
cotanquitsiquea teequeate irinintaji-  
gueji inquemisantajia quena.

<sup>10</sup> Irootaquequea nocatsimatantajiana-  
carica,  
nocanque: ‘Icantacoguitani itimpi-  
nashirentapinijianaque,  
tee irinintajigueji intsajiguero  
noguenavoquiero.’

<sup>11</sup> Nocatsimamajajia queri nocantanta-  
carica:  
‘Iroosacanica imaica aatojate nareje-  
tacaajigaritsi ontaniqui nomagore-  
jacaantajia queparimeca.’  
<sup>1l</sup>

<sup>12</sup> Napitsaroventarijate, inchiquioji-  
taja picovaeguisheshirentatsijate,  
piquenquejave tatsija picantitsi: “Aato  
naventari”, povashiantiritsijate Aapani  
Irioshi anijatsica. <sup>13</sup> Imaica quea imaica  
pintampishitavaca anaquempajate  
pincoquempani savincaguiteriqui  
aatonijite pinejacameetsatashitaro  
quempavaerentsi pinquishoshirentan-  
quempaca. <sup>14</sup> Arigueti quisho oamajagu-  
terini Quirishito arejevaetapo jempa-  
gueti savincaguiteri ametojantaquem-  
paca, aventaguitemparigueti quejetaca  
iroqueragueti aventanacarigueti,  
ariequa iroguenti antsantaquempaca  
arimaja quea ipeacaj i tsipavijimajacaca  
yashintamajatacaji.

<sup>15</sup> Irootaquequea ocantantacaca  
itioncacotantajitacaroca ocanti:

“Imaica quea ocatica savincaguiteri  
pinquemajia querigueti Aapani  
Irioshi inquenquetsatacaajia-  
quempigueti,

aatojate piquishoshirentajiguitsi  
piquempejigaritsi choviquijiana-  
quempica ipigapigatsajia quena-  
guedi.”<sup>m</sup>

<sup>16</sup> ¿Queri quemajia vecarica Aapani  
Irioshi iquenquetsatacaajia queri,  
cotanquitsiquea ipigapigatsajiacari?  
Iriguentijia maasano guinentijia ve-  
quitsica Ejepitoqui yaajiajatica  
Moishishini itsipatsipavetanajari  
osamani. <sup>17</sup> ¿Queri icatsimajia quea  
Aapani Irioshi anaavaetanajia quea 40  
ajagantsini? Iriguentijia quea covaegui-  
shejianquitsica, ariquate imetometoita-  
naji ontaniqui oquitamampororo itapoja-  
quegueti. <sup>18</sup> ¿Queri icanqueca Aapani  
Irioshi: “Aatojate narejetacaajigaritsi  
ontaniqui nomagorejacaantajia quepa-  
rimeca”? Iriguentijia teeca irinetsanata-  
vaqueroji icanquerica. <sup>19</sup> Irootaquequea  
amenantajiacaca teequea irarejejiapo-  
jemparoji quepatsi icantacaajia vecarica  
Aapani Irioshi, teitarite iraventamajaji-  
guempariji, manaquea iquenquejajia ve-  
taca: “Yamataaca Aapani Irioshi.”

**4** <sup>1</sup> Iroosacanica imaica, choocatiraja-  
quea icanqueca Aapani Irioshi  
irinetsanajiacajica icanqueea  
irarejetacaajiacaji ontaniqui irimagore-  
jacaantajia quejajica. Irootaquequea  
noncantantajia quempica inchiquiojita  
ochoocatitsi ticaavaquempineca aatoca  
parejetantajaro. <sup>2</sup> Iriatimpajia coramani  
i quemajia vecarquea maasanopae  
icantajia querica Aapani Irioshi,  
cotanquitsiquea iquenquejajia vetaca  
aatoca yagavejitsi Aapani Irioshi  
irinetsanataqueroquea, jero icantantajia-  
carica iriatimpa aatoja yamenajiguorts  
icantacaajia vecarica irimagorejajia que-  
mequea. Ariqueate aquempejiacari  
aatimpajia imaica aquemajia querero  
icamancajica itsavetantajiquerogueti

Quenquetsatsarentsimajaca Oganejenactatsica.<sup>3</sup> Cotanquitsiquea aroguenti irimagorejacaajiaque, aatimpajia aventajiacarica Jesoquirishito, icanquetari Aapani Irioshi itsavetacojiaqueri-gueti choviquijianacajica, icanti:

“Nocatsimamajajaqueri nocantantacaca:

‘Iroosacanica imaica aatojate narejetacaajiacaritsi ontaniqui nomagorejacaantajiaquemparimeca.’<sup>n</sup>

Cotanquitsiquea iriraquea Aapani Irioshi iteroncaqueroquea maasanopae paesatoniqui iroqueragueti ipeacaague-tacarogueti quepatsi.<sup>4</sup> Choocatarite itioncacojiqueroquea savincaguiteri sietetapojatsica ocanti:

“Iriraquea Aapani Irioshi imagore-jantacaroqueate savincaguiteri 7, irooriji iteroncaguetaquero maasanopae ipeacaaguecaca.”<sup>o</sup>

<sup>5</sup>Aisa chooca ontaniqui otioncacagueti, ocantiquea:

“Aatojate narejetacaajigaritsi ontaniqui nomagorejacaantajiaquemparimeca.”<sup>p</sup>

<sup>6</sup>Cotanquitsiquea choocatiraja itsipajia irarejetacaajiaquempaca ontaniqui irimagorejacaantajiaquemparica. Irirajia iriquetica itsavetacotimojivetacaca icamantajivetacarigueti shinetaajia-quemparinemeca teequea irarejejajem-paroji irooriji ipigapigatsajacari.

<sup>7</sup>Irootaquequea icantacotsitantacaroca Aapani Irioshi otsipa savincaguiteri ipajitaqueroquea “ocatica savincaguiteri.” Ocoramanivaetapojaji anaana-

guetanajirogueti oshequi ajagantsni iriraquea Aapani Irioshi ichagashirenta-queriquea Taavini itioncantacaca icanti:

“Imaicaquea ocatica savincaguiteri pinquemajiaquerigueti Aapani Irioshi inquenquetsatacacaajia-quempigueti,

aatojate piquishoshirentajiguitsi.”<sup>q</sup>

<sup>8</sup>Arimegueti irimagorejacaajiaquerime Josoeni igonorojia, aatomequeate ocoramanitapojaquigueti iquenquetsatacotirome Aapani Irioshi otsipa savincaguiteri irimagorejacaantajiaquemparica.

<sup>9</sup>Irootaquequea itsatantajitacaroca iriraquea Aapani Irioshi irimagorejacaajiaqueriquea maasano yashintajiacaca.

<sup>10</sup>Maasanotari imagorejacaajiguica Aapani Irioshi aatoquea yatsipeventajajarotsi ipanquenajavetacaca irimagore-jacotapojaqueroquea,<sup>r</sup> manaqueate iquempejajari Aapani Irioshi iriatimpa imagorejaquequeate paesatoniqui iroqueragueti iteroncaguetaquerogueti ipeacaaguecarogueti maasanopae.

<sup>11</sup>Iroosacanica imaica jaameshiatsi antampishiventamajateroja aguijamajata-naqueriqueate Aapani Irioshi aatonijite aquempejajaritsi iriatimpajia coramanipaequitica teeca inquemisanta-jigueriji, manaqueate antsipatsipai-quempari amagorejajapojaje.

<sup>12</sup>Maasanoqueate iguenquetsatsare Aapani Irioshi anijaque aisa caaviji agavejamajati. Oquempevecaroquea cotsiro tsaampitsantsameniri mavite otsaampinampitaque cotanquitsiquea caaviji anaquieroqua, agavejaquequea onchagashirentajiacijkeate ashirequi

n 4.3 Sar. 95.11. o 4.4 Jen. 2.2. p 4.5 Sar. 95.11. q 4.7 Sar. 95.7-8.

r 4.10 Ocaticaquea teequea oncanteji aato acatsiqueti acaniqui quepatsiqui. Choocaquea mavite ocantacoquea: (1) Maasano yashintajiacaca Aapani Irioshi aato imaica yatsipeventajajarotsi ipanquenajavetacaca cameetsanjite irimeshiaqueriniji, yagataquerotari Jesoshi imetojaventajiacajigueti ishetacojiaqueri maasano aventajiacarica. (2) Aisa ocantacotaquero arejejiaquempagueti inquitequi irimagorejacaamajajiacaji maasano yashintajiacaca.

quejetaca tsaampitsantsameniri osatajavaecajigueti agaviroqui irooca aguesaqui, aisa oguisotoaguetaquero- queate maasanopae aquenquejajaqueca irooca cameetsari irooca covaeguishero. <sup>13</sup>Yamenamajatiroquea Aapani Irioshi maasanopae, jero aatoquea quericaca agavejatsineca intsitipitsaquemparie- quea, aisa irioquea cantanquitsineca aricaca apeacaajiaca intaquetica irooca tee.

**Jesoshi iriguenti Asaserorotete  
anajaiguirica maasano saserorotejia**

<sup>14</sup>Cotanquitsiquea chooquea Asaserorotete anajaiguirica maasano saserorotejia. Iriatimpa iriguenti Jesoshi Irijanite Aapani Irioshi. Irootaquequea atsomajanajatsica jenoqui itsipatapoja- jari Iriri inquitequi. Irootaquequea nocantantaquempica quisho oamajate- rojate aventashirentacaca acantajiaque- gueti: Notsaroventacari Jesoshi. <sup>15</sup>Iriraquea Asaserorotete Anaantamajat- tatsica teequea inquempejiguemparji itsipajia teeca iragavejajigueji impintsatacojiacaji yamenajiacajigueti teequeate antampishitashijigueroji covaeguishe- rentsipae. Ashi aatimpa Asaserorotete Anaantamajatatsica yamaenajitiro- queate coramani yatsipevaequitarogueti maasanopae atsipevaecaca aatimpajia, jero aisa yasereserevaequeriquea ampatsini yamenantavetacari intantave- caquea irantacaquerime teeca irinintejii Aapani Irioshi quempetaca yasereserejia- cajigueti aatimpajia imaica incovaeta- caajiacajiniji, cotanquitsiquea iriatimpa teequea iragavejeriji incovaeguishetaca- guemparji. <sup>16</sup>Iroosacanica imaica anquempejiquempejii tapojaquempari cavintsajantamajatantsica savicanqui- tsica imajirontamentoqui, aatojate

atsaroacagarotsija aventanaquempari impintsatacojiacajiniji, aritaque incavin- tsjamajacaji iramitacojiacaji.

**5** <sup>1</sup>Maasanoquea ipeacaajitaca saserorote anaantamajatanquitsica icoguiimojitiri irapicaquintete inintaca- jiqueriquea cameetsanijite irioniji quenquetsatacojiaquerine iramanapini- querigueti Aapani Irioshi, aisa irajaiava- queronijite yaajianaquenerica irojocajia- quenerica Aapani Irioshi. Aisa irioquea jitorejajiaquerineca viratsipae itaapinijiaqueriquea cameetsanijite aatoniji icatsimattimentiritsi Aapani Irioshi igovaeguisherejia. <sup>2</sup>Ariqueate iquempejiacariquea irapicaquinteteni, teetarite intampishitashijigueroji taaca opajitapae. Irootaquequea yatsipetaco- tantajiacarica irapicaquinteteni teeca intsajigueji itimpinashirentantajiana- caca, ipintsatacojiacariquea. <sup>3</sup>Yamenam- quequea ariqueate iquempetacari iriatimpa aisa icovaeguishetaca, jero icantacoguitani yaapinijiguinriqueate Aapani Irioshi viratsipae ijitorejajiaque- neriquea cameetsanijite aatonijite icatsimattimentiritsi igovaeguishere, ariquea iquempetsitaroqua ijtorejajia- queneriquea irapicaquintejiate cameetsanijite aatoniji icatsimattimenta- jiguiritsi Aapani Irioshi igovaeguishe- rejia irashijia iratimpajia. <sup>4</sup>Teequea quericaca inchiquiojitsa impeashi- quempa saserorote anaantamajatanqui- tsica, ijimirinquea iriguentiquea nintacaaqueriquea Aapani Irioshi. Quempetaca Aaronini irootaquequea nintacaaquerica.<sup>5</sup>

<sup>5</sup> Ariqueate iquempetaca Quirishito teequea inchiquiojita impeguempaj i saserorote anaantamajatanquitsica irishineventantajitaquemparica, iriguen- tiquea nintacaaqueriquea Aapani Irioshi

ipeacaacariquea, icocanitarite icantiriquea paesatoniqui:

“Aviatimpa aviguenti Irijani, imaica ocatica savincaguiteri aviro nashimajaca nirijanite.”<sup>t</sup>

<sup>6</sup>Aisa chooca otsipaqui itioncacojiqueroquea icanqueca:

“Aviguenti saserorote, pincoguitempaniquea pisaseroroteguiteni, quempetajimpiqueate Merequisenreni.”<sup>u</sup>

<sup>7</sup>Coramani choocatirajagueti Quirishito acanqui quepatsiqui, irooshipojigueti irimetojaque, yamanqueriquea Aapani Irioshi agavejanquitsica iraavajeri aatoniji imetojitsi, icajemanaque iririjencani yapijipijivaequeneriquea yamanquerigueti, oparijata-naque ijaquija. Iriatimpa iquemavaqueri, iquemisantamajataqueritarite inetsanamajaqueroquea maasanopae inintaguistica. <sup>8</sup>Arimajaveca irio Irijanite Aapani Irioshi, cotanquitsiquea yatsipevaecaqueate cameetsanijite intsaquenijite inquemisantamajajaueri Iriri irinetsanamajaqueroquea maasanopae inintacaamerica. <sup>9</sup>Iroompaquea inetsanamajaqueroquea maasanopae ipeantacaca meshiajiaquerineca maasano quemisantaquerineca netsantaqueroneca icanqueca cameetsanijite incoquempaninijite inchoocajiaque. <sup>10</sup>Irootaquequea inintacaantacarica Aapani Irioshi impeaquempa saserorote anaantamajatanquitsica, inquempeta-jempari Merequiereni.

**Shoshoh povashiantajiguirotsijate pitsaroventajiacarigueti**

<sup>11</sup>Chooca oshequi nonintavecaca nontsatacaaquiaquempime quero ococani ocatica, cotanquitsiquea inchiquioji poanaquero caarica pitsatantajaro.

<sup>12</sup>Piquemitsijavetacaniqueate coramani itsavetacojiqueroquea iguenquetsatsare Aapani Irioshi. Pintsatacaantajiaqueme-queate aviatimpajia imaica, cotanquitsiquea coacojianatsimpiquea intsatacaajitajempi iroquetinica itsatacaajivequem-pica iroaqueragueti. Manaqueate quempetatsitrajampitarite chaajaniquirija tequerataca irishecatempaj, inintajiaqueroquea itsomija. <sup>13</sup>Irirajia-quea coacojianquitsica intsatacaajitajeri iroquetinica itsatacaajiquerica teequea intsajigueji taaca opaji cameetsatatsica, aisa taaca opaji covaeguisherentsipae, manaqueate iquempejiacari chaajani-quiri tequerataca irantsopireje atsomitatisitiraja. <sup>14</sup>Cotanquitsiquea irirajiaquea amejiatsica icomajamajajiaqueate jac itsamajajiaqueroquea taaca opaji cameetsatatsica aisa taaca opaji covaeguisherentsipae. Iriatimpajia iquempejiacari quenquevari shecaguetsica, yagavejajiaquequea inquemajiaava-querouquea managuetanquitsica.

**6** <sup>1</sup>Irootaquequea noncantantajia-quempica imaica jaame anaavaeta-naquero notsatacaaajiaquempica iroaque-ragueti noparianacarogueti notsavetantaquerigueti Quirishito, antsamajajia-querouquea maasanopae Iguenquetsatsare Aapani Irioshi, anquenquevaritan-tanajempaca ashirequi. Aatoja apijipiji-vaitiro intati notsatacaaajiaquempica iroaqueragueti. Jac notsatacaaajiaquem-pirotarite teequea quericaca agavejatsi-neca irimeshiacaanquempaquea inchiquiojtaja. Iriquenti irishetacojita-quequeate irirajia pishoncajanajiqueroca ipanquenajiavecaca metojashirentaque-rimeca, ariqueate incantashitatiaina-quempaquea ishirequi iraventajiaquem-pari Aapani Irioshi. <sup>2</sup>Aisa aatoja aquenquetsatacapinijajirotsi intati

<sup>t</sup> 5.5 Sar. 2.7. <sup>u</sup> 5.6 Sar. 110.4.

quejecaroca ocatica: iviñacajatantajiti-gueti, irooca ipamijitirigueti ishinquire-guishiqui tsaroventajiacarica, irooca intancoretancoreitanajequeate metoja-ripare, irooca aisa savincaguiteri incatsimatantajiaquemparica Aapani Irioshi teeca intsaroentajiguempariji.<sup>3</sup> Iriogueti nintanquitsineca Aapani Irioshi, arimpate antsamajatanaquero-quea maasanopae inintaguequeca.

<sup>4</sup> Choocajiavecaqueate quemajiavecaroca Iguenquetsatsare Aapani Irioshi, cotanquitsiquea yovashiantajianajiro-quea itsaroentajiavecarigueti. Icavintsajamajajiavecari Aapani Irioshi, aisa ichagashirentajiavecariequa Ishire irooca aisa itsajiavecaro caaviji oganejencamajataca Iguenquetsatsare, cotanquitsiquea iriatimpajia yovashiantajianajiroquea maasanopae. Yamenajia-vecaroqueate aisa yonigaimojaquerica Quirishito capichaji iragavejane ironigaamajataquea oncoramanitapoja-jegueti, cotanquitsiquea querocaca icojiacani quempecaquea teeca irameni-majigueroji. Imaicaquea imaica querocampate ancojiaquerini incanta-shitatiantajianajempaca inquempejiana-jempaquea itsaroentajiavecarigueti iroaqueragueti, oquempetacaquea yapijitajiri aisa, yompajacojajiri quea Irijanite Aapani Irioshi, yoguipashiven-tajajajiri aisa, yamenacaajiaqueriquea maasano.

<sup>5</sup> Oquempetacaroquea quepatsi omiguiaatapinitirogueti otejigueti incani, iroogueti tsoroantaguetaquempara-rone panqurientsi ishecajiguetacaca ishineventacaca ashincaroca, iriguenti-quea guitsoroaguequero Aapani Irioshi, icavintsajaqueriquea ashincaroca.<sup>6</sup> Cotanquitsiquea oraqueate quepatsi otsoroantacaca samerento aisa poronquetopae teequea oncameetsapa-tsateji, manaquea incantajiqueroquea:

“Isaa”, iroompaquea intaitijitemparo-quea.

### Aapani Irioshi inetsanamajaqueroquea maasanopae icanqueca

<sup>9</sup> Noquempejiavecaroquea imaica noquenquetsatacaa jiaquempigueti, cotanquitsiquea notsajiaque aviatim-pajia, nopintsajiacaca, imeshiajiaquem-piquea, panaanajiriquea nocantacove-caca iroaqueragueti.<sup>10</sup> Iriraquea Aapani Irioshi icocaniquea itampaticamajaque-roquea maasanopae, jero incavintsajan-tajiaquempica oncoramanitapoja-jegueti, aatoquea ipeacotsitimprotsi maasanopae cameetsaripae pipeacaajia-caca, aisa aatoquea ipeacotsitimprotsi pipintsamajatacarigueti pamitacojiaque-riqueti papitsaroventarijate, pamitaco-guitiriniquea arejevaeca imaica.

<sup>11</sup> Nonintajiaque maasanojiaquea pincoquempanijate pinquempejiaquero-quea imaica pintampishiventamajajiana-queroquea oavaetantanaquempaca pamenamajatantajempaca poguijacoequa onetsanatantajempaca.<sup>12</sup> Teequea nonintajigueji pimperajiguempa, iroguenti nonintajiaque pinquempejia-quepariqueate coguitatsica atsipetaco-vaetanquitsica tsaroventamajajianaca-rica, iriojiaqueate icavintsajamajataque Aapani Irioshi yojocajiaqueriquea icantacaajiaquerica.

<sup>13</sup> Coramani iriraquea Aapani Irioshi icanqueri Averaameni inchoocaque irijanite, cotanquitsiquea teequea incanteji: “Yamenaquea anaaque-naca teequea namataimatempají”, teetarite inchoocateji anaquerineca iriatimpa. Manaquea icantaque: “Arimaja nonetsanaquempiro, naroguentitari Yave cantaquempica.”<sup>14</sup> Ariqueate icanqueri: “Arimajaca noncavintsajamajauempi noshequia-majaqueriquea pinchoviquijiana-

queca.”<sup>v</sup> <sup>15</sup>Iriraquea Averaameni teequea imperatemparoji yoguijaque-rogueti, manaqueate yoguijaguitiniquea irinetsanataquerotajate Aapani Irioshi maasanopae icanqueca, iroompaquea inetsanamajaqueroquea.

<sup>16</sup>Cotanquitsiquea iriraquea caquinte taaca opaji ininqueca incanqueriquea itsipa, ininquegueti inquemisantamaja-queriquea, yaventacocaroquea ivajiro anaquerica, iroguenti icanqueri: “Arimajaca nocanque, yamenaqen-queate Aapani Irioshi tee nontojeim-tempaji. Oraqueate managueti namata-vijaquempiquea incatsimataquena-queate.” Iquempetaquerogueti imaica itsaque itsipa teequea iramatavijeriji.

<sup>17</sup>Irootaquequea iquempetacaancaroca imaica Aapani Irioshi, ininquequea intsajiaque irirajia incavintsamajiaqueca aatoquea icantashitatigarotsiquea icantajiaquerica, icantantacarica: “Nonetsanamajaqueroja maasanopae nocantajiaquempica, naroguentitari Irioshimajaca. Aatoquea nocantashitatigarotsi.” <sup>18</sup>Pinquenquejeroja, iriraquea Aapani Irioshi iroquetitaqueate icanque incavintsamajajiaqueri tsaroventajiaquemparieca, ariquea icanque aisa irinetsanataqueroquea maasanopae icantajiaquerica aatoquea icantashitatigarotsi, iriguentitari Irioshimajaca, aato yagavejitsi yamataga, aisa aato yagavejitsi itsojega. Irootaquequea atsatsimajatantajiacaroca aventaventaiacrigueti amanajiaquerigueti irimeshiajiajaji, jac imeshiajiajaji. Irooqua shinetcaca-vaejiacajica aguijaguijaiquerigueti irinetsanamajaqueroquea icanqueca.

<sup>19</sup>Irootarite tampishishirentacaajacajica aatonijite otatsincajitsi covaeguisheta-

caantatsica, quishoqua ajirimajajueri aatonijite oguipegajtsi, quejetaca-quea cavorejatatsica agaparancajata-tsica ajiriquiroca quenajarontsi aatoniji itatsinquiero choviga. Oraquea tampishi-shirentacaacajica manaquea agaparan-cavaetapoja antaquerontamorenaquitica intsompoguiremajacaqui Taverenacoro-majacaqui,<sup>20</sup> iquijapojajigueti Jesoshi, iroorijite ijivajivaitacajti inquenque-tsaventapojajaji. Ipeapoja Saserorote Anaantamajatatsica isaserorotepojaji, manaquea incoguitepani irisaserorote-guiteni, iquejetantapojajarica Merequisereni.

#### Jesoshi iriguenti saserorote quempecarica Merequisereni

**7** <sup>1</sup>Coramani iriraquea Merequisere iriguenti imajirojiate Saremejiaqui-tica, aisa iriguenti isaserorotete Irioshimajaca Anaantamajatatsica. Iroompaquea aapojacaguetti savincagui-teri yoanaque Averaameni itsipatsipaitacari yashintajiacaca itonquivojavajari majirontajatiatsica aanaquerica irijanitso-rite yashimirintavacaajiajaca, ariqueate yagavejajiaqueriquea. Iroompaquea icorajejajigueti, isotoanaque Merequisere yaajivajiri icantavajiri: “Incavintsamajajempa Aapani Irioshi.” <sup>2</sup>Arikea iriraquea Averaameni yojocagarantsitanariquea 1/10 (*un décimo*)<sup>w</sup> maasanopae irajaararopae yaapitsajavajirica majirontajatiatsica yashimirintavacaacaguetti. Oraqueate ivajiro Merequisere iroguenti ocanque “majirontatsica tampaticamajatiroca”. Aisa oraquea Sareme iroguenti ocanque “anchoocajiaque cameetsa, teequea taaca opaji ashoshoguitetimentempaji”,

<sup>v</sup> 6.14 Jen. 22.16-17. <sup>w</sup> 7.2 Yojocagarantsitanariquea 1/10 (*un décimo*) ocanque onchoocaquegueti 10 irojocaueneriquea aparo, onchoocaquegueti 100 irojocaueneriquea 10.

irootaquequea icantantajitacarica “Majirontatsica guinentacaantantatsica cameetsa”.<sup>3</sup> Oraquea tioncarentsi teequea oncantaje taaquea irijanintacari aisa taaquea choviquitanaquerica. Aisa teequea oncantaje querocaca ivoantacaca aisa querocaca imetojantacaca, manaquea oquejevecaro teeca irimetojaneteji, irootaquequea icantantajicarica manaquea iquejevecari Irijanite Aapani Irioshi, icocaniqueate isaserorotetini.

<sup>4</sup> Iriraquea Averaameni caaviji yanaantavequea iriguenti choviquijianacajica atimpajia, cotanquitsiquea yojocaganquenerica Merequisere 1/10 yaapitsajavaquerica majirontajatatsica yashimirintajacarigueti, irootaquequea atsatantajiacaca caaviji yanaaque Merequisere, yanaaqueriquea Averaameni.<sup>5</sup> Ocoramanitapojigueti ichoocaque Irevi ichoviquitanaqueca Averaameni. Iroompaequea ocoramanitapojigueti aisa iriraquea Aapani Irioshi iquenquetsashirentacaqueri Moishishini itioncantacaroca icanti: “Iriguenti peajianquitsineca saseroroteja ichoviquijianaqueca Irevi.” Aisa icanti: “Iriraquea saseroroteja irojocajitaquererija 1/10, iriguenti jocajiaquenerineca maasano igonorojia.” Pinquenquejerijate iriraquea ishiraerijia, iriguentijavetaca aisa ichoviquijianaqueca Averaameni, cotanquitsiquea yojocajiaqueneriqueate.<sup>6</sup> Iriraquea Merequisere teequea irioqueate choviquivettemparine Irevi, cotanquitsiquea yaavaqueroquea 1/10 yojocaquerica Averaameni. Ariqueate icantiri: “Incavintsajamajaquempiquea Aapani Irioshi.” Pinquenquejeja iriguenti cantanquitsi imaica Merequisere iquenquetsatacaquerigueti Averaameni icantacoqueca Aapani Irioshi incavintsajamajaqueri.<sup>7</sup> Irira anaquerica itsipa, riotari cantaquerine:

“Incavintsajamajaquempiquea Aapani Irioshi”, irootaquequea imaica itsamajantajitacaroca iriraquea Merequisere yanaaqueriquea Averaameni.<sup>8</sup> Iriraquea saseroroteja yojocajiqueneca 1/10 iriguentijia metojanetatsica, cotanquitsiquea itioncacojiquerigueti Merequisere iroguenti iquempetacaajitacari saserorote teeca irimetojaneteji.

<sup>9</sup> Oraqueate yojocagaranquenerigueti Averaameni 1/10, quempecaquea iriguentica jocagaranquenerica Irevi aisa maasano ichoviquijianaqueca, iriguentijatari ichoviquijiani Averaameni.<sup>10</sup> Oraqueate yoanaquegueti Merequisere itonquivojavajarigueti Averaameni, quempecaquea ariguentica iconoajiacari Averaameni maasano inchoviquijianaqueca, iroorihi quempetaca ichoocajiaque itsinoqui Averaameni.

<sup>11</sup> Coramani itioncacotaquerogueti Moishishini Icantacaantaqueca Aapani Irioshi, ocanquequea iriojia peajianquitsine saseroroteja ichoviquijiani Aaronini, ichoviquitanaqueca Irevini. Irirajia saseroroteja itsatacajiaqueriquea maasano irinetsanajiaqueri, cotanquitsiquea teequea iragavejajigueji saseroroteja irogameetsashirentantajegui. Arimegueti iragavejajiaquerome, aatomequea itioncacojiturime itsipa Saserorote quempetajemparineca Merequisere, aatoca ichoviquiti Aaronini.<sup>12</sup> Aritarite inchoocategueti itsipa saserorote teeca inchoviquitanaque Aaronini, onchoocatejate otsipa Incantacaantaqueca Aapani Irioshi irinetsanajiteca inchoocauenijite itsipa saserorote.<sup>13</sup> Iriraquea icantacojitaqueca quempetajarica Merequisere, teequea irio ichoviquini Irevini, itsipa quea choviquitaqueri teeca inchoocatimateji aparo igonoro peanquitsica saserorote amitacotirica ishiraerijia aretarequi.

<sup>14</sup>Atsajiaqueterite iriraquea Amajirote iriguenti choviquitanaqueriquea Joraa. Irirajiaquea ichoviquijanaqueca Joraa teequea incantajigeriji Moishishini irisaseroroteteja. <sup>15</sup>Ariquea maasano ocatica nocantaqueca imaica oconijamajataquequea aquenquejaquerogueti choocaquea imaica itsipa saserorote quempetajarica Merequisere. <sup>16</sup>Ipeaca-gueti saserorote, teequea inquempevetempariji irirajia ocantacotaqueca tioncarentsi cantatsica iriguentijia peanquitsineca saseroroteteja ichoviquijani Aaronini. Irirampani peanquitsica saserorote imaica, choocaquea iragave-jane, teequea agavejeriji metojagantsi, irootaquequea ipeantacaca saserorote.

<sup>17</sup>Icantiqueritarite Aapani Irioshi: Aviguenti saserorote, pincoguitempanija pisaseroroteguitejena, quempetajimpiquea Merequiereni.<sup>x</sup>

<sup>18</sup>Choocavetaca icantacaantaqueca Aapani Irioshi itioncacaantaqueca coramani, cotanquitsiquea icaratacaapojajiro, teatarite ontampishimajateji, tee agavejamajateji. <sup>19</sup>Jero teequeate agavejeji ogameetsashirentanteji. Cotanquitsiquea choocaquea imaica cameetsamajatanquitsica aguijacoshirenqueca piayaroca, irootaquequea aventaventaqueempaca anquempejipojempariniji Aapani Irioshi.

<sup>20</sup>Tee incantashitempaji Aapani Irioshi, icantamajataque: "Arimaja oca noncamantempica, naroguentitari Irioshimajaca." Oraqueate ipejaiaveca-gueti ichoviquijanaqueca Irevini

saseroroteteja, teequea incanteji Aapani Irioshi incoquempanijate irisaseroroteguitejena. <sup>21</sup>Cotanquitsiquea oraquea ipeacaacarigueti Quirishito saserorote, icantiqueriquea. Choocaquea tioncanquitsica, ocanti:

"Irioquea Majirontamajatatsica cantatsica, aatoquea yamata-gatsi,  
aatoquea icantashitatigarotsi  
icanquempica, icanquequea:  
'Aviguenti saserorote, pincoguitempaniquea pisaseroroteguitejena,  
quempetajimpiqueate Merequiereni.'"<sup>y</sup>

<sup>22</sup>Irootaquequea ipeantacaca Jesoshi amenamajatajeroneca iroquerari paaquito<sup>z</sup> onetsanatimenquempaniji, ocaticaquea anaavaetapojajiro iroquetinica.

<sup>23</sup>Iriraquea ichoviquijanaqueca Irevini peajavetanquitsica saseroroteteja icaramirincavaequequea jmm, teatarite inquishometojanejigueji, imetojajivajiqueate itsipa quejejiapojajarica.

<sup>24</sup>Cotanquitsiquea iriraquea Jesoshi icoguitani yanijaguitini, aatoquea ichoocati quejetimatajemparineca, incoguitempani irisaseroroteguitejena.

<sup>25</sup>Irootaquequea yagavejantacaca incoquempanijate irishemajataqueneri igovaeguishere maasano aventajiaquemparineca aatonijite icatsimatiertiritsi Aapani Irioshi igovaeguisherejia, icocanitarite ichoocati iquenquetsaventajiaqueriquea nintajianquitsica inquempejipojemparsi Aapani Irioshi.

<sup>x</sup> 7.17 Sar. 110.4. <sup>y</sup> 7.21 Sar. 110.4. Oconoagarantaca iroquettinica paperi iguenquetsatsarequi guiriego tee ontionquempaji acaniqui, "quempetajimpiqueate Merequiereni". Maasano itioncaciajero Evereojiaqui 5.6; 7.17. <sup>z</sup> 7.22 Oraquea paaquito iroguenti icantamajajitirica itsipa irinetsanamajajitenerica. Ocaticaquea iroquerari paaquito icantajiacajiquea Aapani Irioshi irishejajeneri igovaeguisherejia maasano aventajiaquemparineca Meshiantatsica metojaventajiacajica. Ochoocaguetaquequea paaquitopae iroquettinica icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

<sup>26</sup>Irootaquequea atsatantajiacarica Jesoshi iriosacanica Asaserorotete Anaantamajatatsica acoacojiacaca. Iriguentiquea Iriomajatatsica, teequea incovaeguishetimatemtempaji, teequeate impeacaaguishetimatemtemparoji covaeguisherentsi. Aisa teequea inconoajiguempariji covaeguishejatsica inquempejiaquempariquea iriatimpajia, aapojajagueti icajemajiri Aapani Irioshi yatsomajanajiri jenoqui ichooatigueti, yanaacaavajiri yanaantamajataque. <sup>27</sup>Teequea ariquea inquempejiguempariji itsipa saserorotejia anaantamajajianquitsica. Iriatimpajia icantacoguitani quea ijitorejajiguiniriquea Aapani Irioshi viratsipae yojocajiaqueneriquea aatonijite icatsimatimentajiguiritsi icovaeguishejiacagueti, iroopampa quea iquejejiaqueneriquea igonorojia. Cotanquitsiquea iriraquea Jesoshi inchiquiojitaquea ipimantaca imetojvantajiacaji iriatimpa. Irooqua imetojimataquegueti aparo, ari iteroncaquero maasano, teequea irinintacojitajeroji irimetojaventajajaji aisa. <sup>28</sup>Oraquea itioncacotanaqueca Moishishini coramani ocani iriguenti peajianquitsineca saserorotejia anaantamajajianquitsica ichoviquijianaqueca Aaronini. Cotanquitsiquea iriatimpajia tee intampishiteji, caquintejiatarite ijamirincati. Irootaquequea icantacaca Aapani Irioshi ocoramanitapoja-jigueti: “Naatimpa naroguenti Irioshimajaca teequea namataguempaji. Iriraquea Irijani incoquempaniquea irisaseroroteguitevi, icocaniquea

icomajamajataca teequea incovaegui-shetimatemtempaji.”

Jesoshi iriguenti asatecapojanquitsica niganqui onetsanamajaquempaniji iroquerari paaquito

**8** <sup>1</sup>Jero ocatica imaica nonintamaja- taque pintsajigue: choocaquea

Asaserorotete Anaantamajatatsica notsavetantaqueca. Imaica chooca jenoqui inquitequi isavicaque itincami-jempequiqui Oganejencamatatsica isenampijacari imajirontamentoqui.<sup>a</sup>

<sup>2</sup>Isaserorotetaquequea Taverenacoroqui, oratica Taverenacoromajatatsica ipeacaacaca Amajirote, teequea impeacaajiguemparoji caquinte.<sup>b</sup>

<sup>3</sup>Maasano saserorote anaantamajatan-quitsica iriguenti ipeashicariquea saserorote anaantamajatatsica iramaquenerinijite Aapani Irioshi irojocapinijiquenerica, aisa irijitorejajia-quenerinijite viratsipae irojocajiaquene-riquea Aapani Irioshi aatonijite icatsimatimentajiguiritsi igovaeguishe-rejia irashi iriatimpajia aisa irashijia igonorojia. Arikea oquejetimotacari aisa iricatica Asaserorotete inintacotimentajiquero onchoocaque irojocajene-rica Aapani Irioshi, ipimantatsinontanta-jaca.

<sup>4</sup>Icocanime inchoocaqueme ocaniqui quepatsiqui aatomequea ipegame saserorote, choocajitarite saserorotejia jitorejajiguinirica Aapani Irioshi viratsipae iquempetacaajaroquea itioncacotanaqueca Moishishini.

<sup>5</sup>Iriatimpajia manaquea yantapinijigui Taverenacoroqui ipeacaajicaca iquempetacaajitacaro icantajiaquerica Aapani Irioshi coramani, manaquea

**a 8.1** Sar. 110.1. **b 8.2** Oraquea quitsarentsivanco icantajitica *Taverenacoro* isaserorotejiavetacagueti coramani, manaquea oquejevecaro ovaantorite *Taverenacoromajaca* choocatatsica jenoqui inquitequi, iriguentiquea Taverenacoromajaca itsaroventantajitarica Aapani Irioshi. (Pamenero otsapa 5.)

oquejevecaro ovaantorite Taverenacoro-majaca inquitequitica. Irootaquequea icantsitancarica Moishishini coraman-niqui iroshipojigueti impeacaquam-paro: "Arimajaca pimpeacaamajaquem-paroja pinquempetacaamajaquemparo-jate nocantaguequempica ontaniqui otsempiqui nonigaaguetaquempiro-gueti."<sup>c</sup> <sup>6</sup>Cotanquitsiquea imaica isaserorotetaquegueti Jesoshi anaavae-quero isaserorotetaquegueti iriatim-pajia, irootarite amaqueroca paaquito anaantavaetanquitsica, anaantavaeta-quetari icantacaacajica irinetsanagueca-jica.

<sup>7</sup>Oganejencamajataquempamegueti iroquetica paaquito, aatomequea inintacojitirome otsipa. <sup>8</sup>Cotanquitsi-quea Aapani Irioshi teequea irishineven-tajiguempariji irirajia itioncaqueneca Moishishini, teetarite irinetsanamajate-roji icantajiaquerica. Irootaquequea icantantacaca iriatimpa:

"'Oncoramanitapojaxegueti nompea-caaquenempari inchoviquijia-naqueca Ishiraeri aisa inchovi-quijianaqueca Joraa paaquito iroqueratajatsineca.' Irootaque icanke Amajirote.

<sup>9</sup>'Aatoja noquempetacaajarotsi paaquito nocantajiavecarica choviquijianaquerica nacatsajianajirigueti noguisotojaijai-rigueti Ejepitoqui, teetari irinetsanapinijigueroji nocantajiavecarica paaquitoqui-tica.

Irootarite nopitsocapitsatantanacarica.  
Irootaque icanke Amajirote.

<sup>10</sup>'Jeroquea paaquito nompeacaaje-nemparica ishiraerija oncora-manitapojaxegueti.' Icantiquea Amajirote:

'Noamajaqueneri nogantacaanta-neja iguenquejanejiaqui, nontioncantsitenempari ishirejiaqui. Naroguentiquea irioshiquempaca, iriojiaquea nashintajiaquempaca.

<sup>11</sup>Aatoquea quericaca cantajiritsi igonororojia aisa ijitanepae: Intsishiatsi pintsatavaquerija Amajirote, maasanotari intsajiaquena, intsajiaque maasano teeca iranaanteji aisa anaantajiatsica.

<sup>12</sup>Nompintsatacojiguempari nompea-cotsitajempari igovaeguishe-reja,

aatoquea noquenquejajirotsi ipeacaaguishevecaca.'<sup>d</sup>

<sup>13</sup>Oraqueate icantacoquerogueti Aapani Irioshi ocatica paaquito "iroquerari", iroguenti ocanque opijaaro iroquetinica coramanipaequitica. Oraqueate iroqueti-nica paaquitoquitica opaesatotacovaeta-naque, iroshipoji ompeanajempa.

### Taverenacoro quepatsiquitica aisa otsipa inquitequitica

**9** <sup>1</sup>Oraqueate iroquetica paaquito, iroguentiquea icamanquerica Aapani Irioshi intsatimentajiaqueniji quero incojiaquempani intsarovenquem-parigueti aisa impeacaajiaquenempari-gueti tsovironaquí quepatsiquitica irashintaquempaca. <sup>2</sup>Ipeacaajiacanari quitsaarentsivanco icantajitiro Taverenacoro. Ariquea oticaamorenataca ovagantepojacagueti. Intsompoguiguite-pojaquegueti icantajitiro Igovejenarequi irooriji irashi Aapani Irioshi, ochoocatantapojacaro tsivorentsi manaquea ojerenquijerenquiatacotaca, aisa chooca mencotsi itaromaantajita-roca pan ipeacaajicanarica. <sup>3</sup>Antaque-ronta tsipamorenatapojatsica

<sup>c</sup> 8.5 Eeq. 25.40. <sup>d</sup> 8.8-12 Jer. 31.31-34.

ochoocaque otsipaguite icantajitica Igovejencamajarequi inatojencatapojacagueti Aapani Irioshi.<sup>4</sup> Ochoocaque ashi iroatimpa itaantajitaroca casancavaneri, yapamancajiticá cavorejatatsica ooro. Ochoocatsita aisa inchacotanaqui icantajitica *aareca* ashi paaquito<sup>e</sup> yapamanquitsitantajitaro oroqui.

Oraqueate intsompoguiqui inchacotanaqui ariuea osavicaque gorintenaqui ipeacaantajicaroquea ooro yoguijantajitaroca manaa, otsipatsipaicaro igitiro Aaronini peshiananquitsica, aisa mavite mapicotia itioncantacaroca Aapani Irioshi paaquito.<sup>5</sup> Oraqueate osavoqui inchacotanaqui qui itsiquirijapinijitirogueti iriraja viratsipae aatonijite icatsimatentiritsi Aapani Irioshi igovaeguishereja choviquijancajica, ariueate ichoocajiaque mavite irashivantijite Aapani Irioshi, ipeacaajitaca cavorejatatsica ooro, cantashivanquijiacaquea ishivanquipae. Ipajitaca quea querovipae. Oraniquiqueate oraniqui ariuea icoraquepiniquequea Aapani Irioshi iriatimpa itsirencashimpouquirerejavaequequea. Imaica ariotapoji nocamantajiaquempica, aatoquea noguisotoamajatirotsi maasanopae.

<sup>6</sup> Oraqueate iteroncamajajiaquerogueti ipeacaajiacarogueti maasanopae, iquiaquijaitapinique saseroroteja savincaguiteripaequi isavicaventajiaquerroquea icantaguequeca Aapani Irioshi, cotanquitsiquea iroguenti iquijantapojaca iroquetiguitepojatsica.<sup>7</sup> Teequea inquiaquijaitantajiguemparojo otsipaguite intsompoguiremajacaqui. Iriguentiquea quijantaro saserorote

anaantamajatanquitsica. Iriatimpa apaniro iquiji apajencaro savincaguiteri ajagantsinipaequi. Aato iquijashita aatogueti yaajatanontanaca iriraja viratsipae aatonijite icatsimatentiritsi Aapani Irioshi igovaeguishere teeca intsatacoguempaji iriatimpa aisa ignorojia.<sup>8</sup> Iriraquea Ishire Aapani Irioshi iquenquejacaajaciapiroquea maasanopae ocatica cameetsanijite antsajiaqueniji, choocatirajagueti iroquetica Taverenacoro, tequeratirajira ironigagajiro quero ancojiaquempani anquijantapojempac Igovejencamajarequi.<sup>9</sup> Ocemeetsavaeque anquenquejajiaquerojate cameetsanijite antsajiaqueniji maasanopae yojocajiquenerica Aapani Irioshi aisa maasano viratsipae ijitorejajiquenerica teequea iragavejajigueji irishejiaqueroqueate igovaeguishereja amajiaquenerica Aapani Irioshi aatonijite icatsimajiguiritsi, irootaquequea icantacotantaguitanica omintsaroshirentaguitirini yamenajiaquegueti icovaeguishejiaca.<sup>10</sup> Tequeratagueti incoraquetejii Quirishito, icocaniquea iquenquejajiaque iriatimpajia taaca opaji irishecjajiguetempaca aisa irimirajiguetempaca teeca incantimentantajiteji, irooca aisa quero incojiaquempani inquivatsinojiaquempagueti, aisa otsipapae itsatacantajitica tsinotsiquatica. Ocemeetsaveca coramani, cotanquitsiquea imaica icantashitatija-roquea Aapani Irioshi maasanopae.

<sup>11</sup> Jac icoraquequititarite Quirishito ipeaca Asaserorotete anaajiguirica maasano saseroroteja, irisaserorotetacota-quero cameetsaguetanquitsineca.<sup>f</sup> Ocoramanitapojigueti yatsomajanaja

e 9.4 Ocatica *paaquito* ocantacoqueca iroguenti yojocauenerica Aapani Irioshi Moishishini. Pamenero itsavetacojiquerogueti *paaquito* isavivanaqui otsapaqui 7.22, iro tsatacaaquempirone. f 9.11 *irisaserorotetacotaquero cameetsaguetanquitsineca*. Chooca mavite otsipa paperi iroquettinica iguenquetsatsarequi guiriego ocanti: “isaserorotetacotaquero cameetsaguetanquitsica”.

jenoqui iquijantapojaro Itaverenacorote-majaca Aapani Irioshi caavijica anaaque oganejencamajataca, teequea irioquea peacaajiguemparone caquintejia, aisa teequea onchoocateji ocaniqui quepatsiqui.

<sup>12</sup>Oraqueate iquijapojirogueti Igovejenca-majarequi ichoocamajatigueti Aapani Irioshi, teequea irooqua quijacaguerine iriraja caaverapae aisa irijanishigantirena-janiqui caapironcaaripae, iroguentuea quijacaapojajiri iriraja irashi iriatimpa. Aparoqua iquijapojatigui ashijia maasano ivegaratatanontajai aatoniji yashintajia-ja omperashirentajavetacajica ancogui-tempinanijite anchoocajaje iriatimpaqui.

<sup>13</sup>Arimajaca ocameetsaveca iriraja caapironcaaripae aisa caaverapae,<sup>g</sup> aisa intsiquirijaguinatantajiquemparoqua osamamporevaneja orijanishigantirena-janiqui caapironcaaro itaaqueca<sup>h</sup> cameetsa-nijite irisaancatsinotimentanajeni choocaguetai pantatsinotanacarica.

<sup>14</sup>Quempetaca iriraja viratsipae agaveja-veca osaancantiquea maasanopae covaetsi-notantaguetsica, iroompate iriraja Quirishito caaviji agavejamajaque osheshi-rentamajatacaji acovaeguishetacaguetai cameetsanijite asavicaventajanaqueroniji maasanopae icantajicajica Aapani Irioshi anijatsica. Iriraquea Quirishito teequea incovaeguishetimatempaji iriatimpa, ariuea Ishire Aapani Irioshi icocanica ichoocati itampishitacaqueriquea impimanquempaniji yogameetsashirentan-tajajica Aapani Irioshi aatonijite omintsaro-ashirentajaji apeacaagushejiavecaca aantanacajimeca camorecariqui.

<sup>15</sup>Irootaquequea ipeantacaca Quirishito asatecapojanquitsica niganqui onetsanamajaqueempaniji iroquerari paaquito, cameetsaniji

irirajia icajemajiaqueca irashintajiaipo-jemparo inintacaitsicarica caarica teroncajatsi. Imetojaventajiaqueritari yoguipaquijacoventaqueri aatoniji omperaperaashirentajajari igovaegui-sherejia ipeacajaiacaca choocatirajaguetai iroquetica paaquito.

<sup>16-17</sup>Pinquerquejerija inchoocategueti aparo caquinte iroompa intioncanaque-quea paperi incanquequea taaquea ashintajemparoneca maasanopae yashinta-guecaca iriatimpa oncoramanitapojaquegueti imetojanajegueti. Oraqueate aatotagueti imetojitsati aatotaquea inetsanatsijitaro-quea tioncanquitsica, tequeratanica imetojenica. Cotanquitsquea oraqueate imetojanajegueti ariuea iroquenti irinetsanamajajiqueroquea itioncanaqueca.

<sup>18</sup>Ariueate oquempetaca coramani iparianacarogueti iroquetica paaquito, teequea ompariguempa tequeratagueti irashijiteroji iriraja. <sup>19</sup>Jero Moishishini iroquetitaquea yapatsajavantamajajiaque-neriquea maasano ishiraerijia icantague-queca Aapani Irioshi, ariueate yaaquiero-quea imae oveja yajavicamaejitica oquityoncamaetanaque, itsipatacotacaan-tsitaroqua aisa ochajempequijaniquipae isopo, yojocajatsitaroqua irirajaqui irijanishigantirenajaniqui caapironcaaripae aisa caaverapae iconojatsitancacaca oja, ariueate itsiquirijitsitaroqua itioncame-shinatantajicaroca paaquito, iroompaquea iquejetacajajariuea maasano ignororioja itsiquirijantsijigariquea. <sup>20</sup>Ariuea icantajiaqueri: “Ocaticaquea iriraja iroquenti ashi paaquito<sup>i</sup> icamatiajiaquem-pica Aapani Irioshi pinetsanataqueca.”<sup>j</sup>

<sup>21</sup>Ariueate iquempetsitaroqua Taverena-cor ipeacaacarogueti itsiquirijantsijigar-quea iroatimpa iriraja, ariuea iquempeta-

<sup>g</sup> 9.13 Irev. 16.15-16. <sup>h</sup> 9.13 Nm. 19.9, 17-19. <sup>i</sup> 9.20 *iriraja iroquenti ashi paaquito*.

Oraquea iriraja irooqua intsatantajitempacá icantavacaajiaca arimaja irinetsanajiaquero tioncanquitsica paaquitoqui.

caaguecaroqua maasanopae choocatanta-guecaroca ininqueca saserorotejia ashi irisaserorotetegueti.<sup>22</sup> Aritarite ocanque itioncacotanaqueca Moishishini oraqua iriraja irootaquequea osaancantacaca maasanopae taaca opajitapae covaeguishe-tanquitsica. Ariqueate iquempejiaca caquinte aatomegueti ichoocatime metojaventirica ochovivincajatanaque iriraja, aatomequea ipeacotsijitarime igovaeguishere.<sup>k</sup>

**Imetojaque Quirishito cameetsanijite oshetantaquempaca covaeguisherentsi**

<sup>23</sup>Ocaniquiquea ocaniqui quepatsiqui ochoocaveca Taverenacoro aisa choocata-tantaguecaroca intsompoguiqui. Manaquea oquejevecaro iroomajatatsica inuitequitica. Iriraquea saserorote iquijanaque intsompoguiqui, itsiquirijantsiguetaroquea iriraja viratsipae ijitorejancarica cameetsanijite osaan-guetajempa. Cotanquitsiquea oratica inuitequitica ocoacomajacaquea otsipa caavijica anaavaequereroquea iriraja viratsipae.<sup>24</sup> Pinquenquejerojate imaica, imetojaventajiacajigueti Quirishito teequea irooqua inquijantempaji Taverenacoro ipeacaacaca caquinte quempevecaroca iroomajatatsica, manaquea iquijantapoajaro inuite ichoocaquegueti Aapani Irioshi iquenquetsatacoventajapijajiji.<sup>25</sup> Aisa teequea inquijeji inuitequi cameetsaniji impimampimantavaequeempame-quea, inquempequemparimegueti saserorote anaantamajatanquitsica quepatsiquita iquijapinitajini Igovejen-camajarequi Aapani Irioshi ajagantsini-paequi iramacotapinitaquiensi iriraja teeca iro irashi.<sup>26</sup> Arimegueti onquem-petaquempamegueti imaica, irantsipe-tsipepiniquempamequea iroqueragueti

ipeacaacarogueti Aapani Irioshi quepatsi arejevaeca imaica. Cotanquitsiquea imaica iroshipojajegueti onteron-capojajempagueti ajagantsinipae, aparo icoraquequiti imetojaquitatigui cameetsanijite irishemajajiacajironijite Aapani Irioshi maasanopae agovaegi-sherejia impeacomajatajemparoniji.

<sup>27</sup> Maasanomajaca caquinteguetatsica imetojimaque aparo, iroompaquea incanque Aapani Irioshi queri oananquitsineca inuitequi, aisa queri oananquitsineca camorecariqui.<sup>28</sup> Ariqueate iquempetaca Quirishito aparo imetoja-quiti imetojaventajiaquitiri caramirinca-vetananquitsica caquintejia cameetsaniji iraitsijianaqueriniji igovaeguishe-rejia. Oncoramitapojajegueti incoraquetaje aisa, cotanquitsiquea aatoquea irooqua icoraquetashitajatitsi irimetojaventajajeriequeate covaeguishe-jitsica, iroguentiquea incoraquetashitajate irajajajateriquea maasano oguijajavajirica.

**10** <sup>1</sup>Oraquea itioncacacaquerica Aapani Irioshi Moishishini manaquea oquejevecaro ovaantorijen-cate intati cameetsaguetatsica coramanivaepojatsineca. Teequea onquejemajatemparoji vaantorijencataacaroca, irootaquequea teeca agavejantempaji itioncacotanaqueca Moishishini oganejencashirenteriji quempejiquem-pejipojajinerineca Aapani Irioshi ijitorejapinijitaquenerigueti viratsipae ajagantsinipaequi.<sup>2</sup> Agavejaquemegueti, incaratacaapojerome ijitorejapiniquerigueti. Irisaancashirentaquerimetari aparo, ari oncaratapojeme, aatomequea iquenquejacotajime: “Choacasacanica nogovaeguishere.”<sup>3</sup> Cotanquitsiquea ijitorejapinijiguinirigueti Aapani Irioshi viratsipae icantacoguitani ajagantsini-

k 9.22 Irev. 17.11.

paequi, irooqua quenquejacaapinique-riquea choocasacanica igovaeguishereria. <sup>4</sup>Teetarite agavejempaji iriraja caapironcaari aisa caavera oncataroguero covaeguisherentsi.

<sup>5</sup>Irootaquequea, icoraquequitigueti Quirishito ocaniqui isaviji quepatsiqui, icantantacarica Aapani Irioshi:

“Teequea pinintajeji irijitorejajitempiriji viratsipae irooca irojocajitempiji otsipapae iroguishirejantajitempica, irootar picaquintetsinotacaantaque-naca.

<sup>6</sup>Teequea pishineventemparinica viratsipae irampevaneajitaquemirigueti irooca aisa irijitorejimentajiqueneri igoguisherere.

<sup>7</sup>Ariuea nocanque: ‘Choocana acaniqui, quejetaca itioncacojiquenagueta yampinaicameshinajitaqueca.<sup>l</sup>

Iroguenti nocoraquetashique nonetsanatimenqueroniji pinintagueta jiquenagueta aviatimpa, Aapani Irioshi.’”<sup>m</sup>

<sup>8</sup>Iroquetitaquea icanque: “Teequea pinintajeji irijitorejajitempiriji viratsipae irooca irojocajitempiji otsipapae iroguishirejantajitempica, irooca irampevaneajitaquemirigueti viratsipae irooca aisa irijitorejimentajiqueneri igoguisherere, teequea pishineventempariji.” Irooveca icantacaantachea Aapani Irioshi irinet sanajitaqueca itioncacaquerigueti Moishishini.

<sup>9</sup>Iroompaquea icanque Quirishito: “Choocana acaniqui, iroguenti nocoraquetashique nonetsanatimenqueroniji pinintagueta jiquenagueta aviatimpa.” Yaitsitaro-

quea iroquetica itsipacarejitsitaro cameetsanijite impiaanta jemparoniji iroqueratajatsineca. <sup>10</sup>Inetsanamajakerouquea Jeso quirishito maasanopae inintagueta Aapani Irioshi, ipimantatsinotsita apametojaro manaquea oavaetanaje, irooqua icomajareshirentacaantajajica.

<sup>11</sup>Irirajiaquea saseroroteja joriojavyoapinique Taverenacoroqui savincaguitteripaequi isaserorotetapinitigueti, yapijipijitapiniqueneri ijitorejajiniri viratsipae, cotanquitsiquea teequea agavejeroji oncatarogueroji covaeguisherentsi. <sup>12</sup>Cotanquitsiquea iricampani Quirishito Asaserorotemajate aparoquea ipimantaca imetojaventsijigaro covaeguisherentsijia manaquea oavaetanaje, ariuea isenampijapoajari Aapani Irioshi isavicapojaji itincamijempe-quiqui. <sup>13</sup>Chooca imaica yoguijacotaca iragavejamajaquerigueti Aapani Irioshi maasano catsimajajaquerica, ariuea onquejevequemparo Quirishito irovanquegontatsitempariquea catsimajia vecarica, <sup>14</sup>iroorijite aparoquea ipimantacagueta yoganejencashirentacaavaetajiriquea icomajashirentacaajajica iroganejencashirentaguitempani.

<sup>15</sup>Ariueate iquempetaca Ishire Aapani Irioshi iriatimpa icantacomajacajiro, iroquetitaquea icanque:

<sup>16</sup>“Icanque Majirontamajatatsica: ‘Jero paaquito nonetsanajaque-nerica oncoramanitapojagueti avisana-jempagueti ajagantsinipae: Noamajaqueneri nogantacaantanejia ishirejiaqui, nontioncantsitenempari iguenquejanjequiaqui.’”<sup>n</sup>

<sup>l</sup> **10.7** *yampinaicameshinajitaqueca*. Coramani tequeratagueta intsjiteroji paperi, manaquea itioncantacaro imeshinaqui, yampinaicacotsitantaraoquea maviquijite inchaquiji.

<sup>m</sup> **10.7** Sar. 40.6-8.    **n** **10.16** Jer. 31.33.

<sup>17</sup>Ariquea icantsitaquea aisa:

“Aatoquea noquenquejimatapiro  
maasanopae igovaeguishereja,  
maasanojia ipeacaaguishevaeve-  
caca.”<sup>o</sup>

<sup>18</sup>Aritarite impeacoma jatanajemparo-  
gueti covaeguisherentsi, aatoquea  
ijitorejimentajitajiro.

**Anquempejiquempejiipojajemparija  
Aapani Irioshi**

<sup>19</sup>Irootaquequea, napitsaroventari-  
jate, aatoca atsaroaca antaro amanapo-  
jiri Aapani Irioshi, iroguentitari  
quijacaanacajine Igovejencamajarequi  
iriraja Jeso quirishito. <sup>20</sup>Itanarejavoqui-  
tajajiro iroqueravovoquita anijashire-  
taca antantatsica avisana jeroniji  
tica amorenavetatsica, irootarite  
quempecaroca itsino ipmantatsinoven-  
tajiacajigueti.<sup>p</sup> <sup>21</sup>Arikea ipeapoja  
asaserorotete anaanta majatatsica,  
isaserorote ventajia queri maasanojia  
yashintajiacaca Aapani Irioshi. <sup>22</sup>Jaame-  
shiati anquempejiquempejiipojajemparija  
Aapani Irioshi, iintsija anintama jateja,  
atsamaja quetarite Iriomajaca  
aventaventaitanta quemparica, itsiquiri-  
jashirentajitacajitarite irisaancaco jitaja-  
jironijite coguisherentsi chagashirenta-  
vecajica, aisa equivatsinotantajaroquea  
saancajari qui. <sup>q</sup> <sup>23</sup>Jaameshiati ancogui-  
tempani antampishitashiguiteroni  
irinet sanataquero maasano atsaveta-  
tanqueca, aatojate asanticotavaji,  
atsajia quetari iriratari camancajica:  
“Nonetsanataca amaja quempiro”,  
icocaniquea inetsanamajatiro

maasanopae icanqueca. <sup>24</sup>Jaame  
anquenquejamajateroja quero ancoque-  
roni antampishishirentavaca ajaquem-  
pagueti ampint satantamajataquempa-  
niji, aisa ampeacaimenquemparoniji  
cameetsaguetatsica. <sup>25</sup>Aatoquea  
avashiantirotsi acapiocapini jiacaguetti,  
choocapaetari quejepinquiero ca  
ovashiantapinitiroca icapiocaguetti,  
manaqueate aatimpa antampishitava-  
caajiana quempaqueate. Arimpa agaama-  
jatan aquempa amenava jerogueti  
iro shipo jaji savincaguiteri incora-  
que tapojajempaca Amajirote.

<sup>26</sup>Antsamajavequemparogueti irooma-  
jatatsica, cotan quitsiquea avashiantana-  
jerogueti, jatanat sigueti ancovaecovae-  
guishetanajempa, teequea inchoocatajeji  
metoja ventajeroneca agovaeguisher.

<sup>27</sup>Iroguentishiatsi choocatan quitsine  
mintsaro amajacajineca oguijave tava-  
jemparogueti oncatsimataca antajinishiatsi  
ompishon caca antajinishiatsi  
camorecariqui quichagan temenquima-  
tatsica, ontaniquiquea interon capoja-  
quem pa maasanojia catsimata querineca  
Aapani Irioshi. <sup>28</sup>Paesatoniqui icanque  
Aapani Irioshi queri caca aatoca i quem-  
santi rotsi itionca cota na queca

Moishishini, choocaguetti mavite  
amen a queca irooca 3, irimeto jajiquer-  
quea, aatoquea ipint sataco jitajaritsi.

<sup>29</sup>Yoga amajatanaca queca covaeguisheta-  
cotarica Irijanite Aapani Irioshi,  
oquejevetaca mana yagatigativa e queri  
intati, icantacoguishetiro iriraja Jesoshi.  
Oraquea iriraja iroguenti ashi paaquito,  
osaancashirenta vecari iroqueragueti.

**o** <sup>10.17</sup> Jer. 31.34. **p** <sup>10.20</sup> Imetoja queguetti Jesoshi opecotarejana que tica amorenata nqui-  
tisca te temporo qui jocagatsica aatonijite iquijajitiro intsompogu iremajaca qui (Mt. 27.51; Mr.  
15.38; Irc. 23.45). Opecotarejana queguetti iroguenti quempecarо yatsipetsinova ecaguetti  
anquia quija itan ajeniji ichoocamajatiguetti Aapani Irioshi. **q** <sup>10.22</sup> equivatsinotantajaroquea  
saancajari qui. Iquenquejaca aajajiro saancajari iquivantajiacaca saserorotejia (Eeq. 29.4) aisa  
irevitajia coramani iramaneriguetti Aapani Irioshi (Nm. 8.6-7). Chooca cantajan quitsica arica  
ocantacotaquero aisa aviñacajataca antaguetti oguijatacota queriguetti Quirishito.

Iquejetacagueti mana icantaguishetaqueri Ishire Aapani Irioshi cavintsajajacajica, caaviji incatsimamajitaqueriquea.<sup>30</sup> Atsamajajiaqueritari iriraquea cantatsica: "Naroguentiquea quenqueventaquerine caquinte. Inchiquojitaquea naatimpa nonquenquejacaantaque noncatsimajiaqueriquea."<sup>r</sup> Otsipationcanquitsica ocanti: "Iriraquea Amajirote iramenitsijiguempari igaquinjetiae incantsitempaquea queri covaeguishetanquitsica."<sup>s</sup><sup>31</sup> iOcovejen-camajataque irajiricantaquegueti Aapani Irioshi anijatsica!

<sup>32</sup>Imaica pinquenquejajiguerojate aviatimpajia coramani iroaqueraguetti pitsivoshirentacotapojajigueti patsipetacovaecaquea yashimirintashirentajive-quempigueti, arimpaquea pitampishijinaquequeate pitsaroventajianacari teequea povashiantajigueroji. <sup>33</sup>Piconagarantajiacaca icaramirincatashivaetana-quempiquea icatsimajitaquempigueti icantaguishetacojiaquempigueti yatsipetacaajitaquempigueti. Aisa oconoaca-quea manaquea pisenampijajavacari papitsaroventarijiate pamenaquiaquegueti iquejetacaajitarigueti iriatimpajia. <sup>34</sup>Pipintsatacojiacari isantanatacojita-queca, aisa yaapitsatsijiquempirogueti pashincaca pishinevaetanacaqueate, pitsajiaquetari choocatarite pashincaca inuitequatica anaavaequeroca, aatotarite oteroncadjatsi. <sup>35</sup>Irootaquea pintampishirentantanaquem-paca, aatoquea pitsarogui, pinquejequerogueti imaica irishinetacaavaetavajempi Aapani Irioshi. <sup>36</sup>Pinquenava-quiero pinetsanatanaquerogueti inintagueticia Aapani Irioshi cameetsan-jite paampojajemparoca icantsijiaquem-pica. <sup>37</sup>Aritarite ocanque Itioncacaanta-queca Aapani Irioshi:

"Irooshipojishiatsi incoraquetapoje coraquetanquitsineca. Aatoquea osamani ipeatsi.

<sup>38</sup> Iriraquea comajashirentanquitsica incoquempani inchoocaguiteni irooriji yaventaguitarini Aapani Irioshi.

Arigueti impianaje, aatoquea noshineventajaritsi."<sup>t</sup>

<sup>39</sup>Cotanquitsiquea aatimpajia teequea anquempejiguempariji pianajatsica oahoaitananquitsineca camorecariqui, iriguentitari aquejetaja aventaguitarinica inchoocatantaguitempamicia.

#### Coramanipaequitica aventashirentajiacarica Aapani Irioshi

**11** <sup>1</sup>Oraquea aventashirentacarigueti Aapani Irioshi iroguenti ocanque arimajaca atsamajajiaque inetsanamajatiro icanqueca. Choocata-rite oganejencatatsica teeca amenajiave-temparoji imaica, cotanquitsiquea aventashirentaquelmpariguetti atsajiaque arimaja amenajiajapajero oncoramanita-pojagegueti. <sup>2</sup>Irootaquea ishineven-tantajiacarica Aapani Irioshi irirajia coramanipaequitica, manaquea yamena-jiaqueriquea yaventashirentacari itsamajajiaquequea irinetsanamajata-queroca maasanopae icantaguequeca.

<sup>3</sup>Oraqueate aventashirentajiacariguetti Aapani Irioshi irootaquea atsatanta-jiacaca paesatoniqui iroaqueraguetti irioquea peacaaguetacaroquea maasanopae quepatsi, inuite aisa maasanopae choocatantaguecaroca. Teequea taaca opaji choocatimatatsineca, cotanquitsiquea icantimaquitigui-quea ariquea octanaca ochoocagueta-naque maasanopae.

<sup>4</sup>Pinquenquejerija Averini yaventashirentacariguetti Aapani Irioshi, ijitoreja-

<sup>r</sup> 10.30 Ireo. 32.35.    <sup>s</sup> 10.30 Ireo. 32.36.    <sup>t</sup> 10.37-38 Avc. 2.3-4.

queneriquea ivira yojocaqueneri, ariuea ishineventantacarica yamena- queriquea quempetaca teeca incovae- guishetimatemppaji. Iriraquea yojocaque- nerica yanaaquerorequa yojocavetacara- rica irira Caini.<sup>4</sup> Imaica imetojaveca- quea Averi, cotanquitsiquea ochoocataji iquenquejacojitajiri yaventashirentacari- gueti.

<sup>5</sup>Ariqueate iquempetaca Enoconi iriatimpa, yaventashirentacarigueti Aapani Irioshi yatsomajantajitanajarica inquitequi maasanotsino, teequea irimetoejeji. Tee irinejajitajeriji irooriji yatsomajanajiri Aapani Irioshi. Aritarite tequeratagueti irantsomajatsinoyeriji, icantacojitaqueriquea irio ishineventaca Aapani Irioshi. <sup>6</sup>Cotanquitsiquea Aapani Irioshi aatoquea ishinetantimatatsi intati aatogueti yaventashirentajitari. Taacagueti nintanquitsineca inquem- jipojajeri iroquetitaja intsamajaquequea arimaja choocasacanica, aisa intsamaja- quequea incavintsajamajajiavaqueri- quea maasano coamajaguetajerineca.

<sup>7</sup>Iriraquea Noeni yaventashirentacari- quea Aapani Irioshi, irootaquequea itsavetacotsicarogueti teeca iramenaji- teji, omintsaroanaqueri ipeacaantanta- nacaroca quenajarontsantsa icantaji- tica aareca, aatonijite yojocajajigatsi arejetapojempagueti agamirijaatantapo- jempaca incani anaaguetanaqueroquea maasanopae quepatsi. Aapojacagueti iquijantanacaca iriatimpa, irijanijiate, imanquigare aisa iraniropae, teequea irojocajajiguempaji. Iquemisanquegueti Noeni yonigaantaqueroquea iquejeta- caantajiacaquea quepatsiquitica, iteroncamajatantajiacaca. Irirampani Noeni yaventashirentacarigueti Aapani

Irioshi yamenancarica quempetaca teeca incovaeguishetimatemppaji.

<sup>8</sup>Ariqueate iquempetaca Averaameni, yaventashirentacariquea Aapani Irioshi, itsaque inetsanamajaqueroquea icanqueca, irootaquequea yoantanacaca icanquerigueti iroanaquequea otsipaqui quepatsi irashinqueparoquea, teequea intsavetempaji querocaca iroanaqueni.

<sup>9</sup>Yaventashirentacariquea Aapani Irioshi, irootaquequea iguintenitmotan- tajiacarica otsipapaequi quepatsi icantacaquerica Aapani Irioshi irashin- queparoquea, manaquea ichocatimo- tantapojaque intati irooriji iquejetaca tequeratatiraja irashintemparoji. Iroguenti ichocatantapojaca quitsaa- rentsivanco. Iroompaquea ariuea iquempejiaca Ishaaconi aisa Jacovoni, ariqueate iquempetacaajiacari Aapani Irioshi iriatimpajia icantajiaqueriquea irashintamajaquemparoquea oratica quepatsi. <sup>10</sup>Icocani iquempetaca imaica Averaameni irooriji itsamajaque intsipatsipaitajempariquea maasano tsaroventajianquitsineca iriguintenitan- tapojajemparoquea oganejencatsoviro- naquiripae quishomajatanquitsica iquenquejacotsitacaca Aapani Irioshi ipeacaajiacanarica.

<sup>11</sup>Ariuea oquempetaca Sarani iriatimpa jac quenquevaromajavetanaja aatometarite ichocatime irijanite, cotanquitsiquea aventashirentanacari- quea Aapani Irioshi, amenaquetari irinetsanamajaqueroquea icanqueroca: “Inchooaque pirjanite”, irootaquequea ichocatantacaca. <sup>12</sup>Ariqueate iquempetaca iriatimpa Averaameni jac quenque- varimajavetanaja aatomequea irijanin- tame, cotanquitsiquea irijanintaca,

**u 11.4** Aapani Irioshi teequea irishineventemparoji *Caini*, teequea iraventashirentemparinica iramaquenerime viratsi, iroguenti yaavetanacanari tsoroanquitsica iniganquitejirequi. (Pamenero Jen. 4.3-10.)

iroompaquea icaramirincavaetanaquea ichoviquijianaqueca ooqueate teequea iragavejajitajeriji intsajajeriji, manaqueate iquempemirincavaetana-  
cari impoquiropae irooca aisa impanequi ocaratsapijajaquitica  
inirojani quentijani.

<sup>13</sup>Maasanojia noquenquetsatacojia-  
queca imaica icancani yaventaventashirentajianacari Aapani Irioshi imetoja-  
quegueti. Teequea iramenajavetanajem-  
paroji irinetsanateroji Aapani Irioshi maasanopae icantajiaquerica, cotanqui-  
tsiquea ishineventacotsivaecaro quejetaca yamenacovaequero jmmtaco-  
vaeque. Yamenacojiaca ocaticaquea quepatsi teetarite iriguintenimajatempo-  
roji, quempeca iquenaquenavaeque intati. <sup>14</sup>Oraqueate iquempejiaquero-  
gueti imaica iro intsantajitaquempaca icoaguetaquero iriguintenimajatantapo-  
jajempaca. <sup>15</sup>Iroomegueti inquenqueja-  
cojiaquemequea iguepatsite iquenaque-  
naitantapojacaca, iragavejaqueme iroaroitanajeme. <sup>16</sup>Cotanquitsiquea  
iroguenti inintajiaquequea otsipa caavijica oganejencavaeca iriguinten-  
tantajiajapojempaca, irootaquequea inquitequifica. Irootaquequea teeca impashiventantempaji Aapani Irioshi  
icantajiaquegueti: “Iriguenti Nirioshite”, ipeacaajajanaritari tsovironaqui-  
japae inconoavacaajajapojempa.

<sup>17-18</sup>Quempeca coramani ininquegueti Aapani Irioshi iramenanquempari Averaameni icanqueri: “Paanaquerija pirjanite Ishaaco pintaaquenarijate.” Iriatimpa itsavetaca icanquerica Aapani Irioshi: “Iriguentiquea nocantacotsita-  
caca Ishaaco pinchoviquivaetantana-  
quempaca”,<sup>v</sup> cotanquitsiquea yaventashirentanacari, yaantanacarica intaaque-

rimequeate. <sup>19</sup>Itsaque intaaquerigueti Ishaaco iragavejaque Aapani Irioshi irovochantajeri. Aritaque quejetacaquea metojaque iroompa pochatanaji yaavajiri.

<sup>20</sup>Iriraquea Ishaaconi yaventashirentanacari Aapani Irioshi, icantantacarica Jacovoni aisa Esaoni incavintsajamaja-  
queriquea Aapani Irioshi oncoramanita-  
pojajegueti.<sup>w</sup>

<sup>21</sup>Iririquea Jacovoni yaventashirentanacari Aapani Irioshi, jero irooshiveca irimetojeme yovajecashitsita igitiquiji-  
roqui itsaroventanacari Aapani Irioshi. Icajemitsitari aisa irijanijiate Jose yamanacoventsitanacariequea incavintsajamajaqueriniji Aapani Irioshi.<sup>x</sup>

<sup>22</sup>Ariqueate iquempetaca Jose iriatimpa yaventashirentacari, irootaquequea iroshipojigueti irimeto-  
janaje itsavetacotsitantacarica inchovi-  
quijianaqueca Ishiraeri, icanque irisotosotoitantanajemparo Ejepito. Iroompaquea icantajianajiri quero incotonquijitajerini.<sup>y</sup>

<sup>23</sup>Irirajia irijanintajiacarica Moishishini yaventashirentanacariequea Aapani Irioshi, irootaquequea itsititantacarica 3 taai iroqueragueti ivoaque, yamenajia-  
queritari igameetsareni teequeate intsaroacaajempari majirontatsica cantajiavecarica irimetojitaraveri.

<sup>24</sup>Ariquea iquenquevaritanajigueti Moishishini yaventashirentanacariequea Aapani Irioshi, irootaquequea teeca irinintantajempaji incantacojiquerij  
iroguenti irijanintajari irorijanite Paraone. <sup>25</sup>Yamenanontantacaca iroguenti intspatsipaitajempari irashijia Aapani Irioshi yatsipetacaajitarigueti, teetari irininteji irishinevenquemparo coguisherentsi shinetcacaanirotaquempa-

v 11.17-18 Jen. 21.12. w 11.20 Jen. 27.27-29, 39-40. x 11.21 Jen. 47.31-48.20.  
y 11.22 Jen. 50.24-25; Eeq. 13.19.

rimeca taampinaca avisanaque.<sup>26</sup> Aisa yamenaque caaviji anaaque ocameetsavaeque irantsipeventavaequepariquea Quirishito, anaavaequeroquea irashinquemparogueti maasanopae choocague-tatsica Ejepitoqui. Iroguentiquea yoguijacotaca incavintsajaqueriquea Aapani Irioshi oncoramanitapoajegueti.

<sup>27</sup> Yaventashirentanacariquea Aapani Irioshi, irootaquequea yovashiantanacaroca Ejepito, caarica itsaroacaantantari majirontatsica icatsimaquerigueti, manaquea iquenavaquero quejecaquea yamenaqueri irira Teeea Iramenajiteji. <sup>28</sup> Yaventashirentanacariquea Aapani Irioshi, irootaquequea choocatirajagueti Ejepitoqui ipariantanacaroca icantajitica Paashicoa, icamtajiaqueri igonorojia irinetsanatavquero icanquerica Aapani Irioshi, itsiquirijantaguetacaroca iriraja ovoapaequi osotomorotapojacagueta itsovironaquitepaequi, cameetsanijite incoraquequeguet i rashivantite metojaquiaquerineca iriquetica voapojatsica, aatoquea imetojitajiguiri irijanijiate ishiraerijia.

<sup>29</sup> Aisa irirajia ishiraerijia yaventashirentajianacariquea Aapani Irioshi, irootaquequea ocaranarejajatantanacaca niganquija Quentijani Quityoncajaro oroguitetantanacaca isaquiritsaejianaquequea imontemon-teitanacaroquea intatiquieroqui. Cotanquitsiquea iroompapequa iquejejiavepojaca-quea igoaretajate Ejepitoquitica patimajia-vecarica, ariqueate octanaca oquejetanajaquea aisa, yojocajajiacaqueate maasano.

<sup>30</sup> Irirajia ishiraerijia yaventashirentajianacariquea Aapani Irioshi, irootaquequea otaromaquierejantanacaca otantotantavetacaca Jerico, yanquitsaepinijiaccarogueti 7 savincaguiteri.

<sup>31</sup> Oraquea Iraava icotpapinijiavetaca yoashitapinijiiguro, cotanquitsiquea aventashirentsitajari Iroshimajaca,

irootaquequea icoraquejiaquegueti ishiraerijia amenanontantajatiacsica aahaitantavacarica cameetsa, teeca irimetojantajitemparoji iteroncjajatiquerigueti teeca inquemisantajigueriji Aapani Irioshi.

<sup>32</sup> ¿Queri itsipa nontsavetantajiaqueca? Aatoquea nagavejitsi notsitacacovaetiritsi maasano quejejiacarica Jereonini, Varaconi, Sasonquini, Jepeten, Taavini, Samoirini aisa itsipajia tsavetantajatsicani. <sup>33</sup> Iriatimpajia yaventashirentanacariquea Aapani Irioshi, irootaquequea yagavejacaantajiacarica. Iconoagarantajiacarica yashimirintajiacari gunteninintispaequitica, ariquea yagavejajiaqueri. Iconoagarantajiacarica yagavejacaqueri irinetساناتا-mentajiaquerinijite igonorojia iriguinentijiaquempaniji cameetsa, aisa yamena-cojiaquerica icamtajiaquerica Aapani Irioshi irinetساناتا-quentemparica. Itsipajia yamimicacaajiacari ajitsipae. <sup>34</sup> Itsipajia yanaajiaquerpaamari osamimincavaevetacagueta. Itsipajia inintajivequeate irimetojantajiaquemparime tsaampsantsameniro. Itsipajia yyoquijijianacaqueate teequea intampishijajieji, cotanquitsiquea yogueshijajiriquea Aapani Irioshi itampishitacaajajiri. Itsipajia teequea intampishijajavetempaj, cotanquitsiquea oraqueate itampishitacaajiaquerigueti Aapani Irioshi irootarite itampishitantanacaca, yashimirintajiacarigueti catsimajiaquerica yagavejajiaqueriquea yuguishiantajiacarica maasano.

<sup>35</sup> Oconoagarantajiacarica manquigarentsijia aventashirentanacarogueti Aapani Irioshi itancoretancoreitantanajaca ometojacovecagueta. Itsipapae manaquea yatsipetacaajivecar, icantajivecar iroguipaquijajitajeri aatogueti itsaroventajajaritsi Aapani Irioshi, cotanquitsiquea teequea irovashiantaj-

gueroji, itsajiaquetari aatogueti yovashi-  
antajiguiro intancoretancoreitanaje-  
oncoramanitapojaxegueti iroaroaitanaje-  
quea ichoocatigueti Aapani Irioshi,  
anaavaetaqueroquea intancorejanirove-  
tanajempagueti teeca intsaroventaji-  
guempariji.<sup>36</sup>Iconoagarantajiac  
itsipajia yatsipetacovaeca icantagushe-  
jiaquerigueti ishirontimentajiacarigueti,  
ipasapasataquerigueti. Itsipapae  
iroguenti yoishotantajicariquea  
cavorejatsari isantanatacotsijitariquea.<sup>37</sup>Iconoagarantaca imetojaqueri  
itsinatsinatantavaecari mapi, itsipapae  
manaquea iquitencaqueri mavicotate  
serochoqui. Itsipapae iroguenti  
imetojantajicari tsaampitsantsameniro.  
Itsipapae manaqueate ishiashiavaegui-  
tani, iriguenti iquitsaajiacaca ovejame-  
shina aisa caaverameshina, teequea  
irashintimatempaji. Yatsipevaeca  
icoguitejacovaeca, aisa yatsanajivaecari  
icatsimacatsimatasjijivaecari.<sup>38</sup>Ishiapi-  
tsajianacari catsimajiaquerica yoayoai-  
vaetanaquequea oquitamampororoita-  
pojaquegueti irooca aisa otsempitapoja-  
cagueti. Itsitijiaca imperitamoroqui aisa  
omoroguecagueti quepatsi. Irirajaquea  
quempejianquitsica imaica caaviji  
yanaavaetaquequea icameetsavaejiaque,  
yanaajiaqueriquea itsipajia quepatsiqui-  
tica.

<sup>39</sup>Iriraquea Aapani Irioshi ishineventa-  
jiacariquea yamenajiaquerigueti  
yaventashirentajiacariquea, cotanquitsi-  
quea imetojajiaquegueti tequerataquea  
iramenajigueroji maasanopae icantaca-  
jiaquerica Aapani Irioshi.<sup>40</sup>Yamenaque-  
quea iriatimpa caaviji anaaque ocamee-  
tsavaeque intsipatsipaitacaji aatimpajia  
tsaroventajiaquemparineca Quirishito  
oncoramanitapojaxegueti, incomajashi-

rentacaamajajiacaji aatimpajia  
maasano.

**Jaame amenashirentaguitarini Jesoshi  
ashirequi**

**12**<sup>1</sup>Imaica atsajiaque icaramirinca-  
vaequequea coramanipaequitica  
quejetaca notsavetacotsitacaca  
nigaantajiaqueroaca arimaja yaventashi-  
rentajiacari Aapani Irioshi, yanquitacoji-  
acajiquea, quempetacaquea amenajigue-  
rica shiashiavijijiatsica iramenantajita-  
quemparica queri shiamajatatsica,  
iroosacanica jaameshiatsi ovashianta-  
majatanaqueroja maasanopae tenatava-  
cajineca aisa coguisherentsija avironca-  
jiavacajineca, jaameshiatsi anquenava-  
quero ashiaguiteni ampampiavoquima-  
jatanaquero inintacaajitacajica.<sup>2</sup>Jaame-  
shiatsi amenashirentacomajajianaqueri-  
quea Jesoshi pariacajaiacajiroca  
atsaroventantanacarica aisa irio  
teroncacajaiacajirone antsaroventanta-  
majatanaquemparica. Iriatimpa itsatsita-  
caro irishinevaepojajempa, irootaque-  
quea yatsipevaetancaroca coroshi,  
teequea oguipashiventajeriji irimetojan-  
tajitemparogueti, iroompaquea isenam-  
piapojajari Aapani Irioshi imajironta-  
gueti imajirontamentoqui, isavicapojaji-  
quea itincamijempequiqui.<sup>3</sup>

<sup>3</sup>Pinquenquejajiguerija iriatimpa  
atsipetacojacarica covaeguishejatsica  
catsimacatsimavaequerica, aatonijite  
pimagoshirentapojitsi, aatonijite  
pishimampoajancamajatanaca povashianta-  
jiguirotsi maasano.<sup>4</sup>Tequeratatratakari  
osotoajatacitempiro piriraja pashimirinta-  
jencatacarogueti coguisherentsi.<sup>5</sup>Pipeaco-  
jianajaro quenquetsatsarentsimajaca  
tampishirentacaajiaquempica  
ipejaiquempigueti irijanijiate, ocanquetari:

**z 12.2 itincamijempequiqui.** Oraquea itincamijempequi, irootaque yamejiaaca coramani  
iroguisavicaqueri ishineventamajatacaca.

"Irijani, aatoja pimanintavaquero-tsija incantomajaqueempigueti Majirontamajatatsica,  
aisa aatoquea pishimampojancama-jatanaca incantimentajempiro-gueti pipeacaaguishevecaca,  
<sup>6</sup> iroorijite Majirontamajatatsica icantomajajiguriquea ivintsarejia,  
aisa icatsimatimentajiguriquea igovaeguishere maasano ipejai-avajica irijanijate."<sup>a</sup>

<sup>7</sup>Incantomajaqueempigueti Aapani Irioshi manaquea pantsipetacotava-quemparo, manatari ipeajiaquempi irijanijate icantomajimentantajaqueempiroca. ¿Choocampate chaajaniquiri teeca incantomajeriji iriri? <sup>8</sup>Ariqueate iquempetaca Aapani Irioshi iriatimpa icantomajajiguriquea maasano ipeama-jaqueca irijanijate. Aatogueti icantomajajiguimpitsi, teequea impeamajatempiji irijanijate, quempetacaquea itsipaquea irijaninquempica. <sup>9</sup>Quempetacaquea chaajaniquitirajajigueti icantomajajacajigueti irijaintajiacajica, manaquea amativicanaquequea amenacotanaqueri-tari cameetsani, iriompate Irilanintashi-rentajiacajica caaviji amativicajanaque incantomajajacajigueti cameetsanijite ancoquempani anchoocajiae iriatim-paqui. <sup>10</sup>Iriraquea irijaintajiacajica icantomajajacaji aparopae ajagantsini-paequi queroca yamenaquea cameetsat-sica, cotanquitsiquea iriraquea Aapani Irioshi icantomajajacaji cameetsanijite ancomajamajajiaquempi-nijite anquempetantajianaquemparica iriatimpa yoganejencamajatagueti.

<sup>11</sup>Arimajacaquea teequea ashineventem-

paroji icantomajacantomajajitacajigueti, ogatsireni, oshimampojanacaanacaji, cotanquitsiquea anquenquejacoma jajia-querogeti quero ococani icantomajan-tajitacajica, antsamajaquero itsatacaaji-acajica, manaquea ancomajamajajiana-quempaquea aatoca ashoshoguitetanta manaquea ashinevaetanaquempa.

**Shoshoh pipomatsatirotsishiatsi  
icavintsajamajaqueempigueti Aapani  
Irioshi**

<sup>12</sup>Irootaquequea noncantantaquem-pica pintampishitacaanajero patsanco-vacore aisa pisorocagueretore.<sup>b</sup>

<sup>13</sup>Pimpeacaquempa pampavoquitan-quitsica pinquenantaquempaca<sup>c</sup> aatonijite itacosatsi magotsari, manani-jite impeanajempa.

<sup>14</sup>Cameetsajate paavacaanaquempa-jate, aatoja picatsimatavacaanacatsijate, aisa pincomajamajajiaquempaja, aatotarite yamenimajiguiritsi Amajirote teeca incomajamajajiguempaji.

<sup>15</sup>Pinquempoguijavacaajiaquempaja aatoniji ichoocatitsi pomatsataquero-neca icavintsajiquerigueti Aapani Irioshi, aisa aatoja pisemaneguintavaca-gatsija, inchiquiojita oquejetarotsi quepishishitsaquiero ontsorogueguegui, iroonpaquea pincatsimatavacaajia-quempa, irajajencatsijiavaquempiro caramirincajajatsica. <sup>16</sup>Shoshoh poashiji-guirotsijate manquigarentsi teeca irooqua pashi, aisa aatojate piquempe-jigaritsija Esaoni coramani, teequea inquenquejerinicate Aapani Irioshi icavintsajamajavecarigueti. Pitsajiaque-quea aavetarigueti itase yamanitsiveta-riquia apatacoro isheca iriguentijeguite

**a 12.6** Tsa. 3.11-12. **b 12.12** *pintampishitacaanajero patsancovacore aisa pisorocagueretore*. Manatarite iquejetacaotacaro teeca intampishitashiteroji inintaguetica Aapani Irioshi.

**c 12.13** *Pimpeacaquempa pampavoquitanquitsica pinquenantaquempaca*. Iroguentiquea iquejetacaotaca incanquerigueti: "Pincomajamajajiguempajate aatonijite povashiantacaguiritsi papitsaroventarite teemajaca intampishiteji."

ichoviqui, cotanquitsiquea iriatimpa  
icanqueri ininque inquejetajemparija  
quempetaca iriguentica iriquetica  
voapojatsi cameetsanijite irionijite  
ashinuempariniji oncoramanitapoja-  
gueti maasanopae irojocauenerica iriri  
pariapojsatica. Iroompaquea icanque  
Esaoni: “Iintsiya cameetsavaeque”,  
irorijite irooshipojaque aguerime  
itase.<sup>d</sup><sup>17</sup> Arikeate inintavetaja inquem-  
petajempaquea iroaqueragueti tequera-  
tagueti inquejetempariji iriguentijeguite,  
cotanquitsiquea teequea iragavejajem-  
paji incantashitatiajemparoquea  
icanquerica. Iraitsivatanacaqueate,  
cotanquitsiquea querocampate  
incotajempani, ipomatsaquieroquea.<sup>e</sup>

<sup>18</sup> Aviatimpajia teequea pinquempeji-  
guempariji choviquijianaquempica  
oahoaitananquitsica coramani  
otsempiqui Shinaiqui yagavejajiquero  
impamijiquero. Iriatimpajia iroguenti  
yamenajavaqueroquea osamimicatsem-  
pitanaquegueti, opitsecasecantajenca-  
vaetanaquequea ocanca, ochovigaguite-  
vaetanaquequea jeoc jeoc jeoc.

<sup>19</sup> Iquemajaviaqueroquea tivorentsi  
itivojiqueroquea. Arikea iquemajiaque-  
rigueti Aapani Irioshi iquenquetsatacaa-  
querigueti, arikea icojianaca itsaroajia-  
naque, icantantajiacarica Moishishini:  
“Iintshishatsi aatojate iquenquetsatacaa-  
jajitsi.” <sup>20</sup> Iquempetantajiacaroca imaica  
itsaroantajianacaca irooriji icantajia-  
queri Aapani Irioshi: “Incoraquetima-  
quegueti taaca ipajita incatiaquemparo-  
gueti ocatica otsempi nochoocatanta-

caca pintsinatsinavaequeriquea irooca  
pinquentajiaqueri, pimetojitempariquea,  
irioca viratsi aisa caquinte.”<sup>f</sup><sup>21</sup> iOoshi-  
atsi ocovejencavaequequea yamenajia-  
queca! Icantantacaca Moishishini:  
“Notsaroamajatanaque nocanca  
nompioncavaetanacaqueate.”<sup>g</sup>

<sup>22</sup> Cotanquitsiquea aviatimpajia  
quempetaca jac arejevaetapojaimpiquea  
Shionetsempiqui, Jerosaremaja-  
caqui inquitequitica, irootaquequea  
ichoocatantacaca Aapani Irioshi  
anijatsica. Piquempejitacopojajari  
irashivantijite icaramirincavaeque-  
quea icana itsaroventajiacariquea  
Aapani Irioshi. <sup>23</sup> Pitsipatsipaitapoja-  
jari maasano irijanijiate Aapani Irioshi  
tioncacojiansquitsica inquitequi,  
iquejetacaajajari iriquetica voatsi.<sup>h</sup> Aisa  
pitsipatsipaitapoja-  
jari Aapani Irioshi amenajiguirica maasano caquintejia,  
irio cantatsica queri comajamajatatsica  
aisa queri teeca incomajamajatempaji.  
Arikeate pitsipatsipaitacariquea  
ishirejia comajarijia yogameetsashire-  
tajitajica. <sup>24</sup> Aisa pitsipatsipaitapoja-  
jari Jesoshi asatecapojanquitsica niganqui  
onetsanamajaquejempañiji iroaquerari  
paaquito, irootarite iriraja iriatimpa  
itsquirijaventajitaquempica. Oraquea  
ocantacoquea anaavaequereroquea  
ocantacoquea iriraja Averini.<sup>i</sup>

<sup>25</sup> Iroosacanica imaica pipigatsataritsi  
Aapani Irioshi quenquetsatacaa-  
jiaquempica imaica. Coramani teequea iragave-  
jajigueji irishiapitsatanaqueri pigatsajia-  
vecarica icantajiaevecarigueti acaniqui

<sup>d</sup> 12.16 Jen. 25.29-34. <sup>e</sup> 12.17 Jen. 27.30-40. <sup>f</sup> 12.20 Eeq. 19.12-13. <sup>g</sup> 12.21 Ireo. 9.19.

<sup>h</sup> 12.23 Iriraquea iriquetica voatsi iriguentiquea ashintamajatajemparone yashintaguecaca iriri.

<sup>i</sup> 12.24 ocantacoquea. Oraticaquea iriraja Averini iroguenti ocantacoque incatsimati-  
menqueri Aapani Irioshi metojantsatsica aisa itsipajia covaeguisherjia. (Pamenero Jen. 4.10.) Orampani iriraja  
Jesoshi chovivincajatananquitsica imetojaventajiacajigueti, iroguenti ocantacoque irishetajeneri  
igovaeguisherjia maasanojia aventaventaitanajemparineca. Irootaquequea anaavaetantacaroca.  
(Pamenero Ev. 9.12; 10.19; Cor. 1.20; 1 Jn. 1.7.)

quepatsiqui. Aatimpajia ɿarimpate agavejaque ashiapitsatanaqueri ampigatsajiaquemparigueti inquitequitica cantajiacajica: "Shoshoh"? <sup>26</sup>Oraqueate iquenquetsatacaquerigueti Aapani Irioshi coramani imoguecanaqueroquea quepatsi, cotanquitsiquea imaica icancode: "Apanivani nomoguecajeta, cotanquitsiquea aatoquea aparo quepatsi, nonquejetsitemparoquea aisa inquite."<sup>j</sup> <sup>27</sup>Icanquegueti "apanivani", iroguenti oncanque impishoncagueta-jero maasanopae ipeacaaguecaca agavejanquitsica omogueque, irooqua choocatajatsine caarica moguecatsi oncoquempanica onchoocaque. <sup>28</sup>Oncoramanivaetapojaquegueti ariqueate ancoquempani anchoocataje ontaniqui amenajiaqueroquea caarica moguecatsi caarica teroncatsi, antispatsipaitajem-pari Aapani Irioshi imajirontagueti. Iintsija imaica ancantajiguieri: "Ariotesaa." Antsaroacaajiaquempari antsaroventajiaquemparigueti, ancanta-jiguieri: "Caaviji poganejencamajata", irootaquetari ishineventacaca iriatimpa. <sup>29</sup>Iriratarite Arioshimajate iquejecarоquea samimicatsantsajencaro teronqui-roca maasano otaaqueca.<sup>k</sup>

**Quero ancojiaquempani cameetsanijite irishineventajiacajinijite Aapani Irioshi**

**13** <sup>1</sup>Pincoquempanija pimpintsa-guitemparini papitsaroventarijati-ateni. <sup>2</sup>Incoraquejiaquegueti papicaquinteteni incoguitejacojiaquem-pagueti querocaca irimaajiapojaqueni, aviatimpajia paajiaavaquerijate pitsoviro-naquitequi pincavintsa jitempariquea. Ichooocagarantajiaquetari itsipa teequea intsaigueji iriguenti yaajiaavaqueua irashivantijite Aapani Irioshi.<sup>l</sup>

<sup>3</sup>Pinquenquejacojiguerija isantanatacoji-taqueca quempeni pitsipatujari isantanatacojitaquempiquea. Pinquen-quejacojiguerija aisa yatsipetacaajita-caca quempeca aviguentijiaca atsipetsi-peitanquitsi.

<sup>4</sup>Pincomajamajajianaquempaqueate, apaniroqueate poanaquero pimanqui-gare, aatojate pinintitsi otsipa. Arikea pinquejiaquempa aviatimpajia manquigarentsijia apaniroquea poanaqueri manquigatimpica. Incatsimatimentajiaqueritari Aapani Irioshi quericaca teeca irampanironte-roji imanquigare, iriguentijiaca aisa oashijiguiroca manquigarentsijia teeca irooqua imanquigare. Arikea inqueje-jiaquemparoqua Aapani Irioshi manquigarentsijia oashitirica itsipa shirampari. <sup>5</sup>Aatoquea pishineventama-jajigaritsi imentaqui pincaraquisequi-vaequeri. Taaca opajitapae pashincaca pishinejiaquempaquea, icanquetarite Aapani Irioshi:

"Aatoquea notsinampirejimpitsi, aatoquea novashiantimatiimpitsi."<sup>m</sup>

<sup>6</sup>Irootaquequea aatoca atsaroantama-jata ancantantajiaquempaca:

"Iriraquea Nomajirote irio amique-naca, aatoquea notsaroguitsi.

<sup>7</sup>Querocaca incojiavetakenanai caquinteja?"<sup>n</sup>

<sup>7</sup>Pinquenquejajerija jivajiguimpica tsatacaajiaquempica Iguenquetsatsare Aapani Irioshi, pamenajiaqueriquea quero icojiacani iriatimpajia, taa opaji sotoananquitsineca, arikea pinquempe-quempeitanquemparija yaventashiren-tamajacarigueti Quirishito. <sup>8</sup>Iriraquea Jesoquirishito teequea incantashiti-guempajji, icocani iquejetaca coramani, arejevaeca imaica, arikea incoguitem-

j 12.26 Ajeo 2.6. k 12.29 Ireo. 4.24; 9.3; Mt. 3.12; 2 Ts. 1.7-8. l 13.2 Jen. 18.1-8; 19.1-3; Irm. 12.13; 1 Pe. 4.9. m 13.5 Ireo. 1.6, 8; Jos. 1.5; Pp. 4.11-13 n 13.6 Sar. 118.6-7.

pani inquejeguitempani. <sup>9</sup>Aatojate poguijatacotirotsi itsatacaantamampeajitica teeca onquejetemparojo Quenquetsatsarentsimajaca. Oganejencavaetaca ontampishishirentajiacaji igavintsajare Aapani Irioshi. Aatoquea iro tampishihirentaji ashecaquempaca irooca antiquempagueti. Maasano quejetaroca, aato amishirentaji.

<sup>10</sup>Choocaquea ashijia aatimpa aretarete<sup>o</sup> imetojajitaquerigueti metoja-vencajica. Oraticaquea teequeate iragavejeji irishecatacotsitemparo saserorotevetanquitsica Taverenacoroqui iroquettinica. <sup>11</sup>Iriraquea saserorote anaantamajatanquitsica iroguenti yaajatapinijiaqueroquea iriraja viratsipae Igovejencamajarequi Aapani Irioshi intsompoguiremajacaqui Taverenacoroqui cameetsanijite oshequempanijite covaeguisherentsi, cotanquitsiquea oraquea itsinopae manaquea itajaiqueroquea osotsquivae-pojaquegueti iguintenijiacagueti.

<sup>12</sup>Ariqueate iquejetatac Jesoshi iriatimpa, manaquea yaajitanaqueriquea osotsquivaeupojaquegueti iguintenijiacagueti isotoacaitsitanacari osotomoroqui, ariquea yatsipevaetaca imetojaque cameetsanijite irogameetsashirentajajironijite iriraja. <sup>13</sup>Irootaquequea noncantantajiaquempica imaica, jaame ovashiantaguetanaqueroquea maasanopae aventajiacaca paesatoniquitica, oahoaitashitanaqueri Jesoshi, onquejetaquempaquea oahoaitashitanaqueri osotsquivaeupojaquegueti, aatoja atsaroacagarо intsojencajitatacji quejetatac itsojencajiaqueri iriatimpa.

<sup>14</sup>Ocaniquitarite quepatsiqui tee

onchoocatenica aguinentantajiaquem-paca ococonica ochoocati, manaqueate oguijacojiaclaroqua guinentinintsimajaca irojocajiacajica Aapani Irioshi oncoramanitapojaquegueti.

<sup>15</sup>Aatimpajia atsarovenantajiacari Jesoshi, irootaquequea noncantantajia-quempica jaameshia ashineventajiguem-pari Aapani Irioshi ancantajiaqueri: “Caaviji poganejencamajataca.” Irootaquequea quejevecaroca yojocajit-nirica aretarequi. Irooqua sotoantana-quemparoneca itseraqui cantatsica: “Irio Nomajironmajate Jesoshi.” <sup>16</sup>Aisa aatoja pipeacojigaro pantaguetaqueja cameetsaguetatsica, pamitacotavacaa-quempaquea pincavintsajavacaa-quempa, irootaquequea ishineventacaca Aapani Irioshi quejevecaroca yojocajit-nirica aretarequi.

<sup>17</sup>Pinquemisantajiguerija jivajiguirica tsarovenjatiatsica, aatoja pipigatsajigari. Icocanitari iquempoguijashirentajia-quempi, itsajiaque oncoramanitapojaquegueti incatiimojiaqueriquea Aapani Irioshi incamanqueriquea quero icojiaquempini iquempoguijajiguimpigueti. Pinquemisantajigueri irishinetimentaquempanijite irinetsanaquero-gueti, aatonijite otenatiri. Ontenavae-querigueti, aato amishirentimpi aviatimpa.

<sup>18</sup>Pamanacoventajiguenaja. Notsama-jajiaque tee onchoocatajeji chagashiren-tajenanea, nonintajiaquetari noncogui-tempani noncomajatimenquemparo maasano. <sup>19</sup>Nonintamajaque pamanajia-queriquea Aapani Irioshi cameetsanijite taampinanijite namenajajempiniji nontsipajajempiniji.

**o 13.10 aretarete.** Icanquegueti aretarete manaqueate oquenquejacaacajiro coroshi imetojantacaca Jesoshi, itsicarenjanajiro iroquetica paaquito. Anquenquejacotajerigueti ashecatajemparogueti pan cantacoqueroca itsino, oquejevecaquea ashecatacotaquemparo aretarequi. Irirajiaquea ogantagatirajagueti iquenquejacotiro iroquetica paaquito aato yagaveja ishecatacotoro iroqueratrica paaquito.

**Iteroncapojaqueroquea tioncaqueroca**

<sup>20</sup>Iriraquea Aapani Irioshi iriguenti choocatacaajiacajica cameetsa aatoniji ashoshoguiteta, aisa iriguenti vochantajiri Amajirote Jesoshi quempoguijamajacajica aatimpajia irovejajiate. Iroguenti ivochatantajarica iriraja ashi paaquito coguitatsineca. <sup>21</sup>Imaica noninque Aapani Irioshi iragavejacaantaquempiro maasanopae cameetsagueltasica pinetsanatimenqueroniji intaguetica. Aisa noninque intampishirentacaamajajiacaji cameetsanijite ancomajamajajiaquempaniji ashinetacaajiaquempariniji, iriguenti iragavejacaantajiacaji Jesoquirishito. Ancoguitepanijate ancantacoguiterini Quirishito: “íCaavijisanoganejencamajata!” Ari oncoquempa.

<sup>22</sup>Napitsaroventarijateni, noninque pampatsajavantamajatavaqueroja ocatica notioncajiaquempica, aato piperatsitavaquenaro notampishitaca aquempigueti, capichatsajeaniquitari.

<sup>23</sup>Imaica noncamanquempiquea iriraquea apitsaroventarite Timoteo jac isantanatacorejajitajiri. Incoraquetajegueti taampina, nontsipatajempari noajiaquite namenajajatempi. <sup>24</sup>Pincantajiguerija maasano jivajiguimpica aisa maasano yashintajiacaca Aapani Irioshi, noninque inquemacojiajenaja choocana noquenquejacojiajiri. Arikea iqumpejiaca iriraja Itariaquitica inintajiaque pinquemacojiajeri chooca iquenquejacojiaquempiquea.

<sup>25</sup>Imaica noninque maasano aviatimpajia incavintsajamajajiaquempiquea Aapani Irioshi.

# ITIONCAQUECA

## SANTIAGO

**Antsatantaquemparoca**

Ocatica iroguenti antsatantaquemparoca itioncaqueca Santiago itioncajiaqueneri-gueti ishiraerijia tsaroventajiacarica Jesoshi oaguetananquitsica quepatsipaequi. Iriraquea Santiago irio jorio iriguentijeguite Jesoshi. Iquenquejajitaque itioncaquero ocatica paperi ajagantsiniqui irooca 40, irooca otsipaqui ajagantsini arejevaetacaro ajagantsini 60. Itsipajia iquenquejajiaque itioncaquero tequeratagueta intioncajiteroji otsipapae paperi choocajianquitsica ocaniqui paperiqui icantajitica *Tsavetacoquerica Jesoquirishito*, arica ajagantsiniqui 40, irooca otsipaqui ajagantsini arejevaetaro ajagantsini 50.

Acaniqui paperiqui icantajiaqueri quemisantajiaquerica Jesoshi intampishitashiji-aqueroja yatsipeventajiacarigueti (1.2-4; 12-18). Itsatacaa jiaqueri cameetsaguetatsica irantajigueca quemisantajiaquerica Jesoshi (1.5-11, 19-27; 2.14-26; 3.13-18; 5.7-20) aisa taa opajita teeca oncameetsateji irantajiaquerogueti (2.1-13; 3.1-12; 4.1-17; 5.1-6).

---

Iquenquetsatacaa jiaqueri irira jorioja  
quemisantajiajatsica

**1** <sup>1</sup>Naroguenti Santiago tioncajia-quempiroca oca, naroguenti savicaventiroca inintaguetica Aapani Irioshi aisa Amajirote Jesoquirishito. Imaica nonintaque nontioncajia-quempi maasano aviatimpajia oaguetananquitsica quepatsipaequi, aviguentijia ichoviquijiaqueca irijanitepae Ishiraerini carajianquitsica 12.<sup>a</sup>

Intampishitashijaqueroqueate maasano  
irantsipejiaquempaca

<sup>2</sup>Napiguemisantarijateni, pantsipejia-quempagueti taaca opajitapae pishineji-aquempaqueate. <sup>3</sup>Pitsajiaqueterarite aatogueti piquemisantajigiro patsipejiacaca irosati pamananaqueri Aapani Irioshi, ariqueate pintampishitashijiana-quero pincoguitempani. <sup>4</sup>Cotanquitsiquea irosati pintampishitashimajajiana-queroja cameetsanjite pinquenquejamajajiaqueronijite ora taaca opajitapae

---

**a 1.1** Icanquegueti ocaniqui *oaguetananquitsica quepatsipaequi*, icantacojiaqueri quemisantajiaquerica Quirishito, yamenaueriquea yoaguetanaquequea guinentinintsipaequi quejetaca iporocajianaque coramani ishiraerijia icatsimajajiquerigueti Ashiriaquitica aisa Vavironiaquitica.

cameetsaguetatsica aisa cameetsanijite pincomajamajajianaquempaniji, pagavejajianaquenijite pintsamajajianaquero inintaguequeca Aapani Irioshi, aatoniji oquempevaetacaguimpi taaca opajitapae quempevaetacaantatsica.

<sup>5</sup>Choocagueti oraniqui tequerataca intsamajajiguero ininqueca Aapani Irioshi iramanajiaqueriqueate incantajiaqueri intsatacamentajiaquerinijite. Iriatimpa inquemajajueri, igantagatarite iquemiri amanajiguirica ariqueate itsatacamajajiaqueri, teequea incanteji: “¿Quero octocata pamanantaquenaca?” <sup>6</sup>Cotanquitsi quericaca cantaquerineca Aapani Irioshi intsatacaaqueri intsamatataquequeate arimaja intsatacaaqueri, aatoqueate icantajigui: “Aricampa aatoca iquemana, aatocajate itsatacagna.” Maasanotarite quejejaiatsica imaica mana iquejejiacaro otamacojati-gueti quentija itampijatigueti choviga, ariqueate ojaquiti von von, yoguipigui-pijaatanaqueroqueate. <sup>7-8</sup>¿Arimpate inquemaqueri Aapani Irioshi irica quejetiroca imaica? Aatoquea iquemiri, teenicate apaniro oneji iquenquejamajataqueca manaqueate iroota icanti iroota icanti. Ari oquejetaca aisa yantaguevetacaca teenica intsateji quero incoquempa.

<sup>9</sup>Cameetsavaetaquequeate irishinejia-quempagueti irirajia apiguemisantarijia-teni teeca iranaantajigueji, ipejajiaqueritarite Aapani Irioshi irijanijiate.

<sup>10</sup>Iriraqueate apiguemisantarijiateni ajaarantajiatsica cameetsavaetaquequeate irishinejiaquempaqueate intsatacaaquiaquerigueti Aapani Irioshi aatonijite yaventacojajaro yashintajiacaca, manatarite iquejejiacaro ovempe-naqui teeca onquishopempenaquiteji, tee osamani onchoocateji. <sup>11</sup>Arimpate iroatimpa arimpagueti icatsirincaguite-majatigueti catsirincaiteri icatsirincata-

naquerogueti ariqueate jac oshimpeguiricanaquequeate opariapempenaquita-naque teequeate oncameetsapempena-quitanajeji. Arikeate iquejejiaca ajaarantajiatsica aatoqueate osamani ichoocajiguitsi, manaqueate taampina irimetojajianaque irovashiantaguetana-queroqueate maasano isavicaventavecaca.

<sup>12</sup>Quericaca teeca inquemisantajeroji yatsipeguetacaca mana arimpaqueate itampishitashitanaquero arikeate icavintsajamajataqueri Aapani Irioshi, yamenaueritarite itampishitashiquero tee inquemisantero. Arikeate intanco-rejajeriqueate, aatoquea imetojajitsi. Arikeate inquejetacaajiaquempari maasano pintsamajajigarica, irinetsana-taquero icankeca iroqueragueti.

<sup>13</sup>Choocagueti quenquejanquitsica irante teeca oncameetsateji aatoqueate icanti: “Iriguenti quenquejacaquenaro Aapani Irioshi.” Iriraqueate Aapani Irioshi teenicate irinintenicate irantaquero teeca oncameetsateji, aisa teequeate inquenquejacaanteroji yantagushejiguica. <sup>14</sup>Inchiquiojitarite iquenquejashitacaro iriatimpa inintaguequeate irantaquero covaeguishtatsica. Iroqueate agavejaquerine inintaguishetaqueca. <sup>15</sup>Iroquetiqueate ocoraquetashiqueri iquenquejaquero, coajica inintamajajauerogueti ariqueate yantaquero. Oraqueate yantaqueroqueuti irooqueate onquenantanaquempa iroantanaquempaca camorecariqui.

<sup>16</sup>Napiguemisantarijijateni nopintsamajajiacaca, aatoqueate avisatiqueate amatavijaijatsi. <sup>17</sup>Aapani Irioshi icavintsajamajajiacajiqueate irootaquequeate maasano cameetsaguetatsica irioqueate jocajiacajiro. Iriatimpa iriguenti peacaaguetarica taaí aisa impoquiero jeri aisa catsirincaiteri savincaguitetacotantatsica. Teequeate

incantashitatuempoji, irosati icocani icavintsajantamajati.<sup>18</sup> Irijanintajiacaji, inchiquiojitarite inintaque iriatimpa. Irootaquetari choocatacaacaji Quenque-tsatsarentsimajaca. Aatimpajia aroguentijia aroquetica irijanintajiacaca ajivatimentajiaquerinijite maasano irijanintajiaquempaca.

**Quero incoquiaquempani  
inquemisantamajajiaquegueti**

<sup>19</sup>Imaica, napiguemisantarijijateni nopensajigaca, pintsajavaquero oca: cameetsataque taampina anquemava- quero icancajica itsipa, aatoquea aquenquetsatitaguiri taampina tequera- tagueti anquenquejamajateji querocaca ancanteri, aisa aatoquea taampina acatsimati.<sup>20</sup> Ancatsimajajavetaquem- gueti aatotari agaveji anetsanatero inintaguetica Aapani Irioshi, aato agaveji ancomajamajaquempa.<sup>21</sup> Iroota- quequeate nocantantajiaquempica povashiantajianajero maasano piquen- quejaguishejiguica, aisa taaca opajitapae pantagushejiguica teeca oncameetsateji. Aato paventacojiga manaqueate pinquenquejamajajiaquero Iguenquetsatsare Aapani Irioshi itsatacaajiaquempica, irootarite meshia- jajimpi.<sup>22</sup> Aatoqueate piquemashitaro intati manaqueate pinquemisantamajaji- guero quero ocanqueni ariqueate pincojiaquempani. Oraqueate managueti pinquemashijiaquemparo intati avisatiqueate amatavijaijaatsi.<sup>23</sup> Quericaca quemashitaroca Iguenque- tsatsare Aapani Irioshi, aatogueti iquemisantiro ocantaqueca iquejetacari amenavorovetatsica amenajarontsiqui.<sup>24</sup> Yamenajavetaca quero icocani, iroompaqueate yoanajatigui jac ipeacotajaro.<sup>25</sup> Oraqueate Iguenquetsatsare Aapani Irioshi caaviji ocameetsa- majataque, ovashiantacajaiacajiro-

queate teeca oncameetsateji antagushe- jjavetacaca. Irooqueate meshiajiacajica, cotanquitsi Aapani Irioshi incavintsaja- majataqueri quericaca teeca impeaco- temparoji queroca ocanqueca, mana inquemisantamajatanaqueroqueate, aisa intsamajaqueroqueate ocantaqueca.

<sup>26</sup>Chooca cantatsica: "Naroguenti quemisantatsica", cotanquitsi tee irampavirajero inene. Iriraqueate quejecarica imaica teequeate arimaja inquemisantamajatero icanqueca Aapani Irioshi, irisatiqueate amatavijajatsi.<sup>27</sup> Iriraqueate yamenaqueca Aapani Irioshi arimaja iriguenti iquemisantama- jataque irioqueate cavintsajajiaquerica chaajaniquipaetica metojacoguetatsica aisa manquigarentsijia metojacoguetatsica atsipejianquitsica, aisa inetsana- jiaca aatoniji opantari quempevaerentsi ipeacaapinijiaca quepatsiquitica.

**Ampintsajiaquempari maasano**

**2** <sup>1</sup>Napiguemisantarijijateni, imaica piquemisantajiaquerigueti Amaji- rote Jesoquirishito oganejencamajata- tsica, aatoquea apaniro iriguenti pishineventajiga irira anaantaguetanqui- tsica, irioqueate pimanintajiaque teeca iranaanteji. Maasanoqueate pishineven- tajiaquempari, iriogueti anaantanqui- tsica irisati teeca iranaanteji.<sup>2</sup> Arigueti picapiocajiacaca ariqueate inquijajapo- quegueti mavite caquinte, apaniro iriguenti netsanatacovaetacaqueate aisa yasatecacari ichapaquiqui imaachapa- quijitaca ipeacaajicaca cavorejatatsica vegaramajatanquitsica, iriraqueate itsipa tsongashitequijacotaca;<sup>3-4</sup> iriguen- tigueti paajiaavaque netsanatacotanqui- tsica pinetsanajiaavaqueri poguisavicajia- vaqueri, iriraqueate teeca irinetsana- tempaji manaqueate pogatiavaqueri intati irooca poguisavicajiaavaqueri intati querocagueti, ñarimajampate

aviguentijia quemisantamajajiatsica? Teequeate, teenicate pincavintsajajigue-  
riji teeca irinetsanajiguempaji, iriguenti-  
tarite pishineventajiaca netsanatacójian-  
quitsica. Teequeate pinetsanajigueroji  
piquenquejajiaqueca, iroguenti piquen-  
quejajiaque teeca oncameetsateji.

<sup>5</sup>Napiguemisantarijijateni nopintsama-  
jajiac, iintsijsa pinquemisantajiguena  
noncantajiaquempica. Aapani Irioshi  
icoguijajiaqueri teeca irashintamajaji-  
guempaji acaniqui quepatsiqui  
cameetsanijite inquemisantamajajia-  
queri iroajianaquenijite iriguinentijia-  
quempa ontaniqui imajirontagueti.  
Aritarite inquejetacaa jiaquempari  
maasano pintsamajajiacarica, irootaque-  
tarite cantanquitsi. <sup>6</sup>Cotanquitsi  
aviatimpajia mana poguipashiventajia-  
queri teeca irajaarantajiguempaji,  
iriguenti pishineventajiaca ajaarantajia-  
tsica. <sup>7</sup>Teempaqueate iriguenti catsima-  
jiguimpica ajaarantajajatsica nintatsca-  
queate irashitacotacaantapinijiaquempi-  
queate santanaqui? <sup>8</sup>Aviatimpajia  
pitsaroventajiacari Jeso quirishito  
piquemisantajiaqueritarite, cotanquitsi  
iriatimpajia iriguenti cantimanatirica  
cantatsica: “Caari.”

<sup>8</sup>Chooca otioncacotaca icanqueca  
Aapani Irioshi ora anaamajaguequeroca  
maasano cameetsamajatanquitsica,  
ocanti: “Pimpintsataquemparija  
pigonoro pinquejetacajempa pipintsa-  
tagueti aviatimpá.” Pinquemisantajia-  
querogueti ocatica aisa pinetsanamajaji-  
aquerogueti, cameetsamajataquequeate.  
<sup>9</sup>Cotanquitsi teegueti maasanojia  
pincavintsajajiguériji pigonorojia,  
manaqueate pantajiaque teeca oncamee-  
tsateji, teenicate pintsamajajigueroji  
icantaqueca Aapani Irioshi. <sup>10</sup>Quericaca  
tsamajatiroca maasano itioncacotana-  
queca Moishishini cotanquitsi onchoo-  
catimaquegueti aparo teeca irinetsanate,

iquempevaetaca, ari oquempetaca tee  
irinetsanaterojo otsipapae. <sup>11</sup>Irootaque-  
tarite cantanquitsi Aapani Irioshi: “Aatoja  
poashitirotsi manquigarentsi”, aisa  
iriguentiqueate cantanquitsi: “Aatoja  
pimetojanti.” Irootaquequeate quericaca  
aatogueti yoashivetaro manquigarentsi  
cotanquitsi irimetojantaquegueti, tee  
irinetsanatero icantica Aapani Irioshi,  
igantagatiraja iquempevaeta. <sup>12</sup>Imaica  
aviatimpajia pinetsanamajajiaqueroja  
picanqueca aisa cameetsaja pinchooca-  
majajiaque. Aatogueti pinetsanata  
incatsimatimentajiaquempiro Quirishito  
oncoramanitapoajegueti, teenicate  
pinquemisantamajajigueroji Quenque-  
tsatsarentsimajaca ovashiantacajajaci-  
roca teeca oncameetsateji acoguishejia-  
vetacaca. <sup>13</sup>Aatoqueate icavintsajajajiri  
Quirishito oncoramanitapoajegueti  
maasano teeca incavintsajantajigueji,  
iriguentiqueate incavintsajajiaque  
maasano cavintsajantajajatsica, aatoquea  
itsaroajigui iriatimpajia oncoramanita-  
poajegueti incatsimatimentajiaqueri-  
gueti Quirishito quempevaejajatsica.

#### Arimajagueti aquemisantamajataqueri Aapani Irioshi, anteneri inintacaacajica

<sup>14</sup>Napiguemisantarijijateni, inchooca-  
quegueti cantavetanquitsineca:  
“Naatimpa naventacari Aapani Irioshi”,  
cotanquitsi aatogueti yantaguetaque  
cameetsaguetatsica, <sup>15</sup>arimpa amitaco-  
shirenter icantavetacaca intati?  
¿Arimpate iro meshashirenter  
managueti incantashitaquempagueti  
intati: “Naventacari”? Aato. <sup>16</sup>Ariguetija  
pinejaqueri papiguemisantariteni tee  
onchoocateji inquitsaaquempaca jero  
aisa irishecaquempaca, <sup>17</sup>iroompa  
pincantavetaquemparigueti intati:  
“Cameetsaquea pincantanajempa,  
pinquitsaatempa cameetsa aatoniji  
picatsincati, aisa pishecapinitaquempa

cameetsa pinquemanaquempa”, cotanquitsiquea aatogueti pojocavaque-neri coguitejimotacarica, ¿arimpate picavintsaquaqueri? <sup>17</sup>Aritarite iquejetaca imaica cantatsica: “Naventacari Quirishito.” Teegueti irinetsanatero icantica Aapani Irioshi manaqueate iquemisantamampeaca intati, teequeate arimaja iraventamajatempari.

<sup>18</sup>Cotanquitsi arigueti incantajiquempi: “Aviatimpaqueate mana paventacari Aapani Irioshi intati, naatimpa nonetsanaqueroquea icanqueca”, cameetsataquequea. Aatogueti pinetsanaguetirotsi icantaqueca Aapani Irioshi ¿querocate ponigaanquenarocate arimaja paventacari? Naatimpa nonetsanaguetaqueroqueate icantaqueca irootaquequeate pitsatantajiacaca arimaja naventacari noquemisantaqueri. <sup>19</sup>Aviatimpajia picantajiaque chooca apaniro Irioshimajaca. Cameetsataquequeate, cotanquitsi itsajiguiqueate ampatsini iriatimpajia chooca apaniro Irioshimajaca, irootaquequeate itsaroantajiacaca yompioncantajiacaca piompiompio. <sup>20</sup>Teequeate pintsatimajigueji aviatimpajia. Quericaca teeca irinetsanateroji icantaqueca Aapani Irioshi manaqueate iquemisantamampeaca intati. <sup>21</sup>Pamenerija avaesatiniteni Averaameni arimajaguetti iquemisanqueri Aapani Irioshi inetsanaqueroqueate icantaqueca. Pajinimequeate irimetojanaquerime Ishaaco aretarequi intaaquenerimequeate, icantantacacaqueate Aapani Irioshi: “Imaica namenaqueri Averaame quejetaca teeca inquempevaetimatempajia, inetsanaquerotarite nocantaque-rica.” <sup>22</sup>Pameneri imaica Averaame teequeate apaniro inquemisanteriji Aapani Irioshi icanquerigueti: “Inchoocataque pinchoviquijianaqueca iroshequiamajatiguenimaja”, inetsana-

taqueroqueate aisa icanquerica. Itsatan-tajitacarocaqueate arimaja iquemisanta-majataqueri. <sup>23</sup>Onetsanataca Itionca-caantaqueca Aapani Irioshi itioncaco-quierogueti ocanti: “Averaame iquemi-santamajataqueri Aapani Irioshi, irootaquequeate icantantacacaqueate: ‘Namenaqueri Averaame quejetaca teeca inquempevaetimatempaj.’” Ariqueate icantajiqueru itsipataca Aapani Irioshi.

<sup>24</sup>Pamenamajajiaque imaica arigueti mana anquemisantamampeaquequempari intati Aapani Irioshi, aatoqueate yamenajajia quejetaca tee anquempe-vaetempaj, cotanquitsiqueate oraqueate aventajiacrigueti, aisa anetsanajiaque-rogueti icanqueca, irooqueate iroguenti yamenantajiacajica quejetaca tee anquempevaetimatempaj. <sup>25</sup>Arikeate oquejetaca Iraava iroatimpa icotapiniji-avetaca yoashitapinijiguro, cotanquitsi cameetsaqueate aaajiavaqueri omanajia-queriqueate itigarancajiaqueca Josoe amenanontaguequieroneca oguinteni, arikeate yamenaqueero Aapani Irioshi quejetacaqueate tee onquempevaetem-paj. Ocamantajiaqueritarite aisa iroantajianajemparo otsipapoqui quenavoquirontsi irishiaptsajianaqueri-queate catsimajiaquerica. <sup>26</sup>Oraquea itsino caquinte, aatogueti ochoocatan-taro ishire, ompeaquempa, metojani oncantanaquempa. Ariqueate iquempe-taca teeca irinetsanamajateroji icantica Aapani Irioshi, ompeaquempaquea yaventavetarigueti.

### Caavijisano oquempevaetacaanta anene

**3** <sup>1</sup>Napiguemisantarijijateni, aato inchiqioji pishineventajigaro pintsatacaciajaueri papiguemisantarijija-teni, pitsajiaquerarite maasano naatim-pajia tsataacaantajiguiroca Iguenquetsa-tsare Aapani Irioshi yamenamajajiaque-

naqueate Aapani Irioshi, yamenajia-quena aricaca nonetsanamajajiaquero notsatacaantajiguica aricaca tee. Aatogueti nonetsanamajatiro naroguenti incatsimamajajiaque oncoramanitapoja-jegueti. <sup>2</sup>Maasano aatimpajia aquempe-vaejiaca, cotanquitsi choacagueta teeca inquempevaetantemparo icanqueca ivagantequi, iriguenti caavijica icameetsati, itsmajataque icomajamajataca maasanotsino. <sup>3</sup>Asatecaqueneri quitavaireri capichaji cavorejaquijita-tsica ivagantequi iroonijite inquemisan-tantaquempaca atinincacoquerigueti, ariqua oacaanaquerini maasanotsino querocagueta aninqueni. <sup>4</sup>Ariqueate oquejetaca inirojegui quenajarontsi. Inirojeguivequeate aisa itampijague-vetanacaqueate tampija jeoc jeoc jeoc, cotanquitsi itaquiatavaqueroqueate pataquitaqueroitaquiatantavacaro itaquiatantajitaroca. Chaapataquijaniqui onavetaca cotanquitsi ivetincajan-tavacaro yoacotanaqueate querocagueta inintaque iriatimpa. <sup>5</sup>Ariqueate oquejetaca anene iroatimpa chaajani-quiqueate onavetaca, cotanquitsiqueate aquenquetsatantaguetacaro taaca opajitapae. Pameneroqua paamarijaniqui, chaamenquijaniquiqueate onavetaca, cotanquitsi agavejaquequea ontaaquiero inirojegui menoanentsi antsicanaquetarite. <sup>6</sup>Arikea ococa aisa anene, oquempetacaro paamari, caaviji oquempevaetacaajiacaji, ocovaetana-quiero maasanotsino, otsitacaquiero maasano antaguetaqueca acovaeguishe-tantacaca. Oquejetaca iroguenti camore-cari tsitacaquiero anene.

<sup>7</sup>Aatimpajia agavejajiaque avirajia-quempari taaca ipajitapae canaagueta-tsica, araguetatsica, soaancaguetatsica, jeri aisa choocaguetaatsica ojaaqui. Agavejajiaqueri antsatacaajiaqueri.  
<sup>8</sup>Cotanquitsi aatoqueate ichoocati

agavejanquitsineca intsatacaaquiero inene aatonijite iquenquetsatimati teeca oncameetsateji. Oraqueate ashecaji-guemparogueti quepigatatsica aatoqueate achoocajiaji, ametojajia-naque. Ariqueate oquejetaca anquen-quetsaguishejiguerogueti teeca oncameetsateji aatoqueate achoocajiaji cameetsa, ancatsimatavacaajiaquempa-queate intati. <sup>9</sup>Aatimpajia amanajia-queri Amajirote Aapani atsaroventaj-jaari, cotanquitsiqueate irooqueate atsipatavaquero anijashijiavajempari agonorojia ipeacaajiacaca iquejetacaaji-acaca iriatimpa. <sup>10</sup>Oconoacaqueate aquenquetsajiaque manaqueate atsaroventajiacari Aapani Irioshi. Oconoaca aisa mana anijashijiacari agonorojia. Napiguemisantarijijateni, teequeate oncameetsateji anquejejia-quempagueti imaica. <sup>11</sup>¿Arimpate inejajitiro oraniqui ochovivincajatigueti chovivincajari ontsipajapojemparo cameetsajatatsica aisa quepishijatatsica? Teequeate irinejajiteroji onquejetempajimaica. <sup>12</sup>Aisa, napiguemisantarijijateni, ¿arimpate inejajitiro orivoitsoqui oraniqui ochoocatantaro iguera? Arikeate oquejetaca igosovena ¿arimpate inejajitiro ochoocatantaro omantsa ova? Noncamantsijajimpi-queate aisa tee irinejajiteroji. Ari oquempetaca chovivincajari cachoja-majatanquitsica aato agaveja ompeana-jempa cameetsajatatsica. Ari anquempe-taquempa aatimpa, apaniro anquenque-tsate cameetsatanquitsica.

### Apaniroqueate Aapani Irioshi yagavejacaamajatacaji antsamajajiaquequeate

<sup>13</sup>Choocagueta oraniqui tsatatsica quenquejatsica, iiintsija incomajamaja-quempa, aisa incavintsajantamajata-queja, cotanquitsi aatoqueate yaventa-

cota cameetsaniji ironigaantauempa arimaja itsamajataque. <sup>14</sup>Cotanquitsiqueate picatsimamajiquerigueti pigonoro pininquegueti panajaiqueri, aisa avisatigueti quenquejacotajatsi, aatoja pamataga pincanquegueti: "Notsamajati." <sup>15</sup>Teenicate irio quenquejacaguemprone Aapani Irioshi pinquejetaquempa imaica, inchiquiojitarí piquenquejashicaro aviatimpa, aritarite icojiaca caquintepae, aisa iriguenti quenquejacaqueri ampatsini. <sup>16</sup>Noncantajiaquempi querocaca ichoocajiaqueni catsimamajajianquitsica, aisa irisati quenquejacotajatsi, igantaga icatsimatavacaaca, aisa yantagushejiaque taaca opajitapae teeca oncameetsateji. <sup>17</sup>Cotanquitsi irira iquenquejacaamajataqueca Aapani Irioshi, icomajamajataca, cameetsaqueate ichoocaque, teequeate incatsimantanteji, aisa iquenquejacojiaqueri itsipapae quero incoquempa incavintsa-jaquerigueti. Querica quenquetsatacaaqueri iquemisantavaqueri. Ipintsantamajata, icavintsa-jaqueri maasano. Aisa inetsanamajataquero icanqueca, teequeate iramatavijanteji. <sup>18</sup>Taaca opajita apanquiti, aguero oitsouqui ashi. Aisa oquejetaca arigueti aguinentitaquempa cameetsa, agameetsantavacaacuempagueti aatoniji acatsimatavacaga, ariquea anetsanajianaquempa.

#### **¿Taa opajita icatsimatimentantajitica?**

**4** <sup>1</sup>¿Quero ocotacani picatsimatava- caantajiacaca? Manatarite piquenquejagushejiaque taaca opajitapae teeca oncameetsateji, irootaquequeate picatsimatavacaantajiacaca. <sup>2</sup>Pinintajavetacaqueate pajaarantajiguempame, cotanquitsi teequeate pagavejajigueji, niganquiqueate pimetojavacaajianaca. Pashintsimanatsijiacari yashintajiacaca itsipa pamenajiaque tee pashintajiguem-

paroji, queroqueate pincojiaqueroni ariquenqueate picatsimatimentajanaquero. Teequeate pagavejajigueji pashintajiguemparo pinintajiavecaca, teenicate pamanajajeriji Aapani Irioshi. <sup>3</sup>Pamanajiavecarigueti teequeate irojocajiguempiroji, manatarite teenicatarite cameetsa pamanajigueriji. Manatarite pinintashijiavetaca pantajiaquemequeate taaca opajita pishineventajiacaca aviatimpajia. <sup>4</sup>Manaqueate piquejejiacaro manquigarentsi teeca apaniro ogueriji omanquigare. ¿Arimatee pintsajigueji pishineventajijajemparogueti inintaguishejiaqueca quepatsiquitica manaqueate pisemaneguintajiacari Aapani Irioshi? Nocamtantajiaquempica quericaca shineventaquemparone inintaguishejiaqueca quepatsiquitica manaqueate icatsimajiaqueri Aapani Irioshi. <sup>5</sup>Teenicate oncanteroji intati Tioncarentsimajaca ocantigueti: "Iriraqueate Ishire Aapani Irioshi choocashirentajiaquempica inintamajataque pimpintsamajajiaquempari apaniro poamajatanaqueri."

<sup>6</sup>Cotanquitsi Aapani Irioshi icavintsa-ja-aci yamitacojia-aci antampishitashitanta-jaquemparoca aatonijite ashineeventajigarotsi teeca oncameetsateji yantagushejitic. Aritari ocanque itioncacojiqueca: "Aapani Irioshi tee irishineventempariji aventacotatsica, cotanquitsi irira teeca iraventacotempajirioqueate iriguenti icavintsa-jaque yamitacojiaqueri."

<sup>7</sup>Nocantantajiaquempicaqueate pinquemisantamajajiaquerija Aapani Irioshi pinetsanamajajiaquero icanqueca. Pintampishitashijiaqueri ampatsini aatoja piquemisantajiguiri. Pinquejejiaquempagueti imaica irishiapanajante. <sup>8</sup>Pinquempejijiapojaquemparija Aapani Irioshi, ariqueate inquempejijiapojaquempiquea aviatim-

pajia. Nocantajiaquempi aviatimpajia antaguishejiguiroca teeca oncameetsateji, povashiantajianajero, aato papijijajiro aisa. Aviatimpajia quemisantamampeajitsica pinetsanamajiguempa aatonijite pantaguishejajiro teeca oncameetsateji. <sup>9</sup>Pishimampojancajiguempa, pirajaiguempa, pamenajiguempa queate mana pantaguishejiaque teeca oncameetsateji. Aviatimpajia shirontajatsica pirajaiguempa, aisa aviatimpajia shinejianquitsica pishimampojancajiguempa. <sup>10</sup>Aatoja paventacojiga manaqueate pincantajiaqueri Amajirote: "Pamenaguena aviatimpa teequeate naatimpa nagavejempaji." Pinquejetaquerogueti imaica iriatimpa iragavejacaquemqueate.

<sup>11</sup>Napiguemisantarijijateni, aatoqueate pinijashinatantajijaatsi, pitsajiaquetarite ocanque Iguenquetsatsare Aapani Irioshi pimpintsatavacaamajajiaquempaja, cotanquitsi quericaca njashinacarica igonoro irooca icanti: "Chooca yantaqueca", teequea irinetsanateroji Iguenquetsatsare Aapani Irioshi, quejeveta manaca inijashinatacaro intati icanque: "Tee oncameetsateji Iguenquetsatsare Aapani Irioshi, aatoqueate nonetsanatiro ocantaqueca." <sup>12</sup>Apapiro icanca tigarancacajiroca Iguenquetsatsare, apapiro iriatimpa iriguenti Joesé cantanquitsineca oncoramanitapoja jegueti querica quempevaetanquitsica, aisa querica teeca inquempevaetempajai, apapirorotari iriatimpa yagavejaque irimeshiantaque, aisa incatsimatimentajiaqueri quempevaejitsica. Aviatimpa, ¿quero ocotacani picantacotantacarica pigonoro tee incameetsateji?

### Icamantajiaqueriqueate pimantajjatsica jerijia aisa ajaarantajjatsica

<sup>13</sup>Pinquemisantajiguena aviatimpajia cantajjatsica: "Imaica, aricampa

osaitequera oajianaque osamani, aguinentijiaquitempa apaniro ajagantsi, ampimantajiaquitequeate, aajigueta caquisequipae imentaquipae."

<sup>14</sup>Teequeate pintateji taaca oajiaquempine osaitequera. Manatarite piquejejia-caro mararo omararosecanquiti iroompaqueate taampina osaamenco-rencaguitetanaji. <sup>15</sup>Iroguentiquea pincantajigue: "Iriogueti nintanquitsine Aapani Irioshi anchoocajiaque antajiaqueri aquenquejaguetaqueca." <sup>16</sup>Cotanquitsi aviatimpajia manaqueate paventacojica piquemacaantajjaca. Naatimpa noncantajiaquempi tee oncameetsateji pinquejejiaquerogueti imaica. <sup>17</sup>Iriraqueate tsavetanquitsica taa opajita ininqueca Aapani Irioshi iroompa tee irinetsanateroji, manaqueate iquempevaetaca.

### Iquenquejaca jiaqueriqueate ajaarantajjatsica

**5** <sup>1</sup>Imaica noncamantajiaquempi aviatimpajia ajaarantajjatsica. Pirajaiguempa aa aa, pincajemajiaque pantsipejiaquempatarite coajica. <sup>2</sup>Maasano pashintajiavetaca aatonica ocameetsatanaji. Aisa piitsaarepae irishecataquemparo shecaguetaroca quitsarentsi. <sup>3</sup>Iriraqueate pigavorejartepae aisa pimentaquisitepae incantateguetanaquempa, aato ivergarataja. Incantaitanauquempagueti intsajtajquempi picapiocashicari intati. Irootaque atsipetacaantajiaquempineca, onquempetaquempa onteroncaquero paamari piteshi, picapiocajiaqueritarite pimentaquisitepae pajiniguetti aapojempa savincaguiteri vegaratapajatsineca. <sup>4</sup>Teenicate pivegaramajajigueriji antimojiguimpica manaqueate pamatavijajiaqueri intati, irootaqueate iriatimpajia imaica inquenquejajojero teeca pivegarajigueriji. Irira

Agavejamajatatsica Imajirojiate caramirinciajatsica iquemajiaqueriqueate antimojiguimpica yamanaquerigueti.  
<sup>5</sup>Pajaarantavaejiaca taaca opajitapae acaniqui quepatsiqui. Manaqueate pisavicaventajanaquero pishineventajacaca aviatimpajia. Manaqueate piquejejiacari viratsi itijaitica iriguejintajiqueriqueate irishecajitaquempariqueate, interoncijaquempitarite Aapani Irioshi coajica intigarancanjaquempi camorecariqui. <sup>6</sup>Pitsoeventajiacaritarite netsanajiatsica pimetojacaantajaqueri. Iriatimpajia teequeate impigamentajanaquempapi.

#### **Pagamajavajemparija Amajirote**

<sup>7</sup>Imaica, napiguemisantarijijateni, noncantajiaquempiqueate picancanija pantsiperejacojiaquempa irosati incoraquetajegueti Amajirote. Pinquejejiaquemparija panquitatsica teequeate incatimateroji iraguero ivanquire, manaqueate yoguijavaquero ajagantsitanajigueti osampamajatanaqueta ariqueate iraaquero. <sup>8</sup>Ariqueate pinquejejiaquempa aviatimpajia pinquemisantacojiaquempa, aatoja piperajiga. Arimpaqueate pintampishimajajianaque pinquemisantamajajianaquequeate, pajinitarite incoraquetaje Amajirote. <sup>9</sup>Napiguemisantarijijateni, aatoja pinijashitavacaa jiga aatoniji icatsimati mentajapojimpiro. Catiapojacatari sotomorontsiqui irira Joese cantanquitsineca quero incojitaquerini maasano caquinte. <sup>10</sup>Napiguemisantarijijateni, pinquejejiaquempariqueate tsavetantajiguironica icanquerica Aapani Irioshi coramani, iquemisantacovaejiacaqueate yatsipeventajiacarigueti. <sup>11</sup>Imaica pitsajiaque ishinevaejiaca maasano quemisantacojatiatsica yatsipetacaajiacerigueti catsimajiaquerica. Piquemacojiaqueritarite Jopeni coramani iquemisan-

tacocaqueate, teequeate irovashiantanaqueri Aapani Irioshi, arimpaqueate ijatanaqueri iquemisantamajatanaqueri. Arikeate icavintsajaqueri Aapani Irioshi arimpaqueate yojocamajataqueri anaamajataqueroqueate iroquetinica yashintaveca. Caavijitarite icavintsajantamajati Aapani Irioshi, aisa ipintsatantamajata.

#### **Aatoqueate picantashivijita**

<sup>12</sup>Imaica, napiguemisantarijijateni, pinquemisantamajajiaquena noncantajiaquempica. Pincantamajajiaquejate, aatoja pamataajiga, aato picantashita: “Yamenaquenatarite Aapani Irioshi teequeate namataimatempaji.” Aato picantajigui: “Arigueti namataaca ontsinacaquena inquite.” Arikeate oquejetaca aisa aato picantajigui: “Arigueti namataaca ontijaquena quepatsi.” Manaqueate pincantajiaque: “Jeeje arimaja”, irooca manaqueate pincantajiaque: “Teequea”, aatonijite icatsimati mentimpilo Aapani Irioshi coajica.

#### **Pamaneri Aapani Irioshi**

<sup>13</sup>Choocagueti atsipetanquitsica iramanquaqueri Aapani Irioshi. Iriraqueate shinemajatanquitsica iramashaventajiqueru. <sup>14</sup>Choocagueti ashinoncajanquitsica incajemajiaqueriqueate quempoguijajiguirica quemisantajatiatsica iramanacoventajapirojaqueriqueate, aisa impantantajiaquempariqueate oreji ivajiroqui Amajirote. <sup>15</sup>Iramanacoventajiaquerigueti intsamajajiaque arimaja iquemisantavaqueri Amajirote. Inquejataquempagueti imaica ariqueate irogueshitajeri ashinoncajanquitsica, aisa irishemajajauquero maasano iguempevaere irimaisantajeneri. <sup>16</sup>Irootaquequea nocantantajiaquempica pinquempevajiaquempagueti pincamantajiaque-

riqueate papiguemisantarijiteni, aisa pamanacoventavacaajiaquempajate cameetsanijite intampishitacaajiaquem-pinijite Amajirote pincomajamajajia-quempaja, aisa irogueshitimentajajem-pinijite pashinoncajajiacagueti.

Iriraqueate quemisantamajatirica Aapani Irioshi yamaquaquerigueti, oshequi agavejaque. <sup>17</sup>Pamenerija Iriashini, irira tsavetantirinica Aapani Irioshi coramani, iquejemajajiacaji atimpajia, cotanquitsi yamaquaquerigueti Aapani Irioshi icantaquerigueti aatoja otejajitsi incani ariqueate tee ontejajeji irosati yaapojajagueti 42 taai.

<sup>18</sup>Arikeate yamanajiri aisa icantajiri ontejapojae incani, ariqueate otejapo-jaji, ariqueate otsoroaguetanaji ishecajia maasano.

<sup>19-20</sup>Napiguemisantarijiteni, pintsamajajiguero ocatica noncantajia-quempica. Choocagueti quempevaetan-quitsica quemisantavetacaroca Quenquetsatsarentsimajaca, arigueti iramatacotaqueri itsipa irinetساناتاناجемпаниjite, manaqueate yamitacotaqueri aatonijite inejajiro imetojane, irimeshiaqueritari Aapani Irioshi irimaisantsitajeri maasano yantagusheveta caca oshequiaavaevetanquitsica.

# IROQUETICA ITIONCAQUECA

## PEERERO

**Antsatantaquemparoca**

Ocatica iroguenti antsatantaquemparoca iroquetica itioncaqueca Peerero itioncajiaquenerigueti joriojia tsaroventajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1.1). Peerero irio jorio, irio itigarancane Jesoshi. Irocashi itioncacotaqueri irira Peerero otsipaqui paperiqui (Ya. 1.12–5.42; 8.14–25; 9.32–12.19; 15.7–11).

Iquenquejajitaque itioncaquero ocatica paperi irooca ajagantsiniqui 63, irooca 64. Chooca quenquejajianquitsica itioncaquero ichooaquegueti guinnenintisqui pajitatsica Vavironia (5.13). Cotanquitsiquea iconoagarantajiaca pariacaroca quemisantajiaquerica Quirishito iquenquetsatacoquerogueti Iroma, teequea tampatica incanteroji ovajiro, mana yomanaquero, iquempetacaacaro Vavironia iponeajiacagueti catsimajiaquerica ivaesatiniteni paesatoniqui. (Pamenero Yonig. 14.8; 17.5; 18.2.) Chooca quenquejanquitsica arica ichooaque Peerero Iromaqui itioncaquerogueti ocatica paperi.

Itioncajiaqueneri inquenquejacaajiaqueriniji joriojia quemisantajiaquerica Jesoshi intampishitashijiaquero yatsipeventajiacarigueti Amajirote yoguijajavaquerogueti cameetsaguetatsica irantaguetaqueca Aapani Irioshi yamenajiaquerigueti iquemisantajiaqueri Jesoshi (1.2–12), yatsipeventajacajitari iriatimpa (2.18–25). Itsatacaajiaqueri icantashitatiajaciari Ishire Aapani Irioshi (4.1–11). Icantajiaqueri irantsipejiaquempa acaniqui quepatsiqui quemisantajiaquerica Jesoshi (3.18–22; 4.12–19). Icantajiaqueri quero incojiaquempani inchoocajiaqueniji cameetsa igomajamajarejia Aapani Irioshi (1.13–2.3), aisa quero incojiaquempani irantajiaquenerigueti inintaguetaqueca Aapani Irioshi (2.11–17). Itsatacaajiaqueri quero incojiaquempani shirampari aisa imanquigare inchoocajiaquegueti cameetsa (3.1–7), aisa quero incojiaquempani quempogujajiguirica quemisantajiajitsica (5.1–11). Icantajiaqueri irira Jesoshi iquempetacaro mapi anijatsica, irirajia quemisantajiajitsica iquejejiacaro otsipapae mapicota anijatsica ipeacaantacaca Aapani Irioshi tsovironaqui inchoocashirentaqueca (2.4–10).

---

**1** <sup>1</sup>Naroguenti Peerero tioncajiaquempiroca oca, naroguenti itigarancane Jesoquirishito. Imaica nonintaque nontioncajiaquempi paperi maasano

aviatimpajia icoguijajaqueca Aapani Irioshi porocajiananquitsica guinnenintipsipaequi, oajiananquitsica Pontoqui, Garashiaqui, Caparoshiaqui, Ashiaqui

jero aisa Vitiniaqui. <sup>2</sup>Igantagaqueate coramani icoguijiaquempi Aapani Irioshi, itsatsijiaquempitarite tequeratagueta pinchoocateji. Ariqueate yogameetsashirentajajimpi Ishire cameetsanijite pisavicaventajaje inintaguetica iriatimpa. Icoguijiaquempitari pinquemisantajiaqueriniji Jeso quirishito, intsiquirijashirentantajajempironiji iriraja. Namanacoventajajempi incavintsajimentajajempiniji Aapani Irioshi inchoocatacaajajempiniji cameetsa aatonijite pishoshoguiteventajigaro taaca opajitapae.

### **Peerero itsaroventacari Aapani Irioshi**

<sup>3</sup>Iintsija ashineventajajempari Irioshite Amajirote Jeso quirishito, iriotaque aisa Iriri, ancantajiaqueriquea: “Poganejencamajata.” Icavintsajamajajacajiqueate irijanintantajiacajica quejetacaqueate iroquerasano avojaijaiqueate cameetsanijite anijimentajiajenijite coajica. Ivochantajiritarite Jeso quirishito, irootaquequeate atsatantajiacaca anijajajesacanica aatimpajia aisa oajianajesacanica ontaniqui jenoqui inquitequi. <sup>4</sup>Imeshiajiajitarite Aapani Irioshi cameetsanijite oimentajianaquenijite ontaniqui jenoqui inquitequi ivetsicajiacajigueta anchoocatantajiapojempaca. Aatoqueate opejaa, aato ocantaiteti, aisa ocancaniquea oganejen caguitemajataquempa. Iquempoguijajiaquempiroquea ontaniqui inquitequi. <sup>5</sup>Paventajiacariea Aapani Irioshi irootaquequea iquempoguijantajajquempica iragavejanequi, arikea inquejeta naquempa arejevaetantapojoempaca parejejiapojempagueti ontaniqui inquitequi pamennajiajapero maasano ironigaantajajaquea oncoramanitapojogetui. <sup>6</sup>Irootaquequeate pishinemajatan-tajiacaca. Arica imaica pantsipejia-quempa taaca opajitapae, cotanquitsi

aato osamanititsi avisanaque maasano patsipejiavetaca. <sup>7</sup>Oraqueate patsipejia-cagueti mana iramenajitaquero arimajaca piquemisantamajataque, aricampa tee. Quejevaetaca cavorejata-tsica icantajitica ooro itajaitirigueti cameetsanijite intaimentajiqueronijite conoacarica, iriguentiqueate igotanajatsine cavorejatanquitsica. Ivecaramajavetacaqueate oro cotanquitsiqueate oncoramanitapojogetui interoncanajempa. Aviatimpajia caaviji panajaiaqueri ooro, irootaquequeate imaica pantsipemajataquempagueti maasano arimpagueti pinquemisantamajatanaqueri irishineventamajataquempiqueate Jeso quirishito oncoramanitapoja jegueti incoraquetajegueti incantajajempiqueate: “Cameetsavaequequempiqueate, imaicaqueate iintsija naajianaquempi jenoqui inquitequi picancaniqueate pinconoajajena naatimpa, noshine-ventajajemppitarite.” <sup>8</sup>Teequeate pinejajavetempariji, cotanquitsi pipintsajiacari. Tee pinejajavetempariji imaica, cotanquitsiquea paventajianacari, irootaquequeate pishinemajatantajiacaca. Caaviji pishinemajajica, oganejencavaeca ocatica shinevaetantsi, <sup>9</sup>imeshiajiaquempitari pishirequi aatoniji pipejajaa, irootaqetari paventamentantajiacarica.

<sup>10</sup>Coramanii iriraja tsavetantajajatsica yapatsajavantamajajiaquero Itionccaantaqueca Aapani Irioshi, aisa iquenquejamajajiaquero intsajiaque quero incojiaquempini Aapani Irioshi incavintsajajajquempigueti irimeshiajiaquempigueti, aisa irajaijaempigueti coajica, arikeate iquenquetsatacojiaquero aisa. <sup>11</sup>Iriraqueate Ishire Quirishito choocashirentajiaquerica iquenquetsashirentacaajajiaqueritarite itsatacaiaqueri irantsipeventajiacaji Quirishito coajica, arikeate irimetoja-

ventajianacaji, coajica iramenajero iroganejencare. Ariqueate iriatimpajia iquenquejamajajiaquero intintamajajiaqueterite intsajiaqueme querocaqueate aanquempaca inquejetaquempa imaica, aisa quero oncoguetanaquempani.

<sup>12</sup>Cotanquitsi ariqueate itsatacayaqueri Aapani Irioshi aatoqueate yamenajiguiro iriatimpajia onetsanamajataquempagueti maasano itsavetantajiaqueca, iriguentijitarite amenajajiaquerone impoiguetanquitsineca. Irootarite imaica itsavetantajiaqueca quenquetsatacayaquempica icamantajiaquemgueti quero icota Aapani Irioshi imeshiantigueti, iriotaquequeate agavejacaajiaquerica Ishire Aapani Irioshi poneanquitsica jenoqui inquitequi. Iriraquea irashivantijitete Aapani Irioshi intintajavetaca intsamajajiaqueromequeate maasano ocatica itsavetantajiaqueca.

**Aapani Irioshi intintaque incomajamajajiaquempa maasano quemisantajiguirica**

<sup>13</sup>Irootaquequeate nocantantajiaquempica imaica pinquenquejamajajiaquerroja quero pincojaquempani pincomajamajajiaquempagueti aisa pinquenquejamajajiguero quero incojiaquempi Aapani Irioshi incavintsajajiaquemgueti coajica incoraquetajegueti Jesoquirishito. <sup>14</sup>Pinquemisantamajajiaqueri Aapani Irioshi, aviguentijitarite irijanijiate. Aatoquea piquejejijaa coramaní tequeratagueuti pintsajigueriji pantiquerogueti pinintashiguetacaca intati. <sup>15</sup>Iroguentiquea pinquempejiaquempariquea Iriomajatatsica cajemaji-

aqueempica teequea incovaeguishetimtempaji, pinquejetantajiaquempaca aviatimpajia pincomajamajajiaquempaja querocaca pantajiaqueca. <sup>16</sup>Aritaite ocantaque Itioncacaantaqueca: “Pincomajamajajiaquempaja aviatimpajia, irooriji nocomajamajataca naatimpa.”

<sup>17</sup>Piquenquetsatacayaajiguirigueti Aapani Irioshi picantajiguiri: “Aapani.” Iroosacanicate imaica picancanija pimpincatsamajajiaqueri irosati pimetojajianaje, teenicate inchoocatenica apaniro iranaaque impintsamajataquempaca. Irosatiquea mana ipintsamajajacari maasano intati, yamenajajiaqueririte ariqueate iquejetavacaajiacamaasano. Irootaquequeate icantomajantajiacarica maasano antaguishejiguiroca teeca oncameetsateji. <sup>18</sup>Coramani mana poguijatacojiajavetacaroqueate itsatacayaquempica pivaesatinite, cotanquitsimanaqueate poguijatacotamapeajacaro intati, teequeate omeshiajiguempiji. Cotanquitsi coajica yaajajimpiqueate Aapani Irioshi aatonijite piquempejijaa imaica. Tee irioqueate irovegaratantajiguiempiji imentaquipae teroncanajatsineca yaajajimpigueti, <sup>19</sup>iroguentiqueate yovellaratantajiaquempi iriraja Quirishito quejetacarica ovejajaniqui teeca incovaeguishetempaji, teeca inchacotimateji.<sup>a</sup> <sup>20</sup>Coramani tequeratagueti impeacaguemparo Aapani Irioshi quepatsi igantagaqueate icantsitaca quero incoquempani Quirishito, cotanquitsiquea imaica pajinigueti aapojempa savincaguiteripae vegaratapojaatsineca yonigaantaqueriquea incavintsajajiaquempiniji. <sup>21</sup>Pitsajiaque-

**a 1.19** Coramani yamejiacaqueate joriojia icarajiguiniriqueate Aapani Irioshi oveja, cotanquitsi iriguenti icarajiaqueneri oveja cameetsamajatanquitsica quericaca *teeca inchacotimateji*. Ariqueate iquejetacara Quirishito iriatimpia icameetsamajataque teequeate inquempevaetimatempaji, irootaquequeate yagavejantacaca imetojaventajiacaji.

rigueti Quirishito paventajiacariquea Aapani Irioshi tancorejajirica imetojave tacagueti, aisa yoganejencatacaajari, irootaquequea paventantajiacarica Aapani Irioshi, poguijajavaqueri incavintsaajiaquempi.

<sup>22</sup>Piquemisantamajajiaquerogueti Quenquetsartsarentsimajaca ishejajimpilo piguempevaere, imaicaquea jac netsanamajajianaquempi cameetsanjite arimaja pimpintsatimentajaqueemparinijite papiguemisantarijiteni. Imaica picancaniquea pimpintsatavacaamajajiaquempaja aatoqueate picatsimatavacaimajijaatsi.

<sup>23</sup>Quejejiaquempiqueate iroaquerasanoca pivoajaji. Teequeate iriguenti oacaantajiguempine caquinte metojajjaatsineca, iriguentiqueate irijanintajiguimpi Aapani Irioshi, piquemisantajiaquerotarite Iguenquetsatsare. Oraqueate Iguenquetsatsare anijaque, oncoguitempani onchoocaguiteni, aato opega. <sup>24</sup>Aritarite ocanti tioncanquitsica:

“Maasano caquintejia manaqueate iquejejiacaro cataroshi ometojetaglieti, ariqueate iquejejiaca iriatimpajia teequeate inquishojigueji.

Ariqueate oquejetaca aisa yanaantajiguigueti manaquea oquejetacaro ovempenaquipae teequeate onquishopempennaquiteji, ariqueate inquejejiaquempa iriatimpajia aatoqueate igantaga yanaantajigui.

<sup>25</sup>Cotanquitsi oraqueate Iguenquetsatsare Amajirote oncoguitempani onchoocaguiteni.”

Irootaquequeate quenquetsartsentsi itsavetantajitaqueca icamantajitaquempirogueti Quenquetsartsentsi Oganejencatatsica.

**2** <sup>1</sup>Irootaquequeate nocantantajiaquempica povashiantajianajero maasano pantaguevetacaca teeca

oncameetsateji. Aatoqueate pamatavijantajiaji, aisa aato picantashijaja intati. Aato picatsimatacotsitiri itsipa querocagueti icocani jero aisa taaca opajita yashintacaca, aisa aato pinijashitantajiaja. <sup>2</sup>Aviatimpajia pinintamajajiaqueraja Iguenquetsatsare Aapani Irioshi, pinquejejiaquemparija chaajaniquitirajaca iriaqueraca voanquitsi yametarogueti itsomi imponcantanaquempaca. Arikeate pinquejejiaquempa pinquenquejamajajiaqueroja Quenquetsartsimajaca ontampishitacaajiaquempiniji pishirequi arimpanijite pinquemisantamajajianaqueri Aapani Irioshi irosati irajaianaquempi jenoqui inquitequi.

<sup>3</sup>Pitsajiaqueterarite yoganejencamajatac Amajirote, icavintsaajiaquempitarite.

<sup>4</sup>Pinquempejijiapojaquempari iriatimpa quempetacaroca mapi anijatsica. Irirajia caquinte imanintajavetacaro ocatica mapi yantajiguilogueti mapipanco, cotanquitsi Aapani Irioshi icoguiaquero, ishinevencaro yameniquerotarite oganejencamajata. <sup>5</sup>Aisa aviatimpajia mana piquejejiacaro otsipapae mapicotia anijatsica ipeacaantacaca Aapani Irioshi tsovironaqui inchoocashiretaqueca. Aisa piquejejicari isaserorotejiate, quejetaca pitaajiaqueneri viratsi ishineventacaca pisaviventamajaquerogueti maasano inintagueticia, piquemisantajiaqueritari Jesoquirishito. <sup>6</sup>Aritarite ocanti tioncajitic coramani:

Icanti Aapani Irioshi: “Nonquejetaquempari coguiaqueroca mapi yantaquerogueti mapipanco, icoguiaquero cameetsamajatanquitsica ompeaqueumpanijite anaantamajatanquitsineca. Aritarite nocoguiaqueri Quirishito nontigarancaqueri Shionequi, namenaqueritarite caaviji yoganejencata.

Maasanoqueate quemisantajiaqueri-  
neca aatoquea ipashivent.”

<sup>7</sup>Aviatimpajia quemisantajiaitsica  
pamenajiaqueri yoganejencamajata.  
Irira teeca inquemisantajigueriji  
iriotaquequeate ocantacotaque itionca-  
cojiquerigueti ocanti:

“Iriraqueate antajiguiroca  
mapipanco itsinetacotantaro-  
gueti mapicoti imanintaquero-  
queate mapicota cameetsamaja-  
tanquitsica,  
cotanquitsi opejaaqueate anaanta-  
majatanquitsica quishotacaa-  
queroca otsipapae.”

<sup>8</sup>Aisa onetsanataca itioncacojiquero-  
gueti ocanti:

“Iriatimpa mana iquejetacaro mapi  
itivatantajitaca ariqueate  
iromposantajitaquemparo.”

Teenicate irinintajigueji inquemisantaji-  
aquero Iguenquetsatsare Aapani Irioshi,  
irootaquequea tee intsatantajiaquem-  
parica Quirishito, mana icomijivacari,  
irotaquetarite icantaque Aapani Irioshi  
coramani.

<sup>9</sup>Cotanquitsi aviatimpajia icoguiajia-  
quemi Aapani Irioshi igonorontajia-  
jimi, intintacajajiaquemi pimpeajia-  
quempa isaserorotejite Majirontamaja-  
tatsica. Aisa intintacajajiaquemi  
pincomajamajajiaquempaquate  
maasano, yashintamajajiaquempitarite.  
Mana oquejetaca imaica cameetsanjite  
pincamantimentajiaquerinijite maasano  
quero icota Aapani Irioshi, caaviji  
yoganejencamajata. Coramani teequeate  
pintsajavetempaji quejevaetaca-  
queate manaca pipitsecacojiaque intati,  
pantagushejiavetacarotarite teeca  
oncameetsateji, cotanquitsi ariqueate  
imeshiajajimi quejevaetaca manaca  
pisavincaguitetacojianaji, teenicatarite  
pantajajeroji pantagushejiavetacaca  
coramani. <sup>10</sup>Coramani tee irashintajia-

vetempiji Aapani Irioshi, cotanquitsi  
imaica aviguentijiaqueate irijanijiate.  
Aisa teequeate queri incavintsajajive-  
tempiji, cotanquitsi imaica icavintsajaj-  
aquempiqueate Aapani Irioshi.

<sup>11</sup>Napiguemisantarijiate niopintsa-  
mabajiacaca, aato osamani pichoocajigu  
acaniqui quepatsiqui. Ariguenti  
poajianaque pinchoocamajajipojaque-  
quea ontaniqui jenoqui inquitequi  
ichoocaquegueti Quirishito. Nocantanta-  
jiaquempicaqueate pintampishitashijia-  
querojate maasano teeca oncameetsateji  
ishineventajiacaca caquinte, quejetaca-  
quea ashimirintacaro pishire arisanjoa  
oquempevaeshirentacaajanajimpitsi.

<sup>12</sup>Imaica pinconoajiaquemparigueti  
teeca inquemisantajigueji cameetsa-  
queate pinchoocajigue. Ariguetija  
irinijashijavetaquempi ijiqueji irooqua  
pantajiaque teeca oncameetsateji,  
cotanquitsi coajica iramenajiaquempi  
arimaja picomajamajajiaaca irishineven-  
tajiaquempariqueate Aapani Irioshi  
incoraquetajegueti, incantajiaqueri:  
“Arimajasacanicate yantajiaque  
cameetsatatsica.”

### Peerero icantajiaqueri inquemisantajiaquerija majirontajiaitsica

<sup>13</sup>Aviatimpajia piquemisantajiaqueri-  
gueti Amajirote, imaica pinquemisanta-  
jigueri aisa maasano pimajirojate  
choocatanquitsica acaniqui quepatsiqui.

<sup>14</sup>Pinquemisantajigueri pimajirote  
anaantatsica aisa quejemajirovecarica  
itigarancaqueca incantajiaqueriqueate  
antagushejiguiroca teeca oncameetsa-  
teji incantomajajiaqueri, jero aisa  
irishineventajiaquempari netsanajian-  
quitsica. <sup>15</sup>Irootarite ininqueca Aapani  
Irioshi pinetsanamajajiaquempajia  
cameetsanjite poguemisantimentajia-  
querinijite njashijiaquempica teeca  
intsajigueriji Aapani Irioshi. <sup>16</sup>Tecatsi

omperajiaquempine imaica, nocantanta-  
jiaquempica pantajiaquero cameetsa-  
guetatsica. Aatoquea picantitsi: "Imaica  
nantaguishetaque taaca opajitapae  
nonintaguistica naatimpa, tecatsitarite  
omperataquenane." Aato ocameetsati  
pinquejetaquempagueti. Pinquemisanta-  
jiaquerija Aapani Irioshi ashintamajajia-  
quempica.<sup>17</sup> Cameetsaja pinquenquetsa-  
tacaajigueri maasano caquinte,  
paajiaavaqueri maasano. Pimpintajia-  
quemparija papiguemisantarijiteni.  
Pimpincatsajiaqueriqueate Aapani  
Irioshi, pintsaroventajiaquempari.  
Pimpincatsajiaqueri aisa pimajirojate,  
cameetsaja pinquenquetsatacaajiaqueri.

### **Quero incojiaquempani aajanirentsijia**

<sup>18</sup> Aviatimpajia yomperajiacaca,  
pinquemisantamajajigueri omperaji-  
guimpica aato pipigatsajigari. Aato  
apaniro piquemisantajiguiri cavintsaajajia-  
quempica, pinquemisantajiaqueri-  
queate aisa semajiguimpica. <sup>19</sup> Incatsi-  
matashijitaquempigueti intati pantsipe-  
rejacojiaquemparoqueate. Pinquejeja-  
quempagueti imaica pintsajiaque  
iriguenti piquemisantajiaque Aapani  
Irioshi, ariqueate imaica irishineventan-  
quempi. <sup>20</sup> Oraqueate managueti  
pantsipejiaquempa incatsimatimentaji-  
taquempirogueti pantajerogueti teeca  
oncameetsateji, carimpate irooqueate  
irishineeventimenquempi Aapani Irioshi?  
Aatoqueate. Cotanquitsi oraqueate  
iroogueti pantsipejiaquempa pimajereta-  
naque incatsimatashijitaquempigueti  
intati pantajerogueti cameetsatatsica,  
ariequate imaica irishineeventimentajia-  
quempiro. <sup>21</sup> Irootaquequeate inintaque  
Aapani Irioshi pinquejejaquempa  
imaica. Pinquenquejamajajiaqueri  
Quirishito yatsipeventajacajigueti,  
ariequate intsatacayaquempi quero  
pincojiaquempani pantsipejiaquempa-

gueti incatsimatashijitaquempigueti  
intati. <sup>22</sup> Iriatimpajia tee inquempevaetem-  
paji, aisa teequeate iramatavijantima-  
teji. <sup>23</sup> Oraqueate inijashijitacarigueti  
teequeate impigatantempaji. Aisa  
yatsipetacaajitacarigueti teequeate  
incatsimajigueriji atsipetacaajiacarica,  
mana icantaque: "Inchiquiojita  
incantaque Aapani Irioshi quero incojia-  
quempani."<sup>24</sup> Oraqueate imetojaventajiji-  
acajigueti Quirishito coroshiqui  
manaqueate yaitajianacajiro aguempe-  
vaerejia itsinoqui yatsipeventajacajiji  
aatonijite incatsimatimentajiro Aapani  
Irioshi. Imetojaventantajiacajica  
aatonijite aquempevaejajatsi,  
manaqueate ancomajamajajianajempa  
intati. Yompajacojitaqueri coroshiqui  
cameetsanjite irimeshiimentajajinijite  
ancoguitempinaniji anijajiajeniji.  
<sup>25</sup> Coramani manaqueate piquejejia-  
vari intati oveja timpinanquitsica,  
cotanquitsi imaica pipianaja ichooca-  
queguedi Quempoguijantatsica Agamaja-  
coshirentaquempica.

### **Quero incojiaquempani shirampari aisa imanquigare inchoocajiaqueguedi cameetsa**

**3** <sup>1-2</sup> Aviatimpajia manquigarentsijia  
pinquemisantamajajiaquerija  
manquigatimpica. Irioguetiqueate teeca  
inquemisantero Iguenquetsatsare  
Aapani Irioshi cotanquitsi iramen-  
quempigueti pinquejetaquero imaica  
arica irinintanaque inquemisantanaque  
iriatimpajia aisa. Aatoqueate icoacota  
pinquenquetsatacayeri pincantajiaque-  
riqueate inquemisantajiaque, yamen-  
quempitarite picomajamajajica,  
piquemisantajiaqueri. <sup>3</sup> Aato iroguenti  
piquenquejajiguitsi pinetsanamajajia-  
quempagueti pinetsanajiaquero pitsino-  
quitica quejetacaroca pimae jero  
pinenquequijiaquempa taaca opajitapae

vegaramajatanquitsica jero aisa pinquitsaajiaquempa quitsaarentsi cameetsamagotanquitsica.<sup>4</sup> Iroguenti pinetsanajiaque pishire pinquenquejajiaque quero pincojiaquempani pinchoocatimentajiaqueniji cameetsa aatonijite osemashirentacaguimpi taaca opajita. Aritarite anetsanajiaquerogueti ashire ancoguitempani anchoocajiaque cameetsa. Irootaqueate intamajatica Aapani Irioshi.<sup>5</sup> Aritarite oquejejiaca manquigarentsija coramanitica quemisantamajajiguirica Aapani Irioshi, ochooocajiaque cameetsa, aisa oquemisantamajajiguiric manquigatrocata. <sup>6</sup>Ariquetae oquejetaca coramani Sarani iroatimpa, oquemisantamajatiri Averaameni, aisa opincatsamajatiri amenaquerigueti iriguenti ashintaro. Imaica aviatimpajia pinchoocajiaquegueti cameetsa, aisa aatogueti pitsaroajigui, ariquetae pinquejiaquemparo iroatimpa.

<sup>7</sup>Aviatimpajia shiramparijia cameetsaqueate poajiaquero pimanquigarejia, teesaconatarite ontampishimajajigueji onquejejiguempi aviatimpajia, aisa mavitetarite icavintsajajiaquempi Aapani Irioshi imeshiajiaquempigueti cameetsanijite irosatiniji pinchoocajiaque iriatimpaqui. Pinquejiaquempa imaica cameetsaqueate poajiaquero pimanquigarejia cameetsanijite inquemimentajiaquempinijite Aapani Irioshi pamanajiguerigueti.

#### Quero ancojiaquerini atsipetacaajiacajica

<sup>8</sup>Imaicaquea imaica mana noncantajiaquempi pinquemavacaajiaquempaja, aisa pincavintsajavacaajiaquempaja. Pimpintsaajiaquemparia papiguemisantariteni, pincavintsajantajiaquequeate, aatoqueate pinintajigu panaantajiaque. <sup>9</sup>Querocagueti incojiaquempini itsipa aatoja pipigajigari. Incatsimajiaquempi-

gueti incatsajiaquempigueti, aatoja pipigajigari. Iroguentiquea pamanajiaqueri Aapani Irioshi incavintsajajiaqueri. Irootaquetari inintacaantajiaquempica Aapani Irioshi incavintsajimentajiaquempinijite.<sup>10</sup> Ocanquetarite itioncacojiqueca ocanti:

“Quericaca nintanquitsineca irishinevaequempa aisa iriguintenitaquempa cameetsa, aatoqueate inijaguishevaeti, aisa aatoquea yamataga.

<sup>11</sup> Aato yantaguishetajiro teeca oncameetsateji, mana irantaque cameetsaguetatsica, irintamtamajataquequeate inchoocajiaque cameetsa.

<sup>12</sup> Icavintsajajiguiritarite Amajirote maasano quemisantajiguirica, aisa icancani iquemajiguri quenquetsatacaaajiguirica, cotanquitsi iriraqueate antaguishetiroca teeca oncameetsateji teequeate irishineventajiguempari.”

<sup>13</sup>Pinintamajajiaquegueti pantajiaquero cameetsaguetatsica, ariquetae querocampate incatsimati menquempica.

<sup>14</sup>Cotanquitsi inchoocajiaquegueti catsimati mentajiaquempironeca pantaquegueti cameetsaguetatsica, picancaniquea pishinejiaquempa. Aatoqueate pitsaroacagari, aatoja pishoshoguiteta. <sup>15</sup>Manaqueate pintsarover tamajajiaquempari Quirishito, pamena jiaqueriqueate tee inquempeva etempaji, pincantajiaqueri: “Aviguenti Nomajirote.” Incoacojiaquempigueti quero ocotaca piquemisan tantacarica Aapani Irioshi, pishinejiaquempa queate pincantajiaqueriqueate. Pincamanta maja jiaqueri quero picotacani pitsatantajiacaca poajiana que jenoqui inquitequi ichooca quegueti Aapani Irioshi picancaniquea pinchoo-

cajiapojaque.<sup>16</sup> Cotanquitsi cameetsaqueate pinquenquetsatacaa jiaqueri, aatoja picatsimajiguiri. Pinetsanamajaji-aquempaja cameetsanjite impashiventimentajianaquempanjite quericaca catsimatimentajiaquempirineca Quirishito arigueti irivosantejimentajita-quemperi iramenajiaquempigueti piquemisanqueri.<sup>17</sup> Iriogueti nintanquitsine Aapani Irioshi pantsipejiaquempa incatsimatimentajiquempirogueci cameetsaripae, cameetsavaetaque, caavijitarite anaaque ocameetsamajataque onquejetaquempagueti imaica, anaquiero pantsipejiaquempagueti incatsimatimentajiquempirogueci pantajiguirogueci teeca oncameetsateji.

### **Yatsipetacaguetti Quirishito**

<sup>18</sup> Aritarite yatsipetaca Quirishito aisa. Imetojaventajiacajiguetti irishejiaqueronjite aguempevaerejia, apatirokeate imetojaventajiacaji yagaqueroquea maasano. Iriatimpa yoganejencamajataqueeate teequeate inquempevaetem-paji, cotanquitsi imetojaventajiacaji aatimpajia quempevaejiatsica cameetsanjite iraa�ianacajai anconoajiaquempariniji Aapani Irioshi. Imetojajivetacari itsinoqui, cotanquitsi yanijacaajiri Ishire.<sup>19</sup> Yoashirentanaqueua iquenquetsatacaa jiaquitiriqueate ishirejia ashitacoshirejianquitsica.<sup>20</sup> Iriojatarite teeca inquemisantajigueji coramani ichoocaquegueti Noeni. Oraqueate tequeratagueti interonqueroji inirojegui quenajarontsi icantajitica aareca, irira Aapani Irioshi osamaniqueate yoguijajiavecari teetaqueate irantsipetacaajiguempariji. Oraqueate iteroncaquerogueti quenajarontsi, ariqueate itejaquero inirojenca incani anancacojianaqueri maasano, ariqueate iteroncajiajaca yojocajajia. Iriguentimivani yaajiavaji 8 amajatacojianquitsica

aarecaqui.<sup>21</sup> Irooquea ogomarotaque imaica pivinacajajiacaguetti iraajiajempiniji Aapani Irioshi. Tee irooquea pivinacajatashijiguempajipinquiero cantaitero pitsinoqui, manaqueate pivinacajatantajiacaca pincantajiaqueriniji Aapani Irioshi pinintaque irishejajempi pishirequi aatoniji ochoocataji incantomajimentaquempica manaquea pinquenquejajianaqueri cameetsaguetsica. Ipochatanajitarite Jesoquirishito yagavejantacaca iraajiavajempi.<sup>22</sup> Cotanquitsi ipochatanaji ariqueate yoanaji jenoqui inquitequi. Imaica chooca isavicaque itincamijempequiqui Aapani Irioshi imajirontamajatagueti, yanaajiaqueri maasano: irashivantijitete Aapani Irioshi, majirontaguevetatsica, agavejantaguevetatsica, maasano.

**4** <sup>1</sup>Nocamantantajiaquempicaqueate imaica cameetsataque pantsipejiaquempagueti aviatimpajia pinquejejiaquempari Jesoquirishito yatsipeventajiacajiguetti itsinoqui. Antsipeventajiaquempariguetti iriatimpa atsinoqui, aato aquenquejajajiro teeca oncameetsateji.

<sup>2</sup>Imaica choocatirajajiguetti atsinoqui acaniqui quepatsiqui, aatoqueate coanatsi antagushejiguero taaca opajitapae teeca oncameetsateji, iroguenti anquenquejamajajiaque antajiaque inintaguetica Aapani Irioshi.

<sup>3</sup>Coramani pantaguishejiaquetarite taaca opajitapae teeca oncameetsateji ishineventaca teeca inquemisanteriji Aapani Irioshi. Poashijiaquero manquigarentsi aisa piquenquejaguishejiaquero teeca oncameetsateji. Pishinuijiajaca, aisa picapiocajiacameetsanjite pishinuijiaquempa pantaguishejiaque-niji teeca oncameetsateji. Icantavecatequeate Aapani Irioshi: “Aatoja pitsaroventari itsipa”, cotanquitsi teequeate pinquemisantajigueriji, arimpaquea pijatiri pitsaroventajianacari piroshivi-

jitashitacaca.<sup>4</sup> Imaica teenicate pinconoajajempariji antaguishejiguiroca teeca oncameetsateji, irootaquequeate icantantajianacaca: "Querocate icojianacami imaica teequeate inconoajajajiji", ariqueate inijashijianaquempi. <sup>5</sup>Cotanquitsi chooca ontaniqui inquitequi irira Cantimentantatsica, incoacojjavaqueriqueate irira nijashijiaquempica, incantajiguera: "¿Quero ocotaca pinijashitantajavetacarica irira quemisantajiaquenaca?" Aritarite incantimentajiaqueriqueate maasano taaca opajitapae yantajiaqueca maasano quempevaejiatsica imaica, iriocampa metoajianquitsica jerijia tequerataca irimetojajigueji. <sup>6</sup>Irootaquequeate iquenquetsatacantaajitacarica irirajiaqueate metoajianquitsica coramani. Imetojajavetaca, iriguentijitarite quempevaejiatsica quejecarica maasano igonorojia, cotanquitsi iquenquetsatacayaajitaqueri itsavetacojitaquero Quenquetsatsarentsi Oganejenca-tatsica cameetsanijite incoguitempaninijite inchoocajiaque ishirejia inquempejajempari Aapani Irioshi.

**Icantajiaqueriqueate  
incavintsajajiaquerija  
irapiguemisantariteni**

<sup>7</sup>Imaica pajiniqueate aguempa onteroncantapojempaca maasano acaniqui quepatsiqui. Nocantantajiaquempica pinquenquejamajajiaqueja quero pincobiaquempa, pincomajaji-guempaja. Irosati pinquenquetsatacayaajitaqueri Aapani Irioshi. <sup>8</sup>Pinintamajajigueja pimpintsatavacaamajajiaquempa. Pinquejejiaquempagueti imaica aatoquea piquenquejajigiro quero incojiaquempini papiguemisantariteni, manaqueate pimpeacotajemparo. <sup>9</sup>Paavacaajjavaquempa, poguimaajiavaqueri osamanipaequitica, aato picanti-

manatiri. <sup>10</sup>Aapani Irioshi icantashitati-jajaquempiqueate yagavejacaajiaquempi apaniropae. Irootaquequeate nocantantajiaquempica imaica querocaca yagavejacaajiaquempica irootaquequeate pisavicaventajiaque cameetsanijite pamitacojiaquerinijite papiguemisantariteni, cotanquitsi pisavicaventamajajiaqueroyate cameetsanijite iramenimentajitaqueronijite arimaja icavintsajantamajati Aapani Irioshi. <sup>11</sup>Choocagueti tsavetantatsica irooqueate intsavetantaque icanqueca Aapani Irioshi. Choocagueti amitacojiguirica irapiguemisantariteni irooqueate iramitacomajajiaqueri, itampishitacaa-queritari Aapani Irioshi. Pinquejejiaquempa imaica cameetsanijite intsaroventimentajitaquemparinijite Aapani Irioshi, iriguentitarite agavejacaaque-mpine Jesoquirishito. Iintsija acancanija antsaroventajiaquempari, iriguentitarite caavijica yagavejamajati. Ari oncoquempa.

**Icantajiaqueriqueate  
irishinejiaquempaja  
yatsipeventajiacarigueti Quirishito**

<sup>12</sup>Nopintsamajajiacaca, aato poajianaque intati patsipejiacagueti, aato picantajigu: "¿Queroca ocotacani ocatica?" Aritarite onquejetaquempani imaica cameetsanijite iramenajiaquem-pinijite Aapani Irioshi arimajaca piquemisantamajataqueri. <sup>13</sup>Coramani yatsipevaetaca Quirishito. Imaica pishinejiguempa, piquejejiaclaritarite iriatimpa patsipejiacagueti cameetsanijite pishinetimentajiaquempanijite oncoramanitapojajegueti iramenajitaqueriqueate irimajirontamajatapoja-quempa. <sup>14</sup>Pishinejiaquempaqueate irivosantejajitaquempigueti iramenajiaquempigueti piquemisanqueri Quirishito. Ichocashirentajiaquempita-

rite Ishire Aapani Irioshi, iriguentiquea Oganejencari.

<sup>15</sup>Inchiquoitaja patsipeventajigarotsija pimetojantajiaquegueti, jero aisa pincoshijiaquegueti, aisa pantaguishejiaquerogueti otsipapae teeca oncameetsateji. Aisa inchiquiojia patsipeventajigarotsija piticaavaquerigueti taaca opaji irante. <sup>16</sup>Iroogueti pantsipeventajiaquempa pinquemisantajiaquerigueti Quirishito, aatoja pipashiventajiga, manaqueate pintsaroventajiaquempari Aapani Irioshi pamenajiaquegueti iriguenti patsipeventajiac Quirishito.

<sup>17</sup>Aapojacatarite impariantanaquemparoca Aapani Irioshi iramenantajiaquemparica maasano, cotanquitsi iriqueti parianacaro atsipejianquitsi irijanintajiacaca cameetsanijite iramenajitaquero arimaja iquemisantamajajiaque aricampa tee. Aritarite aquejejianaca atimpajia imaica atsipejiacagueti, iriompate irirajia teeca inquemisantajigueroji Quenquetsatsarentsi Oganejen-catatsica itigarancaqueca Aapani Irioshi ¿quiero incojiaquempani iriatimpajia? Arimaja irantsipemajajiaquempa.

<sup>18</sup>Irantsipejiavetaquempaqueate quemisantajatsica, cotanquitsi Aapani Irioshi irajaiavajeri. Irirampani covaeguishetatsica teeca inquemisantajiri Aapani Irioshi, ¿quiero incojiaquempani iriatimpajia? <sup>19</sup>Irootaqueate noncantantajiaquempica iriogueti nintanquitsi Aapani Irioshi pantsipeventajiaquemparo inintaguetica iriatimpia, arimpaqueate pantajianaqueroja cameetsaguetatsica. Iriotaquetarite peacaajiacaji, irooqueate cameetsata-queate pinquenquetsatacaaquiaqueri pincantajiaqueriqueate: "Nonintaque pamenacomajataquena, notsataquetarite pinetsanatero maasano picantaqueca." Aatotarite yamatavijiguimpi Aapani Irioshi.

**Peerero icamantajiaquerigueti quempoguijajiguirica quemisantajatsica**

**5** <sup>1</sup>Imaica nonintaque nontsatacaajia-queMPI aviatimpajia quempoguijajiguirica quemisantajatsica capiocapinijia-tsica ontaniqui, naroguentitari aisa quempoguijajiguirica quemisantajatsica. Naroguentitarite amenamajataquerica Quirishito yatsipetacagueti. Oncoramanita-pojagegueti incoraquetajategueti ironigaampojempa yoganejencavaeca, ariqueate intsipatanajena naatimpia aisa, nonquejevetanaquempari. <sup>2</sup>Imaica irootaqueate noncantantajiaquempica ocatica: Pinquempoguijamajajiaquerija papiguemisantajijateni, inintacajajiaquem-pitarite Aapani Irioshi pinquempoguijajiaqueri. Pintsatacaaquiaqueriqueate, aatoja piperajiga Inchiquoitaja pinintajianaque aviatimpajia pintsatacaaquiaqueri, aatoqueate icantajiguimpi itsipa, aisa aatoja iro pitsatacaashitanti paaqueniji imentaquipae, manaquea pinitamajajigue pamitacoquiaqueri. <sup>3</sup>Aatoja picatsimatsajiguiri pinquempoguijajiaquerigueti, manaqueate cameetsaqueate pinchoocajia-que cameetsanijite iroguijatacójiana-quempinijite iriatimpajia. <sup>4</sup>Pinquejia-quepagueti imaica, oncoramanitapoja-gegueti incoraquetajegueti Jesoquirishito quempoguijajajica maasano aatimpajia, irajaijanajempi intsipajianaquempiqueate jenoqui inquitequi, incavintsajamajajia-quempiqueate pincoguitepani pinchoocamajajiaquequeate cameetsa pinquejia-quepariqueate iriatimpia.

<sup>5</sup>Imaica aviatimpajia quemisantajatsica pinquemisantamajajiaquerija quempoguijajiguimpica, aisa maasano pinquemisantavacaajiaquempaja, aato pinintajigui panaantajiaque. Aritarite itioncacojiquerogueti ocanti:

"Aapani Irioshi ipigajiacari irirajia aventacojatiacsica,

cotanquitsi icavintsajamajajiaqueri-  
queate irirajia teeca iraventaco-  
jiguempaji.”

<sup>6</sup>Irootaquequeate nocantantajiaquempica  
pimpincatsamajajiaquerijate Aapani Irioshi  
agavejamajatatsica. Oncoramanitapojaque-  
gueti aapojempagueti irinintanaquegueti  
incovejencatacaciajiaquempi, incovejencata-  
cajiaquempiqueate. <sup>7</sup>Taaca opajitapae  
piquenquejajiguica aatoja pishoshoguite-  
ventajigaro, manaqueate pincantajiaqueri-  
queate Aapani Irioshi incavintsajajiaquem-  
piqueate, igantagatarite iquenquejajia-  
quempi tee impeacojiguempiji.

<sup>8</sup>Pinquenquejamajajiaque cameetsa,  
pagamajavaquemparija imajirote  
ampatsini catsimajiaquempica. Iquejeta-  
cariquea chaonari icantigueti morororo,  
iquenaguetanaque yamenaguetanaque  
irishecaquempaca. <sup>9</sup>Cotanquitsiqueate  
pintampishitashijiaquerija aatoqueate  
piquemisantajiguiri. Picancaniqueate  
pinquemisantamajajianaqueri  
Amajirote, aatoja povashiantajiguiro  
piquemisantajiaquerigueti, pitsajiaque-  
tarite ariquateate iquejejiaca papiguem-  
santarijijateni gunteninijiatsica  
osamanipaequitica yatsipejiacaroqueate  
taaca opajitapae. <sup>10</sup>Ariquateate pinquejeji-  
aquempagueti imaica pantsipejiaquem-  
pagueti, iriraquea Aapani Irioshi  
iramitacojiaquempiqueate aatonijite  
povashiantajiguiro piquemisantajiaque-  
gueti, aisa intampishitacajiaquempi  
jero aisa inquemisantacaamajajiaquem-  
piqueate. Ariquateate osamanijencaque-  
gueti pinquejejiaquempa imaica,  
ariquateate intsipajianaquempi jenoqui

inquitequi pincoquempaniquea pinchoo-  
cajapiroje ontaniqui, pinquejejiaquempa-  
riqueate iriatimpa icovejencatigueti,  
irootaquetari inintacaajiaquempi Aapani  
Irioshi, aisa icavintsajamajajiaquempi-  
queate piquemisantajiaqueritarite  
Jesoquirishito. <sup>11</sup>Iintsija acancaniquea  
antsarovenetajiaquempari, iriguentitarite  
caavijica yagavejamajati, incoguitem-  
pani irimajirontamajaguitempani. Ari  
oncoquempa.

<sup>12</sup>Chooca acaniqui notsipatacari Shirivano.  
Iriatimpa iriguenti papiguemisantariteni  
quemisantamajatirica Quirishito. Iriotaque-  
queate notsipatashitacaca notionc妖iaquem-  
pigueti capichaji notsavetanquerigueti  
Aapani Irioshi quero icota icavintsajajia-  
quempigueti, aisa notampishitacajiaquem-  
piqueate cameetsanjite arimpanjite  
piquemisantamajajianaqueri. Aato  
povashiantajajiro piquemisantajiaqueca.

<sup>13</sup>Irirajiaqueate apiguemisantarijia-  
teni guntenijijatsica Vavironiaqui<sup>b</sup>  
inintajiaque pinquemacojiaqueri  
iquenquejajajimpi. Iriraqueate  
Aapani Irioshi inintacajajiaqueri  
iriatimpajia inquemisantajajieri  
inquejejiaquempiqueate aviatimpajia.  
Ariquateate iquejetaca aisa notsata-  
caane Maricoshi nopeaqueca  
nirijanite, iriatimpa inintaque pinque-  
macojiaqueri iquenquejajajimpi.

<sup>14</sup>Netsana pinintavorotavacaava-  
quempa,<sup>c</sup> pimpintatsavacajia-  
quempa. Namanacoventajiaquempi  
piquintenijiaquempanjite cameetsa  
maasano aviatimpajia quemisantaji-  
girica Quirishito. Ari oncoquempa.

**b** 5.13 *Vavironia*. Iconoagarantajiaca pariacaroca quemisantajiaquerica Quirishito  
iquenquetsatacoquerogueti Iroma, teequea tampatica incanteroji ovajiro, mana yomanaquero,  
iquempetacaacaro Vavironia iponeajiacagueti catsimajiaquerica ivaesatiniteni paesatoniqui.  
(Pamenero Yonig. 14.8; 17.5; 18.2.) Arica ichooquea Peerero Iromaqui itioncaquerogueti  
ocatica paperi. **c** 5.14 *Netsana pinintavorotavacaavaquempa*. Yamejiaca coramani  
inintavorotavacaajavaca yamenavacaajiacagueti, ari iquejejiaca tsarovenetajigarica Quirishito  
coramani.

# MAVITETAPOJATSICA ITIONCAQUECA

## PEERERO

**Antsatantaquemparoca**

Ocatica iroguenti antsatantaquemparoca mavitetapojatsica itioncaqueca Peerero. Chooca quenquejajianquitsica itioncajiaquereneri joriojia tsaroventajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1 Pe. 1.1). Cotanquitsi itsipajia iquenquejajiaque itioncajiaquereneri maasano quemisantajiaquerica Jesoshi. Peerero irio jorio, irio itigarancane Jesoshi. Irocashi itioncacotaqueri irira Peerero otsipaqui paperiqui (Ya. 1.12–5.42; 8.14–25; 9.32–12.19; 15.7–11). Iquenquejajitaque itioncaquero ocatica paperi irooca ajagantsiniqui 64, cotanquitsi tee intsajiteji quero ichoocaqueuni itioncaquerogueti. Chooca quenquejajianquitsica itioncaquero ichoocaquegueti guinteninintsiqui pajitatsica Vavironia, itsipajia iquenquejajiaque arica ichoocaque Peerero Iromaqui itioncaquerogueti.

Itioncajiaquereneri quemisantajiaquerica Jesoshi iragamajajiaquempari amataajjatsica, aatoniji yamatavijajiguiritsi intsatacajiaquerigueti teeca iroomajateji, aisa aatoniji yovashiantajianajiro iquemisantajiaquegueti (3.17). Icamantajiaqueri quero incojiaquempani quemisantajiaquerica Jesoshi (1.1–15). Itsavetacotajiro coramanitica icantashitatiimojiacarigueti Jesoshi, aisa iquenquejacaajiaqueri icantajiaqueca tsavetantajiatsican coramanitica (1.16–21). Icantajiaqueri icantajiavetacaca amataajjatsica (cap. 2), aisa iquenquetsatacotaquero incoraquetajategueti Jesoquirishito acaniqui quepatsiqui (cap. 3).

**1** <sup>1</sup>Naroguenti Shimo Peerero tioncajiaquempiroca oca. Naroguenti irajaanire aisa itigarancane Jesoquirishito. Imaica nontioncajiaquempi maasano aviatimpajia quejejiaquenaca naatimpajia aventajigaria Jesoquirishito Arioshite Aajjavajica aatoniji apegta. Cameetsavaetaque paventajiacarigueti. Tampatica yoaguetaquero maasano, irootaque yagavejacaantajiaquempica paventajigari. <sup>2</sup>Namanacoventajiaquempiqueate pintsatimentamajajiaquerinijite Aapani Irioshi aisa Amajirote

Jesoshi cameetsanjite arimpanijite incavintsajamajajiaquempi, aisa inchoocatacajiaquempiqueate cameetsa aatonijite pishoshoguiteventajigaro taaca opajitapae.

**Icantajiaqueriqueate quero  
incojiaquempani  
inquemisantamajajiaquerigueti  
Jesoquirishito**

<sup>3</sup>Irira Aapani Irioshi inintacajaiacaji anconoaquiaquempari, aisa anquejejiaquempari ancomajamajaquempa. Imaica

atsajiaqueritarite yagavejacaantajiac-  
jica anquemisantamajajiaqueriniji, aisa  
antajiaqueronijite maasano intintague-  
tica. <sup>4</sup>Inetsanataqueroqueate icantaca-  
jica, yagavejacaajiacaji antajiaque-  
queate cameetsaguetatsica aatonijite  
aquejejijaaritsi teeca inquemisantaji-  
gueji antaguishejiguiroca teeca  
oncameetsateji, manaqueate anquejem-  
ajiaquempari iriatimpa. <sup>5</sup>Imaica  
piquemisantajiaqueri, irootaqueate  
nocantantajiaquempica nonintaque  
pincomajamajajiaquempaja. Arikeate  
pincomajamajajianaquempagueti  
irooqueate pisavicaventajiaque  
pintsamajajianaqueroqueate intintague-  
tica Aapani Irioshi. <sup>6</sup>Pintsamajajiana-  
querogueti arikeate pintampishitashiji-  
anaquero maasano teeca oncameetsateji.  
Pintampishitashijianaquerogueti  
arieate pantsiperejacojianaquempa.  
Pantsiperejacojiaquempagueti arikeate  
pimpincatsajianaqueri Aapani Irioshi  
pishineventajiaquemparoqueate pantajia-  
quero intintaguetica iriatimpa. <sup>7</sup>Pimpin-  
catsamajajiaquerigueti arikeate  
pimpintsaiguempari maasano papigue-  
misantarijateni. Pimpintsaquiaquempari-  
gueti papiguemisantariteni, arikeate  
pincavintsaajajigueri aisa maasano  
caquinte. <sup>8</sup>Pinquejejiaquempagueti  
imaica arimpaqueate pintsamajajiana-  
queri Amajirote Jesoquirishito pinqueje-  
jianaquempa queate iriatimpa,  
arieate aato piquemisantamampeajiga  
intati. <sup>9</sup>Iriraqueate teeca inquejetempaj  
imaica iquejevetacari caarica amenama-  
jatatsi, iquejevetacariquea shamonca-  
jari teenicate intsamajateriji Amajirote,  
aisa ipeacocaro icavintsaajquerigueti  
Aapani Irioshi yaajirigueti ishetajiniri-  
gueti maasano iguempevaere. <sup>10</sup>Cotan-  
quitsi aviatimpajia, napiguemisantarija-  
teni, aatoqueate piquejejigari iriatim-  
pajia mana picancani pantajiaquero

nocantajiaquempica imaica cameetsani-  
jite pintsamajajianaquenijite arimaja  
inintacajajiaquempi Aapani Irioshi  
piquemisantajiaqueri aisa irashintama-  
jajiaquempi. Pinquejejiaquempagueti  
imaica aato povashiantajajairo piquemi-  
santajiguigueti. <sup>11</sup>Coajicaqueate  
poajianaquegueti jenoqui inquitequi  
ichoocatigueti Amajirote Jesoquirishito  
Meshiantatsica cameetsaqueate  
irajaiavajempi pinconoajiaquempa-  
queate ontaniqui igantagagueti  
irimajirontamajataquempaqueate.

### **Icantajiaqueriqueate arimpa inquemajajianaqueroja itsatacaajiaquerica**

<sup>12</sup>Pitsajiaqueroqueate notsatacaaaja-  
quempica, aisa piquemisantamajajiaque-  
roqueate, iroomajacatari; cotanquitsi  
irosatiquea nonquenquejacaajajempiro.  
<sup>13</sup>Otampaticataquequea nonquenqueja-  
caapinijajempiro choocatirajanagueti  
acaniqui notsinoqui, quejecaroca  
noitsarevanco, <sup>14</sup>notsaquetarite  
quempejitacopoji savincaguiteri  
nometojantaquempaca nojocapanajan-  
tero notsino, itsatacaaqueranarotari  
Amajirote Jesoquirishito. <sup>15</sup>Nonquejeta-  
quempaqueate imaica cameetsanijite  
pintsamajajiaquenijite aatonijite  
pipeacojajaro nometojanajegueti.

### **Cameetsavaequequeate inquemisantamajajiaqueri tsavetantamajatirica Quirishito**

<sup>16</sup>Oraqueate notsavetantajiguirigueti  
Amajirote Jesoquirishito nocantajia-  
quempigueti incoraquetajegueti  
incovejencamatapojaje teequeate  
oratica naashijiguemparoji intati,  
namenamajajiaqueritarite coramani  
icantashitatiimojiaquenagueti ontaniqui  
otsempiqui icovejencavaequequeate.  
<sup>17</sup>Icovejencatacaaqueritari Aapani

Irioshi, yonigaantacaroquea iroganejencare iquenquetsajencajitanaquegueti jenoqui oganejencaguitetacaguetti, icanti: "Iricatica irio Irijani, nopsisatacaca, noshineventamajatacari."  
<sup>18</sup>Noquemajiaqueroquea naatimpajia iquenquetsajencajitanaquegueti inquitequi itsipajiaquenaguegueti Amajirote ontaniqui otsempiqui.

<sup>19</sup>Aisa atsajiaque arimaja icantamajajiaque tsavetantajiguironica icanqueca Aapani Irioshi coramani. Imaica cameetsataque pinquenquejajiaqueroja maasano itioncajiaqueca cameetsanjite pintsamajatimentajiaqueronijite, manatarite oquejetacari tsivorentsitsivojitirigueti pitsecariqui cameetsanjite onconijaguitetenmenquenijite. Pinquenquejajianaqueroquea arejevae-tantanaquempaca oratica savincaguiteri incoraquetantajempaca iriratica quejetacarica irira shigompiri amenaqueca osavincaguitetamanaquegueti, ariqueate iroguiiconijataquempiro pishirequi.

<sup>20</sup>Coramani itioncacojiquero Iguenquetsatsarequi Aapani Irioshi icantajiaquerica tsavetantirinica. Imaica nonintaque pintsajiaquequeate tee inchoocateji agavejanquitsineca inchiquiojita incantaque iriatimpa taaca opajita ocantacotaque. <sup>21</sup>Teenicate inquenquejashijijaquemparo intati irirajia tsavetantirinica. Manatarite iquemisantamajajiaqueri Aapani Irioshi ariqueate itsatacayaqueri Ishire Aapani Irioshi quero incantajigue.

### Tsatacantantajajtsica amataajjatsica

**2** <sup>1</sup>Cotanquitsiqueate coramani ichoocagarantajiaquequeate aisa tsavetantajajtsica amatavijajiaquerica ishiraerijia. Arikeate onquejetanaquempani imaica inchoocagarantajianaquequeate tsatacantantajajtsica amatavijantajiananquitsineca. Iromana-

cojianaqueriqueate Amajirote metoja-ventajiacajica, aisa intsatacantantajiaque teeca iroomajaca Quenquetsatsarentsimajaca, incomitacaajiaquempari quemisantajavetemparineca, cotanquitsiqueate taampinaqueate interoncajitaqueri irisatiqueate quejetacaantajianquitsine. <sup>2</sup>Oraqueate icancanigueti intsatacantantajiaque inquemisantajiaqueriqueate oshequini caquinte, ariqueate inquejejianaquempari irantagushejianaquequeate taaca opajitapae teeca oncameetsateji, irooquetae onquenantapojaquemparo intsojencantajitanaquemparoca Quenquetsatsarentsimajaca tsavetantaquerica Quirishito. <sup>3</sup>Irirajiaqueate amataajianquitsineca irinintavintsajiaquequeate imentaquipae intsatacajiaquempiqueate taaca opajitapae inquenquetsatshijianaquemparo queate intati, cotanquitsi Aapani Irioshi jac icantacotsitacari coramani. Interoncajiaqueri queate coajica, aato ipeacotaro.

<sup>4</sup>Arimpate coramani irirajia irashivan-tijitite Aapani Irioshi antagushejiaqueroca teeca oncameetsateji teequeate iraajaijeriji, ipishoncajiaqueri ontaniqui isaviji yashitacojiaqueri opitsecaquegueti. Imaica icancaniqueate inchoocajiaque oraniqui irosati incantimentantajiaquemparica coajica. <sup>5</sup>Arikeate iquejetaca igonorojiani Noeni antagui-shejiaquereroa teeca oncameetsateji. Teequeate iraajaijeriji, manaqueate itejiquereneri inirojenca incani anaacojianaqueriqueate maasano, ariqueate iteroncajiana yojocajajiaquequeate. Iriguentinivaniqueate yaajiavaji Noeni jerijia aisa ijitannejia vegarajanquitsica 7. Iriraqueate Noeni irlotaque tsavetantimojiavetacarica igonorojia, icamantajavetacariqueate incomajamajajiaquempame. <sup>6</sup>Aisa coramani iguintenijiavetacaguetti oshequini caquinte Soromaqui

aisa Gomoraqui, oshequiamajatatiguini-maja tsovironaquipae. Cotanquitsi iriatimpajia yantaguishejianaquero-queate taaca opajitapae teeca oncameetsateji. Irootaquequeate icatsimatantaji-acarica Aapani Irioshi yoguvariajashijia-queriqueate paamari yapevoquijajaque-riqueate maasano, iteroncamajajaque-roqueate maasano tsovironaquipae teequeate querica choocatanaajatsineca. Arikeate iquejetaquero imaica cameetsanijite intsamtimentajiaquenijite maasano antaguishejatsica taaca opajitapae teeca oncameetsateji iriguenti ogomarojiaque incatsimajia-querigueti oncoramanitapojaquegueti interoncajiaquerigueti.<sup>7-8</sup> Arikeate ichoocaqueni oraniqui apaniro caquinte icantajitica Iroteni, cameetsaqueate ichoocaqueni. Igantagaqueate yamenapinijiaqueri guintenijiatsica oraniqui yantaguishejiaquerogueti taaca opajitapae teeca oncameetsateji, aisa iquemajajajqueri inijaguishejiaquegueti ishimampojancacaqueate oshequi, aisa ishoshoguitevaetaca. Irootaquequeate yaantavajarica Aapani Irioshi itigarancajiri ontaniqui aatonijite itaatsi iriatimpa.

<sup>9</sup> Aritarite itsataque Amojirote quero incoquemparo iraajajateri quemisanta-majajianquitsica aatoniji agavejajiguiri taaca opajita coraquetashijiaquerineca, aisa itsaque quero incantomajajiaqueri maasano teeca inquemisantajigueriji, arikeate aavaepojempa iramenacotan-tajiaquemparica irantsipetacaamajajia-quempari.<sup>10</sup> Irrioquea incatsimamajajia-que irirajia guijatacojiguiroca inintaguishejiguica. Iriatimpajia iriguenti isavicaventajiaque yantagui-shejiaqueri taaca opajitapae teeca oncameetsateji. Teequeate impincatsajigueriji Amojirote, aisa inijashinatacaririashivantijitete Aapani Irioshi

teequeate impincatsajigueriji.<sup>11</sup> Iriram-pani ashivantijite caaviji yanaajiaqueri nijashinatacarica yagavejavaevecaquea, cotanquitsi teequeate impigatimaji-guempariji incantajiaqueri Amojirote irantsipetacaiaquempari.

<sup>12</sup> Imaica noncantajiaquempi irirajia-queate amatajajatsica teequeate intsajigueji quejejiaqueate tomirishi-paequitica isavicaventajiguirao taaca opajitapae inintajiaqueca. Iroguenti ichooocatashijiaque irajitaqueriqueate irimetojajitaqueriqueate. Iriatimpajia mana inijashijiajaro taaca opajitapae teeca intsajigueroji. Irantsipetacaajijquempariqueate interoncajitaqueriqueate quejejiaqueate tomirishipae-quitica.<sup>13</sup> Irantsipejiaquempaqueate iroorijite yatsipetacaantajiacarica iriatimpajia. Icancani isavicaventajiguirao taaca opajita ishineventajiacarica. Ooshiatsi apashiventacaqueate pitsipajiacarigueti pishecajiacaguetti aisa ishinejicagueti yamatavijantajiaquegueti.<sup>14</sup> Teequeate iramenashitemparojo manquigarentsi querocaca yamenajajia-queca. Igantagaqueate yantaguishetajiaqueri taaca opajitapae teeca oncameetsateji, teequeate irovashianteroji. Yagavejantajiacarica teesaconaca intampishitashijigueroji teeca oncameetsateji, iquempavaetacaajiacari. Ari icancani iriatimpajia ineveguecaro ajaararontsipa, itsajiguirota quero incojiaquempani irajaarantajiaquempagueci, cotanquitsi incatsimamentajia-queriqueate Aapani Irioshi interoncajiaqueri.<sup>15</sup> Yovashiantajianaquerotarite tampaticavocuitanquitsica, iquenashijia-naca. Manaqueate iquejejiacri Varaameni irijanite Veori, inintavinta-vetacaqueate irajaaranquempame yantaqueroqueate teeca oncameetsateji iraantaquemparomequeate.<sup>16</sup> Cotan-quitsi coajicaqueate irio aashino

cantomajaquerica, icantimentaqueri yantaqueca teeca oncameetsateji. Iriovetaca canaanquitsica teeca intsavetempaji inquenquetsate, cotanquitsi iquempetanacari caquinte iquenquetsataque icantomajaqueri tsavetantavetacaroca icannerica Aapani Irioshi, iticaavaqueri aatoniji iquejetanajari shoncacotanquitsica.

<sup>17</sup>Iriatimpajia mana iquejejiacaro ochaquuirejigueti motojavetatsica. Aisa mana iquejejiacaro oseetigueti yamena-jitirogueti arica ontejapojaque incani, cotanquitsi yaanajiro tampija, tee ontejeji. Aritarite iquejejiaca iriatimpajia itsatacaantajiavecota-  
cotanquitsi mana yamatavijantajiaque intati. Coajica incatsimatimentajiaqueri Aapani Irioshi impishoncaciaqueri opitsecamajaquegueti, icancaniqueate irantsipejiaquempa. <sup>18</sup>Oshequi isemejigui, aisa iquenquetsaguishetashijiaca. Yantagushejiaque taaca opajitapae teeca oncameetsateji ariqueate yovashiantacaajavajiri iriaqueraca comajajiananquitsica quemisantavecara Quenquetsatsaren-tsima-jaca. <sup>19</sup>Icantajiaqueri: “Imeshiajia-quempitarite Aapani Irioshi imaicaqueate cameetsaqueate pantajia-  
quero taaca pinintaque. Aatoqueate icatsimatimentajiguimpiro.” Icantajiave-  
caqueate imaica, cotanquitsi iriatim-  
pajia teequeate iragavejajigueji irantaji-  
aquequeate taaca inintaque, iroguenti yantagushejiaque teeca oncameetsateji teroncacajajaqueemparineca coajica. Pitsajiaqueterite teequeate inchooateji agavejanquitsineca inchiquiojita irovashiantajero iriatimpajia taaca opajitapae agavejamajaquerica. <sup>20</sup>Coramani yantagushejiaquerero teeca oncameetsateji. Ariqueate itsajiaqueri-  
gueti Amajirote Jesoquirishito Meshian-  
tatsica yovashiantajianaquerero.

Cotanquitsi imaica inquejetanajem-pa-  
gueti iroaqueragueti tequeratagueti intsajigueriji arimpaqueate irijajiana-  
queri, arimpaqueate irogaajianaquem-  
pani. <sup>21</sup>Aatomeja itsajigurome Quenquetsatsarentsimajaca tsavetanti-  
rica Quirishito. Itsajiavetacarotarite cotanquitsi yovashiantajianajiro, irootaquequeate arimaja irantsipemaja-  
jiaquempa. Aisa ipiashijianajaro yantagushejiguica arimpaqueate ijajiguiri. <sup>22</sup>Icantajitarite imaica: “Iriraqueate shiishi icamaranquigueti, yoguiapiajro ishecatavajaro.” Aisa icantajiti: “Pincajaterigueti chancho irisati piashitanajemparone intigarita-  
jemparo sampovatsa.” Arikeate iquejetaca quemisantajiavetatsica piashijianajaroca yantagushejiguica.

#### Incoraquetajegueti Amajirote

**3** <sup>1-2</sup>Napiguemisantarijiate ni-  
nopintsamajajiacaca, coramaniqui notioncajiaquempi nonquenquejacai-  
mentajiaquempiro nijite iquenquetsata-  
cojiaqueca tsavetantajiguirinica Aapani Irioshi, jero aisa notsavetantajiaqueca naatimpajia itigarancanejia Jesoshi, nocamantajiaquempigueti maasano icantajiaquenaca Amajirote Meshianta-  
tsica. Imaica notionquitajajimpiqueate aisa nonquenquejacaamajajiaquempiro pinquenquejacojiaquenijite cameetsa-  
guetatsica.

<sup>3</sup>Nonintaqueterite iroqueti pinquen-  
quejamajajiaque quero oncotanaquem-  
pani oncoramanitapoajegueti pajinigueti aapojempa savincaguiteri vegaratapojaatsineca, inchoocajianaque-  
tarite savicaventajianaqueroneca irantagushejiaquerero teeca oncameetsa-  
teji. Irishirontimentajianaquempiqueate incantajianaquequeate: <sup>4</sup>“¿Querocam-  
pate icoraqueti imaica Quirishito?  
Arimpate icantajitini incoraquetaje.

Manaqueate imetojaguetanaji avaesatiteni, cotanquitsi tequeratampate incoraqueteji imaica. Jac arimpate coramani iroaqueraguett ipeacaacaro quepatsi irosati imaica choocatanatsi.”

<sup>5</sup>Teenicate irinintajigue inquenquejajajeroji coramani ipeacaacaro Aapani Irioshi inquitepae aisa quepatsi, ipeacaantaguettacaroquea iguenquetsatsare. Oraqueate quepatsi osotoajatapojaque quentijaniqui, manaqueate ovogoretacocaro quentijani. <sup>6</sup>Irooqua aisa oja anaanaquero maasano quepatsi coramani, iteroncantajiacaca maasano choocatantaguetaroca, yojocajajiaca. <sup>7</sup>Cotanquitsi imaica mana icanque: “Nontsotetavaquemparota quepatsi jero aisa inquite aatota noteronquitaro imaica choocatantajiacaroca.” Cotanquitsi oraqueate coajica incatsimamentajiaqueriguetti maasano teeca inquemisantajigueji ariqueate intaague-taquiero maasano.

<sup>8</sup>Imaica, nopsisajiacaca, aato pipeacotaro ocatica. Iriraqueate Amajirote tee inquejejiaji aatimpajia: 1,000 ocarati ajagantsi iriatimpa yamenakuero oquejetimotacari apajencatiro savincaguiteri; ari oquejetaca aparo savincaguiteri ariqueate oquejetimotacari 1,000 ajagantsi. <sup>9</sup>Cotanquitsi imaica chooca cantajianquitsica: “Icantaveca Amajirote, ‘Noncoraquetaje.’ Imaica tequerata incoraquetajeji manaquea ipeanaca ontaniqui. Imaica aato icoraquetaji.” Cotanquitsi naatimpa noncantajiaquempi arimajaqueate incoraquetaje, tee impeguempaji intati. Iroguenti inintaque incantashitatijaiana-quempata teeca inquemisantajigueriji irovashiantajianaquerota yantagushejiguica teeca oncemeetsateji inquemisantajiajerita, teenicate irinintenicate impeguempa apaniro. Irootaqueate

imaica pamenajiaque tequerata incoraquetajantempaji, cotanquitsi incoraquetajequeate.

<sup>10</sup>Oraqueate incoraquetajategueti Amajirote mana irimapocapojajempa inquejetapojempari aitsitantatsica imapocantiguetti yaitsitantigueti. Arikeate ompojimatanaque jenoqui inquitequi togn, arikea ompeaquempa inquite. Intaaguetanaquempa catsirin-caiteri, taai, jeri aisa impoquirope, maasano interoncamajatanaquempa. Arikea onquejetanaquempa aisa quepatsi ontaaquempa, ontsipatana-quemparo maasano taaca opajitapae choocatantaguetaroca, maasano arikeate onteroncamajatanaquempa.

#### Aapani Irioshi impeacaajempa otsipa quepatsi aisa inquite

<sup>11</sup>Iroorijite atsajiaque onteroncagueta-naquempa maasano, ¿querocampa pincojiaquempani imaica? Iroosacanicate imaica aviatimpajia pincomajama-jajiaquempa pinquemisantamajajigueri-queate Aapani Irioshi. <sup>12</sup>Poguijajiajavero aapojempagueti savincaguiteri intaantaquemparoca Aapani Irioshi inquite, arikeate avejancaguetana-quempa maasano choocatantaguetaroca. Pisavicaventamajajiaqueroja maasano inintagueticia iriatimpa cameetsanjite taampinanjite irinetsanaguetaquiero taampina. <sup>13</sup>Aatimpajia aguijajiaqueritarite iroaquerari inquite aisa iroaque-rari quepatsi impeacaajempa Aapani Irioshi coajica. Iroorijite icanque coramani impeacaajempa coajica otsipa oganejencamajataquempaqueate, aatoqueate ichoocataji antaguishetajeroneca teeca oncemeetsateji, manaqueate oganejencaguitaquerempsa maasano.

<sup>14</sup>Imaica aviatimpajia nopsisajiacaca, poguijajiaqueritarite incoraquetajegueti irinetsanataquiero icanqueca. Irootaque-

queate noncantantajiaquempica imaica aatotagueti icoraqueti iintsija pincomajamajatempa, aato pantajiguiro teeca oncameetsateji, iramenajiaquempinijite Aapani Irioshi piguintenimajajiguempa cameetsa.<sup>15</sup> Pamenajigue imaica tequerata incoraquetaje Amajirote, manatarite inintaque inquemisantajiaquerita itsipapae caquinte cameetsanjite iraimentajavajerinijite. Iriraqueate apiguemisantariteni Paavoro apintsajacaca itioncrajiaquempi iriatimpa aisa, icantajiaquempiqueate quejetaroca nocantajiaquempica imaica. Iriguentitate tsatacaaqueri Aapani Irioshi, irootaquequeate icantantajiaquempica. <sup>16</sup> Ariqueate iquejetiro iriatimpa imaica itioncaguetigueti itsavetantirogueti ocapae. Oconoagarancaqueate itioncaguetaquequea manamajaguetanquitsica teequeate intsajitavaqueroji. Iriraquea teeca intsamajatero Iguenquetsatsare

Aapani Irioshi jerijia teemajaca inquemisantamajajigueroji mana yogaajiaquero intati icanqueca, iquejetacaajiacaro yogaajiaquerogueti otsipapae Itioncacaantaqueca Aapani Irioshi. Inchiquojitarite inquejetacaantajiaquempa iriatimpajia.

#### Ivegaraquerogeti icantajiaquerica

<sup>17</sup> Imaica aviatimpajia nopintsajiacaca, pitsajiaquerotarite ocatica nocantajiaquempica, inchiquiojia yamatavijajiguimpitsija pigatsatantsica, yovashi-antacaajiguimpirotsija piquemisantama- jajiguica. <sup>18</sup> Mana arimpaqueate pinquimoshirentanaque icavintsaajiaquempigueti Amajirote Jesoquirishito Meshiantatsica, aisa pintsamajajianaquerija. Jameja ashineventajiguempari imaica, ariqueate acancaniqueate ashineventajiaquempari. Ari oncoquempa.

# IROQUETICA ITIONCAQUECA

## JOANCA

**Antsatantaquemparoca**

Ocatica iroguenti antsatantaquemparoca iroquetica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iriguentijeguite pajitatsica Santiago, iquitsajaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejajitaque itioncaquero ocatica paperi ichoocaquegueti Epesoqui, atsajiaquetari iriguenti quempogujajiguirica quemisantajiatsica Epesquitica. Iquenquejajitaque arica itioncajiaqueneri quemisantajiatsica quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji otsipa pajitatsica *Yonigaajiguequerica Joanca*.

Joanca itioncacotaqueri acaniqui caquinteja tsatacaantajiavetacaroca teeca iroomajateji, icantajiavetaca, “Jesoshi teequea irio irijanite Aapani Irioshi”. Irootaque itioncantajiacanarica quemisantajiatsica cameetsaniji intsajiaque arimaja Jesoshi iriguenti Iriganite Aapani Irioshi, cameetsaniji irishinevaejiaquempa iquemisantajiaquerigueti Jesoshi, aisa intsajiaqueniji maasano aventajiacarica arimaja ipeacotsijajari iguempevaerejia, incoguitempani intsipajiaquempari jenoqui inquitequi (1.1-4; 2.18–3.3; 4.1-6; 5.1-15). Itsatacajiaqueri Joanca jero anaamajatanquitsica: ampintsamajajiaquempari Aapani Irioshi aisa ampintsaquiaquempari apitsaroventarrijateni aisa maasano caquinteja (2.9-17; 3.11-24; 4.7-21). Itsatacajiaqueri aisa quero incojiaquempani quemisantajiatsica arigueti inquempevaetaquempa (1.5–2.8; 3.4-10; 5.16-21).

---

**Quirishito iriguenti Anijacaantantatsica**

**1** <sup>1</sup>Imaica nontioncajiaquempi nontsavetanqueri igantagaca choocatanquitsica coramani iroaqueragueti tequeratagueti onchoocatimateji,

noquemajiaqueritarite ariqueate namenajiaqueri aisa nopamijiaqueriqueate. Iriguentitarite Quenquetsatsarentsi Anijacaantantatsica. <sup>2</sup>Iriratica Anijagantsi, yonigaantaca, namenajiaqueri notsavetacotantajiacaricaqueate,

iriguentitarite anijacaajiacajineca ancoguitempinaninjite anchoocajaque Aapaniqui Irioshiqui. Manaqueate ichoocavetaca Aapaniqui cotanquitsi ariqueate icoraquequit yonigaajia-quena.<sup>3</sup> Iriontaque notsavetacojaque iriraquea namenamajajiaqueca aisa noquemamajajiaqueca. Nocamantantaji-aquempica cameetsanjite pintsipashirentimentajiaquenanjite pinquejejia-quenanjite naatimpa notsipashirentajia-carigueti Aapani Irioshi jeri aisa Irijanite, irira Jesoquirishito.<sup>4</sup> Notionca-jaquempi cameetsanjite pishinemajajianaquempanijite.

#### Aapani Irioshi iriguenti Tsirencarimajaca

<sup>5</sup>Iroguenti nocamantajiaquempica itsatacaciajiaquenaca Jesoquirishito icanquegueti irira Aapani Irioshi iriguenti Tsirencari, teequeate impitse-cacoteji, teenicate inquempevaetima-tempaji, irootaque icantantajitacarica Tsirencari. <sup>6</sup>Ancantajiguegueti atsipamajajiajari Aapani Irioshi cotanquitsiqueate agantagatirajagueti aquempevaejiga manaqueate amataa-jiaca intati, teenicate antajigueroji cameetsaguetatsica, quejecaqueate manaca apitsecacojiaque intati. <sup>7</sup>Cotanquitsiqueate ancomajamajajiaquempagueti quejetaca aquenanaque tsirenguiteriqui, anquempejiaquemparigueti Aapani Irioshi icomajamajatagueti, ariqueate atsipashirentavacaajiaca, ishejiajirotarite maasano aguempevaerejia, ishetantajajiro iriraja Jesoshi Irijanite.

<sup>8</sup>Ancantajiguegueti: “Tee nonquempevaetempaji”, aroguentiqueate amatavajajatsi, aisa tequerata antsamajateroji iroomajatatsica. <sup>9</sup>Cotanquitsiqueate ancamantajiaquerigueti Aapani Irioshi antajiaquerigueti teeca oncamenteateji, iriatimpa impeacojiacajiro, irishetajaji-

roqueate maasano, icancanitarite inetsanatiro icanqueca, teenicate iramatavijanteji icameetsamajatitarite.

<sup>10</sup>Oraqueate ancantajiguegueti: “Tee nonquempevaetempaji”, quejetaca-queate manaca acantajajaque Aapani Irioshi iriguenti tsojenti, teequeate anquemisantamajajigueroji icamantave-tacajica.

**2** <sup>1</sup>Napiguemisantarijiatevi, aviatim-pajia quejetaquempi irijanijia, iroguenti notionquimentajiaquempi aatoniji piquempevaejaja. Cotanquitsi antajiaquerigueti teeca oncamenteateji chooca quenquetsatacoventacajica quenquetsatacaaquerica Aapani Irioshi. Irioquea Jesoquirishito teeca inquempevaetimatempaji. <sup>2</sup>Apanirotarite iriatimpa metojaventajacajica cameetsanjite irishetajajironjite Aapani Irioshi aguempevaerejia aatonijite iquenquejacaajajiro coajica. Cotanquitsi teequeate apaniro irimetojaventero ashijia, imetojaventaqueroqueate irashijia maasano caquinteguetatsica.

#### Anetsanajiaqueroja icantajiacajica Aapani Irioshi

<sup>3</sup>Oraqueate anetsanajiaquerigueti icantajiacajica Aapani Irioshi, irooqueate atsatantajiacaca arimaja atsaqueri.

<sup>4</sup>Choocagueti cantatsica: “Notsaqueri”, cotanquitsi aatogueti inetsanatiro icantajia-cajica, iriguentiquea tsojenti, teequeate intsateroji iroomajaca. <sup>5</sup>Arigueti anetsanamajajiaquero Iguenquetsatsare, arimaja aroguenti pintsamajajigarica, irooqueate atsatantajiacaca arimaja atsipamajajiacari.

<sup>6</sup>Ancantajiaquegueti atsipamajajiacari aquemisantajiaqueri, iintsija anquejejia-quemparigueate Jesoquirishito iriatimpa inetsanamajajigueroji maasano icanque-rica Aapani Irioshi.

<sup>7</sup>Napiguemisantarijiteni, ocatica oca notioncajiaquempica teequeate iro

iroaqueraro quenquetsatsarentsi, iroguentiquea paesatotica piquemajiaqueca coramani iroaqueragueti piquemisanqueri Quirishito.<sup>8</sup>Cotanquitsi quejetaca iro iroaqueraro. Amenauerigueti Quirishito atsaque iroomajaca icantajiacajica, aisa iramenajitaquempigueti intsajtique iroomajaca. Coramanitarite quejevaetaca apitsecacojaque, cotanquitsi imaica manaqueate atsirencaguitetacojianaque intati.

<sup>9</sup>Choocagueti cantashitalsica: "Tsirenaguitetacotanaquena", cotanquitsiqueate igantagatirajagueti isemacari irapicaquintete, manaqueate igantagatiraja ipitsecacoti. <sup>10</sup>Iriraqueate pintsamajatrica irapicaquintete manaqueate itsirencaguitetacotanaque, teenicate onchoocatantajemparijiqueate taaca opajitapae onquenantapojaquempaca inquempevaetanquempaca. <sup>11</sup>Cotanquitsi iriraqueate semacarica irapicaquintete quejetaca manaca ipitsecacotaque intati, irootaquequea teeca intsatantempaji querocampate incoquempani, oshamoncajatacaque-ritarite pitsecari.

### **Iintsjia ovashiantamajajianaquero maasano teeca oncameetsateji**

<sup>12</sup>Irijanijia<sup>a</sup> notioncantajiaquempica ishejiaquempirotarite Aapani Irioshi piguempevaereja, aatoqueate iquenquejacaajimpido, piquemisantajiaqueritarite Jesoquirishito. <sup>13</sup>Irijanintajanquitsica, notioncajiaquempiqueate pitsajiaqueritari iriquetica choocatatsica coramani tequeratagueti onchoocatimagueteji. Notioncantajiaquempica aviatimpajia iriaqueraca quenquevarijiananquitsica, pagavejajiaqueritarite ampatsini. Notioncantajiaquempica aviatimpajia

napiguemisantarijijateni quejejiaca nirijanijiate, pitsajiaqueritarite Aapani Irioshi. <sup>14</sup>Notioncantajiaquempica irijanintajiatsica pitsajiaqueritarite iriquetica choocatatsica coramani tequeratagueti onchoocatimagueteji- queate. Notioncantajiaquempica aviatimpajia iriaqueraca quenquevarijiananquitsica pitampishitashijiaquerotarite maasano, aisa Iguenquetsatsare Aapani Irioshi ochoocaguitaquempi, jero aisa pagavejajiaqueri ampatsini.

<sup>15</sup>Aatoqueate pinintamajajigu pantajiguero yantapinijiguica quepatsiquitica teeca intsarоventajiguempariji Aapani Irioshi, aisa aatoqueate pinintamajajiguchoocaguetatsica acaniqui quepatsiqui. Quericaca nintamajatiroca quejecaroca imaica, tee impintsatempariji Aapani Irioshi. <sup>16</sup>Teenicate irishineventemparloji Aapani Irioshi ishineventacaca antiroca teeca oncameetsateji. Iriatimpajia manatarite iquenquejajiaquero taaca opajitapae inintamajajiguica iriatimpajia, aisa inintajiaquequeate irashintajiaquemparo maasano yamenajiaqueca, jero aisa yaventacojiga yashintajigarogueti. <sup>17</sup>Oraqueate quepatsi onteroncaguetanajempatarite, aisa onteroncaguetanajuempa maasano teeca oncameetsateji ishineventaca caquinte, cotanquitsi iriraqueate antamajajiguiroca inintaguetica Aapani Irioshi incoguitepaniqueate inchoocaiteni.

### **Catsimajiguirica Quirishito**

<sup>18</sup>Irijanijia, imaica pajini aguempa incoraquetantajempaca Quirishito. Aviatimpajia piquemacojiaqueri incoraqueque catsimatirica, cotanquitsinaatimpa nocantajiaquempi chooca

**a 2.12** Iquenquevarivaetanaquegueti irira Joanca icantiri "irijani" maasano quemisantajiaquerica Amajirote Jesoquirishito.

imaica yoshequiaque catsimajiaquerica. Irootaquequeate antsatantajiaquempaca pajini aguempa incoraquetantajempaca Quirishito.<sup>19</sup> Iriatimpajia manaqueate iconoajavetacaji, cotanquitsi teequeate inquempemajajigaji aatimpajia, teenicate inquemisantajigueteriji

Quirishito. Arimequeate inquempemajajiacajime aatomequeate itsinampirejajajime, igantagamequeate intsipajiacajime, cotanquitsi itsinampirejajianacaji. Oquejetantacaca imaica cameetsanijite antsatimentajiaqueriniji tee inquejetaji aatimpajia iquemisantajiguigueti.

<sup>20</sup>Cotanquitsi aviguentiquea itigarancajiaquempi Aapani Irioshi Ishire inchoocashirentajiaquempi, pitsatantajiacaroca Quenquetsartsarentsimajaca maasano aviatimpajia. <sup>21</sup>Teequea mana nontioncadjiguempiji namenajiaquempi tee pintsajigue-roji. Iroguentiqueate notioncantajiaquempica namenajiaquempitarite pitsamajajia-quero. Aisa pitsajigui iriraquea cantamajatasica teequeate iramataguempaji.

<sup>22</sup>¿Queri tsojegatsica? Iriguenti cantatsica Jesoshi tee irio Quirishito Meshiantatsica. Iriguentisacanicate catsimataquerica Quirishito, teenicate inquemisanteriji iriatimpa aisa Iriri, mana icanque teequeate inchoocajigueji. <sup>23</sup>Quericaca tsojencaquerica Irijanite Irioshi tee intsateriji, aisa tee intsateriji Aapani Irioshi, cotanquitsi iriraquea cantamajatasica: "Jesoshi iriguenti Irijanite Aapani Irioshi", iriotaque tsamajatirica, aisa itsamajaqueri Aapani Irioshi.

<sup>24</sup>Pincoguitempanija pinquenquejajia-quero iroquetica piquemajiaque aatonijite pipeacojigaro. Picancanigeti pinquenquejajiaquero pintsipamajajiaquempariequa Aapani Irioshi aisa Irijanite. <sup>25</sup>Icantajiacajitarite ancoguitempani anchoocajiaque iriatimpapui.

<sup>26</sup>Imaica notioncacojiaqueri nintajia-vetanquitsica iramatavijajiaquempime.

<sup>27</sup>Cotanquitsi aviatimpajia ichoocashi-rentajiaquempi Ishire Aapani Irioshi itigarancajiaquempica Jesoshi, tee pincoguimentajempa intsatacaajajempi caquinte, maasanotarite itsatacaajia-quempi Ishire Aapani Irioshi. Iriatimpajia-queate icantamajataque teequeate iramataguempaji, irootaquequeate imaica pincoguitempani pintsipamajajiaquempari Quirishito pinetsanamajajia-quero itsatacaajiaquempica Ishire Aapani Irioshi.

<sup>28</sup>Imaicaquea, irijanijia, pintsipamajajiguempari Quirishito cameetsanijite pishineventimentajiaquemparinijite incoraquetajegueti. Pintsipamajajiana-quemparigueti aatoqueate apashiventaa-vaajari coajica. <sup>29</sup>Pitsamajajiaqueriquea Jeso quirishito tee inquempavaetempaji, iriotarite comajamajatatsica, iroosacanicate pintsajiaquequeate aisa maasano comajamajatiatsica iriguenti ivoashirentica Quirishito.

### Maasano comajamajatiatsica iriguentijia irijanijiate Aapani Irioshi

**3** <sup>1</sup>iPamenajigueruja! Caaviji ipintsamajajiacaji Aapani Irioshi ipeacaantajiacajia-queate irijanijiate. Arimaja aroguentijia irijanijiate. Jeroqueate teeca intsatantajiacajica itsipajia quepatsiquitica, teequea intsajigueriji Aapani Irioshi. <sup>2</sup>Napiguemisan-tarijilateni nopintsajiacaca, imaica aroguentijia irijanijiate Aapani Irioshi. Teequeate antsajigueriji querocaca ancojianaquempani coajica amenajiaquerigueti Jeso quirishito, iroguenti atsajiaque incoraquetajegueti anquejejiaquempari iriatimpa, amenamajajiaqueritarite quero icota. <sup>3</sup>Maasano ogujajia-vajirica incoraquetajegueti yovashiantajia-querotari covaeguisherentsi yantajavetacaca igantaga icomajamajajia, iquejejiajaci iriatimpa tee inquempavaetempaji.

<sup>4</sup>Cotanquitsi iriraquea quempevaetasica tee irinetساناتری cantica Aapani

Irioshi, iroguentitarite quempevaerentsi teegueti anetsanateroji icantica.<sup>5</sup> Imaica atsajiaquequeate irooqueate icoraqueta-shitaquiti Jeso quirishito irishetajajiro-queate aguempevaerejia. Iriatimpa teenicate inquempevaetimatempaji.  
<sup>6</sup> Maasano quisho oaquerica Quirishito, tee incovaeguishetanajempaji, cotanquitsi irira covaeguishetanajatsica tee irameneriji, tee intsateriji.

<sup>7</sup> Irilanijia, inchiquiojia yamatavijajitimpitsi. Irirajia antiroca cameetsa iriguentequeate cameetsatatsica, iquempetacari icameetsatigeti Jesoshi.  
<sup>8</sup> Cotanquitsi irira antapinitiroca quempevaerentsi iriguenti ashintari ampatsini. Irira ampatsini igantagatarite iquempevaetaca coramani iroaquergueti ipigatsatacari Aapani Irioshi, irooqueate icoraquetashitaquiti Irilanite Aapani Irioshi irovashiantacaantaqueronijite yantavetacaca ampatsini aatonijite iquemisantajitajiri.<sup>9</sup> Irirajia irilanintacaca Aapani Irioshi teequeate irantajianajeji teeca oncameetsateji, ichoocashi-rentaqueritarite Ishire Aapani Irioshi. Arikeate quero incotaquempa irantagushejajegueti, iriguenteritari Aapani Irioshi irilanintacarica.<sup>10</sup> Jero itsatantajitacarica queri irilanijite Aapani Irioshi, aisa queri yashintajacaca ampatsini. Irira teeca iranteroji cameetsari aisa irira teeca impintsatempariji irapicaquintete teequeate irio ashintemparine Aapani Irioshi.

#### Ampintsatavacaajiaquempa

<sup>11</sup> Imaica mana noncantajiaquempi piquemajiaqueca iroaqueragueti icantajique: “Pimpintsatavacaajiguempa.”<sup>12</sup> Aato piquejejigari Cainini yashintacarigueti ampatsini, irootaquequeate imetojantacarica iriguentijeguite. ¿Taa imetojimentaqueri? Mana yamenaueri yantaquero cameetsari, iriatimpa

iroguenti yantaque teeca oncameetsateji, irootaquequeate imetojantacarica.

<sup>13</sup> Napiguemisantarijiatevi, aato poajianaque intati irisemajiaquempi-gueti quepatsiquitica.<sup>14</sup> Atsajiaquequea, coramani anajiaque metojagantsiqui, cotanquitsiquea imaica anajiaji anijagantsiqui. Jeroquea atsatantajiacaroca: apintsamajajiacaritarí apiguemisantarijiatevi. Cotanquitsi maasano teeca impintsatantempaji icancani inajiaque metojagantsiqui.<sup>15</sup> Maasano semajigarica irapicaquintete mana iquejejiacari metojantatsica. Aviatimpajia pitsajiaque irira metojantatsica teequeate irimeshiguempajiqueate ishirequi, teequeate iranijacagueriji ishirequi Aapani Irioshi.<sup>16</sup> Jero atsatantajiacaca quero ancojiaquempani ampintsamajatantajiaquempagueti: irira Jeso quirishito caaviji ipintsamajatacaci imetojaventantajiacajica, ariqueate anquejejiaquempa aatimpajia aato atsaroacagaro ametojaventajiaquerigueti apiguemisantarijiatevi.<sup>17</sup> Querica ashintaguetanquitsica cotanquitsi aatogueti icavintsjajiri irapiguemisantarenvi coguitejimotacarica, ¿arimpate ipintsatacari Aapani Irioshi? iTeequeate!<sup>18</sup> Irilanijia, aato acantashijigaro intati ancantajiaque: “Nopintsatavacaajiacaca.” Oraqueate arimajagueti apintsatavacaajiacaca anigaantajiaqueroqueate.

<sup>19</sup> Oraqueate ampintsatavacaajiaquempagueti irooqueate antsatantajiaquemparoca arimaja anetsanajiaquero Quenquetsatsarentsimajaca. Anquejetajuempagueti aatoquea atsaroajigui anquenquetsatacaaaji-aquerigueti Aapani Irioshi.<sup>20</sup> Amenajiaquempaguetiqueate chooca aguempevaerejia iriompate Aapani Irioshi caaviji yamenaueri, itsaquerotarite maasano.<sup>21</sup> Cotanquitsi, nopintsajiacaca, antsaqueguetiqueate teequeate onchoocateji antaqueca, aatoqueate atsarogui anquen-

quetsatacajiaquerigueti Aapani Irioshi.  
<sup>22</sup>Iriatimpa irojocajiacajiro maasano amanajiaquerica anetsanajiaquerogueti icancajica aisa antajiaquerogueti maasano inintaguetica.<sup>23</sup>Jeroquea igantacaantane: aventajiaquempari Irijanite Jesoquirishito, aisa ampintsatavacaajiaquempa anetsanajiaqueroquea icantajiacajica iriatimpa coramani.<sup>24</sup>Quericaca netsanamajatiroca icantaguetica Aapani Irioshi itsipamajatacari, aisa iriatimpaquea ichoocashirentaqueri. Atsamajajiaque ichoocashirentajiajaji, itigarancajiacajiritarite Ishire.

**Pintsajigueri maasano  
tsatacajiaquempica**

**4** <sup>1</sup>Napiguemisantarijijateni nopintsa-jiacaca, aato piquemisantajiguiri intati maasano cantajiatsica: “Iriguenti choocashirentaquena Ishire Aapani Irioshi.” Iroquetitaja pamenaque irioca choocashirentaqueri. Itsitacaguitejana-carotarite amataajjatsica. <sup>2</sup>Jero pintsatantajiaquemparica ichoocashi-rentaqueca Ishire Aapani Irioshi: maasano cantamajatanquitsica, “Irira Jesoquirishito icoraqueta pojaque icaquintetanaque itsinotanaque” iriotaque ichoocashirentaqueca Ishire Aapani Irioshi. <sup>3</sup>Cotanquitsi maasano teeca inquejejigueroji imaica teequeate irio ashintajiguemparine Aapani Irioshi, iriguenti ashintajigari ampatsini catsimataquerica Quirishito. Piquemaco-jiaqueritarite incoraquetaque, imaicaquea imaica jac coraquetaque.

<sup>4</sup>Irijanijia, aviatimpaia iriguenti ashintajiguimpi Aapani Irioshi aisa ichoocashirentajiaquempi Ishire, irootaquequeate pitampishitashitajiacarica amataajjatsica querocampate incojiaquempini iramatavijajiaquempigueti, iroorijite Ishire Aapani Irioshi choocashirentajiaquempica yanaaqueri ashintarica itsipajia quepatsi-quatica. <sup>5</sup>Iriatimpaia tee inquemisantaji-

gueriji Aapani Irioshi, irootaquequeate mana iquenquetsatacotantajiacaroca intati inintaguetica caquinte, ariqueate itsipajia teeca intsarovenempariji Aapani Irioshi iquemisantajiaavaqueri.<sup>6</sup>Aatimpajia iriguenti ashintajiacaji Aapani Irioshi. Irira tsamajajiguirica iquemisantajiacaji, cotanquitsi irira teeca irashintempariji Aapani Irioshi tee inquemisantajigaji. Irootaquequeate antsantajiaquemparica queri quenquetsatiroca iroomajatatsica aisa queri amataatsica.

**Aapani Irioshi iriguenti  
pintsamajatantsica**

<sup>7</sup>Napiguemisantarijijateni nopintsa-jaca, jame ampintsatavacaajiguempa, aritarite iquejetaca Aapani Irioshi ipintsamajatanta. Maasano pintsatantatsica iriguenti irijanite Aapani Irioshi aisa itsamajajiguiri. <sup>8</sup>Cotanquitsi irirajiaqueate teeca impintsatavacaajiguempaji teequeate intsajigueriji. Irira Aapani Irioshi iriguenti tarite pintsamajatantsica. <sup>9</sup>Iriatimpa itigarancaqueri Irijanite apatirotica acaniqui quepatsiqui irimetojaventajiacaji iranijacaajiajinijite, irootaquequeate atsatantajiacaca arimaja ipintsamajajiacaji. <sup>10</sup>Jero antsantauquempaca quero icotani pintsamajatantsica: aatimpajia teequeate ampintsamajajiguempariji Aapani Irioshi, iriguentiqueate pintsamajatantsica, ipintsamajajiacajitari itigarancantacarica Irijanite imetojaventajiacaji irishetajironijite aguempevaerejia aatonijite iquenquejacagajiro Aapani Irioshi coajica.

<sup>11</sup>Nopintsa-jiacaca, pitsajiaquequea quero icota Aapani Irioshi ipintsajiacajigueti, aritarite anquejejiaquempa aatimpajia aisa ampintsatavacaajiaquempa. <sup>12</sup>Teequeate irinejajiteriji Aapani Irioshi, cotanquitsi apintsatavacaajiacagueti ichoocashirentajiajaji, ariqueate iragavejacaajiacaji ampintsa-majatantajianaquempajiji. <sup>13</sup>Itigarancajiacajiritarite Ishire atsatantajiacaca itsipamajajia-

caji. Ariqueate aquejejiaca aatimpajia atsipamajajacari.<sup>14</sup> Iriatimpa itigarancaqueri Irijanite iraajajateri maasano caquintegueltasica. Naatimpajia namenajiaqueriqueate, irootaqueate notsavetacotantajiacarica.

<sup>15</sup> Aapani Irioshi ichoocashirentajiaqueri maasano cantamajajatsica Jesoshi iriguente Irijanite Aapani Irioshi. Ariqueate iquejejiaca iriatimpajia ichoocatimojiaqueri.<sup>16</sup> Ariqueate amenamajataque atsajiaque ipintsamajajacai Aapani Irioshi. Iriatimpa iriguente pintsamajatantsatsica. Maasano pintsatantsica ichoocatimojiaqueri Aapani Irioshi. Ariqueate iquejetaca iriatimpa ichoocashirentajiaqueri iriatimpajia.

<sup>17</sup> Onquejetaquempagueti arimpaqueate ajajigueri ampintsamajatantajapojempa aatonijite atsaroajigui oncoramanitapojaqueti incantimentajiaquerigueti Aapani Irioshi maasano, iroorijite achoocajavetaqueate acaniqui quepatsiqui, cotanquitsjac aquejelianacari Jesoquirishito.<sup>18</sup> Irira pintsatantsica tee intsarogueji. Aritarite ampintsamajatantaquempagueti querocampate antsaroacaguempaca. Arigueti atsaroanaque atsaroacagaro incatsimatimentacajiroguedi Aapani Irioshi antaqueca teeca oncameetsateji. Irootaquequa atsatantacaca irira tsaroanquitsica teequea impintsamajatantempaji.

<sup>19</sup> Aatimpajia apintsajiacari Aapani Irioshi, iriquetitarite pintsajiacaji aatimpajia.<sup>20</sup> Iriraqueate cantavetatsica: “Nopintsatacari Aapani Irioshi”, cotanquitsi isemacarigueti irapicaquintete, iriguente tsojenti. Aatogueti ipintsatari irapicaquintete yamenavetacaca, aato yagaveji ipintsatari Aapani Irioshi teeca

inconijatimoteriji.<sup>21</sup> Icantajiacajitarite iriatimpa: quericaca pintsamajatarica Aapani Irioshi impintsataquempariqueate aisa irapiguemisantaraneni.

### Maasano irijanijate Aapani Irioshi yagavejajiaque intampishitashijiaquero teeca oncameetsateji

**5** <sup>1</sup>Irijanintajiacari Aapani Irioshi maasano cantajajatsica Jesoshi iriguente Quirishito Meshiantatsica. Quericaca pintsamajacari Aapani Irioshi ipintsamajajacari aisa maasano irijanijate Aapani Irioshi.

<sup>2</sup>Oraqueate apintsajiacarigueti Aapani Irioshi, aisa anetsanajiaquerogueti icantaqueca, atsajiaque apintsamajajacari irijanijate.<sup>3</sup> Apintsajiacarigueti Aapani Irioshi anetsanajiaquero maasano icanqueca, teenicate omanempaji anquemisanquero icancajica.<sup>4</sup> Maasanotarite ivoashirentica Aapani Irioshi yagavejajiaque intampishitashijiaquero maasano teeca oncameetsateji choocaguetatsica acaniqui quepatsiqui, iriguenteritarite agavejacaajiacajine Quirishito aventajiaquemparigueti.<sup>5</sup> ¿Quericampate agavejanquitsineca intampishitashitaquero choocaguetatsica acaniqui quepatsiqui?

Iriguentiqueate cantatsica Jesoshi iriguente Irijanite Aapani Irioshi.<sup>6</sup> Iriotarite Jesoquirishito coraquetaquitsica acaniqui quepatsiqui iviñacajajiqueru ojaaqi, ariqueate imetojajivetacari imocorojajiqueru osotoajatanaque iriraja. Teequeate apaniro iriviñacajajiteriji ojaaqi, aisa imocorojajiqueru osotoajatanaquequea iriraja. Iriguenteritarite cantajiacaji Ishire Aapani Irioshi. Iriatimpa teequeate iramatavijanteji.

<sup>7</sup> Choocatarite 3 tsataacaacajica:<sup>b</sup> <sup>8</sup>chooca

---

**b** 5.7-8 Yoguiptsocantajitacarogueti coramani ocatica paperi iguenquetsatsarequi Iromaquítica (Latín), yogavijitaquero capichaji teeca ontioncavetempaji iroaueragueti. Jero ocanqueca gavitanquitsica: “Chooca 3 tsavetacotantanquitsica inuitequi: Aapani, Quenquetsatsarentsi, jeri aisa Ishire. Iricha trestanquitsica, aparo inaque.” Yogavijitaquero aisa capichaji otsapa 8, itioncjajitaque: “Ari oquejetaca quepatsiqui, chooca 3 tsavetacotantanquitsica.” Irootaquequa itioncantajitacaroca oca iguenquetsatsarequi quimajareri paperiqui icantajitica *La Santa Biblia* versión “Reina Valera”.

Ishire Aapani Irioshi, chooca aisa oja iviñacajatacaantacagueti, jero aisa iriraja imetojaventajacajigueti. Irica 3 ari iquejeta-vacaaca icantacotaqueri Quirishito.

<sup>9</sup> Arimpate aquemisantajiguiro icamantacajica caquinte, iriompate Aapani Irioshi caaviji yanaajiaqueri maasano, arimaja anquemisantamajataquero icamantacajica iriatimpa, itsavetanqueritarite Irijanite.

<sup>10</sup> Querica quemisantamajatrica Irijanite Aapani Irioshi itsaque ishirequi iroomaja icamantacajica, cotanquitsi irira teeca inquemisanterji Aapani Irioshi quejevaeca manaca icanque Aapani Irioshi iriguenti tsojenti, teenicate inquemisanterji itsavetan-taquerigueti Irijanite. <sup>11</sup> Jero icanqueua itsavetanquerigueti: Aapani Irioshi yojocajia-caji anijagantsi coguitatsineca, oratica anijagantsi ochoocaqueri Irijanite.

<sup>12</sup> Iriraquea ichoocaqueca Irijanite Aapani Irioshi, ochoocaqueri anijagantsi; iriraquea caarica ichoocati Irijanite Aapani Irioshi, tee onchoocaterji anijagantsi.

### Icamantajianajiriqueate

<sup>13</sup> Notioncajiaquempi maasano aviatimpajia quemisantajiguirica Irijanite Aapani Irioshi cameetsanijite pintsatimentajiaquenijite yanijacaajia-jimpi pishirequi pincoguitepani pinchoocajiaque. <sup>14</sup> Aatimpajia tee antsaroajigueji amanajiguirigueti Aapani Irioshi, atsajiaqueterite amanajiji-aquerigueti taaca opajita inintaqueca irojocajiacaji, iquemajiacajiqueate.

<sup>15</sup> Atsajiaque iquemajiacaji amanajiguirigueti, aisa atsajiaque irojocajiacajiro taaca amanajiaqueri.

<sup>16</sup> Quericaca amenaquerineca irapigue-misantariteni impeacaguemparogueti coguisherentsi caarica imetojashirentimen-tajitiri, cameetsataque iramanacoventaque-riquea, ariquea iranijashirentacaajeri Aapani Irioshi. Iriguentijia nocantacotaque peacaajigaroca coguisherentsi caarica imetojashirentimentajitiri. Choocaquea coguisherentsi irimetojashirentimentajiteri. Teequea iroguenti noncanteji iramanaco-vente. <sup>17</sup> Maasano ipeacaagushejitala iroguenti coguisherentsi, cotanquitsi chooca coguisherentsi caarica imetojashi-rentimentajitiri.

<sup>18</sup> Atsajiaqueterite iriraqueate irijanincaca Aapani Irioshi teequeate irantaguishetanajero teeca oncameetsateji, yamijiacajita-rite Irijanite Aapani Irioshi arikeate tee iragavejajiajaji ampatsini inquempevaetacaajajaji. <sup>19</sup> Atsajiaque aisa Iriguenti ashintaji-acaji Aapani Irioshi, cotanquitsi maasano teeca inquemisantajigueriji Aapani Irioshi iriguenti ashintari ampatsini, irootaquequeate yagave-jantajiacarica. <sup>20</sup> Oraqueate aisa atsajiaque icoraquequiti Irijanite Aapani Irioshi itsatacaajiacaji atsatantajiacarica Iriomajatatsica. Imaica atsipamajajiacari Iriomajata-tsica, atsipamajajiacaritari Irijanite Jesoquirishito. Iriotaque Irioshima-jaca. Iriotaque aisa anijacaajiacajica ancoguitepaniniji anchoocajiaque iriatimpaqui. <sup>21</sup> Imaica, irijanijia, inchiquiojia pishineventajigaritsi irioshivetatsica. Ari oncoquempa.

# MAVITETAPOJATSICA ITIONCAQUECA

## JOANCA

### Antsatantaquemparoca

Ocatica iroguenti antsatantaquemparoca mavitetapojatsica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iquenquejajitaque itioncaquero ocatica paperi ichooaquegueti Epesoqui, atsajiaquetari iriguenti quempoguijajiguirica quemisantajitsica Epesoquita. Iquenquejajitaque oratica manquigarentsi quemisantatsica aisa irijanijiate itioncajiaqueneca ochooaque quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequeratagueti intionqueroji ivaperite catsantsantanquitsica pajitatsica Quenquetsatsarentsi Oganejencatatsica Itioncaqueca Joanca itsavetacotaquerigueti Jesoquirishito, aisa tequeratagueti intionqueroji otsipa pajitatsica Yonigaajiguequerica Joanca.

Joanca itioncajiaqueneri quemisantajiaquerica Jesoshi cameetsaniji impintsamajajiaquempari Aapani Irioshi aisa impintsajiaquempari irapitsarorentarijateni aisa maasano caquinteja. Itsatacaajiaqueri aisa quero incojiaquerini nintajianquitsica iramatavijajiaqueri quemisantajitsica.

---

### Icamantajiaquerigueti ampintsatavacaajiguempa

<sup>1</sup>Imaica, manquigarentsi, nontioncaquemi paperi pashi aviatimpa icoguiaqueca Aapani Irioshi. Naatimpa naroguenti quempoguijajiguirica quemisantajitsica, irootaquequeate nonintantacaca nontioncaquemi aviatimpa jerijia aisa pirijanijiate. Nopintsamajajiaquempi, cotanquitsi tee apaniro naatimpa pintsajiguempine, ipintsaquiaquempiqueate aisa maasano

tsajiaqueroca Quenquetsatsarentsimajaca. <sup>2</sup>Nopintsamajajiaquempi, atsama-jajiaquerotarite Quenquetsatsarentsimajaca, oncoguitempani onchoocatimotacaji. <sup>3</sup>Iriaquea Aapani Irioshi aisa Irijanite Jesoquirishito incavintsajajacaji, impintsatacojiacaji, inchoocatacaa-jiacaji cameetsa, atsamajajiaquerotari iroomajatatsica aisa apintsatavacaajacaji.

<sup>4</sup>Noshinevaetaca namenajiaqueri pirijanijiate iconoagarantajiaci inetsanamajajiaquero Quenquetsatsaren-

tsimajaca, iquejetacaamajajiacaro icamantajiacajica Aapani Irioshi.  
<sup>5</sup>Imaica, manquigarentsi, noncamanta-quempi iintsija ampintsatavacaaji-guempa maasano aatimpajia. Aritarite ocatica notioncaquempica tee irooqua etsipa iroaquerari quenquetsarentsi, iroguenti icantaqueca Aapani Irioshi itsatacaa jitacajica iroaqueragueti aquemisantajiaquerigueti. <sup>6</sup>Ampintsatavacaajiaquempagueti aatimpajia mana anetsanajiaquero maasano icanqueca Aapani Irioshi, piquemaquetari iroaque-ragueti icanti: "Pimpintsatavacaaji-guempa."

<sup>7</sup>Iquenaguetanaquequea quepatsi-paequi oshequi amataajatsica cantajia-tsica tee incaquintetapoje Jesoquirishito, tee intsnotinapoje. Maasano quejetarica imaica iriguenti amataatsica aisa iriguenti catsimatirica Quirishito. <sup>8</sup>Inchiquoitaja pamativajacaantajigatsi ariquea povashiantajianajero pimpeaco-jiajemparo maasano notsatacaa jiaquempica. Picancani pinetsanamajajiana-quero Quenquetsarentsimajaca cameetsanijite incavintsa jimentajia-quempinijite Aapani Irioshi coajica ontaniqui jenoqui inquitequi iroguiishi-nejamajajiaquempiqueate. <sup>9</sup>Imaica

noncamantajiaquempi aato itsipatari Aapani Irioshi irira cantatiguiroca itsatacaa antaqueca Quirishito, cotanquitsi irira quea netsanatiroca quisho oaqueroca irioquea intsipamaja-taquempa Aapani Irioshi jeri aisa Irijanite. <sup>10</sup>Quericaca coraquetanquitsine intsatacaa jiajavequempi etsipa teeca onquejetemparoji itsatacaa antaqueca Quirishito aato poguisavacajia-queri pitsovirona quitequi, aisa aato pishineventajiavacari. <sup>11</sup>Irira shineven-tajiaquemparineca mana iquejetacari iriatimpa, yantaquero teeca oncameetsa-teji yamatavijantaqueate.

#### Ivegaratanajiroguedi itioncaqueca

<sup>12</sup>Nonintaveta caqueate noncamanta-majajiaquempime maasano, cotanquitsi tee noninteji nontioncajiaquempi paperiqui, noquenquejaqueterite noanaque oraniqui aviatimpajiaqui inchiquoitaja nonquenquetsatacaa jiaqui-tempi cameetsanijite ashinemajajia-quempa maasano. <sup>13</sup>Ariqueate ichooca-jiaque acaniqui irijanijate piguetyote icoguia queca Aapani Irioshi onquemi-santamajataqueri. Iriatimpajia inintajiaque pinquemacojajeri iquenquejajia-jimpi. Ari oncoquempa.

# OTSIPATAPOJACACA ITIONCAQUECA

## JOANCA

**Antsatantaquemparoca**

Ocatica iroguenti antsatantaquemparoca otsipatapojojatsica itioncaqueca Joanca. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguia 3.1–4.22. Iquenquejajitaque itioncaquero ocatica paperi ichooaquegueti Epesoqui, atsajiaquetari iriguenti quempoguijajiguirica quemisantajiatsica Epesoquita. Iquenquejajitaque irira Gayo itioncaqueneca iguintenitaca quepatsiqui pajitatsica Paritia. Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 87, irooca otsipa ajagantsini arejevaetaro ajagantsini 90, tequeratagueti intionqueroji ivaperite catsantsatanquitsica pajitatsica *Quenquetsatsarentsi Oganejencatatsica Itioncaqueca Joanca* itsavetacotaquerigueti Jesoquirishito, aisa tequeratagueti intionqueroji ortsipa pajitatsica *Yonigaajiguequerica Joanca*.

Joanca itioncajaqueneri Gayo cameetsaniji incantajiaqueri iriatimpa aisa Irimitio ishinevaetaca yamenajajaquerigueti icomajamajajiacá, cotanquitsi tee irishineventemparojo yantaqueca Tioterepeshi.

---

### Joanca itioncaqueneri Gayo

<sup>1</sup>Imaica, nopintsatacaca Gayo, nonintaque nontioncaquempi paperi. Naatimpa naroguenti quempoguijajiguirica quemisantajiatsica. Arimaja nopintsamajaquempi.

**Gayo icavintsajajaquerigueti maasano quemisantajiatsica**

<sup>2</sup>Napiguemisantariteni nopintsatacaca, namanacoventaqueMPI cameetsamijite pincoguitempaninijite pinchoocataque

cameetsa, aatoniji pojoquijita, onquejeta-quempa pichoocaquegueti cameetsa pishirequi pishinevaetaca. <sup>3</sup>Oraqueate icorakejiaquegueti apiguemisantarijateni icamantapojanaquea picomajamajatanaca pinetsanamajatanaquero Quenquetsatsarentsimajaca. Noshinevaetanacaqueate noquemacotaquempigueti. <sup>4</sup>Caavijitarite oguishinejamajataquena noquemacojiaquerigueti nirijanijiate<sup>a</sup> inetsanamajajiquer Quenquetsatsarentsimajaca.

<sup>5</sup>Nopintsatacaca, cameetsavaeque-queate picavintsajajianaquerigueti

---

<sup>a</sup> **4** Iquenquevarivaetanaquegueti irira Joanca icantiri “irijani” maasano quemisantajiaquerica Amajirote Jesoquirishito.

maasano quemisantajiatsica, irira pigonorojia aisa itsipapae teeca pinejavetempariji. <sup>6</sup>Iriraqueate coraquejianquitsica acaniqui icamantajiaqueri quemisantajiatsica icapiocajiacagueti icantajiaqueri pipintsamajajiacari. Imaica nonintaque picancani pinquejetajempa imaica iroajianaqueguedi oraniqui, coajica iroajianajeguedi pojocajiaqueneri maasano icoguitejajacaca cameetsanijite irishineventaquempiniji Aapani Irioshi. <sup>7</sup>Irooqua yoantanacaca yoantanacarotari ivajiro Jesoquirishito, cotanquitsiquea irirajia teeca intsaroventempariji Aapani Irioshi teequea iramitacojigueriji, tecatsi irojocajigueneriji. <sup>8</sup>Aroguentijiaqueate jocajiaquenerine maasano taaca intatjaque cameetsanijite amitacojiaqueri itsavetantajiaqueroguedi Quenquetatsarentsimajaca.

<sup>9</sup>Notioncajiavetacanari quemisantajiatsica capiocapinijiatsica oraniqui, cotanquitsi iriraqueate Tioterepeshi mana yanaimanatanaguena intati tee inquemisantenaji naatimpajia. <sup>10</sup>Imaica quea imaica noncoraquequiteguedi pincapiocajiaquempagueti noncamantamajajiaquempi maasano aviatimpajia quero icocani iriatimpia, injashiquenatarite intati. Cotanquitsi tee apaniro onchoocateji ocatica. Oraqueate

yoajianaqueguedi apiguemisantarijateni tee iraajiavaqueri aisa icatsimatiamentajiaqueri quericaca nintavetanquitsica iraajiavaqueri, ariquea icantimentajiaqueri inconoajajemparimequeate capiocajianquitsica.

<sup>11</sup>Imaica, napiguemisantariteni, aato piquejetari antiroca teeca oncameetsateji. Iriguenti pinquejejiaquempa comajamajajiajatsica. Irira comajamajajiajatsica iriguenti ashintari Aapani Irioshi, cotanquitsi irira antajiguiroca teeca oncameetsateji tee intsateriji Aapani Irioshi. <sup>12</sup>Maasano icamantacojiguiri Irimitio, yamenajiaqueritarite inetsanamajatiro Quenquetsatsarentsimajaca. Arikeate noquejejiaca naatimpajia nocamantacojiaqueri. Aviatimpia pitsataque tee namataajiguempaji.

<sup>13</sup>Nonintavetacaqueate noncamantamajajiaquempime maasano, cotanquitsi tee noninteji nontioncaquempi paperiqui. <sup>14</sup>Noninquetarite nonejaquitempi arikeate anquenquetsatavacaaji-aquempi. <sup>15</sup>Noninque pinchoocaque cameetsa. Arikeate ichoocajiaque acaniqui atsipavijijiacaca, intatjaque incamantajiaquempiqueate iquenquejajiaquempi. Naatimpia nonintaque inchiquiojita pincamantajiaqueri maasano atsipavijijiacaca apaniropae choocana noquenquejajiaqueri.

# ITIONCAQUECA

## JORASHI

**Antsatantaquemparoca**

Ocatica iroguenti antsatantaquemparoca itioncaqueca Jorashi itioncajiaquenerigueti quemisantajiaquerica Jesoshi (otsapa 1-3). Tee intsajiteji queri itioncajiaqueneca aisa tee intsajiteji quero ichoocaque Jorashi itioncaquerogueti. Iriraquea Jorashi irio jorio iriguentijeguite Jesoshi. Iquenquejajitaque itioncaquero ocatica paperi ajagantsiniqui irooca 66, irooca otsipaqui ajagantsini arejevaetacaro ajagantsini 90.

Jorashi itioncajiaqueneri quemisantajiaquerica Jesoshi iragamajajiaquempari amataajiatsica, aatoniji yamatavijajiguiritsi intsatacajiaquerigueti teeca iroomajateji, aisa aatoniji yovashiantajianajiro iquemisantajiaquegueti (4-16). Icamantajiaqueri quero incojiaquempani quemisantajiaquerica Jesoshi (17-23). Iteroncaquerogueti itioncaqueca ishineventacariquea Aapani Irioshi, icanqueri: “iArioteesaa!”, iriotaquetari aajiajavajica maasano aatimpajia aventajiacarica Jesoquirishito metojaventajiacajica (24-25).

---

### Itioncajiaqueneri icajemajiaqueca Aapani Irioshi

<sup>1</sup>Imaica nontioncajiaquempi paperi aviatimpajia icajemajiaqueca Aapani Irioshi. Naatimpa naroguenti Jorashi iriguentijeguite Santiago,<sup>a</sup> iriguenti nintacaquena Jesoquirishito nosavicaventajiaqueneri inintaguetaica iriatimpa. Notioncantaqueempica aviatimpajia ipintsamajajiacaca Aapani Irioshi, iquempoguijajiaqueca Jesoquirishito.  
<sup>2</sup>Namanacoventajiaquempi incavintsajajiaquempinijite Aapani Irioshi, inchoocatacamentajiaquempinijite cameetsa, aisa impintsamajajianaquempinijite.

### Tsatacaantantajiatsica amataajiatsica

<sup>3</sup>Napiguemisantarijateni nopintsamajajiacaca, nonintavetacaqueate nontioncaquempimequeate nonquenquejacaaji-aquempimequeate quero icojiacajini Jesoquirishito imeshiajiajigueti, cotanquitsi noquenquejaque caaviji picoguimenta nontioncajiaquempi noncantajiaquempiqueate pintampishitashijiaqueri itsipapae teeca inquemisantamajajigueji aatonijite yamatavijajiguimpi, jero aisa noncantajiaquempi pintsamajajiaquero maasano itsatacajiajacija Quirishito, aatoja picantashitatati-

---

**a 1** *Santiago*. Iguenquetsatsarequi guiriego ipajita *Iakobos*. Iconagarantaca quimajareri yoguipitsocaquerogueti ivajiro ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*.

garo. Teenicate onchoocateji otsipa quenquetsatsarentsi tsavetacoquerineca quero icota Aapani Irioshi imeshiantigueti.<sup>4</sup> Irirajiaqueate amataajiatsica tee inquemisantajiqueriji Aapani Irioshi, mana ipeamampeajiacqua quemisantajiasica cameetsanijite iramatavijimentajiaquempinijite, ariquate iconagarantajiacqua iquijajiaquequeate picapiocapiniji-acagueti iconoajaqueempi. Icantajiaque icavintsajajiacitarite Aapani Irioshi imeshiajiajaci cameetsataquequeate antajiaquero taaca anintajiaque, aato ictsimatimentajiro. Aisa imanintajiaqueri Amajirote Jesoquirishito irira apaniroca ashintamajajiacajica. Irootaquequeate itioncacotantajitacarica paesatoniqui ocanti incatsimatimentajiaqueri Aapani Irioshi iroajianaque camorecariqui.

<sup>5</sup>Pitsajavetacaroqueate maasano ocatica, cotanquitsi nonintaque nonquenquejacaajiaquemperi ishiraerijia. Pameneri iriatimpajia ichoocajavetacagueti Ejepitoqui icavintsajajiaqueri Aapani Irioshi yaajianaqueri otsipaqi quepatsi, cotanquitsi coajica iteroncijaqueri maasano teeca inquemisantajiqueriji. <sup>6</sup>Ari iquejejiaca irashivantijite Aapani Irioshi caavijica icameetsaveta, ipeajiavecariequeate Aapani Irioshi amitacotirica, cotanquitsi coajica yovashiantajiaqueri iguinentijavetacagueti. Arikea Aapani Irioshi yashitacojiaqueri opitsecaquegueti, yoishotacotaqueri cavorejatsariqui caarica teroncatsi igantagaqueate irosati aavaetantanaquempaca oratica savincaguiteri anaanquitsineca incantimentantaquemparica maasano. <sup>7</sup>Arikeate iquejejiaca aisa irirajia guinentijavetatsica Soromaqui aisa Gomoraqui jerijia quempejiguetanquitsica iquempevaejiaca. Yoashitantajiaquequeate, aisa

itsanirojiaquequeate manaqueate arimpa ijamatajianaque, irootaquequeate yoguivariantacanarica Aapani Irioshi paamari iteroncijaqueriqueate cameetsanijite amenajiaquero anquenquejimentajiaqueronijite camorecariaato otsivaqui antsaroantajiaquempaca ancomajamajatantajiaquempaca.

<sup>8</sup>Arikeate iquejejiaca aisa irirajia amataajiatsica iquenquejagushejiaque taaca opajitapae, teequeate incomajajiguempaji mana icovaeguishequero itsino. Imanintajiaqueriqueate Amajirote teequeate impincatsajigueriji, aisa inijashinajiacari maasano oganejen-caguetatsica inquitequitica. <sup>9</sup>Arimpare coramani irashivantite Aapani Irioshi icantajitica Miguera, arivetaca iriguenti imajirote maasano irashivantijite Aapani Irioshi, teequeate irioqueate quejeterone imaica. Pameneri coramani imetojaquegueti Moishishini iriatimpa Miguera manaquea iquenquetsataavaqueri imajirote ampatsini. Iriraqueate imajirote ampatsini manaqueate inintavetaca iraanaquerome itsino, iriraqueate Miguera teequeate irininteji, cotanquitsi teequeate incantimateriji incatsimaqueri mana icanqueri: “Inchiquojita incantomajaquemperi Aapani Irioshi.” <sup>10</sup>Cotanquitsi irirajia amataajiatsica mana inijashinajiacaro teeca intsajigueji. Aisa mana iquejejiacari tomirishipaequitica savicaventiroca taaca opajitapae inintaguetica, irootaquequeate interoncantajianaquempaca.

<sup>11</sup>Maasanotarite irantsipejiaquempa iriatimpajia. Iquejemajajiacaritarite Caini imetojaquerigueti iriguentijeguite, aisa mana iquejejiacari Varaameni ishinevencari imenta-quipae. Pameneri iriatimpajia ishineventajiacarigueti imentaquipae yantaguishejiaquequeate taaca

opajitapae teeca oncameetsateji. Aisa caaviji ipigatantajiga, iquejetacari Coreni ipigatsatacarigueti Moishishini, ariqueate icatsimatumentaqueri Aapani Irioshi imetojaqueri.

Ariqueate inquejejiaquempa iriatimpajia aisa interoncajitaqueri.<sup>12</sup>Iconajiaquempi pitsipatavacaajiacagueti pishecajiaaca piquenquejajiaquerigueti Amajirote imetojaventajiacajigueti, cotanquitsi tee impashiventempaj manatarite ishecatapitsajiacari igonorojia irisati quenquejacotajatsi, irootaquequeate iriguenti shecamajajianquitsi iquemamajajiaqueate tee inquenquejajigueriji teeca onchoocate irishecajiaquempaca. Mana inijashijiaca intati, caaviji yamatavijantajigui quejejiaqueate oseetigueti; ijijitaqueroji ari ontejapojaque incani, cotanquitsiqueate yaanajiro choviga, tee ontejeji. Aisa mana iquejejiacaro panqurientsi ishecamajajitaca, yoguijajitavaqueroqueate oitsoquitajajeta inchiquioji irishecajitatavajemparo, cotanquitsi aavetapojaquerigueti oitsoquitigueti tee oitsoquitajajeti.

Ariqueate ichaquijquiero, aisa iponquitrejajitaquero, ometojamajatanaque.<sup>13</sup>Aisa mana iquejejiacaro quentija ovorevorefavaetigueti, ariqueate opishoncaquero oshimore otsapijaqui, yamenajitaqueroqueate quepatsishimoretaquequeate. Ari iquejejiaaca iriatimpajia, yantagushejiaque impashiventacaquempameca. Mana aisa iquejejiaaca impoquiro teeca igantaga inquishoteji. Irira taquijaajiatsica querocampa incoquiaquempani impampiatantajianaquemparica queroca iquenajianaque.

Irootaquequeate icantantacaca Aapani Irioshi maasano quejejiacarica iriatimpajia iroajianaque opitsecaquegueti, igantagaqueate incantacotaque manquimanquimanqui.

<sup>14</sup>Iriguentijia itsavetacojiaqueca Enoconi coramani. Irira Enoconi irio sietetapojatsica itsavetacojitaquerigueti ichoviquijianaqueca Araini,<sup>b</sup> iquenquesatacotaqueri amataajjatsica icanti: “Incoraquepojaque Amajirote coajica intsipajiaquempari irashivantijite iroshequiamajatatiqenimaja.<sup>15</sup>Incampaqua quericaca antatsica cameetsari aisa quericaca antatsica teeca oncameetsateji, ariqueate icatsimatumentaqueri maasano antaguishejiguiroca teeca oncameetsateji nijashinajigarica iriatimpa.”<sup>16</sup>Iriatimpajia iriguenti isavicaventajiaque inijashitantajiac, aisa inintamampeaguevetaroqueate taaca opajitapae, jero aisa isavicaventajiaquero taaca opajitapae inintaguishejiaqueca. Yaventacojiaaca jero aisa ishinetamampeajiacari igonorojia cameetsanjijite iroquoimentajiaquerinijite taaca inintajiaque.

<sup>17</sup>Cotanquitsi imaica aviatimpajia napiguemisantarijijateni nopintsamajajaca, pinquenquejajiguero maasano icantajiaquempica itigarancanejia Amajirote Jesoquirishito, aato pipeacotaro.<sup>18</sup>ICamantajiaquempitarite icantajigu: “Oraqueate pajinigueti aapojempa savincaguiteri vegaratapajatsineca inchoocajiaque shirontimentantajiananquitsineca savicaventajianaqueroneca taaca opajitapae inintaguisheguetaqueca iriatimpajia.”

<sup>19</sup>Irira quejejiaqueroca imaica yamatavijajiaqueri oshequini quemisan-

**b** <sup>14</sup> *irio sietetapojatsica itsavetacojitaquerigueti ichoviquijianaqueca Araini.* Pamenero Jen. 5.1-24 itsavetacojitaquerigueti. Cotanquitsi ocatica icanqueca Enoconi, tee intioncrajiteroji Jeneshishiqui, oponeaca otsipaqui paperi icantajitica *Itioncane Enoco*.

tajatiatsica ipigatsatavacaantajianacaca, teeca inquemavacaantajiguempaji.

Iriratica shirontimentantajatiatsica mana ishineventajiacaro intati inintaguetica iriatimpa, teequea inchoocashirenteriji Ishire Aapani Irioshi.

#### **Itampishitacajaiaqueri quemisantajatiatsica**

<sup>20</sup>Cotanquitsi aviatimpajia napiguem-santarijijateni, nonintaque picancanija pisavicaventajiaqueroja Quenquetsatsa-rentsji Oganejencatatsica cameetsanijite arimpaqueate pinquemisantamajatana-queri Jesoquirishito. Pincantajiaqueri Ishire Aapani Irioshi intsatacaajia-queMPI pamanajiaquerigueti Aapani Irioshi. <sup>21</sup>Arimpaqueate pincomajajiana-quempa cameetsanijite incavintsajimen-tamajajiaquempinijite Aapani Irioshi. Poguijajiaavaqueri Amajirote Jesoquiri-shito incoraquetajegueti incavintsajajia-pojempi intsipajiaquempi jenoqui inquitequi picancaniquea pinchoocajia-queNI iriatimpaqui. <sup>22</sup>Pimpintsatacoji-guempari irirajia teeca intampishishi-rentajigueji quenquejacojiavetacaroca iroomajatatsica: “Caaricampa.”<sup>c</sup>

<sup>23</sup>Itsipapae mana pintsatacaajiaqueri inquemisantamajajiaqueri Aapani

Irioshi quejevaecaqueate manaca paajiavajiri intati pajinica intajai-aquempa camorecariqui. Pincavintsajaj-aqueri, cotanquitsi inchiquiojia ipajencajianaquempirotsija iguempevae-rejia. Aatoja pishineventsijigari yantaji-aqueca iriatimpajia.

<sup>24-25</sup>Chooca apaniro Irioshimajaca meshiajiaquerineca quemisantajia-querica Amajirote Jesoquirishito. Iriotaquequeate agavejanquitsineca intampishitacajaiaquempi aatonijite piquempevaejiaja. Irajaianaquempi intsipajianaquempi iriatimpaqui, iramenajiaquempi cameetsaqueate pichoocataque quejevaeca teenica pinquempevaetimatempaj. Oraqueate ontaniqui ichoocaquegueti iriatimpa pincoguitempani pishinevaejia-queMPI. Jameja acancani antsaroven-tajiaquempari, yoganejencamajata-tari. Iriguentitarite Amajirote aisa caaviji yagavejamajati, jero aisa yaaguitejaquero maasano. Igantaga-queate iquejetaca coramani, ariqueate iquejetaca imaica, ariqueate igantaga-queate inquejetaquempa coajica, igantagaqueate incoguitempani. Ari oncoquempa.

<sup>c</sup> 22 Oconoaca otsipa paperipae iroquetinica ocanti ocaniqui: “Pintsatacaajiguera irirajia teeca intampishishirentajigueji iramenamajajiaqueroniji iroomajaca.”

# YONIGAAJIGUEQUERICA JOANCA

## Antsatantaquemparoca

Ocatica iroguenti antsatantaquemparoca itioncaqueca Joanca paperiqui pajitatsica *Yonigaajiguequerica Joanca*. Irio jorio poneanquitsica quepatsiqui icantajitica Garirea, irio itigarancane Jesoshi. Tequeratagueti incajemeriji Jesoshi, itsipatacari iriguentijeguite pajitatsica Santiago, iquitsajiaque. Irocashi itioncacotaqueri irira Joanca paperiqui Yantajiguica 3.1–4.22. Iriguenti quempoguijajigurica quemisantajiatsica Epesoquitica. Yamenaquero Joanca ocatica yonigaajiguequerica ichoocaquegueti ovogorequi pajitatsica Patimoshi (1.9). Chooca quenquejanquitsica itioncaquero ichoocaquegueti ontaniqui. Itsipajia iquenquejajiaque itioncaquero ichoocaquegueti Epesouqui irooca otsipaqui quinteninintsi yoguipaquijajitaquerigueti isotoanaquerogueti ovogore Patimoshi. Itioncajiaqueneri quemisantajiatsica Ashiaquitica capiocapiniatiatsica quinteninintspaequi carajianquitsica 7 (1.4). Tee intsajiteji quero ajagantsini itioncaquero ocatica paperi, cotanquitsi chooca quenquejajianquitsica itioncaquero arica ajagantsini 94, irooca otsipa ajagantsini arejevaetaro ajagantsini 98. Itioncaquero ocatica paperi iteroncajitaquerogueti maasano otsipapae paperipae choacajianquitsica ocaniqui paperiqui icantajitica *Tsavetacoquerica Jesoquirishito*.

Joanca itioncacotaquero acaniqui yonigaantaguequequerica Jesoquirishito cameetsaniji intsajiaquenijite quemisantajaquerica quero oncoguetanaquempani oncoramanitapoajegueti, irooshipojitarite aapojajempa (1.1). Jesoshi icanqueri Joanca intioncajiaqueneri irashivantijitete tsaroven tajiacarica capiocajianquitsica quinteninintspaequi carajianquitsica 7 (cap. 2–3). Coajica itioncaque intampishitaca jiaqueriniji quemisantajiatsica atsipeventajiacarica Jesoquirishito iquemisantajaquerigueti intsajiaqueniji quero oncoguetanaquempani onteron canaquempagueti quepatsi, iragavejaquerigueti Jesoshi imajirote ampatsini, aisa omparianajempa iroaqueraro quepatsi.

---

### Yonigaantaguequeca Jesoquirishito

**1** <sup>1</sup>Ocaticaquea tioncanquitsica ocaniqui iroguenti icanquerica Aapani Irioshi Jesoquirishito ironigaajakeri irajaanirejia cameetsaniji intsajiaquenijite quero oncoguetanaquempani oncoramanitapoajegueti,

irooshipojitarite aapojajempa. Iriatimpia itigarancuitsari irashivantite incamantaqueriqueate irajaanire pajitatsica Joanca. <sup>2</sup>Irira Joanca icantamajataquero maasano yamenga quequeca, itsavetacotaquero iguenquetsatsare Aapani Irioshi, aisa yonigaquerica Jesoquirishito.

<sup>3</sup>Iriraquea Aapani Irioshi irishineta-caavaequepariquea quericaca apatsajavantaqueroneca ocatica paperi. Arikeate inquempetacaajiaquempari aisa maasano quemisantajivaqueroneca irampatsajavantajiquerogueti arigueti irinetساناماتاواquieroqua, irooshi-pojitarite aapojajempa itsavetacotsita-caca ocaniqui.

**Joanca itioncajiaqueneriquea  
capiocapinijiatsica Ashiaqui**

<sup>4</sup>Naroguenti Joanca tioncaqueroca oca. Nontioncajiaquempiquea maasano aviatimpajia tsaroventajiatsica Ashiaquitica<sup>a</sup> capiocapinijiatsica quinteninintsipaequi carajatsica 7.<sup>b</sup> Noninque incavintsajamajajiaquempi irira Choacaguitatsica, icoguitaniquea ichoocaguitini coramani, ari incantaco-guitempani inchoocaguiteni. Noninque inchoocatacaaajiaquempi cameetsa aatonijite taaca opajita pishoshoguitetimentajajatsi. Arikea noninque inquempetaquempaquea irirajia 7 jeocajianquitsica<sup>c</sup> choocatimojiaquerica imajirontamentoqui isavancancaca, incavintsaajiaquempi inchoocatacaaajia-quempiquea cameetsa.<sup>d</sup> Noninque inquempetaquempaquea Jesoquirishito iriatimpia incavintsajamajajiaquempi inchoocatacaaajiaquempi cameetsa. Irionaquea tsavetacotantirica Aapani Irioshi tampaticamajatiroca, teequea iramataguempaji. Imetojavetacaquea, cotanquitsi irio jivaqueri maasano tancorejajiananquitsineca, aisa iriguenti

Majirontamajatatsica anaajiaquerica maasano majirontaguetatsica quepatsipa-equitica. Caaviji ipintsamajajiacaji imeshiajiacaji ishetsitajajiro agovaegui-sherejia, manaqueate iquivantajajiro iriraja. <sup>6</sup>Ipeacaajiacaji majirontajatsica aisa ipeacaajiacaji saserorotejia cameetsaniji asavicaventajiaqueroniji maasano intaguetica Aapani Irioshi, Iriri iriatimpia. Caaviji yoganejencama-jata, yagavejamajati, imajirontamajata, ariquea incoguitepani inquejeta-quempa, cameetsavaetaquequea irishineventaguitemparinija maasano. Ari oncoquempa.

<sup>7</sup> iPameneja, coraquetapo jishiatsi Quirishito, iquenantapo jacaro-quea mararo!

Iramenajavajerie quea maasano, inquejetsijianaquempaquea satajacaantajiavecarica irame-najavajeri iriatimpajia aisa.<sup>d</sup> Maasano caquinteguetatsica guinte-nijianquitsica quepatsipaequi iramenajavajerigueti iriraajia-naquempaquea oshimampojan-cacaavaetanaquempari.

Jeeje, ari oncoquempani imaica.

<sup>8</sup>Jeroquea icanqueca Amajirote Irioshi: “Naroguenti *Alfa* aisa naroguenti *Omega*, <sup>e</sup> naroguenti pariac-roca jivatanquitsica nochoocatini coramani, aisa naroguenti caropo-atsica.” Iriguenti choocatatsica, icoguitani ichoocati aisa incoguitepani inchoocaguiteni. Iriguenti Agavejamajatatsica.

**a 1.4 Ashia.** Iroguenti provincia ochocatantajiacaca quinteninintsipae. **b 1.4 quinteninintsi-paequi carajatsica 7.** Pamenero 1.11 itioncaquerogueti ovajirope quinteninintsipae ichoocajiaquegueti itioncaqueneca. **c 1.4 jeocajianquitsica.** Irioca ocantacotaque ijecarajitete Aapani Irioshi. Cotanquitsi itsipa iquenquejanaque irioca ocantacoque Ishire Aapani Irioshi cotanquitsi isietetashitaca, aparo inaque. Pameneroja aco, apapacoro onaque cotanquitsi ocarati 5 achapaquipae, ocincotashitaca. **d 1.7** Sac. 12.10; Jn. 19.34, 37. Pamenero aisa Sar. 22.16; Is. 53.5. **e 1.8 Alfa aisa Omega.** Oratica *alfa* iroguenti ojivatantanacaca abecedario irashi guiriego. Oratica *omega* iroguenti carapo-jatsica.

### **Joanca yamenajiri Jesoquirishito**

<sup>9</sup>Naatimpa naroguenti Joanca papitsa-roventarite, aquejetavacaajiaca atsipeventajiacari Jesoquirishito, amajirontajiacari aisa atsipetacojaciaca maasanopae. Coramani yaajitanaquena-quea yojocajiquitana ovogorequi pajitatsica Patimoshi yamenajiquenagueti notsavetantavaequerouqueate Iguenquetsatsare Aapani Irioshi, notsavetacoqueriqueate Jesoquirishito.

<sup>10</sup>Iroompaquea arejetapojaagueti isavincaguite Amajirote,<sup>f</sup> yagaveja-caashirentaquaquea Ishire Aapani Irioshi, noquemitsitaroquea notaquiqui iquenquetsajencajique inirojencamajaca quempejencavaeca tivorentsi. <sup>11</sup>Icantajiti: “Naroguenti *Alfa* aisa naroguenti *Omega*, naroguenti pariacaroca jivatan-quitsica nochoocatini coramani, aisa naroguenti carapojatsica.<sup>g</sup> Pintioncaco-guetavaqueroja paperiqui maasanopae pamenaguetavaqueca pintigarancacaan-tajiaqueneriquea tsaroventajiacarsica capiocapinijiatsica quinteninintsi qui caratatsica 7 Ashiaqui, opajitaquea: Epeso, Eshimirina, Peregamo, Tiatira, Saririshi, Pirarerepia, aisa Iraorisea.”

<sup>12</sup>Iroompa nopsisocavetanaca nonejeri quenquetsatacaaquenaca. Namenitsitari-quea 7 tsivorentsi jerenquijerenquiatocatsica, ipeacaajitaca cavorejari ooro.

<sup>13</sup>Iniganquitsitaroquea 7 tsivorentsi aparo quejevetarica irijanite caquinte.

Ontiaseavaeca iitsaare arejevaeca yovegaraguitipojacaguetai, yaguiatacar ieguiqui ichompimashite ipeacaajitaca ooro. <sup>14</sup>Oraquea iguitoqui iquitamaromaevaeque quempeni ovejamae irooca sharaca. Oraquea iroquija quempetaca omorequigueti paamari. <sup>15</sup>Oraquea iguitiqui otsirencavaeque ocanca quempetaca itajaitirogueti cavorejata-tsica voronquise. Oraqueate iquenque-tsaquegueti iririjencavaeque icanca quempetaca ampenejatagueti ojaaquiniqui amarigueti. <sup>16</sup>Oraqueate itincami-jempequiqui yajiricajiaqueri 7 impoquiropare. Osototsantsamenivaeque ivagantequi itsaampitsantsamenirite mavite otsaampinampitaque. Oraqueate ivoroqui itsirencajatantavaetiquea icanca quempetaca catsirincaiteri itampaticatigueti.

<sup>17</sup>Irooqua namenaquitiguiri notejimotanaqueriquea quempetaca arinica nometojaquenica. Cotanquitsi-quea iriatimpa ipamitsitantanaroquea itincamijempequi icanneda: “Aatoquea pitsaroguitsi. Naroguentitari jivatatsica, naroguenti aisa carapojatsica. <sup>18</sup>Naroguenti Anijamajatatsica, nometojaiveca coramani iroompaquea nopochatanaji, noncoguitepaniquea nonchoocaguiteni aatoquea nometojaitsi. Naroguenti ajiricaqueroca oyavine metojagantsi aisa oyavine Areshi.<sup>h</sup> <sup>19</sup>Nocantanta-quempica pintioncacoguetavaqueroja pinejaguetavaqueca incajaranqui,

**f 1.10** *isavincaguite Amajirote*. Oraquea icantajitiro “isavincaguite Amajirote” maasano tomino, iroguentitari itancorejantana jaca, irootaquequea icapiocantajiacaca tsaroventajiacarica coramani. **g 1.11** Choocaguetaque otsipapae paperi iroquetinica teeca intioncajiteroji ocaniqui quejetaca tioncanquitsica otsapaqui 8: “Naroguenti *Alfa* aisa naroguenti *Omega*, naroguenti pariacaroca jivatanquitsica nochoocatini coramani, aisa naroguenti carapojatsica.” **h 1.18** Icanquegueti Jesoshi: *Naroguenti ajiricaqueroca oyavine metojagantsi aisa oyavine Areshi*, irooqua ocanke iriguenti cantatsica quero iroaroaitanaque maasano metojajianquitsica, iriguentitari agavejamajaqueroca metojagantsi. Oraquea *Areshi* iroguenti ichoocajiaquegueti metojatsica tequeratagueti impishoncajiteriji camorecariqui. Irira guiriego icanquero *hades*, iguenquetsatsarequi evereo icanquero *sheol*.

pinejaguetavaqueca imaica aisa maasanopae nonigaaguetaquempica coajica.<sup>20</sup>Imaica noncamanquempi taaca opaji icantacoque irira 7 impoquieropae pinejaqueca najiricajaqueca notincamijempequiqui, aisa 7 tsivorentsi jerenquijerenquiatacotsica ipeacaajitaca ooro. Iriraquea 7 impoquieropae iriguenti icantacojaque 7 ashivantijite<sup>1</sup> tsipajiacarica tsaroventajianaca capiocapinijsatsica quinteninintspaequi carajitsica 7. Oraquea 7 tsivorentsi jerenquijerenquiatacotsica iriguenti ocantacojiaque tsaroventajianaca capiocapinijsatsica oraniqui.

**Itioncaciaqueneri tsaroventajiansica quintenijisatsica Epesoqui**

**2** <sup>1</sup>“Imaica pintionqueneri irashivantite<sup>2</sup> tsaroventajianaca quintenijisatsica Epesoqui, pincante:

Iriraquea ajiricajiaquerica 7 impoquieropae itincamijempequiqui, anijitimoguequerica 7 tsivorentsi jerenquijerenquiatacotsica ipeacaajitaca cavorejari ooro icanti: <sup>2</sup>Notsamajaque maasanopae pantajiaqueca, pipanquenapanquenaicaro patsipeventajiacaroquea, teequea povashianteroji. Teequea pishineventajiguempariji peacaagushejigaroca covaeguisherentsi. Notsaque icoraquetimojivequempi cantajavetapojimpica: ‘Naroguenti itigarancaneja Jesoshi’, cotanquitsiquea

oraquea itsatacaaajiavequempigueti manaquea pitsatsijiavaqueri teequea inquempejiguempariji itsatacaantajiguica notigarancanemajaca, ariqueate tee pinquemisantajigueriji, pamenaajiavaqueritarite manaquea yamataajiac intati. <sup>3</sup>Arimajaca patsipetacojiaca patsipeventajiaquenaquea teequea pimperatanaquemparoji.

<sup>4</sup>Cotanquitsiquea chooca aparo noncantomajimentajaqueempica, irootaquequea ocatica: Teequea pinquempejajempaji iroaqueragueti pipintsamajajauenagueti. <sup>5</sup>Iintsija pinquenquejajieroja quero picojivatetacani cameetsaniji pincantashitatijaianaquempaniji pinquempejianajempaquea iroaqueragueti pipintsamajajauenagueti. Atogueti picantashitatijatsi noncoraquetashijiaquempiquea naacotsitanaqueempiri pitsivore jerenquijerenquiatacotsica, aato ochoocataji ochoocaquegueti imaica. <sup>6</sup>Cotanquitsiquea noshinevaeca namenaquequea pisemacaro ipeacaagushejiacaca nicoraitajia,<sup>k</sup> piquempejiaquenaqueate naatimpaa nosemacaro.

<sup>7</sup>Choocagueti guempitatanquitsica iintsija inquemeja icantajiaquerica Ishire Aapani Irioshi tsaroventajiansica. Quericaca tampishitashijiaqueroneca maasanopae coraquetashijiaquerineca nojocaqueneri irishecaquemparoqua osovena inchato anijacaantantatsica choocatatsica jenoqui ivaraisotequi Aapani Irioshi.<sup>l</sup>

**i 1.20 ashivantijite.** Iguenquetsarequi guiriego otioncaca *aggeloi*, ocanque ‘camantajiansica’, irio itigarancajitica incamanteri itsipa. Chooca mavite ocantacotaque. (1) Irootaque icanquerica ashivant, iriotaquetari itigarancaqueca Aapani Irioshi camantajiaquerineca caquinte. (2) Chooca otsipa ocantacoquea: irira caquinte camanquerineca itsipapae.

**j 2.1 irashivantite.** Pamenero otsapa 1.20 ovegaravanapojacagueti ocamantacotaquerigueti ashivant. **k 2.6 nicoraitajia.** Teequea intsamajitajeriji irirajia icantajitica “nicoraitajia”. Iquenquejajitaque irioca guijatacojiguiroca itsatacaantica Nicoraashini. Arica iquejejiacari guijatacojigurica itsatacaantica Varaameni. (Pamenero 2.14.) **l 2.7 ivaraisotequi Aapani Irioshi.** Oraquea *paraíso* iroguenti oganejencajencatapojacagueti ichoocatigueti Aapani Irioshi. Irirajia tsaroventajigarica incoguitempani inchoocaguiten i ontaniqui, aatoquea imetojajitsi.

**Itioncajiaqueneriquea tsaroventajatiacsica  
guintenijiatsica Eshimirinaqui**

<sup>8</sup>“Imaica pintonqueneri irashivantite tsaroventajianaca guintenijiatsica Eshimirinaqui, pincante:

Iriraquea metojavetanquitsica coramani iroompaquea ipochatanaji iriguenti jiyatatsica, aisa iriguenti carapojatsica. Imaica icanti: <sup>9</sup>Notsmajaque patsipeventamajaquenaquea, aisa teetarite taaca opaji pashintimtempaji, cotanquitsiquea caaviji incavintsajamajajiaquempi Aapani Irioshi. Notsaque icantaguishetacovaequempiquea cantajatiacsica: ‘Naroguenti joriojia’, cotanquitsiquea caari, iriguentijiatari igapiocane Satanashi. <sup>10</sup>Aatojate pitsaroacaajigaro pantsipejiaquempaca. Iriraquea ampatsini irisantanatacataantajiaquempi cameetsaniji namenajiaquempinijite arimajaca pitsaroventamajajiaquenaquea. Pantsipevaetaquempatarite <sup>10</sup>savincaguiteri, cotanquitsiquea arimpaqueate pintsaroventamajatanaquenaja, aatoquea povashiantajiguortsijate piquemisantajiaquenagueti arejevaetanajempaquea pimetojantajempaca, iroompaquea nontancoretancoreitajempi oncoguitempaniquea noganijaquempi, onquejveticaquempanojocajiaquempi amatsaerontsianijacaantantatsica.

<sup>11</sup>Choocagueti guempitatanquitsica iintsijsa inquemeja icantajiaquerica Ishire Aapani Irioshi tsaroventajatiacsica. Quericaca tampishitashijiaqueroneca maasanopae coraquetashijiaquerineca aatoquea yatsipetimataja-

rotsi icantajitica ‘mavitetapojsineca metojagantsi’.<sup>m</sup>

**Itioncajiaqueneriquea tsaroventajatiacsica  
guintenijiatsica Peregamoqui**

<sup>12</sup>“Imaica pintonqueneri irashivantite tsaroventajianaca guintenijiatsica Peregamoqui, pincante:

Iriraquea ashincaroca itsaampsntsamenirite mavite otsaampinam-pitaque icanti: <sup>13</sup>Notsaquea quero piguinentijiac, manaquea pichoocajaque oraniqui imajirontacagueti Satanashi, piguinentimojiacari majirontajiacarica, cotanquitsi namenajiaquempi picancaniquea quisho poajiaquena poguijatacomajajianaquena. Teequea povashiantajigueroji paventashirentaquena irosati imetojajivecarigueti Antipashini oraniqui piguinenti qui isavicaventa-vaequenagueti itsavetacotantavaeguitanani.

<sup>14</sup>Cotanquitsiquea choocatiraja aparopae noncantomajimentajiaquem-pica, namenaquetarite piconoagarantajiac teequea pimpishoncrajigueroji itsatacaantica Varaameni. Iriraquea Varaameni iriotaquequea cantaquerica Varacani coramani incovaeguishetacaajiaquempariquea ishiraerijia, jero ishecatacaantantajiacarica iteshi viratsipae ijitorejacaantajiaquenerica irojocajiquenerica ipeashiguetacaca irioshivijitashijiacaca intati. Aisa icantajiaqueriquea cameetsavaeque incantatsajiaqueroquea manquigaren-tsijia.”<sup>n</sup> <sup>15</sup>Aisa piconoagarantajiac teequea pinintajigueji pimpishoncrajigueroji itsatacaantamampeajiacaca

**m 2.11** *mavitetapojsineca metojagantsi*. Irirajia atsipejiaquemparoneca icantajitica “mavitetapojsineca metojagantsi” irantsipeguitempani camorecariqui. Pamenero aisa 20.6, 14; 21.8. **n 2.14** Nm. 25.1-3.

nicoraitaja.<sup>o</sup> <sup>16</sup>Irootaquequea nocantantajiaquempica pincantashitatajianajempajate. Aatogueti picantashitatiatjiga noncoraquetaquitequeate noncatsimajiaquieri quempejiguiroca imaica, nashimirintantajiaquemparie quea notsaampsantsamenirite novagantequitica.

<sup>17</sup>Choocagueti guempitatanquitsica iintsijsa inquemeja icantajiaquerica Ishire Aapani Irioshi tsaroventajatsica. Quericaca tampishitashijiaqueroneca maasanopae coraquetashijiaquerineca nojocaqueneri irishecaquemparoquea manaa caarica inejajiti. Aisa nojoquitenempariquea quitamaropiri mapi tioncanquitsica iroaqueraro ivajiro teeca intsajiteroji, iriguenti tsataquerone iriratica ashinquemparoneca.<sup>p</sup>

#### Itioncajiaqueneri tsaroventajjatsica guintenijiatsica Tiatiraqui

<sup>18</sup>“Imaica pintionqueneri irashivantite tsaroventajianaca guintenijiatsica Tiatiraqui, pincante:

Iriraquea Irijanite Aapani Irioshi chocatanquitsica iroquija quempecaroca omorequigueti paamari, aisa iguiti tsirencavaetanquitsica quempecaroca yamecantajitarogueti cavorejatatsica voronquise icanti: <sup>19</sup>Notsamajaqueroquea maasanopae pantajiaquea. Notsaque pipintsatantajianaca, aisa paventajiaquenaquea pitsaroven-tajiaquena. Aisa notsaque picavintsa-javaequeriquea papitsaroventarijate manaquea patsipeventamajatanaque-naqueate teequea pimpeacojiguenaji. Pantajiaquea imaica anaavaetana-

queroquea pantajiaquea iroaqueragueti.

<sup>20</sup>Cotanquitsiquea ochoocae aparo noncantomajimentajiaquempica, namenaquequeate teequea pincantimate-roji oratica manquigarentsi Jesavere cantamampeatsica: ‘Naroguenti tsavetantiroca icanquenaca Aapani Irioshi’, cotanquitsiquea manaquea amatavijajiaqueri naajanirejia ocantajiaqueri incanta-tsajiaqueroquea manquigarentsijia, aisa ocantajiaqueri cameetsavaeque irishecajiaquempari iteshi viratsipae ijitorejajiguetinirica irojocajiquenerica ipejaigue-tica irioshivijitashijiguetacaca intati.

<sup>21</sup>Noguijaveguitaroni oncantashitatiana-jempame ompishoncanajeromequea maasanopae opeacaagushevaetacaca, cotanquitsiquea teequea oninteji.

<sup>22</sup>Imaicaquea nojouquijitacaquemparo-quea antsipevaequempaquea querocom-pate oncotajempani. Iriraquea tsipatsipa-tacaroca icovaeguishejiacagueti ariquea nonquejetacaajiaquempari iriatimpajia aisa. Aatogueti ipishoncija-najirotsi ipeacaagushejiacaca, nantsipe-tacaajiaquempariquea. <sup>23</sup>Aisa nometo-ji-tsitaqueroquea irijanijate<sup>q</sup> cameetsaniji intsajiaqueniji maasano tsaroventajjatsica querocagueti inchoocajiavequempa naatimpa naroguenti amenashirentajiguiri. Notsamajaqueroquea maasanopae iquenquejajiguica. Noncavintsa-jantajiaquemparica maasano comajamajajia-tsica, aisa noncatsimajiaqueriquea maasano peacaagushecaroca covaeguisherentsi.

<sup>24</sup>Cotanquitsiquea piconoagarantajiacava-avatimpajia Tiatiraquitica teequea pinquemisantajigueroji otsatacaajiaquerica amatavimatavi-

<sup>o</sup> 2.15 *nicoraitaja*. Pamenero 2.6. <sup>p</sup> 2.17 Eeq. 16.14-15, 33-34; Jn. 6.48-50.

<sup>q</sup> 2.23 *Irijanijate*. Icanquegueti “irijanijate Jesavere”, iriguentiquea icantacojiaque maasano guijatacojiaqueroca otsatacaantaquea Jesavere.

vaequeca, aisa teequea pimpeacaagui-shettempojo maasano ipeacaaguishejiacaca oraqua icantajitica 'isenacaguishemajataqueca Satanashi'. Aato nocantajiguimpi aviatimpajia.

<sup>25</sup>Cotanquitsiquea pincoquempanija pinquempejiaquempa imaica pintsaroven-tajiaquenajate arejevaetapoja-jempa noncoraquetantajempaca.

<sup>26</sup>Quericagueti tampishitashijia-queroneca maasanopae coraquetashijiaquerineca, aisa incomajamajaquem-pagueti irinetsanamajaqueroquea maasanopae nonintaguetica arejevae-tapojempagueti onteroncantapojem-paca, nompeacaquempari imajiro-jiate maasano caquinteguetatsica quintenijiatsica quepatsiqui. <sup>27</sup>Quero-cagueti icoquenani naatimpa Aapani ipeacaquenagueti Majirontamajata-tsica, ariquate nonquempetaca-quempari iriatimpa. Irimajirontanta-quemparo imajirontaquijire ipeacaaji-taca cavorejari quishomajatatsica,<sup>r</sup> iragavejaqueriquea maasano teeca inquemisantajiqueriji; interoncajia-queriquea inquempetacaquemparo-quea iporocajitirogueti chomo. <sup>28</sup>Aisa nojocaueneri shigompiri conijata-tsica pitsecaguitetirajagueti.<sup>s</sup>

<sup>29</sup>Choocagueti guempitatanqui-tsica iintsija inquemeja icantajiaque-rica Ishire Aapani Irioshi tsaroventaj-iatsica.

### Itioncajiaqueneriquea tsaroventajjatsica guintenijiatsica Saririshi qui

**3** <sup>1</sup>"Imaica pintionqueneri irashivan-tite tsaroventajianaca guintenijia-tsica Saririshi qui, pincante:

<sup>r</sup> 2.27 *Irimajirontantaquemparo imajirontaquijire ipeacaajitaca cavorejari quishomajatatsica.*

Irooqua oncanque intampishitashimajaqueroquea irimajironquempagueti. Pamenero Sar.

2.9. <sup>s</sup> 2.28 Pamenero 2 Pe. 1.19; Yonig. 22.16. <sup>t</sup> 3.1 *Iriraquea tigarancaquerica.* Irio

Jesoshi tigarancaquerica irirajia jeocajianquitsica aisa impoquiropae. <sup>u</sup> 3.1 *jeocajianquitsica.* Pamenero otsapa 1.4 ovegaravanapojacagueti ocamantacotaquerigueti jeocajianquitsica.

Iriraquea tigarancaquerica<sup>f</sup> irirajia 7 jeocajianquitsica<sup>u</sup> irashi Aapani Irioshi, aisa irirajia 7 impoquiropae icanti: Notsamajaqueroquea maasanopae pantajiguica. Notsaque yamenajivetaquempiquea aviatim-pajia tsaroventamajajati-sica icantaco-tantajivequempica 'Anijashireri', cotanquitsiquea naatimpa namenajia-quempi teequea pintsaroven-tamajaji-guenaji, quempeca jac metoajia-quempi. <sup>2</sup>Iintsishatsi pintinajanaque-shiatsi, pintampishitashivaetavaquero-shiatsi tequeratadiraj pimphisonca-majaterojo pitsaroven-tajiaquenagueti aatonijite pipeacojianajarotsi maasanopae. Namenaqutarite teequea pinetsanamajaterojo inintaguetica Aapani Irioshi.

<sup>3</sup>Iintsijate pinquenquejajieroja Noguenquetsatsare piquemajaivecaca, pinquemisantamajateroje, pincanta-shitatiajianaquempaja. Aatogueti pitinajatsi noncoraquetashijiaquitempi noncomirejacaapojempi nonquempetapojaquempari yaitsitantigueti aitsitan-tatsica, aatotarite pitsajiguitsi querocaca noncoraquetantajempaca.

<sup>4</sup>Cotanquitsiquea ichocagarantaque aparopae conoaconoaiquempica Saririshi qui icocani icomajamajajiac, quejetacaquea tee incantaitejigueroji iitsaare. Oncoramanitapojaquetu iriatimpajia inquitsajiaquemparo-quea quitamarorimajaca quitsarentsi, ariquate noncoquempani nontsipatsi-paitanaquempari, icomajamajacatarite itsaroven-tamajaqueate. <sup>5</sup>Taacagueti tampishitashijiaqueroneca maasanopae coraquetashijiaquerineca

inquejejiaquempariquea iriatimpajia, incoquempani inquitsaaquemparo- quea quitamarocantari quitsarentsi. Aatoquea noshetsitajiri ivajiro itionca- cojiquerigueti jenoqui paperiqui itioncacotantajiguecaroca ivajiro pae maasanopae incoquempanica inchoo- caguiteni, manaquea nonquenquetsa- tacoventaqueperi noncanqueriquea Aapani aisa irashivantijite: Naroguenti ashincari.

<sup>6</sup>Choocagueti guempitatanquitsica iintsija inquemeja icantajiaquerica Ishire Aapani Irioshi tsaroventajia- tsica.

#### **Itioncajiaqueneriquea tsaroventajiaitsica guintenijiatsica Pirarerepiaquei**

<sup>7</sup>“Imaica pintonqueneri irashi- vantite tsaroventajianaca quintenijia- tsica Pirarerepiaquei, pincante:

Jeroquea icanqueca iriraquea teeca incovaeguishetimatemppaji, iriotari Iriomajaca, iriguenti ashincaro iyavine Majirontatsica Taavini. Taaca opajitapae intanare- jaque iriatimpa aatoquea yagaveja- jiti irashijitajero, aisa taaca opajitapae irashitaque aatoquea yagavejajiti intanarejajitajero. Iriatimpa icanti: <sup>8</sup>Notsamajaquerou- quea maasanopae cameetsagueta- tsica pipeacaajiacaca. Pameneroja, jero sotomorontsi notanarejaquem- pica, aatoquea yagavejajiti irashita- jero. Notsaquempiquea teequea pintampishijavetempaji, cotanqui- tsiquea piquemisantajiaqueroquea Noguenquetsatsare pinetsanata- quero, aisa teequea pimpashivent- caajiguenaji, tee pincantacotenaji: ‘Tee notsateriji.’ <sup>9</sup>Choocaquea oraniqui igapiocene Satanashi. Iriatimpajia iriguentijia tsojentti,

icantajiaqueterite: ‘Naroguentija joriojia’, cotanquitsiquea teequea irio joriojia. Jeroquea oncoramani- tapojajegueti namajiaqueriquea picapiocapinijiacaguetti noguerota- caitsitempariquea pichoocajiaque- guetti aviatimpajia cameetsaniji intsajianaquenijite arimajaca nopintsamajajiaquempi. <sup>10</sup>Patsipe- tacojiaca pinetsanamajajianaquero- quea nocantajiaquempica. Iroota- quequea nonquempoguijacotantajia- quempica aatonijite patsipemajaji- atsi oncoramanitapoajegueti irantsipejiaquempagueti maasa- nopae quintenijiatsica quepatsiqui iramenantajitaquempari arimajaca itsaroventajiaquenaqueate. <sup>11</sup>Iroo- shipoji noncoraquepojaje. Quisho poguero piquemisantaqueca aatoniji yovashiantacaajitimprotsi, oqueje- tacotimpitsi iraitsijitaquempiro pamatsaero irojocaqueempimeca Aapani Irioshi. <sup>12</sup>Taacagueti tampishitashiguequeroneca maasa- nopae coraquetashijiaquerineca incoquempani inchoocaguiteni iteemporotequi Aapani Irioshi, inquejveticaquemparo omapipoate choocaguitatsica, aatoquea yogajaatsi osamani. Nontionca- quero ivajiro Aapani Irioshi ivancaqui aisa ovajiro iroqueraro Jerosare, iroguenti quinteninintsi irashimajaca Aapani Irioshi. Iroatimpa manaquea onquenapoje inquitequi Irioshi qui oncoraqueta- quequea ocaniqui isaviji. Aisa nonquejetsitemparoquea iroquaera- tajatsineca novajiro nontionquitem- paroquea ivancaqui.

<sup>13</sup>Choocagueti guempitatanquitsica iintsija inquemeja icantajiaquerica Ishire Aapani Irioshi tsaroventajia- tsica.

**Itioncajiaqueneriqueua tsaroventajatiatsica  
guintenijiatsica Iraoriseaqui**

<sup>14</sup>“Imaica pintonqueneri irashivantite tsaroventajianaca guintenijiatsica Iraoriseaqui, pincante:

Jero icanqueca iriraquea icantatica ‘Amen’,<sup>v</sup> icocanitari itampaticamajaqueroquea maasanopae, teequea iramataguempaji. Iriotaquequea pariacaroca maasano ipeacaantantacaca Aapani Irioshi. Imaica icanti:  
<sup>15</sup>Notsamajaqueroquea maasanopae pipeacaajiacaca teequea povashiantamajatenaji pitsaroventavequenagueti, cotanquitsiquea aisa tee pintsaroventamajatenaji. Nonintaveca pintsaroventamajataquename. Teegueti pininteji, aato pitsaroventana. <sup>16</sup>Imaicaquea piquempetaquerogueti, irootapoji nompishonquempi, irootiji tee pintsaroventamajatenaji aisa tee povashiantamajatenaji. Manatari intati noncamarancaquempi. <sup>17</sup>Aviatimpajia picantajiavecqueate: ‘Naroguenti ajaarantajiatsica, nocapiovacaequero nashintaguecaca, teequea noncoguitejacotimatempaji’, cotanquitsiquea teequea pamenimajiguempaji aviguentijia shimampojancari, ishimampojancacojitacaca, aviguentijia coguitejacovaetsatsica. Aisa manatari pishamponcajashirentavaeque, manaquea cajaratsinoshirentavaequempi. <sup>18</sup>Irootaquequea noncantantajiaquempica povegaratsitenaro nashincaca naatimpa, naatimpaquea nojocajiaquempironijite oromajaca itajaiqueca paamariqui osaancorencantamajatantanacaca, pajaarantamajatimentanaquempaniji.

Aisa povegaratenajate naatimpa nojocajiaquempiroquea quitamaromorenari quitsaarentsi pinquitsaajiaquempaca aatonijite pipashiventacijaajarotsi pigajaratsinore. Aisa povegaratenajate naatimpa, nojocajiaquempiroquea aaavintajarontsi paavintajatacaantantajajempaca cameetsaniji pamenmentanajeniji.

<sup>19</sup>Iriraquea nopintsamajajiacaca noncantomajajiaqueri cameetsaniji intsaroventtamajatanaquenaca. Noncantantajiaquempica pishimampojancajiguempaja pamenajiaquegueti picovaeguishejiaca, pincantashitatiajia-najempajate pincoquempani pintsaroventamajatanaquenajate. <sup>20</sup>Pameneja. Nocatiapojaca sotomorontsi qui notinquiapojaquero nocajemacotapojojimpi. Quericaca quemavaquenaneca iroompapequa intanarejacotsitenaqueate, nonquijanaquequea nontsipatapojempari noshecajiaquempsa.

<sup>21</sup>Taacagueti tampishitashijiaqueroneca maasanopae coraquetashijiaquerineca nontsipatsipaitanaquempari jenoqui noguisavisaviitaqueriquea irisenampijajiaquena nomajirontamentoqu. Inquempemajajiaquenaqueate naatimpa notampishitashiguetirogueti maasanopae, jero iriraquea Aapani yoguisavicaquenaca nosenampijantacarica imajirontamentoqu.

<sup>22</sup>Choocagueti guempitatanquitsica iiintsija inquemeja icantajiaquerica Ishire Aapani Irioshi tsaroventajatiatsica.”

**Ishineventamajajicari Aapani Irioshi inquitequi**

**4** <sup>1</sup>Iroompaquea namenavetaja namenitsitaroquea ashitacorontsi tanarejamoroca inquitequi. Noquemitsi-

<sup>v</sup> 3.14 Amen. “Amen” ocanque “arimaja” aisa “ari oncoquempsa”. Acanqui iroguenti otsipa ivajiro Quirishito, ocanque “Iriomajaca”, itampaticamajaquerotari maasano icanqueca.

tariquea aisa quenquetsatacaaquenaca incajaranquitica iririjencavaequea icanca quempejencavaeca tivorentsí, icanquena: "Caacate ocaniqui jenoqui nonigaaguequempiroqueate queroca oncoguetanaquempani oncoramanitapojagueti."

<sup>2</sup>Irooqua iteroncaquerogueti iquenquetsatacaaquenagueti, iriraquea Ishire Aapani Irioshi yaashirentavaetanaquenaqueate inquitequi. Namenitsitaroqueate imajirontamento isavictacaca Majirontatsica ariquea ochooaque oraniqui, ichoocaque savicantacaroca. <sup>3</sup>Iriatimpa itsirencavaeque icanca quempevaeca mapi tsirencapiri pajitatsica jaashipe aisa otsipa mapi quityoncapiri pajitatsica coronarina. Chooca anquirivogaacaroca isavictacaca, manaquea oquejevecari yogue tsirencavaeque quempevaeca tsirenenquigueti janapiri pajitatsica esemerarera. <sup>4</sup>Aisa namenaguequieroqua otsipapae 24 majirontamentontsipae. Manaquea anquitsaetacocaroqua isavictacaca Majirontatsica. Isavisavitantacaroca 24 iramajirorejia quitamarocantavaequea iitsaare. Yamatsaejiaqueri amatsaerontsi ipeacaantantajitarica ooro. <sup>5</sup>Oraquea imajirontamento isavictantacaca Majirontatsica otimemecantapinicaroquea caretí ocantapinique timemec timemec, aisa ocantavaetaquiti serororon serororon tsijec tsijec. Aisa ochooaque osamimicaguetaque 7 tsivorentsí, ocantacoqueri irirajia 7 jeocajianquitsica<sup>w</sup> irashi Aapani Irioshi. <sup>6</sup>Arikea ochooaque aisa oraniqui quempevecaroca incajare saancorencajvaeque, quempetaca potirinaqui, otampatiacatacotacaro majirontamentontsi.

Oraquea isavictacaca Majirontatsica yanquitsaetacojiacaro 4 anijaripae,

yoquijaquiaavaeca iroquijapae ochoocaguetaque ineguiqui aisa itaquiqui. <sup>7</sup>Aparo manaquea iquempetacari león.<sup>x</sup> Iriraquea itsipa manaquea iquempetacari caapironcaari iriaqueraca quimogantirenajaniquitandiquitsica.

Iriraquea trestapojatsica caquintevoravaetaque. Iriraquea itsipatapojatsica manaquea iquempetacari shirompito icantashivanquitigueti iraregueti.

<sup>8</sup>Irirajia 4 anijaripae maasano ochoocaguetaque 6 ishivanquipae, ocaravaetaquea iroquia yoquijaquiaatsinovaeca maasanopae aisa itapinashivanquipaequi. Icantacoguitani savincaguitiriqui aisa pitsecariqui teequea incarajiegeui icantajiaque:

"<sup>9</sup>Iriomajaca, Iriomajaca, Iriomajaca Nomajirote Aapani Irioshi Agavejamajatatsica!  
Icoguitaniquea ichoocaguitini coramani, chooca imaica, ari incoguitampani inchoocaguiteni."

<sup>9</sup>Ari iquempelinjiaca ishineventajiacari irira savicanquitsica imajirontamentoqui, icoguitanitari ichoocatini coramani aisa incoguitampani inchoocaguiteni. Icanqueriquea: "Ariotesaa, poganejencamajataca." <sup>10</sup>Arikea icantajiaqueguedi imaica, irirajiaquea 24 iramajirorejia ariqueate icohipitanaca iguerogueroventajianacari savicapinitatsica imajirontamentoqui itsaroventajianacari, iriguentitari Majirontamatatatsica choocaguitatsica, incoguitampani inchoocaguiteni. Yamatsaerejitsitaro iramatsaerojia yojoquijijiaqueneri icaraguitapajoqueguedi, icantajiguiri:

<sup>11</sup>"Nomajirote Aapani Irioshi, caaviji poganejencamajataca, ocameetsatantacaca noshineventajiaquempi, ochoocaquetarite

<sup>w</sup> 4.5 *jeocajianquitsica*. Pamenero otsapa 1.4 ovegaravanapojacaguetaque ocamantacotaquerigueti *jeocajianquitsica*. <sup>x</sup> 4.7 Irira león iquejevecari casecari. Pamenero itsavetacojiquerigueti león isavivanaqui otsapaqui 5.5 aisa 10.3.

poganejencare, Pirioshimajati,  
aisa caaviji pagavejamajati.  
Aviguentitarite peacaaguetacaro  
maasanopae choocaguetatsica,  
Aviguentiquea nintanquitsi  
pipeacaantantaguecarica,  
irootaquequea ichoocatantajia-  
caca.”

**Paperi ampinaicanquitsica aisa  
Ovejajaniqui**

**5** <sup>1</sup>Ariqueate nameniroquea paperi ampinaicanquitsica otioncaca mavisotate. Iriraquea savicanquitsica imajirontamentoqui manaquea yajiricancaro itincamijempequiqui. Ochoocaque 7 ovinchajacore otsinetacottantacaca iseyotacotantajicaroca aatonijite yampinaicarejajitrotsi. <sup>2</sup>Iroompaquea nameniri irashivantite Aapani Irioshi caaviji yagavejamajati. Icajemaquequea iririjencani icanti: “¿Queri caavijica yanaaque yoganejencavaeca intsinecarejacoguequeronijite ovinchajacoseyote paperi irampinaicarejaqueroniji?” <sup>3</sup>Cotanquitsiquea teequea inchoocateji agavejanquitsineca intsinecarejacotaqueroquea irampinacarejaqueroquea iramenavanquero. Teequea iragavejajiguempaji choocajatsica inquitequi aisa quepatsipaequitica iriguentijiaca aisa choocajanquitsica isavipatsaqui. <sup>4</sup>Niraitsitanacaquea niraaguitani namenaquegueti teequea inchoocatimateji aparo cameetsmajatsica cameetsaniji iragavejaqueroniji irampinaicarejaqueroquea iramenavanqueroquea. <sup>5</sup>Cotanquitsiquea iquenquetatsatacanauquena aparo iramajirore icanti: “Aatotarite piragtsi. Pamenerija

iriratica León<sup>y</sup> ichoviquitanaqueca Joraani, aisa iriguenti ichoviquitanaqueca Taavini. Yanaajiaqueriquea maasano. Iriguentiquea agavejamajatsica. Iriatimpa iragavejaque intsinecarezacoguequeroqueate 7 ovinchajacoseyote irampinaicarejaqueroquea.”

<sup>6</sup>Iroompaquea nameniri Ovejajaniqui icatiaca oniganquirequi majirontamentontsiqui yanquitsaetacari irirajia 4 anijaripae aisa iramajirorejia Majirontatsica. Conijavaequequea isatajajitaquerigueti imetojajivecarigueti. Ochoocaque ocarataque 7 ivaa, oraquea iroquija 7. Oraquea 7 iroquija iroguenti ocantacoque irirajia 7 jeocajianquitsica<sup>z</sup> irashi Aapani Irioshi itigarancajaqueca intsitacaguitejavaetanaqueroqueate quepatsi. <sup>7</sup>Ariqueate iriraquea Ovejajaniqui yoanaque yaitsitaroquea paperi yajiricaqueca Majirontatsica itincamijempequiqui isavicaquegueti imajirontamentoqui. <sup>8</sup>Irooquea yajiricajuitiguro ariquea iquempejianaca irirajia 4 anijaripae aisa irirajia 24 iramajirorejia Majirontatsica igueroventajianacari Ovejajaniqui. Aparopae yajirijiriitaque itencatsajitica icantajitica aarepa aisa taso ipeacajitaca cavorejari ororo tseraiquivaeca casancapaneri itajaitica. Oraquea casancapaneri iroguenti oncantacoque icantajiaqueca tsaroventajiacarica Aapani Irioshi iramanajiaquerigueti. <sup>9</sup>Yamashajiaquequea iroaque-raro amashairentsi icantajiaque:

“Caaviji poganejencamajataca pagave-jantacaca pajiricancaroca paperi, aisa pintsinecarejacotaquempa-ro ovinchajacoseyote iseyotacotantajicaroca.

**y 5.5 León.** Irira león iquejevecari casecari, cotanquitsi ichoocaque otsipaqui guinentinintsi, quejecaroca Africaqui aisa Ishiraeriqui. Yanaaqueri itsipapae tomirishiquitica icovejencatigueti, irootaque icantajitacarica covejencamajatatsica imajirote tomirishipaequitica. **z 5.6 jeocajianquitsica.** Pamenero otsapa 1.4 ovegaravanapojacaguetti ocamantacotaquerigueti jeocajianquitsica.

Imetojajitaquempitari ochovivinca-jatanaque piriraja,  
irootaquequea pivegaratantajia-cari caquintejia pimeshiajia-queca irashintajajemparinijite Aapani Irioshi.

Pimeshiagarantajiaqueriquea maasanopae caquintegueta-tsica, gonorontavacaagueta-tsica, cantashitatiagueta-tsica iguenquetsatsarejia, aisa guinetiguetatsica quepatsipaequi.

<sup>10</sup> Pipeacajaiacari majirontaguetatsica, aisa pipeacajaiacari saserotejia cameetsaniji irantaquen-riji Aapani Irioshi.

Iriguentijia majirontanquitsine quepatsiqui.”

<sup>11</sup> Iroompaquea namenajiguiri irashivantijite Aapani Irioshi itiroren-cajianaca icaramirincavaeque jmm ontaniqui, yanquitsaecari irirajia anijaripae aisa iramajirorejia Majirontatsica. Noquemajiaqueri iquenquetsajia-quegueti. <sup>12</sup> Iririjencavaeque icantaji-aque:

“Caaviji yoganejencamajataca irira Ovejajaniqui imetojajivecaca, ocameetsatantacaca ochooqaque iragavejane, ochooqaque maasano yashintavaetacaca, ochooqaque itsamajare, itampishire, iroganejencare, itsaroventajitari, ishineventajitari icantajitiri: ‘Caaviji poganejen-camajataca!’”

<sup>13</sup> Iroompaquea noquemajiaqueri maasano choocajitsica inquitequi, quepatsiqui, isavipatsaqui, inirojaniqui quentijani, maasano icantaji-aque:

“Jaameja ashineventajiaquempari savicanquitsica imajirontamen-toqui aisa Ovejajaniqui, ancantajiaqueri iriguentijia caaviji yoganejencamajataca, aisa yagavejamajati. Ancoguitempanjate anquempeta-quempaquea imaica.”

<sup>14</sup> Iriraquea 4 anijaripae icantajiaque: “iAri ancoquempanijate!” Iroompaquea iriraquea 24 iramajirorejia Majirontatsica Anijaguitatsica iguerogueroventanacari itsaroventajianacari.

Itsinecarejacotaqueroquea paperi ampingaicanquitsica

**6** <sup>1</sup> Iroompaquea nameniri Ovejajaniqui itsinecarejaquero aparo ovinchajacore iseyotacotantajivecaroca paperi ampingaicanquitsica, aisa noquemiriquea aparo anijari iririjenca-veque icanca quempejencavaeca caretii, icanti: “iCaacatejate!”<sup>a</sup> <sup>2</sup> Namentanaca iriguentimpa quitavaireri quitamarori. Iriraquea shiacotantacarica yajiricaque iveane. Ariquea yojocajiqueneri amatsaerontsi iramatsaetaquempaquea. Teequea inchoocatimateji agavejaquerineca. Iroompaquea yoanaque irashimi-rintaquempaqueate iragavejantaque-quea.

<sup>3</sup> Ariquea iquempetsitajaro Ovejajaniqui otsipa ovinchajacore iseyotacotantajivecaroca, itsinecarejaquero mavitata-pojatsica, iroompaquea noquemiriquea itsipa anijari icanque: “iCaacatejate!”

<sup>4</sup> Ariquea isotoapojaque itsipa quitavaireri, iquityoncavaeque icanca. Iriraquea shiacotantacarica manaquea icantajiqueru iroanaquequea quepatsiqui irooqueate ompampiatantanaquemparo-

<sup>a</sup> **6.1** Oconoaca paperi iroquetinica iguenquetsatsarequi guiriego otioncaca acaniqui: “iCaacatejate pamenejate!” Otsipapae mana otioncaca: “iCaacatejate!” Ari oquejetaca otsapaqui 3, 5, 7 otioncacagueti: “iCaacatejate!”

quea incatsimatavacaantajiaquempaca maasano, irimetojavacaajiaquempageate. Arikeate yojocajiqueneri catsantsameniri tsaampitsantsameniri.

<sup>5</sup>Iroompaquea iquempetsitajaro Ovejajaniqui otsipa ovinchajacoseyote, itsinecarejaquero trestapojatsica, arikea noquemiriquea iquenquetsatanaque trestapojatsica anijari icanque: “¡Caacatejate!” Namenitanaca iriguentimpa quitavaireri quisaatsantsavaeque icanca. Iriraquea shiacotantacarica yajiricauero itsatantajitaroca otenare. <sup>6</sup>Noquemiquea iquenquetsajencajitanaque ichoocajiaquegueti iriraj 4 anijaripae icantajique: “Apatacoro shovao tirigoitsoqui ovegaravaeca aparo tenario,”<sup>b</sup> arikea oquejetaca trestaco shovao sevaraitsoqui, ovegaravaeca aparo tenario. Iriraquea ashiti aisa vinoja, shooshoh pipomatsatiotsishatsu.

<sup>7</sup>Arikeate iquempetsitajaro Ovejajaniqui otsipa ovinchajacoseyote, itsinecarejaquero cuatrotapojatsica, arikeate noquemiriquea iquenquetsatanaque cuatrotapojatsica anijari icanque: “¡Caacatejate!” <sup>8</sup>Namenitanaca iriguentimpa quitavaireri quiteshivaari icanca. Iriraquea shiacotantacarica ipajita Metojagantsi. Yoguijatapojiri itsipa pajitatsica Areshi.<sup>c</sup> Yagavejacaajiqueru irimetojajiaqueru oshequini quepatsipaequitica incaratacaavaequeri 1/4. Inconoagarantajiaquempaquea irimetojantajiquempari tsaampitsantsameniriqui, itsipapae manaquea ometojagarrantajianaqueriquea itase, itsipapae manaquea ometojagarantajianaqueriquea irojouquijire, itsipapae iringuate-

metojagarantajiaquerine tomirishipaequitica catsimaguetatsica.

<sup>9</sup>Iroompaquea iquempetsitajaro Ovejajaniqui otsipa ovinchajacoseyote iseyotacotantajivecaroca, itsinecarejaquero cincotapojatsica, arikea namenaqueroquea aretare. Oraqueate otapinaqui namenajiaqueri ishirepae imetojimentajitaqueca Iguenquetsatsare Aapani Irioshi aisa itsavetantajiaquerigueti. <sup>10</sup>Iriatimpajia icajemajianaque icantajique: “Intsiquetiroshia Majiron-tamajatatsica Comajarimajaca Iriomajatatsica, iquieroshiatsi oncaravaeteni pompetacovaetajenani pincatsimajajeri guintenijiatsica quepatsiqui metojajiavequenaca?” <sup>11</sup>Iriatimpajia yojocajiaqueri quitamarocantari quitsarentsi, iroompaquea icantajiguiri: “Pogujacoji-guempataja, choocatarite papiajanirentsijiate papitsaroventarijiate quempejia-quempineca aviatimpajia, irimetojimentajiqueriquea intsavetacotantajiaquenagueta. Oraquea inquempetacaajitajempa-riqueti iriatimpajia, arikea nometacostsijiguempiqueate.”

<sup>12</sup>Arikeate namenajqueri Ovejajaniqui iquempetsitajaro otsipa ovinchajacoseyote, itsinecarejaquero seistapojatsica, arikea octanaca omoguecamajatiguinimaja. Arikea icotanaca catsirinaiteri icamaramentatanaque iquempetanacaroquea quitsarentsi ipeacaajitaca caaveramae camaramae-vatatsica. Iriraquea taai iquityoncamentatanaque iquempetanacaroquea irajantsi. <sup>13</sup>Iriraqueate impoquiropae inquitequitica yasacaraaguetanacaquea quepatsiqui iquempetanacaroquea osacoroguitigueti iguera iroshivetapo-

**b 6.6 tenario.** Iriraquea tenario iriguenti imentaqui yaancaca ishiacoquegueti icantacoguitani apajencaro savincaguiteri. Tee onchocamajatajeji isheca, irootaquequea ovegaravaetantacaca chocatajatsica. **c 6.8 Areshi.** Oraquea Areshi iroguenti ichoocajiaquegueti metojatsica tequeratagueeti impishoncrajiteriji camorecariqui. Irira guiriego icanquero *hades*, iguenquetsatsarequi evereo icanquero *sheol*.

jacagueti agaguijempame onincacogueti  
tirogueti inirojenca choviga.<sup>14</sup> Oraquea  
inquite jac opeaca oquempetanacaro-  
quea yampina Cajitirogueti paperi.  
Oraquea maasano otsempipae aisa  
ovogorepae ogaaguetanaca.<sup>15</sup> Arikea  
ishiashiaitanaca maasano majirontague-  
tatsica, jeri aisa imajirojiate coaretajia,  
aisa jivajivaitatsica, ashintavaejati-  
sica, agavejavaetatsica, yashintajitaca, jeri  
aisa teeca irashintajitempariji. Ishiashia-  
itanacaquea maasano caquinteja,  
yaventaventaventanacarquea  
omoroguetacagueti quepatsi aisa  
imperitamoropaequi aisa mapichonquii-  
napae otsempipaequi.<sup>16</sup> Iquenquetsajia-  
naque icantajiguero otsempipae aisa  
mapipae: “iPoaviatocotenashiat-  
sitsitacojiaquenaquea aatoniji  
yamenajajanatsi Majirontamajatatsica  
savicanquitsica imajirontamentoqui,  
aisa aatoniji icatsimacatsimaitana  
Ovejajaniqui!<sup>17</sup> Arejetapojacatarite  
savincaguiteri incatsimatantajiaque-  
queate. ¿Quericampate agavejanquitsi-  
neca intampishitashivaetavaquero?”

**Iseyovancatsitantajitarí ivajiroqui Aapani  
Irioshi 144,000 ichoviquijianaqueca  
Ishiraerini**

**7** <sup>1</sup>Iroompaquea namenajaqueri 4  
irashivantijitete Aapani Irioshi  
aparopae icatiaguetacaquea ocarata-  
pojigueti quepatsi osotoajencagueti-  
gueti chovigapae. Yojocaajencatava-  
queroquea aatoniji ochovigajencata-  
jitsi quepatsiqui, aisa inirojaniqui  
quentijani, irooca aisa inchato-  
paequi. <sup>2</sup>Arikea nameniri itsipa  
irashivantite Aapani Irioshi iquena-  
poaque isotoguigueti catsirincaiteri  
yajiricapojaqueroquea iseyone<sup>d</sup>

Aapani Irioshi anijatsica. Iriatimpa  
icajemacojiapojaqueri irirajia 4  
irashivantijitete Aapani Irioshi  
yagavejacaajiqueca incantashitatia-  
guishevaequeroquea quepatsi aisa  
inirojani quentijani, icantajiguiri:  
<sup>3</sup>“Aatotashiatsi queroca picojigui-  
rotsi quepatsi, aisa inirojanipae  
quentijani, aisa inchatopae, tequera-  
tanica aseyoterinica irajaanirejia  
Aapani Irioshi ivancapaequi.”

<sup>4</sup>Iroompaquea noquemiquea  
iquenquetsatacojiaqueriquea ichovi-  
quiguetanaqueca Ishiraerini  
seyojianquitsica ivancapaequi,  
icarajiaquequea 144,000 ichoviqui-  
guetanaqueca maasano irijanijate  
Ishiraerini. Itsajiqueru iquempeta-  
caajicari imaica:

<sup>5</sup> Iriraquea ichoviquijiani Joraani  
icarajiaque 12,000.

Iriraquea irashijia Iroveneni icaraji-  
aque 12,000.

Iriraquea irashijia Gareni icaraji-  
aque 12,000.

<sup>6</sup> Iriraquea irashijia Ashereni  
icarajiaque 12,000.

Iriraquea irashijia Nepetarini  
icarajiaque 12,000.

Iriraquea irashijia Manaseshini  
icarajiaque 12,000.

<sup>7</sup> Iriraquea irashijia Shimeoneni  
icarajiaque 12,000.

Iriraquea irashijia Irevini icaraji-  
aque 12,000.

Iriraquea irashijia Isacareni icaraji-  
aque 12,000.

<sup>8</sup> Iriraquea irashijia Savorooneni  
icarajiaque 12,000.

Iriraquea irashijia Joseni icarajiaque  
12,000.

<sup>d</sup> 7.2 iseyone Aapani Irioshi. Iroguentiquea itioncacotantajicaroca ivajiro Aapani Irioshi aisa  
ivajiro Ovejajaniqui ivancapaequi yashintajiacaca. Pamenero 14.1 aisa 9.4.

Iriraquea irashijia Vejamineni  
icarajaque 12,000.

**Quitsaajanquitsica quitamarocantari  
quitsaarentsi**

<sup>9</sup>Iroompaquea namenavetanaca  
namenisitari itsipapae caquintejia  
icaramirincajiaque jmm. Iquenaquenai-  
vaepojo osamanipaequi maasano  
quepatsipaequi, iconoagarantajiac  
maasano gonorontavacaaguetatsica,  
maasanopae caquinteguetatsica,  
ocantashitatiaguetacaquea iguenquetsa-  
tsarepae. Maasanomaja quenquetsatsa-  
rentsipae chooca quenquetsatantaca-  
roca. Iriatimpajia icatintiitimojiacari  
Ovejajaniqui aisa Aapani Irioshi  
savicanquitsica imajirontamentoqui.  
<sup>10</sup>iItirorencaventajianacari icaramirinca-  
vaeque jmm! Teequeate iragavejajite-  
riji intsajitajeriji. Ijamirincavaeque  
quitsaajiaca quitamarocantari quitsa-  
rentsi ajirijirijiaquequea tsorenashi.

<sup>10</sup>Ijamirincavaeque icajemajiaque  
icantajiaque:

“iIriguenti aavajajica Arioshite  
savicanquitsica imajirontamentoqui,  
aisa Ovejajaniqui!”

<sup>11</sup>Maasano irashivantijite Aapani Irioshi  
icatintiitacaquea yanquitsaetacotsitacari  
imajirontamento, aisa iramajiroejia, jeri  
aisa 4 anjaripae. Maasano iriatimpajia  
itigueroanaca irosati yarejevaequita  
ivancaqui isavi, itsariventajiacari Aapani  
Irioshi, <sup>12</sup>icantajiaque:

“iArimajaguitatsi!  
Ancoquempani ashineventaguitem-  
parini Arioshite, ancantaguiteri-  
niquea: Caaviji Pirioshimajati.  
Aviguenti caaviji pitsamajati.  
Incantajiaquempi maasano,  
“iArioteesaa! Caaviji picavintsa-

jantamajatanti”, aisa intsaro-  
ventanaquempi.

Aviguenti caaviji pagavejamajati,  
aisa aviguenti caaviji pitampi-  
shimajati.

iOncoguitempaniquea onquempeta-  
quempaquea imaical!  
iArimajaguitatsi!”

<sup>13</sup>Arikeate icanquena aparo iramajirore  
Aapani Irioshi: “¿Taa ipaji iriraja quitsaajan-  
quitsica quitamarocantari quitsaarentsi?  
¿Queroquea iquenaquenaipojini?”

<sup>14</sup>Naatimpa nocantiri: “Avirompate,  
nomajirote, pitsaquiero aviatiimpa.”

Iriatimpa icantana: “Iriguentijia  
sotoampojaroca omajirojencare  
atsipevaetagantsi, iroguenti yajacantaji-  
tacaroquea iitsaare iriraja Ovejajaniqui,  
oquitamarocantantanacaca.

<sup>15</sup>Irootaquequea icatintiitmotantaca-  
rica Aapani Irioshi isavicaque-  
gueti imajirontamentoqui,  
incoquempaniquea irantajigueneri-  
quea oraniqui iteemporotequi  
savincaguiteriqui aisa pitseca-  
riqui.

Iriraquea savicanquitsica imajiron-  
tamentoqui irinetsanatsitenem-  
pari intinerenquitsitenempari-  
quea iitsaarevanco.<sup>e</sup>

<sup>16</sup>Aatoquea yatsipevaetajarotsi itase,  
aatoquea imirejajitsi,  
aatoquea icatsirincatajiritsi catsirin-  
caiteri,  
aatoquea yatsipejajarotsi catsirinca-  
guiteri.

<sup>17</sup>Incoguitempani inquempejia-  
quempa imaica iroorijite  
inquempoguijajiaqueriquea  
Ovejajaniqui choocatantacaroca  
oniganquirequi imajirontamen-  
toqui Aapani Irioshi.

e 7.15 *intinerenquitsitenempari quea iitsaarevanco*. Irooqua oncanque incoquempani  
intsipatsipaitaquempari inquempoguijimenqueriniji aatonijite taaca oahoaitirtsí.

Iramenajiaqueri inquempetacaajia-  
quempari iquempoguijajitiri-  
gueti oveja, irajianaqueri  
omotojatigueti oja anijacaan-  
tantatsica.

Iriraquea Aapani Irioshi irisheoquiji-  
ajeneriquea maasano ijaquija,  
aatoquea ijaquitajitsi.”

### Sietetapojatsica ovinchajacoseyote paperi

**8** <sup>1</sup>Ariquea irooqua iquempetsitaja-  
roquea Ovejajaniqui itsinecareja-  
quero sietetapojatsica ovinchajacose-  
yote otsinetacotantacaca paperi, ariquea  
icohicoitanaca imajerejianaque maasano  
inquitequita yarejetacovaetapojaca  
niganqui hora. <sup>2</sup>Iroompaquea namenaji-  
aqueri 7 irashivantijite Aapani Irioshi  
icatintiitimojiacariquea iriatimpa,  
aparopae yojocajiqueneriquea  
tivorentsi. <sup>3</sup>Iroompaquea icoraquetapoj-  
jaque itsipa irashivantite Aapani Irioshi,  
yamaque yoguijaantajitaroca casanca-  
jencaro ipeacaajitaca ooro, icatiimota-  
pojacaroquea aretare ipeacaajitaca aisa  
oro. Yojocajiqueneri oshequi casanca-  
jencaro intaashiquerica Aapani Irioshi  
onconoajencatanaquemparoquea  
icantajiaqueca igomajamajare yamanaji-  
guirigueti. Itaantsitaroquea aretarequi  
tampaticatacotaqueroca imajironta-  
mento Aapani Irioshi. <sup>4</sup>Oraquea ovoga  
casancajencaro yajiricacotaqueca  
ashivanti ojajencavogavaequequea  
ocantajencavetañanaca ichoocaquegueti  
Aapani Irioshi, oconoajencatanacaro-  
quea icantajiaqueca igomajamajare  
yamanajiguirigueti. <sup>5</sup>Ariqueate  
iriraquea irashivantite Aapani Irioshi  
yaanaque paamarimenqui choocatan-  
quitsica aretarequi yoguijaquerorequea  
yoguijaantajitaroca casancajencaro  
yajiricaqueca. Irooqua itseraiquitaqui-  
tiguro ipishoncaquitiro quepatsiqui,  
ariegate ocotanaca caretí ocantavaeta-

quiti tsijec tsijec, serororo serororo,  
otsantsajencatsarenavaetanaque, aisa  
omoguecaguetanacaquea.

### Itivojiqueroquea tivorentsipae

<sup>6</sup>Iriraquea 7 irashivantijite Aapani  
Irioshi ajircacianquitsica itivorepae  
inetsanajianaca intivojianaquequea.

<sup>7</sup>Iroompaquea ijivatanaque aparo  
ashivanti itivotaque, ariqueate  
ocotanaca oparianaque incojariqui  
quepatsiqui otsipatanacaro paamari  
oconoapojaro irajantsi. Otaagarantsita-  
roquea quepatsi irootapoji oncaratacaa-  
querome niganqui, ocaratacaaquerotari  
1/3. Otaagarantsitaroquea inchatopae  
ocaratacaaquero 1/3, aisa maasanopae  
etsocoreshipae cataroshipae apevoquija-  
majaquero.

<sup>8</sup>Ariqueate itivotaque ashivanti  
mavitetapojanquitsica, ipishoncajajiquero-  
quea inirojaniqui quentijani taaca opaji  
quempetacaquea inirotssemi, osamimica-  
tsantsajencavetañanaquequea. Ariqueate  
ocotanaca inirojani quentijani opeagaran-  
tanacaquea irajantsi irootapoji oncarata-  
caaquerome niganqui. <sup>9</sup>Imetojagarantajia-  
naque guinentantajiacaroca ocaratacaa-  
vaequeri 1/3. Otsitijaagarantaguetaque-  
quea inirotsantsanapae quenajarontsipae  
ocaratacaaquero 1/3.

<sup>10</sup>Iroompaquea itivotaque ashivanti  
trestapojanquitsica, ariqueate ocotanaca  
yomposanaca caramenquivaetanquitsica  
impoquiro, iquenavaetapoji inquitequi  
imorecatsantsajencavetañanaquequea,  
yomposapojaca ojaaquipaequi aisa  
osotoajaguetigueti oja, yoaviojatapojaro  
ocaratacaaquero 1/3 ojaaquipae.

<sup>11</sup>Iriraquea impoquiro ipajitaca  
Quepishiri, iquepishijaagarantagueta-  
pajapiroquea ojaaquipaequi ocaratacaa-  
quero 1/3. Imetojantajiacaca icarami-  
rincajiaque caquintejia imirajiacaro-  
gueti quepishijatanquitsica oja.

<sup>12</sup>Arikeate itivotaque ashivanti cuatrotapojanquitsica, ipitsecanampitanaque catsirincaiteri, irootapojsati impitsecanaque niganqui, teequea irivoreamajatajempaji. Arikea iquempetaca taai ipitsecanampitanaque iriatimpa, irootapojsati impitsecanaque niganqui, teequea inquitasmajatajeji. Aisa impoquiropae ipitsecagarantanaque icaravaeque 1/3. Osavincaguivetamanaca icononcavetanajatiga opitsequitsitanaja. Teequea inquitaseteji taai, tee inquitamiriaquiteji impoquiropae. Pajini onianquitete iquitasepojo irira taai, iriraquea impoquiropae iquitamiriaquitapoji.

<sup>13</sup>Namenitsita iriguentimpa shirompito caramantaneivaeque icanca yaranaque iseontavaetanacaquea jenoqui icajemanaquequea icanque: "iOoo, ooo, ooo, imaanishiatsi irantsipevaetempanishiatsi maasano quintenijiatsica quepatsiqui intivojianaquegueti itsipa tres irashivantijite Aapani Irioshi tequerataca intivoteji!"

**9** <sup>1</sup>Iroompaquea itivotsita ashivanti cincotapojatsica, nameniri itsipa impoquiero iquenavaeypojo inquitequi yomposapojarao quepatsi. Yojocajiquereri yavi iriyavirejanquemparoca oamorovaetanquitsica jmm isaviji ovenaroncapojacaguetti. <sup>2</sup>Iroompaquea irooqua iyavirejacotaquitigiro arikea octanaca ocaravogavaetanaquequea paamarivoga ooshiasci quisaaejencatacaanaqueriquea catsirincaiteri opitsecajencavaetanaquequea. <sup>3</sup>Iroompaquea nameniri quejevecarica tsinari iquenaquenaitantapojacaro paamarivogajenca iporocajencavaetanaque itsitacaguiteja-vaetanacaroquea quepatsi. Yagavejacaajiguequeriquea iroantaquegueti inquem-petaquempariquea yoantigueti oseroti-

cona. <sup>4</sup>Icantimentajitaqueri aato yantaguetiro cataroshipae quepatsiquatica, inchatoshipopae, maasano tsoroaguetanquitsica. Iriguentiquea irantsipetacaajiaquempa caquintegueltasica teeca iriseyotantemparojo ivajiro Aapani Irioshi ivancaqui. <sup>5</sup>Cotanquitsiquea icantimentajitaqueri irimetojajigueri, manaquea irantsipetacaajiaquempari 5 taai. Oraquea iroauerigueti incatsivaequeriquea quempetaca yoantigueti oseroticona. <sup>6</sup>Irirajia caquintejia intsataitavetempa iroguijaceveguitempani irimetojitempame, cotanquitsiquea aatoquea imetojajiguetsi. Irinintamajajavequempauea irimetojajianaqueme, cotanquitsiquea aato imetojitsi.

<sup>7</sup>Iriraquea tsinari quejevaeca quitavaireri inetsanajiguirigueti irooshitegueti iroaroaitanaque irashimirintaquempagueti.

Yamatsaejiaca iguitojiaqui quempetaca amatsaerontsi ipeacaajitaca ooro. Oraquea ivoro quempetaca ivoro caquinte. <sup>8</sup>Ochoocaque imae ontiavenaavaeca oquempetacaroquea omae manquigarentsi. Oraqueate iraji quempetacaqueate iraji casecari.

<sup>9</sup>Isavoneguitaca quishori quejecaroca yero. Oraqueate yarajiaquegueti opojimavaeque ivanqui quempevaeca opojimavaetigueti itigaritacotantajiguetacaca ishiacaacarogueti quitavaireri yoayoaitigueti irashimirintavacaajiguempagueti coarentaja.

<sup>10</sup>Ochoocaguetaque igojapae ochoocatan-tacaca itseji quempetaca itseji oseroticona.

Oraquea itseji irootaque irantsipetacaanta-jiaquemparica caquinte 5 taai. <sup>11</sup>Chooca imajirojiate, ashivantiniro inavetaca, iriotaquequea imajirojiate maasano choocajianquitsica oamorovaetanaquegueti isaviji. Manaquea ipajica iguenquetsatsarequi evereo Avaroni, oraquea iguenquetsatsarequi guiriegojia ipajica Aporioni.<sup>f</sup>

f 9.11 Avaroni aisa Aporioni. Mavite oncanque Jararejantaguetatsica.

<sup>12</sup>Jac teroncanaca iroquetica atsipevaetagantsi icantacotsitacaca “iOoo!”, cotanquitsiquea choocatiraja mavitetiraja icantacotsitacaca “iOoo!”  
<sup>13</sup>Iroompaquea itivotaque ashivanti seistapojatsica, noquemiroquea iquenquesajencajitanaque osotoajencatantapoja-caro ovaapae aretare choocatatsica Aapaniqui Irioshiqui ipeacaajitaca ooro.  
<sup>14</sup>Icantajitiri ashivanti seistatsica ajiricaqueroca tivorentsi: “Poanaque pisiticarejacojaquieri irira 4 ashivantijite shiticacojianquitsica ontaniqui ojaaquiniqui pajitatsica Eoperateshi.”<sup>15</sup>Irooquea iquemavaquegueti yoanaquequea ishiticarejacojaqueri cameetsanjite interoncagarantajiaquieriniji caquinteja quepatsipaequitica incaratacaavaequeri 1/3, iriguentijitari inintacaajaqueca Aapani Irioshi interoncagarantajiaqueri. Iriatimpa itsatsivaetanitari coramani queroca aantapojempaca. Itsaque queroca ajagantsini, querica taai, queroca savinca-guiteri, aisa querocaguetai incaratenei catsirincaiteri.<sup>16</sup>Iroompaquea noquemiriquea itsajitiri coaretajia shiacojiaquerica iguitavairerite, maasano icaramirincaeque 200,000,000.

<sup>17</sup>Irirajia quitavaireri aisa shiacotantajia-carica nonejaqueca quejetaca noguimaa-nequi, ari iquejejiaca imaica: Maasano isavoneguijicaro quishori, ocantashitatia-guequeate oquityoncataquequea quejetaca paamari, otsipaqui oquisaaque, otsipaqui oquiteritaque quejetaca asopiri. Oraquea iguito quitavaireri quempevaeca iguito casecari. Osotoavagantetapojiri omorecare paamari aisa ovogajenca, oconoapojaro asopiri.<sup>18</sup>Imetojagarantajia-naquequea caquinteja ocaratacaavaequeri

1/3, ometojajianaqueriquea maasanopae sotoajencatanquitsica ivagantequi quitavaireri: omorecare paamari, paamarivoga aisa asopiri.<sup>19</sup>Oraquea yagavejantajiacaca quitavaireri teequea aparo onchoocateji ivagantequi, ochoocatsitaquea aisa igojaqui, oquempevecari camaarini, iroguenti ityantya yoantajigarica caquinteja yatsipetacaantajigarica.

<sup>20</sup>Cotanquitsiquea iriraquea choocatatsica tequerataca irimetojajigueji teequea incantashitatijaiguempaji impishoncraigueroji ipeacaagushejiacaca. Arimpaqueate itsaroventavaetanacari ampatsinipae aisa itsipapae ipeagueticua irioshivijitashitacaca ipeacaajitaca ooro, perata, voronquise, mapi aisa inchato—irirapae teeca iramenimajigueji aisa teeca inquemajigueji, aisa teeca iranijajigueji.<sup>21</sup>Iroompaquea aisa teequeate impishoncraigueroji imetojantajiguiguetai, imatsitantajiguiguetai, icantatsantajiguiguetai, aisa yaitsitantajiguiguetai.

## Ashivanti ajiricaqueroca paperijaniqui ampinacanquitsica

**10**<sup>1</sup>Iroompaquea namenitsitariquea itsipa ashivanti tampishivaetatsica, iquenapojoj inquitequi, yaguijitarpojaquequea. Anquirivogaacotacariquea mararo, ari ichoocaqueri yogue iguitoqui. Oraquea ivoro oquempevetacari catsirincaiteri. Oraquea iguitiqui quempevetaca catsantsamorecari.<sup>2</sup>Iroguenti yajiricaque paperijaniqui ampinacarejaca. Oraqueate iguiti itincamijempequiquitica icatiantacaroquea inirojani quentijani. Irooqua ishinampijempequiquitica manaquea icatiantacaro quepatsi.<sup>3</sup>Iroompaquea icajemitsimajatnaca iririjencani icanca, iquempejencavecarri león<sup>8</sup> icajemiguetai. Irooqua icajema-

<sup>g</sup> 10.3 Iriraquea *león* iririjeguimajataque inaque, iquejevecari casecari iririjegui. Cotanquitsi icajemiguetai yampenejencavaetanaca icanca, antsaroacaanaquempari anquemaqueriguetai. Ontaniqui otsipaqui guinentinintsi ichoocaqueguetai icantajiqueru iriguenti imajirote tomirishipaequitica.

quitigui ariquea ocojencatanaca oseroroncaguetanaquequea caretiguetanaquequea 7 careti, opojimajencavaetanacaquea inirojencavaetanaca ocanca. <sup>4</sup>Iroomequea nontioncacotavaqueromequeate ocantajiaqueca careti, cotanquitsiquea noquemiri-quea iquenquetsatacaaajitaquenaquea inquitequi icantajitana: “Aatoja pitioncaci-tilotsi ocantajiaqueca oratica 7 caretipa, aisa aatoquea querica picantitsi.”

<sup>5</sup>Iroompaquea iriraquea irashivantite Aapani Irioshi namenaqueca incajaranqui catiancaroca inirojani quentijani aisa quepatsi icantajempequitanqueroquea itincamijempequi inquitequi, <sup>6</sup>icantiquea: “Iriraquea icancanica ichoocati peacaaguetacaroca inquite aisa quepatsi aisa maasano choocatantaguecaroca ipeacaacaro aisa inirojani quentijani aisa choocatanta-guetaroca. Iriatimpa yamaquenaquea iroomajaca noncanquempica. Imaica noncantajiaquempi aapojaca, aato yoguijavaji. <sup>7</sup>Arikea irooshipojigueti intivotanaquequea irashivantite Aapani Irioshi sietetapojsatsica, iriraquea Aapani Irioshi ironigaantaqueroquea yomanacoguevetacaca, irinetsanamajaqueroquea icantajiaquerica coramani irajaanirejia tsavetantajatsica.”

<sup>8</sup>Ariqueate iquejetsijitajanaquea aisa iquenquetsatacaaajitajana inquitequi icantajitana: “Poanaqueja paavaquero ampinaicarejanquitsica paperi yajiricaquea irashivantite Aapani Irioshi, irinta catiantacaroca inirojani quentijani aisa quepatsi.”

<sup>9</sup>Arikea naatimpa noashitanaqueri ashivant, namanpojaqueriquea paperijaniqui ampinaicarejanquitsica. Icantajenaquea: “Jero, paguero, pishecatemparo. Oraquea arejetapojem-

parogueti pitsicotoqui onquepishicana-quempi, cotanquitsiquea oraquea pivagantequi ompochatanaque quempeca ipochajatigueti earotoja.”

<sup>10</sup>Iroompaquea naitsitaro paperijaniqui iracoqui ashivant noshecatsitaro. Namenitsitaroquea arimajacatarite icantamajaque. Oraquea novagantequi pocha ocanca quempeca ipochajatigueti earotoja, cotanquitsiquea irooqua noniavecaroqua arejetapojacarogueti notsicotoqui oquepishicanaquena.

<sup>11</sup>Arikeate icantajitana: “Imaica pinquejetacaejemparojate aisa pincamantantaje, iriguenti pintsavetacotsivaequempari caramirincavaetanquitsica caquinteguetatsica guntenijiatsica quepatsipaequi cantashitatiaguetanquitsica iguenquetsatsarepae, iriguentijia aisa imajirojiate, pincankequea quero incojiaquerini Aapani Irioshi oncoramanitapojaqueguedi.”

### Mavite tsavetacotantajiaquerica Aapani Irioshi

**11** <sup>1</sup>Arikea yojocajiquenaroquea savoroquijji igomarotantajitaca icantajitana: “Poanaque pigomaroquite-roja itemporote Aapani Irioshi, pinquejetsitemparoquea aretare. Aisa pintsajiaqueriquea queroca icaramirincajiaqueni choocajianquitsica oraniqui tsaroventajiacarica Aapani Irioshi. <sup>2</sup>Oraquea otsoviaguitetapojaqueguedi sotsiquitica aatoquea pigomarotiotsi, irooqua icantacaajiquerica itsipapae caquinteguetatsica inchoocatantapojempaca. Iriatimpajia manaquea irantanavintsajiaquero oratica gunteninintsi yashincaca Aapani Irioshi, <sup>h</sup> iragavejajiaqueroquea incantacoguitempani irarejevaetanaquemparoquea 42 taai. <sup>3</sup>Naatimpa

<sup>h</sup> 11.2 oratica gunteninintsi yashincaca Aapani Irioshi. Iroguenti Jerosare. Pamenero Is. 63.18; Iran. 8.13; Irc. 21.24.

nontigarancaque mavite tsavetantajia- quenaneca, nagavejacaqueri intsav- tantajiaquenaqueate incantacoguitem- pani arejevaetanaquemparoqua 1,260 savincaguiteri,<sup>i</sup> manaquea inquitsaajia- quempaquea jiriquiquijiporoquiro.”<sup>j</sup>

<sup>4</sup>Iriguentijia ocantacotaque mavite inchato orivo<sup>k</sup> aisa mavite tsivorentsi jerenquierenquiatacotasica yojoquiji- queca ichoocaquegueti Imajirojiate maasano quepatsiquitica. <sup>5</sup>Quericaca catsimavequemparineca irinintajiae- quempaquea irantsipetacaavaequem- pari, ariqueate incoquempani osotoamo- recavaetanaquequea ivagantequi ontsiatsiavaetaqueri ometojajiaqueri. Arikeate inquempejiaqueri imaica maasano quepatsipaequitica nintavetan- quitsineca irantsipetacaquemparime. <sup>6</sup>Iriatimpajia incanquegueti: “Aatoquea oteji incani”, aato oteji. Iroompaeua ariquea onquempetaquempa arejevae- quempa interoncanajerogueti intsav- tantavaequegueti. Aisa iragavejajiaque impeacaajianaquemparoqua oja irajantsi. Aisa iragavejajiaque incanta- shitatiajencatashijiaqueriquea guntenij- iatsica quepatsiqui, irantsipetacaajia- quempari. Arikea iriatimpia querocaca ininqueca irampijitajero, ari irampijita- jero.

<sup>7</sup>Cotanquitsiquea interoncianaque- rogueti intsavetantajiaquegueti, incoraquetapojequea covejencavetatsica sotoapojet sineca omoroqui oagantavae- tananquitsica isaviji, incatsimajiaopo- queri iragavejajiaqueri irimetojajiae- riquea. <sup>8</sup>Oraquea itsino manaquea

irojoquijitantajiaquemparoqua quenavo quirontsi oraniqui gunteninint- tsiqui anaanquitsica, ariqueate oraniqui yompajacojiqueriquea Amajirote coramani. Oraquea ishiacaantacarogueti oratica gunteninintsi icantajiqueroquea Soroma aisa Ejepito. <sup>9</sup>Oncarate 3 savincaguiteri intariavaequequempaquea oraniqui, aisa otsipa niganqui savinca- guiteri, iramenajiaqueriquea caquinte- guetsicas, incaramirincavaeque caquintejia cantashitatiaguetanquitsica iguenquetsatsarepae, majirontaguetaca- rica majirontajatsica. Iramenajiaqueri- quea metojajanquitsica cotanquitsiquea incantimentsitaquempari aatonijite iquitatiritsi. <sup>10</sup>Maasanoqua guntenijia- tsica quepatsiqui iramenajiaqueri metojajiaque, ariqueate irishinevaje- naquempaquea iraagarantsitemparo- quea yashintaguecaca irojocagarantava- caajianaquempa, irooriji iramenajiaqueri- quea metojaque iririjia mavite tsavetantatsica atsipetacaajiacarica maasano guntenijiaatsica quepatsiqui.

<sup>11</sup>Cotanquitsiquea avisanaquegueti 3 savincaguiteri aisa niganqui savinca- guiteri, ariquea oquijajencajapojajiri iranijajencare Aapani Irishi, ariquea icatiajianaja. Maasano amenajiaquerica itsaroamajajianaquequea. <sup>12</sup>Iroompaeua iquemajiaque icajemacojitaqueri- quea inuitequi icantajitaqueri iririjen- cani: “¡Caacateshiatsi acaniqui jenoqui!” Iroompaeua yoantajianajaro mararo jenoqui inuitequi, yamenamenaitava- jiri maasano catsimajiaquerica.

<sup>13</sup>Ariqueate octanaca omoguecamajata-

<sup>i</sup> 11.3 1,260 savincaguiteri ocarataque 42 taai. Ocarataque aisa 3 ajagantsini aisa otsipa niganqui ajagantsi. <sup>j</sup> 11.3 inquitsaajiaquempaquea jiriquiquijiporoquiro. Oratica quea jiriquiquijiporoquiro iroguenti cajenimagori yametaca coramani inquitsaatempera shimampojancanquitsineca. Manaquea ocanque iricatica mavite tsavetantatsica incantajiaqueriquea maasano: “Pishimampojancacotentempo pigovaeguishere.” <sup>k</sup> 11.4 inchato orivo. Oraquea orivoitsoqui iroguenti yaantajitacaroca oreji itaatajitacaca tsivorentsiqui.

naca quepatsi, osoveaguetanacaquea oshequi tsovironaquipae guiteninintsiqui ichoocavecagueta ocaravaeque 1/10,<sup>l</sup> imetojajiaque 7,000 caquinte. Iriraquea choocatajatsica itsaroajianaque, ariuea icantajiaque: “iCaaviji Irioshimajati Aapani Irioshi choocatasica inuitequi!”

<sup>14</sup>Imaica jac teroncanaca mavitetanquitsica atsipevaetagantsi icantacotsitacaca “!Ooo!”, cotanquitsiquea taampina arejetapojempa otsipatapojacaca.

#### Tivorentsi sietetapojatsica

<sup>15</sup>Iroompaquea itivotaque irashivanite Aapani Irioshi sietetapojatsica, ariuea iquenquetsajencajitanaquequea inuitequi inirojencavaeque, icantajiti:

“Querocagueti imajirontajivetacagueta quepatsi qui, imaicaquea irimajirontajempa Amajirote aisa Iguirishitote. Incoguitempani irimajirontaguitempani, aatoquea isanticoguiteja-covaetitsi.”

<sup>16</sup>Iroompaquea namenajaqueri irirajia 24 iramajiroreja Aapani Irioshi savisaviitanquitsica oraniqui imajirontamentoqui, ariuatecicojianaca itigueraventajianacari yarejevaequita ivancaqui isaviji itsaroventajianacari,<sup>17</sup>icantajiguiri:

“Nomajirote Irioshimajaca Agavejamajatatsica, noshineventajia-quempi nocantajiaquempi, ‘Arioteesaa.’

Choocataquempiquea imaica, picocaniquea pichoocati coramani, pincoguitempani pinchoocaguiteni.

Imaicaquea jac pagavejamajaquero-quea maasanopae, peamaja-queMPI Imajiromajajiate maasano.

<sup>18</sup>ICatsimajiavetacaquea quepatsipae-quitica, cotanquitsiquea imaica aapojaca savincaguiteri pincatsimacatsi-matantajiaquemparica iriatimpajia.

Pincantsijiaqueri aisa covaeguisheji-atsica metojajiavetanquitsica irantsipetimentajiaquemparo ipeacaaguishejiacaca.

Iriraquea paajanirejia tsavetacoji-guimpica manaquea pishineta-caajiaquempariquea.

Ariuea pinquempetacaajiaquem-pari aisa maasano pigomajama-jarejia aventaventajiguimpica tsaroventamajauempica, irioca caavijica yanaantavaeque, irioca teeca iranaanteji. Aisa aapojaca pinteroncantajia-quemparica maasano covaema-jataqueroca quepatsi.”

<sup>19</sup>Iroompaquea namenitaro otanarejanaca iteemporote Aapani Irioshi inuitequitica, ontaniquiquea intsompogui oconijavaetanaque inchacotanaqui ashi paaquito.<sup>m</sup> Ariuatecicoctanaca ocantavaetaquiti caretisijec tsijec, ortsantsajencatsa-renavaetanaque, serororo serororo, omoguecaguetanaquequea, aisa incojari-quigtevaetanaquequea.

#### Manquigarentsi aisa casantonqueniniro

**12** <sup>1</sup>Iroompaquea oconijavaetanaquequea inuitequi antsatanta-quemparoca quero oncoguetanaquem-

**11.13** osoveaguetanacaquea oshequi tsovironaquipae guiteninintsiqui ocaravaeque 1/10. Oncanque onchoocaqueguedi 1,000 tsovironaquipae, soveananquitsineca 100.

**11.19** inchacotanaqui ashi paaquito. Iroguenti ochoocatantacaca mavite mapicotaitioncantacaroca Aapani Irioshi paaquito yojocauenerica Moishishini irashi maasano igonoro.

pani oncoramanitapojaquegueti. Namenitaro manquigarentsi<sup>n</sup> oquitsaatacocari catsirincaiteri. Iriraquea taai ocatiitari, aisa amatsaetacocari 12 impoquirojite. <sup>2</sup>Iroatimpa otsaraquitaquequea agatsaraquijavaetanaja, jero ocajemavaequequea ocantagueuetanajiroquea.

<sup>3</sup>Ariqueate iconijavaetanaque aisa inquitequi itsipa. Namenitsitariquea casantonqueniniro iquityoncavaequequea icanca iririjeguini. Ochoocaque 7 iguito, oraquea ivaaguetaca 10. Aparopae iguito amatsaejiaca, maasano iramatsaeropae ocarataque 7. <sup>4</sup>Ipotecapetajishitanaqueroquea ivetajishi yasacaraagarantsigueteriquea impoquiropae, icaramirincavaetaque 1/3 itacoroitsijigari quepatsiqui. Iriatimpa icorapepojaque icatiimotapojacaro manquigarentsi iroshipoji ovoacote irishecatsitavaquemparoquea irijanite.

<sup>5</sup>Ariqueate ovoacoque, iriguenti shiramparjaniqui, iriotaquequea peanquitsineca imajirojatemajaca maasano caquinteguetsica, irimajirontantaquemparo imajirontaquijire ipeacaajitaca cavorejari quishomajatatsica, <sup>6</sup> iragavejiqueriquea maasano teeca inquemisantajigueriji. Iroompaquea nameni inoshiquitsijitari yaajitanaqueri jenoqui isavicaquegueti Aapani Irioshi imajirontamentoqui. <sup>6</sup>Oraqueate manquigarentsi oshianacaquea oanaquequea oquitamampororoitapojaquegueti ipeacaacanaroquea Aapani Irioshi onchoocatantaquempaca irojocajitaqueneroquea oshecaquempaca arejetacovaaetapojempa 1,260 savincaguiteri.

<sup>7</sup>Iroompaquea ochoocaque ashimirintagantsi inquitequi. Iriraquea Miguera itsipajiacari irashivantijitete yashimirin-

tsitapojacari casantonqueniniro. Iriraquea casantonqueniniro itsipajiacariquea irashivantinirojite, yashimirintsvetavacari, <sup>8</sup>cotanquitsiquea teequea iragavejavaqueriji. Yaitsitari yoguisotoitsijigari, irootaquequea teeca inchoocantajempaj inquitequi. <sup>9</sup>Ipishonquitsijigari quepatsiqui. Iriraquea casantonqueniniro iriotaquequea camaarini coramaniquitica, ariquea icocani yamatavimatavivaequeriquea maasano caquinteguetsica. Ipajitsitaquea ampatsini aisa Satanashi. Manaquea ipishonquitsijitari quepatsiqui, itsipataantsijitari irashivantinirojite.

<sup>10</sup>Iroompaquea noquemitsitaquea iquenquetsajencajitanaquequea inquitequi inirojencavaequequea oncanca, icanke:

“Imaica jac yaantavajiquea Arioshite. Imaicaquea yamenajiqueroquea yagavejamajatiquea iriatimpa, ipeamajatacaquea Imajirotemajaca maasano.

Arikea iquejetaca Iguirishitote yagavejamajatiquea.

Iroorijite ipishoncajitaqueri isaviji irira ampatsini.

Irioquea catiimopiniveterica Arioshite savincaguiteri aisa pitsecariqui, itsavetacapiniveteracari apitsarventarijate inintaveca inquejetacaantajiaquerime.

<sup>11</sup> Cotanquitsiquea iriatimpajia manaquea yagavejantsijigari iriraja Ovejajaniqui.

Iroguenti aisa yagavejantsijigari Iguenquetsatsare Irioshimajaca itsavetantajiaqueca,

<sup>n</sup> **12.1** Oraticaquea *manquigarentsi* iriguenti oquejeca joriojia. Iriraquea ovoaquea iriguenti iquejeca Jesoquirishito. <sup>o</sup> **12.5** *irimajirontantaquemparo imajirontaquijire ipeacaajitaca cavorejari quishomajatatsica*. Irooqua oncanque intampishitashimajaqueoqua *irimajironquempagueti*.

teequea intsaroacaajiguemparonica  
irimetojajiaquegueti,  
maaquea ipajiacaroquea  
imetojane.

- <sup>12</sup> iIrootaquequea pishinetantajiana-  
quempaca aviatimpajia inquite-  
quitica,  
maasano quintenijiatsica inquitequi!  
Aviatimpajiampani quintenijiatsica  
quepatsiqui irooca inirojaniqui  
quentijani, iooshiatsi pantsipe-  
vaetempashiasi!  
yaguitashitapojimpitarite  
ampatsini.  
Icatsimamajatatiquinimaja,  
iroorijite yamenaque irooshipojitarri  
incatsimajiqueriquea  
iriatimpa.”

<sup>13</sup> Iriraquea casantonqueniniro  
yamenaquegueti ipishoncajiqueriquea  
quepatsiqui, ipatimatsitanacaroquea  
manquigarentsi vojairica shiramparija-  
niqui. <sup>14</sup> Cotanquitsiquea iroatimpa  
iviquitajitanaro mavite ovanqui  
inirovanqui quempevaeca ivanqui  
shirompitomantaneji cameetsaniji  
arapitsatimentanaqueriniji ontaniqui  
onchooquaquegueti oquitätampororoita-  
pojaquegueti, iquempoguijajiqueroquea  
oraniqui 3 ajagantsini aisa otsipa  
niganqui ajagantsite. <sup>15</sup> Oraquea  
casantonqueniniro ariqueate icotanaca  
yoguisotojaatsitaroquea ivagantequi  
apanatojaavaetanaca aanaqueromequea  
manquigarentsi. <sup>16</sup> Cotanquitsiquea  
amitacotavaquero quepatsi, omorotana-  
caquea oquiajtantanacaca oja sotojaat-  
tanquitsica ivagantequi casantonqueniniro.  
<sup>17</sup> Arikeate icotanaca casanton-  
queniniro icatsimamajatanaqueroquea  
manquigarentsi yoayoaitashitantajiana-  
carica irashimirintajiaquempari itsipajia

ochoviquijiaqueca, irirajia netsanamaja-  
tiroca icantacaantaqueca Aapani Irioshi  
aisa tsavetantajiguirica Jesoshi netsana-  
majatiroca itsatacaantaguetica.

### Mavite covejencavetatsica

**13** <sup>1</sup>Arikea nocatiaca impanequivi  
ocaratsapijataquegueti inirojani  
quentijani. Iroompaquea nameniri isotoaja-  
tanaque aparo covejencavetatsica,  
occoaque 7 iguitopae, oraticaquea  
ivaapae 10, yamatsaetacoguetaca ivaaquí  
maasanopae, ocarajiaque 10 iramatsae-  
ropae. Aparopae iguito ochooquaque  
otioncaca ipajigueca iriatimpa, iquejema-  
natacariquea Aapani Irioshi. <sup>2</sup>Iriatimpa  
quempeca casecari, oraquea iguitipae  
quempevaeca iguiti vaavaiconta. Oraquea  
ivagante quempeca ivagante león.<sup>3</sup>  
Iroompaquea iriraquea casantonqueniniro  
yagavejacaqueri irira covejencavetatsica  
iragavejamajaqueniji iragavejajiaqueriquea  
maasano quepatsipaequifica irimajironta-  
pojempa imajirontamentoqui casantonquen-  
niro. <sup>3</sup>Iroompaquea apaguitotiro iguito  
conijavaeque icaraguinajivetacarigueti  
quejetaca irimetojajitaquerime, cotanqui-  
tsiquea yogueshijitajiri. Oraquea yogueshi-  
jitatirigueti, ariqueate ichicoitanaca  
maasano quepatsiquítica yamenamenita-  
naqueua intati, yogujatacojianaqueri.  
<sup>4</sup>Arikea itsaroventajianacari casantonquen-  
niro, yamenajiaqueritari iriguenti  
agavejacaaguequeri covejencavetatsica.  
Iroompaquea ariquea iquempetacaajiana-  
cari covejencavetatsica itsaroventajianacari  
iriatimpa, icantajigu: “Tecatsi quempetem-  
parine iricatica. Tee inchoocateji agavejan-  
quitsineca irashimirintaquempari.”

<sup>5</sup>Arikea yagavejacaajitaqueri  
covejencavetatsica inquenquetsataque  
iraventacovaequempaquea incantagi-

**p 13.2** Pamenero itsavetacojiquerigueti *león* isavivanaqui otsapaqui 5.5 aisa 10.3, iro  
tsatacaaquempire.

shetacovaequeriquea Aapani Irioshi, aisa yagavejacaajitaqueri irimajironta-quempaquea incaratacoguiteni 42 taai. <sup>6</sup>Ariquea icantaguishetacovaequeri Aapani Irioshi, iquejetsitariquea ivajiro, Itaverenacorote, aisa maasano guintenijiatsica inquitequi. <sup>7</sup>Iroompaquea yagavejacaajitaqueri irashimirintajia-quempari tsaroventajiacarica Aapani Irioshi, iragavejajiaqueri. Ariquea yagavejacaajitaqueri impeantaquem-paca imajirojate maasanomajaca caquinteguetatsica, maasano gonorontavacaaguetatsica, maasano cantashitati-guetatsica iguenquetsatsarejia, maasano quepatsipaequitica. <sup>8</sup>Maasano intsaro-ventajiaquempariquea irira covejenca-vetatsica—maasano quepatsiquitica teeca intioncacotantemparoji ivajiro ivaperitequi Ovejajaniqui metojaventajiacajica. Coramanitari tequeratagueti impeacaajitemparo quepatsi, icanque-quea Aapani Irioshi irimetojaventajacija, ariquea itioncacojiguetaqueroquea ivajiropae maasano icocanica iranijagu-teni iriatimpauki.

<sup>9</sup>Choocagueti guempitanquitsica iintsija inquemejate.

<sup>10</sup>Quericaca ontampaticatanaquea irajaitanaqueri irisananatacoji-taqueri,  
ariecate irisananatacotsijitem-pariquea.

Ariquea inquempetaquempaquea aisa quericaca ontampaticata-naquea irimetojantajitaquem-pari tsaampitsantsameniro, irimetojitsitantajitempariquea.

Irootaquequea oncameetsatantananaquem-paca incoquempani irantsipetacojia-quempaquea tsaroventajigarica Aapani Irioshi intsaroventamajatanaquempariquea.

<sup>11</sup>Iroompaquea namenitsitariquea itsipa covejencavetatsica isotoapojaque

quepatsiqui, ochoocaque mavite ivaa quempevaeca ivaa ovejajaniqui, cotanquitsiquea oraqua iquenquetsa-quegueti manaquea iquempetacari iquenquetsatigueti casantonqueniniro. <sup>12</sup>Choocaquea iragavejane quejetaca iragavejane iriquetica covejencaveta-tsica yagavejavaequegueti, cotanquitsi-quea iquemisantaqueri inetsanataquero-quea intaguetica iriatimpa. Icantajia-queri maasano guntenijiatsica quepatsiqui intsaroventajiaquempari iriquetica covejencavetatsica peanajatsica icaraguinajivetacarigueti quejetaca irimetojajitaquerime. <sup>13</sup>Aisa yonigaanta-guequeroquea oacaantantatsica intati. Yasacaraavaequeroquea morecatsantsa-jencaro quepatsiqui, oquenajencavaeta-pojaque inquitetapojaquegueti, yammena-jiaqueriquea maasano caquinteja.

<sup>14</sup>Yantaguetaque quempeguetacaroca ocatica intintacaquerica itsipa covejen-cavetatsica peanajatsica icaraguinatan-tajivetacarigueti tsaampitsantsameniro, yanijanaque. Irootaquequeate yamatavi-tantavaetacarica maasano guntenijiatsica quepatsiqui, aisa icantajiaqueri impeacaavantorijiaquempari iriquetica covejencavetatsica. <sup>15</sup>Arikea yagaveja-caajitaqueri yaajencatacaqueri ivaantot-rite iquenquetsatantanajaca aisa yagave-jantacaca irimetojacaantsijiguempari maasano teeca intsaroventajiguempariji ivaantorite.

<sup>16</sup>Aisa icantajiaqueri maasano irisanoncjitaqueriquea iracoqui itincamijempequiquitica irooca ivancaqui, maasano caavijica yanaanta-veti aisa teeca iranaantajigueji, maasano ashintavaejajatsica aisa teeca irashintavetempaji, maasano yashintajitaca aisa teeca irashintajitempariji.

<sup>17</sup>Iroompaquea quericaca teeca irisanoncatacotemparoji ivajiro covejencavetatsica irooca inomerote

iracoqui itincamijempequiquitica irooca ivancaqui, aatoquea yagavejitsi irovegarataje aisa aato yojocantajitsi.

<sup>18</sup>Imaica cameetsa pinquenquejamajeteroja pintsatimentavaqueroniji noncamantaquempica imaica. Quericaca tsamajatatsica iintsijsa intsatavaqueroqua inomerote covejencavetatsica, irootaquequea inomerote caquinte, iroguenti 666.

#### Yamashaijiaquequeate 144,000

**14** <sup>1</sup>Iroompaquea namenavetaja namenitsitariquea Ovejajaniqui icatiatsempitantacaro Shionetsempi, itsipajiacari 144,000 caquinteja itionca-cojitaqueca ivancaqui ivajiro Ovejajaniqui aisa ivajiro Iriri. <sup>2</sup>Noquemitsitaroqua ampenejencavaetanaca oquenajencavaetapojaque inquitequi quempejencavaeca otaranquigueti ojaaquipaequi, aisa quempejencavaeca caret. Aisa manaquea oquempejencavaecaro ocarajencavaetigueti itencatsajiguiogueti aarepapae caramirincajanquitsica. <sup>3</sup>Irirajia 144,000 manaquea ichoocajaque oraniqui imajirontamentoqui Aapani Irioshi, aisa ichoocajiaquegueti irirajia 4 anijaripae aisa iramajiroreja Aapani Irioshi. Yamashaijiaqueroquea amashairentsi iroqueratica. Tee inchoocatimateji tsajiaqueroneca oratica amashairentsi, iriguenti tsajiaqueroquea irirajia 144,000 quenajapijatsica quepatsiqui ivergaratacotanontajajica Ovejajaniqui. <sup>4</sup>Iricaticajia iriguenticia teeca incovaeguishetantemparoji manquigarentsi, icomajaguitanitari. Irosati yoguijaguijaitanaqueri Ovejajaniqui querocaguetti iquenanaqueni. Iriguenticia ipariajicaca Aapani Irioshi ivergaratacotanontajajica intsaroventamajataquempariniji iriatimpa aisa

Ovejajaniqui. <sup>5</sup>Teequea intsojeavagante-timatempaji. Yamaqueriquea Aapani Irioshi shemajatata taaca opaji covaeguishejiavecarica.

#### Itsavetantaqueca 3 irashivantijitete Aapani Irioshi

<sup>6</sup>Iroompaquea nameniri itsipa irashivantite Aapani Irioshi yaranaque-quea inquitequi niganqui itsavetanta-vetanaqueroquea Quenquetsatsarentsi Oganejencatatsica choocaguitatsica. Itsavetantimojiaqueri maasano caquinteguetatsica guitenijatsica quepatsipaequi, gonorontavacaagueta-tsica, cantashitatiaguetatsica iguenque-tsatsarejia, majirontaguetacarica majirontajatsica. <sup>7</sup>Iririjencavaequequea icanca icantajiguiri: “Imaica pintsaroa-caamajauemparija Aapani Irioshi pincantajiaqueri: ‘iCaaviji pagavejama-jati!’, aapojacatarite incantantajiaquem-pica quero incojitaquerini maasano caquinteja apaniropae, maasano teeca inquemisantajigueriji irantsipetimentaji-aquemparoqua ipeacaaguisejiacaca. Pintsaroventajiaquempariquea, iriguenticia peacaaguetaclaroqua inquite, quepatsi, inirojani quentijani aisa osotoajaguetingueti ojaaquipae.”

<sup>8</sup>Iroompaquea yoguijatsipojacari itsipa irashivantite Aapani Irioshi icanque: “iSoveaca! Soveaca Vavironia oratica guiteninintsi anaantavetanqui-tsica, teroncjiaca guitenitantavetaroca irooriji opeacojianaqueri igovaegui-shere, ariquea ipajencajianaqueri quepatsipaequitica. Oquempetacaquea irishinquitacaajitaquemparinica inquempevaetacaantajitaquemparica.”

<sup>9</sup>Iroompaquea iquempetsitanaca trestapo-jatsica irashivantite Aapani Irioshi yoguijatsipojacari, iririjencavaequequea icanca

icanque: "Quericaca tsarotentajiaquemparanea covejencavetatsica aisa ivaantorite ipeacaajitaca, aisa irisantoncatacojitaquemparigueti ivajiro ivancaqui irooca iracoqui,<sup>10</sup> iriojiatari incatsimajaque Aapani Irioshi. Aatoquea capichajaniqui icatsimatiritsi, irantsipetacaavaequeuempariquea intsiaquempaquea camorecariqui onconoquemparoqua asopiri. Iramenamenaiqueri ashivantijite comajashirentanquitsica, ariquea irameneri aisa Ovejajaniqui.<sup>11</sup> Oraquea ovogataquempagueti irantsipevaetantajiaquempaca oncoquempani omposacecantajcavaequempaquea aatoquea osajaencatimatisi. Aatoquea imagorejimajigui savincogui-teriqui aisa pitsecariqui, incoguitempaniquea irantsipeguitempaniquea tsarotentajiacarica covejencavetatsica aisa ivaantorite ipeacaajitaca, ariquea inquejejiaquempa irantsipevae-quietempani maasano isantoncatacojitaquea ivajiro covejencavetatsica."

<sup>12</sup> Irootarite intantajitacaca incoguitempani irantsipetacojiaquempaquea yashintajacaca Aapani Irioshi, iriguentijia teeca irovashiantimateroji inetsanamajajiaqueroquea icantaguetaica, aisa coanatsi itsarovenatamatatanacariequa Jesoshi!

<sup>13</sup> Noquemitsitaroqua oponimajenca-vaepojaca inquietequi icantajiquena: "Pintioncacoteroja noncanquempica: 'Aapani Irioshi irishinetacaavaequeuempariquea metojajianquitsineca imaica tsarotentajiacarica Amajirote.'"

Icanquequea Ishire Aapani Irioshi: "Arimajaguitatsi, irimagorejajiaque yantavaetigueti, ontsipataquempari yantaguetaqueca cameetsari."

**Icapiocacotavaquerogueti tirigoitsoqui  
aisa ovaitssoqui quepatsipaequitica**

<sup>14</sup> Iroompaquea namenitsitaro mararo oquitamarovaeque ocanca. Ichoocaque savicantacaroca iquempetacari irijanite

caquinte. Yamatsaetacari iramatsaero ipeacaajitaca ooro. Yajiricatsiconteta-quieroqua tsaampsicontero icantajitica *hoz.*<sup>r</sup><sup>15</sup> Isotoanaque teemporoqui itsipa irashivantite Aapani Irioshi, icajemacotaqueri savicanquitsica mararoqui, iririjencavaequequea icanca icantajiguri: "Jac osampatanaquea tirigoitsoqui quepatsipaequitica. Imaica iintsija pintotacotantaquitemparojate."<sup>16</sup> Iroompaquea iriraquea savicanquitsica mararoqui yogarajacoguetaquitiroquea yaavaquero icapiocacotavaquero maasanopae quepatsipaequi.

<sup>17</sup> Arikeate isotoapojaquequea itsipa ashivanti, isotoampojaroquea teemporo inquietequitica. Arikea iquempetaca iriatimpa yajiricatsicontetaquerouqua *hoz* tsaampsicontero.<sup>18</sup> Iroompaquea isotoanaquequea itsipa ashivanti choocatanquitsica aretarequi. Iriatimpa iriguenti quempoguijiroca paamari. Icjemacoqueri ajiricaqueroca *hoz* tsaampsicontero, iririjencavaequequea icanca, icanke: "Iintsija pintotacotantaquitemparojate oratica ovaitssoqui quepatsipaequitica, sampajencatanaquequea."<sup>19</sup> Arikea iquempetacaacaroquea imaica ashivanti, yogarajatsicontetanta-guequitaroqua ovaitssoqui quepatsipaequitica, icapioquitaguetaroquea maasanopae. Iroompaquea yaanaqueroquea ontaniqui osamani ocaraguepojagueueti tsovironaquipae ochoocaquegueti ipeacaashitantajicaroca yaajatan-tajitaroca otsironeja. Iriatimpa manaquea ocantacoqueri incatsimamajajiaqueri Aapani Irioshi maasano teeca intsarovenatajiguempariji interoncamajajiaqueri.<sup>20</sup> Arikeate yagaticamirijaqui-jiqueroquea ovaitssoqui, arikeate ocoitanaca osotoajatanaque irajantsi otserajatanacaroquea yoguijaatantajita-

roca oshirancajavaetanacaquea isaviji, ariquea ocantajavaetanaca jmm arejejavaecaroquea 1,600 estadiopae.<sup>s</sup> Osaanajavaetanaquequea arejejavaecaroquea ivagantequi quitavaireri.

**7 irashivantijite Aapani Irioshi atsipetacaantantajianquitsineca**

**15**<sup>1</sup>Namenitsitaroqua inquitequi otsipa iquempetacaacaro aisa antsatantaquemparoca quero oncoguetanaquempani oncoramanitapojaegueti. iOoshiatsi namenanaquequea intati! Namenajaqueri 7 irashivantijite Aapani Irioshi atsipetacaantantajianquitsineca, iroquea amacojiaqueroneca atsipetagantsipae caratapojatsineca, irootarite onteroncantapojempac igatsimaca Aapani Irioshi.

<sup>2</sup>Nameniquea aisa quejevetaroca incajare, saancorencajavaequequea ocanca quempetaca potirinaqui, oconoa-morecrajacaroquea paamarimoreca. Arikea oraniqui icatintiitaca maasano anaquerica covejencavetatsica aisa ivaantorite ipeacaavaantorijitaca, teetarite intsaroventajiguempariji aisa teequea intioncacojiteroji onomerote ivajiro ivancaqui irooca iracoqui. Icarimirincavaeque yajiricajiaque iraarepate yojocajiaquenerica Aapani Irioshi. <sup>3</sup>Yamashaijiaqueroquea iramashaireni Moishishini irajaanire Aapani Irioshi, iroguenti aisa iramashaire Ovejajaniqui, ocanque:

“Nomajirote Aapani Irioshi Agavejamajatatsica,  
oganejencavaetaca pantagueta-  
queca, oacaavaetanaquenaquea  
intati.

Pitampaticamajataqueroquea  
maasanopae, iroomajacaquea.  
Aviguenti Imajirojiate maasano  
caquinteguetatsica.

<sup>4</sup> Nomajirote, ¿arimpate inchooaque caarica tsaroacaguimpi? Aato ichoocati.

¿Arimpate inchooaque caarica  
shineventimpi? Aato ichoocati.  
Apaniroquea aviatimpa picoguitani  
poganejencamajataca, teequea  
pincovaeguishetimatempaji.  
Incoraquecoraqueitashiquempitari  
maasano caquinteja intiguero-  
aventajiaquempiquea intsaro-  
ventajiaquempi.  
Conijavaetaquetari pitampaticama-  
jaqueroquea maasanopae.”

<sup>5</sup>Iroompaequa nameniquea otanarejana tetempo inquitequi. Iroguenti oquempetacaro otaverenacorote Paaquito. <sup>6</sup>Isotosotoitantapojaroquea irirajia 7 irashivantijite Aapani Irioshi atsipetacaantantajianquitsineca.

Ijamirincajiaque quitsaajiaca quitamarocantari quitsaarentsi saancamagori, tsirencavaeque. Yaguiatacari ineguiqui ichompimashite ipeacaajitaca ooro.

<sup>7</sup>Arikea namenitsitariquea aparo anijari, yojocajiaavaqueneri ashivantijite 7 taso ipeacaajitaca ooro tsuraiqujenavaequeate igatsimaca Aapani Irioshi icoguitani ichoocati. <sup>8</sup>Oraquea iroganjencare aisa iragavejane Aapani Irioshi osotoajencavaequequea oquempejenavaecaro paamarivoga inirovajenavaetigueti otsitacajencavaecaroquea intsompoguiqui iteemporotequi, aritarite ichoocaque iriatimpa. Aatoquea ichoocatitsi quijanquitsineca

**s 14.20** Oraquea 1,600 estadiopae ovegarataca 300 quiromeeteropae, irooqua quempetacaro arigueti anijivaete 7 savincaguiteripae, irooca 8. Aparo estadio ocaravaeque oquejevecaro 185 meeteropae. **t 15.5** oquempetacaro otaverenacorote Paaquito. Oratica Taverenacoro iroguenti quitsaarentsivanco ochoocatantacaca mavicotate mapicota itioncantacaca Aapani Irioshi yojocauquenerica Moishishini.

oraniqui arejevaetanajempataja interon-cajiajerotaja irashivantijite Aapani Irioshi carajianquitsica 7 irisocajiaque-rogueti oratica 7 atsipetagantsi yajirica-cojiaqueca irantsipetacaantajiaquempa-rica caquinte.

**Siete tasopae tseraiquijencavaeca  
igatsimaca Aapani Irioshi**

**16** <sup>1</sup>Iroompaquea noquemiquea iquenquetsajencajitanaquequea iririjencavaeque icanca osotoajencapoja-queroquea te temporo icantajiaqueri 7 irashivantijite Aapani Irioshi: “Pijateja poapoitanaqueja pisocajiaquiteroja quepatsiqui igatsimaca Aapani Irioshi oratica tasoquitica carajianquitsica 7.”

<sup>2</sup>Ariquea yoanaque aparo ashivanti isocaquitiro quepatsiqui yajiricacojia-queca itasonequi, ariqueate icojanaca yavejancajiana maasano caquinteja itioncacojiaqueca ivancaqui ivajiro covejencavetatsica, iriguentijia tigueroa-ventajiacarica ivaantorite ipeacaavaan-torijitaca iquempetacaamajivecari iriatimpa. Irirajia avejancajianquitsica ooquea yatsipejiacaroquea ogatsica.

<sup>3</sup>Iroompaquea irira ashivanti mavite-tapojatsica yaacotapanajantiroquea itasone, isocaquitiro inirojaniqui quentijani. Ariquea oquempetanacaro iriraja metojanquitsica. Imetojajiana-quequea maasano chocajianquitsica inirojaniqui quentijani iteroncajanaca-queate.

<sup>4</sup>Ariqueate irira ashivanti trestapojatsica yaacotapanajantiroquea itasone, isocaqui-tiro ojaaquipaequi aisa maasanopae osotoajaguetigueti nijatenipae. Ariqueate ocoitanaca opeaguetaqueate irajantsipae. <sup>5</sup>Iroompaquea noquemiri iquenquetsata-naque ashivanti quempoguijiroca ojapae, icanque:

“Nomajirote, aviatimpa aviguenti tamapticamajatiroca patsipeta-

caantamajatantacagueti piqumpetacaantaqueroquea imaica.

Choocaquempiquea, aisa picoguitani pichoocatini coramani, Pirioshimajati teequea pinco-vaeguishetimatempaji.

<sup>6</sup> Patsipetacaantajiacarica pamenajia-queritari imetojajiaqueri tsave-tantajatiatsica aisa itsipajia pigomajamajarejia, ichovivincajatacaa jiaqueri iriraja. Pimirajatacantantajiacarica irajantsi, inchiquiojita iquejetacaantajiacarica iriatimpajia.”

<sup>7</sup>Iroompaquea noquemiriquea iquenquetsatanaque itsipa aretarequi icanque:

“Arimajaguitatsi, Nomajirote Aapani Irioshi Agavejamajata-tsica.

Pitampaticamajajeroquea picatsi-majajiquerigueti, teetarite pincantashitempaji.”

<sup>8</sup>Ariqueate irira ashivanti cuatrotapojatsica yaacotapanajantiroquea itasone, isocaquitiro catsirincaiteriqui, icatsirin-camajatanaquequea itsiajiaqueri caquinte. <sup>9</sup>Icantacoguitaniquea yatsipejiaca itsiaquerigueti, cotanquitsiquea teequea irovashiantajigueroji ipeaca- guishejiacaca. Teenicate iraventempariji Aapani Irioshi intsarovenquemparime, manaquea icantaguishejiaqueri yamena-jiavecaroquea irioquea tigaranquimojia-queri atsipetagantsi.

<sup>10</sup>Iroompaquea irira ashivanti cincota-pojatsica yaacotapanajantiroquea itasone isocaquitiro imajirontamentoqui isavican tapinitaca covejencavetatsica. Arikea icojanaca ipitsecacovaetanaque majirontajiacarica icantacovaetanaque manquimanquimanqui. Iriatimpajia yatsicajianaquero inene irooriji yatsipe-

majajiaca.<sup>11</sup> Cotanquitsiquea arimpa yogaamajajianaca teequea irovashiantajajeroji ipeacaaguishejiacaca, manaquea icantaguishetacojaqueriquea Aapani Irioshi ashincaroca inquite, yamenajaqueriquea iriguenti atsipetacaajiacari aisa ishimoiriquishimoiriquatacaqueri.

<sup>12</sup>Iroompaquea irira ashivant seistapojsica yaacotapanajantiroquea itasone, isocaquitiro inirojaqui ojaaqui Eoperateshi. Arikea ocotanaca ochaquirejanaquequea cameetsanijite incoraquecoraqueitapojenijite majiron-tajatiatsica quenaquenaitapojanquitsineca isotoguiguetai catsirincaiteri.<sup>u</sup>

<sup>13</sup>Arikeate nameniriquea casanton-quininiro aisa covejencavetatsica aisa tsavetantatsica amataatsica. Aparopae iriatimpajia isotosotoitanaquequea ampatsini ivagantepaequi. Iriraquea ampatsini quempevaeca oanto.<sup>14</sup> Ampatsini inajiaque. Yonigaantajiaquerquea oacaantantatsica intati, iroompaquea yoayoaitanaque incapiocajaqueriquea maasano majirontajatiatsica quepatsipae-quitica irashimirintajiaquempaqueate arejetapojempaguetai oratica savincaguiteri anaavaetapojsineca irashi Aapani Irioshi Agavejamajatatsica.<sup>v</sup>

<sup>15</sup>[Iroompaquea iquenquetsatanaque Quirishito icanque:] “Lintsijate pinque-misantajguenajate. Naatimpa noncora-quepojaquegueti manaquea noncatima-pojajempaquea nonquempetapojaem-pari aitsitantatsica. Noshineventavaeta-quempariquea maasano tinajaventaque-naneca aisa inquempogujamajajau-queti iitsaare aatoniji icajaratsinojigui aatoniji ipashiventajiga.”

<sup>16</sup>Iriraquea ampatsini quempejiaca-roca oanto icapiocajaqueri majirontajatiatsica ontaniqui ipajijitica evereotsaquai Aremajeroni.

<sup>17</sup>Iroompaquea irira ashivant sieteta-pojsica yaacotapanajantiroquea itasone isocaquitiro otampijaguitetaquegueti. Noquemiquea iquenquetsajita-naque inirojencani oanca oquenajenca-veta pojaque imajirontamentoqui Aapani Irioshi teemporoqui, icantajiti: “iJac teroncapojac!”<sup>18</sup> Arikea ocotanaca otimemecapinique caret iocantapinique timemec timemec, aisa ocantavaetaquiti serororon serororon tsijec tsijec, omoguecavaetanaquequea quepatsi anaavaetanaqueroquea maasanopae moguecaripae omogueca-guetigueti coramaniqui iroiqueraguetai icaquintetacaajiqueriquea caquinte arejevaeca imaica.<sup>19</sup> Arikea ocotanaca otsecaguetanaquequea oratica guinenti-nintsi anaajencavavaetatsica, otsecague-tanaque oquijipejitanaca 3, aisa maasanopae tsovironaquipae choocaguetaatsica quepatsipaequi osoveagueta-naca, ootari teroncaguetacaquea. Iquenquejaqueroquea Aapani Irioshi icovaeguishejiacaguetai Vavironiaquitica, icatsimajiaqueriquea yatsipetacaajavae-cari, quejevaeca yojocacotsitanariequa tseraja igatsimareja.<sup>20</sup> Maasanopaequea ovogorepae opeagueca, aisa otsempipae teequea irinejajitajeroji.<sup>21</sup> Aisa asacaraatseintseinaetapojaeca incojari-quitsentseina oquenapoji jenoqui inquitequi otenavaequequea oanca, apatsentseinaropae otenataque 40 quiro. Iriraquea caquinteja arimpaqueate icantaguishejianaqueriquea Aapani

**u 16.12** Incoraquejiapojaquegueti majirontajatiatsica intsipatsipaitaquelmpari igoaretajiate irashimirintajiaopojaquempa. **v 16.14** oratica savincaguiteri anaavaetapojsineca irashi Aapani Irioshi Agavejamajatatsica. Pamenero 19.11-21 itsavetacoquerogueti oratica ashimirintagantsi.

Irioshi yamenajiaquegueti ipeacaimovetacarica yasacaraaquerogueti incojari-quitsentseina, yatsipemajatacatari.

**Joanca yamenaquero Vavironia quejetaca  
iroguenti manquigarentsi  
cantatsatantamajatantatsica**

**17** <sup>1</sup>Arikeate icoraquetashiquenaequa aparo ashivanti carajian-quitsica 7 ajiricajianquitsica itasonepae, icantapojaquena: “Caacate namenacaaguequempiroquea quero incojiqueroni incatsimajiquerogueti cantatsatantamajatantatsica savicantaguetaroca otsipajatopaequi oshequipaequi. <sup>2</sup>Iriraquea majirontajatisca quepatsipaequitica yoayoaitashipinijiaqueroquea icantatsajiaqueroquea, iroatimpa ocantatsatacaa-jiavacari. Aisa iriraquea guntenijatisca quepatsi qui icovaeguishemajajiacaquea ocovaeguishetacaajiavacari.”

<sup>3</sup>Iroompaquea yaashirentavaetanaquena-quea ashivanti oquitamampororoitapojaquegueti. Arikea oraniqui namenapojiro manquigarentsi osavicantacari quityoncari covejencavetsica. Oraquea itsinoqui maasanotseentena otiontioguisheveta-va vajirontsipae iquejemanatacotancarica Aapani Irioshi. Ocaravaeque 7 iguitopae, oraquea ivaapae ocaratsitaquea 10.

<sup>4</sup>Oraqueate manquigarentsi oquitsaaca oitsaare camachoncamorenari aisa quityoncamorenari. Oashigueta-ocoropae, cameetsapiguetatsica, aisa peererapae. Ajirique oshovaote ipeacaajitaca ooro, tseraiquivaeca taaca opajita covaeguisherentsipae aisa ogantatsarejia. <sup>5</sup>Oraquea ovancaqui ochoo-quea otioncacocaqueate ovajiro, cotanquitsiquea teequea intsajiteroji taaca opaji ocantacoquea, ocanquequea:

“Vavironia anaajencavaetatsica, iniro cantatsatantajatisca, aisa iroguenti guivorocajengcagueta-queroca covaeguisherentsima-jaca quepatsiquitica.”

<sup>6</sup>Iroompaquea namenitsitaroquea oshinquitacaro iriraja igomajamajare Aapani Irioshi ometoja-cantajiaqueca, iriotari tsavetantajiaquerica Jesoshi.

Arikea namenaquitigiro oacaavaetanaquena intati. <sup>7</sup>Cotanquitsiquea iriraquea ashivanti icanquena: “¿Quero-quea ococani poantantanacaca intati? Imaicaquea noguisotoguempirojate ocantacoguetaqueca ocatica manquigarentsi jeeri aisa covejencavetsica quijanaqueroca choocatanquitsica 7 iguitopae aisa 10 ivaapae. <sup>8</sup>Iriratica covejencavetsica pinejaqueca, coramani ichoocaveca, imaica tee inchoocatajeji, cotanquitsiquea incoraquetapanajante inquenantapojem-paro omoro oagantavaetananquitsica isaviji, arikea interoncajikeri. Coramani iroquerogueti ipeacaacarogueti Aapani Irioshi quepatsi ocancani itioncacojiqueroquea ivaperitequi ivajiro- pae maasano coguitatsineca inchoocajiaque. Iriraquea guntenijatisca quepatsi qui teeca intioncacojiguempajii ivajiro- pae mana iroaroaitanaque intati iramenajiaquerigueti iriratica covejencavetsica, iroorijite ichoocaveta- ca coramani, tee inchoocatajeji imaica, cotanquitsi inchoocataje.

<sup>9</sup>“Quericaca tsatanquitsica inquemavaqueroja noncanqueca imaica. Oraquea 7 iguitopae iroguenti ocantacoque 7 otsempi osavicantacaca oratica manquigarentsi. <sup>10</sup>Aisa iriguenti ocantacoque 7 majirontajatisca. Imajirontavetaca 5, metojajiaque. Aparo imajirontaca imaica. Iriraquea itsipa tequerata incoraqueteji. Oraquea incoraquevetapojoempagueti taampina irimajirontavetapanajantempa. <sup>11</sup>Iriraquea covejencavetsica choocavetsica cotanquitsiquea teequea inchoocatajeji imaica, iriotari majirontajatsineca oochotapojsineca. Ichoo-  
ca-

veca coramani, cotanquitsiquea iroompaquea imetojaque, jero ocantacottantacarica apaguitotiro iguito carajitsica 7. Oncoramanitapojaquejugueta incoraquepanajante impeapanajantempauea majirontatsica, ariquea interoncajueri.

<sup>12</sup>“Oraquea 10 ivaapae pamenagueta queca imaica iriguentijia ocantacoque 10 peajianquitsineca majirontajitsica. Tequerata irimajrontajiguempaji. Arikea incantajiqueru impeajaquempauea majirontajitsica intsipatsipaitaquempari covejencavetatsica, cotanquitsiquea aatoquea osamani imajirontajiga. <sup>13</sup>Irirajia 10 majirontajitsica inquemavacaajiaquempa iroguijaguijatanaqueri covejencavetatsica irinetsanjaqueroquea taaca opaji inintagueta queca iriatimpa, impatampishicajaqueri irimajronquempaniji. <sup>14</sup>Iroompaquea iriatimpa incapiocajiaqueriquea maasano intsipatsipaitashiquempari quea irashimirintsjavetempari Ovejajaniqui, cotanquitsiquea iriguenti agavejantanquitsine Ovejajaniqui, iriguentitarite Anaantaguetatsica anaaguetaquerica maasano anaantaguevetatsica, iriguenti Majirontatsica anaaguequerica maasano majirontajitsica. Iriraquea intsipatsipaiquempaca iriguentijia icajemajiaqueca Aapani Irioshi icoguijajaqueca quisho oahoaiquerineca.”

<sup>15</sup>Iroompaquea icanquena ashivanti: “Oraquea otsipajatopae pamenagueta queca osavicantaguetacaca cantatsatantsica iriguentijia ocantacojaque maasano caquinteguetatsica caramirincajitsica guntenijiatsica quepatsipaequi cantashitatiaguetanquitsica iguenquetsatsarepae. <sup>16</sup>Iriraquea covejencavetatsica intsipatsipaiquempari irirajia majirontajitsica ocantacojiaqueca 10 ivaapae, irisemasemaitana-

quemparo cantatsatantsica, incatsimajianaquero irisapocatsinojiaquero cajaratsinoni oncanquempani. Aisa irishecajiaquemparoqua oteshi, iroompaquea intajajiaquero. <sup>17</sup>Iriotarite cotacaacaro Aapani Irioshi iquemava-caantantajiacaca iroguijaguijajiqueru quecovejencavetatsica impatampishi-cajaqueri irimajironquempaniji, arejevaetaquempa onetsanamajaquempa icanqueca Aapani Irioshi. <sup>18</sup>Oraquea manquigarentsi pinejaqueca imaica manaquea ocantacoque oratica gunteninintsi anaajencavaetanquitsica agavejajiaquerica maasano majirontajitsica quepatsipaequitica.”

### Interoncajitaquerigueti Vavironiaquitica

**18** <sup>1</sup>Iroompaquea nameniriquea itsipa ashivanti yaguijatopojaque iquenapojaque inquitequi. Yagaveja-vaeque, yoganejencavaetaca, itsirenca-guitejavaetanaquereroquea maasanopae quepatsi. <sup>2</sup>Arikea irijencavaetanaque icajemanaquequea icanque:

“iSoveaca! iSoveaca Vavironia oratica gunteninintsi anaanta-vaevetatsica!  
Iriguenti guntenitananjaro ampatsiniji,  
iriguenti chocatantajiacaro taaca ipajitapae ampatsiniguetatsica,  
iriguentijia aisa maasano aragueta-tsica teeca incameetsaguetejia  
aisa joratantaguetatsica.

<sup>3</sup> Iroorijite maasano guntenijiatsica quepatsipaequi yoayoaitashijinaqueriquea guntenijiavetanquitsica Vavironiaqui, arikea yaajencatsjiaqueriquea icovaeguishetacaajavacari, quejetaca imiritsipojacaro oguepisshiarote cantatsatantsica.

Aisa maasano majirontajitsica ishineventajiavecari itsipatsi-

paivecarí icovaeguishejiaca-gueti covaeguisherentsipae.

Arikea iquempejiaja jocantavaetasica iriatimpajia iquenaquenai-vaetapojaque osamanipaequi yamapinijigueroqueate taaca opajitapae irajaararo oraniqui Vavironiaqui yojocantantapini-jiaqueroquea yaantajiacaro-quea imentaquipae, caavijitari ishineventajiacaro Vavironiaquitica irajaarantajia-quempaquea.”

<sup>4</sup>Iroompaeua noquemiquea iquenquetsajencajitanaque oquenajenca-vatapojo inquitequi, icantajiti:

“Pisotoanaqueroshiatsi, aviatimpajia nashintajiacaca, aatonijite paajencatsijiguirotsi ogovaeguisherejia, aatonijite notsipatacaantajiguimpiro nantsipetacaavaequemparo-gueti.

<sup>5</sup>Otigariseavaejiaquero ogovaegui-sherejia arejevaetanaca inqui-tequi.

Ogantaga iquenquejacotiro Aapani Irioshi oveacaaguisherejia.

<sup>6</sup>Querocagueti ocojiaquerini itsipajia ariqueate pinquempetacaa-quemparo iroatimpa, cotanquitsiquea caaviji pogaaquero-quea.”

Atsipetacaantajiacatarite, imaica ariqueate pinquempetacaa-quemparoquea iroatimpa, caaviji pogaaqueroquea pantsipeta-ccaquemparoquea, quempetaca inconoajatashijitaque-rogueti quepishijamajatanqui-

tsica iroguipjatashimajatanta-jitaquemparo manquigarentsi oshovaotequi.

<sup>7</sup>Osemesemeitaque ocantacoguitani, aisa ocantacoguitani osavica-ventaqueroquea maasanopae onintagushequeca iroatimpa.

Imaicaquea pogupiashitantajem-pa-roja iroatimpa, panaacaavaeta-jero antsipevaetajempaqua eoshimampojancaguitempani.

Aventacoca oquenquetsashirentaque ocantaque:

“Manaquea nosavicaque quejequena majirontatsica.

Teequea nonquempetemparojo metojacoro coguitejacovaeta-tsica,

aatotarite noshimampojancavaeta.”

<sup>8</sup>Irootarite onteroncantapanajantem-paca taampina Vavironia, apajencaro savincaguiteri ontatiavaetanaquemporoqueate atsipe-tagantsipae: metojagantsi, shihampojancagantsi, tasetsi-jenca.

Iroompaeua irampevoquijajita-quer Vavironia apevoquianisan.

Yagavejamajatitarite Aapani Irioshi Majirontamajatatsica cantoma-jaqueroca.”

<sup>9</sup>Irirajaquea maasano majirontajia-tsica quepatsiquitica shineventajiavecaroca Vavironia tsipatsipaivecarica guinentinitantajavetaroca ipeacaaguishiavaecagueti covaeguisherentsi iriraacojiaqueroquea incajemajianaque-quea iramenajiavaquerogueti ampevo-quijanaquempagueti oncatipogajencata-

w <sup>18.6</sup> Tee onconigamajateji queri iquenquetsatacaaueca acaniqui. Arica imaica ipitsocashitanacari majirontajatsica itsavetacotaqueca incajarandqui capitoroqui 17 otsapaqui 16, iquenquetsatacaaqueri iriatimpajia semajiacaroca Vavironia iquejetacaacaca manquigarentsi. Imaica icanque irantsipetacaajiaquempari choocatantajiacaroca.

naquempaquea.<sup>10</sup> Omintsaromintsaro-vaetanaqueri iramenajiavaquerogueti atsipetsipevaetaca, incaticatiivaeta-naque ontaniqui, incantajigue:

“¡Ooo! ¡Ooshiatsi, aviatimpajia gunteniguinentantaroca Vavironia anaajencavaevetasica tampishivaevetasica!  
Aapojacagueti icantomajajitimp-  
gueti apajaniquiro hora iteron-  
cajitaquempi.”

<sup>11</sup> Arikeante inquempejiaquempaquea aisa jocantantajatisca quepatsipaequiti-  
ca irirajianaquempa iriraacojiaquero-  
quea incajemavaejianaquequea  
iramenajiaguegueti quericampate  
vegarajajeroneca irajaararopae.

<sup>12</sup> Quericampate vegarajajerineca ooro,  
perata, cameetsapiripae, peerera,  
aramaroncari quitsaarentsipae ipeacaaji-  
taca quitamaromorenaro irino, irooca  
aisa carenimorenaro sera, aisa otsipapae  
quitsaarentsipae camachoncamorenari  
aisa quityoncamorenari, irooca aisa  
poncaguetatsica inchato, irooca aisa  
taaca opajitapae ipeacaajitaca itsiconte  
erepaante aisa cameetsaripae inchato,  
cavorejari quishoguetatsica quejecaroca  
voronquise aisa yero, aisa mapi icantaji-  
tica maremoro. <sup>13</sup> Quericampate  
vegarajajeroneca casancapaneri canera  
aisa otsipapae casancapaneri iconoanta-  
jiguetaroca ishecajiguetaca, casancapa-  
neripae itajaitica, mira, poncadjenca-  
ripae, vinoja, oreji orivo, shipetapaneri  
tirigovane aisa tirigoqui. Quericampate  
vegarajajerineca caapironcaari, oveja,  
quitavaireri, aisa itigaritacotantajitaca  
itigaritanaqueca quitavaireri. Quericam-  
pate vegarajajerineca iromperaperai-  
taca irashintajiaquempaca, yojocantajia-  
vetacaritari irapicaquintete. <sup>14</sup> Incantaji-  
aqueri Vavironiaquitica:

“¡Teetarite onchoocatajeji maasa-  
nopae pishineventamajiacaca,

jac oteroncaguetanaca maasanopae  
cameetsaripae pashintajiacaca  
aisa taaca opajitapae vegaramajata-  
tsica pishineventajiacaca,  
imaica aatonica pinejajiro aviatim-  
pajia!”

<sup>15</sup> Irirajiaquea jocantantajatisca  
ashintaguetanquitsica imentaquitsitepae  
yaantajiacaroca irajaararo yojocantajia-  
querogueti Vavironiaqui intsaroajiana-  
quequea iramenajiavaquerogueti  
irantsipejiaquempaca, incaticatiivaeta-  
naque ontaniqui. Iriraacojiaqueroquea  
Vavironia incajemajianaquequea,  
<sup>16</sup> incantajigue:

“¡Ooo! ¡Ooshiatsi, gunteninintsi  
anaajencavaevetasica!  
Yamenajiqueroquea iroqueragueti  
quempetaca manquigarentsi  
onetsanatacotagueti oquitsaata-  
rogueti shipetamorenaro  
quitsarentsi camachoncamore-  
naro aisa quityoncamorenaro  
ipeacaajitaca irino.

Oshequiaavaetanaquequea ocantashi-  
tatiaguetanacaquea yavitajigue-  
tacaca aisa inenqueuijigueta-  
caca oconoaca iriguenti  
ipeacaantajiguetacaro ooro,  
otsipapae manaquea ipeacaan-  
tajiguetacaroquea cameetsapi-  
ripae aisa peerera.

<sup>17</sup> ¡Taampinashiatsi ojatacopanajanti,  
imaica jac apajaniquiro hora  
oteroncaguetanaca maasanopae  
ajaarantavaevetacaca!”

Arikea inquempejiaquempa maasano  
taquiajigueroa quenajarontsi inirotsan-  
tsanapae, iriguentijia tetantajigaroca,  
iriguentijia marinerojia amijiguirica  
taquiajigueroa, iriguentijia aisa  
maasano antavaejatisca inirojaniqui  
quentijani jmm, incaticatiivaetapojaque  
ontaniqui. <sup>18</sup> Iramenajiavaquerogueti  
ovogajencavaetanaquempagueti oratica

guinteninintsi, incajemajianaque  
incantajigue: “¡Querocampate onchoo-  
catajeni otsipa quempetajemparoneca  
iroatimpa anaajencavaetajequeate!”  
<sup>19</sup>Arikeate incojianaquempa iroajana-  
quemparoqua quepatsivane iguitoqui  
iriraacojiaqueroquea incajemajianaque  
incantajigue:

“¡Ooo! ¡Ooshiatsi, gunteninintsi  
anaajencavaevetatsica!  
Irootaqueuea choocatacaaajiaveca-  
rica imentaquitsitepae ashinta-  
jiatsica iguenajaro,  
ivegaraventajiqueroquea taaca  
opajitapae ishineventajigueta-  
caca.

¡Taampinashiatsi ojatacopanajanti,  
imaica jac apajaniquiro hora  
teroncajia maasano guntenin-  
tantajigaroca!”

<sup>20</sup>Cotanquitsiquea imaica pishinejia-  
naquempaja aviatimpajia inqui-  
tequitica.

Pishinejianaquempaja aviatimpajia  
igomajamajare Aapani Irioshi,  
aisa aviatimpajia itigarancaneja  
Jesoshi, aviguentijia aisa tsave-  
tantajiatsica,

pamenajiaqueriquea iteroncajiaque-  
riquea Aapani Irioshi maasa-  
noja Vavironiaquitica,  
aviguentijiaquea yompejiaca.

<sup>21</sup>Iroompaquea nameniriquea  
ashivant agavejavaetatsica yaaquiero-  
quea mapi quejevaeca inirotsentseina  
shimentapiri itononcantajitaca, ipishon-  
cataqueroquea inirojaniquí quentijani,  
iquenquetsatanaque icanque:

“Arikea inquempetacaajitaquempa-  
roquea Vavironia oratica

guinteninintsi anaajencavaeve-  
tatsica,  
quejeni nopishoncajataquerogueti  
mapi, arikea ompejaenca-  
quempa,  
aato yamenajitajirotsi.

<sup>22</sup>Aatoquea iquemajitajirotsi  
yampenejencatacaaajitajaro  
aarepa pivogeniqui, Vavironia,  
aisa aatoquea isoncajitali, aatoquea  
icovijitaji, aatoquea itivojitaji.  
Aisa aatoquea ichoocatimatajitsi  
antavaetajatsineca aviatim-  
paqui,  
aisa aatoquea iquemimajitajirotsi  
itononcantajitaca.

<sup>23</sup>Aatoquea itsivojitaritsi tsivorentsí  
aviatimpaqi.

Aisa aatoquea iquemimajitajiritsi  
aviatimpaqi iriaqueraca  
manquigatanquitsica aisa  
imanquigare.

Irorijite yanaajencajavetaca  
quepatsipaequi jocantantajitaatsica  
guinentantajiaequequempica.

Pamatavimatavivaequeriquea  
maasano quepatsipaequitica  
pimatsitantigueti.

<sup>24</sup>Oraniquitarite imetojacaantajitaqueri  
tsavetantajitaatsica aisa itsipajia  
igomajamajareja Aapani Irioshi  
imetojajitaqueca,  
aisa maasano itsipajia imetojajita-  
queca quepatsipaequi.”

Itsaroventajiacari Aapani Irioshi inquitequi

**19** <sup>1</sup>Iroompaquea noquemiquea  
icajemajianaquequea inquitequi  
icaramirincavaeque jmm, icantajigui:  
“¡Antsaroventemparija Yave!<sup>x</sup>

<sup>x</sup> 19.1-6 Ocanquegueti ocaniqui *iAntsaroventemparija Yave!*, iguenquetsatsarequi evereo  
icanquero *iAleluya!* Oraquea *Yave* iroguenti ivajiro Aapani Irioshi. Iguenquetsatsarequi  
evereojia iraqueate Aapani Irioshi ipajita *YHWH* (Yahweh). Ancanquequea *Yave*.  
Yoguipitsocajitaquerogueti quimajareritsaqui iconoagarantaca icanqueriquea *Jehová*, itsipajia  
icanqueri *Yavé*.

Iriguenti aavacaji Arioshite Majiron-tamajatatsica,  
ochoocataqueta iroganejencare  
aisa iragavejane.

<sup>2</sup> Teequea inchoocateji incatsimata-shiquempaca, tampatica  
yoquiero maasanopae,  
jero icatsimatantacaroca caavijica  
ocantatsatanti  
jocajencajiaquenerica otsanirore  
maasano quepatsipaequitica.  
Aisa icatsimati menquerouquea  
yompetacojiacari irajaanirejia  
ometojacaantajiaqueca.”

<sup>3</sup> Icantijianajaquea aisa:  
“¡Antsaroven tempariaja Yave!  
Iroatimpa oncoquempani ompoase-cantaguitempani, aatoquea  
osajaencatacota mitatitsi.”

<sup>4</sup> Iriraquea 24 iramajiroejia aisa 4  
anijaripae itiguerova entajiacari Aapani  
Irioshi savicanquitsica imajirontamen-toqui, itsaroventajiacari icantajigui:  
“¡Arimajaguitatsi! ¡Antsaroven tem-parija Yave!”

<sup>5</sup> Iroompaquea noquemiquea  
iquenquetsajencajitanaquequea oquena-jencatantapojacaroquea imajirontamen-toqui Aapani Irioshi icantajiti:  
“¡Pintsaroventajiguemparija Aapani  
Irioshi,  
maasano aviatimpajia irajaanirejia,  
aviatimpajia pincatsajiguirica,  
maasanomajaca: anaantajianqui-tsica aisa teeca panaanteji!”

<sup>6</sup> Iroompaquea noquemiquea quempejen-cavaeca icajemamirincatigueti caquintejia,  
aisa quempetaca opojimajencajatagueti  
omporocajatagueti ojaquiniqui, aisa  
quempetaca otampishijencajigueti caret-iocanquitigueti tsijec tsijec, icantajigui:

“¡Antsaroven tempariaja Yave!

<sup>7</sup> Ilmajirontamajata catarate Amajirote  
Aapani Irioshi Agavejamajata-tsica!

<sup>7</sup> Jaameja ashinevaejiaquempa,  
ashineventamajajiaquempari  
ancantajiaqueri: ‘Aviguenti caaviji  
poganejencamajataca’,  
arejetapojacatarate savincaguiteri  
iraanquemparoca Ovejajani qui  
inintane,  
iroatimpaquea netsanataconi.

<sup>8</sup> Icavintsa jiquero yojocajiquenero  
oquitsaacaca  
ogameetsamorenaren ireno saanca-more-nari.”

Oraquea ireno ocantacoque icomajama-jajiacagueta igomajamajarejia Aapani  
Irioshi.

<sup>9</sup> Iroompaquea icanneda ashivanti:  
“Pintioncacotavaqueroja ocatica:  
‘Irishinetacaavae jitaquempariquea  
maasano icajemajita queca irishecajia-quempa irogavisaajitaquenerigueti  
Ovejajani qui iraaquerogueti inintane.’”  
Aisa icanneda: “Ocatica quea pitionca-vaqueca imaica iroguenti iroomajaca,  
iroquentiquea Iguenquetsatsare Aapani  
Irioshi.”

<sup>10</sup> Notigueroaventavetanacari  
ashivanti nontsaroventaqueemparime-quea, cotanquitsiquea iriatimpa  
icanneda: “Aatoquea piquejetirotsi  
imaica, naroguentitari papiajanirentsi-teni, aritarite noquempetajimpitarite  
aviatimpa aisa papitsaroventarijateni  
tsavetantajiguirica Jesoshi aisa netsana-majati roca itsataca antaguetaica.  
¡Iriompani pintsaroventempa Aapani  
Irioshi! Iroorijite tsavetantica Jesoshi,  
irotaquequea tsatacaashirentagueta-querica tsavetantajatisca.”

### Shiacotantacarica quitamarori quitavaireri

<sup>11</sup> Iroompaquea nameniroquea inquite  
tanarejaca, conijani quitavaireri  
quitamarori. Iriraquea shiacotantacarica

manaquea icantajiqueru Netsanamajati-roca Iguenquetsatsare, aisa icantajiqueru Iriomajaca, itampaticamajatirotari maasano icantomajantigueti aisa yashimirintagueti.<sup>12</sup> Oraquea iroquija quempetaca paamarimoreca. Oraqueate iguitoqui ochoocaque oshequiavaeque-quea iramatsaero. Aisa tioncavaca ea ivajiro teeca intsjiteroji, irguentiquea tsataquero.<sup>13</sup> Oraquea iquitsaatacaca yajavicasiquea irajantsiqui. Oraquea ivajiro iroguenti Iguenquetsatsare Aapani Irioshi.<sup>14</sup> Yoguijajipojaqueri igoaretajiate choocajitsica inquitequi. Iquejetavacaajiaca quitsaajiaca aramaroncari quitsaarentsi ipeacaantajitaroca irino, quitamaromorenavaeque saancamorenavaeque. Ishiashiaitacontajiacari quitavaireripae quitamarori.<sup>15</sup> Oraquea ivagantequi iriatimpa osotoatsantsamenivaeque itsaampsan-tsamenirite yamecamajajitaqueca iragavejantajiaquemparica maasano quepatsipaequitica. Impeamajataquem-paquate Majirontamajatatsica irimajirontantaquemparo imajirontaqui-jire ipeacaajitaca cavorejari quishoma-jatatsica,<sup>y</sup> iragavejaqueriquea maasano teeca inquemisantajiguereji. Incatsimaj-avaequeriquea irantsipetacaajiaquem-pari inquempetacaajiaquempariquea agaticamirijaquitiroca ovaitsoqui. Iriguentitarite catsimajiaquerine Aapani Irioshi Agavejamajatatsica.<sup>16</sup> Oraquea iitsaarequi aisa ivoriqui ochoocaque otioncaca ocanque:

“Majirontamajatatsica anaagueque-rica maasanopae majirontajia-tsica,

Anaamajatatsica anaaguequerica maasano anaaguevetanqui-tsica.”

<sup>17</sup>Iroompaquea nameniriquea itsipa ashivanty catiaca catsirincaiteriqui icajemacojaqueriquea maasano arajian-quitsica quempeguevetarica sheetyaoni, iririjencavaeque icanca icanque: “iCaacateshia pincapiocajiaquempa pishecajiaquempa irojocajiaquempica Aapani Irioshi!<sup>18</sup> iPishecajiaquemparo-quea iteshi majirontajitsica aisa jivajivaitirica igoaretajiate, aisa itsipajia tampilshiri, aisa iteshi quitavaireripae aisa shiacotantajiacarica! iPishecajia-quempariquea maasano, irioca yashinta-jitaca irioca teeca irashintajitempariji! iPishecajiaquempariquea anaaguevetan-quitsica aisa teeca iranaajencavaeteji!”

<sup>19</sup>Iroompa namenitsitari covejencavetatsica, aisa imajirojiate quepatsiquitica itsipajiacari igoaretajiate, iroguentiquea icapiroimentajiacarica irashimirintajia-quempari shiacotantacarica quitavaireri aisa igoaretajiate. <sup>20</sup>Iriraquea covejenca-vetatsica yaajiqueru iconoacaantajicari tsavetantatsica amataavaetatsica nigaimotaquerica oacaantantatsica intati. Oraquea oacaantantatsica intati irootaquequea yamatavimatavivaetanta-carica maasano itioncacojiqueca ivajiro covejencavetatsica, aisa maasano tsaroventajiacarica ivaantorite ipeacaajitaca iquempetacaamajavetajari iriatimpa. Mavitequea ipishoncajiqueru anijatseentenatiraja osamimicatsants-morecavaequeguedi asopiri, quempeni incajaremocareci. <sup>21</sup>Iroompaquea iriraquea shiacotantacarica quitavaireri mana imetojantacari itsipajia itsaampsantsamenirite sotoatsantsamenitanqui-tsica ivagantequi. Maasanoquea araguetatsica shecaguetarica iteshipae yomporoguijaventajiacari ishecajiacari, iquemamajajianaca.

y 19.15 *Irimaljirontantaquemparo imajirontaqui-jire ipeacaajitaca cavorejari quishomajatatsica.* Irooqua ocanque intampishitashimajaueroquea irimajironquempagueti.

Iyavitacojiqueru Satanashi 1,000  
ajagantsini

**20** <sup>1</sup>Iroompaquea nameniri itsipa irashivantite Aapani Irioshi iquenapojaque inquitequi yaguijatopajaque, yajiricaquero iniropetana cavorejatsari aisa yavi iriyavirejantaquemparoca omoro oagantavaetananquitsica isaviji. <sup>2</sup>Ariquea yaopojaqueruea casantonqueniniro yoishotapojaqueri incoramanitacovaetanaqueuea 1,000 ajagantsini. Iriotaqueuea camaarini coramanitica, iriotaque ampatsini pajitatsica Satanashi.<sup>z</sup> <sup>3</sup>Iroompaquea ipishonquitsitari omoroqui oagantavaetananquitsica isaviji, yashitacotsitari iyavitacotsitari. Ivinchajacoseyotsitari aatonji isotoaji iramatavimatavivaetajeri quepatsipaequitica arejevaetaquemparo anaavaetanajegueti 1,000 ajagantsini. Oncoramnitapoja jegueti intanarejacotsijivetajemparie, cotanquitsiquea capichaji inchoocavetapanajantempa.

<sup>4</sup>Ariquea namenitsitaro majirontamentontsipae, isavisaviitantacaro irirajia ipeacaajitacaca jivajivaitatsica icantajitaqueca irinetsanajaqueriquea maasano. Aisa namenajaqueroquea ishirejia ijitorejimentajiguequeca itsavetantajiaquerigueti Jesoshi, aisa itsavetantajiaquerogueti Iguenquetsartsare Aapani Irioshi. Iriatimpajia teequea intsaroventajiguempariji covejencavetatsica aisa ivaantorite ipeacaajitaca iquempetacaamajatajaca iriatimpa, aisa teequea irisantoncatacotsitempariji ivajiro covejencavetatsica ivancaqui aisa iracoqui. Ariquea namenajaqueri itancoretancoreitanaji itsipatsipaitanajari Quirishito ipeajiacqueate majirontajiatsica arejevaetana-

quempa aapojajempagueti 1,000 ajagantsini. <sup>5</sup>Itsipajia metojajavetanquitsica tequerataquea intancoretancoreitajeji, iriatimpajia manaquea intancoretancoreitanaje anaanajempagueti ocatica 1,000 ajagantsini. Ocaticaquea nocanquempica imaica iroguenti icantajitica “iroquetica intancoretanco-reitantanajempaca”. <sup>6</sup>Iriraquea Aapani Irioshi irishinetacaavaequempariquea irirajia tancorejantajianajemparoneca oratica icantajitica “iroquetica intancoretancoreitantanajempaca”, iriguentijiaquea comajamajajatiatsica. Aatotarite agavejajajiri “mavitetapojsineca metojagantsi”, manaquea impeajiaquempaquea isaserorotejiate Aapani Irioshi aisa isaserorotejiate Quirishito. Aisa intsipatsipaitajempari impeacaajiaquempari majirontajiatsica irimajironta-jiaquempa 1,000 ajagantsini.

### Intsijaiqueriquea Satanashi

<sup>7</sup>Oraquea anaanaavaetananajegueti 1,000 ajagantsini irisantanatacorejajitajeriquea Satanashi. <sup>8</sup>Iroavaetanaqueuea intsitacaguitejavaetanaquemparo quepatsi iramatavimatavivaetanaqueriquea maasano caquinteguetatsica incapiocajiaqueriniji irashimirintajiaquempaniji. Iramatavijaqueri Gogue aisa Magogue incapiocantajiaquemparica igoaretajiate, intirorencavetaquemparaquea incaramirincajiaque jmm inquempavaetanaquemparo quea impanequi ocaratsapijajatapojaquegueti inirojani quentijani.

<sup>9</sup>Iquenaquenaivaetapojaque quepatsipaequi itsitacaguitejavaetanacaroquea, yanquitsaetacovaetapojacari tsaroventajiacarica Aapani Irioshi aisa oratica guinteninintsi ipintsamajataca, cotanquitsiquea yasacaraashijitaqueri

<sup>z</sup> 20.2 Jen. 3.1, 13.

paamari oquenapojaquequea inquitequi  
otsiajiaqueri apevoquijavaetaqueriquea.  
<sup>10</sup>Iriraquea ampatsini amatavimatavi-  
vaetaquerica ipishoncjtiqueriquea  
osamimicatsantsamorecavaequegueti  
asopiri quempeni incajaremocari  
ichoocaquegueti covejencavetsica aisa  
tsavetantsica amataatsica. Incoguitem-  
paniquea irantsipeguitempani savinca-  
guiteriqui aisa pitsecariqui, aatoquea  
ivejencarejacovaetajatsi.

**Ontaniqui oguitamaroren  
majirontamentontsiqui  
iramenacotsijiacapiro antajaqueca**

<sup>11</sup>Iroompaquea nameniroquea  
iniroshitaponcarovaeca majirontamen-  
tonsi oguitamaroren. Arikea  
ichoocaque savicantacaroca. Oraquea  
quepatsi aisa inuite ariqueate  
ocotanaca opeimocari, teequea  
irinejimajitjeroji. <sup>12</sup>Arikea namenajia-  
queriquea metojajianquitsica, caavijica  
yanaajencavaeti aisa teeca iranaajen-  
vaeteji, icatintiitomoijacaro majironta-  
mentontsi. Nameniroquea ampinaicare-  
jaguetacaquea paperipae itioncacotanta-  
jicaroca ipeacaaguetacaca maasano  
caquinteji. Iroompaquea ampinaicare-  
jaca otsipa paperi itioncacotantagueca-  
roca ivajiropae maasano coguitatsineca  
inchoocaguuteni. Iriraquea savicanqui-  
tsica imajirontamentoqui icanque  
queroquea incojitaquerini aparopae  
caquinte, iroguentiquea yoguijataco-  
taque itioncacotantajicaca paperiqui.  
<sup>13</sup>Arikeate iquempetacaajiacari  
maasano metojajitsica choocajitsica  
inirojani quentijaniqui, icajemajiaqueri  
yoguisotosotoajaitaqueriquea, iriguen-

tija aisa maasano metojajianquitsica  
choocavaetanquitsica Areshiqui<sup>a</sup>  
icajemajiaqueriquea icapiocajiaqueri-  
quea, ariquea icanque quero incohincor-  
querini aparopae, yoguijatacotanaque-  
roquea tioncanquitsica ipeacaajiacaca  
caquinteji tequeratagueti irimetojeji.

<sup>14</sup>Oraquea Metojagantsi aisa Areshi  
ipishoncjtiquerero incajaremocariqui.  
Oraticaquea incajaremocari iroguenti-  
quea icantajitica “mavitetapojsineca  
metojagantsi”.<sup>b</sup> <sup>15</sup>Arikeate iquempeta-  
caajitacariquea aisa maasano teeca  
itioncacotempaji paperiqui itioncacot-  
tantajitacarica ivajiropae maasano  
coguitatsineca inchoocaguuteni.  
Maasano teeca itioncacotempaji  
ipishoncjtitaqueri incajaremocariqui.

**Iroaqueraro inuite aisa quepatsi**

**21** <sup>1</sup>Iroompaquea namenagueque-  
roquea iroaqueraro inuite aisa  
iroaqueraro quepatsi. Oraquea iroqueti-  
nica inuite aisa iroquetinica quepatsi  
jac opeagueca. Arikea oquempetaca  
inirojani quentijani iroatimpa jac  
opeagueca. <sup>2</sup>Naatimpa nameniroquea  
agujitacotapojaque iroaqueraro  
Jerosare caavijica oganejencamajataca  
yashintacaca Aapani Irioshi, oquenapo-  
jaque inuitequi iriatimpaqui. Netsana-  
tacovaecaquea ocanca quempevaeca  
onetsanatacovaettagueti manquigarentsi  
irooshipojaquegueti irimanquigatem-  
paro nintiroca. <sup>3</sup>Iroompaquea noquemi-  
quea iquenquetsajencajiquequea  
oquenajencavaetantapojacaro majiron-  
tamentontsi. Carajencajeguiniquea  
ocanca icantajitaque: “¡Pameneroja!  
Imaicaquea oratica Itaverenacorote

**a 20.13 Areshiqui.** (Pamenero 1.18; 6.8.) Oraquea Areshi iroguenti ichoocajiaquegueti  
metojatsica tequeratagueti impishoncjtiteriji camorecariqui. Irira guiriego icanquero *hades*,  
iguenquetsatsarequi evereo icanquero *sheol*.   **b 20.14 mavitetapojsineca metojagantsi.**  
Pamenero 2.11; 20.6; 21.8.

Aapani Irioshi ochoocatimojiaqueri caquintejia, iriatimpa iriguintenitimojiaquempari, impeamajatajeri igaquintejiate incoquempani inconoavaequeuempari. Iriatimpajia impeamajatsitempari Irioshimajate.<sup>4</sup> Iriraquea Aapani Irioshi irisheoquijajeneriquea maasano ijaquija, aatoquea ijaquitajitsi. Aatoquea imetojajajitsi, aato irajaijaatsi, aatoquea icajemajajitsi, aisa aatoquea icatsijajitsi, maasanotari coramaniquitica jac anaaguetanaca.”

<sup>5</sup> Ariqueate iriraquea savicanquitsica majirontamentontsiqui icanque: “iPame-neja, niroqueratacaaguetajeroquea maasanopae!” Aisa icanque: “Pintonacotavaqueroja maasanopae nocantaguequeca, iroguentitari iroomajaca, teequea namataguempaji.”

<sup>6</sup> Iroompaquea icanquena: “Imaica-quea agataca. Naroguenti *Alfa* aisa naroguenti *Omega*, <sup>c</sup> nocoguitanitarite nochoocaguitini, aisa aatoquea nosanti-coguitejacovaetajitsi. Quericaca miretanquitsineca nojocaqueneriquea irimiraqueroquea motojaaro anijacaantantatsica. Aatoquea ivergaraventirotsi, manaquea nojocashiquenempari intati.

<sup>7</sup> Quericaca tampishitashijiaqueroneca maasanopae coraquetashijiaquerineca noncavintsajaqueriquea nojocaqueneri maasano oraticapae, irashintajempar-quea. Impeamajatsitenia Irioshimajate, naatimpaquea nirajanitsitempari.

<sup>8</sup> Cotanquitsiquea maasano tsarontijia intsiajiaquempaquea osamimicatsantsa-morecavaequegueti asopiri, quempeni incajaremmorecari. Arikea iquempejajica teeca intsaroven-tajiguenuji, iriguentijica coguishemajajajitsica, iriguentijica metojantajajitsica, iriguentijia cantatsatantajajitsica, iriguentijia

matsinti aisa itsipajia aventajiacaroca iragavejanepae ampatsinipae, iriguentijiaca peajiaquerica itsipa irioshivijita-shicaca, iriguentijica aisa maasano tsojenti. Oraqueate intsiajiaquempaguetti osamimicatsantsamorecavaequegueti iroguentiquea icantajitica ‘mavitetapoja-tsineca metojagantsi.’”

### Iroqueraro Jerosare

<sup>9</sup> Iroompaquea icoraquetashiquenae-quea aparo ashivant i tipajiacarica incajaranqui itsipajia ashivantijite socajiaqueroca oratica 7 atsipetagantsi carapojsatsica yajiricacojiaqueca yatsipe-tacaantajiacarica quepatsipaequitica, icantapojanaquea: “Caacateja nonigaa-quempiroquea inintane Ovejajaniqui irimanquigaquempaca.” <sup>10</sup> Arikea yaashirentavaetanaquenaqueate inirotsempivaetatsica agasataavaetan-quitsica. Yonigaaguequenaroqueate Jerosare, oratica quinteninintsi caavijica oganejencamajataca yashintacaca Aapani Irioshi, oquenapojaque inquitequi ichocatigueti Aapani Irioshi agujitacotapojaque. <sup>11</sup> Cantavaequequea tsiren otsirenquitsitaroquea iroganejen-care Aapani Irioshi, quempevaeca mapi vegaravaetatsica, quempetacaro jaashipe, saancorencapiri. <sup>12</sup> Anquitsae-tacocaroquea iniropiricavaequequea tantontsi ocaravaequequea jenoqui, osotomorosotomoroataca ocaravaeque 12, aisa ichocataque 12 ashivant quempoguijaqueroca osotomoropae. Aisa aparopae ashitacoropaequi chooca itioncacojiqueroquea aparo ivajiropae irijanijiate Ishiraeri, ariqueate icarajiaque iriatimpajia aisa 12.

<sup>13</sup> Oraquea tantontsi chooca 3 osotomo-ropae tampaticataqueroca isotoguigueti

<sup>c</sup> 21.6 *Alfa* aisa *Omega*. Oratica *alfa* iroguenti paria-pajaroca *abecedario* irashi guiriego. Oratica *omega* iroguenti carapojiroca.

catsirincaiteri. Oraquea iquijigueti ochoocaque 3. Arikeate oquempetaca ocatoncopojaquegueti ochoocaque 3, aisa oquirincopojaquegueti ochoocaque 3.<sup>14</sup> Oraquea isaviji otantotacagueti ochoocaque 12 mapi oquishomajatancaca. Aparopae ochoocaque itioncacojiqueroquea aparo ivajiropae itigarancane Ovejajaniqui, arikeate icarajiaque iriatimpajia aisa 12.

<sup>15</sup>Iriraquea ashivanti quenquetsatacaaquenaca yajiricaquero cavorejaquijiri igomarotantajitaca ipeacaajitaca ooro, irigomarotantaquemparoca Jerosare, aisa osotomoropae aisa otantopae.<sup>16</sup> Oraquea Jerosare ochoocaquea 4 omerequipae oquejetsantsavacaaca. Igomarotaqueroquea ocaravaeque 12,000 estadiopae<sup>d</sup> ogatsantsacapae aisa ojenoquivaequegueti, arikea oquempetavacaaca.<sup>17</sup> Iroompaquea igomaroqueroquea ocarapiricaque otantotacagueti ocaravaeque 144 catsantsaconaqui-rentsi.<sup>e</sup> Oraquea igomarotantajitaca igomarotantacaca ashivanti, iroguenti-quea igatsantsaconaquire caquinte.

<sup>18</sup>Oraquea otantotsaequitacaca iroguenti ipeacaajitaca mapi jaashipepi. Oraquea Jerosare saancorencavaeque ocanca cantavaequequea tsiren, iriguentiquea igitanquitsi ooromajaca teeca inconoantajitempariji otsipa cavorejatasica.<sup>19</sup> Oraquea mapipae isaviquitica oquishomajatancaca otanto iroguenti cameetsapiripae vegaramajatatsica pajiguetsicas jaashipepi, sapiro, aagata, aisa esemerarerera;<sup>20</sup> aisa oonise, corona-

rina, quirisorito, veriro, topashio, quirisopera, jashinto aisa amatishita. Arikea ocaravaeque 12.<sup>21</sup> Oraquea 12 osotomoropae iroguentivaeque peerera,<sup>f</sup> aparopae iroguenti ipeacaantajitaro aparo peerera. Oraquea quenavoquirontsi iquenaquenaitantamajatacaca iriguentini ooromajaca teeca inconoantajitempariji otsipa cavorejatatsica, saancorerejavaequequea ocanca quejevaeca potirinaqui.

<sup>22</sup>Tee nonejeroji tetempo ontaniqui guinentinintsiqui, iroguentitari iguinenti Amajirote Aapani Irioshi Agavejamajatasica itsipatacari Ovejajaniqui, iriguentijitari quempetajaroca tetempo.<sup>23</sup> Iriraquea catsirincaiteri teequea irinintajitajeriji irivoreacotantajequeate. Arikea iquempetaca taai teequea irinintajitajeriji inquitase-tacotantajequeate, iroguentitarite savinca-guitetacaavaequerouquea iroganejencare Aapani Irioshi, ari iquejetaca aisa Ovejajaniqui iriguentitarite otsivore.<sup>24</sup> Maasano caquinteguetsicasa iranjinijitantanaquemparo otsirencare. Aisa incoraquecoraquei-quequea maasano majirontajitsicasa quepatsipaequitica iramajencatapoajenero iroganejencare, irishineventavaetapoajempari Aapani Irioshi.<sup>25</sup> Aatoquea yashijitajirotsi osotomoropae, aatonica inejajitajiro pitsecari, oncoguitempani osavincaguete-guiteni.<sup>26</sup> Incoraquecoraquei-quequea maasano caquinteguetsicasa quepatsipaequitica iramajencatapoajenero iroganejencare, irishineventavaetapoajempari Aapani Irioshi.<sup>27</sup> Aatoquea oquijajencati-matisi oraniqui covaeguisherentsipae. Aatotarite iquijitsi antaguishetatsica teeca

**d** 21.16 Oraquea 12,000 estadiopae ovegarataca 2,200 quiromeeteropae, irooquea quempetacaro arigueti anijivaete 55 savincaguiteripae. Aparo estadio ocaravaeque oquejevecaro 185 meeteropae. **e** 21.17 144 catsantsaconaquiresnti. Iroguenti oquejetsantsavecaro 65 meeteropae. **f** 21.21 peerera. Chooca quentijaqui quejevetarica chapiro. Onquijaquerigueti capichaji impanequi, asereaqueri, ari intiritapiniquero cameetsaniji oncarenitanaque. Oncoramanitapoajegueti ompeanaquempa icantajitica peerera, quitasancorercavaeque, impeacaquaemparo nenquetsiqui.

oncameetsateji aisa tsojeajatsica, iriguenti-  
tarite choocajajatsine tioncacotanquitsica  
ivajiroja ivaperitequi Ovejajaniqui  
itioncacotantajiguecaroca ivajiroja  
maasano coguitatsineca inchoocaguiteni.

**22** <sup>1</sup>Arikeate yonigaquenaroquea  
ojaaqui saancorencajarmajaca  
anijacaantantatsica osotoajatantapojacaro  
imajirontamento Aapani Irioshi aisa  
Ovejajaniqui, <sup>2</sup>oniganquirejavoquijaatana-  
quero quenavoquirontsi iquenaquenaitan-  
tamajatacaca. Oraquea omavitsapsijaata-  
pojaqueguedi ochoocaque ocatintiitaca  
inchato anijacaantantatsica. Aparopea taai  
opishivoroquijacovaetantanacaroquea  
osovena ocantashitatiaguecaquea. Oraquea  
ovanapae iroguenti iroveantajianajempaca  
maasano caquinteguetatsica. <sup>3</sup>Aatoquea  
ochoocatimatjitsi incantomajacotimentaji-  
querica, aritari onchoocaque oraniqui  
imajirontamento Aapani Irioshi aisa  
Ovejajaniqui. Irirajia irajaanirejia incogui-  
tempani irisavicaventaguitarini. <sup>4</sup>Iramena-  
vorojiapojayeri, aisa intioncacotsijitempari  
ivajiro Aapani Irioshi ivancapaequi.  
<sup>5</sup>Aatoquea ochoocataji pitsecari. Iriraquea  
choocajatsica oraniqui aatoquea icoguite-  
jacojiaja intsivojiajeri, aisa aatoquea  
inintajitajiritsi catsirincaiteri intsirencagu-  
tetacotantajequeate, incoguitempanitari  
intsirencagujejacotantaguuteni Amajirote  
Aapani Irioshi. Iriatimpajia impejiaquem-  
paquea majirontajatsica incoguitempani  
irimajirontajaguitempani.

#### Iroshipojishiatsi incoraquetajate Jeso quirishito

<sup>6</sup>Iroompaquea icanquena [ashivant]:  
“Maasanopae ocatica pitioncaquea  
imaica iroguenti iroomajaca, teetari  
amatavitanteji. Iriraquea Amajirote  
Aapani Irioshi quenquetsashirentacaaji-

guirica tsavetantajatsica itigaranca-  
queri irashivantite ironigaaguequeneri-  
quea irajaanirejia querocaca oncogueta-  
naquempani, iroshipojishiatsi  
aapojempa.” [Icanquetari Jesoshi:]

<sup>7</sup>“iArimajaguitatsi noncoraquetaje  
taampina! iIrishinetacaavaejiquempari-  
quea guijatacomajajeroa maasanopae  
itsavetacotsijitacaca ocatica paperiqui!”

<sup>8</sup>Naatimpa Joanca, naroguenti  
nejaguetaquereroa aisa quemagueque-  
roca maasanopae ocaticapae. Iroquea  
noquemaguequeroguedi, aisa nonejague-  
taqueroguedi notigueroaventavetanaca-  
riquea ashivant omigaaguequenaroche  
nontsarovenquemparime. <sup>9</sup>Icantitana:  
“Aato piquejetirotsi imaica, naroguenti-  
tari papiaajanirentsiteni, noquejetajim-  
piquea aviatimpa aisa papitsaroventari-  
jiteni tsavetantajajeroa icanqueca  
Aapani Irioshi, noquejetajari aisa  
maasano quemisantajigueroche tioncan-  
quitsica ocaniqui paperiqui. iIriompani  
pintsaroventempa Aapani Irioshi!”

<sup>10</sup>Aisa icanquena: “Aatoja pivinchaja-  
coseyotiroti<sup>8</sup> pitioncacotaqueca  
paperiqui, iroshipojaquetari  
aapojaquempa onetsanamajatanaquem-  
paquea. <sup>11</sup>Iriraquea peacaaguishetaroca  
covaeguisherentsipae iiintsija incogui-  
tempani inquempetanaquempa imaica.  
Iriraquea coguishemajatatsica iiintsija  
incoguitempani incoguishemajatana-  
quempa. Arikea inquempetaquempa-  
quea peacaatsica cameetsaripae, iiintsija  
incoguitempani inquempetanaquempa  
imaica. Aisa iriraquea comajamajatsica  
iiintsija incoguitempani incomajamajatanaquempaquea.”

<sup>12</sup>“Arimajaguitatsi noncoraquetaje  
taampina, novegarapojeneri maasano  
caquinteja querocaca yantaguetaqueca

<sup>g</sup> 22.10 Ocanqueguedi Aatoja pivinchajacoseyotiroti, iroguenti oncanque “Aatoja  
pomanirotsi”.

apaniropae.<sup>13</sup> Naroguenti *Alfa* aisa naroguenti *Omega*,<sup>h</sup> naroguenti jivatatsica aisa naroguenti carapoja-tsica, nocoguitanitarite nochoocaguitini, aisa aatoquea nosanticoguitejacovaajitsi.

<sup>14</sup>“Irishinetacaavaejitaquempariquea ajaquiroca iitsaare, irishinetsijitempari irishecajiaquemparoqua osovena inchato anijacaantantatsica, aisa inquiaquijaitantapojajemparo osotomoro quinteninintsi.<sup>15</sup> Cotanquitsiquea incoguitempani inchoocajiaque sotsiqui maasano cogushemajatatsica, matsinti, cantatsatantajatiatsica, metojantajatiatsica, tsaroventajavetarica irioshivijirentsí, aisa maasano shineventajigaroca yamatavitantajigui.

<sup>16</sup>“Naroguenti Jesoshi, notigaranca-queriquea nashivantite incamanquempi-quea maasanopae pitioncacotaquea cameetsaniji paacaantajiaqueneriniji tsaroventajiatsica capiocapinijiatsica tsovironaqipaequi. Naroguenti ichoviquitanaqueca Taavini, aisa naroguenti shigompiri tsirencamenqui- tatsica pitsecaguitetirajagueti.”

<sup>17</sup>Iriraquea Ishire Aapani Irioshi aisa intiane Ovejajaniqui icantajigui: “¡Caacate!” Ariquea inquempejia-quempa quemajiaqueroneca incanta-

jigue: “¡Caacate!” Iriraquea mirejiatsica incoraquecoraqueiteja; irira nintajian-quitsica, iintsija irimirajiguemparo oja anijacaantantatsica, aatoquea ivergarati-roti, manaquea irojocashijiquenempari intati.

<sup>18</sup>Maasanoquea quemajiaqueroneca maasanopae ocatica itsavetacotsijitacaca ocaniqui paperiqui noncantajia-queri: Quericagueti gavitashitajemparo-neca tioncanquitsica ocaniqui, iriraquea Aapani Irioshi irogavitacaantavaetajem- pari atsipetagantsipae itsavetacotsijitacaca ocatica paperiqui.<sup>19</sup> Aisa querica- gueti jocagaranneroneca tioncacoton- quitsica ocaniqui paperiqui, iriraquea Aapani Irioshi iraapitsatsitempari osovena inchato anijacaantantatsica irishecaquempameca, aisa aatoquea inejajirotsi quinteninintsi yashincaca Aapani Irioshi tioncacoguetanquitsica ocaniqui.

<sup>20</sup>Iriraquea oguisotoamajaqueroca maasanopae ocatica icanque: “Jeeje, noncoraquetaje taampina.”

Arimajaguitatsi. ¡Caacateshiatsi, Nomajirote Jesoshi!

<sup>21</sup>Iriraquea Amajirote Jesoshi incavintsa jamajaquempiquea maasano aviatimpajia. Ariquea oncoquempani.

---

**h 22.13** *Alfa aisa Omega*. Oratica *alfa* iroguenti pariajajaroca *abecedario* irashi guiriego. Oratica *omega* iroguenti carapojiroca.



## VOCABULARIO

---

### Quenquetsatsarentsi

| Quenquetsatsarentsi                         | Iguenquetsatsare quimajarerí       |
|---|------------------------------------|
| aagata                                      | ágata                              |
| aareca                                      | arca                               |
| aarepa (Pamenero <i>Glosario</i> )          | arpa                               |
| aaroe                                       | áloe                               |
| aashino                                     | asno, asna                         |
| acashia                                     | acacia                             |
| amatishita                                  | amatista                           |
| aravasetero                                 | alabastro                          |
| asopiri                                     | azufre                             |
| caavera                                     | cabra                              |
| cameyo                                      | camello                            |
| caripintero                                 | carpintero                         |
| coaretajia (Pamenero <i>Glosario</i> )      | soldados, guardias                 |
| coronarina                                  | cornalina                          |
| esemerarera                                 | esmeralda                          |
| igo   | higo                               |
| iguera (Pamenero <i>Glosario</i> )          | higuera                            |
| irino (Pamenero <i>Glosario</i> )           | lino                               |
| Iromaquitica (Pamenero <i>Glosario</i> )    | romanos                            |
| iseyone, seyo                               | su sello, sello                    |
| isopoquiji                                  | una rama de hisopo                 |
| itsiconte erepaante                         | marfil (del colmillo del elefante) |
| iyavine, yavi                               | su llave, llave                    |
| jaashipe                                    | jaspe                              |
| jashinto                                    | jacinto                            |
| joese, joesepae (Pamenero <i>Glosario</i> ) | juez, jueces                       |
| majirontatsica                              | rey, reina, emperador              |
| maremoro                                    | mármol                             |
| meetero                                     | metro                              |
| mira (Pamenero <i>Glosario</i> )            | mirra                              |
| naarero (Pamenero <i>Glosario</i> )         | nardo                              |
| oonise                                      | ónice                              |
| orivo (Pamenero <i>Glosario</i> )           | olivo                              |

|  |                        |
|--|------------------------|
| ova (Pamenero <i>Glosario</i> )        | uva                    |
| Paashicoa (Pamenero <i>Glosario</i> )  | Pascua                 |
| peerera (Pamenero <i>Glosario</i> )    | perla                  |
| perata                                 | plata                  |
| potirinaqui                            | botella, vidrio        |
| querovi, querovipae                    | querubín, seres alados |
| quirisoorito                           | crisólito              |
| quisoperasa                            | crisoprasa             |
| quiro                                  | kilo, kilos            |
| quiromeetero                           | kilometro, kilometros  |
| quitavaireri                           | caballo                |
| sapiro                                 | zafiro                 |
| sera                                   | seda                   |
| sevara (Pamenero <i>Glosario</i> )     | cebada                 |
| seyo, iseyone                          | sello, su sello        |
| tenario (Pamenero <i>Glosario</i> )    | denario                |
| tirigo, tirigoitsoqui                  | trigo                  |
| tominco                                | domingo                |
| topashio                               | topacio                |
| veriro                                 | berilo                 |
| vieseta (Pamenero <i>Glosario</i> )    | fiesta                 |
| voronquise (Pamenero <i>Glosario</i> ) | bronce                 |
| yavi, iyavine                          | llave, su llave        |
| yero                                   | hierro, metal fundido  |

## GLOSARIO

### ANTSATANTAJIAQUEMPAROCA MANAGUETANQUITSICA CANTAGUETANQUITSICA

---

**Aareca** (*arca*). Chooca mavite icantajitica “aareca”:

1. Oraqueate quimajareritsaqui icantajitiroqueate *arca*, iroguenti inirojegui quenajarontsi ipeacaaca Noe. (Jen. 6.14; Mt. 24.38; Ev. 11.7; 1 Pe. 3.20)
2. Chooca inchacotanaqui icantajitica *aareca* ashi paaquito. Quimajareritsaqui icantajitiro *el Arca del pacto* irooca *el cofre del pacto*. (Ev. 9.4; Yonig. 11.19)

**Aarepa** (*arpa*). Iroguenti itencatsajitica, ochoocaquequea oshequi otsapae, caaviji ishineventamajacaroquea jorio coramani ipojimajencatacaajiqueroquea yamashaivenquerigueti Aapani Irishi. Pamenero ovaantorite otsapaqui Yonig. 5.8. (Yonig. 5.8; 14.2; 18.22)

**Aguiripa** (*Agripa*). (Pamenero “Erorishi”.)

**Amenaguetinirica ajaarantatsica maasanopae yashintaguecaca** (*mayordomo, administrador*). (Irc. 16.1) Amitacopinijiguirica irapitsaroventarijiate (diácono, diaconisa). Iroaqueragueti iriguenti yojocacojiaquenerica tsaroventajia-

tsica ishecajia icapiocajiacaguetti intsipatavacaajiaquempagueti irishecajiaquempa, cotanquitsi coajicani querocaguetti ichoocajigui tsaroventajiatsica yaajiaque irapitsaroventarite ipeacaajiacari amitacopinijiguirica irapitsaroventarijiate coguitejacojianquitsica. Orajiadiaconisa iroguenti manquigarentsi amitacopinijiguirica tsaroventajiatsica. (1 Tim. 3.8-13; Irm. 16.1).

**Anempoacaguiroca pan** (*levadura*). Iroguenti cachosetanquitsica onconoantajitaquemparoca ose pan cameetsaniji anempoanaque. Oraquea Iguenquetsatsarequi Aapani Irishi ocantacotaquerogueti anempoacaguiroca pan, chooca tres ocantacotaque:

1. Coramani pajiniguetti iroajianaje ishiraerijia irisotoantanajemparo Ejepito yomperaperaivetacariguetti, icantajiaqueri Aapani Irishi irishecajianaquempari ovejajaniqui irisomatantajiaquempari pan teeca onconoguemparoji anempoacaguiroca, aisa icantajiaqueri incatimajiaquero

irishecajiaquemparogueti.  
Inintajitaque taampina iroajianaje  
aato yoguijiro pan anempoanaque,  
mana irishecajiaquemparo intati  
caarica oconogaro anempoacagui-  
roca. Arikea icantajiaqueri irosati  
ajagantsini onchooaque iviesetate  
cameetsaniji inquenquejajigero  
coramani yaajianaqueri choviquijia-  
naquerica isotoajianajigueti  
Ejepitoqui icatimajiaqueri shintsi  
iroajianaje icantantajiacarica  
irishecajianaquemparo pan teeca  
onconoguemparoji anempoacagui-  
roca. Oraga vieseta opajita “Vieseta  
ishecatantajitaroca pan teeca  
onconoguemparoji anempoacagui-  
roca”. (Eeq. 12.1-18; Mr. 14.1;  
pamenero “Iviesetatepae jorioja”.)

2. Iroguenti ocantacotaque aisa  
quempevaerentsi irooca aisa taaca  
opajitapae teeca oncameetsateji,  
irootari icantantajiacarica Aapani  
Irioshi ishiraerija maasano pan  
iramajianaqueneri itsovironaquie-  
tequi intaacaantajiaquenempari  
aato oconogaro anempoacaguiroca.  
(Irev. 2.4-11; Nm. 6.1, 15-20;  
Mt. 16.5-12; 1 Co. 5.6-8; Ga. 5.9)

3. Itsatacaantaquegueti Jesoqui-  
rishito icantacotaquerogueti  
Imajirontagueti Aapani Irioshi  
iquejetacaacaro anempoacaguiroca  
pan. (Mt. 13.33)

**Antipashi** (*Antipas*). (Pamenero  
“Erorishi”.)

**Arameo** (*arameo*). Iroguenti iguenquetsa-  
tsare Jesoquirishito aisa igonorojia  
joriojia. Iconoagarantajiaca iquenque-  
tsatantacaro aisa guiriego aisa evereo.  
(Pamenero tioncanquitsica isaviva-  
naqui otsapapaequi Mt. 10.4;  
Mr. 3.18; 5.41; Jn. 1.41-42; 4.25.)

**Aravasetero** (*alabastro*). Iroguenti  
mapi quitamarori saancorencari.

**Arequerao** (*Arquelao*). (Pamenero  
“Erorishi”.)

**Areshi** (*Hades*). Oraquea Areshi  
iroguenti ichoocaquegueti ishirejia  
metojajiatsica tequeratagueto  
impishoncriteriji camorecariqui.  
Irira guiriego icanguero *hades*,  
iguenquetsatsarequi evereo  
icanquerosheol. (Mt. 11.23;  
Irc. 10.15; 16.23; Ya. 2.27, 31;  
1 Co. 15.55; Yonig. 1.18; 6.8;  
20.13-14)

**Aretare** (*altar*). Ocatica aretare mana  
oncanque itaapinijitirigueto  
Aapani Irioshi quejecarica oveja,  
emoren, irisati caapironcaari  
intsaroventantanaquemparica.  
Iroquetita itsipaviquero mapi  
yasatecaguetaquero  
quimopiguetanquitsica.  
Oncameetsatanaquegueti  
iraitemparoqua intsitaquitemparo.  
Chooca otsipa manaquea ipeacaan-  
tacaro cavorejatatsica. Oconoaca-  
quea mana itsaampiguetaquero  
ocaraguepojaquegueti. (Pamenero  
ovaantorite: Ev. 8.2.) Chooca otsipa  
chaajaniquitanquitsica iroguenti-  
quea intaantaquemparo  
casancapanetatsica. (Pamenero  
ovaantorite Irocashiqui 1.8-11.)

**Aretemisa** (*Artemisa*). Iroguenti  
irioshivijitashiguetacaca intati  
Epesoquitica. Irirajia Iromaqutica  
icantajigiro Diana. Chooca oteem-  
porote ontaniqui Epesoqui.  
(Ya. 19.24, 27-28, 34-35; aisa  
pamenero ovaantorite ontaniqui.)

**Ashiti** (*aceite*). (Pamenero “Orivo”.)

**Atsimijicatiroca oja** (*esponja*).  
(Mt. 27.48)

**Avejancari** (*leproso*). Iriguenti  
caquinte aaqueri ashinoncarents  
pajitatsica iguenquetsatsarequi  
quimajareri *lepra*, cotanquitsi

coramaniquitica itioncacojiquero-gueti Iguenquetsatsare Aapani Irioshi ora ashinoncarentsi icantajitica *lepra* tee onquejetemparojo *lepra* imacatrica. Coramani teequea apaniro oneji, cotanquitsi oconoaca iroguenti oquejevetacaro patsetsi, otsipa iroguenti opatacacaro quitsaarentsi aisa tsovironaqui oporeaquegueti. Iroaqueragueti icantaquerigueti Aapani Irioshi Moishishi quero incojiaquempani ishiraerijia inchoocajiaquegueti cameetsa icantaqueri maasano avejancari aato iconoajaijari igonorojia, irogentiquea intigarancajiquerontaniqui teegueti inchoocateji caquinte aatoniji ipajencatir. Icantaqueri aisa quero incoquempani avejancavetanquitsica irisaancajempagueti. (Irev. 14.1-33; Nm. 12.1-16; Mt. 8.1-4; Irc. 17.11-19)

**Camorecari** (*el infierno*). Iroguenti paamari caarica tsivacatsi ipeacaashitacarica Aapani Irioshi Satanashi aisa itsipa ampatsinipae. Irirajia teeca intsaroventajiguempari Aapani Irioshi ariuea iroaroaitanaquequea iriatimpajia aisa, icancani irantsipevajejaquemappaquea oshequi, intsjajiaquemappaqueaa atotarite iteroncjiga. (Mt. 3.12; 5.30; 10.28; 13.49-50; 25.41; Yonig. 20.10, 14-15; pamenero “Satanashi”.)

**Canaane** (*Canaán*). Iriguenti irijanite Came irijanite Noe. (Jen. 9.18; 10.6) “Ichoviquijianaqueriquea Canaane caquinteguetatsica icantajitica jevoseojia, amoreojia, gueregueseojia, eveojia, araqueojia, shineojia, arevareojia, semareojia, jeri aisa amateojia.” (Jen. 10.16-18)

Canaane iroguenti aisa ovajiro quepatsi yashintacaacarica Aapani Irioshi Averaameni coramani icantaquerigueti iroanaque iriguinentitaquempa otsipaqui quepatsi irojocauenerica, irootaquetari icantantajitaro aisa oratica quepatsi “Quepatsi Icantacaajitaquerica Irojocaueneri Coajica” (*La Tierra Prometida*). (Jen. 11.31; 12.1, 4-7; 13.12-17; 17.1-8; Ev. 11.8-9)

Iroaqueragueti oratica quepatsi Canaane aacotsqueri ivajiro Canaane. Ocoramanitapojafigueti opajitaja Ishiraeri (*Israel*), aacotsqueri ivajiro Ishiraeri choviquijianaquerica maasano ishiraerijia. **Cantaitetantagantsi, ocantaitetanti** (*hacer ritualmente impuro*). Oraquea ocantaquegueti Iguenquetsatsare Aapani Irioshi “ocantaitetanti” teequea iro oncantacoteji cantaitetiroca tsinotsi irooca quitsaarentsi. Oraquea *Iroquetinica Itioncacaantaqueca Aapani Irioshi* rootari ocantacotaque otsipapae quejecaroca ocatica: ishecajiguetaca icantimentantica Aapani Irioshi irishecajitemparogueti quejeguetacarica cameyo, quiima, shirompitopae; inchagajqueri metojaguetatsica; quishogueti oaquiero amanquigare oshirincaquempagueti irajaqui; aisa otsipapae. Irootaquetari oca ocantacotaque Itioncacotanaqueca Moishishi, aisa iro icantacojiaqueca pariseojia ichoocatigueti Jesoshi acaniqui quepatsiqui.

Irira Aapani Irioshi tee inquempevaetimatempaji, aisa tee taa opajita cantaitetimaterine, jeroquea icantantajiacarica ishiraerijia oncantaitejiaquerigueti taaca opajita iroajianaque ichoocaquegueti

saserorote irajaianaqueneri taaca ipajita ontampaticataqueri, irioca viratsi irioca itsipa, ariuea irira saserorote irinetsanaguetaquero maasano icantaquerica Aapani Irioshi cameetsaniji incantaqueriniji: “Imaicampani saancanajimpi, teequea oncantaitetajempi.” Tequeratagueti incanteri, irantajiaquerogueti taaca opajita irashi Aapani Irioshi iroguenti incantaitejiaquero. Irirajia pariseojia mana yogaashijiacaro intati icantimentajiaquerigueti irapijorijojateni aatoniji yantajiguiro taaca opajitapae teeca incantimentantero Aapani Irioshi. (Irev. 11—14; Mt. 8.4; Irc. 2.22-24; Jn. 2.6; 11.55; 18.28)

Ariuea icoraquetaquegueti Jeso quirishito acaniqui quepatsiqui icamantajiaqueri maasano quero caavijica anaaque ocantaitetanti iroguenti quempevaerentsi, irootari cantaitejiaqueri caquinte ishirequi. Irirajia pariseojia yaventacovaejiaca intati, iroosatitari iquivacomajajiapinita isaancajiacaca, iroguenti aisa isaancajiguiro ishetantajiacaca aatoniji taaca opajita cantaitetimatiri, cotanquitsi icantajiaqueri Jeso quirishito iroomequea impincajiaqueme cantaitejiaquerineca ishirequi. Oraquea irirajia Jeso quirishito irooqua saancaqueroneca maasano cantaitetantsica shiretsiqui. (Mt. 15.10-20; Irc. 11.41; 1 Jn. 1.7; Yonig. 1.5)

Iroompa yoanajigueti Jesoshi jenoqui inquitequi, irira Peerero yoanaque irinejantaguete inejajiaqueri irapitsarorentarijati. Ariuea ichoocaquegueti Jopequi ineji oquejetimotacari iguimaa-nequi. Ariuea iquemiri icanquerigueti Amajirote irishecaguetaquempari icantimen-

tantajitica coramani irishecajitempari, iroguentitari ininque Aapani Irioshi intsatacaaqueri aato icantaitetantaji cantaitetantaguevetatsica. Aatome quea iquejetirome imaica aatome yoguime Peerero itsovironaquitequi teeca irio jorio inquenquetsatimotaqueri, impincajiaquerime incantaitetaqueri. (Ya. 10) Irootari ocantacotaqueca aisa Irm. 14.1-3.

### **Capiocapinitinrica majirontatsica**

**imentaquipae** (*cobrador de impuestos, publicano*). Iriguenti jorio peanquitsica iromperare majirontatsica Iromaquitica. Irira majirontatsica Iromaquitica irosati yaagarantacaantaque imentaquitsite maasano yashintajiacaca, cotanquitsi irirajia capiocapinitinrica imentaquipae yamejiacaro yoga aquero icoacomajajiaqueri cameetsaniji iraagarantajiaqueri iringuente irooqua quea icatimamajatantajiacarica igonoro icantantajiacarica iriguenti cogushejatisica. (Mt. 9.9-13;

Irc. 19.1-9; pamenero “Iromaquitica”.)

### **Carereojia** (*los caldeos*). Iriguentijia

choocajatsica Vavironiaqui yaajianaquerigueti ishiraerijia ontaniqui. (2 Maj. 24.2; 25.1-13; Jer. 32.28-29; Iran. 1.1-4; 3.8;)

### **Cavorejatatsica agaparancajatatsica**

**quishotacaqua roca quenajrontsi** (*ancla*). (Ya. 27.29-30, 40)

### **Coaretajia** (*soldados*). Acanquiquea

paperiqui icantajitica Tsavetacoqueric Jeso quirishito ocantacotaquerigueti coaretajia, irioqua ocantacomajataque igoare-tajiate Iromaquitica omperajiaca-rica joriojia, yashintaguetacarotari Iromaquitica iguepatsite jorio aisa

iguepatsijate itsipajia caquinteguetatsica. Icantajiaqueri aato ichoocataji igoaretajiate, iriguenti aparopae igoaretajiate joriojia choocajajatsica teemporoqui Jerosarequi inquempogujantaqueparoca. Iriojia tsipajiacarica Jorashi yaacaantaquerigueti Jesoshi. (Mt. 26.58; Irc 22.4, 52; Jn. 7.32; 18.3, 12; 19.6; Ya. 4.1; pamenero aisa "Iromaquitica".)

Irirajia igoaretajiate Iromaquitica iconoagarantajiaca yatsipetacaajiacari joriojia. Iriojia atsipetacaajiacarica Jesoshi. (Irc. 3.14; Jn. 18.3, 12; Irc. 22.63-65; 23.34-37) Cotanquitsi apaniropae caaviji icameetsati. (Irc. 7.1-10; Ya. 10. Pamenero ivaantorite coareta Irocashiqui 3.14.)

**Coaretajia quempogujajiguiroca teemporo** (*guardianes del templo*). Iriojia joriojia quempogujajiguiroca teemporo erosarequi. (Pamenero "Coaretajia".)

**Coroshi** (*cruz*). Ora icantajitica coroshi mana ocononcagotataca inchacota intati jenoqui. Iriraqueate Iromaquitica icatsimamajataquerigueti metojantatsica, aitsitantatsica, aisa itsipapae covaeguishetatsica yamejiga iriatimpa irompajacoqueri coroshiqui irosatiquea irimetojantanaquempa. (Pamenero ivaantorite Irocashiqui 23.23.)

**Eonoco** (*eunuco*). Oraquea coramani iriguenti icantajiqueriquea eonoco irashijia majirontatsica iquitsogujitaqueri iguemaaqui cameetsanijite inquempogujajiaquenerinijite imanquigarejia. Arikea iconoagarantajiacauea itsipapae iriguenti

icantajiqueriquea intati iriguenti eonoco, teenica irimanquigatem-paji, itsipapae iroguenti yantavaeguitirini majirontatsica ipeaca iramajirore. (Ya. 8.26-40)

**Epicoro** (*Epicuro*). Iriraquea Epicoron ichoocavaetini coramani tequerataguetai incoraqueteji Quirishito Jesoshi acaniqui quepatsiqui, yamenajitiriquea caaviji itsamajati cotanquitsiquea iroguenti itsatacaanti teeca iroomajateji, irootaquequea icantaque irirajia caquinte iroguenti inchoocatashijiaquequea irishineventajiaquempaquea. Irirajia guijatacojiguirica icantajitiri epicoreojia (*epicúreos*). (Ya. 17.18-34; pamenero "Eshitoicojia".)

**Eremeshi** (*Hermes*). Iriguenti irioshivijire guiriegojia. Iriatimpajia ijiqueji irio camantajiaquerica taaca opaji inintajiaqueca itsipapae irioshijiate. Irirajia Iromaquitica iroguenti icanneriquea Merecorio (*Mercurio*). (Ya. 14.12-13; pamenero aisa "Seoshi".)

**Erorishi** (*Herodes*). Ora Iguenquetsatsare Aapani Iroshi oquenquetsatacoqueri 5 Erorishi:

1. Majirontatsica **Erorishi**, oquenquetsatacoqueri Mt. 2.1-20. Ari ivoaquegueti Jesoquirishito irio peanquitsi majirontatsica Joreaqui. Aisa iriguenti imajirote guinentijatifica Garireaqui, Samariaqui aisa otsipapaequi quepatsipae intatique-roqui Jororane. Aisa ipeacaacaro teemporo Jerosarequi, cotanquitsi imetojaque tequerataguetai agatempaji.

2. Irijanite majirontatsica Erorishi pajitatsica **Arequerao** (*Arquelao*),

oquenquetsatacotaqueri Mt. 2.22. Ariquea imetojaqueguetí iriri, irio piajari ipejaa majirontatsica Joreaquei, Iromeaqui aisa Samari-aqui.

3. Irijanite majirontatsica Erorishi pajitatsica **Erorishi Antipashi** (*Herodes Antipas*), oquenquetsatacotaqueri Mt. 14.1-12; Mr. 6.14-29; Irc. 3.1; 9.7-9; 23.7-12; Ya. 13.1. Irira Sesa ipeacaacari iramajirore nejaguetaquenerica maasano Garireaquei aisa Pereaquei. Itioncacotaqueriguetí Maricoshi ipajitaqueri majirontatsica, cotanquitsi tee irio majirontamajatatsica (Mr. 6.14).

4. Ishaine majirontatsica Erorishi pajitatsica **Erorishi Aguiripa I** (*Herodes Agripa I*), ocantacotaqueri Ya. 12.1-25. Iguenquetsatsarequi Aapani Irioshi iroguenti icantajitiri majirontatsica Erorishi, quejetaca ityaine.

5. Irijanite Erorishi Aguiripa I pajitatsica **Erorishi Aguiripa II** (*Herodes Agripa II*), oquenquetsatacotaqueri Ya. 25.13—26.32. Iguenquetsatsarequi Aapani Irioshi iroguenti icantajitiri majirontatsica Aguiripa.

**Eshitoicojia** (*los estoicos*). Iriguentijia guijatacojiguirica caquinte pajitatsica Senone (*Zenón*)r. Iriatimpa iriguenti guiriego choocatatsica coramani tequeratagueti incoraqueteji Jesoquirishito acaniqui quepatsiqui. Irirajia eshitoicojia yamenajiaca itsamajataque, cotanquitsiquea iriguenti itsatacaantaque otsipa teeca iroomajateji, icanquequea iriraquea caquinte inchiquiojítaja incomajamaquempaquea intampishitashiji-

aqueroquea maasanopae coraquetashiguequerica aatonijite agavejiri oquempevaetacagari. (Ya. 17.18)

**Evereo** (*hebreo*). Iguenquetsatsare vereojoia icantajitiro evereo. Ora *Iroquetinica Itioncacaantaqueca Aapani Irioshi* iroguenti itioncantajitacaro evereo. (Pamerero Ya. 6.1; Pp. 3.5 aisa Evereojoia.)

**Evereojia** (*los hebreos*). Irirajia vereojoia iriguentijia ichoviquitanaquea Averaame, irijanintarica Ishaaco, iriri Jacovo. Icantajitiri aisa ishiraerijia aisa joriojia. (Eeq. 3.15-18; 9.1-4; 2 Co. 11.22; pamenero “Ishiraerijia” aisa “Joriojia”.)

**Gachoncaguinatagantsi,** igachoncaguinatantacaro **cachopoquiri irooca itijaguinatacaro quepatsivane** (*regar cenizas o polvo sobre la cabeza*). (Mt. 11.21; Irc. 10.13. Pamenero “Jiriquiquijiporoquiro”.)

**Gamarieri** (*Gamaliel*). Iriguenti tsatacantiroca itioncacotanaqueca Moishishini caavijica iquemisanta-majatiri Aapani Irioshi. Iriguenti tsatacaguirica Paavoro coramani tequeratagueti intsaroventempariji Jesoquirishito. (Ya. 5.34; 22.3)

**Garirea** (*Galilea*). Iroguenti quepatsi choocatanquitsica iguepatsitequi ishiraerijia. Iriguenti osamanitacotiro Jerosare ochoocaquegueti teemporo, aisa ichoocatantajigaro oshequini quenaguetapojatsica osamanipaequi teeca irio jorio. Irootari ocantacotaqueca Mt. 4.12-16. Irira Jesoquirishito iquenquevaritanaque Garire-aqui, ari iquenquevarimajatanaquegueti

itsitacaguitejaquero  
 iquenquetsatimojiaquerigueti  
 choocajianquitsica oraniqui. Irirajia  
 itsatacaanejia iriquetica  
 guijajiaquerica iriguenti Garireaquita-  
 ca (Mt. 4.18-20; Garirea iroguenti  
 aisa ovajiro iniromotija chocatan-  
 quitsica oraniqui Garireaqui.  
 Opajita aisa Tiveriashi,  
 aacotsiquero ovajiro ocapiocaguetai  
 tsovironaqui pajitatsica aisa Tiveri-  
 ashni choocatanquitsica oraniqui  
 otsapijaqui. (Jn. 6.1) Ora iniromotija  
 iroguenti ipajijitiro aisa  
 Jenesare (*Genesaret*), aacotsiquero  
 quepatsi choocatanquitsica oraniqui  
 otsapijaqui. (Mt. 14.34; Irc. 5.1)

### **Guiriego (griego).**

1. Ipajita guiriego irira  
 Guireshiaquitica. Ontaniqui  
 mapaqui pamenaquero quepatsipae  
 icantajitica Acaya, Maseronia,  
 Iririco, aisa Terashia, iroguentijia  
 iguepatsitepae guiriegojia.)
2. Iroguenti aisa iguenquetsa-  
 tsare choocajiascica quepatsiqui  
 icantajitica Guireshia (*Grecia*)  
 Ichocoquaitigueti Jesoquirishito  
 acaniqui quepatsiqui itsipapae  
 caquinte paricotipaequitica aisa  
 iquenquetsatantajiacaro iguenque-  
 tsatsare guiriego. Ora *Iroaquerari*  
*Itioncacaantaqueca Aapani Irioshi* (*el*  
*Nuevo Testamento*) itioncantajicaro  
 iguenquetsatsarequi guiriego.

### **Ichoviquijianaqueca irijanitepae**

**Ishiraeri (Jacovo)** (*los doce tribus de Israel*). (Pamenero “Ishiraeri”  
 aisa “Ishiraerija”.)

### **Ichoviquitanaqueca Taavi (el Hijo de David, descendiente del rey David).**

(Pamenero “Jesoquirishito”.)

### **Igovezencamajarequi inatojencatapo- jacaguetai Aapani Irioshi (Lugar Santísimo).**

Iroguenti otsipaguete

intsompoguiremajacaqui Taverena-  
 coroqui (Eeq. 26.33-34) aisa  
 ocoramanitapojigueti ochoocataji  
 Teemporoqui (1 Maj. 6.16).  
 Ontaniqui ochoocaque inchacota-  
 naqui icantajitica *aareca* ashi  
 paaquito. Quimajareritsaqui icanta-  
 jitiro *el Arca del pacto* irooca *el*  
*cofre del pacto*.

(Ev. 9.4; Yonig. 11.19) Tecatsi  
 quijaquerone intsompoguiremaja-  
 caqui Taverenacoroqui, apatiroti  
 irira saserorote anaantamajatanqui-  
 tsica inquijaque aparo savincogui-  
 teri maasano ajagantsipaequi  
 aapojacaguetai savincaguiteri  
 icantantacarica Aapani Irioshi  
 iraantantanaquemparoca iriraja  
 viratsi intsompogui Taverenaco-  
 roqui irooca Teemporoqui, intsom-  
 poguiremajacaqui icantajitica  
 “Igovezencamajarequi inatojencata-  
 pojacaguetai Aapani Irioshi” aatoniji  
 icatsimativentajiguiri ishiraerijia  
 iquempevaejiacaguetai. Iroguenti  
 savincaguiteri icantajiticael *Día del Perdón (o de la Expiación)*.  
 (Irev. 16.1-3, 12-14, 34;  
 Ev. 9.3-8, 25; 10.19) “Ariquea  
 iraacoquiteroqua iriraja irijanigan-  
 tirenajaniqui caapironcaari  
 irojocachapaquitaquempaquea  
 intsiquirijaquero otapaqui  
 cavoronaquiqui.” (Irev. 16.14;  
 pamenero aisa “Iviesetatepae  
 jorioja”.)

**Iguera (higuera).** Ora icantajitica  
 iguera iroguenti inchato panqui-  
 rentsi. Chooca osovena, icantajitiro  
 igo (*higo*).

**Imagorejantajitaca** (*sábado, el día de descanso, el día de reposo*). Irirajia  
 jorioja imagorejantaro savincaguiteri  
 saavarro. Ora savincaguiteri  
 imagorejantajitaca teequea

irininteji joriojia  
incatsiquetantemparo, irootaquetari  
icantaqueca Moishishini itioncaa-  
querigueti Aapani Irioshi. Iroguenti  
savincaguiteri saavarō icapiocajia-  
cagueti iquenquejajiaqueri Aapani  
Irioshi. (Mt. 12.1-14)

**Imajirontamento isavcantacaca**  
**majirontatsica** (*trono*). (Mt. 5.34;  
19.28; Yonig. 5.1, 6.)

**Imajirotepae joriojia** (*la Junta Suprema,*  
*el Concilio, el Sanhedrín*). Oraquea  
icapiocapinijiacagueti imajirotepae  
joriojia, iroguenti icantajiqueriquea  
*Junta Suprema*. (Iroguenti oquempe-  
tacaro *Junta Directiva*. ) Iriatimpajia  
capirocapinijiatsica iriguentijia  
saserorote anaantamajatanquitsica,  
jivajigurica joriojia, aisa tsatacaanta-  
jiguiroca itioncacotanaqueca Moishi-  
shini. Irirajia tsatacaantajiguiroca  
itioncacotanaqueca Moishishini  
iconoagarantajiacaquea iriguenti aisa  
pariseojia. Oraquea icapiocajiacagueti  
maasano icarajiaque 71 (Mt.  
26.57-59; Jn. 11.45-53;  
Ya. 22.30; pamenero “Saserorote  
anaantamajatanquitsica”.)

**Inchacotanaqui icantajitica “aareca”**  
**ashi paaquito** (*el Arca del pacto, el*  
*cofre del pacto*). (Pamenero Ev. 9.4;  
Yonig. 11.19.)

**Intsompoguiremajacaqui Taverena-**  
**coroqui irooca Tetemporoqui**  
(*Lugar Santísimo*). (Mt. 27.51;  
Mr. 15.38; Irc. 1.9; 23.45; Ev. 6.19;  
pamenero aisa “Igovejencamaja-  
requi inatoyencatapojacagueti  
Aapani Irioshi”.)

**Irevitajia** (*levitas*). Iriguentijia  
ichoviquijianaqueca Irevini irijanite  
Jacovoni. Irira Aapani Irioshi  
icanque apaniro iriguentijia  
antavaetanquitsine taverenacoroqui  
aisa tetemporoqui. Iconoagaranta-

jiaca ipeajiacaca saserorotepae.  
Itsipapae irevita teeca irio saserore-  
rote, mana yamitacojiguiri intati.  
(Nm. 1.47-51; 3.5-13; 16.9-10;  
pamenero aisa “Saserorotejia”.)

**Irijanite Caquinte** (*el Hijo del*  
*Hombre*). Icanqueguedi Jesoshi  
“Irijanite Caquinte” mana icantaco-  
taca iriatimpa, mana oquejetaca  
icantacoqueri itsipa. Iriotaque  
Quirishito Meshiantatsica ponean-  
quitsica jenoqui inquitequi,  
icaquintetapojaquetari ivoapojaque.  
(Mt. 16.13-16; 18.11; 20.17-19;  
26.64-65)

**Irino** (*lino*). Iroguenti panquirentsí  
ipeacaantajitaroca quitsarentsí  
vegaramajatatsica. Ora  
quitsarentsimorena opajita aisa  
irino. Iguenquetsatsarequi Aapani  
Irioshi oconoaca ocanquegueti  
iquestsaahtarogueti irino iroguenti  
oquejetacaaca inetsanatagueti  
tsaroventarica Aapani Irioshi. Irira  
saserorotejia iquestsaahtacaro  
irino. (Mt. 27.59; Yonig. 18.12, 16;  
19.8, 14)

**Iriquetica voanquitsica** (*el*  
*primogénito, el hijo mayor*).  
Coramani irirajia joriojia yamejiga  
iquejejiaquero imaica: Tequerata-  
gueti irimetojeji icantanaque  
irimetojaquegueti irojocajitajeneri  
irijanijiate maasano yashintagueta-  
caca, cotanquitsi irira iriquetica  
voanquitsica tee inquejetempariji  
iguentijeguijiate, iroguenti yojoca-  
queneri quimota  
yavisacaimataqueri iriatimpajia.  
Iroquea icantajiti iguenquetsatsa-  
requi quimajarerí *una doble*  
*porción*. Irooompa imetojanajigueti  
iroquea piajari irijanite iriquetica  
voanquitsica.

Irootari iquenquejantacaroca  
Eriseo pajinigueti irajaitanaqueri  
Iriashi jenoqui, jeroquea icantanta-  
carica inintaque  
inquejetacaguempari iriguentica  
irijanite iriquetica voanquitsica,  
cotanquitsi tee iro irininteji yashin-  
taguecaca, iroguenti inintaque  
inquejetajempari  
intsavetantavaequiero icanquerica  
Aapani Irioshi. Iguenquetsatsarequi  
quimajareri iroguenti ocanti: *Quiero  
recibir una doble porción de tu  
espíritu.* (2 Maj. 2.1, 4, 6-10)

Inquenquejamajaquerome Esao  
icantajerica Aapani Irioshi ityaine  
iroqueragueti icanquerigueti  
incavintsjajiaqueri inchoviquijia-  
naqueca, aatome icantirime  
iriguentijeguite cameetsataque  
inquejetajempari quejevaetaca  
irioca iriquetica voanquitsica,  
cotanquitsi teequea  
inquequejimateroji iroguenti  
ipomatsaguetaquero maasano.  
(Jen. 17.1-8; 25.27-34;  
Ev. 12.16-17)

### **Iroaquerari Itioncacaantaqueca**

**Aapani Irioshi** (*el Nuevo  
Testamento*). Iroguenti ovajiro  
maasanopae itioncacaantaqueca  
Aapani Irioshi coramani yoanajigueti Jesoshi jenoqui inquitequi.  
Acantiro aisa *Tsavetacoquerica  
Jesoquiriti*. Iriguenti  
tioncaciaquero itigarancanejia  
Jesoshi, jeri aisa Maricoshi,  
iriguenti aisa aavintantatsica  
pajitatsica Irocashi, iriguenti aisa  
Paavoro. (Pamenero  
itsavetacojitaquerogueti *Iroquetinica  
Itioncacaantaqueca Aapani Irioshi.* )

**Iromaqutica** (*los romanos*). Iriguen-  
tija ashintajiacarica jorjojia  
coramani ivoaquegueti Jesoquiri-

shito. Tequeratagueti incoraqueteji  
Jesoshi acaniqui quepatsiqui irira  
imajirote Iromaqutica itigarancajia-  
queri igoaretatepae irashimirinta-  
jiaquempari maasano guinentijia-  
tsica oraniqui quepatsipaequi  
anquitacoguetacaroca iniroja  
quentijani pajitatsica Meriteraneo,  
iroompa yanaajiaqueri  
yaitsijiaqueri iguepatsitepae  
yashintajiacaro, ariquea  
imajiaqueri iriatimpajia aisa  
yashintajiacari.

Irira imajirote Iromaqutica  
icantajitiri Sesa. Iguintenitaca  
iriatimpa Iromaqui Itariaqui. Ora  
Iroma iroguenti ocapiocagueti  
tsovironaquai aisa iroguenti  
inirojeguintacaro maasano iguepa-  
tsite Iromaqutica icantajitica *el  
imperio romano.* Irira Sesa caaviji  
imajirontamajataca ontaniqui.  
Icantajiaqueri maasano yashintajia-  
caca iroosati irojocajiaqueneri  
imentaquisite, irootaquetari  
ichoocatantajiacaca  
yamanantajiacarica igonorojia  
imentaquisite irashi majirontatsica,  
icantajitiri quimajareri *cobrador de  
impuestos.* (Pamenero  
“Capiocapinitinirica majirontatsica  
imentaquipae.”)

Ichoocajiaque oshequini igoare-  
tate Sesa shiramparjiatsica.  
Iriatimpa itigarancajiaqueri  
iramenajiaqueri maasano guinenti-  
jiatsica iguepatsitequi  
irinejajiaqueri taaca opajita  
impeacaajiaquempa teeca irininte-  
roji iriatimpa cameetsaniji  
incamantajiaqueri iramajirorejia  
irijajiaque incantomajajiaqueri  
aatoniji yapijitajiro aisa.  
Yatsipetacaajiacariquea  
yasereamajajiaquerigueti oconoaca

icatsimatasjijiacari imetojacaantaji-aqueri yompajacojaqueri. (Pamenero “Coaretajia”.)

Apatiroti agavejanquitsi Iromauquitica irimetojacaantajijaqueri peacagaroca teeca irininteroji Sesa, icantimentajijaqueri maasano yashintajiacaca irimetojacaantantajiaque. (Jn. 18.31) Irootari iquenquetsatacotaque Jesoquirishito icamantajijaqueri itsatacaanejia iraacaantajitaquerigueti irajaitanaqueri ichoocaquegueti teeca irio jorioja irimetojacaantajijaqueri. (Mr. 10.33-34) Cotanquitsi teequea irimetojanteji intati Iromauquitica, mana icajemacaantajijaqueri catsimajianquitsica aisa icatsimajiaqueca inquenquetsaventajiaquempa iriatimpajia inquemajiaqueriquea maasano. (Ya. 25.16)

Irira Jesoquirishito icamantajijaqueri itsatacaanejia oncoramanitapojegueti irisoveajitero teemporo aato ochoocatimataji apapiro mapi ogataajatsineca, itsatsitacatari aapojempagueti ajagantsini 70 incoraquetaque coaretajia Iromauquitica irisovejaiquerero incontaajiaquerero, coajica ariquea oquejetanaca, onetsanataca icanqueca. (Mt. 24.1-2)

Irira Paavoro iriguenti jorio, cotanquitsi tee irivogueji Ishirae-riqui. Iroguenti ivoaque Tarisoqui. Oraquea Tariso iroguenti ocapiocantacaca tsovironaqui, iroguenti irashi Iromauquitica, jeroquea iriatimpa iriguenti aisa Iromauquitica, irootaquequea yompevintsatantacarica Sesa. (Ya. 16.37-39; 21.37—22.3; 22.22-29)

Chooca paperi pajitatsica *Paavoro Itioncaciaqueneri Iromauquitica*, irootaque itioncaciaquenerica Paavoro tsaroventajiacarica Quirishito choocajianquitsica Iromauqui. (Irm. 1.7) Iconoagarantaca iriatimpajia iriguenti joriojia conoajiacarica Iromauquitica, cotanquitsi yoshequiamajatanquitsica igonorojia Iromauquitica teeca irijorijoigueji. Oconoaca tee inquemavacaajiguempaj irootaquea itioncaciaquenerica Paavoro icamantamajajaqueri quero icota Aapani Irioshi imeshi-antigueti, aisa icamantajijaqueri irira Aapani Irioshi inejajiaqueri maasano tsaroventajiacarica, ari iquejetavacaajiacaca irioca jorio, aisa irioca teeca irijorijoigueji. Aisa icamantajijaqueri ipintsataca iroanaque iramenajiaqueri inquenquetsatimojiaqueri. (Irm. 1.13-16; 3.22; 10.12)

#### **Iroquetinica Itioncacaantaqueca**

**Aapani Irioshi** (*el Antiguo Testamento*). Iroguenti ovajiro maasanopae itioncacaantaqueca Aapani Irioshi coramani tequeragueti incoraqueteji Jesoquirishito acaniqui quepatsiqui. Iriguentijia tioncaciaquerero Moishishini, Taavini, Saromonini, Jeremiashini irisati itsipapae oshequini tsavetantatsica. (Pamenero itsavetacojitaquerogueti *Iroquerari Itioncacaantaqueca* Aapani Irioshi.)

**Ishiraeri** (*Israel*). Iroguenti otsipa ivajiro Jacovoni, irijaniteni Ishaaconi, irijaniteni Averaameni. Irira Jacovo irootari pajitajiri Aapani Irioshi aisa Ishiraeri. (Jen. 32.23-32) Ichoocajiaque irijanijiate 12, iriojia choviquijiaquerica

maasano ishiraerija (*las doce tribus de Israel*). (Jen. 35.22b-26; pamenero “Ishiraerija”.)

Aisa opajita Ishiraeri iguepatsite joriojia yojocajiaquenerica Aapani Irioshi. Iroqueraguetai opajitaca Canaane, iroompa coajica itsipajia ipajitaquero aisa Pareshitina (*Palestina*). Ora Jorea, Garirea aisa Samaria onajiaque Ishiraeriqui. (Mt. 2.19-22;)

### **Ishiraerija, ichoviquijianaqueca**

**Ishiraeri** (*los israelitas, las doce tribus de Israel*). Iriatimpajia ishiraerija iriguenti ichoviquijianaqueca Jacovoni. Iriraquea Jacovo iriotari ipajitajica Aapani Irioshi Ishiraeri, irootaquea icantantajitacarica ichoviquijianaqueca ishiraerija. Aisa icantajitiri joriojia, aisa evereojia. (Jen. 32.22-32; Eeq. 1.6-9; 2 Co. 11.22; Stg. 1.1; pamenero “Ishiraeri”, “Evereojia” aisa “Joriojia.”)

**Itigarancaneja Jesoshi** (*los apóstoles*). (Mt. 10.2-4)

**Itioncacaantaqueca Aapani Irioshi** (*la Escritura, las Escrituras*). (Pamenero itsavetacojitaquerogueti *Iroquetinica Itioncacaantaqueca Aapani Irioshi*, aisa *Iroquerar itioncacaantaqueca Aapani Irioshi*.)

**Itioncacotanaqueca Moishishini** (*la Ley de Moisés*). Iroguenti ovajiro maasanopae itioncacaquerica Aapani Irioshi Moishishini coramani ichoocajiaquegueti ishiraerija oquitamampororoitapojigueti cameetsanijite intsajiaquenijite iriatimpajia maasano inintaguequea iriatimpa irinetsanajitaque. Icamantaqueri quero incojiaquempani ishiraerija intsipatavacaajiaquempagueti inchoocajiaquenijite cameetsa. Aisa icamantaqueri quero incojiaquerini

viratsipae intajaiquenerigueti iroguenti aisa quero incojiaqueroni taaca opajitapae otsipa irojocajiaquenerica. Icamantaqueri quero incojiaquempa saserorotejia irantavaejiaquenerigueti Taverenacoroqui, aisa taaca opajitapae otsipa inintaguetica. Ariquea irira Moishishini itioncaguetaquero maasano.

Irira Aapani Irioshi icantajiaqueri ishiraerija irinetsanamajajiaquero maasano itioncacetanaqueca Moishishini cameetsaniji incavintsajajiaqueriniji inchoocajiaquenijite cameetsa, cotanquitsi oconoaca tee inquemisanterji. Ocoramanitapojaquegueti icoraquetaque Jesoquirishito imetojaventajiaqueri maasano cameetsaniji irimeshiajiaqueriniji aventajiaquemparineca, iraajivajeri aatoniji ipega. Cotanquitsi iconoagarantajiaca joriojia icantajiaque aato apaniro iquemisantajitiri Quirishito, iroguenti irinetsanajitero aisa itioncacetanaqueca Moishishini cameetsaniji irimeshiajiaqueriniji caquinte. Irootaqetari itsatacaantaquegueti Paavoro icantantajiacarica maasano apaniromajaca imeshiantaque Quirishito. Teequea omeshiantejii itioncacetanaqueca Moishishini, teenica queri agavejatsine irinetsanamajajero maasano. (Eeq. 34.28; Irev. maasano; Ga. 2.15—3.25)

**Ivajiroqui** (*en su nombre, en el nombre de*). Amanantaquemparigueti Aapani Irioshi ivajiroqui Jesoshi oncanque amanaqueri iroorijite aquenquejamajaquero ininqueca iriatimpa, aato amanacoventiro anintashitacaca aatimpa intati. Aisa ocanque Ya. 10.48: “yoviñacajata-

caantimentajiacari ivajiroqui Jesoquirishito”.

Anquejetaquempaquea iriotaquetari aventanaca irishetajaroniji aguempevaere, iriotaquetari metojaventajacajica. Ya. 16.18 irira Paavoro icanqueri ampatsini choocatantacaroca manquigarentsi: “Noncantantaquempiro ivajiroqui Jesoquirishito pisotoanajero”, iriotaquetari agavejanquitsi Jesoshi yoguisotoaqueri.

**Iviesetatepae joriojia** (*las fiestas de los judíos*). Coramani Aapani Irioshi icantajiaqueri ishiraerija onchoocataque iviesetatepae cameetsaniji irooniji inquenquejacotantajiaquemparoa queroca icantajiaqueri icavintsajajiquerigueti irishineventajiaquemparo, aisa aatoniji imaisantajiguiro queroca icantajiaqueri choviquijianaquerica icavintsajajiquerigueti yamitacojiaquerigueti yaajavajirigueti. Ora iviesetatepae iroguenti quejecaroca imaica ocatica:

1. **Paashicoa.** *Pascua*. Iroguenti ishineventantajitaroca ora iquenquejajiro joriojia yoguisotoajajarica Aapani Irioshi ivaesatinite ontaniqui Ejepitoqui yomperaperaiacarigueti Ejepitoquitica. Pajinigueti iroguisotoajajeri, irira joriojia imetojajiaqueri ovejajaniqui, yaaquiero iriraja itiritaquero sotomorontsiqui itsovironaquitequi. Ishecajiaaca pan teeca onconoguemparoji anempoacaguiroca aisa ishecajiacari iteshi ovejajaniqui. Ariquea icoraquetaque irashivantite Aapani Irioshi imetojajiaqueri irijanite jivatanquitsica voanquitsica maasanoqueate tsovironaquipaequi

teegueti irinejeroji iriraja ovejajaniqui. Yamaquerogueti itiritaca iriraja ovejajaniqui, mana yavisa-naque. Ishineventajiacarogueti Paashicoa imetojajiaqueri ovejajaniquipae, iroguenti imetojantacarica savincaguiteri 14 taaiqui icantajitica *Nisan*. Opitsecanajigueti yamenaque oparianaca savincaguiteri quincetanquitsica, iroguentiquea ishecatantacarica. Oraquea savincaguiteri 15 *Nisan* iparianacaro ishecajiacaro pan teeca onconoguemparoji anempoacaanaqueroneca, arejevaeaquea savincaguiteri 21 ishecajiacaro.

2. **Vieseta ishecajitarogueti pan teeca onconoguemparo anempoacaguiroca.** *la fiesta del pan (o de los panes) sin levadura*. Iroguenti iviesetate joriojia guijatapojaqueroca Paashicoa. Icantimentantajitiro irishecajitempaji pan iconoantajitaroca anempoacaguiroca arejevaetemparo 7 savincaguiteri cameetsaniji inquenquejajajeroniji coramani isotoantanajaca choviquijianaquerica Ejepitoqui ishecajianacarogueti pan teeca onconoguemparo anempoacaguiroca. Icanqueri Aapani Irioshi inquejejiaquero imaica irosati ajagantsiniqui, aisa icankequea taacagueti shecatacoquemparone anempoacaguiroca aatoquea iconoajajari igonorojia iroguenti inquejetacaajitaqueri quejetaca teequea irio ishiraeri. (Eeq. 12.15-18; Mr. 14.1-2; Irc. 22.1-2, 7; pamenero “Anempoacaguiroca pan”.)

3. **Pentecoshite.** *Pentecostés*. Oraquea “Pentecoshite” manaquea ocanque “50 savincaguiteri”.

Ocoguitani ajagantsiniqui iroqueti yogavisajaque Pashicoa iroompaquea avisanaquegueti 50 savincaguiteri irooqua aapojajatsi Pentecoshite. Aisa opajitaquea "Yaantajitaroca panquirentsí", *Fiesta de la cosecha*, irootaqueuea yaantajigaroca iriatimpajia ivanquirepae yaajianaqueneriquea Aapani Irioshi iroquetica yaaquiaque, irootaque icantantajitaroca aisa *Día de los primeros frutos (o de las primicias)*.

Oraquea yoanajigueti Jesoquirishito jenoqui inquitequi, iriraquea Ishire Aapani Irioshi irooquauea icoraquetantacaca savincaguiteri Pentecoshite ichoocashirentajiapojiri tsaroventajiacarica. (Ya. 2.1-4; 20.16)

#### 4. Savincaguiteri

**yaantanacaroca saserorote anaantamajatanquitsica iriraja viratsi intsompogui Taverenacoroqui irooca Teemporoqui, intsompoguiremajaquaui icantajitica "Igovejencamajarequi inatojencatapojacagueti Aapani Irioshi" aatoniji icatsimamentajiguiri ishiraerija iquempevajiacagueti. el Día del Perdón (o de la Expiación).** (Irev. 16.1-3, 12-14, 34; Ev. 9.6-7, 25)

**5. Vieseta ishineventajiacacá joriojia ipeacaantajigaroca tsovironaquianiquipae**  
iquenquejajaijoro iquenaquenaitanajigueti ivaesatinite oquitamampororoipojaquegueti isotoantanajarogueti Ejepito. *la fiesta de las enramadas (o de los tabernáculos o las cabañas)*. (Jn. 7.2)

Chooca otsipapae iviesetajiate joriojia itioncacojitaqueca Ireviticoqui 23.

**Jenesare** (*Genesaret*). Iroguenti otsipa ovajiro iniromotija Garirea. Aisa iroguenti ovajiro guinentinintsi Garireaqui. (Pamenero "Garirea".)

**Jerosare** (*Jerusalén, Ciudad Santa, Ciudad de David, Sión*). Iroguenti ocapiocaguetagueti tsovironaquipae choacaguetanquitsica ontaniqui iguepatsitequi joriojia. (Pamenero ovaantorite Maricoshiqui 10.32-33.) Maasano joriojia ishineventamajajiacaroquea, ariquateate ochoocavecaquea iteemporote Aapani Irioshi. (Mr. 11.11; Irc. 2.22; Jn. 10.22) Aisa irooquauea ichoocatantajiacaca Imajirojiate coramanipaequítica quempecarica Taavini, Saromonini, Esequiashini iriguentejijacaca aisa igonororjia imajirojiate. Aisa oraniqui imetojaque Jesoquirishito. Opajita aisa "Guinteninintsi Yashincaca Aapani Irioshi" (*Ciudad Santa*). (Pamenero Mt. 4.5; 27.53; Irc. 21.24; Yonig. 11.2.)

Oraquea Iguenquetsatsare Aapani Irioshi oquenquetsatacoquero aisa "Iraquieraro Jerosare" jenoquítica caavijica oganejencamajataca. Oncoramanitapoja jegueti incoraquetajategueti Jesoquirishito impeaqueempagueti imajirojiate maasano quepatsipaequítica, agujitapoje isavi. Choocaquea cantajianquitsica iriguente ocanta-cojiaque maasano tsaroventajiacarica Jesoquirishito. (Ga. 4.26; Ev. 12.22; Yonig. 3.12; 21.1—22.5; pamenero "Shione".)

**Jesoquirishito** (*Jesucristo*). Tequeratagueeti irivogueji Jesoquirishito acaniqui quepatsipiqui iriraquea irashivantite Aapani Irioshi iconijatimotaqueri Jose icantajaueri

irivoaquegueti iroguenti impajitaqueri **Jesoshi** (*Jesús*), iritari aajavajerine igonorojia. Ivajiro Jesoshi iroguenti iguenquetsatsare guiriego (*Iesous*), ari oquenapojaque iguenquetsatsarequi evereo, icanquequea *Yeshua*, ocanque: “Yamitacotantaque Yave”, “Yaantavaji Yave” aisa “Imeshianataque Yave”. (Mt. 1.20-21, 24-25)

**Icantajitiri** aisa **Quirishito** (*Cristo*). Iguenquetsatsarequi guiriegojia *Christos* ocanque “Ishaguijitaqueca”. Coramani Aapani Irioshi icantajiaqueri ishiraerijia irishaguijitaqueri orejiqui orivo irirajia icoguiajiaqueca impeaquempa imajirojiate irooca isaserorotejiate. (1 Sam. 9.15-16; 10.1; 10.1, 10-13) Irootaquea icantantajitaracica Jesoshi aisa Quirishito, iritari icoguiaqueca Aapani Irioshi impeaquempa Imajirote maasano quemisantajiaquerineca, aisa impeaquempa Isaserorotete, irootaquea yoguipitsocajitaquerogueti *Christos* aguenquetsatsarequi icantantajitaroca “Icoguiaqueca Aapani Irioshi”. Atsipatacaantacarogueti ivajiro Jesoshi aisa Quirishito icantajitiri “Jesoquirishito”. (Mt. 1.1, 18; pamenero “Meshiashi”.)

Irira Jesoquirishito iriguenti Irioshimajaca icoguitani ichoocati. Ariquea iquenapojojigueti jenoqui inquitequi ivoaquegueti acaniqui quepatsiqui iroguenti voajiri manquigarentsi majinaro, iriguenti tari agavejaca aquero Ishire Aapani Irioshi oaquégueti, irootaquequea icantantajitaracica Jesoquirishito Iriganite Aapani Irioshi. (Jn. 1.1-3; Irc. 1.27-35; Mt. 14.33) Ari

irisatigueti quenquetsata cotanquitsi ipajitaca aisa Iriganite Caquinte, itsataquetari iroguenti iquenapopajaque jenoqui inquitequi, cotanquitsi ichoocaquitigueti acaniqui quepatsiqui iquejejiacaji aatimpajia caquintejia. (Mt. 8.20; pamenero “Iriganite Caquinte”). Icantajitiri aisa Imajirote ishiraerijia (Irc. 1.32-33; Jn. 1.29; 12.13), Imajirote joriojia (Mt. 2.2; 27.11), Irovejajaniquite Aapani Irioshi (Jn. 1.29; Yonig. 5.6), León ichoviquitanqueca Joraani (Yonig. 5.5), aisa Ichoviquitanqueca Taavini (Mr. 10.47; 12.35).

**Jesoshi** (*Jesús*). (Pamenero itioncacoji querogueti ivajiro “Jesoquirishito”.)

**Jiriquipijoroquiro** (*ropas ásperas*). Ora quitsaarentsi jiriquipijoroquiro iroguenti oquejevecaro costal ipeacaajitacaca omashiyute, oquejevecaro peamashi. Iquitsaajitarogueti amecantaque jiriquipijoroquitaro ocanca.

Irirajia joriojia coramanitica yamejiga inquitsaaquemparo ironigaantaquempaniji caaviji ishimampojancavaetaca, iroguentica inejajiacagueti ipeacaajiacateecca oncameetsateji, iroguentica imetojacojigui. Oconoaca itsipatacaantajiacaro aisa iperejacojiaca itsaare, isavicashijiaca intati tee irishecajiguempaji, itijaguinaitsijigaro cachopaneri irooca quepatsivane, irooca aisa itinquianeguintajiacaca. (Jen. 37.34; Jon. 3.4-9; 2 Maj. 18.13—19.3; Ne. 9.1; Mt. 11.21; Irc. 23.48; pamenero “Gachoncaguinatagantsi” aisa “Perejacotagantsi”.)

**Jivatanquitsica shinagogaqui** (*el jefe de la sinagoga*). Iriguenti cantanqui-

tsica quero incojitaquemparo  
maasano shinagogaqui icapiocanta-  
jiacaca joriojia quejeguetaroca oca:  
icapiocajiacagueta irio cantanquitsi  
queri apatsajavantaqueroneca  
Iguenquetsatsare Aapani Irioshi  
aisa queri quenquetsatacaaquerine;  
inetsanataacaantaquero tsvironaqui  
icapiocantajiacaca aisa maasano  
choocatantaguetaroca;  
impeacaajitempagueti taaca  
opajitapae icantimentantajitica  
icapiocajiacagueta, irio  
cantomajantankuitsine; aisa incora-  
quetaquegueti itsipa irinejante, irio  
cantaquerine arigueta irintintaque  
inquenquetsatacaaquiaqueri  
maasano. (Mr. 5.22; Irc. 8.41;  
13.14; Ya. 18.7-17; pamenero  
“Shinagoga”.)

**Joese, joesepae** (*juez, jueces*). Iriguen-  
tija peajianquitsica jivatirica  
ishiraerija coramani tequeratagueti  
inchoocateji imajirote. Iriatimpajia  
ipigamentajiaqueri, aisa yamitacoji-  
aqueri maasano manapitsajacarica,  
aisa icamantajiaqueri taa opaji  
inique Aapani Irioshi.  
(Joes. 2.10-19; 1 Sam. 7.15-17; 8.1;  
Ya. 13.20)

Coajicani ichoocajigui joesepae  
iroguenti isavicaventajigui icoacoji-  
aqueri icantajiquerigueta ipeacaaca  
teeca oncameetsateji. Ariquea  
inejaquerigueta arimaja iquejeta-  
quero imaica, ari icantaque quero  
incojitaquerini. Oconoaca mana  
icantomajaqueri intati, iroguentica  
icantaque iroguijajitaqueri,  
irogentica irovegarataqueri  
catsimataquerica.

(Mt. 5.25; Irc. 12.58; 18.1-8)

**Joraa** (*Judá*). Joraa iriguenti irijanite  
Jacovo irijanite Ishaaco irijanite  
Averaame. Maasano imajirojiate

ishiraerija peajianquitsica majiron-  
tatsica Jerosarequi iriguenti ichovi-  
quijianaqueca Joraani. Ari iqueje-  
taca aisa Jesoquirishito iriatimpa  
iriguenti ichoviquitanaqueca  
Joraani, irootaquetari ocantanta-  
caca Yonig. 5.5: “Pamenerija  
iriratica León ichoviquitanaqueca  
Joraani, aisa iriguenti ichoviquita-  
naqueca Taavini. Yanaajiaqueri-  
quea maasano.” (Jen. 35.22b-26;  
Mt. 1.1-17; Irc. 3.23-32; Ev.  
7.12-14)

Oraquea quepatsi Canaanequi-  
tica ichoocatantajiacaca ichoviquiji-  
anaqueca Joraa, iroqueragueta  
icantajitiro iguepatsite Joraa.  
Coajicani opajitaja Jorea. Ari  
onaque Jerosare ontaniqui  
Joreaqui. Maasano ichoviquijiana-  
queca Joraa icantajitiri aisa Joraa  
(*la tribu de Judá*). Coramani  
ipeacagueta Taavini majirontatsica  
iriguenti imajirote ichoviquijiana-  
queca maasano irijanijate Ishiraeri,  
iriatimpajia icantajitica ishiraerija.  
Ari iquejetaca irijanite pajitatsica  
Saromoni, cotanquitsi imetojaque-  
gueti iriatimpa iriraquea irijanite  
pajitatsica Irovoame ipeaca  
imajirote ichoviquijianaqueca Joraa  
aisa Vejamine, ari oponeanaca  
iriatimpajia icantajitiri *el reino de*  
*Judá*. Itsipa pajitatsica Jerovoame  
ipeaca imajirote ichoviquijiana-  
queca itsipapae iriguentijeguitepae  
Joraa carajianquitsica 10, quejeta-  
carica Irovene, Shimeone, Irevi,  
maasano. Irirajia majirontajatiatsica  
ichoviquijianaqueca Joraa iroosati  
ichoocajiaque Jerosarequi. (Pame-  
nero “Ishiraerija”.)

**Jorashi** (*Judas*). Oraquea Iguenquetsatsa-  
requi Aapani Irioshi chooca oshequi  
shirampari pajitatsica Jorashi:

1. Jorashi irijanite Santiago.  
Iriatimpa ipajita aisa Tareo.  
Iriguenti itigarancane Jesoshi.  
(Mt. 10.3; Irc. 6.16)
2. Jorashi Garireaquitica  
metojantatsica. (Ya. 5.37)
3. Jorashi Ishicariote (*Judas Iscariote*). Icantajitiri aisa Jorashi irijanite Ishicariote. Iriguenti itsatacaane Jesoshi aacaanquerica. (Mt. 10.4)
4. Jorashi iriguentijeguite  
Jesoshi. (Mt. 13.55) Teequea intsamajajitero queri tioncaqueroca paperi pajitatsica “Jorashi”. Chooca iconoagarantajiaca icantajiaque iriguenti tioncaquero Jorashi itigarancane Jesoshi. Chooca itsipapae iriguenti icantajiaque iriguentica tioncaquero iriguentijeguite Jesoshi.
- Jorea** (*Judea*). Iriguenti quepatsi choocatanquitsica iguepatsitequi ishiraerijia. Tequeratagueti impajijiteroji Jorea ariguenti opajiveta Joraa. Ivoaque Jesoquirishito Verenequi Joreequi. Aisa onaque ontaniqui ocapiocagueta tsovironaqui pajitatsica Jerosare. (Mt. 2.1-6; pamenero “Ishiraeri”, “Joraa”, “Jerosare”.)
- Jorio, joriojia** (*judío, los judíos*). Iriguentijia ichoviquijianaqueca Jacovoni irijanite Ishaaconi irijanite Averaameni. Oraquea iroqueragueti iriguenti icantajiqueriquea ishiraerijia, ipajitacatari Jacovo aisa Ishiraeri. Aisa icantajiqueru “evereojia”. Iriguentijia inintacaajiaqueca Aapani Irioshi iroqueragueti irashintamajajiaquempari, irootaquea icantantajitaracica aisa iriguenti “irashi Aapani Irioshi”. Aisa irioquea yojocajiaquene
- Iguenquetsatsare. (Aparoqua inaque Irocashi, tee irio jorio.) Oraquea icoraquetaquegueti Jesoquirishito acaniqui quepatsiqui, ivoaquegueti, jorio inaque. Ari iquejejiaca irirajia saseroroteja, pariseojia, saroseojia, aisa tsatacaantajiguiroca itioncacotana queca Moishishini, maasano iriguentijia joriojia. (Jn. 4.1-26; Irm. 3.1-2; 11.16, aisa tioncanquitsica isavivanaqui; pamenero “Imajirotepae joriojia” aisa “Iviesetatepae joriojia”).
- Coramani ivoaquegueti Jesoshi, irira joriojia tee inchoocatashijiguemparo iguepatsite intati, iriguentijatari ashintajigari Iromaquitica. Imaicaquea ari ichoocatashijiaca intati. Oraga iguepatsite opajita Ishiraeri (*Israel*). Iriqueti itsavetantimojitaque joriojia icamantajitaqueri quero icota Aapani Irioshi imeshiantigueta, cotanquitsi tee irishineventajiguempari Jesoquirishito meshiajiaquerinemea teetari irinintajigueji intsaroventajiguempari, irootaquequeate ipitsocashitantajitanacarica teeca iriojia joriojia itsavetantimojitaqueri. Cotanquitsi oncoramanitapojaquegueti imipitsocashitajitanajemparsi joriojia intsaroventajiaquempari Jesoshi oshequini. (Irm. 1.16; 11.11-15; pamenero “Ishiraerija”, “Evereojia”, “Joraa”, “Pareshitina”.)
- Manaa** (*mandá*). Ocatica manaa irootaque ishecajia ca ishiraerijiani yojocajiaquenerica Aapani Irioshi coramani iquenajianaquegueti oquitamampororoipojaquegueti. Ogantaga ojoquijipinitaja sotsiqui

irosati savincaguiteriqui osavinca-guitetamanaquegueti aavaepojaca 40 ajagantsini, cotanquitsi savinca-guiteriqui imagorejantajitaca tee ojoquijitempaji. Oraquea iquijana-quegueti Canaanequi teequea ojoquijitajempaji. Oconoacaquea icantajiqueroquea “pan quenapoja-tsica jenoqui inquitequi”. Ocatica manaa mana oquejetacaro omentajaniqui pan, quempevaeca-quea anconoanquemparonica earotoja, pochavaeque. Iroguenti oquempevecaroquea oitsouqui *cilantro* icantajitica aisa *coriandro*, quitamaroitsoquivaeque.  
(Eeq. 16.14-18, 31-35; Nm. 11.7-9; Jos. 5.10-12; Jn. 6.48-51, 57-58; 2 Co. 8.15)

**Menta** (*menta*). Iroguenti panquirentsi. Oraquea ovana iroguenti oquempe-tacaroquea ovanaqui sanconcavana oponcavageataque. Irirajia jorio itsipatacaantacaro isheca omposhimanjamatanaqueuniji.  
(Mt. 23.23; Irc. 11.42)

**Merequisere** (*Melquisedec*). Irira Merequisere iriguenti isaserorotete Aapani Irioshi choocatanquitsica coramani ichooquegueti Averaameni. Teemajaca inquemacomamajiteriji, irootaque tee antsantanempaji quero iquenapojini, taa irijanintari, quero iguinentita, aisa quero yoanaqueni. Ariquea ipijaagueui Averaame yashimirintajavacarigueui majiron-tajitsica aajavetanacarica irijani-tsorte pajitatsica Irote, iriatimpa itonquivojavajari Merequisere, icantacoventaqueri incavintsa-jataqueri Aapani Irioshi, ariquea Averaame yojocagarantaqueri yaapitsajiavajirica yashimirintajiacaca. Irira

tioncajiaquenerica evereojoia icantaque irira Jesoquirishito iriguenti saserorote quejecarica Merequisere. (Jen. 14.17-20; Ev. 7.1-19)

**Meshiashi.** (*el Mesías, el ungido de Dios*). Irira Jesoquirishito icantajitiri aisa “Meshiashi”. Iguenquetsatsarequi evereojoia iroguenti icanta-jitiro *mashiakh*, ocanque “ishaguijitaqueca”.  
Yoguipitsocajiquerogueti guiriegoqui icantajitiro *Christos*, Quirishito. Irio icoguajiaqueca Aapani Irioshi impeaquempa Imajiromajate ishiraerijia. Irio Meshiantatsica itigarancaqueca Aapani Irioshi, aajavajerineca caquinteja aventajiaquemparineca.  
(Jn. 1.40-42; 4.25-26; pamenero “Jesoquirishito”.)

**Mira** (*mirra*). Iroguenti ogashija inchato oponcabajamajataque, aisa ovegaravaeca. Iriraquea jorioja iconoancaro vinoja yogavintantacaro, iroguenti aisa imirashitantajitaroca osanticotantanajempaca ogatsire.  
(Jen. 37.25; 43.11; Mt. 2.11; Mr. 15.23; Jn. 19.39-40)

**Moroco** (*Moloc*). Iroguenti irioshivijire amonitajia, ipeacaantajitacari voronquise. Itsinoqui iquejevecari caquinte. Iguitoqui oquejevetacaro iguito irijanijaniqui caapironcaari. Irirajia amonitajia itsitacashitaqueri paamari, coajica icatsirincatanaquegueti iquichagantetanaque yojoquijqueneri irijanite iracoqui, intaaquempa. (Ya. 7.43; pamenero “Voronquise”.)

**Naarero** (*nardo*). Iroguenti inchaquijishi choocatatsica otsem-pipaequi otsipapaequi quepatsi.

Yaa jitiroquea ogati aisa oshipaqui ipeacaajitaroquea ose oponcajajencamajataque. Ishineventamajajiacaro joriojia, yaapinijitiro osamani, jeroquea ovegaramajatantacaca. (Mr. 14.3-9; Jn. 12.3)

**Nicoraitaja** (*los nicolaitas*). Teequea intsamajajitajeriji irirajia icantajatica “nicoraitaja”. Iquenquejajitaque irioca guijatacojiguiroca itsatacantica Nicoraashini. Arica iquejejiacari guijatacojiguirica itsatacantica Varaameni. Iroguenti icantajiqueriquea cantashitatigroca Iguenquetsatsare Aapani Irioshi (Yonig. 2.6, 14-15)

**Ogueroventantsi, yogueroventacari** (*arrodiarse delante de, postrarse delante de*). Irirajia joriojia yamejiga yogueroventajiacari quericaca anaquerica, irirasano Aapani Irioshi, iriguentijia aisa majirontajiacarica. Oconoaca yogueroventajiacari yarejevaetaquita ivancaqui isavi (*se postraron sobre sus rostros; o se inclinaron hasta el suelo*). Yugueroventajiacarigueti Aapani Irioshi tee aparo oncateji inejajiaqueri caaviji yanaaqueri. Oconoaca aisa iroguenti oncantaque caaviji ishineventajiacari yamenajiaquetari caaviji yagavejavaeti, irooca caaviji icavintasajanti, irooca itsaroacaajacari, irooca aisa otsipapae ishineventimentajiacarica. (Jen. 18.1-2; 27.27-29; Iran. 3.5; Mt. 4.9; Mr. 3.11)

**Omencotapojacagueti itsovironaqueitequi ovancaitoqui** (*en la azotea de la casa*). Oraquea osamani-paequi teegueti ontejamajateji, ora itsovironaqueitepae choocajianquisica ontaniqui omencotaca sotsiqui

ovancaitoqui, cameetsavaetaque iroroantajitaquemparo iitsaarepae iroguentica aisa irisavicanjitaquemparo. Aritaque oquejeguetaca itsovironaqueitepae coramaniquitica choocajiatcsica Ishiraeriqui. (Mt. 10.27; 24.17; Mr. 2.4; Ya. 10.9. Pamenero ovaan- torite Irocashiqui 17.31.)

**Orivo** (*olivo*). Iroguenti inchato choocatatsica iguintenijigagueti joriojia. Caaviji ishinevencaroquea iriatimpajia ochocomajatitarite oshequi oreji oitsoquiqui, opajita *aceite de olivos*. (Pamenero ovaan- torite otsapaqui Irm. 11.17-24.)

Oraquea oquenquetsatacotaquerogueti Iguenquetsatsare Aapani Irioshi “ashiti” irooca “oreji”, irootaque ocantacotaque oreji orivo.

Coramani irooqua itsivotacotajitaroca Taverena- coro, Teemporo, jero aisa itsoviro- naquitepae. (Irev. 24.1-4; Mt. 25.3) Aisa yaavintantajiacaroquea (Mr. 6.13; Irc. 10.34), aisa iconoantajiacaro isheca. Aisa irooqua ishaguitantajigari quericaca ipeacaajiacaricomajirojiate irooca isaserorotejiate. (1 Sam. 9.16; 10.1) Ari iquejejiaquero aisa maasano taaca opajitapae yashinta- caacarica Aapani Irioshi ishaguitantajigaro ashiti. (Jen. 28.18; Irev. 2.1-6) Oraquea yaavintantajiacarogueti irooca ishaguitantajiacarogueti irashintacaaquemparica Aapani Irioshi, oconoaca itsipatacantajiacaro vinoja. (Irc. 10.34; Jen. 35.13-15)

Imaicaquea imaica oraquea itsipatacantajitaro vinaguere

(*vinagre*) aisa incachoanepane, manaquea icantajitiro *aceituna*.

Chooca aparo otsempi irooshitacocaroca Jerosare opajita- quea Orivotsempi (*el Monte de los Olivos*), ochoocatantarotari oshequi orivo. Irootari ocantacotaque Jn. 18.1 ocanquegueti yoanaque Jesoshi panquirentsimashiqui itsipajianacarigueti itsatacaanejia. Ari ontaniqui yamanaqueri Aapani Irioshi pajinigueti iraacaantajiteri. (Mt. 26.30; Ya. 1.12)

**Orivotsempi** (*el Monte de los Olivos*).

(Pamenero “Orivo”.)

**Ova** (*uva*). Oraquea icantajitica ova mana ipanquijiquero oquejetanacaroquea shivitsatsa osoaancaguetanaquemparoqua, onchoocatanaquequea oitsoquijaniquipae quejevaecaquea manquinto aisa sevantoqui. Coramani yamecaroqua joriojia imiracaro ovaja. Ocachotanaque- gueti opeanaja vinoja. (Pamenero “Vinoja” aisa pamenero ovaantorite ova: Jn. 15. Pamenero ovaantorite otantacocagueti ova otsapaqui Mr. 12.1, ochoocaquegueti aisa yagati- cantajitaroca ova impeacaantaquemparoqua ovaja peanquitsineca vinoja.)

**Oveja** (*oveja*). Yamejiga joriojia iviratacari oshequini oveja. (Pamenero ivaantorite oveja otsapaqui Jn. 1.1-10; 1 Pe. 2.25.) Oshequi irashi oveja icameetsatantacaca: imae ashi quitsarentsi, imeshina iroguenti antaca onero ashi ovaja, ora iteshi ishecajitaro. Coramani tequerata- gueti incoraquetejí Jesoshi icaman- tajiaqueri Aapani Irioshi joriojia: “Arigueti pinquempavaetaquempa paaqueriquea ovejajaniqui

pimetojiqueriqueate.”

Imetojaquerigueti oveja mana iquejetacaacaro irimetojaventacajigueti coajica irira Quirishito Meshiantatsica. Icanqueri inquejetacaaqueemparogueti ariqueate irishetajeneri igovaegui- shere, aato iquenquejacaajiri, aato yogashinoncajimentiri. Irootaque- queate icantantajitacarica Quirishito “Irovejajaniquite Aapani Irioshi” (Jn. 1.29). Imetojaventacaji ivegaratajajirotari aguempavaere.

**Paaquito** (*pacto*). Oraquea paaquito iroguenti icantamajajitirica itsipa irinetsanamajajitenerica. Oratica- quea *iroqueraro paaquito* (Mt. 26.28) icantajiacajiquea Aapani Irioshi irishetacotajeri igovaegui- shere maasano aventajiaquempari- neca Meshiantatsica metojaventajia- cajica. Ochoocaguetaquequea paaquitopae iroquetinica icanque- rica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishi- shini, otsipa icanquerica Taavini. (Pamenero aisa Mr. 14.24; Irc. 22.20; Irm. 9.4; 1 Co. 11.25; 2 Co. 3.6; Ga. 4.24; Ev. 7.22; 8.6-13; 9.1-20.)

**Paashicoa** (*Pascua*). (Pamenero “Iviesetatepae joriojia”.)

**Pan** (*pan*). Oraquea pan irooquea ishecama jataca joriojia. Iroguenti opeacaantacaro ovane tirigo, irooca ovane *cebada*. Mana intati otsinacaquero oitsoqui. Coajica intsaparoncaguitetanajegueti onconoanquemparo oja aisa anempoacaqueroneca. Ojoquijiqueroquea intati, ariquea anempoanaquempa. Arikea ontsitacashitsitemparoquea

omoroqui itashitantajitaroca,  
manaquea oncantacoguitempani  
samimimi irosatiquea osavincagui-  
tetanaquegueti cameetsaniji  
oncatsirincatanaqueniji mapinaqui.  
Osavincaguitetamanaquegueti  
aamanaqueroquea ose  
onconoantaquemparo otsipa ovane,  
oja, aisa incachaoanepane, ariquea  
ojoquijitajero  
anempoanajempaquea. Ariquea  
anempoanaquempagueti  
aitemparoqua paamari  
ompishonquitemparo, ariquea  
oguijaitemparoqua omorotaca-  
gueti omopasatimentanaqueniji.

Aatogueti oconoantaro anempo-  
acaqueroneca manaquea  
onquejetanajemparo intati shape.

Irira joriojia yamejiga iriatim-  
pajia irishecaquempagueti  
manaquea ojoquijitacoquerota  
intati shitaponcarontsiqui,  
iraitemparoqua iramanqueri  
Aapani Irioshi incanqueriquea:  
“Arioteesaa, Aapani, pojocaquenaro  
nosheca”. Incantsitemparoqua  
cotarec irojocaqueneri irijanitepae,  
imanquigare, manaquea  
iraaguetavaquero apaniropae  
incantavaquero cotare cotare.

**Paraiso (paraíso).** Irimetojaquegueti  
tsaroventarica Aapani Irioshi, ari  
iroanaque ontaniqui paraisoqui, ari  
inchooaque irosati aapojempagueti  
savincaguiteri intancorejantanajem-  
paca. (Irc. 23.43; 2 Co. 12.2-4;  
Yonig. 2.7; pamenero aisa Irc.  
16.22.)

**Pareshitina (Palestina).** Iroguenti  
otsipa ovajiro quepatsi ichoocatan-  
tacaca Jesoquirishito coramani  
icoraquequitigueti acaniqui quepa-  
tsiqui. Ari ontaniqui ochoocataque  
Garirea, Samaria, Jorea,

Tecaporishi aisa otsipapae quepatsi  
icantajitica *distritos*. Iroqueragueta  
opajita Canaane. Iroguentitari  
pajitatsica aisa Ishiraeri. (Pamenero  
“Canaane” aisa “Ishiraeri”;

**Pariseoja (los fariseos).** Iriguenti  
joriojia cantajianquitsica  
intsamajajitaquero maasano  
itioncacotanaqueca Moishishini,  
cotanquitsi oconoaca  
yogaashijiacaro, icantajiaquetari  
irinet sanamajajitero taaca  
opajitapae otsipapae teeca irio  
cantatsine Aapani Irioshi  
irinet sanajitero, mana yaashitacaro  
iriatimpa. Ijijiaque iriguenti camee-  
tsamajatatsica anaamerica  
itsipapae joriojia. Ora itsatacaanta-  
quegueti Jesoshi irosati  
yaserejiaqueri inintajiaque incatsi-  
matacaantajiaqueri, cotanquitsi  
iriatimpa itsatavaqueri iriguentijia  
quemisantamampeajitsica intati.  
(Mt. 12.1-2, 14, 24; 19.3; 23.1-32;  
pamenero “Saroseoja”).

**Peerera (perla).** Chooca quentijaqui  
quejevetarica chapiro. Onquijaque-  
rigueti capichaji impanequi, aserea-  
queri, ari intiratapiniquero camee-  
tsaniji oncarenitanaque. Oncoram-  
nitapojaquegueti ompeanaquempa  
icantajitica “peerera” (icanquero  
quimajareri *perla* ), quitasaaancore-  
rencavaeque, impeacaquemparo  
nenquetsiqui. Ovegaravaetaca  
peerera. (Mt. 7.6; 13.44-46;  
Yonig. 17.4; 18.12, 16; 21.21)

**Pentecoshite (Pentecostés).** (Pamenero  
“Iviesetatepae joriojia”.)

**Perejacotantsi, iperejacotaca**

**iitsaare (romper la ropa).** Irirajia  
joriojia coramanitica yamejigaca  
iperejaciaca iitsaarequi capichaji  
yamenacaantajiacaca caaviji  
icatsimamajajiaque irooca

ishimampojancavaejiaca. (Jen. 37.31-35; 2 Maj. 18.13—19.1; Mt. 26.65; Ya. 14.14; pamenero “Gachoncaguinatagantsi”, “Pishoncavanetagantsi” aisa “Jiriquiquijiporoquiro”.)

**Pishoncavanetagantsi,**  
**ipishoncavanequiero quepatsivane** (*tirar polvo al aire*).  
 Coramani caavijigueti yotsimajajitaqueri joriojia iroguenti yamejiga ipishoncavanetanaquero quepatsivane jenoqui, irooca aisa ipotecamorenataquero iitsaare, irooca ipishoncanaquero jenoqui, oconoaca iperejacotanaca capichaji. Iquejejiaquerogueti imaica iroguenti oncanque tee capichaji incatsimajigue. (Ya. 22.23; pamenero “Perejacotagantsi”.)

**Quempoguijajiguirica tsaroventajatsica** (*anciano, dirigente*).  
 Coramani irira Paavoro icantajiaqueri tsaroventajatsica querocagueti icapiocajiacagueti iraajiaqueri irapitsaroventarite quemisantamajajiguirica Aapani Irioshi cameetsaniji irioniji quempoguijajiaquerine maasano tsaroventajatsica choocajatsica oraniqui. (Ya. 20.17-35; 1 Tim. 3.1-7; Tito 1.5-9)

**Quirishito** (*Cristo*). (Pamenero “Meshiasi” aisa itioncacojiquerogueti ivajiro “Jesoquirishito”.)

**Saancagantsi, isaancaquero** (*purificación*). (Pamenero “Cantaitetantagantsi, ocantaitetanti” aisa “Saserorotejia”.)

**Samaria** (*Samaria*). Iroguenti quepatsi choocatanquitsica niganqui iguepatsitequi ishiraerijia. Ora Garirea iroguenti onaque catonco, Jorea iroguenti onaque quirinca, Samaria iroguenti onaque niganqui. (Jn.

4.1-4; pamenero “Samariaquitica” **Samariaquitica** (*los samaritanos*). Iriguentijia caquintejia choocajatsica ontaniqui Samariaqui ocarata-pojigueti Jorea. Coramani icatsimatavacaajiaca ishiraerijia inashijianaca irosati ichoocataque mavite imajirote. Aparo icocani ichoocaque Jerosarequi, itsipa ichoocataque Samariaqui, teequea intspitavacaajajempa maasano ishiraerijia. Iroompaquea yashimirintajiacariquea Ashiriaquitica ishiraerijia choocajatsica Samariaqui, yagavejajiaqueri, ariquea yaagarantajianaqueri iguepatsitepaequi, iroompaquea irioquea itigarancajiaque ignororjia inquempejajempariquea inchoocajiaquequea Samariaqui inconoajiaquempari ishiraerijia choocajianquitsica Samariaqui. Iroompaquea iriatimpajia ipeacaaiciacaquea otsipa teemporo itsaroventantajitarica Aapani Irioshi ontaniqui ichoocajiguigueti, irootaquequea icatsimantajiacarica ignororjia choocajatsica Joreaqui, icantajiaqueriquea iriguentijia covaeguishejatsica, inejajiaqueriquea teequea irishineventajajemparoji iteemprote Aapani Irioshi Jerosarequitica, aisa iconoajiacariquea teeca irijorijoigueji, yaajiaqueri ororijani-jiate imanquigajiacaro, aisa yojocajiaqueneri ororijanijiate irimanquigajiaquemparo iriatimpajia. Icantajiaqueritar Aapani Irioshi aato imanquigataro teeca irojorio. (Irc. 10.25-37; Jn. 4.4-42; 8.48)

**Santiago** (*Santiago*). Iguenquetsatsarequi guiriego ipajita *Iakobos*. Iconoagarantaca quimajareri yoguipitsocaquerogueti ivajiro

ipajitiri *Santiago*, itsipa ipajitiri *Jacobo*. Mavite oponeaca iguenquetsatsarequi evereo, ipajitiri *Yaakob*.

**Saroseojia** (*los saduceos*). Iriguentijia joriojia tsataacaantajiguiroca itioncacotanaqueca Moishishini, cotanquitsiquea iriatimpajia iroguenti icantajiaque aato itanco-rejajiti oncoramanitapojaegueti, ijivetaca tee onchoocateji ishire caquinte. Iconoagarantajica iriguentijia saserorotejia, aisa iriguenti ashintamajajianquitsica, apatirotitari iquenquejajiaque inchoocajiaquegueti cameetsa acaniqui quepatsiqui irishinevaejia-quempa, ijijiaquietari aato yanijajianaji oncoramanitapojaegueti.

Iriatimpajia itsipajiavetacarigueti pariseojia icatsimatavacaajiacaca teequea inquemavacaajiguempaji, aisa teetarite intsatacaaajigueronica saroseojia maasanopae icantajiaqueca pariseojia irinetsanjajigue, cotanquitsiquea orauea icoraque-quitigueti Jesoquirishito iconoavacaajicaquea icatsimajia-querigueti. (Mt. 16.1-4; 22.23-32; Ya. 5.12-17; 23.6-8; pamenero aisa “Pariseojia”.)

**Saserorote anaantamajatanquitsica** (*el sumo sacerdote*). Iriraquea saserorote anaantamajatanquitsica iriguenti *presidente de la Junta Suprema*. Iriqueti jivatanquitsica peanquitsica saserorote anaantamajatanquitsica Aaronini, iriguentijeguite Moishishi. Pajinigueti irimeto-janaque, irira Aapani Irioshi icantiri Moishishi irisapocaguetaqueri iquitsaatashitaroca

isaserorotetigueti, irioquea inquitsaatantajempa irijanite pajitatsica Eriasare cameetsaniji inquejetajempari iriri. Arikea cantacani oquejetaca ichooctigueti Jesoshi quepatsiqui, maasanoquea saserorotejia anaantamajajianquitsica iriguenti ichoviquitanaqueca Aaronini. (Eeq. 28.1-4; Nm. 20.22-29)

Apatirotisano icotacani saserorote anaantamajatanquitsica iquijapiniti intsompongiaremaja-caqui Taverenacoroqui araqueera tsipamorenatapojatsica ochoocaguegueti otsipaguite icantajitica Igovejencamajare Aapani Irioshi inatojencatapojacagueti. (Pamenero Eeq. 25.22; Irev. 16.1-3, 12-14, 34; Ev. 9.3, 8, 12, 25; 10.19; 13.11.)

Irira Jesoquirishito icantajitiri “Asaserorotete Anaantamajatatsica” (*nuestro Sumo Sacerdote*), teenica irio iroquoeneri Aapani Irioshi viratsi aatoniji icatsimatimentajiro aguempevaere, inchiquijitari imetojaventacaji iriatimpa. (Ev. 3.1; 4.14; 8.1-6; pamenero “Imajirotepae joriojia” aisa “Saserorotejia”.)

**Saserorotejia k\*** (*los sacerdotes*).

Iriguentijia ichoviquijianaqueca Aaronini antavaetinirica itaverenacorotequi Aapani Irioshi irooca iteemporotequi, itaajiguiniriquea casancavaneri aisa viratsipae, aisa taaca opajitapae otsipapae yamajiaquenerica ishirae-rijia aatonijite icatsimatimentajiguiri Aapani Irioshi icovaeguishejiacagueti. (Pamenero ivaantorite saserorote Irocashiqui 1.8-11.) Aisa inetsantaquero icantacaquerica Aapani Irioshi cameetsaniji irisaancajeneri

maasano cantaitejiavetanquitsica  
aisa itsatacaantajiaque Iguenquetsa-  
tsare Aapani Irioshi. Coramaniqui  
ichoocajiaquegueti ishiraerijia  
oquitamampororoipojigueti,  
iriguentijia tivotacojiaquerica  
cameetsanijite iroaroaitanaque  
irogaajianaquempagueti  
osamaniqui irooca  
irashimirintajiaquempagueti.  
(Eeq. 28.1-4; Nm. 10.1-8; Irc. 1.5;  
pamenero “Cantaitetantagantsi,  
ocantaitetanti”.)

**Satanashi** (*Satanás, Satán*). Irootaque  
ivajiro imajirontajiacaca ampatsi-  
nipae. Ipajitaca aisa Veeresevo  
(*Beelzebú*). (Mt. 10.25; 12.24-28)  
Iriguenti catsimatashitacarica  
Aapani Irioshi aisa maasano  
tsaroventajatiacsica. Ora ivajiro  
iroguenti oncataque  
catsimatantashitatsica, iroguenti  
aisa tsojeventantatsica. (Mr. 1.13;  
4.15; Irc. 22.3; Ya. 26.18; Irm.  
16.20; 1 Co. 5.1-5; 2 Co. 2.11; 4.4;  
Ep. 2.2; 2 Ts. 2.9; Yonig. 12.9;  
20.1-10)

**Savicaventirica iticajaguetiri imeshi-  
napae** (*curtidor de cueros*).  
Iriguenti caquinte ticajaguetirica  
itaroquipae aisa imeshinapae  
cachojaariqui aatoniji ipatsají.  
Coajica yoroaqueri yaaqueri  
itotaqueri ipeacaaca chompimashi,  
caviguitrentsi, otsipapae.  
(Ya. 9.43)

**Seoshi** (*Zeus*). Iroguenti ivajiro  
irioshivijire guiriegojia caavijica  
yanaamajaqueri itsipajia  
irioshivijirejia. Irirajia Iromaqutica  
iroguenti icantajiguiri Jopitere  
(*Júpiter*). (Ya. 14.12-13; pamenero  
aisa “Eremeshi”.)

**Sesa** (*César*). (Pamenero “Iromaquti-  
ca”).

**Sevara** (*cebada*). Iroguenti panqui-  
rentsi, oquejetacaro tirigo.  
(Jn. 6.9; Yonig. 6.6)

**Sotomorontsi, osotomoro quinteni-  
nintsi** (*la puerta de la ciudad*).  
Coramani ocapiocaguetagueti  
oshequi tsovironaquipae  
itantotsaetacojitacaro aatoniji  
icoraquetashijiguiri catsimajiaque-  
rica inquijashijiaqueri interoncrajia-  
queri. Cotanquitsi ochoocaque  
osotomoro iquijantapinijitaroca, aisa isotoantapinijitaroca. Opitseca-  
najigueti yashijitanaquero aatoniji  
iquijajiti, aisa aatoniji isotoajiti.  
Irirajia imajirojiate joriojia  
yamejiga isavicapinijigui ontaniqui  
osotomoroqui  
iquenquetsavacaajiacagueti aisa  
iquemisantajiaquerigueti coraquetashijiaquerica incantajiaqueri taaca  
opajitapae. Ichocaquegueti  
Jesoshi, irirajia joriojia tee  
inquejetacaajajemparojo.  
(Jos. 2.5; Jn. 5.2; Ya. 9.24;  
Ev. 13.12; Yonig. 21.12, 25)

**Shinagoga** (*sinagoga*). Oratica icantaji-  
tica shinagoga iroguenti icapiocan-  
tajiacar joriojia yapatsajavantanta-  
roca Iguenquetsatsare Aapani  
Irioshi aisa yamanantapinitarica.  
Querocaguetti iguinentiguetaquetu  
joriojia incarajiaquegueti 10  
shirampari quenquevaritatsica  
iragavejaque impeacaaquemparo  
shinagoga. Incoguiitempariquea  
aparo jivaquerineca.

Yamejiaja joriojia  
iquijapinitaque maasano savinca-  
guiteriqui imagorejantajitaca  
iramanaqueriniji Aapani Irioshi aisa  
inquemisantajiaqueri Iguenquetsa-  
tsare. Irira Jesoquirishito icocani  
itsatacaantiguetu iriatimpa aisa  
oconoaca iquijapinitaque shinago-

gaqui. Ari iquejetaca Paavoro.  
(Irc. 4.14-21; Ya. 17.1-2)

**Shione** (*Sión*). Iroguenti otsempi Jerosarequi icantajitica aisa Moria (2 Crn. 3.1). Coramani iroaqueragueti iriguenti guinentenijavetanquitsica ontaniqui pajitatsica jevoseojia. Iriatimpajia iroguenti ipeacaajiaca itantataetacojia aatoniji yagavejajiguiri ashimirintajiacarica, cotanquitsi yagavejajiaqueri majironatsappica Taavini, yaapitsajiaqueri ichocatantajiacaca. (2 Sam. 5.6-7)

Irootaquetari opajitantacaca coajica “Ocapiocaguecaguetti tsovironaquipae irashi ‘Taavi’” (*la ciudad de David*). Iriatimpia ipeacaacaro anaantamajatanquitsica Ishiraeriqui, *capital de Israel*. Tequerataguetti onchoocateji teemporo Jerosarequi irira majironatsappica Taavi yoquiero irinchacotanaquite Aapani Irioshi ontaniqui Shionequi. (1 Maj. 8.1)

Oconoaca ocantaquegueti Iguenquetsatsare Aapani Irioshi “Shione” iroguenti ocantacotaque maasano Jerosare. (Jn. 12.12-15; Irm. 9.32-33; 11.26)

Aisa oconoaca iroguenti ocantacotaquero ichocatantacaca Aapani Irioshi jenoqui inquitequi coraque-tanquitsineca coajicani onchoocatantaquemparo iroaque-rari quepatsi. (Ev. 12.22; Yonig. 14.1; pamenero “Jerosare”).

**Taverenacoro** (*el Tabernáculo, la tienda del encuentro con Dios*). Iroguenti quitsaarentsivanco icantajerica Aapani Irioshi Moishishini irantacaantaqueneri ichocajiaquegueti ishiraerijia ontaniqui oquita-mampororoitapojigueti. (Eeq.

25.8—27.21; Ev. 8.2, 5; 9.1-28; Yonig. 15.5; 21.3. Pamenero ovaantorite Taverenacoro otsapaqui Ev. 8.2.)

**Teeca intotsaiquijiteriji** (*los no circuncidados*). Coramani itioncaco-jitaquerogueti Iguenquetsatsare Aapani Irioshi irirajia joriojia icantajiaqueri maasano teeca iriojia joriojia “teeca intotsaiquijiteriji”, iriguentitari icantajiaque Aapani Irioshi iroaqueragueti intotsaiquijiqueru joriojia. Cotanquitsi imaica itotsaiquijitaqueri aisa oshequini teeca iriojia joriojia iriaqueraca voananquitsi. (Irm. 2.26; 4.11-12; pamenero “Totsai-quimashitagensi, itotsaiquijiquero ichonquimashi” aisa “Teeeca iriojia joriojia”.)

**Teeca iriojia joriojia, teeca irijorijoi-gueji** (*los gentiles, paganos*). Iriguentijia maasanomajaca caquin-tejia teeca iriojia ichoviquijiana-queca irijanijiate Jacovoni icantajita aisa Ishiraeri. Iroaqueragueti coramani iquemisantajiaquerigueti Averaameni Aapani Irioshi, iriatimpia icanqueri irooqua onquenantaquempaca incavintsaja-majajaqueri maasano quepatsiquatica. (Jen. 12.3) Coajicani ininta-caajiaqueri ichoviquijianaqueca irashintamajajiaquempari cameetsaniji irojocajiaqueneriniji Iguenquetsatsare, aisa intigarankui-mojiaqueri tsavetantajiasica tsatacaajiaquerineca maasano inintaqueca iriatimpia cameetsaniji inquemisantamajajiaqueri inchoo-cajiaqueniji cameetsa. Aisa inintacaajiaqueri cameetsaniji oncoramanitapojaquegueti intigarancaquerigueti irijanite irivoaquegueti acaniqui quepatsiqui, irirajia

ishiraerijia inchoviquijianaqueri.  
(Irm. 3.1-2; 9.4-5; Ga. 4.4)

Icantimentajiaqueri aatoniji yaajiguiro manquigarentsijia teeca iro ishiraerijia, aisa aatoniji iconoajigari teeca iriojia ishiraerijia aatoniji ipajencajiguiro icovaeguishejiacagueti. (Ireo. 7.1-4) (Ocoramanitapofigueti irirajia ishiraerijia iriojijatari icantajitica aisa joriojia.) Irootari icomitantajiacaroca coajica joriojia ijivetaca apatiroti iriatimpajia incavintsaajiaque Aapani Irioshi iraajjavajeri aatoniji ipega, irirajia teeca iriojia igonorojia iroguenti incatsimatashijiaquempari. Cotanquitsi coajica icoraquetaquitigueti Jesoquirishito acaniqui quepatsiqui, irirajia joriojia tee inquemisantajiguerriji. Ari oquejetaca coajica yoajianaquegueti itigarancanejia incamantajiaqueri igonorojia irira Jesoquirishito iriguenti itigarancaqueca Aapani Irioshi iraajjavajeriniji aatoniji ipega, teequea inquemisantajiguerriji iriatimpajia aisa, irootaquequea Aapani Irioshi icantantajiacarica itigarancanejia Quirishito impitso-cashijianaquempari teeca iriojia joriojia inquenquetsatimojiaqueri iriatimpajia. Iriomaja Paavoro inintacaaque intigarancaqueri inquenquetsatimojiaqueri teeca iriojia joriojia incamantajiaqueri irira Aapani Irioshi inejajiaqueri maasano ari iquejetavacaajiaca, tee incantashitatiguempaji, irioca joriojia iriguenticia teeca iriojia joriojia. (Irm. 1.5, 16; 3.21-22; 10.11-12; 11.11-16; pamenero “Jorio, Joriojia”.)

**Teemporo** (*el Templo*). Oratica teemporo iroguenti inirojegui

mapipanco choocavetatsica Jerosarequi coramani. (Pamenero ovaantorite otsapaqui Mt. 21.23.) Irira joriojia iroguenti itaantapinitantaria viratsipae intsaroventantajita-quemparica Aapani Irioshi. Manaquea ochoocaguetaque onicorepae. Nicomajatanquitsica iroguenti inchoocatantempaca teeca irijorijoigueji. Otsipa onchoocatantempaca manquigarentsijia. Otsipa onicore iroguenti intsompoguipojatsica ochoocaguegueti aretare itaantajitarica viratsipae aisa ochoocamajaquegueti mapipanco. Aato iquijajigui caquinteja, irioquea quijananquitsine saserorote incoguiaqueca taaqueroneca casancavaneri aretarequi intsompoguiquitica. Inquijapinique osavincaguitetamanaquegueti aisa intsaparoncaguitetanaquegueti intaapiniqueneri Aapani Irioshi. Oraniquiquea ojocajamorenataca quitsaarentsimorena aatonijite yavishirotsi saseroroteja. Aapojaquempagueti aparo savinca-guiteri ajagantsinipaequi inquijanaque saserorote anaantamajantanquitsica intsompoguimajacaqui iramancoventajiaqueri tsarovenstantajigarica Aapani Irioshi.

Ocaraveca 3 teemporo Jerosarequi. Iroquetica ipeacaavecaca Saromonini, ipariancaro arica 964 ajagantsini tequeratagueti irivogueji Jesoshi. Ocameetsavaque ocanca. Isoveaquero Vavironniaquitica 586 ajagantsini tequera>tagueti irivogueji Jesoshi. Anaavaetanacaguetti 48 ajagantsini majirontatsica Shiro quenampoja-roca Perishia yanaantapoji. Itigaranquitsariquea jorio icantaji-

tica Sorovaveri impeacaajemparo. Ipeacaantavetajaroquea, teemajaca oncameetsateji.

Ocoramanivaepojacagueti, 20 ajagantsini tequeratagueti irivogueji Jesoshi, irira majirontatsica Erorishi iparianajaro ipeacaajaro otsipa cameetsamajatasica. Irooquea choocatajatsica ivoaquegueti Jesoshi.

Ocanquegueti paperi yoanaque Jesoshi teemporoqui, iroguenti ichoocatantapojaca onicorequi, tee inquijeroji mapipanco.

**Tenario (denario).** Iriguenti imentaqui irashi Iromaqutica. Ari ochoocatantacari ivaantorite majirontatsica Sesa. Ichocatigueti Jesoshi ocaniqui quepatsiqui, irirajia catsiquejiatsica amitacojia querica itsipa apajencaro savinacuiteri ivegarajitaqueri apamenta quiro tenario. (Pamenero ivaantorite tenario Mateoqui 22.18-22.)

**Tigueroaventagantsi,**  
**itigueroaventanacari** (*arrodillarse delante de, postrarse delante de*). (Pamenero “Ogueroventagantsi, yogueroventacari”.)

**Tiveriashi (Mar de Tiberias).** 1. Iroguenti otsipa ovajiro iniromotija Garirea. (Jn. 6.1; 21.1; pamenero “Garirea”).

2. Aisa iroguenti ovajiro quintenintsi icapiocajigagueti oshequin caquinte otsapijaqui iniromotija Garirea. (Jn. 6.23; **Totsaiquimashitagantsi, itotsaiquijiquero ichonquimashi** (*circuncisión, ser circundado*)). Coramani iriraquea Aapani Irioshi icantaqueri Averaame intotsaiquimashitacaanqueroquea ichonquimeshina, iriatimpa aisa maasano shiramparijia choocatimo-

jiaquerica. Icanqueri aisa inquem-pejaquempari maasano inchoviquijianaqueca intotsaiquimashitacaanquero ichonquimeshina irijanijiate cameetsanijite intsajiquero iriguenti ashintari Aapani Irioshi, aisa intsajitaqueri irinetsanataquero Aapani Irioshi maasano icantaquerica Averaame iroaqueragueti. (Jen. 17.9-14)

**Arigueti**  
 intotsaiquimashitacaantajiquempa imparianaquemparo ocaratapoji-gueti otyogueviquiqui iraitsitemparoquea irisagorejitsitemparo, manaquea ocanque impeantanaquempa jorio inquejetantanaquemparica ichovijianaqueca Averaameni.

Ocoramanitapofigueti itionccaquerigueti Aapani Irioshi Moishishi maasano inintaguetica irinetsanajitaque, icantaqueri intotsaiquimashitacaantajiaquerico ichonquimeshinapae maasano irijanijiate ishiraerijia. (Irev. 12.1-3)

Ocoramanitapofigueti icoraquetaquitigueti Jesoquirishito imetojaventajiaquerigueti maasano joriojia iriguentijia aisa teeca iriojia joriojia, jeroquea teequea incantaje Aapani Irioshi irinetsanajitero itioncacotanaqueca Moishishi aatoniji icatsimatimentiri caquinte iguempevaere, iroguenti icantaque iraajavajeri maasano aventajiaquemparineca Quirishito. Cotanquitsi iroaqueragueti iquemisantajiaquegueti teeca irio joriojia, iconoagarantajiaca joriojia icantajiaqueri, “Aato apatiroti piquemisantiri Quirishito, iroguenti aisa pintotsaiquimashitacaantajia-

quempa cameetsaniji iraajiavajempi Aapani Irioshi.” (Ya. 15.1) Irootaquetari itioncantajiacanarica Paavoro Garashiaquitica aisa itsipajia tsaroventajatiatsica, icantajiaqueri aatoniji iquemisantimatiro quejecaroca oca. (Ga. 3.1—5.15)

**Tsatacantajiguiroca itioncacotanaqueca Moishishini** (*maestros de la ley, escribas*). Iriguenti savicaventajiguiroca itioncacotanaqueca Moishishini cameetsanijite intsamajajiguero, cotanquitsiquea itsatacantajiaquerogueti oconoaca mana yogaashijiacaro, icantajiaquetari irinetsanajitero taaca opajitapae otsipapae teeca irio cantatsine Aapani Irioshi irinetsanajitero manatari yogaashicaro iriatimpajia. Aisa iriojia tionaçajajiro maasano itioncacaantaqueca Aapani Irioshi yoshequiaquero cameetsaniji oshequianaqueni, iroguenti aisa aatoniji opega. *Escriba* oncanque tioncavaetatsica.

Iconoagarantajiacaca tsatacantajiguiroca itioncacotanaqueca Moishishini iriguentijia aisa pariseojia, aisa iconoagarantajiacaca iriguentijia imajirojate joriojia tsipajiacarica igonororjia imajirotepae icapiocapinniacagueti. (Mr. 14.53-55; pamenero “Imajirotepae joriojia”.)

Itsatacantaquegueti Jesoquirishito oconoaca irirajia tsatacantajiguiroca itioncacotanaqueca Moishishini itsipajiacari pariseojia aisa imajirojate saserorotejia yasereavaetaqueri, teenica inquemisanteriji (Irc. 7.30; Mr. 3.22; Irc. 6.6-11; pamenero “Itioncacotanaqueca Moishishini”.)

**Tsavetantatsica, tsavetantiroca icantajeria Aapani Irioshi**

(*profeta*). Acaniqui paperiqui oguipitsocacagueti itioncajiaqueca coramaní, ocanquegueti “tsavetantatsica” iriguenti caquinte iquenquetsatacaqueca Aapani Irioshi cameetsanijite irogavisaqueneri igonoro icanquera, incamantaguetaqueriqueate. Iconoagarantajiacaca itioncaquero icanqueca Aapani Irioshi.

Coramaniquea tequeratagueti irajaivetempariji ishiraerija osamani Ashiriaqui aisa Vavironiaqui ichoocajiaque oshequi tsavetantajatiatsica camantajiaquerica maasano icantajeria Aapani Irioshi. Oconoaca icamantacojiaquero netsanaguetananquitsineca coajica aato inejajiajiro iriatimpajia. (Ev. 1.1; 1 Pe. 1.10-12) Chooca aparo pajitatsica Samoiri, itsipa ipajita Isaiashi, itsipa iriguenti Jeremiashi, cotanquitsi irirajia igonororjia tee inquemisantajigue-riji. (Jer. 26; 29; 32) Oconoaca imetojajiaqueri. (1 Maj. 19.10; 2 Maj. 17.13-23; 24.2; Mt. 23.29-37; 1 Ts. 2.15)

Ari oquejeta aisa yaajitanaqueri- gueti ontaniqui Ashiriaqui aisa Vavironiaqui ichoocajiaji aisa tsavetantajatiatsica. Aparo ipajita Esequieri, itsipa iriguenti Iranieri. Irirajia tsavetantajatiatsica icantajiaqueri igonororjia inintaque Aapani Irioshi irampaquijanajero maasano ipeacaagushejiacaca inquemisantajiaqueri irinetsanajiguero icantajuerica ariniji incavintsajamajajiaqueriniji, aisa icamantajiaqueri inchoocaque coajicani inchoviquitanaqueca Taavini aaajiavajerineca aatoniji ipega. Irira tsavetantatsica

pajitatsica Maraquiashi iriotari  
impojivaetananquitsica, tee inchoo-  
cateji itsipa irosati  
avisavaetanaquegueti 400 ajagan-  
tsini ivoaquegueti Joanca Viñacaja-  
tantatsica (Mt. 11.13-14), aisa tee  
intioncacojitajero otsipa Iguenque-  
tsatsare Aapani Irioshi irosati  
ichoocajiaquegueti itsatacaanejia  
Jesocuirishito.

Ariquea ivoaquegueti Jesoshi  
iroguenti onetsanaguetanaca  
icantajiaqueca tsavetantajiatsica  
coramaniquitica  
icamantacojiaquerigueti icantaji-  
aque coajicani inchoocaque  
inchoviquitanaqueca Taavini  
peanquitsineca Imajirote joriojia.  
(Mt. 1.22-23; 2.16-18; 11.13-14;  
Ya. 2.29-30; 3.24-25) Cotanquitsi  
icomijiacari oshequi igonorojia  
icantajiaque iriguenti itsipa  
tsavetantatsica. (Mt. 16.13-14;  
21.46)

Ariquea yoshequianaquegueti  
tsaroven tajiatsica iconoagaranta-  
jiaca ipeacaajiacari Aapani Irioshi  
tsavetantajiatsica cameetsaniji  
intsavetacotantajiaqueriniji Jesoshi  
aisa incamantajiaqueri irapiguem-  
santarijiateni maasano icantajiaque-  
rica Aapani Irioshi. (Ya. 13.1;  
1 Co. 12.10; Ep. 4.11) Cotanquitsi  
ichoocajianaque aisa oshequini  
tsavetantajiatsica amataajaiatsica  
gaajiguiroca Iguenquetsatsare  
Aapani Irioshi, irootaquetari irira  
Paavoro aisa Peerero icantantajia-  
carica quemisantajiatsica aato  
iquemisantimajiguiri aatoniji  
yamatavijajiguiri. (Irm. 16.17;  
1 Co. 15.33; Ep. 5.6; 2 Pe. 2.1)

**Vavironia** (*Babilonia*). Iroguenti  
quepatsi yaajitanaquerigueti  
ishiraerijia coramani

icatsimatimentajiaquerigueti  
Aapani Irioshi  
iquempevaejacaguetai. (2 Maj.  
24.1-15; 25.1-7; Jer. 32.1-28; Iran.  
1—2; Yonig. 14.8; 16.19; 17.5;  
pamenero “Carereojia” aisa mapa  
“Quinteninintispae  
Paesatoniquitica”.)

**Veeresevo** (*Beelzebú*). Iriguenti  
imajirojiate ampatsinipae  
pajitatsica aisa Satanashi. (Mt.  
10.25; 12.24-28; pamenero aisa  
“Satanashi”.)

**Vieseta** (*fiesta*). (Pamenero  
“Iviesetatepae joriojia”.)

**Vieseta ishecajitarogueti pan teeca**  
**onconoguemparo anempoacagu-  
roca** (*la fiesta del pan sin  
levadura*). (Pamenero  
“Iviesetatepae joriojia”.)

**Vieseta ishineventajiacaca joriojia**  
**ipeacaantajigaroca tsovironaqui-  
janquipae** (*fiesta de las enramadas  
o de los tabernáculos o cabañas*).  
(Pamenero “Iviesetatepae joriojia”.)

**Vinoja** (*vino*). Iroguenti oja ova (*uva*)  
ocachotanaquegueti. (Mt. 9.17) Iro  
imirajiga ishiraerijia  
itsipatacantajiacaro isheca. (Jen.  
27.25) Aisa iro imirajiga  
iviesetatepaequi.  
Onteroncanauempagueti vinoja  
viesetaqui  
impashiventamajaquempa  
cajemantanquitsica. (Jn. 2.1-10)  
Coramani inintajiaquegueti ichovi-  
quijianaqueca ishiraerijia incavin-  
tsajamajajiaqueri Aapani Irioshi  
irijanijiate iriguentica itsipa  
iroguento yamejiga yamanacoventa-  
jiaqueri yamanaqueri Aapani  
Irioshi intejaqueneri incani camee-  
tsaniji ontsoroamajatanaqueniji  
ivanquirepae

onchoocamajatanaqueniji tirigoqui  
aisa vinoja. (Jen. 27.27-28)

Irirajia joriojia coramanitica  
yaavintantajiacaro, aisa oconoaca  
iconoantajiacaro ashiti  
ishaguitantajiacarogueti taaca  
opajitapae inintajiaqueca  
irashintacaajiaquempari Aapani  
Irioshi. Aisa iro imirajiaca tsaroven-  
tajjatsica iquenquejajiaquerogueti  
imetojaventajiacajigueti Jesoshi  
osotojatanaque iriraja. (Irc. 10.34;  
1 Ti. 5.23; Mt. 26.27; 1 Co. 10.16.)


**Voronquise** (bronze). Iriguenti cavorejata-  
tsica quiteriqueteriiro caarica yoguetatsi.

(Eeq. 25.1-7; Nm. 21.4-9; 2 Maj. 25.13;  
Yonig. 1.15; 2.18; 9.20; 18.12)


**Yojocantajitirogueti ajaararon-**  
**tsipae** (*mercado*). Iroguenti  
ocapiocaguetai ajaararontsipae  
aisa taaca opajitapae  
ishecajiguecaca cameetsanijite  
irivegarapinijiqueronijite.

(Mr. 7.4; Ya. 17.17)


**Yave** (*Yavé, Jehová*). Iguenquetsatsa-  
requi evereojia iriraqueate Aapani  
Irioshi ipajita *YHWH* (Yahweh).  
Ancanquequea *Yave*. Yoguipitsoca-  
jitaquerogueti quimajareritsaqui  
iconoagarantaca icanqueriquea



PRIMER VIAJE MISIONERO DE PABLO




SEGUNDO VIAJE MISIONERO DE PABLO




TERCER VIAJE MISIONERO DE PABLO




VIAJE DE PABLO A ROMA



# El Templo en el tiempo de Jesucristo




Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines

Tierra de  
PALESTINA  
en el tiempo de  
NUESTRO SEÑOR  
JESUCRISTO





Mapa para el estudio de  
LOS HECHOS Y LAS EPISTOLAS

1. El primer viaje misionero de Pablo.
2. El segundo viaje misionero de Pablo.
3. El tercer viaje misionero de Pablo.
4. El viaje de Pablo a Roma.